


Yak'usda bughunek:
k'andit khunek neba
lhaidinla



New Testament in Carrier, Southern (CA:caf:Carrier,
Southern)

**Yak'usda bughunek: k'andit khunek neba lhaidinla
New Testament in Carrier, Southern (CA:caf:Carrier, Southern)**

copyright © 2002 Wycliffe Bible Translators, Inc.

Language: Carrier, Southern

Translation by: Wycliffe Bible Translators, Inc.

Carrier, Southern [caf], Canada

Copyright Information

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

 You must give Attribution to the work.

 You do not sell this work for a profit.

 You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Carrier, Southern

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not sell this work for a profit.

 You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files dated 29 Jan 2022
f3f87939-bb58-59c1-9788-d872c7ab79b0

Contents

Matthew	1
Mark	55
Luke	85
John	141
Whel'a 'En Hubube 'Ut'en K'ah	179
Rome Whut'en	228
1 Corinth Whut'en	253
2 Corinth Whut'en	276
Galatia Whut'en	291
Ephesus Whut'en	300
Philippi Whut'en	308
Colossia Whut'en	314
1 Thessalonica Whut'en	320
2 Thessalonica Whut'en	325
1 Timothy	328
2 Timothy	335
Titus	340
Philemon	343
Hebrew Khunek K'uyahalhtuk	345
James	366
1 Peter	373
2 Peter	380
1 John	385
2 John	391
3 John	392
Jude	393
Revelation	395

Yak'usda Bughunek Unzoo, 'I Matthew Yuk'uné'uzguz

Sizi Gri ndunnah hube dínzut

¹ Ndi dustl'us 'uk'e'eduguz 'et ndutni, 'i be Sizi Gri 'en hube dínzut 'en 'uhínt'ah, 'i Sizi 'en David yuts'uh hainzut 'int'ah. David 'en Abraham yuts'uh hainzut 'int'ah. ² Abraham 'en Isaac bu'abá 'int'ah. Isaac 'en Jacob bu'abá 'int'ah.

Jacob 'en Judah 'ink'ez bulhutsinkah bu'abá 'int'ah.

³ Judah 'en ndun ts'eke Tamar 'en be Perez 'ink'ez Zerah bu'abá 'int'ah.

Perez 'en Hezron bu'abá,

'ink'ez Hezron 'en Ram bu'abá 'int'ah.

⁴ Ram 'en Amminadab bu'abá.

Amminadab 'en Nashon bu'abá,

'ink'ez Nashon 'en Salmon bu'abá 'int'ah.

⁵ Salmon bu'at Rahab 'en be Boaz bu'abá.

Boaz 'en Ruth 'en be Obed bu'abá.

'Ink'ez Obed 'en Jesse bu'abá 'int'ah.

⁶ Jesse hubudayi cho David bu'abá.

'Et hubudayi cho David, ndun Uriah bu'at inle, 'en be Solomon bu'abá 'int'ah.

⁷ Solomon 'en Rehoboam bu'abá.

Rehoboam 'en Abijah bu'abá,

'ink'ez Abijah 'en Asa bu'abá 'int'ah.

⁸ Asa 'en Jehoshaphat bu'abá.

Jehoshaphat 'en Joram bu'abá,

'ink'ez Joram 'en Uzziah bu'abá 'int'ah.

⁹ Uzziah 'en Jotham bu'abá.

Jotham 'en Ahaz bu'abá,

'ink'ez Ahaz 'en Hezekiah bu'abá 'int'ah.

¹⁰ Hezekiah 'en Manasseh bu'abá.

Manasseh 'en Amon bu'abá,

'ink'ez Amon 'en Josiah bu'abá 'int'ah.

¹¹ Hoh da wheghah whudezulh, ts'iyyannah dune keyah whuti Babylon ts'ih wheobuhanla, 'et Josiah 'en Jeconiah 'ink'ez bulhutsinkah 'en bu'abá 'int'ah.

¹² Keyah whuti Babylon whuz whebuhanla hukw'elh'az 'et Jeconiah 'en Shealtiel bu'abá 'int'ah.

Shealtiel 'en Zurubbabel bu'abá 'int'ah.

¹³ Zerubbabel 'en Abiud bu'abá.

Abiud 'en Eliakim bu'abá,

'ink'ez Eliakim 'en Azor bu'abá 'int'ah.

¹⁴ Azor 'en Zadok bu'abá.

Zadok 'en Achim bu'abá,

'ink'ez Achim 'en Eliud bu'abá 'int'ah.

¹⁵ Eliud 'en Eleazar bu'abá.

Eleazar 'en Matthan bu'abá,

'ink'ez Matthan 'en Jacob bu'abá 'int'ah.

¹⁶ Jacob 'en Joseph bu'abá 'int'ah. 'En Mary buki 'ink'ez Mary 'en be Sizi whuzdli. 'En Christ hiyulhni.

¹⁷ 'Et Abraham 'en David whuts'un, 'en ts'iyyawh lanezi 'o 'at dit (14) bubé hudinde 'uhint'ah. 'Ink'ez David hoh da whudezulh hoh ts'iyyannah keyah whut'en Babylon ts'ih whebuhanla whuts'un, 'en ts'iyyawh lanezi 'o 'at dit

(14) bubé hudinde hinli. 'Ink'ez hoh da whudezulh hoh ts'iyannah keyah Babylon ts'ih whebuhanla 'et hukw'elh'uz dich'oh bukeyah yun k'ut Judah, whuz whenáheded, Christ 'et whuts'un, 'en ts'iyawh lanezi 'o 'at dit (14) bubé hudinde hinli ho' hint'ah.

Sizi Gri whuzdli

¹⁸ Aw 'et Sizi Gri whuzdli, ndez na'a 'uhooja. 'Ama Mary 'en Joseph 'en yughu tedalh ka lhahódinla, 'ink'ez yughu tedalh whutsuh hoh 'et nahoo'ai 'uda 'uski bulh 'int'ah. Ndoni, 'i be 'uja. ¹⁹ 'Et ndun Joseph 'en ts'ah'un dune unli, 'et huwa lhgho hutedukelh ts'iyannah tah yooya yoolhtselh whuch'a bubení lhaidinla. 'Ink'ez whu'iz yuch'a natedalh hukwa' ninzun. ²⁰ 'Et howu nuni nuzut hoh 'et huwu nusúti hoh neMoodihti bulizas 'en 'uyulhni, "Joseph nyun David buts'u hainzut inli ho' 'int'ah. Wheniljut ilah Mary n'at wule. Ndun 'uski Ndoni be chainya ho' 'int'ah. ²¹ Aw 'et 'en duneyaz tele. Nyunch'oh boozí bugha ídon'alh. Sizi dóni. 'En 'utenilh ts'iyannah lubeshi ch'a hubutelhyih." ²² 'Et ndez na'a 'uhooja, neMoodihti ndun nus whunilh'en, 'en be daja ni, 'et nduhoolcho hoh túne' whust'en. 'Et ndun nus whunilh'en ndez na'a njan ndutni, ²³ "Soo zulhts'ai ndun ts'eke 'aw dune t'enizun 'et whunts'ih khunyaz 'uski ba 'uja, 'ink'ez buyaz dune tele, boozí Emmanuel hiduténih, Yak'usda nelh 'int'ah, ni ho' utni."

²⁴ 'Et Joseph ts'enanzut hoh neMoodihti bulizas daja yulhni, hoh tune' 'ust'en 'ink'ez 'aw 'et Mary yilhchoot bu'at tele ka. ²⁵ 'Udechoo buyaz whutele t'eoananzin 'et whuts'un 'aw yut'áchaghesnak. 'Aw 'et buye' whuzdli, 'et k'an zeh soo yughusda. 'Et boozí yugha íden'ai Sizi yulhni.

2

Dune whunih, Maji hubuhútni, 'en 'et Jerusalem ts'ih hunindel

¹ Aw 'et yun k'ut Judea, keyah Bethlehem whuz'ai, 'et Sizi whuzdli. Hoh da whuz na'a Herod hubudayi cho unli hoh 'et 'uhooja. 'Aw 'et whuzdli hukw'elh'az khunyaz nda whut'en keyah Jerusalem ts'ih hunindel. 'En whunih Maji hubuhútni, 'en 'uhint'ah. ² 'Ink'ez dune hoodulhkut, "Lizwif hubudayi cho k'an whuzdli, 'en nts'e whuzdli? 'Et ndi sum cho ts'a'en, 'i bugha lhuts'úzdel. 'Et huwa ndaz de ndun 'uski 'en buts'un teni' ts'untelhdzilh ka whusats'ándel." ³ 'Et whunts'ih hubudayi cho Herod whulh 'udúzts'ai hoh buba dzuh 'uhutni. Jerusalem whut'en, 'en chah whuz na'a zeh huba dzuh 'uhutni. ⁴ 'Ink'ez ts'iyannah ba náwhulnuk hubumoodih 'ink'ez Moses be' dustl'us 'uk'ununa'úsduguz chah, 'en ts'iyawh Herod 'aníh hubudani. 'Et 'en hubuts'un nahooté'alh Christ ndet whutele. ⁵ 'Ink'ez 'uhiyulhni, "Yun k'ut Judea, keyah Bethlehem whuz'ai, 'et whutele. Nus whunilh'en 'et 'uk'e'edúguz, 'et ndutni,

⁶ 'Yun k'ut Judea ts'ih keyah Bethlehem whut'en,
'et nuhkeyah hoontsolyaz hoonli,
'et whunts'ih tube whudezti tele.

Nuhkeyah 'et whuts'un 'ilhunuh moodih ncha, 'en whusateyalh. 'Ink'ez sudune,

Israel hits'uh hainde,
'en sheep għunli k'una'a bugħu tele.' "

⁷ 'Et Herod whu'iz hoh dune whunih 'en 'anīh hubudáni. 'En hubuts'un naoote'alh ka ndet dzin nts'oh whudezulh ndi sum be hóoduteltsilh. ⁸ 'Et hukw'elh'az keyah Bethlehem ts'ih whebalh'a 'ink'ez ndo búlhni, "Ahdulh 'ink'ez soo cho hoh 'uski naoollteh. 'Et nawħħai t'eh, nts'e 'int'ah 'et sts'ótl'a khunek wah'ah. Si chah whuz tesyalh buts'un teni' ntelhzilh ka." ⁹ 'Et hubudayi cho ndo búlhni hoh wheħändel. Hedulh hoh khunyaz ndi sum ndaz de

ts'un hitelh'en 'ink'ez hubutsuh 'ults'ulh. 'Et nts'e 'uski usda 'et bugha nduk, 'et lhghá dilts'ut. ¹⁰ 'Et ndet sum hinalh'en da tube huhóont'i. ¹¹ 'Et 'ink'ez koo dahuníndel hoh 'uski hitelh'en, 'ama Mary 'en bulh. Hibut nachánelya 'ink'ez hits'un teni' nalhdzin. Huye 'úzdla, 'i hidah lhch'az hiyílhchoot hoh 'i hiyé ha'anla 'ink'ez hits'u hítelhdel. Gold, yoo sooltsun, 'i frankencense hiyulhni, 'ink'ez yoo Myrrh hiyulhni chah, 'i ts'iyawh hits'u hítelhdel. ¹² 'Ink'ez Yak'usda bubul be bugha dáni, 'aw Herod buk'unaoohdelh gunih hubudáni. 'Et huwa 'uts'un ts'un hubukeyah ts'ih whenáhded.

Joseph, Mary teh, 'ink'ez Sizi bulh yun k'ut Egypt ts'uwíhútni, whuz whehándel.

¹³ 'Aw 'et whenáhdedel hukw'elh'az neMoodihti bulizas Joseph nute hoh beghah hódiltsai. 'Et ndi yúlhni, "Didinyaiah, ndun 'uski 'ama bulh hubilhchoot 'ink'ez yun k'ut Egypt 'a ts'ih whuz hubalhtelh! 'Et nuwhhudutésnilh 'et whuts'un 'et doolhúts'i! 'Et 'áho Herod 'uski yuka it'é'ilh yutuzelhghelh ka!" ¹⁴ 'Et 'ulh'ek dinadeja 'ink'ez 'uski 'ama bulh hubilhchoot 'ink'ez yun k'ut Egypt whuz whehandel. ¹⁵ 'Et Herod datetsah whuts'un 'et hudutélts'ilh. 'Et ndúhut'en hoh neMoodihti ndun nus whunilh'en, 'en be daja ni 'et ndoneltsuk tune' whust'en hoh njan ndutni, "Suye' 'anih dáni yun k'ut Egypt whuch'a naooja ka."

Hubudayi cho Herod nehughan 'en ndo búlhni, "Keyah Bethlehem ts'ih duneyaz nat naoodezulh be suli, 'en ts'iyawh hubooohghan."

¹⁶ 'Aw 'et Herod t'eoonzanin ndunnah whunih, Maji hiyulhni, nahina'a, 'et huwa tube hunilch'e. 'Et nts'oh huwa whezulh Maji hidáni hoh bulunah ne-hughan keyah Bethlehem ts'ih whebalh'a. 'Et ndo búlhni, 'et keyah whut'en ts'iyawh 'ink'ez whunat whut'en chah ndunnah duneyaz nat naoodezulh be suli 'ink'ez whuts'un whudelhdzulh chah, 'en ts'iyawh hubooohghan. ¹⁷ 'Et whuz na'a ndun nus whunilh'en Jeremiah hiyulhni, daja ni 'et ts'iyawh nduhóolhcho tune' whust'en hoh njan ndutni,

¹⁸ "Et keyah Ramah hódants'o hoh tso yahalhtuk

'ink'ez hubuzkeh k'ehúnentai.

Rachel buzkehyaz hubuk'etso yahalhtuk.

'Aw budzi nduk na'ootneh ghaít'ah,
bubuzkehkah hoolah huzdli 'et huwa."

Joseph, Mary, Sizi chah, keyah Nazareth huwhútni hudutélts'ilh

¹⁹ 'Aw 'et Herod dazsai hoh Egypt ts'ih neMoodihti bulizas Joseph huwunute hoh beghah níwhults'ut. ²⁰ 'Et ndi yulhni, "Didinyih! 'Uski bu'ama bulh naoobilchoot. Israel yun k'ut whuz nahdulh. 'Et whutsuh da ndunnah 'uski híkuneztai hituzelhghelh ka, 'en ts'iyawh yahadla." ²¹ 'Et dudinya. 'Uski bu'ama bulh nabílchoot 'ink'ez Israel yun k'ut ts'ih whenáhdedel. ²² 'Et whunts'ih Joseph whulh uduzts'ai Herod buye' Archelaus hiyulhni, 'en bu'abá k'edanya 'ink'ez k'an Judea yun k'ut hubudayi cho unli. 'Et whuz teyalh whénuljut hoh howu nusúti 'et Yak'usda yugha dáni. 'Et huwa Galilee yun k'ut ts'ih whuz whehándel. ²³ Whuz hunindel keyah Nazareth huwhútni, 'et hudutélts'ilh. 'Et whuz na'a nus whunilh'en daja hutni, hoh túne' whust'en njan nduhútni, "En Nazareth whut'en hiduténilh."

3

John dune too be 'ulh'en ts'iyannah ndo búlhni, "Ndun Yak'uz k'une' whul'en, 'aw 'et nilhdukw netah 'utet'ilh."

¹ 'Et whezulh hoh John dune too be 'ulh'en 'en Judea yun k'ut dune chahóot'ih ts'ih, whuz whinya 'ink'ez dune bulh yalhtuk. ² 'Et ndo búlhni, "Nuhwhulubeshi ch'a nuhwhubeni náhandunoohlelh. 'Aw 'et nilhdukw suli hoh ndun yak'uz k'une' whul'en, 'en nuhwhutah 'utet'ilh." ³ Ndun 'en nus whunilh'en Isaiah yughu yalhtuk hoh njan ndutni,
 "Dune chahóot'ih ts'ih dune yiz dusduts'ai soo 'ultus hahuyih hoh njan ndutni,
 'NeMoodihti buti lhaoodahleh!
 Buti soo lhts'odez'a buba whulhtsi.' "

⁴ 'Ink'ez John dich'oh khunai bugha, camel hiyulhni, 'i ye dune unli 'ink'ez 'ukulh se be sudelhú'oo. Tulk'us cho 'ink'ez honey, 'i ya'alh. ⁵ 'Et hoh da dune ts'iyawh ndunnah Jerusalem whut'en, Judea yun k'ut whut'en, 'ink'ez dune 'et took'oh Jordan whut'en, 'en ts'iyawh John highu nindel. ⁶ 'Ink'ez bulubeshi hubugha hunahuwhélnuk hoh 'et nyo 'et took'oh Jordan, John 'en too be' balh'en. ⁷ 'Et whunts'ih lhanah Pharisee 'ink'ez Sadducee chah, 'en too be' hutelnih ka highu nindel. 'Et hubunilh'en hoh ndo búlhni, "Nuhwheni poison tl'ughus buzkehkah lí'aht'ah! Ndán 'ún whulhni Yak'usda huntelch'oh whuch'a lhúwus? ⁸ Lubeshi ch'a nuhwheni nahandunihla t'eh, ndaht'en ts'iyannah t'ehonóozin ndaht'ah. ⁹ 'Ink'ez khun teh na'dudoohnti gunih, nuwheni Abraham buts'u hats'ánde 'uts'int'ah. Ts'ah'un na'a 'ún whudusni Yak'usda soo 'ultus ho' 'int'ah, tse be 'i whunts'ih Abraham buts'u hahánde hubutelhtsilh. ¹⁰ Nuhwheni duchun lí'aht'ah. 'Aw 'et tsetsilh lhadínt'ah. Duchun bumai hoolah, bugih tubulh tsuhídantsel 'ink'ez hidutélk'un. ¹¹ Nuhwheni nahunduníhla 'et huwa too zai be too be' nuhwhússla. 'Et whunts'ih sk'elh'az ndun whusatéyalh, 'en sughanus dezti ho' 'int'ah. 'Aw bukegwun buba nutésdle huba soo cha'lhúdzooth. Ndun Ndoni 'ink'ez kwun bulh 'i be too be' nuhwhutelh'ilh. ¹² Be tl'onuldzeh 'i tl'o mai be tahawhúlhts'ih, 'i niyútun. 'Ink'ez ndi tl'o mai yutahawhúlhts'ih, 'i 'ink'ez yuk'ut 'ut'en, 'i chah yuk'ut lhadút'ih t'eh, 'ink'ez yuna'ulhdoh. 'Ink'ez ndi mai ndai lhaduja, 'i deínudzih 'ink'ez mai koo ts'ih wheyúlih. Ndi kwun 'aw nachanusne, be but'ooz, duték'un," ndo búlhni.

John, Sizi too be 'uyínlá

¹³ 'Et Sizi Galilee yun k'ut ts'ih hainya. Jordan took'oh ninya John too be' yutelih ka. ¹⁴ 'Et whunts'ih John dah yúlhni. "Nyun too be' sonleh huba' hoont'ah. 'Ink'ez di ka si suts'ú tenya too be' nyoodle ka?" ¹⁵ 'Et whunts'ih Sizi ndi yúlhni, "Whute ndoh hot'e, be ts'ah'un 'uhoont'ah, 'i 'et ts'iyawh lhaoodutenih ho' hoont'ah." 'Aw 'et whute 'et ndúyinla. ¹⁶ Sizi too be' yinla hoh tooz hanája ibulh 'et 'ahoh yak'uz whuda'dutézkez 'ink'ez Yak'usda buyégha yunilh'en hoh ndus de dut'ai, 'i dove hiyúlhni, 'i k'una'a Sizi buk'édinde. ¹⁷ Khunyaz ndus de 'uwhutni, "Ndun 'en suYe' buk'esi' 'en 'int'ah, 'ink'ez tube 'en bulh hoonúst'i," ni.

4

Netsudule Sizi tink'us yunóolht'uk hukwa'yulh'en

¹ Sizi dune chahóot'ih ts'ih Ndoni Sizi whuz wheyálh'a netsudule yootélhdzih ka. ² Dit lanezi dzin (40) sahá'delya, 'et hukw'elh'az buye'élts'ul. ³ 'Et ndun yootélhdzih ka, 'en yughu ninya 'ink'ez ndi yúlhni, "Alha Yak'usda buYe' ninli t'eh, ndi tse lhes wule dini." ⁴ 'Et Sizi 'uyúlhni, "Yak'usda bughunek k'ut 'uk'une'úsduguz, "Aw lhes zeh ilah dune yugha khuna, 'et Yak'usda bughunek ts'iyawh, 'i be chah higha khuna.' " ⁵ 'Et netsudule keyah whudezti ts'ih yulh whin'az, 'ink'ez luglez whucho degha ndoh hukw'ut,

'et hukw'abah ninilhya. ⁶ 'Ink'ez ndi yúlhni, "Alha Yak'usda buYe' ninli t'eh, njan whegha' dudintneh! 'Alha 'uk'e'edúguz hoh njan ndutni, 'Yak'usda bulizas butl'aho'ai hoh 'en nyun nka huwuhinli, 'ink'ez hubula be nyoohóotetun, 'et 'aw nke tse t'aoonalh ghaít'ah.' "

⁷ 'Et Sizi nduyulhni, "Doo chah zeh njan 'uk'e'éduguz hoh ndutni, 'Khun teh Moodihti nYak'usda 'en nantan'ah hukwa ólhdzih gunih!' " ⁸ 'Et doo chah zeh netsudule ndi dzulh yédoch hadet'ai ts'ih whuz yulh whin'az. 'Et ndi yun k'ut ndulhcho hoh whenulhtun hubudayi cho bube 'ut'en k'ah 'ink'ez huyé dezti, 'i chah. ⁹ 'Ink'ez ndi yúlhni, "Ngwutsi be nininyih 'ink'ez suts'u téni' nilhdzun t'eh, 'et sih ts'iyawh, nye'ildzun wule!" ¹⁰ 'Ink'ez Sizi ndi yúlhni, "Satan naindalh! 'Et 'uk'e'éduguz hoh njan ndutni, 'Moodihti nYak'usda, 'aw 'en zeh bubut negwutsi be nits'uyih, 'ink'ez buts'u téni' uznilhdzun, 'ink'ez 'en zeh buba né'ts'oot'en huba' hoont'ah.' " ¹¹ 'Et netsudule whenaja 'ink'ez lizas whusahánel 'ink'ez hiba ne'ut'en.

Sizi dune hubulh yawhénilhtuk

¹² John tsak'ehiyan'a Sizi whulh údants'o hoh Galilee yun k'ut ts'ih whinya. ¹³ Nazareth whuch'a séya 'ink'ez keyah Capernaum whuz ninya 'et tedalh ka. Keyah 'et taba whuz'ai. Yun k'ut Zebulun 'ink'ez Naphtali lhodin'ai. ¹⁴ Isaiah nus ho'en, 'et howu yailhtuk lhaóodotneh hoh njan ndutni,

¹⁵ "Yun k'ut Zebulun 'ink'ez yun k'ut Naphtali,
bun k'uz wheti 'et whuz'ai.
Galilee 'i 'udun yun k'ut whut'en,
huwhut'i.

¹⁶ Tsahólhgus yuh hudemts'i,
'en be whét'en cho 'i hitelh'en.
Hoh huwhut'en dahutetsah tsagwusts'it huba li'hoont'ah, ndunnah 'en huba hoolh'en."

¹⁷ 'Et whuts'un Sizi dune hubulh yawhénilhtuk hoh ndo búlhni, "Nuhwhu-lubeshi ch'a nuhwhubeni náhandunoohleh! Yak'uz k'une' whul'en 'aw 'et nilhdukw suli."

Dinah lhook ka 'uhut'en Sizi, "Anih," hubúlhni.

¹⁸ 'Aw 'et bun k'ut Galilee taba Sizi hoh wheghah uyalh 'et nanah dune lhulhutsinkah hubutelh'en. 'Ilhunuh 'en Simon hiyulhni, Peter chah hiyulhni, 'et 'ilhunuh bulhutsin 'en Andrew hiyulhni. 'En lhoombilh tahíyalhdel lhook ka 'uhut'en hinli. ¹⁹ 'Ink'ez ndo búlhni, "Suneh'us. Dune ka 'ut'en nuh-whutelhsilh." ²⁰ 'Ahoh hubuloombil hiladetnik 'ink'ez hik'ah ts'ih 'uhoot'en ka hiyuntez'az. ²¹ 'Et 'o 'un hedulh nanah dune hubutelh'en. 'En chah lhulhutsinkah Zebedee buye'kah. 'Ilhunuh James 'ink'ez 'ilhunuh 'en John hiyulhni. Bu'abá bulh ts'i cho be húdelts'i 'ink'ez hubuloombil nahuyutl'oo. 'Et Sizi hubukahunih. ²² 'Et 'ahoh bu'abá highu dehaín'az 'aw 'et ye usda hoh 'ink'ez Sizi hik'ah ts'ih 'uhoot'en ka hiyuntez'az.

Sizi lhanah dune hunduda soo ná'ubalh'en

²³ Galilee yun k'ut Sizi ndulhcho nuya. Lizwif hubuluglez dune hubulh yálhtuk. Yak'uz k'une' whul'en, 'en hubugha khunek unzoo, 'i be hubulh yálhtuk. Ndán nduda 'ink'ez buyust'e tel'en, 'en ts'iyawh soo na'bulh'en.

²⁴ 'Et Syria huwhut'en, ts'iyawh hiyulh údits'o. Ndunnah lhenyoo dada bé hunduda, 'ink'ez ndan 'o nus bulh 'últ's'ulh chah, ndan ntsi' nudúde buyudínda chah, 'ink'ez hubukaootuzuk 'ink'ez nuchahúsyah chah, 'en Sizi ts'un lhgha budinla hoh ts'iyawh soo ná'binla. ²⁵ Galilee, 'ink'ez Decapolis yun k'ut whut'en chah, 'ink'ez Jerusalem whut'en, Judea whut'en, 'ink'ez Jordan

took'oh 'onghoh whughah whut'en chah, 'et 'ahuneltsuk 'ilhunahuwésdel 'en ts'iyawh hiyuntezdel.

5

Sizi ndo búlhni, “Dawhuldzoo 'et hubughá whults'ut”

¹ 'Ilhunahuwésdel Sizi hubunilh'en. Dzulh yenun ts'ih whenya, 'ink'ez 'et nátl'adeda hoh yugha hódul'eh, 'en highu nindel. ² 'Et wheobudunilh'i, 'et njan ndo búlhni,

³ “Lubeshi 'ulh'en, 'en budzi tel'en unli,
'en yak'uz k'une' whul'en bube'ildzun huzdli,
'et huwa degha nus hoonzoo hubughá whults'ut.

⁴ Hubulubeshi ghu ni hinli, 'en degha nus k'enánet'a hutele.
'En 'uhuja degha nus hoonzoo hubughá whults'ut.

⁵ Yuh údudildzun,
'en ndi yun k'ut bube'ildzun whutele, 'et huwa degha nus hoonzoo hubughá whults'ut.

⁶ Ndán ye be ts'ah'un 'uhoont'ah, 'i tube hukwa buye'élts'ul 'ink'ez ta'oosde lí'hint'ah, 'et hubughá óotelts'ulh.
'En degha nus hoonzoo hubughá whults'ut.

⁷ Bugha te'huninzun, Yak'usda chah hubughá te'untezilh,
'et t'eh degha nus hoonzoo hubughá whults'ut.

⁸ Hubudzi dutsun chailah,
'en k'at le Yak'usda hute'ilh 'et huwa 'en degha nus hoonzoo hubughá whults'ut.

⁹ Ndán ts'ah'un na'a lhulh 'uhint'ah hubulhtsi, 'en Yak'usda buzkeh ubahu-daténilh.
'Et huwa degha nus hoonzoo hubughá whults'ut.

¹⁰ Ndunnah ye be ts'ah'un 'uhoont'ah gha dzuh nobuhulhdeh, 'en yak'uz k'une' whul'en, 'et bube'ildzun hinli.
'Et huwa degha nus hoonzoo hubughá whults'ut.

¹¹ Dune nuhwheni ch'a yahutelhtuk 'ink'ez dzuh nunohotelhdzut, 'ink'ez ts'iyaitruk whuts'it khunek dutsun, 'i be nuhwheni ch'a 'uts'un na'a yahutelhtuk, 'et si sugha whuz na'a dune dzuh nunwhahulhdzut t'eh, 'et degha nus hoonzoo hubughá whults'ut.

¹² Whunélnik 'ink'ez degha nus hoonáht'i! Yak'uz hooncha hoh nuhwhuba k'elha whutele. Nuhtsuh nus whunilh'en inle, 'en chah whuz na'a zeh bube huzula inle.

Huba 'alha 'uhoont'ah 'en lusel 'ink'ez be whét'en lí'hint'ah

¹³ Lubeshi 'uhulh'en huba lusel liaht'ah. 'Et whunts'ih lusel 'aw buzachahóolkih suli t'eh, nts'e na'a simba doo chah lusel buzahóolki naoodle? 'Aw hoonli ba chaízooh ho' 'int'ah. 'I 'ants'ih dune ti híyulhkuk 'ink'ez hik'unúdelh. ¹⁴ Ndi yun k'ut dune huba be whét'en, 'i li'aht'ah. Keyah whuti dzulh k'ut whuz'ai t'eh, 'aw whuntool'ih ghaít'ah. ¹⁵ Dune too dezkl'un naidulhk'an 'ink'ez 'aw k'its'ai yut'ah niyóo'ah ghaít'ah. K'us kw'uzdai k'eíte'ah 'ink'ez kwun 'i bugha ts'iyannah huwhuntelh'ilh. ¹⁶ Dune ba be whét'en ahli. 'I be nuhwhe'ut'en unzoo, 'i dune yuntelh'ilh 'ink'ez nuhwhe'aBá yak'uz usda, 'en degha nus hidutélhti."

Sizi ndo búlhni, “Moses be' dustl'us 'ink'ez nus whunilh'en bube dustl'us ts'iyawh lhadutésdlih”

¹⁷ “Moses be' dustl'us 'ink'ez nus whunilh'en bube' dustl'us 'i hoolah natelhtsilh ka whusaíya noohzin gunih. 'I ts'iyawh lhaoodutesdlih 'et

wheni whusaiya. ¹⁸ 'Alha' dusni ndun whudusni, Moses be' dustl'us Hebrew bughunek k'una'a hoonsolyaz hoh 'uk'e'edúguz 'ink'ez hoonsolyaz 'uk'e'edúsgus, ndet 'uwhulhni, 'et ts'iyawh 'et ndúhooja t'eh, 'et whuts'un 'aw ndi yun 'ink'ez yat'ah chah 'ustl'e' 'uhóneh ghaít'ah. ¹⁹ Ndai khunek neghalts'ut, hoontsolyaz whunts'ih dune k'uhinínyuz t'eh, 'ink'ez 'uyoon whuz na'a zeh wheoobodutelh'eh t'eh, 'et sih yak'uz k'úne' whul'en, 'en 'aw hoonli chailah hiduténilh. 'Et ndi khunek netl'adélt's'ut, 'i dune ts'iyawh hik'une' 'ut'en t'eh, 'ink'ez 'uyoon chah whuz na'a 'az whebodutelh'eh, yak'uz k'úne' whul'en be ncha 'int'ah hiduténilh. ²⁰ Ndun whudusni ndunnah Moses be' dustl'us 'uk'ununa'úsduguz 'ink'ez Pharishee chah, 'en hiye be ts'ah'un 'uhoont'ah, 'ink'ez nuhwheni ye be ts'ah'un 'uhoont'ah, 'i be huba nus hoonzoo t'eh, 'aw 'et zeh nts'e yak'uz k'úne' whul'en ts'ih téhdulh.

Nyulh dune hoonliyaz hoh nch'a detni t'ewhunínzun t'eh, bughu ninya 'ink'ez nyulh dune naooltsilh

²¹ "Whulh udahts'o netsuhda hubuhutni, 'Dune solhghelh gunih,' 'ink'ez ndan dune selhghi t'eh, 'et hukw'una'a huba nahuteyeh ho' hoont'ah. ²² Ndun whuhdúsni, ndunnah 'ants'ih dulh dune bulh hunilch'e t'eh, 'en huba nahutedeh. 'Et ndan dudulh dune 'Raca' 'ulhni t'eh, khunek dakelh k'una'a 'Ntsi' ni hoh 'utni, 'i bugha naheyelh hububut huteyin. 'Ink'ez chah zeh ndun dune, 'Whuzinik dune inli ho' 'int'ah!' yulhni t'eh, 'en tube whewhúnujut kwuncho yuh ts'ih buhutenoh. ²³ 'Et huwa hoonliyaz Yak'usda bukw'uzdai k'ut howa' té'alh, 'ink'ez nyulh dune hoonli nch'a hudetni whunailnih t'eh, ²⁴ 'et whutsuh nyulh dune bulh lhk'enahoodutseh. Hukw'elh'az k'an zeh Yak'usda bukw'uzdai k'ut huwa' tan'alh, 'et huwa níoon'alh. ²⁵ 'Et khun dune hoonli nch'a hudetni t'eh, 'ahoh buts'un ts'ah'un na'hotneh. 'Et naheyelh but nínyutelhtelh whutsuh ndóneh. 'Aw ndúchainel t'eh, nch'a hudetni, 'en naheyelh but nínyutelhtelh. Naheyelh, 'en nélhghel tl'anyutelhtelh 'ink'ez nch'a dána'dute'alh. ²⁶ Ts'ah'un 'un whudúsni, ts'iyaituk buk'elha whutelhtsilh whuts'un, nts'e na'a simba whuch'a naoohja?"

Ndun ts'eke yunilh'en 'ink'ez budzi yuh hoh duninzun, "Bulh tínta' test'ilh hukwa' nuszun," et 'uda yulh tinta' 'ant'en ho' 'int'ah

²⁷ "Whulh udahts'o netsuhda hubuhutni, "Uyoon ts'eke bulh tinta' ont'en gunih." ²⁸ Sich'oh 'un whudúsni, dune ts'eke yunilh'en 'ink'ez budzi yuh hoh duninzun t'eh, 'Bulh tínta' test'ilh hukwa' nuszun,' 'uda budzi yuh bulh tinta' ant'en ho' 'int'ah. ²⁹ 'Et nalhnih ts'ih nyuna be lubeshi inla t'eh, hanón'alh 'ink'ez 'un ntolh'is. 'Et ndáhja t'eh nuhyust'e ndulhcho chadutésk'un hoh whanus soo' hoont'ah. ³⁰ 'Ink'ez nalhnih ts'ih nla be tínta' nint'en t'eh, k'ont'as 'ink'ez 'un tolh'is. Nuhyust'e ndulhcho 'aw kwuncho yuh ts'ih chadutésk'un, 'et 'o nus soo' hoont'ah."

Dune ts'eke bulh lhgo delhts'i, 'ilhuz wheni 'uhoont'ah

³¹ "'O 'un chah nduhútni 'Ndun bu'at 'ustl'e' 'utelilh, ye' dustl'us 'istl'e' itelilh, 'i yutl'ayóolhchoos huba' hoont'ah.' ³² 'Et whunts'ih 'un whudúsni, bu'at 'uyoon dune bulh tinta' 'ant'en 'et huwa zeh dustl'us ye' 'ustl'e' itelilh, 'i yutl'ayóolhchoos. Ndúchainel hoh bu'at 'ustl'e' 'uyínla t'eh, dich'oh bu'at tinta' 'ant'en yulhtsi. 'Ink'ez ndun ts'eke 'uyoon dune ghu nasda t'eh, dune 'en chah tinta' 'ut'ih unli ho' 'int'ah."

Khun nyunch'oh nghunek k'ónyis gunih

³³ "'Et doo chah niz de whudezulh da ts'iyawh t'eoónáhzun 'uda dune daja hutni hoh njan duhutni, 'Khun nyunch'oh nghunek k'ónyis gunih. 'Et neMoodihti buts'u nahizínya 'et nduhoolcho hukw'una'a 'ont'en huba'

hoont'ah.' ³⁴ 'Et whunts'ih sich'oh 'un whudúsni, khun whuz na'a teh ndudóohtni gunih. Khun 'Yak'uz whunalh 'udusni,' doohtni gunih. 'Alha yak'uz ts'ih Yak'usda bukw'usda cho dezti, 'i 'et su'ai. ³⁵ 'Ink'ez, 'Ndi yun k'ut whunalh 'udusni,' doohtni gunih. Yak'usda duke yuk'udelhú'ez, 'i 'int'ah 'et huwa. 'Ink'ez khun teh, 'Keyah Jerusalem whunalh 'udusni,' doohtni gunih. Hubudayi cho k'us dezti bukeyah whucho 'uhoont'ah 'et huwa. ³⁶ 'Ink'ez khun teh, 'Sutsi be 'alha' dusni,' doni gunih. 'Aw ntsigha 'ilhuk'i whuntsi dulyul k'us dulhgus 'ólhtsilh hoolah. ³⁷ 'Et ndez na'a njan dúdoohtni, 'Aw 'et 'A,' dahtni, 'A,' 'int'ah. 'Ink'ez "Awundooh," dahtni t'eh chah, "Awundooh," 'uhoont'ah. 'Et 'uts'un na'a 'udutéhnih t'eh, 'et sih ntsi' ts'ih hadutédoh ho' 'int'ah."

Dune ntsi', en buch'a nót'uk

³⁸ "Et whutsuh da whulh udahts'o nts'e na'a dune daja hutni inle njan duhutni, 'Dune buna chawhés'en silhtsi t'eh, nyunch'oh nyúna be chawhés'en tanle. 'I be kw'elha whutelhtsilh. 'Et bughoo habe'alhchus t'eh, nyunch'oh nghoo be k'elha whutelhtsilh,' hutni inle. ³⁹ 'Et whunts'ih 'un whuhdúsni, dune ntsi' k'ól'en gunih. 'Et k'us ndan nalhnih ts'ih nuhnezkuk t'eh, 'et 'intl'as ts'ih buts'un nándunont'ah. ⁴⁰ Khun ndan nts'oozt'an naheyeih but nts'u yuka 'utni t'eh, ndzoot 'i chah bughá yólhchoos. ⁴¹ Dune 'et nduhóolhdzah sulh ti ínyalh nyulhni t'eh, nat 'uwhuldzah ts'ih bulh neóonya. ⁴² Ndán hoonli nts'un hukwa 'utni t'eh, hubugha yó'ah. Hoonli bughu sinla yulhni t'eh, buch'a naool'ah gunih."

Nuhch'az detni, en buk'eoohitsi'

⁴³ "Et whulh údahts'o hubuhútni, 'Nyeghah whut'i buk'eoontsi' 'ink'ez nch'a hudetni, 'en buts'u dontnik.' ⁴⁴ Ndun whúdusni, nuhch'a hudetni, 'en buk'eoohitsi'. Ndunnah denwhútdule, 'en khunek unzoo, 'i be hubulh yaóolhtuk. Ndunnah nuhts'u dutnik, 'en buts'un wahzoo. 'Et ndunnah hoontsi' nuhts'un ne'hut'en 'ink'ez dzuh nunwhahulhdzut, 'en chah buba tenadoohdli. ⁴⁵ 'Et ndez na'a nuh'aBá yak'uz usda, buzkeh wahle. Yak'usda ndunnah hintsi' 'ink'ez hinzoo 'en ndi sa lhulhúgha buk'eidindi. Ts'ah'un 'uhint'ah 'ink'ez ts'ah'un cha'hít'ah, en chah lhulhúgha buk'ut nawhúlhtih. ⁴⁶ Ndunnah nuhk'entsi', 'en zeh hubuk'ehtsi' t'eh, di simba nuhgha óokat? Sooneya nalhdzooh chah whuz na'a zeh nduhút'en. ⁴⁷ Nuhwhulhutsinkah zeh dahooja hubudahni t'eh, 'uyoon degha nus ahzoo na'dunáhzun ih? Hoolah! Sooneya nalhdzooh, 'en chah whuz na'a zeh nduhút'en. ⁴⁸ Nuh'aBá yak'uz usda dant'ah hoh ts'ah'un 'int'ah, nuhwheni chah whuz na'a zeh ndóht'e huba' hoont'ah."

6

'Ut'en unzoo, i' ulh'en t'eh, khun ts'iyannah nalh tube cho whe 'ududoohlúti gunih

¹ "Huwahli! Khun tel'en gha' teh'ah t'eh, ts'et whucho ndóht'en gunih. 'Et whuz na'a ndaht'en t'eh, nuhwhe'aBá yak'uz usda, 'en 'aw nuhwhuba k'elha holhtselh ghaít'ah. ² 'Et huwa tel'en gha' teh'ah t'eh, khun ts'iyannah nalh tube cho 'ududoohlúti gunih. Ndunnah duba nahudzoo, 'en 'et whuz na'a 'et duhút'en. Lizwif hubuluglez k'us ti whulheguz 'et ts'iyannah hubunoolh'en ka, 'et nduhút'en. 'Alha' dusni, ndunnah ba 'uk'elha whutele, 'uda huba 'uk'elha whuzdli ho' hoont'ah. ³ 'Et whunts'ih tel'en gha' teh'ah t'eh, nyula 'intl'as ts'ih 'aw t'ewhunozin nyula nalhnih ts'ih dat'en 'et. ⁴ 'Et whuz na'a 'uyoon t'ehoníszun 'et ndaht'en hoh tel'en bugha 'áh'ah. 'Ink'ez nuhwhe'aBá yak'uz usda, 'en dahoont'ah huwa 'et ndaht'en, 'et ts'iyawh nuhwhunílh'en

ho' 'int'ah. 'Et huwa dich'oh ts'iyannah but hoonzoo hoh nuhwhuba k'elha whutelhtsilh."

Ndez na'a tenadoohdli huba' hoont'ah

⁵"Et tenadahdli t'eh, khun ndunnah duba nahudzoo k'ah ts'ih tenadoohdli gunih. Ndunnah Lizwif hubuluglez nahudelhúya, k'us ti wheguz chah, 'ants'ih ts'iyannah hubunoohl'en ka tenahududli. Ndu whudúsni 'uda huba k'elha whuzdli ho' hint'ah. ⁶'Et nuhwheni tenadutehdli t'eh, nuhwhenich'oh whaht'i, dati dána'dehtan 'ink'ez tenadoohdli. Nuhwhe'aBá, 'aw be chaoodést'en, 'en ts'iyannah nahl nuhwhuba k'elha whutelhtsilh. ⁷'Et tenadahdli t'eh, lhat cho lhtanahoochdeh gunih. Whuz na'a ndunnah 'aw Yak'usda t'echahunízun tenahududli. Lhai khunek be tenahududli t'eh, 'et sih Yak'usda hubudutéts'o huninzun. ⁸'En hubuk'una'a 'udoohni gunih. Nuhwhe'aBá dant'i be ndunahdzit 'uda t'ewhunízun ho' 'int'ah. ⁹'Et ndez na'a tenadoohdli, 'Ne'aBá yak'uz sinda.

Nyoozi dóoti.

¹⁰Hoh hubudayi cho inli,
 whusahóolts'it.

Hukwa' ninzun t'eh, ndoh honeh,
ndi yun k'ut 'ink'ez yak'uz chah.

¹¹K'an dzin uzte'alh,
 'i negha iní'ai.

¹²'Uyoon bulh tink'us ts'uwhulh'ai t'eh, buba whunats'odoolnah.
 'Et whuz na'a zeh tink'us 'uts'ut'ih 'et neba whunaoodolnah.

¹³Nts'e tink'us ts'unint'uk, whuch'a neghinli.

'Ink'ez ndun ntsi', 'en chah buch'a neghinli.

'Et yak'uz k'une' 'int'en 'int'ah, 'ink'ez be ilhtus,
 be dénti, 'i chah, 'i 'ilhuz wheni, 'i ts'iyawh nye'ildzun 'int'ah.
 'Et ndoh honeh.'

¹⁴Dune nuhwhudulhyah né'hut'en t'eh, buba whunaodelhúnah t'eh, nuhwhew'aBá yak'uz usda, 'en chah nuhwhuba whunaoodutelnah. ¹⁵'Et whunts'i dune nuhwhudulhyah né'hut'en t'eh, 'ink'ez buba whuchanaooduzulhnah t'eh, nuhwhe'aBá yak'uz usda, 'en chah nuhwhuba whunaoodoolnah ghaít'ah."

Sahá'delhuya t'eh, 'onghunnah hubuch'a nonoolh'i

¹⁶"Ndet sahá'delhuya t'eh, ndan duba nahudzoo, 'en hubuk'una'a 'ooht'e gunih. 'En hubudzi yuh 'uhilhdzun na'hududil'i ho' hint'ah. Dunen 'uts'un 'oonint'en hiyúlhtsih, whuz na'a te'hududil'en 'ink'ez dzuh nuhuzut na'hududil'i, 'uyoon húbonoohl'en ka. 'Alha ndun whudusni, ndan nduhút'en, 'uda huba k'elha whuzdli ho' hint'ah. ¹⁷'Et nuhwheni sahá'delhúya t'eh, soo cho nuhwhunen chah na'óolhdeh 'ink'ez nuhtsigha chah naoolhlho. ¹⁸'Et whuz na'a sahá'delhúya t'eh, 'et 'onghunnah hubuch'a nonah'i. 'Et whunts'ih nuhwhe'aBá cha'whést'en ts'ih whunts'ih whunilh'en, ts'iyannah nahl nuhwhuba k'elha whutelhtsilh."

Yak'uz be hoonzoo 'ahoont'ah, 'i be yak'uz ts'ih whuz 'ilho neóohlelh

¹⁹"Ndi yun k'ut hoonáht'i, 'i 'ilho 'oohleh gunih. Ndulh'en t'eh, 'ants'ih k'enadidutsih 'ink'ez muszoombaiyaz chah hoolah yutelhtsilh. 'Undunut'ih, nuhghu dá'duteyus 'ink'ez hiduntet'ih. ²⁰'Et yak'uz be hoonzoo 'ahoont'ah, 'i whuz 'ilho wéhla. 'Aw buk'ena'doodutsih ghaít'ah. 'Ink'ez muszoombaiyaz chah 'aw hoolah yoolhtselh ghaít'ah. 'Aw nuhghu da'hooyis 'ink'ez nuhghe' hudunooot'ih ghaít'ah. ²¹'Et ndet be hoonzoo 'ahoont'ah, ndet sáhla, nuhdzi chah 'et duté'ah."

Dune buna too dezk'un li'int'ah

²² “Nena neyust'e ba too dezk'un li'int'ah. Nuhna soo 'int'ah t'eh, nuhyust'e be whét'en, 'i dez bun. ²³ 'Et whunts'ih dune buna tink'us 'ut'en be untsi' t'eh, 'et buyust'e ndulhcho tsahólgus be duté bun. 'Et huwa be whét'en nohwhulh 'int'ah tsahólgus k'una'a be hoodet'en t'eh, dáhoolcho, 'i be simba tsahólgus wule?”

Yak'usda k'une' 'int'en t'eh, sooneya chah k'une' 'ont'en ghaít'ah

²⁴ “Ilhunuh dune nanah moodih ba 'oot'en ghaít'ah. 'Ilhunuh 'en yuts'u dutetnik 'ink'ez 'ilhunuh yuk'etetsi'. K'us 'ilhunuh yuk'úne' tet'en 'ink'ez 'ilhunuh yuch'a dutetni. 'Aw Yak'usda k'une' 'int'en 'ink'ez sooneya chah k'une' 'ont'en ghaít'ah.”

Yinkak delhúts'i huwu ni wahle gunih

²⁵ “Et huwa njan ndun whudusni, yinkak delhúts'i huwu ni wahle gunih. Teh'alh, 'i 'ink'ez tehnih, 'i chah, 'ink'ez nuhyust'e be soo nadutehnih, 'i chah, 'i ts'iyawh khun bugha ni wahle gunih. Teh'alh, 'i be kháhna, 'i degha nus dezti nahzun ih? K'us naih 'i nuhuyust'e degha nus dezti nahzun ih?

²⁶ Nduk dut'ai núdelh, 'i nulh'en! 'Aw hacha'nusdle 'ink'ez 'aw khi huba ilhucha'wesdle ilah. 'Et whunts'ih nuhwhe'aBá yak'uz usda, 'en bugha 'á'ah. Nuhwheni 'en ilah 'o nus huba déhti. ²⁷ Nuhtah ndan dalcho tele howu ni unli? 'Aw 'et huwa 'o nus 'ulyez wule ghaít'ah! ²⁸ Di ka be dune tehleh wuni ahli? 'Indakyaz nts'e na'a haniyeh, 'et howu nuni nahzut. 'Aw cha'hust'en 'ink'ez 'aw naih chah cha'hulh'en hiye dune tele ka. ²⁹ Ndun whudusni Solomon 'en whunts'ih soo nadut'ih teh, 'aw 'indakyaz yuch'a degha nus cha'ildzooh. ³⁰ Yak'usda tl'o unzoo, 'i yilh'i. 'I k'an dzin tl'o k'ut haniyeh 'ink'ez bunt'ah 'i tsehidutelhkulh 'ink'ez duték'un. 'Et dáhoolcho 'i be nuhwheni 'o nus soo nanohdutele? Nuhwheni 'aw soo cho nuhwhuba 'alha' cha'hoot'ah ho' 'aht'ah! ³¹ 'Et huwa di simba ts'oo'ah, k'us di simba ts'ootnai, k'us di simba be dune ts'ooke, noohzin gunih. ³² 'Alha 'udun yun k'ut whut'en 'et zeh hukwa hités'en. 'Ink'ez 'alha 'i be nuhwhe'aBá yak'uz usda, ndai hoonliyaz be ts'udunudli, 'i ts'iyawh t'eo oninzun. ³³ Ndet Yak'usda nuhwhuba hubudayi cho tele 'ink'ez ye ts'ah'un na'a 'ohoont'ah, 'i nuhbe'ildzun tele, 'et zeh hukwa' nahzun t'eh, 'o 'un, 'i chah ts'iyawh nuhgha tékulh ho' hoont'ah. ³⁴ 'Et huwa bunt'ah dawhútenih, 'et howu ni wahle gunih. Bunt'ah dawhuténih, 'et ndo honeh. Dzin totsuk soo' hoolcho howun ni hoonli 'et huwa.”

7

'Uyoon ba nahoohyeh gunih

¹ “Uyoon ba nahoohyeh gunih. Doo ka sih nuhwhuba nahodeh. ² Nts'e na'a 'uyoona nahahyeh, 'et whuz na'a nuhwhuba nahutedeh. 'Ink'ez nts'e na'a 'uyoona ghu nuni nahdzut, whuz na'a zeh nuhghu nuni huntezut. ³ 'Et di ka nyulhutsin lhusyaz buna k'et dez tan, 'i nilh'en, nyunch'oh duchun cho nyuna k'et dez tan 'ink'ez? ⁴ Nts'e na'a nyulhutsin 'uduténih, 'Nyuna k'elts'ut, 'i nyuna k'ehanaóos'ah,' 'ink'ez nyunch'oh lhi'ilcho, 'i nyuna k'et su'ai, 'i 'aw chanílh'en? ⁵ Buba naindzoo! 'Udechoo lhe'ilcho, 'i nyuna k'élts'ut, 'i choo nyuna k'éhanain'ah. 'Et sih soo whunilh'en hoh buna k'élts'ut, 'i buna k'ehanáyo'ah. ⁶ Yak'usda bughunek lubeshi bughuh hoolah, 'i khun teh lhikah ndult'ah hubugha yóoh'ah gunih. K'us Yak'usda ye whúneodulh'eh, 'i kw'usul dezti, 'i pearl hiyulhni, 'et dult'ah, 'i khun teh goso dult'ah batayóolhdelh gunih. 'Et ndahja t'eh, ndulhcho hik'unutélh'us 'ink'ez 'ahoh nuhts'un nahulhúya 'ink'ez yanohodutélhch'ulh.”

*Yak'usda nuhts'o hukwa' ninzun, 'et Yak'usda hukwa 'oodolhkut 'ink'ez
nuhgha whúte'alh*

⁷ "Yak'usda bukayoodulhkut, 'i nuhgha íte'alh. Bukunáhta 'ink'ez na-hootéh'alh. Ndati whudúlhghalh 'ink'ez nuhwhuba da'dutékwus. ⁸ Ndán 'oodulhkut, Yak'usda hubugha whúte'alh. Hoonliyaz hukunúta, 'en na-hahooté'alh. 'Ink'ez ndati hodulhghalh 'en Yak'usda huba dá'dutet'ilh. ⁹ Ndunnah nuhbákah nuhtah, buye' lhes yuts'u ka 'utni t'eh, tse yughá ndunóo'alh ghaít'ah. ¹⁰ K'us lhook yuts'u ka 'utni t'eh, hoh tl'ughus yugha óoleh ghaít'ah. ¹¹ Nuhwheni lubeshi 'ulh'en ahli, 'et whunts'ih t'eoonaahzun nts'e na'a unzoo, 'i nohwuzkeh hubugha itéh'alh. Dáwhulcho, 'i be 'o nus nduk yak'uz nuhwhe'aBá, ndunnah yoodulhkut, unzoo, 'i hubugha itéh'alh. ¹² 'Et huwa nts'e na'a hukwa' nahzun dune danoh hotelh'ilh, 'et whuz na'a zeh nuhwheni 'et ndúboolh'en. 'Alha Moses be' dustl'us, 'ink'ez nus whunilh'en bube' dustl'us chah, 'et nawhult'ah 'et nduwhútni."

Ndi hukwuti hoondot

¹³ "Njan hukwuti hoondot 'et hukohdelh huba' hoont'ah. 'Et hukwuti hoontel, 'et hoontsi' ts'un whuz'ai, whuz whéti 'uhoont'ah 'ink'ez lhanah whuz whehúdelh. ¹⁴ Njan 'et huwa 'et nduhút'en, njan hukwuti hoondot, 'i 'ilhuz be ts'ukhuna 'uhoont'ah 'ink'ez howa whulna ho' hoont'ah. 'Aw lhanah ilah nahuhóo'aih."

Dune dahút'en, 'et 'i be dahint'ah t'eoobuntehzeh

¹⁵ "Ndunnah whuts'it be nus whunilh'en na'dudil'i, 'en buka huwahli! Sheep zuz be soo dint'ah, 'en buyuh ts'ih yus soo degha nus ntsi' 'en lí'hint'ah. ¹⁶ 'Et huwa dahút'en, 'et 'i be t'eoobuntehzeh. 'Et mai cho whus chuntah ih oonahye? K'us ndi mai, figs hiyulhni, chuntah whuduts'ul whutah oonahye ih? 'Awundooh! ¹⁷ 'Et whuz na'a zeh duchun unzoo, 'i mai unzoo, 'i bugha haniyeh. ¹⁸ 'Ink'ez duchun dalhjut, 'i 'aw mai unzoo, 'i bugha hanóoyeh ghaít'ah. ¹⁹ Ts'iyai, 'i duchun 'aw mai unzoo, 'i bugha hanoooyeh ghaít'ah, 'i nánuhidutselh 'ink'ez hidelhk'un. ²⁰ 'Et huwa dune chah whuz na'a ndúhint'ah. 'Et huwa t'eoobunoohzin."

Yak'usda k'únucha'ust'en, 'en Sizi Gri bube'ildzun chahilah

²¹ "Aw ts'iyannah, 'SMoodihti, sMoodihti,' sulhni, 'aw nts'e yak'uz k'une' ts'uwhul'en whuz hutooya ghaít'ah. Ndán se'aBá buts'o hukwa' ninzun tune' 'ut'en, 'aw 'en zeh yak'uz ts'un hutedulh. ²² 'Et ndunnah njan dzin whusawhélts'ut t'eh, 'SMoodihti sMoodihti, 'alha nyoozi be nus ts'úhoo'en. 'Ink'ez nyoozi be ntsi' nududeh, 'i 'uyoon bughu whe náts'inanyoot! 'Ink'ez nyoozi 'i be huwa 'ét'en tune' ts'ut'en,' hutni. ²³ 'Et ndunt'ah dune ts'iyawh hubudutésnilh, "Aw t'enwhunuzúszun. Such'a nasahdel! Nuhwheni 'aw suk'unucha'aht'il aht'ah!" "

Sizi Gri bughunek soo cho whulh ts'ooyin

²⁴ "Et huwa ndunnah sughunek yoozilhts'ai, 'ink'ez daja dusni hukw'une' hut'en, ndun dune whunih bukoo tse k'ut niooni'ai, 'en k'una'a 'uhint'ah. ²⁵ 'Aw 'et nawhéónilhtan 'ink'ez too 'aw 'et ulhtus suli, 'i njan bukoo whut'agheznai. Nilhtsi ulhtus, 'i chah whudelhts'ut. 'Et whunts'ih njan bukoo 'aw dachahóonil. Njan bukoo tse k'ut whuz'ai 'et huwa. ²⁶ 'Et whunts'ih ndan sughunek hudit's'o 'ink'ez 'aw hik'unucha'ust'en t'eh, ndun dune whusnik, 'en bukoo 'ants'ih sai k'ut niooni'ai, 'en duhúlt'ah. ²⁷ 'Aw 'et nawhéónilhtan 'ink'ez too 'aw 'et ulhtus suli, 'i njan bukoo whut'agheznai. Nilhtsi ulhtus, 'i chah whudilhts'uk. 'Ink'ez njan bukoo nawhélt's'ut. 'Ink'ez wheéonujut hoh nahwélt's'ut." ²⁸ 'Et Sizi ndi khunek ye hubulh yailtuk, 'i lhaduja hoh 'ilhunahuwésdel tube huba hooncha. ²⁹ Khunek

be butl'awhélts'ut hoh wheoobudalh'i. Ndunnah Moses be' dustl'us k'ut 'uk'ununa'úsduguz, 'aw whuz na'a hubuchaoodílh'il.

8

Dune hubukak whulhjut 'en Sizi soo na'binla

¹ Aw 'et Sizi ndus de dzulhyaz k'uz hanaja hoh lhanah dune hinantesdel. ² 'Et hoh dune bukak whulhjut, 'i leprosy hiyúlhni, 'en yududezya, yubut nachaniti 'ink'ez ndi yúlhni, "SMoodihti nyun hukwa' ninzun t'eh, ndi ndai be ilhtus, 'i 'int'i, 'i be suna'ilhdeh." ³ 'Et Sizi bula be yut'aghéznai 'ink'ez, "A, hukwa' nuszun. Nyuna'alhde!" yúlhni. 'Et bukak whulhjut, 'et 'ahoh soo na'uja. ⁴ 'Et Sizi ndi yúlhni, "Khun teh 'uyoon doni gunih! 'Et náwhulnuk buts'inyalh 'ink'ez ts'ah'un na'a díni nyust'e nts'e na'a hoh soo na'uja 'ink'ez nyunoohl'en. 'Et Moses be' dustl'us yuk'uyaoolhtuk. 'I bugha ndai huwa ta'ah, 'i nyudóoni. 'Et whuz na'a ts'iyannah whubuntalhtun dainja hoh soo na'inja."

'Ilhunuh Rome whut'en nehughan bumoodih, 'en buye' Sizi soo na'yinla

⁵ Aw 'et Sizi keyah Capernaum ts'ih huwhutni ninya hoh 'ilhunuh Rome whut'en nehughan bumoodih, 'en yududezya hoh yuts'u tedudlih, ⁶ "SMoodihti se'ustlenyaz, 'en njan koo yun sulhti 'aw dechadusnik hoh tube dzuh nuzut." ⁷ 'Et Sizi 'uyulhni, "Buts'u tesyalh 'ink'ez soo na'tesdlilh." ⁸ 'Et whunts'ih ndun nehughan bumoodih 'uyulhni, "SMoodihti sukoo ts'ih tanyalh huba 'aw soo cha'lhudzooh. 'Ants'ih nghunek be 'et ndudénja t'eh, 'et whunts'ih se'ustlenyaz soo na'ootnelh sih. ⁹ 'Alha si chah 'onghunnah sugha ndoh 'uhint'ah hoh hukwa' huninzun tune' suhulh'en. 'Et si chah whuz na'a zeh nehughan huba ndoh 'ust'ah. 'Et 'ilhunuh, 'Inyalh!' dusni t'eh, 'et 'aho wheyih. 'Et 'uyoon 'Anih,' dusni t'eh, 'et 'ahoh sughu yih. 'Et se'ulhna, 'Njan dineh!' dusni t'eh, 'et 'ahoh 'et ndút'ih." ¹⁰ Sizi ndun dune ndet 'uwhúlhni whulhúdants'o hoh tube ba hooncha. 'Et huwa ndunnah yunedulh ndo búlhni, "Israel whuyun k'ut ndulhcho hoh, 'aw ndun dune whuz na'a buba 'alha 'ohoont'ah nachalhtel. ¹¹ 'Et ndun whudusni ndaz de 'ink'ez nus de lhanah whusatedulh hoh yak'uz k'une' whul'en ts'ih 'et Abraham, 'ink'ez Isaac, 'ink'ez Jacob chah, 'en 'ilho lhula na'hutet'ah. ¹² 'Et whunts'ih ndunnah yak'uz k'une' hool'en huba 'int'ah inle, 'en 'az tsahólhgus ts'ih hubotelhdulh. 'Et ts'iyawh hutso 'ink'ez hubughoo lhehídutelhk'us." ¹³ 'Et Sizi ndun nehughan bumoodih 'en ndi yúlhni, "Aw 'et inyalh! 'Et nts'e whula mba 'alha 'ust'ah, whuz na'a zeh mba' whuténilh." 'Et soo 'et 'uhunet'oh hoh be 'ustlenyaz soo na'uja.

Peter bubez, 'en chah Sizi soo na'yinla

¹⁴ 'Et Sizi, 'en Peter bukoo daninya hoh bubez yunilh'en. 'Et kw'usti k'ut sulhti dada nézul be nduda. ¹⁵ Yuzih ninínya 'ink'ez yula t'agheznai. 'Et 'ahoh ndi nézul nduda buts'uh hanaidede. 'Et 'ahoh dinadija 'ink'ez bugha ná'unt'ai.

Lhanah ntsi' nududeh hubuyidélhts'i, Sizi bughunek be buts'ah haóobunanyoot

¹⁶ Aw 'et sa yuk tez'ai hoh lhanah ntsi' nududeh hubuyidélhts'i, 'en Sizi highu bunínlá. Bughunek be ntsi' nududeh, 'i hubuyáh hanaínanyoot. 'Et ts'iyawh ndan nduda, 'en ts'iyawh soo na'ubinla. ¹⁷ 'Et whuz na'a Isaiah nus ho'en hoh ndutni, 'et ts'iyawh 'et ndúhooja. 'Et huwa njan ndutni, "Ndai lait'ah neilh'i, 'i ts'iyawh neghu yílhchoot.

'Ink'ez nedada chah 'i nets'u hanáhonla."

Ndun Sizi Gri ba ne'tét'en hukwa' ninzun t'eh, 'et t'eh ndai ndi yun k'ut hukw'entsi', 'et ts'iyawh whuladootni huba' hoont'ah

18 'Et 'ilhunahuwésdel ts'iyawh hinasdúguz. 'Et Sizi whunah'en hoh 'et ndunnah yulh 'ut'en, 'en ts'iyawh ndo búlhni, "Nyan uztooke." **19** 'Et 'ilhunuh Moses be' dustl'us 'uk'ununa'usdúguz, 'en yughu ninya hoh ndi yúlhni, "Nehodulh'eh nts'oh tula nutáyalh, 'et ndulhcho nyun tesyalh hukwa' nuszun." **20** 'Et Sizi ndi yúlhni, "Soo cho howu nuní ninzut! Nanguz 'en chah 'an whut'i ho' 'int'ah 'ink'ez dut'aiyaz chah ut'o ut'i. 'Et whunts'ih yinkak dune ye', 'aw hukw'ut tsin tel'alh 'et whunts'ih chahóot'ih." **21** 'Et 'uyoon yugha hoodul'eh, 'en ndi yúlhni, "SMoodihti subailh'i. 'Se'abá wheyutelhteh choo." **22** 'Et whunts'ih Sizi ndi yúlhni, "Sunanyalh! Dudulh yaidla dich'oh wheyunalhuhooleyelh."

Nilhtsi 'ink'ez tatsi bulh 'i whunts'ih Sizi hik'une' 'ut'en

23 'Aw 'et ts'i beinya 'ink'ez yugha hoodul'eh, 'en ts'iyawh hiyulh 'úja. **24** Ni huzki ibulh hubulh taoodelts'ut 'ink'ez 'aw 'et ts'i be tawhenduniteh, 'et whunts'ih Sizi 'en nanisti. **25** 'Ink'ez yugha hoodul'eh, 'en hits'u whendel ts'enahiyulhdzit. "NeMoodihti netalhyis! 'Aw 'et too ts'uteghan!" **26** 'Et ndo búlhni, "Di ka whénlhujut? 'Aw bé 'alha' whut'en, 'i soo 'últus, 'i chaht'ih ho' dahni." Didinya hoh khunekti be hukwa' yudáni too 'ink'ez nilhtsi bulh yatelhtuk, 'ink'ez 'aw 'et dinghel. **27** 'Et ndunnah dune huba hooncha hoh 'ulhódutni, "Ndun dant'ah dune simba 'int'ah? Nilhtsi 'ink'ez tatsi bulh 'i whunts'ih hik'une' 'ut'en."

Nanah dune ntsi' nududeh, 'i hubuyudínda, 'en Sizi ntsi' nududeh, 'i buts'ah hanaóobunanyoot

28 'Aw 'et nyan nisúki ndunnah Gergese hubyun k'ut huwhutni, whuz lhghuhudindel. 'Et nanah dune highu nin'az. 'En ntsi' nududeh, 'i buyudínda. Ndet neyust'e 'ahule, 'et whuz de hahá'az. Soo cha'hunízun k'et 'aw dune buyust'e ghah lhoya ghaít'ah. **29** 'Et khunyaz tube cho 'uhutni, "Sizi nyun Yak'usda buYe' inli ho' 'int'ah! Ndai nets'u hukwa' ninzun? Nket'ah neba whusaóotelts'ulh whutsuh, dzuh nunetalhdzut ka 'inja whusainya?" **30** 'Et njan howu nilhdza, 'et goso lhai hoh ahú'ah. **31** 'Et ntsi' nududeh, 'en hits'u tedudlih hoh hiyulhni, "Whusanáneuntanyulh t'eh, 'et nyoooz goso yúzdoodeh netl'ahó'ah." **32** 'Et "Ahdulh!" ndo búlhni. 'Aw 'et ntsi' nududeh, 'i ndunnah dune hubuts'uh haídande hoh goso yídande. 'Aw 'i bulh goso wheghah helghaz 'ink'ez too hubanghan. **33** 'Et ndunnah goso ghuhinli, ts'iyawh 'ahoh keyah ts'ih whehélgaz. 'Ink'ez keyah whut'en ts'iyawh ndo badáni dahooja 'et. Ndunnah nanah ntsi' nududeh, 'i hubuyidande inle, 'et dahúja nduhóolcho ndo badáni. **34** 'Aw 'et keyah whut'en, ts'iyawh 'az whehélgaz 'ink'ez Sizi hidudezdel. Hitelh'en ibulh njan buyun k'ut whuch'a naóoja, 'et hukwa hits'u tedudlih.

9

Sizi ndun dune 'et ndi yulhni, "Nlubeshi ts'iyawh mba hoolah suli."

1 Sizi 'aw 'et ts'i beinya 'ink'ez nyan whehánki dich'oh dukeyah ts'ih. **2** 'Aw 'et ndun dechadusnik, 'en kwusuti be whusahíyankai. Sizi hubunilh'en 'ink'ez t'eooininzun huba 'alha' hoont'ah. 'Et dechadusnik 'uyúlhni, "Dahooja 'uski, nduk 'un dunilt'uk! Nyulubeshi ts'iyawh mba hoolah suli!" **3** 'Et 'ahoh bulunah Moses be' dustl'us 'uk'ununa'usduguz 'ulhódutni, "Ndun dune Yak'usda ch'a yalhtuk ho' 'utni!" **4** 'Et daja huninzun Sizi 'et ts'iyawh t'eooininzun. 'Et ndo búlhni, "Di ka nuhdzi yuh ntsi' ghu nuni nahzut? **5** Nts'e na'a simba huwa chahoolnah k'una'a uzdooni? 'Lubeshi mba hoolah suli,' k'us, 'Didinyih 'ink'ez inyalh?' **6** 'Et njan t'eoónóhzin yinkak dune ye', 'en ndi yun k'ut huba' hoont'ah ho' 'int'ah lubeshi 'un toolhdelh ka huba' hoont'ah ho' 'int'ah,"

hubúlhni. 'Ink'ez ndun dechadusnik, "Didinyih 'ink'ez kw'usinti, 'i nailchoot 'ink'ez nkoo ts'ih naindalh!" yulhni. ⁷ 'Et 'ahoh dinadija 'ink'ez bukoo ts'ih whenája. ⁸ 'Et 'ilhunahuwésdel ts'iyawh huba hooncha 'ink'ez Yak'usda hidálhti, dune, 'en chah butl'aho'ai hoh huba' hót'e ka.

Matthew 'en sooneya nalhdzooh

⁹ 'Et hukw'elh'az Sizi wheghah lhuseya hoh ndet sooneya nalhdzooh, 'et 'ilhunuh dune Matthew hiyulhni, 'et usda yunilh'en. "Sunanyalh," yulhni. 'Et didinya 'ink'ez yuk'ah ts'ih oot'en ka yuntezya. ¹⁰ Sizi yukoo ts'ih daninya 'ink'ez buzih usda bula na'utet'ah. Sooneya 'ilhunanowez'ah 'ink'ez lubeshi 'ulh'en, 'en chah koo dahuníndel 'ink'ez Sizi 'ink'ez yugha hoodul'eh hubulh hubulana'hut'ah. ¹¹ 'Ink'ez ndunnah Pharisee hinilh'en hoh yugha hoodul'eh hubuhoodulhkut, "Nuhodulh'eh, 'et di ka sooneya 'ilhunanowez'ah 'ink'ez lubeshi 'ulh'en chah hubulh na'ut'ah?" ¹² 'Et Sizi bubulh údants'o daja hiyulhni 'et ndo búlhni, "Ndunnah soo 'ínt'ah 'aw yoo be duyin ka cha'hunizun. Nduda, 'en zeh yoo be duyin ka' huninzun. ¹³ 'Et huwa ahdulh 'ink'ez ndet 'uk'e'whe'edúguz hoh 'et hodoohlú'eh, "Uyoon hubugha te'ntehzilh 'et nuhts'uh hukwa' nuszun. Ndai Yak'usda bukwy'uzdai k'ut hidutelhk'un, 'i buka' cha'núszun,' ni. Si chah whuz na'a, 'aw dune ts'ah'un 'uhint'ah, 'aw hubuka ilah whusáya. 'Et lubeshi 'uhulh'en, 'en bulubeshi ch'a bubení naháhundunooleh ka, 'et huba whusáya."

John yugha hoodul'eh, 'en sahá'delya 'et Sizi hukwa hiyoodulhkut

¹⁴ 'Aw 'et John yugha hoodul'eh, 'en Sizi ts'un hunindel hoh hiyoodulhkut, "Dáhoont'ah huwa wheni chah 'ink'ez Pharisee, 'en chah lhat hoh sahá'delya. 'Ink'ez nyun ngha hoodulh'eh, 'en 'aw sahá'chahudulhuye?" ¹⁵ 'Et Sizi ndo búlhni, "Ndun bu'at whutele, 'en bulh dunekah 'awhuz hiyulh 'int'ah, 'en chah ih soo sahá'hudutelyih? 'Awundooh! 'Et whunts'ih dubulh dunekah buch'a nahítelhtelh, 'et t'eh zeh sahá'hudutelyelh. ¹⁶ 'Ink'ez chah, 'aw 'uda, 'i dzoot 'aw k'andit, 'i naih be naoohlkhut ghaít'ah. 'Et nyoo k'andit, 'i naih naootéltulh 'ink'ez buts'u hanaitech'ulh, 'et 'o nus hootétsi'. ¹⁷ 'Et doo chah, 'aw k'an mai too, 'i 'aw 'ujut, 'i 'uzus be yóolhdzeh ghaít'ah. 'Et nduyínla t'eh, 'et sih bukóltalh. 'Et nyoo k'an, 'i mai too ts'iyawh nadutejulh, 'ink'ez ndi 'uzus 'i chah tinta' tet'ilh. 'Et k'an mai too, k'an 'uzus 'i be híyalhdze t'eh, 'aw tinta' 'oot'en ghaít'ah."

Sizi 'uski yula ilhchoot hoh dinadija 'ink'ez 'ilhunuh ts'eke soo na'yinla

¹⁸ 'Et njan dahooja 'awhuz howu yalhtuk khunyaz 'ilhunuh moodih yughu ninya 'ink'ez yubut nachániti. 'Et ndi yulhni, "Sutse' k'an 'ahoh dazsai. 'Et whunts'ih soo tulih sukoo ts'ih tónya, 'ink'ez nla be buk'édolnih, 'et sih nakhóotna!" ¹⁹ 'Et Sizi didinya 'ink'ez yuntezya. Yugha hoodul'eh, 'en chah ts'iyawh hiyulh 'ut'en. ²⁰ 'Et wheghah hedulh hoh khunyaz 'ilhunuh ts'eke, 'en lanezi 'o 'at nat (12) naooduzuk inle hoh 'uskai 'uyulh'en. Ndun ts'eke Sizi yut'ak ts'ih yugha ninya 'ink'ez nayits'uz, 'i yus ts'ih yut'agheznai. ²¹ 'Et ndutenilh whuts'uh dich'oh nduna'dudútni, "Ants'ih bunaih but'aghénaí t'eh, 'et sih soo na'oosneh." ²² Sizi yuts'u nálha'a 'ink'ez yunilh'en 'ink'ez ndi yúlhni, "Stse', nduk 'undunilt'uk! Be 'alha' hoont'ah, 'i mba 'alha' 'int'ah 'et huwa soo na'inja." 'Et whuts'un soo na'uja. ²³ 'Aw 'et Sizi ndun moodih bukoo ts'ih daninya hoh ndi be ts'ujun, 'i flute hiyulhni, 'i hiye ujun hoh hubunilh'en. 'Et 'onghunnah tube tahúdetnik hoh tso yahalhtuk, 'ink'ez ndo búlhni, ²⁴ "Az náhdulh! Ndun ts'ekeyaz 'aw dáchaitsal, 'ants'ih nanisti ho' 'int'ah." 'Et highhudloh. ²⁵ 'Et dune ts'iyawh 'az whenaóobahalh'a. Sizi bukoo

ts'ih daninya hoh 'uski yula ilhchoot ibulh dinadija. ²⁶ 'Et dahooja, 'et yun k'ut ndulhcho 'et hukw'u nahuwhulnuk.

Nanah dune chawhés'en, 'en Sizi soo na'binla

²⁷ 'Aw 'et Sizi natesja hoh nanah dune chawhés'en hiyuntez'az 'ink'ez hikazulh, "NeMoodihti David buts'u hainzut negha te'nenzeh!" ²⁸ 'Et Sizi koo ts'ih daninya hoh ndunnah chawhés'en highudani'az. 'Et Sizi ndo búlhni, "Nuhwhuba 'alha' hoont'ah ih njan 'et dutésnih huba?" 'Et 'uhiyulhni, "A, neMoodihti!" ²⁹ Buna yut'agheznai 'ink'ez ndo búlhni, "Nts'e na'a nuhwhuba 'alha' hoont'ah, whuz na'a 'uhóneh." ³⁰ 'Et 'ahoh nahitát'en 'ink'ez honilh'en. Sizi khunek ulhtus, 'i be ndo búlhni, "Khun 'uyoon dóohni gunih!" ³¹ 'Et whunts'ih tináhunt'az 'ink'ez ndi keyah ndulhcho ts'iyannah ndo badáni.

Huba 'alha' cha'hoot'ah, 'en 'uhutni, "Sizi 'en netsudule ye ulhtus, 'i be 'ut'en"

³² 'Et tinahúndel 'ilhunuh dune 'aw yachalhtuk, ntsi' nududeh, 'i buyidínda 'et huwa. 'En Sizi highu hínihilhi. ³³ 'Et ndun ntsi' nududeh, 'i ye yáhanainanyoot. Ndun dune 'aw 'et yawhénihilhtuk. 'Et 'ilhunahuwésdel 'ulhódutni, "Israel yun k'ut nduhoolhcho hoh 'aw ndez na'a cha'whúsne, 'et k'an ts'iyai 'et 'udechoo ndúhooja!" ³⁴ 'Et ndunnah Pharisee nduhúttni, "Ants'ih ntsi' nududeh, 'en bumoodih ye ulhtus, 'i bugha ndi nududeh ntsi' yuts'u hanaínanyoot!"

Sizi 'en dune hubugha te'ninzun

³⁵ 'Aw 'et Sizi njan keyah whuti 'ink'ez keyah whuyaz chah nduhóolhcho nusiya. 'Ink'ez Lizwif hubuluglez ndi khunek unzoo, 'i be yak'uz k'úne' whul'en, 'en hubugha wheboodulh'eh. 'Et dune ndunnah buyust'e nduda, 'en ts'iyawh soo na'bulh'en. ³⁶ 'Ink'ez 'ilhunahuwésdel hubunilh'en. 'En ts'iyawh nihunentsai k'ah hanul'en, 'aw 'uhoooneh ghaít'ah. 'Ink'ez ts'iyaintsuk ladetnik li'hut'en. 'Ants'ih sheepyaz lhanah 'aw hubughunli hoolah li'hint'ah. ³⁷ 'Ink'ez yugha hoodul'eh, 'en ndo búlhni, "Alha 'aw 'et ha' nukat newhúninzut 'ink'ez t'l'o mai lhai suli, 'et whunts'ih ndunnah 'uhut'en, 'en 'aw soo cha'huniltsuk. ³⁸ 'Et huwa Yak'usda ha' nukat whumoodih, 'en 'uyoon 'uhut'en chah whusáboolh'a, 'et huba tenadoohdli," hubúlhni.

10

Lanezi 'o 'at nanah (12) whel'a huboozi yuk'e'tegus

¹ 'Et lanezi 'o 'at nanah (12) Sizi yugha hoodul'eh, 'en 'ilho 'anih hubudáni. Ntsi' nududeh, 'i 'en ts'iyawh ndet whehíltus chah, 'ink'ez k'une' bool'en ka, 'et chah, 'ink'ez ndet hukw'e húndudá chah, 'et ts'iyawh 'et whuch'a soo na'botelilh, 'et chah ts'iyawh butl'ahó'ai. ² Njan 'et lanezi 'o 'at nanah whel'a huboozi yuk'e'tegus; 'udechoo Simon, 'en Peter chah hiyulhni; 'en bulhutsin 'en Andrew hiyulhni; 'et doo chah James chah Zebedee buye', 'ink'ez John 'en chah 'en bulhutsin 'int'ah; ³ Philip 'ink'ez Bartholomew; Thomas 'ink'ez sooneya nalhdzooh Matthew hiyulhni; James 'en chah Alphaeus buye' 'int'ah, 'ink'ez Lebbaeus 'en buboozi 'udek'elh'az Thaddaeus hiyulhni; ⁴ 'et Simon chah, 'en Canaan yun k'ut whut'en 'int'ah, 'ink'ez Judas Iscariot 'en 'uja Sizi be 'onket 'int'ah.

Ndunnah lanezi 'o 'at nanah, 'en Sizi hubutelh'alh

⁵ 'Aw 'et ndunnah lanezi 'o 'at nanah, 'en nts'e 'uhutet'ilh, Sizi whuz hubutelh'alh. 'Et khunek ulhtus, 'i hubutl'aida'ai hoh ndo búlhni, "Khun 'udun yun k'ut whut'en hubuti ts'ih teh toohdelh gunih. 'Ink'ez Samaria hubukeyah ts'uti whuz teh toohdelh gunih. ⁶ 'Et Israel buts'u hainde, 'en 'ants'ih sheep tinta nilh'az, 'i lí'hint'ah, 'en zeh hubuts'un toohdelh. ⁷ 'Aw 'et ahdulh hoh hubutah lholhdelh, njan 'et hubudutéhnih, 'Nts'e na'a

yak'uz dune k'úne' whul'en, 'aw 'et nilhdukw suli.' ⁸ Nduda 'ink'ez buka whulhjut, leprosy hiyúlhni, 'en chah ts'iyawh soo na'boolh'en. Yaidla chah dinábudóohlelh. Ntsi' nududeh, dune hubuts'ah hanábunoohyukw. Ndai 'ants'ih nuhgha nkat, 'i chah 'ants'ih huwaóohle. ⁹ Khun teh sooneya nuh-sooneya zus be óohdzaih gunih! ¹⁰ Khun téhdulh t'eh hoonliyaz toohla gunih. Ezdla 'ink'ez kesgwut, 'i chah 'ink'ez nankoh ts'oozt'an 'ink'ez nuhtuz. 'Alha ndan 'ut'en, 'en nts'e na'a ne'ut'en, 'en huba soo 'úlzoo dant'i hiye ndunidzit 'i hubutl'ahó'ah huba' hoont'ah. ¹¹ Ndet keyah ts'ih téhdulh 'et keyah whuyaz k'us keyah whuti, 'et ndunnah keyah whut'en, 'en hukwa boodolhkut k'us ndan simba dune budzi unzoo, 'en bukoo doolhúts'i. ¹² 'Et hubugha danáhdel t'eh, ndunnah bukoo hudemhts'i 'i ts'iyawh hoonzoo nuhghá holts'it, nuh-whuba hukwa' nídudzun, 'et whuz na'a 'et ndubudóohni. ¹³ 'Et ndunnah bukoo 'et hudemhts'i, 'en huhóont'i hubugha danáhdel t'eh, 'et nuhdzi dant'ah, ts'iyawh hubuts'un be óolnih. 'Aw 'et nduchahit'ah t'eh, daja hubudáhni, 'aw nuhwhula'hooneh ghaít'ah. ¹⁴ 'Et ndunnah 'aw nuhghun nuchahiyal 'ink'ez chanohuhoozilhts'ai t'eh, 'et bukoo tinaoohdelh 'et nyoh keyah whuti 'et chah whuch'a naoohdelh. 'Ink'ez nuhke ts'iyawh lhez ch'a naoohghat. ¹⁵ 'Alha ndun whudusni ndet dzin dune ba nahutedeh whusawhélts'ut t'eh, ndunnah Sodom whut'en 'ink'ez Gomorrah whut'en chah, njan keyah whut'en ndunnah nuhghu núcayal, 'en 'o nus 'uwhultsi' hubugha óotelts'ulh.

Sizi 'utni, "Si soozibugha ts'iyannah nuhts'u dutetnih"

¹⁶ "Njan whunulh'en, 'ants'ih sheep yus yugha wélh'az li'hoont'ah ts'ih whuz nuhwhutelh'a. 'Et huwa tl'ughus k'una'a whunih wáhle, 'ink'ez dut'aiyas, dove hiyulhni, 'i k'una'a 'aw dune ndóolhdah gunih. ¹⁷ Bulunah dune buch'a kháhdli. 'En Lizwif naheyelh, 'en hububut nenóhotelelh. 'Ink'ez Lizwif luglez húbez ts'ih 'et nuhohóotelhtsus. ¹⁸ 'Et 'ants'ih yun k'ut whumoodih 'ink'ez hubidayi cho chah si sugha 'en hububut nenóhotelelh. 'Ink'ez si sugha wheoobuntelhtun. 'Udun yun k'ut whut'en, 'en chah si sugha wheoobuntelhtun. ¹⁹ 'Aw 'et whutl'anohuhanla t'eh, nts'e na'a daja dutehnih, 'et huwu ni wahle gunih. Nts'oh howa whudezulh whe ndai be yátelhtuk, 'i 'et t'ewhunoohzeh. ²⁰ 'Alha 'aw nuhwhenich'oh ilah yatelhtuk. Nuhwhe'aBá buyégha 'i 'uduténih. ²¹ 'Et dune dulhutsin datétsah ka whutl'aítelhtelh. Bu'abá 'en buzkeh chah whuz hubutelih. Bubuzkeh budusnekah chah hubuch'a nehúdutedulh 'et dahutetsah huwá botelelh. ²² 'Ink'ez si soozibugha ts'iyannah nuhts'u dutetnik. 'Et whunts'ih ndunnah 'udek'elh'az whuts'un 'et whechahítsaz, 'aw 'en zeh hudutejih. ²³ 'Et whunts'ih njan keyah 'en dzuh nanóhahulhdzut t'eh, 'et 'udun keyah ts'ih hubuch'a tóohdelh. 'Et keyah whuti 'et chah dzuh nunohohulhdeh t'eh, doo chah 'o 'un keyah hubuch'a tóohdelh. 'Alha' dusni 'et yinkak dune ye' whusateyalh whutsuh, 'aw njan Israel hits'uh hainde, 'en hubukeyah ts'iyawh whutah lhóhdelh ghaít'ah. ²⁴ Dune yugha hoodul'eh, 'en 'aw yuba dune hoodulh'eh hubugha ndoh cha'it'ah. 'Ink'ez be 'ulhna, 'en chah 'aw dumoodih bugha ndoh cha'it'ah. ²⁵ Dune yugha hoodul'eh, whuyodulh'eh k'una'a 'oot'e huba' hoont'ah, 'ink'ez be 'ulhna, 'en dumoodih k'una'a 'oot'e huba' hoont'ah. 'Et si Beelzebul* suhútni t'eh, 'et nuhwheni sugha hoodul'eh, nuhwheni chah whuz na'a zeh 'et ndunohoduténih! ²⁶ 'Et huwa 'en bube noolhújut gunih! Ts'iyaitsek lubeshi whu'iz 'int'ah 'ink'ez ntelh'i, 'i ts'iyawh ts'et haóotekulh 'ink'ez ts'iyannah 'et t'ehontezeh.

Yak'usda 'en zeh be noolhújut

* **10:25** Ndunnah buboozi, Beelzebul, 'en ntsi' hubumoodihti 'int'ah, ni hoh 'utni.

²⁷ “Njan daja nuhwhudusni tsahólhgus ts'et whucho howu yaoolhtuk. Ndet whu'iz whudahts'o, 'et bun k'ut whuts'un khunekti be howu yaoolhtuk. ²⁸ Ndun neyust'e hughan 'et 'aw nezul 'i hizoolhghelh ghaít'ah, 'et ndunt'ah, 'en bube noolhújut gunih. 'Et whunts'ih Yak'usda ndun nuhzul nuhyust'e bulh kwuncho yuh ts'ih nuhtenoh, 'en zeh be noolhújut. ²⁹ 'Alha ih ndi nankoh 'uschas, 'i 'ilho sooneya chadíti, 'i 'et 'ultsuk 'i be oohket? A, 'alha 'uhoont'ah. 'Et whunts'ih ne'aBá 'aw hukwa cha'nizun t'eh, 'aw 'ilhunuh ndi yun k'ut naoolts'it ghaít'ah. ³⁰ 'Ink'ez nuhtsigha, 'i ts'iyawh 'ilhuk'i hoh t'eininzun. ³¹ 'Et huwa khun whenoohlhujut gunih. Nuhwheni 'uschas buch'a degha nus déhti hoh aht'ah.

Dune nalh Sizi 'en zeh neulhyis 'int'ah uzdooni

³² “Et huwa ndun dune nalh 'et ndutni, Sizi, 'en zeh si sulhyis 'int'ah, ndun 'et ndutni, se'aBá yak'uz usda, 'en dutesnilh, ndun 'en se'ildzun 'int'ah. ³³ 'Et whunts'ih ndunnah dune nalh si hubulhyis ilah hutni t'eh, si chah se'aBá yak'uz usda ndunnah, 'en 'aw se'ildzun chahilah dóosni.

Ndan si sugha dich'oh ye khuna, 'i whuladetnik, 'en ndai ye khuna, 'i nayité'ah

³⁴ “Ts'iyannah lhts'un ts'ah'un 'uhoot'e, 'et hukwa ndi yun k'ut whusáya noohzin gunih! 'Aw lhts'un ts'ah'un 'uhoot'e hubugha ootés'ah hukwa ilah whusáya. 'Et soh cho li'int'ah, 'i hubugha ités'ah 'et huba whusáya.

³⁵ Dune bu'abá ch'a nidúteyalh 'ink'ez butse' 'en be'ama ch'a nidúteyalh.

'Ink'ez 'en buyas'at 'en dubez ch'a nidúteyalh, 'et hukwa whusáya.

³⁶ Ndunnah dune bukoo huwhut'i,

'en chah hich'a nidutédulh.

³⁷ Ndan bu'abá k'us bu'ama, si sughanus hubuk'entsi' t'eh, ndunt'ah, 'en 'aw suba soo cha'hildzooh! 'Ink'ez ndan buye' 'ink'ez butse' bulh, si sughanus hubuk'entsi' t'eh, 'en 'aw suba soo cha'ildzooh. ³⁸ 'Ink'ez chah ndunnah bulhdulalhgus chadestil, 'ink'ez suchahunesdulh t'eh, 'en ts'iyawh suba soo cha'hildzooh. ³⁹ Ndan dich'oh ye khuna, 'et hoolhyih hukwa 'ut'en, 'en ye khuna ts'iyawh tinta ooté'ah ho' hoont'ah. 'Et whunts'ih ndan si sugha dich'oh ye khuna, 'i tinta ooní'ai, 'en ye khuna, 'i nayité'ah.

Ndan hoont'i hoh danyunilhti, 'en si chah hoont'i hoh dasunílhti ho' 'int'ah

⁴⁰ “Ndan hoont'i hoh danyunilhti, 'en si chah hoont'i hoh dasunílhti li'hoont'ah. Ndan whesalh'a, 'en chah hoont'i hoh daínílhti ho' hoont'ah.

⁴¹ Ndan nus whunilh'en, 'en 'et huwa dune hoont'i hoh dainílhti. 'Et nts'e na'a buba k'elha whutele, 'et ndan chah whuz na'a zeh buba k'elha whutele. 'Et whuz na'a zeh ndan ts'ah'un dune, 'en 'et huwa dune hoont'i hoh dainílhti, 'en ndet buba k'elha whutele, 'et whuz na'a zeh ndunnah chah ba k'elha whutele.

⁴² 'Ink'ez ndunnah si sugha hoodul'eh, 'ink'ez ndun hubutah k'us hukw'elh'ih 'int'ah, 'en sugha hoodul'eh 'int'ah 'et huwa dune too nezk'uz yubainkai t'eh, 'alha 'ún whudusni, 'en whunts'ih buba k'elha whutale ho' hoont'ah.”

11

Nanah John yugha hoodul'eh, 'en John Sizi ts'un whebalh'a John dune too be ulhen, 'en nanah yugha hoodul'eh, 'en Sizi ts'un wheóobalh'a

¹ 'Aw 'et Sizi lanezi 'o 'at nanah yugha hoodul'eh, 'en ts'iyaintsuk ndo budáni 'ustl'e' 'udeja, 'et bughu whénya. 'Uts'un keyah ts'un whenya dune hodutelh'eh 'ink'ez hubulh yatelhtuk wheni. ² 'Aw 'et John ndalts'ut 'et Christ be 'ut'en k'ah whulh uduzts'ai. 'Et huwa nanah yugha hoodul'eh, 'en John Sizi ts'un wheóobalh'a. ³ 'Et hiyoodulhkut, “Nyun ih whusatéyah inli, k'us 'uyoon tulih ka ts'itóo'en?” ⁴ 'Et Sizi njan ndo búlhni, “John bugha nanaht'az

t'eh, ndet whunél'h'en 'ink'ez ndet whudáhts'o, 'et ts'iyawh ndudóohni. ⁵ 'Et chawhés'en chah 'et honilh'en nasdli. Dzuh nuhudelh, 'en soo nahudelh nahúsqli. Hubuka whulhjut chah leprosy hiyúlhni, butsun hoolah nasdli, 'ink'ez cha'hudusts'uk chah 'ahudits'o nasdli. Yaidla chah dináhudidel 'ink'ez tel'en chah khunek unzoo, 'i be hubulh yaintuk ho' hint'ah. ⁶ 'Et ndunnah si sugha 'aw buba dzuh chailel t'eh, 'en degha nus hoonzoo bughá whults'ut." ⁷ 'Et ndunnah nanah whehá'az, Sizi ndunnah 'ilhunahuwésdel, 'en njan John bugha hubulh yawhenilhtuk hoh ndo búlhni, "Di teh'ilh ka dune chahóot'ih ts'ih whéhdel? Tl'o ghazilh nonulhts'i, 'i tulih teh'ilh nahzun ih? ⁸ Ndet simba hukwa tsi hooqli whuteh'ilh? Dune naih duchut, 'i be soo naduja, 'en tulih teh'ilh nahzun ih? Sih soo zelhts'ai, ndunnah naih duchut, 'i be dune unli, 'aw 'en zeh hubudayi cho bukoo hudelhts'i. ⁹ 'Et ndet whuteh'ilh hukwa tsi hóohli? Nus whunilh'en tulih? A, 'alha' hoont'ah. 'Et 'unhwhudúsni, nus whunilh'en degha nus hoonzoo whunalh'en! ¹⁰ Ndun 'en bugha 'uk'une'úsduguz, 'i 'et ndutni,

'Sih soo zelhts'ai 'uyoon khunek suba na'a, 'en ntsuh telh'ah.

Nts'oh lhutéyah mba lhaooodutelih ka.'

¹¹ Ts'ah'un na'a 'ún whudusni, ts'iyannah whuzdli, 'aw John dune too be 'ulh'en degha nus dezti hoolah. 'Et whunts'ih nts'e yak'uz k'úne' whul'en, ndan degha nus dezti chailah, 'en degha nus uncha ho' int'ah. ¹² 'Et hoh da John dune too be 'ulh'en be whe' whudit'en, 'et k'an dzin whuts'un, yak'uz nts'e k'úne' whul'en, 'et yak'uz huholhdel, 'ink'ez huholhdel, 'en ts'iyawh yak'uz da'hudutóoyis hukwa' hut'en. ¹³ John whusateyalh whuts'un, nus whunilh'en hube' dustl'us, 'ink'ez Moses be' dustl'us chah, ndet daóotenilh hubudani, 'et 'uwhulhni. ¹⁴ 'Et daja nuhwhudúsni, soo nuhwhuba 'alha' whutet'ilh t'eh, ndun nus whunilh'en Elijah whusateyalh, John 'en 'int'ah, 'et huwa. ¹⁵ Ndán budzo hooni, 'en 'ahoozólhts'a huba' hoont'ah. ¹⁶ 'Et yuk'edíndeh nts'e na'a simba nuhwhuba lhuzih neobooosdlel? Ndez na'a njan duhínt'ah hoh 'uskehyaz nduhúlt'ah 'ink'ez nts'e ts'uyi, 'i be 'ooket 'et hudelhts'i. 'en dudulh dunekah buts'u hahuyih hoh ndó buhútni,

¹⁷ 'Be ts'ujun, 'i nuhwhuba be ts'ujun,

'et whunts'ih neba chanuzahdak.

'Ink'ez nuhwheni nuhwhuba tso ts'inli,

'et whunts'ih 'aw wáhtso ghaít'ah!"

¹⁸ 'Et John dune taninya hoh 'aw cha'us'al 'ink'ez 'aw tachasnai. 'Et highu yalhtuk ho' hutni, 'Nududeh, 'i ntsi' buyudínda,' dahni. ¹⁹ 'Et yinkak dune ye', 'en dune hubutaninya hoh hubula whé'ni'al 'ink'ez hubula tawhénitnai, 'et 'uhutni, 'Ndun 'en bucha hooncha 'ink'ez mai too chah 'utnai. Sooneya nalhdzoo 'ink'ez lubeshi 'ulh'en, 'en hubulh dunekah 'int'ah,' dákni. 'Et whunts'ih ndunnah Yak'usda bugha whunih suli, 'en ts'iyawh ndi hiye whunih, 'i be ts'ah'un 'uhint'ah suli."

Ndunnah hubeni lht'anahádunooleh hukwa cha'hunízun, 'en dawhultsi' hubugha óotelts'ulh

²⁰ 'Et hukw'elh'az nts'e keyah whuti totsuk 'ut'en ncha, 'i ba' yílya, 'i ndut'en hukwa' budáni. 'Aw hubeni lht'anahádunooleh hukwa cha'hunízun.

²¹ 'Et huwa 'utni, "Nuhwheni Chorazin whut'en, 'ink'ez nuhwheni Bethsaida whut'en chah, dawhultsi' 'et nuhts'u whélts'ulh! Soo cho soozélhts'ai 'uda ndet nduhóolcho hoolhtus nuhnat ne'whust'en, ndunnah Tyre 'ink'ez Sidon whut'en, 'en chah bunat 'et ndúhooja t'eh, 'uda da hubeni lht'anahádunooleh, 'ink'ez doso naih be húdelhts'i 'ink'ez lhez tsi la hidudzih wule da. ²² 'Et whunts'ih ndun whudusni, ndet dzin nuhwhuba whusawhutelts'ulh nts'e

na'a nuhwhuba nahutedeh ka, 'et ndunnah hubulh dawhutenilh, 'et nuhwheni 'o nus 'uwhulsi' 'et nuhts'u whelts'ulh. ²³ 'Ink'ez nuhwheni Capernaum whut'en nduk yak'uz huba soo áht'ah nahzun ih? 'Awundooh! 'Et kwuncho yuh ts'ih nuhotelhdulh! 'Alha 'uda ndet hoolhtus nuhnat ne'whust'en, ndunnah Sodom whut'en, 'en chah bunat 'et ndúhooja t'eh, 'awhuz da bukeyah 'et whuz'ai wule da. ²⁴ 'Et whunts'ih ts'ah'un 'un whudúsni, dahoont'ah nuhwhuba whusawhutelts'ulh, nts'e na'a nuhwhuba nahutedeh ka, 'et ndunnah Sodom whut'en hubulh dawhutenilh, 'et nuhwheni 'o nus 'uwhulsi' 'et nuhts'u whélt's'ulh."

Sizi ndo búlhni, "Nuhwheni ts'iyawh dez ahdulh 'ink'ez natelhuyis nuhgha óotes'alh"

²⁵ Sizi 'awhuz hubulh yalhtuk 'et ndutni, "ABÁ nyun nyudélhti. Yak'uz 'ink'ez yun k'ut huMoodihti inli. Whunih 'ink'ez hoodul'eh, 'en ndi 'i ts'iyawh buch'a whunte'i. 'Et whunts'ih 'uskiyaz li'int'ah, 'en bunalhts'et hahó'ai. ²⁶ 'Et whunts'ih 'aBÁ ndet 'uhóonla hoonínt'i. Ndoh honeh. ²⁷ Se'aBÁ ts'iyawh stl'ahónla, 'ink'ez 'en buYe' ndan unli ts'iyannah t'ehonízun. Ba'aBÁ 'aw 'en zeh t'eininzun. 'Ink'ez ndan be'aBÁ unli, buYe' 'aw 'en zeh t'eininzun. 'Ink'ez ndan buYe' 'onghun ts'iyawh wheoobuntelhtun hukwa' ninzun t'eh, 'en zeh huba' hoont'ah. ²⁸ Nuhwheni ts'iyawh ndan 'ut'en ulhtus, 'i 'ulh'en 'ink'ez ndan ndaz, 'i nuhle li'aht'ah, nuhwheni ts'iyawh dez ahdulh 'ink'ez nats'ulyis nuhgha óotes'alh. ²⁹ Ndai se' 'ut'en, 'i ulhchoot 'ink'ez nedúht'ah li'ahleh 'ink'ez si sugha hoodulhú'eh. 'Aw dune ch'a nucha'zust'en 'ink'ez ts'iyannah tah te'dudulhú'en 'et huwa. 'Et whuz na'a nuhzul nátelyis huba nahóh'ah. ³⁰ Ndi úlhchoot, 'i 'aw nuhwhuba hubugha chahóolnah tele, 'ink'ez se'ut'en k'ah chah hoondzak tele."

12

Sizi 'en nats'ulyis dzin whunts'ih huMoodihti ho' 'int'ah

¹ 'Aw 'et 'ilhut dzin 'et Lizwif huba nalyis dzin huhoolh'i. Hoh da Sizi tl'o k'ut íyalh, 'ink'ez yugha hoodul'eh, 'en chah hiyulh hudulh hoh buye'élts'ul. 'Et tl'o mai huyoonye 'ink'ez hiya'alh. ² 'Et ndunnah Pharisee hiya'en ibulh, Sizi hiyoodulhkut, "Ngha hoodul'eh dahút'en hubunilh'en ih? K'an dzin nats'ulyis dzin 'uhoont'ah. 'Aw 'et nduhóot'en huba cha'hoot'ah!" ³ 'Et Sizi ndo búlhni, "Et hubudayi cho David daja 'aw ih hukw'e yachasulhtuk? 'Et hoh da David 'ink'ez hiyulh 'ut'en hubuye'élts'ul? ⁴ 'Aw 'et Yak'usda bukoo daninya ndi lhes ndai Yak'usda hubugha it'ah, 'i yu'alh 'ink'ez hiyulh 'ut'en, 'en chah hiyan'al. Nawhulnuk 'aw 'en zeh huyoo'alh huba' hoont'ah, 'et whunts'ih David 'ink'ez hiyulh 'ut'en 'en chah nduhuja. ⁵ 'Ink'ez Moses be' dustl'us chah, 'aw buk'eyáchasulhtuk hoh ih dahni? Ndez na'a njan ndutni, náwhulnuk nats'ulyis dzin luglez whucho dahunídel 'ink'ez 'et 'uhut'en. Nts'e na'a 'uhuhoolhdzun, 'et k'uhoninyuz, 'et whunts'ih 'aw buk'echahoolts'ulh. ⁶ Whuz na'a ndun whudusni, njan nuhwhutah, 'et 'ilhunuh 'en njan luglez whucho whuch'a degha nus 'ilcho 'int'ah. ⁷ 'Et 'uk'e'whusdúguz 'et ndutni, "Uyoon bugha te'untezilh, 'et nuhts'uh hukwa' nuszun. Ndai Yak'usda bukw'uzdai k'ut hidutelhk'un, 'i buka cha'nuszun,' ni. 'Et ndi njan ndutni, 'et 'eoonaahzun t'eh, 'et sih ndan buk'echáwhulhts'it, 'en 'aw buk'ehoh'ah hukwa aht'en ilah! ⁸ 'Et huwa yinkak dune ye' nats'ulyis dzin 'et whunts'ih 'en huMoodihti ho' 'int'ah."

Nats'ulyis dzin 'ut'en unzoo, 'i 'uts'oolh'en

⁹ 'Aw 'et hukw'elh'az bughuh whinya hoh ndunnah Lizwif hubuluglez ts'ih daninya. ¹⁰ 'Ilhunuh dune 'en 'et usda 'ink'ez 'aw bula 'aw ye nucha'ust'en.

'Et Sizi hiyoodulhkut, "Et nats'ulyis dzin soo na'uztelnih huba' hoont'ah ih?" 'Et hoonliyaz highu nahooté'ah hukwa' hut'en. ¹¹ 'Et ndo búlhni, "Ndan nuhtah 'utenilh sheepyaz tsak'et 'ált's'ut hoh hanaíteltelh nats'ulyis dzin 'et whunts'ih? ¹² 'Et dawhulcho, 'i be dune sheep degha nus dezti ho' 'int'ah? 'Et huwa netl'awhélts'ut nats'ulyis dzin 'ut'en unzoo, 'i 'uts'ulh'en whuba." ¹³ 'Et ndun dune nduyúlhni, "Nyla lhk'unadíntsih!" 'Aw 'et lhk'unadezzi hoh ílhk'uz ts'ih k'una'a sóo na'uja. ¹⁴ 'Et Pharisee 'az whuhandel 'ink'ez huwu yahalhtuk nts'e na'a hituzelhghelh hukwa.

Sizi ndan unli, 'aw whebuntelhtun hukwa cha'nínzun

¹⁵ 'Et Sizi hituzelhghelh huwu yahalhtuk, 'et t'ewhunanzin ibulh bughuh whenaja. Lhanah nduda hiyuntezdel, 'en ts'iyawh soo naóo'balh'en. ¹⁶ Khunek ulhtus, 'i be ndo búlhni, "Uyoon ts'un sughu yaoolhtuk gunih." ¹⁷ 'Et nus whunilh'en Isaiah, daja ni, hoh tuné'whust'en. Ndi khunek njan ndutni,

¹⁸ "Ndun suYe' se'ustlen,
 'en 'utahaílhti 'int'ah.

'En buk'esi'.

'En bugha suzul tube yé hoont'i.
 Suyéghah buk'eidutelhdoh.

'Et nts'e na'a dahoont'ah dune ba nahesyelh,
 suYe' whuz na'a zeh 'udun
 yun k'ut whut'en ndo buduténilh.

¹⁹ 'Aw dune budulhyah 'udooni ghaít'ah.
 'Aw hububúlh 'aooldzul ghaít'ah.
 Ti nuya t'eh, 'aw hubulh dóoltul ghaít'ah.

²⁰ 'Aw tl'oghzilh lhbe né'dujut, 'i whunts'ih k'udóojis ghaít'ah.
 'Aw too dezk'un 'aw 'et nanutneh, 'i whunts'ih, 'aw nainoolhneh ghaít'ah.
'Aw 'et Yak'usda lubeshi ba naheyeh 'et whuch'a nilhde t'eh, whuz na'a zeh suYe' 'utet'ilh.

²¹ 'Ink'ez 'udun yun k'ut whut'en ndun suYe' se'ustlen,
 'en boozi, 'i be 'et whut'anihíntetan."

Ndunnah lhch'a nihudendel, 'en chah hoolah hutele

²² Njan 'ilhudzin 'et 'ilhunuh ntsi' nududeh buyudínda, 'en chawhés'en 'ink'ez yaoolhtuk chah ghaít'ah. 'En Sizi buts'un lhgha hidílhti hoh soo ná'yinla. 'En 'ahoh yutá'en 'ink'ez yawhenilhtuk. ²³ 'Et 'ilhunahuwésdel ts'iyawh tube huba hooncha 'ink'ez dich'oh lhulh yáhaltuk, "En 'alha David buts'u hainzut tulih 'int'ah." ²⁴ 'Et Pharisee whulhódants'o hoh 'et 'uhiyulhni, "Ndun Sizi, 'en Beelzebul, ntsi' nududeh bumoodih 'int'ah, 'en be zeh ntsi' nududeh, 'i dune ts'uh hanahinuyukw," hutni. ²⁵ Daja huninzun Sizi t'eeoninzun 'et ndo búlhni, "Yun k'ut k'une' huwhul'en, 'en lhch'a nehúdindel t'eh, 'en ts'iyawh hoolah hutele. 'Ink'ez keyah whuti whudune k'us bukoo hudemhts'i chah, ts'iyawh lhch'a nehúdindel t'eh, 'en chah huholah hutele.

²⁶ Whuz na'a Satan dich'oh dune ts'uh hanainuyukw t'eh, 'et 'alha dich'oh lhch'a detni ho' 'int'ah. 'Ink'ez nts'e na'a hubidayi cho unli, 'ilhuz whutet'ilh?

²⁷ 'Et si Beelzebul 'en be 'ust'en t'eh, 'et t'eh sudahni nuhwheni nuhye'kah, k'us ndan simba ntsi' nududeh, 'i dune ts'uh hanaóobunooyukw? 'Et huwa 'en hubugha t'ewhuntehzeh tink'us údahni! ²⁸ 'Et whunts'ih Yak'usda buyégha be ntsi' nududeh dune ts'uh hanáanusyukw t'eh, 'et 'alha' hoont'ah, nts'e Yak'usda hubidayi cho unli, 'aw 'et nuhghu whults'ut ho' hoont'ah. ²⁹ 'Et nts'e na'a 'utenilh 'ilhunuh dune 'et dune ulhtus bukoo daninya 'ink'ez hoonliyaz yegho telhchulh? 'Aw 'ooneh ghaít'ah. Ndun dune 'udechoo yulhghel t'eh,

'et t'eh zeh ts'iyaituk yegho telhchulh. ³⁰ Ndunnah sulk cha'it'ah, 'en sch'a hudemtni ho' hint'ah. 'Ink'ez ndunnah 'aw dune sula 'ilhuchahowesdele 'en ts'iyawh 'ants'ih yahutedúkulh li'hutenilh.

Ndunnah Ndoni ch'a detni be yalhtuk, 'aw buba whunaoodootnah ghaít'ah

³¹ "Et huwa 'un whuhdúsni, lubeshi ts'iyawh 'ink'ez Yak'usda ch'a yalhtuk, 'et ts'iyawh nuhwhuba whunaoodutelnah. 'Et whunts'ih Ndoni ch'a detni be yalhtuk, 'aw buba whunaoodootnah ghaít'ah. ³² 'Ink'ez ndunnah yinkak dune ye' ch'a yalhtuk, daja hutni, soo buba 'un whutelhdulh. 'Et whunts'ih ndunnah Ndoni ch'a yahalhtuk, 'aw buba 'un whutoolhdelh ghaít'ah. K'an dzin k'us nus de whunts'ih 'aw 'uhoneh ghaít'ah.

Duchun bumai gha dant'i duchun i t'enahzun

³³ "Mai chun unzoo, 'i hanálhyeh t'eh, bumai unzoo tele. 'Et mai chun untsi', 'i hanálhyeh t'eh, bumai ntsi' tele. 'Et bumai whuzdli t'eh, dant'i duchun 'int'ah, 'i bumai bugha t'entedzeh. ³⁴ Nuhwheni ts'iyawh poison tl'ughus buzkeh li'aht'ah! Nts'e na'a ahtsi' 'ink'ez khunek unzoo, 'i be yalhtuk? Nuhdzi ndai be dezbur, 'i be zeh yalhtuk. ³⁵ Dune unzoo 'en ndai unzoo, 'i budzi tuz 'ilhunayoole, 'aw 'i zeh buts'uh haídukat. 'Et dune untsi', 'en ndai untsi', 'i budzi tuz 'ilhunayoole, 'aw 'i zeh buts'uh haídukat. ³⁶ 'Et ndun whudusni ndunnah 'aw khunek cha'it'ah, 'i be yalhtuk, dune ba nahedelh dzin whusawhélts'ut t'eh, nts'e na'a khunek 'i be yalhtuk, whuz na'a buba nahutedeh. ³⁷ 'Et huwa nuhghunek bugha Yak'usda nahl ts'ah'un dune tehle, k'us nuhghunek bugha kwuncho yuh ts'ih téhdulh k'una'a, whuz na'a nuhwhuba nahutedeh."

Sizi buba 'alha' cha'ít'ah, 'en hoonliyaz hooncha tune' whut'en, 'et zeh hukwó'en hukwa' huninzun

³⁸ 'Aw 'et bulunah Moses be' dustl'us 'uk'ununa'úsduguz, 'ink'ez Pharisée, 'en chah 'uhiyulhni, "Dune hoodulh'eh neba huwa 'et'en tune' tant'en nts'uh hukwa' uzninzun." ³⁹ 'Et ndo búlhni, "K'an ndoh whudezulh dune hintsi', 'ink'ez 'ahoolhyez dune ts'eke bulh tinta' hut'ih. Hoonliyaz hooncha tune' whut'en, 'et zeh hukwa hités'en. 'I bugha t'ehonózin. 'Et whunts'ih honilh'en bugá holts'it ghaít'ah. Nts'e na'a nus whunilh'en Jonah bulh dahooja, 'et zeh hote'ilh. ⁴⁰ Njan dúhooja, tat dzin 'ink'ez tat 'ulh'ek Jonah lhook cho chadánda. 'Et whuz na'a zeh yinkak dune ye' 'en tat dzin 'ink'ez tat 'ulh'ek yun yuh ts'ih tédalh. ⁴¹ 'Ink'ez wheghah whezulh dzin dune ba nahutedeh t'eh, Nineveh whut'en, nuhwheni k'andoh whudezulh, 'en nuhwhutah di hudutédluh 'ink'ez nuhwhuba nahoteyeh. Soo cho whunulh'en, hoh da Jonah hubulh yailhtuk da, ts'iyawh hububeni lht'anahádunezdla. 'Aw 'et soo zélhts'ai, 'ilhunuh 'en Jonah degha nus 'int'ah k'an nuhtah siyin. ⁴² 'Et wheghah whezulh dzin dune ba nahutedeh t'eh, 'et nyaz de hubudayi cho ts'eke 'en nuhtah didutéyalh, 'et nuhk'ehóotelts'ulh. Ndi yun k'ut nilhdza hainya, Solomon ye whunih, 'i yudutéts'o ka 'et huwa. 'Et whunts'ih 'ilhunuh Solomon degha nus whunih k'an nuhtah siyin."

Dahooja hoh ntsi' nududeh, 'i doo chah zeh dune buyunaídede t'eh

⁴³ 'Ink'ez ndo búlhni, "Et ntsi' nududeh dune ts'uh hanádide hoh yun whudezgih, 'et whuz nududeh natelyis hukwu nútä. 'Et 'aw nduhóont'ah nachahóo'al. ⁴⁴ 'Et dich'oh na'dudútni, "Et ndun buyudúsda, 'en buts'un zeh natóosja,' ni. 'Et whuz lhghu nadija hoh 'aw hoonli hoolah. 'Et ndun dune budzi yuh chadítsun nawhulhtsi 'ink'ez ts'ah'un na'a 'uja, 'et nahoo'ai. ⁴⁵ 'Ink'ez 'et 'uts'un whedande 'ink'ez skwunlai 'o 'at nanah ntsi' nududeh, 'i 'en degha nus 'ultsi', 'en 'et dune hiyaíndel 'ink'ez 'et nihunina. 'Et ndun dune

ndun hiyudalts'i', 'en 'et whutsuh da 'o nus 'ultsi' suli. Nuhwheni k'an ndoh nuhwheghah whudezulh, nuhwheni dune tube untsi' aht'ah, 'et whuz na'a zeh nuhwhuba 'uwhuténihl!"

Sizi be'ama 'ink'ez bulhutsinkah teh hiyulh yatelhtuk hukwa' huninzun

⁴⁶ Sizi 'awhuz 'ilhunahuwésdel hubulh yalhtuk hoh be'ama 'ink'ez bulhutsinkah teh, 'az nahudelhúya. 'Et hiyulh yatelhtuk hukwa' huninzun. ⁴⁷ 'Et 'ilhunuh dune 'uyulhni, "Nilh'en! Nyu'ama 'ink'ez nyulhutsin 'az nahudelhúya nyulh yahutelhtuk hukwa' huninzun!" ⁴⁸ 'Et Sizi ndi yúlhni, "Ndan su'ama, 'ink'ez ndan sulhutsinkah?" ⁴⁹ 'Et Sizi ndunnah yugha hoodul'eh, 'en butune'úlhge, "Nilh'en ndunnah, 'en su'ama 'ink'ez sulhutsinkah 'uhint'ah. ⁵⁰ Se'aBá 'en yak'uz usda, k'us ndan hik'une' 'ut'en, 'en sulhutsin, sulhtus, 'ink'ez su'ama teh 'uhint'ah!"

13

Khunek be whuts'odul'eh, 'i 'a'nule bugha

¹ 'Et dzin Sizi koo tininya, 'ink'ez bun taba natl'adeda. ² 'Aw 'et dune lhanah higha wézdel 'et ts'i beinya, 'ink'ez ts'i bet natl'adeda. 'Et ts'iyawh taba 'et nahudelhúya. ³ Ndai khunek be whuts'odul'eh, 'i 'et lhelhdun huwa hubulh yalhtuk hoh ndo búlhni, "Sih soo zélhts'ai, 'ilhunuh 'a'nule, 'en 'a'ntelelh ts'ih whinya. ⁴ 'Et 'a'nule bulah ti nanánkat. 'I dut'aiyaz whusahándel 'ink'ez ts'iyawh hineldel. ⁵ 'Et bulah tse tah nanánkat, 'et huwa 'i 'ahoh hanusdúki, 'ankw'us yun hoolah huwa. ⁶ Bughih hoolah 'et huwa hasain'ai hoh ts'iyawh yanúdezgi 'ink'ez hoolah suli. ⁷ 'Et bulah chah whus tah nanánkat. 'I chah whus cho whutah bulh tanenyi 'ink'ez bulh lhéwhuntlah. ⁸ 'Et 'onghoh, 'i yun unzoo, 'i k'ut nanánkat hoh soo hananyi. Bumai buluh lanezi lanezi (100) bumai suli, buluh lhk'utat lanezi (60) bumai suli, 'ink'ez buluh tat lanezi (30) bumai suli. ⁹ Ndan budzo hoonli, 'en soo cho hiyoozólhts'a huba' hoont'ah."

Khunek be whuts'odul'eh, 'i be zeh Sizi hubulh yalhtuk

¹⁰ 'Aw 'et yugha hoodul'eh highu nindel, 'et hiyoodulhkut, 'ink'ez 'uhiyúlhni, "Di ka ndi khunek be whuts'odul'eh, 'i be zeh hubulh yaíltuk?" ¹¹ 'Et ndo búlhni, "Yak'uz be k'úne' whul'en 'aw be whe' hoont'ah hooyah, 'i daja ni, nuhwheni zeh nuhghá whunt'ai. 'Et 'onghun 'aw hubugha chahóolts'uh. 'Et huwa whuz na'a zeh hubulh yalhtuk. ¹² 'Et huwa njan duhoont'ah, ndunnah hoontsoolyaz t'ehonínzun, 'en 'o nus lhat t'ehonínzun, 'et hubugha whútelts'uh. 'Et ndunnah hoonli t'ehonízun, hoontsoolyaz, hodits'o ndai 'aw 'i hiyit'i, 'i whunts'ih bughu nayitélchulh. ¹³ 'Et huwa ndi khunek be whuts'odul'eh, 'i be zeh hubulh yalhtuk.

'Et doo ka honalh'en 'et whunts'ih 'aw chahonilh'en.

'Ink'ez hidits'o 'et whunts'ih 'aw chahodústs'o, 'aw t'ehonoozeh chah ghaít'ah. ¹⁴ 'Et Isaiah nus ho'en daja ni 'en bugha ts'iyawh lhaóodulya. Njan ndutni,

"Ahoolhyez whudahts'o 'et whunts'ih 'aw t'echanuzéhze.

'Ahoolhyez whunulh'en 'et whunts'ih 'aw ts'ah'un nechaóozah'ai.

¹⁵ Ndunnah dune budzi 'ants'ih buba' hoont'ah suli 'et huwa,

'ink'ez 'aw hoonli hodóts'o hoolah,
'ink'ez ndai be 'alha' hoont'ah,
'i 'aw hinoolh'en hukwa cha'hunízun.

'Et huwa chawhés'en lí'hint'ah.

'Et huwa 'aw honóolh'en ghaít'ah,

'ink'ez budzo be 'aw hodóts'o ghaít'ah.

'Ink'ez budzi be 'aw t'ehonoozeh hoolah.

'Et whuz na'a nducháhit'ah t'eh,
 'uda da hubulubeshi ch'a nahulhya wule da,
 'ink'ez da Yak'usda huboolhyih,' ni Isaiah.

¹⁶ 'Et whunts'ih nuhwheni ndai nuhna be whunulh'en, ts'ah'un na'a whunulh'en. 'Ink'ez nuhdzeh hoh soo whúdahts'o, 'et huwa degha nus hoonzoo nuhgħá whults'ut. ¹⁷ Ts'ah'un 'un whúdusni, hoh da lhanah nus whunilh'en 'ink'ez ndunnah ts'ah'un 'uhint'ah, ndai nulh'en, 'i hiyuntelh'ilh hukwa' huninzun, 'et whunts'ih 'aw chahiyí'il! Ndett whudahts'o, 'et soo ts'ah'un hodutéts'o hukwa' huninzun, 'et whunts'ih 'aw chahodíts'il.

Khunek be whuts'odul'eh, 'i be 'a'nule, 'en bugha njan ndutni hoh 'utni

¹⁸ "Et huwa ndi khunek be whuts'odul'eh, 'i be 'a'nulih, 'en bugha, njan ndutni, ¹⁹ ndunnah yak'uz nts'e na'a 'uhuhoohlhdzun whulh 'úhudits'o ndi khunek daja ni hoh 'utni 'et whunts'ih buben be 'aw t'ehonuszun. Ndai dune budzi tuz 'ahinanla, 'i ndun ntsi' whusayih 'ink'ez budzi be hanaída'ah! Ndi 'i 'int'ah, ti 'anélya, 'i 'int'ah. ²⁰ Ndi ndai da tse tah 'anilya, 'i ndunnah 'i k'una'a 'uhint'ah. Ndi khunek hidits'o t'eh, 'ink'ez soo 'ahoh huhóont'i hoh hiyilchukw. ²¹ 'Et whunts'ih dich'oh 'aw bughih hoolah li'hint'ah. 'Et huwa 'astl'iyaz zeh huba 'alha' hoont'ah. 'Ink'ez ndi khunek 'i bugha dzuh nuhudeh 'ink'ez 'onghunnah buch'a hudemtni. 'Et huwa 'ahoh whulahudutnih. ²² Ndai whus tah 'anankat, 'i li'int'ah, 'en ndez na'a 'uhint'ah. 'En khunek hidits'o, 'et whunts'ih ndi yun k'ut huwu ni ts'inli, ndi yun k'ut soo uzde'a 'ohoont'ah, 'et 'i ts'iyawh whus cho 'i be bulh lheyúllhuk ndult'ah. 'Et huwa 'aw lhahúdulya hoole għaít'ah. ²³ 'Et whunts'ih ndet yun unzoo, 'i k'éninkat, 'i li'ínt'ah, 'en ndez na'a njan ndúhinh'ah. Ndi Yak'usda bughunek hidits'o, 'i t'ehinuzih teh daja ni hoh 'utni. 'Et huwa bumai lhai lhih li'hint'ah. Bulah lanezi lanezi (100) suli. 'Et doo chah bulah lhk'utat lanezi (60) suli. 'Et doo chah bulah tat lanezi (30) suli."

'Uyoo khunek be whuts'odutel'eh, 'ints'e na'ayak'uz hubudayi cho 'uhuhoohlhdzun

²⁴ Doo chah 'uyoo khunek be nawhutnuk, 'i be whuts'odul'eh, 'i be hubulh yalhtuk 'et njan ndo búlhni, "Nts'e na'a yak'uz hubudayi cho 'uhuhoohlhdzun, 'et dez na'a njan nduhoont'ah. Dune ndi yun buk'ut 'a'nukat. Unzoo, 'i 'anukat, 'i 'ainanla. ²⁵ 'Awhuz huztez hoh dune yuch'a detni whusainya. 'Et ndi 'ainanla, 'i unzoo, 'i tah, ndi 'anukat, 'i 'ut'antsi' ts'utni, 'i yutah 'ainanla, 'ink'ez whenaja. ²⁶ 'Et ts'iyawh hanáyi hoh ndi 'ut'antsi', 'i chah bulh hainanyi. ²⁷ 'Et bukoo whumoodih be 'ulhna highu nindel 'ink'ez 'uhiyulhni, 'Dahooja nemoodih, di hoh inla ndi unzoo, 'i hanuyeh butah 'anánla? Di ho' 'int'ah ndi 'ut'antsi' ndult'ah?' ²⁸ 'Et ndo búlhni, 'Sch'a detni 'uja.' 'Et be 'ulhna hiyulhni, 'Ndi 'ut'an untsi', 'i butah hananyi, 'i hats'úntelelh hukwa' ninzun ih?' ²⁹ 'Et ndo búlhni, "Awundooh! Whute 'int'ah doo ka sih ndi unzoo, 'i chah bulh 'óohneh. ³⁰ Whute ndulhhdzun ha' untekulh whuts'un. 'Aw 'et ha' nukat neooninzut t'eh, ha' untelelh, 'en si budóosni, 'udechoo 'ut'antsi' hanáhle 'ink'ez ulhghel duték'un huba. 'Ink'ez ndai unzoo, 'i ts'iyawh hanáhle 'ink'ez haníyeh, 'i ba bukoo whuz danáhle.' "

Nts'e na'a yak'uz hubudayi cho 'uhuhoohlhdzun, ndi mai, mustard hiyulhni, 'i k'una'a 'ohoont'ah

³¹ Doo chah 'uyoo khunek be nawhutnuk, 'i be whuts'odul'eh, 'i be hubulh yalhtuk 'et njan ndo búlhni, "Nts'e na'a yak'uz hubudayi cho 'uhuhoohlhdzun, 'et ndez na'a njan nduhoont'ah. Ndi mai, mustard hiyulhni, 'i k'una'a 'int'ah. 'I dune yílhchoot 'ink'ez ha'nulhyeh k'et wheyínanla. ³² Ndi mai soo degha nus ninsol, 'i hanáyi 'ink'ez buchun degha nus dincha suli. Ndi mustard hiyulhni

buchun, 'i ndai mai chun ts'iyawh 'ut'an hanúlhyeh bugha ndoh suli. 'Et 'i dut'aiyaz buyooschun tah 'ut'o ninínla."

Nts'e na'a yak'uz hubudayi cho 'uhuhoohlhdzun, 'et lhes ntuldoh, 'i ndult'ah

³³ Doo chah 'uyoo khunek be nawhutnuk, 'i be whuts'odul'eh, 'i be hubulh yalhtuk 'et njan ndo búlhni, "Nts'e na'a yak'uz hubudayi cho 'uhuhoohlhdzun, 'et ndez na'a njan nduhoont'ah, lhes ntuldoh, 'i ndult'ah. Ts'eke yílhchoot 'ink'ez lhes nudzaih, 'i tat tests'ai be lhtayudzih, 'i dez bun. 'Et yunélhus, 'ink'ez 'udun ninínkai hoh untéldoh."

Khunek be nawhulnuk, 'i be whuts'odul'eh, 'i 'et whuz na'a zeh Sizi 'ilhu-nahuwúdulh hubulh yailhtuk

³⁴ Ndi ts'iyai, 'i khunek be nawhutnuk, 'i be whuts'odul'eh, 'i 'et whuz na'a zeh Sizi 'ilhu-nahuwúdulh hubulh yailhtuk. 'Aw 'uts'un na'a cha'budínil. 'Et ndez na'a zeh hubudáni. ³⁵ 'Et whuz na'a ndun nus whunilh'en daja dani, 'et ts'iyawh lhaóoduja hoh njan ndutni,

"Khunek be nawhutnuk, 'i be whuts'odul'eh, 'i be hubulh yatelhtuk.

Nts'oh huwa whudezulh hoh ndi yun 'uyínlá 'et whuts'un,
ndai buch'a yuntez'i, 'i bugha hubudutésnilh."

Ndi haniyeh, 'i tah 'ut'an nts'i hanáyi, 'i wheoobuntelhtun daja ni

³⁶ 'Et Sizi 'ilhoahuwezdel, 'en ts'iyawh whenábalh'a 'ink'ez koo danínya. 'Et yugha hoodul'eh highu nindel 'ink'ez 'uhiyúlhni, "Ndi khunek be nawhutnuk, 'i be whuts'odul'eh, 'i ts'ah'un na'a nedini ndi haniyeh, 'i unzoo, 'i tah 'ut'an nts'i hanáyi, 'i 'et daja ni hoh 'utni?" ³⁷ 'Et ndo búlhni, "Ndai unzoo, 'i hanáyi bumai 'i, ndun 'ainanla, 'en yinkak dune ye' 'en 'int'ah. ³⁸ Haniyeh k'et, 'et ndi yun k'ut nduwhúlt'ah ho' hoont'ah. Ndai mai unzoo, 'i yak'uz hubudayi cho buzkeh, 'en nduhúlt'ah. 'Et whunts'ih ndi 'ut'an nts'i, 'i nts'i buzkeh nduhúlt'ah. ³⁹ 'Ink'ez ndun yuch'a detni, ndi 'ut'an nts'i 'ainanla, 'en netsudule. Njan ha'nukat 'et ndóh yun k'ut ts'udelhts'i whulatah 'et 'uhóont'ah. Ndunnah ha' úntelelh, 'en lizas nduhult'ah. ⁴⁰ 'Et huwa nts'e na'a ndi 'ut'an nts'i nahidulhdzooh 'ink'ez hidelhk'un, whuz na'a zeh njan k'an ndoh whudezulh whulatah t'eh chah, nduwhutenilh. ⁴¹ 'Ink'ez yinkak dune ye', 'en bulizas nduhóolcho ts'ih whutl'abutelelh. Nts'e hubudayi cho unli, ndunnah hukwaya hoonli tune' 'úst'en, 'en 'ink'ez yuk'unucha'ust'en, 'en ts'iyawh 'ilhunaoobotélelh. ⁴² Nts'e kwun dezkl'un huba' hoont'ah, 'et whuz hubatelhdulh. 'Ink'ez tso yahutelhtuk 'ink'ez hubughoo lhuhidutek'us. ⁴³ 'Et dzin nts'e na'a sa hadánat, ndunnah ts'ah'un na'a 'int'ah, nts'e be'aBá hubudayi cho unli, 'en chah whuz na'a zeh sa k'una'a buts'u haíteduz ho' hoont'ah. Ndunnah budzo hoonli, 'en soo cho hiyoozólhts'a huba' hoont'ah.

Yak'uz k'une' whul'en, daóodelti, 'et ndez na'a njan ndúhoont'ah

⁴⁴ "Doo chah zeh 'ún whudusni, yak'uz k'úne' whul'en, daóodelti, 'et ndez na'a njan ndúhoont'ah. Ndun dune njan yun k'ut hoonzoo, 'et nunúta hoonliyaz dezti, i nayí'ai. 'Ink'ez 'onghoh nayuntelh'i. 'Et hoont'i k'et ndun dune ndai hoonli yit'i, 'i ts'iyawh ye 'ónket 'ink'ez ndi yun yuk'ut nayí'ai, 'i yun ndulhcho whe yonket.

Doo chah zeh yak'uz k'úne' whul'en daoodelti, 'et ndez na'a njan nduhoont'ah

⁴⁵ "Doo chah zeh 'ún whudusni, yak'uz k'úne' whul'en, daoodelti, 'et ndez na'a njan nduhoont'ah. 'Et doo chah 'uyoon dune, 'en hoonliyaz 'i ts'iyawh yooket. 'Et 'o 'un doo chah ye ná'oonket. 'En kw'usul k'us dunezti, 'i hikunuta.

⁴⁶ 'En 'ilho kw'usul k'us dunezti, 'i naini'ai. Ndun dune ndai hoonli yit'i, 'i ts'iyawh ye 'ónket hoh ndi kw'usul k'us dunezti, 'i yoonanket.

Yak'uz k'une' whul'en, 'et lhoombilh tahíyalhdel, 'et whuz na'a njan ndúhoont'ah

⁴⁷ “Et doo chah zeh 'ún whudusni, yak'uz k'úne' whul'en, 'et ndez na'a njan ndúhoont'ah. Ndez na'a 'uhut'en, lhoombilh tahíyalhdel 'ink'ez yanáhiyigus lhawh dédowh 'i hiyuzdlooh. ⁴⁸ 'Et yahíuzguz ts'iyawh lhtahahíyule. Ndai lhook untsi', 'i ts'iyawh 'un whehiyulhdelh. 'Ink'ez ndai unzoo, 'i ts'iyawh nts'e 'whitelh'ilh ts'ú whehiyulhdelh. ⁴⁹ 'Aw 'et nts'oh whúdezulh hoh huba neóoni'ai, 'et huba whusawhélts'ut t'eh, 'et hukw'un'a zeh 'uwhuténih. Lizas whusahutedulh, 'en ts'iyawh dune hinzoo 'ink'ez dune hintsi' lhtahábotelelh. ⁵⁰ Ndunnah hintsi', 'en nts'e kwun dezkl'hun huba' hoont'ah, 'et whuz hubotelhdulh. 'Ink'ez tso yahutelhtuk 'ink'ez hubughoo lhuhidutek'us.” ⁵¹ 'Aw 'et Sizi ndo búlhni, “Njan ndun whudusni, 'et ts'iyawh ih t'eoónáhzun?” 'Et 'uhiyúlhni, “A, neMoodihti, ts'iyawh t'ets'oninzun.” ⁵² 'Et ndo búlhni, “Et huwa ndan Yak'usda bughunek 'uk'e'eduguz, 'i 'ink'ez yak'uz k'une' whul'en 'et hubughah wheyodalh'i, ndun dune 'en bukoo whumoodih, 'en ndult'ah. 'Ink'ez ndai yit'i, 'i tah ts'iyawh ts'et hayúle, k'an, 'i 'ink'ez 'uda, 'i chah. 'Et whuz na'a dune hoodulh'eh.”

Keyah Nazareth ts'ih ndunnah Sizi buba 'alha' cha'hoot'ah, 'en ts'iyawh hits'u desnih

⁵³ 'Et ndi khunek be nawhutnuk, 'i be whuts'odul'eh, 'i 'aw 'et Sizi ts'iyaintsuk lhaoodinla hoh njan usda 'et whuch'a nanja. ⁵⁴ 'Ink'ez dich'oh bukeyah ts'ih whénaja hoh Lizwif hubuluglez 'et wheóobudunilh'i. Et ts'iyannah huba hooncha suli, 'ink'ez 'ulhódutni, “Ndun dune nts'ez de hahó'ai ndi khunek whunih, 'i be yalhtuk? 'Ink'ez hooncha tune' 'ut'en nts'e na'a dat'en hoh 'ut'en? ⁵⁵ 'Alha ilah bukoo 'uwhulh'en, 'en buye' 'int'ah? 'Ink'ez 'en ilah be'ama Mary? K'us bulhutsinkah 'en James, Joses, Simon, 'ink'ez Judas? ⁵⁶ 'Et bulhtuskah 'aw ts'iyawh nelh cha'hit'ah? 'Et ndun dune ndi ts'iyawh nts'ez de hahónla hoh 'utni?” ⁵⁷ 'Et huwa ts'iyawh hits'u desnih. 'Et Sizi ndo búlhni, “Ndun nus whunilh'en unli, 'en ts'iyannah yudelhti. 'Et whunts'ih dich'oh bukeyah whut'en 'ink'ez dich'oh bukoo, 'en chah 'aw chahidílhti.” ⁵⁸ 'Et Sizi 'en 'aw buba 'alha' cha'yít'ah. 'Et huwa dich'oh bukeyah 'aw lhat hooncha tunucha ít'il.

14

John dune too be 'ulh'en, 'en hizelhghi

¹ 'Et hoh da wheghah whudezulh hoh hubidayi cho Herod 'en Sizi yulh údants'o. ² 'Et Herod bube 'ustl'en ndo búlhni, “Ndun John dune too be 'ulh'en, 'en 'int'ah. Yaidla tah nakhitna. 'Et huwa 'ut'en hoolhtus tune'út'en.” ³ Ndez na'a 'uhooja hoh da Herod John hiyílhchoot, hiyulhghel 'ink'ez tsak'e híya'ai. Bulhutsin Philip hiyulhni, 'en bu'at Herodias hiyulhni, 'en bula gha ts'ih 'uhiyínla. ⁴ 'Et John 'en Herod ndi yulhni, “Aw nyun mba ts'ah'un na'a cha'hoot'ah hoh 'uyoon bu'at buzih sinda.” ⁵ 'Et Herod yutzelhghelh hukwa' ninzun. 'Et whunts'ih ts'iyannah dune John 'en nus whunilh'en 'int'ah huninzun, 'et huwa Herod whenelhújoot. ⁶ 'Et 'ilhudzin 'et Herod whuzzli dzin 'uhoont'ah hoh Herodia butse' 'en hububut nunúdaih. Herod tube buba hoonzoo. ⁷ 'Et 'ahoh hits'u náhezya hoh ndi yúlhni, “Ndet sts'o hukwa' ninzun sts'o hukwa' dini.” ⁸ 'Et ndun ts'eke be'ama, 'en, “Herod oodílkut John dune too be 'ulh'en butsi lusyet be stl'ainkaiah dóni,” yulhni. ⁹ 'Et hubughah hubidayi cho budzi únduda suli. 'Et ts'iyannah ndunnah yuzih hudelhts'i, 'en ts'iyawh hidánts'o, 'et ts'ekeyaz bughunek yutl'aida'ai. 'Et huwa whuz na'a 'uhiyooleh huba' hoont'ah. ¹⁰ 'Aw 'et nts'e tsak'esda ts'ih whuz wheyálh'a, 'ink'ez tsak'esda ghuhinli, 'en John hitsi k'unéntsel. ¹¹ 'Ink'ez

lusyet be whusahíyankai, 'ink'ez ndun ts'ekeyaz tl'ahíyankai. 'Ink'ez be'ama yughah níninkai. ¹² Yugha hoodul'eh, 'en whusahandel. Hiyust'e hiyilhchoot 'ink'ez whuyihiyalhti. 'Et hukw'elh'az Sizi ts'un whehandel 'ink'ez nduhídani.

5,000 dune Sizi híte'ah, 'i hubugha iní'ai

¹³ 'Et Sizi whulh uduzts'ai hoh buch'a nanja 'ink'ez ts'i be inya 'ink'ez nts'e dune nuchasyah ts'ih whuz whénki. 'Et whunts'ih lhanah dune t'ehonanzin ibulh nts'e whénki ts'ih, whuz lhelhdun keyah whut'en whehínandel. ¹⁴ 'Et Sizi ts'i bé hainya hoh dune soo ts'ah'un hulai 'aw 'uzdooni ghaít'ah, 'en bunilh'en. 'Et 'ahoh hubugha té'nanzin 'ink'ez nduda chah ts'iyawh soo na'binla. ¹⁵ K'an 'aw 'et hulhgha 'uhoont'ah 'et huwa yugha hoodul'eh, 'en highu nindel 'ink'ez 'uhiyúlhni, "Njan dune nuchasyah 'uhoont'ah. 'Aw 'et ye 'un whezulh. Ndunnah ts'iyawh 'uts'un keyah ts'ih naoobélh'ah, 'et whuz hite'ah, 'i hiyoket." ¹⁶ 'Et whunts'ih Sizi ndo búlhni, "Aw nahutoodelh huba cha'hóot'ah. Nuhwhenich'oh hubugha ná'nuht'ah." ¹⁷ 'Et 'uhiyúlhni, "Aw hoonliyaz chats'it'ih. Lhes skwunlai 'ink'ez lhook nankoh, 'aw 'i zeh ts'it'i." ¹⁸ 'Et ndo búlhni, "De' sugháh ninahle!" ¹⁹ 'Et ndunnah 'ilhunahuwésdel, 'en ts'iyawh tl'oyaz k'ut natl'ahudoolts'ilh hubúlhni. 'Et ndi skwunlai lhes 'ink'ez nankoh lhook chah, 'i hitl'ahíyanla, nduk yetá'en hoh suchanailya ni tenadedli. Lhes taidalhkut 'ink'ez lhook 'i chah ndíyinla 'ink'ez yugha hoodul'eh butl'ayánla, 'ilhohuwezdel hubugha híyoo'ah ka. ²⁰ 'Et ts'iyawh 'uhan'al 'ink'ez 'uhunesdai. Ndai ts'ih tezkat 'i ts'iyawh 'ilhunahiwezdla hoh lanezi 'o 'at nankoh (12) ts'its'ai dez bun. ²¹ 'Et ndunnah dune, 'en 'ankw'us 5000 'oha'al. 'Et 'uskeh 'ink'ez ts'ekoo 'en chah 'oha'al.

Sizi too k'ut nuya

²² 'Aw 'et Sizi yugha hoodul'eh ts'i tuz whenaóobalh'a hoh, "Sutsuh nyan ahkelh," hubúlhni. 'Ink'ez 'ilhunahuwésdel, 'en chah dukeyah ts'ih whenaóobalh'a. ²³ 'Aw 'et ndunnah ts'iyawh whenaóobalh'a hoh dich'oh ndoh dzulh k'uz whinya tenadutedli ka. Dich'oh únli hoh bé nadalhghel. ²⁴ 'Aw 'et ts'i bun k'ut taniz hoh wheghah tatsi cho be nilhts'i be hubududezts'i. 'I be ts'i hoh nudúlduz. ²⁵ 'Aw 'et bundada haootélh'en hoh Sizi too k'ut buts'u tezya. ²⁶ 'Et khunyaz yugha hoodul'eh hitelh'en hoh whehunelhújoot, "Dune tsen 'ut'en!" hutni ibulh tsoya whehúnilhtuk. ²⁷ 'Et 'ahoh Sizi hubulh yatelhtuk, "Nuhdzi ulhtus úlhtsi! Si 'ust'en! Whenulhujut ílah!" ²⁸ Peter ndez na'a yoodulhkut, "SMoodihti 'alha nyun 'int'en t'eh, too k'ut nts'u toosya stl'ahóo'ah." ²⁹ 'Et 'ahoh ndi yúlhni, "Anih!" 'Aw 'et Peter ts'i be hainya 'ink'ez Sizi too k'ut yuts'u teyalh ka. ³⁰ 'Et nyo whunilh'en hoh nilhtsi tube ulhtus 'ink'ez whenelhújoot 'ink'ez yuk tezdlat hoh, "SMoodihti, sula 'ineh!" yulhni. ³¹ 'Et 'ahoh Sizi yula dughélchoot hoh ndi yulhni, "Aw soo 'ultsuk, 'i be 'alha' hoont'ah, 'i chaint'ih. 'Et dahoont'ah huwa mba nawh 'uhoont'ah?" ³² 'Et ts'i be nahét'az hoh 'ahoh nilhts'i k'ah na'ja. ³³ 'Et ndunnah ts'i be hudelhts'i, ts'iyawh hibut nachánilya 'ink'ez 'uhiyulhni, "Alha nyun Yak'usda buYe' 'unínt'ah!"

Gennesaret whut'en nduda Sizi soo na'bulh'en

³⁴ 'Aw 'et nyan Gennesaret ts'ih yahuzki hoh, ³⁵ 'et keyah whut'en Sizi hitelh'en ibulh, nahiyoohlúts'it hoh lhtunahunek hust'ai. 'Ink'ez ts'iyawh nduda, 'en hits'ún lhgha hobodinla. ³⁶ Hits'utédudlih, "Ndai nyunaih naints'uz, 'i 'ants'ih yus ts'ih but'áts'ughoonalh," hiyulhni. Ts'iyawh ndan hit'aghéznai, 'en ts'iyawh ts'ah'un na'a soo ná'huja.

15

Ndai nedzi be yats'ulhtuk, i bughha ts'ints'i 'ulhih

¹ 'Aw 'et Jerusalem keyah whuts'un ndunnah Moses be' dustl'us 'uk'ununa'úsduguz 'ink'ez Pharisee, 'en chah ts'iyawh Sizi highu nindel 'ink'ez 'uhutni, ² "Et di ka ngha hoodul'eh, netsuh whudelhdzulh 'uda ne'whust'en hukw'u na'a 'aw hukw'unucha'hust'en? Whunilh'en, ndunnah ngha hoodul'eh, 'aw lanacha'hulhúde 'uhute'alh whutsuh!" ³ 'Et ndo búlhni, "Et di ka nuhwhenich'oh nuhk'ah ts'ih huwa Yak'usda bughunek buk'unucha'zaht'en? ⁴ Whunulh'en, nuhwheni nts'e na'a ndaht'en! Yak'usda bughunek nuhlt'aida'ai hoh njan ndutni, 'Nyu'abá 'ink'ez nyu'ama bulh hubudóolhti.' 'Et doo chah 'udun 'et njan ndutni, 'Ndan be'ama 'ink'ez be'abá bulh dzuh ts'ih bughu yatelhtuk, 'en daootsah huba' hoont'ah.' ⁵ 'Et whunts'ih nuhwheni ndez na'a 'udahni, 'Ndan be'abá k'us be'ama njan ndo búlhni, ndai 'ust'i, 'i be da nuhla 'oost'en wule, 'et whunts'ih 'i ts'iyawh Yak'usda bughia iníla.' ⁶ 'Et whuz na'a nuhwhe'ut'en k'ah be 'aw be'ama 'ink'ez be'abá bulh chabudílhti. 'I be Yak'usda bughunek nuhlt'aida'ai, 'i 'aw hoonliyaz chailah sulhtsi! ⁷ Nuhwheni duba náhdzoo ahli! Ndun nus whunilh'en Isaiah, 'en 'uda ho'en 'ink'ez ts'ah'un na'a 'utni nuhwheni nuhwhugha. Njan 'et njan ndutni,

⁸ 'Ndunnah dune bughunek be buzek be sudélhti.

'Et whunts'ih budzi sughun nilhdza 'int'ah.

⁹ Ndunnah doo ka 'ants'i 'et suts'un teni 'uhunoohlzin.

'Ink'ez ndet dune bube 'ut'en k'ah,

'i Yak'usda bughunek netl'aida'ai, 'i k'una'a 'uyoon hubuhoodoolh'eh ka' 'uhut'en.'

¹⁰ 'Et Sizi 'ilhunahuwésdel ndo búlhni, "Anih! Ndez áhdulh!" 'Et ndo búlhni, "Soo zéelts'ai 'ink'ez soo cho nt'eoonaahzeh! ¹¹ Ndai dune buzai yúkat, 'i 'aw 'et ílah hints'i hulhih. 'Et whunts'ih ndai khunek 'aw chaizooch, 'i dune ye yalhtuk, 'i be dune hints'i 'ulhih." ¹² 'Et yugha hoodul'eh highun nindel hoh 'uhiyúlhni, "T'eoónínzun ih ndunnah Pharisee nyudánts'o daja dini, 'et nduhólcho huba dzuh 'údenja?" ¹³ 'Et Sizi ndo búlhni, "ABá yak'uz usda, ndai 'aw whuyuchaínilel, 'i bughih tubulh hahítelch'uh. ¹⁴ Whute! Ndunnah 'aw buts'áhachaozah'ah! 'En moodih chawhés'en li'hint'ah. 'Et ndez na'a njan nduhoont'ah, 'ilhunuh chawhés'en 'ink'ez 'ilhunuh chawhés'en għunli t'eh, nahúlt'ah tsa k'et hutelts'uh." ¹⁵ 'Et Peter yoodulhkut, "Ndi be nawħutnuk 'i be whuts'odul'eh, 'i nts'e na'a daja ni, 'et ts'iyawh whenénilhtun." ¹⁶ 'Et ndi yúlhni, "Aw ih nuhwheni tachaooodulhts'it hoh ih dahni? ¹⁷ Awhuz ih ts'ah'un nechaóozah'ak? Dune ndai buzai yúkat, 'i ts'iyawh bubut zeh be yukat. 'Ink'ez buyust'e ts'ih hanádukat. ¹⁸ 'Et ndai dune khunek be yailhtuk, 'i budzi ts'ih hayúkat 'i 'int'ah, 'ink'ez 'i dune dilhtsi'. ¹⁹ Soo cho whunulh'en, ndi 'et ndunt'ah, 'i dune budzi tuz hayúkat, be ne-eni untsi', 'i dune hutuzelhghelh, 'uyoon dune bu'at k'us 'uyoon ts'eke buki bulh tinta' ant'en, 'ink'ez 'aw lhughudelhúts'i whunts'ih whuz na'a zeh ne'hut'en. 'Uhudunut'ih, 'uyoon ba huwhuts'it, 'ink'ez Yak'usda ch'a yahulhtuk chah. ²⁰ 'Et njan 'et ndúhoont'ah, nduhoohlchoh dune hints'i hulhih. 'Et 'aw lanacha'zulhude hoh 'ah'alh, 'aw 'et huwa ilah hints'i 'ulhih."

Ndun ts'eke, 'udun yun k'ut whut'en, 'en buba 'alha' hoont'ah hooncha ho' hoont'ah

²¹ 'Aw 'et Sizi njan usda whuch'a nanja hoh Tyre keyah 'ink'ez Sidon keyah wheghah nánja. ²² 'Et whuts'un 'ilhunuh ts'eke, 'en Canaan whut'en 'int'ah, 'en yugħu ninja. Tso bulh yalhtuk ho 'uyulħni, "SMoodihti sugħa te'ninzech, t'enyunúszun David buts'u hainzut 'unint'ah! Sutse', 'en ntsi' nududeh, 'i

buyídinda!" ²³ 'Et 'aw daja chaidínil. 'Et yugha hoodul'eh highu nindel 'ink'ez 'uhiyúlhni, "Un nailh'ah, 'et tso bulh yalhtuk 'ustl'e' 'udóoneh sih." ²⁴ 'Et Sizi, 'en ndun ts'eke 'uyúlhni, "Ndunnah Israel bukoo whut'i, 'en 'ants'ih sheep tinta nílh'az, 'i li'int'ah, 'en zeh buts'un whests'alh'a." ²⁵ Ndun ts'eke 'en yughu ninya hoh yubut nachaneti 'ink'ez, "SMoodihti, sula 'ineh!" yulhni. ²⁶ 'Et Sizi 'uyúlhni, "Uskehkah lhes híyu'ah, 'i lhiyazkah hubugha ts'iya'ah t'eh 'aw chahóozooth." ²⁷ 'Et ts'eke ndi yúlhni, "SMoodihti 'alha' dini. 'Et whunts'ih ndai moodihti bukw'uzdai k'ut tukat, 'i lhiyazkah hiyeldel." ²⁸ 'Et Sizi ndi yúlhni, "O ts'eke ndi mba be 'alha' hoont'ah, 'et hooncha ho' hoont'ah. 'Et huwa hukwa' ninzun k'una'a 'uhoneh." 'Et soo ndoh wheghah whezulh, buts'e' soo na'uja.

Lhanah hunduda, 'en Sizi usda highu nindel 'ink'ez ts'iyawh soo ná'balh'en

²⁹ 'Aw 'et Sizi bughu natesja Galilee bun ghah lhunásja hoh, ndoh dzulh k'uz whenya, 'et natl'adeda. ³⁰ 'Et khunyaz lhanah dune, 'en highu nindel. Ndunnah nuchahúsdel, chawhés'en, yachahulhtuk, buyust'e hubodi'ai, 'ink'ez 'uyoon chah, 'en ts'iyawh hits'un hubuninla. Hibut nebaninla 'ink'ez ts'iyawh soo ná'hubínla. ³¹ Yachahulhtuk chah yawhehunilhtuk, buyust'e hubodi'ai, 'en chah soo na'huja. Nucháhsdel chah nahúdelh nahusdli, chahuwhés'en chah honilh'en nahusdli. Ts'iyannah bunalh'en hoh tube huba hooncha 'ink'ez Israel budune, 'en buYak'usda 'en 'o nus hidálhti.

Sizi 4,000 dune ghá' ní'ai

³² Sizi yugha hoodul'eh, 'en 'anih hubúlhni 'ink'ez ndo búlhni, "Ts'iyawh ndunnah dune hubugha té'nuszun. Tat dzin whuts'un njan suzih hudemts'i 'ink'ez 'aw huya'ah, 'i chahít'ih. 'Et 'aw cha'hus'al hoh bukeyah ts'ih nabutoohl'a ghaít'ah. 'Et ndúbusdla t'eh, nahedulh hoh sih bukaootoozit."

³³ Yugha hoodul'eh hiyulhni, "Njan keyah 'aw dune hoolah 'uhoont'ah. Nts'ez de simba soo 'últuk, 'i tet'ah, 'i nats'óoleh dune lhe'huneltsuk lah?"

³⁴ 'Et Sizi ndo búlhni, "Daltsuk lhes sut'e aht'i?" "Skwunlai 'o at nankoh 'i lhes sut'e 'ink'ez lhook nsolyaz bulh," hiyulhni. ³⁵ 'Et 'ilhuhowezdel, 'en natl'adulhúts'ih hubúlhni. ³⁶ 'Et ndi lhes skwunlai 'o at nankoh (7) lhook bulh yílhchoot 'ink'ez suchanailya ni hoh tenadidli. Taidalhkut 'ink'ez yugha hoodul'eh butl'ayánkai. 'I ts'iyawh natl'ahudelts'i, 'en butahíninik. ³⁷ Ts'iyawh na'het'al 'ink'ez 'uhunesdai. 'Et yugha hoodul'eh skwunlai 'o at nankoh k'its'ai dezbuñ 'i highá' wez'al, 'i 'ilhunahiwezdla. ³⁸ 4,000 dune bat'en 'uha'ah. 'Uskiyaz 'ink'ez ts'ekoo 'en chah 'uha'ah. ³⁹ 'Aw 'et Sizi 'ilhunahuwésdel bukeyah ts'ih whuz whenaóobalh'a, 'et ts'i be naja 'ink'ez yun Magdala huwhutni ts'ih whuz whehánki.

16

Pharisee 'ink'ez Sadducee chah, 'en huwa 'ét'en huba' hooleh hukwa hiyoodulhkut

¹ 'Aw 'et ndunnah Pharisee 'ink'ez Sadducee chah, 'en highu nindel 'ink'ez hiyóolhdzih hoh hiyoodulhkut, "Aw ih yak'uz whuts'un hooncha tune' whut'en, whunénolhtun ghaít'ah?" ² 'Et ndo búlhni, "Et hulhgha ts'ih nduk whunulh'en. 'Et whudulk'un t'eh, 'et dzin hoonzoo tele dahni. ³ 'Et bundada kw'us bulh dulk'un suli whunulh'en t'eh, 'aw 'et zeh whudutetsi' dahni. Nuhwheni duba nahdzoo ahli! 'Et nduk dawhut'en, 'et t'eeonáhzun. 'Et whunts'ih ndoh whugha whudezulh dawhut'en, 'et ndet 'uwhulhni, 'aw t'eeonuzáhzun! ⁴ Njan k'an ndoh whudezulh, 'en lubeshi ts'un ne'hut'en 'uhint'ah. 'Ink'ez 'ahoolhyez dune ts'eke bulh tinta' hutet'ilh, 'et zeh whuts'un hunint'uk. 'Ink'ez hooncha huwa 'ét'en whuntelh'ilh hukwa' nahzun. 'Et

whunts'ih 'aw hoo'h'en nuhghu hólts'it ghaít'ah. 'Et nts'e na'a Jonah bulh dáhooja inle, 'et zeh whuteh'ilh ho' hoont'ah!" hubúlhni, 'ink'ez bughu whenája.

Pharisee 'ink'ez Herod bules untildoh, 'i ch'a hughohle hubúlhni

⁵ 'Aw 'et nyan yahuzki hoh yugha hoodul'eh lhes nahodelhúnah. ⁶ 'Et Sizi ndo búlhni, "Ahoolhyez wheni khahdli ndunnah Pharisee 'ink'ez Sadducee chah, 'en bules untildoh, 'i ch'a." ⁷ 'Et 'ahoh lhulh yawhehunilhtuk, "Et 'aw lhes chats'ít'ih 'et huwa 'utni." ⁸ 'Et Sizi t'eoonanzin, 'et ndo búlhni, "Nuh-wheni be 'alha' hoont'ah, 'i unsol! 'Et huwa 'udahni. 'Aw lhes whusachah'al, 'et huwa ih 'et howu yalhtuk? ⁹ 'Awhuz ih 'aw ts'ah'un t'eoonuzahzun? 'Aw whunachazulhunik hoh ih skwulai lhes 'i be 5,000 hubugha náh'ai, 'ink'ez daltsuk k'its'ai ts'utezkat, 'i 'ilhunawehla? ¹⁰ 'Et doo chah skwunlai 'o at nankoh lhes 'i be 4,000 hubugha ináh'ai, 'et daneletsuk k'its'ai ts'uhtézkat, 'i 'ilhunawehla? ¹¹ 'Et nts'e na'a aht'ah t'eoonuzahzun, 'aw lhes hubugha nohwhulh yachasulhtuk? 'Uda ndun whudúsni, ndunnah Pharisee 'ink'ez Sadducee chah, 'en bules untildoh, 'i bughohle, 'i bughi yálhtuk ho' dusni." ¹² 'Et 'ahoh t'ehoninzun ndunnah Pharisee 'ink'ez Sadducee chah, dune huhodulh'eh, 'et whuch'a buch'a huwahli, 'et 'uwhulhni. Ndi lhes bulh untildoh, 'i ch'a huwahli ni ilah hoh 'utni.

Sizi 'en Christ 'int'ah 'et Peter howu yalhtuk

¹³ 'Et Sizi Caesarea Philippi buyun k'uz whinya hoh yugha hoodul'eh, 'en huboodulhkut, "Si yinkak dune ye' 'ust'ah. 'Et whunts'ih n'awh dune, ndan hoh 'ust'ah hutni?" ¹⁴ 'Et 'uhiyúlhni, "Bulunah, 'en nyun John dune too be 'ulh'en 'int'ah hutni. 'Et bulunah chah, nyun Elijah 'int'ah hutni. 'Et 'onghunnah chah, nyun Jeremiah 'int'ah hutni. 'Ink'ez bulunah nyun nus whunilh'en 'ilhunuh 'int'ah hutni." ¹⁵ 'Et ndo búlhni, "Nuhwheni do, ndan 'ust'ah dahni?" ¹⁶ 'Et Simon Peter yatelhtuk hoh ndi yúlhni, "Nyun ndun Christ, Yak'usda khuna, 'en buYe' 'unint'ah." ¹⁷ 'Et Sizi ndi yúlhni, "Simon Jonah buye', degha nus hoonzoo nghá whults'ut! Ndet sudini, 'et 'aw ndi yun k'ut dune, 'en ilah nyunalhts'et hahó'ai. Se'aBá yak'uz usda, 'en nyunalhts'et hahó'ai. ¹⁸ 'Ink'ez nyun Peter 'int'ah. 'Et ndi tse 'i k'ut suluglez neootes'ah. Njan ndun kwuncho ulhtus, 'i yuh ts'ih haindel, 'en whunts'ih 'aw whuch'a' hoolhdeh ghaít'ah. ¹⁹ Nts'e yak'uz hubudayi cho usda, whuz be da'dutut'ah, 'i ntl'ates'ah. 'Et ndi yun k'ut ndai whedinguz, 'i 'et 'uda yak'uz chah whuz na'a zeh whedint'uk. 'Et ndai ndi yun k'ut k'unada'uk, 'i 'et yak'uz chah 'uda whuz na'a zeh k'una'tet'uk." ²⁰ 'Et yugha hoodul'eh khunekti be ndo búlhni, "Khun teh 'uyoon dóohni gunih, si Sizi ndun Christ, 'en 'ust'ah."

Dzuh nutezut 'ink'ez datétsah, 'et Sizi huwu yalhtuk

²¹ 'Et wheghah whezulh whuts'un Sizi yugha hoodul'eh, 'en wheóobunulhtun nus daoostenilh 'et. Nts'e na'a Jerusalem ts'ih teyalh. 'Et keyah ndunnah dune netsuh whudelhdzulh, 'ink'ez náwhulnuk bumoodih, 'ink'ez Moses be' dustl'us 'uk'ununa'úsduguz chah, 'en bube lhat hoh dzuh nuhítelhdzut, 'ink'ez hituzelhghelh. 'Et whulh tat dzin, 'et dinadutédalh. ²² 'Et Peter, 'en Sizi yílhchoot, 'udun neínilhti 'ink'ez hukwa' yudáni, "SMoodihti nyun Yak'usda ngha te'untezeh! 'Aw nyulh 'et ndúhoneh ghaít'ah!" ²³ Peter yuts'un nalhú'a 'ink'ez ndi yúlhni, "Satan sut'ak ninínyih! Nyun yooya suzilhts'i! Yak'usda nts'e na'a dat'en, 'et 'aw howu nuni chanuzinzut. Ndi yun k'ut dune nts'oh tuné'hut'en, 'et hukw'una'a zeh nuni ninzut!"

Ndan Sizi Gri yuntooya hukwa' ninzun, 'en ye dulhdulalhgus yóolhchoot 'ink'ez yuntooya

²⁴ 'Et Sizi yugha hoodul'eh ndo búlhni, "Ndan dune se'ut'en k'ah oot'en ka sunteyalh hukwa' ninzun t'eh, ndi yun k'ut dats'ínt'ah, 'et ts'iyawh whula dootnih, 'ink'ez dulhdulalhgus yóolhchoot 'ink'ez suntooya. ²⁵ 'Et huwa ndan ye khuna hotelhyih hukwa' ninzun t'eh, 'en tinta hóte'alh. 'Et whunts'ih ndan ye khuna si sugha tinta ooní'ai t'eh, 'en ye khuna 'i nahíte'alh. ²⁶ 'Et huwa dune ndi yun 'i ndulhcho bube'ildzun yúzdli t'eh, 'ink'ez duzul 'i tinta iní'ai t'eh, ndet buba whutézoo? 'Ink'ez dich'oh duzul nayitélcholh hukwa' ninzun t'eh, di k'elha simba duzul nahíyoket? ²⁷ 'Et huwa yinkak dune ye' whusateyalh, ndai be'aBá ye dezti, 'i 'ink'ez bulizas, 'en hubulh, 'et whusainya t'eh, nts'e na'a ts'iyannah dahét'en, whuz na'a 'ilhunah hoh buba k'elha whutele. ²⁸ Soo ts'ah'un na'a ndun whudusni, bulunah njan nuhudelhúya, 'en dahutetsah whutsuh 'et whuts'un yinkak dune ye' nts'e na'a hubudayi cho tele, 'en whuz de úyalh huyuntelh'ilh."

17

Sizi 'uts'un onent'en suli

¹ 'Aw 'et whulh lhk'utat dzin inle hoh Sizi 'en Peter, James, 'ink'ez dulhutsin John chah, 'en ndoh dzulh k'uz dulh hobélya. ² Khunyaz hubunalh 'uts'un oonent'en suli. Bunen 'ants'ih sa k'una'a buts'u ha'ánduz, 'ink'ez bunaih 'i chah khunyaz lhiyul suli, 'ink'ez 'i chah buts'u ha 'ánduz. ³ 'Et khunyaz Moses 'ink'ez Elijah hubunalh hube whédilts'ai 'ink'ez Sizi hubulh yawahéniltuk. ⁴ Peter, 'en Sizi 'uyulhni, "NeMoodihti njan uzdelhts'i hoonzoo. Hukwa' ninzun t'eh, tat whut'ah 'uts'otelilh. 'Ilhunuh nyun mba, 'et 'ilhunuh Moses ba, 'ilhunuh chah Elijah ba." ⁵ Peter yalhtuk hoh khunyaz kw'us be tídet'en hoh buk'eyínde. Kw'us tah ts'ih khunyaz 'uwhutni, "Ndun suYe' degha nus buk'esi' 'int'ah. 'En bulh hóonust'i. 'En zeh 'oozélhts'ai!" ⁶ Yugha hoodul'eh hídants'o hoh hibut nacháneldel, 'ink'ez tube whehunelhújoot. ⁷ Sizi bughu ninya 'ink'ez but'agheznai hoh ndo búlhni, "Dinadahdelh 'ink'ez whenlhújut ilah!" ⁸ 'Et nduk nahítat'en, 'aw 'uyoón hoolah. Sizi dich'oh zeh hiya'en. ⁹ Ndet dzulh k'ut whenahedidel, 'et yuk nahidulh, Sizi khunek ulhtus, 'i be hubulh yalhtuk 'et ndo búlhni, "Yinkak dune ye' yaidla tah dinadutédalh whuts'un ndet whunelh'en, 'et khun 'uyoón ndudóohtni gunih!" ¹⁰ 'Et yugha hoodul'eh, 'en hiyoodulhkut, "Ndunnah Moses be' dustl'us 'uk'ununa'úsduguz, 'et di ka' hutni, Elijah 'en choo whusateyalh huba' hoont'ah hutni?" ¹¹ 'Et Sizi ndo búlhni, "Et 'alha Elijah 'en choo whusateyalh 'ink'ez ndai hoonliyaz ts'iyawh lhanaidutedlilh. ¹² 'Et whunts'ih ndun whudusni, Elijah 'uda whusainya ho' 'int'ah. 'Ink'ez 'en 'aw t'ehinízun. 'Et hukwa' huninzun k'una'a 'uhiyinla. 'Et whuz na'a zeh 'en hubula be yinkak dune ye' dzuh nutezut." ¹³ 'Et yugha hoodul'eh, 'en ts'iyawh John dune too be 'ulh'en, 'en yugha yalhtuk t'ehonanzin.

'Uski, 'en ntsi' nudúdeh, 'i buyudínda, 'en Sizi soo ná'yinla

¹⁴ 'Aw 'et 'ilhohuwezdel 'en butanahundel hoh 'ilhunuh dune yugha ninya 'ink'ez yubut dugwútsi be nenínya. 'Ink'ez 'utni, ¹⁵ "SMoodihti suye' 'en bugha te'nonze! Bukaoootuzuk 'ink'ez tube dzuh nuzut. Lhat tsudúlt's'uk 'ink'ez talts'uk chah 'ut'i. ¹⁶ 'Et ngha hoodul'eh bughi nílhti 'et whunts'ih 'aw soo na'hiyooleh ghaít'ah." ¹⁷ 'Et Sizi ndo búlhni, "Nuhwheni k'an ndoh whudezulh, nuhwheni 'aw be 'alha' hoont'ah, 'i chaht'ih, 'ink'ez tink'us zeh 'eht'ilh. 'Et dawhuldzah nuhwhutah tesdalh? 'Ink'ez dawhuldzah nuhwhuba 'et ndutest'ilh? De', nye' 'en sugha nínílhtih!" ¹⁸ 'Et ntsi' nududeh, 'i buyudínda, Sizi 'en ts'un khunek ulhtus, 'i be hukwa' yudáni. 'Et whulh hulgħha zeh yuts'u hanája 'ink'ez ndun 'uski soo na'uja. ¹⁹ 'Et Sizi yugha

hoodul'eh, 'en dune hoolah ts'ih highu nindel hoh 'uhiyulhni, "Et dahoont'ah huwa ndun 'uski, 'en ntsi' nududeh, 'i 'aw buts'u hanáts'inooyoot ghaít'ah?" **20** 'Et Sizi ndo búlhni, "Aw nuhwhuba 'alha' cha'hoot'ah 'et huwa 'aw 'oohleh ghaít'ah. 'Alha 'ún whudusni ndi 'anukat, 'i lhe'niltsol, 'i mustard hiyulhni, 'i k'una'a be nuhwhuba 'alha' hoont'ah, 'i 'et 'ulcho t'eh, 'et ndez 'una'a da 'udoohni. Ndi dzulh njan whuts'un, 'et nguz nailts'ut dahni t'eh, 'ahoh 'et ndutenilh. 'Et whuz na'a ts'iyaitsuk whuz na'a 'udahni t'eh, 'et ndutét'ih. **21** 'Et whunts'ih ndi ntsi' nududeh, 'i netenadudli, 'i ink'ez sahá'delya, 'et t'eh zeh dune buts'u hanáts'iyunteyolh ho' hoont'ah."

Sizi datetsah, 'et doo chah huwu yalhtuk

22 'Aw 'et Sizi 'ink'ez yugha hoodul'eh, 'en Galilee yun k'ut hudemhts'i 'et ndo búlhni, "Aw 'et nilhdukw yinkak dune ye", 'en 'uyoon dune tl'ahítelhtelh. **23** Hituzelhghelh 'ink'ez whulh tat dzin inle t'eh, dinadutédalh." 'Et hodánts'o hoh ts'iyawh tube tso huzdli.

Sizi 'en chah luglez whucho whuzooneya yuk'elha hoolh'i

24 'Aw 'et keyah Capernaum whuz hunindel hoh 'ilhunuh sooneya 'ilhunanowes'ah, 'en Peter yughu ninya 'ink'ez yoodulhkut, "Nuhwheni whuno-hodul'h'eh 'en chah ilah luglez whucho whuzooneya yuk'elha hoolh'i?" **25** 'Et, "A," ni. 'Et Peter koo danínya. 'Et Sizi 'ahoh yulh yatéltuk 'ink'ez ndi yulhni, "Simon, daja ninzun? Ndi ndai sooneya dune buba k'elha yutele, 'i ndi yun k'ut hubidayi cho 'en ndi sooneya 'ilhunanowes'ah? Dich'oh buzkehkah tulih k'us n'awh whut'en tulih?" **26** 'Et Peter ndi yulhni, "Aw n'awh whut'en, 'aw 'en zeh." Sizi ndi yúlhni, "Et 'alha' dini. Hubidayi cho dich'oh bubuzkehkah 'en 'aw huba k'elha hole ghaít'ah. **27** 'Et whunts'ih ndunnah Capernaum whut'en, 'en nelh hánilch'e hukw'u na'a hubuts'oolh'en ghaít'ah. 'Et huwa ndi luglez whucho whuzooneya, 'i huba k'elha ts'iyoolhtsilh. 'Aw 'et, bun k'uz ts'inyalh 'ink'ez oolhjas. Soo 'udechoo lhook silhjus, 'i buzek lhch'a 'uhoonleh. 'Et sooneya naité'alh. 'I ilhchoot 'ink'ez si 'ink'ez nyun bulh neba bugha íyo'alh."

18

Yak'uz hubidayi cho dilhts'i ndan simba degha nus dezti?

1 'Et hoh da zeh Sizi yugha hoodul'eh, 'en highu nindel 'ink'ez hiyoodulhkut, "Yak'uz hubidayi cho delhts'i ndan simba k'us dezti?" **2** 'Et Sizi ndun 'uskiyaz 'anih yulhni, 'ink'ez hubutah neínilhti. **3** 'Ink'ez ndo búlhni, "Et soo ts'ah'un na'a 'un whudúsni, 'aw 'uts'un na'a nahcha'ahníl, 'ink'ez 'uskehyaz k'ah ts'ih sahli t'eh, 'aw 'et zeh huwa, nts'e yak'uz hubidayi cho unli whuz toohdelh ghait'ah. **4** 'Et huwa ndun 'uskiyaz, ndan yuk'ah ts'ih 'int'ah, whuz na'a dich'oh te'dudil'en, 'et ndunt'ah, 'en nts'e yak'uz k'une' whul'en, 'en hubutah k'us hidelhti tele ho' 'int'ah. **5** 'Ink'ez ndun dune 'uskiyaz, ndan yuk'ah ts'ih 'int'ah huhóont'i, 'i bulh highu nuseya, si chah whuz na'a zeh 'usuhiinla."

Dune 'en bugha 'uyoon lubeshi yutélhcholh t'eh, ndun dune nduja, 'et dahóolts'i 'et whute'ilh

6 "Et ndunnah 'uskehyaz huba 'alha' 'ust'ah, 'uskehyaz hoontsi' ts'ih hubonilht'uk, ndun dune 'et ndúja, 'en tse cho buts'ilchun yehudinguz 'ink'ez k'us takhulh 'et tábuhanó t'eh, 'et 'o nus whútezoo. **7** Ndi yun k'ut hudemhts'i, 'en ndunnah hukwaya hoonli tune' 'uhut'en, 'en dawhultsi', 'et buts'u whélts'ulh ho' hint'ah. 'Alha njan hukwaya hoonli tune' hutet'en ho' hoont'ah. 'Et whunts'ih ndan bugha 'et 'úhooja, 'en dawhultsi', 'et hote'ilh ho' hoont'ah!

8 'Et nla k'us nke 'i be hukwaya hoonli tune' 'ínt'en t'eh, k'unint'as 'ink'ez 'un tilh'is! 'Et dzuh ninya k'us nyust'e bodin'ai, 'et whuz na'a 'ilhuz be ts'ukhuna, 'i nghalts'ut t'eh, 'et whuz na'a degha nus mba whútezoo. 'Et whunts'ih nke 'anelht'et 'ink'ez nla 'anelht'et chah bulh 'ínt'ah hoh kwun nachanusne, 'i tanyaníno t'eh, degha nus mba whutétsi'. **9** 'Ink'ez nyuna be hukwaya hoonli tune' whut'en whunilh'en t'eh, nyuna hanó'alh 'ink'ez 'un ntolh'is! 'Et nyuna 'ilho bulh zeh, 'et whuz na'a 'ilhuz be ts'ukhuna, 'i ngha nínzut t'eh, degha nus mba whútezoo. 'Et whunts'ih nyuna 'anelht'et bulh kwun nachanusne, 'i tanyaníno t'eh, degha nus mba whutétsi'.

Ndunnah tinta huninkat, 'en Sizi hubutelhyih ka, 'et huba whusainya

10 "Et ndunnah 'uskehka khun buka cha'nuzoohzin gunih! 'Alha lizas yak'uz hudelhts'i, 'en bughu hinli 'ink'ez se'aBá yak'uz usda, bulizas 'en 'ahoolhyez hinalh ne'ut'en. **11** 'Et huwa ndunnah tinta huninkat, 'en yinkak dune ye' hubutelhyih ka, 'et huba whusainya. **12** Nts'e na'a daja nahzun? 'Et dune 'en lanezi lanezi (100) sheep 'ut'i hoh 'en hubutah 'ilhunuh tinta nínya 'et bulah 'et nébuninla 'ink'ez ndai lhuk'i tinta nínya, 'en dzulh k'uz yukawhenántai. **13** 'Et nayilhti t'eh, ts'ah'un na'a 'un whudusni, ndunnah bulah 'et nébuninla, 'en bugha whunelhnik. 'Et whunts'ih ndai lhuk'i tinta nínya, nayilhti t'eh, 'en bugha dahoolcho 'i be simba 'o nus whuntélnik! **14** 'Et whuz na'a zeh ndunnah 'uskehkah 'et 'ilhunuh whunts'ih kwuncho yuh ts'ih teyalh t'eh, nuhwhe'aBá yak'uz usda, 'en 'aw hukwa cha'nizun.

Nyulhutsin lubeshi be dulya 'uja t'eh, datánlilih?

15 "Et nyulhutsin lubeshi be nch'ani t'eh, 'et buzih nininya 'ink'ez di ka sch'adini, 'et dóni. 'Et nyun 'ink'ez nyulhutsin bulh nuhwhenich'oh lhanaóodoohle. 'Et nghunek yílhchoot t'eh, nyulhutsin whuch'a nanilde ho' hoont'ah. **16** 'Et 'aw chanyoozílhts'ai t'eh, 'ilhunuh k'us nanah teh ilhchoot 'ink'ez 'et bukoo ts'ih natoohdelh. Nanah k'us tanah teh mba lhgha 'úhudeja t'eh, 'et whuz na'a 'uhót'e. 'Et 'i be daja hutni, ts'iyai 'i khunek ts'ah'un na'a 'uhoneh. **17** 'Et whunts'ih 'et chah 'aw chanhozílhts'ai t'eh, 'et Yak'usda ba 'ilhunahuwésdel, 'en chah budóohni. 'Et 'en chah 'aw chaboozílhts'ai t'eh, 'et ndan 'aw huba 'alha' cha'hoot'ah k'us ndan sooneya 'ilhunanowes'aih, 'et ndun lubeshi be nch'ani, 'et 'en buk'una'a noolh'en. **18** 'Alha' dusni ho' dusni, nuhwheni ndai ndi yun k'ut whuladehnik t'eh, 'et nduk yak'uz chah bulaooodutetnih. 'Et ndi yun k'ut ndai lhgha 'úhudeja t'eh, 'et ndoh yak'uz chah lhgha 'úwhutenilh. **19** Doo chah 'ún whudusni, ndai buka yoodutelhkut, 'i 'ink'ez nanah k'us tanah ndi yun k'ut lhgha nuhwhuba soo' hoont'ah t'eh, 'et se'aBá yak'uz usda, 'en nuhwhuba 'uwhutelih. **20** 'Et huwa nts'e soozи bugha nanah k'us tanah 'ilhunahuwésdel t'eh, 'et sih si chah nuhtah 'ust'ah ho' hoont'ah."

Lhba whunats'odoolnah

21 'Et Peter yughu ninya 'ink'ez yoodulhkut, "SMoodihti ndun sulhutsin 'en lubeshi be sch'a 'uja. Dawhultsuk whe lubeshi be sch'a 'utet'ilh 'ink'ez buba whunaooodutelhúnah? Skwunlai 'o 'at nankoh (7) tulih 'et 'uwhuneltsuk?" **22** 'Et Sizi ndi yulhni, "Aw skwunlai 'o 'at nankoh (7) 'i chaduzúsni. 'Et skwunlai 'o 'at nankoh lanezi (70) k'us 'o 'un tulih 'et 'uwhuneltsuk dusni ho' dusni. **23** 'Et yak'uz k'úne' whul'en, 'et ndez na'a njan duhoont'ah. Ilhunuh hubudayi cho unli da, 'et be 'ulhna, 'en daneeltsuk be buts'ú whulh'ai, 'i ts'iyawh ye bubúlh lhanaoodutélih, 'et hukwa' ninzun. **24** 'Et ho' whunilh'en 'ilhunuh be 'ulhna dahinilhti. Ndai ye yuts'ú whulh'ai, 'i 10,000 sooneya dezti, 'i 'et 'uneltsuk. **25** Hoolah! Yuk'elha yoolhtsilh, 'i hoolah. 'Et ndun hubudayi cho bughunek be 'et ndi yulhni, 'et ndun dune, bu'at, bubuzkeh, 'ink'ez ndai

yit'i, 'i chah, 'i ts'iyawh ye 'óket. 'Et t'eh soo suba k'elha whutelhtsilh. ²⁶ 'Et huwa ndun be 'ulhna yubut nacháneti 'ink'ez yuts'un tedudlih hoh ndi yúlhni, 'Sumoodih k'at, suba ilh'i! Ts'iyawh mba k'elha whutelhsilh!' ²⁷ Bumoodih tube yugha te'nanzin. 'Et ndai ye yuts'u whulh'ai, 'i ts'iyawh yuba whunaood-elhunah, 'ink'ez whenayalh'a. ²⁸ 'En 'ulhna zeh 'az whinya hoh doo chah 'ilhunuh dudulh 'ulhna, 'en nayilhti. 'En lanezi lanezi (100) sooneya ch'adítí, 'i 'et 'uneltsuk yuts'u whulh'ai. Yuzool ílhchoot hoh ndi yúlhni, 'Daneltsuk ngunelh'ai, 'i suba buk'elha hoolhtsi!' ²⁹ Ndun yubut dugwútsi be nininya 'ink'ez yuts'u tedudlih hoh ndi yúlhni, 'K'at, suba ilh'i. Ts'iyawh mba k'elha whutelhsilh!' ³⁰ 'Et whunts'ih 'aw chayoozilhts'ai. 'Et whunts'i 'ayan'ai ndai yughi nelh'ai, 'i ts'iyawh yuba k'elha whutelhtsilh 'et whuts'un. ³¹ 'Et 'onghoh 'ulhna, 'en ts'iyawh honalh'en 'et dahooja. 'Et ts'iyawh howu ni huzdli. 'Et huwa hubumoodih ts'un whehandel 'ink'ez ts'iyawh nduhidani. ³² 'Et ndun 'et ndúja, 'en bumoodih 'anik yudani 'ink'ez 'et ndo búlhni, 'Nyun 'ulhna k'us ntsi' zeh 'int'ah! Suts'un tedindlih ka 'et huwa ndai be sts'o zilh'ai, 'i ts'iyawh mba whunaodelhúnah!' ³³ Nts'e na'a ngha te'nazin, 'et whuz na'a 'oneh mba' hoont'ah, nyulh 'ulhna ts'un!' yulhni. ³⁴ 'Et bumoodih yulh hunilch'e. 'Et ndunnah dune dzuh nuhulhdeh, 'en butl'ayálhti. 'Et ndai yughi nelh'ai, 'i ts'iyawh yuba k'elha whutelhtsilh whuts'un. ³⁵ 'Et nuhwheni chah nuhwhulhutsinka tinta' hant'en, 'ink'ez nuhdzi ndulhcho, 'i be 'aw buba whunachaooduzulhúhnah t'eh, 'et sih se'aBá yak'uz usda, 'en chah whuz na'a zeh 'aw nuhwhuba whunaoodoolnah ghaít'ah."

19

Dune lhghu delhts'i lhch'á nahusdel, 'et huwa Sizi hubodulh'eh

¹ 'Aw 'et Sizi hubulh yalhtuk 'ustl'e' 'udeja hoh njan Galilee yun k'ut whuch'a nanja. 'Et Judea yun k'ut Jordan koh whuch'az whuz ninya. ² Lhanah dune 'et whuz hahínandel. 'Et soo na'balh'en. ³ 'Et ndunnah Pharisee, 'en chah highu nindel hiyootélhdzih ka. 'Et hiyoodulhkut, "Et ndet huwa ne'atkah 'ants'ih hoh hubugha buch'a naztedalh t'eh, 'et Moses khunek netl'aida'ai, 'i buk'una'a ih 'ohoont'ah?" ⁴ Sizi ndo búlhni, "Et ndi dustl'us k'ut 'uk'e'eduguz, 'i 'aw ih buk'eyáchasulhtuk? Njan 'et ndutni, 'udeecho ho' whewhudit'en da ndun dune inla, 'en dune 'ink'ez ts'eke bulh 'obínl da. ⁵ 'Ink'ez 'et ndutni, 'Njan huwa dune be'abá 'ink'ez be'ama bulh buch'a ooya huba' hoont'ah, 'ink'ez bu'at bulh lhulh zeh 'uhoot'e huba' hoont'ah. 'Et whuz na'a nahúlt'oh 'ilho hutele.' ⁶ 'Et whuz na'a 'aw 'o 'un nanah chahilah, 'ilho zeh hinli suli. 'Et huwa ndun Yak'usda lhgha hubunilhti, 'aw dune lhch'a nabóolhtelh huba cha'hoot'ah." ⁷ 'Et hiyulhni, "Et di ka Moses hoh da whuz na'a netl'ahó'ai 'ink'ez dustl'us chah neba inla inle hoh dune, 'en bu'at tl'ayóolhchoos 'ink'ez naitoolh'a." ⁸ 'Et ndo búlhni, "Nuhwhenich'oh nuhdzi dulhts'un, 'et huwa Moses nuh'at whuch'a naoohja nuhtl'ahó'ai. 'Et whunts'ih whe'whudit'en whuts'un, 'aw 'et duchahoot'ah. ⁹ 'Et 'un whudúsni, dune bu'at 'en 'uyoon dune bulh tinta' 'ant'en t'eoonaanzin t'eh, 'et sih zeh ndi dustl'us ndai ye 'ustl'e' itelih, 'i bu'at tl'ayóolhchoos. 'En bu'at 'aw tinta cha'it'il t'eh 'et whunts'ih ndi dustl'us yutl'ayálhchooz, 'ink'ez 'uyoon ts'eke yugha nasda t'eh, 'et sih dune ts'eke bulh tinta' 'ant'en suli. 'Ink'ez ndun dune bu'at 'ustl'e' 'uyínla 'ink'ez 'uyoon dune yugha nasda t'eh, ndun dune 'en chah dune ts'eke bulh tinta' 'ant'en tele." ¹⁰ 'Et Sizi yugha hoodul'eh, 'en 'uiyulhni, "Et dune bu'at bulh whuz na'a 'uhutet'ilh t'eh, 'aw lhghu chahíkah t'eh, 'et 'o nus soo' hoont'ah." ¹¹ 'Et ndo búlhni, "Ndi khunek, 'i 'aw ts'iyannah ba cha'it'ah. Ndan bughá whunt'ai, 'aw 'en zeh buba' hoont'ah. ¹² 'Et bulunah dune 'aw bughez hoolah hoh huwhuzdli. 'Et 'onghunnah 'et whuz na'a dune

'ubinla. 'Ink'ez nts'e yak'uz hubudayi cho, bulunah 'en ba whuz na'a soo whulh 'utet'ilh, 'en whuz na'a whulh 'úhoot'e."

Sizi 'uskehiaz bula be hubuk'edalnik

¹³ 'Aw 'et 'uskehiaz highu bunínlá. Khun teh buk'édolnih 'ink'ez buba tenadoodli ka. 'Et whunts'ih yugha hoodul'eh, 'en dah hubuhútni. ¹⁴ 'Et Sizi ndo búlhni, "Whute 'uskehiaz sts'un hutoodelh. Khun teh dah budóohni gunih! Ndunnah Yak'usda hubudayi cho unli whuz delhts'i, 'en ndunnah 'uskehiaz hubunduhúlt'ah ho' hint'ah." ¹⁵ Bula be hubuk'edilnik, 'ink'ez buch'a nanja.

Dune soode'a 'int'ah

¹⁶ 'Aw 'et 'ilhunuh dune Sizi yughu ninya 'ink'ez yoodulhkut, "Dune hoodulh'eh unzoo, nts'e na'a hoonzoo k'una'a 'utest'ilh 'ilhuz khutenalh whuch'a ootéldoh?" ¹⁷ 'Et Sizi ndi yulhni, "Et di ka nuszoo sudini? 'Aw 'ilhunuh unzoo hoolah. Yak'usda 'aw 'en zeh unzoo ho' 'int'ah. 'Et whunts'ih 'ilhuz be hukhutenalh hukwa' ninzun t'eh, ndai Yak'usda khunek dune tl'aida'ai, 'i buk'une' 'int'en da." ¹⁸ 'Et ndi yúlhni, "Et k'us ndai ho' dini?" 'Ink'ez Sizi ndi yúlhni, "Dune sóolhghelh gunih! Ts'ekoo bulh tinta' 'ont'en gunih! 'Undunont'ih gunih! 'Uyoon ba honts'it gunih! ¹⁹ Nye'abá 'ink'ez nye'ama bulh hubudólhti! Nts'e na'a nyunch'oh k'enaindutsi', whuz na'a zeh nyulh dune buk'eontsi!" ²⁰ 'Et ndun chilh ndi yulhni, "Nusol da whuts'un, ndi ts'iyawh buk'une' zust'en. Nts'e na'a 'o 'un datést'ilh?" ²¹ Sizi ndi yulhni, "Lhadulya 'utant'ilh hukwa' ninzun t'eh, ndai 'int'i, 'i ts'iyawh be 'ónket, 'ink'ez tel'en butaininle. 'Et sih nduk yak'uz ndai 'ilhuwenla, 'i 'et mba telallh. 'Ink'ez 'anih se'ut'en k'ah tune' ónt'en ka sunanyalh." ²² 'Et ndun chilh ndi khunek yudánts'o hoh tube budzi nduda hoh yuch'a nanja. Tube soode'a 'int'ah 'et huwa.

Dune 'uhuhooleh ghaít'ah, 'et whunts'ih Yakusda ba huwa chahoolnah ho' hoont'ah

²³ 'Et Sizi yugha hoodul'eh ndo búlhni, "Ndi 'i be soo ts'ah'un na'a 'ún whudusni, yak'uz ts'ih, nts'e hubudayi cho unli, tube howa whulna hoh dune soode'a 'et whuz teyalh. ²⁴ Doo chah zeh 'un whudúsni, ndi khunai ncha, 'i camel hiyulhni, 'i buba howa whulna hoh ughabatsoh bula tah bukoni'a hukwa téyah. 'Et whunts'ih 'o nus howa whulna hoh dune soo de'a, 'en Yak'usda hubudayi cho unli whuz dateyalh." ²⁵ 'Et yugha hoodul'eh, 'en hidants'o hoh buba hooncha 'ink'ez 'et nduhutni, "Ndán zeh dutejih ho' 'udini?" ²⁶ Sizi hubunilh'en 'ink'ez ndo búlhni, "Dune, 'aw ndet 'uhuhooleh ghaít'ah, 'et whunts'ih Yak'usda ba huwa chahoolnah ho' hoont'ah." ²⁷ 'Et Peter yatelhtuk hoh Sizi njan ndi yulhni, "Whunilh'en, ndai ts'ut'i, 'i ts'iyawh bulazdetnik, 'ink'ez nye 'ut'en k'ah ts'ih ts'oott'en ka nyuts'un ts'utezdel. 'Et huwa ndai negha nínkat?" ²⁸ 'Et Sizi ndo búlhni, "Ts'ah'un na'a 'ún whudusni, nts'oh whuye whudezulh ts'iyaintsuk k'an, 'i natedleh, 'et wheghah whudezulh hoh yinkak dune ye', yuk'usda cho dezti, 'i yuk'etl'adutedalh. 'Et nuhwheni suntehdel inle, nuhwheni chah lanezi 'o 'at nankoh kw'uts'uzda, 'i dune huba nahuteyeh ka, 'et dutelhúts'ilh. 'Et Israel buts'u hainde, 'en lanezi 'o 'at nanah (12) lhendoh dédowh, 'en huba nahutehyeh. ²⁹ 'Ink'ez ndan bukoo huwu tezya, k'us dulhutsinkah, k'us dulhtuskah, k'us bu'abá 'ink'ez be'ama, k'us bu'at, k'us buzkehkah, k'us dukeyah chah, njan si soozi bugha huwu tezya t'eh, 'en lanezi lanezi (100) 'et 'uwhuneltsuk butl'anaoootedúkulh. 'Ink'ez 'ilhuz be ts'ukhuna, 'et chah hubugha óotelts'ulh. ³⁰ 'Et whunts'ih lhanah 'udechoo 'uhint'ah, 'en 'udek'elh'az nahutedleh. 'Ink'ez lhanah 'udek'elh'az hinli, 'en 'udetsah nahutedleh."

20

Khunek be nawhutnuk, 'i be whuts'odul'eh, Yak'usda nts'e na'a be nek'une' whul'en

¹ "Yak'uz ts'e Yak'usda hubudayi cho, 'en ts'iyawh k'une' whul'en, 'et ndez na'a njan nduhoont'ah, 'ilhunuh dune 'en ndi yun k'ut yun ut'i. 'Et mai too chun haniyeh k'et, 'et huba 'utet'ilh ka' ninzun. Bundada 'uda 'et dune telh'ahlh ka whuz whinya. ² 'Et ndunnah hubalh'a 'ilhuk'i sooneya chaditi 'i dzin nduhóolyez hoh hik'elha utet'ilh, huhóost'et. 'Et huwa mai too chun haniyeh k'ez whebalh'a. ³ 'Et hukw'elh'az 9:00 bat'en, ts'uyi be óoket daninya dune bunilh'en, 'ants'ih hoh nahudelhúya. ⁴ 'Et njan ndo búlhni, 'Nuhwheni chah whuz mai too chun haniyeh ts'ih ahdulh. 'Ink'ez nts'e na'a sooneya ts'ah'un 'int'ah, 'i nuhwhuba k'elha telhsilh.' 'Ink'ez whuz whehánel. ⁵ 'Et doo chah hukw'elh'az dzetniz bat'en k'us 3:00 bat'en chah whuz whinya. 'Et whuz na'a zeh 'uja. ⁶ Doo chah hulgħha ts'ih bat'en whuz whinya 'ink'ez 'uyoon chah 'ants'ih hoh nadelhúya hubunilh'en. 'En chah ndo búlhni, 'Et di ka dzin nduwhulyez 'ants'ih hoh nudelhúya?' ⁷ 'Et 'aw dune nechalh'ah, 'et huwa 'uts'int'ah,' hiyulhni. 'Et ndo búlhni, 'Nuhwheni chah whuz mai too chun haniyeh ts'ih ahdulh. 'Ink'ez nts'e na'a sooneya ts'ah'un 'int'ah, 'i nuhwhuba k'elha telhsilh.' ⁸ 'Aw 'et hulgħha ts'ih dune 'ustl'e' hut'ih ndun mai too chun 'ut'i, 'en bughunli 'anīh yudani 'ink'ez ndi yúlhni, "Uhut'en ts'iyawh whusábinle, 'ink'ez huba k'elha hoolhtsi. 'Et ndun 'udek'elh'az whe'dit'en, 'en choo huba k'elha holhtsi.' ⁹ Ndunnah hulgħha ts'ih bat'en ul'a whusahandel 'ilhunah hinli 'ilhuk'i sooneya chaditi, 'i buba k'elha yulhtsi. ¹⁰ 'Et ndunnah 'udechoo ul'a, 'en chah whusahandel. 'O nus lhai duba k'elha tele huninzun. 'Et whunts'ih whuz na'a zeh 'ilhunah hinli 'ilhuk'i sooneya chaditi, 'i buba k'elha yulhtsi. ¹¹ 'En ts'iyawh buba 'uk'elha whuzdli hukw'elh'az, 'et ndun yun ut'i hich'a yawhenilhtuk. ¹² 'Et 'uhiyúlhni, 'Ndunnah 'udek'ah wheóobalh'a, 'en 'ilhoh sadzi hukw'e' hoonist'ah zeh 'uhet'en. 'Ink'ez wheni dzin ndúhoolyez hoh sa ulhtus, 'i niz 'uts'et'en. 'Et whunts'ih 'en nelhulhúgha zeh buba 'uk'elha whuzílhtsi.' ¹³ 'Et ndun yun ut'i 'et ndo búlhni, 'Suh dunekah 'aw hoonliyaz tink'us na'a cha'unwhúslil. 'Et ts'iyawh nuhwhuba soo' hoont'ah 'ilhuk'i sooneya chaditi, 'i mba k'elha silhs. ¹⁴ 'Aw 'et ndai nuhwhe'ildzun ulhchoot 'ink'ez nahdulh. 'Et ndunnah 'udek'elh'az hubalh'a, 'en nuhwheni nuhk'una zeh 'et 'uneltsuk 'i zeh buba k'elha tesilh 'et hukwa' nuszun. ¹⁵ 'Alha ilah ih ndai ust'i, 'i nts'e na'a hukwa' nuszun tune' 'úlh'en? Nuszoo 'et huwa ih sugha 'aoonilh ahli?' hubúlhni." ¹⁶ 'Et 'awhuz Sizi njan howu yalhtuk ndo búlhni, "Ndunnah 'udek'ah hinli, 'en 'udechoo nahutedleh. 'Ink'ez ndunnah 'udechoo hinli, 'en 'udek'ah nahutedleh. 'Et huwa Yak'usda lhanah 'anīh dáni, 'et whunts'ih ntsoolyaz zeh 'utahaóbanla."

Sizi datetsah 'ink'ez dinadutedalh 'et whulh tat huwi yatelhtuk

¹⁷ 'Aw 'et Sizi Jerusalem ts'ih tezya. 'Ink'ez ndunnah lanezi 'o 'at nanah ndunnah yugha hoodul'eh, 'en 'udun nibuninla 'ink'ez ndo búlhni, ¹⁸ "Soo zúlht's'ai, Jerusalem ts'iztedulh 'ink'ez yinkak dune ye', 'en ndunnah náwhulnuk moodih, 'ink'ez Moses be' dustl'us 'uk'ununa'úsduguz chah, 'aw 'et butl'ahitelhtelh, datetsah ka hiba nahuteyeh. ¹⁹ 'Ink'ez 'udun yun k'ut whut'en butl'ahitelhtelh. 'En highu tedloħ, hiyootelhtsus, 'ink'ez 'et lhdulal-hgus k'ehítelhtelh. 'Ink'ez hukw'elh'az whulh tat dzin dinadutédalh."

James 'ink'ez John hube'ama, 'en hoonli hukwa Sizi yoodulhkut

²⁰ 'Aw 'et Zebedee buzkeh hube'ama, 'et Sizi hits'un tezdel hiyoodutelhkut ka. Hube'ama yubut nachaniti. ²¹ 'Et Sizi ndi yulhni, "Ndet sts'o hukwa' ninzun?" 'Et ts'eke 'utni, "Nts'e hubudayi cho inli, ndunnah nanah suzkeh,

'en 'ilhunuh nalhnih ts'ih tedalh 'ink'ez 'ilhunuh intl'as ts'ih tedalh, sugha óoni'ai." ²² 'Et Sizi njan ndutni, "Ndet hukwa' hoodulkut 'aw t'eoonuzahzun. Ndi lubot 'aw 'et be' tesnilh, 'i nuhwheni chah be' tehnih nahzun ih? 'Ink'ez ndai dune be too be 'ul'en, 'i be 'usotelilh. Nuhwheni chah whuz na'a zeh ih too be' tehnih?" 'Et ndi híyulhni, "A, 'et sih nduts'óoneh!" ²³ 'Et ndo búlhni, "Alha sulubot be' tehnih, 'ink'ez be too be' lhúya, 'i too be' tehnih. 'Et 'aw doosni ghaft'ah ndan nalhnih ts'ih sts'un tedalh 'ink'ez ndan intl'as ts'ih sts'un tedalh. Ndunnah se'aBá huba lhaóodinla, 'aw 'en zeh buba' hoont'ah." ²⁴ 'Et 'onghunnah lanezi hidants'o hoh, 'aw 'et ndunnah nanah lhulhutsinkah huba dzuh 'uhudeja. ²⁵ 'Et Sizi ndunnah ts'iyawh 'anih hubudani 'ink'ez ndo búlhni, "Nuhwheni t'eoonahzun ndunnah 'udun yun k'ut whut'en bumoodih, 'en dune k'une' buhul'en. 'Ink'ez ndunnah ncha, 'en ndunnah bumoodih huba hubugha ndoh 'uhint'ah. 'Et whuz na'a hube 'ut'en k'ah hooni. ²⁶ 'Et whunts'ih nuhwheni nuhtah whuz na'a 'uteht'ilh nóohzin gunih. 'Et ndan nuhtah ncha tele hukwa' ninzun, 'en nuhwhuba ne'út'en wule. ²⁷ 'Et ndan nuhtah 'udechoo tele hukwa' ninzun, 'en nuhwhe'ulhna wule. ²⁸ Whuz na'a yinkak dune ye', 'aw ba ne'whutet'en hukwa whusáchaiyal. 'Et dune buba ne'ut'en tele 'ink'ez buba datetsah, 'et whuz na'a lhanah naootekulh, 'et hukwa whusainya."

Nanah chawhés'en, 'en honilh'en nasdli

²⁹ 'Aw 'et hukw'elh'az Jericho keyah whuch'a náhusdel hoh lhanah dune hiyuntezdel. ³⁰ Nanah chawhés'en ti whuzih huzke. 'Et Sizi wheghah uyalh hoh hiduzts'ai. Soo tube cho hits'uh hahuyih, "Moodihti, David buts'u haínzut, negha te'nonzeh!" ³¹ 'Et 'ilhunahuwésdel, 'en "T'eduzahnih!" hubuhútni. 'Et whunts'ih 'o nus 'uhutni, "Moodihti, David buts'u haínzut, negha te'nonzeh!" ³² 'Et Sizi bughah nininya 'ink'ez ndo búlhni, "Dez áh'us. Ndet nuhwhuba 'uwhutesdlilh hukwa' nahzun?" ³³ "NeMoodihti nena be ts'onolh'en hukwa' uzninzun," hiyúlhni. ³⁴ 'Ink'ez Sizi hubugha te'nanzin hoh bula be hubuna yut'agheznai. 'Et 'ahoh honilh'en suli. 'Aw 'et hiyuntez'az.

21

Lhanah hohoost'et hoh Sizi keyah Jerusalem ninya

¹ 'Aw 'et Jerusalem wheghah hedulh keyah whuyaz Bethphage huwhutni, 'et whuz hunindel. 'I dzulh yenun, Olive huwhutni. 'Et Sizi nanah yugha hoodul'eh, 'en dutsuh whébalh'a, ² 'et ndo búlhni, "Njan keyah whuyaz nuhgha nch'az whuz ah'us. 'Et whuz lhgha dah'az t'eh, 'et 'ahoh yeztliyaz, donkey hiyulhni, buyaz bulh whehudint'uk, 'et whunoolh'en. Sk'unaobudooh'uk 'ink'ez dez sts'un naoobutoohlooh. ³ 'Et dune nuhoodulhkut, 'Di ka 'ulh'en?' nuhuwhútni t'eh, 'NeMoodihti yuka' ninzun,' dóohtni. 'Et 'ahoh sts'un bula dóohtnih." ⁴ 'Et whuz na'a ndi ts'iyawh tune' whust'en, 'i be nus hon'en daja ni, 'et ndulhcho 'et dúhooja. 'Et njan ndutni,

⁵ "Zion bukeyah whuti whut'en,

whunulh'en! Nuhhubudayi cho te'dudil'en hoh nuhts'u teyalh.

Donkey buyaz, 'en yuk'usda.

'En be nuhts'u teyalh."

⁶ 'Et ndez na'a njan dúhooja, Sizi yugha hoodul'eh whuz wheha'az, 'ink'ez Sizi daja hubúlhni, hoh tune'hust'en. ⁷ 'Et whuz na'a Donkey buyaz bulh hits'u hinilhti. Dunaih hik'ehíyinla 'ink'ez 'on dus de Sizi hik'etl'ahidilhda. ⁸ Lhanah dune dunaih ti hiba néhiyuzbus nts'oh lhuteyalh. 'Ink'ez 'onghunnah, 'en chah 'ul nanehidutselh 'ink'ez ti hiba nehídenla. ⁹ 'Aw 'et 'ilhunahuwésdel bulunah butsuh 'ink'ez bulunah buk'ah ts'ih hedulh 'ink'ez tube cho hahuyih ho' hutni,

“David buts'u haínzut ba ts'odélhti!
NeMoodihti boozi be whuz de úyalh.
'En degha nus hoonzoo bugha whults'ut.
'Et soo deghan doh hidélhti!” hutni.

¹⁰ Aw 'et Sizi keyah Jerusalem whuz ninya, 'et keyah whut'en khu-nahuntesdel hoh 'ulhódutni, “Ndan dune ho' 'int'ah?” ¹¹ Et 'ilhunahuwésdel hubuhútni, “Ndun 'en Sizi nus whunilh'en, 'en 'int'ah. Keyah Nazareth yun k'ut Galilee whuz'ai, whuz de hainya 'int'ah.”

Ndunnah luglez whucho 'ooket 'ink'ez 'e'ooket, 'en ts'iyawh Sizi tinaobunenyoot

¹² Aw 'et Jerusalem hubuluglez whucho whuna'nezt'oo daninya 'et ndunnah 'ooket 'ink'ez 'e'óoket, 'en ts'iyawh tenabunenyoot. Sooneya lhk'enaduleh bukw'uzdai 'i chah ts'iyawh buch'a yuntez'ai. Ndunnah dut'aiyaz, dove hiyulhni, be 'óoket, 'en bukw'usuda 'i chah buch'a yuntez'ai. ¹³ 'Et ndo búlhni, “Uk'e'eduguz hoh njan ndutni, 'Njan sukoo tenadudli ba koo dahni,' 'et whunts'ih 'et chah njan ndutni, “Undunut'ih, 'en bukoo whuzúlhtsi.” ¹⁴ 'Et luglez whucho 'et chawhés'en 'ink'ez bukechun nduda, 'en highu nindel, 'et soo na'balh'en. ¹⁵ Ndunnah náwhulnuk bumoodih 'ink'ez Moses be' dustl'us 'uk'ununa'úsduguz, 'en njan huwa 'ét'en tune' 'ust'en hinalh'en. 'Ink'ez 'uskeh 'en chah luglez whucho sulyahalhtuk 'et njan nduhutni, “David buts'u haínzut buba ts'odélhti!” 'Et njan ts'iyawh honalh'en hoh hukwa hanílch'e. ¹⁶ 'Ink'ez Sizi 'et ndi hiyulhni, “Ndi daja hutni hoo-boozélt'sai ih?” 'Et ndo búlhni, “A, 'ink'ez dahúja 'aw hukw'uyachasulhtuk hoh ih dahni? Ndez na'a 'uk'e'wheduguz 'et njan ndutni,

“Uskeh 'ink'ez 'uskehiaz chah,
'en bughunek 'i be' hutni, ts'ah'un na'a suba hodilhti hubulhtsi.”

¹⁷ 'Et ndunnah 'aw 'et buch'a nanja 'ink'ez keyah whuti huwu whenája. 'Ink'ez keyah whuyaz Bethany ts'un ninya 'et usda.

Ndi duchun mai buts'u haníyeh, 'i Sizi yek'éhanya

¹⁸ 'Et 'om bun 'uda 'et keyah whuti whuts'u hédluh hoh khunyaz buye'élts'ul. ¹⁹ 'Et ti whuzih khunyaz ndi mai chun, fig hiyulhni, yutell'en. 'Et 'i yuts'un lhgha dinya hoh 'et 'aw bumai bughoh hoolah. 'Ut'an zeh bugha hoonli hoh ndi yúlhni, “Et 'aw 'ilhuz nyumai hootélah.” Ni ibulh ndi duchun 'uyulhni, 'i dezgi.

Ndi duchun, fig hiyulhni, 'i be whuts'odutel'eh

²⁰ Ndunnah yugha hoodul'eh hiya'en hoh tube huba hooncha. 'Et 'uhutni, “Nyoo mai chun, fig hiyulhni, daja hoh 'uja khunyaz dezgi?” ²¹ 'Et Sizi ndo búlhni, “Alha 'un whudusi, bé 'alha' hoont'ah, 'i aht'i, 'ink'ez 'aw nuhwhuba nawh cha'whutést'il t'eh, 'et ndi mai chun khunsih doogi. 'Aw 'et zeh ilah, njan dzulhyaz, 'Didílhts'i 'ink'ez bun k'ut whucho ts'ih tailhts'i, 'i dáhnti t'eh, 'et whuz na'a 'et ndoh whútenilh. ²² 'Et ndai buka' dahni tenadudli be, nuhwhuba 'alha' hoont'ah t'eh, 'i ts'iyawh nuhgha tékulh.”

Sizi ndan bugha dune gha ndoh 'int'ah, 'et hukwa hiyoodulhkut

²³ Aw 'et luglez whucho daninya 'et hudélhts'i wheobudunilh'i. 'Et nawhulnuk degha nus dézti 'ink'ez dune netsuh whudelhdzulh chah, 'en highu nindel 'ink'ez 'uhiyúlhni, “Nedini ndan bugha dune gha ndoh 'unint'ah njan dint'en. K'us ndan ntl'ahó'ai dune gha ndoh 'unínt'ah?” ²⁴ 'Et Sizi ndo búlhni, “Si chah 'ilhun hukwa nuhoodutelhkut. 'Et ndusudáhni t'eh, 'et nuhwhudutesnilh ndan bugha dune gha ndoh 'ust'ah. ²⁵ Nts'e na'a John dune too be 'úlh'en? Ndán yutl'aho'ai dune too be telih huba? Yak'uz ts'ih tulih

hawhélts'ut, k'us dune tulih ts'ih hawhélts'ut?" Dich'oh lhtah howu yahalhtuk 'ink'ez 'uhutni, "Et yak'uz ts'ih hawhélts'ut ts'utni t'eh, 'et neundúdoni, "Et di ka John nuhwhuba 'alha' cha'dusnih?" ²⁶ 'Et whunts'ih, 'Dune ts'ih hawhélts'ut whutéla 'uhoont'ah,' ts'utni t'eh, 'aw uzdooni ghaít'ah, dune hububéznuljut, ts'iyanah John 'en nus whunilh'en 'int'ah huninzun 'et huwa." ²⁷ 'Et Sizi ndi hiyulhni, "Aw nts'ez de hawhélts'ut nt'ets'onízun." 'Ink'ez Sizi ndo búlhni, "Ndan be dune bugha ndoh 'ust'ah ndi njan nduwhúlh'en, 'et si chah 'aw ndun whudóosni ghaít'ah."

Ndunnah nanah ndet be'abá huba hukwa' ninzun, k'us nts'oh tune'hut'en

²⁸ "Njan hubugha daja nahzun? 'Ilhunuh dune nanah buye'. 'En 'udechoo yughu ninya 'ink'ez ndi yulhni, 'Suye' mai too chun haniyeh ts'ih whuz inyalh 'ink'ez suba 'int'en.' ²⁹ 'Et yuch'a tsí'desnih. 'Et whunts'ih hukw'elh'az ndunát'e 'ink'ez whuz whinya. ³⁰ 'Et bulh nat buye', 'en chah yughu ninya 'ink'ez ndi yulhni. 'A, whuz toosya 'ink'ez 'oost'en!' ni. 'Et whunts'ih 'aw whuz chatíyal.' ³¹ 'Et Sizi 'utni, "Ndunnah nanah k'us ndan ndet be'abá huba hukwa' ninzun hoh teh hukw'une' hust'en?" "'Et 'udechoo, 'en zeh," hutni. 'Et Sizi ndo búlhni, "Ts'ah'un 'ún whudusni, ndunnah sooneya nalhdzooh 'ink'ez ts'ekoo 'ul'en chah, nts'e Yak'usda hubudayi cho unli, whuz nuhtsuh hutedulh. ³² Soo whunulh'en, be ts'ah'un 'uhoont'ah, 'i be John dune too be 'ulh'en nuhts'uh whusainya, 'ink'ez 'aw nuhwhuba 'alha' cha'hoot'ah. 'Et whunts'ih sooneya nalhdzooh 'ink'ez ts'ekoo 'ul'en, 'en ts'iyawh huba 'alha' hoont'ah. 'Et nuhwheni whunulh'en 'et whunts'ih 'aw nuhwheni k'ah nácha'ahlil, 'ink'ez 'aw nuhwhuba 'alha' cha'hoot'ah."

Mai haníyeh k'et whulh'ai, 'en bugha whúts'odul'eh

³³ "Njan 'uyoo be nawhutnuk, 'i be nuhwhudutésnilh. Sih soozólhts'a! 'Ilhunuh bukoo whumoodih, 'en haniyeh k'et 'uhoonla, 'ink'ez mai too mai too chun 'ananla. 'Ink'ez whuna'neztl'oo. 'Et tsak'et hahónkai mai too 'utahahúlhtsus, 'et chah neóoni'ai. 'Ink'ez buk'ut yutest'en, 'i chah wheni 'uhinla. 'En njan haniyeh k'et ndunnah ha' nulhyeh butl'ahó'ai, 'ink'ez nilhdza keyah ts'ih whinya. ³⁴ 'Aw 'et 'oonuje neooninzut hoh bukoo whumoodih 'en 'ulhna, 'en whuz whebalh'a 'ink'ez ndun 'uhut'en, 'en buts'un mai hitelhchulh ka. ³⁵ 'Et ndunnah ha' nulhyeh, 'en bukoo whumoodih 'en 'ulhna hubílhchoot. 'Ink'ez 'ilhunuh soo yayalhchus. 'Ilhunuh chah hizelhghi. 'Ilhunuh chah tse be yahiyalh'uz. ³⁶ 'Et doo chah zeh 'onghunnah 'ulhna 'o nus 'uhuneltsuk whuz whebalh'a. 'En chah whuz na'a zeh 'et ndo buhínl. ³⁷ 'Et 'udek'elh'az bukoo whumoodih buye' whuz buts'ú wheyálh'a. 'En tulih hidóolhti,' ni. ³⁸ 'Et whunts'ih ndunnah bughu whulh'ai hitelh'en hoh 'et 'ulhódutni, 'Ndun 'en nyoo haníyeh k'et bube'ildzun, 'en buye' 'ut'en. Ts'uzoolhghelh! 'Et t'eh ndet buts'i telts'ulh, ts'iyawh 'et nduhóolcho ts'ohólhchoot!' ³⁹ 'Et hiyílhchoot 'ink'ez njan haníyeh k'et tñahinino 'ink'ez hizelhghi. ⁴⁰ 'Et huwa 'et njan mai too chun haniyeh, 'en bube'ildzun, 'en whusateyalh. Whusainya 'eh, 'et dabóoleh simba?' ⁴¹ 'Et ndi hiyulhni, "Et ndunnah untsi', 'en hooncha hukw'un'a hoolah hubutelhtsilh 'ink'ez njan haniyeh k'et 'uyoon ha' untelhyeh bugho télh'ah. 'Et whuz na'a niwhúzuk totsuk ndi mai higha' hítelelh." ⁴² 'Et Sizi ndo búlhni, "Aw ih hukw'e yachazulhtuk Yak'usda bughunek daja ni inle da? 'Et ndez k'e'eduguz,

'Ndunnah 'en ndi tse be koo 'uwhulh'en 'i 'ún hidutelh'us,
 'i ba koo buk'uwhuz'ai huba soo degha nus tse 'int'ah, 'i suli.
 'Et Moodihti whuz na'a 'uhoonla.
 'Ink'ez nuhwheni tube neba hooncha ho' hoont'ah,' ni.

43 'Et huwa nuhwhudúsni, nts'e Yak'usda hubudayi cho unli, 'et ts'iyawh nuhghu nahootélchulh 'ink'ez 'uyoон hudedowh butl'aóote'ah. 'En 'ut'en unzoo, 'i buts'u haóokat. **44** 'Ink'ez ndunnah ndi tse hik'elts'ut, 'en ts'iyawh yahidutélhkulh. 'Ink'ez ndunnah ndi tse buk'édilts'ut, 'en ts'iyawh hoolah hutele." **45** 'Et ndunnah Lizwif náwhulnuk bumoodih 'ink'ez Pharisee chah, 'en ndi khunek be nawhutnuk, 'i whulh 'úhudants'o hoh t'ehonanzin Sizi 'en didut bughu yalhtuk. **46** Nts'e na'a simba Sizi hitelhchulh 'et hukwa' hut'en. 'Et whunts'ih dune yé hunuljut. 'En Sizi 'en nus whunilh'en 'int'ah huninzun 'et huwa.

22

Yak'uz k'une' whul'en, 'et hubudayi cho buye' bu'at whutele, 'et ndult'ah

1 'Et doo chah zeh Sizi be nawhutnuk, 'i be whuts'odul'eh, 'i be hubulh yalhtuk 'et ndo búlhni, **2** "Et yak'uz k'úne' whul'en, ndez na'a njan dóohoont'ah, 'ilhunuh hubudayi cho buye' bu'at whutele, 'en huba lhadútenilh. **3** 'Ink'ez ndunnah bughu núseyá, de'ulhna buts'u whebaoolh'a, 'anih hubadooni ka, 'et whunts'ih buch'a tséhudesnih. **4** 'Et doo chah zeh 'uyoон chah de'ulhna whuz wheóolh'a. Ndunnah bughu nusja suba budoohni, 'Aw 'et ts'uyi, 'i lhadínt'ah. Njan musdus ts'iyawh ndai nilhúk'a, 'i ts'iyawh suba nahiyanghan dune yute'ah whuba. Ts'iyai 'i lhadínt'ah. 'Aw 'et ndunnah lhghusdúke hubulh na'uztet'ah. Soo 'a dezáhdulh! suba hubudóohni.' **5** 'Et whunts'ih ndunnah bughu nusja huba 'ants'ih 'uhoont'ah. Ts'iyawh lhents'un whehádel. Bulunah chah há' hunulhyeh ts'ih whenáhedel. 'Et bulunah chah hube 'ut'en k'ah whuz'ai ts'ih whenáhedel. **6** Bulunah hubudayi cho be 'ulhna hubihílhchoot 'ink'ez dzuh ne'buhalh'en 'ink'ez hubuhanghan. **7** 'Et hubudayi cho whulh údants'o hoh tube huních'e. Ndunnah nehughan hubít'i ts'iyawh whuz whebalh'a. Ndunnah be 'ulhna inghan, 'en ts'iyawh hoolah hubulhtsi 'ink'ez bukeyah ts'iyawh hodálhk'un. **8** 'Et hukw'elh'az 'uyoон chah be 'ulhna, 'en ndo búlhni, 'Aw 'et na'tet'ah lhaoodint'ah, 'et whunts'ih bughu nusja, 'aw huba soo cha'hildzooh.' **9** 'Et huwa 'aw 'et ti ts'íh ahduhlh. 'Ants'ih lhanah cho nahla t'eh, 'en ts'iyawh bughu nóhdelh. **10** 'Et ndun be 'ulhna ti ts'ih whehandel. Ndán nabuhinla, ntsi' 'ink'ez unzoo tubulh 'ilho ts'iyawh whusábahanla. 'Aw 'et na'hutet'ah bukoo whudezbun. **11** 'Aw 'et hubudayi cho buts'un danínya bughu nusja hubuntelh'ilh ka. 'Et 'ilhunuh dune 'en 'aw naih dune lhghu delhts'i whunaih be dune chailah hoh yutelh'en. **12** 'Et ndi yúlhni, 'Sulh dune 'aw dune lhghu delhts'i whunaih be dune chainlah. 'Ink'ez nts'e na'a danínya?' 'Et ndun dune 'aw whé 'uyoodoni hoolel. **13** 'Et hubudayi cho duba ne'ut'en ndo búlhni, 'Ndún dune ulhchoot 'ink'ez ulhghel. 'Ink'ez 'az tsahólhgus yuh ts'ih táhneh! 'Et whuz tetso 'ink'ez dughoo lheidútelhk'us.' **14** Njan 'et ndutni hoh 'utni, lhanah ghu nusja 'et whunts'ih bulunah zeh 'utahálya."

Yun k'elha huhoolh'i hukwa' hoodulhkut

15 'Aw 'et ndunnah Pharisee 'udun nehúnindel 'ink'ez howu yahalhtuk, nts'e na'a Sizi ye yalhtuk, 'i be hitelhzah hukwa' hut'en. **16** 'Et Pharisee hubugha hoodul'eh 'ink'ez Herod dédowh chah, 'en Sizi ts'un wheoobuhalh'a. 'Et ndi hiyúlhni, "Dune hoodulh'eh t'ets'oninzun nyun ts'ah'un dune 'int'ah 'ink'ez khunek 'alha' 'int'ah, 'i be Yak'usda k'una'a dune hodilh'eh. Ts'iyannah mba lhgha 'int'ah. Nts'e na'a dune dahút'en 'et whunts'ih mba 'ants'ih 'uhoont'ah. **17** 'Et huwa nedini, ndi yun hik'elha hiyilh'i, 'i 'et ts'ah'un tulih 'uhoont'ah hoh hubudayi cho Caeser 'en tulih buba k'elha ts'uyoolhtselh, k'us 'awundooh tulih? Daja ninzun?" **18** 'Et Sizi t'eoóninzun nts'e na'a hoontsi' k'ah ts'ih

'ohoont'ah, 'et huwa ndo búlhni, "Et di kah sóolhdzih? Nuhwheni ts'iyawh duba nahdúdzoo aht'ah! ¹⁹ De' nyoo sooneya sunalh ts'et nah'a!" 'Ilhuk'i sooneya chaditi, 'i hitl'ahína'ai. ²⁰ 'Et ndo búlhni, "Ndan bunen 'ink'ez boozi chah buk'e'edúguz?" ²¹ "Hubudayi cho Caesar," hiyulhni. 'Et ndo búlhni, "Et huwa ndai hubudayi cho Caeser bube'ildzun, 'i butl'anáyahle. 'Ink'ez ndai Yak'usda bube'ildzun, 'i Yak'usda butl'anáyahle." ²² 'Et hidants'o hoh ts'iyawh huba hooncha 'ink'ez hich'a nandel.

Nat ts'ukhítnahi hukwa Sizi hiyoodulhkut

²³ 'Et dzin zeh ndunnah Sadducee, 'en highu nindel. 'En 'uhutni dats'úzsai 'ink'ez 'aw nats'ukhótnah ghaít'ah. ²⁴ 'Et ndi hiyulhni, "Dune hoodulh'eh Moses ndez na'a njan ndutni, 'et dune 'aw buzkeh hoolah hoh dazsai 'ink'ez bu'at zeh khuna t'eh, 'et bulhutsin 'en yughu naooda huba' hoont'ah. 'Et ndun bulhutsin 'en dughe yughu nasda t'eh, 'en ts'un dulhutsin ba buzkeh whutele. ²⁵ 'Et netah skwunlai 'o 'at nanah lhulhutsinka, 'en 'udetsah whudelhdzull, 'en 'at ut'i. 'Ink'ez 'aw buzkeh hoolah hoh dazsai. 'En bu'at dulhutsin ba nayoosdzi. ²⁶ Whúlh nanah whuz na'a zeh dazsai. 'Et whulh tat, 'en chah whuz na'a zeh 'uja. 'Et nduwhúlyez hoh skwunlai 'o 'at nanah ts'iyawh yahadla. ²⁷ 'Et 'udek'elh'az ndun ts'eke 'en chah dazsai. ²⁸ 'Et huwa nedini 'ilhudzin whusawhutelts'ulh hoh ts'iyannah dinadutédluh, 'et t'eh ndun ts'eke ndan bu'at tele? 'Et whunulh'en skwunlai 'o 'at nanah ts'iyawh hubughinda." ²⁹ 'Et Sizi ndo búlhni, "Nuhwhenich'oh na'dunáht'ah! 'Aw Yak'usda bughunek nt'enuzahzun. Ye ulhtus, 'i chah 'aw nt'enuzahzun. ³⁰ 'Et ndet dzin dune dinadidel t'eh, 'aw lhghu chahudutelhts'il 'et huwa. Dune dinadidel, 'en Yak'usda bulizas k'una'a 'uhutet'ilh ho' hoont'ah. ³¹ 'Et daja sudahni yaidla tah dinadutédalh hubugha, Yak'usda daja ni, 'aw ih hukw'u yachazulhtuk? Njan ndutni, ³² 'Si Abraham, Isaac, 'ink'ez Jacob, hubuYak'usda 'ust'ah.' 'Aw yaidla hubuYak'usda ilah 'int'ah. Hukhuna 'en hubuYak'usda nusli unli 'et huwa." ³³ 'Et 'ilhunahuwésdel 'en dahoont'ah hubugha hubudani tube huba hooncha.

'Ilhuk'i khunek degha nus dezti, 'i netl'aída'ai

³⁴ 'Et Pharisee whulh 'úhudants'o nts'e na'a Sizi ndunnah Sadducee hubudani, 'et hukwa Sadducee 'aw yahutoolhdih ghaít'ah hoh hinat 'ilhunahuwésdel. ³⁵ 'Aw 'et 'ilhunuh hubutah, Moses be' dustl'us k'ut, daja ni hoh beni hoonli be yalhtuk unli, 'en Sizi yóolhdzih hoh yoodulhkut, ³⁶ "Dune hoodilh'eh k'us undai khunek neba yutulhúhezya, 'i k'us degha nus dezti?" ³⁷ 'Et Sizi ndi yulhni, " 'Yak'usda nyuMoodihti ndzi ndulhcho 'i be, nzul ndulhcho 'i be, nyunut'uk ts'iyawh 'i be, 'ink'ez nyeni ts'iyawh 'i be chah, 'et whuz na'a 'en buk'eoontsi'." ³⁸ Ndi ndai nuhwhuba yutulhuhezya, 'i 'udechoo 'ink'ez degha nus dezti, 'i 'int'ah. ³⁹ 'Et bulh nankoh, 'i 'udechoo, 'i k'una'a 'int'ah, ndez na'a njan ndutni, "Et dahoont'ah hukw'una'a nyunch'oh k'enaindutsi", 'et whuz na'a zeh 'onghunnah chah buk'eoontsi'." ⁴⁰ Ndi nankoh khunek nuhtl'adélts'ut, 'i be Moses be' dustl'us, 'ink'ez nus whunilh'en hube dustl'us chah, 'i ts'iyawh 'ants'ih koo buk'ut whuz'ai, 'i li'int'ah."

Christ ndan unli 'int'ah?

⁴¹ 'Et 'awhuz ndunnah Pharisee 'ilhunahuwésdel hoh Sizi huboodulhkut, ⁴² "Christ ndan unli 'int'ah nahzun? K'us ndan yuts'u hainzut simba 'int'ah?" "En David yuts'u hainzut 'int'ah," hiyulhni. ⁴³ 'Et ndo búlhni, "Nts'e na'a 'int'ah David Ndoni be nyun sMoodihti 'int'ah nyudúsni ni 'et ndez na'a njan ndutni, ⁴⁴ 'Moodihti 'en sMoodihti ndi yúlhni, nalnih ts'ih sinda t'eh nch'a detni, 'en buk'ut nke naóolyis mba hólhsilh.'

⁴⁵ 'Et whuz na'a David, 'SMoodihti,' 'uyulhni. Nts'e na'a simba 'en yuts'u hainzut wule?" ⁴⁶ 'Aw dune yuts'u yatoolhdih hoolah. 'Et ts'iyannah whehunuljut 'aw 'o 'un hiyoodolhkut ghaít'ah.

23

Moses be'dustl'us 'uk'ununa'úsduguz 'ink'ez Pharisee chah, 'en dawhultsi' 'et buts'u whélts'ulh

¹ 'Aw 'et Sizi ndunnah 'ilhunahuwésdel 'en 'ink'ez yugha hoodul'eh chah hubulh yawhenilhtuk hoh ndutni, ² "Ndun Moses be' dustl'us 'uk'ununa'úsduguz 'ink'ez Pharisee, 'en chah 'en dune hodutelh'eh 'et wheni Moses yuk'usda, 'i k'ut natl'ahudelts'i. ³ 'Et ndai khunek hiye nohwhulh yalhtuk, 'i 'et ts'iyawh wúlhchoot 'ink'ez buk'úne' 'ooht'en. 'Et whunts'ih khun hubuk'una'a ne'óoh't'en gunih. 'Et 'alha daja hutni, hoh tunuchá'hust'en. ⁴ 'Et ndez na'a né'hut'en, lhai cho lhughel tube howa whulna dune neyúghe huba. Dune buwus k'ehiyíle. 'Et hedich'oh hubulasgek lhuk'i whunts'ih nuhighoolhnah ghaít'ah. ⁵ Ndai 'uhiyulh'en, 'i 'uyoón yunoolh'en huba 'uhiyulh'en. 'Ink'ez ndi Yak'usda bughunek zus, Phylacteries hiyulhni, 'o nus ncha hiyilh'i ts'iyannah hinoolh'en ka. 'Ink'ez ndi nayidúts'uz 'i tenahududli teh nahuyits'uz, 'i chah butsuh 'o nus 'udelyez nahiyulhtsih. ⁶ 'Et 'uhuté'ah 'ink'ez luglez chah soo k'us hoonzoo 'et zeh hudutélts'ilh hukwa' huninzun. ⁷ 'Ink'ez ndet ts'uyi, 'i be 'óoket, 'et ts'iyannah hubodélhti hoh dahooja hubuhútni, 'et huhóont'i. 'Ink'ez ts'iyawh 'ihunah hinli hoh, 'Rabbi! Nehodulh'eh!' huba hudóoni hukwa' huninzun. ⁸ 'Et whunts'ih khun teh 'uyoón 'Rabbi,' nuhodóoni gunih! 'Aw 'ilhunuh zeh whenohodulh'eh hoonli 'et huwa, Christ 'en 'int'ah. 'Et nuhwheni ts'iyawh lhulhutsinkah ahli. ⁹ 'Et ndi yun k'ut 'ants'ih ndan, "Abá," hubudóohni gunih. 'Aw 'ilhunuh zeh nuh'aBá unli 'et huwa, Yak'uz usda, 'en 'int'ah. ¹⁰ 'Ink'ez khun teh 'uyoón 'Nemoodihti,' nuhwhudóoni gunih. 'Aw 'ilhunuh zeh nuhMoodihti hoonli 'et huwa, Christ 'en 'int'ah. ¹¹ Ndunnah nuhtah hincha, 'en nuhwhuba ne'hút'en wule. ¹² 'Ink'ez ndan dich'oh ncha nadudil'i, 'en deghanyuk tel'en tele. 'Et ndan deghanyuk 'ududildzun, 'en degha ndoh ncha tele." ¹³ 'Et nuhwheni Moses be' dustl'us 'uk'ununa'úsduguz nuhwheni Pharisee chah, nuhwheni duba nadúhdzoo aht'ah! Dawhultsi' 'et nuhts'u whélts'ulh. Ndez na'a njan ndaht'en, nts'e hubudayi cho yak'uz usda, 'et whudáti dune ch'a dána'dehtan. Nuhwhenich'oh whunts'ih daóohya ghaít'ah. 'Ink'ez ndunnah whuz hedulh, 'en chah 'aw dabóohlelh ghaít'ah. ¹⁴ Nuhwheni Moses be' dustl'us 'uk'ununa'úsduguz, nuhwheni Pharisee chah, nuhwheni duba nadúhdzoo aht'ah! Dawhultsi' 'et nuhts'u whélts'ulh! Tsandelh hubukoo hubugha haoondunaht'ah. 'Et ndi tenadudli 'i be whuz na'a zeh 'aonilhka sa cho tenadahdli. 'Et huwa 'o nus 'uwhulcho nuhwhuba nahutedeh. ¹⁵ Nuhwheni Moses be' dustl'us 'uk'ununa'úsduguz, nuhwheni Pharisee chah, nuhwheni duba nadúhdzoo aht'ah! Dawhultsi' 'et nuhts'u whélts'ulh! Ndi yun k'ut ndulhcho hoh náhdelh 'ink'ez too k'ut ndulhcho hoh nahke, 'ilhunuh tulih nuhwhenich'oh nuhk'una'a 'int'ah wulhtsilh. 'Et whuch'a nulhde t'eh, 'et sih ndan nat 'uwhultsi' hoh nuhghanus kwuncho yuh whuye' tele. ¹⁶ Nuhwheni chawhés'en li'aht'ah, dawhultsi' nuhts'u whélts'ulh. Lhe'aht'ah whuzeh'en 'et whunts'ih dune ti wheoobuntelhtun hukwa' aht'en. 'Et ndez na'a dune whubodulh'eh, njan luglez whucho boozí be dune nahuhezya t'eh, 'et 'ants'ih 'uhoont'ah. 'Et whunts'ih luglez whucho 'et gold 'ink'ez silver bulh 'uholya, 'et 'i be whuz na'a nahuhezya t'eh, 'et whuz na'a 'uhuhooleh huba' hoont'ah, dáhni. ¹⁷ Nuhwheni whuzáhnik 'ink'ez chaoozéh'en ahli! K'us ndet degha nus whudezti? Luglez whucho k'us gold bulh 'uholya, 'et 'i tulih? 'Et luglez whucho 'et degha nus whudezti. 'Et gold bulh 'uholya, 'i 'ants'ih

Yak'usda ba 'udun neníkat, 'i 'int'ah. ¹⁸ Ndi 'i chah dune whubodulh'eh, ndan Yak'usda bukw'uzdai 'i be hoonliyaz yuts'u nahezya, 'et 'ants'ih 'uhoont'ah. 'Et whunts'ih ndai 'ants'ih huwa t'aih, 'i Yak'usda bukw'uzdai k'eyin'ai, 'et 'i be dune yuts'u nahezya t'eh, 'et nduyóoleh huba' hoont'ah. 'Et whuz na'a dune whubodulh'eh. ¹⁹ Nuhwheni whuzahnik 'ink'ez chaoozéh'en ahli. K'us ndet degha nus whudezti? 'Ants'ih huwa t'aih, 'i tulih k'us Yak'usda bukw'uzdai tulih? Ndi Yak'usda bukw'uzdai 'i degha nus dezti! Ndi 'ants'et huwa t'aih, 'i Yak'usda bukw'uzdai 'i bugha Yak'usda bube'ildzun suli 'et huwa. ²⁰ 'Et huwa ndan Yak'usda bukw'uzdai 'i be hoonliyaz yuts'u nahezya, ndi Yak'usda bukw'uzdai 'ink'ez buk'uyuzdla, 'i ts'iyawh 'i be yuts'u nahezya. ²¹ 'Ink'ez ndan luglez whucho yuts'u nahezya, luglez whucho 'ink'ez Yak'usda usda, 'et ts'iyawh yuts'u nahezya. ²² 'Ink'ez ndan yak'uz yuts'u nahezya, Yak'usda yuk'usda cho dezti, 'i 'ink'ez ndan yuk'usda, 'en be yuts'u nahezya. ²³ Nuhwheni Moses be' dustl'us 'uk'ununa'úsduguz, nuhwheni Pharisee chah, nuhwheni duba nahdzoo aht'ah! Dawhultsi' 'et nuhts'u whélts'ulh! Ndez na'a njan daht'en, ndai haníyeh, 'i 'ut'an sooltsun, 'i chah, anise hiyulhni, 'i chah, 'ink'ez cummin hiyulhni, 'i chah, 'i bulah zeh, 10%, 'i Yak'usda ghah'ah. 'Et whunts'ih Moses be' dustl'us k'ut degha nus whudezti, 'et ts'iyawh whuladehnik. Ndez na'a ts'ah'un 'uhoont'ah. Njan ndet ts'ah'un na'a ne'áht'en, ye negha te'untezeh, 'i chah, 'ink'ez be néba 'alha' hoont'ah, 'i chah, njan 'et ts'iyawh whuladehnik, 'et whunts'ih whuz na'a ndóht'en huba' hoont'ah, 'ink'ez 'onghun, 'i chah 'aw lhachaduzahle bula doohtnih gunih. ²⁴ Lhe'aht'ah whuzeh'en 'et whunts'ih, dune ti whúbuntelhtun hukwa' aht'en. Lhe'aht'en, ndai ahnai, 'i sts'uz yé tat'o t'eh, 'i ahguz 'et whunts'ih nuhwheni ndi khunai cho, camel hiyulhni, 'i telhnoh li'hoont'ah! ²⁵ Nuhwheni Moses be' dustl'us 'uk'ununa'úsduguz, nuhwheni Pharisee chah, nuhwheni duba nahdzoo aht'ah. Dawhultsi' 'et nuhts'u whélts'ulh! Lusyet 'ink'ez lubot chah yoo 'az ts'ih toonáhgus. 'Et whunts'ih bet ts'ih 'et ndai 'uyoona be, bé whulhts'it, 'i 'ink'ez nts'e na'a hukwa' nahzun tune' aht'en 'et 'i be nuhlusyet 'ink'ez nuhlubot teh dezbun. ²⁶ Nuhwheni Pharisee chawhés'en ahli! Ndi lusyet 'ink'ez lubot bulh 'udechoo bet ts'ih tóonawahahgus 'et t'eh yoo 'az chah 'aw chaditsun wule. ²⁷ Nuhwheni Moses be' dustl'us 'uk'ununa'úsduguz, Pharisee nuhwheni chah, duba nahdzoo aht'ah! Dawhultsi' 'et nuhts'u whélts'ulh! 'Ants'ih ts'un k'ut whuduchun dustl'us 'i lí'aht'ah. yoo 'az ts'ih tube soo 'awhut'en, 'ink'ez bet ts'ih whudutsun 'ink'ez dune ts'un be whudezbun. ²⁸ 'Et whuz na'a zeh dune nalh nuhyust'e yoo 'az ts'ih ts'ah'un dune hinli ndoonéht'en. 'Et whunts'ih nuhyuh ts'ih ts'ah'un cha'aht'ah. Ndai duba nahdzoo 'ink'ez 'uk'únucha'ust'en, 'i chah, 'i be whudezbun. ²⁹ Nuhwheni Moses be' dustl'us 'uk'ununa'úsduguz, Pharisee nuhwheni chah, duba nahdzoo aht'ah! Dawhultsi' 'et nuhts'u whélts'ulh! Nuhwheni nus whunilh'en, 'en buba tse bet 'ahudutelhtelh 'uwhulh'en. 'Ink'ez ts'ah'un 'int'ah, 'en buts'un k'ut hoonzoo whulhtsi. ³⁰ 'Ink'ez ndez na'a njan ndudáhtni, 'Hoh da netsuh whudelhdzulh hubulh ts'ukhuna inle ndúcha. Hoh da ts'ukhuna t'eh, 'et nus whunilh'en hubuhughan da, 'aw bulah ts'oot'en ghaít'ah inle.' ³¹ 'Et ndi njan ndudáhtni, 'i be nuhwhenich'oh ch'a déhtni. Ts'iyannah hobunulhtun 'aw 'uyoona ndunnah nus whunilh'en hubahanghan, nuhwheni 'en buts'uh háde ahli! ³² 'Aw 'et ndai 'ut'en untsi', 'i nuhwhubákah whe'hidilh'en, 'et ts'iyawh lhaódahla. ³³ Tl'ughus poison buzkehkah lí'aht'ah! Njan kwuncho yuh wheni nuhwhuba nahutedeh, nts'e na'a 'utehnih wheghoo tehdulh? 'Aw 'uhóneh ghait'ah! ³⁴ 'Et hukwa soo cho soo zélhts'ai, 'et nus whunilh'en, 'ink'ez dune huwhunih, 'ink'ez Yak'usda bughunek hodulh'eh chah, 'en ts'iyawh nuhts'ún butelh'alh. 'En

bulunah butehghan. 'Et whuz na'a lhdulalhgus hubunduntélht'ah. Bulunah nuhluglez bez ts'ih 'et hubootelhtsus. 'Ink'ez lhelhdun keyah totsuk zah nohbutelhzut. ³⁵ 'Ink'ez 'et huwa 'et ndez na'a nuhk'eóotelts'ulh. Ndunnah ts'ah'un 'int'ah buzkai yun k'ut nájul, 'en bughá 'utehnihl nuhk'eóotelts'ulh. Hoh da Abel 'en 'uja buzkai yun k'ut nájul. 'Et njan Zechariah buzkai yun k'ut nájul 'et whuts'un. 'En 'int'ah Berechiah buye'. Ndun 'en njan luglez whuchó 'et Yak'usda bukw'uzdai ye guz 'et nuhtsuh whudelhdzulh, 'en hizelhghi inle. ³⁶ Ts'ah'un na'a be 'ún whudusni k'an whudelhdzulh, 'et nuhwheni hukw'elha whutelhtsilh ho' aht'ah.

Jerusalem whut'en, 'en hubugha Sizi budzi nduda suli

³⁷ "Nuhwheni Jerusalem whut'en, dáwhultsi' nuhts'u whélts'ulh! Nuhwheni aht'en nus whunilh'en ahghan. 'Ink'ez ndunnah nuhts'u télh'a, 'en chah tse be hubahghan. Dant'ah ligok duduzkeh dints'un be huboontun, whuz na'a nuhwheni chah lhat hoh 'ilhunanohwutésdlel hukwa' nuszun, 'et whunts'ih 'aw hukwa cha'nahzun. ³⁸ Soo cho whunulh'en, 'aw 'et nuhwheni Jerusalem whut'en nuhkeyah 'aw hoonli hoolah suli hoh nuhwhuba 'et nenáwhults'ut, 'et whuz na'a Yak'usda nuhladutetnih. ³⁹ 'Et 'un whudusni, 'aw 'o 'un chasutuzeh'il. 'Et ndet dzin whusaoötélt'sulh, 'et ndudútehnih, 'Ndun Yak'usda boozi be whusatéyah, 'en degha nus hoonzoo buts'ó telts'ulh,' 'et k'an zeh suteh'ilh!"

24

Njan Lizwifhubuluglez whuchó hoolah whutéleh, 'et Sizi huwu yalhtuk

¹ 'Aw 'et njan luglez whuchó Sizi 'az whenaja hoh yugha hoodul'eh highu nindel. Njan luglez whuchó nts'e na'a 'uhóolya 'et whuhínulhtun. ² 'Et Sizi ndo búlhni, "Njan ts'iyawh 'aw chaoonuzulh'en 'ih? Ts'ah'un na'a 'ún whudusni, 'aw lhuk'i tse lhk'uchadutésdra, ts'iyawh nadúntejuh ho' hoont'ah."

Ndet hoh wheóoduteltsilh, 'et huwa nt'ets'onoozeh

³ 'Aw 'et haoodet'aiyaz dzulh Olive hiyulhni, 'et usda. 'Et ndunnah yugha hoodul'eh ts'iyawh highu nindel, 'ink'ez whu'izyaz hiyoodulhkut, "Njan nket'ah 'uwhuténih? Nts'oh whudezulh hoh whusanátandalh, 'ink'ez nts'oh huwa whudezulh hoh whulatah whutele? Ndet hoh wheóoduteltsilh, 'et huwa nt'ets'onoozeh? 'Et nendudíni!" ⁴ 'Aw 'et Sizi ndo búlhni, "Soo cho howahli. Khun teh dune nanohwhunoo'ah gunih. ⁵ 'Alha lhanah soozí bugha whusahutedulh 'ink'ez 'uhudutenih, ndun Christ unli, si 'ust'ah, nduhutni hoh lhanah nahunte'ah. ⁶ Dune nehughan whulh 'udutéhts'o. 'Ink'ez dune lhutegan chah howu yahutelhtuk. 'Et chah whudutéhts'o. Khun teh whénoolhujut gunih. Njan dawhutenih, 'et ts'iyawh nduwhuténih, 'et whunts'ih 'awhuz whulatah ilah 'ohoont'ah. ⁷ 'Et huwa lhelhdowh dédowh lhch'az nehúdutadulh. 'Ink'ez yinkak ndulhcho hubudayi cho be 'ustl'ennah, 'en chah lhehútedulh. 'Et dai whúteleh, 'ink'ez dada chah whutéleh. 'Et lhelhdun yun nutughetnah. ⁸ Ndi ts'iyawh be dzuh nuts'udeh, 'i k'an be whewhudít'en. ⁹ 'Et neooninzut t'eh, 'et dzuh nunohotilhdeh ka whutl'anohtelelh. Bulunah nuhoteghan. 'Ink'ez si soozí bugha 'udun yun k'ut whut'en nuhts'o dutetnik. ¹⁰ 'Et hukw'elh'az 'et lhanah huba dzuh tele, 'ink'ez nuhwhenich'oh nuhtah lhgha hawhútelyih 'ink'ez lhts'udutehtnih. ¹¹ Lhanah whuts'it be nus whunilh'en hinli, 'en lhanah dune nahunte'ah. ¹² 'Ink'ez ndunnah 'uk'unucha'ust'en, 'en 'o nus 'uhults'i' tele. Dune ye lhk'etsi', 'i chah k'ah 'utenilh. ¹³ 'Et whunts'ih ndunnah soo whulatah whuts'un whechahítsaz, 'aw 'en zeh hudutejih. ¹⁴ 'Et nts'e na'a Yak'usda

yak'uz ts'un dune k'une' whul'en, 'en bugha khunek unzoo, 'i yun k'ut ndulcho hoh be yatetuk. 'I be 'udun yun k'ut whut'en, 'en huba whubuntelhtun tele. 'Et zeh 'aw 'et whulatah whusawhételts'ulh."

Degha nus whewhunujut

¹⁵ "Et huwa ndi degha nus be whunujut, 'en hoolah yutelhtsilh, 'en degha nus whudezti ts'ih siyin hoh nulh'en t'eh, ndun Daniel nus whunilh'en hoh da howu yalhtuk inle. (Soo zélhts'ai, ndi ndan yuk'eyalhtuk, 'en soo cho bubenit taóodoools'it). ¹⁶ 'Et ndan Judea yun k'ut hadelhts'i, dzulhyaz k'uz tsihutoolhdell. ¹⁷ Ndán bukoo hukw'usda khun teh nanaóoja 'ink'ez bukoo ts'ih na'óolchoot gunih. ¹⁸ Ndán haníyeh k'et 'ut'en, 'en khun bukoo ts'ih dunaih kunaóoda gunih. ¹⁹ 'Et hoh t'eh, ndan ts'ekoo helchan, 'ink'ez ndan buzkeh ye'úlht'ukw, 'en huba tube 'o nus whutetsi'. ²⁰ Nket'ah whuch'a tsiz telhdulh, khi k'us nats'ulyis dzin, 'et teh 'uhoneh gunih, 'et huba tenadahdli. ²¹ 'Et 'alha whusawhélts'ut t'eh, hooncha dune dzuh nuhutedeh. 'Et ndi yun k'ut whe'whudit'en da, 'ink'ez k'an dzin whuts'un, 'aw whuz na'a doo chah zeh ndó honeh ghaít'ah, 'ilhuh zeh 'uwhutenilh. ²² Hoh t'eh nts'oh whugha whudezulh hoondukw nachahwháhdel t'eh, 'aw dune hudoojih hoolah. 'Et whunts'ih 'utahálya, 'en hubugha hoondukw whutelhtsilh. ²³ 'Et ndun Christ njan usda k'us nwun usda, 'et ndun nuhwhuhútni t'eh, khun nuhwhuba 'alha hudooni gunih. ²⁴ 'Alha lhanah whuts'it be Christ la'dadil'i 'ink'ez whuts'it be nus whunilh'en, 'en lhanah nuhtah whutele. 'Ink'ez nuhtah tube hooncha tune'hutet'en. 'Ink'ez huwa 'et'en chah nuhtah ne'hutet'en. 'Et ndi njan ndótet'ilh, khun teh 'utahálya nabonoo'ah huninzun, 'et hukwa' hutet'ilh. ²⁵ 'Et sih soo zulhts'ai, whutsuh whudelhdzulh 'uda nuhwhudáni. ²⁶ 'Et huwa dune ndun whulhni t'eh, 'Nulh'en nda 'et dune chahóot'ih 'et usda!' hutni t'eh, khun whuz toohdelh gunih. K'us, "Et bukoo bez ts'ih usda," hutni t'eh, khun nuhwhuba 'alha hudooni gunih. ²⁷ Ndez na'a njan nduwhútenilh, 'et ditnik kwun ndaz de hadánat 'ink'ez nuk ts'un whedanat. 'Et ts'iyannah dune yunoolh'en ka, 'et whuz na'a yinkak dune ye' whusanatedalh. ²⁸ 'Et huwa nts'e neyust'e súlht'i, 'et sbalyan 'ilhuwezdel.

Yinkak dune ye' whusanátedalh

²⁹ "Et dune dzuh nuhutedeh,
'et ndúhooja t'eh, hukw'elh'az 'ahoh sa dulhgus tele.
'Ulh'ek ooza chah 'aw be chahoodest'en tele.
Sum chah ts'iyawh ndus de hantejulh.

'Ink'ez ndai yak'uz whelhtus ndulhcho hoh notughetnah.

³⁰ 'Et njan nduhóoja t'e, ts'iyannah dune yunoolh'en ka yinkak dune ye' yak'uz ts'ih be hóodutelsilh. 'Et hoh wheghah whezulh t'eh, 'et dune ndi yun k'ut ndulhcho tso yahutelhtuk. 'Et yinkak dune ye' whuz de úyalh hiyuntelh'ilh. Kw'us k'ut yak'uz ts'ih hatéyah. Ye dezti, 'i 'ink'ez ye ulhtus, 'i be' tenilh. ³¹ Be ts'ujih, 'i tube cho be' duts'o hoh bulizas whuz haóobutelh'ah. 'Utahálya, 'en ts'iyawh 'ilhunaooboohootélel. Diwh hukw'un'a huteduh 'ink'ez yaz ndulhcho notedulh. 'Et ndulhcho hoh 'ilhunaooboohootélel.

Mai, fig hiyulhni, buduchun, 'i be nawhutnuk be whuts'odul'eh

³² "Ndi mai, fig hiyulhni, buduchun, 'i be nawhutnuk be whuts'odul'eh. Ndi 'i 'int'ah, buzooschum 'ulghih teh, 'Aw 'et but'an whulhlhiih, 'i bugha t'ewhunáhzun 'aw 'et dain nilhdukw suli. ³³ Nuhwheni chah whuz na'a zeh ndi ts'iyawh nuhwhudusni. 'Et hoh nket'ah nulh'en 'aw 'et t'ewhunóhzin, 'en nuhwheghah. 'Ants'ih ndati siyin li'hoont'ah. ³⁴ 'Alha ts'ah'un na'a 'ún whudusni, k'an ndoh whudezulh 'aw yachahútessla, 'et ndi ndó tenilh ts'iyawh 'et lhawhúdutenilh, 'et whuts'un. ³⁵ Yaz 'ink'ez ndi yun k'ut 'i

chah hoolah whutele. 'Et whunts'ih ndi sughunek 'aw hoolah chates-dle. ³⁶ Ndet dzin 'ink'ez nts'oh whugha whudezulh 'uwhutenilh, 'aw dune nt'echoonízun. Lizas yak'uz hudelhts'i, 'en whunts'ih 'aw nt'ehonízun. Se'aBá yak'uz usda, 'aw 'en zeh nt'eooninzun. ³⁷ 'Et hoh da Noah khuna da, dune dahant'e, 'et whuz na'a zeh 'uwhuté't'ilh hoh yinkak dune ye' whusanátedalh. ³⁸ Soo cho whunulh'en, yinkak too be' whutenilh da, whutsuh da, ts'iyannah 'a'alh 'ink'ez 'uhutnai. Dune 'ink'ez ts'ekoo bulh lhgho delhts'i, Noah ts'i cho be teyalh 'et whuts'un. ³⁹ Dune 'aw t'ehonízun nket'ah too hadutébilh. 'Aw 'et hadámbun hoh ts'iyawh too hubanghan. 'Et whuz na'a zeh yinkak dune ye' whusanátedalh t'eh, 'et ndó tenilh. ⁴⁰ 'Et dzin nanah, 'en haniyeh k'et 'uhut'en. 'Ilhunuh, 'en hitélhchohlh 'ink'ez 'ilhunuh 'aw 'et tedalh. ⁴¹ Nanah hite'ulh, 'i hidunulhduz. 'Ilhunuh hitélhchohlh 'ink'ez 'ilhunuh 'aw 'et tedalh. ⁴² 'Et huwa soo cho huwahli! Nts'oh huwa whezulh hoh nuhMoodihti whusateyalh 'aw nt'eoonuzahzun. ⁴³ 'Et ndi nuwheni taoonahle, ndun bukoo moodih, nts'oh huwa whudezulh undunut'ih whusateyalh, 'et t'ewhuninzun t'eh, 'et soo ts'ah'un da huwole, 'ink'ez 'aw hikoo da'óoyis ghaít'ah. ⁴⁴ 'Et huwa nuhwheni chah lhadóoh't'e. 'Alha nts'oh huwa whudezulh, 'et buka tsih chawhahlih, 'et yinkak dune ye', 'et whusanátedalh."

'Ulhna ts'ah'un 'int'ah

⁴⁵ "K'us ndan 'ulhna, 'en ts'ah'un 'int'ah 'ink'ez whunih 'int'ah? 'en 'int'ah, bumoodih dich'oh 'en 'onghunnah 'ulhna bukoo humoodih yutelhtsilh. 'Et soo hoh hite'ah, 'i hubugha ite'ah. ⁴⁶ 'Et bumoodih whusanaja teh 'ink'ez 'ulhna whuz na'a nduja, 'en degha nus hoonzoo buts'uh whélts'ulh. ⁴⁷ 'Alha 'ún whudusni, ndai yit'i, 'i chah ts'iyawh k'une' yul'en yutelhtsilh. ⁴⁸ 'Et whunts'ih ndun be 'ulhna ntsi' dich'oh budzi yuh 'et nduninzun, 'SMoodih sa sla whusanádaih.' ⁴⁹ 'Et khunyaz 'onghunnah dudulh 'ulhna hububeyih, 'ink'ez tatnai chah hubula whe'ni'al 'ink'ez hubula tawhénitnai. ⁵⁰ Ndet dzin ndun bumoodih whusanátedalh 'ink'ez nts'o huwa 'uhunit'oh utenilh 'aw t'ewhunízun, 'et wheghah 'uhunet'oh whusanátedalh. ⁵¹ 'Et lhulcho lhk'ube' yutelht'oh 'ink'ez ndunnah duba nahudzoo 'en hubuts'itekulh, 'i bulah buts'itekulh. 'Et whuz na'a tso bulh dughoo lhidutelhk'us."

25

Ndi be nawhutnuk 'i be whuts'odul'eh, 'i lanezinah t'etdukah 'en dune t'ehunízun, skwunlanah, 'en huwhunih 'ink'ez skwunlanah, 'en huwhusnik 'et hubugha

¹ "Yak'uz nts'e hubidayi cho usda ndi yun k'ut whusawhélt's'ut teh, 'et ndez na'a ndó tenilh, lanezi t'etdukah 'en dune t'ehunízun, ndi kwun be whét'en, 'i hiylhchoot 'ink'ez ndun dune 'at tet'ilh 'az 'et hibalh'i. ² Skwunlanah, 'en huwhunih 'ink'ez skwunlanah, 'en huwhusnik. ³ Ndunnah huwhusnik ndi too dezkl'un hit'i 'et whunts'ih ndi too dezkl'un hiye náhitelhdzoh, 'i hi'et 'uja. ⁴ 'Et huwhunih 'en too dezkl'un denáhitelhdzoh, 'i chah hitez'ai. ⁵ 'Et 'at tet'ilh sa sla whusayih. 'Et ts'iyawh nehunentsai 'ink'ez ts'iyawh bulh buk'eóodilts'ut hoh nahunéstez. ⁶ Tuzniz bat'en 'ilhunuh hahuyih, "Aw 'et 'at tet'ilh 'az de iyahl. Dinadahdelh 'ink'ez bududéhdelh!" ⁷ 'Et ndunnah t'etdukah ts'iyawh dihudíndel 'ink'ez too dezkl'un, 'i ts'iyawh nahídulhk'an. ⁸ Huwhusnik, 'en ndunnah huwhunih hubuhutni, 'Too dezkl'un negha núlhdzeh, netoo dezkl'un 'aw 'et bé haooduk'aih!' ⁹ 'Et ndunnah huwhunih, "Awundooh!" hutni 'Nuhgha nidulze t'eh, nuhwheni 'ink'ez nuwheni chah 'aw neba soo cha'iltsuk.' 'Et hubuhutni, "E'óoket ts'ih whuz ahdulh, 'ink'ez nuhwhenich'oh 'óohket." ¹⁰ 'Et whuz whehandel, 'at tet'ilh buk'elh'at whusaínya. 'Ink'ez ndunnah yuba lhadint'ah, 'en na'hutet'ah ts'ih hiyúlh danindel, 'ink'ez ndati

daná'hudentan, 'ink'ez dána'hude'ai. **11** 'Et hukw'elh'az ndunnah t'etdukah huwhusnik whusánahedel hoh, 'Nemoodih, nemoodih, neba dana'dutintih!' hiyulhni. **12** 'Et ndo búlhni, "Alha 'aw nt'enwhunuzúszun!" **13** 'Et whuz na'a nuhwheni chah soo cho huwahli! 'Alha ndet dzin 'ink'ez nts'oh whughá whezulh hoh yinkak dune ye' whusanatedalh, 'aw dune t'eoónizun hoolah."

Dune dude 'ulhna, ndai yít'i, i butl'ayánla, et yak'uz hubudayi cho usda ndult'ah be nawhutnuk

14 "Yak'uz ndet hubudayi cho usda, ndi yun k'ut whusawhélt's'ut teh, 'et whuz na'a ndó tenilh, ndun dune dukeyah huwu teyalh. 'Et teyalh whutsuh dude 'ulhna 'anih hubudani. Ndai yit'i, 'i hubutl'ayánla. **15** 'Ilhunuh skwunlai sooneya dezti, 'i yutl'aina'ai. 'Et 'ilhunuh chah nankoh sooneya dezti, 'i yutl'ainanzai. 'Et doo chah 'ilhunuh 'en 'ilho zeh yutl'ainanzai. 'Ilhunuh hinli hoh nts'e na'a soo hoonzoo hukw'un'a hiye' whutelih, 'et wheni butl'ainanzai. **16** 'Et hukw'elh'az 'aw 'et whinya. 'Et 'ilhunuh skwunlai yutl'ainanzai, 'en 'o 'un skwunlai uneltsuk, 'i ye na'yínl. **17** 'Et whuz na'a zeh 'ilhunuh 'en nankoh yutl'ainanzai hoh nankoh ye yúba na'yínl. **18** 'Et whunts'ih 'ilhunuh lhuk'i zeh yutl'aina'ai, 'en yun hahónkai 'ink'ez whuz dumoodih buzooneya yuntelh'i. **19** 'Et hukw'elh'az sa inle hoh ndunnah 'ulhna hubumoodih whusanája. 'Et nahooté'alh hukwa' ninzun nts'e na'a dahiyínl. **20** 'Et ndun skwunlai yutl'ainanzai, 'en skwunlai be 'o 'un 'uneltsuk, 'i yuba whusanáinanzai. 'Et ndi yulhni, 'Sumoodih skwunlai sooneya dezti, 'i stl'ananzai. Nah! Nilh'en skwunlai be 'o nus mba na'usdla.' **21** 'Et bumoodih ndi yulhni, 'Tube soo 'inja! Nyun tube inzoo. Nduhóolhcho k'une' nyutelh'en. Nyun tube 'ulhna unzoo inli. 'Et hoontsoolyaz k'une' nyutelh'en inle. 'Et k'an n'un hoh lhai ghu tanleh. 'Anih! Ndai nyumoodih ye hoont'i, 'i nyun chah be hóotant'i.' **22** 'Et 'ilhunuh nankoh sooneya dezti, 'i yutl'ainanzai, 'en chah whusainya. 'Et ndi yulhni, 'Sumoodih nankoh sooneya dezti, 'i stl'ananzai. Nah! Nilh'en nankoh be 'o nus mba na'usdla.' **23** 'Et bumoodih ndi yulhni, 'Tube soo 'inja! Nyun chah tube inzoo. Nduhóolhcho k'une' nyutelh'en. Nyun chah tube 'ulhna unzoo inli. 'Et nyun chah hoontsolyaz k'une' nyutelh'en inle. 'Et k'an nyun chah n'un hoh lhai ghu tanleh. 'Et nyun chah 'anih! Ndai nyumoodih ye hoont'i, 'i nyun chah be hootant'i.' **24** 'Et doo chah 'ilhunuh 'ilhuk'i sooneya dezti yutl'ainánzai, 'en chah whusainya 'ink'ez ndi yúlhni, 'Sumoodih t'eoonuszun nyun 'aw t'echa'nínzun 'unint'ah. Nts'e 'acha'ninlel 'et whunts'ih 'et ha'ninle. Nts'e haneyeh whuyúchaninlel 'et whunts'ih 'et chah ha'nínle. **25** Tube whenlhujut 'et huwa ndi sooneya dezti yun yuh ts'ih ntélh'i. Nah! Nilh'en ndi stl'ana'ai, 'i ntl'ananús'ah.' **26** 'Et bumoodih 'uyúlhni, 'Nyun nínts'i 'ink'ez tsidintnik 'ulhna 'int'ah. 'Alha t'eooninzun nts'e 'acha'nuzusdlah, 'et whunts'ih 'et chah ha' nusdle. 'Ink'ez nts'e haníyeh whucha'núsdlel, 'et whunts'ih 'et chah ha' nusdle. **27** 'Et huwa hoh da ndez na'a njan ndónleh huba' hoont'ah. Ndi uszooneya ntl'anadzai, 'i sooneya lhk'enadunudzih, 'en butl'achainuzínzai. 'Et t'eh da uszooneya 'o nus 'uneltsuk, 'i be na'óotneh wule da.' **28** 'Et huwa ndo búlhni, 'Ndunnah ndi uszooneya dezti, 'i bugha nailhúchoot. Ndun lanezi sooneya dezti, 'i yit'i, 'en bugha inéhzhaih. **29** 'Et ndan yulah zeh ut'i, 'en 'o nus lhai bugha itélt's'ulh. 'Et whuz na'a lhai tet'ilh. 'Et whunts'ih ndan ntsoolyaz ut'i, 'i whunts'ih bughu nayutélchulh. **30** 'Aw 'et ndun 'ulhna nts'i, ulhchoot 'ink'ez 'az tsahólhgus yuh ts'ih téhnoh.' 'Et whuz tso bulh dughoo lhudoohlhk'us sih."

Yinkak dune ye' whusanátedalh teh, et t'eh yinkak dune, en ts'iyawh huba nahuteyeh

³¹ “Aw 'et yinkak dune ye' nket'ah buts'u ha 'ánduz hoh whusanátedalh teh, 'et ndunnah lizas lubeshi bughoh hoolah, 'en hiyulh whusanátedulh. 'Et 'ink'ez yuk'usda cho dezti, 'i k'ut nanát'l'adutedalh. ³² 'Et 'ink'ez yinkak dune, 'en ts'iyawh hibut 'ilhunaoobuhootélelh. 'Et sheep għunli k'una'a sheep, 'i sbai tahanaítelelh. ³³ Sheepyaz 'en nalhnih ts'un ts'ih nebutelelh. 'Ink'ez sbai 'en 'int'l'as ts'un ts'ih nebutelelh. ³⁴ 'Et hubudayi cho 'et ndunnah nalhnih ts'un ts'ih 'int'ah 'et whuz na'a ndubudutenilh, ‘Nuhwheni se'aBá degħa nus hoonzoo nuhghá whults'ut ahli. 'Et huwa 'anīh! Ndi yun 'utelnih whutsuh, ndet hubudayi cho yak'uz úsda, 'et ndet nuhwhuba lhaoodinla, 'et k'an zeh nuhtl'aootelts'ulh. ³⁵ Soo cho whunulh'en, suye'élts'ul hoh 'ates'ah, 'i sugħa náh'ai. Ta'oosde hoh ndai tesnilh, 'i sugħa náhkai. 'Uts'un whút'en usdli 'et whunts'ih nuhwhukoo ts'ih dásunulhti. ³⁶ 'Aw naih chaúst'i hoh 'enásalhti. Ndusda hoh sts'un nusahdel. Stsak'esida hoh suts'un nusahdel. ³⁷ 'Ink'ez ndunnah ts'ah'un 'int'ah hiyoodutélhkut, ‘NeMoodihti nkeda nye'élts'ul hoh nts'a'en 'ink'ez tá'ah, 'i ngházni'ai? 'Ink'ez ta'óonde hoh tantnillh, 'i nghaznínkai? ³⁸ 'Et nkeda 'uts'un whút'en inli hoh dánts'unilhti inle? K'us naih chaint'ih hoh naih ngházninla inle? ³⁹ Nkeda ndinda hoh nts'unálh'en k'us tsak'esinda hoh nts'un nuts'uzdel inle? ⁴⁰ 'Et hubudayi cho njan ndoh dúbudutenilh, ‘Alha, 'i be 'ún whudusni, ndunnah sulhutsinkah, ndunnah 'aw ncha chailah, 'en 'ilhunuh whunts'ih whuz na'a 'et ndóbahla t'eh, 'et si 'usáhla ho' hoont'ah.’ ⁴¹ 'Aw 'et ndunnah 'int'l'as ts'ih 'int'ah, ndez na'a ndo ba duténih, ‘Ndai Yak'usda ye hunilch'e, 'i nuwhulh 'int'ah saħli! Sch'a nanahdelh! 'Aw 'et ndi kwun 'aw nachanusne, 'i netsudule bulizas huba 'uhóolya, 'et nuhwheni chah whuz tehdulh! ⁴² Suye'élts'ul inle 'et whunts'ih 'aw tes'ah, 'i sugħa chah'al. Ta'óosde 'et whunts'ih 'aw tesnilh, 'i sugħa chahkal. ⁴³ 'Uts'un whut'en usdli, 'aw 'et dachasúlħtel. Hoh da 'aw naih chast'ih 'et whunts'ih 'aw be oosda, 'i hoolah naih sugħa chahlel. Hoh da ndusda hoh 'ink'ez tsak'esida, 'aw suts'un nuchahdulh.’ ⁴⁴ 'Et dez na'a 'uhidutenilh, ‘NeMoodihti nkeda da nts'a'en ho' dini? Nkeda nye'ilts'ul 'ink'ez ta'onde? K'us 'uts'un whut'en inle, k'us be dune onle, 'i chaínt'ih? K'us ndinda 'ink'ez tsak'esinda? 'Et whuz na'a nts'a'en 'et whunts'ih 'aw hoonliyaz hoh nlacha'ts'ínil dini?’ ⁴⁵ 'Et ndoh budutenilh, ‘Alha 'i be 'un whudusni, ndunnah sulhutsinkah 'aw ncha chahílah, 'et 'aw 'ilhunuh whunts'ih whuz na'a nuchaobahlil. 'Et huwa si chah 'aw nduchásahlil li'hoont'ah.’ ⁴⁶ 'Et nduhint'ah, 'en 'ilhuz wheni dzuh nahutedoh ts'ih hutedulh. 'Et whunts'ih ndunnah ts'ah'un 'int'ah, 'en 'ilhuz hoh ts'ukhuna hubugħa ootékulh.”

26

Sizi whu'ízyaz hikunúta hituzelhghelh ka

¹ 'Aw 'et Sizi ts'iyaintsuk lhadúja yugħa hoodul'eh 'et ndo búlhni, ² “Et t'eoonaħzun 'aw 'et nat dzin whuz'ai butus lhuseya 'et whunahutelnih. 'Et 'ink'ez yinkak dune ye' 'aw 'et butl'ahitelħtelh 'ink'ez lhdulalhgus k'ehiyutelħtelh.” ³ 'Et soo whegħah wheżulh hoh, 'et nahuwhulnuk degħa ndoh, 'ink'ez Moses be' dustl'us 'uk'ununa'úsduguz, 'ink'ez dune netsuh whudelhdzulh chah, 'en ts'iyawh náwhulnuk degħa nus dezti, 'en Caiaphas hiyulħni, bukoo soo' whulcho 'et 'ilhunahuwutédu. ⁴ 'Et 'ilho yahalhtuk 'ink'ez huwhuts'it hoh hoonli hiba' hoonla hoh Sizi hitelħcholl 'ink'ez hituzel-hghelh. ⁵ “Et whunts'ih 'et njan butus lhuseya 'et whutah 'uts'inla t'eh, 'et hukwa dune lhtahahót'ah.” hutni.

Datetsah whutsuh ts'eke Sizi k'unuts'újul, 'iyutsi k'eyilhdze

⁶ 'Aw 'et keyah whuyaz Bethany huwhúttni, 'et Simon buka whulħjut ínle, leprosy hiyúlhni, bukoo 'et Sizi yuzih usda. ⁷ 'Et 'ilhunuh ts'eke bugħu

daninya hoh 'en ndi tse dezti, 'i Alabaster hiyúlhni, 'i be ndi luboodai 'ulya, 'i ye'ah. Ndi k'unutsutjul sooltsun, 'i tube dezti ho' 'int'ah. 'Et kw'uzdai k'ut na'ut'ah hoh yutsi k'eyilhdze. ⁸ 'Et ndunnah yugha hoodul'eh hinilh'en hukwa cha'hunízun. 'Ink'ez 'en ndúlhodutni, "Et di ka ndi 'ants'ih tinta' yulh'ih? ⁹ Ndi yoo dezti, 'i bé' ts'onket 'ink'ez, 'i ts'iyawh tehel'en, 'en hubugha íts'oodzaih wule da!" ¹⁰ 'Et Sizi t'eoonanzin 'et ndo búlhni, "Ndun ts'eke 'aw buts'áhachaoozah'ak. 'Ut'en unzoo, 'i suba 'uyínla ho' 'int'ah. ¹¹ 'Ahoolhyez tehel'en hubulh áht'ah, 'et whunts'ih si 'ahoolhyez 'aw no-hwhulh cha'tuzest'il. ¹² 'Alha ndi k'unutsutjul sooltsun, 'i 'adutestelh huba suyust'e yuk'eyílhdze hoh 'ut'en. 'Et whuz na'a lhasúdinla. ¹³ 'Alha 'un whudusni ndi yun k'ut ndulhcho ndi khunek unzoo, 'i nudutékat, ndun ts'eke ndet 'uhoonla, 'et hukw'u naoottitnuk 'et hoh dune yunatelnih."

Judas 'en Sizi be 'ótekulh hukwa' nínzun

¹⁴ 'Aw 'et ndunnah lanezi 'o 'at nanah, 'en hubutah 'ilhunuh Judas Iscariot hiyulhni, 'en náwhulnuk bumoodih buts'uh whinya. ¹⁵ 'Et ndo búlhni, "Daltsuk sugha ntéh'ah ndun dune nuhwhutl'ailhti t'eh?" "Et tat lanezi sooneya, silver," hiyulhni, 'et 'uneltsuk hiba hiyoodalhto. ¹⁶ 'Et whuts'un nts'e na'a butl'aitelhtelh 'et hukwunúta.

Sizi 'en yugha hoodul'eh butus lhuséya hubulh na'ut'ah

¹⁷ 'Et k'an 'aw 'et ndi lhes chantíldoh dzin whusawhélts'ut hoh ndunnah Sizi yugha hoodul'eh, 'en highu nindel 'ink'ez huyoodulhkut, "Njan Hubutus Lhuseya 'ute'ah, nts'e mba lhats'odutelilh hukwa' nínzun?" ¹⁸ 'Et ndo búlhni, "Nyooz keyah whuti whuz ahduh. 'Ilhunuh dune suba ndudóohni, 'Nehodulh'eh njan ndutni, 'aw 'et suba nilhdukw whezulh. Nkoo ts'ih ndunnah sugha hoodul'eh njan butus lhuseya, 'et 'ilho hubulh whunatelnih.' "

¹⁹ 'Ink'ez yugha hoodul'eh Sizi daja hubudani, 'et whuz na'a nduhuja. 'Ink'ez njan Hubutus Lhuseya 'et wheni lhaháduja. ²⁰ 'Aw 'et hulgħha whusahonzut lanezi 'o 'at nanah yugha hoodul'eh, 'en hubulh natl'adeda hubula na'tet'ah ka. ²¹ 'Et 'uha'ah hubutah ndo búlhni, "Alha 'ún whudusni njan nuhtah 'ilhunuh whutl'asutelhtelh." ²² 'Et ts'iyawh ni huzdli, 'ink'ez 'ilhunah hinli hoh hiyoodulhkut, "SMoodihti si tulih sudini?" ²³ 'Et ndo búlhni, "Ndan dules sulk toonayuz'ai, 'en 'utenilh whutl'asútelhtelh. ²⁴ 'Alha yinkak dune ye' nts'e na'a ba 'uk'e'eduguz, whuz na'a 'utenilh datetsah. 'Et dune ndan whutl'ayálhti, 'en dune degħa nus hoontsi' bugħa ootélts'ulh. Ndun dune 'aw cha'hóolel t'eh, 'et sih 'o nus buba hózoo wule da." ²⁵ 'Et Judas, ndun whutl'aitelhtelh, 'en Sizi yoodulhkut, "Rabbi si ih sudíni?" 'Et ndi yúlhni, "Nyunch'oh 'udini."

Sizi 'udek'elh'az na'ut'ah

²⁶ 'Aw 'et 'uhan'al hoh Sizi lhes yilhchoot. Suchanailya ni hoh tenadedli. Taidalhkut 'ink'ez yugha hoodul'eh hubutaininik. 'Et ndo búlhni, "Úlhchoot 'ink'ez ah'ah. Ndi suyust'e 'int'ah." ²⁷ 'Et lubot 'i chah yilhchoot 'ink'ez suchanailya ni hoh tenadedli. 'Et ndo búlhni, "Nuhwheni ts'iyawh ndi wahna. ²⁸ Ndi k'andit khunek 'i suzkai be nuhts'u nahuzíya. Lhanah ba nadútelt'ih. 'Et 'i be bulubeshi huba hoolah natedleh. ²⁹ Njan 'et 'un whudusni, ndi mai too, doo chah zeh 'aw chatuzésnil. 'Et whunts'ih ndi mai too k'an, 'i nuwhulh tesnilh. Nts'e se'aBá hubudayi cho unli, 'et whuz lhgha dahdel, 'et dzin nuhwhubulh tesnilh." ³⁰ 'Et Yak'usda buyun be héjun 'ink'ez ndoh dzulhyaz k'uz Olive hiyulhni, whuz whehandel. ³¹ 'Aw 'et Sizi ndo búlhni, "K'an 'ulh'ek nuhwheni ts'iyawh skahóoyatehle. Ndez na'a 'uk'e'edúguz hoh ndutni,

'Sheep għunli, tuzelghelh huba whutl'aitelhtelh.

'Ink'ez 'et sheep ts'iyawh lhtatelh'us.'

³² 'Et dinadusja hukw'elh'az t'eh, 'et yun k'ut Galilee ts'ih nuhwhutsah tesyalh."

Sizi, 'en Peter ndi yúlhni, "T'echasunuzinzun dutanilh"

³³ 'Et Peter ndi yúlhni, "Et ts'iyawh nyun nkayahutele, 'et whunts'ih si 'aw nkayáchatuzésdle." ³⁴ 'Et Sizi njan ndi yulhni, "Alha, 'i be 'un nyudúsni, 'et k'an 'ulh'ek ligok dune 'uduténih whutsuh, 'et tat t'echasunuzínzun dutanilh."

³⁵ 'Et Peter 'utni, "Nyúlh datesah t'eh, 'et whunts'ih 'aw t'echanyunuzúszun doosni għai't'ah." 'Et 'ongħun yugħa hoodul'eh, 'en chah whuz na'a zeh 'uhutni.

Sizi Gethsemane 'et tenadedli

³⁶ 'Et 'ilħunuh haniyeh k'et Gethsemane huwhúttni ts'ih whuz hunindel hoh Sizi yugħa hoodul'eh ndo bülħni, "Nuhwheni njan delħúts'i. 'Et si ye'at tenadutesdli." ³⁷ Peter 'ink'ez Zebedee buzkeh, nanah, 'en hubilhchoot 'ink'ez dulh whebeldel. 'Aw 'et tso cho buk'édilts'ut 'ink'ez budzi tube yuk 'uja. ³⁸ 'Ink'ez ndo bülħni, "Suzul tube tso suli k'et 'aw 'et datesah li'ust'ah. Njan delħúts'i 'ink'ez sula huwahli." ³⁹ 'O 'unyaz whinya hoh 'et nachaneti 'ink'ez tenawħéndunidli 'ink'ez njan ndutni, "ABÁ ndi lubot be dzuh nuteszut, 'i whuz na'a 'int'ah t'eh, 'et whute sengħólts'it. 'Et whunts'ih 'aw si hukwa' nuszun k'una'a ilah. Nyun hukwa' ninzun hukw'un'a 'et 'uhóneh." ⁴⁰ 'Et ndunnah yugħa hoodul'eh nahunisteż hoh bugħu nanja. 'Et Peter ndi yulhni, "Aw ih lhuk'i hukw'e'uhunint'o whuts'un sula ghónle għai't'ah? ⁴¹ Tink'us nínt'uk whuch'a howinli 'ink'ez tenadinli! 'Alha dune yéghah whuz na'a hukwa' ninzun, 'et whunts'ih buyust'e laít'ah." ⁴² 'Et doo chah zeh whulh nat bugħo whenaja tenadutedli ka. 'Et njan ndutni, "ABÁ ndi lubot ts'iyawh usnai t'eh, 'et k'an zeh sugħu natalcholh. 'Et whuz na'a zeh hukwa' ninzun t'eh, 'et ndó hot'e." ⁴³ 'Et doo chah zeh nahuneżteż hoh bugħu nanja. Bulħ huba yilħtus k'et 'aw hitoo'en għai't'ah. ⁴⁴ 'Aw 'et bugħo whenaja 'ink'ez whulħ tat, 'i khunek 'i be zeh tenadedli. ⁴⁵ 'Aw 'et yugħa hoodul'eh bugħu nanja 'ink'ez ndo bülħni, "Awhuz nalħuyis 'ink'ez saħtez hó ih aħt'ah? Soo zélhts'ai 'aw 'et suba whusawħélts'ut. Yinkak dune ye' 'en ndunnah lubeshi 'uhulħen, 'en butl'asátelhtelh. ⁴⁶ Soo 'a dinadahdel! 'Aw 'et uztoodelħ sih! Whunulħ'en ndun butl'asátelhtelh, 'aw 'et seghħah uyalħi!"

Sizi 'aw 'et hiyīlhchoot

⁴⁷ 'Awhuz yalhtuk hoh 'et khunyaz Judas, 'en whusainya, 'en ndunnah lanezi 'o 'at nanah whuhé'l'a, 'en ndun 'ilħunuh 'int'ah. 'En bulħ lhanah dune yulħ whusaindel. Bulunah soħi cho nuħule, 'ink'ez bulunah be net-tunuzdult'o nadule. Náwhulnuk bumoodih 'ink'ez dune netsuh whudel-hdzulħ, 'en whusaoħħabhalħ'a. ⁴⁸ 'Aw 'et ndun Sizi hubutl'aitelhtelh, 'en 'ilħunahuwésdel ndo bülħni, "Ndan nandunests'ooz, 'en 'udúsni. 'En 'ahoh olħchoot!" ⁴⁹ 'Et 'ahoh Sizi yugħu ninya hoh "Dahooja Rabbi," yulħni 'ink'ez 'en naindunants'ooz. ⁵⁰ 'Et Sizi ndutni, "Sulħ dune di ka whusainya?" 'Aw 'et whusahandel 'ink'ez Sizi 'aw 'et hiyīlhchoot. ⁵¹ 'Et khunyaz 'il-ħunuh Sizi yulħ 'int'ah ndi soħi cho hayálhtsus 'ink'ez náwhulnuk degħha nus dezti be 'ulħna, 'en yudzo yuts'ah habé' yalħt'o. ⁵² 'Et Sizi ndi yulħni, "Nyoo soħi cho t'unádiñtih! 'Alha ndunnah 'et nduhút'en, 'en 'et hukw'e dahutetsah. ⁵³ 'Et si hukwa' nuszun t'eh, se'aBÁ oodalhkut t'eh 'ink'ez k'an 'ahoh 70,000 lizas 'o 'un 'uhuneltsuk, 'en da sts'o tħallab wile da sula hutentilh ka. 'Et 'aw t'eoonuzínzun hoh 'int'en. ⁵⁴ 'Et zeh ndust'en t'eh, nts'e na'a Yak'usda bugħunek lhadútenilh? Nts'e na'a sts'un dawħut'ih, 'et

whuz na'a 'uhóneh huba' hoont'ah." ⁵⁵ 'Aw 'et wheghah 'uhunet'oh hoh Sizi 'ilhunahuwésdel ndo búlhni, "Et di ka soh cho 'ink'ez be netunuzdult'o chah nudáhle 'ink'ez 'undunaht'ih hukw'u n'a'a skaootéhdel? Dzin totsuk luglez whucho 'et nuhwhutah sída 'ink'ez whunohodulh'eh. 'Et whunts'ih 'aw chasúlhchulh. ⁵⁶ 'Et huwa, nus whunilh'en bube' dustl'us hukw'e'edúguz, 'et ts'iyawh lhawhúdutenilh." 'Aw 'et higha hoodul'eh, 'en whulahúdetnik 'ink'ez highut sitélhdel.

Sizi naheyelh hububut ninínya

⁵⁷ 'Aw 'et ndunnah Sizi hiyilhchoot, 'en náwhulnuk degha nus dezti, Ca-iaphas hiyulhni, ghu hinílhti. Moses be' dustl'us 'uk'ununa'úsduguz, 'ink'ez dune tsuh whudelhdzulh chah, whuz 'ilhunahuwésdel. ⁵⁸ 'Et Peter 'o niz de hubuneyalh hoh náwhulnuk degha nus dezti bukoo whuna'nezdúl'oo whuz níbunenya. Whuz hubughu daninya hoh nélhghel buzih natl'adeda 'ink'ez na'dunildzilh, daootenilh whuntelh'ilh 'et hukwa. ⁵⁹ 'Et náwhulnuk bumoodih, 'ink'ez dune netsuh whudelhdzulh chah, 'ink'ez nahuheyelh chah, 'en ts'iyawh hoonliyaz whuts'it hubugha highu nahó'alh hukwa' hut'en hitzelhghelh ka. ⁶⁰ 'Et whunts'ih 'aw hiyulh náho'alh hoolah. Lhanah dune whusahándel 'ink'ez huwhuts'it be highu yalhtuk. 'Et whunts'ih 'awhuz hoonli hiyulh nachawhus'ai. 'Et khunyaz nanah dune huwhuts'it whuz haha'az ⁶¹ hoh nduhútni, "Et ndun dune 'utni Yak'usda hubuluglez whucho hoolah whutelhtsilh 'ink'ez tat dzin whutah 'udun na'whutelih ni," hutni. ⁶² 'Aw 'et náwhulnuk degha nus dezti didinya 'ink'ez Sizi yoodulhkut, "Aw ih daja chadáhnil? Daja hutni 'et hubugha daja ninzun?" ⁶³ 'Et Sizi 'aw nt'edusnih. 'Et náwhulnuk degha nus dezti, 'en 'uyulhni, "Ndun Yak'usda khuna, 'en be nyudusni yatalhtuk huba' hoont'ah. 'I be mba nahutedeh. Nedini Christ Yak'usda buYe', 'en ih 'unint'ah?" ⁶⁴ 'Et Sizi ndi yulhni, "Nyunch'oh 'et 'udíni. 'Et njan hubugha nohwhulh yalhtuk, nk'atlih t'eh yinkak dune ye', 'en ndun be hóolhtus, 'en nalhnih ts'ih yughu usda, 'et whuteh'ilh. 'Ink'ez kw'us k'ut ndus de hatéyalh, 'et chah whuteh'ilh." ⁶⁵ 'Et náwhulnuk degha nus dezti ye usda, 'i bubut gha lhts'e yalhch'ul 'ink'ez 'utni, "Yak'usda ch'a detni hoh yalhtuk. 'Aw 'uyoona nedóni hukwa cha'uznízun. K'an whunulh'en Yak'usda ch'a detni ts'iyawh nuhwheni nuhnalh 'utni. ⁶⁶ Daja nahzun?" 'Et 'uhutni, "Daóotsah huba 'uhoont'ah!" ⁶⁷ Hinen ts'ih huyoodunuzewh. Huyoolhchis 'ink'ez bulunah hiyoonukat. ⁶⁸ 'Et whuz na'a nduhíylhni, "Neba nus whutan'ilh. Nyun 'int'ah Christ inli t'eh, ndan 'unyinla nyunézkuk?" hiyúlhni.

Peter 'utni, "Sizi 'aw t'echanuzúszun"

⁶⁹ 'Et Peter n'az whuna'nesdúl'oo whez ts'ih usda hoh ts'ekeyaz yughu ninya. 'Ink'ez ndi yulhni, "Ndun Sizi Galilee whut'en, nyun chah bulh 'int'en inle!" ⁷⁰ 'Et ts'iyawh hububut whuts'oodedlai hoh ndutni, "Daja dini 'aw nt'echaoonuzúszun." ⁷¹ 'Et 'az tíanja. 'Uyoona ts'eke chah yunilh'en, 'ink'ez hoh nahudelhúya, 'en ndo búlhni, "Ndun 'en chah Sizi Nazareth whut'en bulh 'int'ah inle." ⁷² 'Et doo chah zeh neghan ndoh nalh whuts'oodéslat hoh ndutni, "Ndun dune 'aw nt'echanuzúszun!" ⁷³ Hukw'elh'az ndunnah yuzih nuhudelhúya, 'en highu nindel hoh 'uhiyúlhni, "Alha ndunnah yulh 'uhant'e, 'en nyun chah 'ilhunuh 'int'ah. Nts'e na'a yailhtuk, 'et huwa t'ents'unínzun." ⁷⁴ 'Et Peter ndutni, "Yak'usda sts'e'telhtsus 'aw ts'ah'un cha'duzusnih t'eh, ndun dune 'udáhni, 'aw t'echanuzúszun." 'Et 'ahoh ligok dune 'udéja. ⁷⁵ 'Et Sizi daja ni 'et Peter whunalnik hoh njan ndutni, "Et ligok dune 'uduténilh whutsuh, tat 'aw t'echasunuzinzun dutenilh." 'Et 'az whenaja 'ink'ez tube cho howintse.

27

Sizi, 'en Pilate but ninínya

¹ 'Et 'om bun bundada 'uda náwhulnuk bumoodih, 'en ts'iyawh, dune netsuh whudelhdzulh, 'en chah, 'en Sizi hich'a detni hoh howu yahalhtuk hituzelhghelh hukwa. ² 'Et Sizi hiyulhghel 'ink'ez yun k'ut whumoodih, 'en Pontius Pilate hiyulhni, hits'un hinilhti.

Judas tsená'usduguz

³ 'Et ndun whutl'ayálhti, 'en Judas hiyúlhni, 'aw 'et Sizi datetsah huba ba nahisda hoh, 'et nt'eoonanzin hoh tube budzi nduda suli. 'Et ndi tat lanezi sooneya silver hiyulhni, ndunnah náwhulnuk bumoodih 'ink'ez dune netsuh whudelhdzulh chah, buba whusanáyandzai. ⁴ 'Et ndo búlhni, "Njan ndusja hoh tinta' nust'en. Ndun dune nuhts'un whutl'ailhti, 'en 'aw tinta cha'ít'il." 'Et 'uhiyúlhni, "Nuwheni neba cha'hóot'ah. Nyunch'oh zeh mba' hoont'ah!" ⁵ 'Et ndi tat lanezi silver ts'utni, 'i sooneya luglez whucho yun hububut nayántsut. 'Et 'ink'ez 'az whenaja 'ink'ez tsená'usduguz. ⁶ 'Et ndunnah náwhulnuk bumoodih ndi sooneya silver ts'utni, 'i hiyilhchoot 'ink'ez 'uhutni, "Dune buzkai suli, 'i 'int'ah. 'Et huwa 'aw Yak'usda ba be 'úzdla, 'i be náts'oodzaih ghaít'ah." ⁷ 'Et dich'oh dutah howu yahalhtuk. 'Ink'ez ndan lhez 'oosa' 'ulh'en, ndi sooneya 'i be yun hiyónket. 'I k'ut 'uts'un whut'en wheyóbahule 'et wheni. ⁸ 'Et huwa soo k'an njan dzin 'et whuts'un ndi yun boozi 'i 'uskai yun hiyulhni. ⁹ 'Et whuz na'a hoh da ndun nus whunilh'en Jeremiah, daja ni 'et nduhóolcho túne' whust'en 'et lhaóodija njan ndutni, "Ndi sooneya silver ts'utni, 'et tat lanezi 'et 'uneltsuk ulhchoot. 'Et 'uneltsuk hiyoodolheto, ndun Israel hits'uh hainde, 'en huba k'elha hiyoolhtsilh. ¹⁰ 'Ink'ez lhez 'oosa' 'ulh'en, 'en buyun hiyónket. 'Et whuz na'a Moodihti sudani."

Sizi, 'en Pilate yubut siyin

¹¹ 'Aw 'et Sizi ndun yun moodih 'en yubut siyin. 'En yun moodih yoodulhkut, "Ny whole ih 'int'ah Lizwif hubudayi cho inli?" 'Et Sizi ndi yúlhni, "A, 'alha dini." ¹² 'Ink'ez ndunnah Lizwif bumoodih 'ink'ez dune netsuh whudelhdzulh chah, 'en hik'eho'ah hukwa' hut'en. 'Et whunts'ih 'aw hoonliyaz cha'dínil. ¹³ 'Et Pilate yoodulhkut, "Aw ih cha'duzínts'uk, 'aw daooneltsuk hoh nch'a yahálhtuk?" ¹⁴ 'Et 'aw lhuk'i khunek be whunts'ih daja chadinil. 'Et hoh yun k'ut whumoodih tube buba hooncha.

Pilate, 'en Barabbas buba yulanadetnik

¹⁵ 'Et nawhudezulh totsuk Lizwif butus lhuseya 'et whunahulnih, 'et whutah yun moodih ndan tsak'esda 'ilhunuh hika' ninzun, 'en ts'iyannah buts'un lanadutetnih. 'Et whuz na'a buk'ah ts'ih 'uhoont'ah. ¹⁶ 'Ilhunuh tsak'esda, 'en Barabbas hiyulhni, ts'iyannah t'ehinínzun. ¹⁷ 'Et ts'iyawh 'ilhunahuwésdel hoh Pilate huboodulhkut, "Ndan nuhwhuba bulanadutesnih hukwa' nahzun, Barabbas k'us Sizi, 'en Christ hiyulhni?" ¹⁸ T'eooininzun 'oolnih bugha butl'ahíyalhti. ¹⁹ 'Et Pilate dune ba nahedilh, 'i kw'usuda k'usda hoh bu'at 'en khunek yuts'ó tl'aida'ai, 'et ndi yulhni, "Ndun dune 'en ts'ah'un 'int'ah. Hoonliyaz onleh gunih! 'Alha k'an dzin 'en bugha huwu nusíti 'et hoh dzuh nusízut." ²⁰ 'Et ndunnah náwhulnuk bumoodih 'ink'ez dune netsuh whudelhdzulh chah, 'en 'ilhunahuwésdel ba hubahoont'i 'et whuz na'a 'uhóoneh ka, 'en Pilate, Barabbas yulanadootnih 'ink'ez Sizi hoolah hiyoolhtsilh. ²¹ 'Aw 'et yun moodih 'en huboodulhkut, "Ndunnah nanah, 'en k'us ndan nuhwhuba bulanadutesnih hukwa' nahzun?" 'Ink'ez 'et 'uhiyúlhni, "Barabbas." ²² 'Et Pilate ndo búlhni, "Et ndun do, Sizi ndun Christ hiyúlhni, 'en nts'e na'a chah daóosdleh ka?" 'Et 'ilhunahuwésdel nduhíyulhni, "Lhdulalhgus kélhtih!" ²³ 'Et yun moodih 'et ndutni, "Di

ka? Ndet hoh tinta' 'ant'en?" 'Et whunts'ih sulyehúdelya, "Lhdulalhgus kélhtih!" hutni. ²⁴ 'Et Pilate t'ewhnünzun 'aw hoonliyaz 'uhooleh ghaít'ah. Ndunnah 'ilhunahuwéšdel 'aw 'et lhtahotét'ahli li'hoont'ah. 'Ink'ez 'ilho-huwezedel hububut too be lana'elde 'ink'ez ndo búlhni, "Ndun ts'ah'un dune buzkai but'aghóosnalh hukwa cha'nuzúszun. Nuhwhenich'oh zeh nuhwhuba 'uhoont'ah." ²⁵ Ts'iyannah dune 'et nduhúttni, "Nuhheni ts'iyawh neuzkeh tubulh buzkai whuteleh, 'et nek'éholts'it!" ²⁶ 'Aw 'et Barabbas buba yulanadetnik 'ink'ez Sizi hiyolhtsus. 'Et hukw'elh'az butl'ayálhti lhdulalhgus k'ehíoolhtelh ka.

Nehughan Sizi highu nolhéya

²⁷ 'Aw 'et yun moodih 'en nehughan huwhut'i, 'en Sizi hiyílhchoot 'ink'ez bukoo ts'ih whehíyalhti, 'et Praetorium huwhúttni. 'Et ts'iyawh ndunnah nehughan Sizi higha' wezguz. ²⁸ 'Et hinaih hits'u húnuhuyulch'ul hoh nalhti dulk'un, 'i be híyalhti. ²⁹ Whus cho nahinelhbaz, 'i hitsi nihída'ai. 'Ink'ez tl'oghazilh nalhnih ts'ih hila k'ehídantan. Hubudayi cho k'una'a oot'e ka hitl'ahídantan. Hibut nachánuldulh cha' hiyulh'en. 'Et whuz na'a highudloh. 'Ink'ez "Lizwif hubudayi cho sa cho khona!" hiyúlhni. ³⁰ Highá dizoh, 'ink'ez tl'oghazilh be hitsi oonulht'ah. ³¹ 'Et highudloh 'ustl'e' 'uhudeja hoh ndi nalhti highun náhuyílchoot 'ink'ez dich'oh bunaih be nahíyalhti. 'Aw 'et lhdulalhgus k'ehítelhtelh ts'ih hítelhti. ³² 'Aw 'et Sizi tehínilhti hoh 'ilhunuh dune Cyrene whut'en 'int'ah, 'en Simon hiyúlhni, 'en hidudezedel hoh ndi Sizi bulhdulalhgus buba idantilh hiyúlhni. ³³ 'Aw 'et njan Golgotha ts'uwhúttni whuz lhgha hudindel. 'Et ndi khunek "Utsints'un nez'ai," ni hoh 'utni. ³⁴ 'Et mai too dunink'ooz, 'i 'ink'ez yoo, gall ts'utni, hitaidenla. 'I yulh yootnai hukwa' huyinla. 'Et yálhka 'ink'ez 'aw yootnai hukwa cha'nízun. ³⁵ 'Et lhdulalhgus yehíduñilht'o hukw'elh'az hinaih higha 'áinlih. Dahúja 'et hoh da nus whunilh'en nts'e na'a 'udani, 'et ts'iyawh hukw'u na'a 'uhooja. Ndez na'a njan dudani,

"Ndi sunaih dich'oh lhtahiyulya.

'Ink'ez bulah higha 'ainli cha' hiyínla."

³⁶ 'Aw 'et nátl'ahudelts'i 'ink'ez highunli. ³⁷ Butsi huwa ndoh ts'ih lhustelyaz whehindunilht'o. 'Ink'ez ndet hik'ehoo'ai 'et 'uk'e'hanguz. 'Et ndutni, ndun Sizi 'en 'int'ah Lizwif hubudayi cho.

³⁸ Nanah 'uhundunut'ih, 'en chah hiyulh lhdulalhgus k'ebuhilhti. 'Ilhunuh nalhnih ts'ih, 'ink'ez 'ilhunuh 'int'l'as ts'ih. ³⁹ Ndunnah wheghah whehúdelh nodunul'us 'ink'ez hich'a detni hoh yahalhtuk. ⁴⁰ 'Et 'uihyúlhni, "Nyún 'int'ah luglez whucho nanaóodutanlelh 'ink'ez tat dzin zeh na'whutanlelh dini! Nyunch'oh 'ududílyih! Yak'usda buYe' inli t'eh, ndi lhdulalhgus k'ut buk'ut nanaíndaih!" ⁴¹ 'Et ndunnah náwhulnuk bumoodih, 'en chah whuz na'a zeh highudloh. Moses be' dustl'us 'uk'ununa'úsduguz, 'en chah 'ink'ez dune netsuh whudelhdzulh chah, ts'iyawh whuz na'a zeh 'uhutni hoh ndez na'a njan duhutni, ⁴² "Uyoon ulhyis 'et whunts'ih dich'oh 'aw 'ududoolyih ghaít'ah. Israel buts'u hahánde, 'en ba hubudayi cho unli t'eh, 'et t'eh ndi lhdulalhgus yuk'ut nanaóoja wule da. 'Et t'eh da neba 'alha 'oot'e. ⁴³ 'En Yak'usda t'aníntan. 'Et huwa Yak'usda yuka' ninzun t'eh, k'an 'ahoh da yoolhyih. 'En 'utni si Yak'usda buYe' 'ust'ah." ⁴⁴ Ndunnah 'uhundunut'ih yuzih lhdulalhgus k'usulhti, 'en chah whuz na'a zeh 'et nduhíylhni.

Sizi ye khuna, 'iyuladetnik

⁴⁵ Dzetniz hukw'elh'az 3:00 bat'en 'ink'ez hulgħha 6:00 bat'en 'et whuts'un ndi yun k'ut ndúwhulcho tsahólhgus suli. ⁴⁶ 'Et 6:00 bat'en Sizi tube cho

ka' deduja hoh, "Eli, Eli, lama sabachthani?" Ndi khunek, "SuYak'usda, SuYak'usda di ka sula dantnik," ni ho 'utni. ⁴⁷ Bulunah dune 'et nuhúdelhuya hidánts'o 'ink'ez 'uhutni, "Ah! Elijah hahayih hoh 'utni!" ⁴⁸ 'Et 'ahoh 'ilhunuh whusalgalai, 'ink'ez duchun bula'dul'oo, 'i mai too dunink'ooz, 'i ye toonayuztan 'ink'ez nduk Sizi yuzek be naónoulhtsul. ⁴⁹ 'Ong'hunnah 'uhutni, "Bukaza'ez! Khunsih, Elijah yughu ninya 'ink'ez tulih yoolhyih." ⁵⁰ Doo chah Sizi tube cho 'udéja 'ink'ez duyéghah yula detnik. ⁵¹ Khunyaz luglez whucho bez ts'ih hukwadelhchooz 'i lhulcho lhk'énch'ul. 'Et yun chah nughésnai, 'ink'ez tse cho chah lhts'edankat. ⁵² Ts'un k'ut dune 'adinla 'et cha da' dutezkat. 'Ink'ez lhanah dune Yak'usda bube'ildzun, 'en nahunestez inle, 'en dináhudidel. ⁵³ 'Aw 'et tse be tsa k'et ts'ih hanáheded, 'ink'ez keyah Jerusalem ts'ih whehandel. 'Et lhanah nalhts'et hube hóodiltsai, 'et whébunelhtan. Sizi nakhitna hukw'elh'az ndulhcho 'et ndúhooja. ⁵⁴ 'Aw 'et ndun nehughan bumoodih 'en, 'ink'ez yulh 'uhut'en, 'en ndunnah Sizi yughunli, yun nughéznai 'ink'ez nts'oh tuné'whust'en, 'et honalh'en, 'et hoh tube whehunelhújoot 'ink'ez 'et 'uhutni, "Alha ndun dune, 'en Yak'usda buYe' 'int'ah." ⁵⁵ Lanah ts'ekoo chah 'et nahudelhúya ye 'az de whuts'un honilh'en. 'En Galilee ts'ih hahádel 'uhut'en. 'En Sizi whusahínandel 'ink'ez hiba ne'úst'en 'uhint'ah. ⁵⁶ 'En hubutah Mary, Magdala whut'en, 'en chah 'ut'en, 'ink'ez Mary, James 'ink'ez Joses bulh 'en hube'ama, 'en chah 'ut'en, 'et Zebedee buyekah 'en be'ama chah, 'ut'en.

Joseph, Sizi whuyiyalhti

⁵⁷ 'Aw 'et hulgħha wheghah whezulh hoh 'ilhunuh Arimathea whut'en, dune soode'a 'int'ah, 'en Joseph 'uhiyulhni. 'En chah Sizi yugha hoodul'eh 'ilhunuh suli. ⁵⁸ 'En Pilate ts'ih whinya, 'ink'ez Sizi buyust'e yuts'un ka na'dutni dutl'ayóolhtelh ka. 'Et Pilate ndo búlhni, "Sizi buyust'e ndunnah butl'ayúlhtih." ⁵⁹ 'Et Joseph Sizi buyust'e ndus de hanáyalhti 'ink'ez naih dezti, 'i 'aw chaditsun, 'i yugha iwézduz. ⁶⁰ 'Et dich'oh butse be tsa k'et k'an 'uhoonla, 'et bez ts'ih 'et neínilhti. 'Et tse cho be whudanaindunelhmul 'ink'ez whenája. ⁶¹ Mary Magdala whut'en, 'en chah 'et usda. Njan tsa k'et huwanch'az, 'et 'uyoon Mary chah 'et usda.

Sizi nts'e whuhíyalhti, ndi tse k'ut whuduná'hudelhdze

⁶² 'Et njan dzenis whuti 'et wheni lhazdutneh dzin 'uhoont'ah. 'Et 'om bun dzin ndunnah náwhulnuk bumoodih 'ink'ez Pharisee chah, 'en ts'iyawh Pilate ts'un whehandel. ⁶³ 'Et ndi hiyulhni, "Nemoodih ndun nena'a 'awhuz khuna hoh daja neúlhni, 'et whunats'ulnih hoh 'Tat dzin inle t'eh dinádutésdalh,' ni. ⁶⁴ 'Et hoh nghunek be budóoni njan tsa k'et da'dute'a whulh tat dzin 'et whuts'un. 'Et 'aw ndúchainel t'eh ndunnah yugha hoodul'eh 'ulh'ek whusahádel 'ink'ez hiyust'e hindutet'ih tulih. 'Ink'ez ts'iyannah ndoh budóoni ndunnah yaidla hubutah dinadeja ho' 'int'ah. 'Et whuz na'a 'udek'elh'az whuts'it, 'i 'udechoo, 'i degħa nus 'ultsi' whutéleh," hiyulhni. ⁶⁵ 'Et Pilate ndo búlhni, "Nuhwheni chah nohhowunli aht'i hoh aht'ah. 'Aw 'et nahdulh 'ink'ez nuhwhenich'oh soo duts'o cho hoh dána'deh'aih!" ⁶⁶ 'Et whehádel 'ink'ez ndi tse k'ut whuduná'hudelhdze. 'I be duts'o cho whuzzdli. 'Et 'ink'ez howu hinli 'en 'et nibanínla.

28

Sizi dinadija

¹ Nats'ulyis dzin hukw'elh'az hukw'enilhghel, 'et 'udechoo dzin, soo haootelh'en, 'et Mary Magdala whut'en 'ink'ez 'uyoon Mary bulh ts'un k'uz huni'az 'ink'ez honilh'en. ² Khunyaz 'ilhunuh neMoodihti bulizas yak'uz

hainya. 'Et huwa yun chah nughesnai. Whusainya 'ink'ez ndi tse whudahaidunalhmul, 'ink'ez yuk'ét'l'adida. ³ Bunen 'ants'ih ditnik kwun nduwhút'en. Bunaih tsil k'una'a lhiyul. ⁴ 'Et huwa ndunnah howuhinli nujut k'et hudulduz, 'ink'ez 'ants'ih dune dahuzsai li'huja. ⁵ Lizas ndunnah ts'ekoo ndo búlhni, "Nulhújut ilah. T'eeonusuzun Sizi ndun lhdulalhgus k'ut dazsai, 'en bukunáhta hó 'aht'en. ⁶ 'Aw njan hoolah! Dinadeja ho' 'int'ah. Nts'e na'a datenilh ni, whuz na'a dinadija hó 'int'ah. 'Anih, njan whunulh'en, ndet neMoodihti ilhte! ⁷ 'Et 'a cho whuz ah'us 'ink'ez ndunnah yugha hoodul'eh hubudáhni yaidla tah dinadija hó 'int'ah. Soo zelhts'ai nuhtsuh Galilee ts'ih iyahl. 'Et teh'ilh. Soo cho soo zelhts'ai 'uda ndun whudáni." ⁸ 'A tsih tse be tsa k'et whuch'a nahúnt'az. Whehunelhujoot 'et whunts'ih 'o nus huhóont'i cha' hint'ah. 'Ink'ez ndunnah yugha hoodul'eh 'en buts'un whuhelgai ndoh buduténilh ka.

Sizi hits'u teni' nalhdzun

⁹ 'Et ndunnah yugha hoodul'eh ts'ih he'us hoh khunyaz Sizi bududezya 'ink'ez ndo búlhni, "Whunélhnik." Hizih nen'i'az 'ink'ez hike óontun 'ink'ez hits'u téni' nalhdzin. ¹⁰ 'Et Sizi ndo búlhni, "Aw whénulhujut ilah. sul-hutsinkah buts'un naht'us 'ink'ez sba dobudóohni, nuhwheni ts'iyawh Galilee ts'ih toohdelh. 'Et si suhunoolh'en."

Lhuhúdughan 'en sooneya hubugha hinendzai

¹¹ 'Aw 'et hutezdel hoh 'et howuhinli bulunah Jerusalem ts'ih hunindel. 'Et whuz hunindel hoh 'et ndunnah náwhulnuk bumoodih, 'en 'et nduhóolcho hubudáni njan ndet dahooja 'et. ¹² 'Aw 'et náwhulnuk bumoodih 'ink'ez dune netsuh whudelhdzulh, 'en ts'iyawh 'ilhunahuwésdel 'ink'ez howu yahalhtuk. 'Ink'ez Ihai sooneya 'i lhahudughan hubugha hinendzai. ¹³ 'Et ndo buhútni, "Et nuhwheni ndez na'a 'udutéhnih, "Et 'ulh'ek 'awhuz ts'uztez hoh ndunnah yugha hoodul'eh whusahanel'i 'ink'ez buyust'e neghu hitelhti." ¹⁴ 'Et yun moodih whulh 'údants'o t'eh, soo kháznent'a hoh bulh yats'oolhtuk sih. 'Et t'eh whuz na'a 'aw hoonliyaz nuhts'u cha'hosne." ¹⁵ 'Et huwa ndunnah lhahudughan ndi sooneya hiyoohlchoot, 'ink'ez nts'e na'a ndo badáni, 'et whuz na'a zeh 'o 'unnah chah hubudáni. 'Et soo k'an dzin 'et whuts'un, 'et whuz na'a Lizwif dich'oh dutah howu yahalhtuk.

Sizi yak'uz whenaja whutsuh khunek netl'aída'ai khunek buk'une' ts'oot'en ka

¹⁶ 'Aw 'et ndunnah lanezi 'o 'at 'ilhunuh 'en yugha hoodul'eh, 'en Galilee ts'ih whehandel. Ndi dzulh k'uz Sizi hubudani, whuz whehandel. ¹⁷ Hiyan'en hoh hits'un teni' nalhdzin. 'Et whunts'ih bulunah huba cha'hoot'ah. ¹⁸ Sizi hubuts'un whusainya hoh hubulh yalhtuk 'ink'ez njan ndo búlhni, "Yak'uz 'ink'ez ndi yun k'ut 'i ts'iyawh huwando 'ust'ah, 'et sutl'awhélts'ut. ¹⁹ 'Et huwa lhelhts'un keyah whut'en, 'en ts'iyawh buts'un nahdulh 'ink'ez si sugha hoodul'eh hubulhtsi. Se'aBá 'ink'ez 'uYe' 'ink'ez Ndoni, ndi boozi be 'i be too be' butelh'ilh. ²⁰ Ndai khunek nuhtl'adá'ai, 'i ts'iyawh hik'une' 'oot'en hubodoolh'eh. 'Ink'ez sih soo zelhts'ai, 'et dzin whulatah lhaoodija t'eh, 'et whuts'un 'ahoolhyez nohwhulh 'útest'ilh ho' hoont'ah." 'Et ndoh honeh.

Yak'usda Bughunek Unzoo, 'I Mark Yuk'uné'uzguz

John dune too be 'ulh'en 'en Yak'usda bughunek be hubulh yalhtuk

¹ Ndi khunek unzoo, 'i khunek 'udechoo, 'i Sizi Gri, Yak'usda buYe' bugha. ² 'Uda Yak'usda be nus whunilh'en, ndi Yak'usda bughunek bugha 'uk'une'úsduguz, 'i 'et njan ndutni,
 " 'Yak'usda 'ust'ah, sóo zelhts'ai,
 'uyoon khunek suba na'á ntsuh tes'alh,
 mba lhaoodutelih 'et wheni.'

³ 'Et keyah, 'aw dune chahóot'ih,
 dune 'ultus hahuyih hoh,
 'NeMoodihti whuz de uyalh, buti buba lháoodahleh.

Lhuteyalh hoonzoo 'ink'ez lhts'e whudez'a buba whulhtsi," ni.

⁴ 'Et 'uhóoja John dune too be 'ulh'en, 'aw dune chahóot'ih ts'ih ninya 'ink'ez tube'o budáni, "Lubeshi whuch'a nuhwhubeni náhandunoohleh, 'ink'ez too be 'oohneh, 'aw 'et t'eh zeh Yak'usda nuhwhulubeshi nuhwhuba 'ún yutelhdulh." ⁵ Ts'iyannah Judea whunat whut'en 'ink'ez Jerusalem whut'en chah hits'un lhghadindel 'ink'ez John dune too be 'ubulh'en hiyoozélhts'ai. 'Ink'ez hubulubeshi hubugha hunáhuwhulnuk hoh nyo 'et took'oh Jordan huwhúttni toot 'et John dune too be balh'en. ⁶ 'Ink'ez John dune too be 'ulh'en khunai* gha sdútl'oo, 'i ye dune unli 'ink'ez 'uzuz se be sudelhú'oo. Tulk'us cho 'ink'ez honey, 'i ya'ah inle. ⁷ 'Et ndo búlhni, "Dune sk'élh'az whusatéyah sughanus dezti ho' 'int'ah. 'Aw bukechun ketl'oolh buba k'unaídutes'uk 'et whunts'ih huba soo cha'lhútdzooh. ⁸ Too be 'unwhuh'en 'et whunts'ih ndun dune 'en Ndoni be too be 'unwhutelih 'ink'ez Ndoni nuhyédute'ah."

Sizi too be 'úlya 'ink'ez netsudúle tink'us 'óoneh hukwa yóolhdzih

⁹ 'Et sa ilah hukw'elh'az Sizi Gri Nazareth† ts'ih hainya 'ink'ez took'oh Jordan huwhúttni toot 'et John dune too be 'ulh'en Sizi too be 'uyínlá. ¹⁰ Soo Sizi tooz hanaja íbulh, nduk yak'uz dá' dutézkez whutélh'en, 'ink'ez Ndoni, dut'aiyaz k'una'a, dove hiyúlhni, ndus de buk'eyít'o. ¹¹ 'Et 'uwhúttni, "Nyun suYe' inli. Tube nk'esi", 'ink'ez tube nyulh hoonúst'i." ¹² 'Et 'ahoh Ndoni 'en Sizi nye'un 'aw dune chahóot'ih ts'ih wheyálh'a. ¹³ 'Et dit lanezi dzin (40) Sizi 'aw dune chahóot'ih inda 'ink'ez Satan tink'us 'óoneh hukwa yóolhdzih. Khunai tsiyaini 'i chah hoonli. 'Et lizas whusahándel, 'ink'ez hiba ne'ut'en.

Dinah lhook ka 'uhut'en, 'en Sizi, "Anih," hubúlhni

¹⁴ John dune too be 'ulh'en, tsak'ehíya'ai hukw'elh'az, Sizi Galilee ts'ih ninya 'ink'ez hubulh yálhtuk nts'e na'a Yak'usda buk'úne whut'en, 'et hubugha. ¹⁵ 'Ink'ez 'et 'utni, "Ndi khunek unzoo, 'i 'int'ah. K'an 'aw 'et whusahónzut. 'Aw 'et nilhdukw Yak'usda buk'úne whutet'en ho' hoont'ah. Lubeshi whuch'a nuhwhubeni náhandunoohleh, 'ink'ez ndi khunek unzoo, 'i nuhwhuba 'alha 'oot'e 'ink'ez wúlhchoot!" ¹⁶ 'Et Sizi bun k'ut Galilee taba nuya hoh nanah lhook ka' hut'en hubunilh'en 'en Simon 'ink'ez bulhutsin Andrew bulh lhoombilh tahíyalhdel lhook ka 'uhut'en hinli 'et huwa. ¹⁷ 'Et Sizi ndo búlhni, "Sunéh'us, dune ka 'ooht'en whunwhudoolh'eh sih." ¹⁸ 'Et 'ahoh hubuloombil hiladetnik 'ink'ez hik'ah ts'ih 'uhoot'en ka hiyuntez'az. ¹⁹ 'Et 'o 'unyaz hahándel 'et 'uyoon nanah lhulhutsinkah James 'ink'ez John bulh

* ^{1:6} Ndi khunai, "camel" hiyúlhni. † ^{1:9} Nazareth, yun k'ut Galilee 'et whuz'ai.

Zebedee buye'kah 'en hubutelh'en buts'i bet buloombil nahutl'oo. ²⁰ Soo Sizi hubutelh'en ibulh, "Anih," hubúlhni. 'Aw 'et Zebedee buye'kah Sizi bulh whehá'az. Zebedee 'ink'ez yuba 'ut'en chah 'aw 'et ts'i bet hudélhts'i hoh bughoh whehá'az.

Dune ntsi' buyudínda

²¹ Keyah Capernaum‡ huwhútni whuz hunindel. 'Om bun dzin Lizwif nahulyis dzin, 'et Sizi Lizwif hubuluglez 'et bughut danínya 'ink'ez whehubondunilh'i. ²² Dune yudánts'o tube huba hooncha, soo buba 'ohoont'ah k'una'a hoh dune wheobodalh'i, 'aw Moses be' dustl'us 'uk'une'úsduguz buk'una'a ilah 'utni. ²³ 'Et 'ilhunuh dune hubutah usda, 'en ntsi' nududeh, 'i k'úne' 'ut'en, 'alzul hoh 'utni, ²⁴ "Sizi Nazareth whut'en ndet nets'ú hukwa' ninzun? Hoolah metalhtsilh ka ih whusaínya? Ndán ninli t'enyunúszun, nyun Yak'usda ba lubeshi bughu hoolah, 'en 'unint'ah." ²⁵ 'Et Sizi hukwa' yudani hoh ndi yúlhni, "T'eduzinlh hoh buyáh hanaindaih!" ²⁶ 'Et ntsi' nudúdeh, 'i ndun dune yukaootelhdzut, 'alzul, 'ink'ez yuyáhanaja. ²⁷ Ts'iyannah huba hooncha k'et 'et 'ulhódutni, "Dant'un dune 'int'ah, whutsuh da chats'udústs'uk 'et whuneoodulh'eh? Bughunek be whúnujut k'et ntsi' nudúdeh, 'i whunts'ih hik'úne' 'ut'en." ²⁸ 'Ahoh Galilee keyah whuti whunat whut'en Sizi hiyulh údants'o.

Sizi lhanah dune hunduda soo ná'bulh'en

²⁹ 'Aw 'et Lizwif luglez tínahundel. Simon 'ink'ez Andrew bukoo ts'ih hunindel, James 'ink'ez John bulh chah whuz huni'az. ³⁰ Simon bubez kwusuti k'ut sulhti. Buyust'e nezul, 'i be undúda. Sizi whuz ninya ibulh ndi hidáni. ³¹ 'Et yughu ninya 'ink'ez yula t'az nduk yilhchoot. 'Ahoh ts'eke soo 'uja 'ink'ez hubugha ná'unt'ai. ³² Hulhgha sa yun ts'ih tez'ai hukw'elh'az, ndan húnduda 'ink'ez dunnah ntsi' nudúdeh, 'i k'úne' hut'en chah Sizi gha banínla. ³³ Ts'iyannah 'et keyah whut'en ndati 'ilhúhowezdel. ³⁴ Lhawh dédowh dada, 'i be húnduda, 'en Sizi soo ná'balh'en 'ink'ez ntsi' nudúdeh, 'i k'úne' hut'en, 'en chah dune yé hanabunanyoot. Ntsi' nudúdeh, 'i 'aw yahoolhtuk butl'achahóo'al, t'ehinínzun 'et huwa.

Keyah Galilee huwhútni, 'et Sizi Yak'usda bughunek be yálhtuk

³⁵ 'Om bun 'uda 'awhuz hootel'eh whutsuh da, 'et Sizi didinya 'ink'ez 'az whenya. 'Et nyo keyah whuch'a siya, ndet soo nehoolah ts'ih, whuz ninínya. 'Et tenadedli. ³⁶ Simon 'ink'ez dulh 'úhut'en, 'en Sizi híkunuta. ³⁷ Nahuyilhti hoh 'et 'uhiyúlhni, "Ts'iyannah nkúnuta." ³⁸ 'Et Sizi ndo búlhni, "Uts'un keyah ts'ih chah uzttoodelh huba' hoont'ah dune bulh yatelhtuk, 'et huba whusáya." ³⁹ Galilee ndulhcho nukéhudezde luglez totsuk hubulh yálhtuk 'ink'ez ntsi' nudúdeh, 'i dune ye hanábuneyukw.

Dune bukak whulhjut, 'i leprosy hiyúlhni, 'en Sizi soo ná'yinla

⁴⁰ 'Ilhunuh dune, bukak whulhjut, leprosy hiyulhni, 'en Sizi ghu ninya, dugwútsi bé nenínya 'ink'ez yuts'u tédedli dula 'ooneh ka. "Nyun hukwa' ninzun t'eh, be ilhtus, 'i 'int'i, 'i be suná'ilhdeh," yulhni. ⁴¹ Sizi yugha té'nanzin, yuts'un delhúnik 'ink'ez yut'agheznai. "Hukwa' nuszun, soo na'íntneh," yulhni. ⁴² 'Et zeh ndun dune bukak whulhjut, 'en soo ná'uja. ⁴³ Sizi khunekti be yulh yálhtuk 'ink'ez 'aw 'et whenáyalh'a. ⁴⁴ Ndun dune natesja 'et Sizi ndi yúlhni, "Soo zelhts'ai, 'uyoon dóni gunih! Inyalh ts'ih náwhulnuk 'en buts'ínyalh 'ink'ez nyunoohl'h'en. 'Et 'ants'ih soo na'ínga hukw'élha ndet Moses bughunek k'una'a náwhulnuk nts'u húkwa' 'utni, 'i hubugha íon'alh. 'Et ts'iyannah whúntalhtun ts'ah'un soo na'ínga." ⁴⁵ 'Et whunts'ih ndun dune whenája 'ink'ez

‡ **1:21** Capernaum, yun k'ut Galilee 'et whuz'ai.

ts'iyannah ndo budáni 'o nus huwe yalhtuk k'et Sizi 'aw keyah dune tunóya ghaít'ah. 'Et n'awh dune chahóot'ih hoh dune unli. Lhelhts'un teh whut'en whuz highu lhk'esúdel.

2

Dune buyust'e dechadusnik, Sizi soo ná'yinla

¹ 'Et hukw'elh'az whutezut hoh Sizi koo Capernaum ts'ih lhgha nadija. Ts'iyannah whulh 'úhuduzts'ai. ² 'Et 'ahoh dune 'ilhuhowezdel. Whuz dune lhanah 'ilho daníndel k'et 'aw whuz'ai hoolah, ndati 'i bulh whudezbun. 'Et Sizi Yak'usda bughunek bugha hubulh yálhtuk. ³ Yalhtuk hoh dinah dune, 'en 'ilhunuh dune buyust'e dechadusnik Sizi ts'un hítezkai. ⁴ Whuz dune hulan 'ink'ez 'aw Sizi highah nióodelh ghaít'ah. 'Et nduk bun 'i k'ehiyílhti 'ink'ez soo ndet Sizi 'int'ah bat'en, whuz ndun dune buyust'e dechadusnik ndus de yuk'usti, 'i bulh hukwu hininkai. ⁵ 'Et Sizi dahóolcho huba 'alha 'ahoont'ah t'eeonínzun, ndun dune buyust'e dechadusnik 'ulhni, "Uski nyulubeshi ts'iyawh mba hoolah suli." ⁶ Bulunah Moses be' dustl'us 'uk'une'úsduguz, 'en nyo 'et huelhts'i 'ink'ez 'uhinínzun, ⁷ "Ndan na'dunúdzun hoh 'utni, Yak'usda ch'a yalhtuk. 'Aw dune lubeshi n'un hutoolhdehl ghaít'ah, Yak'usda 'en zeh lubeshi n'un yutelhdulh ho' 'int'ah." ⁸ 'Et Sizi buyeghah be daja huninzun t'ewhunínzun 'et 'ahoh ndo búlhni, "Dáhoont'ah huwa hoh teh nuní nahzut? ⁹ Ndet degha nus huwa chahóolnah, ndun dune buyust'e dechadusnik 'udutésnih, 'Nyulubeshi mba 'un telhdel,' k'us 'Dinadindaih 'ink'ez ninja?" ¹⁰ Whunuh whuntelhtun, yinkak dune ye', 'en njan ndi yun k'ut lubeshi n'un tulhdehl huba' hoont'ah." 'Et ndun dune buyust'e dechadusnik yúlhni, ¹¹ "Nyudúnsi, bukw'usinti 'i ilhchoot 'ink'ez nkoo ts'ih naíndalh." ¹² Ts'iyawh hinilh'en hoh 'a hoh dinadija, yuk'usti, 'i yilhchoot 'ink'ez ts'iyannah nalh whenája. Soo ts'iyawh huba hooncha 'ink'ez Yak'usda hidálhti 'ink'ez 'uhútni, "Aw whutsuh da 'et nduhoont'ah 'aw chats'uwhes'en."

Sizi, 'en Levi, "Anih," yulhni

¹³ 'Et chah Sizi taba ts'ih lhghanadija. Hulan hoh highu nindel hoh 'et whubodalh'i. ¹⁴ 'Et Sizi wheghah uyahl hoh Alphaeus buye' Levi, Capernaum hoonkuti huwunli ka sooneya 'ilhunughesdzaih, 'en Sizi yutelh'en, 'et ndi yúlhni, "Sunanyalh." 'Et Levi dudinya 'ink'ez yuk'ah ts'ih oot'en ka yuntezya. ¹⁵ Hukw'elh'az 'et Levi bukoo lhannah ndunnah sooneya 'ilhughunesdzaih 'ink'ez lubeshi 'ulh'en, Sizi yugha hoodul'eh chah 'et hubula na'ut'alh. ¹⁶ 'Et Moses be' dustl'us yuk'ununa'úsduguz 'ink'ez Pharisee dédowh, Sizi hinilh'en ndunnah lubeshi 'ulh'en, 'ink'ez sooneya 'ilhughunesdzaih hubula na'ut'alh. Ndunnah Pharisee Sizi yugha hoodul'eh hubuhoodulhkut, "Dáhoont'ah huwa ndunnah hubula 'ah'alh?" ¹⁷ Sizi hubuduzts'ai 'ink'ez ndo búlhni, "Ndan soo 'ínt'ah, 'aw yoo be duyun ka cha'hunízun, ndan nduda, 'en zeh yoo be dýyun ka' huninzun. 'Et whuz na'a zeh si chah dune ts'ah'un 'int'ah na'dunúdzun ba whusáchasyal, lubeshi 'ulh'en lht'anahunoodelh hubudutésnih 'et wheni whusáya."

Dune saha'húdelya 'et hukwa Sizi hiyoodulhukut

¹⁸ 'Et John dune too be 'ulh'en yugha hoodul'eh 'ink'ez Pharisee hubugha hoodul'eh chah sahá'hudelya hoh 'uyoon Sizi highu nindel 'ink'ez 'uhiyúlhni, "Et dáhoont'ah huwa John dune too be 'ulh'en yugha hoodul'eh 'ink'ez Pharisee hubugha hoodul'eh chah sahá'hudelya 'et whunts'ih nyun ngha hoodul'eh, 'en 'aw sahácha'hudilyel?" ¹⁹ Sizi ndo búlhni, "Aw ih k'an lhghusduke bulh dunekah sahá'hudutelyelh? 'Awundooh! Ndunnah hubughun

ts'úzdel, ndun dune bu'at whuzdli, 'et hubutah usda t'eh, 'aw sahácha'hudilyel. ²⁰ 'Et whunts'ih whusawhutélts'ulh ndet ndun dune 'at ut'i bughu nay-itélchulk. 'Et dzin whusawhélts'ut t'eh, 'et sih saha'hudutelyelh." ²¹ "Aw 'ilhunuh naih k'an, 'i naih jut be lhudunoolhkalh ghaít'ah. 'Et ndúja t'eh, ndi naih k'an, 'i be lhts'etech'ulh, 'et nyoo naih jut lhts'ench'ul 'i bulh hanaitech'ulh 'ink'ez 'o nus hooncha tele. ²² 'Et whuz na'a 'aw 'ilhunuh mai too, 'awhuz 'ut'en, 'i 'uzus 'ujut, 'i be hiyoolhdzeh huba cha'hóot'ah. 'Et nduhiyínla t'eh ndi mai too zus jut, 'i buk'otéltulh 'ink'ez mai too nadutejulh 'ink'ez buzus bulh tinta' tet'ilh. Mai too 'awhuz 'ut'en, 'i uzus k'an, 'i be yóoldzeh huba' hoont'ah."

Nahulyis dzin hukwa' hoodulhkut

²³ 'Et doo chah nahulyis dzin 'uhoont'ah hoh, Sizi 'ink'ez yugha hoodul'eh tubulh tl'o k'ut wheghah hidulh hoh, tl'o mai hoonuye. ²⁴ 'Et Pharisee Sizi 'uhiyúlhni, "Nilh'en dáhoont'ah huwa ngha hoodul'eh nats'ulyis dzin 'et 'uhut'en? 'Aw 'et nduhóot'en huba cha'hoot'ah." ²⁵ Sizi ndo búlhni, "Aw ih hukw'e yachalhtih David dája hoh da, yoo'alh, 'i hoolah, yulh 'úhut'en teh buye'élts'ul 'et 'uja, ²⁶ Yak'usda bukoo 'et danínya 'ink'ez ndi lhes Yak'usda bugha iní'ai, 'i yu'alh 'ink'ez yulh 'uhut'en, 'en chah hiya'al. Nawhulnuk 'aw 'en zeh hiyoo'ah huba' hoont'ah, 'et whunts'ih David 'ink'ez yulh 'uhut'en chah nduhuja. Hoh da Abiathar 'en nawhulnuk bumoodih unli ho' hooja." ²⁷ 'Et Sizi ndo búlhni, "Nahulyis dzin dune huba whulhtsi, 'ink'ez dune, 'en 'aw nahulyis dzin huba cha'hílnel. ²⁸ 'Et huwa yinkak dune ye', nahulyis dzin 'et whunts'ih nts'e na'a ne'hutet'ilh hukwa' huninzun huba' hoont'ah."

3

Sizi Gri dune bula únduda 'en soo na'yinla

¹ 'Et Sizi Lizwif hubuluglez ts'ih danínya. 'Ilhunuh dune bula 'aw ye nucha'ust'en, 'et usda. ² 'Et Pharisee tube Sizi highunli nahulyis dzin tulih ndun dune ka hoonli nayoolhyih, hukwa hik'ého'ah, 'et hukwa high-unli. ³ Sizi ndun dune bula ka hoonli 'en 'uyúlhni, "Didinyih 'ink'ez 'udez inyalh!" ⁴ 'Et Sizi huboodulhkut, "Neghá whunt'ai ih nats'ulyis dzin, hubula 'uts'utenilh k'us 'uts'uduntélhda, uztelhyih k'us hoolah ts'utelhtsilh?" 'Aw dája chahudinil. ⁵ Sizi tube hunílch'e hoh hubutunuyú'en tube budzi ndesda, ndunnah stabe hubudzi duts'un. 'Et ndun dune ka hoonli yulhni, "Lhk'utdughelnih!" Ndun dune 'en lhk'udughellhúnik ibulh 'ilhk'us ts'ih k'una'a soo ná'uja. ⁶ 'Et 'ahoh Pharisee nyo luglez tínahundel 'ink'ez Herod dédowh bulh highu yalhtuk nts'e na'a Sizi hituzelhghelh 'et wheni lhahóduleh.

'Ilhuhowezdel bun k'ut taba hudilhts'i

⁷ 'Et chah Sizi yugha hoodul'eh tubulh Galilee bun ts'ih lhgha huditdel. Galilee keyah whut'en whuz lhgha hidunindel 'ink'ez lhelhyoo keyah ts'ih huhandel tubulh. Judea ts'ih hahandel chah, ⁸ Jerusalem whut'en, Idumea ts'ih hahádel, Jordan took'oh wheghah whut'en, 'ink'ez ndunnah Tyre 'ink'ez Sidon whut'en, 'en chah, ts'iyawh Sizi higha 'ilhuhowezdel lhat tune'út'en hiyulh 'udánts'o 'et huwa. ⁹ Lhanah 'ilhuhowezdel Sizi lhube' hintelhjulh 'et whuch'a yugha hoodul'eh, "Ts'iyaz suba lhadáhleh," hubulhni. ¹⁰ Lhanah hunduda soo na'ubinla 'ink'ez 'uyoon hit'aónalh hukwa' hut'en, ¹¹ 'ink'ez ndunnah ntsi' nudúdeh, 'i hubuyudínda, Sizi hitulh'ih teh, hibut nachánuldulh, 'ink'ez hahúzulh hoh 'uhutni, "Nyun Yak'usda buYe' inli ho' 'int'ah." ¹² 'Et Sizi khunekti be ndunnah ntsi' nudúdeh, 'en ndo búlhni, "Khun ndan 'ust'ah doohtni gunih!"

Lanezi 'o 'at nanah (12), 'en Sizi 'et 'utaháoobanla

¹³ Dzulhyaz k'ut nduk whenza hoh ndunnah hubuka' nenzun 'en hubuka' dani 'ink'ez hits'uh whendel. ¹⁴ Lanezi 'o 'at nanah, 'en 'utaháoobanla. 'Et ndo búlhni, "Sulh 'óoh't'e ka 'utahanhóla, dune bulh yátelhtuk ka nuhwutél'h'ah, ¹⁵ 'ink'ez ntsi' nudúdeh, 'i dune buyuh hanainóohyukw 'ink'ez dune soo na'boolh'en, 'et nuhwhutl'ahó'ai." ¹⁶ Ndunnah lanezi 'o 'at nanah, 'en 'utaháoobanla Simon, 'en Sizi "Peter" naidútni. ¹⁷ James 'ink'ez bulhutsin John, Zebedee buye'kah 'en Sizi Boanerges nabudátni, ndi boozi, 'i "Huhuske" ni ho 'utni; ¹⁸ Andrew, Philip, Bartholomew, Matthew, Thomas, James Alphaeus buye', Thaddaeus, Simon 'en ts'ah'un 'ut'udil'i, ¹⁹ 'ink'ez Judas Iscariot chah 'en Sizi be ná'oodutekulh.

Netsudule Sizi Gri buyudínda hutni

²⁰ 'Et doo chah zeh 'ilhohuwezdel hulai k'et Sizi 'ink'ez yugha hoodul'eh bulh 'uhute'alh, 'et whunts'ih 'aw 'uhooneh ghaít'ah. ²¹ Lhanah dune 'uhutni, "Beni hoolel" hutni 'ink'ez bulhutsinkah hiyulh údants'o hoh hika natesdel budeni 'et tinta' 'oot'en whuch'a. ²² Moses be' dustl'us 'uk'ununa'úsduguz, Jerusalem ts'ih huhandel, 'en 'uhutni, "Beelzebul buyudínda 'ink'ez ntsi' nududeh bumoodih 'en ye úlhtus yugha óoni'ai, 'et huwa ntsi' nududeh, 'i dune buts'u hanaoobuneyukw." ²³ 'Et Sizi, "Anih," hubúlhni, 'ink'ez hubulh náwhulnuk higha hodool'eh ka, "Nts'e na'a Satan dich'oh na'dudúntejulh? ²⁴ Keyah whut'en lhch'az nihúdendel t'eh, 'et keyah hoolah whutéle, ²⁵ k'us 'ilhunuh bukoo whut'en lhch'az nihúdendel t'eh, 'et bukoo whut'en hoolah whutéle. ²⁶ 'Et Satan dich'oh dulh duch'a nenadenja 'ink'ez lhch'a nihúdendel t'eh, 'aw sa 'uhoot'e ghaít'ah 'ink'ez hoolah whutele.

Ndan Ndoni ch'a detni be yahulhtuk, 'aw buba whunaoodootnah ghaít'ah

²⁷ "Aw 'ilhunuh dune whunts'ih njan dune ulhtus bukoo 'et datdutooyis 'ink'ez te'oolelh ghaít'ah, 'et ndunah dune ulhtus 'en yulghel choo, 'et sih yughu te'oolelh. ²⁸ Soo ts'ah'un nuhwhudúsni, ts'iyannah dune bulubeshi 'ink'ez Yak'usda ch'a yátuk chah, ts'iyawh hububa n'ún whuteldulh. ²⁹ 'Et whunts'ih ndan Ndoni ch'a yáhalhtuk, 'en 'aw bulubeshi buba n'un yutool-hdelh ghaít'ah, 'ilhuz wheni huba nahutedeh." ³⁰ Sizi hubudani, 'et huwa ndunnah Moses be' dustl'us 'uk'ununa'úsduguz 'uhútni, "Ntsi' nudúdeh, 'i buyudínda!"

Sizi bu'ama 'ink'ez bulhutsinkah hits'u téduhlh

³¹ 'Et Sizi bu'ama 'ink'ez bulhutsinkah teh whusahádel koo yoo 'az ts'ih, 'et nahudelhúya hoh koo whez ts'ih khunek hits'o tl'adá'ai. ³² Dune 'ilhuhowezdel Sizi hinat delhts'i 'ink'ez 'et 'uhiyúlhni, "Nilh'en nyu'ama 'ink'ez nyulhutsinkah ye'at 'az 'uhint'ah 'ink'ez nka' hoodulhkut." ³³ 'Et Sizi ndo búlhni, "Ndan su'ama k'us ndunnah sulhutsinkah?" ³⁴ Ts'iyawh hodelhts'i hubutunúyuz'en 'ink'ez 'utni, "Whunulh'en njan ndunnah, 'en su'ama 'ink'ez sulhutsinkah chah 'uhint'ah. ³⁵ Ndunnah Yak'usda k'úne' 'ut'en unli, 'en sulhutsin, sulhtus, 'ink'ez su'ama 'uhint'ah."

4

Ha'nule bugha whúts'odul'eh

¹ 'Et bun k'ut Galilee huwhúttni, 'et doo chah 'ilhuhowezdel Sizi higha wezdel 'ink'ez hubodulh'eh. 'Ilhuhowezdel hulai k'et ts'iyaz bet natl'adeda. 'Et 'o nus lih dudekelh 'et whuts'un 'ilhuhowezdel taba nahudelhúya hubodulh'eh. ² Lhat hukw'e hubulh nawhulnuk huwa ha hodool'eh 'et wheni. ³ "Soo suzelhts'ai, 'ilhunuh ha'nule, há'unteleh ts'ih whenya. ⁴ 'Et ha'nule hoh bulah ti nanánkat. 'I dut'aiyaz whusahádel 'ink'ez ts'iyawh hineldel. ⁵ 'Et

bulah tse tah nanánkat, 'ankw'us yunyaz hoolah, 'et huwa 'ahoh hanusduki. ⁶ Bughih hoolah 'et huwa hasain'ai hoh ts'iyawh yanúdezgi 'ink'ez hoolah suli. ⁷ 'Et bulah chah whus cho taníkat. 'I chah whus cho whutah bulh hananyi bulh lhéwhuntlah 'ink'ez 'aw hachániyel. ⁸ 'Et 'onghah, 'i yun unzoo, 'i k'ut nanánkat hoh soo hananyi 'ink'ez bumai bulah tat lanezi (30) bumai suli, bulah lhk'utat lanezi (60) bumai suli, 'ink'ez bulah lanezi lanezi (100) bumai suli." ⁹ 'Et Sizi ndo búlhni, "Ndan budzo hooni, 'en huyoozólhts'a huba' hoont'ah."

Bugha whúts'odul'eh, 'i di unli ho' 'int'ah?

¹⁰ 'Et Sizi dich'oh 'int'ah hoh bulunah hiyoozálhts'ai whel'a bulh Sizi higha wézdel 'ink'ez 'uhiyúlhni, "Dája dani, 'et neba hukw'u nuhílhye." ¹¹ Sizi ndo búlhni, "Nts'e na'a 'utenilh Yak'usda budune hik'úne' 'ut'en, k'an whuts'un dune ch'a nonú'i. 'Et k'an ts'iyawh nuhwhuba hahónla t'eoonoohzeh ka, 'et whunts'ih 'uyoos dune, 'en higha hódool'eh k'una'a zeh hubulh yálhtuk. ¹² 'Et huwa:

'Honílh'en 'et whunts'ih 'aw chahuwhés'en wule.

'Uhoozélhts'ai 'et whunts'ih 'aw t'echahonoosze.

'Et bubení taóodelts'ut 'ink'ez Yak'usda ts'un nahulhú'a t'eh, 'et bulubeshi buba 'ún yutelhdulh."

Ha'nule bugha whúts'odul'eh, 'et Sizi neba hukw'u nuhúlhye

¹³ 'Et Sizi ndo búlhni, "Ndi bugha hodulhú'eh, 'aw ts'ah'un nichawahh'al t'eh, 'ink'ez 'uyoos bugha hoodelhú'i t'eh, 'et nts'e na'a simba 'oohneh ts'ah'un neooteh'ahl?" ¹⁴ 'Et Sizi ndo búlhni, "Ha'nule 'en Yak'usda bughunek 'aínule.

¹⁵ Buluh Yak'usda bughunek ti nanúkat, 'i hidits'o teh, 'et 'ahoh Satan khunek budzi bughu yílhchokw. ¹⁶ Ndi ndai da tse tah 'anelya, ndunnah 'i k'una'a zeh 'uhint'ah. Ndi Yak'usda bughunek hidits'o 'ink'ez soo 'ahoh huhóont'i hoh huyilhchuk. ¹⁷ 'Et whunts'ih dich'oh 'aw bughih hoolah li'hint'ah. 'Et huwa 'astl'iyaz zeh buba 'alha' hoont'ah. 'Ink'ez ndi khunek 'i bugha dzuh nuhudeh 'ink'ez 'onghunnah buch'a hudemtni. 'Et huwa 'ahoh ndi khunek hiladutnih. ¹⁸ Ndai whus tah 'anankat, ndunnah 'i k'una'a zeh 'uhint'ah. ¹⁹ 'En khunek hidits'o, 'et whunts'ih ndi yun k'ut huwu ni udli, ndi yun k'ut soo uzde'a 'ohoont'ah, 'ink'ez ndai yun k'ut huhóont'i tune' hut'en, 'et 'i ts'iyawh whus cho 'i be bulh lhewhullhuk. 'Et huwa 'aw lhadoolneh wule ghaít'ah. ²⁰ 'Et bulunah yun unzoo, 'i k'ut nanánkat 'i li'hint'ah. Yak'usda bughunek hidits'o, hiyílhchukw, 'ink'ez budzi yuh nihíyu'aish, 'et bumai whulhlhii. Bulunah tat lanezi (30), bulunah lhk'utat lanezi (60), 'ink'ez bulunah chah lanezi lanezi (100)."

Too dezkl'un 'i hukw'usu'ai 'i Siziyughi yailhtuk

²¹ 'O 'un Sizi ndo búlhni, "Too dezkl'un dune dainí'ai 'ink'ez k'its'ai tulih yeyuh niyúte'ahl, k'us kw'usuti t'ah tulih niyúte'ahl? 'Awundooh! Hukw'usu'ai ba'hoont'ah, 'et hukw'eíte'ahl. ²² 'Et huwa ndai whu'iz 'int'ah, 'i ts'iyawh ts'et haóotekulh." ²³ 'Et Sizi ndo búlhni, "Ndan hubudzo hooni, 'en hiyoozólhts'a huba' hoont'ah." ²⁴ 'Et chah ndo búlhni, "Huawahli 'ink'ez soo cho soo zélhts'ai t'eh, soo bugha hóodolhu'eh whuz na'a Yak'usda 'o 'un chah sih nuhla 'ooneh. ²⁵ Ndunnah sughunek soo cho hiyoozélhts'ai, 'en 'o 'un chah hiyootuzélhts'ilh 'ink'ez higha hóodutel'eh. 'Et bugha óotet'ahl 'ink'ez ndunnah chahiyyootuzélhts'ilh, 'en sughunek hidánts'o 'et whunts'ih hinaoodutelnah."

Haniyeh, 'i bugha whúts'odul'eh

²⁶ 'Et Sizi 'utni, "Nuhwhubulh naóotelhúnuk Yak'usda buk'úne' whut'en, 'et hubugha dune lí'ut'en 'a'nulye, 'i 'ainúle whuz na'a 'int'ah. ²⁷ 'Et hukw'elh'az 'ulh'ek usti 'ink'ez dzenis 'et n'awh ne'út'en, 'et nduhoolyez hoh 'ainanla,

'i buk'unónultalh 'ink'ez haníyeh 'et whunts'ih 'aw t'eoonízun dat'en hoh hanúlhyih. ²⁸ 'Et yun 'i bugha hanúlhyih 'ink'ez bumai whulhlhiih. 'Udechoo yun yuh hanúduki, 'et nuyeh 'ink'ez dinyez 'ulhih teh bumai whulhlhiih. ²⁹ 'Et bumai nut'ih teh, 'et dune tl'o be dut'as 'i be yut'us 'aw 'et há' nukat newhúninzut 'et huwa."

Haníyeh, 'i Mustard hiyúlhni, 'i bugha whúts'odul'eh

³⁰ 'Et Sizi 'utni, "Daja uzdutenilh Yak'usda buk'úne' whut'en, 'et hukw'u nuts'úhulhye hígha hóodool'eh 'i buk'únats'otelnuk? ³¹ Degha nus 'anulye, 'i nintsool, 'i mustard hiyúlhni. 'I dune yilchuk 'ink'ez yun 'ainulih. ³² 'Et hanúlhyih teh, 'ink'ez soo k'enulhyi, 'i ts'iyawh 'ut'an hanúlhyih degha nus 'udelcho 'ulhih. 'Et huwa buzooschum dincha hoh lhts'enunúlhye, 'et dut'aiyaz yutah 'ut'o nilih." ³³ Lhat higha hóodool'eh ka hubullh yálhtuk dáhoolcho 'i be t'ehontezeh, 'et zeh hukw'u hubulh náwhulnuk. ³⁴ Higha hóodool'eh, 'i be zeh hubulh yálhtuk, 'et whunts'ih dich'oh 'úhint'ah teh, yugha hoodul'eh, 'en soo cho huba hukw'ú nuhúlhye.

Nilhtsi cho 'ink'ez tatsi cho, 'i Sizi yuk'úne'ut'en

³⁵ 'Et hulgħha Sizi yugha hoodul'eh, 'en ndó bulhni, "Nyan tadatus ts'ih uztóoke." ³⁶ 'Et 'ilhohuwezdel buch'a nahusdel, yugha hoodul'eh ts'i be hándel, Sizi 'uda ye usda, 'i be nyan hutezki, 'uyoo ts'iyaz chah hubulh tezkat. ³⁷ Khunyaz nilhts'i ulhtus tezts'i hoh tatsi dincha k'et ts'i be tadutih 'ink'ez 'ankw'us too be whendunimbun. ³⁸ 'Et Sizi ts'i niz ts'ih 'et ts'i alh k'ut tsilhu'al 'ink'ez nanésti. 'Et yugha hoodul'eh ts'ih nahinílhdzut 'ink'ez 'uhiyúlhni, "Nehodul'h eh, 'aw 'et yats'utedlah! 'Aw ih negħu ni chaínlah?" ³⁹ Sizi didinya hoh too k'ut nilhtsi khunek ulhtus, 'i be hukwa' yudáni, "Nilhts'i, 'ustl'e' 'ineh," 'ink'ez, "Tatsi nughuzina," 'ink'ez 'Aw 'et dóngħel. ⁴⁰ 'Et Sizi yugha hoodul'eh ndo búlhni, "Dahoont'ah huwa stabe whenlhujut, 'aw ih bé 'alha' hoont'ah, 'i chaht'ih hoh 'aht'ah?" ⁴¹ 'Et tube wheħunelhújoot 'ink'ez 'ulhóđutni, "Dant'ah dune unli ho' 'int'ah? Nilhts'i 'ink'ez tatsi bulh 'i nts'ih yuk'úne' 'ut'en."

5

Dune ntsi' nudúdeh, 'i buyidélhts'i Sizi soo ná'yinla

¹ 'Et bun k'ut nyan nahuninki whuz Gadarene whut'en hubukeyah 'et 'uhoont'ah. ² Soo Sizi ts'i bé hainya ibulh 'ilhunuh dune tse bet dune 'adinla whuz de haínya. ³ Ndun dune tel'en ntsi' nudúdeh, 'i buyudínda 'ink'ez ts'un k'ut 'et whut'i. 'Aw dune tse tl'oohl be whunts'ih wheħidoolht'uk għaít'ah. ⁴ Lhat hoh bula 'ink'ez buke bulh hiyulħghel 'et whunts'ih hoh totsuk tse tl'oohl k'unuyéyuz 'ink'ez tse tl'oohl buke be lhulħú'oo, 'i chah yayalħus. Ulhtus k'et 'aw dune hich'a 'oolħdeh għaít'ah. ⁵ Dzin 'ink'ez 'ulħ'ek 'i bulħ ts'un k'ut whutah 'ink'ez nódest'ai, hoh nuya hoh 'alzul 'ink'ez tse be bubut na'dudut'as. ⁶ Dzuh nilhdza, 'et yugħu siyin hoh Sizi yutelh'en. 'Ahoh yuts'u télhgħai 'ink'ez dugwutsi be yubut nachánetno, ⁷ 'ink'ez soo 'ultus 'alzul hoh 'utni, "Sizi degħa nus Yak'usda buYe' ndet suts'o hukwa' ninzun. Yak'usda 'en be suts'un nahútanyelh dzuh nusilħdżut ilah." ⁸ 'Et ndutni hoh Sizi ndi yulħni ntsi' nudúdeh, 'i ndun dune buyáh hanaindaih. ⁹ 'Et Sizi yoodulħkut, "Ndai nyoozi?" yúlhni. 'Et 'utni, "Legion, 'i sooz 'int'ah. 'I lhanah neħughan 'uts'int'ah ni hoh 'utni." ¹⁰ 'Et ntsi' nudúdeh, 'i Sizi soo yuts'u téddulħi, "Njan keyah whuch'a netolħ'a gunih," yúlhni. ¹¹ Dzulħ yegħah 'et goso lħai 'et 'ahú'ah. ¹² 'Et ntsi' nududeh, 'i Sizi ts'un teħududleħ ndunnah n'ún goso 'en buts'un neitħel'hah, 'et t'eh buyúzdoodeh. ¹³ 'Et huwa 'ahoh Sizi hubutl'ahó'ai ntsi' nudúdeh, 'i dune yuts'ah hanádexe 'ink'ez goso 'i yeyúdande.

Goso 'ankw'us 2,000 'int'ah, 'i ts'iyawh wheghálghaz 'ink'ez too yanghan. ¹⁴ 'Et ndunnah goso ghuhinli whuhélghaz 'ink'ez keyah whutah khunek nihuni'ai. 'Et lhanah whusaíndel dáhooja hontelh'ilh ka. ¹⁵ 'Et Sizi highu nindel 'ink'ez dune hinilh'en ntsi' nudúdeh, 'i buyudelhts'i inle, 'et hukw'usda beni bugha nádelts'ut 'ink'ez soo dint'ah chah 'int'ah. Huba hooncha k'et tube whéhunelhújoot. ¹⁶ 'Et ndunnah ho'en, 'en dune hubudáni ndun dune ntsi' nudúdeh, 'i buyudélhts'i inle, dája 'ink'ez goso bugha chah. ¹⁷ 'Et Sizi highut tedudlih hubukeyah whuch'a naóoja ka. ¹⁸ 'Et Sizi ts'i be nádaih, 'et ndun dune ndun ntsi' nudúdeh, 'i buyudélhts'i inle, 'en Sizi yuts'u téudlih, "Nyulh 'óosneh," yúlhni. ¹⁹ 'Et Sizi, "Awundooh," yúlhni 'ink'ez ndi yúlhni, "Nkoo ts'un naíndalh 'ink'ez nyulh 'uhut'en teh hubudóni dálhcho 'i be nyuMoodihti nts'un budzi únzoo 'ink'ez dálhcho 'i be nla 'uja." ²⁰ 'Et ndun dune whenája 'ink'ez lanezi keyah 'et whutah lhuséya Sizi daíyinla hoh yula 'uja 'et ndo búlhni. 'Et ndan yudants'o ts'iyawh huba hooncha.

Sizi, 'en Jairus butse' dinaidilhti 'ink'ez ts'eke, 'en Sizi yunaih t'agheznai

²¹ 'Et Sizi nyan tadatus ts'ih whenahedúki 'ink'ez bun k'ut whuzih lhanah dune higha wezdel. ²² 'Et Lizwif hubuluglez whumoodih Jairus hiyúlhni, 'en yughu ninya 'et Sizi yutelh'en hoh yubut nacháneti. ²³ 'Ink'ez tube cho yuts'un téudlih, "Sustse'yaz 'aw 'et datétsah, sulh naínt'us 'ink'ez buk'edólnih sih soo ná'ootneh 'ink'ez khoona sih." ²⁴ 'Aw 'et Sizi yulh nátest'az. 'Et whuz lhanah dune yulh tezdel k'et lhts'un na'a hiyúlh lhgha dindel. ²⁵ 'Ilhunuh ts'eke tube dzuh nuzut, lanezi 'o 'at nat naooduzuk (12) 'et nduhóolhyez hoh 'uskai 'uyulh'en, ²⁶ yoo be dýyun lhanah chah hukwa' hiyalh'en. Duzooneya ts'iyawh hoolah yulhtsi 'et whunts'ih 'aw nus zeh lhe'enilh. ²⁷ 'Et Sizi yulh údants'o 'et huwa dune tah Sizi yut'ak ts'ih yugha ninya 'ink'ez bunaih yut'agheznai. ²⁸ Dich'oh 'et ndunínzun, "Ants'ih bunaih 'i teh but'aghénai t'eh, 'et sih soo ná'oosneh." ²⁹ 'Et Sizi yunaih 'i yut'agheznai ibulh 'et 'ahoh 'uskai 'iyulh'en 'ustl'e' 'uja 'ink'ez 'ahoh t'éoonanzin dzuh nuzut soo ná'uja. ³⁰ 'Et 'ahoh Sizi t'éoonanzin ye úlhtus ye dune la'ut'en, 'i bulah buts'ah haidélts'ut. 'Et 'ilhuhowezdel hubuts'un nalhú'a 'ink'ez 'utni, "Ndan hoh 'uja sunaih yut'agheznai?" ³¹ 'Ink'ez yugha hoodul'eh hiyúlhni, "Dadíni ho' dini? Lhe'ueneltsuk 'ilhohuwezdel lhanah hoh nyan do hahúneldo 'ink'ez, 'Ndan 'uja sunaih yut'agheznai dini?" ³² 'Et whunts'ih Sizi ndan 'uja yukiyú'en. ³³ 'Et ndun ts'eke daja soo ná'uja t'éoonanzin hoh butahaínya whenuljut k'et dulduz 'ink'ez Sizi yubut nacháneti. Khunek 'alha' 'int'ah, 'i be ts'iyawh yulh náwhelnuk. ³⁴ Sizi ndi yúlhni, "Sutse' be 'alha' hoont'ah, 'i yint'i, 'et huwa soo ná'inja. Ndzi hóont'i hoh natonja 'ink'ez ndai be dzuh ninzut, 'i buch'a soo ná'ontneh." ³⁵ 'Et 'awhuz Sizi naheyelh hoh, khunek na'á Jairus bukoo ts'ih hahádel 'uhiyúlhni, "Ntse'yaz dazsai, ndun dune hoodulh'eh di ka 'o 'un bugha téindlih?" ³⁶ 'Et Sizi whulh 'uduzts'ai ibulh daja hutni ndun luglez whumoodih ndi yúlhni, "Aw whéchanuzíljut hoh mba 'alha' hot'e." ³⁷ 'Aw 'uyoon dune duntoodelh gunih, ndunnah Peter, James, 'ink'ez bulhutsin John chah, 'aw 'en zeh hiyulh tezdel. ³⁸ 'Aw 'et Lizwif luglez whumoodih bukoo ts'ih hunindel, 'et Sizi whunilh'en ndulhcho tahudétnik 'ink'ez tso yahalhtuk. ³⁹ Sizi koo danínya 'ink'ez ndo búlhni, "Di ka sdabe tadéhnik 'ink'ez ahtso? Ndun 'uski 'aw dáchaitsal, 'ants'ih usti ho' 'int'ah." ⁴⁰ 'Aw 'et ts'iyawh highudloh. 'Et ts'iyawh tinaóobunilh'a. 'Uski bu'abá 'ink'ez bu'ama bulh hubílhchoot, yugha hoodul'eh tanah chah 'ink'ez 'uski sulhti ts'un dahunindel. ⁴¹ 'Et ts'ekeyaz yula ílhchoot 'ink'ez ndi yúlhni, "Talitha koumi," 'et dakelh k'una'a, "Ts'ekeyaz dinadindaih nyudúsni," ni hoh 'utni. ⁴² 'Et 'ahoh dinadija 'ink'ez nádinya. Ndun ts'ekeyaz lanezi 'o 'at nat be naoodezulh (12)

'et ndúhooja hoh soo ts'ah'un buba hooncha. ⁴³ Sizi soo khunek ulhtus, 'i be ndo búlhni, "Et dune ndo budóohtni gunih, 'ink'ez hoonliyaz yute'ah, 'i bugha yóoh'ah."

6

Sizi, ndunnah Nazareth whut'en, 'en ch'a hínesjoot

¹ 'Et Sizi 'ut'en inle 'et whuch'a nanja 'ink'ez dukeyah ts'ih whenája. Yugha hoodul'eh chah hiyuh whendel. ² Nahulyis dzin 'et Lizwif hubuluglez whubodulh'eh hoh lhanah dune 'et hudelhts'i hidánts'o tube huba hooncha 'ink'ez 'uhútni, "Ndun dune nts'ez de hahónla hoh 'utni? Ndi be ts'uwhunih, 'i be nts'ez de hahónla hoh 'utni? 'Et nts'e na'a 'ut'en sdabe hooncha huwa 'ut'en tuné'ut'en? ³ Koo 'uwhulh'en, 'en ilah ih 'int'ah? Mary buye' 'ink'ez bulhutsinkah chah James, Joses, Judas, Simon, 'ink'ez budestl'ahkah chah 'en ts'iyawh njan huwhut'i?" 'Et hits'a desnih. ⁴ 'Et Sizi ndo búlhni, "K'us ndan Yak'usda be nus whúnih'en yalhtuk teh ndulhcho hoh hidelhti, 'et whunts'ih bukeyah whut'en, bulhtuskah, 'ink'ez bukoo huhuwhut'i chah, 'en zeh chahidílhti." ⁵ 'Et huwa nyoh 'et Sizi 'aw huwa 'oot'en tune'óot'en ghaít'ah, 'et whunts'ih bulunah nduda, 'en zeh buk'edilnih hoh soo ná'bulh'ih. ⁶ 'Et ndunnah 'aw be 'alha' hoont'ah, 'i chahiyít'ih, 'et Sizi buba hooncha. 'Ink'ez whunat keyah hoh neya 'ink'ez dune hubodulh'eh.

Yugha hoodul'eh lanezi 'o 'at nanah (12), 'en Sizi whébalh'a

⁷ Aw 'et ndunnah lanezi 'o 'at nanah, "Anih," hubudáni'* 'ink'ez nanah hinli hoh lhelhts'un whebalh'a. 'Ink'ez hiye úlhtus, 'i hubugha iní'ai ntsi' nudúdeh, 'i dune yudúlts'i 'i hits'ah hanáhinooyoot ka. ⁸ 'Ink'ez khunek ulhtus, 'i hubutl'aida'ai, "Teh'us ts'ih hoonliyaz teh whutoohla gunih! Teh'ah, 'i chah, ézdlai, 'i chah, k'us sooneya teh bulh sudoohlú'oo gunih! Tuz 'i zeh dutóohtan. ⁹ Nuhkesgwut, 'i 'ink'ez dzoozt'an 'ilhuk'i be súhke, 'i zeh be 'óohnah." ¹⁰ 'Et 'udun chah ndo búlhni, "Keyah lhghadah'az t'eh dune bukoo danah honilhti t'eh, 'et bukoo 'et wahke 'uts'un keyah ts'ih téh'us whuts'un. ¹¹ 'Et keyah nenáh'az 'ink'ez dune 'aw hachanwhuhílh'al t'eh, k'us chanuwhuhudústs'uk t'eh huwu nátóoht'as 'ink'ez whulez ch'a nuhke naóohghat. 'Et dahúja t'ehonoozeh. Ts'ah'un nuhwhudúsní Sodom 'ink'ez Gomorrah whut'en sdabe hints'i. 'Udék'elh'az dzin t'eh hiyé dzuh nutézut, ndunnah keyah whut'en, 'en 'o nus ba dzuh nahutezut ho' hoont'ah." ¹² 'Aw 'et whehádel 'ink'ez dune Yak'usda bughunek be hubulh yahúlhtuk, "Nuh-whulubeshi ch'a lht'ananoohdelh," hubuhútni. ¹³ Lhanah ntsi' nudúdeh, 'i hubugha delhts'i hubugha whenabunanyoot 'ink'ez dune lhanah nduda khe be hubuhulho hoh soo ná'buhalh'en.

John dune too be 'ulh'en, 'en hizelhghi

¹⁴ Aw 'et hubudayi cho Herod hiyúlhni yulh údants'o Sizi dulhcho hoh búlh khunek bughi denzut. 'Ink'ez 'utni, "John dune too be 'ulh'en 'ut'en. Dazsai inle 'ink'ez nakhítña, 'et huwa Yak'usda ye ulhtus, 'i buyidi'ai hoh 'út'en whunul'en teh ne'út'en." ¹⁵ 'Et bulunah chah, "Elijah 'ut'en," hutni. 'Et 'uyoon chah 'uhutni, "Uda hukw'u na'a Yak'usda be nus whunilh'en 'ut'en," hutni. ¹⁶ 'Et hubudayi cho Herod whulh 'údants'o hoh 'et 'utni, "John dune too be 'ulh'en 'ut'en. Butsi suba k'uhinentsel inle da, 'et whunts'ih nakhítña," ni. ¹⁷ Herod dich'oh John dune too be 'ulh'en 'ahiyyoo'ah huvá bulh'a ínle. Hiyulhghel 'ink'ez tsak'ehíya'ai. Ndun ts'eke Herodias hiyúlhni, 'en yughusda. 'En gha 'uyínla ínle. Dulhutsin Philip bu'at 'en lhch'a bunenjoot, 'et whunts'ih yughusda. ¹⁸ John dune too be 'ulh'en Herod yudani, "Yak'usda bughunek

* **6:7** Ndunnah whel'a 'uhint'ah.

k'uninyuz ho' 'int'ah nyulhutsin bu'at zih silda." ¹⁹ 'Et huwa bu'at Herodias, 'en John dune too be 'ulh'en yuts'u dutnik 'ink'ez yuzoolhghelh hukwa' ninzun. 'Et whunts'ih Herod, 'en bugha 'aw yuzoolhghelh ghaít'ah. ²⁰ 'Et Herod 'en chah John dune too be 'ulh'en yé nuljut, t'eoónízun John dune too be 'ulh'en, ts'ah'un dune unli, 'ink'ez Yak'usda budune 'int'ah. 'Et huwa yugha 'óoli. John whulat tune 'út'en, 'et huwa hóont'i hoh yoozélhts'ai. ²¹ 'Et 'ilhudzin Herodias bughá whults'ut Herod whuzdli dzin 'et dune dézti 'ink'ez nehughan moodih chah 'ink'ez Galilee whut'en moodih tubulh, ts'iyawh bughu nuséya. ²² Herodias butse' danínya 'ink'ez huba nedak. Herod 'ink'ez hubughu nusja tubulh huba hoonzoo. 'Et hubudayi cho Herod ndun ts'eke ndi yúlhni, "Ndai suts'un buka' dini, 'i ngha tesdlelh," yúlhni. ²³ Lhat yuts'u náhezya hoh ndi yúlhni, "Ndai suts'un buka' dini, 'i ngha tesdlelh, ndai hubudayi cho be usdli, 'i lhulcho 'i whunts'ih ngha tesdlelh," yúlhni. ²⁴ 'Et ndun ts'ekeyaz 'az whenája 'ink'ez bu'ama 'en yoodalhkut, "Ndai simba buts'u hukwa' doosni?" yúlhni, "John dune too be 'ulh'en butsi," yúlhni, bu'ama. ²⁵ 'Et ts'ekeyaz 'ahoh hubudayi cho yuts'un lhgha nadija 'ink'ez ndi yúlhni, "John dune too be 'ulh'en butsi k'an 'ahoh tsets'ai be sugha ninínkaih," yúlhni. ²⁶ 'Et hubudayi cho 'ahoh ni suli 'et whunts'ih 'aw yuch'a 'uts'un 'udooni ghaít'ah, bughu nusja 'en hubunalh yuts'u náhezya 'et huwa. ²⁷ 'Et 'ahoh 'ilhunuh huwuhinli, 'adinla delhts'i ts'ih wheyálh'a, John dune too be 'ulh'en butsi whusaínoo'ah wheni. Huwuhinli 'en 'adinla delhts'i ts'ih whénya 'ink'ez John dune too be 'ulh'en yutsi k'éinentsel. ²⁸ Tsets'ai bé na'ai 'ink'ez ts'ekeyaz yutl'ayánkai. 'En be'ama yutl'ayankai. ²⁹ 'Et John dune too be 'ulh'en yugha hoodul'eh hiyulh 'údants'o, buyust'e hikunasdel 'ink'ez whuyihiyalhti.

5,000 dune Sizi hiyoo'ah, 'i hubugha inínlá

³⁰ 'Aw 'et ndunnah whel'a whusanáheded 'ink'ez Sizi ts'un 'ilhuhowezdel 'et 'uhidáni nts'oh tuné'hust'en 'ink'ez ndet dune whéoobuhodalh'i. ³¹ Lhanah dune whusahúdulh 'ink'ez whenáhadelh, 'et huwa Sizi 'ink'ez yugha hoodul'eh tubulh 'uhúte'ah 'et whunts'ih búgha chawhulhts'it, 'et ndo búlhni, "Uts'un uztodelh nts'e whenich'oh úztet'ilh, 'et 'astliyaz naoohluyis." ³² 'Aw 'et nus ts'i be hutezki, dune hoolah ts'ih whuz nehúninki. ³³ 'Et whunts'ih lhanah dune huba'en hutezki hoh 'ink'ez 'ahoh t'ehonízun ndun 'int'ah, 'et huwa keyah totsuk whut'en lhanah helwus. Sizi 'ink'ez yugha hoodul'eh tubulh butsuh 'et whuz lhgha hadílgaz. ³⁴ 'Et Sizi ts'i be hainya lhanah 'ilhuhowezdel 'et hubunilh'en, tube hubugha té'nanzin 'ants'ih sheeypyaz bughu chaídlah lí'hint'ah. 'Et lhat 'et whubuwhéoodunilh'i. ³⁵ 'Aw 'et ye 'ún whezulh hoh yugha hoodul'eh highu nindel 'ink'ez 'uhiyúlhni, "Aw 'et tube ye 'ún whezulh 'ink'ez njan dune hoolah chah 'uhoont'ah. ³⁶ Ndunnah dune ts'iyawh n'awh keyah ts'ih nabalh'ah 'ink'ez 'i ts'uyi, 'i náhiyoododuket hiyoo'ah wheni, ndunnah 'aw hiyoo'ah hoolah 'et huwa." ³⁷ 'Et Sizi ndo búlhni, "Nuhwhenich'oh hite'ulh, 'i hubugha ínah'ai daja." 'Et hiyoodulhkut, "Whuz uztedulh hukwa' ninzun 'ink'ez \$200.00 k'ah ts'uyi, 'i ts'onket 'ink'ez ih hubugha ízte'ah?" ³⁸ 'Et whunts'ih Sizi huboodulhkut, "Lhes dáltsuk aht'i 'et whunulh'en." 'Et nahuhoon'ai hoh 'et 'uhiyúlhni, "Skwunlai lhes 'ink'ez nankoh lhook chah." ³⁹ Sizi 'et yugha hoodul'eh ndo búlhni, "Ts'iyawh dune lhelhdun nibunahle 'ink'ez tl'oyaz k'ut hudóolts'i." ⁴⁰ 'Aw 'et dune nátl'ahudelts'i tl'oyaz k'ut lanezi lanezi (100) 'ink'ez skwunlai lanezi (50) hoh lhanoowh teh lhuhusdúguz. ⁴¹ 'Aw 'et Sizi nyoo lhes 'ink'ez lhook bulh yílhchoot, ndoh yak'uz ts'ih yuta'en 'ink'ez, "Suchanailya," ni hoh tenadedli. 'Et lhes taidalhkut hoh yugha hoodul'eh hubutunyoole ka butl'ayánla. 'Et nankoh lhook chah 'et ndúyinla hoh butainínlá. ⁴² Ts'iyawh 'uha'al 'ink'ez

'uhunesdai. ⁴³ 'Et yugha hoodul'eh lanezi 'o 'at nankoh (12) k'its'ai dez bun, 'i lhook 'ink'ez lhes bulh 'et niníkat, 'i 'ilhunahíghezdla. ⁴⁴ 5,000 dune, 'en ndi lhes hiya'al.

Sizi too k'ut nya

⁴⁵ 'Aho Sizi yugha hoodul'eh ts'i be naóobalh'a 'ink'ez Bethsaida huwhútini keyah whuz dutsuh whebalh'a nyan tadatus ts'ih whuz'ai. 'Et didut ndunnah 'ilhuhowezdel whenaóobalh'a. ⁴⁶ 'Et whenáheded hoh tenadutedli ka 'aw 'et buch'a násja 'ink'ez dzulh k'uz ts'ih whénya. ⁴⁷ 'Aw 'et húlhgha suli 'et nyoo ts'i be k'an zeh taniz hekelh 'ink'ez Sizi 'en dich'oh 'awhuz nyoh yun k'ut 'int'ah. ⁴⁸ Yugha hoodul'eh hubunilh'en nilhts'i 'i yenah hekelh, tube hunint'uk, 'aw 'uhoot'o chah ghaít'ah. 'Et bundada haootelh'en, 'et Sizi too k'ut uyalh hoh nus whuz hubughu ninya hube ghootéyah inle. ⁴⁹ 'Et whunts'i hitelh'en too k'ut uyalh hoh, "Dune tsen 'ut'en," huninzun. Tube whéhunelhújoot 'ink'ez 'uhúldzul. ⁵⁰ 'Et Sizi 'ahoh ndo búlhni, "Nuhdzi ulhtus úlhtsi! Si 'ust'en. Whenulhújut ílah." ⁵¹ 'Et ts'i bet hubughu dénya. 'Aw 'et nilhts'i chah 'ilhuz ninints'i, 'ink'ez yugha hoodul'eh tube buba hooncha. ⁵² Whutsuh whudelhdzulh lhes dáyinla 'et 'aw ts'ah'un nechahohoo'al, 'et huwa njan lhes bugha dahóoja hubeni taóodoools'it ghaít'ah.

Gennesaret whut'en hunduda, Sizi soo ná'bulh'en

⁵³ 'Aw 'et nyan bun k'ut yahúninki 'ink'ez keyah Gennesaret huwhútini, 'et ts'i whehídinguz. ⁵⁴ Ts'i bez hahánel 'aw 'et Sizi 'en nahuyoolhúts'it. ⁵⁵ 'Et huwa ndulhcho nahulhúghaz 'ink'ez nts'oh Sizi usda hiyulh 'údits'o hoh, nduda hik'usútez 'i be hits'ú butule. ⁵⁶ 'Ink'ez nts'oh Sizi nya keyah whuyaz k'us keyah whuti k'us khunai nuyéh e'óoket whutah dune 'ilhodulh whuz nduda nébuhanle 'ink'ez Sizi híghu téduelih, "Nyunaih 'ants'ih buk'abah 'et hunduda 'en hit'aónalh," hiyúlhni. 'Et ndunnah yut'agheznai, ts'iyawh soo ná'huja.

7

Sizi, 'en Lizwif butsuh whudelhdzulh wheóobuhodalh'i, ndai dune buts'u haídults'it, 'i bugha lubeshi hilchokw.

¹ 'Aw 'et Pharisee 'ink'ez Moses be' dustl'us 'uk'ununa'úsduguz tubulh Jerusalem ts'ih huhánel 'en Sizi higha wézdel. ² 'Et hubunílh'en bulunah Sizi yugha hoodul'eh dula tsun bulh 'uha'ah. 'Uda Pharisee, 'en 'et, "Me" huwhútini inle 'et buts'ú hahuhó'ai. ³ Pharisee 'ink'ez 'o 'awh Lizwif ts'iyawh butsuh whudelhdzulh whebuhodalh'i whuz na'a 'uhint'ah soo ts'ah'un na'a dula toonáhugus k'ez 'uhá'ah. ⁴ 'Ooket bukoo ts'ih hanahudulh teh la'huldh 'et k'an zeh 'uha'ah. Lhat huba hoosdzi teh né'hut'en, dulubot, hube 'oosa', 'ink'ez 'uyoo hiyé ne'ut'en, 'i chah, hubukw'usti chah, soo buba' hoont'ah k'una'a zeh toonahíyugus. ⁵ 'Et huwa Pharisee 'ink'ez Moses be' dustl'us 'uk'ununa'úsduguz Sizi hiyoodulhkut, "Et dáhoont'ah huwa ngha hoodul'eh netsuh whudelhdzulh whuneoodalh'i k'una'a cha'hust'en 'ink'ez hubula toonáchahusgus hoh 'uha'ah?" ⁶ 'Et Sizi ndo búlhni, "Nuhwheni duba nahd-zoo! 'Alha zeh Isaiah nuhwhugha nus whunilh'en 'uk'e'ánguz inle hoh njan ndutni,

'Ndunnah bughunek be suba hodelhti,
'et whunts'ih 'aw budzi yuh hoh buba 'alha' cha'úst'ah.

⁷ Suts'un téni hunilhdzun doo ka 'uhutni,
 ndi yun k'ut dune nihini'ai, 'i Yak'usda bughunek hiyílh'i hoh dune whubuhodalh'eh."

⁸ 'Et Sizi 'utni, "Yak'usda bughunek nuhtl'aída'ai, 'i 'aw chaooozulhts'ai 'ink'ez yinkak dune whubuhodalh'i, 'i zeh buk'úne 'uht'en, tsets'ai, lubot,

'ink'ez 'uyoo hiyé ne'ut'en, 'i tóonahgus hoh ndúhoont'ah, 'et zeh dune whubodulh'eh." ⁹ 'Et 'o 'un chah Sizi 'utni, "Tube 'uyoo ahli! Yak'usda bughunek nuhtl'aída'ai 'i buladehnik, 'ink'ez nuhwhenich'oh be dune hoodulh'eh, 'i zeh nuht'uk hoh whubodulh'eh. ¹⁰ 'Et Moses be' dustl'us 'uk'une'uzguz, 'i njan ndutni, 'Nye'abá 'ink'ez nye'ama bulh hubudólhti, 'ink'ez 'Ndan bu'ama k'us bu'abá dzuh ts'ih bughu yatelhtuk, 'en daóotsah huba' hoont'ah.' ¹¹ 'Et whunts'ih ndan be'ama 'ink'ez be'abá chah ye yula tet'ilh, 'i dune yit'i t'eh 'ink'ez 'i 'Corban 'uhoont'ah' ní t'eh, (ndi 'Corban' Lizwif bughunek 'et dakelh k'una'a 'Yak'usda be'ílhdzun' ni hoh 'utni), ¹² 'et hoh 'aw be'ama 'ink'ez be'abá bulh hubula 'oot'en whuch'a hobodelh'i ho' dahni. ¹³ 'Et njan huwa Yak'usda bughunek 'aw chaoozólhts'ai 'ink'ez buk'únucha'zaht'en. Whuz na'a dune whúbunulhtun lhat hoh 'udun chah nuhwhenich'oh nuhk'una'a hoh, whuz na'a wheoobunulhtun."

Nts'e na'a lubeshi ts'ilhchuk

¹⁴ 'Et 'ilhuhowezdel Sizi doo chah, "Anih! Soo zélhts'ai ts'iyannah 'ink'ez nuwheni taoodóolts'it," hubúlhni. ¹⁵ "Ndai dune hiylhchuk, 'i 'aw bugha lubeshi ólhchoot ghaít'ah, 'et whunts'ih ndai dune buts'u haídults'it, 'i bugha lubeshi hilhchokw. ¹⁶ Ndán hubudzo hooni, 'en hiyoozólhts'a huba' hoont'ah." ¹⁷ Ilhuhowezdel 'et hubutahanája 'ink'ez koo danánja hoh yugha hoodul'eh ndi higha hódul'eh yé yaíltuk, 'et hukwa hiyoodulhukut. ¹⁸ 'Et ndo búlhni, "Nuhwheni chah ih nuhwheni hoolah? 'Aw nuhwheni taóodulhts'it hoh ndai dune yu'alh, 'i bugha lubeshi wulhchoot ghaít'ah. ¹⁹ 'Aw budzi be chayuskat, bubut zeh be yúkat 'ink'ez buyust'e ts'ih hanaidukat, 'et whuz na'a untsi', 'i neyust'e ts'uh hanádukat." ²⁰ 'Ink'ez ndo búlhni, "Ndai dune budzi yuh whuts'ahaidults'it, 'i bugha lubeshi ts'ilhchokw. ²¹ 'Et dune budzi yuh ts'ih whuz de 'ut'en untsi' buts'uhaídukat, 'et huwa 'uyoon dune bu'at bulh lubeshi hilhchokw, dune ts'eke bulh tinta' 'ut'ih, nehughan chah, ²² 'uhundunut'ih chah, 'uyoon be'ílhdzun ka' huninzun, hoontsi' k'una'a túne' hut'en, dune nahuna'ah chah 'uhut'en, yooyá chailah, 'uhoolnih chah, Yak'usda ch'a yahalhtuk, 'uhudelhúti, 'ink'ez yílah tune' hut'en. ²³ 'I ts'iyawh ndi dune budzi yuh ts'ih hadúlts'it, 'i bugha lubeshi hilhchokw."

Ndun 'udun yun k'ut whut'en ts'eke, 'en buba 'alha' hoont'ah

²⁴ 'Et Sizi whenája hoh Tyre 'ink'ez Sidon huwhútni keyah 'et whunat whuz lhghu nadija. 'Et 'ilhunuh koo danínya 'ink'ez 'et usda 'uyoon t'ehonózin hukwa cha'nízun, 'et whunts'ih 'aw buch'a ntool'ih ghaít'ah. ²⁵ 'Ilhunuh ts'eke buyats'e ntsi' nudúdeh, 'i buyidínda, Sizi yulh údits'o hoh yugha ninya 'ink'ez yubut nachánetno. ²⁶ Ndun ts'eke nts'iz de haínya 'ink'ez 'en Greek buk'una'a yalhtuk 'ink'ez Phonecia, Syria whuz'ai, 'et whuzdli 'int'ah. 'En Sizi yugha téduddlih hoh ndi yúlhni, "Ntsi' nudúdeh, 'i suyats'e buts'u hanaínonyoot." ²⁷ 'Et whunts'ih Sizi ts'eke ndi yúlhni, "Uskeh, 'en choo hububé' ts'oolh'ah. 'Aw ts'ah'un cha'hóot'ah 'uskeh hiya'ah, 'i ts'ílhchoot 'ink'ez Ihiyazkah hubugha ts'iyoo'ah ghaít'ah." ²⁸ 'Et ts'eke 'uyúlhni, "Moodihti, 'alha' dini, 'et whunts'ih whulutah teh Ihiyazkah 'en whunts'ih kw'uzdai t'ah yun nakat, 'i 'uskeh yugha' wéz'al, 'i hiya'ah." ²⁹ 'Et Sizi ndi yulhni, "Et ndedénja 'et huwa nkoo ts'ih naíndalh, ntsi' nudúdeh, 'i nyats'e buyuh hánaiadeda." ³⁰ 'Et koo ts'ih whenája 'ink'ez buyats'e kw'usuti k'ut usti ntsi' nudúdeh, 'i buyah hanaidede.

Dune cha'dústs'uk 'ink'ez yachalhtuk cha' 'int'ah, 'en Sizi soo ná'yinla

³¹ Doo cha zeh Sizi 'en Tyre 'ink'ez Sidon keyah hoh wheghah lhuséya, 'Et Decapolis keyah whutah lhuséya 'ink'ez Galilee Bun k'ut whuz ninya. ³² 'Ilhunuh dune cha'dústs'uk 'ink'ez yachalhtuk cha' 'int'ah, 'en Sizi highu

nihinílhyá 'ink'ez Sizi highu tédundliah yuk'édoonih ka. ³³ 'Et Sizi bughah 'udunyaz nínilhya hoh yudze 'alhge, 'ink'ez 'ún whenzo, 'ink'ez dune yutsoola yut'agheznai. ³⁴ Sizi nduk yak'uz ts'ih yutá'en, telhayiz 'ink'ez dune 'uyúlhni, "Ephphatha!" Ndi Lizwif bughunek 'et "Mba dá' dutoolts'it," ni hoh 'utni. ³⁵ 'Et 'ahoh dune 'udits'o nasdli 'ink'ez soo yálhtuk chah nasdli. ³⁶ 'Et ndo búlhni, "Khun teh dune dóoktni gunih!" 'Aw 'et, "Dah" ndo búlhni, 'et whunts'ih 'o nus huwu yahulhtuk. ³⁷ 'Ink'ez ndan hubodits'o ts'iyawh huba hooncha, "Sóo 'usdla ts'iyantsuk né'whul'en, cha'hudústs'uk 'uhudits'o 'ink'ez yachahúlhtuk chah yahulhtuk hubulhtsi," hutni.

8

Sizi 4,000 bughá' ni'ai

¹ 'Aw sa ilah hukw'elh'az doo chah zeh dune lhanah 'ilhuhowezdel 'aw 'et 'uhute'alh, 'i hoolah suli hoh Sizi yugha hoodul'eh, "Anih," hubudáni 'ink'ez ndo búlhni, ² "Ndunnah dune hubugha te'nuzzun. 'Aw 'et tat dzin suh 'úhet'en 'ink'ez hiyoo'alh, 'i hoolah. ³ 'Et nduhínt'ah bukoo ts'ih whenábalh'a t'eh nahedulh hoh bukaootoodeh. Bulunah tube nilhdza ts'ih hahándel 'et huwa." ⁴ 'Et yugha hoodul'eh hiyoodulhkut, "Ndoh dune chahóot'ih, nts'e simba hite'alh, 'i nats'óolelh lhe'huneltsuk dune gházte'alh wheni?" ⁵ 'Et Sizi huboodulhkut, "Daneltsuk lhes sut'e aht'i?" 'Et ndi híyulhni, "Skwunlai 'o 'at nankoh lhes sut'e." ⁶ 'Et 'ilhuhowezdel yun natl'ahudóolts'ih huwa bulh'a. 'Et skwunlai 'o 'at nankoh lhes yílhchoot 'ink'ez, "Suchanailya," ni ho' tenadedli. Taidalhkut 'ink'ez yugha hoodul'eh yutl'aiyanla hubutunyoonih ka, 'ink'ez hudemts'i butaininik. ⁷ 'Et lhook chah ntsoolyaz hit'i, 'i chah Sizi "Suchanailya," ni hoh yuba tenadedli 'ink'ez 'i chah yugha hoodul'eh ndo búlhni, "Hubutunyoonih." ⁸ Ts'iyannah 'aha'al 'ink'ez 'uhunesdai. 'Et yugha hoodul'eh skwunlai 'o 'at nat k'its'ai dezbuñ 'i highá' wez'al, 'i dih tezkat. ⁹ 4,000 bat'en 'en 'aha'al. 'Aw 'et Sizi hoh whenaóobalh'a. ¹⁰ 'Et 'ahoh yugha hoodul'eh bulh ts'i be náheded 'ink'ez keyah Dalmanutha huwhútni whuz yanahúsduki.

Ndunnah Pharisee, 'en Sizi buba hooncha tune'tet'ilh 'uhooleh hukwa hiyoodulhkut

¹¹ 'Et bulunah Pharisee, 'en Sizi highu nindel 'ink'ez hiyenah hoh hiyóolhdzih hiyóodúlhkut, "Alha Yak'usda ntl'ahón'ai t'eh, yak'uz ts'ih hooncha tune'tant'ilh 'uhonleh, 'i be t'éts'onoozeh ka." ¹² Sizi tube cho hiba dzuh 'uhídeja 'ink'ez ndo búlhni, "Di ka k'an dune huwa ne'ut'en hukwa' hutni? 'Alha 'un whudúsni 'aw ndi yun k'ut whudune ndúhoont'ah honóolh'en ghaít'ah." ¹³ 'Et 'ahoh buch'a nanja, ts'i be nája 'ink'ez bun k'ut nyan whenadúki.

Huwohole Pharisee 'ink'ez Herod hubules untéldoh, 'i ch'a hubúlhni

¹⁴ Yugha hoodul'eh lhes nahodelhúnuh, lhes lhuk'i zeh ts'i be húlh'ai. ¹⁵ 'Et Sizi hubugha utni, "Huwohole, 'ahoolhyez khuhdli Pharisee 'ink'ez Herod hubules untuldooh, 'i ch'a," hubúlhni. ¹⁶ 'Aw 'et lhulh yáwhehuniltuk, "Et 'aw lhes chats'ít'ih 'et huwa 'utni." ¹⁷ 'Et Sizi daja hutni 'uda t'eoónínzun, 'et ndó bulhni, "Et di ka lhes cháht'ih 'et huwa yalhtuk, 'awhuz nt'eoónuzúhzun k'us nuhwheni t'achaoodulhúts'it nuhdzi 'awhuz ih duts'un ho' dahni? ¹⁸ Nuhna hoonli be chaóozeh'en, nuhdzo hóonli be cha'duzahs'uk. 'Aw ih whunacha-sulhúnik? ¹⁹ 5,000 dune skwunlai lhes hubutaidalhkut hoh daneltsuk k'its'ai dezbuñ 'i dune yugha' wéz'al, 'i dih tezkat inle?" "Lanezi 'o 'at nankoh," hiyúlhni. ²⁰ "Ink'ez skwunlai 'o 'at nankoh lhes 4,000 dune butaidalhkut, daneltsuk k'its'ai dezbuñ, 'i highá' wez'al, 'i dih tezkat ínle?" hubúlhni.

“Skwunlai 'o 'at nankoh,” hiyúlhni. ²¹ 'Ink'ez ndo búlhni, “Et 'awhuz ih nuwheni tachaooodulhts'it?”

Keyah Bethsaida et Sizi dune chawhés'en whé'en nayulhtsi

²² 'Et Sizi yugha hoodul'eh bulh keyah Bethsaida huwhútni whuz hunindel hoh 'ilhunuh dune chawhés'en, 'en Sizi highu nihínilha 'ink'ez highu tedudlih yuk'edoolnih ka. ²³ 'Et Sizi chawhés'en yula ilhchoot 'ink'ez keyah whuch'a inílhyá hoh lhch'az dune yuna k'éndo 'ink'ez yuna k'édilnik hoh ndi yulhni, “Dahooja, hoonliyaz ho'en ih?” yúlhni. ²⁴ Dune yutá'en 'ink'ez 'utni, “A, dune nulh'en, 'et whunts'ih 'aw ts'ah'un chaoozes'en, dune 'ants'ih duchun li'hint'ah hoh nuhúdelh.” ²⁵ Sizi doo chah zeh lhch'az dune yuna k'édilnik 'ink'ez yeduk yuta'en hoh 'et 'aw 'et whe'en nasdli 'ink'ez ts'iyaituk huba hooltsai. ²⁶ 'Et Sizi dune chawhés'en bukoo ts'ih whenáyah'a 'ink'ez khunek ulhtus, 'i be ndi yúlhni, “Bethsaida ts'ih nátonja gunih 'ink'ez Bethsaida whut'en ndo budóni gunih!”

Sizi ndan unli, et Peter huwu yalhtuk

²⁷ 'Ink'ez yugha hoodul'eh bulh Caesarea Philippi 'et keyah whuz whehánel. Hedulh hoh huboodulhkut, “Ndun dune sughu yahulhtuk t'eh, ndan usdli hutni?” ²⁸ 'Et yugha hoodul'eh 'uhiyúlhni, “Bulunah 'uhutni John dune too be' 'ulh'en inle 'int'ah. 'Et 'uyoona 'uhutni Elijah 'en Yak'usda whusaítelh'ah 'int'ah. 'Et 'uyoona chah Yak'usda be nus whunílh'en 'ilhunuh 'int'ah hutni.” ²⁹ 'Ink'ez yugha hoodul'eh ndo búlhni, “Nuhwheni do, ndan 'ust'ah dahni?” 'Et Peter 'utni, “Nyun Christ* 'unint'ah.” ³⁰ Sizi khunek ulhtus 'i be ndo búlhni, “Si sugha dune dóohni gunih!”

Dzuh nutezut, ink'ez datetsah, et Sizi huwu yailhtuk

³¹ 'Aw 'et Sizi yugha hoodul'eh whubodulh'eh 'ink'ez ndo búlhni, “Yinkak dune ye' tube cho dzuh nuhítelhdzut. 'Et netsuh whudelhdzulh, náwhulnuh moodih 'ink'ez Moses be' dustl'us 'uk'ununa'úsduguz chah ts'iyawh 'aw hiyoozólhts'a ghaít'ah. Hituzelhghelh 'ink'ez whulh tat dzin dinadutédalh.” ³² Soo ts'et cho hubúlhni, 'et huwa Peter, 'en Sizi 'udun nenílhti 'ink'ez hukwa' yudáni. ³³ Sizi yugha hoodul'eh buts'un nalhú'a 'ink'ez Sizi, 'en Peter hukwa' yúlhni, “Satan sut'ak ninínyih! Ndi yun k'ut hoonliyaz zeh yugha nuní nuzut. 'Aw Yak'usda be 'ut'en k'ah bugha nuní chanuzinzut.” ³⁴ 'Et Sizi 'ilhohuwezdel 'ink'ez yugha hoodul'eh tubulh, “Anih,” ndo búlhni, “Ndán suntédulh hukwa' huninzun, dich'oh duba moodih nahoodle ghaít'ah. Dulhdulalhgus hídutootan 'ink'ez suntooya. ³⁵ 'Et ndan duk'una'a zeh hukwa' huninzun, 'en 'aw 'ilhuz wheni hukhoona ghaít'ah. 'Et whunts'ih ndan si suba, 'ink'ez khunek unzoo, 'i bugha 'et huwa daházsaí t'eh, 'en 'ilhuz wheni hukhutenalh. ³⁶ 'Et dune yinkak ndulhcho 'uhoolhdzun 'ink'ez dazsai t'eh, ndet simba whuch'a hóldeh? 'Aw 'uhóneh ghaít'ah! ³⁷ K'us dahóont'ah simba dats'úzsai t'eh, 'aw hoonli be whunts'ih 'ilhuz ts'ukhutenalh nats'uhoket ghaít'ah. ³⁸ 'Et k'an yuk'edinzut lhanah dune ts'eke bulh tinta' hut'ih, 'ink'ez Yak'usda nahodilnah ho' hint'ah. 'Et huwa ndan dune si 'ink'ez sughunek bulh hukwaya unli t'eh, 'et sih yinkak dune ye', 'en yukaya hutele hoh lizas bulh be'aBá buts'u hayánduz, 'i tah whusanája t'eh.”

9

¹ 'Et 'o 'un chah ndutni, “Njan whunaoohlhúnih, ndet ts'iyannah Yak'usda ye úlhtus, 'i be hik'úne' 'ut'en, 'i whusáwhitelts'ulh, bulunah dune njan hudenhts'i hote'ilh dahútetsah whutsuh.”

* ^{8:29} Ndi boozi, “Yak'usda nets'ítelh'a” ni ho 'utni.

Sizi 'uts'un na'a be hóodiltsai

² Lhk'utak'i dzin inle hoh 'et Sizi, Peter, James 'ink'ez John dulh hubutelhúdel ndoh dzulh k'uz dulh 'óbilya. 'Et hinilh'en hoh 'uts'un na'a be hóodiltsai. ³ 'Ink'ez bunaih be hóodiltsai, lheyul k'et 'ants'ih soo tsil 'et nduja, degha nus ndi yun k'ut soo toonasdúguz, 'i bugha 'o nus lheyul suli. ⁴ Ndunnah tanah yugha hoodul'eh khunyaz Elijah 'ink'ez Moses bulh Sizi hizih siyin 'ink'ez hiyulh yálhtuk hoh hiya'en. ⁵ 'Ahoh Peter Sizi yulh yatelhtuk, "Nehodulh'eh hoonzoo ho' hoont'ah njan uzdelhts'i. Tat bun nuhwhuba nets'oolelh, 'ilhuk'i nyun mba, 'ilhuk'i, 'i Moses ba, 'ink'ez 'ilhuk'i, 'i Elijah ba." ⁶ Peter ndi khunek be yalhtuk hoh daja dutenilh 'aw nt'eeonízun, ndunnah tahult'ah 'en tube hunelhújoot 'et huwa 'utni. ⁷ Khunyaz kw'us buk'eínde 'ink'ez yedoh kw'us tah ts'ih yatzelhtuk, "Ndun sich'oh suYe' 'int'ah, tube buk'esi'. 'En soo óozelhts'ai," whutni. ⁸ 'Et 'ahoh dunat nuhúyuz'en, 'aw 'uyoon chahí'il, Sizi 'en zeh hubulh 'út'en. ⁹ 'Aw 'et dzulh k'ut ntsun nahedulh hoh Sizi khunek ulhtus, 'i be ndo búlhni, "Khun teh 'uyoon dóohni gunih! Ndet whunulh'en, yinkak dune ye' dinadutédalh 'et whuts'un." ¹⁰ Sizi bughunek hiyoontun hoh lhulh yawhehúniltuk, 'ink'ez nduhútni, "Ndi khunek 'Dazsai 'ink'ez dinadutédalh?" dant'i ni hoh 'utni?" ¹¹ 'Ink'ez Sizi hiyoodulhkut, "Et Moses be' dustl'us 'uk'ununa'úsduguz di ka hubodulh'eh Elijah 'en 'udechoo whusatéyalh?" ¹² Sizi 'et ndo búlhni, "Elijah 'alha 'udechoo whusaínya ts'iyaintsuk lhaóodutelih ka. 'Et whunts'ih di ka Yak'usda bughunek 'uk'ununa'usdúguz, 'i 'et ndutni 'Yinkak dune ye' 'en ye dzuh nutezut 'ink'ez tube hits'u dutnik tele?" ¹³ 'Et whunts'ih nuhwhudúsni Elijah 'uda whusaínya 'ink'ez dune nts'e na'a hukwa' huninzun t'eh, hoh teh né'hiyulh'en. 'Et Yak'usda be' dustl'us k'ut whuz na'a 'uk'une'úsduguz ínle."

'Uski ntsi' nudúdeh, 'i buyídinda, 'en Sizi soo na'yínla

¹⁴ 'Et Sizi 'onghunnah yugha hoodul'eh butanaja hoh, dune hubugha 'ilhuhowezdel 'en hubunilh'en 'ink'ez bulunah Moses be' dustl'us 'uk'ununa'úsduguz yugha hoodul'eh hiyenah 'uhutni. ¹⁵ 'Ilhuhowezdel Sizi hitelh'en ibulh huba hooncha hoh hidudelhúghaz 'ink'ez, "Dahooja," hiyúlhni. ¹⁶ 'Et Sizi Moses be' dustl'us 'uk'ununa'úsduguz huboodulhkut, "Dant'i ghu yalhtuk ho' 'udahni?" ¹⁷ 'Ilhuhowezdel 'ilhunuh dune butahaínya, "Nehodulh'eh suye' ntsi' nudúdeh, 'i buyudínda 'et huwa 'aw yaoolhtuk ghaít'ah, 'en nts'un nilhti. ¹⁸ 'Et ndet ndi ntsi' buyédinda 'i hubugha buba hoolhtus t'eh, 'et yun nadélduz, huwus buzek hanáyi, dughoo lhedúlk'us, 'ink'ez lhts'edunukw. Ngha hoodul'eh ntsi' nudúdeh, 'i yejuhanahinooyoot, hubudúsni 'et whunts'ih 'aw 'uhiyooleh ghaít'ah." ¹⁹ 'Ink'ez Sizi ndi yúlhni, "Aw nuhwheni dune nuhwhuba 'alha' 'uhot'e ghaít'ah! Dáwhuldzah nuhzih tesdalh? Dawhuldzah nuhwhutah tesdalh sudutéhts'o whuts'un 'ink'ez nuhwhuba 'alha' test'ilh? 'Uski ndez suts'u tóolhte!" ²⁰ 'Et highu hinílhti. 'Et ndi ntsi' nududeh, 'i ye yudínda Sizi yutelh'en ibulh, 'ahoh 'uski bukaotezut 'ink'ez nadélduz, 'ink'ez huwus buzek haneldo hoh núkallhah. ²¹ 'Et Sizi be'abá yoodulhkut, "Dáhooldzah ndun 'uski 'et ndunt'ah?" yúlhni. "Ntsool da whuts'un," ní be'abá. ²² "Lhat hoh 'uski yuzoolhghelh hukwa' yalh'en. Too be chah yuzoolhghelh hukwa' yalh'en 'ink'ez tsídunoh cha' yulh'en. Soo' tenilh t'eh, negha té'nonze 'ink'ez nela 'oneh!" ²³ "A," yúlhni, "Soo 'úlcho 'i be be 'alha' hoont'ah int'i t'eh, ndan be 'alha' hoont'ah hit'i t'eh, 'en ts'iyaintsuk ne'hutet'en buba huwa chaootelhúnah." ²⁴ 'Ahoh be'abá bunatsultoo hoonli hoh 'utni, "SMoodihti be 'alha' hoont'ah 'ust'i, 'et whunts'ih 'aw soo cha'lhtus. 'Et huwa sula 'ineh, 'o nus 'iltus, 'i be 'alha' hoont'ah, 'i be 'oost'e ka, 'et hukwa' nuszun." ²⁵ 'Et Sizi whutelh'en 'ilhuhowezdel 'aw 'et higha welhúghaz hoh 'ahoh

khunek ulhtus, 'i be ntsi' nudúdeh, 'i hukwa' yudáni, 'ink'ez ndi yúlhni, "Ntsi' nudúdeh, 'i cha'hudústs'o 'ink'ez yachahulhtuk hubilh'i, ndun 'uski buyáh hanaindaih nyudúsni, 'ink'ez doo chah 'o 'at buyunádondzit gunih!" ²⁶ 'Et ntsi' nudúdeh, 'i ndunnah 'uski yukaootelhdzut, 'ink'ez tube cho dulduz, 'alzul, 'ink'ez yeyáhanaja. Ndunnah 'uski 'ants'ih dazsai li'uja. 'Et huwa lhanah, "Dazsai ho 'int'ah," hutni. ²⁷ 'Et whunts'ih Sizi 'uski yula ílhchoot 'ink'ez nduk 'úyinla. 'Et 'uski dich'oh dinadija. ²⁸ 'Et hukw'elh'az Sizi koo danínya hoh yugha hoodul'eh whu'izyaz hiyoodulhkut, "Et dáhoont'ah huwa wheni ntsi' nudúdeh, 'i 'aw buts'u hanáts'inooyoot ghaít'ah?" ²⁹ 'Et Sizi ndo búlhni, "Ndan tenahududli, 'ink'ez sahá'hudulyih, 'aw 'i zeh ntsi' nudúdeh, dune nahiyunteyukw."

Sizi datetsah doo chah huwuyailhtuk

³⁰ 'Aw 'et keyah whuch'a nahundel 'ink'ez 'et keyah Galilee wheghah lhunáhusdel. Sizi nts'e whénya ts'ih dune t'éoonózin hukwa cha'nízun, ³¹ yugha hoodul'eh hubodulh'eh 'et huwa. 'Ink'ez ndo búlhni, "Yinkak dune ye", 'uyoон dune t'l'ahítelhtelh 'ink'ez hituzelhghelh. Hizelhghi hukw'elh'az whulh tat dzin 'et dinadutédalh." ³² 'Aw daja ni hoh 'utni nt'ehonízun 'ink'ez hiyé nuljut 'aw hiyoodolhkut ghaít'ah.

Ndan simba netah degha nus dune uncha unli

³³ 'Et keyah Capernaum ts'ih whuz lhghu nahudídel. Koo danáhandel hoh 'et Sizi yugha hoodul'eh huboodulhkut, "Njan ni ti ts'ih ahdulh hoh, dant'i ghu yalhtuk ho' dahni?" ³⁴ Daja hutni hukwaya hinli 'et huwa t'echahudusnih. Ti 'et lhena'uhutni ho' hutni, "Ndan simba netah degha nus dune uncha unli?" ³⁵ Sizi nátl'adeda ndunnah lanezi 'o 'at nanah yugha hoodul'eh, "Anih," hubúlhni 'ink'ez ndo búlhni, "Ndan degha nus dune uncha tele hukwa' ninzun t'eh, 'en 'udek'ah wule huba' hoont'ah, 'ink'ez ts'iyannah nané'tet'en." ³⁶ 'Et Sizi 'ilhunuh 'uskiyaz yílhchoot 'ink'ez hububut ninílhyá 'ink'ez yunasúnik hoh ndo búlhni, ³⁷ "Ndan si soozí gha ndun 'uski ndult'ah danílhti t'eh, si dasunílhti. 'Ink'ez ndan dasunílhti, si zeh ilah dasutálhtelh. Ndun sutélh'a, 'en chah dahinílhti ho' hoont'ah."

Sizi ndo búlhni, "Ndan nech'a chadítini, 'en neba 'int'ah."

³⁸ 'Et John ndi yúlhni, "Nehodulh'eh, 'ilhunuh dune nyoozi be ntsi' nudúdeh, 'i dune buts'u hanaídulhdoh, 'en uznílh'en. "Ustl'e' 'ineh ts'utni,' 'aw nelh cha'ust'en 'et huwa." ³⁹ Sizi ndo búlhni, "Aw whuch'a néhyoot ilah, ndan soozí bugha huwa 'ét'en 'uwhulh'en, 'en 'aw hukw'elh'az t'eh dzuh k'una'a sughi yaoolhtuk ghaít'ah. ⁴⁰ Ndán nuhch'a chahudítni, 'en nuhts'un hudentni ho' hint'ah." ⁴¹ 'Ink'ez 'utni, "Njan whunalhúnih, nuhwheni Christ bube'ildzun ahli huwa ndan too whunts'ih nuhgha nílhdez t'eh, 'en Yak'usda buba k'elha whutelhtsilh."

Sizi dune tink'us nílht'uk bughi yalhtuk

⁴² "Et 'ilhunuh 'uski buba 'alha' 'ust'ah, 'ink'ez 'ilhunuh dune lubeshi be such'a itéltelh t'eh, ndun dune 'uski tink'us na'a wheyúntelhtun 'et whutsuh tse be hits'ilchun ye'ulhchuz 'ink'ez hiyulh tatse doolh'is 'o nus soo' whutet'e. ⁴³ 'Et nla 'i bugha lubeshi inla t'eh, nla k'ont'as! 'Et nla k'us zeh int'i hoh yak'uz whénya t'eh whuz 'ilhuz khutanalh, 'et degha nus mba whutézoo. 'Et lhch'az nla bulh kwuncho yuh ts'ih whénya t'eh degha nus mba whutétsi', whuz kwun nachanusne ho' 'int'ah. ⁴⁴ 'Et whuz hube 'usgoo 'aw yachatésdla 'ink'ez kwun nachanusne. ⁴⁵ 'Et nke 'i bugha lubeshi inla t'eh, nke k'ont'as! 'Et nke k'us zeh int'i hoh yak'uz whénya t'eh whuz 'ilhuz khutanalh, degha nus mba whutézoo. 'Et lhch'az nke bulh kwuncho yuh ts'ih whénya t'eh

degha nus mba whutétsi', whuz kwun nachanusne ho' 'int'ah. ⁴⁶ 'Et whuz hube 'usgoo 'aw yachatésdla 'ink'ez kwun nachanusne. ⁴⁷ 'Et nyuna 'i bugha lubeshi inla t'eh, hanó'ahl! 'Et nyuna k'us zeh int'i hoh Yak'usda buk'úne' whut'en whénya t'eh, 'et degha nus mba whutézoo. 'Et lhch'az nyuna bulh kwuncho yuh ts'ih whényuhano t'eh, degha nus mba whutétsi', whuz kwun nachanusne ho' 'int'ah. ⁴⁸ 'Et whuz hube 'usgoo 'aw yachatésdla 'ink'ez kwun nachanusne. ⁴⁹ Lizwif Yak'usda ts'un khunai hidélhk'un hoh 'udechoo lusel hik'unhiyudzih. 'Et whuz na'a ts'iyannah dzuh nutezut ho' hoont'ah. ⁵⁰ Lusel unzoo ho' 'int'ah, 'et whunts'i lusel buzachahoolkih 'uts'ulh'ih t'eh, nts'e na'a doo chah lusel buzahóolki 'uztelhtsilh? Whuz na'a nuhdzi wútsi' gunih 'ink'ez nuwhulh dune ts'un nuhdzi dóoghel."

10

Dune lhghu hudemhts'i lhch'á nahoodelh, 'et hubugha Sizi huboodulh'eh

¹ 'Et Sizi whuch'a nasja 'ink'ez Judea huwah nenínya, 'et took'oh Jordan huwhútni, 'et yasúya. 'Et lhanah dune yugha wézdel. 'Et whutsuh da datni 'ahoolhyez whuz na'a doo chah zeh huboodulh'eh. ² 'Et bulunah Pharisee highu nindel 'ink'ez hiyóolhdzih hoh hiyoodulhkut, "Nedíni, dune 'en ih bughá whunt'ai bu'at lahudoonih ka?" ³ 'Et Sizi 'utni, "Daja ni hoh Moses khunek nuhtl'aída'ai inle, 'i?" ⁴ 'Et 'uhiyúlhni, "Moses bugha óonin'ai dune dustl'us yuk'une'úzguz, 'i be bu'at buch'a nayólhtelh." ⁵ 'Et Sizi ndo búlhni, "Stabe nuhdzi duts'un 'et huwa ndi khunek Moses nuhwhuba yuk'e'ánguz. ⁶ 'Et whunts'ih 'udechoo Yak'usda ts'iyaintsuk inla hoh dune 'ink'ez ts'eke chah inla. ⁷ 'Et njan huwa dune be'abá 'ink'ez be'ama bulh buch'a óoya, 'ink'ez bu'at 'en zeh zih wuda. ⁸ 'Et nuhult'ah 'ilho hutele, 'et 'o 'un hoh nanah chahílah. ⁹ Ndán Yak'usda lhghá buninla, 'en 'aw dune lhch'a nabuhóoleh huba cha'hoot'ah." ¹⁰ 'Et koo danáhandel hoh yugha hoodul'eh Sizi njan dáhoont'ah 'et hukwa hiyoodulhkut. ¹¹ 'Et ndo búlhni, "Dune ndan bu'at 'ún tezno 'ink'ez 'uyoon ts'eke ghu nasda t'eh, 'en 'uyoon ts'eke bulh tinta' tétilh ho' 'int'ah. ¹² 'Et whuz na'a zeh ts'eke buki 'ún tezno 'ink'ez 'uyoon dune ghu nasda t'eh, 'en chah 'uyoon dune tinta' tet'ilh."

Sizi 'uskeh buk'udelhúnik 'ink'ez buba tenadudli

¹³ Bulunah dune 'uskeh Sizi ts'un nibaninla buk'edoolni ka, 'et yugha hoodul'eh ndunnah 'uskeh whusaínla hukwa' búdani. ¹⁴ 'Et Sizi whunah'en hoh hunílh'e 'ink'ez yugha hoodul'eh ndo búlhni, "Whute 'uski suts'un hutoodelh. Khun teh dah hubudóohni gunih. Ndán Yak'usda hubudayi cho unli whuz hudemhts'i, 'en ndunnah 'uskehiaz hubunduhúlt'ah ho' hint'ah. ¹⁵ Soo ts'ah'un 'alha' 'un whudúsni, ndán 'uskehiaz k'una'a njan Yak'usda hubudayi cho unli chahoolhchulh t'eh, 'aw whuz dahóoya ghaít'ah." ¹⁶ 'Et 'uskehiaz ts'iyawh bunasunik 'ink'ez 'ilhunah hinli hoh hubuk'edilnik 'ink'ez huba tenadedli.

Dune soode'a 'int'ah

¹⁷ 'Et Sizi doo chah natesja hoh dune yududelhgai, yubut bugwutsi be nenínya 'ink'ez yoodalhkut, "Dune hoodulh'eh unzoo, nts'e na'a dast'en hoh 'ilhuz khutesnalh whuch'a ootéldoh?" ¹⁸ 'Et Sizi 'uyúlhni, "Di ka 'usudíni, ninzoo sudíni? 'Aw 'ilhunuh unzoo hoolah. Yak'usda 'aw 'en zeh unzoo ho' 'int'ah. ¹⁹ Ndi khunek Yak'usda nuhtl'aída'ai, 'i 'et t'eninzun: nesóolhghelh gunih, dune k'us ts'eke bulh tinta' 'ont'en gunih, 'undunont'ih gunih, honts'it gunih, ha'ndunont'ah gunih, nyu'abá 'ink'ez nyu'ama chah hubudólhti." ²⁰ 'Et dune 'utni, "Nehodulh'eh ndet chilh usdli 'uda whuts'un, ndi khunek ts'iyawh buk'úne' zest'en." ²¹ 'Et Sizi soo yuk'entsi' hoh yunah'en 'ink'ez

ndi yúlhni, "Ilhun zeh whu'et 'int'ah, inyalh 'ink'ez ndai int'i, 'i ts'iyawh be 'ónket 'ink'ez sooneya tehel'en hubugha ínondzaih, lhdulalhgus ilhchoot 'ink'ez 'anih, se'ut'en k'ah tune' 'ónt'en ka sunanyalh. 'Et t'eh nduk yak'uz hoonzoo, 'et whuch'a ootálhdoh." ²² 'Et ndun dune ndi khunek whudánts'o hoh tube budzi ndesda, 'ink'ez tso unli hoh yugha natesja, tube soode'a 'int'ah 'et huwa. ²³ Sizi yugha hoodul'eh bunilh'en 'ink'ez ndo búlhni, "Dáhoont'ah huwa whúlña hoh ndan soode'a, 'en Yak'usda hubudayi cho unli, 'et dahútedulh." ²⁴ 'Et yugha hoodul'eh ndi khunek hídants'o hoh tube huba hooncha. 'Et Sizi whuz heyelh hoh ndutni, "Suzkehkah dahoont'ah huwa whúlña hoh 'en duzooneya hit'az 'int'ah Yak'usda hubudayi cho unli, 'et dahútedulh. ²⁵ Dant'ah khunai cho, camel hiyúlhni, 'i 'aw yubatsoh buna 'aw yukólget ghaít'ah. 'Et whuz na'a dune soode'a 'int'ah, 'o nus buba huwa whúlña Yak'usda hubudayi cho unli datéyalh huba." ²⁶ 'Et yugha hoodul'eh tube buba hooncha 'ink'ez lhuhoodulkut, "Ndan simba doojih?" ²⁷ 'Et Sizi hubunilh'en 'ink'ez ndo búlhni, "K'us njan 'et dune ba 'uhóneh ghaít'ah, 'et whunts'ih Yak'usda ba ts'iyaintsuk 'aw huwa chahólnah ho' hoont'ah." ²⁸ 'Et Peter yatélhtuk, "Soo cho whunilh'en, ts'iyaintsuk bulazdetnik 'ink'ez nts'un tezdel." ²⁹ 'Et Sizi ndo búlhni, "A, ts'ah'un nuhwhudúsni, ndan bukoo huwu tezya 'ink'ez dulhutsinkah, k'us dulhtuskah, be'ama, be'abá, bu'at, buzkehkah, k'us duyun k'ut t'eh, si sugha 'ink'ez ndi khunek unzoo, 'i k'uz ts'iyaintsuk whuladetnik, 'ink'ez suntezya t'eh, ³⁰ nus de 'o nus lhai únli hoh butl'anaítekulh: bukoo 'ink'ez bulhutsinkah, bulhtuskah, be'ama, buzkehkah, 'ink'ez buyun k'ut 'ink'ez dune hiye tena'tel'ilh chah, 'ink'ez nus de 'ilhuz khutena. ³¹ 'Et whunts'ih lhanah 'udechoo 'int'ah 'en 'udek'elh'az hutele, 'ink'ez lhanah ndunnah 'udek'elh'az hinli, 'en 'udechoo hutele."

Sizi datetsah 'ink'ez dinadutédalh whulh tat huwu yatelhtuk

³² 'Aw 'et Jerusalem ts'ih ti hedulh Sizi, 'en yugha hoodul'eh hubutsuh úyalh. Hoh hedulh tube huba hooncha k'et whéhunuljut. 'Et doo chah Sizi yugha hoodul'eh lanezi 'o 'at nanah 'udun nébuninla 'ink'ez nus de bulh daóotenilh, 'et hubugha hubulh yaílhtuk. ³³ 'Et ndo búlhni, "Sih soo zélhts'ai, Jerusalem ts'ih ts'utedulh 'ink'ez yinkak dune ye', 'en Lizwif náwhulnuh moodih 'ink'ez Moses be' dustl'us 'uk'ununa'úsduguz, 'en butl'aihítelhtelh. 'Et datétsah wheni hiba nahuteyeh, 'ink'ez ndunnah 'udun yun k'ut whut'en, 'en butl'aihítelhtelh. ³⁴ 'Et 'en highu tedloh, higha dútezoh, hiyootélhtsus 'ink'ez hituzelhghelh. 'Et tat dzin inle t'eh, dinadutédalh."

James 'ink'ez John bulh Sizi hiyoodulhkut

³⁵ 'Et James 'ink'ez John bulh Zebedee buye'kah Sizi highu nin'az 'ink'ez hiyoodulhkut, "Nehodul'eh ndai nts'un buka' ts'utni, 'i 'et neba 'uwhutanlilih hukwa' ts'uninzun." ³⁶ Sizi huboodulhkut, "Ndet nuhwhuba 'uwhutesdlilih hukwa' nahzun?" ³⁷ 'Et 'uhutni, "Ndet yak'uz degha nus dénti ts'ih sinda t'eh, nzih taduke 'et hukwa' nídudzun, 'ilhunuh 'en nalhnih ts'ih 'ink'ez 'ilhunuh 'en 'intl'as ts'ih 'int'ah." ³⁸ 'Et Sizi ndo búlhni, "Ndet suts'u hukwa' dahni 'aw t'éonuzúhzun k'us ndi lubot be tesnilh, 'i soo tulih wahnai 'ink'ez nts'e na'a too bé' 'ulya soo tulih whuz na'a too be' 'óohneh?"* ³⁹ "Soo sih 'uts'ooneh," hiyúlhni. 'Et Sizi ndo búlhni, "Ndai lubot be tesnilh, 'i nuhwheni chah téhtnilh ho' 'int'ah. 'Ink'ez too bé' 'ulya whuz na'a nuhwheni chah too be' téhtnilh. ⁴⁰ 'Et ndan nalhnih ts'ih sughu tedalh, 'ink'ez 'intl'as ts'ih sughu tedalh, 'aw si huwá hos'alh ghaít'ah, ndunnah huba lhawhúdulya, 'en zeh buba' hoont'ah." ⁴¹ 'Et 'o 'un lanezi yugha hoodul'eh, 'en James 'ink'ez John hubulh hánilch'e. ⁴² 'Et Sizi

* **10:38** Nts'e na'a dzuh nuteszut, whuz na'a dzuh nuhtézut ih?" ni ho 'utni.

soo ts'iyawh, "Anih," hubudáni, 'ink'ez ndo búlhni, "Et nt'eeonáhzun 'udun yun k'ut whut'en hubutah, ndun dune tsuh whudelhdzulh hinli, 'en dune buk'ut moodih hinli. Ink'ez ndan bumoodih hinli, 'en chah bumoodih hinli. ⁴³ 'Et whunts'ih nuhwheni nuhtah 'aw whuz na'a ilah ho' hoont'ah. Ilhunuh nuhtah dune uncha tele hukwa' ninzun t'eh, 'o 'awh chah huba ne'óot'en wule huba' hoont'ah. ⁴⁴ 'Et nuhtah 'ilhunuh 'udetsah tele hukwa' ninzun t'eh, ts'iyannah 'e'ulhna wule huba' hoont'ah. ⁴⁵ Yinkak dune ye', 'en whunts'ih 'aw ba né'whutet'en huba whusachaíyal 'et huwa. Dune buba né'tet'en 'ink'ez dune buba datétsah 'et hoh dune ts'iyawh nabootekulh."

Dune chawhés'en Bartimaeus hiyúlhni, 'en Sizi whe'en nayulhtsi

⁴⁶ Jericho ts'ih hunindel, Sizi yugha hoodul'eh tubulh nahutesdel hoh, lhanah 'ilhuhowezdel chah 'ut'en. Dune chawhés'en Bartimaeus hiyúlhni, Timaeus buye', 'en ti whuzih usda hoh tedudlih, ⁴⁷ Sizi Nazareth whut'en wheghah uyalh whulhúdants'o. 'Ahoh hazulh hoh 'utni, "Sizi, David buts'u hainzut sugha té'ninzech!" ⁴⁸ Lhanah t'edoosnih hiyulhni 'ink'ez whuch'a hínenyoot. 'Et whunts'ih 'o nus 'alzul hoh 'utni, "Sizi, David buts'u hainzut sugha té'ninzech!" ⁴⁹ Sizi 'ilhunenínya 'ink'ez ndo búlhni, "Anih sba dáhni," hubúlhni. 'Et dune chawhés'en yuka hunih, "Hoonínt'i 'ink'ez didinyih, 'anih nyúlhni," hiyúlhni. ⁵⁰ Dunaihts'uz 'i ts'ahayét'ah, dudillhah, 'ink'ez Sizi yughah nininya. ⁵¹ "Et dányutesdlilh 'et suts'u hukwa' ninzun?" ni hoh Sizi yoodulhkut. "Nehodulh'eh doo chah whes'en naóosle, 'et sugha holts'it," yúlhni. ⁵² "Naindalh, si suts'un be 'alha' hoont'ah, 'i be soo ná'inja," yúlhni. 'Et 'ahoh dune 'aw 'et whe'en nasdli, 'ink'ez Sizi ti yuntezya.

11

Lhanah honelhnik hoh Sizi Jerusalem lhgha dínya

¹ 'Aw 'et Jerusalem whéghah hedulh, nat keyah Bethphage 'ink'ez Bethany chah 'et dzulhyaz Olive be hóodzi, 'et whuz nihúnindel. 'Et Sizi nanah yugha hoodul'eh whébalh'a, 'et ndo búlhni, ² "Keyah whiyaz nda ts'ih whuz'ai whuz ah'us. Whuz lhugha dah'az, 'et yeztliyaz, donkey hiyúlhni, whutsuh da dune yak'uchaidah, 'i 'et whédint'uk, 'i lhk'unadooh'uk 'ink'ez suts'u toolhdlooh. ³ Dune, 'Di ka 'et ndaht'en?' nuwhúlhni t'eh, 'NeMoodihti yuka' ninzun' doohtni. 'Aw 'et sih nuhtlayoolhtelh." ⁴ 'Et whehá'az 'ink'ez keyah 'et yeztliyaz nahuyilhti, 'ilhunuh bukoo ndati 'et whédint'uk, 'ink'ez lhk'unahida'uk. ⁵ 'Et bulunah n'awh nahudelhúya, 'en hubuhoodulhkut, "Et daht'en hoh aht'en yeztliyaz lhk'unadah'uk?" hubuhútni. ⁶ 'Et Sizi buba nahezya k'una'a hubuhútni, 'et 'ants'ih t'ehudínel 'ink'ez hubula hudemtnik. ⁷ 'Et Sizi yeztliyaz highu hinílhti hoh bulunah nahiyíts'uz 'i hiba hik'ehiyílhdel 'ink'ez Sizi yuk'ét'l'adida. ⁸ Lhanah dune chah nahiyíts'uz, 'i ti 'et nehíyuzbus. Bulunah chah 'ul k'us 'ut'an k'unuhídut'as, 'i ti nahídulhdelh Sizi yuk'ut lhuteyalh 'et wheni. ⁹ Ndunnah dune Sizi hitsuh hedulh, 'ink'ez hik'ah hedulh, ts'iyawh hahuzulh hoh 'uhutni,

"Yak'usda ba whudélhti!

NeMoodihti boozi bugha whusaínya,

'en degha nus hoonzoo bughá whults'ut.

¹⁰ Netsuh whudelhdzulh, David hubudayi cho keyah 'et dúhoont'ah chah zeh whusawhutélts'ulh, 'et Yak'usda ba ts'odóolhti."

¹¹ 'Aw 'et Sizi Jerusalem keyah neninya hoh Lizwif hubuluglez whuchos'tih danínya 'ink'ez dulhcho nýuz'en. 'Aw 'et náwhendunilhghel 'et huwa Bethany huwhútni ts'ih whuz lanezi 'o 'at nanah yugha hoodul'eh whuz hubulh whén'az.

Ndi mai chun hanulhye, 'i fig hiyulhni, 'i Sizi yek'ehanya

¹² 'Om bun Bethany ts'ih whuz de nahéduhlh 'et Sizi buye'élts'ul. ¹³ Nilhdza 'et mai chun yunílh'en but'an chah hoonli. 'Et yughu nínya mai ntélhcholh ka. Yughu nínya hoh 'ut'an zeh 'int'ah, nk'achah bumai hoolah. ¹⁴ 'Et Sizi ndi mai chun ndi yúlhni, "Aw 'o 'at dune nyumai hunoo'ah ghaít'ah!" 'Et ndutni hoh yugha hoodul'eh hídants'o.

Sizi, 'en Lizwif hubuluglez whucho ts'ih tezya

¹⁵ 'Et Jerusalem ts'ih hunindel. Sizi Lizwif hubuluglez whucho 'et daninya. Ndunnah 'e'óoket 'ink'ez 'ooket ts'iyawh tinábuninyoot. Sooneya lhk'enáhududzaih bukw'uzdai chah naína'ai, 'ink'ez dut'ai be 'óoket chah, ¹⁶ 'aw luglez hoonli ne'hóole butl'achahoo'al. ¹⁷ 'Ink'ez Sizi dune whubodulh'eh ndo búlhni, "Yak'usda be' dustl'us k'ut 'uk'ut ne'úsduguz, 'Njan sukoo ts'iyannah tenadudli bakoo 'úhoont'ah,' ni. 'Et 'uwháhla undunut'ih 'ink'ez nanúl'i bakoo whuzúlhtsi!"

¹⁸ 'Et náwhulnuk moodih 'ink'ez Moses be' dustl'us 'uk'ununa'úsduguz hodánts'o hoh, hizoolhghelh hukwa húnuta, tube hiyé nuljut, ts'iyannah 'ilhuhowezdel hubodulh'eh, 'en huba hooncha 'et huwa. ¹⁹ Soo nadálhghel ibulh Sizi yugha hoodul'eh hubulh Jerusalem whuch'a nahúndel.

Ndi mai chun bugha hahóodul'eh

²⁰ Hoh bundada 'uda 'et ti hedulh ndi mai chun hinilh'en. Soo ts'ah'un bughih tubulh desuz. ²¹ 'Et Peter, 'en whunalnik hoh Sizi bulh yátelhtuk, "Nehodulh'eh nilh'en ndi mai chun bulh buk'ehanya, 'i desuz," yúlhni. ²² 'Et Sizi ndo búlhni, "Njan whunaoohlhúnih, Yak'usda nuhwhuba 'alha' 'int'ah t'eh, ²³ ndi dzulhyaz 'i 'udóohni, 'Didilts'it 'ink'ez bun k'ut whucho ts'ih tailts'it.' 'Et soo nuhdzi yuh 'aw nawh cha'hoot'ah 'ink'ez nuhwhuba 'alha' hoont'ah t'eh, dawhútenilh dahni, ts'iyawh nuhwhuba 'et ndó tenilh. ²⁴ 'Et huwa' 'un whudúsni, ndi be 'alha' hoont'ah, 'i be tenadahdli, 'ink'ez hoonli ka' dahni 'et 'alha' nahzun hoh nuhgha tekulh t'eh, ndai buka' dahni, 'i nuhgha tekulh ho' 'int'ah. ²⁵ 'Et sahyin hoh tenadahdli, 'ink'ez 'uyoon ts'un nuhwhuba dzuh t'eh, buba n'ún whutulhdelh, 'et sih nuhwhe'aBÁ, yak'uz úsda, 'en nuhwheni chah nuhwhulubeshi nuhwhuba 'un yutoolhdelh. ²⁶ 'Et 'uyoon buba n'ún chaootulhdulh t'eh, nuhwhe'aBÁ, yak'uz úsda, 'en chah 'aw nuhwhulubeshi nuhwhuba 'un yutoolhdelh ghaít'ah."

Sizi be 'ut'en k'ah 'et hukwa' hoodulhkut

²⁷ 'Ink'ez doo chah Jerusalem ts'ih nahundel, Sizi Lizwif hubuluglez whucho nuya hoh náwhulnuk moodih, Moses be' dustl'us 'uk'ununa'úsduguz, 'ink'ez dune tsuh whudelhdzulh, 'en Sizi highu nindel, ²⁸ 'ink'ez ndi híyulhni, "Nedini ndai bugha dune bugha ndoh 'int'ah hoh njan ndint'en? Ndán nghá ooni'ai hoh 'int'en?" ²⁹ 'Et Sizi ndo búlhni, "Ilhun zeh hukwa nuhoodutelhkut. 'Et ndusudáhni t'eh, 'et sih ndun whudóosni ndi dune bugha ndoh 'ust'ah hoh njan ndust'en. ³⁰ Ndusudóohni ndun John dune too be' 'ulh'en ndan yutl'ahón'ai hoh dune too be' 'ulh'en inle, Yak'usda tulih k'us dune tulih yugha ooní'ai?" ³¹ 'Et 'ahoh dich'oh dutah hukw'u nahúhlhye hoh njan duhútni, "Daja chah uzdooni, 'Yak'usda yugha ooní'ai,' ts'utni t'eh, 'et sih dooni, 'Di ka John nuhwhuba 'alha' cha'dusnih?" ³² 'Et, 'Dune yugha ooní'ai ts'utni t'eh,' 'et njan dune hubé hunuljut 'et huwa, ts'iyawh dune John dune too be 'ulh'en, 'en Yak'usda be nus whunilh'en unli inle huninzun. ³³ 'Et huwa Sizi 'uhiyúlhni, "Aw 't'ets'onízun." Sizi 'et ndo búlhni, "Si chah ndan sugha óoni'ai 'aw nuhwhudoosni ghaít'ah."

12

Mai haníyeh k'et huwhulh'ai bugha whúts'odul'eh

¹ 'Aw 'et Sizi khunek hiye oodool'eh hubugha hubulh yálhtuk, "Ilhunuh dune, 'en mai haníyeh, mai too 'úlh'ih, 'i 'ainanla. Yuna'neztl'oo, tsak'et hahónkaih, mai tahúndununih huba, 'ink'ez yutést'en chah 'uhóonla. 'Et dune bughu whulh'ai 'ink'ez ninza keyah whenya. ² 'Et 'aw 'et mai oonteje niwhuninzut t'eh, 'ulhna 'ilhunuh 'en mai haníyeh k'et butl'ahúhonla buts'ú wheyalh'a, ndai ooneje, 'i bulah buts'itookat huba' hoont'ah, 'i ka. ³ 'Et 'uhiyínla ndunnah mai k'et butl'ahúhonla, 'ulhna hiyílhchoot yahúyalht'o 'ink'ez hoonli higha chaílel hoh whenáhinanyoot. ⁴ Ndun dune be'ildzun, 'en doo chah 'uyoon 'ulhna whuz whelh'a. 'En tse be nahínelh'uz hitsi ts'e' nalh'uz hoh nukai híyulhtsi, 'ink'ez hukwa yáhoonli k'una'a 'uhiyínla hoh whenáhinanyoot. ⁵ Doo chah 'uyoon 'ulhna whuz wheyalh'a. 'En hizelhghi. Lhanah 'uyoon chah 'et ndo buhinla. Bulunah hubuhoolht'ah 'ink'ez bulunah chah hubuhanghan. ⁶ Ilhunuh zeh 'udek'elh'az whuz buts'un wheyálh'a, 'et usda, 'en buye' yuk'entsi', 'Suye', 'en sih hidóolhti,' ni 'et huwa.* ⁷ Ndunnah dune mai k'et butl'ahúhonla 'et 'ulhodútni, 'Ndun njan mai k'et be'ildzun, 'en buye' int'ah. 'Anih, ts'uzoolhghelh. 'Et sih ndun buye' buts'ítekulh, 'i ts'iyawh ne'ildzun wule.' ⁸ 'Et ndun buye' hiyílhchoot, hizelhghi 'ink'ez hiyust'e 'i nyoh haníyeh k'et tñahinino." ⁹ 'Et Sizi huboodulhkut, "Daóoneh simba ndun mai k'et whulh'ai? Whusanája, 'ink'ez ndunnah dune ts'iyawh hubóoghan, 'ink'ez mai k'et 'uyoon gho hohólh'a. ¹⁰ 'Aw whutsuh whudelhdzulh ndi Yak'usda bughunek 'uk'une'úsduguz, 'i, 'aw ih buk'eyáchasulhtuk? 'Et ndutni, 'Ndi tse be koo 'uwhulh'en 'ún hidutelh'uz, 'i 'uja degha nus bukadaoodilt'ah, 'i suli.

¹¹ 'Et Moodihti whuz na'a 'uhóonla.

Tube huba hooncha k'una'a 'obínlá ho' hoont'ah.'
'Et whuz na'a Yak'usda be' dustl'us k'ut ndutni," ndo búlhni.

¹² 'Et Lizwif bumoodih, 'en Sizi hiyoolhchoot hukwa' hut'en, t'ehonínzun didut buch'a yálhtuk hoh dune hoodalh'i, 'et whunts'ih dune 'ilhuhowezdel hiye nuljut huwa Sizi dachahíyil hoh whenáhedel.

Yun k'elha huhoolh'i hukwa' hoodulhkut

¹³ 'Et bulunah Pharisee 'ink'ez Herod budune chah 'en Sizi khunek be hiyoolhgooh ka hits'ú wheóobahalh'a. ¹⁴ 'Et Sizi highu nindel 'ink'ez 'uhutni, "Dune hoodulh'eh t'ets'onínzun ts'ah'un zeh 'udanilh. 'Aw 'uyoon daja huntezilh huwu ni chaínlah hoh dune dant'ah whunts'ih chabunílh'en hoh Yak'usda beni k'ah ts'ih hubugha khunek 'alha' int'ah, 'i be whúbodilh'eh. 'Et nedíni wheni khunek netl'ahon'ai, 'i whudulhyah 'uts'oot'en ih tulih Roman keyah whumoodih buts'un yun k'elha ts'uholh'i 'i buba buk'elha ts'otelh'i tulih k'us 'awundooh tulih?" ¹⁵ 'Et whunts'ih Sizi hiyoolhgooh hukwa' hiyulh'en t'eoonaanzin, 'ink'ez ndo búlhni, "Et di ka sóolhdzih? Sooneya stl'anah'ah noolh'en sih." ¹⁶ 'Aw 'et 'ilhunuh sooneya yutl'ainá'ah. 'Et Sizi huboodulhkut, "Ndan ho' int'ah bunen 'ink'ez boozí 'ukw'e'usdúguz?" 'Et 'uhiyúlhni, "Yun k'ut whumoodih Caesar, 'en 'int'ah." ¹⁷ 'Et Sizi ndo búlhni, "Ndai Caesar be'ildzun, 'i buts'un buk'elha whulh'i, 'ink'ez ndai Yak'usda be'ildzun, 'i Yak'usda ts'un buk'elha whulh'i." 'Et soo tube huba hooncha.

Nats'ukhítnahi 'i buka 'oodulkut

¹⁸ 'Aw 'et ndunnah Sadducee hubuhútni, 'en Sizi highu nindel. 'En 'uhutni, "Dats'úzsai 'ink'ez 'aw nats'ukhóotnah ghaít'ah." ¹⁹ 'En hiyoodulhkut hoh

* ^{12:6} Njan mai k'et haníyeh humoodih, 'en Yak'usda 'int' ah, 'ink'ez buYe' 'en Sizi Gri 'int' ah. 'Et ndun bugha télh'a, ndunnah Lizwif hubumoodih 'uhint' ah, ni ho 'utni.

'uhutni, "Nehodulh'eh Moses 'en khunek negha ide'ai, 'i neba yuk'une'úzguz, 'Dune bu'at 'en dazsai, 'ink'ez buzkeh hoolah t'eh, ndun dune dazsai bulhutsin 'en ndun tsandelh yughu naooda, ndun dune dazsai, 'en ba buzkeh hole ka.' ²⁰ 'Et skwunlai 'o 'at nanah lhulhutsinkah hinli, 'udetsah whudelhdzulh, 'en 'at ut'i, 'awhuz buzkeh hoolah hoh dazsai. ²¹ 'Et yuk'ah whúdelhdzulh, 'en tsandelh yughu nasda. 'En chah buzkeh hoolah hoh dazsai. 'Et whulh tat chah whuz na'a zeh 'uja. ²² Ts'iyawh skwunlai 'o 'at nana 'ilho dunedzulh 'en ts'iyawh highu dalts'i, ts'iyawh bubuzkeh hoolah hoh yahadla. 'Udek'elh'az ndun ts'eke dich'oh chah dazsai. ²³ Ndunnah yahadla ts'iyawh dinahudutédluh dzin dinahudidel t'eh, k'us ndan simba bu'at tele, ts'iyawh skwunlai 'o 'a nanah, 'en highu dálts'i?" ²⁴ 'Et Sizi ndo búlhni, "Tube 'uts'un na'a 'udahni. Ndet daja dahni t'eoonuzáhzun ih? Yak'usda ye ulhtus, 'i 'ink'ez bughunek k'e'eduguz, 'i t'énuzahzun, 'et huwa whuz na'a 'udahni. ²⁵ Ndet yahadla dinahudidel t'eh, ndoh yak'uz lizas li'hint'ah. 'Et ndó tet'ilh dune chah 'ink'ez ts'ekoo chah 'aw lhgha hudóolts'i ghaít'ah. ²⁶ 'Ink'ez ndunnah yaidla dináhudutédalh hubugha, ndi Moses 'uk'une'úsduguz, 'i 'aw ih buk'uyachálhdih, whus delhtan, 'i tah whudezk'un hoh Yak'usda yulh yalhtuk inle? 'Et 'uk'une'úsguz, 'i ndutni ndun Moses Yak'usda ndi yulhni, 'Si 'ust'ah Abraham 'en buMoodihti 'ust'ah, Isaac, 'en buMoodihti 'ust'ah, 'ink'ez Jacob, 'en chah buMoodihti 'ust'ah.' ²⁷ 'Et huwa huhukhuna hubuYak'usda 'int'ah, 'aw yahadla hubuYak'usda ilah ho 'int'ah. 'Et 'ílhuz 'uts'un na'a 'udahni."

Ilhuk'i khunek neba yutulhúhezya, i degha nus dezti

²⁸ 'Ilhunuh dune Moses be' dustl'us 'uk'ununa'úsduguz, 'en 'et 'ut'en, 'ink'ez hubudánts'o 'ink'ez 'en t'éoonínzun Sizi ndunnah Sadducee soo ndo budáni. 'Et didut chah Sizi yoodulhkut, "K'us ndai khunek neba yutulhúhezya, 'i k'us dezti?" ²⁹ 'Et Sizi 'uyúlhni, "Ndi degha nus dezti, 'i 'int'ah, 'Israel budune, oozélhts'ai, neMoodihti 'en Yak'usda unli. 'En zeh 'ilhunuh Moodihti 'int'ah. ³⁰ Yak'usda nuhMoodihti nuhdzi ndulhcho, 'i be, nuhzul ndulhcho, 'i be, 'ink'ez nuhwhubeni ts'iyawh ndulhcho chah." ³¹ Whulh nat khunek higha nélh'a, 'i chah degha nus dezti, 'i 'int'ah, 'Nts'e na'a nuhwhenich'oh k'enahdutsi', whuz na'a nuhwhulh dune chah buk'eoohtsi.' 'Aw 'uyoo khunek higha nélh'a, 'i ndi nankoh 'o nus dezti, 'i hoolah." ³² 'Et ndun Moses bughunek 'uk'ununa'úsduguz, 'en Sizi 'uyúlhni, "Nehodulh'eh soo' denja! Khunek 'alha' 'int'ah, 'i be yailhtuk! Degha ndoh Moodihti 'en zeh Yak'usda unli, 'aw 'uyoon Yak'usda chaílah. ³³ 'Ink'ez dune budzi ndulhcho 'i be Yak'usda yuk'eootsi' huba' hoont'ah, budeni ts'iyawh 'i be, buzul be, bunut'uk ts'iyawh, 'ink'ez dich'oh k'enadutsi' chah, whuz na'a bulh dune hubuk'eootsi'. 'Et degha nus neba hooncha ndi nankoh khunek yugha nélh'a, 'i buk'úne' ts'ooot'en. Khunai 'ink'ez 'uyoo hoonliyaz Yak'usda bukw'uzdai k'ut Yak'usda bugha ídezk'un, 'i ba 'o nus whudezti." ³⁴ Sizi t'éoonanzin dalcho 'i be whunih k'una'a 'udéja 'et ndi yúlhni, "Aw 'et nilhdukw hoh Yak'usda k'úne' nyul'en tele." 'Et hukw'elh'az 'aw 'udun hukwa chahiyyoodílkulh hiyéntsaz 'et huwa.

Christ, en nts'e na'a David buts'u haínzut, et hukwa hiyoodulhkut

³⁵ 'Et Sizi, 'en Lizwif hubuluglez whucho dune hoodulh'eh hoh huboodulhkut, "Nts'e na'a ndunnah Moses be' dustl'us 'uk'ununa'úsduguz, 'Christ 'en David buts'u hainzut tele ho 'int'ah,' hutni? ³⁶ 'Et David, 'en Ndoni bugha 'et ndutni,

'Moodihti 'en suMoodihti 'uyúlhni njan nalhnih ts'ih sughu sinda.
Hoh t'eh sih nch'a húdetni, 'en buk'ut nke
naóolhyis mba hólhsilh.'

³⁷ David dich'oh, 'Sumoodihti,' yúlhni, 'et nts'e na'a Christ 'en David ts'ih haínzut wule?" 'Et nyoh dune, 'en huhóont'i hoh hidants'o.

Sizi dune ndo búlhni, "Ndunnah Moses be' dustl'us 'uk'ununa'úsduguz, 'en buch'a kháhdli"

³⁸ 'Et Sizi hubodulh'eh hoh 'et ndo búlhni, "Ndunnah Moses be' dustl'us 'uk'ununa'úsduguz, 'en buch'a kháhdli. Ndunnah 'e'óoket bakoo 'et dune tah hoh nahúdughun tl'asus nyez be húdelhts'i, 'ink'ez dune hubaoodelhti hukwa ne'hutdudul'en. ³⁹ Njan luglez ndet huntel'ilh, 'et 'utaháoodet'ah, 'ink'ez dune dahúlih teh, 'et chah k'us whudézti, 'et didut nátl'ahududaih. ⁴⁰ Tsandelh chah khábonut'ah, 'ink'ez bukoo huwa hahuwhút'ah. 'Ink'ez ncha ná'hadudil'i hoh sa cho tenahududli. 'En 'et hukw'elha 'o nus dzuh nahútezut ho' hint'ah."

Tsandelh sooneya huwa iné'ai

⁴¹ Lizwif hubuluglez whucho sooneya dekat, 'et Sizi usda, 'ink'ez hubunilh'en sooneya dehínudzaih. Lhanah soode'a 'uhint'ah, 'en sooneya lhai hoh dehínudzaih. ⁴² 'Et 'ilhunuh tsandelh tel'en, 'en 'oh wheghah uyallh, 'ink'ez nankoh sooneyayaz dénalhdel.† ⁴³ 'Et Sizi yugha hoodul'eh ts'un bé' buntelhúnik 'ink'ez ndo búlhni, "Nuhwhudúsni ndun tsandelh tel'en, ndunnah ts'iyawh huba nus lhai 'i denandzai ho' 'int'ah. ⁴⁴ Ndunnah 'uyoon, 'en ndai hiye soode'a 'int'ah, 'i 'un hakat, 'i 'uhiyulh'en dehínudzaih. 'Et ndun lhe'int'ah tel'en ndai 'aw 'i yít'i, 'i yuk'ekhutenalh, 'i whunts'ih ts'iyawh deyándzai."

13

Njan Lizwif hubuluglez whucho hoolah whutéleh, 'et Sizi huwu yailhtuk

¹ 'Et Sizi Lizwif hubuluglez whucho tinanja hoh 'ilhunuh yugha hoodul'eh ndi yúlhni, "Nehodilh'eh whunilh'en, njan luglez whucho 'ink'ez tse chah 'i lhe'íldzoo 'i be 'uhóolya." ² 'Et Sizi 'utni, "Njan koo whucho whuzdla whunulh'en ih? 'Aw lhuk'i tse 'i whunts'ih lhk'uchadutésdlal, 'i ts'iyawh nadúntejulh ho' hoont'ah."

Ndan Sizi Gri hinedulh, 'en hiye dzuh nutezut, 'i hubugha hubulh yátelhtuk

³ 'Aw 'et Lizwif hubuluglez whucho huwanch'az dzulhyaz Olive hiyúlhni, 'i k'ut, 'et Sizi usda. Peter, James, John, 'ink'ez Andrew chah, 'et dune hoolah, 'et Sizi hiyoodulhkut. ⁴ 'Et hiyúlhni, "Nedíni nket'ah 'uwhuténilh? 'Ink'ez ndet huwa t'ets'ontézin daóotenilh hoh 'et neóotels'ulh?" ⁵ 'Et Sizi ndo búlhni, "Huwuhli dune nanwhanoo'ah gunih. ⁶ Lhanah dune whusahútedulh 'ink'ez soozi bugha 'uhudutenilh, 'Christ 'ust'ah!' 'Et nduhútni hoh dune lhanah nahuntet'ah. ⁷ 'Et nuhgha ha'nóojoot gunih. Nilhdukw dune lhutedughan whulh 'uhuduzts'ai, 'ink'ez nilhdza lhuhudughan whulh 'uhuduzts'ai t'eh, 'et ndoh honeh huba' hoont'ah. 'Et whunts'ih 'awhuz whulatah ilah ho' hoont'ah, 'awhuz 'udun chah whusawhútekulh ho' hoont'ah. ⁸ Lhelhts'un keyah whut'en, 'en lhch'a nihúdutedulh, 'ink'ez lhelhts'un hubudayi cho hinane'ut'en 'en chah lhch'a nihúdutedulh. Nduhóolhcho yun chah natughet-nah, 'ink'ez dai chah whutéleh 'ink'ez nduhóolhcho hoh dune dzuh nul-huwhuteldeh. 'Et nduhút'en suli t'eh, t'ewhuntehzin 'o nus hooncha tune' whutet'en. 'Et dzuh nutehdeh k'an ho' whe'whudit'en. ⁹ Nuhwhenihch'oh chah huwahli. Keyah huwunli but nenóhwhutelleh 'ink'ez luglez koo 'et chah yanwhuts'utelht'oh. 'Et si sugha ndunnah moodih 'ink'ez hubudayi cho chah bubut ninhótelleh, khunek unzoo, 'i be hubulh yaoolhtuk ka. ¹⁰ 'Ink'ez 'udechoo ndi yun k'ut ndulhcho dune ts'iyawh khunek unzoo, 'i bugha hubulh yatetuk. ¹¹ Tsak'e nawhuhanla 'ink'ez naheyelh but nenóhnihilhi

† **12:42** Ndi sooneya deghanus chadíti, 'i 'int'ah.

t'eh, dája dutehnih, 'aw huwu ni wahle gunih 'ink'ez nuhdzi dóoghel. 'Et nióoninzut t'eh, 'ants'ih ndai nuhza dánkat, 'i be yaoolhtuk, Ndoni bughunek 'i be yatelhtuk. ¹² Dune, 'en dulhutsinkah dahútetsah huwa butelelh. 'Et hube'abákah 'en chah, bubuzkeh 'en ndúbotelh'ilh, 'ink'ez 'uski, 'en chah, hube'ama 'ink'ez hube'abá, 'en hubuch'a nahútel'ah 'ink'ez dahóotsah hukwa' hubutelih. ¹³ Si sugha sunehdulh huwa ts'iyannah nuhts'uh dútetnik. 'Et whunts'ih ndan 'udek'elh'az whuts'un whechahítsaz, 'aw 'en zeh hudutejih."

Degha nus whewhúnujut 'et

¹⁴ "Ndan degha nus be whunjut, 'aw buba cha'hóot'ah 'et siyin nulh'en t'eh, (ndi yuk'é yalhtuk soo cho nuwheni taóodoools'it. Daniel, Yak'usda be nus whúnillh'en, 'en 'uda húwu yailhtuk ínle). Judea hudelhts'i dzulhyaz k'uz ts'ih, whuz tsi hutoolhdelh. ¹⁵ Dune bukoo hukw'ut* usda t'eh, 'aw bukoo ts'ih nuchátesdal 'ink'ez ndai be'ildzun yutelelh, 'i 'aw nayólchoot gunih! ¹⁶ 'Ink'ez dune haníyeh k'et 'ut'en chah, 'aw bukoo ts'ih nayítsuz kunaóoda gunih. ¹⁷ Dahooolcho 'i be whéwhunujut tele, hoh t'eh ts'ekoo, 'úlchan 'int'ah t'eh, 'ink'ez buzkeh yé'ulht'ukw chah. ¹⁸ Njan dzuh nutehzut whuch'a ténaadoohdli 'et khi 'uhoneh whuch'a. ¹⁹ 'Et Yak'usda yun inla k'an dzin whuts'un 'aw cha'whúsne 'ink'ez 'aw 'et 'ulcho 'i be whutsuh da hiye dzuh nulháhulzut, 'i be dzuh natezut. ²⁰ 'Et whunts'ih neMoodihti lhat dzin hoh k'ah ná'hoonla. 'Et nduchaínil t'eh, 'aw 'ilhunuh whunts'ih doojih ghaít'ah. 'Et ndunnah 'utaháoobanla, 'en bugha' hoonla hoh t'eh hoondukw whutelhtsilh. ²¹ 'Et hoh t'eh dune ndunóhowhutni t'eh, 'Nulh'en njan Christ 'en njan usda!' K'us, 'Ngut usda!' nuhuwhútni t'eh, khun teh nuhwhuba 'alha' 'uhudooni gunih. ²² 'Et whunts'ih ndunnah Christ na'dudil'i, 'ink'ez nus whúnillh'en na'dudil'i chah, 'en Ihanah hitele hoh lhat teh huwa ne'ut'en 'ink'ez hooncha túne' hutet'en, ndunnah Yak'usda 'utuhaóobanla, 'en whunts'ih nabunoo'a hukwa' hutet'ilh. ²³ 'Ahoolhyez tsi hóohli! Ts'iyaintsuk whutsuh da 'un whudáni.

Yinkak dune ye' whusatéyah

²⁴ "Et hukw'elh'az dune dzuh nuhuzde t'eh,
sa 'i chah dulhgus tele,
'ink'ez 'ulh'ek ooza chah 'aw be chawhest'en tele.
²⁵ Sum chah natekulh 'ink'ez nduk yaz be hóolhtus,
'i be notughetnah.

²⁶ Hoh t'eh yinkak dune ye', 'en ndoh kw'us tah bé wheónonujut ye ulhtus, 'i bulh 'ink'ez Yak'usda buts'u hayánduz, 'i be ndoh be wheóoduteltsilh. ²⁷ 'Ink'ez bulizas 'en haóobutelh'alh, ndus de, n'az de, niz de, 'ink'ez ndaz de, 'ink'ez ndi yun k'ut 'ink'ez yaz chah ndulhcho hoh Yak'usda ndunnah 'utaháoobanla 'en 'ilhohubutughélelh 'et wheni."

Mai chun, fig hiyulhni, bumai 'i be bugha whúts'odul'eh

²⁸ "Ndi mai, fig hiyulhni, buduchun, 'i be buk'unats'uwfulnuk be whuts'odul'eh, 'i soot'sah'un boodulhú'eh. Ndi 'i 'int'ah, buzooschum delghih t'eh, 'aw 'et but'an whulhlhih, 'i bugha t'eoónáhzun 'aw 'et shen nilhdukw suli. ²⁹ 'Et ndez na'a ndun whudúsni, ndet whusawhét'en whutélh'en t'eh, 'et sih whuz na'a zeh t'eoónóhzin 'aw 'et nilhdukw ho' whe'oodutet'ilh. ³⁰ 'Alha ts'ah'un na'a 'un whudusni, k'an ndoh whudezulh 'aw yachahútesdla, 'et njan ndó tenilh, ts'iyawh 'et lhawhúdutenilh, 'et whuts'un. ³¹ Yaz 'ink'ez ndi yun k'ut 'i chah hoolah whutele. 'Et whunts'ih ndi sughunek 'aw hoolah chatesdle."

* **13:15** Lhat Lizwif hubukoo, 'et bun k'ut lhk'eoodez'a.

'Aw dune nt'eoónízun ndet dzin 'ink'ez nts'oh huwa whudezulh hoh 'uwhuténih

³² "Aw dune t'eoónízun ndet dzin k'us nts'oh huwa 'uhunet'oh 'et whusawhútelts'ulh. 'Aw lizas yak'uz hudelhts'i, 'ink'es Yak'usda buYe' whunts'i 'aw t'ehonízun, se'aBá dich'oh zeh t'eoónízun. ³³ 'Ahoolhyez huwahli 'ink'ez tenadahdli. 'Aw nt'eoónuzáhzun nts'oh t'eh whusawhútelts'ulh. ³⁴ 'Et ndez na'a 'uwhutenilh, 'ilhunuh dune bukoo huwu tezya 'ink'ez hiba 'ut'en 'en 'et nibuninla 'ilho hinli hoh dude 'ut'en 'uhoolh'en ka, 'ink'ez 'et ndati huwunli ndi yúlhni, 'Soo cho huwonle!' ³⁵ 'Et whuz na'a nuhwhudúsni, huwahli! 'Et nts'oh teh bukoo humoodih whusanatedalh 'aw nt'eoónuzáhzun, hulgħha tulih, tuzniz tulih, yilkaz tulih, k'us sa haí'ai t'eh tulih. ³⁶ 'Et huwa 'ahoolhyez lhadáht'ah. 'Aw hukwa tsi chawhahlih 'ink'ez nanehtez t'eh, nuhche tulih nuhwhumoodih nuhghun naoja. ³⁷ 'Et daja nuhwhudúsni, 'et ts'iyanah chah ndo budúsni, huwahli!"

14

Sizi whu'izyaz hikunuta hituzelhghelh ka

¹ 'Awhuz nat dzin whuz'ai Lizwif Hubutus Lhuseya* whewhúnahulnih 'ink'ez lhes chantulhúdoh, 'i ts'uyi, whewhúnahulnih chah, 'et náwhulnuk moodih 'ink'ez Moses be' dustl'us 'uk'ununa'úsduguz, Sizi whu'izyaz hikunúta hituzelhghelh ka. ² 'Et 'uhutni, "Njan butus lhuseya, 'et whutah ilah 'uts'ooleh, dune lhtahohót'ah 'et whuch'a."

Bethany 'et ts'eke Sizi k'unuts'újul yutsi k'eyíhdze

³ Ilhunuh keyah wheyaz Bethany huwhúttni, 'et Simon buka whulhjut ínle, leprosy hiyúlhni, bukoo 'en Sizi yuzih 'usda. 'Et na'ut'ah hoh ts'eke k'unuts'újul dezti, 'i tse be ídezbun, 'ink'ez 'i be buda' deldze ye'ah hoh danínya. Ndi 'i lhts'eyalhkut 'ink'ez k'unuts'újul 'i Sizi yutsi k'eyíhdze. ⁴ Bulunah dune hukwa huních'e 'ink'ez ndulhóhudutni, "Et di ka ndi k'unuts'újul 'ants'i 'et tinta' yulh'ih. ⁵ Dezti hoh bé' ts'onket t'eh† 'ink'ez da sooneya tehel'en hubugha ts'ínozdzhah," hutni, 'ink'ez koo ts'ih ts'eke tube cho hich'a yálhtuk. ⁶ 'Et Sizi ndo búlhni, "Buts'áhachaozah'ak! Di ka tedulhlih? 'Ut'en unzoo, 'i suba inla ho' 'int'ah. ⁷ Ahoolhyez tehel'en nuhwhunat whutéle. Ndet hukwá' nahzun t'eh, hubula 'ooht'en. 'Et si 'ahoolhyez huba nuhwhúbulh cha'tuzest'il ho' hoont'ah. ⁸ K'unuts'újul, 'i suyust'e yuk'eyíhdze 'adutes'ah wheni lhasúdinla. Ndun ts'eke 'aw 'o 'un 'ooneh għaít'ah, 'et 'uhóonla ho' 'int'ah. ⁹ 'Alha' 'un whudusni, ndi yun k'ut ndulhcho hoh ndi khunek unzoo, 'i nudutekat, ndun ts'eke ndet 'uhoonla, 'et hukw'u naoitetnuk, 'et hoh dune yunatelnih."

Judas, 'en Siziye óotekulh hukwa' ninzun

¹⁰ Lanezi 'o 'at nanah yugha hoodul'eh, 'ilhunuh Judas Iscariot hiyúlhni, 'en Lizwif bunáwhulnuk bumoodih buts'un whinya Sizi hubutl'aítelhtelh ka.

¹¹ Dája ndo búlhni huhóont'i 'ink'ez sooneya hits'óozi. 'Et Judas, 'en Sizi ye 'óotekulh, 'et hukwa hités'en.

Sizi 'en yugha hoodul'eh butus lhuséya whunahutelnih, 'et hubulh na'ut'ah

¹² 'Et 'udechoo dzin lhes chantídoh, 'i nahiyut'ah, 'et dzin sheepyaz na'hitet'ah, 'i naihizulhghih, ndi sheepyaz Lizwif Hubutus Lhuséya huba 'int'ah. 'Et Sizi yugha hoodul'eh 'uhiyúlhni, "Nts'e netalh'ah ndi na'tant'ulh, 'i mba lházdutelih?" ¹³ 'Et Sizi nanah, 'en wheóobalh'a 'ink'ez ndo búlhni,

* ^{14:1} Nawhudezulh totsuk 'ilhohuwudulh 'ink'ez ndi sheep k'us unzoo 'i nahiyut'ah. Njan whunahulnih 'oh da Yak'usda yun k'ut Egypt whuch'a hanaóbanla da. † ^{14:5} Tehul'en ba 'ilhuh yus k'ut yuk'elhla 'et'en, 'et 'uneltsuk.

"Jerusalem ts'ih ah'us 'ink'ez dune too nulhtun, 'en sih nuhdudóoya. Nts'e bukoo tezya whuz bun tooh'as, ¹⁴ 'ink'ez bukoo be'ildzun njan dudoohtni, 'Dune hoodulh'eh njan ndutni ndet sugha hoodul'eh bulh Hubutus Lhuséya huwa na'uztet'alh bukoo negho télh'ah ih?' ¹⁵ 'Et nduk hukw'uz hooncha lhaóodint'ah whunwhunoolhtun, 'et na'uztet'alh, 'i lhádoohleh.' ¹⁶ 'Aw 'et yugha hoodul'eh Jerusalem ts'ih whehá'az 'ink'ez Sizi soo daja ndo búlhni, ts'iyawh whuz na'a nahuhóo'ai 'ink'ez Hubutus Lhuséya wheni lhahodinla. ¹⁷ 'Et hulgħha 'aw 'et Sizi, ndunnah lanezi 'o 'at nanah bulh, 'en whusahádel. ¹⁸ 'Et na'hut'alh hoh Sizi ndo búlhni, "Et njan ndun whudusni 'ilhunuh nuhtah sulh ná'ut'alh, 'en se'óotekulh." ¹⁹ 'Et yugha hoodul'eh hubudzi únduda hoh 'ilhunuh hinli hoh hiyoodulhkut, "Si ih 'usudíni," hiyúlhni. 'Et 'uyoon chah ndutni, "Si ih 'usudíni?" ²⁰ 'Et Sizi ndo búlhni, "Et lanezi 'o 'at nanah njan netah ndan bules sulh toonayuz'ai, 'en 'utenilh. ²¹ Ndi Yak'usda bughunek 'uk'une'úzguz, 'i 'et ndutni, 'Yinkak dune ye', 'en datetsah. 'Et ndun ye 'ónket, 'en dalcho 'i be buba wheónujut tele.' Ndun dune 'aw chahóolel t'eh, 'et da 'o nus soo' hot'e wule da."

Sizi 'udek'elh'az na'ut'alh

²² 'Et na'hut'alh hoh Sizi lhes yílhchoot yuba tenadedli 'ink'ez taídalhkut. 'Et yugha hoodul'eh hubugha íninal 'ink'ez ndo búlhni, "Ndi ulhchoot, 'ink'ez ah'ah. Ndi suyust'e 'int'ah." ²³ 'Et lubot yílhchoot, 'ink'ez be'aBá "Schanailya," yúlhni. Hubutl'ayankai 'ink'ez ts'iyawh hiyetnai. ²⁴ 'Ink'ez ndo búlhni, "Ndi 'i suzkai 'int'ah. Lhanah huba nadútelt'ih 'ink'ez ndi k'andit khunek 'i suzkai be nuhts'u nahuzíya. ²⁵ 'Et 'alha' 'un whudusni, ndi mai too 'aw doo chah zeh naóosnai għait'ah. Ndet dzin ts'iyannah Yak'usda buk'úne' hutet'en 'et whuts'un, 'et ndet t'eh, ndi mai too k'an natesnai." ²⁶ 'Et Yak'usda buyun be hújun 'ink'ez ndoh dzulhyaz k'uz Olive be hóodzi whuz whehandel.

Sizi, 'en Peter 'uyúlhni, "T'esunuzínzun dutanilh"

²⁷ 'Ink'ez Sizi ndo búlhni, "K'an 'ulh'ek nuhwheni ts'iyawh sukayátehle, 'ink'ez si sugha tintuz telhúwus, ndi Yak'usda bughunek ndutni, "Et huwa Yak'usda 'en sheep għunli yutzelhghelh 'ink'ez ndi sheep ts'iyawh lhtatelwus."

²⁸ 'Et dinadusja hukw'elh'az t'eh, 'et yun k'ut Galilee ts'ih nuhtsuu tesyalh." ²⁹ Peter ndi yúlhni, "Ts'iyannah nkaya tele, 'et whunts'ih 'aw si ilah!" ³⁰ 'Et Sizi ndi yúlhni, "Peter, njan whunaoollnih, k'an 'ulh'ek ligok dune nat 'uduténih whutsuh, tat 'et 'T'esunuzínzun,' dutanilh." ³¹ 'Et Peter soo khunek ulhtus, 'i be ndutni, "Nyulh datésah 'et whunts'ih 'aw t'enyunuzúszun doosni għait'ah." 'Onghunnah yugha hoodul'eh chah ts'iyawh whuz na'a nduhútni.

Sizi, 'en Gethsemane 'et tenadedli

³² 'Et 'ilhunuh haníyeh k'et Gethsemane huwhútni ts'ih whehádel 'ink'ez Sizi yugha hoodul'eh ndo búlhni, "Njan delhúts'i. Si nye'un tenadutesdli."

³³ 'Et Peter, James 'ink'ez John teh 'o 'un hubulh when'az. 'Aw 'et buyust'e 'i be tso be teni'nelhts'it 'i buk'edilts'ut, ³⁴ 'ink'ez ndo búlhni, "Suzul tube tso suli, 'aw 'et datesah 'et suts'un whelts'ulh ho' hoont'ah. Njan delhúts'i 'ink'ez howohle." ³⁵ 'Et 'o 'unyaz nenínya 'ink'ez nachanétno. 'Et tenadedli hoh ndutni, njan huba whusawħutels'ulh, 'et whuz na'a sengħoholts'it t'eh 'et ndoh honeh. ³⁶ 'Ink'ez ndi yúlhni, "Abba, 'aBá, nyun zeh ts'iyaintsuk nk'úne' whut'en. Ndi be dzuh nuteszut suba hoolah nahoolhtsi, 'et whunts'ih si hukwa' nuszun ilah, nyun hukwa' ninzun hukw'u na'a 'et ndoh honeh."

³⁷ 'Et ndunnah tanah yugha hoodul'eh nahunéstez hoh bughu nanja 'ink'ez Peter 'uyúlhni, "Simon nanenti hoh ih 'unint'ah? 'Aw ih 'astliyaz whunts'i honih għait'ah?" ³⁸ 'Ink'ez ndo búlhni, "Howahli tink'us nteht'uk whuch'a

tenadooohdli. Nuhyéghah be tehzoo hukwa' nahzun, 'et whunts'ih nuhyust'e latet'ah ho' 'int'ah." ³⁹ 'Et doo chah 'o 'un whenaja 'ink'ez whutsuh da tenadedli whuz na'a zeh tenadedli. ⁴⁰ Doo chah zeh yugha hoodul'eh, 'en nahunéstez hoh bughu nanja 'aw huhoonih ghaít'ah 'ink'ez 'aw whé' hidooni hooyah. ⁴¹ Whulh tat bughu nanja 'et ndo búlhni, "Whute sahtez 'ink'ez nalhúyis. 'Aw 'et whusawhélt'sut, soo cho whunulh'en, yinkak dune ye', 'en dune ntsi' butl'ahítelheli. ⁴² Dinadahdelh! 'Uztoodelh! Nulh'en ndun dune se'óotekulh, 'aw 'et nyoh hiyalh."

Sizi 'aw 'et hiyilhchoot

⁴³ 'Et 'awhuz Sizi yalhtuk hoh Judas 'en whusaínya. Ndun Judas 'en lanezi 'o 'at nanah whel'a 'en, 'ilhunuh 'int'ah. Dzuh sa inle Lizwif náwhulnuk bumoodih, Moses be' dustl'us 'uk'ununa'úsduguz, 'ink'ez dune tsuh whudelhdzulh chah, 'uda buts'un nuséya, 'ink'ez Sizi ye búts'e'onket. 'En Judas buts'un whenáhiyah'a, 'ink'ez dune lhanah yulh údulh soh cho chah 'ink'ez tuz chah hiyellelh hoh whusahándel. ⁴⁴ Hédulh hoh Judas ndo búlhni, "Ilhunuh dune bunenk'us k'ut nadests'ooz, 'en wahgooh 'ink'ez bugha 'óohli hoh tóolhte!" ⁴⁵ 'Et huwa Judas Sizi yugha ninja ibulh ndi yulhni, "Dahooja, Rabbi," 'ink'ez naindunants'ooz. ⁴⁶ 'Aw 'et Sizi hiyilhchoot 'ink'ez duts'o cho hiyoontun. ⁴⁷ 'Et whunts'ih 'ilhunuh Sizi zih siyin soh cho hayálhtsus 'ink'ez Lizwif náwhulnuk degha nus dezti be 'ulhna, 'en yudzo k'uz habe'yalht'o. ⁴⁸ 'Et Sizi ndo búlhni, "Et di ka soh cho 'ink'ez tuz chah nahle 'ink'ez 'undunust'ih hukw'u na'a skaootéhdel? ⁴⁹ Dzin totsuk nuhwhubulh 'úst'ah 'ink'ez luglez whucho whunwhudulh'eh, 'et di ka hoh da chasulhchulh inle. 'Et whunts'ih Yak'usda bughunek dája ni whuz na'a 'uhóneh huba' hoont'ah." ⁵⁰ 'Et ts'iyawh yugha hoodul'eh hich'a sudel 'ink'ez tinta hulghaz. ⁵¹ 'Ilhunuh chilh naih ts'ut'on, 'i zeh khaíwesdúduz, 'en Sizi yuneyalh. Ndun chilh 'en 'uyoon chilhkah hiyoolhchoot. ⁵² 'Ust'et whelgai hoh naih zeh hubula k'éyano.

Sizi ndunnah naheyelh 'en hibut nihínilhya

⁵³ 'Et Sizi hiyilhchoot 'ink'ez Lizwif náwhulnuk degha nus dezti bukoo ts'ih whehíyalhti. 'Et Lizwif náwhulnuk bumoodih, dune tsuh whudelhdzulh, Moses be' dustl'us 'uk'ununa'úsduguz chah 'ilhuhowezdel. ⁵⁴ Peter ye niz de hubuneyalh. Lizwif náwhulnuk degha nus dezti bukoo 'et whuna'nesdutl'oo, whuz bughu danínya. 'Et howuhinli buzih natl'adeda 'ink'ez na'dunildzilh. ⁵⁵ Lizwif náwhulnuk bumoodih 'ink'ez naheyilh chah 'en hibut Sizi nihínilhti hituzelhghelh hukwa highu nahó'ah hukwa' hut'en, dune yuch'a yaoolhtuk nahóolhtelh hukwa' hut'en, 'et whunts'ih 'aw 'ilhunuh nachahilhtel. ⁵⁶ Lhanah dune huwhuts'it hoh hich'a yaíltuk, 'et whunts'ih ts'iyawh lhelhts'un na'a 'uhutni. ⁵⁷ Bulunah dune dihudíndel 'ink'ez Sizi hiba whuts'it hoh njan nduhútni, ⁵⁸ "Njan ndutni hoh nenalh 'útni, 'Njan luglez whucho dune 'uhóonla, 'et nanaóoduntesyus. 'Et hukw'elh'az tat dzin inle t'eh, 'aw dune bula be nacha'hoolil hoh 'udun na'whutesdlilh." ⁵⁹ 'Et whunts'ih 'aw ts'ah'un lhgha 'úhudooni ghaít'ah. ⁶⁰ 'Et Lizwif bunáwhulnuk degha nus dezti hubutah didinya 'ink'ez Sizi 'uyúlhni, "Ndunnah dune nch'a yahúlhtuk daja dutenilh?" ⁶¹ 'Et whunts'ih Sizi t'edusnih 'ink'ez 'aw yachatílkth. 'Et doo chah náwhulnuk yoodulhkut, "Ny whole Christ 'int'ah? Yak'usda dezti buYe' inli ih?" ⁶² Sizi 'et ndi yúlhni, "A, 'en 'ust'ah, 'ink'ez nuhwheni ts'iyawh yinkak dune ye', hiyuntelh'ilh Yak'usda bugha nalhnih ts'ih sida hoh ndus de kw'us tah hanátedalh." ⁶³ 'Et ndun náwhulnuk tube hunílch'e k'et dunaih lhts'e yalhch'ul 'ink'ez njan ndutni, "Aw 'o 'un 'uyoon ts'oodolhkut ghaít'ah. ⁶⁴ Ndi bughunek Yak'usda yech'a yaílduk, 'i dahts'o! Nuhwhuba dáhoont'ah?" 'Et ts'iyawh 'úhutni, "Daóotsah huba' hoont'ah." ⁶⁵ 'Et bulunah highá whenduninzoh,

hina ka'dalh'oo 'ink'ez hiyoonukat cha' hiyulh'en 'ink'ez, "Ndan nyunézkuk?" hiyúlhni. 'Et ndunnah dune għunli hiyílhchoot 'ink'ez 'en chah hiyoonankat.

Peter 'utni, "Sizi 'aw t'enuzúszun."

⁶⁶ 'Et Peter 'onghoh nanestl'oo bet 'ut'en hoh Lizwif bunáwhulnuk degħha nus dezti ts'ekeyaz yuba 'ut'en 'ut'en, 'en wheghah úyalh. ⁶⁷ Peter na'dunildzilh yutelh'en 'ink'ez ndi yúlhni, "Nyun chah Sizi Nazareth whut'en bulh 'int'en inle." ⁶⁸ 'Et Peter 'utni, "Aw t'éoonuzúszun ndet 'uwhudini," 'ink'ez 'az whenya. Soo 'aw 'et liggok dune 'udéja. ⁶⁹ 'Et ts'ekeyaz njan 'et ya'en ndunnah hoh nuhudelhúya chah 'et ndo búlhni, "Ndunnah 'en chah 'ilhunuh 'int'ah." ⁷⁰ 'Et whunts'ih Peter doo chah, "Awundooh!" ni. 'Et 'astl'iayz inle ndunnah hoh nahudelhúya, 'en chah Peter 'et ndi híyulhni, "Alha nyun chah 'ilhunuh 'unint'ah. Nyun chah Galilee hoont'en 'unint'ah, whuz na'a yailhtuk 'et huwa." ⁷¹ 'Et Peter 'utni, "Ndukni bunalh, 'alha' dusni ho' dusni, ndun dune 'udáhni, 'aw nt'enuzuszun!" ⁷² 'Et ligok dune whulh nat 'udeja. 'Et Peter Sizi dája yulhni whunalnik, "Ligok dune nat 'uduténih whutsuh, 'et tat t'esunuzínzun dutenilh." 'Et huwun ni ninzut 'ink'ez intse.

15

Sizi Pilate yubut nenínya

¹ 'Et bundada 'uda Lizwif náwhulnuk moodih, dune tsuh whudelhdzulh, Moses be' dustl'us 'uk'ununa'ús duguz, 'ink'ez dune ba naheyilh chah, ts'iyawh yahalhtuk. 'Et Sizi hiyulgħel 'ink'ez Pilate t'ahíyalhti. ² 'Et Pilate ndi yúlhni, "Nyun ih Lizwif hubidayi cho inli?" 'Et Sizi 'utni, "Alha' dini ho' dini." ³ Lizwif náwhulnuk moodih lhat Sizi hich'a yalhtuk, 'ink'ez hiba honts'it, 'et whunts'ih Sizi t'edusnih. ⁴ 'Et Pilate doo chah Sizi yoodulhkut, "Daóoneltsuk nk'ehuhóo'ai, 'et hubugha 'aw ih dája chadutuzanil?" ⁵ 'Et doo chah Sizi 'aw yachatílħtih. 'Et Pilate buba hooncha.

Pilate Sizi datétsah whuts'uyúlh'a

⁶ Naoodezulħ totsuk Lizwif butus lhuséya whunahulnī, 'et 'ilhunuh dune tsak'esda Lizwif 'utahahíyulħtih, 'en Pilate yula nadutnih. ⁷ 'Et hoh da ndunnah lhtahuwhunt'ai da dune lhutughan ts'iyawh tsak'ebahanla. Barabbas 'en chah hubutah tsak'esda dune selħghi hukwa. ⁸ Ts'iyannah 'ilhuhowezdel 'ink'ez Pilate 'uhiyúlhni, "Nawħudezulħ totsuk 'ilhunuh dune tsak'esda 'en bulanadantnik. Doo chah 'et ndoneh." ⁹ 'Et ndo búlhni, "Lizwif hubidayi cho, 'en ih bulanadutesnih hukwa' nahzun?" ¹⁰ Dich'oh soo t'eoónínzun Lizwif náwhulnuk bumoodih 'oonih bugħa Sizi hitl'ahíyalhti 'et huwa. ¹¹ 'Et whunts'ih Lizwif náwhulnuk bumoodih dune huba nus hódelhti, Barabbas 'en Pilate yulanadootnih hidóoni ka. ¹² 'Et Pilate doo chah dune 'ilhuhowezdel ndo búlhni, "Ndun Lizwif hubidayi cho dájni datésdilh hukwa' nahzun?" ¹³ 'Et tube cho 'uhiyúlhni, "Lhdulalhgus yundunilht'ah!" ¹⁴ 'Et Pilate ndo búlhni, "Ndet hoh tink'us 'úja?" 'Et whunts'ih 'o nus 'uhutni, "Lhdulalhgus yundunilht'ah!" hutni. ¹⁵ 'Et 'ilhuhowezdel 'en huhót'i ka Barabbas 'en Pilate huba yulanadetnik. 'Et Sizi yahiyalhtsus, 'ink'ez lhdulalhgus k'ehíyoolħtelh ka butl'ayálhti.

Nehughan Sizi highu nolħúya

¹⁶ 'Et nehughan moodih* bukoo whuna'nesdutl'oo, 'i tuz ts'ih Sizi dahínħilhti 'ink'ez 'ongħoh nehughan ts'iyawh buka' hudáni. ¹⁷ Naiyits'uz dulk'un, 'i Sizi higha híwezdzu. Whus nahínħelwut, 'i hitsi nihida'ai. ¹⁸ 'Et hidélhti la-hooħóolħ'i, 'ink'ez 'uhiyúlhni, "Lizwif hubidayi cho sa cho khona." ¹⁹ Duchun

* **15:16** Ndun moodih Pilate 'int'ah.

be hitsi ts'e' nalht'o, highá dizoh, hibut dugwútsi be nihúdulh, 'ink'ez hibut nachánuldulh cha' hiyulh'en. ²⁰ Sizi highu núwhulhyá 'ustl'e' 'uhiyínlá hukw'elh'az nayits'uz dulk'un, 'i highu nahiyilchoot, 'ink'ez dich'oh bunaih be nahiyalhti. 'Aw 'et lhdulalhgus k'ehíteltelh ts'ih hítelhti.

Sizi lhdulalhgus k'ehiyilhti

²¹ 'Et hedulh hoh 'ilhunuh dune, Simon hiyúlhni, Jerusalem ts'ih tezya. 'En hidudezdel 'ink'ez Sizi bulhdulalhgus yuba idutetilh ka, 'et nihínenyoot, ndun Simon, 'en Cyrene whut'en, 'en Alexander 'ink'ez Rufus 'en hube'abá 'int'ah.

²² 'Et Sizi Golgotha huwhútni ts'ih lhgha hídilhti. Ndi Golgotha 'utsints'un nez'ai hutni ho' hutni. ²³ 'Et mai too 'ink'ez yoo, myrrh hiyúlhni, hitaídenla, 'i Sizi hiyíhiyoohlhnai hukwa' hiyínlá, 'et whunts'ih 'aw chaitítnil. ²⁴ 'Et lhdulalhgus k'ehúyilhti 'ink'ez bunaih 'i higha 'aínlih hoh lhtahiyulya. ²⁵ Bundada 9:00 'uhunet'oh bat'en Sizi lhdulalhgus k'ehiyilhti. ²⁶ Ndet hukwa' hiyínlá hutni, 'et 'uk'e'hanguz, 'i higha ndoh huwuhidi'ai. Ndi khunek hík'e'anguz, 'i ndutni,

Lizwif hubudayi cho, ni.

²⁷ Nanah 'uhundunut'ih chah hiyulh lhdulalhgus k'ebuhilhti, 'ilhunuh bugha naílhni ts'ih 'ink'ez 'ilhunuh bughe 'intl'as ts'ih. ²⁸ 'Uda Yak'usda bughunek 'uk'une'úsduguz, 'i whuz na'a 'uhóoja ndutni hoh, "Dune ntsi' dult'ah huninzun." ²⁹ Dune whúghha hoh nahúdelh nohóndunul'us 'ink'ez Sizi highudloh, "Lhoonk'a! Nyun lah 'udini, 'Luglez whucho yanawhut-duntanyus 'ink'ez tat dzin na'whutanlilh,' dini? ³⁰ K'an 'ahoh nanaíndaih, 'ink'ez 'ududílyih," hiyúlhni. ³¹ Whuz na'a Lizwif náwhulnuk bumoodih 'ink'ez Moses be' dustl'us 'uk'ununa'úsduguz, 'en chah, Sizi highudloh 'ink'ez njan ndulhódutni, "Uyoon úlhyis, 'et whunts'ih dich'oh k'an 'ududoolyih ghaít'ah.

³² K'an Christ, Lizwif hubudayi cho ts'unoolh'en nanaóoja, 'et neba 'alha' 'oot'e." 'Et ndunnah nanah hizih lhdulalhgus k'ut sulhti, 'en chah highudloh.

Sizi dazsai

³³ Dzeteniz 'et 'o 'un 3:00 bat'en 'uhúnet'oh keyah nduhoohcho hoh tsahólhgus whuzdli. ³⁴ Whulh skwunlai 'o 'at dit (9) hukw'e' hunit'o, 'et Sizi soo tube cho haínzul, bughunek k'una'a 'utni, "Eloi, Eloi, lama sabachthani," "SuYak'usda, suYak'usda, di ka suladanrik?" ni hoh 'utni. ³⁵ 'Et bulunah dune 'et nahudelhúya hoh hídants'o, 'ink'ez 'uhutni, "Nulh'en! Ndun Elijah yuka hahuyih." ³⁶ Ilhunuh whusálgai, 'ink'ez duchun bulá'del'oo, 'i mai too dunink'ooz, 'i ye tóonayuzsi, 'ink'ez nduk Sizi yuza bé' yunantan, 'ink'ez 'utni, "Kw'azi'ez! Elijah tusih whusatéyah 'ink'ez lhdulalhgus k'ut nanaíteltelh." ³⁷ 'Et Sizi tube cho haínzul 'ink'ez dek'elh'az hanáji. ³⁸ Lizwif hubuluglez whucho njan dadelhchooz, 'i bugha nduk 'ink'ez butl'az ts'ih lhts'ench'ul. ³⁹ Nehughan moodih lhdulalhgus yubut siyin. Sizi nts'e na'a haínzul 'ink'ez dazsai 'et yunah'en. "Ndun dune 'alha hoh Yak'usda buYe' unli," ni. ⁴⁰ Ts'ekoo chah 'et nudelhúya yoo 'az de ts'un honilh'en. Butah Mary Magdala whut'en, 'ink'ez Mary Jamesyaz, 'ink'ez Joses bulh be'ama, 'ink'ez Salome chah. ⁴¹ 'En Sizi Galilee 'et 'ut'en hoh hiyununézdel 'ink'ez hila 'ét'en. Uyoon ts'ekoo lhanah chah 'et 'uhut'en. 'En Jerusalem ts'ih hahínandel.

Joseph, 'en Sizi whuyíhiyalhti

⁴²⁻⁴³ 'Aw 'et hulgħha ts'óteżut hoh Joseph, 'en Arimathea whut'en whusaínya. 'En nahéyelh tah boozi unzoo 'int'ah. 'En, Yak'usda buk'úne' whut'en, 'et hukwa ités'en. 'Et dzin nats'ulyis dzin huba lhahúdutneh 'úhoont'ah. Joseph soo budzi ulhtus 'udulhútsi hoh Pilate yubut ninínya, 'ink'ez Sizi buyust'e yuts'un ka' dani. ⁴⁴ 'Et Pilate buba hooncha Sizi 'uda dazsai. Nehughan moodih, 'en yuka' dani 'ink'ez ndi yúlhni, "Sizi 'uda tulih

dazsai?" ⁴⁵ 'Et hukw'elh'az nehughan moodih, "Alha' dazsai," ni. 'Et Pilate, 'en Joseph 'uyúlhni, "Sizi buyust'e nailchoot." ⁴⁶ Joseph naih dezti, 'i yonket, 'ink'ez buyust'e nanáyalhti, 'ink'ez ndi naih dezti, 'i yughá iwezduz. 'Et tse 'an whuz wheyíyalhti, 'ink'ez tse cho whudunaíndunelhmul. ⁴⁷ Mary Magdala whut'en, 'ink'ez Mary, 'en Joses be'ama bulh 'en bunalh, Sizi 'et nihínilhti.

16

Sizi dinadija

¹ Lizwif nahulyis dzin hukw'elh'az hulgħha ts'ih Mary Magdala Whut'en, 'ink'ez Salome, 'ink'ez Mary James be'ama chah, yoo sooltsun, 'i hiyónket, Sizi buyust'e hiye hítelho huba. ² Bundada 'uda hukw'enilhghel 'et 'udechoo dzin, 'et sa haín'ai hoh, ts'un k'uz hutezdel. ³ Whuz hedulh hoh 'ulhódotni, "Tse cho ts'un k'ut whudándune'ai, 'i ndan simba neba 'udun nindunoolhmelh?" ⁴ Tse 'uda 'udun nindunelmul hoh hotelh'en. Tse tube nduninch. ⁵ 'Et tse 'an 'uhandel hoh chilh lheyul, 'i be dune unli, 'en naílnih ts'ih 'usda hoh hitelh'en. 'Et hubugha tube huba hooncha hoh hunelhújoot. ⁶ 'Et ndo búlhni, "Nulhújut ilah! T'eoónúszun Sizi Nazareth whut'en, lhdulalhagus k'ehíyilhti, 'en bukunáhta hoh 'aht'en. 'Aw hoolah! Dinadija ho' 'int'ah! Njan whunulh'en ilhte 'et. ⁷ 'Aw 'et nahdulh, Peter 'ink'ez 'onghunnah Sizi yugha hoodul'eh, 'en ndo hubudóohni, Sizi dája nuwhúlhni da, nuhtsuh Galilee ts'ih téyah 'et sih wah'en." ⁸ 'Aw 'et tse 'an tínahalghaz 'ink'ez nahutelhúghaz tube hubughá ha'nejoot 'ink'ez 'aw dune nduchahudinil, hunelhújoot 'et huwa.

Sizi Mary Magdala whut'en yunalhts'et hainya

⁹ 'Et Sizi dinadija hukw'elh'az, Lizwif nahulyis dzin bundada 'uda 'et Sizi 'udechoo Mary Magdala whut'en, 'en choo yunalhts'et hainya. 'En skwunlai 'o 'at nankoh (7) ntsi' nudúdeh, 'i ye yáhanainanyoot ínle. ¹⁰ Sizi yulh 'út'en inle hík'enudle, 'ink'ez hutso hoh hubugħu ninya 'ink'ez ndo budáni, ¹¹ Sizi khuna hoh ya'en, 'et whunts'ih 'aw huba 'alha' cha'dusnih.

Sizi nanah yugha hoodul'eh hubunalhts'et hainya

¹² 'Et hukw'elh'az Sizi 'uts'un na'a be hóodet'en, nanah 'uts'un keyah ts'ih he'us hoh hubunalhts'et hainya. ¹³ Hoh wheha'az, 'onghunnah hubulh náwhuhulnuk 'aw huba 'alha' cha'hudusnih.

Sizi lanezi 'o 'at 'ilhunuh hubunalhts'et hainya

¹⁴ 'Et hukw'elh'az Sizi yugha hoodul'eh lanezi 'o 'at 'ilhunuh (11) na'hut'ahl hoh hubunalhts'et hainya. 'Et 'aw be 'alha' hoont'ah, 'i chahít'ih 'ink'ez 'uts'un 'uhuninzun. 'Et huwa ndunnah hiya'en 'aw huba 'alha' cha'hudusnih, 'et Sizi hukwa' hubudáni, ¹⁵ 'ink'ez ndo búlhni, "Yinkak ndulhcho hoh náhdelh, 'ink'ez khunek unzoo, 'i ts'iyawh yinkak dune wheóobunulhtun. ¹⁶ Ndan huba 'alha' hoont'ah, 'ink'ez too be 'úlya t'eh, 'en dutejih. Ndan huba 'alha' cha'hoot'ah, 'en hoontsi' hukw'u na'a huba ne'whutet'ilh. ¹⁷ Ndunnah huba 'alha' 'ust'ah, 'en be úlhtus hubugħa ootés'ah. Si soozie bugħa ntsi' nududeh, 'i dune ts'uh hanáhiyunteyulh. K'an khunek 'i cha be yahutelhtuk. ¹⁸ Tl'ughus ntsi' hiyílhchoot, k'us poison hétnai t'eh, 'et whunts'ih 'aw dachahutesnil. 'Ink'ez hunduda butsi k'ehudilnih, 'en chah soo ná'hutetnilh."

Sizi yak'uz whenaja

¹⁹ 'Et hukw'elh'az 'et Sizi neMoodihti dune hubulh yálhtuk 'ustl'e' 'udéja hoh, 'et yak'uz whenája 'ink'ez Yak'usda bugħa nálhnihs ts'ih nátl'adeda. ²⁰ Yugħa hoodul'eh 'en ndulhcho nahúdelh, 'ink'ez ndi khunek unzoo 'i be dune bulħ yahúlhtuk. 'Et neMoodihti hubulh 'út'en 'ink'ez be úlhtus, 'i hubutl'aida'ai, 'et huwa bugħunek be yahulhtuk, 'alha' hutni ho' hutni. 'Et ndoh honeh.

Yak'usda Bughunek Unzoo 'I Luke Yuk'uné'uzguz

Luke ndi dustl'us ndun Theophilus ba yuk'uné'uzguz

¹Lhanah 'uda hoolhtus hoh hét'en ndi be nawhutnuk ts'ah'un na'a 'uhidáni, 'i ts'iyawh hik'e'anguz. 'Et hik'e'anguz whutsuh, 'i ts'iyawh ndi whenich'oh netah neba 'alha' 'int'ah. ²Soo 'udechoo whe' whudit'en 'et dich'oh hubuna be honalh'en 'ink'ez Yak'usda bughunek be ne'hút'en huzdli, 'en ndi khunek netl'ahídanla, 'i 'int'ah. ³'Et Theophilus nyun dune uncha inli. 'Ink'ez si chah ndi 'uk'une'tésguz hoh 'ust'ah. 'Udechoo whe' whudit'en whuts'un nts'e na'a dahooja 'ink'ez ndet 'uwhulhní, 'et ts'iyawh soo ts'ah'un na'a t'eeonúszun 'et huwa. ⁴'Et ndet 'onghun whunyohodah'i, 'et tink'us na'a 'uhoont'ah k'us ts'ah'un na'a 'uhoont'ah, 'et ts'ah'un na'a t'ewhuntanzeh.

Zacharias bu'at, Elizabeth, 'en duneyaz buyaz tele. 'En 'int'ah John dune too be 'ulh'en 'int'ah

⁵'Et hoh da Herod 'en Judea yun k'ut hubudayi cho inle, 'et da 'ilhunuh náwhulnuk, 'en Zacharias hiyulhní, 'en Abijah bulh dédowh 'int'ah. Bu'at Elizabeth hiyulhní, 'en Aaron yé dinzut 'int'ah. ⁶'En nahult'ah Yak'usda nalh ts'ah'un dune 'uhint'ah. Ndet Yak'usda bughunek huba yutulhuhézya 'ink'ez ndet hubuts'u hukwa' ninzun hik'une' tet'en ka, 'et ts'iyawh hukw'ú ne'hut'en. 'Aw hoonliyaz hukwa hubuk'eho'ah gháit'ah. ⁷'Et whunts'ih Elizabeth 'aw buyaz hole ghaít'ah tube ye'un hezulh 'et huwa. ⁸'Aw 'et Zacharias bulh 'ínt'ah k'una'a hoh Yak'usda nalh náwhulnuk be 'ut'en k'ah huwaghúna, ⁹nts'e na'a 'ilhuk'i hinli hoh náwhulnuk k'una'a né'hutelelh, 'et whuz na'a Zacharias, 'en chah nawhulnuk 'utahayálhti yoo sooltsun dutélk'unka. 'Et neMoodihti hubuluglez whucho ts'ih danínya. ¹⁰'Et yoo sooltsun yudelhk'un hoh 'et nduwhulyez lhanah 'az ts'ih tenahududli. ¹¹'Et Yak'usda bukw'uzdai k'ut yoo sooltsun delhk'un, 'et nalhnih ts'ih, 'et lizas be hoodiltsai. ¹²Zacharias khun yutelh'en 'i be bugha 'uts'un 'úja 'ink'ez whenelhújoot. ¹³'Et lizas ndi yúlhni, "Zacharias wheniljut ilah. Yak'usda ntenadudli yudánts'o. N'at Elizabeth, 'en dune buyaz yaz tele, 'ink'ez boozí John be beootanzi. ¹⁴'En bugha dawhulcho be hootant'i 'ink'ez whuntélhník. 'Ink'ez whuzdli t'eh, lhanah chah hohontélhník. ¹⁵'Alha neMoodihti bunah dune uncha tele. Mai too k'us too ulhtus, 'i chah chaitesnil. Whutele whutsuh 'et whunts'ih Ndoni be dutebun. ¹⁶'Ink'ez Israel hits'uh hainzut, 'en lhanah neMoodihti buYak'usda ts'ih hubutelelh. ¹⁷'Et nus whunilh'en Elijah hiyulhní, 'en k'una'a 'et whuz na'a Ndoni ye ulhtus, 'i be neMoodihti yutsuh teyalh. Ndez na'a njan ndotet'ilh, lhanah hubuzkehkah hube'abákah hubudzi hubuts'un tezoo dutebun nabutelhtsilh. Ndán 'uk'unucha'ust'en, 'en lhanah ts'ah'un 'int'ah ye whunih hitélhchulh. 'Ink'ez dune, 'en lhanah neMoodihti buts'un teyalh, 'et wheni lhábutelilh," lizas ndi yúlhni. ¹⁸'Et Zacharias ndun lizas yoodulhkut, "Nts'e na'a t'ewhunteszeh? Nilh'en duneti 'ust'ah 'ink'ez su'at 'en chah ye 'un uzulh ho' 'int'ah." ¹⁹'Et lizas ndi yúlhni, "Si Gabriel 'ust'ah. Yak'usda zih siyin 'ust'ah. Nts'un sutélh'a nyulh yatelhtuk ka. Ndi khunek unzoo, 'i nyudutésnilh wheni. ²⁰Soo zéhlts'ai! Sughunek daja dusni, soo 'et néwhults'ut t'eh, 'et ts'iyawh 'et ndótenilh. 'Et whunts'ih daja dusni 'aw mba 'alha' cha'hoot'ah. 'Et ndet dzin 'uwhutenilh whuts'un, 'aw yachatuzahtuk!" yulhni. ²¹'Ink'ez dune, 'en ts'iyawh Zacharias hika tsi hooli, 'ink'ez daja hoh simba 'int'ah, sa luglez whucho ts'ih 'ut'en. ²²Tinanja

hoh 'aw hubulh yaóolhtuk ghaít'ah. 'Ink'ez t'ehoninzun hoonliyaz begah hawhelts'ut ho' 'int'ah. 'Ink'ez 'ants'ih huba núlhni hoh hubulh yalhtuk. ²³ 'Et hukw'elh'az ne'úle 'ustl'e' 'uhooja hoh, 'aw 'et bukoo ts'ih whenája. ²⁴ 'Et hukw'elh'az bu'at Elizabeth buyaz 'ucháinya hoh skwunlai sanun 'et nduwhulyez 'et whu'iz inda. 'Et njan ndutni, ²⁵ "Et whuz na'a azeh neMoodihti sulk 'ut'en. Hoh da dzin sunalnih inle hoh ndet hukwaya usdli, ts'iyawh sch'ah hanáhonla."

Ndun lizas Gabriel, 'en Mary ndi yúlhni, "Uski ba' tanilh. En Sizi dutanilh."

²⁶ 'Aw 'et bulh lhk'utat sanun hoh Yak'usda ndun lizas Gabriel hiyulhni, 'en keyah Nazareth ts'ih wheyalh'a. Njan keyah 'et yun k'ut Galilee whuz'ai. ²⁷ Whuz ts'ih 'ilhunuh ts'eke 'aw dune yut'achaghesnak unli, 'en ts'un whel'a. Ilhunuh dune, Joseph hiyúlhni, 'et David hits'uh hainde, 'en 'ilhunuh 'int'ah. 'En yughu tedalh yuts'un lhaoodinla. 'Et ndun ts'eke 'aw dune yut'achaghesnak, 'en Mary hiyúlhni. ²⁸ Lizas yuts'uh whusainya 'ink'ez 'et ndi yulhni, "Whunélhnik! Yak'usda nts'un unzoo! Nemoodihti nyulh 'int'ah 'et huwa ts'ekoo tah degha nus hoont'i inli!" ²⁹ 'Et yutelh'en hoh 'et tube bugha ha'nejoot. 'Ink'ez 'et howun nuni nuzut bughunek daja ni ho' 'utni. ³⁰ 'Ink'ez lizas 'en ndi yúlhni, "Mary niljut ilah! Yak'usda nyulh hoont'i. ³¹ Dája 'uski ba' tenilh. Duneyaz nyaz tele. 'En Sizi dutanilh. ³² 'En ncha tele. 'En 'uhidutenilh soo 'uk'enus 'en buYe' tele. 'Ink'ez Yak'usda neMoodihti David butsuh whudelhdzulh, ndet hukw'inda, 'et yutl'aóote'ah. ³³ 'Et whuz na'a Jacob hits'uh hainde 'ilhuz wheni huba hubudayi cho tele. 'Ink'ez njan hubudayi cho tele, 'aw whulatah whutélah." ³⁴ 'Et Mary, 'en lizas 'uyúlhni, "Nts'e na'a 'uwhutenilh, 'aw dune t'enuzuszun hoh 'ust'ah." ³⁵ 'Et lizas yulh yalhtuk, "Ndoni nk'edinde 'ink'ez degha nus 'en ye ulhtus, 'i nk'ut sakwhusts'it be whútele. 'Et huwa ndi 'uyust'e lubeshi bughoh hoolah, 'i whuzdli t'eh, 'en Yak'usda buYe' hidutenilh. ³⁶ K'an 'aw 'et nyunat Elizabeth ye'un uzulh, 'en whunts'ih duneyaz bughoh. Ndun 'aw buzkeh hole ghaít'ah hiyulhni, 'et whunts'ih 'en 'aw 'et whulh lhk'utak'i sanun be suli. ³⁷ 'Alha 'i be Yak'usda 'en 'aw hoonliyaz buba hoolhtus hoolah." ³⁸ 'Et Mary ndi yúlhni, "Daja, si neMoodihti be 'ulhna 'ust'ah! Nts'e na'a nghunek k'una'a daootenilh dini, whuz na'a sulk 'úhoneh." 'Et lizas yugho whenája.

Mary 'en Elizabeth 'astl'iyaz whuba yuzih usda

³⁹ 'Et hukw'elh'az Mary lhadúja. 'Et yun k'ut nódest'ai whuz Judea yun k'ut 'ilhun keyah whuz'ai, 'ahoh whuz whinya. ⁴⁰ Zacharias bukoo daninya 'ink'ez Elizabeth dahooja yulhni. ⁴¹ 'Et Elizabeth, en Mary daja ni yuduzts'ai ibulh 'uski buchan ts'ih télhah. 'Ink'ez 'ahoh Ndoni be dezbur. ⁴² Elizabeth soo tube cho ndi yúlhni "Ts'ekoo tah degha nus hoonzoo nyulh 'uhooja. 'Ink'ez nyaz whutéleh, 'en dawhuldzoo nghá whults'ut! ⁴³ Nts'e na'a hoh sugha whults'ut sMoodihti 'ama 'en sughu ninya. ⁴⁴ 'Alha, dahooja 'usudini hoh nyuduzts'ai ibulh, 'uski schan ts'ih hoont'i k'et núllhah. ⁴⁵ Ndun ts'eke buba 'alha' hoont'ah, 'en degha nus hoonzoo bughoh whults'ut. Nts'e na'a neMoodihti daja yulhni, buba 'alha' hoont'ah, 'et huwa hoh teh buba ne'whutet'en."

Mary buyun

⁴⁶ 'Et Mary njan ndutni,
 "Suzul, 'i be neMoodihti ye uncha yudélhti.
⁴⁷ 'Ink'ez Yak'usda súlh yih.
 'En be suyéghah whuneílhnik.
⁴⁸ 'Alha ndun be 'ulhna,

nts'e na'a yuh 'ududildzun, 'et t'ewhuninzun.
 'Et whunulh'en, k'an whuts'un, nus de chah,
 'ilhuz wheni ndi yun k'ut ts'iyannah soo degha nus hoonzoo bulh 'úhooja
 soo 'uduténilh.
 49 'Alha ndun hooncha hoh tune' sulh'en,
 'en be óonujut 'int'ah 'ink'ez boozi, 'i degha nus dezti.
 50 Ndi yun k'ut hudedowh, 'ink'ez o 'un hubundunedoh,
 ndunnah 'en k'una'a hidóolhti,
 'ink'ez ndan hiyé nuljut, 'en ts'iyawh hubugha te'ninzun.
 51 Dugan bunut'uk 'i be hoolhtus tune' 'ut'en.
 Ndunnah budzi be 'ududelhúti, 'en ts'iyawh yabanla.
 52 Ndunnah dune ncha hukw'adálts'i, 'et 'en nanábanla.
 'Et ndunnah te'dadildzun, 'en hincha hubulhtsi.
 53 Ndunnah buye'últs'ilh, 'en unzoo 'i be hubudelhbun.
 'Ink'ez ndunnah soode'a, 'en 'aw hoonliyaz bughá chai'al hoh
 whenábalh'a.
 54 Be 'ustl'en Israel, 'en hubugha te'ninzun,
 'et whunalnih hoh hubula 'uja.
 55 'Et whuz na'a netsuh dune hanle hubulh yailhtuk hoh Abraham 'ink'ez
 yuts'u hainde,
 'en 'ilhuz wheni 'uhint'ah, 'et whuz na'a hubudáni."
 56 'Et Mary tat sanun bat'en hoh Elizabeth yuzih inda. 'Et hukw'elh'az
 bukoo ts'ih whenaja.

John dune too be 'ulh'en 'aw 'et whutele

57 'Aw 'et Elizabeth buyaz whutele 'et níoodelhdzut 'ink'ez buye' whúzdli.
 58 'Et highah delhts'i 'ink'ez hinat hudélhts'ikah whulh 'úhuduzts'ai nts'e na'a
 neMoodihti yugha te'nanzin. 'Ink'ez ts'iyawh hiyulh whunélhnik.

John 'aw 'et yuka dune unli, 'i k'ut hitet'us

59 'Aw 'et whulh lhk'udink'it dzin hoh 'uski 'en yuka dune unli, 'i k'ut
 hitet'us. 'Ink'ez bu'abá boozi Zacharias 'i be hiyootézhilh. 60 'Et whunts'ih
 bu'ama, "Awundooh! Ndi boozi John 'i be hiyootézhilh," ndo búlhni. 61 'Et
 hiyúlhni, "Aw nyulh dunekah hubutah 'aw John boozi 'i hoolah!" 62 'Et
 bu'abá ndi boozi higha idúte'ah 'et t'ehontezeh hukwa' huninzun. 'Et dula
 be hiba núlhnih whuz na'a hiyoodulhkut. 63 Dula be núlhnih hoh dustl'us
 hubuts'u ka' dani, 'ink'ez 'uk'une'uzguz, "Boozi John hidutenilh." 'Ink'ez
 ts'iyawh huba hooncha. 64 'Et khunyaz yanawhéniltuk hoh Yak'usda dálhti.
 65 Yunat whut'en, 'en ts'iyawh nujut hubugha nídelts'ut. 'Ink'ez Judea yun k'ut
 nodest'ai ndulhcho 'et whut'en, 'en ts'iyawh howu yahalhtuk. 66 'Et ndunnah
 whulh uzduzts'ai, ts'iyawh hubudzi be hódanla 'ink'ez 'ulhódutni, "Ndan 'uski
 dant'ah simba wule?" hutni. 'Ink'ez neMoodihti bula be yula 'ut'en.

Zacharias nus whunilh'en

67 'Aw 'et be'abá Zacharias, Ndoni be dez bun 'ink'ez nus whunilh'en hoh
 ndutni,
 68 "Israel buYak'usda 'ink'ez neMoodihti, 'en dalzoo!
 Budune, 'en buts'un nusiya nabootekulh ka.
 69 David 'en Yak'usda be 'ustl'en, 'en yuts'u hainde,
 'en hubugha neulhyis hooncha, 'en neba yulhtsi.
 70 'Uda whe' whudit'en whuts'un,
 'et whuz na'a Yak'usda be nus whunilh'en, 'en hube yailhtuk.
 71 'Et hoh nech'a yalhtuk 'ink'ez ndunnah nets'u detni,
 'en ts'iyawh hubula k'éhaoodelts'ut, 'et neulhyis.

- 72** Ne'abákah 'en Yak'usda hubugha te'ninzun.
 'Ink'ez ndi khunek huba lhaídinla, 'i 'et yunalnih.
- 73** Netsuh whudelhdzulh Abraham nts'e na'a Yak'usda bughunek yutl'aída'ai
 hoh 'ink'ez yuts'un náhezya,
 njan 'et wheni neba' whutelilh ka,
- 74** 'et hoh nech'a hudemtni, 'en hubula k'ehaoodelts'ut, 'et hoh neulhyis.
 'Ink'ez 'aw whechats'uniljut hoh Yak'usda ba' uztet'ilh.
- 75** Lubeshi cha'ulh'en uztele 'ink'ez ts'ah'un na'a uztet'ilh,
 'et whuz na'a Yak'usda bunalh dzin totsuk ts'ukhuna hoh 'en ba' ts'ut'en.
- 76** 'Ink'ez nyun 'uskiyaz 'en ndun degha nus dedo, 'en ba nus whunilh'en
 nyuhudutenilh.
 NeMoodihti 'en ti hoonzoo buba whutelhtsilh ka butsuh tanyalh 'et
 huwa.
- 77** 'Ink'ez wheni budune soo cho t'ets'onózin dahoont'ah hoh uzdutejih 'ink'ez
 nelubeshi chah neba hoolah yutelhtsilh,
 'et hubugha nedutenilh.
- 78** 'Et whutsuh neYak'usda nek'entsi' hoh negha te'nanzin.
 'Et ndun sa yilkaz ts'utni,
 'en ndus de whuts'un nets'ún k'unadaih.
- 79** Ndunnah tsahólhgus yuh hudélhts'i 'ink'ez datsah huba 'int'ah chah,
 'en ts'iyawh hubuk'eiduténolh.
 'Ink'ez lhuteyalh hoh nedzi soo 'uhot'e, 'et nts'e wheho'a, 'et newhunelhtun.
 'Et huwa Yak'usda be nus whunilh'en nyudutenilh," ni Zacharias.
- 80** 'Et ndun 'uski John, 'en nezyi 'ink'ez buyégha ulhtus suli. 'Ink'ez nket'ah
 Israel budune hubunalh haooya dunábunteltun ka, 'et whuts'un nts'e dune
 chahóot'ih ts'ih inda.

2

Mary 'udechoo buyaz whuzdli, Sizi 'en 'int'ah

- 1** 'Et da 'ilhunuh dune Caesar Augustus hiyulhni, 'en nduhoolhcho keyah
 hudelhts'i, 'en ndi khunek yutah lhuhezya. Ts'iyannah boozi 'i ts'iyawh
 hik'e'tegus ka. **2** 'Et hoh da whudezulh whutah, 'ilhunuh dune Cyrenius
 hiyulhni, 'en whuyun k'ut Syria whumoodih inle. 'Et wheghah whudezulh
 'et whuts'un huboozi 'uk'e'whehininguz. **3** 'Et ts'iyannah dich'oh dukeyah
 whuz whehandel huboozi k'éhutegus ka. **4** 'Et Joseph 'en yun k'ut Galilee
 'ink'ez keyah Nazareth, 'et whehúdin'az 'ink'ez David bukeyah, Bethlehem
 huwhutni, whuz wheha'az Joseph, 'en David yuts'uh hainzut 'int'ah 'et huwa.
5 Ndun Mary yughu tedalh hoh yuts'un nahezya, 'en njan Mary 'uski ba
 'int'ah hoh yulh when'az huboozi k'é'hutegus ka. **6** 'Aw 'et huzke hoh buyaz
 whutéleh 'et neoodenzut. **7** 'Aw 'et 'udechoo buyaz whuzdli. 'Et ndi layin
 naih yugha iwézduz 'ink'ez musdus yez 'uyi, 'i be yalhti. 'Aw ts'uztez bakoo
 nachahuhó'al, ts'iyawh whudézbun 'et huwa.

NeMoodihti buts'uh hayanduz, 'i ndulhcho hoh hubunat hube dendí

- 8** 'Ilhunuh yun k'ut dzuh nilhdzayaz, 'et sheep ghuhinli tl'o k'ut 'et huwhut'i,
 'ink'ez 'ulh'ek nduwhulyez hoh hubughunai ghuhinli. **9** 'Ink'ez nilh'en, 'aw
 'et neMoodihti bulizas hububut siyin. 'Ink'ez neMoodihti buts'uh hayanduz,
 'i ndulhcho hoh hubunat bube dendí. 'Ink'ez 'aw 'et tube hoh hunelhújoot.
10 'Et lizas ndo búlhni, "Whenoohlhujut gunih! Nulh'en ndi khunek unzoo
 'i soo ts'iyannah dune ye hóotet'i, 'i nuhwhuts'u té'ai. **11** K'an dzin David
 bukeyah, nuhwhutelhyis nuhwhuba whuzdli. 'En Christ neMoodihti ts'utni,
 'en 'uja. **12** Ndez na'a hoh t'ewhunehzeh ka nuhwhuba hoh hoodel'en nts'e

na'a dahooja, lhe'ínt'ah layin bugha iwésduduz 'ink'ez musdus yez 'uyi, 'i bet usti." ¹³ Khunyaz lizas 'ink'ez lhanah lizas nehughan, 'en ndus de hahandel. 'Et Yak'usda 'o nus hiba hodélhti hoh nduhútni,
¹⁴ "Yak'usda degha ndoh yak'ut, 'en uzdelhti.

'Ink'ez ndi yun k'ut nedzi dooghel, 'i be ts'iyannah dune hubuts'un hoonzoo hole!"

¹⁵ 'Aw 'et ndunnah lizas yak'uz ts'ih hubugho whenáhadel. Ndunnah Sheep ghuhinli ndulhodutni, "Aw 'et Bethlehem ts'ih ts'utoodelh. 'Ink'ez nts'e na'a dahooja 'et neMoodihti nedani, 'et ts'onoolh'en!" ¹⁶ 'Et 'a tsih ndaz de hedulh. 'Et Mary 'ink'ez Joseph 'ink'ez 'uski musdus yez 'uyi bet usti hoh hubughu hunindel. ¹⁷ Hiya'en hukw'elh'az, nts'e na'a 'uski bugha lizas 'en hubudáni, 'et whunat ts'iyannah t'ehonandzin hoh ¹⁸ ndunnah yudants'o sheep għunli daja hubulhni, 'en ts'iyawh huba hooncha suli. ¹⁹ 'Et Mary dahooja, budzi be yodanla 'ink'ez 'ahoolhyez howu nuni nuzut. ²⁰ 'Aw 'et ndunnah sheep ghuhinli 'en sheep ts'un whenahedel. 'Et ndet hodants'o, 'ink'ez honalh'en, 'ink'ez nts'e na'a hubulh yahalhtuk chah, 'et hubugha Yak'usda hidélhti 'ink'ez 'o nus hoonzoo k'una'a highu yalhtuk.

Sizi 'aw 'et yuka dune unli 'i lhk'ihitét'us

²¹ Whulh lhk'udit dzin lhaóodija hoh 'uski yuka dune unli 'i lhk'uhinint'az, 'ink'ez hiyoozi be hiyootézilh, Sizi hiyulhni. 'Awhuz 'ucha dinda hoh 'et ndi boozi, 'i lizas yugħa íde'ai.

Sizi luglez whucho ts'ih, 'et neMoodihti bunalh hahítelhtelh

²² 'Et Moses be' dustl'us k'ut daja ni hoh ts'ekoo buyaz whulħih hukw'elh'az soo ná'hut'ih 'et luglez danáhudaih, 'et ndúwhulcho hoh Mary lhaóodinla. 'Ink'ez 'uski Jerusalem ts'ih wheħiyalhti neMoodihti bunalh hahítelhtelh 'et hukwa. ²³ NeMoodihti, 'en Moses bugha ndi bughunek butl'aida'ai, 'i whuz na'a 'uk'e'hanguz 'et njan ndutni, "Ndunnah duneyaz 'udechoo whuzzdli, 'en ts'iyawh neMoodihti ba 'udun nelti hinli ho' hint'ah." ²⁴ 'Ink'ez ndai Yak'usda bukw'uzdai k'ut hidutélhk'un, "I nankoh dut'aiyaz, dove hiyulhni, k'us nankoh dut'aiyaz, 'i dih hiyulhni." NeMoodihti, en Moses bugha ndi bughunek butl'aida'ai, 'et whuz na'a 'utni.

Simeon 'en neMoodihti buChrist yunalh'en

²⁵ 'Et 'ilhunuh dune Simeon ts'utni, Jerusalem whut'i. Ts'ah'un na'a 'int'ah 'ink'ez 'ahoolhyez Yak'usda be 'ut'en k'ah 'uwhulh'en. Ndun Israel budune k'enábunte'ah, 'en yuka tsi hóolih. 'Ink'ez Ndoni chah yulh 'int'ah. ²⁶ Ndoni 'en whut'einalhdzin, datetsah whutsuh neMoodihti buChrist ts'utni, 'en yute'ilh. ²⁷ 'Et Ndoni bugha luglez whucho daninya. 'Ink'ez 'uskiyaz Sizi, 'en be'abá 'ink'ez be'ama, 'en hik'uz dahinilhti. Moses bughunek 'uk'une'usdúguz butl'aida'ai, ndet hubuts'un hukwa' ninzun, 'et hukw'u ne'hutet'en ka. ²⁸ 'Et 'ahoh Simeon yilħchoot 'ink'ez njan ndutni hoh Yak'usda yudélhti,
²⁹ "SMoodihti si nye 'ulħna usdli.

'Ink'ez nts'e na'a nghunek k'una'a, 'et 'uhoont'ah sudzi dezghel hoh daóosah.

³⁰ 'Alha be suna be netelhyis nulh'en.

³¹ Ts'iyannah dune hubunalh lhaoodinla.

³² 'Udun yun k'ut whut'en, 'en chah huba be whét'en, 'i 'int'ah. 'En be hite'ilh. 'Ink'ez nyudune, 'en Israel budune, 'en chah huba idézti 'en 'int'ah," ni.

³³ Nts'e na'a yugħu yatelhtuk 'et huwa Joseph 'ink'ez 'uski 'ama bulh huba hooncha. ³⁴ 'Et Simeon Yak'usda ts'un hukwa' dani hubuts'un wuzoo ka. 'Ink'ez 'ama Mary 'en ndi yulhni, "Ndet huba ndun 'uski Yak'usda 'en

huba 'utahayálhti 'int'ah, 'et nyudutésnilh. Israel hits'uh hainde, 'en bugha lhanah natekulh 'ink'ez lhanah dinadutéduh. 'Ink'ez highu t'eooninzun 'et whunts'ih hich'a yatelhtuk. ³⁵ 'Ink'ez nyunch'oh nzul soh cho be huyuzgwut li'tenilh. 'Ink'ez lhanah hubudzi be daja huninzun, 'et ts'iyawh ts'iyannah nalh ts'et haootelts'ulh."

Anna 'en chah Sizi ya'en 'ink'ez Yak'usda délhti

³⁶ 'Aw 'et 'ilhunuh ts'eketi, Anna hiyulhni, Yak'usda be nus whunilh'en. Phanuel butse', 'ink'ez Asher hubulh dédowh, 'ilhunuh 'int'ah. Tube ye 'un uzulh. 'Udechoo ki tet'ilh whutsuh, 'aw dune t'enizun 'int'ah. Skwúnlat 'o 'at nat naoodezulh duki zih inda. ³⁷ Ndun tsandelh, 'en lhk'udit lanezi 'o 'at dit be naoodezulh bat'en (84). 'Et 'aw luglez whucho whuch'a chaíyal. 'Et whunts'ih lhat hoh dzenis 'ink'ez 'ulh'ek ibulh sahá'dulyih 'ink'ez tenadudli, 'i be Yak'usda ba ne'ut'en unli. ³⁸ 'Et ndun ndoh whudézulh hoh daninya 'ink'ez Yak'usda yudélhti. Jerusalem hудelhts'i, ndun nabootekulh, 'en hika ítes'en, 'et 'en bugha Anna hubudáni.

Joseph 'ink'ez Mary, 'uski bulh hubukeyah Nazareth ts'un whenahedel

³⁹ 'Aw 'et Joseph 'ink'ez Mary, neMoodihti, 'en Moses bugha ndi bughunek hubutl'aida'ai, 'et ts'iyaintsuk lhahuduja hoh yun k'ut Galilee 'ink'ez hubukeyah Nazareth ts'un whenahedel. ⁴⁰ 'Et 'uski 'aw 'et nuyeh 'ink'ez buyégha be ulhtus súli. Ye whunih be dezbur 'ink'ez Yak'usda ye unzoo, 'i bulh 'int'ah.

Sizi 'aw 'et chilh unli hoh keyah Jerusalem usda. Ndan yudits'o tube huba hooncha suli

⁴¹ 'Aw 'et be'abá, be'ama bulh naoodezulh totsuk Jerusalem ts'ih k'unáhut'us. Na'hutet'alh hoh Hubutus Lhusiya whunahutelnih, 'et hukwa whuz whehánel. ⁴² Hoh da ndunnah 'uski 'en lanezi 'o 'at nat be naoodezulh (12) 'et Jerusalem ts'ih k'unáhudulh, butus lhusiya da hukw'un'a 'et huwa 'uhut'en. ⁴³ Nkeda 'ustl'e' hooja hoh k'ah nahutest'az. 'Et whunts'ih 'awhuz 'uski Sizi Jerusalem 'aw 'et usda. Joseph, 'ink'ez be'ama bulh 'aw t'ehonízun. ⁴⁴ 'Uyoon bulh 'ut'en huninzun. 'Ilhudzin bat'en huní'az 'et k'an zeh hika ítes'en. 'Et bulh dunekah 'ink'ez bulhutsinkah 'en hubutah hikunúta. ⁴⁵ 'Et 'aw nachahuyíltel 'et doo chah Jerusalem ts'ih whenáhet'az, 'ink'ez 'et hikunúta. ⁴⁶ Tat dzin hukw'elh'az 'et k'an zeh nahuyilhti. Luglez whucho 'et whubodulh'eh hubutah usda. Huboozélhts'ai 'ink'ez huboodulhkut. ⁴⁷ Ndan hidits'o tube huba hooncha suli. Ts'iyaintsuk t'ewhunízun 'ink'ez ts'iyawh ts'ah'un na'a ndó bulhni. ⁴⁸ Be'ama 'ink'ez Joseph bulh ndet 'ut'en 'et usda hinilh'en hoh huba hooncha. 'Et be'ama 'uyúlhni, "Uyaz di ka whuz na'a nene'ilh'en? Nyu'abá 'ink'ez si bulh tube nk'enedadutai." ⁴⁹ 'Et ndo búlhni, "Di ka sukunahta? 'Aw nt'echoonuzúhzun se'aBá be 'ut'en k'ah huwa óosna huba' hoont'ah?" ⁵⁰ 'Et daja ni hoh 'utni, 'et 'aw t'echahonízun. ⁵¹ 'En hubulh whená'taz. Nazareth ts'ih whenahédel 'ink'ez hubutl'a'dudelti. 'Et be'ama ndi ndet 'uwhulhni, budzi yídanla. ⁵² 'Ink'ez Sizi 'o nus whunih chah 'ulheh hoh nus lhaneyelh. Yak'usda yuba hoont'i, 'ink'ez dune, 'en chah hiba hoont'i.

3

John dune too be 'ulh'en ts'iyannah, "NeMoodihti buti buba lhaoodahleh" ndo búlhni

¹ 'Aw 'et Caesar Tiberius, 'en yun k'ut ndulhcho hoh hubidayi cho inle. Lanezi 'o 'at skwunlai naoodezulh (15) ant'e. 'Et Pontius Pilate, 'en Judea yun k'ut whumoodih unli. Herod, 'en Galilee yun k'ut whumoodih unli. Bulhutsin Philip, 'en Iturea 'ink'ez Trachonitis yun k'ut whumoodih unli.

'Ink'ez Lysanius, 'en Abilene yun k'ut whumoodih unli. ² Annas 'ink'ez Caiaphas, 'en nawhulnuk degha nus dézti 'uhint'ah. 'Et whughah whudézulh whutah 'et John, 'en Zacharias buye', 'en dune chahóot'ih ts'ih usda hoh Yak'usda bughunek buk'édilts'ut. ³ 'Et Jordan koh 'et whunat nuya hoh dune hubulh yalhtuk too be' hooneh ka hukwa. 'Et whebunulhtun dulubeshi ch'a bubeni náhubudunoolelh ka. 'Et hoh lubeshi buba hoolah yutelhtsilh. ⁴ 'Et whuz na'a Isaiah bughunek 'uk'e'eduguz 'et njan ndutni,

"Dune chahóot'ih ts'ih dune yiz dusduts'ai, 'et 'ultus hahuyih hoh njan ndutni, 'NeMoodihti buti lhaoodahleh!"

Buti soo lhk'e oodez'a buba whulhtsi!

⁵ Too k'oh totsuk naoodutebun.

Dzulh 'ink'ez dzulhyaz bulh ts'iyawh lhgha yuk na'tetnilh. Whudélyah 'et chah lhk'enaoodutedukih.

Yun nudest'ai 'i chah lhgha na'whutétnilh.

⁶ 'Ink'ez nts'e na'a Yak'usda dune ulhyis, 'et ts'iyannah hontelh'ilh."

John dune too be 'ulh'en, 'en dune hubulubeshi hubugha khunek ulhtus 'i be ndo búlhni

⁷ Dune lhanah yughu nindel too be' hutennih hukwa' huninzun. 'Et ndo búlhni, "Nuhwheni poison tl'ughus buzkehkah li'aht'ah. Yak'usda lubeshi 'ulh'en hubulh húntelch'oh 'et whuz de whélts'ulh, ndan 'un whúlhni whuch'a lhúwus? ⁸ Nuhwhulubeshi ch'a nuwheni náhundunehla t'eh, nuhwhe 'ut'en be ts'iyannah whebunoolhtun nuhwhulubeshi buladehtnik. 'Ink'ez khun lhts'un njan dudoohtni gunih wheni Abraham hits'uh hats'ánde 'uts'int'ah. 'Alha ts'ah'un na'a 'un whudusni, Yak'usda soo 'ultus ho' 'int'ah, ndi tse 'i whunts'ih 'i be Abraham buts'uh hahánde hubutelhtsilh. ⁹ Njan soo cho whunulh'en, nuhwheni duchun lí'aht'ah. 'Aw 'et tsetsilh ba lhadínt'ah. 'Et nuhwheni bulunah duchun bumai hoolah, 'et ndaht'ah. K'an whunts'ih ndai bumai hoolah, 'i tsetsilh be bughih tubulh tahídantsel 'ink'ez hidutélhk'un."

¹⁰ 'Ink'ez dune ts'iyawh hiyoodulhkut, "Ink'ez nts'e na'a simba dats'óoneh."

¹¹ 'Et ndo búlhni, "Ndán dzoozt'an nankoh 'ut'i, ndan dzoozt'an chait'ih, 'en 'ilhuk'i yugha óolhchoos. 'Ink'ez ndán ts'uyi 'ut'i, 'en chah whuz na'a zeh ndóneh." ¹² Ndunnah sooneya 'ilhunanowes'aih, 'en chah too be' hutennih ka hits'uh whusaindel 'et hiyoodulhkut, "Whuneodulh'eh nts'e na'a daztenilh?"

¹³ 'Et ndo búlhni, "Ndet ndanéltsuk hutni télhcholh huba' hoont'ah, 'et 'aw 'o 'un chawhuzóolhchoot." ¹⁴ Nehughan, 'en chah hiyoodulhkut, "Nuwheni do daztenilh." 'Et ndo búlhni, "Khun nuhwheni dune sooneya nuhgha hó'alh huboolhtsilh gunih! Khun dune whuts'it be buk'éhoh'alh gunih! 'Ink'ez ndet daneeltsuk nuhwhuba k'elha whútele, 'aw 'et hóht'i huba' hoont'ah!"

¹⁵ Ts'iyannah hoonliyaz hukwa tsi huholi. 'Et budzi be dahoont'ah simba John 'en bugha, ndun Christ ts'utni, 'en tulih 'int'ah k'us 'awundooh. ¹⁶ John ts'iyawh 'et ndo búlhni, "Too zeh 'i be too bé' nuhwhulh'en. 'Et whunts'ih sk'elh'az whusateyalh, 'en sughanus dezti ho' 'int'ah. 'Aw buke tl'oohl buba lhk'unadutes'uk 'et whunts'ih huba soo cha'ust'ah. Ndun 'en Ndoni 'ink'ez kwun bulh 'i be too be' 'un whutelilh. ¹⁷ Be tl'o nuldzeh tl'o mai be tahawhúlts'it, 'i lhaídilhdzun. 'Ink'ez ndi tl'o mai yuk'ut tahawhúlts'it, 'i chah yuk'ut lhadút'ih t'eh, 'ink'ez yuna'ulhdoh. 'Ink'ez ndi mai lhaduja, 'i ts'iyawh denúdzih 'ink'ez mai bakoo ts'ih wheyúlih. 'Et whunts'ih ndi kwun 'aw nachanusneh, ndi but'ooz 'i be duték'un," hubúlhni. ¹⁸ Ndi Khunek 'ink'ez 'uyoo khunek 'i bulh 'et whuz na'a khunek ulhtus, 'i be hubudáni. ¹⁹ 'Aw 'et ndi yun k'ut whumoodih Herod, 'en 'ilhunuh 'int'ah. 'En dulhutsin Philip bu'at 'en yuzih usda. John 'uyúlhni, "Lubeshi 'ilh'en." 'Udun tink'us na'a chah 'ut'en. 'Et chah ts'iyawh lubeshi 'ohoont'ah yulhni. ²⁰ 'Et ndi lubeshi 'uyulh'en, 'i 'uyoo chah yuts'u na'whuleh hoh John 'en tsak'eya'ai.

Sizi too be 'úlya

²¹ 'Aw 'et ts'iyannah dune too be 'úlya. Sizi 'en chah too be 'uyínlá. Tenawhéndunidli 'i bulh yat'ah dá'dutezkez, ²² 'ink'ez Ndoni dut'aiyaz, dove hiyulhní, 'i k'una'a ndus de hát'o 'ink'ez yuk'eít'o. 'Et nduk yak'uz khunek huduzts'ai, 'i ndutni, "Nyun suYe' nk'esi' 'unint'ah. Tube nyulh hoonúst'i."

Sizi hubuts'u haiyanzut

²³ Et Sizi tat lanezi naoodezut bat'en suli (30), 'aw 'et whe'dít'en. Ts'iyannah 'en Joseph buye' huninzun.

'Ink'ez 'en Heli buye'.

²⁴ 'En Matthat yuts'uh hainzut,
'en Levi yuts'uh hainzut,
'en Melchi yuts'uh hainzut,
'en Janna yuts'uh hainzut,
'en Joseph yuts'uh hainzut.

²⁵ 'En Mattathiah yuts'uh hainzut
'en Amos yuts'uh hainzut,
'en Nahum yuts'uh hainzut,
'en Esdli yuts'uh hainzut,
'en Naggai yuts'uh hainzut.

²⁶ 'En Maath yuts'uh hainzut,
'en Mattathiah yuts'uh hainzut,
'en Semei yuts'uh hainzut,
'en Joseph yuts'uh hainzut,
'en Judah yuts'uh hainzut.

²⁷ 'En Joannas yuts'uh hainzut,
'en Rhesa yuts'uh hainzut,
'en Zerubbabel yuts'uh hainzut,
'en Shealtiel yuts'uh hainzut,
'en Neri yuts'uh hainzut.

²⁸ 'En Melchi yuts'uh hainzut,
'en Addi yuts'uh hainzut,
'en Cosam yuts'uh hainzut,
'en Elmodam yuts'uh hainzut,
'en Er yuts'uh hainzut.

²⁹ 'En Jose yuts'uh hainzut,
'en Eliezer yuts'uh hainzut,
'en Jorim yuts'uh hainzut,
'en Matthat yuts'uh hainzut,
'en Levi yuts'uh hainzut,

³⁰ 'En Simeon yuts'uh hainzut,
'en Judah yuts'uh hainzut,
'en Joseph yuts'uh hainzut,
'en Jonan yuts'uh hainzut,
'en Eliakim yuts'uh hainzut,

³¹ 'En Melea yuts'uh hainzut,
'en Menan yuts'uh hainzut,
'en Mattatha yuts'uh hainzut,
'en Nathan yuts'uh hainzut,
'en David yuts'uh hainzut,

³² 'En Jesse yuts'uh hainzut,
'en Obed yuts'uh hainzut,

'en Boaz yuts'uh hainzut,
 'en Salmon yuts'uh hainzut,
 'en Nahshon yuts'uh hainzut,
³³ 'En Amminadab yuts'uh hainzut,
 'en Ram yuts'uh hainzut,
 'en Hezron, yuts'uh hainzut,
 'en Pharez yuts'uh hainzut,
 'en Judah yuts'uh hainzut,
³⁴ 'En Jacob yuts'uh hainzut,
 'en Isaac yuts'uh hainzut,
 'en Abraham yuts'uh hainzut,
 'en Terah yuts'uh hainzut,
 'en Nahor yuts'uh hainzut,
³⁵ 'En Serug, yuts'uh hainzut,
 'en Reu yuts'uh hainzut,
 'en Peleg yuts'uh hainzut,
 'en Eber yuts'uh hainzut,
 'en Salah yuts'uh hainzut,
³⁶ 'En Cainan yuts'uh hainzut,
 'en Arphaxad yuts'uh hainzut,
 'en Sem yuts'uh hainzut,
 'en Noah yuts'uh hainzut,
 'en Lamech yuts'uh hainzut,
³⁷ 'En Methuselah yuts'uh hainzut,
 'en Enoch yuts'uh hainzut,
 'en Jared yuts'uh hainzut,
 'en Mahalaleel yuts'uh hainzut,
 'en Cainan yuts'uh hainzut,
³⁸ 'En Enos yuts'uh hainzut,
 'en Seth yuts'uh hainzut,
 'en Adam yuts'uh hainzut,
 'ink'ez 'en Yak'usda yuts'uh hainzut.

4

Netsudule, 'en Sizi tink'us 'óoneh hukwa yóolhdzih

¹ 'Et Sizi, en Ndoni be dez bun hoh Jordan koh ts'ih hanája. 'Ink'ez dune chahóot'ih ts'ih Ndoni whuz wheyalh'a. ² 'Et whulh dit lanezi (40) dzin 'et dzin totsuk netsudule tink'us ooneh hukwa' yulh'en 'et yoolhdzih. 'Et nduwhulyez hoh 'aw hoonli chas'al. 'Et lhaóodinla hukw'elh'az buye'élts'ul.
³ 'Et netsudule 'uyúlhni, "Alha Yak'usda buYe' inli t'eh, ndi tse lhes wule dini."
⁴ 'Et Sizi njan ndi yúlhni, "Ndez na'a Yak'usda bughunek k'ut 'uk'une'úsduguz 'et njan ndutni, "Aw lhes zeh ilah dune yuk'ekhuna. 'Et ndai Yak'usda bughunek 'i ts'iyawh dune yuk'ekhuna." ⁵ 'Et netsudule nyedoh dzulh k'ut yulh whin'az. 'Et 'ahoh yun k'ut nts'oh tula dune whut'i, 'ink'ez hubudayi cho bube 'ut'en k'ah, 'et nduwhulcho wheínlultun. ⁶ Netsudule 'uyúlhni, "Et nyun ndi ts'iyawh humoodih tanle, 'ink'ez hiye dezti 'et chah ngha ootés'ah. Njan sugha whulya. 'Et huwa ndan hubuka', nuszun, 'en hubutl'aootes'ah.
⁷ 'Et ngwutsi be nininya 'ink'ez sts'u téni' nilhdzun t'eh, 'et sih ndi ts'iyawh nye'ílhgzun wule." ⁸ 'Et Sizi ndi yulhni, "Satan st'ak inyalh! 'Et 'uk'e'éduguz hoh njan ndutni, 'Moodihti nYak'usda 'aw 'en zeh bubut negwutsi be nits'eyih, 'ink'ez 'en zeh buts'uh teni' uznilhdzun. 'Ink'ez 'en zeh ba nets'ut'en." ⁹ 'Et

Jerusalem ts'ih yulh whin'az 'ink'ez njan luglez whucho yedoh hukw'ut 'et
 soo hukw'abah ninílhyá 'ink'ez ndi yúlhni,
 "Alha Yak'usda buYe' inli t'eh, 'et njan whegha' dudintneh!
 10 'Alha 'et 'uk'e'éduguz hoh njan ndutni,
 'Yak'usda bulizas ngho hoole ka 'ink'ez nyuhotun
 'ink'ez wheni hubutl'ahó'ai.
 11 Bula be nyedoh nyuhóötetun,
 'et huwa 'aw nke be tse t'aoonalh ghaít'ah."
 12 'Ink'ez Sizi ndi yúlhni, "Njan 'et 'uk'e'uduguz hoh njan nduwhutni,
 'Khun teh Moodihti nYak'usda 'en nantá'ah hukwa ólhdzih gunih." 13 'Et
 netsudule ts'iyaantsuk hoh tink'us ooneh hukwa yóolhdzai, 'aw 'et lhaooduja
 hoh 'astl'iyaz whuts'un yugha whenája.

Sizi bube 'ut'en 'aw 'et whe'yudilh'en

14 'Et Sizi, en Ndoni ye ulhtus, 'i be yun k'ut Galilee ts'ih whenaja. 'Ink'ez
 yughu yalhtuk Galilee yun k'ut hudemts'i ndulhcho hiyulh údants'o, 'ink'ez
 ts'iyawh highu yalhtuk. 15 'Et ts'iyawh Lizwif luglez totsuk whéoobondunilh'i
 'ink'ez ts'iyanah hidélhti. 16 'Et ndet keyah nezyi Nazareth huwhutni,
 whuz whinya. 'Et dzin dune nalyis dzin 'uhoont'ah, 'et Lizwif hubuluglez
 whuz ninya. 'Et whuz na'a dich'oh be 'ut'en k'ah 'uhoont'ah. 'Ink'ez buba
 'uk'eyatelhtuk ka didinya. 17 'Ink'ez nus whunilh'en Isaiah be' dustl'us 'i
 hitl'ahúya'ai. Lhk'inélgħal 'ink'ez ndet hukw'uyatelhtuk 'et nahoo'ai. 'Et
 buba k'eyawhénilhtuk 'et njan ndutni,

18 "Moodihti buyégha 'i sulh 'int'ah.
 'I be 'utahasalhti, ndunnah tehel'en, 'en khunek unzoo, 'i hubugha
 ités'ah ka.

Ndunnah, en hubudzi nduda,
 'en nabutélhyih ka hubuts'un whusaíya.
 Ndunnah ílchoot,
 'en hobuntelhtun nts'e na'a hubulanadetnik hutele.
 'Ink'ez hobuntelhtun ndunnah chahuwhés'en,
 'en chah honilh'en nahutedleh.

Ndunnah dune nts'e whuts'un yuk nihininkat,
 'en chah dinábudutésdlel.

19 'Et ndet nawhudezulh soo 'et neMoodihti buba hoonzoo,
 'et ts'iyanah hubudutesnilh."

20 'Aw 'et dustl'us nainílghal 'ink'ez 'et 'ut'en yutl'anayá'ai 'ink'ez
 nanát'l'adeda. 'Ink'ez ndunnah Lizwif luglez hudemts'i, ts'iyanah 'en zeh
 hinilh'en. 21 'Ink'ez 'aw 'et hubulh yawhenilhtuk, "Et nuhwheni ndi Yak'usda
 bughunek dáhts'o, 'et k'an dzin ts'iyawh lhaooduja." 22 Ts'iyanah soo
 highu yalhtuk. Khunek unzoo, 'i ye yailhtuk, 'i ts'iyanah huba hooncha.
 Dich'oh 'ulhóutni, "Ndun 'en Joseph buye' 'en ilah ih 'int'ah?" 23 'Et ndo
 búlhni, "Aw nawh cha'hoot'ah ndi khunek 'ahoolhyez 'et dudáhtni hoh njan
 ndutni, 'Yoo be duyin nyunch'oh cho soo na'dudilneh,' 'et whuz na'a si
 chah 'et ndusúdutehnih. 'Et ndez na'a ndutehnih, 'Ndet keyah Capernaum
 huwhútni, dawhut'en whulh úzdzits'o, 'et njan nyunch'oh nkeyah 'et chah
 whuz na'a zeh ndint'en." 24 'Ink'ez 'et ndutni, "Alha ts'ah'un 'ún whudusni,
 nus whunilh'en dich'oh bukeyah ninya hoh 'aw 'ilhunuh whunts'ih yuka
 cha'nizun. 25 Ndet nuhwhudutésnilh soo ts'ah'un 'et 'alha' hoont'ah. 'Et
 hoh da ndun Elijah, 'en yun k'ut Israel nus whunilh'en huba unli inle. 'Et
 lhanah tsandehl hoonli inle. Hoh da tat naooduzuk 'o 'at lhk'utat sanun 'et
 nduhóolhyez 'aw chan hoolah. 'Et 'uhooja yun k'ut ndulhcho hoh dai whuzdli.
 26 'Et Elijah 'aw 'ilhunuh whunts'ih hubuts'un chaitílh'al. 'Ilhunuh tsandehl,

'aw 'en zeh. 'En yun k'ut Sidon nts'e keyah Zerephath 'et whut'en, 'aw 'en zeh buts'un wheyalh'a. ²⁷ 'Ink'ez hoh da Elisha, 'en nus whunilh'en huba unli inle, 'et hoh da yun k'ut Israel hubukák whulhjut, leprosy hiyulhni, hulai. 'Aw 'ilhunuh whunts'ih soo nacha'yitlil, 'et Naman, ndun Syria whut'en, 'aw 'en zeh soo na'yinla," ndo búlhni. ²⁸ 'Et Lizwif luglez húdelhts'i hidánts'o hoh tube huyulh húnlich'e. ²⁹ Ts'iyawh dihudíndel 'ink'ez hiyílhchoot njan keyah hukw'un nahítelhya. 'Ink'ez nyedoh dzulhyaz k'ut keyah whuzdla, 'et whukw'abah nihinílhyha whegha hitenoh ka. ³⁰ 'Ink'ez ts'iyannah hubutah lhuseya 'ink'ez nts'e hukwa' ninzun ts'ih whénya.

Dune ntsi' buyudínda

³¹ 'Aw 'et Galilee yun k'ut 'et keyah Capernaum whuz'ai whuz whinya. Nats'ulyis dzin totsuk whubodulh'eh. ³² 'Et njan hubodulh'eh tube huba hooncha. Bughunek hoolhtus hoh buk'une' hóot'en ka hubulh yalhtuk. ³³ 'Et nyo Lizwif luglez 'et 'ilhunuh dune, 'en ntsi' nududeh, 'i yudínda. Ndun ntsi' nududeh tube cho 'alzul, ³⁴ 'ink'ez 'utni, "Ah! Nyun Sizi Nazareth whut'en 'unint'ah. Ndet nets'u hukwa' ninzun? Nehoolah ka metalhtsilh 'et hukwa whusainya ih? Ndun inli t'enyunúszun! Yak'usda ba lubeshi bughoh hoolah, 'en 'unint'ah!" ³⁵ 'Et Sizi hukwa' yudáni hoh ndi yúlhni, "T'eduzinlh hoh buyáh hanaindaih!" Ntsi' nududeh, 'i ndun dune hubutah nayáno 'ink'ez yuts'u hanája. 'Ink'ez 'aw chayundíldal. ³⁶ Ts'iyannah hubugha ha'nejoot 'ink'ez whe hunelhújoot 'ink'ez 'ulhahudutni, "Ndi khunek ndai ho' 'int'ah? Ulhtus 'ink'ez buk'une' whut'en. Ndai ntsi' nududeh, 'i 'et ndi yulhni ibulh 'et yuts'u hanaja." ³⁷ 'Et yun k'ut nduhoolcho hoh hiyulh údants'o.

Sizi Peter bubez soo na'yinla

³⁸ 'Et Sizi Lizwif luglez dinadija 'ink'ez Simon bukoo ts'ih whuz whinya. 'Et Simon bubez dada nezul 'i be nduda. 'Et Sizi ndi hiyúlhni khun teh yula 'ooneh ka. ³⁹ 'Et kw'usuti yuzih nininya 'ink'ez yutus chah tez'a. 'Ink'ez dada hukwa' yudáni hoh ndi nezul ye nduda, 'i yuts'ahanádoolts'it yúlhni, 'ink'ez buts'ah hanaídelts'ut. 'Et 'ahoh dinadija 'ink'ez hubugha ná'unt'ai.

Nats'ulyis dzin 'et lhanah nduda, Sizi soo na'ubinla

⁴⁰ 'Aw 'et sa yun ts'ih tez'ah hoh ndunnah bulh dunekah lhelhyoo dédowh, 'i dada be nduda ts'iyannah Sizi higho bunínlia. 'Ink'ez ts'iyannah hubuk'edálnik 'ink'ez 'et soo ná'ubinla. ⁴¹ 'Ink'ez bulunah dune ntsi' nududeh, 'i 'ahúlzul hoh hubuts'uh hanaídede, 'ink'ez 'uhutni, "Nyun Yak'usda buYe' ndun Christ hiyulhni, 'en 'unint'ah!" T'eduzahnih ndo búlhni 'aw yahutélhtuk whunts'ih hubutl'achahoo'al, t'ehonínzun Christ 'en 'int'ah 'et huwa.

Yun k'ut Galilee ndulhcho hoh Sizi dune hubulh yalhtuk

⁴² 'Et 'om bun bundada sa hawhéni'ai 'et 'aw nehoolah ts'ih whenya. 'Et dune ts'iyannah hikunúta. 'Et nts'e usda highu nindel, hubughu tooya whuch'a né'hiyulh'en. ⁴³ 'Et ndo búlhni, "Udun keyah chah ndi khunek unzoo, 'i be yatelhtuk, dant'ah hoh nts'e whuba Yak'usda hubudayi cho unli hubudutesnilh. 'Et huba whusáts'ah'a." ⁴⁴ 'Et Galilee yun k'ut ndulhcho Lizwif whuluglez whuz lhghadínya 'ink'ez hubulh yalhtuk.

5

Dinah lhook ka' hut'en, 'en Sizi, "Anih," hubúlhni

¹ 'Ilhut dzin Gennesaret bun k'ut taba siyin, 'et dune ts'iyannah higha wezdel, Yak'usda bughunek hidutéts'o ka. ² Ts'i cho nankoh yasá'a yunilh'en. 'Et whunts'ih lhook ka' hut'en, 'en 'udun loombilh toonahugus. ³ 'Ink'ez 'ilhunuh Simon, 'en buts'i 'i yeínya. 'Ink'ez ndi yúlhni, "Nusyaz le 'inleh."

'Ink'ez 'et ts'i bet natl'adeda 'ink'ez dune, 'en wheoobudunilh'i. ⁴ Njan hubulh yalhtuk 'ustl'e' déjà 'et Simon ndi yúlhni, "Nts'e soo takhulh 'et nuwhuloombilh ts'iyawh tenahle 'utehlooh huba." ⁵ Simon ndi yúlhni, "Sumoodiwh wheni 'ulh'ek nduhooley hoh 'uts'et'en 'et whunts'ih 'aw hoonliyaz nts'ih chats'ílooh. Nedini t'eh 'et lhoombilh 'ilho tenaoosdlelh sih." ⁶ Te'huninla hoh lhook lhai hiyuzdlooh. Lhai huzdlooh k'et hubuloombil 'aw 'et lhk'enich'oohl. ⁷ 'Et 'onghunnah ts'i cho bet 'uhut'en, 'en 'anih hubuhútni hubula 'uhooneh ka. 'En chah whusahanki 'ink'ez 'ahunélht'et ts'i cho hidelhbun 'ink'ez 'aw 'et tewhéninlat. ⁸ Simon Peter, 'en whunalh'en hoh Sizi yubut dugwútsi be neninya 'ink'ez, "Sumoodihti sch'a naindalh, si lubeshi 'ulh'en usdli," yúlhni. ⁹ Peter 'ink'ez yulh 'ut'en, 'en ts'iyawh hubugha ha'nejoot 'ink'ez whe hunelhújoot ndi lhook lhe'neltsuk hoh hiyuzdlooh 'et huwa. ¹⁰ 'Et James 'ink'ez John Zebedee buye'kah, 'en Simon ts'udetni, 'en chah hubugha ha'nejoot 'ink'ez whehonehlhújoot. 'Et Sizi 'uyulhni, "Simon khun whenoljut gunih. K'an whuts'un dune ka' tant'ilh." ¹¹ 'Aw 'et yanahusdúki hoh ts'iyaintsuk 'et hiladetnik. 'Ink'ez hik'ah ts'ih 'uhóot'en ka hiyuntezdel.

Bukak whulhjut, 'en Sizi soo ná'yinla

¹² 'Et hukw'elh'az Sizi 'ilhunuh keyah 'ut'en. 'Ink'ez 'ilhunuh dune ndulhcho hoh bukak whulhjut, 'i leprosy hiyulhni, 'i be nduda, 'en chah 'et keyah whut'en. Sizi yutelh'en hoh yubut nachaneti, yuts'un tedudlih, "SMoodihti nyun hukwa' ninzun t'eh be ilhtus 'int'i, 'i be suna'ilhdeh," yulhni. ¹³ 'Et Sizi bula be yut'aghéznai 'ink'ez ndi yúlhni, "A, hukwa' nuszun hoh nyuna'alhde." 'Et ndunnah bukak whulhjut 'en 'aw 'et soo na'uja. ¹⁴ 'Et Sizi khunekti be njan ndi yulhni, "Khun teh 'uyoona ndudóni gunih! 'Et ndun náwhulnuk buts'inyalh 'ink'ez nyulh dahooja, 'et nyunoolh'en. 'Et Moses be' dustl'us k'ut daja ni hoh 'aw ts'ah'un cha'it'ah, 'et huba hoolah whutele, 'et whuz na'a Yak'usda bukw'uzdai k'ut hoonliyaz dutálhk'un. 'Et hobunolhtun dainja hoh soo na'inja," yulhni. ¹⁵ 'Et whunts'ih be nawhutnuk 'i Sizi Gri 'en bugha lha'un teh whulh 'úhudits'o. 'Et whu la gha ts'ih 'o nus hulai 'ink'ez 'o nus 'uhuneltsuk hoh highudulh, ndai hiye nduda, 'i ts'iyawh hubutelhyih hits'uh hukwa' ninzun. ¹⁶ 'Et dich'oh lhat nehoolah ts'ih wheyih tenadutedli ka.

Dune dechadusnik, Sizi soo ná'yinla

¹⁷ 'Ilhut dzin dune hoodulh'eh, 'et ndunnah Pharisee, 'ink'ez Moses be' dustl'us hodulh'eh chah, 'en Sizi highah delhts'i. Ndunnah yun k'ut Galilee 'ink'ez Judea, 'ink'ez Jerusalem chah, 'en whuz hahándel. 'Ink'ez neMoodihti ye ulhtus, 'i nduda soo ná'hubutelh'ilh ka, 'i yulh 'int'ah. ¹⁸ 'Aw 'et ndun dune dechadusnik, 'en kw'usuti be whusahúyankai, 'ink'ez Sizi bukoo ts'ih hits'uh hitoolhte hukwa' hiyulh'en. ¹⁹ 'Et whunts'ih dune hulai 'ink'ez 'aw 'uhiyooleh ghaít'ah. 'Et nduk bun hukw'ut, 'et hukw'ehiyilhti, 'i k'ehiyílhti. Bun hikonintsi 'ink'ez whuz hukwu hinínkai. 'Et soo buniz Sizi bubut yun nihíninkai. ²⁰ Ndoh ts'iyannah hubunilh'en 'et t'eoóninzun huba 'alha 'ohoont'ah 'ink'ez dechadusnik ndi yúlhni, "Dahooja dune nlubeshi ts'iyawh mba hoolah suli." ²¹ 'Et Moses be' dustl'us 'uk'ununa'úguz 'ink'ez Pharisee, dich'oh 'et ndonínzun, "Ndun dune 'en Yak'usda ch'a yalhtuk. Ndun na'dunúdzun hoh 'utni? Ndun lubeshi 'un tulhdelh? Yak'usda dich'oh zeh lubeshi 'un tulhdelh!" ²² 'Et Sizi nt'eoóninzun daja huninzun, 'ink'ez ndo búlhni, "Et di ka nuhdzi yuh 'et ndunahzun? ²³ Nts'e na'a simba huwa chahoolnah k'una'a uzdooni, 'Lubeshi mba hoolah suli,' k'us, 'Didinyih 'ink'ez nínya?' ²⁴ 'Et njan t'eoónóhzin yinkak dune ye', 'en ndi yun k'ut huba' hoont'ah ho' 'int'ah lubeshi 'un toolhdelh huba' hoont'ah ho' 'int'ah," ndo búlhni. 'Ink'ez ndun dechadusnik, "Didinyih, bukw'usinti nailchoot, 'ink'ez

nkooz ts'ih naindalh!" yulhni. ²⁵ 'Et 'ahoh ts'iyannah nalh didinya, yuk'usti nayílchoot 'ink'ez Yak'usda délhti hoh bukooz ts'ih whenaja. ²⁶ 'Et ts'iyannah huba hooncha. 'En chah Yak'usda hidálhti. Tube whe hunuljut, "Njan tube huwa 'et'en tune'ust'en, 'et ts'onalh'en," hutni.

Sizi, 'en Levi, "Anih," yúlhni

²⁷ 'Et hukw'elh'az Sizi 'az whenya 'ink'ez 'ilhunuh sooneya 'ilhunaoonughés'aih, Levi hiyulhni, 'en 'ut'en usda hoh yunilh'en, 'ink'ez ndi yúlhni, "Sunanyalh." ²⁸ 'Et didinya, 'ink'ez ts'iyaintsuk yula ditnik hoh yuk'ah ts'ih oot'en ka yuntezya. ²⁹ 'Et Levi bukooz ts'ih hooncha 'et dune hubugha na'tét'alh, Sizi ba. 'Et sooneya 'ilhunaoonughés'aih 'en chah hulan. 'Ink'ez 'uyoon chah hulan hubulh 'et húdelhts'i. ³⁰ 'Et ndunnah Moses be' dustl'us 'uk'ununa'úsduguz 'ink'ez Pharisee, 'en dich'oh highu yalhtuk 'ink'ez Sizi yugha hoodul'eh, 'en hubuhútni, "Et ndunnah sooneya 'ilhunaoonughés'aih 'ink'ez lubeshi 'uhulh'en, 'en di ka hubulh áh'ah 'ink'ez hubulh táhtnai?" ³¹ Sizi 'et ndo búlhni, "Ndunnah soo 'int'ah, 'aw yoo be duyun ka cha'hunízun. Nduda, 'en zeh yoo be duyun ka' huninzun. ³² Si chah whuz na'a zeh 'aw dune ts'ah'un 'int'ah, 'en bulubeshi ch'a bubení naháhunduntele huba ilah whusáya. 'Et lubeshi 'ulh'en, 'en bulubeshi ch'a bubení naháhundunooleh hubudutésnilh ka, 'et huba whusáya."

Dune saha'délya soo hukwa' hoodulhkut

³³ 'Et hiyoodulhkut, "Dahoont'ah huwa John yugha hoodul'eh, 'en lhat soo saha'dulyih 'ink'ez tenahududli? 'Ink'ez Pharisee hiye hoodul'eh, 'en chah 'et nduhút'en. 'Et whunts'ih nyun ngha hoodul'eh, 'oha'ah cha' hut'en 'ink'ez 'uhutnai cha' hut'en?" ³⁴ 'Et ndo búlhni, "Ndun bu'at whutele, 'en bulh dune 'en 'awhuz hiyulh 'ut'en, 'en do soo saha'dutélyelh ih? 'Awundooh! ³⁵ 'Et whusawhutelts'ulh, hoh t'eh bu'at whutele bughu nayítécholh. Hoh t'eh zeh soo sahá'hudutelyelh." ³⁶ 'Et be nawhutnuk 'i be whuts'o dul'eh, 'i be hubulh yalhtuk 'et njan ndutni, "Aw 'ilhunuh naih k'an ts'ih hayálhch'ul 'ink'ez 'ujut, 'i lhunaidunóokalh ghaít'ah. 'Et whuz na'a nduja t'eh, 'et ndi k'an naih, 'ink'ez naih jut bulh 'aw lhk'una'a oot'e ghaít'ah. ³⁷ 'Et doo chah, 'aw 'ilhunuh k'an mai too 'i 'aw 'ujut mai too 'uzus be yóolhdzeh ghaít'ah. 'Et ndúja t'eh, k'an mai too ndi 'ujut mai too 'uzus buk'e'ootéltulh. 'Et ts'iyawh mai too bé haitejulh. 'I 'uzus 'i chah tinta' tet'ilh. ³⁸ 'Et whunts'ih k'an mai too, 'i k'an mai too 'uzus be naooldzeh huba' hoont'ah. 'Et whuz na'a 'anelht'et soo' tet'ilh. ³⁹ 'Aw 'ilhunuh mai too 'ujut utnai t'eh, 'ahoh k'an mai too ka' noozin ghaít'ah. "Ujut, 'i zeh 'o nus unzoo,' hutni," 'et hubúlhni.

6

Yinkak dune ye', 'en nats'ulyis dzin, 'et chah huMoodihti unli ho' 'int'ah

¹ K'an whulhnat dune nalyis dzin, 'udechoo 'et hukw'elh'az 'ohoont'ah. Sizi 'ink'ez higha hoodul'eh, 'en bulh tl'o k'ut hedulh hoh, tl'o mai hiyooneye. 'Ink'ez hubula k'et nuhínulhmul 'ink'ez hiya'ah. ² 'Et bulunah Pharisee hubuhútni, "Daht'en hoh 'aht'en? K'an dzin nats'ulyis dzin 'ohoont'ah! 'Aw 'et nduhót'en huba cha'hoot'ah!" ³ Sizi ndo búlhni, "Hubudayi cho David daja 'aw ih hukw'e yachazulhtuk. 'Et hoh da David 'ink'ez yulh 'ut'en buye'élts'ul. ⁴ 'Et 'úja, Yak'usda bukoo daninya. Lhes 'i Yak'usda bugha yu'aih, 'i ndi lhes nawhulnuk 'aw 'en zeh hiyoo'ah huba' hoont'ah. 'Ink'ez 'i yilhchoot 'ink'ez ya'al. 'Ink'ez dulh 'ut'en, 'en chah bulah hubugha iní'ai." ⁵ 'Ink'ez Sizi ndo búlhni, "Yinkak dune ye', 'en njan nats'ulyis dzin, 'et chah huMoodihti unli ho' 'int'ah."

Nats'ulyis dzin 'et Sizi Gri dune bula ndúda soo na'yínla

⁶ 'Et hukw'elh'az 'o 'at nats'ulyis dzin Lizwif luglez daninya 'ink'ez whubodulh'eh. 'Et 'ilhunuh dune 'en chah 'et usda. Ndun bula nalhnih ts'ih 'aw yé nucha'ust'en. ⁷ Ndunnah Moses be' dustl'us 'uk'ununa'úsduguz 'ink'ez Pharisee chah soo cho highunli 'ink'ez hinilh'en daténih simba. 'Et dune nalyis dzin 'et tulih soo na'yooleh. 'Et hoonliyaz hiyulh nahó'ahl hukwa' hut'en. ⁸ 'Et daja huninzun t'eooninzun. 'Et dune bula yunucha'ust'en ndi yúlhni, "Didinyih 'ink'ez hubuniz sinyin." 'Et didinya 'ink'ez hubuniz ninínya. ⁹ 'Ink'ez Sizi ndo búlhni, "Hoonliyaz hukwa nuhoodutelhkut. 'Et nats'ulyis dzin, nts'e na'a netl'awhélts'ut, 'et ts'ah'un na'a 'uztenilh, k'us hoontsi' k'una'a 'uztenilh? Dune hiye khuna 'uztelhyih k'us daztelhtsah?" ¹⁰ 'Ink'ez 'et ts'iyawh hubunilh'en. 'Et ndunnah dune ndi yúlhni, "Nla ts'ih 'un lhk'ut dughelnih!" 'Et ndúja 'ink'ez bula k'uz ts'ih dachait'ah, 'et whuz na'a zeh ndunája. ¹¹ 'Et 'onghunnah tube whuske be honích'e, 'ink'ez dich'oh howu yahalhtuk Sizi dahítelih 'et hukwa.

Lanezi 'o 'at nanah whel'a, 'en Sizi 'utahaóobanla

¹² Hoh da 'et dzin njan ndúhooja, Sizi dzulhyaz k'ut tenadutedli ka whuz whenya. 'Ulh'ek nduhoolhyez Yak'usda ts'un tenadedli. ¹³ 'Et yihkai higha hoodul'eh, 'anih hubulhni. 'Et hubutah lanezi 'o 'at nanah, 'en 'utahaóobanla. 'En whel'a huboozi yúlhtsi. ¹⁴ Simon, 'en ndi boozi Peter, 'i yugha íde'ai. 'Ink'ez bulhutsin Andrew, James, John, Philip 'ink'ez Bartholomew. ¹⁵ Matthew 'ink'ez Thomas. James Alphaeus buye', 'ink'ez Simon 'en huwu daóodit'ah hiyulhni. ¹⁶ Judas, 'en James buye', 'ink'ez Judas Iscariot chah, 'en 'utenilh whu'iz buch'a niduteyalh.

Lhanah nduda 'ink'ez ntsi'nududeh, 'i be dzuh nuhúdeh, 'en Sizi soo ná'balh'en

¹⁷ 'Et whududlun ndus de yugha hoodul'eh hubulh hainya 'ink'ez lhts'e oodez'a nináhundel. Yun k'ut Judea whut'en, Jerusalem whut'en chah, 'ink'ez yatoo ba keyah Tyre 'ink'ez Sidon whut'en, 'en chah hulan 'ink'ez 'aw uzdooni ghaít'ah. Hiyoootuzélhts'ilh 'ink'ez soo na'butelih, 'et hukwa 'ilhuhowezdel. ¹⁸ 'Ink'ez ndunnah ntsi'nududeh 'i be dzuh nudeh, 'en chah 'et hudemhts'i, 'ink'ez soo na'balh'en. ¹⁹ Ts'iyanah hit'aghoonalh hukwa' hut'en. Ye ulhtus buts'uh haidults'uk, 'i be ts'iyawh hubudada 'et soo na'ubinla.

Sizi ndo búlhni, "Degha nus hoonzoo nohwhulh 'uhooja"

²⁰ Sizi 'et yugha hoodul'eh, 'en ts'iyawh hubutuniyú'en hoh njan ndo búlhni, "Nuhwheni tel'en ndet Yak'usda 'et hubudayi cho unli, 'et nuhwheni nuwhe'ilhdzun 'uhooont'ah.
'Et huwa degha nus hoonzoo nuhgha whults'ut.

²¹ Nuhwheni k'an buye'últs'ilh,
untehdai, 'et huwa degha nus hoonzoo nuhgha whults'ut.

Nuhwheni k'an ahtso, 'et tehdloh, 'et huwa degha nus hoonzoo nuhgha whults'ut.

²² Hoh t'eh dune nuhts'u hudutnik 'ink'ez 'aw hubulh 'óoh't'e ghaít'ah nuhwhulhtsi.

'Ink'ez nuhch'a yahutelhtuk hoh yinkak dune ye'
'en bugha, 'et huwa nuhoozi dutsun hitelhtsilh 'ink'ez 'un hitelhdulh.

'Et whuz na'a ndunóhowhulh'en t'eh,
'et degha nus hoonzoo nuhgha whults'ut.

²³ 'Et dzin ndóohooja t'eh, 'et hooteht'i 'ink'ez hoonaht'i hoh nduk tóolhuthluk. 'Alha 'uhooont'ah nduk yak'uz hooncha 'et nuhwhuba k'elha

whutele. Hoh t'eh whusawhutelts'ulh ndunnah whuz na'a zeh nduno-hotelh'ilh, 'et ndunt'ah butsuh whudelhdzulh, 'en chah niz dak'ez nus whu-nilh'en inle, whuz na'a zeh ndubuhalh'en 'et huwa.

Bulunah degha nus hoontsi' hubugha whútelhts'ulh

- ²⁴ "Et whunts'ih nuhwheni soode'a 'aht'ah, soo cho howahli!
Ndai be hoonah'i, 'i be 'uda ts'iyawh nuhwhuba 'uk'elha whuzdli 'et huwa.
²⁵ Nuhwheni ndunnah soo 'a'alh, nuhwheni chah soo cho howahli!
Nuhyé'telts'ulh! Ndunnah hédlah howahli!
Nuhdzi dúnteda 'ink'ez tehtso!
²⁶ 'Et huwahli ndunnah sóo nuhghu yalhtuk.
Hoh da nus whunilh'en la'dudil'i, 'en chah butsuh whudelhdzulh, 'et zeh ndó buhutni."

Nuhch'a húdetni, 'en hubuk'ehtsi'

- ²⁷ "Et whunts'ih ndez na'a ndun whudusni, nuhch'a húdetni, 'en buk'ehtsi'. Ndunnah nuhka cha'nizun, 'en chah sóo ne'bulh'en. ²⁸ Ndunnah nuhk'ehuyih, Yak'usda buts'un wúzoo ka huba tenadóohdli. 'Et ndunnah dzuh ne'nohulh'en, 'en chah huba tenadoohdli. ²⁹ Ndunnah nuhnen k'ut nuhnezkuk t'eh, huba 'awh nandunóoh'tah 'ink'ez 'ilhk'us ts'ih chah 'unohuhooleh. Ndán ndzoot nghu halchooz, ndzoozt'an chah buch'a yóntun gunih. ³⁰ Ts'iyannah hoonliyaz ka nuhts'u ka 'utni t'eh, hubugha íyoohlelh. Ndai nuhwhe'ilhdzun 'uyoón yílhchoot t'eh, buts'un ka na'doohtni gunih. ³¹ Nts'e na'a hukwa' nahzun dune danoh hotelh'ilh, 'et whuz na'a zeh nuhwheni chah 'et né'boolh'en. ³² Ndunnah nuhk'entsi', 'en zeh buk'ehtsi' t'eh, whuz na'a hoonzoo nahzun ih? 'Awundooh! Ndunnah lubeshi 'uhulh'en, 'en whunts'ih ndunnah buk'entsi', ts'iyawh hubuk'ehints'i'. ³³ Ndunnah soo ne'nohulh'en, 'en zeh soo ne'bulh'en t'eh, whuz na'a hoonzoo nahzun ih? 'Awundooh! 'Et lubeshi 'uhulh'en chah whuz na'a zeh 'et nduhút'en. ³⁴ 'Et ndunnah bughi zilh'ai t'eh, 'en nuhtl'anaítelts'ulh nuhzun t'eh, whuz na'a hoonzoo nahzun ih? 'Awundooh! 'Et lubeshi 'uhulh'en, 'en whunts'ih lubeshi 'uhulh'en ghe' hulh'ai 'ink'ez 'et 'uneltsuk zeh hubutl'anáh'a'ih. ³⁵ 'Et whunts'ih nuhch'a húdetni, 'en hubuk'eoohnts'i', 'ink'ez soo ne'boolh'en. Hubughe 'oohla 'ink'ez hoonliyaz nuhtl'unaítelts'ulh hukwa tsi hóhli gunih. 'Et whuz na'a ndaht'en t'eh, hooncha hoh nuhwhuba k'elha whutele. 'Et ndun yak'uz soo 'udedo 'int'ah, 'en k'una'a tileh. 'Alha ndunnah suchanailya chadusnih 'ink'ez ntsi' chah, ts'iyawh hubuts'un unzoo. ³⁶ 'Et nuhwhe'aBá nts'e na'a te'ninzun, nuhwheni chah whuz na'a zeh te'noohzin.

'Uyoón ba nahoooyeh gunih

- ³⁷ "Uyoón ba nahoooyeh gunih, doo ka sih 'aw nuhwhuba nahoodéh ghaít'ah. 'Uyoón k'ehoh'ah gunih, 'et sih 'aw nuhk'eholts'it ghaít'ah. 'Uyoón ba whunaoodoolhunah, 'et t'eh nuhwheni chah nuhwhuba whunaoodutet-nah. ³⁸ 'Uyoón hubugha' náh'ai, 'i nuhtl'anátedukulh ho 'int'ah. Lht'usúkat 'ink'ez lhai cho tele. 'Et niyulh'uz hoh bé haitekulh. 'Et 'uneltsuk hoh nuhbut nehítekálh. Daltsuk hubugha ináh'ai, 'et 'uneltsuk zeh nuhtl'anátedukulh 'et huwa." ³⁹ Be nawhutnuk be whúts'odul'eh, 'i be hubulh yailhtuk, "Soo ih chawhés'en 'uyoón chawhés'en nutéguz? 'Alha nahúlt'ah ka háwhedukai 'ahoolts'it! ⁴⁰ Hodul'eh 'ink'ez whuyodulh'eh, 'en 'aw yagha ndoh cha'it'ah. 'Et whunts'ih ndunnah soo ts'ah'un na'a hodul'eh, 'et hubodulh'eh 'en k'una'a 'uhutet'ilh. ⁴¹ 'Et di ka nyulhutsin lhusyaz buna k'et deztan, 'i nilh'en, 'et whunts'ih 'aw t'eoónuzinzun nyunch'oh duchun cho nyuna k'et deztan? ⁴² Nts'e na'a nyulhutsin 'uduténih, 'Sulhutsin nyo lhusyaz nyuna

k'ehanádoostan.' 'Et whunts'ih nyunch'oh duchun cho nyuna k'et deztañ 'aw chasá'en. Nyunch'oh duba naindzoo! 'Udechoo duchun cho nyuna k'ehanadintih. 'Et t'eh soo yutó'en hoh nyulhutsin nyoo lhusyaz 'i buna k'ehanaidontan.

Dune budziyuh be whudezbun, 'i be yatelhtuk

⁴³ "Et duchun dinzoo 'aw mai untsi', 'i bughi noot'ai ghaít'ah. 'Et whuz na'a zeh duchun dintsí' mai unzoo, 'i bughi noot'ai ghaít'ah. ⁴⁴ 'Et whuz na'a zeh bumai bugha duchun dant'ah 'int'ah t'enudzun. 'Et whuz na'a zeh ndi mai unzoo, figs hiyulhni, 'aw whus chun bughu hiyoonye ghaít'ah. 'Ink'ez whuz na'a zeh whuscho chun, 'aw mai cho ndoh whut'en bughu hiyoonye ghaít'ah. ⁴⁵ 'Et whuz na'a zeh dune unzoo, ndai unzoo budzi yuh hoonli, 'i bugha khunek unzoo be yalhtuk. 'Ink'ez dune untsi', ndai untsi' budzi yuh hoonli, 'i be khunek untsi' be yalhtuk. Ndez na'a njan nduwhutni, dune di budzi yuh be whudezbun, 'i be yatelhtuk.

Sizi Gri bughunek soo cho whulh ts'ooyin

⁴⁶ "Ink'ez di ka 'SMoodihti, sMoodihti,' sudahni, 'ink'ez daja nuhwhudusni 'aw húkw'u nucha'zaht'en? ⁴⁷ Ndán sts'un teyih 'ink'ez soo zelhts'ai 'ink'ez hukw'ú ne'ut'en, 'et ndan 'uhint'ah 'en bunwhuntelhtun. ⁴⁸ Ndez whuz na'a 'et ndúhint'ah. Dune bukoo 'uwhutelih hoh, soo ye yoh hahónkai 'ink'ez bukoo buk'uwhuz'ai 'et tse k'ut newhúte'ah. 'Et ndet too telhbun t'eh, 'et ninli ulhtus bukoo whut'agheznai, 'et whunts'ih bukoo 'aw dachahóonil. Tse k'ut niwhuni'ai 'et huwa. ⁴⁹ 'Et whunts'ih ndunnah sughunek yoozelhts'ai 'ink'ez 'aw hik'unucha'ust'en t'eh, 'et ndez na'a njan nduhint'ah. Dune yun k'ut bukoo 'uhoonla. 'Ink'ez bukoo buk'uwhuz'ai 'i 'aw cha'hiyílil. 'Et ninli ulhtus bukoo whut'agheznai 'et 'ahoh nawhunet'ai. Tube wheónonujut hoh hoolah whuzdli."

7

Nehughan whumoodih yuba ne'út'en, Sizi soo ná'yinla

¹ 'Et dune Sizi yoozelhts'ai ndet hubugha ndo búlhni, 'aw 'et ts'iyawh lhaoedinla. 'Ink'ez keyah Capernaum huwhutni whuz lhgha dinya. ² 'Ink'ez njan 'et keyah whut'en 'et 'ilhunuh nehughan whumoodih yuba ne'út'en. Tube yúk'entsi', 'en tube nduda 'ink'ez 'aw 'et datetsah. ³ 'Et ndun nehughan whumoodih Sizi yulh údants'o 'ink'ez Lizwif tsuh whudelhdzulh, 'en whuz whebalh'a. Sizi hiyoodutélhkut nehughan whumoodih yuba ne'ut'en soo na'yooleh ka. ⁴ 'Et Sizi highu nindel hoh soo tube cho hits'uh tedudlih 'ink'ez 'uhiyulhni ndun nehughan whumoodih, 'en tube unzoo ho' 'int'ah yuba ne'ut'en, 'en soo na'yooleh ka. ⁵ "Nedune, 'en hubuk'entsi' 'ink'ez 'en bugha Lizwif buluglez neba 'uhóonla," hiyulhni. ⁶ 'Et hubulh tez'as. 'Et Sizi koo wheghah uyalh hoh, 'et ndan nehughan whumoodih 'en hubulh dune Sizi hits'ú whebalh'a. Hidudezdel 'ink'ez Sizi 'uhiyúlhni, "Nehughan whumoodih njan ndunyúlhni, 'SMoodihti 'ants'i 'et dzuh ne'dudoldzut gunih. Sukoo datányalh huba 'aw soo cha'lhudzooh 'et huwa. ⁷ 'Et si chah 'et ndunuszun 'aw soo cha'lhudzooh ndudutésyalh huba. 'Et whunts'ih 'ants'ih nghunek be dini t'eh, 'et suba ne'út'en soo na'óotneh. ⁸ 'Alha si chah 'onghunnah sgha ndoh 'uhint'ah hoh hukwa' huninzun tune' satelh'en. 'Et si chah whuz na'a zeh nehughan huba gha ndoh 'ust'ah. 'Et 'ilhunuh, 'Inyalh!' dúsni t'eh, 'et 'ahoh 'aw 'et teyalh. 'Et 'uyoon, "Anih!" dúsni t'eh, 'et 'ahoh sts'u teyih. 'Et suba ne'út'en, 'Njan dineh!' dúsni t'eh, 'et 'ahoh 'et ndút'ih.' " ⁹ Sizi ndun dune daja ni yulh údants'o hoh tube buba hooncha. 'Et ndunnah hinedulh, 'en hubuts'un nalhú'a 'ink'ez ndo búlhni, "Israel ndulhcho keyah ndun dune

'en k'una'a 'aw 'ilhunuh ndulhcho be huba 'alha' hoont'ah nachasulhtek." ¹⁰ Ndunnah yuts'un whel'a ndun nehughan whumoodih bukoo ts'ih nahundel, 'et ndun yuba ne'ut'en nduda, 'en 'aw dáchait'ah hoh highu danádel.

Dune dazsai, Sizi dinaidilhti

¹¹ 'Et 'om bun dzin Sizi njan keyah Nain huwhutni, yugha hoodul'eh bulh, 'ink'ez hooncha hoh lhannah hinedulh, 'en chah ts'iyawh whuz haídel. ¹² Njan keyah na'nestl'oo ghu ti wheghah nihúnindel, 'et khunyaz dune dazsai hidihídezkai. 'Et 'ama tsandelh, 'aw 'ilhunuh zeh buye' 'int'ah. 'Et keyah whut'en, 'en lhanah yulh údulh. ¹³ 'Et neMoodihti ya'en hoh yugha te'nanzin 'et ndi yúlhni, "Intso ilah!" ¹⁴ 'Ink'ez be nesulhti yughu neninya 'ink'ez yut'agheznai. Ndunnah yelhtelh, 'en chah 'ilhuz nihunindel. 'Ink'ez 'et 'utni, "Chilh dune didinyih nyudúsni!" ¹⁵ 'Ink'ez ndun dune dazsai nduk ninatl'adenda 'ink'ez yawahéniltuk. 'Ink'ez Sizi, 'en be'ama tl'anayalhti. ¹⁶ Ts'iyannah hunelhújoot, 'ink'ez Yak'usda hidélhti hoh njan duhutni, "Njan netah nus whunilh'en hooncha unli, 'en whusainya." 'Ink'ez 'et chah nduhútni, "Yak'usda budune hubutah nunasja." ¹⁷ 'Et Judea yun k'ut nduhoolcho 'ink'ez 'et whunat keyah nduhoolcho chah, ts'iyannah hiyulh údants'o.

John dune too be 'ulh'en yugha hoodul'eh, 'en Sizi ts'un whebalh'a hiyoodutélkut ka

¹⁸ John yugha hoodul'eh ts'iyawh ndi hiduténilh dahooja 'et. ¹⁹ 'Ink'ez nanah 'anih hubúlni 'ink'ez Sizi ts'un whebalh'a hiyoodutelhkut ka, "Nyun ih whusatánya inli, k'us 'uyoon tulih ka ts'ító'o'en?" ²⁰ 'Et Sizi highu ni'az 'ink'ez 'uhiyúlhni, "John dune too be 'ulh'en, 'en nts'u nételh'a nts'oodutelhkut ka, nyun ih whusatánya inli, k'us 'uyoon tulih ka ts'ító'o'en?" ²¹ 'Et 'ahoh ndunnah hunduda 'ink'ez buka, 'ink'ez ntsi' nududeh buyudínda, 'en chah lhanah hoh soo na'balh'en. Chawhés'en, 'en chah honilh'en butl'anáho'ai. ²² 'Et Sizi John yugha hoodul'eh ndo búlni, "John buts'un ah'us. Ndet whunelh'en 'ink'ez whudáhts'o 'et dóohtni, nts'e na'a chawhés'en honilh'en nasdli. Nuchahúdel, 'en nahúdelh nahusdli. Bukak nódutsi', leprosy hiyulhni, 'en chah soo ná'binla. Cha'hudust's'uk, 'en chah 'ahudits'o nahusdli. Yahadla, 'en chah dináhudidel. Tel'ennah, 'en chah khunek unzoo, 'i be hubulh yaíntuk ho' hint'ah. ²³ 'Ink'ez ndunnah si sugha buba dzuh chahoolah, 'en degha nus hoonzoo bughá whults'ut." ²⁴ 'Et John khunek yuba na'a whenáhet'az, 'aw 'et Sizi John yugha yatelhtuk hoh 'ilhunahwésdel njan ndo búlni, "Dune chahóot'ih ts'ih ndet hukwa tsi hooqli whuteh'ilh? Tl'o ghazilh nónulhts'i, 'i tulih teh'ilh nahzun ih? ²⁵ Ndet simba hukwa tsi hooqli whuteh'ilh? Dune naih duchut 'i be soo naduja, 'en tulih teh'ilh nahzun ih? 'Alha ndez whuz na'a soo nadut'ih, 'en lhai sooneya ts'iya hulhtsih 'ink'ez hubudayi cho bukoo huwhut'i. ²⁶ 'Et ndet simba hukwa tsi hooqli whuteh'ilh? Nus whunilh'en tulih? A! 'Alha 'un whudúsni nus whunilh'en ba nus unzoo 'et nulh'en! ²⁷ 'En bugha 'uk'une'usguz inle hoh njan ndutni, 'Soo zilhts'ai, khunek suba na'a, 'en ntsuh tes'alh. 'En ti lhutanyalh, mba lhaooodutelih 'et wheni.'

²⁸ 'Alha 'un whudúsni, nus whunilh'en ndunnah whuzdli, 'en hubutah John dune too be 'ulh'en, 'en degha nus ncha 'int'ah. 'Et whunts'ih nts'e Yak'usda hubudayi cho unli, ndan degha nyoh 'int'ah, 'en 'o nus uncha unli." ²⁹ Ts'iyannah dune 'ink'ez sooneya 'ilhuhunughes'ah, Sizi daja ni hidants'o hoh Yak'usda buba 'alha' yija, John 'en too be' balh'en 'et huwa. ³⁰ 'Et whunts'ih ndunnah Pharisee 'ink'ez Moses be' dustl'us k'ut daja ni hoh beni hoonli be yalhtuk, 'en ts'iyawh Yak'usda nts'e buts'uh hukwa' nizun, 'ants'ih 'et 'un hubutelhdel. 'En 'aw John too be cha'bilel 'et huwa. ³¹ 'Et

Sizi ndo búlhni, "Dune k'an yuk'edídeh nts'e na'a simba nuhwhuba lhzih niboosdlelh, k'us dant'ah dune hinli, 'et nuhwhudutésnilh. ³² Ndez na'a njan nduhínt'ah, 'uskehiaz duhúlt'ah hoh hiya'alh be 'e'óoket 'et hudelhts'i. 'Ink'ez lhts'u háhudih hoh njan ndulhódutni,
 'Be ts'ujun be nuhwhuba ts'ujun,
 'et whunts'ih 'aw chanuzahdak.
 'Ink'ez nuhwhuba tso ts'inli,
 'et whunts'ih 'aw chasáhtsol'

³³ Soo cho whunulh'en, John dune too be 'ulh'en whusainya, 'aw lhes chas'al 'ink'ez mai too chah chasnai. 'En 'údahni 'Ntsi' nududeh buyudínda, dahni. ³⁴ 'Et yinkak dune ye' whusainya, 'a'alh 'ink'ez 'utnai. 'Et 'udáhni, 'Ndun dune 'en bucha hooncha 'ink'ez tanutnai. Sooneya 'ilhunanowes'aih 'ink'ez lubeshi 'ulh'en, 'en hubudune, dánhni. ³⁵ 'Ink'ez ndunnah hiye whunih na'dudil'i, 'en bugha ndi be whútnih, 'i ts'ah'un na'a 'uhóoja."

Ts'eke lubeshi 'ulh'en bulubeshi lhai, Sizi ts'iyawh yuba whunaodelhúnah

³⁶ 'Et Pharisee 'ilhunuh yughu nusiya dudulh ná'oot'ah yulhni. 'Et whuz bukoo ts'ih yughu danínya. 'Et kw'uzdai yeyoh 'int'ah, 'i yuzih nilget ute'ulh wheni. ³⁷ 'Et 'ilhunuh keyah whut'en, 'en lubeshi 'ulh'en ts'eke. 'Et Pharisee bukoo ts'ih 'et Sizi 'a'alh yulh údants'o hoh whuz whinya. Ndi k'unutsutjul sooltsun, 'i dezti, 'i alabaster luboodai bé yalhdze, 'i whuz wheya'ai. ³⁸ 'Et yut'ak suyin. Utso 'ink'ez bunatsultoo buke k'eidilt'ik. 'I dutsga be yuna'ulhdeh, 'ink'ez buke naidunants'ooz. 'Ink'ez ndi k'unutsutjul sooltsun, 'i dezti, 'i be yuke yulhlho. ³⁹ 'Et ndun Pharisee, ndun 'anih yudani, dich'oh na'dudutni, "Et ndun nus whunilh'en unli t'eh, t'eoónózin da dant'ah ts'eke 'int'ah yut'aghunah. 'En lubeshi 'ulh'en 'int'ah." ⁴⁰ 'Et Sizi ndi yúlhni, "Simon, hoonliyaz nyudutésnilh." "Nehodulh'eh dini," ni. ⁴¹ 'Et Sizi ndi yúlhni, "Ilhunuh sooneya yughu sulh'ai nanah dune ghe 'ulh'ai. 'Ilhunuh 'en 500 unli sooneya, 'ink'ez 'ilhunuh 50 unli sooneya. ⁴² 'Aw hiba k'elha hitelhtsilh chahít'ih. 'Et nahúlt'ah huba whuladetnik. 'Et sudini, k'us ndan degha nus yuk'entsi?" ⁴³ 'Et Simon 'utni, "Si ndunúszun, ndun degha nus lhai yuba ladetnik, 'en degha nus yuk'entsi'." 'Et Sizi ndi yúlhni, "Soo ts'ah'un na'a 'udenja." ⁴⁴ 'Et ndun ts'eke ts'un nalhu'a 'ink'ez Simon 'uyúlhni, "Ndun ts'eke nilh'en ih? Nkoo daníya hoh 'aw too suba 'et néchainkal suke be tóona'tesgu huba. 'Et whunts'ih ndun ts'eke dunatsúlttoo be suke nainelhtsul 'ink'ez butsigha be yuna'ahlde. ⁴⁵ Nyun 'aw na'duts'oos be dahooja chasudínel. 'Et whunts'ih ndun ts'eke 'udechoo danínya whuts'un 'aw suke naduts'oos stl'echa'ínil. ⁴⁶ 'Aw sutsi khe be chaílhoh 'et whunts'ih ndun ts'eke ndi khe be suke yulho. ⁴⁷ 'Et huwa ndi ndusni, bulubeshi lhai ts'iyawh huba whunaodelhúnah. Nilh'en ih 'ilhuz tube skentsi' ho' 'int'ah? 'Et whunts'ih ndunnah hoontsolyaz lubeshi huba hoolah unli, 'en whunts'ih hoontsolyaz zeh whe skehintsi'." ⁴⁸ 'Ink'ez Sizi ts'eke ndi yulhni, "Nlubeshi ts'iyawh mba hoolah suli." ⁴⁹ 'Et ndunnah 'onghunnah kw'uzdai k'ut na'hut'ah, 'en dich'oh 'ulhódutni, "Ndun, ndan ho' 'int'ah? Lubeshi 'i whunts'ih yuna'ahldeh?" ⁵⁰ 'Ink'ez ts'eke ndi yulhni, "Mba 'alha' hoont'ah, 'i be dinjih. 'Aw 'et ndzi dezghel hoh naindalh!"

8

Lhanah ts'ekoo 'en Sizi hila 'ut'en

¹ 'Et hukw'elh'az Sizi kedutezut keyah whucho 'ink'ez keyah whuyaz totsuk, ndet hoh Yak'usda hubudayi cho unli, 'et hubugha khunek unzoo, 'i be yatelhtuk. 'Et ndunnah lanezi 'o 'at nanah, 'en chah hiyulh 'ut'en. ² 'Ink'ez ndunnah ts'ekoo 'en chah hiyulh 'ut'en hoh ntsi' nududeh, 'i buyudínda 'ink'ez

bukak nódutsi', 'en ts'iyawh soo na'binla. Mary Magdala whut'en, 'en chah 'ut'en. 'En 'int'ah skwunlai 'o 'at nankoh ntsi' nududeh, 'i buyáh hanaid-edé. ³ 'Ink'ez Joanna, Chuza bu'at, 'et Chuza, 'en Herod bukoo hudelhts'i bumoodih unli, 'en bu'at 'ink'ez Susanna, 'ink'ez 'uyoon lhanah chah, ndai hiyit'i, 'i be hila 'ut'en.

Ha'nule bugha whúts'odul'eh

⁴ 'Et njan nduhoolhcho keyah whut'en 'ilhuhowezdel 'ink'ez Sizi nawhut-nuk, 'i be whuts'odul'eh, 'i be yatelhtuk, ⁵ "Ilhunuh 'a'nule 'en 'a'unteleh ka. 'Et 'a'nule 'et ndi ninutsut 'et bulah 'ants'ih 'et nts'oh nanánkat. 'Ink'ez hik'ut nusúdel 'et dut'aiyaz chah ts'iyawh yuneldel. ⁶ 'Et bulah chah tse tah nanánkat. 'Et ndet hanálhyi hoh 'et ndi hanulhyeh, 'i too hoolah 'et huwa yanúdezgi. ⁷ 'Et 'onghuh, 'i chah whus cho tanínkat. 'I chah whus cho bulh taninyi 'ink'ez whus cho 'i bugha chaniyel. ⁸ 'Et 'onghuh, 'i yun unzoo, 'i k'ut nanánkat, 'ink'ez hanálhyi. 'Ink'ez bumai 'i lhan'un teh lhai suli lanezi lanezi (100) 'et 'uneltsuk suli." 'Et hukw'elh'az 'et tube cho ndo búlhni, "Ndunnah budzo hooni, 'en hiyoozólhts'a huba' hoont'ah!"

Di ka Sizi ndi be nawhutnuk, 'i be whuts'odul'eh, 'i be hubulh yalhtuk?

⁹ 'Et yugha hoodul'eh hiyoodulhkut, "Ndi be whuts'odul'eh, 'i daja ni hoh 'utni?" ¹⁰ 'Et ndo búlhni, "Ndi Yak'usda hubudayi cho unli huba whe' hoont'ah hooyah, 'i bugha t'eoonoohzeh ka, 'i 'uda nuhtl'awhélts'ut. 'Et whunts'ih 'onghunnah ndi khunek be whuts'odul'eh, 'i whuz na'a zeh hubulh yalhtuk. 'Et sih,
'Honah'en 'et whunts'ih 'aw chahuwhés'en.
'Et hodits'o 'et whunts'ih 'aw t'ehonízun daja ni."

A'nule bugha whuts'odul'eh, 'et Sizi neba hukw'u nuhúlhye

¹¹ "Ndi be nawhutnuk, 'i be whuts'odul'eh, 'i ndi 'et ndutni. Ndi mai 'anukat, 'i Yak'usda bughunek 'int'ah. ¹² Ndunnah ti 'int'ah, 'en Yak'usda bughunek hidits'o 'ink'ez netsudule ndi khunek budzi be hanaída'ah. 'Et whuz na'a 'aw huba 'alha cha'hoot'ah 'ink'ez 'aw hudoojih ghaít'ah. ¹³ Ndai tse tah nanánkat, 'i li'int'ah hodits'o 'ink'ez huhóont'i hoh khunek hiyilhchuk. 'Et whunts'ih 'aw bughih hoolah. 'Et huwa 'astl'iyaz huba 'alha' hoont'ah. 'Et 'ahoh bé tink'us hunint'uk, 'i be tinch'a haninkat, 'en 'uhint'ah. ¹⁴ Ndai ndi whus cho tah nanánkat, 'i 'et njan nduwhutni, dune Yak'usda bughunek hidits'o 'et whunts'ih ndi yun k'ut huwu ni ts'inli, ndi yun k'ut soo uzde'a 'uhoont'ah, 'ink'ez ndai ndi yun k'ut huhoont'i tune' hut'en, 'i ts'iyawh whus cho 'i bulh 'ilho ndunt'ah. 'Et huwa 'aw lhaooodoolneh wule ghaít'ah. ¹⁵ 'Et whunts'ih ndai yun unzoo, 'i k'ut nanánkat, 'i ndez na'a njan nduwhutni, 'en huhóont'i 'et khunek hidants'o 'ink'ez budzi unzoo hoh hiyoontun. Nts'oh dahoont'ah whunts'ih 'ilhuz hiyilhchoot. 'Et whuz na'a bumai lhai tele.

Et nts'e too dezkl'un, 'i hukw'usú'ai, 'et hukw'e yi'ai, 'i Sizi bughu yalhtuk

¹⁶ "Dune too dezkl'un 'ink'ez 'i nahidilhk'ah 'ink'ez 'aw 'oosa' yuk'uz koo naídoo'ah ghaít'ah. K'us kwusuti t'ah ts'ih whuyuh neyoo'alh ghaít'ah. 'Et nts'e too dezkl'un, 'i hukw'usú'ai, 'et hukw'e yi'ai. 'Et sih ndunnah dahúndelh ts'iyawh 'i be hinoolh'en. ¹⁷ Ndez na'a 'et ndúhoont'ah, ndai nest'i, 'i whunts'ih nus de 'et ts'iyawh haootekulh. Ndai whu'iz 'uts'ulh'en hukwa' ts'ut'en, 'i 'et whunts'ih ts'iyannah t'ewhuntezeh. 'I ts'iyawh ndet whét'en, nus de ts'et haootekulh. ¹⁸ 'Et soo cho howahli nts'e na'a ndi khunek dutéhts'o. Soo ts'ah'un 'alha ndunnah hoontsolyaz t'ehonínzun, 'en 'o nus lhat t'ehonínzun, 'et hubugha whútelts'ulh. 'Ink'ez ndunnah hoonli t'ewhunúszun, hoonts'olyaz 'uhudits'o, ndai 'aw 'i hiyít'i, 'i huninzun, 'et whunts'ih 'i bughu nayútelcholh."

Sizi be'ama 'ink'ez bulhutsinkah bulh hiyulh yatelhtuk hukwa' huninzun

¹⁹ 'Aw 'et be'ama 'ink'ez bulhutsinkah bulh, hits'un hukwa' hut'en. Dune hulan 'et huwa 'aw highah niooya ghaít'ah. ²⁰ Bulunah ndi hiyulhni, "Nyu'ama 'ink'ez nyulhutsinkah bulh, 'az nahudelhúya, nyuhuntelh'ilh hukwa' huninzun." ²¹ 'Et ndo búlhni, "Ndunnah Yak'usda bughunek yoozélhts'ai 'ink'ez hik'une' 'ut'en, 'en se'ama 'ink'ez sulhutsinkah hinli, ho' hint'ah." ²² 'Et hukw'elh'az 'ilhuh dzin yugha hoodul'eh bulh ts'i be handel. 'Ink'ez "Nyan uztooke," hubúlhni. 'Aw 'et nus níhuzki. ²³ Nus níhuzki 'et Sizi 'ahoh nanesti. Khunyaz hubulh taoodelts'ut 'ink'ez 'aw 'et ts'i too be táguteh. 'Ink'ez tube wheónonujut hoh hube naints'i. ²⁴ 'Et ts'enahinílhts'ut, "NeMoodihti, neMoodihti, 'aw 'et too ts'uteghan!" hiyúlhni. 'Et ts'enahinílhdzut, 'ink'ez didinya hoh too k'ut nilhts'i 'i khunek ulhtus 'i be yuts'un nahezya. 'Et 'ahoh k'ah na'hooja 'ink'ez dínghel. ²⁵ 'Et ih, "Nuhwhuba 'alha' 'ust'ah, dáhooja?" hubúlhni. Ts'iyawh whehunelhújoot 'ink'ez huba hooncha. 'Et 'ulhódutni, "Ndun dune, 'en ndan unli ho' 'int'ah? Nilhts'i 'ink'ez tatsi 'i whunts'ih dah yúlhni, 'aw 'et yuk'une' 'ut'en."

Dune ntsi' nududeh, 'i buyidélhts'i, Sizi soo ná'yinla

²⁶ 'Aw 'et Gadaren hubuyun k'ut yahuzki. 'Et njan 'et Galilee howanch'az whuz'ai. ²⁷ 'Et dehainya 'et 'ahoh dune 'et keyah whut'en yududezya. 'En sa whuts'un ntsi' nududeh, 'i lhai buyidélhts'i. 'En tsan 'et nuya, 'ink'ez 'aw koo chailah, 'et ts'un k'ut whut'i. ²⁸ 'Et Sizi yutelh'en hoh yuts'u hahuyih 'ink'ez yubut nacháneti. 'Ink'ez tube cho yuts'u téeduli, "Sizi nyun soo deghan doh Yak'usda buYe' 'unint'ah! Ndet suts'u hukwa' ninzun? Nts'u tedusdlih, dzuh nusilhdzut ilah!" ²⁹ 'Et 'uda ndi ntsi' ndudeh, 'i khunekti be ndo búlhni ndun dune ye yáhanadoodeh ka. Hoh da 'ut'es tl'ool be hiyulhghel bula 'ink'ez bukechun chah, 'et whuz na'a highunli inle. 'Et whunts'ih lhat hoh ndi ntsi' ndudeh, 'i yilhchukw hoh ndi 'ut'es tl'ool lhtánuduch'us 'ink'ez ndi ntsi' nududeh, 'i 'en dune chahóot'ih ts'ih whuz wheníyukw. ³⁰ 'Ink'ez Sizi 'en yoodulhkut, "Ndai nyoozi?" "Legion," yulhni. Lhanah ntsi' nududeh, 'i ye yudúlt's'i 'et 'utni. ³¹ Ntsi' nudúdeh, 'i Sizi hits'u tedudlih 'et nyo tsak'et whucho whut'l'ah hoolah, whuz teh netólh'a gunih, hiyúlhni. ³² 'Et goso lhai hoh 'onghun whenun núlh'as. 'Et ntsi' nududeh, 'i Sizi hits'u tedudlih goso hubuyidoodeh ka. 'Et hubutl'aho'ai. ³³ 'Et ntsi' nududeh, 'i dune, 'i buts'uh haídande hoh goso buyídande. 'Aw 'i bulh goso bulh wheghah helghaz 'ink'ez too buhanghan. ³⁴ 'Et ndunnah goso ghuhinli 'en dahooja honalh'en hoh ts'iyawh whehélghaz. Hedulh hoh keyah whunat whut'en 'ink'ez keyah whut'en ts'iyawh ndo badáni. ³⁵ 'Et ndunnah dune hodánts'o hoh 'et whuz whehánel 'ink'ez honalh'en. 'Et Sizi highu nindel hoh 'et ndun dune ndun ntsi' nududeh, 'i buts'uh hanaídede, 'en Sizi yuk'etl'a usda hoh hinalh'en. Naih be dune unli 'ink'ez beni chah bugha nádelts'ut hoh soo 'int'ah. Ts'iyawh hinalh'en 'ink'ez hunelhújoot. ³⁶ 'Et ndunnah dahooja honalh'en, 'uyoón chah hudáni 'et dahooja ndun ntsi' nududeh, 'i buyudínda 'aw 'et dujih. ³⁷ 'Et ndunnah Gadaren huwhut'en 'et whunat whut'en nduhóolhcho hoh whe hunelhújoot. 'Et huwa Sizi hubuch'a naoja hiyúlhni. 'Et ts'i be naja 'ink'ez hugho whenaduki. ³⁸ 'Et ndun dune ndi ntsi' nududeh, 'i buts'uh hanádide, 'en Sizi yuts'u tedudlih yulh útenilh hukwa' ninzun. 'Et whunts'ih Sizi whenáyalh'a 'ink'ez ndi yúlhni, ³⁹ "Nkoo ts'un naíndalh 'ink'ez dáhoolcho hoh Yak'usda mba daja, ts'iyawh hubudóni." 'Et whenaja 'ink'ez keyah ndulhcho hoh ts'iyannah Sizi dahoolhcho yuba' hóonla ts'iyawh 'et hubugha dune ndo budáni.

Sizi Jairus butse' dinaidilhti, 'ink'ez ts'eke Sizi yunaih t'aghéznai

⁴⁰ 'Aw 'et nyan whenadúki. Ts'iyannah Sizi hikunúta hoh whusanaduki ts'iyannah huhóont'i hoh nahíyet'en. ⁴¹ Soo yanasdúki ibulh 'ahoh dune Jairus yughu ninya. 'En Lizwif hubuluglez whumoodih 'int'ah. Yubut nachaneti 'ink'ez yuts'u tedudlih bukoo ts'ih yulh nátoot'as ka. ⁴² 'Ilhunuh zeh butse', lanezi 'o 'at nat be naooduzuk bat'en. 'En 'aw 'et dáwhenintsai. Sizi, 'en Jairus bukoo ts'ih yulh nátest'az. 'Aw 'et 'ilhohuwezdel lhanah higha wézdel. ⁴³ 'Ilhunuh ts'eke tube dzuh nuzut lanezi 'o 'at nat naoodezulh 'et dúwhulyez hoh 'uskai 'iyúlh'en, yoo be dýyun lhanah chah hukwa' hiyalh'en. 'Et hukw'uz duzooneya ts'iyawh hoolah yulhtsi, 'et whunts'ih nus zeh lhe'enilh. ⁴⁴ Ndun 'en ts'eke Sizi yut'ah ts'ih yughu ninya 'ink'ez nayits'uz, 'i yus ts'ih but'ah 'et yut'agheznai. 'Et 'ahoh uskai 'uyulh'en 'i 'ustl'e' 'uja. ⁴⁵ 'Et Sizi 'utni, "Ndan 'uja st'aghéznai?" "Ts'iyawh wheni ilah 'uts'uja," hutni. Peter 'ink'ez ndunnah yulh 'ut'en, 'en 'uhutni, "Nemoodih lhe'huneltsuk nyunat hahúneldo 'ink'ez nyuholghas. 'Ink'ez di ka' dini 'Ndan st'aghéznai?" dini?" ⁴⁶ 'Et Sizi 'utni, "T'eoonuszun 'ilhunuh st'agheznai. Be ulhtus, 'i sts'u hadélts'ut 'et nt'eoonuszun." ⁴⁷ 'Et ndun ts'eke t'eoonanzin 'aw yuch'á ntool'ih ghaít'ah. Dulduz hoh yughu ninya 'ink'ez yubut nachaneti. 'Et ts'iyannah nalh Sizi ndi yúlhni ndet huwa yut'agheznai 'ink'ez daja hoh 'ahoh soo ná'uja. ⁴⁸ 'Ink'ez ndi yúlhni. "Sútse' mba 'alha' hoont'ah 'et huwa soo na'inja. 'Aw 'et ndzi dezghel ho' 'unint'ah naindalh." ⁴⁹ 'Et 'Awhuz ndun ts'eke yulh yalhtuk hoh Lizwif hubuluglez whumoodih bukoo usda, 'en yughu ninya 'ink'ez ndi yúlhni, "Ntse' dazsai. Whute ndun dune hoodulh'eh, 'aw 'o 'un dzuh nilhdzut ilah. 'Aw 'et dazsai ho' 'int'ah." ⁵⁰ 'Et Sizi yulh údants'o hoh Jairus ndi yúlhni, "Whenoljut gunih, njan 'et zeh mba 'alha' hot'e, 'ink'ez soo na'tetnilh ho' 'int'ah." ⁵¹ 'Ink'ez bukoo ts'ih daninya. 'Et 'aw 'uyoon chah dachaóosya. Peter, James, John, 'ink'ez ndun 'uski be'abá 'ink'ez be'ama chah, 'en zeh dahóodelh. ⁵² 'Et ts'iyannah tso yahalhtuk 'ink'ez hik'etedudlih. 'Et Sizi ndo búlhni, "Ahtso ilah! 'Aw dachaitsal 'ants'ih nanesti ho' 'int'ah." ⁵³ 'Ink'ez ts'iyawh highudloh, t'ehonínzun dazsai ho' 'int'ah. ⁵⁴ Sizi ts'iyawh tinaóobunilh'a, 'ink'ez 'uski yula ilhchoot 'ink'ez, "Uski didinyih," yúlhni. ⁵⁵ Buyégha buyunaídede 'ink'ez 'ahoh didinya. 'Ink'ez 'et 'obúlhni, "Hoonliyaz yute'alh, 'i bugha ináh'aih." ⁵⁶ Be'ama 'ink'ez be'abá tube huba hooncha, 'ink'ez khunek ulhtus, 'i be ndo búlhni, "Uyoon dudóohtni gunih njan bulh nduhooja."

9

Lanezi 'o 'at nanah yugha hoodul'eh, Sizi whebalh'a hiye 'ut'en k'ah húhodutel'eh ka

¹ 'Et lanezi 'o 'at nanah yugha hoodul'eh, Sizi ts'iyawh buka' dani. Ntsi' nududeh, 'i ts'iyawh ndet whehíltus chah, 'ink'ez himoodih wule ka, 'et hubugha óoni'ai. 'Ink'ez dune ndet hukw'e hunduda, 'et chah soo na'boohoolh'en, 'et chah hubugha óoni'ai. ² 'Uyoon nts'e na'a Yak'usda hubudayi cho unli 'et hubugha hubulh yalhtuk 'ink'ez nduda soo na'hubuhooleh, 'et wheni wheóobalh'a. ³ 'Ink'ez ndo búlhni, "Nts'e tehdulh 'et ndi nuhtuz, k'us nuhwhu'ezdlai k'us lhes, k'us sooneya chah, 'et ndunt'i, 'i toohla gunih. 'Ink'ez nankoh dzoozt'an nyez, 'i waht'i gunih. ⁴ Ndet koo danáh'az, 'et zeh wahke, 'ink'ez 'et koo zeh whenádooh'tas. ⁵ 'Et ndunnah danáh'as 'aw chanwhadusnih t'eh, 'et keyah whunateht'us whutsah, 'et hubulez ch'a nuhwhuke naóohghat. 'I bugha t'ehonózin buk'ewhutelts'ulh 'et buts'uh whélts'ulh." ⁶ 'Et whenáhadel 'ink'ez keyah totsuk whutuh lhunáhusdel. 'Et whuz na'a dune khunek unzoo, 'i be hubulh yahulhtuk. 'Ink'ez keyah totsuk dune soo na'hulh'en.

John dune too be 'ulh'en, 'en hizelhghi

⁷ 'Aw 'et hubudayi cho Herod hiyulhni whulh uduzts'ai nts'oh teh Sizi ne'ut'en. Bulunah nduhútni, "John yaidla hubutah nakhitna, 'en 'int'ah," hutni. 'Et huwa ba nawh 'uhooja. ⁸ 'Ink'ez 'uyoon chah 'uhutni, "Ndun 'en Elijah 'int'ah hoh nenalhts'et hainya." 'Et 'onghunnah chah nduhútni, "En 'uda yinkak Yak'usda be nus whunilh'en, 'ilhunuh nakhítna 'ink'ez 'en 'ut'en." ⁹ 'Et Herod 'utni, "John butsi k'unélht'o inle. 'Et whunts'i ndan hoh 'ut'en ndun lhe'hoont'ah teh ne'ut'en bulh 'údusts'o?" 'Ink'ez yuntelh'ilh hukwa' ninzun.

5,000 dune, Sizi hiyoo'alh, 'i hubugha ní'ai

¹⁰ 'Et ndunnah whel'a whusanáhdedel hoh dahét'en, 'et ts'iyawh hidani. 'Ink'ez "Aw 'et uztodelh!" hubúlhni, 'ink'ez njan Bethsaida keyah whunat dune nuchasyah ts'ih wheóbanla. ¹¹ 'Et whunts'ih 'ilhohuwezdel nahuhoon'ai hoh hiyuntezdel. 'Et Sizi hoont'i hoh highu nindel 'ink'ez nts'e na'a Yak'usda hubudayi cho unli hukw'un'a hubugha hubulh yalhtuk. 'Ink'ez ndunnah soo na'tetnilh hukwa' ninzun, 'en chah ts'iyawh soo ná'balh'en. ¹² 'Aw 'et ts'etniz hukw'elh'az ye'un whezulh 'ink'ez ndunnah lanezi 'o 'at nanah, 'en highu nindel 'ink'ez 'uhiyúlhni, "Ndunnah 'ilhohuwezdel nabálh'ah njan dune nuchasyah 'uts'int'ah. 'Et ndo ho keyah whunat hiya'ah, 'i hoket 'ink'ez 'et hutetez chah nahohóleh sih." ¹³ 'Et whunts'ih Sizi ndo búlhni, "Hoonliyaz hiyoo'alh, 'i hubugha naínuht'ah." 'Et 'uhiyulhni, "Lhook nankoh 'ink'ez lhes skwulai chah, 'aw 'i zeh ts'ít'i. 'Et ndunnah 'ilhohuwezdel ts'uyi, 'i huba ts'onket t'eh, 'et zeh soo hubugha ná'uztet'ah." ¹⁴ 'Et njan 'ilhohuwezdel 'ankw'us 5,000 dune hinli. 'Et Sizi yugha hoodul'eh ndo búlhni, "Skwunlat lanezi hinli hoh (50) lhendun natl'ahudoolts'ilh budáhni." ¹⁵ 'Et whuz na'a 'uhuja. 'Aw 'et ts'iyawh natl'ahudelts'i hoh ¹⁶ 'et skwulai lhes yilhchoot 'ink'ez lhook nankoh chah, 'et nduk yutá'en 'ink'ez suchanailya ni hoh yuba tenadedli. 'Et taidalhkut 'ink'ez yugha hoodul'eh butl'ayánla, 'ilhohuwezdel hubugha híyo'ah ka. ¹⁷ Ts'iyawh 'uha'al 'ink'ez soo' na'hunesdai hoh ndai ts'utezkat, 'i ts'iyawh 'ilunahíwezda hoh lanezi 'o 'at nankoh k'its'ai cho dez bun.

Sizi, 'en Christ unli, 'et Peter huwu yalhtuk

¹⁸ 'Et hukw'elh'az Sizi dich'oh zeh tenadedli 'ink'ez higha hoodul'eh hiyulh 'ut'en 'ink'ez huboodulhkut, "Ilhohuwezel, 'en ndan usdli hutni?" ¹⁹ 'Ink'ez 'uhiyúlhni, "John dune too be 'ulh'en 'int'ah hutni. 'Et 'onghunnah Elijah 'int'ah hutni. 'Ink'ez 'onghunnah 'uhutni 'uda nus whunilh'en, 'ink'ez 'ilhunuh dinadija, 'en 'int'ah, hutni." ²⁰ 'Et, "Nuhwheni do?" hubúlhni, "Ndan usdli dahni?" Peter yatelhtuk hoh ndi yúlhni, "Ndun Yak'usda buChrist ts'utni, 'en 'unint'ah."

Dzuh nutezut 'ink'ez datétsah, 'et Sizi huwu yalhtuk

²¹ 'Et khunekti be ndo búlhni, "Khun teh 'uyoon dóohtni gunih!" ²² 'Ink'ez ndo búlhni, "Yinkak dune ye' lhat whé dzuh nutezut buba 'uhoont'ah. 'Ink'ez ndunnah tsuh whudelhdzulh, nawhulnuk degha nus dézti, 'ink'ez Moses be' dustl'us 'uk'ununa'úsduguz chah, 'en ts'iyawh hich'a dutétni ho' hint'ah 'ink'ez 'et hituzelhghelh. 'Ink'ez whulh tat dzin dinadutédalh."

Sizi ndo búlhni, "Ndan sulk tídluh hukwa' ninzun, dich'oh duba moodih nahoodle ghaít'ah"

²³ 'Ink'ez ts'iyawh 'úbulhni, "Ndan dune se'ut'en k'ah ts'ih oot'en ka hukwa' ninzun, 'et ndunt'ah ndai dats'ínt'ah, ts'iyawh whuladootnih 'ink'ez dzin totsuk dulhdulalhgus yóolhchoot 'ink'ez suntooya. ²⁴ 'Et huwa ndunnah hoh húkhuna hotelhyih, 'en 'et whunts'ih tinta hoté'ah. 'Et whunts'ih ndan ye

khuna si sugha tinta ooni'ai t'eh, 'en hoh ye khuna hotelhyih. ²⁵ 'Et dune ndi yun k'ut nduhoolhcho whuch'a oonilhde t'eh, 'et whunts'ih dich'oh ye khuna tinta ní'ai k'us ye khuna yugha nahootélchulh t'eh, 'et ndet simba whuch'a hólhdeh? ²⁶ 'Et k'us ndan dune si, 'ink'ez sughunek 'i yukaya unli, 'et nket'ah yinkak dune ye', nts'o t'eh 'i be'aBá 'ink'ez Yak'usda bulizas hiye dezti chah, 'i 'et whuz na'a whusanaja t'eh, 'et sih ndunnah dune hukwayá tele. ²⁷ 'Alha 'un whudusni, bulunah njan nuhudelhúya ndet dahutetsah 'et whuts'un, ndet Yak'usda hubudayi cho unli, 'et dahutetsah whutsuh hote'ilh." ²⁸ Lhk'udit dzin bat'en hukw'elh'az 'et njan ndutni, 'et Peter, John, 'ink'ez James ndoh dzulh k'uz dulh wheóobeldel whuz tenadutedli ka. ²⁹ 'Et 'awhuz tenadudli hoh 'et bunen ts'ih 'uts'un be hoonet'en suli. 'Ink'ez bunaih chah soo ts'ah'un lheyul suli, 'ink'ez buts'uh ha'ánduz suli chah 'uja. ³⁰ Khunyaz nanah dune, 'en hiyulh yálhtuk. 'Ilhunuh Moses 'ink'ez 'ilhunuh Elijah. ³¹ Whet'en buts'uh hayánduz 'i be hóodet'en. 'Et Jerusalem ts'ih datenilh hoh datétsah lhaóodutelih, 'et huwa hubulh yálhtuk. ³² 'Et Peter 'ink'ez hiyulh 'ut'en sa tube hantez. 'Et ts'ah'un na'a ts'enawhehunide hoh 'et Sizi buts'uh hayánduz, 'i nanah dune yuzih siyin hoh hitelh'en. ³³ 'Et hukw'elh'az highu when'az hoh Peter, 'en Sizi ndi yúlhní, "Nemoodih hoonzoo njan uzdelhts'i. Tat whut'ah uztetez 'uts'uholeh. 'Ilhunuh nyun mba, ilhunuh Moses ba, 'ink'ez 'ilhunuh chah Elijah ba." 'Et whunts'ih Peter daja dutenilh 'aw t'eoonuszun. ³⁴ Awhuz yalhtuk hoh kw'us buk'eyínde. 'Et kw'us hubunanezdo hoh 'et whe hunelhújoot. ³⁵ Kw'us tah ts'ih khunek huduzts'ai, "Ndun suYe' 'en buk'esi' 'int'ah. 'En oozólhts'a," ni. ³⁶ 'Et yatuk 'ustl'e' 'uwhudeja hoh Sizi dich'oh zeh 'int'ah hinilh'en. 'Et 'aw hoonliyaz cha'hudínil ndet hohon'en. 'Et hoh da dzin 'aw dune nduchahudinil nts'e na'a hinalh'en 'et.

'Uski ntsi' nudúdeh, 'i buyudínda, 'en Sizi soo ná'yinla

³⁷ 'Et 'om bun dzin dzulhyaz k'ut ts'ih hanáhedel hoh 'ilhohuwezdel Sizi hidudezdel. ³⁸ 'Ilhunuh dune 'ilhohuwezdel hubutah, 'en Sizi 'últus be yuts'u háiyih hoh njan ndi yulhní, "Nehodilh'eh nts'u téodusdli suye' nolh'en. 'En 'aw 'en zeh 'ilhunuh suye' 'int'ah. ³⁹ 'Et khunyaz ntsi' nududeh, 'i yilhchuk ibulh hazulh, bukaootuzuk, 'ink'ez huwus buza hanúldoh. 'Et huwa ndulhcho hoh bukaootúzuk. 'Ink'ez tube howa whúlna hoh yeýáhanadudoh. ⁴⁰ 'Et nye hódul'eh hubuts'uh téodusdli hits'uh hanáhidoolhdeh ka, 'et whunts'ih 'aw 'uhooneh ghaít'ah." ⁴¹ 'Et sizi 'utni, "Nuhwheni k'an ndoh whudezulh 'alha 'i be nuhwhuba 'alha' cha'hoot'ah. Nuhwheni dune 'aw ts'ah'un cha'it'ah ahli. Dawhuldzah nuhtah 'utest'illh hoh nohwhulh whúsyin? Nye' suts'ílhelh!" ⁴² 'Et 'awhuz Sizi ts'un yelhtelh hoh ndi ntsi' nududeh, 'en 'uski nayáno 'ink'ez yukaootelhzut. 'Et Sizi ntsi' nududeh, 'i khunekti be hukwa' yudáni, 'ink'ez 'uski soo na'uja hoh bu'abá yutl'anáyalhti.

'Aw 'et nilhdukwyinkak dune ye', 'en dune ntsi' tl'aitelhtelh k'une' hitel'ilh ka

⁴³ 'Ink'ez Yak'usda daltus 'et huwa ts'iyannah huba hooncha suli. 'Ink'ez Sizi nts'oh tune'ust'en huba hooncha k'et, 'aw buk'eóodoozit ghaít'ah. Hoh da zeh yugha hoodul'eh 'en 'úbulhní, ⁴⁴ "Ndi khunek be nohwhulh yatelhtuk, soo cho nuhdzi be wheoodoools'it. 'Aw 'et nilhdukwyinkak dune ye', 'en dune ntsi' tl'aduteltelh k'une' hitel'ilh ka." ⁴⁵ 'Et whunts'ih njan daja ni 'aw ts'ah'un t'echahonízil. 'Aw huba ts'et ka hachahóolts'ulh. 'Et huwa daja ni, 'aw ts'ah'un nachahuhoo'al. 'Et whunts'ih whehúnuljut, 'aw hukwa hiyoodolhkut ghaít'ah.

Ndan netah simba degha nus dune uncha unli?

⁴⁶ 'Ink'ez hedich'oh lhtah 'ulhadutni, k'us ndan degha nus uncha tele. ⁴⁷ Hubudzi yuh daja huninzun 'et Sizi t'eoonzun. 'Et huwa 'ilhunuh

'uskiyaz yílhchoot 'ink'ez buzih ninílhti. ⁴⁸ 'Ink'ez ndo búlhni, "Et soo ts'ah'un na'a 'un whudusni, ndunnah soozi bugha ndun 'uskiyaz hik'esutset, 'en sk'ehints'i ho' hint'ah. 'Ink'ez ndunnah sk'esutset, 'en ndun whuz de sútelh'a, 'en chah hik'esutset ho' hoont'ah. 'Et huwa, ndan nuhtah degha nus dune ba tel'en, 'en degha nus ncha tele."

Sizi ndo búlhni, "Ndan nech'a chaditni, 'en nelh 'int'ah"

⁴⁹ 'Et John ndi yúlhni, "NeMoodihti 'ilhunuh dune nyoozi be ntsi' nududeh, 'i dune buts'uh hanaídulhdoh, 'et ts'uhoo'en. 'En 'aw nelh 'ilhunuh chailah, 'et huwa 'et ndut'en whuch'az nényoot." ⁵⁰ 'Et whunts'ih Sizi ndi yúlhni, "Whuch'a' nehyoot ilah! 'Alha ndan 'aw nech'a chahuditni, 'en nets'ú détni 'int'ah."

Keyah Samaria whut'en, 'en Sizi hikacha'nízun

⁵¹ 'Aw 'et Sizi buba whusahonzut nduk yak'uz nátedalh huba, 'aw 'et Jerusalem whuts'u nalhú'a 'ink'ez whuz natedalh howun nanínuzut. ⁵² Khunek yuba na'a dutsuh wheoobalh'a. 'En hutezdel hoh 'aw 'et 'ilhunuh Samaria keyah ts'ih hunindel hiba lhaoodutelih ka. ⁵³ 'Et whunts'ih Jerusalem ts'ih tezya 'et nahuhoo'ai hoh njan keyah Samaria whut'en 'aw hikacha'nízun. ⁵⁴ 'Et yugha hoodul'eh James 'ink'ez John honalh'en bulh dahooja hoh Sizi hiyoodulhkut, "NeMoodihti Elijah k'una'a ndi kwun ndus de yak'uz ts'ih hadóonat 'ink'ez ts'iyawh hadóok'un uzdooni, 'et ih neba hukwa' ninzun?" ⁵⁵ 'Et whunts'ih hubuts'un nalhú'a 'ink'ez hukwa' hubudani, 'ink'ez 'utni, "Aw daja nahzun nt'ewhunuzáhzun 'et huwa' dahni! ⁵⁶ Soo cho soo zélhts'ai, yinkak dune ye', dune ye khuna hoolah yutelhtsilh ka ilah whusainya, hubutelhyih ka whusainya." 'Ink'ez 'et 'udun keyah whuyaz ts'ih whehándel.

Ndan yun wheoonilhch'ul 'ink'ez k'ah naidutut'ih t'eh, ndunt'ah ndet Yak'usda hubudayi cho unli, 'et 'aw huba soo cha'hit'ah ho' hint'ah

⁵⁷ 'Aw 'et ti hedulh hoh 'ilhunuh dune Sizi yughu ninya 'ink'ez ndi yúlhni, "SMoodihti nts'e ténya ts'ih 'ilhuz nyun tesyalh." ⁵⁸ 'Et Sizi ndi yúlhni, "Nanguz 'en chah 'an whut'i ho' 'int'ah 'ink'ez dut'aiyaz chah t'o ut'i. 'Et whunts'ih yinkak dune ye', 'aw netsin tet'alh 'et whunts'ih chahóot'ih." ⁵⁹ 'Et 'uyoona chah 'ulhni, "Nyun chah sunanyalh." 'Et whunts'ih ndi yúlhni, "SMoodihti, k'at 'udechoo se'abá buyust'e wheyútelhtelh choo." ⁶⁰ 'Et whunts'ih Sizi ndi yúlhni, "Whute dudulh yahadla didutch'oh wheyúnalhuholyleh. 'Et whunts'ih nyun ndulhcho hoh nónya 'ink'ez ndi Yak'usda hubudayi cho unli, ts'iyannah 'et hubugha dóni." ⁶¹ 'Et 'uyoona chah 'utni, "SMoodihti nyun tesyalh, 'et whunts'ih 'udechoo sukoo hudemts'i ts'ih hubuts'un nunatesda choo 'ink'ez 'ilhuz wheni nuhghu tesyalh budutésnilh, 'et stl'ahóo'aih." ⁶² 'Et whunts'ih Sizi ndi yúlhni, "Ndan wheoonilhch'ul 'ink'ez k'ah naidutut'ih t'eh, ndunt'ah ndet Yak'usda hubudayi cho unli, 'et 'aw huba soo cha'hit'ah ho' hint'ah."

10

Skwunlai 'o' at lanezi (70) yugha hoodul'eh, Sizi dutsuh wheoobalh'a

¹ 'Et hukw'elh'az neMoodihti skwunlai 'o' at lanezi (70) 'en 'utaháoobanla keyah whuti totsuk nuteyalh, nanah hinli hoh dutsuh wheoobalh'a. ² 'Et ndo búlhni, "Alha 'aw 'et há' nukat newhúninzut 'ink'ez tl'o mai lhai suli, 'et whunts'ih 'uhut'en, 'en 'aw soo a'huneltsuk. 'Et huwa Yak'usda ba ha'nukat whumoodihti, dich'oh 'a'dunenla 'uyoona chah 'uhut'en whuz haóobalh'a, 'et huba tenadehdli. ³ 'Aw 'et ahdulh 'ink'ez soo zélhts'ai! Lhe'un whusla 'ants'i Sheep k'una'a yus tuz whenwhalh'a. ⁴ 'Aw sooneya zuz, k'us 'ezdlai, k'us

kegwun chah, 'i ndunt'i, 'i toohla gunih. 'Ink'ez ti dune dudéh'az t'eh, khun teh dahooja dóohni gunih. ⁵ Ndet koo danáhya t'eh, 'et koo hudemts'i njan ndo budoohni choo, nuhkoo whudóoghel wule. ⁶ 'Et dune t'edusnih 'et usda t'eh, 'et nuhdzi dezghel 'et butl'á whutelts'ulh. 'Et 'aw ndunt'ah hoolah t'eh, be nuhdzi dezghel 'i nuhts'u nádutelts'ulh. ⁷ 'Et koo zeh wahke. Ndai nuhgha híya'ah 'i zeh wah'ahlh 'ink'ez wahnai. 'Alha ndun 'ut'en bube 'ut'en, 'en k'elha hole huba' hoont'ah. 'Ink'ez lhelhdun koo teh danaóohdaih gunih. ⁸ 'Ink'ez nts'e 'udun keyah lhgha dah'az, 'et 'anah nuhwháh hutni t'eh, 'et ndai nuhbut nehininla, 'i wah'ahlh. ⁹ 'Et ndan 'et koo nduda, 'en chah soo na'ubóohleh 'ink'ez ndo budóohni, 'Yak'usda hubudayi cho unli, 'aw 'et nuhwhughah 'ohoont'ah.' ¹⁰ 'Et nts'e keyah lhgha dah'az, 'et 'aw nuhghu nuchahíyal t'eh, 'et ti k'enaohja, 'ink'ez 'udoohni, ¹¹ 'Et njan nuhkeyah whulez, ndai neke ghu hoonli, 'i whunts'ih, nuhch'a búna'ts'ahde. 'Et whunts'ih t'ewhunóhzin huba' hoont'ah, Yak'usda hubudayi cho, 'et nuhwheghah 'ohoont'ah,' 'et hubudóohni. ¹² 'Alha ts'ah'un 'un whudusni, 'et dzin whusaootelts'ulh, 'et keyah Sodom whut'en, hoh da nts'e na'a hubulh dahooja inle, 'et njan keyah whut'en, ndunnah nuhka cha'nízun, 'en 'o nus hoontsi' hubugha óotelts'ulh."

Ndunnah hubeni nahádunooleh hukwa cha'hunízun, dáwhultsi' butsuh whélts'ulh ho' hoont'ah

¹³ "Et nuhwheni Chorazin whut'en, 'ink'ez nuhwheni Bethsaida whut'en, nuhwheni chah 'aw 'et dawhultsi' 'et nuhts'u whélts'ulh! Soo cho soo zélhts'ai, ndet hoolhtus nuhnat 'uhooja, ndunnah Tyre 'ink'ez Sidon whut'en, 'en bunat 'et chah 'et ndúhooja t'eh, 'uda hubeni náhondunezdla wule. 'Ink'ez doso be hudemts'i 'ink'ez lhusts'iz k'enahidudzih. 'Et whuz na'a 'uhoneh wule. ¹⁴ 'Et dzin nuhwhuba whuz de whélts'ulh nuhwhuba nahutedeh ka, 'et ndunnah hubulh dawhutenilh, nuhwheni 'o nus nuhwhuba whutétsi'. ¹⁵ 'Et nuhwheni Capernaum whut'en nduk koo huba soo áht'ah nahzun ih? 'Awundooh! 'Et k'us kwuncho yuh ts'ih nóhotelhdulh! ¹⁶ 'Ink'ez nuhwheni sutsuh tehdulh ndunnah nuhoozelhts'ai, 'en si chah soo hoozelhts'ai. Ndán ch'a nuwhunehsjoot, si chah ch'a sunésjoot ho' hoont'ah. 'Ink'ez ndan ch'a sunésjoot, ndun whuz de sútelh'a, 'en chah ch'a inésjoot ho' hoont'ah."

Nduk yak'uz nuhoozi 'uk'une'úsduguz, 'et huwa whunoolhnik

¹⁷ 'Et hukw'elh'az skwunlai 'o 'at lanezi (70) hohoont'i hoh whusanáhdedel. 'Et nduhúyulhni, "NeMoodihti ndunnah ntsi" nududeh, 'i 'en whunts'ih, nyoozi bugha nek'une' hut'en!" ¹⁸ 'Ink'ez ndo búlhni, "Satan, 'en ditnik kwun hadanat k'una'a ndus de yak'uz hadélduz, 'et nalh'en. ¹⁹ Sih soo zélhts'ai, tl'ughus 'ink'ez poison unli, 'i scorpion hiyulhni, tube cho buk'unahya. 'Ink'ez ndai nuhch'a detni, 'en hiye ulhtus, 'i 'et ts'iyawh ndi bugha ndoh 'ooht'e, 'et nuhlt'ahó'ai 'ink'ez 'aw hoonli nuhwhundóolhda ghaít'ah. ²⁰ 'Et whunts'ih ntsi" nududeh, 'i nuhk'une' 'oot'en huba 'int'ah, 'aw 'et huwa ilah whunélhnik. 'Et k'us nduk yak'uz nuhoozi ts'iyawh 'uk'une'úsduguz, 'et huwa zeh whunóolhnik."

Sizi, 'en Ndoni be whunoolhnik

²¹ 'Et hoh wheghah 'uhunet'oh Sizi, 'en Ndoni be whunélhnik hoh njan ndutni, "ABá nyun 'un yuduánsi! Yak'uz 'ink'ez yun k'ut huMoodihti inli. Whunih 'ink'ez hodul'eh, ndi 'i ts'iyawh buch'á whunte'i. 'Et whunts'ih 'uskiyaz li'int'ah, 'en bunalhts'et haho'ai. 'Alha 'aBá mba soo 'uhooja.

²² Se'aBá ts'iyawh stl'ahónla, 'ink'ez 'en buYe' ndan unli ts'iyannah t'ehonízun. Be'aBá 'aw 'en zeh t'eininzun. 'Ink'ez ndun be'aBá unli, buYe' 'aw 'en zeh t'eininzun. 'Ink'ez ndun buYe' 'onghunnah wheóobuntelhtun hukwa' ninzun t'eh, 'en zeh buba 'uhooont'ah." ²³ 'Ink'ez yugha hoodul'eh hubuts'un nalhú'a

'ink'ez whu'ízyaz ndo búlhni, "Ndet hoh'en 'uyoona duna be honilh'en, 'en degha nus hoonzoo hubugha whults'ut. ²⁴ Ndun whudusni, lhanah nus whunilh'en, 'ink'ez hubudayi cho chah 'en dalcho 'i be ndet hoh'en hote'ilh hukwa' huninzun, 'et whunts'ih 'aw chahuhó'o'il. 'Ink'ez ndet whudáhts'o 'enychah hidutéts'o hukwa' huninzun 'et whunts'ih 'aw cha'hudits'il."

Daztet'ilh hoh 'ilhuz be ts'ukhuna, 'i ts'utélhcholh?

²⁵ 'Et hukw'elh'az 'ilhunuh Moses be' dustl'us k'ut, daja ni hoh beni hoonli be yalhtuk, 'en didinya 'ink'ez Sizi 'aoonilhka yoodulhkut, "Nehodulh'eh datest'ilh hoh 'ilhuz be ts'ukhutena, 'i whutélhcholh?" ²⁶ 'Et Sizi 'utni, "Ndet hukw'e'éduguz Moses be' dustl'us k'ut? Buk'eyáilhtuk hoh nts'e na'a mba daja ni?" ²⁷ 'Et ndi yulhni, "Ndez na'a njan ndutni, 'Yak'usda nyuMoodihti ndzi ndulhcho 'i be, nzul ndulhcho 'i be, nyunut'uk ts'iyawh 'i be, 'ink'ez nyeni ts'iyawh 'i be chah, 'et whuz na'a 'en buk'eoontsi'. 'Et dáhoont'ah hukw'u na'a nyunch'oh k'enaindútsi', 'et whuz na'a zeh nyenghoh whut'i 'en chah buk'eoontsi'." ²⁸ Sizi ndi yulhni, "Soo ts'ah'un 'udini. 'Et ndint'en t'eh, 'et 'ilhuz wheni khutanalh." ²⁹ 'Et whunts'ih ndun dune ts'ah'un 'int'ah na'dudil'i. 'Et hubugha Sizi yoodulhkut, "Ndan sughah whut'i?" ³⁰ 'Et Sizi njan di yulhni, "Ilhunuh dune Jerusalem ts'ih hainya 'ink'ez Jericho ts'un úyalh hoh 'uhundunut'ih hiyílhchoot. Bunaih ts'iyawh higha hahíyulya 'ink'ez nukai hiyulhtsi, 'et nehinílhti, 'ink'ez higho whenádel, 'aw 'et dawheníntsai. ³¹ Soo hoh da zeh 'ilhunuh náwhulnuk ti uyalh hoh ndun 'en yutelh'en. Yutelh'en hoh 'ants'ih yagha nch'az lhusiya. ³² 'Ink'ez doo chah 'ilhunuh dune Levi yuts'uh hainzut, 'en chah hoh uyalh 'et yunalh'en 'ink'ez 'ants'ih yugha nch'az lhusiya. ³³ 'Et whunts'ih 'ilhunuh Samaria whut'en, 'en chah hoh uyalh 'et yutelh'en 'ink'ez 'aw 'et yugha te'nanzin. ³⁴ Yughu ninya 'ink'ez khe yuk'eyíhdze 'ink'ez mai too bulh yuka' dalh'oo. 'Et dughunai k'eyílhti 'ink'ez dune ts'uztez bakoo ts'ih wheyalhti, 'et yughunli. ³⁵ 'Et 'om bun dzin teyalh whutsuh nankoh sooneya ts'uztez whumoodih tl'aya'ai 'ink'ez ndi yúlhni, 'Bughonle. 'Ink'ez ndai 'o 'un buk'uz ts'iya silhtsi t'eh, 'et whusanásja, 'et sih mba k'elha hólhtsilh." ³⁶ 'Et Sizi 'ilhunuh Moses be' dustl'us k'ut, daja ni hoh beni hoonli be yalhtuk, 'en yoodulhkut, "Et ndun dune untsi' 'ankw'us hizelhghi, 'et ndunnah tanah dune hinalh'en da, 'et k'us ndan soo ts'ah'un na'a yeghah whut'i 'int'ah ninzun ih?" ³⁷ 'Et ndi yúlhni, "Ndun yugha te'nezit, 'en 'int'ah!" 'Et Sizi ndi yúlhni, "Aw 'et inyalh 'ink'ez nyun chah whuz na'a zeh 'et ndónt'en!"

Mary degha nus hoonzoo 'utahahó'ai

³⁸ 'Et hukw'elh'az hedulh hoh Sizi 'udun keyah ninya 'ink'ez ts'eke Martha hiyulhni, hubukoo ts'ih yughun seja. ³⁹ Bulhtus Mary hiyulhni, 'en chah Sizi yukétl'ah usda 'ink'ez yughunek yoozélhts'ai. ⁴⁰ 'Et whunts'ih Martha nts'e na'a hubugha ná'tet'alh 'et tube 'unest'it. 'Et Sizi yugha ninya 'ink'ez ndi yúlhni, "SMoodihti 'ants'ih mba 'ohoont'ah ih sulhtus sich'oh zeh 'et nesunilhti buba'oost'en ka? Sula oot'en dini!" ⁴¹ 'Et whunts'ih Sizi ndi yúlhni, "Martha Martha lhat teh howu nduda 'ink'ez howu nuni ninzut! ⁴² 'Et whunts'ih 'aw 'ilhunuh zeh degha nus nduts'ooneh huba' hoont'ah. 'Et Mary degha nus hoonzoo 'utahahó'ai ho' hoont'ah 'ink'ez 'aw bula k'ehahólts'it ghaít'ah."

11

Ndez na'a tenazdoodli huba' hoont'ah

¹ 'Et 'ilhut dzin, Sizi tenadudli. 'Istl'e' deja hoh 'ilhunuh yugha hoodul'eh 'uyúlhni, "John nts'e na'a yugha hoodul'eh huboodalh'i, nyun chah whuz

na'a tenazdutedli whuneoodilh'eh." ² 'Et ndo bulhni, "Njan ndudáhni hoh tenadoohdli,
'Ne'aBá yak'uz sinda.

Nyoozi dooti.

Dahoont'ah hoh hubidayi cho inli,
'et chah nets'ó toolts'it.

'Ink'ez ndet yak'uz ts'ih hukwa' ninzun dahooja,
ndi yun k'ut chah, 'et whuz na'a zeh 'et ndúhoneh.

³ Ndai k'an dzin ts'uté'alh, 'i negha ní'ah.

⁴ 'Ink'ez 'uyoon bulh dulhyah ts'uwhulh'ai t'eh, buba whunats'odoolnah.
'Et whuz na'a zeh nelubeshi neba whunaoodoolnah.

Nts'e tink'us ts'unint'uk whuch'a neghinli.

'Ink'ez ntsi' en ch'a neghinli."

⁵ 'Ink'ez Sizi ndo búlhni, "Nuhwheni nuhtah ndan 'int'ah bulh dune hoonli
'ink'ez tuzniz buts'u téhyalh 'ink'ez 'udutéhnih, 'Suh dune lhes tak'i sughu
sinla! ⁶ Njan sulh dune 'ilhunuh sughu ninya. Nilhza ts'ih hainya, 'aw
bugha yóos'alh, 'i hoolah,' yúlhni. ⁷ 'Ink'ez bukoo whuts'un idóoni, "Aw sugha
ghinai ilah. Ndati 'aw 'et dana'délts'ut ho' hoont'ah. Suzkehkah ts'iyawh
nahunéstez. 'Aw dinadóosja ghaít'ah. 'Ink'ez hoonliyaz ngha óos'alh ghaít'ah."

⁸ 'Et ndun whudusni, 'aw dinadóoja ghaít'ah 'ink'ez hoonliyaz yugha óo'alh
ghaít'ah, bulh dune 'int'ah 'et whunts'ih. 'Et whunts'ih 'awhuz yoodulhkut
zeh 'utni, 'et huwa dinadutédalh 'ink'ez ndai yuka' ninzun ts'iyawh yugha
itélelh. ⁹ 'Et whuz na'a 'un whudúsni, Yak'usda ndai buka yoodulhkut, 'i
nuhgha ité'alh. Bukunáhta 'ink'ez nahootéh'alh. Ndati whudulhghalh 'ink'ez
nuhwhuba dá'dutetilh. ¹⁰ 'Et ndunnah Yak'usda hoonli hits'u hukwa 'utni t'eh,
'en 'et bugha whútekulh. Ndunnah hoonliyaz hukwunúta, 'en nahuhooté'alh.
'Ink'ez ndunnah ndati whudulhghalh, 'en chah huba dá'dutetilh. ¹¹ Ndunnah
nuh'abákah nuhtah, buye' lhes yuts'u ka 'utni t'eh, 'aw tse yutl'adóo'alh
ghaít'ah. K'us lhook yuts'u ka 'utni t'eh, 'aw 'i gha tl'ughus yutl'a oolelh
ghaít'ah. ¹² K'us ligok ghez yuts'u ka 'utni t'eh, 'aw 'i gha ntsi' neoolht'ah, 'i
scorpion hiyuhni, 'i yutl'ayóolhtelh ghaít'ah. ¹³ 'Et njan nduhoont'ah, nuh-
wheni lubeshi 'ulh'en ahli, 'ink'ez t'eoónáhzun nts'e na'a unzoo, 'i nuwhuzkeh
hubugha itéhlelh. 'Et dáwhulcho, 'i be 'o nus nduk yak'uz nuhwhe'aBá, k'us
ndan yoodulhkut, 'en Ndoni hubugha íte'alh."

Huba 'alha' cha'hoot'ah, 'en 'uhutni, "Sizi, 'en netsuduleye ulhtus, 'i be 'ut'en"

¹⁴ 'Aw 'et ndi ntsi' nududeh buyudínda 'aw yaoolhtuk ghaít'ah hoh Sizi
dune yuts'ah hanaínanyoot. 'Et yuts'ah hanaínanyoot hoh dune yalhtuk 'aw
'et yawhenilhtuk. 'Et 'ilhohuwezedel ts'iyawh huba hooncha. ¹⁵ 'Et bulunah
nduhútni, "Beelzebul ndun ntsi' nududeh bumoodih, 'en be ntsi' nududeh
dune yuts'u hanainanyoot." ¹⁶ 'Et 'uyoon hiyoolhdzih hoh hiyoodulhkut,
"Yak'uz ts'ih whuts'un neba huwa 'et'en tune' tant'en ih, 'et whunenilh-
tun?" ¹⁷ Daja huninzun t'eoóninzun, 'et ndo búlhni, "Nts'e hubidayi cho
hinli, 'en lhch'a nihúdendel t'eh, 'en ts'iyawh huhoolah hutele. 'Et whuz
na'a zeh 'ilhunuh bukoo delhts'i, 'en chah lhch'a nihúdendel t'eh, 'en chah
huhoolah hutele. ¹⁸ 'Et whuz na'a zeh nts'e Satan hubidayi cho unli, 'et
dich'oh lhch'a nidinja t'eh, nts'e na'a buk'úne' whut'en tele? Lhe'dahni
Beelzebul 'en be ntsi' nududeh, 'i dune ts'ah hanánušyukw dahni. ¹⁹ 'Et si
Beelzebul 'en be 'ust'en t'eh, 'et sudahni nuhwheni nuhye'kah k'us ndan be
simba ntsi' nududeh, 'i dune ts'ah hanaóobunooyukw? 'Et huwa 'en bugha
t'ewhuntehzech tink'us údahni! ²⁰ 'Et whunts'ih Yak'usda bulasgek be ntsi'
nududeh, 'i dune ts'ah hanánušyukw t'eh, 'et 'alha' hoont'ah, nts'e Yak'usda
hoh hubidayi cho unli, 'aw 'et nuhghu whults'ut ho' hoont'ah. ²¹ 'Et dune

ulhtus lhahutedughan huba lhahudint'ah, 'et bukoo huwunli 'ink'ez ndai 'et yuzdla, 'i 'aw but'aghóohnalh ghaít'ah. ²² 'Et 'uyoona yugha nus 'ultus yundélhda 'et yuch'a' nilhde. 'Et dune ye lhuhutughan, 'i yut'aninintan, 'i ts'iyawh hubugha hayulya. 'Et hukw'elh'az ndun buch'a' ninde, 'en ndai 'et yuzdla, 'i chah ts'iyawh 'uyoona yugha nus 'ultus. ²³ Ndunnah sulh cha'it'ah, 'en such'a hudeeti ho' hint'ah. 'Ink'ez ndunnah 'aw dune sula 'ilhuchawesdle, 'en ts'iyawh yadutékulh.

Dahooja hoh ntsi' nududeh, 'i doo chah zeh dune buyunaídede t'eh

²⁴ "Et ntsi' nududeh, 'i dune ts'ah hanádide hoh, yun whudezgi 'et whuz nududeh natelyis hukwu nútä. 'Et 'aw nduhóont'ah nachahoo'al 'et dich'oh na'dudútni, "Et ndun buyudúsda, whuz zeh natoosja." ²⁵ 'Et whuz lhghu nadidaih 'ink'ez 'et nahoo'ah ndun dune budzi yuh chaoodítsun nawhulhtsi 'ink'ez ts'ah'un na'uja. ²⁶ 'Ink'ez 'et 'uts'un whedudoh 'ink'ez skwunlai 'o 'at nankoh ntsi' nududeh, 'i 'en 'o nus 'iltsi', 'en 'et dune ye yuná'dudoh 'ink'ez 'et nihúnih. 'Et ndun dune ndun hiyudúlt's'i, 'en 'et whutsuh da 'o nus 'ultsi' suli."

K'us ndan Yak'usda bughunek yudits'o 'ink'ez yoontun, 'en degha nus hoonzoo buts'un whélts'ulh

²⁷ 'Et Sizi njan ndutni hukw'elh'az, 'ilhohuwezdel hubutah 'ilhunuh ts'eke yuts'uh hahúyih, "Ndun buchan yuts'uh hainzut 'ink'ez ndun nye 'alht'ukw, 'en ts'eke degha nus hoonzoo bughá whults'ut," ni. ²⁸ 'Et whunts'ih Sizi ndi yúlhni, "Et degha nus hooncha 'uhoont'ah, k'us ndan Yak'usda bughunek yudits'o 'ink'ez yoontun, 'en degha nus hoonzoo hubulh 'uhooya!"

Hooncha tune' whut'en, 'et zeh hukwa hités'en

²⁹ 'Et 'ilhohuwezdel lha'un teh nus lhe'huneltsuk 'ink'ez ndo búlhni, "Njan k'an whudezulh dune, 'en hints'i. 'Et hoonliyaz hooncha tune' whut'en 'et zeh huwhuntelh'ilh hukwa' huninzun. 'I bughá t'ehonóozin. 'Et whunts'ih 'aw honilh'en bughá holts'it ghaít'ah. 'Et nts'e na'a nus whunilh'en Jonah bulh dahooja, 'et zeh hote'ilh. ³⁰ 'Alha nts'e na'a Nineveh whut'en, 'en Jonah be huba whehóodal'en inle, 'et whuz na'a zeh 'en k'una'a k'an whudezulh dune, yinkak dune ye', 'en be huba whehóodel'en tele. ³¹ Njan dzin dune ba nahutedeh whusawhélts'ut t'eh, 'et nyaz de hubidayi cho ts'eke 'en hubuniz didutéyah, 'et hububa nahutedeh. Soo cho whunoohl'en, ndi yun k'ut nilhdza de hainya hubidayi cho Solomon ye whunih, 'i yudutets'o ka. 'Et whunts'ih 'ilhunuh hubidayi cho Solomon ch'a degha nus 'int'ah k'an 'et nuhtah siyin. ³² 'Ink'ez hoh wheghah whezulh dzin dune ba nahutedeh t'eh, Nineveh whut'en nuhwheni k'an ndoh whudezulh nuhwhutah di hudutéulh 'ink'ez nuhwhuba nahuteyeh. Soo cho whunulh'en, hoh da Jonah hubulh yailhtuk da, ts'iyawh bubení náhundunezdla. 'Aw 'et soo zulhts'ai, 'ilhunuh 'en Jonah ch'a degha nus 'int'ah k'an 'et nuhtah siyin.

Nena 'i neyust'e ba too dezkl'un 'et ndunt'ah

³³ "Dune 'aw too dezkl'un naidulhk'an 'ink'ez whunest'i k'us k'its'ai t'ah chah 'aw níyoo'ah ghaít'ah. 'Et too dezkl'un hukw'usú'ai 'et hukw'eyí'ai. 'I bughá ts'iyannah dahúndelh ndi be whét'en, 'i hinilh'en gha. ³⁴ 'Et whuz na'a nuhwheni nuhna 'i nuhyust'e ba too dezkl'un li'int'ah. 'Et nuhna soo 'int'ah t'eh, 'et nuhyust'e ndulhcho hoh be whét'en, 'i be whudezbun. 'Et whunts'ih nuhna chanizooch t'eh, 'et nuhyust'e 'i chah tsahólhgus be dezben. ³⁵ 'Et huwa ndai be nuhyust'e be whét'en, 'i ahli, khun teh nuhyust'e tsahólhgus naoodle gunih. 'Et whuch'a soo cho huwohole! ³⁶ 'Et huwa nuhyust'e ndulhcho hoh be whét'en, 'i dezben, 'ink'ez 'aw hoontsolyaz whunts'ih tsahólhgus bughoh

hoolah t'eh, 'et ndulhcho, 'i be, be whét'en wule. 'Et whuz na'a soo ts'ah'un be whét'en, 'i ulhtus, 'i k'una'a whedéndi, 'i bugha soo whunoolh'en."

Duba nahudzoo, 'en dawhultsi', 'et hubugha whútelts'ulh

³⁷ Sizi 'awhuz yalhtuk hoh 'ilhunuh Pharissee yoodulhkut, "Sulana'int'ah sukoo ts'ih." 'Et Sizi bukoo daninya 'ink'ez natl'adeda 'ute'ulh wheni. ³⁸ 'Ute'ah whutsuh lanacha'ildoh. 'Et Pharissee yunilh'en 'ink'ez tube huba hooncha. ³⁹ 'Ink'ez neMoodihti 'et ndi yulhni, "Nuhwheni Pharissee soo cho whunulh'en, nuhlusyet 'ink'ez lubot bulh, bukak zeh toonáwhahgus. 'Et whunts'ih nuhdzi yuh dátni, 'ink'ez 'ut'en ntsi' 'i bulh, 'i ts'iyawh 'i be nuhyuh whudezbun. ⁴⁰ Whuzahnik ahli! 'Aw ih t'eoonuzáhzun? Ndán yoo 'az ts'ih 'uhoonla 'ink'ez bez ts'ih chah, 'en zeh 'uhoonla. ⁴¹ 'Et whunts'ih ndai aht'i, 'i be bulah ndunnah tehel'en hubula 'ooht'en. 'Et sih ts'iyaintsuk nuhwhuba whuna'dodeh. ⁴² 'Et whunts'ih nuhwheni Pharissee 'aw 'et dawhultsi' 'et nuhts'u whélts'ulh! Ndai hanúlyeh, 'i 'ut'an sooltsun, 'i rue hiyulhni, 'ink'ez 'onghoh, 'i buluh, 10%, 'i Yak'usda ghah'aih. 'Et ndóht'en huba' hoont'ah. 'Et whunts'ih ndet ts'ah'un na'a ne'áht'en, 'ink'ez Yak'usda ye nek'entsi', 'i 'aw nduchazaht'en. 'Et whuz na'a chah ndóht'en huba' hoont'ah. ⁴³ Nuhwheni Pharissee 'aw 'et dawhultsi' 'et nuhts'u whélts'ulh! Lizwif luglez dahyih teh, soo hoonzoo, 'et natl'adahdaih, 'et zeh hukwa' nahzun! 'Ink'ez ndet 'e'óoket, ssoo ts'iyannah nohwhudóolhti hukwa' nahzun. ⁴⁴ 'Et nuhwheni Moses be' dustl'us 'uk'ununa'úsduguz, 'ink'ez nuhwheni Pharissee, dune nalh duba nadudzoo. 'Aw 'et dawhultsi' 'et nuhts'u whélts'ulh! Nuhwheni ts'un k'ut 'adahla, 'aw dune chanohwhes'en li'aht'ah. 'Ink'ez 'adahla dune t'ehonízun hoh nuhk'unuhudelh." ⁴⁵ 'Et 'ilhunuh Moses be' dustl'us k'ut daja ni hoh beni hoonli be yalhtuk, 'en Sizi 'uyúlhni, "Nehodulh'eh njan 'udini, 'et nuwheni chah, 'en nelh 'udini, 'et huwa neba dzuh 'udénja." ⁴⁶ 'Et ndi yúlhni, "Nuhwheni chah Moses be' dustl'us k'ut daja ni hoh beni hoonli be yalhtuk, 'aw 'et dawhultsi' 'et nuhts'u whélts'ulh! Nuhwheni nuhgha dune 'ut'en howa whúlna butl'awhahle, 'aw hoontsolyaz be hubula 'oohnah ghaít'ah. ⁴⁷ Nuhwheni 'aw 'et dawhultsi' 'et nuhts'u whélts'ulh! Nuhtsuwhudelhdzulh nus whunilh'en, 'en huba tse bet 'ahudutelhtelh 'uwhulh'en. 'Ink'ez nuhwhubákah 'en hubuhanghan inle. ⁴⁸ 'Et 'alha nuhwhubákah 'et dahája, 'et nuhwheni nuhwhuba ts'ah'un 'ohoont'ah nahzun. 'Et soo cho whunulh'en, nuhwhubákah nus whunilh'en hubuhanghan 'ink'ez nuhwheni 'ahudutelalh huba 'uwhulh'en. ⁴⁹ 'Et huwa njan Yak'usda ye whunih, 'i be 'et ndutni, 'Nus whunilh'en 'ink'ez whel'a, 'en nuhts'un hubutelh'alh. 'En bulunah dzuh nubotelhdzut 'ink'ez 'onghunnah chah huboteghan.' ⁵⁰ 'Et ndi yun 'udechoo 'ulya 'et whuts'un ndunnah nus whunilh'en hubuzkai whúzdli, nuhwheni k'an whudezulh dune nuhwheni hukw'elha whutelhtsilh ho' hoont'ah. ⁵¹ 'Et huwa hoh da Abel buzka whuzdli whuts'un 'ink'ez Zacharias buzka whuzdli da, ndan 'en 'int'ah Zacharias njan luglez whuchó 'et Yak'usda bukw'uzdai beguz 'et hizelhghi, 'alha ts'ah'un 'ún whudusni, hoh da dahooja, 'et k'an whudezulh dune, 'et nuhwheni hukw'elha whutelhtsilh ho' aht'ah. ⁵² 'Et nuhwheni Moses be' dustl'us k'ut daja ni hoh beni hoonli be yalhtuk, 'aw 'et dawhultsi' 'et nuhts'u whélts'ulh! Nts'e na'a dune t'ehonózin, 'et bughu naoolhúchoot! Nuhwhenich'oh 'aw chawhúlhchulh. 'Et ndunnah hóolhdzih, 'en chah k'ah húboohntun!" ⁵³ 'Et 'awhuz héyelh hoh, ndunnah Moses be' dustl'us 'uk'ununa'úsduguz, 'ink'ez Pharissee, 'en tube hiyóolhdzi. khun teh hoonliyaz 'uts'un na'a 'udooni ka 'et lhelhdun hukwa hiyoodulhkut. ⁵⁴ 'Ahoohyez hinilh'en 'aoonilhka khun teh tink'us 'údooni. Khunyaz hoonliyaz 'udeja t'eh, 'et hik'eóote'ah 'et huba.

12

Pharisee hubules be untildoh, 'et whuch'a khohdle

¹ 'Et whulhuga da lhanah dune 'ilhuhowezdel. Hulan 'ink'ez lhk'ut nahúdelh cha'hut'en. Ndunnah yugha hoodul'eh, 'en choo ndubulhni, "Ndunnah Pharisee hubules be untildoh, 'i ch'a soo cho howahli. 'I dune nalh ye dúa naudzoo, 'i 'int'ah. ² 'Alha ndai ts'iyawh whunest'i, ts'iyawh ts'et haóotekulh. 'Et ndai whu'iz 'int'ah, 'i chah ts'iyawh t'entedzeh. ³ 'Et huwa ndet tsahólhgus yuh ts'ih yalhtuk, 'et whét'en hidutets'o. 'Et ndet koo whez ts'ih 'uyoon yudzek khunek i'ah daja dani, 'et bun k'ut whuts'un khunekti be howu yatelhtuk.

Yak'usda 'en zeh be noolhújut

⁴ "Ink'ez sulkah ndun whudusni, ndunnah nuhyust'e ughan, 'et whunts'ih 'aw 'o 'un hoonliyaz 'ohooneh ghaít'ah, ndunt'ah hube noolhújut gunih. ⁵ 'Et whunts'ih ndun be ntelhújut, 'en bunwhuntelhtun. Ndun nuhyust'e selhghi, 'et hukw'elh'az, 'en zeh buba 'ohoont'ah hoh kwuncho yuh ts'ih chah nuhwhutenoh, 'en zeh be noolhújut! 'Alha 'ún whudusni, soo ts'ah'un na'a 'en be noolhújut! ⁶ 'Alha ih 'ohoont'ah skwunlai 'uschas, 'i nankoh sooneya chaditi, 'i be 'óoket? Ink'ez ndi dut'aiyaz Yak'usda 'aw lhuk'i whunts'ih yunachaooodulhúnah ho' hoont'ah. ⁷ 'Ink'ez daneltsuk nuhtsigha 'i whunts'ih ts'iyawh t'einínzun. 'Et huwa whenoolhújut gunih! Nuhwheni 'uchas degha nus déhti ho' aht'ah!

Dune nalh Sizi 'en zeh neulhyis 'int'ah ts'udooni

⁸ "Ink'ez 'et chah 'ún whudusni, k'us ndan dune, 'en dune nalh, Sizi Gri 'en zeh sulhyis unli ni t'eh, 'en yinkak dune ye' Yak'usda bulizas ndo ba duténih, 'en se'ildzun unli ho' 'int'ah. ⁹ 'Et whunts'ih k'us ndan dune, 'en dune nalh 'aw sulhyis ilah ni t'eh, 'en Yak'usda bulizas bunalh 'aw se'ildzun ilah hubuduténih. ¹⁰ 'Ink'ez ndunnah yinkak dune ye' ch'a detni be yahulhtuk, daja hutni, soo huba 'un whutelhdulh. 'Et whunts'ih ndunnah Ndoni ch'a detni be yahulhtuk, 'aw huba 'un whutookat ghaít'ah. ¹¹ 'Ink'ez Lizwif luglez, k'us naheyelh k'us moodih chah, 'en hububut nenothonilhya t'eh, daja dutehnih, 'et huwu ni oohle gunih. ¹² 'Et soo 'et whudezulh Ndoni whunohuntelhtun daja dutehnih."

Khunek be nawhutnuk, 'i dune whusnik, 'en bugha

¹³ 'Aw 'et dune tah 'ilhunuh dune 'utni, "Whuneoodulh'eh nedusnekah hubuk'elhaítezkat, 'i sulhutsin ndai se'ildzun unli, 'i stl'ayóolelh suba dini!" ¹⁴ 'Et Sizi ndi yúlhni, "Dune, ndan 'usinla nuhwhuba naheyelh, k'us nuhwhuba yatelhtuk sulhtsi?" ¹⁵ 'Ink'ez Sizi ndo búlhni, "Nuhwheni soo cho khahdli! 'Uyoon dune be'ildzun ka noohzin gunih! Dune daneltsuk hoonli yut'i ndi yun k'ut, 'et ndi 'ants'ih ho' 'int'ah." ¹⁶ 'Ink'ez 'et khunek bugha whuts'odul'eh hubugha hubulh yalhtuk hoh njan ndutni, "Ilhunuh dune soode'a 'int'ah, buyun k'ut ts'iyaintsuk soo haníyeh. ¹⁷ 'Ink'ez dich'oh 'un-inzun, 'Nts'e na'a simba daoosneh? Haníyeh, 'i bakoo whudezbun k'et. 'Aw 'o 'un chah 'uyoo dánosdzaih ghaít'ah." ¹⁸ 'Ink'ez 'et ndutni, 'Njan dutésnih lhai hananyi, 'i sutl'o bakoo nawhuntesyes 'ink'ez 'o nus 'uhoolcho na'whútesdlilh. 'Ink'ez 'et ndai hanálhyi, 'i 'ink'ez ndai ust'i, 'i ts'iyawh, 'et datésdlelh. ¹⁹ 'Ink'ez 'et sih na'dudóosni, lhai unzoo, 'i mba 'ilhowezkat, lhat naoooduzuk whuba. 'Et nailyis, 'in'alh, taintnai, 'ink'ez whunélhnik." ²⁰ 'Et whunts'ih Yak'usda ndi yúlhni, 'Tube slah whuzinik! K'an 'ulh'ek nzul naitécholh. 'Ink'ez ndai int'i, 'i ndan simba buts'e ítookat?" ²¹ 'Et whuz na'a ndan lhai duba 'ilhowezdla 'ink'ez Yak'usda ba hoonli chait'ih."

Yinkak delhúts'i huwu ni wahle gunih

²² 'Ink'ez yugha hoodul'eh ndo búlhni, "Et huwa 'ún whudusni, yinkak delhúts'i, ndai teh'alh, 'ink'ez be sóo nadutehnih, 'i ts'iyawh bugha ni wahle gunih! ²³ Ndai ts'uyi, 'ink'ez ndi naih chah, 'ants'ih unli ho' 'int'ah. Yinkak sahda, 'ink'ez nuhyust'e chah 'i o nus dezti. ²⁴ Ndunnah datsan cho dahint'ah buk'un nuni nulhzut. 'Aw whuyucha'hunusdzai 'ink'ez 'aw hacha'hunusdzai cha' hint'ah. 'Aw uzdla bakoo 'ink'ez haníyeh bakoo chah chahuhóot'ih. 'Et whunts'ih Yak'usda hubugha 'á'ah. 'Et njan whunulh'en, nuhwheni ndi dut'ai ch'a degha nus déhti ho' 'aht'ah. ²⁵ Nuhwheni nuhtah ndan 'int'ah dalcho tele howu ni unli? 'Aw 'et huwa 'o nus 'ulyez wule ghaít'ah. ²⁶ Ndi hoontsolyaz whunts'ih 'ohoohleh ghaít'ah t'eh, 'et di ka 'udun chah howu ni ahli? ²⁷ 'Ink'ez 'indakyaz unzoo, 'i nts'e na'a haníyeh, howu nuni nahzut. 'Aw cha'ust'en 'ink'ez 'aw hoonliyaz hiye soo nadootnih, 'i chah cha'husdle. 'Et hubudayi cho Solomon naih dezti 'i be soo nadut'ih teh, 'et whunts'ih 'aw 'indakyaz degha nus cha'íldzooh ho' 'int'ah. ²⁸ 'Et Yak'usda tl'o unzoo, 'i yilh'i. 'I k'an dzin tl'o k'ut haníyeh 'ink'ez bunt'ah 'i tsehidutelhkulh 'ink'ez duték'un. 'Et nuhwheni dalhcho 'i be 'o nus soo nuhghutele. Nuhwhuba 'alha' hoont'ah, 'i tube usdlah nuhwhuba ntsol. ²⁹ Ndai teh'alh, 'ink'ez tehtnilh, 'i chah, 'ahoolhyez tube cho buka daóohtne 'ink'ez bughunek wahle gunih. ³⁰ 'Et ndi yun k'ut 'udun yun k'ut whut'en 'et zeh hukwa hunúta. 'Et whunts'ih Yak'usda nuh'aBá ndai be ndunahdzit, 'i ts'iyawh t'einínzun ho' 'int'ah. ³¹ 'Et whunts'ih nts'e na'a Yak'usda hubudayi cho unli, 'et zeh hukwa itéh'en t'eh, 'et ndi chah 'o nus nuhghá tekulh ho' hoont'ah. ³² Nuhwheni se'usheep 'ilho núlh'as, 'aw whenoolhújut gunih! Njan whunulh'en, nuh'aBá nts'e na'a hubudayi cho unli, 'et hoont'i hoh nuhgha óote'ah. ³³ Ndai aht'i, 'i ts'iyawh be 'óhket 'ink'ez tehel'en, 'en hubugha yoohlelh. 'Et whuz na'a 'et ndaht'en t'eh, 'ink'ez nuhsooneya zus 'aw tinta cha'test'il, 'i 'ahleh. 'Ink'ez ndai unzoo, 'i 'ilhuz wheni bula tah hoolah, 'i ts'iyawh be yóohlelh, 'i yak'uz ts'ih nióohlelh. 'Aw whuz undunut'ih daóoya ghaít'ah 'ink'ez 'aw yun nulh'as, 'i whunts'ih tinta' yoolh'en ghaít'ah. ³⁴ 'Et ndai oonaht'i be sahla 'i 'ilhughehla, ndet sula, nuhdzi chah 'et zeh da' duté'ah.

Lhazdoot'e, 'aw nket'ah t'ets'onízun neMoodihti whusanátedalh

³⁵ "Nuhwheni nuhnaih be 'áht'en, 'i ts'iyawh be náhdelh 'ink'ez nuhtoo dezkiun, 'i chah dóok'un. ³⁶ 'Et nuhwhenich'oh dune ndunnah dumoodih ba lh'i, 'en buk'una'a 'ooht'e. Nts'e dune lhghusdúke ts'ih hanája, 'ink'ez ndati whudulhghalh t'eh, 'ahoh hiba dá'dutootan. ³⁷ 'Et ndet moodih whusanaja t'eh, 'ink'ez be 'ulhna hika tsi hooli, 'ink'ez hika ítes'en, ndunnah moodih ndut'en bunilh'en t'eh, 'en degha nus hoonzoo hubugha whults'ut. 'Alha 'un whudúsni, bumoodih soo nadutetnilh ka, 'ink'ez dude 'ulhna natl'adulhúts'ih hubuduténih, 'ink'ez hububut ní'telelh. ³⁸ 'Ink'ez moodih tuzniz tusih k'us tuzniz hukw'elh'az tusih, 'et whusanatedalh 'ink'ez be 'ulhna hika tsi hooli hoh hika ítes'en, 'et whuz na'a moodih ndut'en hubunilh'en t'eh, 'en degha nus hoonzoo hubugha whutelts'ulh. ³⁹ 'Ink'ez soo cho t'eoonahteh, ndun bukoo whumoodih nts'owhugha whudezulh undunut'ih whusatéyah, 'et t'ewhuninzun t'eh, 'et soo ts'ah'un da huwhole, 'ink'ez 'aw hikoo da'dutooyis ghaít'ah. ⁴⁰ 'Et huwa nuhwheni chah lhadóoht'e. 'Alha nts'owhugha 'uhunet'oh 'et buka tsichahóohlih, 'et yinkak dune ye' 'en whusanátedalh," ni Sizi. ⁴¹ 'Ink'ez 'et Peter ndi yúlhni, "NeMoodihti, ndi khunek bugha whuts'odul'eh, 'i be yailhtuk, 'i nuhwheni zeh tulih k'us ts'iyannah ba tulih 'udini?" ⁴² 'Ink'ez neMoodihti 'utni, "K'us ndan ts'ah'un 'int'ah 'ink'ez whunih unli hoh bukoo huwunli? 'En bumoodih bukoo whumoodih yutelhtsilh,

soo 'et neooduzuk t'eh, 'et 'onghunnah hite'alh, 'i hubugha naítet'ah. ⁴³ 'Et bumoodih whusanaja t'eh, 'ink'ez hibe 'ulhna whuz na'a ndut'en yunilh'en t'eh, 'et tsih ndan bukoo whumoodih yulhtsi, 'en degha nus hoonzoo bulh 'uwhútenilh. ⁴⁴ 'Alha 'ún whudusni ndan bumoodih ndai yit'i, 'i ts'iyawh k'une' yul'en yutl'aóote'ah. ⁴⁵ 'Et whunts'ih ndan be 'ulhna dich'oh budzi yuh hoh 'et nduninzun t'eh, 'Sumoodih sa slah whusanádaih.' 'Ink'ez 'et dune bumoodih hiba 'uhút'en 'ink'ez ts'ekoo hiba 'uhút'en chah whéboonilhtsus. 'Ink'ez whé'ni'al 'ink'ez tanutnai, hoh tanutnih, ⁴⁶ hoh t'eh ndet dzin 'et ndan be 'ulhna 'aw yuka ts'ih chahoolih 'ink'ez nts'oh howa 'uhunet'oh utenilh 'aw t'eoónizun, 'et hoh wheghah 'uhunet'oh hoh bumoodih whusanátedalh. Tube ye'whudutelhyah, 'ants'ih lhulcho k'eitet'us li'yutelih 'ink'ez ndai Yak'usda k'unucha'ust'en hubuts'ítekulh, 'et didut chah whuz na'a zeh bugha ootét'ah. ⁴⁷ 'Ink'ez ndan 'ulhna 'en bumoodih ndet yuts'u hukwa' ninzun, 'et ts'iyawh t'eoónizun, 'et whunts'ih 'aw wheni lháchadit'ah 'ink'ez yuk'unucha'ust'en, 'et huwa lhat hoh hubooteltsus. ⁴⁸ 'Et whunts'ih ndan t'eoónizun dumoodih ndet yuts'u hukwa' ninzun, 'ink'ez dude 'ut'en k'ah huwa hubooteltsus huba, dzuhayaz zeh hubooteltsus. 'Et ndun dune lhai bugha nt'ai, 'en lhat yuts'u hukwa' ntezilh. 'Ink'ez ndan lhat butl'awhélya, 'en 'o nus lhat yuts'u hukwa' untezilh.

Sizi 'utni, "Dune lhch'a nihudutédluh 'et hukwa whusáya"

⁴⁹ "Ndi yun kwun buk'eítes'ah ka whusáya. 'Uda ncha duzk'an. ⁵⁰ 'Et whunts'ih be dune too be 'ul'en, 'i be too be' tesnilh huba' hoont'ah. 'Et lhaooodutenilh 'et whuts'un 'et huwa tube dzuh nuszut. ⁵¹ Ts'iyannah lhts'un ts'ah'un 'úhoot'e, 'et hukwa ndi yun k'ut whusáya nahzun ih? 'Awundooh! 'Et ndun whudusni, dune lhch'a nehúdutedulh 'et hukwa whusáya. ⁵² 'Et k'an njan whuts'un skwunlanah 'ilhughun bukoo hudemhts'i, 'en lhch'a nihúdutedulh. Tanah, 'en nanah ch'a nihudutedulh, 'ink'ez nanah, 'en tanah ch'a nihúdutet'us. ⁵³ Be'abá buye' ch'a níduteyalh, 'ink'ez buye' 'en be'abá ch'a níduteyalh. Be'ama 'en chah dutse' ch'a níduteyalh, 'ink'ez butse', 'en be'ama ch'a níduteyalh. 'Ink'ez bubez 'en chah beyas'at ch'a níduteyalh, 'ink'ez beyas'at, 'en chah bubez ch'a níduteyalh."

Sizi Gri whusanatedalh soo cho buka tse ts'úholi

⁵⁴ 'Et lhanah 'ilhohuwezdel, 'en chah ndo búlhni, "Et ndet nus de kw'us whúzli nulh'en t'eh, 'et 'ahoh 'udahni, 'Dzuh stl'iyaz nawhulhtih.' 'Ink'ez 'et nduwhút'ih. ⁵⁵ 'Ink'ez n'az tézts'i teh 'et 'udahni, 'Tube whuntézulh ho' whut'en,' 'ink'ez 'et nduwhút'ih. ⁵⁶ Nuhwheni dune nalh duba nahdzoo aht'ah! Ndi yun k'ut 'ink'ez yat'ah chah dawhutenilh, 'et nt'eoónuhzun. 'Et whunts'ih dáhoont'ah huwa k'an dawhutenilh 'aw nt'eoónuzáhzun? ⁵⁷ 'Ink'ez nuhwhenich'oh dahoont'ah huwa nts'e na'a ts'ah'un na'a 'ohoont'ah, 'et 'aw nt'eoónuzáhzun? ⁵⁸ 'Et ndan nch'a detni, 'en naheyelh but ninyutélhtelh, 'et whuz ah'us hoh 'et tube buts'un lhanaoodonleh hukwa' ont'en. 'Et sih naheyelh but ninyutelhtelh 'ink'ez naheyelh nehúlhghel tl'anyutelhtelh, 'ink'ez nehúlhghel tsak'enyute'ah. ⁵⁹ 'Et ndun whudusni ndi sooneya ntsolyaz whunts'ih, 'i ts'iyawh buk'elha whutelhtsilh, 'et whuts'un tsak'etanda."

13

Nuhwheni lubeshi whuch'a nuhwhubeni nahadunoohlelh, 'et ndúchahnel t'eh, 'et nuhwheni ts'iyawh kwuncho yuh ts'ih téhdulh

¹ 'Et hoh da bulunah dune, 'en Sizi 'uhiyulhni nts'e na'a Galilee whut'en hubanghan hubulh dahooja. 'En 'uhint'ah Galilee whut'en Yak'usda ba 'uhudélk'un hoh Pilate hubanghan 'ink'ez hubuzkai nyoo hidélk'un, 'i butayunjut. ² 'Et Sizi ndo búlhni, "Ndunnah Galilee whut'en, 'en nts'e na'a 'uhuja

dzuh nuhuzde, 'et huwa 'uyoon Galilee whut'en degha nus lubeshi 'uhulh'en nahzun ih? ³ Awundooh nuhwhudúsni! 'Et whunts'ih nuhwheni chah nuhwhubeni lubeshi whuch'a náhandunoohlelh, 'et nduchahnil t'eh, 'et nuhwheni chah ts'iyawh, whuz na'a zeh yatáhlah! ⁴ 'Et keyah Siloam huwhútni, 'et tse whedi'a, 'i ndunnah lanezi 'o 'at lhk'udinah, 'en hubuk'enínghez hoh ts'iyawh hedúghan. 'Et Jerusalem whut'en, 'en huba nus lubeshi 'uhulh'en 'uhint'ah nahzun ih? ⁵ Awundooh nuhwhudúsni! 'Et whunts'ih nuhwheni chah nuhwhubeni lubeshi whuch'a náhandunoohlelh, 'et nducháhnil t'eh, 'et nuhwheni chah ts'iyawh, whuz na'a zeh yatáhlah!"

Ndi duchun, fig hiyulhni, 'i be Lizwifhubodutelh'eh

⁶ 'Et doo chah Sizi huwa whuts'odul'eh, 'i be hubulh yalhtuk hoh njan ndutni, "Ilhunuh dune 'en mai chun, figs hiyulhni, 'i bumai haníyeh, 'i k'ut, 'et 'ilho ha ínulhyeh. Ink'ez 'ilhudzin yumai ka ités'en. Ink'ez 'aw mai bughoh hoolah. ⁷ Ink'ez 'et bumai haníyeh huwunli ndi yúlhni, 'Whunilh'en ih? Tat naoodezulh whuts'un ndi mai chun, figs hiyulhni, bumai ka ités'en 'ink'ez 'aw bumai bughoh hoolah. Di ka yun k'ut bulh hóonsol? Ntintselh!" ⁸ Ink'ez 'utni, 'Moodih whute k'an naoodezulh zeh buts'un ha chaoozí'ah. K'at bunat naooteskalh 'ink'ez bugha soo ha' niyeh, 'i butaídutesleh. ⁹ 'Et soo bumai whúzdli t'eh, 'et soo' hoont'ah. 'Et ndúchainil t'eh, 'et sih ntooselh."

Ts'eketi, 'en Satan yulhghel

¹⁰ 'Aw 'et dzin nats'ulyis 'et 'ilhunuh Lizwif luglez 'et whubodulh'eh. ¹¹ Khunyaz 'et 'ilhunuh ts'eke lanezi 'o 'at lhk'udit naoodezut (18) 'et ntsi' nududeh, 'i lait'ah yulhtsi hoh 'en yudinda. 'Et huwa nachaneti 'ink'ez dich'oh 'aw nduk na'ootneh ghaít'ah. ¹² Sizi yutelh'en ibulh, yuka hunih 'ink'ez 'anih yúlhni, 'ink'ez ndi yúlhni, "Ts'eketi lait'ah 'aw 'et mba whulaood-etnik!" ¹³ 'Et yuk'edilnik 'ink'ez 'ahoh lhk'unadesduki 'ink'ez Yak'usda dálhti. ¹⁴ 'Et nats'ulyis dzin 'et Sizi ndun ts'eke soo na'yinla, 'et hukwa ndun Lizwif luglez whumoodih hunílch'e. Ink'ez 'ilhohuwezdel, 'en ndo búlhni, "Lhk'utat dzin (6) 'et dune 'uhoot'en huba' hoont'ah. 'Et huwa 'uts'ut'en dzin 'aw 'et zeh soo na'nohohooleh huba' hoont'ah. 'Et nats'ulyiz dzin 'et huba cha'hoot'ah." ¹⁵ 'Et neMoodihti ndi yúlhni, "Nyun dune nalh duba naindzoo 'unint'ah! 'Alha nuhwheni ilhughun ahli hoh nats'ulyis dzin nuhmusdus dune, k'us nuhmuyool teh musdus bakoo hundelhúya, 'et lhk'unadúh'uk 'ink'ez too k'ez toolhdlooh ghaít'ah ih? ¹⁶ Ndun ts'eke 'ilhunuh Abraham yuts'u haínzut 'ink'ez Satan lanezi 'o 'at lhk'udit (18) naoodezulh hoh yulhghel. Soo cho howu nuni nahzut! 'Alha nats'ulyis dzin 'et 'aw buk'una'óot'uk ghaít'ah hoh ih 'udahni?" ¹⁷ 'Et Sizi ndi khunek 'et ndudáni hoh yuch'a detni, 'en ts'iyawh hooya huzdli. Ink'ez 'onghunnah lhanah 'en hubugha hoonzoo tune' 'ust'en 'et huwa honélnik.

Haníyeh, 'i mustard hiyúlhni, 'i bugha whúts'odul'eh

¹⁸ 'Et Sizi ndo búlhni, "Yak'usda hubudayi cho unli, 'et nts'e na'a nuhwhuba dahoont'ah? Ink'ez di bulh simba nuhwhuba nduwhúlt'ah nahzun? ¹⁹ Ndez na'a nduhoont'ah, ndi mai nintsolyaz butse, 'i mustard hiyulhni, 'i k'una'a 'uhoont'ah. 'I dune yunílhchokw 'ink'ez ha'neyeh whuyína'ah 'ink'ez haneyih. 'Ink'ez duchun cho ulhih. 'Et dut'aiyaz buzooschum tah 'ut'o nilih."

Yak'usda buk'úne' whut'en 'et, lhes ntuldooh, 'i ndult'ah

²⁰ 'Ink'ez doo chah ndo búlhni, "Nts'e na'a simba whunwhunoolhtun Yak'usda buk'úne' whut'en? Ndez na'a Yak'usda buk'úne' whut'en 'et. ²¹ Lhes ntuldooh, 'i dunt'ah. Ndai ts'eke yílhchukw 'ink'ez lhes nudúdzaih, 'i ta tsetsai be yúnde'oohlzh, 'i dezbuñ. 'I ntuldooh, 'i bulh 'ilho be yandzai, 'ink'ez yunelhlhus. 'Et hukw'elh'az 'udun ninínkai hoh untelhúdo."

Hoondot ndati hukwa 'óohneh

²² 'Et hukw'elh'az Sizi Jerusalem whuz tezya. 'Ink'ez keyah whuti 'ink'ez keyah whuyaz 'et dune hoh uyalh 'ink'ez dune hoodulh'eh. ²³ 'Et 'ilhunuh ndi yúlhni, "Nemoodihti bulunah zeh ih hudutejih?" 'Ink'ez Sizi ndo búlhni, ²⁴ "Hoondot ndati hukwa 'óohneh. 'Et ndun whudúsni lhanah 'et ndati dahátedulh hukwa' huntezilh, 'et whunts'ih 'aw 'uhooneh ghaít'ah. ²⁵ 'Et 'ilho bukoo whumoodih didinya 'ink'ez ndati dána'dentan, 'et nuhwheni 'az nudelhúya 'ink'ez ndati whudulhghalh 'ink'ez 'udahni, 'Moodihti, moodihti neba dá'dutentih!' 'Et 'un whudóoni, "Aw nt'enohwhunuzúszun nts'ez de háhdel." ²⁶ 'Ink'ez 'udoohni, 'Nyulh 'uts'u'alh 'ink'ez nyulh 'úts'utnai. 'Ink'ez nekeyah whuti 'et da whuneoodilh'e inle.' ²⁷ 'Et whunts'ih 'udóoni, 'Nuhwhudusni, nuhwheni 'ink'ez nts'ez de háhdel 'aw t'enowhunuzúszun. Sch'a nasáhdelh! Nuhwheni ts'iyawh tink'us ne'zaht'en!' ²⁸ Abraham, Isaac, Jacob, 'ink'ez nus whunilh'en, 'en ts'iyawh, ndet Yak'usda hubudayi cho unli, 'et hudutélt's'ilh 'et hubunoolh'en. 'Et whunts'ih nuhwheni tinanohonilhdel. 'Et tehtso 'ink'ez nuhghoo lhedutelhk'us. ²⁹ 'Ink'ez lhanah ndaz de, nus de, nyaz de 'ink'ez nts'iz de, whuz de hahutedulh 'et ndet Yak'usda hubudayi cho unli, 'et nátl'ahudutelts'ilh 'uhute'alh ka. ³⁰ 'Et ndóohoont'ah, bulunah 'udechoo hinli, 'en 'udek'ah hutele. 'Ink'ez bulunah 'udek'ah hinli, 'en 'udechoo hinli nahutedleh.' ³¹ 'Et dzin zeh bulunah Pharisee, 'en Sizi highu nindel 'ink'ez 'uhiyúlhni, "Naindalh 'ink'ez njan whuch'a nasindaih. Herod nyutuzelhghelh hukwa' ninzun!" ³² 'Ink'ez ndo búlhni, "Ndun 'uyoo nanguz 'en sba dóohni, 'Sih soo zolhts'ai! K'an dzin 'ink'ez bunt'ah chah ntsi' nududeh, 'i dune ch'a hanánusyukw 'ink'ez dune soo ná'ulh'en, 'ink'ez whulh tat dzin 'et hukwa whusáya 'et lhaoodúlya tesdle.' ³³ 'Et whunts'ih k'an dzin, bunt'ah dzin, 'ink'ez 'om bun dzin kedutooszit huba' hoont'ah. 'Alha' hoont'ah, 'aw nus whunilh'en, 'en 'aw keyah Jerusalem whu'az daóotsah huba cha'hóot'ah.

Jerusalem whut'en, 'en hubugha Sizi budzi nduda suli

³⁴ "Nuhwheni Jerusalem whaht'en, Jerusalem whut'en, nuhwheni aht'en nus whunilh'en, 'en ahghan. 'Ink'ez ndunnah nuhts'uh whel'a, 'en chah tse be hubahghan. Dant'ah ligok duduzkeh dut'a bugha hubudelhts'i, whuz na'a nuhwheni chah dáwhultsuk hoh 'ilhunanohwutésdlel hukwa' nuszun, 'et whunts'ih 'aw hukwa cha'náhzun. ³⁵ Soo cho whunulh'en, 'aw 'et nuhwheni Jerusalem whut'en nuhkeyah 'aw hoonli hoolah suli hoh nuhwhuba 'et nenáwhults'ut, 'et whuz na'a Yak'usda nuhladutetnih. 'Ink'ez 'alha 'un whudúsni, ndet whusawhútelts'ulh, 'et hoh t'eh 'et ndudútehnih, 'Ndun Moodihti boozi be whusateyalh, 'en degha nus hoonzoo bugha whults'ut.' 'Et ndudútehnih 'et whutsuh, 'aw sooh'en ghaít'ah."

14

Nats'ulyis dzin, 'et Sizi nduda soo ná'yinla

¹ 'Aw 'et 'ilhut dzin 'ilhunuh Pharisee bumoodih bukoo, 'et nats'ulyis dzin, 'et Sizi lhes natet'alh ka danínya. 'Et soo ts'ih hinilh'en. ² 'Et khunyaz 'ilhunuh dune buyust'e tah too whudezbun suli, 'et hukw'é nduda, 'en Sizi yubut suyin. ³ 'Ink'ez Sizi ndunnah Moses be' dustl'us k'ut, daja ni hoh beni hoonli be yalhtuk, 'ink'ez Pharisee, 'en chah ndo búlhni, "Et neba ts'ah'un 'uhoont'ah ih nats'ulyis dzin dune soo na'ts'oolh'en?" ⁴ 'Et ts'iyawh t'ehudusnih. 'Ink'ez ndun dune yílhchoot 'ink'ez soo na'yinla, 'ink'ez yulanadetnik. ⁵ 'Et ndo búlhni, "Ndunnah 'int'ah nuhtah muyool 'ut'i k'us bumusdus dune tsa k'et 'alts'ut t'eh, 'aw nats'ulyis dzin 'uhoont'ah 'et huwa

ih 'ahoh 'aw hanáchahitelhtel nahzun ih?" ⁶ Njan 'et hubugha huboodulhkut, 'aw whe' hudooni hooyal ghaít'ah.

Dune ncha unli tehleh, 'et hukwa 'ooh't'en gunih

⁷ Ndunnah hubugha nusja k'us hoonzoo 'utahahódet'ai 'ink'ez hubunilh'en ho' hut'en. 'Et huwa whuts'odul'eh, 'i be hubulh yalhtuk hoh njan ndutni, ⁸ "Nts'e dune lhghu tekelh ts'ih nuhghu nusja t'eh, k'us hoonzoo teh natl'adoohdalh gunih. Doo ka noghan do 'int'ah tulih highu nónya. ⁹ 'Et t'eh ndun nuhghu nuseya, 'en 'un yudooni, 'Sinda 'et ndun 'et butl'ahóo'ah.' 'Ink'ez 'et hooya sinli hoh degha nus 'on yuk 'et nanátl'adondalh. ¹⁰ 'Et whunts'ih nts'e nuhghu nuhúzya whuz toohya 'ink'ez 'ants'ih ndati wheghah nátl'adondalh. 'Et t'eh ndun nuhghu nusiya 'en tulih 'un whudóoni, 'Suh dune soo hoonzoo 'et natl'adindaih.' 'Et ndunnah kw'uzdai k'ut nyulh hudemhts'i, 'en nyahudóolhti. ¹¹ Soo cho whunulh'en, ndan ncha na'dudil'i, 'en hooya tele. 'Ink'ez ndan te'dudil'en, 'en ncha hiyoolhtsilh." ¹² Ndun yughu nusiya, 'en Sizi ndi yúlhni, "Ndet dzetniz k'us hulgħha huwa' tan'ah t'eh, khun teh nyulh dunekah, k'us nyulhutsinkah, k'us nyulhtuskah, k'us nghah whut'i ndunnah soode'a 'int'ah, 'en ts'iyawh hubugħu nónya gunih. 'En hubugħu nusinya t'eh, 'en tulih ngħu nunáhooda hoh mba k'elha whutele. ¹³ 'Et whunts'ih huwa' tan'ah t'eh, 'et ndan tehel'en, 'ink'ez dzuh nuhudelh, 'ink'ez hubuyust'e hubodi'ai, 'ink'ez chawħés'en chah, 'en ndunt'ah, 'en zeh hubugħu nónya. ¹⁴ 'Et nyun degħa nus hoonzoo nyulh 'úhoneh. 'En 'aw mba k'elha huħolhtsilh għaít'ah. 'Ink'ez nk'et'ah dune tsah'un 'int'ah, 'en dináhudidel t'eh, 'et sih mba k'elha whuteleh 'et huwa."

'Udechoo hubugħu nusiya, ndunnah 'awundooh hutni, 'aw 'ilhunuh whunts'ih ndi tet'alh 'aw chahítesil

¹⁵ 'Et 'ilhunuh dune kw'uzdai k'ut yulh usda, 'en yudants'o, 'en ndi yúlhni, "Ndet Yak'usda hubudayi cho unli, ndunnah 'en 'uha'ah, 'en degħa nus hoonzoo hubugħa whutel's'ulh!" ¹⁶ 'Ink'ez Sizi ndi yúlhni, "Ilħunuh dune hulgħha hooncha hoh huwa' ni'ai. 'Ink'ez lhanah għu nusiya. ¹⁷ 'Et hulgħha na'hutet'ahh dude 'ulħna yálħa 'ink'ez ndunnah hubugħu nusja ndo budóoni, "Aw 'et ts'iyai lhadúja, dez ahdulħ!" ¹⁸ Ts'iyawh 'ilħunah hinli hoh 'aonilhka 'aw 'uhooneh għaít'ah hutni. 'Et 'udechoo njan ndutni, 'Si yun oket 'ink'ez whuz tesyalh whuntelh'ilh ka, 'et huwa 'aw oosneh għaít'ah suba dóni.' ¹⁹ 'Et 'ujoon dune 'en chah njan ndutni, 'Skwunlai musdus dune ħuziħi ndelħuya oket. 'Ink'ez nantelħu'ilh dant'ah simba, 'et huwa 'aw oosneh għaít'ah suba doni.' ²⁰ 'Uyoon chah 'et ndutni, 'K'an zeh 'at ust'i 'et huwa 'aw whuz toosya għaít'ah.' ²¹ 'Et hoh 'ulħna yughu nanja 'ink'ez dumoodih 'en hubugħa ts'iyawh ndi yúlhni. 'Ink'ez ndun bukoo whumoodih 'aw 'et hunilch'e 'ink'ez dude 'ulħna ndi yúlhni, 'Soo 'a tsih! Keyah whuti ts'ih inyāl 'ink'ez ti wheyaz ndulħcho hoh ninya 'ink'ez tehel'en, dzuh nuhudelh, chahuwhés'en, 'ink'ez hubuyust'e hubodinla chah, 'en ts'iyawh whusaoobonleħ!' 'Ink'ez wheyálħa. ²² 'Ulħna whusanája 'ink'ez 'utni, 'Sumoodih nts'e na'a 'udini, hukw'u na'a 'usja, 'et whunts'ih 'awħuz hooncha whuz'ai.' ²³ 'Ink'ez moodih dude 'ulħna ndi yúlhni, "Aw 'et ti whucho ts'un inyāl 'ink'ez ti whuyaz ts'un chah inyāl 'ink'ez dune ts'iyawh dez hutoodelh hukwa' bilħen, sukoo whudoobun ka. ²⁴ 'Alha' dusni hoh nyudusni, ndunnah 'udechoo hubugħu nusíja, 'aw 'ilħunuh whunts'ih ndi tet'alh, 'i 'aw chahítesil."

Nuhwheni nuhtah 'ilħunah ahli hoh ts'iyai aħt'i, 'i 'aw bulachaduzahnik t'eh, 'aw sugħha hoodul'eh wahle għaít'ah

²⁵ 'Et lhanah 'ilhohuwezdel hiyulh tezdel. 'Et hubuts'u nalhú'a 'ink'ez ndo búlhni, ²⁶ "Ndan suts'u teyalh se'ut'en k'ah 'uwhutelh'ilh 'ink'ez bu'abá, bu'ama, bu'at, buzkehkah, dulhutsinkah, 'ink'ez dulhtuskah, 'alha 'ink'ez dich'oh hoh yinkak usda chah, ndi njan ts'iyawh si sugha whuladetnik t'eh, 'en 'aw sugha hoodol'eh wule ghaít'ah. ²⁷ 'Ink'ez chah ndan bulhdulalhkus chaidestil 'ink'ez suntezya, 'en 'aw sugha hoodol'e wule ghaít'ah. ²⁸ Soo cho whunulh'en, ndan 'int'ah nuhtah, 'en whedi'a, 'i 'itelih t'eh, 'en 'udechoo nátl'adeda 'ink'ez daneltsuk whutele neooni'ai, 'i bé lhaoodutenilh. ²⁹ Doo ka 'aw nduchaínil t'eh, 'ink'ez koo buk'uwhuz'ai inla, 'et 'aw soo 'uneltsuk ye lhaoodutelih, 'i chayít'ih t'eh, 'et ndunnah whuhunilh'en, ts'iyawh highu tedloh. ³⁰ 'Ink'ez 'uhudooni, 'Ndun dune whedi'a, 'i whe'yuninle 'ink'ez 'aw lhai dooleh ghaít'ah!' ³¹ K'us ndan hubudayi cho 'utenilh 'uyoон hubudayi cho bulh lhuhutedúghan hukwa' ntezilh. 'Alha 'udechoo nátl'adeda 'ink'ez hukw'u nuni noolhdzut datenilh. 'Et soo tulih 10,000 budune, 'en be ndun 'uyoон hubudayi cho 'en 20,000 lhahudughan, 'en soo tulih ndunnah 10,000 be hubududóoya. ³² 'Et k'us ndan 'uyoон hubudayi cho 'en 'awhuz nilhdza 'az de hédlh hoh, 'et khunek yuba na'a yuts'u whébahalh'a, nts'e na'a simba ts'ah'un nenáhoho'ah 'et huwa. ³³ 'Et huwa nuhwheni nuhtah 'ilhunah ahli hoh, ts'iyai aht'i, 'i 'aw bulachaduzahnik t'eh, 'aw sugha hoodul'eh wahle ghaít'ah.

Lusel buzachahóolki t'eh, 'aw hoonli huba cha'íldzooh ho' 'int'ah

³⁴ Lusel 'i unzoo ho' 'int'ah. 'Et whunts'ih 'aw buzachahóolki suli t'eh, nts'e na'a simba doo chah buzahóolki naoodle? ³⁵ Lusel buzachahóolki t'eh, 'aw hoonliyaz huba cha'íldzooh ho' 'int'ah. 'Aw yun ba whunts'ih cha'íldzooh. 'Ink'ez 'aw musdus ndálya 'et whunts'ih huba cha'íldzooh ho' 'int'ah. 'I'ants'ih dune tihiyulhkuk huba 'int'ah. Ndán hubudzo hooni hiyoozólhts'a huba' hoont'ah!"

15

Sheep tinch'a ninja

¹ 'Aw 'et ndunnah sooneya 'ilhunaoonughés'ah 'ink'ez lubeshi 'uhulh'en, 'en chah ts'iyawh Sizi hiyootuzélhts'ilh ka highu nendel. ² 'Ink'ez ndunnah Pharisee 'ink'ez Moses be' dustl'us 'uk'ununa'úsduguz chah highu yawhenilh-tuk hoh njan nduhútni, "Nulh'en ndun dune 'en lubeshi 'uhulh'en, 'en hubulh ne'ut'en 'ink'ez hubulh 'á'alh chah 'ut'en." ³ 'Et huwa bugha whuts'odul'eh, 'i be hubulh yalhtuk hoh njan ndutni, ⁴ "Ndan 'int'ah nuhtah dune 'en sheep 100 ut'i hoh 'ilhuk'i tinta ninja. 'Aw 99 'en chuntah 'aw 'et níbuninla 'ink'ez 'ilhunuh tinta inilhti, 'en naitelhtelh whuts'un yukunúta? ⁵ 'Ink'ez ndet nayilhti hoh duwus k'eyilhti 'ink'ez hootét'i. ⁶ 'Et hoh da bukoo ts'ih lhgha nadija, budunekah 'ink'ez hubeghah huwhut'i, 'en ts'iyawh 'anih hubudani 'ink'ez ndo búlhni, 'Suh hoonaht'i. Ndun se'usheepyaz tinch'a nilhti inle, 'en nailhti!' ⁷ 'Et ndun whudusni, whuz na'a zeh ndan 'ilhunuh dune lubeshi whuch'a bubení nahundunez'ai, 'en 99 ts'ah'un 'int'ah, 'en 'uda dulubeshi ch'a hubeni nahundunezda. 'Et whunts'ih ndan 'ilhunuh dune 'en bugha nduk yak'uz hudemlhts'i, 'en huba nus'o nus howun télnik."

Lhuk'i sooneya dezti, 'i tinch'a iné'ai, 'i

⁸ "Et doo chah zeh 'ilhunuh ts'eke lanezi silver ut'i 'ink'ez lhuk'i tinch'a iné'ai. 'Aw 'et too dezkl'un nadulhk'an 'ink'ez bukoo tímawhulhtsas, 'ink'ez nayunté'ah whuts'un yukunúta. ⁹ 'Ink'ez ndet nainí'ai t'eh budusnekaah 'ink'ez bughah huwhut'i, 'en 'ilho 'anih hubudani 'ink'ez hubudútenilh, 'Suh hoónaht'i! Ndi sooneya lhuk'i tinch'a ne'ai, 'i naní'ai!' ¹⁰ Whuz na'a zeh

'un whudúsni, 'ilhunuh lubeshi 'ulh'en bubení nahundunez'ai t'eh, 'et si-hYak'usda hubulizas, 'en ts'iyawh huwhun télnik."

'Ilhunuh tintalts'ut inle 'aw 'et nailti

¹¹ Sizi 'et 'utni, "Ilhunuh dune, nanah buye' hooni. ¹² 'Udek'ah 'et bu'abá ndi yulhni, 'Abá ndai suba naootándzilh, 'i k'an ts'iyawh stl'ainle.' 'Et ndun be'abá ndai buye' buba nayootedzilh, 'i ts'iyawh huba lhk'éyanla. ¹³ 'Et hukw'elh'az 'aw lhat dzin chailah, 'et 'udek'ah yugha ininla, 'i ts'iyawh soo nininla. 'Ink'ez keyah nilhdza ts'ih whinya. 'Et whuz ninya hoh ndai yít'i, 'i ts'iyawh tinta' yunilh'en 'ink'ez hoolah yulhtsi. ¹⁴ Hoh da 'et ndai yuts'u yoozi, 'i ts'iyawh hoolah yulhtsi hoh, 'et nyoh yun k'ut dai cho whúzdlı. 'Ink'ez ndun chilh ts'iyai, 'i ye ndunidzit suli. ¹⁵ 'Et 'ilhunuh dune 'et yun ut'i, 'en 'ut'en yugha níai. 'Ink'ez hanulhyeh ts'ih wheyálh'a, 'et goso ghá' te'ah ka. ¹⁶ 'Et buye'élts'ul k'et 'et ndunínzun, ndi goso yu'alh, 'i úncha us'alh, ninzun. 'Et whunts'ih 'aw dune yugha cha'us'ah. ¹⁷ 'Et beni bugha nadelts'ut li'uja 'ink'ez 'utni, 'Dahúneltsuk se'abá ba 'uhut'en hiya'ah, 'i huba nus 'uneltsuk, 'ink'ez si njan lhe'ust'ah! 'Aw 'et dai súzulghe! ¹⁸ Dinadoosja 'ink'ez se'abá buts'uh nátoosja 'ink'ez njan ndudóosni, su'abá yak'uz whudulhyah chah lubeshi usdla 'ink'ez nyun mbut chah. ¹⁹ 'Aw 'o 'at suye' sudutenilh huba soo cha'lhudzooh. 'Et huwa ndunnah mba 'uhut'en k'una'a 'usolhdzin.' ²⁰ 'Aw 'et be'abá ts'un natesja. 'Awhuz yoo 'az de nádalh, be'abá yutelh'en hoh 'ahoh yugha te'nanzin. Yududelhgai 'ink'ez buye' bushih be na'yilchoot 'ink'ez naindunants'ooz. ²¹ 'Ink'ez buye' ndi yúlhni, 'Se'abá yak'uz whudulhyah 'ink'ez nyun nyunalh chah lubeshi usdla. 'Aw 'o 'at nye' sudutánilh huba soo cha'lhudzooh.' ²² 'Et whunts'ih be'abá be 'ustl'en hubuts'un 'et ndutni, 'Naih degha nus unzoo, 'i whusaoohlchoos 'ink'ez be sóo naidahleh, lande'ai bula nidah'ah 'ink'ez kegwun chah beyúlh'es. ²³ 'Ink'ez musdusyaz nilhúk'a, 'i ulhchoot 'ink'ez nasulhghe! 'Et 'uts'oo'ah 'ink'ez ts'onóolhnik. ²⁴ Suye' dazsai inle 'ink'ez k'an nakhítna li'hoont'ah. Tinta nilhti inle, 'ink'ez k'an nailhti.' 'Aw 'et ts'iyannah hiyulh whunélhnik. ²⁵ 'Et buye', 'udetsah whudelhdzulh, 'en ha'níyeh ts'ih 'ut'en. 'Et koo ts'ih natesja. 'Aw 'et wheghah nadalh hoh 'et shun chah 'ink'ez hanudaih 'et whuduzts'ai. ²⁶ 'Ink'ez 'ilhunuh 'uski ye 'ulhna 'anih yulhni 'ink'ez yoodulhkut, 'Dawhutni ho' whutni?' ²⁷ 'Ink'ez ndi yúlhni, 'Nyulhutsin whusanája. Soo 'int'ah 'ink'ez dáchait'ah hoh whusanája. 'Et huwa nye'abá musdusyaz nilhúk'a, 'i naselhghi.' ²⁸ 'Et whunts'ih bulhutsin 'udetsah hunilch'e. 'Ink'ez 'aw koo ts'ih nátooja hukwa cha'nizun. 'Et be'abá tenínya 'ink'ez yughu tedudlih. ²⁹ 'Ink'ez be'abá ndi yúlhni, 'Nilh'en lhe'whulduh mba 'ust'en. 'Ink'ez 'aw nghunek lhuk'i whunts'ih k'uchásyus. 'Et whunts'ih 'aw sheepyaz whunts'ih sugha chailtel sulh dunekah hubulh whúnoohlhnik ka. ³⁰ 'Et whunts'ih ndun nye', 'en, ndai bugha íni'ai, 'i ts'ekoo 'uhul'en, 'en buk'uz ts'iyai, 'i yulhtsi 'ink'ez musdusyaz nilhúk'a, 'i buba naizélhghi!' ³¹ 'Ink'ez ndi yúlhni, 'Suye' 'ahoolhyez sulh 'ínt'ah. 'Ink'ez ndai ust'i, 'i ts'iyawh nyun nye'ildzun 'int'ah. ³² 'Et ts'ah'un na'a 'ohoont'ah ts'onóolhnik 'ink'ez ts'ohót'i huba' hoont'ah. Nyulhutsin dazsai inle, 'en nakhitna. Tintalts'ut inle, 'aw 'et nailhti.'

16

'Aw Yak'usda chah 'ink'ez sooneya chah ba 'ont'en ghaít'ah

¹ 'Ink'ez 'et chah yugha hoodul'eh, 'en ndo búlhni, "Ilhunuh dune soode'a 'int'ah, 'en bukoo whumoodih unli. 'Et 'uyoon 'uhiyulhni, 'Nkoo whumoodih ndai int'i, 'i tinta' inílh'en.' ² 'Et 'anih yudani 'ink'ez ndi yúlhni, 'Daja hutni nyulh udusts'o? Nts'e na'a sukoo whumoodih inli, 'et ts'iyawh suba

'uk'e'ónges. 'Aw 'et sukoo whumoodih inli 'ustl'e' 'inja ho' hoont'ah!' ³ 'Et ndun bukoo whumoodih inle dich'oh na'dudutni, 'Daoosneh simba? Sumoodih 'aw 'et se'ut'en sughu nayílchoot. 'Aw soo cha'lhútus yun whuteskaih whuba. 'Ink'ez da'dutelhúne chah hukwayá usdli. ⁴ Datésnelh howu nuni nuszut. Ndet se'ut'en njan tinta ní'ai t'eh, dune bukoo ts'ih soo dasuhoolel.'

⁵ 'Et ndunnah bumoodih 'ilhunah hinli hoh hubuts'ún 'ít'i, ts'iyawh 'anih hubudáni. 'Ink'ez 'udechoo 'en yoodulhkut, 'Sumoodih daneltsuk buts'un int'i?' ⁶ 'Et ndi yúlhni, 'Khe 100 bundé'oolhdzai, 'i.' 'Ink'ez ndi yúlhni, 'Soo 'a natl'adindaih 'ink'ez bé nts'uh whuz'ai, 'i 50 zeh 'uk'e'inges!' ⁷ 'Et 'ilhunuh chah ndi yúlhni, 'Nyun do, daneltsuk buts'un int'i?' 'Ink'ez ndi yúlhni, 'Tl'o mai 100 bundé'oolhdzai, 'i.' 'Et ndi yúlhni, 'Bé nts'uh whuz'ai, 'i 80 zeh 'uk'e'inges!'

⁸ Ndun ts'ah'un cha'it'ah bukoo whumoodih, tube 'uyoo unli hoh 'uja. 'Et ndi yúlhni bumoodih, "Aw soo ts'ah'un na'a cha'inil, 'et whunts'ih 'uyoo inli hoh 'inja!" 'Et Sizi ndo búlhni, "Ndez na'a njan nduhoont'ah, ndunnah huba 'alha' cha'hoot'ah, 'en 'uyoo hinli 'int'ah 'ink'ez ndunnah Yak'usda ba be whét'en hinli, 'en huba nus 'uyoo hinli. ⁹ 'Ink'ez ndun whudusni, ndi sooneya, 'i be dulh dunekah nahultsih. 'Ink'ez datéhtsah t'eh, 'et sih, 'ilhuz 'ohoont'ah ts'ih, whuz danáhohooleh. ¹⁰ Ndai 'aw hoonli chahóolah, 'et ts'ah'un ne'whulh'en t'eh, ndai hooncha 'et chah ts'ah'un ne'whutelh'en. 'Et ndan hoontsolyaz be tink'us 'int'ah, 'en hooncha whuz na'a zeh 'et ndutet'ilh.

¹¹ 'Et huwa ndi sooneya, 'i be ts'ah'un nucha'zaht'en t'eh, nts'e na'a simba ndai be soode'a 'ohoont'ah, 'i nuhtl'ayóo'ah? ¹² 'Et nuhwheni ndai 'uyoon be'ildzun 'i be ts'ah'un cha'áhnel t'eh, 'et ndan simba óoneh ndi nuhbe'ildzun unli, 'i nuhtl'ayóo'ah? ¹³ 'Aw 'ilhunuh 'ustl'en 'en 'aw nanah moodih ba né'oot'en ghaít'ah. 'Et 'ilhunuh 'en yuts'u dutetnik 'ink'ez 'ilhunuh yuk'etetsi'. K'us 'ilhunuh yuk'úne'tet'en 'ink'ez 'ilhunuh yuch'a dútetni. 'Aw Yak'usda k'une' 'int'en 'ink'ez sooneya chah k'une' 'ont'en ghaít'ah."

Ndai dune ba dezti, 'i Yak'usda yuts'u dutnik ho' 'int'ah

¹⁴ 'Et ndunnah Pharisee, 'en sooneya huba dezti 'uhint'ah. 'En chah soo nts'e na'a daja ni ts'iyawh hidants'o, 'ink'ez highhudloh. ¹⁵ 'Et ndo búlhni, "Nuhwheni ndez na'a njan daht'ah. Dune tah nuhwhenich'oh soo ts'ah'un 'int'ah na'dudulhú'i, 'et whunts'ih Yak'usda nuhdzi dant'ah ts'iyawh soo ts'ah'un nt'eooininzun. Ndai dune ba dezti, 'i Yak'usda yuts'u dutnik ho' 'int'ah. ¹⁶ Moses be' dustl'us 'ink'ez nus whunilh'en bube' dustl'us chah ndet whuts'un John dune too be 'ulh'en khuna da, 'et whuts'un dune hik'une' 'oot'en huba' hoont'ah. 'Et whuts'un whudutezut ndet Yak'usda hubudayi cho unli, 'et hubugha khunek unzoo, 'i dune hiye yalhtuk. 'Ink'ez ts'iyannah 'et whuz na'a húkwa' hut'en. ¹⁷ 'Et tube howa whulna hoh nduk yat'ah 'ink'ez ndi yun chah hoolah whutele. 'Et whunts'ih njan Moses be' dustl'us k'ut degha nus hoontsolyaz hukw'e'éduguz, 'et 'o nus howa whulna hoh hoolah whutele. ¹⁸ 'Et ndan dune bu'at 'ustl'e' 'inla 'ink'ez 'uyoon ts'eke ghu nasda t'eh, ndun dune 'en lubeshi 'ulh'en. 'Ink'ez ndun ts'eke duki ch'a nasja 'ink'ez 'uyoon dune ghu nasda t'eh, ndun dune 'en chah lubeshi 'ulh'en ho' 'int'ah."

Lazarus 'ink'ez dune soode'a, 'i

¹⁹ "Aw 'et 'ilhunuh dune soode'a 'int'ah, 'en naihulk'un, dezti, 'ink'ez laiyin dezti, 'i chah, ye dune unli. Dzin totsuk unzoo, 'i zeh yu'alh, ²⁰ 'ink'ez 'ilhunuh dune tel'en, 'en Lazarus hiyulhni, 'en buyust'e 'et ndulhcho hoh buka whulhjut. 'Ink'ez ndun dune soode'a 'int'ah, 'en bughu dati 'et hiyulhti. ²¹ Ndun soode'a bukw'uzdai k'ut wheghakat, 'i uncha us'alh ninzun. Lhikah 'en whunts'ih highuh nilgok hoh hika k'et whúdlat. ²² 'Et ndun dune tel'en dazsai. 'Ink'ez lizas, 'en Abraham zih nihinílhti. 'Ink'ez ndun soode'a 'int'ah

chah dazsai. 'Ink'ez wheyih hiyalhti. ²³ 'Et ndun 'en yaidla tah usda 'ink'ez tube dzuh nuzut. 'Et nduk yuta'en hoh nilhdza 'et Lazarus, Abraham yuzih usda hoh hubutelh'en. ²⁴ 'Et tube soo cho yuts'u ha huyih 'ink'ez 'uyulhni, 'Se'abá, Abraham, sugha te'nonzeh! Lazarus 'en suts'ilh'ahlh! 'Astl'iyaz dulasgek be toot nudoolnih 'ink'ez 'i be sutsoola k'ut nawhunoolhtsul, 'i be nanoosdúk'as! Ndi kwun 'i be dzuh nuszut' yulhni. ²⁵ 'Et whunts'ih Abraham ndi yúlhni, 'Suye' yinkak sinda da whunailnih ih? Ts'iyaantsuk unzoo, 'i nghánkat. 'Et whunts'ih Lazarus ntsi' zeh bughankat. 'Ink'ez 'aw 'et 'en hoonzoo bughá whults'ut, 'ink'ez nyun k'an dzuh ninzut. ²⁶ 'Ink'ez 'aw 'et zeh ilah, nyun 'ink'ez nuwheni nuhwhéguz tube nadalhdzat ho' hoont'ah. 'Et huwa njan whuts'un 'aw nts'ó tooya ghaít'ah k'us nyun nts'un ts'ih whuts'un chah 'aw dez hutooya ghaít'ah.' ²⁷ 'Et ndi yúlhni, 'Se'abá Abraham nts'u tedusdli, Lazarus 'en se'abá bukoo ts'ih ilh'ahlh. ²⁸ Skwunlanah sulhutsinkah hooni. Khun teh khunek hubugha ó'ahlh. Doo ka sih njan dune dzuh nudeh ts'ih hutoodelh.' ²⁹ 'Et Abraham ndi yúlhni, 'Moses be' dustl'us 'ink'ez nus whunilh'en bube' dustl'us chah hit'i. 'I hiyoozólhts'a da.' ³⁰ 'Ink'ez ndi yúlhni, 'Awundooh se'abá Abraham. 'Et 'ilhunuh yaidla tah ts'ih hanája 'ink'ez hubuts'u tezya t'eh, 'et huwa lubeshi whuch'a hubeni nahodunooleh.' ³¹ 'Ink'ez ndi yúlhni, 'Moses be' dustl'us 'ink'ez nus whunilh'en bube' dustl'us chah, daja ni 'aw hiyoozólhts'a hukwa cha'hunízun t'eh, 'et nts'e na'a 'ilhunuh dazsai yaidla tuz hanaja t'eh, 'en whunts'ih 'aw hubeni 'uts'un ná'yooleh ghaít'ah."

17

Ndun dune tink'us nehúnílht'uk, 'en bugha 'et nduwhut'en, 'et dawhultsi' buts'uh whélts'ulh

¹ 'Ink'ez Sizi yugha hoodul'eh 'et ndo búlhni, "Njan tink'us uznint'uk 'ahoolhyez 'et whuzdla ho' hoont'ah. 'Et whunts'ih ndun dune bugha tink'us 'úwhut'en, 'en dawhultsi' buts'uh whélts'ulh. ² Ndunnah 'uskehyaz 'ink'ez ndun dune 'en bugha tink'us 'úhut'en suli t'eh, 'en dune tse cho hits'ilchun edinguz 'ink'ez soo takhulh tahíyano t'eh, 'et 'o nus whutézoo. ³ 'Et huwa soo cho khahdli. 'Et nuhulhutsinkah nuhdulhyah 'uhuja t'eh, 'et hukwa' budóohnti. 'Et hubeni náhudunez'ai t'eh, 'et huba whunaooodoolhúnah. ⁴ 'Et 'ilhut dzin skwunlai 'o at nankoh ndulhyah 'uja t'eh, 'et totsuk nghu nadaih 'ink'ez, 'Seni náhandune'ai,' nyúlhni t'eh buba whunaooodolnah."

Nts'oh dahooja whunts'ih, be 'alha' hoont'ah, 'i be neMoodihti buk'une' ts'oot'en

⁵ 'Ink'ez ndunnah whel'a, 'en neMoodihti 'uhiyúlhni, "Be néba 'alha' hoont'ah, 'i 'o nus 'ultus neba ilhtsi." ⁶ 'Et neMoodihti ndo búlhni, "Degha nus haníyeh mai tseyaz, 'i mustard hiyulhni, 'et nuhwhuba 'alha' hoont'ah, 'et 'uwchlcho t'eh, 'et njan duchun, 'i mulberry hiyulhni, 'et Yak'usda boodolhkut, 'Ndi duchun bughih tubulh hanaílhch'oolh 'ink'ez nye bun cho k'ut 'et whuyuni'ah.' 'Et Yak'usda nuhk'ah ts'ih 'ooneh. ⁷ 'Ink'ez nuhwheni nuhtah 'ilhunuh nuhwhe'ulhna unli. 'Et ndan 'en haníyeh k'et nawhulhch'ul k'us sheep ghunli. 'Et ndi hanúlhyeh k'us whuz de hanája. 'Et ndez na'a tulih 'udóoni, 'Soo 'a! Natl'adindaih 'ink'ez na'int'ahlh!' ⁸ 'Awundooh! K'us ndez na'a njan dudóoni, 'Hulgħha natest'ahlh, 'i suba lhadinle, 'ink'ez soo cho soo nadíntneh! 'Ink'ez suba hukw'e'inle, bulħ na'test'ahlh, 'i chah suba hukw'einkaih. 'Ink'ez na'est'al hukw'elh'az 'et na'ont'ahlh.' ⁹ 'Et ndun be 'ulhna ndet yutl'ahonla 'et ts'iyaantsuk lhaoodinla. 'Et nduja 'et huwa iħsuchanailya yudutenilh? 'Awundooh nuszun. ¹⁰ 'Et whuz na'a zeh nuhwheni

chah, ndet daóoh't'en nuhwhudani, 'et ts'iyawh lhaoodahla t'eh, 'et 'ink'ez njan dudutéhnih, "Aw 'ilhun whunts'i huba soo cha'ts'ilzoo. Daja nehutni, 'et zeh ne'ts'ut'en."

Dune bukak whulhjut, buba 'alha' hoont'ah, i be soo ná'uja

¹¹ 'Aw 'et Sizi Jerusalem tezya hoh yun k'ut Samaria 'ink'ez yun k'ut Galilee chah wheguz lhuseya. ¹² 'Et whuz uyalh hoh keyah whuyaz ninínya. 'Et lanezi ndulhcho hoh bukak whulhjut, 'i leprosy hiyúlhni, 'i be hunduda, hidudezdel. 'Ink'ez highu nilhdza nahudelhúya. ¹³ 'Et whuts'un hits'un ha huyih, "Sizi neMoodihti, negha te'ninzech!" ¹⁴ 'Et Sizi hubunilh'en 'ink'ez ndo búlhni, "Náwhulnuk buts'un ahdulh." 'Et 'awhuz whuz hédluh hoh soo na'huja. ¹⁵ 'Et 'ilhunuh soo na'uja t'ewhunanzin hoh 'et nuhundunezya. 'Et soo tube cho Yak'usda dálhti. ¹⁶ 'Et Sizi yubut yun 'et nacháneti, 'ink'ez lk'uz teh suchanailya yulhni. 'En dune Samaria whut'en 'int'ah. ¹⁷ 'Et Sizi ndi yúlhni, "Lanezinah ih soo na'huja? Ndunnah lhuk'i hoolah lanezinah nts'e whehánel? ¹⁸ 'Et ndun 'udun keyah ts'ih hainya, 'en zeh whusanaja 'ink'ez Yak'usda suchanailya yulhni." ¹⁹ 'Ink'ez Sizi ndi yúlhni, "Didinyih 'ink'ez naindalh. Mba 'alha' hoont'ah, 'i be soo na'inja."

Nket'ah 'uwhutenilh Yak'usda hubudayi cho unli whusaóotelts'ulh

²⁰ 'Et bulunah Pharisee, 'en Sizi hiyoodulhkut, "Nket'ah 'uwhutenilh Yak'usda hubudayi cho unli whusaóotelts'ulh?" 'Et ndo búlhni, "Yak'usda hubudayi cho unli, 'aw nts'e na'a whusaóotelts'ulh, 'et 'aw whunólh'en ghaít'ah. ²¹ 'Aw 'ilhunuh whunts'ih dooni ghaít'ah, 'Njan whunulh'en 'et 'ohoont'ah, 'k'us, 'Nghah 'ohoont'ah.' 'Et Yak'usda hubudayicho unli 'uda no-hwhulh 'ohoont'ah ho' hoont'ah." ²² 'Ink'ez 'et yugha hoodul'eh ndo búlhni, "Et hoh dzin whusaóotekulh 'ink'ez yinkak dune ye', 'ilhut dzin whuteh'ilh hukwa' ntehzilh, 'et whunts'ih 'aw hooh'en ghaít'ah. ²³ 'Et 'onghunnah dune 'en ndun núhwhudooni, "O 'un whunulh'en!" 'k'us 'Njan whunulh'en!' Khun hubuts'u toohdelh gunih 'ink'ez hubun toohdelh gunih! ²⁴ Nts'e na'a ditnik kwun 'oolges teh ndulhcho hoh bé wheóodiltsih, 'et whuz na'a zeh yinkak dune ye', budzin t'eh ndulhcho hoh ts'iyannah ba be hooduteltsilh. ²⁵ 'Et whunts'ih 'udechoo lhat hoh dzuh nutezut huba' hoont'ah. 'Ink'ez k'an whudzulh dune, 'en hikacha'unteszil. ²⁶ 'Et nts'e na'a Noah budzin whudezulh da, dahoont'ah inle, 'et whuz na'a zeh yinkak dune ye' dzin 'et ndo whútenilh. ²⁷ 'Et ts'iyannah 'oha'alh zeh 'uhut'en, 'ink'ez tahunutnai. Dune 'ink'ez ts'ekoo chah lhgho delhts'i. 'Ink'ez hoh da nts'e na'a Noah ts'i cho be ínya 'ink'ez too hadámbun, 'et ts'iyannah too hubanghan. ²⁸ 'Ink'ez ndun Lot 'en khuna da whuz na'a 'et ndúhooja. 'Et ts'iyannah 'oha'alh zeh 'uhut'en 'ink'ez tahunutnai. 'Oohooket 'ink'ez 'e'hooket. 'A'hunule 'ink'ez koo 'uhuwhulh'en cha' hut'en. ²⁹ 'Et hoh da dzin Lot, 'en keyah Sodom huwhutni huwu whenaja hoh kwun 'ink'ez tse dezk'un, 'i ndus de yak'uz ts'ih naílhtan, 'ink'ez ts'iyawh hoolah hubulhtsi. ³⁰ 'Ink'ez ndet dzin 'uwhutenilh yinkak dune ye' be hóoduteltsilh, 'et whuz na'a ndó tenilh. ³¹ 'Et hoh dzin, ndun dune bukoo hukw'ut nalyis hoh, 'en 'aw koo natooja 'ink'ez bukoo ts'ih ye 'int'ah, 'i 'aw nayóolchoot gunih. 'Et whuz na'a zeh ndun dune ha'niyeh k'et 'ut'en, 'en bukoo ts'ih 'aw ye 'int'ah, 'i yukunaóoda gunih. Khun 'uwhuténilh 'et huwa. ³² Lot, bu'at 'en bunálhúnih! ³³ Ndan dich'oh ye khuna, 'et 'ududooliyih hukwa 'ut'en, 'en ye khuna, 'i tinta ité'ahl. 'Ink'ez ndan dich'oh ye khuna tinta ooní'ai t'eh, 'en 'udutelyih ho' 'int'ah. ³⁴ 'Et ndun whudusni ndez na'a njan nduwhútenilh, 'et 'ulh'ek nanah lhuk'i kw'usuti k'ut huztez. 'Ilhunuh 'en itélcholh, 'ink'ez 'ilhunuh 'aw 'et ndutét'ih. ³⁵ Nanah hite'ahl, 'i hidunulhduz. 'Ilhunuh itélcholh, 'ink'ez 'ilhunuh 'aw 'et ndutét'ih. ³⁶ Nanah, 'en haníyeh

k'et 'uhut'en. 'Ilhunuh itélhcholh, 'ink'ez 'ilhunuh 'aw 'et ndutét'ilh." ³⁷ 'Et hukwa hiyoodulhkut, "NeMoodihti nts'e 'udini?" 'Ink'ez ndo búlhni, "Ndét neyust'e sula, 'et sbalyan 'ilhowútuwédulh."

18

Nuwheni 'ahoolhyez tenazdoodli 'ink'ez whulazdoontnih gunih

¹ 'Et Sizi be whuts'odul'eh, 'i bugha ndo búlhni. 'Et ndez na'a whunehodul'h'eh hoh njan ndutni, dune 'ahoolhyez tenazdoodli 'ink'ez 'et whulazdoontnih gunih. ² 'Et ndo búlhni, "Et 'ilhun keyah, 'et ndun nahéyelh, 'en 'aw Yak'usda yé chaniljut, 'ink'ez dune ba 'ants'ih 'int'ah. ³ 'Et keyah zeh 'ilhunuh tsandelh, 'en 'ahoolhyez yugheyih 'ink'ez ndi yúlhni, 'Ndun such'a detni, dásinla suba ts'ah'un na'honleh!" ⁴ 'Et 'astl'iayaz whuts'un hoont'i hoh 'aw yoozólhts'a ghaít'ah. 'Et 'udek'elh'az na'dudútni, "Aw Yak'usda be chanuzulhújut 'ink'ez dune chah 'ants'ih suba hinli. ⁵ 'Et whunts'ih ndun tsandelh sdabe tesudule, 'et huwa buba ts'ah'un na'whutesdlilh, doo ka sih suk'a'doolhdzas!" ⁶ 'Ink'ez neMoodihti ndo búlhni, "Ndun naheyelh ts'ah'un cha'ít'ah, daja ni oozélhts'ai. ⁷ 'Et whuz na'a zeh k'us ndan Yak'usda budune, dzin 'ink'ez 'ulh'ek 'i bulh hits'u tedudlih, 'ink'ez soo hubulh whulh'ai. 'Aw hiyoozólhts'ai ghaít'ah nahzun ih? ⁸ 'Et 'un whudusni, 'a cho huba k'utetnilh! 'Et whunts'ih yinkak dune ye' ndi yun k'ut whusanája t'eh, soo ih dune buba 'alha' hoont'ah naootélelh?"

Dahoont'ah huwa dune Yak'usda nalh ts'ah'un na'uja

⁹ Bulunah ts'ah'un na'a 'ust'ah na'hundunúdzun, 'ink'ez 'onghunnah, 'en hints'i hubunínzun. 'Et huwa Sizi 'en ndi nawhutnuk 'i be whúts'odul'eh 'i be 'ubulh yalhtuk hoh njan ndo búlhni, ¹⁰ "Nanah dune Lizwif hubuluglez whucho tenahudutedli ka whuz wheha'az. 'Ilhunuh 'en Pharisee 'int'ah, 'ink'ez 'ilhunuh sooneya 'ilhunanowes'ah 'int'ah. ¹¹ Ndun Pharisee 'en dich'oh siyin 'ink'ez tenadudli hoh njan ndutni, 'Yak'usda suchanailya nyudusni. 'Aw 'uyoon dune dúlh nduchaust'ah. 'Uyoon 'en huwhilhtsi' sooneya be, 'en 'aw ts'ah'un cha'it'ahnah 'uhint'ah, 'ink'ez ts'ekoo k'us dune bulh tínta' 'ut'ihnah. 'Ink'ez ndun sooneya 'ilhunanowes'ah, 'en whunts'ih bunduchalhút'ah. ¹² Hukw'enilhghel 'et totsuk nat sahá'delhuya. 'Ink'ez ndai suba k'elha unli, 'i chah bulah, 10%, luglez huwas'ah,' ni Pharisee. ¹³ 'Et ndun sooneya 'ilhunanowes'ah, 'en chah 'udun siyin. 'Aw nduk whunts'ih yutó'en ghaít'ah 'ink'ez yuk nelhú'ai. 'Ink'ez budzi k'ut hoolhchis, 'Yak'usda sugha te'ninzech! Lubeshi 'ulh'en 'ust'ah,' ni." ¹⁴ 'Et Sizi ndo búlhni, "Ndun whudusni ndun sooneya 'ilhunanowes'ah, 'en Yak'usda nalh ts'ah'un na'uja hoh bukoo ts'ih nanja. 'Et 'ilhunuh 'aw nduchaínil. 'Et ndez na'a njan ndúhoont'ah, ndun duba nahúdzoo, 'en hooya yutelhtsilh. 'Ink'ez ndun yuk 'ududildzun, 'en Yak'usda nduk na'yutelilh."

Sizi 'uskehyaz huba tenadudli

¹⁵ 'Aw 'et 'uskehyaznah highih hininla khun sih buk'edoolnih ka. 'Et yugha hoodul'eh honilh'en hoh, 'Dah!' buhútni. ¹⁶ 'Et whunts'ih Sizi yugha hoodul'eh 'anih hubúlni, "Whute 'uskehyaz suts'un toohdelh. Khun teh dah budoohni gunih. Ndunnah Yak'usda hubudayi cho unli whuz hudemhts'i, 'en ndunnah 'uskehyaz hubunduhúlt'ah ho' hint'ah. ¹⁷ Soo ts'ah'un 'alha 'ún whudusni, ndet Yak'usda hubudayi cho unli ts'ih, ndunnah Yak'usda hubudayi cho unli 'aw 'uskehyaz k'una'a chahuhóolhchulh t'eh, ndunnah 'aw whuz dahóoya ghaít'ah."

Dune soode'a, 'en daténih hoh 'ilhuz khutenalh whuch'a ootéhdoh

18 'Aw 'et 'ilhunuh dune moodih uncha 'en Sizi yoodulhkut, "Dune hoodulh'eh unzoo, nts'e na'a datesnilh hoh 'ilhuz khutesnalh whuch'a ootélhdoh?" **19** 'Et Sizi ndi yúlhni, "Di ka' sudini, nuszoo sudini? 'Aw 'ilhunuh unzoo hoolah. Yak'usda 'en zeh unzoo ho' 'int'ah. **20** Ndai Yak'usda khunek dune butl'aida'ai, 'i t'eininzun. Khun teh ts'ekoo bulh tinta 'ooht'en gunih. Dune soolghelh gunih. 'Undunooh'tih gunih. 'Uyoon ba hohts'it gunih. Nuhwhé'aba 'ink'ez nuhwhe'ama bulh budóolhti." **21** 'Et ndi yúlhni, "Nusol da whuts'un, ndi ts'iyawh buk'une' zust'en." **22** 'Et Sizi njan oozalhts'a hoh 'et ndi yúlhni, "Awhuz 'ilhunuh mba 'et whuz'ai. Ndai int'i, 'i ts'iyawh be 'ónket, 'ink'ez tel'ennah hubugha íyo'ah. 'Et sih nduk yak'uz dezti, 'i 'et mba téla. 'Ink'ez 'anih se'ut'en k'ah tune' ónt'en ka sunanyalh." **23** 'Et whudánts'o hoh tube budzi yuk 'úja. Ndun dune tube soode'a 'int'ah 'et huwa. **24** 'Et Sizi yunilh'en hoh ndun dune tube budzi nduda suli, 'et 'utni, "Ndunnah soo hude'a 'uhint'ah dahóolhcho huba howa whulna hoh Yak'usda hubudayi cho unli ts'un hutedulh. **25** 'Et ndi khunai ncha, 'i camel hiyulhni, 'i buba howa whulna hoh ughabatsoh bulatah bukoní'a hukwutelgwulh. 'Et whuz na'a 'o nus howa whulna hoh ndunnah soo hude'a 'uhint'ah, 'en Yak'usda hubudayi cho unli dahútedulh." **26** 'Et ndunnah hodants'o 'uhutni, "Ndan zeh simba doojih?" **27** 'Et whunts'ih ndo búlhni, "Dune ndai bulh 'uhuhooleh ghaít'ah, 'et whunts'ih Yak'usda ba huwa chahoolnah ho' hoont'ah." **28** 'Et Peter yatelhtuk hoh Sizi njan ndi yulhni, "Whunilh'en ndai ts'it'i, 'i ts'iyawh bulazdetnik 'ink'ez nye'ut'en k'ah ts'ih ts'oot'en ka nyuts'un tezdel." **29** 'Ink'ez ndo búlhni, "Alha 'un whudúsni, ndet Yak'usda hubudayi cho unli, 'et huwa dune bukoo huwu tezya t'eh, k'us budusneka, k'us dulhutsinkah teh, k'us bu'at, buzkeh chah, ndi ts'iyawh huwu tezya t'eh, **30** 'et ndan 'et ndúja, 'en 'o nus lhat butl'anaóotedúkulh. 'Et nus de whusawhélts'ut t'eh, 'et 'ilhuz khutena."

Sizi datetsah whulh tat huwu yatelhtuk

31 'Aw 'et ndunnah lanezi 'o 'at nanah, 'en 'udun nibuninla 'ink'ez ndo búlhni, "Sih soo zulhts'ai, Jerusalem ts'ih ts'utedulh 'ink'ez yinkak dune ye', ndunnah nus whunilh'en, 'en bugha hik'e'anguz, 'i ts'iyawh lhawhudutenilh. **32** Lizwif 'udun yun k'ut whut'en butl'a'duteltelh. 'En highu notablyoh, 'ink'ez highu tedloh, 'ink'ez higha dútezoh. **33** Hiyootelhtsus 'ink'ez hituzelhghelh. 'Et whulh tat dzin dinadutédalh." **34** 'Ink'ez njan ndo búlhni, 'aw hubeni tachaóodulhts'it. Bughunek daja ni hubuch'a whuntest'i ho' hoont'ah. 'Aw daja ni ho' 'utni, 'aw t'ehonízun.

Dune chawhés'en, 'en Sizi whé'en nayulhtsi

35 'Et hukw'elh'az Sizi keyah Jericho wheghah uyalh hoh, dune chawhés'en, 'en ti whuzih usda, 'ink'ez dune ts'un datni. **36** 'Et dune lhanah hoh wheghah hudulh hoh 'et hubuduzts'ai. 'Et ndo búlhni. "Et dawhut'en ho' whutni?" **37** 'Et 'uhiyúlhni, "Sizi Nazareth whut'en 'en wheghah uyalh." **38** 'Et hahuyih, "Sizi, David buts'ah hainzut, sugha te'nenzeh!" **39** 'Et 'udetsah hedulh khunek ulhtus, 'i be, "T'eduzinlh!" hiyúlhni. 'Et whunts'ih 'o nus 'ultus hoh hahuyih, "David buts'ah hainzut, sugha te'nenzeh!" ni. **40** 'Et Sizi 'ilhuz nininya 'ink'ez dune chawhés'en duts'un hítoolhte hubúlhni. 'Et Sizi hizih nehinílhti hoh yoodulhkut, **41** "Ndet mba 'uwhutesdlilh hukwa' ninzun?" "Moodihti doo chah whunulh'en nasilhtsi!" ni. **42** 'Et Sizi ndi yúlhni, "Ho'en naoondle! Mba 'alha' 'ust'ah 'et huwa soo na'inja." **43** 'Et 'ahoh whunilh'en nasdli, 'ink'ez Sizi yuntezya 'ink'ez Yak'usda délhti. 'Et ts'iyannah, njan 'et honalh'en, 'en chah ts'iyawh Yak'usda hudélhti.

19

Zacchaeus 'en chah dune hiye dujih, 'i bugha íyults'ut

1 'Et Sizi 'aw 'et Jericho ts'ih whutalhuséya. **2** 'Ink'ez 'et 'ilhunuh dune 'en 'et usda, Zacchaeus hiyulhni. 'En sooneya 'ilhunanowes'aih hubumoodih, 'ink'ez soode'a. **3** 'Ink'ez Sizi ndan 'int'ah yuntelh'ilh hukwa' ninzun. 'Et whunts'ih 'ilhunahuwésdel, 'en bugha 'aw yoo'en ghaít'ah. Ndun dune tube ndukw 'et huwa. **4** 'Et butsuh telhgai 'ink'ez duchun, Sycamore hiyulhni, yuntelh'ilh ka, 'et hukwa 'i k'ut dugailget. Whuz na'a Sizi hoh wheghah lhuteyalh. **5** 'Et Sizi 'et nininya, 'et nduk yútan'en hoh yutelh'en, 'ink'ez ndi yúlhni, "Zacchaeus 'a cho k'an 'ahoh nanaíndaih! K'an dzin nkoo tesdalh huba' hoont'ah." **6** 'Et 'a cho nanája. 'Ink'ez hoont'i hoh bukoo ts'ih yughu nuséya. **7** 'Et ts'iyannah hinalh'en hoh whuts'uh destnih, 'ink'ez howu yahalhtuk hoh 'ulhódutni, "Ndun lubeshi 'ulh'en, 'en yukoo tedalh." **8** 'Et whunts'ih Zacchaeus didinya 'ink'ez Moodihti ndi yúlhni, "SMoodihti whunilh'en, ndai ust'i, 'i ts'iyawh lhulcho tehel'en hubugha itésdlel. 'Ink'ez ndunnah hubuts'un whusts'it, 'en dit 'et 'uneltsuk, 'i hubutl'anaítes'ah." **9** 'Et Sizi ndi yúlhni, "K'an dzin dune hiye dujih, 'i hoh njan bukoo hudelhts'i hubugha íyults'ut. Ndun 'en chah Abraham yuts'uh hainzut ho' 'int'ah 'et huwa. **10** 'Alha ndunnah tinta huninkat, 'en yinkak dune ye', 'en hubukúnteta 'ink'ez hubutelhyih ka, 'et whuba whusainya."

Ndi khunek be whuts'odul'eh, 'i be t'ezninzun neMoodihti whusanátedalh whuts'un, ndez na'a ndi yun k'ut uzdóolts'i

11 'Et njan hidants'o hoh ndai 'uyoo khunek be whúts'odul'eh, 'i be hubulh yawheníltuk. Jerusalem wheghah hedulh 'ink'ez ts'iyannah 'uhuninzun ndet Yak'usda hubudayi cho unli, 'aw 'et soo 'ahoh wheóodutelsilh huninzun. **12** 'Et huwa ndez na'a ndo búlhni, "Ilhunuh dune ncha, 'en nilhdza keyah ts'ih teyalh. 'Et whuz ninya t'eh, 'et ndun nts'ez de dukeyah ts'ih hainya, 'et whuz hubudayi cho hitelhtsilh. 'Ink'ez dukeyah ts'ih nátedalh. **13** Teyalh whutsuh lanezi dude 'ulhna 'anih hubudani. 'Ink'ez ilhughun hinli hoh sooneya dezti, 'i 'ilhuk'i hoh butl'aína'ai, 'ink'ez ndo búlhni, 'Whusanátesdalh whuts'un be 'óoh't'en 'ink'ez be 'ahóhleh.' **14** 'Et whunts'ih bulh keyah whut'en hika cha'nizil. 'Et whinya hukw'elh'az 'ahoh njan keyah whudune, 'en bulunah 'utahaóobahanla, 'en keyah whunat whuz whebahalh'a huba yahutelhtuk ka, "Aw ndun dune 'aw nedayi cho wule hukwa cha'uznízun," hutni. **15** 'Et ndun dune hubudayi cho suli hoh whusanája, 'et ndunnah dude 'ulhna, ndunnah sooneya hubutl'ain'ai, 'en 'anih hubúlhni. 'Ilhunah hinli hoh daltsuk hiba inla 'et nahooté'alh hukwa' ninzun. **16** 'Et 'udechoo yughu ninya 'ink'ez ndi yúlhni, 'SMoodih ndi sooneya dezti, 'i suzih nini'ai, 'i be lanezi 'uneltsuk, 'i be mba 'usdla.' **17** 'Ink'ez ndi yúlhni, 'Se'ulhna, tube soo 'ínya! Ntsolyaz ntl'anádzai, 'i ts'ah'un na'a be ne'zint'en. 'Et huwa lanezi keyah whuti whumoodih tanleh 'et ntl'ahó'ai.' **18** 'Et bulh nanah whusainya 'ink'ez ndi yúlhni, 'SMoodih nzooneya dezti, 'i suzih nine'ai, 'i be skwunlat 'uneltsuk, 'i be mba 'usdla,' yúlhni. **19** 'Et ndun ndi yúlhni, "Et huwa nyun chah skwunlat keyah whuti whumoodih tanleh, 'et ntl'ahó'ai.' **20** 'Et 'uyoón chah yughu ninya 'ink'ez ndi yúlhni, 'SMoodih soo zelhts'ai. Nah njan nzooneya dezti, 'i suzih není'ai. 'I dzezoh be be' lhasílhchuz 'ink'ez 'et mba nine'ai. **21** 'Aw dune gha te'ninzun chaínlah t'enyunúszun, 'et huwa nyenlhújut. Ndai nye'ildzun chailah, 'i whunts'ih nailchukw. Ndai hachanilel, 'i whunts'ih hanínle,' yúlhni. **22** 'Et ndi yúlhni, 'Nyunch'oh nzek hoh dája dini, 'et hoh mba nahutesyih. Se'ulhna intsi', 'aw huba inzoo hoolah. T'eoóninzun dant'ah dune usdli. Ndai 'ilhuchaghuzus'ai 'i whunts'ih 'ulhchukw. 'Ink'ez ndai

hachazníel, 'i whunts'ih hanúsdlih 'ink'ez be sooneya 'ulh'en. ²³ 'Et hoh da di ka ndunnah sooneya lhk'enanduna'ah suzooneya 'en butl'achayí'al? 'Et t'eh da, whusanasja t'eh, 'o 'un be 'ahósdleh?' ²⁴ 'Et t'eh 'onghah nadelhúya ndo búlhni, 'Ndi sooneya dezti, 'i bugha nailhúchoot. 'Ink'ez ndun lanezi 'inla, 'en bugha ínah'ah.' ²⁵ 'Et whunts'ih 'uhiyulhni, 'Moodih 'uda 'aw 'et lanezi ut'i.' ²⁶ 'Et ndun hubudayi cho 'en 'utni, 'Ndunnah hoonliyaz hit'i, 'en 'o 'un lhai bugha itét'ah. 'Ink'ez ndan hoonliyaz chait'ih, ndai 'aw 'i yut'i, 'i whunts'ih bugha nayutélchulh. ²⁷ 'Et ndunnah such'a hudetni 'en, sukacha'hunízun hoh hubudayi cho tesdle, 'en ts'iyawh sábahle 'ink'ez soo subut 'et hubahghan."

Yak'usda hudemhti hoh keyah Jerusalem hunindel

²⁸ 'Et ndo hubudani hukw'elh'az Sizi Jerusalem ts'ih hutezdel hoh hubutsuh tezya. ²⁹ 'Aw 'et dzulhyaz, Olive hiyulhni, 'et keyah whuyaz Bethphage 'ink'ez Bethany huwhutni dzulhyaz zih whuzdla. 'Et dzulhyaz wheghah hedulh hoh nanah yugha hoodul'eh hubutélh'a. ³⁰ 'Ink'ez 'utni, "Keyah wheyaz nuhghanch'az ts'ih whuz ah'us. 'Aw 'et keyah wheyaz nenah'az t'eh, 'et 'ilhunuh yeztliyaz, donkey hiyúlhni, whédint'uk, 'i 'aw whutsuh da 'awhuz dune yuk'uchaíduh, 'i teh'ilh. 'Ihk'unadóoh'uk 'ink'ez ndez tóolhdlooh. ³¹ 'Et dune nuhuhóodulhkut t'eh, 'et dant'i ka 'ulh'en lhk'unaduh'uk? 'Et njan ndúdoohni, neMoodihti yuka' ninzun." ³² 'Et ndunnah whebalh'a whuz lhghuhudi'az hoh, soo nts'e na'a daja ni, 'et whuz na'a nahuhoo'ai. ³³ 'Aw 'et ndi yeztliyaz lhk'unaidú'uk hoh ndunnah hubube'ildzun, 'en 'uhútni, "Ndi yeztliyaz dant'i ka 'ulh'en lhk'unaduh'uk?" ³⁴ 'Ink'ez 'et ndo buhútni, "NeMoodihti yuka' ninzun." ³⁵ 'Aw 'et Sizi highu hiníhdkukw. 'Ink'ez dich'oh dunaih yeztliyaz hik'ehíyinla, 'ink'ez Sizi hik'ehíyilhti. ³⁶ 'Aw 'et tezya hoh ti yun dunaih hiba nehíyuzbuz. ³⁷ 'Aw 'et njan dzulhyaz, Olive hiyúlhni, 'aw 'et wheduhanédel hoh 'et huwu nilhdukw hoh, 'et lhanah yugha hoodul'eh huhóost'et. 'Et ndet huwa 'ét'en tune'ust'en 'et honalh'en, 'et huwa soo tube cho Yak'usda hidélti. ³⁸ 'Ink'ez 'uhutni,

"Hubudayi cho 'en Moodihti boozi be whusainya, 'en degha nus hoonzoo bugha whults'ut!"

Nduk yak'uz 'et soo whudutéghel, 'ink'ez 'et soo dugha ndoh 'et k'us whudutéti."

³⁹ 'Et bulunah Pharisee hubutah hits'un hahúyih, "Dune hoodulh'eh, ndunnah nye hóodul'eh, 'en hukwa' hubudini!" ⁴⁰ 'Et whunts'ih ndo búlhni, "Ndun whudusni, njan t'ewhudusnih t'eh, tse 'i whunts'ih da 'ahoh yatoolhdih."

Jerusalem whut'en hubulh dawhutenilh, 'et huwa Sizi howintse

⁴¹ 'Et keyah whuti wheghah uyalh, 'et Jerusalem whutelh'en hoh howintse. ⁴² 'Ink'ez 'et ndutni, "Nuhwheni Jerusalem whut'en, nuhwheni whunts'ih, k'an dzin soo cho uncha t'eoonaahzun nuhuzzin 'uhoont'ah. 'Et huwa da t'eoonaóhzin nts'e na'a hoh nuhwhuba whudutéghel. 'Et whunts'ih k'an whuts'un nuhna ch'a whuntest'i. ⁴³ 'Et hoh t'eh dzin whusawhutelts'ulh ndet nuhch'a detni, 'en nuhna'hutegus. 'Ink'ez lhez lhk'ehitelhkulh nuhnat ndulhcho hoh, 'ink'ez whez ts'ih nuhuhootetun. ⁴⁴ 'Ink'ez njan keyah whuti lhk'unahuhootélhkulh. 'Ink'ez ndunnah whez ts'ih hudemhtsi, 'en chah ts'iyawh hubulh 'uwhútenilh. 'Aw 'ilho tse lhk'udez'ai, 'i nuhwhuba 'et nenachaídutes'al. Nts'oh huwa whudezulh 'uhooga nuhulyis nuhts'un whusateyalh, 'aw t'echaoonáhzhil, 'et huwa whuz na'a 'uwhuténilh."

Luglez whuchot ts'ih 'uhóoket 'ink'ez 'é'hooket, 'en ts'iyawh Sizi tinaóobunenyoot

⁴⁵ 'Et luglez whuchot whuna'nesdutl'oo daninya 'ink'ez 'uhooket 'ink'ez 'é'hooket, 'en ts'iyawh tinaóobunenyoot. ⁴⁶ 'Ink'ez ndo búlhni, "Uk'e'eduguz ho' njan ndutni, 'Sukoo 'et tenadudli bakoo 'úhoont'ah.' 'Et whunts'ih 'et chah

njan ndutni, "Uhundunut'ih bakoo whuzúlktsi." ⁴⁷ 'Ink'ez 'et nyoooz luglez whucho dzin totsuk dune hubodulh'eh. 'Et whunts'ih soo nawhulnuk degha nus dézti, 'ink'ez Moses be' dustl'us 'uk'ununa'úsduguz, 'ink'ez dune tsuh whudelhdzulh chah, ts'iyawh nts'e na'a hituzelhghelh 'et hukwa hités'en. ⁴⁸ 'Et whunts'ih 'ilhunahuwésdel, ts'iyawh hinat nodelhúya 'ink'ez soo cho hiyoozélhts'ai. 'Et huwa 'aw ndunnah hizoolhghelh ghaít'ah.

20

Sizi ndai bugha dune bugha ndoh 'int'ah, 'et hukwa hoodulhkut

¹ 'Et hoh da 'et 'ilhudzin ndez na'a 'et ndúhooja. Luglez whucho Sizi dune hoodulh'eh hoh khunek unzoo, 'i be hubulh yalhtuk hoh nawhulnuk degha nus dézti, 'ink'ez Moses be' dustl'us 'uk'ununa'usdúguz chah, 'ink'ez ts'iyannah dune netsuh whudelhdzulh, 'en khunek be hik'udughaínya. ² 'Ink'ez 'uhiyúlhni, "Nedini ndai bugha dune bugha ndoh 'int'ah hoh ndi 'ut'en oowaghina? K'us ndan ntl'ahón'ai hoh 'udini?" ³ 'Et whunts'ih ndo búlhni, "Si chah 'ilhunuh hukwa nuhoodutelhkut, 'et úsudáhni, ⁴ nts'e na'a John dune too be 'úlh'en? Ndán yutl'aho'ai dune too be telh'ilh huba? Yak'uz ts'ih tulih hawhélts'ut, k'us ndi yun k'ut dune tulih ts'ih hawhélts'ut?" ⁵ Dich'oh lhtah howu yahalhtuk 'ink'ez 'ulhadutni, "Et yak'uz whuts'un tulih hawhélts'ut ts'utni t'eh, 'Et di ka John nuhwhuba 'alha' cha'dusnih, nedóni. ⁶ 'Et whunts'ih dune ts'ih hawhélts'ut, ts'utni t'eh, 'et dune ts'iyannah tse be nehooghan. John 'en nus whunilh'en 'int'ah 'et huba 'alha 'uhoont'ah 'et huwa." ⁷ 'Et Sizi ndi hiyulhni, "Aw nts'ez de hawhélts'ut t'ets'onízun." ⁸ 'Ink'ez Sizi ndo búlhni, "Ndai be dune bugha ndoh 'ust'ah hoh ndi njan nduwhúlh'en, 'et si chah 'aw nuhwhudóosni ghaít'ah."

Mai haníyeh k'et whulh'ai bugha whuts'odul'eh

⁹ 'Aw 'et 'uyoo khunek be whúts'odul'eh, 'i be hubulh yawhéniltuk hoh njan ndutni, "Ilhunuh dune haniyeh k'et mai too mai 'ananla. 'En njan haniyeh k'et ndunnah há' nulhyeh bughu whulh'ai, 'ink'ez sa whuts'un nilhdza keyah ts'ih whinya. ¹⁰ 'Aw 'et mai oonteje néwhuninzut hoh 'ilhunuh 'ulhna hubuts'ú wheyalh'a. 'Et ndai mai buts'ítekulh, 'i bulah higha ínoodzaih. 'Et whunts'ih ndunnah haniyeh k'et bughu whulh'ai, ndun 'ulhna yahíyalchus 'ink'ez, whenáhinanyoot. ¹¹ 'Et doo chah 'uyoon 'ulhna buts'ú whelh'a. 'En chah yahíyalchus, 'ink'ez hooya hiyulhtsi, 'ink'ez 'en chah, whenáhinanyoot. ¹² 'Et búlh tanah dude 'ustl'en buts'ú whelh'a. 'En chah nukai hiyulhtsi 'ink'ez tináhinino. ¹³ 'Et haniyeh k'et whut'i 'utni, 'Daoosneh chah simba? Sich'oh suye' buk'esi', 'en buts'ítoolh'a. 'En tulih hiyan'en t'eh, 'int'ah k'una'a né'hiyoolh'en,' ni. ¹⁴ 'Et whunts'ih ndunnah bughu whulh'ai hitelh'en hoh 'et 'ulhódutni, 'Ndun 'en nyoo haníyeh k'et bube'ildzun 'en buye' 'út'en. Ts'uzoolhghelh! 'Et t'eh ndet buts'ó telts'ulh ts'iyawh 'et ndúwhulcho hoh nets'ó toolts'it.' ¹⁵ 'Et njan haniyeh k'et tináhinino 'ink'ez hizelhghi. 'Et huwa soo cho 'ún whudusni, ndan haniyeh k'et bube'ildzun hoonli, dabóoleh simba? ¹⁶ Ndez na'a njan dutenilh, whusanátedalh 'ink'ez ndunnah mai k'et bughu whulh'ai, 'en ts'iyawh hoolah hubutelhtsilh. 'Ink'ez bumai haníyeh k'et 'uyoon, 'en bugha íte'alh.' 'Et dune hohodánts'o hoh 'uhutni, "Aw uncha 'et nduchahóonil!" ¹⁷ 'Et Sizi hubunilh'en 'ink'ez 'utni, "Ndi Yak'usda bughunek daja ni hoh 'uk'e'eduguz,

'Ndi tse koo 'uwhuhullh'en 'ún hidutelh'uz,

'i koo huk'uwhuz'ai huba soo degha nus tse 'int'ah, 'i suli.'

¹⁸ Ndunnah ndi tse hik'elts'ut, 'en ts'iyawh yahutelkulh. 'Ink'ez ndunnah ndi tse buk'édilts'ut, ts'iyawh hoolah hutele." ¹⁹ Ndunnah Lizwif

náwhulnuk bumoodih, 'ink'ez ndunnah Moses be' dustl'us 'uk'ununa'úsduguz, 'en chah, 'et soo 'et dze h'uhunet'oh, 'en Sizi hiyólhchoot hukwa' hut'en. 'Et whunts'ih ndunnah dune hubé hunuljut 'et hubugha 'aw 'ohooneh ghaít'ah. T'ehoninzun ndi khunek bé whuts'odul'eh, 'i be didut buch'a yalhtuk hoh 'utni 'et huwa.

Yun k'elha huholh'i hukwa' hoodulhkut

²⁰ 'Ink'ez highunli, 'ink'ez ts'ah'un 'int'ah na'dudil'i nunúl'i, 'en hits'un whehíyalh'a. 'En khun teh Sizi ye yalhtuk, 'i bugha hiyoolhgooh. 'Et t'eh yun k'ut whut'en bumoodih yutl'ahiyoolhtelh. 'En 'int'ah hoolhtus tune'út'en ne'ut'en, 'ink'ez ts'iyannah k'une' 'ul'en. ²¹ 'Et nunúl'i hiyoodulhkut, "Whuned-hodulh'eh t'ets'oninzun ts'ah'un na'a yailhtuk. Ts'iyannah mba lhgha 'int'ah. 'Et ts'ah'un na'a Yak'usda k'una'a dune hodilh'eh. ²² Nedini ndi yun hik'elha hiyilh'i, 'i tax hiyúlhni, 'i 'et ts'ah'un tulih 'ohoont'ah hoh hubudayi cho Caesar 'en buba k'elha ts'uyoolhtsilh, k'us 'awundooh tulih?" ²³ 'Et whunts'ih Sizi t'eooninzun 'aoonilhka 'uhutni. 'Ink'ez ndo búlhni, "Di ka sóolhdzih? ²⁴ De' nu-sooneya sunalhts'et nah'a! Ndán bunen 'ink'ez boozi chah 'uk'une'úsduguz?" 'Et 'uhiyúlhni, "Hubudayi cho Caesar 'int'ah." ²⁵ 'Et Sizi 'utni, "Et huwa ndai hubudayi cho Caesar bube'ildzun, 'i butl'anáyahle. 'Ink'ez ndai Yak'usda bube'ildzun, 'i chah Yak'usda tl'anáhle." ²⁶ Ndai khunek be dune hubulh yailhtuk, 'i bugha 'aw huyoolhgooh ghaít'ah. 'Et njan ts'iyannah nalh hubudáni hoh tube huba hooncha suli, 'ink'ez ndunnah nunúl'i, 'en ts'iyawh t'ehudínil.

Sizi dinadutédalh bugha hiyoodulhkut

²⁷ 'Et bulunah Saducee Sizi highu nindel. 'En 'uhutni dats'úzsai 'ink'ez 'aw nats'ukhóotnah ghaít'ah. 'Ink'ez hiyoodulhkut, ²⁸ "Dune hoodulh'eh njan Moses daztet'ilh neba 'uk'e'anguz ho' hoont'ah. 'Et 'ilhunuh dune buzkeh hoolah hoh dazsai 'ink'ez bu'at khuna t'eh, ndun dune bulhutsin 'en dughe inle yughu naooda huba' hoont'ah. 'Ink'ez bubuzkeh whúzdli t'eh, 'et ndunnah buzkeh ndan dazsai, 'en boozí hiyóolhchoot huba' hoont'ah. ²⁹ 'Et 'ohoont'ah skwunlat 'o 'at nanah lhulhutsinkah hoonli. 'En 'udetsah whudelhdzulh, 'en 'at ut'i. 'Ink'ez 'aw buzkeh hoolah hoh dazsai. ³⁰ 'Et bulh nánah 'en ndun ts'eke yughu nasda. 'En chah ndun dune buzkeh hoolah hoh dazsai. ³¹ 'Et bulh tanah, 'en chah yughu nasda. 'Et whuz na'a zeh ts'iyawh skwunlat 'o 'at nanah 'en ts'iyawh ndun ts'eke highu dálts'i. 'Ink'ez ts'iyawh bubuzkeh chahóolel hoh yahadla. ³² 'Et 'udek'elh'az ndun ts'eke 'en chah dazsai. ³³ 'Et ndet dune dinadidel t'eh, ndun ts'eke ndan bu'at tele? Ndunnah skwunlat 'o 'at nanah, 'en ts'iyawh ndun ts'eke 'en hubughinda 'et huwa." ³⁴ 'Et Sizi ndo búlhni, "Dune 'ink'ez ts'ekoo teh ndi yun k'ut ts'iyawh lhgho delhts'i. ³⁵ 'Et ndet hoh t'eh whusawhútelts'ulh hoh ndunnah Yak'usda ba hoonzoo hoh bughá whults'ut yaidla tah dinahudutédulh 'ink'ez yak'uz hutedulh. Whuz 'aw dune lhghu chadíls'ih ho' hoont'ah. ³⁶ 'Aw doo chah yahódlah ghaít'ah. 'En Yak'usda buzkeh huzzli 'ink'ez lizas hubulh lhuga 'uhint'ah. 'En hudujih 'uhint'ah. ³⁷ 'Ink'ez Moses 'en ts'ah'un newhuni'ai yaidla dinahudutédulh ho' hoont'ah. 'Et hoh da njan dahooja 'ut'an delhtan, 'i tah whudezk'un 'et whunts'ih 'aw whudóok'un ghaít'ah. 'En Moodihti ghu yalhtuk hoh njan ndutni, 'Abraham buYak'usda, Isaac chah buYak'usda, 'ink'ez Jacob chah buYak'usda 'int'ah,' ni. ³⁸ Nuhwheni 'uts'un na'a'unahzun. 'Aw yahadla hubuYak'usda chailah, hukhuna hubuYak'usda 'int'ah. Soo cho whunulh'en, 'en be ts'iyannah hukhutena." ³⁹ 'Ink'ez bulunah Moses be' dustl'us 'uk'ununa'úsduguz 'uhiyúlhni, "Dune hoodulh'eh tube soo' denja!" ⁴⁰ 'Et whehunelhújoot k'et 'aw 'o 'un hiyoodolhkut ghaít'ah.

Nts'e na'a Christ 'en David yuts'a hainzut 'int'ah?

⁴¹ 'Ink'ez ndo búlhni, "Nts'e na'a bulunah nduhútni, Christ dahni, 'en David yuts'a hainzut 'int'ah? ⁴² David dich'oh 'et ndutni njan Yak'usda bughunek Shun be' dustl'us k'ut,
 'Moodihti 'en SMoodihti ndi yúlhni,
 Sunailhni ts'ih sinda,
⁴³ hoh t'eh nch'a hudemtni, 'en hubuk'ut nke naóolhyis mba huboolhtsilh.'
⁴⁴ 'Et huwa David, 'SMoodihti,' yulhni, nts'e na'a simba Christ 'en yuts'u hainzut wule?"

Sizi dune ndo búlhni, "Moses bughunek 'uk'ununa'úsduguz buch'a kháhdli"

⁴⁵ 'Et ts'iyannah dune huyoozelhts'ai hoh Sizi yugha hoodul'eh 'et ndo búlhni, ⁴⁶ "Moses be' dustl'us 'uk'ununa'úsduguz, 'en naih nyiz, 'i be húdelhts'i, 'ink'ez ndet ts'uyi, 'i be 'óoket, 'et ts'iyannah hubodélhti hoh dahooja buhútni, 'et huhóont'i. 'Ink'ez Lizwif hubuluglez soo k'us hoonzoo hudutélts'ilh hukwa' huninzun. 'Ink'ez dune ghunuda, soo k'us hoonzoo huteda huka' huninzun. 'Et ndunt'ah soo cho buka tsi hooqli! ⁴⁷ 'En 'uhint'ah tsandelh bukoo hubugha ha'hudunent'ah 'ink'ez bughu huhoolhchukw. 'Ink'ez 'aonilhka sa cho tenahududli huhoolh'i. Ndunnah, 'en 'o nus 'uwhulcho hoh huba nahutedeh."

21

Tsandelh tel'en, ndai huwa íné'ai, 'i

¹ 'Et doo chah nyoh yutá'en hoh ndunnah soode'a 'uhint'ah ndai sooneya howa híte'ah, 'en sooneya bé kat, 'i be hína'ah, 'et hubunilh'en. ² 'Ink'ez 'ilhunuh tsandelh tel'en, 'en ndai 'aw 'iyaz yit'i, 'i nankoh sooneya chaditi, 'i dená'ah. ³ 'Ink'ez ndo búlhni, "Alha 'ún whudusni, ndun tsandelh tel'en, ndunnah ts'iyawh huba 'o nus lhai dená'ah ho' 'int'ah. ⁴ Soo cho whunulh'en, ndunnah soode'a 'uhint'ah ndai lhai hiyít'i, 'i Yak'usda ba hilah zeh dehína'ah. 'Et ndun tsandelh tel'en 'aw 'i yuk'ehútenalh, 'i ts'iyawh dená'ah."

Njan luglez whucho hoolah whutéle, 'et Sizi huwu yalhtuk

⁵ 'Et bulunah 'aw 'et luglez whucho howu yahalhtuk 'ink'ez 'uhútni, "Lhe'whuldzoo tse lhe'ildzoo 'i be 'uhoolya. 'Ink'ez Yak'usda bugha t'ah 'i chah 'i be 'uhoolya." 'Et Sizi ndo búlhni, ⁶ "Ndai ndi ts'iyawh nulh'en, 'et njan whusawhútelts'ut t'eh 'aw lhuk'i tse lhk'uchadutésdal, ts'iyawh nadúntejuh ho' hoont'ah."

Nket'ah 'uwhuténih?

⁷ 'Ink'ez hiyoodulhkut, "Whuneoodulh'eh, nts'oht'ah 'uwhuténih? 'Ink'ez 'aw 'et nilhdukw suli t'eh, dant'i be wheóoduteltsilh, 'i be t'ewhuntehzez?"

⁸ 'Ink'ez ndo búlhni, "Soo cho howahli. Khun teh dune nanohonoo'ah gunih. Lhanah soozí bugha whusahútedulh 'ink'ez 'uhudutenilh, 'Si 'en 'ust'ah,' 'ink'ez 'aw 'et whusawhútekulh, hutni t'eh, khun teh hubuntoohya gunih. ⁹ Dune nehughan whulh 'úduzahts'ai t'eh, 'ink'ez dune lhulhdulhyah nehóninla t'eh, njan 'et 'udechoo whusawhútekulh ho' hoont'ah. Khun teh whénoolhujut gunih. 'Awhuz whulatah, 'aw wheghah ilah 'ohoont'ah."

¹⁰ 'Et ndo búlhni, "Lhulhyoo dédowh, 'en lhch'a nehudutedulh. 'Ink'ez yinkak ndulhcho hubudayi cho be 'ustl'en, 'en chah lhch'a nehudutedulh.

¹¹ Lhelhdun, 'et chah ndulhcho hoh wheónonujut yun nutughétnah. 'Ink'ez dai chah 'ink'ez lhanah lhelhdun chah dada whutéleh. 'Et nduk yat'ah dune wheoonujut hote'ilh, 'ink'ez hooncha hoh be wheóoduteltsilh chah hote'ilh. ¹² 'Et nduwhútenih whutsuh, 'et nanwhútelcholh 'ink'ez dzuh nunóhotelhdeh. Lizwif hubuluglez whumoodih, 'en butl'anóhotelel 'ink'ez tsak'e nohotelel. 'Ink'ez hubudayi cho 'ink'ez yun humoodih, si soozí

bugha 'en hububut ninuhotelelh. ¹³ 'Et t'eh si sugha khunek unzoo, 'i be yatelhtuk. ¹⁴ 'Et hoh t'eh, 'Daja doosni simba,' noohzin gunih. ¹⁵ Khunek 'ink'ez be wháhnih, 'i nuhlt'adutes'ah. 'Et sih ndunnah nuhch'a hudemtni, 'en 'aw nuhnts'oohoodódlai ghaít'ah. 'Aw 'et buch'a' nilhde 'ink'ez 'aw 'o 'un hoonliyaz 'uhudooni ghaít'ah. ¹⁶ 'Ink'ez nuhwhulhdusneka, 'ink'ez nuhwhulhutsinkah, 'ink'ez nuhwhulhtuskah, 'ink'ez nuhwhulhdunekah, 'en whutl'anóhotelelh 'ink'ez bulunah nuhntah nuhoteghan. ¹⁷ 'Ink'ez si soozu bugha ts'iyannah nuhnts'u dutetnik. ¹⁸ 'Et whunts'ih Yak'usda 'aw nuhla dootnih ghaít'ah. Nuhtsigha 'aw lhuk'i whunts'ih tinta dóokes ghaít'ah. ¹⁹ Yak'usda ba soo cho bulh nudelhúya. 'I bugha nuhzul óhtun.

Jerusalem hoolah whutelhtsilh

²⁰ "Ndet Jerusalem nehughan whuna'húsduguz, 'et whunulh'en t'eh, 'et huwa t'eoonoohzeh 'aw 'et nilhdukw suli njan keyah whuti hoolah whutelhtsilh. ²¹ 'Et ndúhooja t'eh, 'et Judea whut'en dzulhyaz k'uz ts'ih hutoolhdell. 'Et ndunnah 'et keyah whuti 'et hudemts'i, ts'iyawh whuch'a hóodelh. 'Ink'ez ndunnah whunat huwhut'i, 'en chah khun teh keyah whuti ts'ih hutooya gunih. ²² 'Alha 'un whudusni 'aw 'et dzuh nutehzut whusawhutelts'ulh ho' hoont'ah. 'Et hubugha 'uk'e'wheduguz, 'et ts'iyawh lhaóodutenilh. ²³ 'Et hoh dzin ndunnah héchan chah, 'ink'ez ndunnah hubuzkeh 'e'úlht'ukw chah, 'en huba tube 'o nus whutétsi'. Ndi yun hoontsi' buk'e whudutelts'ulh 'et huwa. 'Ink'ez tube Yak'usda ye húnich'e, 'i chah ndunnah dune hubuk'eidutelts'ulh. ²⁴ 'Et bulunah soh cho buk'a be ts'iyawh hudutedúghan. 'Ink'ez 'onghunnah hitélhcholh 'ink'ez lhelhdun keyah ts'ih hubotelhna. 'Ink'ez 'udun yun k'ut whut'en, huba ni'unduguz, 'et whuts'un, Jerusalem 'et nduhóolhcho hoh hukw'unáteduh.

Yinkak dune ye' whusanátedalh

²⁵ "Sa, 'ink'ez 'ulh'ek ooza, 'ink'ez sum chah, 'i ts'iyawh hoonliyaz 'i be hóoduteltsilh. 'Et ndi yun k'ut ndulhcho hoh lhenyoona dune, 'en ts'iyawh tube dzuh natedeh 'aw dahútenilh ts'iyawh t'ehonízun. Hoh t'eh yatoo 'i chah tatsi tadetnik hoh taba ndulhcho yánteghus. ²⁶ Ndi yun k'ut daóotenilh hukwa tsi húhooli 'ink'ez whehunuljut k'et, bulunah budzi 'ustl'e' 'utenilh. Nduk yat'ah ts'ih be hóolhtus, 'i ts'iyawh ndulhcho nuhówutughetnah 'et huwa. ²⁷ 'Et t'eh, yinkak dune ye' kw'us tah ye úlhtus, 'i be 'ink'ez buts'uh hayánduz, 'i chah, 'et whuz na'a hiyuntelh'ilh hoh whusatéyalh. ²⁸ 'Et ndez na'a njan nduwheónit'en t'eh, nduk yutooh'en 'ink'ez whunoohlhnik. Lubeshi buch'a nanhóotekulh 'aw 'et niooninzut suli 'et huwa."

Mai cho chun, fig hiyúlhni, 'i bugha whúts'odul'eh

²⁹ 'Et be náwhutnuk 'i be whuts'odul'eh 'i be hubulh yalhtuk hoh njan ndo búlhni, "Ndi fig hiyulhni buduchun 'ink'ez 'uyoo duchun chah nulh'en. ³⁰ Bindak 'aw 'et hawhenilh'az 'i bugha t'eoonoohzin dain 'aw 'et nilhdukw ho' hoont'ah. ³¹ 'Et nuhwheni chah whuz na'a nuhnalh 'et nduwhút'en t'eh, 'et huwa t'eoonoohzeh nts'e na'a hoh Yak'usda hubudayi cho unli 'aw 'et nilhdukw ho' hoont'ah. ³² 'Alha ts'ah'un na'a 'ún whudusni, k'an njan whudezulh, 'en 'aw yachahutésdla 'et njan ndóotenilh ts'iyawh 'et lhawhúdutenilh 'et whuts'un. ³³ Yat'ah 'ink'ez ndi yun k'ut 'i chah hoolah whutéleh, 'et whunts'ih ndi sughunek 'aw hoolah chatesde.

Soo cho khahdli

³⁴ "Et whunts'ih soo cho khahdli. Khun teh stabe zoodulhú'i, 'ink'ez tanahtnai, 'ink'ez ndi yun k'ut hooni 'et zeh huwu nuní nahzut, ndi ts'iyawh 'i be nuhdzi be whudoobun gunih. Doo ka si 'et dzin soo hukwa tsi chawhahlih

'et whusawhútelts'ulh. ³⁵ Hoh t'eh, ndi yun k'ut ndulhcho hoh whudune lhugoooh li'hutenilh whuz na'a khun whusaóotelts'ulh. ³⁶ 'Et huwa 'ahoolhyez hukwa tsi hóohli 'ink'ez nts'oh whute daóotenilh nuh'et 'uwhuténilh huba soo 'ulhúdzoo 'ink'ez yinkak dune ye' 'en bubut tehyin, 'et huba tenadooohdli.' ³⁷ 'Aw 'et dzin totsuk Sizi luglez whucho dune hubodulh'eh. 'Ink'ez hulgħha totsuk ndoh dzulhyaz, Olive huwhútqi, 'et whuz whenádaih, tetelh ka. ³⁸ 'Et ts'iyannah soo 'uda cho luglez whucho dahúdulh hiyootuzélhts'ilh ka.

22

Sizi whu'izyaz hikunúta hituzelhghelh ka

¹ 'Aw 'et ndi lhes nachantulhúdoh, 'i nahitet'ulh, 'aw 'et wheghah whezullh. 'Et Hubutus Lhuseya dzin huwhútqi. ² 'Ink'ez ndunnah nawhulnuk degħa nus dézti, 'ink'ez Moses be' dustl'us 'uk'ununa'úsduguz, 'en Sizi hituzilhghelh, 'et hukwánuta. 'Et dune hube hunuljut 'et huwa nonut'i be né'hut'en. ³ 'Ink'ez Satan, 'en Judas ye ghínya. 'En 'int'ah Iscariot hiyulhni. Lanezi 'o 'at nanah, 'en hubutah 'ilhunuh 'en 'int'ah. ⁴ 'Et náwhulnuk bumoodih 'ink'ez lhuhudúghan bumoodih chah 'en hubuts'uh whinya 'ink'ez hubulh hukw'anótelhye nts'e na'a Sizi hubutl'aitelhtelh 'et. ⁵ 'Ink'ez 'aw 'et huhóost'et hoh ts'ah'un hiyúlh niwhuni'ai 'ink'ez sooneya highan té'alh hiyulhni. ⁶ 'Aw 'et Judas buts'uh náhezya nts'e na'a 'ilhuhowezdel hubuch'a hubutl'aitelhtelh, 'et hukwunúta.

Sizi 'en yugha hoodul'eh butus lhuséya hubulh na'tet'ah lhahodutele

⁷ Ndet 'aw 'et lhes nachanteldoh, 'i nahitet'ah dzin whusawhélts'ut. 'Et Hubutus Lhuseya 'et whunahulnih hoh ndi sheep k'us unzoo, 'i nahituzelhghelh. ⁸ 'Et Sizi, Peter 'ink'ez John bulh whuz wheoobalh'a 'ink'ez ndo búlhni, "Ah'us 'ink'ez neba lhaoodahleh nts'e Hubutus Lhuseya 'et na'uztet'ah." ⁹ 'Ink'ez ndi hiyúlhni, "Nts'e hukwa' ninzun mba lhats'ódutelel?" ¹⁰ 'Ink'ez ndo búlhni, "Soo zelhts'ai, ndet keyah whuti nináh'az t'eh, 'et dune nuhdudutéyah. 'En too be dezbuñ 'i niya'a. 'En nts'e bukoo danátedalh ts'ih whuz buntóoh'as. ¹¹ 'Ink'ez 'et ndun bukoo whumoodih 'en 'udóohni, 'Whuneodulh'eh njan ndúnyulhni, ndet 'uhoont'ah nkoo dune 'ilhogħudulh 'uha'ah wheni? 'Et sugħa hoodul'eh ndi Hubutus Lhuseya hubulh ná'test'ah." ¹² 'Ink'ez 'et nduk yuh hooncha lhaoodint'ah whunóhnoolhtun. 'Et lhaoodahleh." ¹³ 'Et wheħá'az hoh soo nts'e na'a hubudáni, whuz na'a nahahoo'ai. 'Ink'ez 'et Hubutus Lhuseya 'et wheni lħaháduja.

Sizi 'udek'elh'az na'ut'ah

¹⁴ 'Aw 'et wheghah whudezeluh whusawhélts'ut, 'et ndunnah lanezi 'o 'at nanah whel'a hubulh natl'adeda. ¹⁵ 'Ink'ez ndo búlhni, "Dzuh nuteszut whutsuh sudzi ndulhcho, 'i be njan Hubutus Lhuseya 'et nohwhulh ná'test'ah tube hukwa' nuszun. ¹⁶ 'Alha 'ún whudusni, nts'e Yak'usda hubudayi cho unli, 'et ts'iyawh lhaoodutenilh, 'et whuts'un, 'et ndi Butus Lhuseya 'aw 'o 'at naóost'ah għaít'ah." ¹⁷ 'Aw 'et lubot yilħchoot 'ink'ez be'aBá suchanailya yul-hni 'ink'ez 'utni, "Ulhchoot 'ink'ez ts'iyawh 'ilho ahtnai. ¹⁸ Ndun whudusni, nts'e Yak'usda hubudayi cho unli, 'et whusawhélts'ulh 'et whuts'un, doo chah 'aw ndi mai too wusnai għaít'ah." ¹⁹ 'Et lhes yilħchoot. Be'aBá suchanailya yul-hni, taídahlkut 'ink'ez butainínl, 'et ndo búlhni, "Ndi suyust'e 'int'ah. Nuhwheni nuhwhuba huwalti. 'Et ndaħt'en t'eh, 'et hoh sunaoħħu l-há." ²⁰ 'Uħan'al hukw'elh'az 'et whuz na'a zeh lubot yilħchoot 'ink'ez 'utni, "Ndi lubot 'i suzkai be k'an khunek nuhwhuba lhadúsbla, 'i 'int'ah. Nuhwheni nuhwhuba nadútelt'ih. ²¹ 'Ink'ez soo cho whunulh'en, ndun whu'izyaz dune

ch'a detni, 'en njan kw'uzdai gha sulh usda. ²² 'Alha' hoont'ah yinkak dune ye', nts'e na'a buba 'et níwhults'ut, 'et whuz na'a 'et 'uwhuténih. 'Et whunts'ih ndun dune whu'izyaz dune tl'aitelhtelh, 'en dáwhultsi' buts'uh whélts'ulh!" ²³ 'Ink'ez hedich'oh lhutah lhuhoodulkut, "K'us ndan simba 'uyúlhni, ndan 'utenilh hoh 'utni?"

Yugha hoodul'eh hubutah, k'us ndan simba degha nus ncha wule?

²⁴ 'Et chah 'ilho dich'oh 'ulhtah 'uhútni k'us ndan suba degha nus ncha wule? ²⁵ 'Ink'ez Sizi ndo búlhni, "Udun yun k'ut huwhut'en hubudayi cho dune k'une' bul'en 'int'ah. 'Ink'ez ndunnah hubugha ndoh 'int'ah, 'en nets'un hinzoo 'uhint'ah hubuhútni. ²⁶ 'Et whunts'ih nuhwheni nuhtah 'en ndóht'e gunih! 'Et k'us nuhtah ndan degha nus 'int'ah wule, 'en 'udek'ah k'una'a wule. Ndán nuhtuh whudelhdzulh, 'en nuhwhuba ne'út'en k'una'a wule. ²⁷ Daja nahzun? K'us ndan degha nus 'int'ah? Ndán kw'uzdai k'usda 'ute'ah ka, k'us yuba ne'út'en? 'Alha 'ohoont'ah ndan kw'uzdai k'usda 'ink'ez 'ute'ah 'en 'int'ah. 'Et whunts'ih nuhwheni nuhtah nuhwhuba ne'út'en, 'en 'ust'ah. ²⁸ Nuhwheni aht'ah ndet dzuh nususzut, 'et nduhóolyez hoh sulh 'éht'e. ²⁹ 'Et nts'e na'a se'aBá stl'ahó'ai hoh hubudayi cho usdli, whuz na'a zeh nuhwheni chah hubudayi cho tehleh nuhgha ótot'alh. ³⁰ 'Et nts'e hubudayi cho usdli, 'et suk'uzdai k'ut sulh 'uteh'ah 'ink'ez sulh 'utehtnai. Ndét kw'usuda cho dezti, 'i 'et hukw'u dutelhúts'ilh 'ink'ez lanezi 'o 'at nat Israel hits'uh hainzut bulh dédowh, 'en huba nahutehyeh."

Sizi, 'en Peter 'uyúlhni, "T'esunuzínzun dutanilh"

³¹ 'Ink'ez neMoodihti 'utni, "Simon, Simon, soo zelhts'ai! Satan tube nuhka' ninzun. Tl'o mai k'una'a lhtahahontéylh hukwa' ninzun. ³² 'Et whunts'ih mba tenadesdli, ndet mba 'alha' 'ust'ah, 'et 'aw nla k'éhahoolts'it ghaít'ah. 'Ink'ez ndet suts'u nanínja t'eh, nyulhutsinkah 'en hilhtus nabolhtsilh." ³³ 'Et whunts'ih ndi yúlhni, "SMoodihti lhadúst'ah nyulh tesyalh, tsak'edutes'ah k'us mba datésah." ³⁴ 'Ink'ez 'uyúlhni, "Peter ndi nyudúsni, k'an dzin ligok dune 'uduténih whutsuh, tat, "Aw ndun t'enuzuszun,' dutanilh."

Ts'iyawh lhawhúdoneh huba' hoont'ah

³⁵ 'Ink'ez ndo búlhni, "Hoh da whénwhalh'a hoh, sooneya zus, 'ezdlai chah, 'ink'ez nuhkesgwut, 'i ts'iyawh be'et. 'Aw ih hoonliyaz whechan-dunuzáhdzit?" 'Ink'ez, "Hoolah!" hiyulhni. ³⁶ 'Ink'ez ndo búlhni, "Et k'an ndan sooneya zus 'ink'ez be ne'ughe ut'i, whute yóolhchoot. 'Ink'ez ndan soh cho chait'ih, 'en budzoot ye 'óket 'ink'ez soh cho lhuk'i óket. ³⁷ 'Et huwa 'un whudusni, ndet Yak'usda bughunek k'ut si sugha 'uk'une'úsduguz, 'i ts'iyawh lhaóodoneh huba' hoont'ah. 'Et nduwhutni, 'Ndunnah 'uk'unuchá'hust'en, 'en hubun dult'ah hudooni,' ni. 'Et huwa si sugha 'uk'une'úsduguz 'et lhawhúdoneh huba' hoont'ah." ³⁸ 'Ink'ez 'uhiyúlhni, "NeMoodihti njan whu-nih'en nankoh soh cho 'et 'ustan." 'Ink'ez ndo búlhni, "I 'aw 'et soo 'últsuk."

Sizi, 'en Gethsemane 'et tenadudli

³⁹ 'Aw 'et tinánja hoh whutsuh da hukw'una'a nyoo dzulhyaz, Olive hiyulhni, 'i yuk'uz whenaja. 'Ink'ez yugha hoodul'eh, 'en chah whehínandel. ⁴⁰ Whuz hunindel hoh 'et ndo búlhni, "Tink'us únteht'uk whuch'a ténadahdli." ⁴¹ Nts'e tse nadulh'us, 'et nduwhuldzah ts'ih bughu ninínya. Dugwútsi be ninínya 'ink'ez tenadudli. ⁴² 'Et njan ndutni, "ABá hukwa' ninzun t'eh, ndi be dzuh nuteszut, 'i sughu naoolchoot. 'Et whunts'ih 'aw si hukwa' nuszun k'una'a ilah. Nyun hukwa' ninzun k'una'a 'uhóneh!" ⁴³ 'Et khunyaz ndus de yak'uz lizas be hoodiltsai. 'En ulhtus nayúlhtsi. ⁴⁴ Tube budzi nduda hoh 'o nus 'íltus hoh tenadedli. 'Uskai k'una'a buts'uh halhdzilh hoh yun nadúluz. ⁴⁵ Tenadedli 'istl'e' 'udeja 'ink'ez dinadija hoh yugha hoodul'eh tso

k'et nahunéstez hoh bughu nanja, ⁴⁶ 'ink'ez ndo búlhni, "Di ka sahtez? Doo ka sih tink'us nóoht'uk dinadahdelh 'ink'ez whuch'a tenadahdli."

Sizi 'aw 'et hiyílhchoot

⁴⁷ 'Awhuz hubulh yalhtuk hoh khunyaz lhanah dune whuz de údulh. Ndun Judas hiyulhni, 'en butsuh uyalh. 'En lanezi 'o 'at nanah, 'en hubulh 'ilhunuh 'int'ah. 'Et Sizi yughah neninya naiduntets'oos ka. ⁴⁸ 'Ink'ez Sizi ndi yúlhni, "Judas, yinkak dune ye' nadutants'oos 'i be ih whunést'i hoh butl'aítalhtelh?" ⁴⁹ Sizi bunat nuhadelhúya, dawhútenilh 'et honalh'en, 'et 'uhiyúlhni, "NeMoodihti soh cho be ih lhts'utedughan?" ⁵⁰ 'Et 'ilhunuh yuzih seyin, 'en Lizwif náwhulnuk degha nus dezti be 'ulhna nalhnih ts'ih yudzo habe' yalht'o. ⁵¹ 'Ink'ez Sizi ndo búlhni, "Ndez na'a njan dutésnilh, 'et stl'awháh'ah." 'Ink'ez ndunah budzo yut'agheznai 'ink'ez soo na'yinla. ⁵² 'Ink'ez ndunnah náwhulnuk hubumoodih, luglez whucho nehúghan hubumoodih, 'ink'ez butsuh whudelhdzulh chah, 'en highu nindel, 'ink'ez Sizi ndó bulhni, "Et di ka soh cho chah 'ink'ez tult'oh chah nuhle 'ink'ez 'undunust'ih hukw'una'a sukaótehdel? ⁵³ 'Et dzin totsuk luglez whucho nuhtah sída hoh, 'aw hoh da 'aw sóolhchoot hukwa cha'záht'en inle. 'Et whunts'ih k'an netsudule, tsahólhgus yuh usda, 'en nuhmoodih tele, 'Aw 'et nuhwhuba ní'hunent'o."

Peter 'utni, "Ndun dune 'aw t'enuzuszun"

⁵⁴ 'Aw 'et Sizi hiyilhchoot 'ink'ez náwhulnuk degha nus dezti highu dáhinilhti. 'Ink'ez Peter yoo niz de yuneyalh. ⁵⁵ 'Et naneztl'oo tuz whuniz ts'ih kwun húdulhk'an 'ink'ez 'ilho nátl'ahudelts'i. Peter 'en chah hubutah usda. ⁵⁶ 'Et kwun zih usda hoh 'ilhunuh 'ustl'e ts'ekeyaz 'en soo yunen ts'ih yunilh'en 'ink'ez ndi yúlhni, "Ndun dune 'en chah yulh 'ut'en inle." ⁵⁷ 'Et whunts'ih yuts'oodesdlai 'ink'ez ndi yúlhni, "Ts'eke, ndunah dune 'aw nt'echanuzuszun." ⁵⁸ 'Et hukw'elh'az 'astl'iyaz inle hoh 'et chah 'ilhunuh dune ndi yúlhni, "Ny whole hubulh 'ilhunuh 'unint'ah." 'Et whunts'ih Peter 'utni, "Awundooh!" ⁵⁹ 'Et doo chah 'ilhuh hukw'e'hunint'o 'et doo chah 'ilhunuh ndi yúlhni, "Alha' hoont'ah ndun 'en chah yulh 'ut'en. 'En chah Galilee whut'en 'ilhunuh 'int'ah 'et huwa." ⁶⁰ 'Et Peter ndun dune 'en ndi yúlhni, "Aw daja dini 'aw nt'echaoonuzúszun!" 'Et 'awhuz yalhtuk hoh lígok dune 'udéja. ⁶¹ 'Et neMoodihti Peter yuts'un nalhú'a 'ink'ez soo yunen ts'ih yunalh'en. 'Et Peter 'ahoh neMoodihti yughunek yunalnik daja yudani inle hoh njan ndi yulhni, "Ligok dune 'uduténih whutsuh tat nt'echasunuzínzun dutanilh." ⁶² 'Et Peter 'az whinya 'ink'ez tube cho intse.

Nehughan, 'en Sizi highu nolhúya

⁶³ Ndunnah dune Sizi huyilhchoot, 'en highudloh 'ink'ez hiyoohlchis. ⁶⁴ 'Ink'ez hina k'úna'uzguz 'ink'ez hiyonukat 'ink'ez hiyoodulhkut, "Neba nus whunóolh'en, 'ink'ez nedini ndan 'unyinla nyunezkuk?" ⁶⁵ 'Ink'ez lhat hoontsi' hoh hich'a yalhtuk.

Sizi naheyelh hububut nehinílhti

⁶⁶ 'Aw 'et yilkai ibulh dune tsuh whudelhdzulh, ndunnah nawhulnuk degha nus dézti nahúlt'ah, 'ink'ez Moses be' dustl'us 'uk'ununa'úsduguz chah, 'en 'ilhuhowezdel 'ink'ez huba naheyelh but nihinilhti. 'Ink'ez 'uhiyúlhni, ⁶⁷ "Ny whole Christ inli t'eh, nedíni!" 'Et whunts'ih ndo búlhni, "Ndun whudáni t'eh, 'aw nuhwhuba 'alha' doosni ghaít'ah. ⁶⁸ Si chah hoonliyaz nuhoodulhkut t'eh, 'aw sudóohni ghaít'ah 'ink'ez 'aw sula nadoohtnih ghaít'ah. ⁶⁹ 'Et 'ink'ez k'an whuts'un yinkak dune ye' 'et nalhnih ts'ih Yak'usda whelhtus whuda." ⁷⁰ 'Ink'ez ts'iyawh 'uhutni, "Ny whole Yak'usda buYe' ih 'int'ah?" 'Ink'ez ndo

búlhni, “Ts'ah'un na'a 'udahni, si 'en 'ust'ah.” ⁷¹ 'Ink'ez 'uhutni, “Aw 'o 'un bugha hoonliyaz highun nedóoni hukwa cha'ts'unízun. 'Aw 'et whenich'oh buzek ts'udánts'o.”

23

Sizi, 'en Pilate but néhinilhti

¹ 'Et ndunnah dune 'ilhohuwezdel ts'iyawh dináhudidel 'ink'ez Pilate but nehínilhti. ² 'Aw 'et hik'e whehoni'ai 'ink'ez 'uhutni, “Ndun dune 'en Lizwif tink'us úbunilht'uk 'et bulh náts'uhoo'ai. 'Ink'ez hubudayi cho Caesar ts'un ndi yun hik'elha hiyilh'i, 'i tax hiyulhni, 'et chah whuch'a bunézyoot. 'Ink'ez didut ndun hubudayi cho Christ ts'utni, 'en usdli na'dudútni.” ³ 'Et Pilate yoodulhkut, “Nyun ih 'int'ah Lizwif hubudayi cho inli?” 'Et Sizi 'utni, “A, 'alha' dini.” ⁴ 'Ink'ez 'et Pilate, ndunnah Lizwif bumoodih, 'ink'ez 'ilhohuwezdel ts'iyawh ndo búlhni, “Ndun dune 'aw hoonliyaz tinta' 'ant'en bugha nachawhus'al.” ⁵ 'Ink'ez 'et 'o nus huhunílch'e 'ink'ez 'uhutni, “Yun k'ut Judea ndulhcho hoh, Galilee yun k'ut, 'ink'ez njan chah, dune nuhwheni nuhch'a nihudoodelh whuz na'a whebodulh'eh.”

Hubudayi cho Herod, 'en chah Sizi yóolhdzih

⁶ 'Et Pilate njan oozalhts'a hoh, 'et huboodulhkut, “Alha ih ndun dune Galilee whut'en 'int'ah?” ⁷ 'Et Pilate Sizi hubudayi cho Herod bukeyah be'ildzun unli t'eoonanzin, 'et 'ahoh yuts'u wheyálh'a. Ndun hubudayi cho 'en chah hoh da soo 'et Jerusalem 'ut'en inle. ⁸ 'Et Herod tube hoont'i hoh Sizi yutelh'en. 'Et tube sa whuts'un yuntelh'ilh hukwa' ninzun 'et huwa. 'Et lhat hoh yulh údants'o inle. 'Et huwa khun teh huwa 'ét'en dunalh 'uhooleh. ⁹ 'Ink'ez khunek lhai be yoodulhkut. 'Et whunts'ih Sizi 'aw yuts'un t'éduSNih. ¹⁰ 'Et hoh da zeh njan ndúwhut'en ndunnah nawhulnuk degha nus dézti 'ink'ez Moses be' dustl'us 'uk'ununa'úsduguz, ts'iyawh dináhudidel 'ink'ez soo tube cho whúske be hik'ehóo'ai. ¹¹ 'Et Herod 'ink'ez yuba nehughan, 'en hubulh ts'iyawh hoonliyaz huba chaílah hininzun 'ink'ez highudloh. 'Et hubudayi cho nayits'uz, 'i be híyalhti 'ink'ez Pilate ts'un whunahíyalh'a. ¹² 'Et soo 'et dzin Pilate 'ink'ez Herod bulh dune nulhuhulhtsi. 'Et whutsuh da lhch'a hudetni inle.

Pilate Sizi butl'ayálhti datetsah ka, 'ink'ez Barabbas huba yulanadetnik

¹³ 'Aw 'et Pilate ndunnah nawhulnuk degha nus dézti, dune k'une' bul'en, 'ink'ez ts'iyannah dune, 'en ts'iyawh ilho hubughezdla, ¹⁴ 'ink'ez ndo búlhni, “Ndun dune, 'en dune tink'us hubunilht'uk k'una'a, 'en sughu nulhti. 'En nuhwhubut soo ts'ah'un na'a bugha nunéstai. 'Et whunts'ih ndet buk'éwhah'ai 'aw hoonliyaz bugha nachawhús'al.” ¹⁵ 'Awundooh! 'Ink'ez Siz, 'en Herod buts'un nohwhulh whélh'a. 'En chah hoh tink'us 'int'ah yughu nachahóo'al. 'Alha' hoont'ah ndun dune 'aw hoonli hukwa daóotsah hoolah. ¹⁶ 'Et hiyootelhtsus 'ink'ez bulanadutesnih.” ¹⁷ 'Et njan butus lhuseya na'hut'ah, 'et naoodezulh totsuk, 'ilhunuh dune tsak'edi'ai, 'en lana'hudutnih. 'Et whuz na'a buk'ah ts'ih 'uhoont'ah. ¹⁸ 'Et 'ilho hits'uh hahúyih 'ink'ez 'uhutni, “Ndun Barabbas neba bulanadintnih, 'ink'ez ndun dune sulhghe!” ¹⁹ Ndun Barabbas 'en bugha lhtahuwhunt'ai hoh 'ilhunuh dune selghi 'et hukwa tsak'eya'ai inle. ²⁰ 'Et whunts'ih Pilate 'en Sizi lanadutetnih hukwa' ninzun, 'et 'ilhohuwezdel doo chah zeh hubulh yaílhtuk. ²¹ 'Et whunts'ih 'o nus hits'uh hahuyih, “Lhdulalhgus k'eilhtih! Lhdulalhgus k'eilhtih!” hutni. ²² 'Ink'ez 'aw 'et whulh tat ndo búlhni, “Et di ka? Ndet dáhoont'ah hoontsi' tinta' 'ant'en? 'Aw hukw'elha daootsah bugha nachawhús'al! 'Et huwa 'ants'ih hiyootelhtsus 'ink'ez bulanadutesnih.” ²³ 'Et whunts'ih 'aw hiyoozólhts'a ghaít'ah. 'Ink'ez 'et

'o nus hits'uh hahuyih, "Lhdulalhgus k'eilhtih!" Daja hutni 'ink'ez ndunnah nawhulnuk degha nus dézti, 'en chah, daja hutni 'et hoh Pilate hich'a' nilhde. **24** 'Et Pilate nts'e na'a hukwa' huninzun hukw'u na'a yuba nahezya. **25** 'Ink'ez ndun Barabbas 'en bugha lhtahuwhunt'ai hoh 'ilhunuh dune selhghi, 'et hukwa tsak'eya'ai 'en Pilate hubuts'un yulanadetnik. 'Et whunts'ih Sizi 'en nts'e na'a hukwa' huninzun k'una'a 'uhitelelh ka hubutl'ayálhti.

Sizi lhdulalhgus k'ehiyilhti

26 'Aw 'et Sizi hitelhti hoh 'ilhunuh dune Simon hiyulhni, 'en Cyrene whut'en 'int'ah, 'en wheghah keyah ts'ih hainya, 'en Sizi bulhdulalhgus yuba yudutootan ka hiwus k'ehídintan. **27** Lhanah dune hiyuntezdel, ts'ekoo chah. 'En bugha tso hinli 'ink'ez hutso. **28** 'Ink'ez Sizi hubuts'un nalhú'a 'ink'ez ndo búlhni, "Nuhwheni Jerusalem whuts'ekoo, si sughahtso ilah. 'Et k'us nuhwhenich'oh khunahdutso, 'ink'ez nuhwhuzkehkah chah ghahtso. **29** Soo cho whunulh'en, dzin whuz de whékulh ho' hoont'ah, 'et 'uhudooni, 'Ndunnah buzkeh hoolah, ndunnah 'aw cha'hílhtsil, 'ink'ez ndunnah 'aw 'uski yetcha'úlht'ukw 'en 'o nus huba soo 'uwhutet'ilh.' **30** 'Et hoh dune 'uhudooni

'Ndi dzulh 'i uncha nek'énit'ai 'ink'ez ndi dzulhyaz 'i chah ndulhcho be nek'eoonookat.'

31 'Alha' hoont'ah, duchun 'awhuz duli hoh 'et whunts'ih 'awhuz njan 'et nduhút'en. Duchun desuz t'eh, dawhútenilh nahzun?** **32** 'Et nanah untsi', 'en chah, hiyulh hubutzelghelh. **33** 'Ink'ez ndet dzulhyaz Calvary huwhútni, 'i 'utsints'un nez'ai huwhutni, whuz hinilhti 'ink'ez lhdulalhgus k'ehiyilhti. Ndunnah dune ntsi', 'en 'ilhunuh nalhnih ts'ih 'ink'ez 'ilhunuh 'intl'as ts'ih, 'en chah lhdulalhgus k'éobuhilhti. **34** 'Aw 'et Sizi 'utni, "ABÁ huba whunaooodolnah. 'Aw dahút'en t'ehonizun, 'et huwa 'uhut'en." 'Ink'ez hinaih lhk'ehiyelya 'ink'ez higha 'ánilih. **35** 'Et dune hundelhúya 'ink'ez honilh'en. Ndunnah bumoodih, 'en chah buzih nuhadelhúya 'ink'ez highudloh hoh nduhútni, "Uyoon, 'en hubulhyis inle. 'Et huwa ndun 'en Christ ndun Yak'usda 'utahayálhti 'int'ah t'eh, dich'oh 'ududooliyih da!" **36** Nehughan, 'en chah highudloh. Hizih niníndel 'ink'ez mai too dunink'ooz, 'i hits'un dihidinkai. **37** 'Ink'ez 'uhíyulhni, "Lizwif hubudayi cho inli t'eh, nyunch'oh 'ududílyih!" **38** Lhustelyaz hik'une'úzguz. 'Udechoo Greek hubughunek k'una'a, Latin hubughunek k'una'a, 'ink'ez Hebrew hubughunek k'una'a chah, 'aw 'et lhdulalhgus k'ut sulhti, higha ndoh ts'ih whehidunilht'o. Ndez na'a njan ndutni,

c Ndun 'en Lizwif Hubudayi Cho 'int'ah.

39 Ndunnah nanah hints'i, hizih lhdulalhgus k'ehiyílhti, 'ilhunuh hich'a 'uts'un 'utni hoh 'et di yulhni, "Nyun Christ inli t'eh, 'et nyunch'oh 'ududílyih 'ink'ez nuwheni chah neílhyih!" **40** 'Et 'ilhunuh untsi' hukwa' yudáni hoh ndi yúlhni, "Aw Yak'usda whunts'ih bé chanuzíljut hoh ih 'udini? 'Aw nt'eoonuzínzun nts'e na'a huba nahesda, 'et whuz na'a zeh nuwheni chah neba nahesda. **41** 'Ink'ez wheni ts'ah'un na'a neba nahesda. Daidút'en 'et huwa k'an lhdulalhgus k'ut neba k'elha sidúlti. 'Et huwa neba 'uk'elha whuzdli. 'Et whunts'ih ndun dune 'aw hoonliyaz tinta cha'ít'il. 'Et whunts'ih wheni nek'una'a zeh huba nahesda." **42** 'Et ndun dune untsi' 'en Sizi ndi yúlhni, "SMoodihti nts'e hubudayi cho inli, whuz lhgha nadinja t'eh, sunaoolnih!" **43** 'Et Sizi ndi yúlhni, "Ts'ah'un na'a nyudusni, nts'e degha nus hoonzoo, 'et soo k'an dzin sulh 'útant'ilh."

* **23:31** Ndi duchun duli, 'i Sizi Gríndi yun k'ut nuséya, 'uwhúlhni.' Ink'ez ndi duchun désuz, 'i ndunnah chahúdijih 'uwhúlhni. 'Ink'ez Sizi Gri yak'uz whenája t'eh, tube hoontsi' 'et hubuts'úwhelts'ulh, ni ho 'utni.

Sizi lhdulalhgus k'ut ye khuna, 'iyuladetnik

⁴⁴ Dzeteniz hukw'elh'az 3:00 bat'en 'et whuts'un ndi yun k'ut ndúhoolcho tsahólgus inle. ⁴⁵ Sa chah 'aw chast'en suli. 'Ink'ez luglez whucho dutai, 'i hukwa délhchooz, 'i chah lhulcho lhk'enínc'h'ul. ⁴⁶ 'Ink'ez Sizi tube cho 'utni, "ABÁ, suyéghah 'i nts'un bula desnik." 'Ink'ez 'et ndudéja 'aw 'et 'udek'elh'az hanáji. ⁴⁷ 'Et dahooja ndun nehughan bumoodih whunah'en hoh Yak'usda yudélhti 'ink'ez 'utni, "Ndun 'alha soo ts'ah'un dune zeh 'int'ah." ⁴⁸ 'Et 'ilhohuwezdel ts'iyawh 'et nehunindel howhuntelh'ilh ka, ndet ndulhcho dáhooja howhunalh'en, tso k'et 'et budzi k'ut huholchis 'ink'ez whusanáheded. ⁴⁹ Ndunnah t'ehininzun, 'ink'ez ndunnah ts'ekoo Galilee whuts'un whusanáhinedel, 'en chah nilhdzayaz highu nudelhúya njan ndulhcho hoh dawhut'en honilh'en.

Joseph, 'en Sizi whuyíyalhti

⁵⁰ 'Aw 'et 'ilhunuh dune Joseph hiyulhni, ndunnah Lizwif buk'úne' whut'en, 'en 'ilhunuh 'int'ah. Dune unzoo 'ink'ez ts'ah'un dune unli. ⁵¹ Ndunnah buk'úne' whut'en, dahúja, 'aw huba ts'ah'un cha'hoot'ah. Joseph 'en Arimathea whut'en 'int'ah. 'En chah ndet Yak'usda hoh hubadayi cho unli, 'et chah hubalh'i. ⁵² 'Et Joseph, en Pilate ts'un whinya 'ink'ez Sizi buyust'e yuts'u ka ná'dutni dutl'anáyoolhtelh ka. ⁵³ 'Aw 'et buyust'e nanáyalhti hoh ndi naih dezti, 'i layin hiyulhni, 'i be yugha iwezduz. 'Et tse bet hahuhontsel, 'et whuts'uh da, 'aw 'uyoon 'et 'achadílhtah, 'et wheyíhiyalhti. ⁵⁴ 'Aw 'et njan dzin wheni lhahúdutneh 'ohoont'ah. 'Aw 'et Lizwif nats'ulyis dzin hoolh'en. ⁵⁵ 'Ink'ez ndunnah ts'ekoo Galilee whuts'un whusanáhanded, 'en Joseph hiyuntezdel, 'et buyust'e 'et wheyíhiyalhti 'et hinalh'en. ⁵⁶ 'Et whenáheded. Yoo sooltsun, 'i khe sooltsun, 'i chah ts'iyawh lhahídinla. 'Et nats'ulyis dzin, 'et Yak'usda bughunek be buba' hóonla, 'et dzin nahelyiz.

24

Sizi dinadija

¹ 'Aw 'et ndi k'enílhgel 'udeechoo dzin 'ohoont'ah. Bundada 'uda, ndunnah ts'ekoo 'ink'ez 'uyoon chah bulh 'et ts'un k'uz ts'ih hutezdel. Ndi yoo sooltsun, 'i lhahídinla, 'i chah hitezdla. ² Tse 'uda 'udun dez'ai hoh hotelh'en. ³ 'Et dahúnindel 'ink'ez neMoodihti Sizi buyust'e hoolah nahuhoo'ai. ⁴ 'Et ts'iyawh hububa whe' hooja hooyal 'et dáhooja hoh simba 'ohoont'ah. 'Et khunyaz nanah dune buzih siyin. Bunaih soo tube be hoodet'en. ⁵ 'Ink'ez ndunnah ts'ekoo tube whehonetlújoot hoh butsi be nachahúnelya. 'Ink'ez ndunnah dune 'uhutni, "Et di ka yaidla tah dune khuna, 'en bukunáhta? ⁶ 'Aw njan hoolah, dinadija ho' 'int'ah! 'Awhuz Galilee 'ut'en hoh, daja nuhwhulhni, 'aw ih whunachasulhúnik? ⁷ Njan ndun whulhni, 'Ndez na'a njan ndótenilh, yinkak dune ye', 'en lubeshi 'ulh'en tl'ahítelhtelh 'ink'ez lhdulalhgus k'ehítelhtelh ka. 'Ink'ez whull tat dzin dinadutédall." ⁸ 'Ink'ez 'ahoh highunek hinalnih. ⁹ 'Et ts'un k'uz hanáheded, 'et ndi ts'iyawh lanezi 'o'at 'ilhunuh, 'ink'ez 'onghunnah chah, ts'iyannah ndo budáni. ¹⁰ Ndunnah, 'en Mary Magdala whut'en, Joanna chah, Mary, James be'ama chah, 'ink'ez 'uyoon ts'ekoo bulh 'uhut'en, 'en 'uhuja ndunnah whel'a ndo budáni. ¹¹ 'Et whunts'ih ndunnah whel'a, 'ants'ih hoh ne'huduni whula 'uhutni hubunínzun 'ink'ez 'aw huba 'alha' cha'hudusnih. ¹² 'Et whunts'ih Peter didillhah 'ink'ez ts'un k'uz ts'ih whélgai. Yuk lih 'uja 'ink'ez tsa k'et whunilh'en. 'Et naih dezti, 'i zeh 'et sulhchooz hoh yutelh'en. 'Et koo ts'ih whenaja. 'Et howu nuní nuzut 'ink'ez buba hooncha dahooja hoh simba 'ohoont'ah.

Sizi nanah yugha hoodul'eh bunalhts'et hainya

¹³ 'Aw 'et dzin zeh keyah whuyaz, Emmaus ts'uwhútni, nanah dune whuz hutez'az. Jerusalem whuts'un 7 miles bat'en 'uhoont'ah. ¹⁴ 'Et whuz he'us hoh 'et ndóohoolhcho dawhút'en hoh howu yahulhtuk. ¹⁵ 'Awhuz 'et howu yahulhtuk dawhút'en ne'whust'en, 'et Sizi hubughan ninya 'ink'ez hubulh tez'az. ¹⁶ Buna be hinilh'en 'et whunts'ih 'aw butl'acháhoo'al 'et huwa 'aw t'echahinízil. ¹⁷ 'Ink'ez ndo búlhni, "Et wheghah ah'us hoh, ndet ho' whudahni? Stabe hubuga nuhdzi nduda hoh howu yalhtuk?" ¹⁸ 'Et ndun 'ilhunuh, Cleopas hiyulhni, 'en ndi yúlhni, "Aw nyun zeh ilah ih nts'oh teh k'an ne'whust'en, 'aw ih nt'ewhunuzínzun. 'Aw Jerusalem whut'en chainlah ho ih 'udini?" ¹⁹ 'Et ndo búlhni, "Ndet 'uwhudahni?" 'Ink'ez 'uhiyúlhni, "Sizi Nazareth whut'en, 'en bugha dahooja. Ndun dune nus whunilh'en 'int'ah. Yak'usda 'ink'ez dune chah bunalh ts'iyawh hoolhtus hoh ne'whúst'en 'ink'ez hoolhtus whe chah yaílhtuk. ²⁰ 'Ink'ez 'et chah dahooja nawhulnuk degha nus dézti, 'ink'ez nuwheni nemoodih chah, 'en Rome whut'en hiba nahuhooyeh ka butl'ahíyalhti, 'ink'ez lhdulalhgus k'ehíyilhti. ²¹ 'Et whunts'ih 'en úncha Israel hits'uh hainzut nabootekulh uzninzun da. Nts'oh tuné'whust'en 'et whuts'un k'an 'aw 'et whúlh tat dzin 'uhoont'ah. ²² A, 'alha 'uhoont'ah, 'ink'ez bulunah ts'ekoo nelh 'uhet'en, daja hutni, tube neba hooncha. Soo 'uda bundada ts'un k'uz huníndel. ²³ 'Aw hiyust'e nachahíyilhtel. 'Ink'ez lizas ha'en hoh 'en 'uhutni, 'Khuna ho' 'int'ah!' ²⁴ 'Ink'ez 'et bulunah nelh 'uhut'en, 'en chah ts'un k'uz nahúz'az. Soo nts'e na'a ts'ekoo daja hutni, whuz na'a nahuhoo'ai. 'Et whunts'ih Sizi 'aw chahiyí'il." ²⁵ 'Et Sizi ndo búlhni, "Tube nuhwheni whuzahnik ahli! Ndet ts'iyawh nus whunilh'en daja hutni, tube sa nuhdzi be nuhwhuba 'alha 'uhoneh!" ²⁶ 'Alha ih 'uhoont'ah Christ, 'en dzuh nutezut huba 'uhoont'ah 'ink'ez 'et hukw'elh'az whudezti ts'ih natedalh?" ²⁷ 'Ink'ez soo 'udechoo Moses be' dustl'us 'uk'ununa'úzguz 'ink'ez nus whunilh'en bube' dustl'us chah, ndai hik'une'úzguz 'en bugha, 'i ts'iyawh Yak'usda bughunek yubunelhtan ho 'utni.

'Et hitán'en li'huja 'ink'ez nahiyoohlúts'it

²⁸ 'Et njan keyah wheyaz hutezdel ts'ih, 'aw 'et wheghah hedulh. 'Ink'ez Sizi 'aoonilhka njan keyah wheghah lhuteyalh li'ut'en. ²⁹ 'Ants'ih tube cho duzíh wuda hukwa' hiyulh'en, 'ink'ez 'uhiyúlhni, "Aw 'et sa naín'ai, hulhgha 'uhoont'ah." 'Ink'ez koo hubulh danánt'az buzih tedalh ka. ³⁰ 'Et hukw'elh'azyaz nat'l'ahudelts'i 'ink'ez 'uhute'alh. Sizi lhes yílhchoot 'ink'ez Yak'usda suchanailya yulhni. 'Ink'ez lhtaídalkut 'ink'ez hubutl'ayánlá. ³¹ 'Et khunyaz hitá'en li'huja 'ink'ez nahiyoohlúts'it. 'Ink'ez 'et khunyaz hoolah nasdli. ³² 'Et 'ulhódutni, "Nus de ti nelh yalhtuk 'ink'ez Yak'usda bughunek daja ni whunenulhtun hoh 'aw ih nedzi dézk'un lí'ts'int'ah inle?" ³³ 'Ahoh 'et wheghah 'uhunet'oh hoh dihudíndel 'ink'ez Jerusalem ts'ih nahutesdel. 'Et ndunnah lanezi 'o 'at 'ilhunuh 'ink'ez ndunnah hubulh 'uhut'en, 'en ts'iyawh ndet 'ilhoh 'úhint'ah hoh hubughun nahúndel, ³⁴ 'ink'ez njan 'et hudemts'i, 'en 'uhutni, "Alha neMoodihti dinadija ho' 'int'ah! 'Ink'ez Simon yunah be hóodiltsai!" ³⁵ 'Ink'ez ndunnah nanah njan ti dahooja 'et hubuga hubulh náhohoolnuk nts'e na'a Sizi ndi lhes taídalhkut hoh ndun unli nahiyoohlúts'it.

Sizi dich'oh hubuniz be hóodiltsai

³⁶ 'Awhuz njan howu yahalhtuk hoh, Sizi dich'oh hubuniz be hóodiltsai, 'ink'ez ndo búlhni, "Nohwhullh soo whudooghel." ³⁷ 'Et whunts'ih hubuga ha'nejoot 'ink'ez tube hunelhújoot. Dune dazsai butsen ha'en huninzun. ³⁸ 'Ink'ez ndo búlhni, "Et dahoont'ah huwa whenhujut? 'Ink'ez dahoont'ah huwa nuhdzi yuh hoh nuhwhuba nawh 'uhoont'ah?" ³⁹ Sula chah 'ink'ez

suke chah nulh'en. Si 'ust'ah. St'agháhnaih 'ink'ez sunulh'en! 'Alha nuh-whenich'oh whunulh'en. Suyust'e chah hoonli 'ink'ez suts'un chah. Dune butsen 'aw whuz na'a nduchait'ah, buyust'e 'ink'ez buts'un chah hoolah, ndi ts'iyawh bulh 'ust'ah." ⁴⁰ 'Aw 'et ndudáni hoh, dula chah 'ink'ez duke chah hubunalh ts'et niyuzdla. ⁴¹ Soo ts'ah'un huhóont'i 'ink'ez tube huba hooncha, 'et whunts'ih 'awhuz huba 'alha' cha'hoot'ah. 'Ink'ez ndo búlhni, "Aw njan ts'uyi, 'i cháht'ih?" ⁴² 'Et lhook sut'e, 'i 'ink'ez honey, 'i yoo'alh ka higha híninla. ⁴³ 'I yílhchoot 'ink'ez hubunalh ya'al.

Sizi whubunulhtun Yak'usda bughunek daja ni

⁴⁴ 'Ink'ez ndo búlhni, "Awhuz nohwhulh 'úst'ah da ndi khunek 'i da be nohwhulh yalhtuk, 'et ndi ts'iyawh lhaoodeh ndai Moses be' dustl'us 'ukune'usdúguz, ndunnah nus whunilh'en, 'ink'ez Yak'usda bughunek Shun be' dustl'us k'ut chah, si sugha 'uk'une'úsduguz." ⁴⁵ 'Et hubeni t'ehonoozeh ka butl'ahó'ai Yak'usda bughunek t'ehonoozeh ka. ⁴⁶ 'Ink'ez ndo búlhni, "Ndi 'i 'uk'une'úsduguz hoh 'et ndutni, Christ, 'en dzuh nozut huba' hoont'ah, 'ink'ez whulh tat dzin dinadutédalh. ⁴⁷ 'Ink'ez ndunnah boozi be yatelhtuk, 'en boozi bugha nts'e na'a hoh ts'iyannah bulubeshi ch'a bubení naháhundunooleh, 'ink'ez nts'e na'a hoh bulubeshi huba 'ún tukuk chah, ndi bugha boozi hubugha ts'iyannah ndudóohni huba' hoont'ah. 'Et njan Jerusalem 'et choo whe'dooht'en. 'Et hukw'elh'az t'eh, ts'iyannah yun k'ut nduhoolcho hoh whebodoolh'eh. ⁴⁸ 'Ink'ez nuhwheni njan 'et ts'iyawh dune whúntelhtun ahli hoh aht'ah. ⁴⁹ 'Ink'ez soo zélhts'ai, ndi se'aBá nuhts'u yoozi, 'i nuhts'o tl'adutes'ah. 'Et whunts'ih yak'uz ndus de whelhtus, 'i nuhk'edútelts'ulh 'et whuts'un, njan Jerusalem keyah 'et zeh doolhúts'i."

Sizi nduk yak'uz whenálti

⁵⁰ 'Aw 'et keyahyaz Bethany ts'uwhútni, whuz nabuninla. Bula nduk 'uyínla 'ink'ez Yak'usda yoodulhkut hubuts'un wuzoo ka. ⁵¹ 'Et 'awhuz Yak'usda yoodulhkut hoh hubuts'un wuzoo ka, 'et hubuch'a nduk yak'uz whenabe'whéldzut. ⁵² Hits'un teni' nalhdzin, 'ink'ez tube hooncha huhóont'i hoh Jerusalem ts'ih whunáheded. ⁵³ 'Et 'ahoolhyez luglez whucho hudemhts'i hoh Yak'usda hidelhti 'ink'ez dalzoo ho' 'int'ah hutni. 'Et ndoh honeh.

Yak'usda Bughunek Unzoo 'I John Yuk'uné'uzguz

Ndi khunek 'ilhuz 'int'ah

¹ Soo 'udechoo da 'et khunek hoonli 'ink'ez ndi khunek 'i Yak'usda yuh 'int'ah. Ndi khunek 'i Yak'usda 'int'ah. ² Ndun 'en soo 'udechoo da whuts'un Yak'usda bulh 'int'ah. ³ 'En bula tah ts'ih ts'iyaitsuk 'ulya ínle. Ndai 'ulya, 'i tah 'aw ilhuk'i cha'yílil hoolah. ⁴ Be ts'úkhuna 'en buts'un haídanzut 'ink'ez ndi be ts'ukhuna 'i ts'iyanah dune huba be whét'en 'int'ah. ⁵ Ndi be whét'en tsahólgus* yuh ts'ih whéndi 'ink'ez ndi tsahólgus yuh ts'ih haínya, 'aw yuch'a 'oolhdeh ghaít'ah. ⁶ 'Ilhunuh dune John hiyulhni, 'en Yak'usda whusayálh'a. ⁷ Ndun dune 'en ts'iyanah dóni ndi be whét'en, 'i bugha. Hukwa' huninzun t'eh, 'en bugha ts'iyanah huba 'álha 'uhot'e. ⁸ Ndun John, 'en 'aw be whét'en ilah 'int'ah. 'En 'int'ah be whét'en, 'i bugha ts'iyanah dóni 'int'ah. ⁹ Ndun ts'ah'un be whét'en, ts'iyanah dune ndi yun k'ut k'eínya, 'en ndi be whét'en hubugha ite'alh. ¹⁰ Ndi yun k'ut inda. Ndi yun 'uyínlá 'et whunts'ih yinkak dune t'ehinóozin hukwa cha'hunízun. ¹¹ Ndunnah dulh whút'en 'en lhtahaoobanla 'ink'ez hubutaninya hoh 'aw chahayílhcholh. ¹² 'Et whunts'ih ndan ho 'int'ah hiyílhchoot, Yak'usda buzkeh huzdli 'et hubugha óoni'ai. Ndán 'uhint'ah ndi boozi huba 'álha' yint'ah. ¹³ 'Aw dune hits'u haínzut whu la ts'ih ilah Yak'usda buzkeh huzdli, k'us buyust'e hukwa' nínzun huwa ilah, k'us dich'oh dune hukwa' huninzun huwa chah ilah, Yak'usda 'en bugha zeh huwhuzdli. ¹⁴ 'Et ndi khunek Yak'usda unli, 'i dune suli 'ink'ez netah dune inle, 'et hoh dadélti ts'onah'en. Ndi yé dadélti, 'i Yak'usda 'aw 'ilhunuh zeh buYe' yé dezti 'i 'int'ah. Ye unzoo 'i 'ink'ez khunek 'alha' 'int'ah 'i zeh ye dézbun. ¹⁵ 'En bugha John hubudáni inle, dune bulh yálhtuk hoh, "Ndun 'en nuhghu dáni, sk'elh'az whusatéyah 'et whunts'ih whutesdleh whutsuh da whunts'ih, 'uda 'et khuna ho' 'int'ah, 'et huwa 'int'ah sugha ndoh 'int'ah," hubúlhni. ¹⁶ 'Ink'ez ndai yé dezbu 'i ts'iyawh negha ínínla. Dzin totsuk ye unzoo 'i neba 'o 'un 'int'ah. ¹⁷ Yak'usda ndi bughunek 'i buk'une't's'oot'en, 'i Moses 'en bugha netl'aidá'ai ínle. 'Et whunts'ih k'an Sizi Gri 'en bugha ye unzoo, 'i 'ink'ez khunek 'alha' 'int'ah, 'i neghalts'ut. ¹⁸ 'Aw Yak'usda 'en ya'en, 'et whunts'ih ndunnah 'aw 'ilhunuh buYe', be'aBá degha nus yuk'entsi', 'en Yak'usda bugha 'et wheinélhtan.

John dune too be 'ulh'en, 'en ndó bulhni 'aw ndun Christ 'en ilah 'ust'ah

¹⁹ 'Et 'ilhudzin ndan Lizwif Jerusalem whut'en, 'en náwhulnuk 'ink'ez Levitenah, 'en John buts'un wheóobahalh'a hiyoodolhkut ndan unli 'et hukwa. 'Et John ndo búlhni, ²⁰ soo ts'ah'un na'a 'aw whuts'u chaoodídai hoh hubudáni, "Aw Christ, 'en ílah 'ust'ah," hubúlhni. ²¹ 'Et doo chah hiyoodulhkut, "Ndán inli? Elijah tulih 'int'ah?" "Awundooh, 'aw 'en ilah 'ust'ah," hubúlhni. "Ndán Yak'usda be nus whunílh'en hubugha yatuk inle, 'en tulih 'int'ah?" hiyúlhni. 'Et chah, "Awundooh," hubúlhni. ²² 'Et 'uhiyúlhni, "Aw ndan hó' nint'ah. Nyunch'oh daja ho' dini? 'Et ts'ah'un ne'díni, 'et ndez na'a ndunnah whuz denéteh'a hubuzdóoni," hiyúlhni. ²³ 'Et John ndo búlhni, "Si 'ust'ah 'aw dune chahóot'ih ts'ih dultul hoh ts'iyanah dune hubudúsni, neMoodihti lhuteyalh hoonzoo 'ink'ez lhk'owhudez'a huba whulhtsi. 'Et whuz na'a Yak'usda 'en be nus whunílh'en Isaiah ndutni ínle," ndo búlhni.

* ^{1:5} Ndi tsaholhgus yuh ts'iyanai hoontsi' 'ink'ez tink'us 'ínt'ah 'i ni ho 'utni.

²⁴ 'Et ndunnah John buts'un whets'iyalh'a ndunnah Pharisee bulunah zeh 'uhint'ah. ²⁵ 'Et doo chah hiyoodulkut, "Aw Christ, k'us Elijah, k'us ndan Yak'usda 'en be nus whunilh'en, ndunnah ilah 'int'ah t'eh, di ka dune too bé' bilh'en?" hiyúlhni. ²⁶ 'Et John ndo búlhni, "Si too zeh 'i be dune too be' 'ulh'en, 'et whunts'ih nuhwhutah 'ilhunuh dune hoonli, 'en 'aw t'enuzáhzun. ²⁷ 'En 'int'ah sk'élh'az whusatéyah sughanus dezti ho' 'int'ah. 'Aw bukechun ketl'oolh buba k'unaídutes'uk, 'et whunts'ih huba soo cha'lhudzooh," hubúlhni. ²⁸ 'Et njan keyah Bethabara huwhútñi Jordan took'oh whanch'az whuz'ai, 'et John dune too be' 'óbulh'en. ²⁹ 'Om bun dzin khunyaz Sizi yuts'un úyalh hoh John yutelh'en, 'ink'ez 'utni, "Nulh'en, Yak'usda busheepyaz 'int'ah. 'En 'ut'en, yinkak dune hubulubeshi hubuts'u hanáyule," hubúlhni. ³⁰ 'En bugha 'un whudúsni sk'elh'az whusatéyah, 'et whunts'ih whitesdleh whutsu da whunts'ih, 'uda khuna ho' 'int'ah, 'et huwa sughanus dezti ho' 'int'ah. ³¹ Ndan unli 'aw seni be t'énuzúszun inle, 'et whunts'ih nuhwheni Israel buts'u háhde nuhwhuts'un whuz haya be t'ewhunoohlzech 'ink'ez too zeh 'i be too be' 'un whulh'en, 'i bugha ndan 'int'ah soo cho t'ewhunoohlzech," hubúlhni. ³² Njan 'et Sizi bugha John ndutni, "Ndoni dut'aiyaz nduwhút'en hoh yak'uz ts'ih hadánde 'ink'ez buyédande, 'et whunalh'en. ³³ Hoh da 'aw seni be t'éonuzúszun ndun 'int'ah, 'et whunts'ih ndun whuz de sutéh'a too zeh 'i be dune too be' oolh'en ka, 'en sudáni, 'Ndan Ndoni ndus de yuk'édilts'ut 'ink'ez 'ilhuz yulh 'ínt'ah, 'en 'int'ah Ndoni be dune too be' 'ulh'en unli, 'et sudáni. ³⁴ 'Et ndúhooja 'et whunalh'en. Soo ts'ah'un khunek be nuhwhudúsni, 'alha ndun 'en Yak'usda buYe' 'int'ah," hubúlhni John. ³⁵ 'Et 'om bun dzin John 'ink'ez yugha hoodul'eh nanah 'et nahudéhuya. ³⁶ Sizi hoh wheghah uyalh hoh John yunilh'en, "Nulh'en ndun Yak'usda busheepyaz 'int'ah!" hubúlhni. ³⁷ 'Et ndunnah nanah dune John yugha hoodul'eh daja ni hidánts'o hoh 'aw 'et Sizi Gri hiyuntez'az. ³⁸ 'Et Sizi hubunilh'en hine'us hoh 'et huboodulkut, "Di kunahta hoh 'aht'en?" hubúlhni. 'Et 'uhiyúlhni, "Rabbi, nts'e hoont'i?" ('Et ndi khunek "Rabbi" 'i Lizwif k'una'a dune hoodul'eh ni ho' utni.) 'Et Sizi hubúlhni, ³⁹ "Anih, whunoohl'en si!" hubúlhni. 'Et hiyúlh tez'az 'ink'ez nts'e sída 'et honalh'en. 'Et dzin nduhooleyz hoh hizih hinke 'ink'ez, hoh da 10:00 bat'en 'uhunet'oh. ⁴⁰ 'Et ndunnah nanah dune John hidánts'o huwa Sizi hiyuntez'az, 'en 'ilhunuh, Andrew hiyulhni, 'en Simon Peter bulhutsin 'int'ah. ⁴¹ 'En 'ahoh dulhutsin, Simon hiyulhni, 'en yughu ninya 'ink'ez yudáni, "Ndun Messiah 'aw 'et nats'ilhti," yúlhni. (Ndi boozi "Messiah," Christ ni ho' utni.) ⁴² 'Et Sizi 'en yughu inílhti. 'Et soo cho Sizi yunalh'en 'ink'ez ndi yúlhni, "Nyun Simon Jonas buye' 'en 'int'ah, 'et whunts'ih Cephas nyuhuduténih," yúlhni. (Ndi Cephas 'i Peter 'i zeh 'int'ah 'ink'ez 'i "tse" ni ho' utni.) ⁴³ 'Et 'om bun dzin Sizi Galilee yun k'ut huwhútñi ts'ih teyalh hukwa' ninzun. Whuz ninya hoh dune Philip hiyúlhni, 'en nayilhti 'ink'ez "Sunanyalh," yúlhni. ⁴⁴ 'Et ndun Philip 'en keyah Bethsaida huwhútñi, 'et whut'en 'int'ah. Keyah 'et Andrew 'ink'ez Peter bulh huwhut'i. ⁴⁵ 'Et Philip 'en dune Nathanael hiyúlhni, 'en nayilhti, "Ndun dune Moses dude dustl'us k'ut yugha 'uk'une'úzguz, 'ink'ez Yak'usda be nus whunilh'en highun 'uk'une'úzguz, 'en 'aw 'et nats'ilhti. 'En 'int'ah Sizi, Joseph buye' unli. Keyah Nazareth huwhútñi, 'et whut'i," yúlhni. ⁴⁶ 'Et Nathanael 'utni, "Nts'e na'a simba hoonliyaz 'unzoo 'i Nazareth ts'ih haóolts'it?" 'Et Philip 'utni, "Anih, sulh ín'us 'ink'ez whunolh'en si!" yúlhni. ⁴⁷ 'Et Sizi Nathanael 'az de úyalh yunilh'en 'ink'ez yugha 'et ndutni, "Ndun 'en soo Israel buts'u hainzut 'int'ah, 'aw tínk'us 'uhóont'ah teh nucha'ust'en," ni. ⁴⁸ 'Et Nathanael Sizi yoodulkut, "Dí bugha t'ewhunízun dant'un dune usdli?" 'Et Sizi 'uyúlhni, "Mai chun t'ah sinda da, Philip 'anih nyuduténih whutsuh da, 'et

'uda nyunalh'en," yúlhni. ⁴⁹ 'Et Nathanael ndi yúlhni, "Rabbi, 'alha' Yak'usda buYe' inli 'ink'ez Israel hits'u hainde, huba hubudayi cho chah inli," yúlhni. ⁵⁰ 'Et Sizi ndi yúlhni, "Mai chun t'ah sında hoh nyunalh'en nyudúsni. 'Et huwa Yak'usda buYe' usdli mba 'álha 'uhoont'ah, 'et whunts'ih 'o nus ts'un 'o nus hooncha, 'et whuntalh'ilh. ⁵¹ 'Et soo ts'ah'un 'ínt'ah nyudut'esnilh, yak'uz da' dutézkez 'ink'ez Yak'usda hubulizas ndus de hahádel 'ink'ez doo chah whenáhudéde ndun yinkak dune ye† 'en buts'un 'uhut'en, 'et whuntalh'ilh," yúlhni.

2

Sizi huwa 'ét'en túne' 'ut'en 'et huwa dune 'en Christ 'int'ah t'ehonózin.

¹ 'Et whulh tat dzin suli hoh Galilee yun k'ut 'et 'ilhun keyah Cana huwhútini, 'et keyah 'et k'an nalhgha húsduke huba honélhnik. 'Et Sizi be'ama 'en chah 'et usda. ² Sizi 'ink'ez yugha hóodul'eh 'en chah hubughu nahúzdel. ³ 'Et njan lhghahúsduke ba honelhnik whutah 'et ndi mai too ntsol súli. 'Et Sizi be'ama yughu ninya 'ink'ez 'uyúlhni, "Aw mai too cha hit'ih." ⁴ Sizi 'et ndi yúlhni, "Ts'ake dant'i ka 'uyoón mba 'uhoont'ah 'et si hukwa' sudini, njan 'et 'aw suba 'et nicha'hunest'o!" ⁵ 'Et be'ama ndunnah ustlen, 'en búlhni, "Daja nuhwhúlhni hoh tuné'ooht'en." ⁶ 'Et njan lhk'uta tse 'oosa' cho, too hiye 'ílhdzun wheni, 'et súla. Lhanah Lizwif hube 'ut'en k'ah hukw'un'a lana'huldeh wheni. ⁷ 'Et Sizi ndunnah ustlen, 'en búlhni, "Ndi tse 'oosa' cho ts'iyawh too be nadulhbun." 'Et soo ts'iyawh budah whuts'un yanahídelhbun. ⁸ "Aw 'et buyé' 'ahkaih 'ink'ez ndun njan howunli, 'en buts'un yéhkalh," hubúlhni. 'Ink'ez bulah hits'un whinkai. ⁹ Ndi too mai too suli, 'i 'aw nts'ez de hahuyalhdze ndan howunli 'en t'éoonízun, 'et whunts'ih ndunnah ustlen, 'en hiyínkai, 'en t'ehonízun. 'Ink'ez ndet huwunli 'en dune 'at ut'i, 'en 'aníh yúlhni, ¹⁰ 'ink'ez ndi yúlhni, "Dune ts'iyannah ndi mai too unzoo, 'i choo howu hínildzze, 'et hukw'elh'az soo' neltsuk hutni, 'et 'ink'ez hukw'elh'az 'int'ah 'i mai too 'i bughu hínildzze. 'Et nyun ndi unzoo, 'i 'udek'ah whuts'un ontun!" yúlhni. ¹¹ Njan keyah Cana Galilee yun k'ut whuz'ai 'et soo 'udechoo Sizi huwa 'ét'en teh whená'dit'en, 'ink'ez dádelti 'et hóbunelhtan. 'I bugha hodul'eh 'en bugha ba 'alha yint'ah suli.

Jerusalem luglez whucho Sizi 'uhooket tindá bunenyoot

¹² 'Et ndúhooja hukw'elh'az Sizi keyah Capernaum huwhutni ts'ih whinya. Be'ama chah 'uja, 'ink'ez bulhutsinkah chah, 'ink'ez yugha hoodul'eh chah, 'aw sa ilah 'et hudálts'i. ¹³ 'Aw 'et wheghah whúdezulh ndet da Lizwif bukoo Yak'usda lizas Butus Lhuséya whunahulnih,* 'et Sizi Jerusalem ts'ih whénya. ¹⁴ 'Et luglez whucho whuna'nesdut'oo wheyah ts'ih tézya 'et dune 'e'óoket hubunílh'en. Khunai cha, musdus cha, sheep cha, 'ink'ez dut'aiyaz cha, dove hiyúlhni, hiye 'óoket, 'ink'ez dune sooneya lhk'enáhundunedzih, 'en chah 'et 'uhut'en. ¹⁵ Tl'oolhyaz be dutsus inla. 'I be khunai ts'iyawh tinaínenyoot. Sooneya lhk'enáhundunedzih chah hubuzooneya nus wheyantsut, 'ink'ez kw'uzdai chah yun tez'ai. ¹⁶ 'Ink'ez dut'aiyaz be 'óoket chah ndó bulhni, "K'an 'aw 'et tiná'nuhle! 'Aw se'aBá bukooyah 'et 'e'óohket bakoo whulhtsi ilah!" hubúlhni. ¹⁷ 'Et ndunnah yugha hoodul'eh 'et whunahulnih huwa 'uk'une'huzguz 'i daja ni, 'et ndutni, "Njan nkoo hukwa' nuszun k'et 'ants'ih siyah whudezk'un li'nust'ah." ¹⁸ Lizwif 'uhiyúlhni, "Njan nts'oh teh ne'ínt'en nts'ez na'a 'ínt'en hooncha túne' 'int'en, 'et whunénilhtun?" ¹⁹ 'Et Sizi ndo

† ^{1:51} Yinkak dune ye' ni, 'et dich'oh na'dudútni. * ^{2:13} Nawhudezulh totsuk 'ilhunahowudulh 'ink'ez ndi sheep k'us unzoo 'i nahiyut'alh. Njan whewhúnhulnih hoh da Yak'usda yun k'ut Egypt ts'a hanaóbanla da.

búlhni, "Njan bukoo whudézti nuhwheni hoolah whulhtsi 'ink'ez tat dzin inle t'eh, 'et dinaoodutés'ah." ²⁰ 'Et ndunnah Lizwif 'uhiyúlhni, "Njan koo whudézti dit lanezi 'o 'at lhk'utat naoodezut inle hoh lhaoodúlya. 'Et daja ninzun ho' dini, tat dzin whutuh zeh dinaoodutá'ah dini," hiyúlhni. ²¹ 'Et njan Sizi bukoo whudézti howu yalhtuk hoh, dich'oh buyust'e, 'i ghu yalhtuk ho' utni ínle. ²² 'Et huwa Sizi Gri dázsai hubutuh dinadija hoh yugha hoodul'eh whunahulnih daja hubúlhni inle da, 'ink'ez ndi Yak'usda bughunek 'uk'une'úsduguz, 'i 'ink'ez khunek 'i Sizi ye yaílhtuk, 'i bulh daja ni ts'iyawh huba 'álha 'uhoont'ah. ²³ 'Awhuz Jerusalem 'et zeh 'ut'en hoh njan Hubutuh Lhusíya, 'et whutah ne'whut'en, bulunah ndunnah Sizi yunilh'en nts'o túne'ut'en, 'et huwa k'us lhanah boozí huba 'alha' yint'ah suli. ²⁴ 'Et whunts'ih Sizi dich'oh chah 'aw dune hubut'achanítan, t'eoobunínzun dune dahínt'ah 'et huwa. ²⁵ 'Ink'ez 'aw 'uyoon dune dahínt'ah 'et ndudóoni ghaít'ah, dich'oh dune dahínt'ah chah t'eoobunínzun 'et huwa.

3

Sizi Nicodemus yúlhni doo chah zeh whutanle huba 'uhoont'ah

¹ 'Ilhunuh dune Pharisee bulh dezulh, 'en 'ilhunuh Lizwif hubutsuh whudelhdzulh, 'en Nicodemus hiyulhni. ² 'En 'ulh'ek 'et Sizi yughu ninya 'ink'ez ndi yúlhni, "Rabbi, Yak'usda yulh 'int'ah dune, 'en zeh njan huwa 'ét'en tune' oot'en huba 'uhoont'ah. 'Et huwa soo t'ets'onínzun dune hoodulh'eh Yak'usda ts'ih haínya, 'en inli ho' nint'ah." ³ 'Et Sizi 'uyúlhni, "Soo ts'ah'un na'a nyudúsni, dune doo chah zeh whuzdli t'eh, 'et t'eh zeh nts'e Yak'usda 'en hubudayi cho unli whute'ilh." ⁴ 'Et Nicodemus ndi yúlhni, "Nts'e na'a suba 'ilhunuh dune tube ye'un uzulh, 'en doo chah 'uhóoleh ho' dini? 'Aw whulh nat be'ama yuchan naoja 'ink'ez doo chah 'uhóoleh ghaít'ah!" yúlhni. ⁵ 'Et Sizi ndi yúlhni, "Soo ts'ah'un na'a nyudúsni, dune too 'ink'ez Ndoni be chah whuzdli t'eh, 'et zeh nts'e dune Yak'usda dich'oh zeh hubudayi cho unli 'et 'aw dahóoya ghaít'ah. ⁶ Ndun dune bughá whuzdli, 'en dune budune 'int'ah, 'ink'ez ndan Ndoni be whuzdli, 'en Ndoni budune 'int'ah. ⁷ 'Et nyudúsni nuhwheni doo chah zeh hóhle huba' hoont'ah. Khun teh 'et huwa mba hócha gunih! ⁸ Ants'ih nilhts'i delts'ulh li'hoont'ah. Nilhts'i dints'o 'et whunts'ih nts'ez de hadélts'ut k'us nts'e dutelts'ulh 'aw t'éoonuzínzun. 'Et whuz na'a zeh 'aw t'éoonónzin ghaít'ah nts'e na'a dune Ndoni be whuzdli," yúlhni. ⁹ 'Et Nicodemus ndi yúlhni, "Et nts'e na'a 'uwhuté'ilh?" ¹⁰ 'Et Sizi ndi yúlhni, "Et nyun Israel buts'u hainde whubodilh'eh inli, 'ink'ez nts'e na'a 'int'ah njan 'aw nyeni be t'éoonuzínzun? ¹¹ Soo ts'ah'un na'a njan nyudúsni, t'ets'onínzun ndet howu yats'ulhtuk 'ink'ez ts'ah'un na'a nuhwhuts'útni ndai ts'a'en 'ink'ez nuhwheni 'aw neghunek nuhwhuba 'alha' cha'ít'ah. ¹² Ndi yun k'ut nts'oh tulih né'whut'en, 'et hubugha 'ún whudusni, 'et whunts'ih nuhwhuba 'álha cha'hóot'ah nts'e na'a simba nduk yak'uz né'whut'en, 'et hubugha 'ún whudusni, 'et nuhwhuba 'alha 'uhot'e? ¹³ 'Aw 'ilhunuh dune nduk yak'uz whenya hoolah, 'aw 'ilhunuh zeh 'uja ndus de yak'uz haínya. 'En 'int'ah yinkak dune ye' unli, 'en 'int'ah yak'uz whukeyah whuz'ai. ¹⁴ 'Uda 'aw dune chahahóot'ih 'et Moses 'en tl'ughus k'edéltsi dibe' yudilhtsi inle, whuz na'a yinkak dune ye' dibe na'hidóolhtsi huba 'uhoont'ah. ¹⁵ 'Et huwa ndunnah 'en bughá huba 'alha 'uhoont'ah, 'en 'aw dachatesa,* 'ilhuz wule wheni hukhutenalh. ¹⁶ Yak'usda dalhcho 'i be ndi yun k'ut dune húbuk'entsi', 'aw 'ilhunuh zeh buYe' 'en hubugha ínilhti. 'En bughá ndan huba 'alha' yint'ah 'aw dachahútesa, 'ilhuz wheni hukhutena 'et huwa. ¹⁷ 'Aw dune ba

* ^{3:15} Njan ndachátesa ni, 'aw neyust'e ilah, nezul 'ink'ez neyégha gha yalhtuk ni ho 'utni.

nahuteyeh ílah Yak'usda buYe' ndi yun k'uz yutélh'a. 'En bugha ndi yun k'ut whut'en 'en ts'iyannah hudoojih, 'et wheni ndi yun k'uz yutélh'a. ¹⁸ Ndunnah huba 'álha' yint'ah 'en 'aw huba nachahutésyel. 'Et ndunnah 'aw huba 'álha cha'yít'ah, 'en 'uda huba nahézya ho' hint'ah, 'aw Yak'usda buYe' boozi 'aw huba 'alha cha'yít'ah 'et huwa. ¹⁹ 'En 'int'ah be né'hoot'en unli ndi yun k'eínya. 'I 'aw 'i hikacha'nízun njan tsahólgus yuh 'et 'o nus tinch'a 'uhút'ih, 'et huhóont'i. 'Et huwa huba nahooyeh. ²⁰ Ndunnah hoontsi' tune'hút'en, 'en ndi be whét'en hits'u dutnik. 'Et huwa ndi be whét'en, 'aw hits'un téoya ghaít'ah, doo ka tink'us ne'hút'en 'et ts'et haootélt's'ulh 'et whuch'a. ²¹ 'Et whunts'ih ndan ts'ah'un na'a 'et'ilh, 'en ndi be whét'en ts'un teyalh, 'et hoh ts'iyannah t'ehonózin, nts'oh tune'út'en, Yak'usda 'en bugha ne'ts'oot'en."

John dune too be ne'úlh'en doo chah zeh Sizi yuba whudélhti

²² Njan hoh túne' whust'en hukw'elh'az Sizi 'ink'ez yugha hoodul'eh Judea yun k'ut ts'ih whehándel. 'Et yugha hoodul'eh higha hudálts'i 'ink'ez dune too be' óobalh'en. ²³ Hoh da zeh John 'en chah keyah Aenor huwhútni, keyah Salem huwhútni wheghah whuz'ai, 'et dune too be 'oobalh'en, 'et too lhai 'et huwa. Dune hits'u lhadulh 'ink'ez bulunah dune too be' binla. ²⁴ 'Et John nk'ácha tsak'echalhts'it 'et huwa. ²⁵ 'Et hoh da John yugha hoodul'eh Lizwif bulh lhk'enahuditdzut Lizwif hube 'ut'en k'ah hukw'una'a lana'huldeh 'et huwa. ²⁶ 'Et huwa John highu nindel 'ink'ez hiyoodulhkut, "Rabbi ndun dune 'ilhunuh ngha hoodul'eh, Jordan took'oh nyaz ts'ih, 'en dune hubulh yaílhtuk ínle, 'aw 'et 'en dune too be 'úlh'en 'ink'ez ts'iyannah hits'ún lhadulh," hiyúlhni. ²⁷ 'Et John ndo búlhni, "Yak'usda yugha óoni'ai t'eh zeh, 'et huwa 'aw 'ants'ih 'et hoonliyaz 'oot'e ghaít'ah. ²⁸ Nuhwhenich'oh 'et whunts'ih daja dusni t'éoonáhzun, si 'aw Christ 'en ilah 'ust'ah, 'et whunts'ih 'ilhunuh yutsuh whusál'a, 'en 'ust'ah. ²⁹ 'Et nduhóont'ah hoh, 'ilhunuh dune ts'eke yughusda, 'en 'at ut'i 'int'ah. 'Et hubuk'entsi' yuzih suyin 'ink'ez yughunek yoozélhts'ai whuz na'a tube yuba hóont'i. 'Et nuhwhúdusni si chah whuz na'a tube cho hoonúst'i.† ³⁰ 'O nus tube cho hidóolhti 'ink'ez si hukw'elh'ih suba hodóolhti, 'et whuz na'a 'uhót'e huba' hoont'ah. ³¹ Ndun ndus de haínya, 'en ts'iyannah hubugha ndoh 'int'ah 'ink'ez ndan yinkak ts'ih haínya, 'en yinkak dune unli, 'et huwa ndi yun k'ut hoonli, 'i zeh highu yalhtuk. 'Et ndun yak'uz haínya, 'en ts'iyannah hubugha ndoh 'int'ah. ³² 'Et ndet ndun whunahen 'ink'ez whudánts'o, 'et 'uyoon chah hubúlhni, 'et whunts'ih daja hubúlhni 'aw highunek chaílhcholh. ³³ 'Et whunts'ih ndun yughunek ilhchoot daja ni, 'en 'utni ndun Yak'usda 'en buba 'alha' yint'ah, ni. ³⁴ Ndun 'en Yak'usda whusayálh'a, 'en 'ink'ez didut Ndoni be yudelhbun, 'et huwa Yak'usda bughunek zeh be yálhtuk. ³⁵ Yak'usda 'en buYe' yuk'entsi' 'et huwa ts'iyaintsuk k'úne' hool'en, 'et yugha óoni'ai. ³⁶ 'Et ndunnah ndan Yak'usda buYe' buba 'alha yint'ah, 'en 'ilhuz wheni be ts'úkhuna, 'i huyit'i, 'et whunts'ih ndunnah huba 'alha' cha'yít'ah, 'en 'aw honoolh'en ghaít'ah, Yak'usda yé hubulh húnilch'e 'ahoolhyez wheni buk'uz 'uztét'ilh," ni John.

4

'Ilhunuh ts'eke Samaria yun k'ut whut'en, 'en Sizi ndi 'ilhuz wheni be ts'úkhuna 'i bugha yulh yálhtuk.

¹ 'Et ndunnah Pharisee hiyulh údits'o hoh 'uhíyulhni, "Sizi 'en John degha nus lhanah dune chah yugha hoodul'eh suli, 'ink'ez dune too be' úlh'en chah 'ut'en," hutni. ² 'Et whunts'ih 'alha Sizi 'aw dich'oh ilah dune too be' bulh'en,

† ^{3:29} Ndun dune 'at ut'i 'en Sizi Gri dult'ah, 'ink'ez buk'esi', 'en John dune too be 'ulh'en dult'ah ni ho 'utni.

yugha hoodul'eh, 'en zeh 'uhut'en. ³ 'Et neMoodihti whulh úduzts'ai 'aw 'et Judea yun k'ut whuch'a nasja 'ink'ez Galilee yun k'ut ts'ih natesja. ⁴ 'Et nadalh hoh Samaria yun k'ut hoh lhunátedalh, ⁵ 'ink'ez Samaria yun k'ut keyah Sychar huwhútni ts'ih ninja. Njan keyah 'et yun k'ut Jacob buye' Joseph yugha óoni'ai ínle, 'et wheghah whuz'ai. ⁶ 'Et Jacob too k'et 'uhóonla, 'et whuz'ai. 'Et Sizi tube sa nuséya 'ink'ez ninéntsai, 'et huwa too k'et whuzih 'et nátl'adeda. 'Et 6:00 'uhúnet'oh hoh 'ut'en. ⁷ 'Et usda hoh 'ilhunuh ts'eke, Samaria whut'en, 'en too kéya. 'Et Sizi ndi yúlhni, "Too sugha nínkaih!" yúlhni. ⁸ Dich'oh zeh 'int'ah, yugha hoodul'eh keyah ts'ih ts'iyyi hootekulh ts'ih whehándel 'et huwa. ⁹ 'Et ndun Samaria ts'eke 'en 'uyúlhni, "Nyun Lizwif 'int'ah 'ink'ez si Samaria ts'eke 'ust'ah, 'ink'ez di ka dini too suts'un ka' dini?" Lizwif, 'en Samaria whut'en 'aw buka cha'hunízun 'et huwa 'utni. ¹⁰ 'Et Sizi ndi yúlhni, "Ndi Yak'usda huwa íni'ai, 'i soo cho t'eninzun t'eh, 'ink'ez ndun 'utni nyulh yálhtuk hoh too nts'u ka 'utni, 'en t'enínzun t'eh, 'et nyun 'uda oodolhkut 'ink'ez ndai too bugha hiye khuna, 'i da nughá yoolhdzeh inle," yúlhni. ¹¹ 'Et ndun ts'eke ndi yúlhni, "Nyun 'aw be ta'ónkalh 'i chaínt'ih, 'ink'ez njan too k'et nádalhdzat, nts'e na'a ndi too be ts'úkhuna, 'i be 'útankalh? ¹² Netsuh whudelhdzulh Jacob 'en njan too k'et negha óoni'ai. Didut, buye'kah, 'ink'ez bughunai teh, njan too k'et 'et too hutnai ínle, 'et huwa nyun buba nus incha ninzun ih?" yúlhni. ¹³ 'Et Sizi ndi yúlhni, "Ndunnah njan too k'et too utnai, doo chah zeh ta'hóosde hulhíh, ¹⁴ 'et whunts'ih ndunnah too bugha ítelhdzoh, 'i hiyetnai t'eh, 'aw 'o 'at ta'hóde ghaít'ah. Ndun ndi too bugha ínulhdze, 'i too 'ahoolhyez ninli 'int'ah, 'i be 'ahoolhyez wheni hukhutena," yúlhni. ¹⁵ 'Et ts'eke ndi yúlhni, "Hoh ndi too 'udíni 'i sugha nílhdzeh, 'et huwa 'aw 'o 'un tacha'ootuzesde 'ink'ez 'aw 'o 'at njan too ooskalh ghaít'ah." ¹⁶ "Nki 'anih díni 'ink'ez 'en bulh dez náht'us," yúlhni Sizi. ¹⁷ 'Et ts'eke 'utni, "Aw suki hoolah hoh 'ust'ah." 'Et Sizi ndi yúlhni, "Soo' dini! Ts'ah'un na'a sudíni, 'aw nki chah hoolah dini. ¹⁸ T'éoonúszun skwunlanah nkikah inle, 'ink'ez k'an bughu sinda, 'en chah 'aw nki ilah 'int'ah. 'Et ts'ah'un na'a 'udenja," yúlhni. ¹⁹ 'Et ts'eke ndi yúlhni, "Nyun nus whunilh'en tuli' nint'ah? ²⁰ Netsuh whudelhdzulh, 'en ndi dzulh k'ut 'et teni 'uhunilhzun ínle. 'Et nuhwheni 'udúhni Jerusalem 'et 'ilhun whuz'ai, 'et dune teni 'uhunoohlzin huba 'uhoont'ah," yúlhni. ²¹ 'Et Sizi ndi yúlhni, "Mba 'alha 'udoosni, 'ilhudzin dez whélts'ulh hoh 'uhoont'ah, 'aw ndi dzulh k'ut k'us Jerusalem 'et zeh ilah Yak'usda 'en buts'u téni 'untelhdzin hoh 'uhoont'ah. ²² Nuhwheni ndai buts'un téni 'unulhdzun 'i 'aw nuhwheni be t'enuzúhzun. Wheni ndun buts'u téni 'uznilhzun t'ezninzun, Lizwif, 'en hubula tah ts'ih zeh dune hudutejih 'et huwa. ²³ Ndet whuz de whúdezulh k'an 'et huba 'uhoont'ah, ts'ah'un na'a teni 'uhunilhzun soo ndzi ndulhcho 'i be ts'ah'un na'a Yak'usda hits'un téni 'uhunoohlzin wheni. 'En ndunt'ah, 'en Yak'usda buka' ninzun buts'u téni 'uhunoohlzin ka. ²⁴ Yak'usda 'en nudúdeh 'i unli ho' 'int'ah. 'Ink'ez ndunnah hits'un téni' hunilhzun, 'en ts'ah'un na'a buyégha be hits'un teni 'unoohlhdzin huba' hoont'ah," yúlhni. ²⁵ 'Et ndan ts'eke ndi yúlhni, "T'éoonúszun ndan Messiah whusatéyah, ndan Christ hiyúlhni, 'en whusaínya t'eh, dutsuk newhuntelhtun." ²⁶ 'Et Sizi ndi yúlhni, "K'an 'et ndan nyulh yálhtuk, 'en si usdli hoh 'ust'ah." ²⁷ Soo 'et ndutni 'aw 'et 'ustl'e' 'udeja hoh, yugha hoodul'eh whusanáhadel. Tube huba hooncha Sizi ndun ts'eke 'en yulh yálhtuk, 'et whunts'ih 'aw 'ilhunuh nts'ih chahiyoodulhkut, "Di ka ndun ts'eke 'en bulh yaílhtuk?" k'us, "Ndet 'et nahoote'alh?" chahidínil. ²⁸ 'Et ndun ts'eke too ye kuya 'i chah 'aw 'et nínin'ai 'ink'ez keyah ts'ih whenája. 'Et dune ts'iyawh ndó bulhni, ²⁹ "Anih! Ndun dune noolh'en si! Nts'oh tula né'zust'en inle, ts'iyawh ndusúlhni. 'En tulih Christ 'int'ah?" hubúlhni. ³⁰ 'Et huwa soo ts'iyannah keyah ts'ih hahándel 'ink'ez Sizi highu nindel. ³¹ 'Et

ho da yugha hoodul'eh 'uyúlhni, "Rabbi, na'int'alh!" ³² 'Et Sizi ndo búlhni, "Uda ndi ts'iyi 'aw nuhwheni t'enuzuhzun, 'i úst'i." ³³ 'Et yugha hoodul'eh dich'oh 'úlhodutni, "Uyoon dune yuté'ah 'i yuba whusayánlá ho tulih ni?" ³⁴ 'Et Sizi ndo búlhni, "Ndun whuz de sutelh'a, ndet suts'u húkwa' nínzun, hoh tune'óost'en 'ink'ez be 'ut'en lhadóosdleh huba 'uhoont'ah. Ndi 'i zeh suts'eyi 'int'ah. ³⁵ 'Awhuz dink'i sanun whuz'ai, tl'o 'utelilh whuts'un. 'Et whunts'ih 'un whudusni hoh soo zélhts'ai, soo cho nuhwhuna be whunulh'en. Tl'o k'ut 'aw 'et whudezgi tl'o 'utenilh huba. ³⁶ Ndan whut'as, 'en huba k'elha hóle, 'ink'ez ndan 'ilhodughulhdzeh 'en, 'et ndunnah 'ilhunabughesdle, 'en 'ilhuz wúle hiye khúna, 'i bugha itélt's'ulh. 'Et huwa ndan 'a'nule 'ink'ez ndan 'ilhodughulhdzeh, nahúlt'ah 'en hóntelhnik. ³⁷ 'Et whuz na'a daja ni 'alha 'utni, "Ilhunuh dune 'en whuye' nule 'ink'ez 'uyoón dune 'en ha' nule.' 'Et ndi 'utni 'i 'alha 'uhoont'ah. ³⁸ 'Aw whutsah da cha'záht'en 'et whunts'ih whetélh'a na'oolhdzoo wheni. Whuz whutsuh da 'uyoón suba 'et'en ínle. 'Et k'an nuhli whusáhdel 'ink'ez 'uyoón ha' nanla 'et ha' nilhla," hubúlhni. ³⁹ 'Et ndun ts'eke, njan keyah whut'en, 'en ts'iyannah hubudáni, "Dast'en inle, ts'iyawh ndusúlhni," ni. 'Et huwa 'en bughunek bugha lhannah Samaria whut'en huba 'alha' yint'ah suli. ⁴⁰ 'Et huwa Samaria whut'en dune Sizi highu nindel hoh hubuzih ónda hiyúlhni. 'Et huwa nat dzin 'et hubuzih inda. ⁴¹ Bughunek 'i bugha tube 'o nus unéltsuk, 'en bugha hububa 'alha 'uhoont'ah. ⁴² 'Et ndun ts'eke 'uhiyúlhni, "Aw nyun nghunek 'i bugha zeh ilah neba 'alha' 'int'ah, whenich'oh bughunek ts'udánts'o. 'I bugha 'alha ndun 'en dune telhyis wheni, Christ, 'en ndi yun k'einya t'ets'onanzin," hiyúlhni. ⁴³ Nat dzin inle hoh Sizi Galilee yun k'ut ts'ih whénya, ⁴⁴ 'ink'ez dich'oh hoh ndúttni, "Yak'usda be nus whúnih'en dich'oh dukeyah inda, 'et whunts'ih, 'aw chahidílhti," ni. ⁴⁵ 'Et Galilee yun k'ut ts'ih hainya hoh ndunnah Galilee whut'en 'en dune tube huhóont'i hubughu ninya. Didut chah Jerusalem dzenis whuti nduhóolyez hoh 'et 'uhet'en 'ink'ez Sizi hinilh'en hoh hubunah hooncha túne' 'ust'en. ⁴⁶ 'Et doo chah Sizi Galilee yun k'ut, keyah Cana huwhútni ts'ih lhunásja. 'Et 'uja too, 'i mai too yulhtsi ínle. 'Et 'ilhunuh dune keyah dune tsuh whudéldzulh buye' tube únduda keyah Capernaum huwhútni 'et. ⁴⁷ 'Et Sizi Judea yun k'ut ts'ih haínya 'ink'ez Galilee yun k'ut whuz tezya, 'et whulh úduzts'ai hoh yuts'un ninya, Capernaum ts'ih duduh nátoot'as buye' 'aw 'et datétsah, 'en soo ná'yoleh, 'et hukwa yuts'un tedudlih. ⁴⁸ 'Et Sizi ndi yúlhni, "Nyunalh huwa 'int'en tune' 'ust'en 'ink'ez hooncha tune' 'úst'en t'eh, 'et t'eh zeh mba 'alha 'oost'e." ⁴⁹ 'Et ndun keyah dune tsuh whudéldzulh ndi yúlhni, "Sumoodih 'anih soo 'a! Siyaz datétsah whutsah da!" ⁵⁰ 'Et Sizi ndi yúlhni, "Naindalh, nye' khuna." 'Et ndun dune daja yulhni, Sizi yuba 'alha deja 'ink'ez whenája. ⁵¹ 'Awhuz bukoo whuts'un nádalh hoh, be' ustle hidudezdel 'ink'ez, "Nye' khuna," hiyúlhni. ⁵² 'Et huboodulhkut, "Soo nts'oh da whudézulh hoh soo na'uja?" 'Et hiyúlhni, "Hulhda 7:00 'uhunit'oh hoh ndi dada buts'u haídelts'ut." ⁵³ 'Et ndun dune t'ewhunínzun soo hoh wheghah whezulh hoh Sizi ndi yúlhni, "Nye' khuna." 'Et didut 'ink'ez 'on ghoh 'int'ah tubulh, ts'iyawh Sizi bugha hububa 'alha' yint'ah suli. ⁵⁴ 'Et Judea yun k'ut ts'ih haínya 'ink'ez Galilee yun k'ut 'et ninya hoh whulh nat 'i yun k'ut Sizi hooncha tune' 'ust'en.

5

Tádez'ai Bethesda huwhútni, 'et Sizi 'ilhunuh dune soo ná'yinla

¹ Njan hoh tune' whust'en hukw'elh'az 'et Lizwif budzenis whuti 'et wheni Sizi Jerusalem ts'ih whinya. ² Nyoh Jerusalem 'et sheep ba da'dentan hoonli, 'et wheghah tádez'ai whuz'ai. Njan tádez'ai, 'et Hebrew k'una'a Bethesda

huwhútñi, 'et whunat skwunlat bun tsilh t'ah whuzdla. ³ Njan bun tsilh t'ah 'et tube lhanah nduda 'et husdla. Bulunah chahuwhés'en, 'ink'ez bulunah hubódin'ai, 'ink'ez bulunah chah nchahúghusna. 'En ndi too nutughetnah, 'et huba hilh'i. ⁴ Soo nenaóodughidzuk te'whut'ih totsuk, lizas ndus de hadúdoh 'ink'ez tadez'ai, 'et too nunáhighelnaih. Ndán soo 'udechoo toot tayih 'en, nts'oh dant'i dada be nduda, 'et whunts'ih soo na'ut'ih. ⁵ 'Ilhunuh dune tat lanezi 'o 'at lhk'udit (38) naóodezut, 'en 'et ndúda. ⁶ 'Et sulhti hoh Sizi yunilh'en. T'ewhunínzun tube sa 'et ilhte. 'Et ndi yúlhni, "Soo ná'tantnilh hukwa' ninzun ih?" ⁷ 'Et 'ahoh dune nduda 'utni, "Ndi too nunaghetnaih teh, 'aw dune tasóolhtelh hoolah. 'Awhuz whuts'un húkwa 'ust'en hoh 'uyoon whusayih 'ink'ez sutsuh tayih." ⁸ Sizi 'et ndí yulhni, "Didinyih, kw'usinti 'i ílhchoot, 'ink'ez nínya!" ⁹ 'Et 'ahoh dune nduda soo ná'uja. Yuk'usti 'i yílhchoot, 'ink'ez tezya. Lizwif nahulyis 'et dzin 'et 'uhooja. ¹⁰ Ndun dune soo ná'uja, 'en Lizwif ndi hiyúlhni, "K'an dzin nahulyis ho' 'ohoont'ah. 'Aw bukw'usinti 'i 'aw nólhchoos huba chahóot'ah!" ¹¹ 'Et ndo búlhni, "Ndán soo ná'sinla, 'en 'usúlhni, 'Kw'usinti 'i ilhchoot 'ink'ez ninya, 'sulhni." ¹² 'Et huwa hiyoodulhkut, "Ndán ho' 'int'ah, ndi kw'usinti 'i ilhchoot 'ink'ez ninya nyúlhni 'en?" ¹³ 'Et ndun dune dich'oh chah 'aw t'eyunízun ndan 'uyínla soo ná'yinla. Tube lhanah dune tadez'ai, 'et 'uhut'en hoh Sizi whu'iz ts'ih whenya, 'et huwa 'aw t'echahinízil. ¹⁴ Njan 'et ndúhooja hukw'elh'az luglez whucho 'et Sizi ndun nayilhti 'ink'ez ndi yúlhni, "Dahooja, k'an 'aw 'et soo ná'inja. Lubeshi 'ilh'en 'ustl'e' 'oneh, doo ka 'o nus hoontsi' 'et ts'ih ngha hólts'it!" ¹⁵ 'Et ndun dune whenája 'ink'ez Lizwif hubudáni Sizi 'en 'uyínla soo ná'yinla. ¹⁶ 'Et huwa Lizwif Sizi dzuh nahídilhdzut 'ink'ez hituzelhghelh 'et hukwa húnuta. Njan nahulyis dzin 'et hoh tune' 'ust'en 'et hukwa. ¹⁷ 'Et whunts'ih Sizi ndo búlhni, "ABÁ 'ahoolhyez 'ut'en, 'et huwa si chah 'oost'en huba 'ohoont'ah." ¹⁸ 'Et hukwa Lizwif 'o nus hituzelhghelh hukwa' huninzun. 'Aw nahulyis dzin lhk'onínyuz 'et huwa zeh ilah, 'ink'ez chah Yak'usda 'en be'aBÁ yulhni. 'Et ndutni hoh 'et bugha ts'ih Yak'usda yulh lhúgha 'int'ah ni, 'et huwa hituzelhghelh hukwa' huninzun.

Sizi Yak'usda buYe' unli 'ink'ez ts'iyannah hubugha ndoh suli, 'et be'aBÁ yugha óoni'ai, 'et wheóobunelhtan.

¹⁹ 'Et Sizi 'et ndo búlhni, "Soo ts'ah'un na'a 'un whúdusni, si Yak'usda buYe' usdli, 'et whunts'ih 'aw sich'oh hukwa' nuszun tune' 'oost'en ghaít'ah. Yak'usda se'aBÁ nts'oh ne'út'en nulh'en, 'et whuz na'a zeh buYe' ne'út'en. ²⁰ Se'aBÁ buYe' yuk'entsi' 'et huwa ts'iyai tsuk be 'ut'en k'ah whénulhtun. det whunalh'en, 'et 'o nus 'ut'en k'ah hooncha, 'et whuyúntelhtun. 'I be tube nuhwhuba hóncha. ²¹ Se'aBÁ 'en 'ut'en, yahadla 'en dinabudile 'ink'ez ndunnah hubuka' ninzun, 'en 'ilhuz hiye khúna 'i hubugha yú'ah. Whuz na'a zeh si Yak'usda buYe', ndunnah hubuka' nuszun, 'en 'ilhuz hiye khúna 'i hubugha yús'ah. ²² Se'aBÁ 'en 'aw dune ba nahéyelh ílah, k'us buYe' 'en dune ba nahooyeh, 'et yutl'ahó'ai. ²³ Njan 'et ndúja, 'et huwa buYe' dune ts'iyannah 'en hidóolhti nts'e na'a be'aBÁ hidélhti hukw'una'a. Ndunnah buYe' chadílhti 'en 'aw be'aBÁ 'en chah chahidílhti, 'ink'ez 'en 'uyínla buYe' whusayálh'a inle.

Ndunnah sughunek ílhchoot 'ink'ez ndun whuz de sútelh'a, 'en hubugha hububa 'alha' 'int'ah, 'en 'ilhuz hiye khúna 'i hiyít'i.

²⁴ "Soo ts'ah'un na'a nuhwhudúsni, ndunnah sughunek ílhchoot 'ink'ez ndun whuz de sútelh'a, 'en hubugha hububa 'alha' 'ohoont'ah, 'en 'ilhuz hiye khúna 'i hiyít'i. 'Aw hubuna'doodeh ghaít'ah, 'uda be dats'útsaiah 'i hiye ghóozdel 'ink'ez 'ilhuz hiye khúna, 'i hiyít'i. ²⁵ Soo ts'ah'un na'a 'un whudúsni, ndet whuz de whúdezulh k'an 'aw 'et néwhults'ut. K'an 'aw 'et yahadla Yak'usda buYe' bughunek hidutéts'o, 'ink'ez ndan hidánts'o, 'en

hukhutenalh. ²⁶ Se'aBá 'en dich'oh hiye khúna 'i yit'i. 'Et whuz na'a zeh buYe', 'en chah be khútña 'i dich'oh yít'i, 'et yugha óoni'ai. ²⁷ Ink'ez ts'iyannah hubugha ndoh 'oot'e, 'et chah yugha óoni'ai. Yak'usda buYe' unli 'ink'ez yinkak dune ye' chah unli, 'et huwa ts'iyannah dune huba nahuteyelh huba 'uhóont'ah. ²⁸ Daja 'un whudúsni 'aw nuhwhuba hócha gunih! 'Aw 'et whuz de whúdezulh, 'et ts'un k'ut yahadla chah highunek hidutéts'o, ²⁹ 'ink'ez dinahudutédlh. Ndunnah 'ut'en unzoo 'i 'ahiyulh'en, 'en dinábudutélelh 'ilhuz wheni hukhutena, 'ink'ez ndunnah hoontsi' tune' húst'en, 'en chah dinábudutélelh 'ilhuz wheni dzuh nahutezut huba nahuteyeh. ³⁰ 'Aw sich'oh ndúhoont'ah whunóolh'en ghaít'ah. 'Aw sich'oh hukwa' nuszun tune' 'óost'en ghaít'ah. Nts'oh tula se'aBá suts'u húkwa' ninzun hoh teh zeh ne'úst'en. 'Et huwa dune ba nahutesyeh t'eh, se'aBá súlhni, 'et whuz na'a zeh dune ba nahusyeh, 'et ts'ah'un na'a 'uhoont'ah. ³¹ Sich'oh sugha 'un whudúsni t'eh, 'aw nuhwhuba 'álha cha'zóost'e. ³² 'Et 'uyoon 'int'ah, 'en si sugha ts'iyannah dune wheóobunulhtun 'ink'ez si sugha daja ni, 'alha 'uhoont'ah 'et t'ewhunúszun. ³³ 'Et nuhwheni 'uyoon, 'en John ts'un wheóobalh'a, 'et daja ni, 'et khunek 'alha' 'int'ah 'i be hubudáni. ³⁴ 'Aw dune si sugha daja ni, 'et huwa zeh ilah, njan ndúhoont'ah huwa ndun nuhwhudúsni, 'et huwa whedóohjih, 'et huwa ndun whudúsni. ³⁵ John 'en too dezklun 'ink'ez be whét'en, 'i hubut ts'u hayándi 'et ndánt'e. 'Astl'iyaz wheni ndi be né'hoot'en, 'i be ndunwhúlhni inle. ³⁶ 'Et whunts'ih John si sugha 'uyoon wheóobunelhtan, 'o nus 'uhóolcho, 'et whust'i. Ndi 'ut'en 'i se'aBá stl'ayá'ai lhadóosdleh wheni, 'i 'ut'en 'aw 'i zeh bughá khusna, 'i bugha 'uyoon t'ehonózin, se'aBá 'en whuz de sútelh'a. ³⁷ Ink'ez se'aBá, ndun whuz de sútelh'a, 'en dich'oh si sugha ts'ah'un na'a whulhtsi. 'Aw yalhtuk chah suduzahs'o, 'ink'ez dant'ah unli 'aw chaséh'en. ³⁸ Ink'ez bughunek 'aw chaóozahntun. Ndun whuz de yútelh'a 'aw nuhwhuba 'alha' cha'ít'ah, 'et huwa bughunek 'aw nuhwhéyah chadi'ah. ³⁹ Yak'usda bughunek 'uk'une'úsduguz, 'i be 'ilhuz hiye khúna 'i aht'i nahzun, 'et huwa 'áht'en soo cho hoodulhú'eh, 'ink'ez ndi khunek 'uk'une'úsduguz, 'i si sugha zeh 'int'ah. ⁴⁰ Si sugha 'ilhuz wule hiye khúna 'i 'ooht'e, 'et whunts'ih 'aw suts'u tóohdelh hukwa cha'nuzuhzun. ⁴¹ 'Aw dune ye súdelhti 'i wulchoot ghaít'ah, ⁴² 'et whunts'ih nuhwheni nuhwhugha ts'iyawh t'éoonúszun. Nuhwhuyuh ts'ih daht'ah hoh 'aw Yak'usda buk'echatsi' 'et t'ewhunúszun. ⁴³ Se'aBá 'en boozi bugha whusáya, 'et nuhwheni 'aw suka cha'nuzáhzun, 'et whunts'ih 'uyoon teh dich'oh buboozi bugha whusainya t'eh, 'et t'eh da 'en buka' noohzin. ⁴⁴ Nuhwhenich'oh nuhtah chaoodúlhti. 'Et whunts'ih, ndai be 'uzdélhti 'i Yak'usda dich'oh buts'u haídelts'ut, 'i 'aw bakancha'zaht'o 'et huwa nts'e na'a nuhwhuba 'alha' 'uwbutét'ilh? ⁴⁵ Se'aBá 'en bubut nuhk'éhos'alh noohzin gunih! 'Uyoo chah hoonli. Ndi khunek Yak'usda neba lhuhezya, 'i Moses 'en yutl'aída'ai ínle, 'i but'anínuhtan, 'en, 'i nuhk'éhoo'ai. ⁴⁶ Ndi Moses 'uk'uné'uzguz 'i, nuhwhuba 'alha' 'int'ah t'eh, 'et si sugha chah da nuhwhuba 'alha 'uhót'e, Moses si sugha 'uk'uné'uzguz 'int'ah 'et huwa. ⁴⁷ 'Et whunts'ih ndi Moses 'uk'uné'uzguz 'i 'aw nuhwhuba 'alha' cha'ít'ah 'et huwa nts'e na'a suba si sughunek 'i nuhwhuba 'alha 'oot'e?" 'et Sizi ndubulhni.

6

Huwa 'ét'en tune'ust'en, 'et huwa 5,000 dune 'en Sizi hiyoo'ah ka, 'i hubugha iní'ai

¹ 'Et hukw'elh'az Galilee bun k'ut 'et Sizi nyan whinki, 'i bun k'ut zeh Tiberias cha huwhútñi. ² Hunduda hubutah tube huwa 'ét'en tune' 'úst'en 'et hinilh'en, 'et huwa tube lhanah 'ilhunahuwésdel, 'en 'et nihínudelh. ³ 'Et Sizi yasúya hoh yugha hoodul'eh tubulh, 'on ndoh dzulhyaz k'ut 'et nátl'ahúdelts'i.

⁴ 'Aw 'et wheghah whudezulh Lizwif Yak'usda bulizas Hubutus Lhuséya whunahulnih. ⁵ 'Et nyoh dzulhyaz k'ut Sizi whunilh'en tube lhanah dune hits'ú lhadulh, 'et hubunilh'en hoh Philip 'uyúlhni, "Nts'e lhes ts'ootekulh, ndunnah dune hite'alh huba?" ⁶ 'Et Sizi dich'oh daténih 'et nt'eeonínzun, 'et whunts'ih Philip 'en yóoldzi ho 'utni. ⁷ 'Et Philip 'utni, "\$200.00 k'ah dustl'us lhes 'aw huba soo cha'nítsuk, 'i ilhunuh hinli 'et whunts'ih ntsólyaz hite'alh, 'i hiya'al." ⁸ 'Et 'ilhunuh Sizi yugha hoodul'eh, Andrew, Simon Peter bulhutsin, 'en Sizi ndi yúlhni, ⁹ "Njan 'ilhunuh duneyaz netah 'ut'en, 'en lhes sut'e skwunlai (5) chah 'ink'ez lhookyaz nankoh (2) chah, 'i yit'i, 'et whunts'ih di wule lhe'huneltsuk yute'ulh huba?" ¹⁰ 'Et Sizi 'utni, "Ts'iyannah nitl'ahudoolts'ilh hubuhútni." 'Et 'uhut'en tl'oyaz k'ut hoonli, 'et dune 5,000 bat'en hinli hoh 'et natl'áhuelts'i. ¹¹ 'Et Sizi lhes yílhchoot, Yak'usda ts'un suchanailya ni hoh tenadéqli, 'ink'ez yugha hoodul'eh hubutl'áyanla, hudélhts'i ts'iyawh hubutah niyoowhnih ni. 'Et lhookyaz yílhchoot 'ink'ez 'i chah 'et ndúyinla. Ts'iyannah soo 'uneltsuk hoh hiyílhchoot 'ink'ez hiya'al. ¹² 'Ink'ez ts'iyannah 'uhunesdai hoh, Sizi yugha hoodul'eh ndo búlhni, "Ndai ts'íhitezkat, 'i soo ts'iyawh 'ilhunawooohlelh, 'et huwa 'aw tintaookat ghaít'ah." ¹³ 'Et huwa soo ts'iyannah 'an'al hukw'elh'az, ndai highá wéz'al 'i ndi skwunlai lhes sut'e 'ink'ez nankoh lhookyaz bulh, díhitezkat, 'i lhunahighezvla hoh lanezi 'o 'at nankoh (12) hoongwun 'i dez bun. ¹⁴ 'Et ndunnah dune honalh'en hoh Sizi dahoolcho 'uja, "Et 'alha' hoont'ah hoh ndun 'en nus whunilh'en 'et njan yun k'e teyalh, 'en 'int'ah," hutni. ¹⁵ 'Et Sizi t'éwhunínzun hubudayi cho tele, 'et k'ehintét'a hukwa' huninzun, 'et huwa doo chah zeh dich'oh dzulhyaz k'uz whenája.

Sizi too k'ut nuya

¹⁶ 'Aw 'et hulhgha suli hoh yugha hoodul'eh 'en bun k'ut ts'ih whenahedel, ¹⁷ 'ink'ez ts'i be nahédel nyan keyah Capernaum ts'ih whuz nahutekelh hukwa' huninzun. 'Aw 'et tube tsahólhgus suli 'ink'ez Sizi 'awhuz bughu nachasdak. ¹⁸ Tube nilhtsi ulhtus, 'et huwa too k'ut tatsi díncha suli. ¹⁹ 'Aw 'et bun k'ut lhulcho 'uhut'en hékelh hoh, Sizi too k'ut uyalh hoh hitelh'en, 'ink'ez 'aw 'et hubuts'i hubughah haínya hoh tube hiyenelhujoot. ²⁰ 'Et, "Aw senlhujut ílah, si 'ust'en!" hubúlhni. ²¹ 'Et ndo búlhni hukw'elh'az huhóont'i hoh hubuts'i be naja. 'Et hubughu denája ibulh, 'a hoh nts'e yun k'ut hutézki, whuz yáhuzki.

Sizi 'ilhohuwezdel ndo búlhni, "Si ndi lhes 'ilhuz wule hiye khúténa, 'i 'ust'ah"

²² 'Om bun dzin 'et ndunnah bun k'ut ts'ih 'ilhohuwezdel ínle ts'iyaz 'ilho zeh 'et hinalh'en ínle, 'et huwa Sizi 'aw yugha hoodul'eh hubughut denachaídal, hi'et whenadúki t'éhonínzun. ²³ 'Et whunts'ih ndet neMoodihti Yak'usda ts'un lhes ba tenadedli 'ink'ez dune tainínlah huyoo'alh wheni, 'et whuzih, 'et hukw'elh'az 'uyoo ts'i chah Tiberias whuz de hainkat. ²⁴ 'Et ndet 'ilhohuwezdel ts'iyawh t'ehonanzin Sizi chah hoolah 'ink'ez yugha hoodul'eh chah ts'iyawh chah huhóolah, 'et huwa didut chah ts'iyawh ts'i be hándel 'ink'ez nyan Capernaum ts'ih whehánki Sizi hikunúta wheni. ²⁵ 'Et ndunnah 'ilhohuwezdel bun k'ut nyan nahuninki hoh Sizi nahiyilhti 'ink'ez hiyoodulhkut, "Rabbi nkeda njan 'et nínya?" hiyulhni. ²⁶ 'Et Sizi ndo búlhni, "Soo ts'ah'un na'a 'un whudúsni, 'aw njan nuhnalh huwa 'ét'en túne' 'ust'en, 'et huwa zeh ilah skunáhta. Ndi lhes nuhgha ní'ai, 'ink'ez be soo 'uhja, 'i ka zeh 'aht'en skunúhta. ²⁷ Ndi naht'ah 'i hoolah nadleh ho' 'int'ah, 'aw 'i ilah bukunáhta, k'us ndi ah'ah 'i dune 'ilhuz wule beye khúténa, 'i zeh bukunóohta. Yinkak dune ye', 'en 'i nuhwhughá yoo'alh, be'aBá Yak'usda 'en yugha óóni'ai, 'en behóodel'en, buYe' 'int'ah 'et huwa." ²⁸ 'Et 'uhiyúlhni, "Dats'út'en hoh ndi Yak'usda be 'ut'en 'uts'utélh'ilh?" ²⁹ 'Et Sizi ndo búlhni,

“Ndun dune Yak'usda nuhts'u whusayálh'a, 'en nuhwhuba 'alha 'oot'e. Ndi 'i Yak'usda be 'ut'en, 'i 'int'ah.” ³⁰ Et 'uhiyúlhni, “Dant'i 'ut'en 'utalh'ilh? Ilhunuh huwa 'ét'en neba 'uhoonleh, 'et t'eh ts'onoolh'en, 'ink'ez neba 'alha 'ont'e. ³¹ Wheni netsuh whudelhdzulh 'aw dune chahóot'ih ts'ih manna ndus de hainkat, 'i hiya'al. Yak'usda be' dustl'us k'ut 'uk'une'ús duguz bughunek, 'i 'utni, ‘Lhes yak'uz haínkat, 'i bugha íní'ai hiyoo'ah wheni,’ hiyulhni. ³² Et Sizi ndo búlhni, “Soo ts'ah'un na'a 'un whudúsni 'aw Moses 'en bugha ílah ndi lhes yak'uz hainkat, 'i nuhgha yá'ah inle, 'et k'us se'aBá 'en 'ut'en yak'uz whales nuhgha yú'ah. ³³ Ndi Yak'usda bules 'en 'int'ah ndus de yak'uz haínya 'ink'ez yinkak whudune 'ilhuz wheni hiye khútenalh 'i bugha íní'ai.” ³⁴ Et 'uhiyúlhni, “NeMoodihti, k'an whuts'un 'ahoolhyez ndi lhes 'i negha óón'ah.” ³⁵ Et Sizi ndo búlhni, “Si 'ust'ah ndi lhes ndai dune yugha khúna 'i usdli. Ndán sughuyih, 'en 'aw 'ilhuz wheni buye'óolts'ilh ghaít'ah, 'ink'ez ndan si buba 'alha' 'ust'ah, 'aw 'ilhuz wheni ta'hóde ghaít'ah. ³⁶ Et 'un whudúsni, k'an sunulh'en 'et whunts'ih 'aw nuhwhuba 'alha' cha'úst'ah. ³⁷ Ndunnah 'en se'aBá sughá bunínlá, 'en suts'un hútoodelh, 'ink'ez ndan sughuyih, 'aw hubuch'a naóolhu'ah ghaít'ah. ³⁸ Et húkwa ndus de yak'uz ts'ih háya. 'Aw sich'oh hukwa' nuszun tuné' test'en huba ilah, ndun whuz de sútelh'a, 'en nts'oh tula daóotenilh hukwa' ninzun, 'i 'ut'en 'óosdleh wheni whusáya. ³⁹ Ink'ez se'aBá, whuz de sútelh'a, 'en ndunnah sughá buninla 'aw 'ilhunuh whunts'ih yudóonih hukwa cha'nízun, 'ink'ez dek'elh'az dzin t'eh dinabudutéleh. ⁴⁰ Ndunnah Yak'usda buYe' t'einínzun 'ink'ez 'en buba 'alha 'uyint'ah, 'ilhuz wheni hiye khúna 'i hiye'té'tilh, 'ink'ez dek'elh'az dzin t'eh 'en dinabudutéleh. Ndun whuz de sútelh'a njan 'et hukwa' ninzun 'et huwa,” hubúlhni. ⁴¹ Et Lizwif 'en Sizi hich'a yáwhenilhtuk, “Datni hóh 'utni ndi lhes yak'uz ts'ih halts'ut 'i 'ust'ah ni?” ⁴² Ink'ez chah 'uhutni, “Nilh'en lhe'hoont'ah k'una'a yalhtuk! Ndun 'utni, 'en Joseph buye' Sizi 'en 'int'ah, 'ink'ez be'abá chah, be'ama chah, t'ébuznínzun. Nts'e na'a 'utni ndus de yak'uz ts'ih háya ni?” hutni. ⁴³ Et Sizi ndo búlhni, “Aw nuhwheni tah sughu yálhtuk ilah! ⁴⁴ Ndunnah se'aBá sts'ó bunilht'uk, 'en zeh suts'un hutoodelh, 'ink'ez dek'elh'az dzin t'eh 'en dinahubudutéleh. ⁴⁵ Ndun nus honilh'en, 'en ndi 'i hik'une'úzguz ínle, 'Yak'usda 'en ts'iyannah hubodutelh'eh,' 'Et huwa ndunnah se'aBá bughunek hidánts'o 'ink'ez 'i bugha huhodul'eh t'eh, 'en 'uhutenilh suts'un hutedulh. ⁴⁶ Aw se'aBá ya'en hoolah 'et whunts'ih ndun Yak'usda buts'u haínya 'int'ah, 'en zeh ya'en. ⁴⁷ Alha 'un whudúsni, ndunnah si buba 'alha' 'ust'ah, 'en 'ilhuz wule hiye khúna 'i hiyít'i. ⁴⁸ Si 'ust'ah lhes dune ye khúna, 'i usdli. ⁴⁹ Nuhtsuh whudelhdzulh, 'en 'aw dune chahóot'ih ts'ih huwhut'i ínle, 'ink'ez manna 'i hiya'al, 'et whunts'ih yahadla. ⁵⁰ Et ndi lhes yak'uz ts'ih haínkat, 'i, ndan ya'al t'eh, 'aw dahóotsah ghaít'ah. ⁵¹ Ndi lhes yak'uz ts'ih haínkat 'i, 'ilhuz wule wheni hiye khúna, 'i 'ust'ah. Ndunnah ndi lhes ya'al t'eh, 'en 'ilhuz wheni hukhutenalh, 'ink'ez ndi lhes nuhgha té'ah, 'i suyust'e 'int'ah. 'Et ndi bugha ités'ah, 'i hubugha yinkak whudune, 'ilhuz wule wheni hukhutenalh,” húbulhni. ⁵² Et doo chah ndunnah Lizwif 'et lhk'enahudidzut 'et nduhútni, “Nts'e na'a ndun dune buyust'e ts'ute'ulh?” hutni. ⁵³ Et Sizi ndo búlhni, “Ts'ah'un ndun whudusni, 'aw ndun yinkak dune ye' buyust'e cháh'ulh 'ink'ez buzkaí chah cháhntil t'eh, 'et ndi 'ilhuz wheni hiye khúna 'i 'aw chatuzeht'ih hoh 'uht'ah. ⁵⁴ Ndán suyust'e ya'al 'ink'ez suzkaí chah yétnai, 'en 'ilhuz wheni hukhutenalh 'ink'ez 'udek'elh'az dzin t'eh dinábusdutéleh. ⁵⁵ Suyust'e soo ts'uyi 'i 'int'ah, 'ink'ez suzkaí chah soo ts'utnai 'i 'int'ah. ⁵⁶ Ndán suyust'e ya'al, 'ink'ez suzkaí chah yetnai, 'en 'ilhuz wheni sulh 'útet'e 'ink'ez si chah bulh 'útest'ilh. ⁵⁷ Se'aBá, 'ilhuz wheni khuna, 'en whuz de sútelh'a. 'En bugha si chah 'ilhuz wheni khusna. 'Et whuz

na'a ndan sk'ut dune unli, si sugha 'ilhuz wule hukhutena. ⁵⁸ I 'int'ah, ndi soo lhes unli hoh ndus de yak'uz ts'ih haínya. 'Aw manna dulh nduchait'ah nuhtsuh whudelhdzulh 'aw dune chahóot'ih huwhut'i 'ink'ez hiya'al inle, 'et whunts'ih yahadla. Ndi lhes k'an bughu yalhtuk, 'i ndan ya'al, 'ilhuz wheni hukhutenalh," hubúlhni. ⁵⁹ Sizi njan 'et ndutni inle keyah Capernaum huwhútñi 'et luglez dune hodul'eh da.

Lhanah Sizi yugha hoodul'eh hich'a nasdel

⁶⁰ Lhanah yugha hoodul'eh daja hutni hidánts'o hukw'elh'az 'uhutni, "Njan whuneodulh'eh, 'et neba howu whulna k'una'a 'utni. Nts'e na'a buk'úne' 'uztet'en?" ⁶¹ Sizi dich'oh t'éwhunínzun daja ni 'et huwa hubudzi yuh ts'ih hich'a yalhtuk, 'et huwa yugha hoodul'eh huboodulhkut, "Nuhwhuba dzuh 'udusni ih? ⁶² Ink'ez yinkak dune ye' ndoh nts'e whutsuh da usda ts'ih, whuz nadalh nulh'en t'eh, daja ntehzilh? ⁶³ Ndoni 'en 'ut'en yinkak dune 'en 'ilhuz hukhutenalh bugha whu'ah. Dune yust'e yu'alh, 'aw hoonli chahoolah ho' hoont'ah. Ndi khunek be nóhwhulh yalhtuk, 'i Yak'usda buts'u haídankat, 'i 'int'ah 'ink'ez 'i be 'ilhuz wheni hukhutenalh. ⁶⁴ 'Et whunts'ih nuhtah bulunah 'aw nuhwhuba 'alha' cha'hoot'ah." Sizi 'uda t'eooninzun ndunnah hububa 'alha' cha'hoot'ah, 'ink'ez ndun ye 'óotekulh, 'et chah t'eoonínzun 'et huwa. ⁶⁵ 'Et Sizi 'utni, "Et huwa 'un whudúsni, ndunnah se'aBá bugha óoni'ai, 'en zeh sts'un hutédluh ho' 'int'ah," hubúlhni. ⁶⁶ 'Et whuts'un lhanah yugha hoodul'eh hich'a nasdel 'ink'ez 'aw 'o' at highah lhúnasdel. ⁶⁷ 'Et Sizi ndunnah lanezi 'o' at nannah (12) yugha hoodul'eh huboodulhkut, "Nuhwheni chah ih such'a natehdulh hukwa' nahzun?" hubúlhni. ⁶⁸ 'Et Simon Peter ndi yúlhni, "NeMoodihti, ndan simba buts'uztoodelh? Nyun zeh khunek 'ilhuz wheni be ts'úkhuna, 'i ínt'i, ⁶⁹ 'ink'ez neba 'alha' 'int'ah. T'éts'onínzun nyun Christ 'en 'int'ah. Yak'usda 'ilhuz wheni khuna, 'en buYe' 'int'ah!" hiyúlhni. ⁷⁰ 'Et Sizi ndo búlhni, "Alha nuhwheni lanezi 'o' at nanah, 'en lhtahanhóla, 'et whunts'ih nuhtah 'ilhunuh 'en netsudule unli. ⁷¹ Judas Iscariot, Simon buye', 'en bugha yughi yalhtuk hoh 'utni, 'en 'utenilh, ye 'óotekulh t'éwhunínzun 'et huwa 'utni. 'En chah lanezi 'o' at nanah 'ilhunuh butuh 'int'ah.

7

Sizi bulhutsinkah 'aw huba 'alha' cha'hóot'ah Sizi 'en Christ 'int'ah

¹ Njan hukw'elh'az Sizi Galilee yun k'ut zeh hoh nuséya. Lizwif hitzelghelh hukwa' huninzun 'et whuch'a 'aw Judea yun k'ut nónya hukwa cha'nízun. ² Lizwif budzenis whuti, 'et 'ulbun be koo nihúwhulih* chah huwhútñi, 'aw 'et nilhdukw whuz'ai. ³ 'Et bulhutsinkah khunek be' 'uhiyulhni, "Njan huwinyalh 'ink'ez Judea yun k'ut ts'ih inyalh, 'et ndet ngha hoodul'eh ndai 'ut'en bugha ghína 'et honolh'en. ⁴ Ndán ts'iyannah t'einóozin hukwa' ninzun 'aw whu'iz ne'oot'en ghaít'ah. 'Alha hooncha túne' 'int'en t'eh, ndi yun k'ut dune ts'iyannah nyun ngha t'ehonóozin huba 'ohoont'ah!" ⁵ Bulhutsinkah 'en whunts'ih 'aw ndun Christ 'en 'int'ah 'aw huba 'alha' cha'hóot'ah, 'et huwa hoh tune' hiduni. ⁶ 'Et Sizi ndo búlhni, "Sutsuh whudezulh 'awhuz whusachawhulhts'it, 'et nuhwheni nuhwhuts'u whélts'ulh, 'et 'ahoolhyez lhawhúdint'ah. ⁷ Ndi yun k'ut dune 'aw nuhwheni nuhwhuts'u dootnik ghaít'ah, 'et si suts'u hudutnik. Tink'us 'úhut'en ts'iyawh 'et hubugha ndo budúsni, 'et huwa. ⁸ Whute dzenis whuti ts'ih whuz ahdulh. Sughá whunt'ai 'awhuz 'aw lhachaduzusne, 'et huwa 'awhuz 'aw si dzenis whuti ts'ih toosya ghaít'ah," hubúlhni. ⁹ Njan 'et ndubúdani hukw'elh'az

* ^{7:2} Njan bun nehulih huwhútñi, 'et tl'o 'uhulh'ih hukwelh'az Lizwif 'uda Moses bulh dune chahóot'ih ts'e inle ho whúnahulnih. 'Et whutuh 'et Jerusalem 'et hiyulhbun be yah, 'i hoonli ts'ah'un na'a k'us tink'us 'uhóont'ah 'i bugha t'ets'oninzun ts'utni ho' ts'utni.

Galilee yun k'ut 'et inda. ¹⁰ Bulhutsinkah dzenis whuti ts'ih whehandel hukw'elh'az, Sizi dich'oh chah whu'iz 'et whuz whinya, 'aw dune bunah ilah. ¹¹ 'Et nyō dzenis whuti whutuh 'et Lizwif hika ités'en 'ink'ez 'uhutni, "Nts'e 'ut'en ho' 'int'ah?" hutni. ¹² 'Et 'ilhohuwezdel dich'oh dutuh whu'íyaz hoh highu yalhtuk. Bulunah chah 'en unzoo hutni, 'ink'ez bulunah chah 'awundooh ts'iyannah nana'ah, 'et huwa 'en untsi' hutni. ¹³ 'Et 'aw 'ilhunuh whunts'ih ts'et highu yachalhtuk, ndunnah Lizwif moodih hubé hunuljut 'et huwa. ¹⁴ 'Aw 'et dzenis whuti lhuhoolcho bat'en 'uwhét'ilh, 'et Sizi ndoh luglez whucho ts'ih nínya, 'ink'ez dune huboodulh'eh, ¹⁵ 'ink'ez daja ni Lizwif tube huba hooncha 'ink'ez 'uhutni, "Aw dune hoodul'eh ts'ih inda ilah, 'ink'ez nts'e na'a stabe 'o nus lhat t'éwhunínzun?" ¹⁶ 'Et Sizi ndo búlhni, "Ndai be hoonwhudulh'eh, 'i 'aw si si'ilhdzun cha ilah 'int'ah. Ndun whuz de sútelh'a, 'en buts'u haídelts'ut, 'i 'int'ah. ¹⁷ Ndunnah Yak'usda yuk'úne' tet'ilh hukwa' ninzun, 'en t'ehonózin, ndi khunek Yak'usda buts'u haidelts'ut 'i 'int'ah, k'us sich'oh sughunek be yalhtuk, 'et t'ehonózin. ¹⁸ 'Et dune dich'oh khuyanal-tuk t'eh, dich'oh dutéti 'et zeh hukwunúta hoh 'utni. 'Et whunts'ih dune yalhtuk, ndun whuz de yútelh'a, 'en yudutélhti hukwunúta t'eh, 'en ts'ah'un na'a dune unli hó 'utni 'ink'ez tink'us ne'ut'en 'i 'aw bughi yóolah. ¹⁹ 'Aw ih Moses 'en ndi khunek buk'úne'ooht'en, 'i nuhwhutl'aída'ai, 'et whunts'ih 'aw hubuk'uncha'zuht'en, 'ink'ez di ka sutzelhghelh hukwa' nahzun?" hubúlhni. ²⁰ 'Et 'ilhohuwezdel 'uhiyúlhni, "Ntsi' ndúdeh, 'i nyudínda! Ndán nyutuzelhghelh hukwunúta ho' dini?" ²¹ 'Et Sizi ndo búlhni, "Et nats'ulyis dzin 'ilhun 'ut'en, 'i ncha, 'i 'úsdla, 'et nuhwheni tube nuhwhuba hóncha. ²² K'an daja nuhwhudutésnilh 'et hubugha nuní nahzut. Moses, 'en bugha buka dune ahli, 'i óonaht'as ínle. ('Aw Moses 'en bugha zeh ilah, nuhwhutsuh whudelhdzulh, 'en buts'u hawhélts'ut hoh 'uht'en.) 'Ink'ez 'et nats'ulyis dzin 'uskiyaz duneyaz whulih teh, 'o 'at nats'ulyis dzin 'et yuka dune unli, 'i hiyut'as. ²³ 'Et ndúhoont'ah hoh Moses be' dustl'us k'ut butulhúhesde k'ohyis whuch'a, nats'ulyis dzin 'et dzin whunts'ih 'uskiyaz dune whulih teh yuka dune unli hiyóot'as. 'Ink'ez di ka 'et si dune nats'ulyis, 'et dzin dune soo ná'usdla 'et hukwa sulh húnlhuch'e? ²⁴ 'Aw whunulh'en 'et huwa ilah dune ba nahahye, ts'ah'un na'a 'uhoont'ah hukw'una'a zeh dune ba nahoohyeh," hubúlhni.

Bulunah dune Sizi 'en Christ 'int'ah huninzun.

²⁵ Bulunah Jerusalem whut'en 'uhutni, "Ndunnah 'en tulih 'int'ah hituzilhghelh hukwa' huninzun? ²⁶ 'Et njan whunulh'en! Dune ts'iyannah tah usda 'ink'ez hubulh yálhtuk, 'et whunts'ih 'aw dune dachahidusnih. 'Aw whuz na'a cha'hoot'ah whutele ndunnah moodih, 'en t'ehonínzun tulih ndunnah 'en 'alha Christ 'int'ah? ²⁷ 'Et whunts'ih ndunnah 'en nts'ez de haínya t'ets'onínzun, 'et whunts'ih Christ whusaínya t'eh, nts'ez de hainya, 'aw 'ilhunuh whunts'ih t'ehonózin ghaít'ah," hutni. ²⁸ 'Et 'aw 'et nyō luglez whucho dune hoodulh'eh hoh Sizi soo khunek ti be ndo búlhni, "Nuhwheni t'esunáhzun 'ink'ez nts'ez de haíya chah nt'eoónáhzun, 'aw sich'oh sughá ilah whusáya, 'et whunts'ih ndun whuz de há salh'a, 'en soo ts'ah'un 'en unli ho' 'int'ah, 'en 'aw nuhwheni t'enuzuhzun. ²⁹ 'Et 'en buts'u haíya 'et huwa t'enuszun 'ink'ez 'en whuz de ha sálh'a!" hubúlhni. ³⁰ 'Et hukwa hiyóolhchoot hukwa hé't'en, 'et whunts'ih buts'un whudelts'ulh 'awhuz whuchasawhulhts'it, 'et huwa 'aw dachahíyil. ³¹ 'Et 'ilhuhowezdel hubutah lhanah 'en huba 'alha' yint'ah suli 'ink'ez 'uhutni, "Ndun Christ whusaínya t'eh, ndun yenus túlih huwa 'ét'en teh tuné'tet'en? 'Awundooh!" hutni. 'Et huwa 'en Christ 'int'ah huninzun. ³² 'Et ndunnah 'ilhohuwezdel whuz na'a Sizi highu yalhtuk hoh Pharisee hubuduzts'ai, 'et Pharisee 'ink'ez náwhulnuk moodih, nélhghel

whuz whéoobuhalh'a Sizi hiyóolhchoot ka. ³³ 'Et Sizi nt'ewhunínzun 'et huwa 'ilhuhowezdel 'en 'obúlhni, "Awhuz sáyaz tele 'et nuhwhulh 'utest'ilh, 'et 'ink'ez ndun whuz de ha sálh'a, 'en buts'un nátesdalh. ³⁴ Nuhwheni skunúhta 'et whunts'ih 'aw nasóolhtelh ghaít'ah, 'ink'ez nts'e 'ust'ah 'aw nuhwheni whuz toohya ghaít'ah." ³⁵ 'Et Lizwif dich'oh 'ulhódutni, "Nts'e teyalh hoh 'utni? 'Aw nats'óolhtelh ghaít'ah néulhni. 'Udun yun k'ut whut'en, 'en butuz tulih teyalh, whuz Lizwif bulunah hahandel inle, 'ink'ez whuz tulih 'udun yun k'ut whut'en hubodutelh'eh? ³⁶ 'Ink'ez njan neúlhni inle, 'Nuhwheni skunúhta 'et whunts'ih 'aw nasóolhtelh ghaít'ah, 'ink'ez nts'e tesdalh ts'ih 'aw nuhwheni whuz toohya ghaít'ah,' 'et daja ni hoh 'utni?" hutni.

Sizi ndo búlhni, "Ndoni 'en nuhwhuts'u télh'ahl."

³⁷ 'Aw 'et nuhwhújeh cho whutah, 'et 'udek'elh'az dzin, 'et dzin degha nus hooncha. 'Et dzin 'et Sizi hubutah síyin 'ink'ez soo khunekti be hubulh yálhtuk, "Ndán ta'óosde suts'un hutóodelh 'ink'ez tahóotnai! ³⁸ Ndunnah si huba 'alha' 'ust'ah, Yak'usda bughunek 'uk'une'úsduguz ndutni, 'Ndi too, 'i 'ilhuz wheni be ts'úkhutena, 'i 'en buts'u haíteli," hubúlhni. ³⁹ 'Et Sizi ndutni hoh Ndoni bugha hubulh yaílhtuk. Ndunnah 'en huba 'alha' yint'ah, 'en buyédutelts'ulh. 'Aw 'ahoh ilah. Sizi huba whudálhti hukw'elh'az t'eh, 'et nduwhútenilh.

Dune Sizi ndan 'int'ah huninzun hoh lhch'a níhudendel

⁴⁰ 'Et 'ilhuhowezdel hubutah ndi khunek hidánts'o hoh bulunah 'en 'uhutni, "Alha 'i be ndun 'en ndun ye nus whunilh'en bughu yatuk inle 'en 'int'ah." ⁴¹ 'Et bulunah chah 'uhutni, "Ndún 'en Christ 'en 'int'ah." 'Et 'uyoon chah 'uhutni, "Awundooh! Ndunnah Christ 'en Galilee ts'ih ih hatéyah? ⁴² Yak'usda bughunek 'uk'une'úsduguz, 'i ndutni, David buts'uh haídanzut, 'en keyah Bethlehem huwhútni, David bukeyah ínle, Christ whuz de ha téyah," hutni. ⁴³ 'Et huwa ndunnah 'ilhuhowezdel ndun 'en bugha lhch'a nehúdendel. ⁴⁴ Bulunah, 'en hitélhcholh hukwa' huninzun, 'et whunts'ih dachahíyilil. ⁴⁵ 'Et ndunnah nélhghel ndunnah náwhulnuk moodih 'ink'ez Pharisee 'en whuz wheoobuhalh'a, 'en chah hi'et whuz hanahédel hoh hubuhoodulhkut, "Di ka whuz hachaltel?" ⁴⁶ 'Et nélhghel 'uhutni, "Aw whutsuh da 'uyoon dune 'en ndun dune k'una'a yachalhtuk." ⁴⁷ 'Et Pharisee 'uhutni, "Nuhwheni chah nuhwhunan'a ho ih 'udahni? ⁴⁸ Nuwheni moodih k'us Pharisee wheni chah neba 'alha' 'int'ah nahzun ih? 'Awundooh! ⁴⁹ 'Et whunts'ih ndunnah 'ilhuhowezdel luglez whucho, 'et ts'iyawh di chahílah 'uhint'ah 'et huwa ndai Moses yuk'uné'uzguz 'i 'aw beni be t'éhinízun!" hutni. ⁵⁰ 'Et Nicodemus, 'en 'ilhuh 'úlh'ek Sizi yughu ninya inle, 'en chah Pharisee hubulh 'ilhunuh unli hoh dulh Pharisee hubúlhni, ⁵¹ "Wheni neba khunek butulhúhesde 'i 'utni, dune bughunek uzdánts'o 'ink'ez be 'ut'en uznalh'en t'eh, 'et hoh ih whunts'i buba nats'uhoooyeh huba 'uhooont'ah." ⁵² 'Et uhiyúlhni, "Ny়un chah ih Galilee yun k'ut ts'ih haínya inli? Yak'usda bughunek 'uk'une'úsduguz 'i soo cho nilh'en, 'et nts'e nyeni be t'éoonónzin, 'aw 'ilhunuh whunts'ih nus whunilh'en, 'en Galilee yun k'ut ts'ih haínya hoolah!" ⁵³ 'Et 'aw 'et ts'iyannah bukoo ts'ih whenáhidel.

8

¹ 'Et Sizi dzulhyaz Olive hiyulhni, 'i yúk'uz whinya.

Ts'eke dune bulh lubeshi 'úhuleh hoh nahilhútus. Sizi highu hinílhti 'ink'ez tse be hituzelhghelh hutni.

2 'Et 'om bun dzin soo 'uda 'et Sizi luglez whucho ts'ih ninya. Ts'iyanah dune highu nindel. 'Et nátl'adeda 'ink'ez whehabudunilh'e. **3** 'Et whabodulh'eh hoh ndunnah Moses be' dustl'us 'uk'ununa'úsduguz, 'ink'ez ndunnah Pharisee teh, ts'eke dune bulh lubeshi 'uleh hoh nahiyulhtus, 'en soo hubuniz 'et nihínilhti. **4** 'Et Sizi 'uhiyúlhni, "Neoodulh'eh ndun ts'eke 'en dune bulh lubeshi 'uhuleh hoh soo 'et naoobuts'ulhútus. **5** Moses khunek butulhúhesde, 'i butl'aidét'ai, 'i k'ut 'utni, 'Ndunnah ndi lubeshi 'ulh'en, 'en tse be hubuts'uzoolhghelh,' ni. Nyun do 'et hubugha daja dini?" **6** 'Et 'aoonilhka hiyóolhzih hoonliyaz hukwa hik'eóote'ah 'et huka 'uhutni. 'Et Sizi nyuk 'uja 'ink'ez dulasgek be yun k'ut hukw'uné'uzguz. **7** 'Et 'awhuz hiyoodulhkut hoh 'et njan nduk naja 'ink'ez ndo búlhni, "Nuhwheni nuhtah ndan lubeshi chait'ih, 'en 'udechoo tse be yuts'e 'oolh'is," hubúlhni. **8** 'Et doo chah yuk na'uja 'ink'ez doo chah yun k'ut hukw'u ne'úzguz. **9** 'Et ndunnah hodánts'o hoh neyuh ts'ih bugha t'ets'oninzun* wheóobunelhtan hedich'oh chah lubeshi 'uhulh'en hínli, 'ink'ez 'ilhunuh hinli hoh hoonyan 'udetsah hedulh hoh ts'iyawh highu whenáhedel 'ink'ez ndun ts'eke dich'oh zeh Sizi yubut séyin suli. **10** 'Et Sizi nduk na'uja hoh ndun ts'eke whusahiyálhti 'en 'aw huholah honilh'en hoh ndun ts'eke ndi yúlhni, "Ts'eke ndunnah nk'éhoo'ai nts'e whenahedel? 'Aw 'ilhunuh whunts'ih ih mba nahooyeh ghaít'ah?" **11** 'Et ts'eke ndi yúlhni, "Awundooh, 'aw 'ilhunuh whunts'ih huholah." 'Et Sizi ndi yúlhni, "Aw si chah mba nahoosyeh ghaít'ah. 'Et huwa naindalh 'ink'ez 'aw whulh nat whuts'un lubeshi cha'zolh'en!" yúlhni.

Yinkak whut'en didut 'int'ah buba be whét'en 'i unli hubúlhni Sizi

12 'Et Sizi doo chah zeh hubulh yálhtuk hoh ndutni, "Si 'ust'ah yinkak whudune huba be whét'en 'i usdli. Ndán suneyalh, 'en 'aw tsahólhgus yuh hutooya ghaít'ah, k'us ndai be whét'en, 'i higha 'ilhuz wheni hukhutenallh, 'i hitet'i," hubúlhni. **13** 'Et Pharisee 'uhiyúlhni, "Nyun ch'oh khuyanailtuk ho' dini, 'et huwa nghunek daja nedíni, 'i 'aw ts'ah'un cha'ít'ah." **14** 'Et Sizi ndo búlhni, "Nts'ez de háya nt'eoónúszun 'ink'ez nts'e tesyalh chah nt'eoónúszun, 'et huwa daja dusni, si sugha 'alha 'uhoont'ah, sich'oh 'údusni 'et whunts'ih. 'Et nts'ez de háya 'ink'ez nts'e tesyalh nuhwheni 'aw t'eoónuzáhzun. **15** Nuhwheni dune ba nahehyelh, si 'aw dune ba nahusyeh hoolah. **16** 'Et si chah dune ba nahusyeh t'eh, ndi be náhusyeh, 'i ts'ah'un na'a 'int'ah. 'Aw sich'oh zeh ilah 'ust'ah, se'aBá, ndun whuz de sútelh'a, 'en sulh 'int'ah, 'et huwa ndi be dune ba náhesyelh, 'i ts'ah'un na'a zeh 'int'ah. **17** 'Et whuz na'a zeh 'uk'une'úsduguz ndi khunek nuhwhuba butulhúhesde, 'i k'ut hoh ndutni, 'Nanah dune ndet huhon'en lhgha 'úhudeja hoh howu yahulhtuk t'eh, 'et ts'ah'un na'a 'uhoont'ah,' ni hoh 'utni. **18** Sich'oh duba yanahúltuk 'ink'ez se'aBá ndun whuz de sútelh'a, 'en chah suba yalhtuk," hubúlhni. **19** 'Et hiyoodulhkut, "Nyu'aBá 'en nts'e usda?" 'Et Sizi ndo búlhni, "Si 'aw t'esunuzáhzun. 'Ink'ez se'aBá 'en chah 'aw t'echanuzáhzun. Si t'esunáhzun t'eh, se'aBá chah da t'enóohzin wule." **20** Sizi ndi khunek 'i be yailhtuk luglez whucho 'et dune hoodulh'eh da. Nts'e sooneya nahulhdzooh, 'et dune hoodulh'eh. 'Et 'awhuz huba whudezulh whuts'un whezulh, 'et huwa 'aw chahiyílhcholh. **21** 'Et Sizi doo chah ndo búlhni, "Nuhghu tesyalh. Ska itéh'en, 'et whunts'ih nuhwhulubeshi bulh yatáhndlalh, 'et huwa nts'e tesyalh ts'ih nuhwheni chah 'aw whuz toohdelh ghaít'ah." **22** 'Et doo chah ndunnah Lizwif 'ulhódotni, "Ndun dich'oh tulih na'dutuzelghelh? 'Et huwa tulih 'utni, 'Nts'e tesyalh ts'ih nuhwheni chah 'aw whuz toohdelh ghaít'ah,' neúlhni?"

* **8:9** Ndi khunek, "neyuh ts'e hoh bugha t'ets'onínzun", 'i hoonli ts'ah'un na'a k'us tink'us 'uhóont'ah 'i bugha t'ets'oninzun ts'utni ho' ts'untni.

²³ 'Et ndo búlhni, "Nuhwheni ndi yun k'ut ts'ih hahdel, 'et si ndus de háya ho 'ust'ah. Nuhwheni ndi yun k'ut ts'ih hahdel, 'et si 'aw ndi yun k'ut ts'ih haízut ilah ho 'ust'ah. ²⁴ 'Et huwa ndun whudusni nuhwhulubeshi bulh yatáhldah. 'Aw nuhwhuba 'alha' cha'hóot'ah si ndun 'ust'ah 'et hubugha, 'et huwa nuhwhulubeshi bulh yatáhldah," hubúlhni. ²⁵ "Ndan inli ho' nint'ah?" hiyúlhni. 'Et Sizi ndo búlhni, "Ndun whudusni soo 'udechoo whuts'un, 'en zeh 'ust'ah. ²⁶ 'Awhuz tube lhat nuhwheni nuhwhugha howu yatéltuk, 'ink'ez tube lhat nuhwheni nuhwhugha nahutesyeh whuz'ai, 'et whunts'ih ndun whuz de sútelh'a, 'en ts'ah'un na'a 'int'ah. Ndai buts'un whudásts'o, 'et whuz na'a zeh yinkak whudune hubulh yálhtuk," hubúlhni. ²⁷ 'Et whunts'ih 'aw hubeni be t'ehonízun, be'aBá, 'en bugha hubulh yálhtuk ho 'utni. ²⁸ 'Et Sizi ndo búlhni, "Yinkak dune ye' nduk dube dibe' dulhtsi t'eh, 'et t'eh soo ts'ah'un ndan usdli, 'en 'ust'ah t'éoonóhzin. 'Ink'ez 'aw sich'oh duba moodih nasdli ílah, se'aBá nts'e na'a whusodalh'i, 'i khunek zeh be yálhtuk, ²⁹ 'ink'ez ndun whuz de sútelh'a, 'en sulh 'int'ah. 'Ahoolhyez wheni se'aBá hóont'i zeh hoh ne'úst'en, 'et huwa 'aw such'a nachasdak," hubúlhni. ³⁰ 'Et ndi khunek 'i ye yaílhtuk hoh tube lhanah 'en huba 'alha' int'ah suli. ³¹ 'Et ndunnah Lizwif, ndunnah Sizi yuba 'alha' 'int'ah, 'en ndo búlhni, "Sughunek 'óohtun 'ink'ez buk'úne 'uht'en t'eh, 'alha 'uhoont'ah hoh sugha hoodul'eh ahli. ³² 'Ink'ez 'et huwa ndai khunek 'alha' 'int'ah 'i t'enoohzin, 'ink'ez 'i bugha 'aw 'o 'un 'ulhna wahle ghaít'ah." ³³ 'Et 'uhiyúlhni, "Nuhwheni Abraham buts'u hatsánde 'uts'int'ah. 'Aw whutsuh da 'uyoon ba 'ulhna chats'ilah, 'ink'ez di ka ne'díni, nuhwhula na'dutetnih nedíni?" ³⁴ 'Et Sizi ndo búlhni, "Soo ts'ah'un na'a 'un whudúsni, ndunnah lubeshi 'uhulh'en, 'en lubeshi ba 'ulhna hinli. ³⁵ Ndán koo 'ilhunuh 'ulhna unli, 'en 'aw 'ahoolhyez 'et 'usda ílah, 'et whunts'i ndan koo whudune buye', 'en 'ahoolhyez wheni, 'et 'usda. ³⁶ 'Et huwa ndun buYe' lubeshi ch'a nuhwhulanadutnih t'eh, 'et t'eh 'alha 'uhoont'ah 'aw 'o 'un 'ulhna wahle ghaít'ah. ³⁷ T'ewhunúszun Abraham buts'u hágde ahli, 'et whunts'ih sughunek 'aw buka cha'nuhzun, 'et huwa sutuzelhghelh hukwa' nahzun. ³⁸ Ndet se'aBá whusunelhtan, 'et 'un whudúsni. 'Et whunts'ih nuhwheni nuhwhé'abá 'unwhúlhni, hoh teh né'aht'en." ³⁹ 'Et 'uhiyúlhni, "Abraham 'en buts'u hats'ánde ts'inli." 'Et Sizi ndo búlhni, "Abraham 'en buts'ah hágde t'eh, 'en be 'ut'en k'ah zeh da ne'óoht'en. ⁴⁰ 'Et whunts'ih k'an si nts'oh teh 'unuhwhudúsni ts'ah'un na'a 'uhoont'ah hoh Yak'usda ts'un whudásts'o. 'Et whunts'ih nuhwheni sutuzelhghelh hukwa' nahzun. Njan 'et 'aw Abraham be 'ut'en k'ah ilah 'uhoont'ah. ⁴¹ Nuhwhe'abá be 'ut'en k'ah 'uwhulh'en." 'Et doo chah 'uhiyúlhni, "Aw nuhwheni nuwhusulhutzi ilah 'uts'int'ah! 'Ilhunuh ne'aBá 'en Yak'usda unli!" ⁴² 'Et Sizi ndo búlhni, "Yak'usda 'en nuhwhu'aBá unli t'eh, si suk'eoohnts'i wule da, Yak'usda buts'un háya 'et huwa. 'Aw sich'oh sughá ilah whusáya, Yak'usda whusásalh'a. ⁴³ Nts'e na'a nuhwulh yalhtuk, 'aw t'ewhunuzáhzun. Daja nuhwhudúsni 'aw sudóohnts'o hukwa cha'nuzáhzun 'et huwa. ⁴⁴ Netsudule 'en nuhwhé'abá 'int'ah. Ndet 'en hukwa' ninzun, hoh zeh ne'óoht'en hukwa' nahzun. Soo 'udechoo da whuts'un dune ughan unli. 'Aw ts'ah'un 'uhoont'ah hukwa cha'nizun, 'et huwa 'aw ndi khunek 'alha' 'int'ah 'i bughu yoolah. Nts'oh tula ne'duni tink'us na'a zeh yalhtuk, dich'oh duk'una'a 'utni. Ndi whuts'it 'en 'int'ah, 'ink'ez khunek whuts'it, 'i 'en zeh buts'u haídukat 'et huwa. ⁴⁵ 'Et si khunek 'alha' 'int'ah 'aw 'i zeh be yalhtuk, 'et 'aw nuhwhuba 'alha' cha'duzusni. ⁴⁶ 'Aw nuhtah 'ilhunuh whunts'ih si lubeshi 'ulh'en 'úsdli doohtni ghaít'ah. 'Et huwa khunek 'alha' 'int'ah, 'i be 'un whudúsni 'ink'ez, di ka 'et nuhwhuba 'alha' cha'duzusnih? ⁴⁷ Ndunnah Yak'usda budune unli, 'en zeh Yak'usda bughunek hidits'o. Nuhwheni 'aw Yak'usda budune cháhlah 'et huwa bughunek 'aw dóohts'o ghaít'ah," hubúlhni. ⁴⁸ 'Et Lizwif 'uhiyúlhni, "Alha 'i be nts'útni, nyun Samaria whut'en 'int'ah 'ink'ez nts'i nudúdeh 'i

nyudínda!" ⁴⁹ 'Et Sizi ndo búlhni, "Aw ntsi' nudúdeh 'i sughu hoolah hoh, se'aBá 'en délhti, 'et nuhwheni 'aw chasudulhti. ⁵⁰ 'Aw 'uyoón sudóolhti hukwa cha'núszun, 'et 'ilhunuh suba whudutélhti hoonli, 'en naheyelh chah 'int'ah. ⁵¹ Soo ts'ah'un na'a 'un whudúsni, ndan sughunek yoontun, 'en 'aw dahóotsah ghaít'ah." ⁵² 'Et Lizwif 'uhiyúlhni, "K'an 'aw 'et t'éts'onínzun ntsi' nudúdeh 'i nyudínda! Abraham 'ink'ez nus whúnih'en yahadla, 'et whunts'ih né'dini, ndunnah nghunek yoontun, 'aw dahóotsah ghaít'ah díni. ⁵³ Ne'abá Abraham dazsai inle. 'En ba nus 'ilcho hoh ih 'udini? 'Et nus whúnih'en, 'en chah yahadla. 'En chah huba nus 'ilcho ih? Soo ndan inli dini ho' dini?" ⁵⁴ 'Et Sizi ndo búlhni, "Sich'oh duba nadesduti t'eh, sich'oh be núscha 'ants'ih 'int'ah. 'Et whunts'ih nuhwheni ndun nuhYak'usda dáhni, 'en si se'aBá 'int'ah, 'ink'ez 'en sudélhti. ⁵⁵ 'Et nuhwheni 'aw t'echanáhzil, 'et si t'enuszun. 'Aw si t'enuzuszun dusni t'eh, 'et nuhwheni nuhk'una'a whahts'it usdli ho' dutesnilh. 'Et whunts'i ndun soo t'enuszun 'ink'ez bughunek 'ahoolhyez wheni buk'úne 'ust'en. ⁵⁶ Nuhwhé'abá Abraham tube hóont'i whe suts'ó dezulh, 'et whute'ilh. 'Aw 'et whunalh'en 'ink'ez tube whunálhnik." ⁵⁷ 'Et Lizwif 'uhiyúlhni, "Nilh'en cha'hoont'ah teh ne'dini! 'Awhuz skwunlai lanezi (50) nyeyus k'ut ilah, 'ink'ez 'udini Abraham 'uda in'en dini!" ⁵⁸ 'Et Sizi ndo búlhni, "Soo ts'ah'un na'a 'un whudúsni, Abraham whuteleh whutsuh da, 'et 'uda si usdli ho 'ust'ah." ⁵⁹ 'Et ndo búlhni hoh, ts'iyawh tse hiyeni dézgooh, 'i be whusa be' hínalh'uz 'ink'ez hituzelhghelh 'et hukwa. 'Et Sizi hubuch'a untelhú'i 'ink'ez soo hubutah 'et lhunásja hoh luglez whucho 'et tinánja.

9

Dune whuzdli da whuts'un chawhés'en Sizi soo na'yínla

¹ 'Et Sizi uyalh hoh, dune whuzdli da whuts'un chawhés'en yutélh'en. ² 'Et yugha hoodul'eh hiyoodulhkut, "Whuneoodilh'eh ndun dune, ndan simba bulubeshi yugha 'úja chawhés'en hoh whuzdli? Dich'oh k'us be'abá k'us be'ama hubulubeshi k'elha tulih 'uja?" ³ 'Et Sizi ndo búlhni, "Aw dich'oh bulubeshi bugha, k'us be'abá k'us be'ama hubulubeshi hubugha ilah chawhés'en unli. Yak'usda be 'ut'en k'ah bughá t'ewhunoodzeh, 'et huwa 'uja chawhés'en hoh whuzdli. ⁴ 'Awhuz dzenis whét'en hoh, ndun whuz de sútéh'a, 'en hube 'ut'en oolh'en huba 'uhoont'ah. 'Ulh'ek whusawhutélts'ulh 'ink'ez tsahólhgus yuh suli t'eh, 'aw dune 'oot'en ghaít'ah. ⁵ 'Awhuz ndi yun k'ut sída hoh, ndi yun k'ut whudune huba be whét'en 'i usdli." ⁶ 'Et ndúdeja hukw'elh'az yun 'úntezno, buzek too, 'i be whutl'us inla, 'ink'ez ndun dune chawhés'en yuna yé yulhlho, ⁷ 'ink'ez ndi yúlhni, "Nyooz too dez'ai Siloam ts'ih inyalh 'ink'ez ni'nildeh." 'Et ndi khunek Siloam ni, 'et whél'a, ni ho 'utni. 'Et huwa whuz whinya, ni'nelde, 'ink'ez whunilh'en hoh whusanája. ⁸ 'Et ndun hinat whut'i 'ink'ez 'uyoón chah, ndunnah chawhés'en hoh hinalh'en da, 'en 'ulhódutni, "Ndun 'en da hoh úsda 'ink'ez hubuts'udatso inle, 'en ih 'int'ah?" ⁹ Bulunah 'uhutni, "A, 'en 'int'ah." 'Et bulunah chah 'uhutni, "Awundooh, 'ants'ih yunduwhút'en 'int'ah." 'Et ndun chawhés'en inle obúlhni, "A, si 'ust'ah." ¹⁰ 'Et 'uhiyúlhni, "Daínja hoh ho'en suli?" ¹¹ 'Et ndo búlhni, "Ilhunuh dune, Sizi hiyulhni, 'en whutl'us 'ínlá, suna k'ut yé sulhlho, 'ink'ez 'usulhni, 'Ta dez'ai ts'ih, Siloam huwhútni, whuz inyalh 'ink'ez ni'nildeh.' Whuz lhgha diya 'ink'ez nine'lhúde hoh whes'en súli." ¹² Et doo chah hiyoodulhkut, "Ndun dune, nts'e 'ut'en?" "Aw t'éoonuzúszun," hubúlhni. ¹³ 'Et ndun chawhés'en inle, Pharisee bughu hinílhti. ¹⁴ Njan dzin ndun dune Sizi whutl'us 'ínlá 'ink'ez whes'en nayulhtsi, 'et nats'ulyis dzin 'uyínla. ¹⁵ 'Et doo chah zeh Pharisee hiyoodulhkut, "Dáhoont'ah huwa ho'en suli?" 'Et ndo búlhni, "Ndun dune whutl'us 'ínlá, suna k'ut yé whulhlho, hukw'elh'az ni'nelhude, 'ink'ez whes'en

sili.” ¹⁶ 'Et ndunnah Pharisee bulunah 'uhutni, “Ndun dune bugha yailhtuk, 'en 'aw Yak'usda buts'u haínya ilah 'int'ah. 'Aw nats'ulyis dzin hukw'u nucha'ust'en 'et huwa.” 'Et 'uyoon chah 'uhutni, “Nts'e na'a 'uwhutét'ilh, 'aw lubeshi 'ulh'en, 'en huwa 'ét'en túne' óot'en ghaít'ah!” 'Et hubugha lhch'a nihudendel. ¹⁷ 'Et doo chah zeh ndun chawhés'en inle 'uhiyúlhni, “Hó'en nyúlhtsi, 'et huwa 'en bugha daja dini?” “Alha nus whunilh'en 'int'ah,” hubúlhni. ¹⁸ 'Et whunts'ih Lizwif moodih 'aw hububa 'alha' cha'hóot'ah, chawhés'en inle hoh whuzdli 'ink'ez k'an 'et whe'en, 'et huwa be'abá 'ink'ez be'ama 'anih hubúdani, ¹⁹ 'ink'ez hubuhútni, “Ndun 'en nuhye' 'int'ah 'ink'ez whuzdli whuts'un chawhés'en nedúhni, 'ink'ez nts'e na'a k'an whe'en?” ²⁰ 'Et be'abá 'ink'ez be'ama 'uhutni, “T'ets'onízun ndun 'en neye' 'int'ah 'ink'ez whuzdli whuts'un chawhés'en inle. ²¹ 'Ink'ez ndet huwa k'an whe'en, 'ink'ez ndun whe'en yulhtsi, 'aw t'éts'onízun. 'Aw 'uski chailah ho' 'int'ah, oodilhkut da. Dich'oh ts'ah'un na'a 'unwhudóoni.” ²² 'Et be'abá 'ink'ez be'ama t'ehonízun Lizwif moodih 'uda lhgha 'úhudeja ndunnah Sizi Christ 'int'ah, 'uyoon hudáni t'eh, luglez 'et whuch'a tinabunteyolh. 'Et huwa ndun dune be'abá 'ink'ez be'ama Lizwif moodih hube hunuljut. ²³ Njan hunuljut, 'et huwa 'uhutni, “Aw 'uski chah ilah ho' 'int'ah, 'en huboodilhkut daja,” hutni. ²⁴ 'Et doo chah zeh whulh nat ndun dune chawhés'en inle, “Anih,” hiyúlhni, 'ink'ez 'uhutni, “Njan daínja Yak'usda 'en buba whudélhti, 'aw ndun dune 'en ílah, t'ets'onízun lubeshi 'ulh'en 'int'ah 'et huwa.” ²⁵ 'Et ndo búlhni, “Lubeshi 'ulh'en tulih 'int'ah, 'aw t'éoonuzúszun. 'Et 'ilhuh nt'éoonuzúszun, chaoozes'en inle, 'et k'an naitast'en.” ²⁶ 'Et doo chah zeh 'uhiyúlhni, “Danyin la inle? Nts'e na'a hó'en nyulhtsi?” ²⁷ 'Et ndo búlhni, “Uda ndun whúdusni 'et whunts'ih 'aw chasóozulhts'ai, di ka 'et doo chah 'un whudóosni hukwa' nahzun? Soo tuzélhts'ilh hukwa' nahzun ih? Nuhwheni chah ih bugha hodutelhu'eh tehleh hukwa' nahzun ih?” hubúlhni. ²⁸ 'Et soo hoontsi' tune' hiduni, “Nyun 'en yugha hoodul'eh inli! 'Et wheni Moses bulh 'út'en ts'inli! ²⁹ T'ets'onízun Yak'usda 'en Moses yulh yaíltuk ínle. 'Et ndun 'en, 'aw nts'ez de hainya whunts'ih t'ets'onízun,” hiyúlhni. ³⁰ 'Et ndun dune chawhés'en inle ndo búlhni, “Ndun dune whes'en sulhtsi 'et whunts'ih nuhwheni 'aw t'éoonuzúhzun nts'ez de haíya duhni! Tube suba hooncha! ³¹ T'ets'onízun Yak'usda 'aw lubeshi 'ulh'en chaboozílhts'ai. 'Et ndunnah Yak'usda ts'un téni' nilhzun, 'ink'ez buts'u húkwa' ninzun tune' 'út'en, 'en zeh huboozélhts'ai. ³² Soo 'udechoo yinkak 'uhóolya whuts'un 'aw dune chawhés'en hoh whuzdli, 'en dune soo ná'yinla whucha'dilhts'o. ³³ Ndun dune 'en 'aw Yak'usda buts'un ilah 'int'ah t'eh, 'aw hoonli whe ndóneh ghaít'ah,” hubúlhni. ³⁴ “Whuzinli da whuts'un nyun lubeshi 'ulh'en zeh inli! Ndun na'dunízun hoh whuneoodolh'eh hukwa' dini?” hiyúlhni 'ink'ez 'az tináhinino. ³⁵ 'Et Sizi whulh údants'o hoh Lizwif ndun dune tináhinino, hukw'elh'az nayilhti, 'et ndi yúlhni, “Yak'usda buYe' bugha mba 'alha 'uhoont'ah ih?” ³⁶ 'Et dune 'utni, “Moodihti ndan ho' 'int'ah? Busúnilhtun 'et sih suba 'alha 'uhot'e.” ³⁷ 'Et Sizi ndi yúlhni, “Uda ah'en ho' 'int'ah, 'ink'ez 'en 'utni nyulh yálhtuk.” ³⁸ 'Et dune yubut nacháneti 'ink'ez, “SMoodihti, suba 'alha' 'int'ah!” yúlhni, 'ink'ez yuts'u teni' nalhzin. ³⁹ 'Et Sizi 'utni, “Ndi yun k'ut ts'un whusaíya 'et huwa yinkak dune huba nahooyeh ka. Whusaíya, 'et huwa chawhés'en 'en huwhe'en hutele. 'Et ndunnah whe'en, 'en chah chawhés'en hutéle.” ⁴⁰ 'Et bulunah Pharisee yugha hoodul'eh hidánts'o hoh, 'et 'uhiyúlhni, “Wheni chah chats'uwhes'en dini hoh ih 'udini?” ⁴¹ 'Et Sizi ndo búlhni, “Chawhuzeh'en t'eh, nuhwheni 'aw lubeshi nuhwhuba hoolah. 'Et 'uduhni, ‘Nuwheni ts'uwhe'en,’ dahni, 'et huwa lubesh nuhwhuba hoonli.”

10

Sizi hubodulh'eh hoh 'utni, "Si susheep għunli 'ust'ah. Ndunnah soo sulk 'út'en, en se'usheep hinli."

¹ 'Et Sizi ndo búlhni, "Soo ts'ah'un na'a 'un whudúsni, ndan sheep ba nanestl'oo 'aw dáti k'et dáchayal 'ink'ez 'ants'ih nanestl'oo tus telhget t'eh, 'en dune 'undunut'ih 'int'ah. ² 'Et ndan dáti ts'ih dayih, 'en sheep għunli 'int'ah. ³ 'En dáti għunli yuba da'dututih. 'Et t'eh sheep buboozi be hubuka hunih t'eh, hidits'o huwa t'ehinínzun 'ink'ez 'az hiyuntulh'us. ⁴ Tinaóobilh hukw'elh'az, 'et hubutsuh teyih 'ink'ez sheep ts'iyaww hiyunelh'us, high-unek t'ehinínzun 'et huwa. ⁵ 'Et 'ants'ih hoh neya, 'en 'aw hiyuntoolh'as għaít'ah. 'Ants'ih hoh núa 'int'ah 'aw bughunek t'ehinízun 'et huwa hich'a nutsilħdelħ," hubúlhni. ⁶ 'Et Sizi ndi highha hódool'eh ka hubulh náwhulnuk, 'et whunts'ih daja ni hoh 'utni 'aw t'ehonízun. ⁷ 'Et huwa doo chah zeh Sizi ndo búlhni, "Soo ts'ah'un na'a 'un whudúsni, Si susheep ba dáti usdli ho 'ust'ah. ⁸ Ndunnah sutsuh whusahándel, 'en 'undunut'ih 'uhint'ah, 'et huwa 'aw sheep chaboozílħts'ai. ⁹ Si datí 'ust'ah. Ndunnah si sugħa dahúnindel, 'en ts'iyaww hudutejih. Dahúnindel 'ink'ez whuz 'az wheħändel t'eh, tl'o k'ut nahuhóote'alh. ¹⁰ 'Undunut'ih, 'en 'uduntet'ih 'ink'ez dune tuzelħgħelh 'ink'ez tinta oħobutéħħlħi 'et wheni dayih. 'Et si whusáya hoh 'ilhuz wheni hiye khúna 'i 'utet'ilh 'ink'ez ndi 'ilhuz hiye khúna, 'i hiyit'i t'eh, 'aw hoonli whe ndunoodzit għaít'ah. ¹¹ Si nuszoo sheep għusdli 'en 'ust'ah. Sheep għunli unzoo, 'en ye khúna 'i dude'usheep ba yuladutetnih. ¹² 'Et lhuhul'a, 'en 'aw sheep għunli ilah 'int'ah. 'Ants'ih sheep yugħole ka 'ul'a. Sheep 'aw busheep ilah 'uhint'ah, 'et huwa yus whuz de úlgwulh yunilh'en t'eh, sheep hubula dutnih 'ink'ez whetsílhyih. 'Et yus bulunah huboogooh 'et 'ongħun chah hich'a wheyálwus. ¹³ Ndan lhúħul'a, 'en 'ants'ih 'ul'a 'int'ah, 'et huwa sheep 'ants'ih hiba unli 'ink'ez didut bugħo whetsílhyih. ¹⁴ Si nuszoo sheep għunli 'en 'ust'ah, 'et huwa ndunnah sudune t'ebunúszun 'ink'ez didut chah t'ésanínzun. ¹⁵ 'Et whuz na'a zeh se'aBá 'en t'ésunínzun 'ink'ez si chah t'enuszun. 'Ink'ez se'usheep be khúsna 'i huba hubula dutesnih. ¹⁶ 'Uyoo sheep chah 'i 'ust'i. Ndi tah, 'en chahoonli. 'Aw ndi tah ilah. 'En chah whusáboosdleħ huba 'uhoont'ah. Sugħunek hidóots'o, 'ink'ez 'ilho 'ulħus zeh hutele 'ink'ez 'ilħunuh zeh sheep għunli hutέ. ¹⁷ Se'usheep ba be khúsna 'i bula dutesnih 'et huwa be khúsna 'i doo chah naoollhúchoot. 'Et huwa se'aBá tube sk'entsi'. ¹⁸ 'Aw be khúsna 'i dune sugħu yóollħchoot hoolah. Sich'oh zeh huwa tés'alħ. Ndi be khúsna 'i huwa tés'alħ 'ink'ez naitelcholħ, 'et sughá whunt'ai hoh 'ust'ah. Se'aBá 'en 'uja ndi khunek st'l'aída'ai ndi 'ut'en 'oolħen ka," hubúlhni. ¹⁹ Ndi khunek 'i bugħha doo chah Lizwif dich'oh dutah lhch'a nínahudédel. ²⁰ Tube lhanah, 'en 'uhutni, "Ntsi' nudúdeh 'i yudínda! Whusnik ho 'utni, di ka oozélħts'ai?" ²¹ 'Et 'ongħunnah chah 'uhutni, "Aw ntsi' nudúdeh 'i yughudínda, 'en bughunek ilah 'utni. Nts'e na'a ntsi' nudúdeh, 'i dune chawħés'en 'en chah whe'en yutelhtsilh?"

Lizwif, en Sizi 'aw hika cha'nizun

²² 'Aw 'et khi suli. Jerusalem keyah 'et nowħújeh nihoní'ai. 'Et whunahulnii k'ahoondit nahuwhulhtsi huwhúttni. [†] ²³ 'Et luglez whucho bun 'un hayalbun buyah, 'et Solomon bubun 'un hayalbun buyah huwhúttni, hoh whéghah

* **10:16** 'Et ndi 'udechoo 'ulħus Israel buts'u hainde ubúlhni. 'Et ndi 'uyoo 'ulħus 'i yugħu yailħtuk, 'I 'udun yun k'ut whut'en 'uhint'ah. Ndannah 'awħuz Sizi hiyulħcha'dusts'o. 'Et huwa huba 'alha cha'hít'ah. † **10:22** 'Et njan nowħújeh 'et Lizwif whunahulnii 'udayaz inle ho luglez whucho dune untsi' 'en daninya ho tinta' whunilħen. 'Et huwa Lizwif k'andit nahuwhulhtsi. 'Et huwa dahóodelħ 'ink'ez Yak'usda buts'un téni 'uhunoolhdzin.

Sizi uyalh, ²⁴ 'ink'ez Lizwif higha wézdel hoh hiyoodulhkut, "Dahooldzah 'et nech'a nontalh'i. 'Alha hoh Christ 'en 'int'ah t'eh, k'an 'et ts'ah'un na'a nedíni." ²⁵ Et Sizi ndo búlhni, "Uda ndun whudúsni 'et whunts'ih 'aw nuhwhuba 'alha' cha'duzusnih. Ndi se'aBá boozí bugha 'ut'en 'ulh'en, 'i bugha si sugha chah t'éwhunózhzin huba 'uhoont'ah. ²⁶ 'Et whunts'ih nuhwheni 'un whudúsni hukw'un'a 'aw se'usheep ilah 'aht'ah. 'Et huwa ndi 'ut'en 'ulh'en 'i 'aw nuhwhuba 'alha' cha'ít'ah. ²⁷ Si se'usheep t'ébunúszun. Sughunek hidits'o 'ink'ez nusáhunudelh. ²⁸ Ilhuz hiye khúna, 'i bugha iní'ai. 'Aw yachahutésdlah 'ink'ez 'aw dune sula k'éhaboolelh hoolah. ²⁹ Se'aBá, ndan sughá buninla, ts'iyannah sugha ndoh 'int'ah, 'ink'ez ndunnah sudune suli, 'en 'ilhuz sulh 'átet'ilh. 'Aw dune soo 'últus hoolah se'aBá yula k'éhanabutelelh wheni. ³⁰ Si 'ink'ez se'aBá bulh 'ilho zeh nidudli," hubúlhni. ³¹ 'Et doo chah Lizwif tse hiye tuzelhghelh 'i hidílhchoot. ³² 'Et Sizi ndo búlhni, "Se'aBá be 'ut'en k'ah hoonzoo lhat si sugha whunulh'en. 'Ink'ez k'us dant'i ka 'usutelhlik tse be suzoolhghelh hukwa' nuhzun?" ³³ 'Et Lizwif 'uhiyúlhni, "Aw 'ut'en unzoo, 'i ka ilah tse be nts'utuzelhghelh! Nyun 'ants'ih hoh dune inli 'ink'ez Yak'usda ch'a yaílhtuk. Nyunch'oh Yak'usda na'dudil'i, 'et hukwa tse be nts'útuzelhghelh." ³⁴ 'Et Sizi ndo búlhni, "Soo cho whunalhúnih hoh Yak'usda bughunek k'une'úsduguz 'i nuhtlaida'ai hoh ndutni, 'Nuhwheni yak'usda ahli?" ³⁵ T'ets'onínzun 'aw Yak'usda bughunek 'uk'une'úsduguz, 'i k'uyooyis ghaít'ah, 'ink'ez ndunnah Yak'usda bughunek bughi delts'ut, 'en yak'usda hubulhni. ³⁶ 'Et Yak'usda buYe' usdli 'un whudúsni, 'et huwa Yak'usda ch'a yalhtuk dahni hoh sk'ehóoh'ah. Se'aBá 'en 'udun nésunilhti hoh ndi yun k'ut ts'ih sutelh'a. ³⁷ Se'aBá be 'ut'en cha'zúlh'en t'eh, whute, nuhwhuba 'alha' cha'úst'ah. ³⁸ 'Et whunts'ih se'aBá be 'ut'en 'ulh'en t'eh, si nuhwhuba 'alha' cha'ust'ah, 'et whunts'ih ndi 'ut'en 'ulh'en, 'i bugha nuhwhuba 'alha 'uhot'e. 'I bugha nuhwheni be t'éwhunózhzin 'ink'ez nuhwhuba 'alha 'uhót'e se'aBá 'en syudínda 'ink'ez si chah buyudúsda," hubúlhni. ³⁹ 'Et doo chah zeh hiyóolhchoot hukwa 'uhuja hoh Sizi butáhanája 'ink'ez hubula k'ah hanaja. ⁴⁰ Jordan took'oh nyaz ts'ih ndet da John 'udechoo dune too be 'ulh'en inle, whuz whenaja 'ink'ez 'et inda. ⁴¹ Lhanah dune highu nindel 'ink'ez 'ulhódutni, "John 'aw huwa 'ét'en teh nucha'it'il, 'et whunts'ih ndun dune 'en bugha daja dani, ts'ah'un 'udani." ⁴² 'Ink'ez nyoh 'et tube lhanah huba 'álha' yint'ah suli.

11

Lazarus dazsai hoh Sizi nahiyúlhna

¹ 'Ilhunuh dune Lazarus hiyúlhni, keyah whuyaz Bethany huwhútni, 'et whut'en. 'En nduda suli. Bulhtuskah nanah Mary 'ink'ez Martha bulh hizih whut'i. ² Ndun Mary 'en 'uja ínle neMoodihti khe 'i be yuke 'ink'ez butsigha be yuna'ahlde ínle. 'En bulhutsin Lazarus 'en nduda. ³ Bulhtuskah 'en Sizi khunek hits'ó tl'aidá'ai, "NeMoodihti ndun dune buk'entsi', 'en nduda," hiyúlhni. ⁴ 'Et Sizi hoozélhts'ai hoh 'utni, "Aw ndi dada 'ilhuz ye daóotsah ghaít'ah. Njan nduda bugha, 'et hoh Yak'usda buba whudélhti, 'ink'ez 'i bugha Yak'usda buYe', 'en chah ba whudélhti." ⁵⁻⁶ 'Et Lazarus nduda Sizi whulh 'udiúzs'ai hoh Martha, bulhtus chah, 'ink'ez Lazarus chah tube hubuk'entsi' 'et whunts'ih whut'i 'et, nat dzin, 'et naná'el'ai. ⁷ Nat dzin 'et whut'i hukw'elh'az 'et yugha hoodul'eh 'et ndo búlhni, "Doo chah Judea yun k'ut ts'ih uztoodelh," ni. ⁸ 'Et yugha hoodul'eh 'uhiyúlhni, "Rabbi, k'an 'ahoh Lizwif tse be nyotúzelhghelh hukwa' huninzun 'ink'ez di ka whuz natandalh hukwa' ninzun?" ⁹ 'Et Sizi ndo búlhni, "Et 'ilhudzin 'et lanezi 'o 'at nat (12) hukwe'hunít'oh 'uhoont'ah. Ndán dzenis neya, 'en 'aw dughun tooghalh ghaít'ah. Ndi yun k'ut be whét'en, 'i be honílh'en 'et huwa. ¹⁰ 'Et

whunts'ih ndunnah 'ulh'ek nuya t'eh, 'en dughun teghulh, 'aw be whét'en 'i bu'et 'int'ah 'et huwa." ¹¹ 'Et ndo búlhni hukw'elh'az 'et 'utni doo chah, "Ndunnah buk'ets'ints'i Lazarus nanésti 'et whunts'ih buts'u tésyalh 'ink'ez ts'enatelhdzulh." ¹² 'Et yugha hoodul'eh 'uhiyúlhni, "NeMoodihti Lazarus nanesti t'eh, 'et soo na'tetnilh ho 'int'ah." ¹³ 'Et Sizi njan dazsai, 'et howu yalhtuk hoh 'utni. Yugha hoodul'eh, 'en 'ants'ih nanesti 'ink'ez nalyis 'et howu yalhtuk hoh 'utni huninzun. ¹⁴ 'Et Sizi soo ts'et gaih ndo búlhni, "Lazarus dazsai. ¹⁵ 'Et nuhwheni nuhwhuba hoonúst'i 'aw 'et chásdah hoh 'uja. 'Et t'eh nuhwhuba 'alha 'oost'e. 'Et whunts'ih k'an 'aw 'et buts'uztoodelh." ¹⁶ 'Et Thomas, 'en 'ut'adánda hiyúlhni, ndunnah yugha hoodul'eh ndo búlhni, "Wa'ih! Bulh úztoodelh! Wheni chah sih, bulh yats'odlah!" ¹⁷ Sizi whuz whenya 'et nahoo'ai Lazarus whiyahiyalhti whuts'un dit (4) dzin inle. ¹⁸ Njan keyah wheyaz Bethany huwhútni, 'et Jerusalem tube wheghah whuz'ai. Ts'éyalh hoh 'ilhuh (1) hukw'e hunit'oh bat'en 'uhooldzah 'uhoont'ah. ¹⁹ Tube wheghah whuz'ai, 'et huwa lhanah Lizwif highu nindel. Mary 'ink'ez Martha bulh hubulhutsin dazsai 'et hoh hinidoolhya ka 'et huwa highu nindel. ²⁰ 'Et Sizi whuz de úyalh Martha whulh úduzts'ai hoh yududezya. Mary 'en koo 'aw 'et usda. ²¹ 'Et Martha Sizi ndi yúlhni, "SMoodihti, njan sinda inle t'eh, 'aw da sulphtsin dachatésa wule da. ²² 'Et k'an whunts'ih, ndai Yak'usda buts'un kwa' dini, 'i ngha íté'alh, 'et t'éwhunúszun." ²³ 'Et Sizi ndi yúlhni, "Nyulhutsin dinadója." ²⁴ 'Et Martha ndi yúlhni, "T'éwhunúszun 'udek'elh'az dzin t'eh, ts'iyannah dinadutédalh, 'et t'eh 'en chah sih dinadója." ²⁵ 'Et Sizi ndi yúlhni, "Si 'ust'ah dune ts'iyannah dinabudutésdelh 'ink'ez 'ilhuz wheni hiye khúna 'i hubugha ités'alh. Ts'iyannah ndunnah huba 'alha' 'ust'ah, dahúzsai 'et whunts'ih hukhutenalh. ²⁶ 'Ink'ez ndunnah 'awhuz khuna 'ink'ez huba 'alha' 'ust'ah, 'aw dahóotsah ghaít'ah. 'Et mba 'alha 'uhoont'ah ih?" ²⁷ 'Et Martha ndi yúlhni, "A sMoodihti, suba 'alha 'uhoont'ah nyun Yak'usda buYe', Christ, ndun ndi yun k'etéyah, 'en 'unint'ah." ²⁸ Njan 'et ndudáni hukw'elh'az 'et dulhtus Mary yugha nanja 'ink'ez whe'ízyaz 'uyúlhni, "Whuneodulh'eh whusaínya 'ink'ez nka 'oodulhkut." ²⁹ Soo whudants'o ibulh didinya 'ink'ez yuts'un whenya. ³⁰ Sizi 'awhuz keyah wheyaz whuts'un úyalh hoh, ndet da Martha yududezya, 'et zeh 'ut'en. ³¹ 'Et ndunnah Lizwif, hubutah hudélhts'i, hinidélyha wheni, Mary soo 'a ts'ih didinya 'ink'ez 'az whinya, hinilh'en 'et hiyuntezdel 'ink'ez 'ulhódutni, "Ts'un k'ut ts'ih tétsø wheni whuz tezya hoh 'ut'en." ³² Sizi ndet da 'ut'en Mary whuz ninya. Soo yutelh'en ibulh yubut dugwútsi be nenínya 'ink'ez ndi yúlhni, "SMoodihti, njan 'unint'ah inle t'eh, 'aw da sulphtsin dachaítsal wule da." ³³ 'Et Sizi yunilh'en utso, 'ink'ez Lizwif ndunnah hiyulh nudelh, 'en chah hutso hubunilh'en hoh, tube whuts'u desnih 'ink'ez buyégha hoh huba dzuh 'uhooja, ³⁴ 'ink'ez huboodulhkut, "Nts'e wheyalhti?" 'Et 'uhiyúlhni, "Anih, whunolh'en sih!" ³⁵ 'Et Sizi intse. ³⁶ Lizwif 'et 'ulhódutni, "Nulh'en ndulhcho 'i be yuk'entsi!" ³⁷ 'Ink'ez bulunah 'uhutni, "Chawhés'en 'en whé'en yulhtsi ínle, 'aw ih ndun dune 'en chah datétsah whuch'a 'uyooleh ghaít'ah inle?" ³⁸ 'Et Sizi doo chah budzi yuh hoh buba dzuh 'uhooja, 'ink'ez ni suli hoh ts'un k'uz ninya. Njan ts'un k'ut 'et 'an tse whudá'de'ai 'uhoont'ah. ³⁹ 'Et Sizi ndo búlhni, "Ndi tse 'udun dutah'ah!" 'Et Martha dune dazsai bulhtus, 'en 'utni, "SMoodihti, ndun 'aw 'et dit (4) dzin 'adalhte 'ink'ez 'ulhtsun chah suli." ⁴⁰ 'Et Sizi ndi yúlhni, "Aw ih chanyudúsnil inle, si sugha mba 'alha 'uhoont'ah t'eh, 'et t'eh Yak'usda yé dezti 'i tant'ilh?" ⁴¹ 'Et nyoh ts'un k'ut dune wheyudílhti, tse 'udun hidutez'ai. 'Et Sizi nduk yutá'en 'ink'ez 'utni, "ABÁ sudánts'o 'et huwa suchanailya nyudúsni. ⁴² 'Ink'ez t'éwhunúszun 'ahoolhyez wheni soozélhts'ai. 'Et whunts'ih njan 'udusni ndunnah 'ilhuhowezdel njan nahudelhúya, 'et

huwa nyun whuz de sutélh'a 'alha 'uhot'e." ⁴³ 'Et ndudéja hukw'elh'az soo khunekti be yatéltuk, "Lazarus, ndez ínyalh!" yúlhni. ⁴⁴ 'Et ndun dune dazsai tsa k'ez ts'ih hanája. Bula 'ink'ez buke chah 'awhuz naih be híyulhti, 'i be bugha' wésduduz, 'ink'ez dzezoh chah bunen 'awhuz bugha' wésduduz. "Buk'una'ah'uk 'ink'ez bula duhnih!" hubúlhni Sizi. ⁴⁵ Ndunnah Lizwif, Mary yughu nindel inle, Sizi bunalh 'uja 'et huba 'alha' yint'ah suli. ⁴⁶ 'Et whunts'ih bulunah, 'en Pharishee ts'un whehandel 'ink'ez Sizi nts'oh tune' 'ust'en, 'et ndó ba dani. ⁴⁷ 'Et hukwa náwhulnuk bumoodih 'ink'ez Pharishee yahútelhtuk wheni 'ilhúnahuwesdel 'ink'ez 'uhutni, "Nts'e na'a dážtenilh? Ndun dune stabe lhat hooncha tune' 'út'en! ⁴⁸ Whute 'ut'en ts'ilh'i t'eh, ts'iyannah huba 'alha oot'e 'ink'ez Roman whusahádel hoh njan neluglez whucho 'ink'ez njan neyun k'ut chah negha hahóolhchoot, 'ink'ez ts'iyawh yats'óodelh." ⁴⁹ 'Et 'ilhunuh hubutah Caiaphas hiyulhni, 'en 'et naooduzuk wheni náwhulnuk degha nus dezti unli ínle, 'en ndo búlhni, "Aw hoonli t'éwhunuzáhzun! ⁵⁰ 'Aw ih hubuk'ut chanunínulhzut, ts'iyannah ba 'ilhunuh dune zeh dazsai t'eh, 'et t'eh 'o nus soo whutétilh, 'et huwa 'aw neyun k'ut hoolah hole ghaít'ah." ⁵¹ Caiaphas dich'oh ilah ndi khunek yaka ni ntezut, 'et náwhulnuk degha nus dezti unli, 'et naooduzuk huba, 'et huwa whuz na'a nus whunilh'en Sizi 'en 'aw 'et nilhdukw hoh ts'iyannah Lizwif 'et yun k'ut whut'en ba datétsah. ⁵² 'Et 'aw Lizwif hiyúlh dedowh, 'en huba zeh ilah. Ndunnah Yak'usda buzkeh hinli, nts'e hahandel, hoh whut'en, 'en huba chah. 'Et huwa ts'iyawh 'ilho ninaobutélel 'ink'ez 'ilho whut'en dune whutéleh. ⁵³ Soo 'et dzin whuts'un lhahóuleh hituzelhghelh wheni. ⁵⁴ 'Et wheghah ts'ih Sizi 'aw ts'et Lizwif hubutah nuchásyah. K'us yun k'ut 'aw dune chahóot'ih ts'ih whuzih whuz'ai, 'ilhun keyah Ephraim huwhútini, whuz whinya 'ink'ez yugha hoodul'eh tubulh 'et hudálts'i. ⁵⁵ 'Et doo chah Lizwif budzenis whuti ndet da Hubutus Lhuseya huwhútini, 'aw 'et wheghah whudezulh. 'Et huwa lhanah yun k'ut whut'en Lizwif hubuna'udoh hukw'un'a 'uhutenilh wheni keyah whuti Jerusalem ts'ih hunindel. ⁵⁶ Luglez whucho nahudelhuya 'ink'ez Sizi hika ités'en, 'et 'ulhódotni, "Daja nahzun? 'Aw tulih dzenis whuti wheni whusachásyah nahzun ih?" ⁵⁷ 'Et náwhulnuk bumoodih 'ink'ez Pharishee chah, 'uda dune tah khunek butl'aídai Sizi nts'e 'ut'en t'éhonínzun t'eh, 'ahoh ndobadooni, 'et t'eh 'aw 'et hitélhcholh.

12

Soo 'udek'elh'az Sizi Jerusalem ts'ih tezya

¹ Dzenis whuti Hubutus Lhuseya huwhútini 'awhuz lhk'utat (6) dzin whuz'ai, 'et Sizi keyah wheyaz Bethany huwhútini, 'et 'uja Lazarus dazsai hoh yaidlah tah dinaidilhti inle, 'et Lazarus whut'i, whuz lhugha dínya. ² 'Et hulgħha na'tet'alh wheni hiba lhadúja. Martha 'en huba hukw'e'ile. 'Et Lazarus 'en chah hubulh na'ut'alh. ³ 'Et Mary lubot dezbuñ bat'en, k'unuts'újul soo dezti, 'i khe, nard hiyulhni, 'i luboodai be whusayá'ai. 'I be Sizi yuke yulħlħo 'ink'ez dutsigha be yuna'ahde. Bukoo ndulħcho hoh k'unuts'újul be soo whultsun suli. ⁴ 'Et 'ilhunuh yugha hoodul'eh Judas Iscariot, Simon buye', 'en 'utenilh ye 'ótekulh, ⁵ 'en 'utni, "Di ka ndi k'unuts'újul be chá'oohkulh 'ink'ez tel'ennah hubugha chanuzáhdzaih? Tube dezti ho' 'int'ah!" ni.* ⁶ 'Et 'aw tel'ennah huba dátni ilah huwa 'et ndutni. Undunut'ih unli 'ink'ez sooneya zus ndai be yúkat, 'i didut buba niyú'a, 'ink'ez hukwa' ninzun totsuk ndai be yúkat 'i 'ants'ih ye hainá'ah 'et huwa 'utni. ⁷ 'Et Sizi 'utni, "Ndun ts'eke buts'áhachaozah'ak, ndi wheyosuhutelhtelh dzin wheni, 'et yálh'a 'i 'int'ah.

* **12:5** Tel'en buba 'ilhuh yus k'ut yuk'elha 'et'en, 'et 'uneltsuk.

8 Tehul'en 'en 'ahoolhyez nohwhulh 'úhint'ah, 'et si 'ahoolhyez ilah nohwhulh 'útest'ilh." **9** 'Et Lizwif 'en Sizi 'et usda t'éhonanzin hoh, soo tube lhanah 'ilhuhowezdel, 'en whusahándel. 'Aw Sizi 'en bugha zeh ilah, Sizi, 'en Lazarus dinaidilhti inle, 'en huyuntelh'ilh ka. **10** 'Et náwhulnuk bumoodih, 'en chah 'ilhuhowezdel Lazarus 'en chah hituzelhghelh 'et howu yahutelhtuk wheni. **11** 'En bugha tube lhanah Lizwif hube 'ut'en k'ah whuch'a huzdel 'ink'ez Sizi 'en bugha huba 'alha' yint'ah suli.

Sizi Jerusalem lhugha dínya

12 'Et 'om bun dzin lhanah 'ilhuhowezdel, 'en dzenis whuti wheni Jerusalem ts'ih hunindel Sizi hiyúlh údants'o whuz de úyalh hutni 'et huwa.

13 'Ul hidílhchoot 'ink'ez 'i hidelelh hoh hidudezdel 'ink'ez tube cho 'uhutni, "Yak'usda buba whudélti!

Ndun neMoodihti boozí bugha whusaínya, 'en degha nus hoonzoo hubugha whults'ut!

'En Israel buts'u hainde hubudayi cho 'int'ah!"

14 'Et Sizi yeztliyaz hiba whusaílhti 'ink'ez yuk'et'l'adida. 'Et whundúlya hoh ndi 'uda bugha 'uk'une'úsduguz, 'i ndutni,

15 "Zion† whut'en nuhdzi ulhtus ulhtsi!

Nulh'en nuhwhubudayi cho yeztliyaz k'ut usda 'ink'ez nuhts'un úyalh!"

16 'Et 'udechoo hoh Sizi yugha hoodul'eh 'aw hubeni be t'éhonízun 'i bugha. 'Et yak'uz buba whudélti ts'ih, whenája hukw'elh'az 'et whunahelnik ndi bugha 'uk'une'úsduguz 'i 'et ndutni 'ink'ez 'et Jerusalem whuts'un úyalh hoh didut hoh chah hiba ne'úst'en. **17** 'Et ndunnah 'ilhuhowezdel, ndunnah yugha hoodul'eh hoh Lazarus yuka hezya 'ink'ez ts'un k'ut yuhadla tah dinaidilhti hoh hinalh'en inle, 'et howu yawhehunilhtuk. **18** 'Et ndunnah 'ilhuhowezdel hooncha túne' 'ust'en whulh 'úhudants'o 'et huwa 'uhuja hidudezdel. **19** 'Et Pharisee dich'oh 'ulhódutni, "Nulh'en! 'Aw hoonliyaz cha'ts'uhóolil! Ndi yun k'ut dune, ts'iyawh huyúntezdel!"

Bulunah 'udun yun k'ut whut'en, 'en chah Sizi hite'ilh hukwa' huninzun!

20 Ndunnah dune Jerusalem ts'ih hutezdel, 'en hubutah, bulunah Greek cha 'uhut'en. Dzenis whuti 'et Yak'usda ts'un teni 'uhuntehzilh, 'et wheni.

21 Philip, 'en keyah Bethsaida huwhútni, Galilee yun k'ut whuz'ai, 'et whut'en 'int'ah, 'en highu nindel 'ink'ez 'uhiyúlhni, "Wheni chah Sizi ts'ute'ilh hukwa 'uzninzun." **22** 'Et Philip, Andrew yughu ninya 'ink'ez 'uyúlhni, 'ink'ez Andrew Philip bulh Sizi nduhíylhni. **23** 'Et Sizi ndo búlhni, "Aw 'et yinkak dune ye' huba whudutélhti, 'et whusahónzut. **24** Soo ts'ah'un 'un whudúsni, haniyeh 'i bumai 'aw yun k'ut nachanílts'ulh t'eh, dant'ah dich'oh 'et zeh ndutet'ilh. 'Et whunts'ih soo ndi yun k'ut ná'nest'ai t'eh, soo lhai bumai, 'i bugha hanantejeh.‡ **25** Ndán dune ye khuna 'i yuk'entsi' t'eh, 'et t'eh ye khúna 'i tinta ité'alh ho' 'int'ah. 'Et whunts'ih ndán yun k'ut ye khúna 'i buba 'ants'ih yint'ah t'eh, 'ilhuz wule wheni whuz na'a khutena. **26** Ndán suba né'tet'en hukwa' ninzun, 'en suhuntoodelh 'ink'ez nts'e 'ust'ah suba ne'ut'en chah 'et 'uhutet'ilh. 'Ink'ez ndán suba ne'ut'en unli, 'en se'aBá hubudutélhti.

Sizi datetsah howu yalhtuk

27 "K'an 'aw 'et tube suzul ba dzuh neooninzut, 'ink'ez daja doosni simba? Se'aBá njan sts'un whudelts'ulh whuch'a sula 'ineh doosni ih? 'Awundooh! Njan sts'un whudélt's'ulh, 'et wheni whusáya. 'Ink'ez 'udusni, **28** "ABá nyoozi 'o nus dezti ílhütsi." 'Et yak'uz whuts'un khunek huduzts'ai, "Uda soozi dézti

† **12:15** Njan Zion ni, 'et Jerusalem keyah, 'et 'uwulhni. ‡ **12:24** Ndi haniyeh bumai, 'i Sizi Gri dulh ndúlt'ah, 'ink'ez ndi bumai bugha hanáyih, 'i ndunnah buba 'alha 'uyint'ah, 'en 'uhint'ah ni ho 'utni.

'ink'ez doo chah zeh 'o nus dutésti," whutni. ²⁹ Bulunah 'ilhunahuwésdel, 'et nuhúdelhuya 'ink'ez hodánts'o. 'Et ndulhodúttni, "Ditnik desni!" 'Et bulunah, "Lizas yulh yálhtuk hoh 'uwhutni," hutni. ³⁰ 'Et Sizi ndo búlhni, "Ndi khunek duzáhts'ai, 'i 'aw si suba ilah 'uwhutni, nuhwheni nuhwhuba 'uwhutni. ³¹ K'an 'aw 'et yinkak whudune huba nahuteyeh 'ink'ez whutsuh da ndi yun k'ut humoodih, § 'en 'ilhuz 'un hítenoh. ³² 'Ink'ez ndi yun k'ut dibe' sadunintan t'eh, 'et sih soo ts'iyannah suts'un buntelhut'uk."* ³³ 'Et ndutni hoh nts'e na'a datétsah, 'et hobunelhtun ni hoh 'utni. ³⁴ 'Et 'ilhunahuwésdel 'uhiyulhni, "Moses yuk'une'úzguz inle, 'i bugha whulh 'úzdzits'o ndun Christ 'en 'ilhuz khutena. 'Ink'ez dálhti 'udini yinkak dune ye' dibe na'hidóolhtsih huba 'uhoont'ah. Ndán ho' 'int'ah ndan yinkak dune ye'?" hutni. ³⁵ 'Et Sizi ndo búlhni, "Awhuz sayaz whuz'ai 'et ndi be whét'en 'i nohwhulh 'útet'ilh. 'Awhuz ndi be whét'en 'i nohwhulh 'int'ah hoh ahdulh zeh aht'en. 'Et nduht'en t'eh, 'aw tsahólhgus nuhk'éoodoolts'it ghaít'ah. Ndunnah tsahólhgus yuh hédluh 'aw nts'e hédluh t'éhonízun. ³⁶ Dáhooldzah ndi be whét'en aht'i, 'ink'ez nuhwhuba 'alha' 'int'ah t'eh, 'et ndi be whét'en 'i buzkeh téhleh." 'Et Sizi ndo bulhni hukw'elh'az, bughu whenája 'ink'ez buch'a ntelhu'i. ³⁷ Tube 'ut'en uncha 'i bunálh 'alh'en 'et whunts'ih 'aw huba 'alha' cha'ít'ah. ³⁸ 'Et nus whúnoohl'en Isaiah yuk'úne'uzguz, 'i bugha whuz na'a hoh teh ne'whust'en. Njan ndutni hoh 'uk'une'úzguz,

"Moodihti ndi khunek whutl'azdá'ai, 'i ndan zeh buba 'alha yint'ah?

NeMoodihti yé ulhtus 'i ndan ts'un ye nénelhtan?"

³⁹ 'Et huwa huba 'alha' cha'hóot'ah, Isaiah njan chah ndutni 'et huwa,

⁴⁰ "Yak'usda, 'en hubuna be chahuwhé's'en hubulhtsi,
'ink'ez hubudzi chah duts'un yulhtsi.

'Et 'aw hubuna be honóolh'en ghaít'ah

'ink'ez hubudzi be 'aw t'ehonozin ghaít'ah.

'Soo na'buténdlilh huba suts'un nahoolyeh ghaít'ah,' ni Yak'usda."

⁴¹ 'Et Isaiah Yak'usda yé dezti 'i yunalh'en hoh 'et yugha ndutni inle. ⁴² 'Et whunts'ih 'alha 'i be lhanah dune gha ndoh 'uhínt'ah, 'en Sizi huba 'alha yint'ah, 'et whunts'ih 'aw hudooni ghaít'ah. 'Et ndo deja t'eh, Pharisee Lizwif hubuluglez whuch'a 'ilhuz tibuhoneh 'et whehunuljut. ⁴³ 'En dune Yak'usda buch'a 'onus huba délhti. ⁴⁴ 'Et Sizi khunek ulhtus 'i be ndutni, "Ts'iyannah Ndunnah si huba 'alha' 'ust'ah, 'aw si sugha zeh ílah, ndun whuz de sútelh'a, 'en huba 'alha' yint'ah. ⁴⁵ 'Ink'ez ndunnah sunilh'en, 'en ndun whuz de sútelh'a, 'en hinilh'en. ⁴⁶ Yinkak whudune ba be whét'en 'et hukwa ndi yun k'ut niníya. 'Et huwa ndunnah huba 'alha' 'ust'ah, 'aw tsahólhgus yuh hudoolts'i ghaít'ah. ⁴⁷ 'Ink'ez ndunnah sughunek hidits'o 'et whunts'ih huba 'alha' cha'yít'ah, 'aw huba nahoosyeh ghaít'ah. Ndi yun k'ut whudune huba nahutesyeh ílah ka whusáya, hubutelhyih ka whusáya. ⁴⁸ Ndán sts'u desnih 'ink'ez 'aw sughunek chayílhcholh, 'ilhunuh 'en huba nahuteyeh. Ndi khunek be nohwhulh yalhtuk, 'i khunek zeh 'udek'elh'az dzin t'eh be nuhwhuba nahutedeh. ⁴⁹ 'Aw sich'oh zeh ilah yalhtuk. Se'aBá, ndun whuz de sútelh'a, 'en dich'oh khunek yutulhuhézya, 'i stl'aída'ai daja doosni hoh yaoolhtuk 'et wheni. ⁵⁰ 'Ink'ez t'éwhunúszun ndi khunek yutulhuhézya, 'i bugha 'ilhuz be khútina 'i unli. 'Et huwa ndai sich'oh be yálhtuk, 'i nts'e na'a se'aBá sudáni, si chah whuz na'a zeh yalhtuk," hubúlhni.

13

Ndi yun k'ut howu natedalh, Sizi yugha hoodul'eh sshubulh yálhtuk

§ ^{12:31} Ndi yun k'ut humoodih, 'en netsudule 'int'ah. * ^{12:32} Dibe' hidunintan ni, 'et lhalhgus yulhni ho 'utni.

¹ Dzenis whuti ndet hoh da Hubutus Lhuséya huwhútñi, 'et whutsuh da Sizi 'aw 'et buts'uh whúdelts'ulh ba 'et newhúninzut t'éwhunínzun ndi yun k'ut howu teyalh 'ink'ez be'aBá ts'un natedalh. Ndi yun k'ut ndan budune 'en ts'iyawh hubuk'entsi'. Soo nts'e whuts'un hubuk'entsi'. ² 'Et hulgħha na'het'al hukw'elh'az 'uda netsudule Judas Iscariot Simon buye' Sizi ye 'ootékulh hukwa' nizun, yudzi yuh nioode'ai. ³ 'Et Sizi t'éwhunínzun be'aBá ts'iyaituk k'úne' yool'en, 'et yugħa óoni'ai. 'Ink'ez Yak'usda ts'un haínya 'ink'ez Yak'usda ts'un nátedalh 'et chah t'éwhunínzun. ⁴ 'Et na'het'al 'ink'ez yoo 'az ye dune unli 'i 'udúnininla. Lusima ilħchoot hububut neínħibal 'ink'ez yulh ts'ú delħú'oo. ⁵ 'Aw 'et be la'ts'uldeh ts'ih too deínyul 'ink'ez yugħa hoodul'eh hubuke toonagus 'ink'ez lusima yulh ts'ú delħú'oo, 'i be hubuke yuna'ulħdeh. ⁶ 'Et Sizi Simon Peter yugħu ninja hoh 'et Simon Peter ndi yúlhni, "SMoodihti, si chah suke tóona'tangus hoh ih 'int'en?" ⁷ 'Et Sizi ndi yúlhni, "K'an dast'en 'aw nyeni be t'éwhunuzínzun, 'et k'at lih sih t'ewħunonzeħ." ⁸ 'Et Peter ndi yúlhni, "Awundooh! 'Aw suke toonaóongus għaít'ah!" ⁹ 'Et Sizi ndi yúlhni, "Aw too nachainyúsgus t'eh, 'aw sulkh 'ónt'e għaít'ah." ⁹ 'Et Simon Peter ndi yúlhni, "SMoodihti, 'aw suke zeh ilah, sula 'ink'ez sutsi chah too naóongus!" ¹⁰ 'Et Sizi ndi yúlhni, "Ndan buna'ēde, duke zeh toonaōogus huba' hoont'ah. 'Et whunts'ih ndulħcho hoh chadáhtsun hoh aht'ah. 'Et nuhwheni ts'iyawh nuhwhuna'dóodeh 'et whunts'ih nuhtah 'aw ts'iyawh ilah nuhwhuna'déde." ¹¹ 'Et 'uda t'éwhunínzun ndun ye 'ootékulh 'et huwa 'utni, "Aw ts'iyawh ilah nuhwhuna'déde." ¹² Hubuke toonagus 'aw 'et lhadúja hoh, ye dune unli 'i yé naja 'ink'ez hubutah nanátl'adeda, 'ink'ez ndo bülħni, "Dahooja, njan k'an danóħusdla, soo cho ih nuhwheni be t'éwhunúhzun? ¹³ Whuneoodulħ'eh 'ink'ez Moodihti sudħuġni. 'Et 'alha duhni ho' duhni, si 'en 'ust'ah 'et huwa. ¹⁴ 'Et si 'en 'ust'ah dune hodul'eh 'ink'ez Moodihti usdli hoh nuhke toonasíguz, 'et nuhwheni chah whuz na'a nuhwhuke lhuba toonaóohgus huba' hoont'ah. ¹⁵ K'an nuhwhunalh danóħwhusdla whuz na'a nuhwheni chah 'et ndusóolħ'en. ¹⁶ Soo ts'ah'un na'a 'un whudúsni, 'aw ustle, 'en bumoodih yugħa ndoh cha'ít'ah. 'Et whuz na'a zeh khunek na'a 'aw ndan yugħatéħla yugħa ndoh cha'ít'ah. ¹⁷ 'Et nuhwheni be t'éwhunáhzun t'eh daja nuhwhudúsni, 'ink'ez danwhúsdla, 'et nuhwheni chah whuz na'a 'aht'en t'eh, 'et tube hooteħti. ¹⁸ 'Aw soo ts'iyawh ilah nuhwhugħa 'et ndudúsni. Ndan 'utaháobála, 'en t'ebunúszun. 'En 'utaháobála, 'et huwa Yak'usda bugħunek i'uk'une'usduguz k'ut dawħu tenilh 'et hubugħa njan ndutni, 'Ndan lħes sulħ ī'al, 'en sch'a nidenya hoh sazoolħgħelħ hukwa' ninzun.' ¹⁹ Njan 'et ndo whútenilh whutsuh 'et nuhwhudúsni. 'Et ndúħooja t'eh, 'et t'éwhunóħzin, 'et ndan usdli, 'en 'ust'ah. ²⁰ Soo ts'ah'un nuhwhudúsni ndan whuz na'a, 'en budzi yuh hoh hiyílħchoot t'eh, si chah suhħilħchoot hoh 'uhoont'ah. 'Et Ndan budzi yuh hoh sħilħchoot, 'en ndun whuz de sútelħ'a, 'en chah hiyílħchoot hoh 'uhoont'ah." ²¹ 'Et Sizi njan ndudáni hukw'elh'az buyégha hoh buba dzuh 'uħħooja. 'Et hubulh yátelħtuk 'ink'ez njan ndo bülħni, "Soo ts'ah'un nuhwhudúsni 'ilħunuh nuhtah 'en se'óotekulh." ²² 'Et yugħa hoodul'eh ts'iyawh lhahunul'en k'us ndan simba 'uyúlhni 'aw nt'ēħonízun. ²³ 'Et 'ilħunuh yugħa hoodul'eh, Sizi k'us yúk'entsi' soo yuzih k'ut usda, ²⁴ 'et Simon Peter yuba nálħni hoh Sizi yoodolħkut, soo ndan simba ndi 'uyúlhni yugħu yalħtuk 'et huwa. ²⁵ 'Et ye chanenti 'ink'ez 'uyúlhni, "SMoodihti, ndan ho' 'int'ah?" ²⁶ 'Et Sizi ndi yúlhni, "Ndan ndi lħesyaz toonasíai 'ink'ez butl'ayá'ai, 'en 'int'ah." 'Ink'ez lħesyaz toonayuz'ai 'ink'ez Judas Iscariot Simon buye', 'en yutl'ayá'ai. ²⁷ 'Et ndi lħesyaz yutl'ayá'ai hoh 'aw 'et Satan ye ghínya. 'Et Sizi ndi yúlhni, "Ndet da 'uwhutanlilh, soo 'ah lhaóodinleh!" ²⁸ 'Et 'ongħunnah ts'iyawh ndun Sizi

yugha hoodul'eh, 'en dant'i ka 'et ndi yulhni 'aw t'éhonízun. ²⁹ Bulunah, 'en 'uhuninzun Judas 'en sooneya zus nuyá'a 'et huwa ndi dzenis whuti wheni buka nudzun, 'i yoket ka ndi yúlhni. K'us tel'en teh hoonliyaz hubugha 'oo'ahl ka ndi yúlhni huninzun. ³⁰ 'Aw 'et lhesyaz yílhchoot ibulh, 'ahoh 'a tsih 'az whinya. 'Aw 'et tsahólhgus 'ohoont'ah. ³¹ 'Az whénya hukw'elh'az 'et Sizi 'utni, "Aw 'et yinkak dune ye' buba whudélti 'ink'ez 'en bugha Yak'usda buba whudélti. ³² 'En bugha Yak'usda buba whudélti t'eh, 'et Yak'usda dich'oh chah yinkak dune ye' soo 'ahoh 'et yuba whudutélhti. ³³ Suzkehkah 'aw sa ilah nohwhulh 'utést'ilh. Suteh'ilh hukwa' ntehzilh, 'et nts'eh na'a Lizwif hubudáni, whuz na'a nuhwheni chah nuhwhudúsni, nts'e tésyalh ts'ih 'aw nuhwheni chah sulh tóohdelh ghaít'ah. ³⁴ 'Ilho khunek k'an 'i nuhwhutl'adá'ai 'ink'ez ndi 'i 'int'ah, ts'iyawh lhk'eoohdutsi'. Nts'e na'a si nuhk'esi', 'et whuz na'a zeh nuhwheni chah lhk'eoohdutsi'. ³⁵ Ndi be lhk'ezdutsi' 'i nuhtah hoonli t'eh, 'i bugha sugha hoodul'eh ahli ts'iyannah t'éhonóozin." ³⁶ 'Et Simon Peter yoodulhkut, "Moodihti, nts'e tanyalh?" 'Et Sizi ndi yúlhni, "Nts'e tesyalh ts'ih, 'aw k'an suntonya ghaít'ah, 'et whunts'ih nk'at lih, suntanyalh." ³⁷ 'Et Peter ndi yúlhni, "Moodihti, 'et di ka k'an 'et 'aw nyun toosya ghaít'ah? Be khúsna, 'i whunts'ih nyun mba bula dutesnih!" ³⁸ 'Et Sizi ndi yúlhni, "Alha ih be khína, 'i suba bula dutatnih? Soo ts'ah'un na'a nyudúsni ligok dune 'uduténih whutsuh, tat 'et t'ésunuzínzun dutanilh."

14

Sizi yugha hoodul'eh ndo búlhni, "Si sugha zeh se'aBá buts'un téhdulh."

¹ "Khun teh nuhwhudzi ndóoda gunih. Yak'usda nuhwhuba 'alha 'int'ah, whuz na'a si chah nuhwhuba 'alha 'oost'e. ² Se'aBá bukeyah lhat koo whuzzla hoh 'ohoont'ah. 'Aw 'alha cha'hoot'ah t'eh, ndun whudóosni da. Whuz tesyalh nuhwhuba lhawhúdutesdleh wheni. ³ Whuz lhadíya 'ink'ez nuhwhuba lhawhúdussla t'eh, doo chah zeh whusanátesdalh 'ink'ez ts'iyawh nanwhutelhúchulh, ndet sída, 'et si sulh 'óoht'e. ⁴ 'Ink'ez nts'e whéya ts'ih 'ink'ez nts'e ti whého'a 'et t'éwhunáhzun." ⁵ 'Et Thomas yoodulhkut hoh 'uyúlhni, "Moodihti, nts'e tanyalh 'aw nt'ets'onízun, 'ink'ez nts'e na'a whuz ti nt'ets'ontézin?" ⁶ 'Et Sizi ndi yúlhni, "Si yak'uz ti, 'ink'ez khunek 'alha' 'int'ah 'i chah usdli. 'Ink'ez 'ilhuz wheni be ts'ukhuna, 'i chah 'usdli. 'Et huwa 'aw 'ilhunuh whunts'i se'aBá yuts'un tooya ghaít'ah, si sugha zeh 'et ndutenilh. ⁷ Si t'ésunahzun inle t'eh, 'et se'aBá chah da t'enóohzin wule. 'Et k'an whúts'un, 'en 'aw 'et t'enahzun 'ink'ez ah'en chah áhja." ⁸ 'Et Philip ndi yúlhni, "Moodihti, nye'aBá bunenilhtun 'ink'ez uznoohl'en, 'aw 'et zeh hukwa' uzninzun." ⁹ 'Et Sizi ndi yúlhni, "Philip, lhe'hóoldzah nohwhulh 'úst'en, 'et 'awhuz ih t'ésunuzínzun? Ndán sunalh'en, 'en se'aBá chah hinalh'en. 'Ink'ez di ka, 'Nye'aBá bunenilhtun,' díni? ¹⁰ Si se'aBá buyudúsda 'ink'ez se'aBá chah suyudínda. 'Et 'aw ih mba 'alha cha'hoot'ah? Khunek be nohwhulh yálhtuk 'i 'aw si sughunek ilah 'int'ah. Se'aBá ndun suyudínda, 'en ndi 'ut'en 'uyulh'en 'en 'int'ah. ¹¹ Nuhwhuba 'alha 'uhot'e si se'aBá buyudúsda 'ink'ez se'aBá 'en suyudínda. 'Et nuhwhuba 'alha cha'hoot'ah t'eh, ndi 'ut'en ndai 'ulya, 'i bugha si sugha nuhwhuba 'alha 'uhot'e. ¹² Soo ts'ah'un na'a ndan nuhwhudúsni, ndan buba 'alha 'ust'ah, 'en ndi 'ut'en ndai 'ulh'en, 'i, 'en chah 'uhitelh'ilh. 'Et si se'aBá buts'u nátesdalh 'et huwa si 'ut'en 'ulh'en, 'i, 'o nus 'ílhcho 'ut'en, 'i, 'uhiyoolh'en. ¹³ 'Ink'ez ndai si soozí buka' dahni 'i hoh nuhwhuba né'test'en. 'Et huwa se'aBá 'en buYe' buba whudóolhti. ¹⁴ Ndai si soozí buka' dahni, 'et nuhwhuba 'uwhutesdlilh. ¹⁵ Nuhwheni sk'ehetsi' t'eh, ndai ndi khunek nuhLa'tet'ilh, 'en nuhwhugha itélhtelh, 'et buts'u hukwa' doosni. ¹⁶ 'En wheni nuhLa'tet'ilh, 'en nuhwhugha itélhtelh, 'et buts'u hukwa' doosni. ¹⁷ 'En

Ndoni 'int'ah. Ndai khunek 'alha 'int'ah, 'i zeh buts'u haíduits'it. Ndi yun k'ut whudune* 'aw bubení be t'ehinízun, 'et huwa 'aw huyóolhchoot ghaít'ah. 'Et nuhwheni t'enahzun, nohwhulh 'int'ah, 'ink'ez nuhyudutélts'ulh. ¹⁸ 'Aw ts'unuh ahli li'aht'ah hoh nuhghu toosya ghaít'ah. Nuhts'u tóosya. ¹⁹ Dzuh sayaz inle, 'ink'ez yinkak whudune, chasátes'il, 'et whunts'ih nuhwheni suntelh'ilh. Si khusna 'et huwa nuhwheni chah khutehna. ²⁰ 'Et dzin t'eh, 'et t'ewhunohzin si se'aBá buyudúsda 'ink'ez se'aBá chah syudínda 'ink'ez 'o 'un nuhwheni chah nuhyudusda. ²¹ Ndan khunek 'et nidéla 'i yuk'úne' 'ut'en, 'en sk'entsi' 'uhint'ah. 'Ink'ez ndan sk'entsi', se'aBá chah buk'etesi', 'ink'ez si chah buk'etesi' 'ink'ez ndan usdli 'et t'ehonozin huboolhtsilh." ²² 'Et Judas, 'aw Judas Iscariot 'en ilah, 'en Sizi ndi yúlhni, "Moodihti, nts'e na'a 'ohoont'ah hoh nyun nyugha t'ets'onózin neba 'uw hutánlilh, 'et whunts'ih yinkak whudune, 'en nyun nyugha 'aw t'éhontészin dini?" ²³ 'Et Sizi ndi yúlhni, "Ndunnah sk'entsi', 'en sughunek yootetun. 'En se'aBá buk'etesi' 'ink'ez hubulh 'útet'ilh 'et huwa si bulh hubutah óduke. ²⁴ Ndan sk'echaítsi', 'aw sughunek hik'unucha'ust'en. 'Ink'ez ndi khunek nuhwheni dahts'o, 'i 'aw sich'oh sughunek ilah 'int'ah. Se'aBá, whuz de sútelh'a, 'en bughunek 'int'ah. ²⁵ 'Awhuz nuhtah 'ust'ah hoh njan 'et nuhwhudúsni. ²⁶ 'Et nuhLa'ut'en, 'en Ndoni 'int'ah, 'en si soozí bugha se'aBá 'en nuhts'ítelh'alh, ts'iyaintsuk whunohodutilh'eh 'ink'ez daja nuhwhudáni 'et soo cho whunalhúnih chah nuhwhutélhtsilh. ²⁷ Be nedzi dezghel, 'i nuhghu nenánust'ai. 'I sich'oh be sudzi dezghel, 'i nuhgha ní'ai. Ndi be nedzi dezghel nuhgha ní'ai, 'i 'aw yinkak whudune nuhgha húyu'ah, 'i 'aw yulh nduchaílt'ah ho' 'int'ah. Khun teh nuhdzi úndooda 'ink'ez noohlújut gunih! ²⁸ Sudahtso hoh 'un whudúsni. 'Aw 'et nuhghu tesyalh 'ink'ez nuhts'u tóosya. Se'aBá 'en sughanus dezti 'et huwa 'en buts'u nátesdalh, 'ink'ez sk'ehtsi' t'eh, k'an daja nuhwhudáni 'et huwa whunóolhnik. ²⁹ 'Ink'ez hoh teh ne'whutet'en, k'an nuhwhudáni. 'Et t'eh whusawhélts'ut t'eh, si sugha nuhwhuba 'alha 'uhot'e. ³⁰ 'Aw dzuh sayaz 'o 'un nohwhulh yaóolhtuk ghaít'ah. Ndi yun k'ut humoodiht'az de úyah 'ink'ez si sugha 'aw ntsolyaz 'i whunts'ih buch'a chayílah 'et huwa. ³¹ 'Aw 'et didahdelh, 'aw 'et njan huwuztoodelh, 'et huwa yinkak whudune t'éhonózin se'aBá buk'esi' 'ink'ez nts'oh tula khunek stl'aidan'ai, hoh tune'út'en ne'úst'en.

15

Sizi yugha hoodul'eh hubodulh'eh nts'e na'a mai chun buyooschum buts'u haínulhyeh, 'et whuz na'a zeh yugha hoodul'eh hiyulh zah oot'e. 'Et hubugha hubodulh'eh.

¹ "Soo mai chun 'i 'ust'ah 'ink'ez se'aBá 'en mai k'et huwunli unli, ² Ndunnah si sugha 'uzooschum unli, 'en 'aw bumai hoolah t'eh, 'et buts'u haídule, 'ink'ez ndunnah bumai lhai, 'en soo 'obulh'en bumai lhai wule ka. ³ Ndi khunek be nohwhulh yalhtuk, 'i be 'uda nuhwhuna'dede hoh 'aht'ah. ⁴ Nuhwheni syudoolhúts'i 'ink'ez si chah nuhyudóosda. 'Uzooschum mai chun bunída'a t'eh, bumai whutéleh. 'Et whuz na'a zeh nuhwheni nuhwhugha 'alha 'ohoont'ah. Si syudelhúts'i t'eh, 'et zeh nuhmai whutéleh. ⁵ Si mai chun lí'nust'ah 'ink'ez nuhwheni 'uzooschum lí'aht'ah. Ndunnah si syudínda 'ink'ez si chah buyudúsda, 'en zeh bumai lhai téleh. 'Aw si su'et, 'aw hoonliyaz 'uhuhoooleh ghaít'ah. ⁶ Ndunnah si syudínda ilah, 'en 'uzooschum k'una'a k'uhídut'us 'ink'ez n'un hidutulht'oh, 'et dugi, 'et nduhínt'ah. 'Uzooschum ts'iyawh nahidulhdzooh 'ink'ez tsuh hidulhkuk 'ink'ez hidélhk'un. ⁷ 'Et si suyudelhúts'i

* **14:17** Ndan ndi yun k'ut Yak'usda huba 'alha cha'ít'ah. 'En 'o bulhni bughu yalhtuk. † **14:30** Ndi yun k'ut humoodiht, 'en netsudule 'int'ah.

'ink'ez sughunek nuhyuh dez'ai t'eh, 'et ndet hukwa' nahzun, 'et ts'iyawh nuhwhuba 'et nduwhuténih. ⁸ Ink'ez mai lhai nuhwhuts'u hánulhyeh t'eh, 'et huwa se'aBá 'en buba whudóolti. 'Et huwa sugha hoodul'eh wahle. ⁹ Se'aBá 'en si sk'entsi'. 'Et whuz na'a zeh nuhk'esi', 'et huwa be nuhk'esi' 'i bulh zeh 'ooht'e. ¹⁰ Se'aBá nts'e na'a suba lhuhézya buk'úne' zust'en 'ink'ez yé sk'entsi', 'i chah bulh 'utést'e. 'Et whuz na'a zeh khunek nuhtl'adála 'i buk'úne' 'aht'en t'eh, 'et huwa be nuhwhuk'esi', 'i bulh 'ooht'e. ¹¹ K'an njan nuwhudúsni, 'et be hónust'i, 'i be hoonáht'i t'eh, 'et hoonáht'i k'et 'aw 'o 'un 'ooht'e ghaít'ah. ¹² Ndi sughunek nuhtl'adáai 'i ndutni, 'ilho ahli hoh nts'e na'a nuhk'esi', whuz na'a zeh lhk'eoohdutsi'. ¹³ Ilhunuh dune yuk'entsi' buk'uz dazsai t'eh, 'aw 'o 'un ye búk'eoots'i' hoolah. ¹⁴ Ink'ez khunek nuhtl'adáai 'i buk'úne 'aht'en t'eh, 'et nuhwheni sk'entsi' ahli. ¹⁵ Aw 'o 'un sunane'uht'en chanuwhuduzúsnih. Hubunane'hut'en 'en bumoodih nts'oh tune' 'ut'en, 'aw t'éhonízun. Si nts'oh tula se'aBá bugha whudáts'o, 'et soo ts'iyawh whún whunelhtan, 'et huwa sk'ehtsi' nuhwhudúsni. ¹⁶ Aw nuhwheni 'utahachásulhtel. Si lhtahánhola toohdelh 'ink'ez mai hanóolhyeh 'ink'ez nuhmai 'ilhuz wheni 'óot'e, 'et huwka 'et ninwhunila. 'Et huwa se'aBá ndai si soozí bugha buts'un hukwa' dahni, 'i si nuhgha íyoo'ah. ¹⁷ K'an nuhwhudúsni, ts'iyawh lhk'eoohdutsi'. ¹⁸ Ndi yun k'ut whudune nuhts'u hudutnik t'eh, whunalhunih nuhwheni nuhts'o dutetnik whutsuh, 'et 'uda si sts'u hudutnik inle. ¹⁹ En buluh ahli t'ah, 'et da nuhk'ehootsi' wule t'eh, nuhwheni chah hubutah aht'ah 'et huwa. 'Et whunts'ih nuhwheni 'utáhanhóla, 'ink'ez 'aw 'o 'un bulah cháhlah, 'et huwa yinkak whudune nuhts'u hudutnik. ²⁰ Et huwa daja nuhwhudusni whunalhunih, 'aw hubunane'hut'en, 'en dumoodih gha ndoh cha'ít'ah. Si dzuh nusúhulhdzut t'eh, nuhwheni chah dzuh nunóhotelhdzut. 'Et sughunek hik'úne' 'ust'en t'eh, nuhwheni nuhghunek chah hik'úne' oot'en sih. ²¹ Et nuhwheni sudune ahli, 'et huwa hoh teh ne'nohuholh'en, ndun whuz de sútelh'a, 'aw t'éhinizun 'et huwa. ²² Aw si whusáchasyal 'ink'ez hubulh yáchalhtih t'eh, lubeshi 'ulh'en hinli 'aw hukwa t'éhonózin ghaít'ah. 'Et k'an whuts'un hubulubeshi 'aw nuhínoohl'i hoolah. ²³ Ndunnah sts'u dutnik, se'aBá 'en chah hits'u dutnik hoh 'uhint'ah. ²⁴ Ndi 'ut'en 'ulh'en 'i 'aw 'uyoon cha'yulh'en, 'i bunalh cha'whuslel t'eh, 'et t'eh lubeshi 'ulh'en hinli 'aw da t'éhonózin. 'Et k'an 'ut'en 'ulh'en, 'i hinalh'en, 'et huwa si 'ink'ez se'aBá bulh nets'u hudutnik. ²⁵ Ink'ez ndi Yak'usda bughunek buba 'uk'úne'úsduguz 'et ndutni, "Aw hoonliyaz huwa ilah sts'u hudutnik." Daja ni k'an 'aw 'et ne'whust'en. ²⁶ Et whunts'ih nuhLa'ut'en, Ndoni, ndai be 'alha 'uhoont'ah 'i buts'u haídelts'ut, 'en 'int'ah, se'aBá buts'un 'en nuhts'un telh'alh, 'en whusainya t'eh, si sugha ts'iyawh whun whunóolhtun, se'aBá yuts'u haínya 'et huwa. ²⁷ Ink'ez nuhwheni chah si sugha 'uyoon whúbuntelhtun, soo 'udechoo da whuts'un sulh 'aht'en 'et huwa."

16

Sizi yugha hoodul'eh 'en nihínudelh hinli, 'et huwa ndi yun k'ut whut'en dzuh nubotelhdeh, 'et huwa 'Óbulhni.

¹ 'Et Sizi 'o 'un ndo búlhni, "Nuhwhuba 'alha' hoont'ah doo ka si whuladoothnih, 'et 'un whudúsni. ² Luglez 'et chah tinan whuts'unooyoot. 'Aw 'et whuz de whudezulh, 'et t'eh ndunnah nuhteghan Yak'usda ba 'uhut'en huntezilh. ³ Si 'ink'ez se'aBá bulh t'éhonízun 'et huwa ne'nohoholh'en.

⁴ 'Et 'uda 'un whudáni, 'aw 'et ne'nohoholh'en t'eh, 'et whunaoohlúnih. Nohwhulh 'ust'en inle 'et huwa 'aw nduchah nuhwhudusnil. ⁵ K'an ndun whuz de sútelh'a, 'en buts'un nátesdalh, 'et whunts'ih 'aw 'ilhunuh nuhtah nts'e tésyalh 'et hukwa chasuzoodúzulhkut. ⁶ 'Et njan 'un whudúsni, 'et huwa nuhwhudzi tso be dézbun, ⁷ 'et whunts'ih khunek 'alha' 'int'ah 'i 'ún whudusni,

nuhghu natesdalh, 'et nuhwheni nuhwhuba whutézoo. 'Aw whenáchasdal t'eh, nuhLa'tet'ilh, 'en 'aw nuhnts'un tooya ghaít'ah. Whenásja t'eh, 'et 'en nuhnts'un télh'ah. ⁸ 'Et whusaínya t'eh bubeni tah dez'ai 'i bugha yinkak whudune lubeshi 'uhulh'en hinli t'éhonózin. 'Ink'ez ndai ts'ah'un 'int'ah 'i 'ink'ez Yak'usda ye náhezya 'i chah 'i bugha t'éhonózin. ⁹ Si sugha 'aw huba 'alha cha'hót'ah 'et huwa hubunah t'ewhunoolhzech lubeshi 'uhulh'en hinli. ¹⁰ Se'aBá buts'un nátesdalh 'ink'ez 'aw 'o 'un sooh'en ghaít'ah. 'Et 'i bugha ndai ts'ah'un 'int'ah 'i* Ndoni, 'en bubut'ewhunoolhzech. ¹¹ Ndi yun k'ut humoodih 'en† 'uda buba nahezya, 'et huwa ndi be náhudeh 'i ndi yun k'ut whudune, Ndoni 'en whebunoolhtun, 'en chah whuz na'a zeh buba nahutedeh. ¹² 'Awhuz tube lhat nuhwhudutésnilh whuz'ai, 'et whunts'ih k'an 'aw whull whuhiyin, ghaít'ah. ¹³ 'Et Ndoni, ndun khunek 'alha' 'int'ah 'i buts'u haídults'it, 'en nuhyudánde t'eh, 'en ndi khunek 'alha' 'int'ah, 'i nuhwheni tah nído'o'ah. 'Et ndi 'i be 'ut'en 'int'ah; 'aw dich'oh bughunek be ilah nohwhulh yátelhtuk, ndet whudánts'o, 'et zeh whunoh untilhtun, 'ink'ez nts'oh teh ne'whutet'en, 'et chah t'ewhunáhzun nuhwhutelhtsilh. ¹⁴ Se'ut'en k'ah ts'iyawh whútalhchulh 'ink'ez whunóhuntelhtun, 'et si suba whudóolhti. ¹⁵ Ts'iyaituk ndai se'aBá be'ilhdzun yinli, 'i si se'ilhdzun 'int'ah. 'Et 'un whúdusni Ndoni 'en ndai se'ut'en k'ah unli, 'i ts'iyawh yutélhchulh 'ink'ez 'i yenewhuntelhtun. ¹⁶ 'Aw 'et se'aBá buts'u natésdalh 'et huwa 'udusni dzuh sayaz whuts'un, 'aw sooh'en ghaít'ah. 'Et doo chah dzuh sayaz inle t'eh, 'et suteh'ilh." hubúlni. ¹⁷ 'Et yugha hoodul'eh dich'oh chah lhahoodulkut, "Ndi khunek ye nelh yalhtuk 'i lhe'utni, 'Se'aBá buts'u natésdalh,' 'ink'ez, 'Dzuh sayaz whuts'un, 'et 'aw sooh'en ghaít'ah. 'Et doo chah dzuh sayaz whuts'un, 'et suteh'ilh.' 'I daja ni hoh 'utni?" ¹⁸ 'Et 'o 'un chah 'uhutni, "Njan dzuh sayaz whuts'un ní, 'et daja ni hoh 'utni? Wheni 'aw t'ets'onízun." ¹⁹ 'Et Sizi hukwa huyoodutélhkut hukwa' huninzun, 'uda t'éwhunínzun 'et ndo búlhní, "Nuhwhudúsni dzuh sayaz whuts'un, 'et 'aw sooh'en ghaít'ah. 'Et doo chah dzuh sayaz inle t'eh, 'et suteh'ilh. 'Et ih nuhwhenich'oh nuhtah hukwa lhoodulhukut? ²⁰ Soo ts'ah'un na'a 'un whudúsni, tehtso 'ink'ez 'o 'un chah tube sk'enitehleh, 'et whunts'ih yinkak whudune hontélnik. Nuhwheni tube tso tehleh, 'et whunts'ih nuhtso 'i bé hoonah'ti 'i tele. ²¹ 'Et whuz na'a ts'eke buyaz whutéleh, 'en k'una'a 'et ndúhoont'ah. 'Aw 'et wheghah whudezulh whuch'a ní unli lhih. 'Et buzki whulih teh, yé ndida 'i yunaooodilnah, 'uski yinkak nenílhti 'et tube hóont'i. ²² 'Et whuz na'a zeh nuhwheni k'an tso ahli, 'et whunts'ih nanwhutest'ilh 'ink'ez nuhdzi hóotet'i, 'ink'ez be hónaht'i 'i 'aw nuhghu hayóolhchoot ghaít'ah. ²³ 'Et dzin t'eh, 'aw hoonliyaz suts'u ka' doohtni ghaít'ah. Soo ts'ah'un na'a 'un whudúsni, se'aBá si soozí bugha hoonliyaz buts'u hukwa' dahni t'eh, ndai buka' dahni, 'i nuhgha íte'ah. ²⁴ K'an whuts'un si soozí bugha 'aw buts'o hukwa' dahni hoolah. 'Et se'aBá huboodulhukut, 'et nuhgha whútelts'uh, 'ink'ez 'et be ts'uhooont'i teht'ilh.

"Ndi yun k'ut humoodih, 'ink'ez be 'ut'en k'ah chah, ts'iyawh buch'a' nílhde," ni Sizi

²⁵ "Whutsuh da khunek whe' hoont'ah hooyah be 'ún whudusni inle. 'Et whunts'ih whuz de whélts'uh, khunek whe' hoont'ah hooyah be ilah 'udutésnilh. Se'aBá 'en bugha soo ts'et khunek 'i be nuhwhudutésnilh. ²⁶ 'Et neóodinzut t'eh, 'aw si ilah se'aBá nuhwhuba bóodolhkut nuhwhudusnih, nuhwhenich'oh si soozí bugha hóobudutelhkut. ²⁷ Nuhwheni sk'ehtsi' 'et huwa se'aBá dich'oh nuhk'entsi', 'ink'ez Yak'usda ts'un haya 'et nuhwhuba 'alha

* **16:10** Sizi Gri 'en chah ts'ah'un 'int'ah, 'et chah bulh t'ewhunoozhézeh. † **16:11** Ndi yun k'ut humoodih, 'en netsudule 'int'ah.

'ohoont'ah, 'et huwa nuhwheni nuhk'entsi'. ²⁸ Se'aBá 'en buts'u háya hoh ndi yun k'ut niníya. 'Aw 'et ndi yun k'ut whuch'a natesdalh 'ink'ez se'aBá 'en buts'u nátesdalh," hubúlhni. ²⁹ 'Et yugha hoodul'eh 'uhiyúlhni, "K'an 'aw 'et ts'et khunek be nelh yaíltuk, 'aw khunek whe' hoont'ah hooyah be ilah 'udini. ³⁰ K'an 'aw 'et t'ets'onínzun soo ts'iyaintsuk 'et t'éwhúnínzun 'et huwa 'aw 'o 'un nts'oodólhkut ghaít'ah. Daja nedáni, 'et huwa Yak'usda buts'un hainya neba 'alha 'ohoont'ah." ³¹ 'Et Sizi ndo búlhni, "Soo ih nuhwhuba 'alha 'ohoont'ah? ³² Nulh'en whuz de whúdezulh 'aw 'et 'et níoodenzut, ndet 'ilhunah ahli hoh lhch'a dutelhuwus 'ink'ez nuhwhenich'oh nuhwhútkauna'a 'uteht'ilh. Si chah sich'oh úsdi hoh sughu téhdulh, 'et whunts'ih 'aw sich'oh ilah 'ust'ah, se'aBá 'en sulh 'int'ah 'et huwa. ³³ K'an njan 'et hubugha ndi khunek 'i be nohwhulh yálhtuk, daja nuhwhudáni, 'et huwa nedzi be dezghel, 'i 'ooht'e. Ndi yun k'ut tube nuhwhé'huzoola, 'et whunts'ih hóht'ah, ndi yun k'ut humoodih 'ink'ez be 'ut'en k'ah chah, ts'iyawh buch'a' nulhde 'et huwa.

17

Sizi Gri náwhulnuk degha nus dezti unli hoh de'aBá yuts'un tenadudli

¹ Sizi njan 'et ndudáni hukw'elh'az, nduk yak'uz yuta'en 'ink'ez 'utni, "ABá, 'aw 'et sts'o dezulh 'aw 'et whusawhélt'sut. NYe' buba whudélhti, 'et whuz na'a nYe' chah mba whudólhti. ² 'Et whuz na'a zeh 'et ndineh hoh yinkak whudune ts'iyawh hubugha ndoh oot'e, 'et hubugha óoni'ai, 'et ndunnah sughá buninla 'ilhuz wheni hiye khútenalh 'i hubugha ités'allh. ³ 'Et ndez na'a ndi 'ilhuz wheni be khuténalh, nyun zeh ts'ah'un Yak'usda inli, 'ink'ez ndun whuz de haílh'a, Sizi Gri 'en 'int'ah, ndunnah soo hubeni be t'éhonoozeh, ndi 'ilhuz wheni be khuténalh 'et 'ohoont'ah. ⁴ 'Ut'en sughá ní'ai 'i 'aw 'et lhadúsdla hoh ndi yun k'ut mba whudálhti. ⁵ 'ABá, ndi yun k'ut 'uwhuténih whutsuh da, ndai nyun bulh hoh da bé whúdalti, 'i be k'an doo chah zeh suba whudélhti.

Sizi yugha hoodul'eh huba tenadudli.

⁶ Ndunnah ndi yun k'ut whudune hubutah sughá buninla, ts'iyannah nyun ye nehobonelhtan. Nyun hube'ílhdzun hinli hoh si sughá buninla 'ink'ez nghunek hik'úne' 'ust'en. ⁷ Ndai sughá nínla, 'i ts'iyawh nyun nts'u haínkat 'i 'int'ah. 'Et k'an bubeni be t'éhonínzun. ⁸ Ndai khunek 'en huba stl'aída'ai, 'i chah hubutl'aida'ai. Soo cho hiyílhchoot 'ink'ez hubeni be t'éhonínzun, 'et huwa nyun nts'u háya 'ink'ez nyun whuz de sútelh'a, 'et chah soo hubeni be t'éhonínzun 'ink'ez huba 'alha 'ohoont'ah. ⁹ Huba tenadusdli. 'Aw ndi yun k'ut whudune, 'en ilah huba tenadusdli. Ndunnah sughá buninla, 'en zeh huba tenadusdli, nyun hube'ílhdzun hinli 'et huwa. ¹⁰ Ndai si se'ílhdzun unli, 'i nyun nye'ílhdzun 'int'ah, 'ink'ez ndai nyun nye'ílhdzun unli, si se'ílhdzun 'int'ah. 'Ink'ez 'en hubugha 'aw 'et suba whudálhti. ¹¹ 'Aw 'o 'un ndi yun k'ut sída ílah hoh nts'un usyalh, 'et whunts'ih ndunnah, 'en ndi yun k'ut 'uhint'ah. 'ABá, lubeshi bughoh hoolah 'int'ah, 'ink'ez ndunnah sughá buninla, nyoozi be ílhtus, 'i be huboontun, 'i be nyun si bulh 'ilho ídudli, whuz na'a didut chah 'ilho hoole. ¹² Ndunnah sughá buninla, ndi yun k'ut 'awhuz hubulh 'ust'ah da, nyoozi be ílhtus, 'i be huboostun 'ink'ez hubughosdle. 'Et 'aw kwuncho yuh whuye', 'en ilah, 'et huwa nts'oh teh bugha 'uk'une'úsduguz inle, hoh teh whét'en. ¹³ K'an 'aw 'et nts'un téya. 'Et whunts'ih 'awhuz ndi yun k'ut sída hoh njan 'et howu yalhtuk, 'et soo ts'ah'un na'a ndai be whúnelhnik, 'i be hubudzi doobun. ¹⁴ Nghunek hubugha íde'ai 'ink'ez ndi yun k'ut whudune hubuts'u hudutnik. Nts'e na'a si 'aw ndi yun k'ut whudune hubulh 'uhint'ah ilah, 'et whuz na'a 'en chah 'aw ndi yun k'ut whudune hubulh 'uhint'ah ilah. 'Et huwa ndi yun k'ut whudune hubuts'u hudutnik. ¹⁵ 'Aw ndi yun k'ut whuch'a

nabónlelh, 'et ilah nts'u húkwa' dusni, 'et whunts'ih ntsi', 'en ch'a soo cho hubughonle, 'et nts'u húkwa' dusni. ¹⁶ Nts'e na'a 'aw ndi yun k'ut whudune hubulh 'uhint'ah ilah, 'et whuz na'a si chah 'aw ndi yun k'ut whudune hubulh 'ust'ah ilah. ¹⁷ Khunek 'alha' 'int'ah 'i nts'u hadélt'sut, 'i be nyunch'oh mba 'udun níbuninle. Nghunek 'i khunek 'alha 'int'ah 'i 'int'ah. ¹⁸ Nts'e na'a nyun ndi yun k'ut whudune buts'un whesalh'a, 'et whuz na'a 'en ndi yun k'ut whudune buts'un whébalh'a. ¹⁹ 'Ink'ez 'en hubugha si 'udun ni'dunlhuti, 'et whuz na'a 'en chah soo ts'ah'un na'a nyun mba 'udun nibuninla hoole.

Sizi Gri ts'iyannah ndan huba 'alha 'uhoont'ah 'en huba tenadudli

²⁰ 'Aw ndunnah, 'en zeh ilah huba tenadusdli, ndunnah bughunek hubugha si sugha huba 'alha 'uwhutét'ilh, 'en chah huba tenadusdli. ²¹ 'Et t'eh soo ts'iyannah 'ilho 'ilhunahuwésdel hoole. 'ABÁ nts'e na'a nyun syudínda, 'ink'ez si chah nyudúsda, 'et whuz na'a zeh neyuh 'uhoot'e. 'Et hoh yinkak whudune soo ts'ah'un na'a huba 'alha 'uhot'e nyun whuz de sútelh'a, 'et huwa. ²² 'Ink'ez ndi be dézti sugha ní'ai, 'i 'o 'un hubugha iní'ai. 'I be nyun si bulh da ídut'ah hoh 'ilho idúdli, whuz na'a zeh 'ilho hoole. ²³ Si 'en hubuyudúsda usdli 'ink'ez nyun si syudínda inli, 'et whuz na'a ndunnah 'ilho hinli hoh lhahádotneh. 'Et huwa yinkak whudune soo bubení be t'éhonózin nyun whuz de sútelh'a. 'Ink'ez nts'e na'a sk'eintsi', whuz na'a 'en chah hubuk'eintsi'. ²⁴ Ndi yun k'ut 'owhuténih whutsuh da sk'eintsi', 'ink'ez bé dézti 'i sugha ní'ai ínle, 'et soo cho ndunnah huwhute'ilh hukwa' nuszun. 'Et huwa 'aBÁ ndunnah sughá buninla, k'an nts'e 'ust'ah 'et sulh 'úhoot'e hukwa' nuszun. ²⁵ 'ABÁ nyun ts'ah'un 'int'ah inli. 'Et yinkak whudune nyun ngha 'aw soo cho bubení be t'echanyonízun. 'Et si t'ényunúszun 'ink'ez ndunnah sulh 'út'en chah t'éhonízun nyun whuz de sútelh'a. ²⁶ 'Ink'ez nyun ngha soo cho bubení be t'éhonózin hubuzílhtsi. 'Ink'ez nyun ngha 'o 'un chah soo cho t'éhontézin hubutélhtsilh. 'Et huwa ndai be sk'entsi' 'i hubuyuh doo'a, 'ink'ez si chah hubuyuh 'utesdalh."

18

Sizi 'aw 'et huyilhchoot.

¹ Sizi ndi khunek be tenadedli hukw'elh'az, yugha hoodul'eh tubulh took'oh wheyaz Kedron huwhútni, nyan yahunindel. 'Et haniyeh k'et whuz'ai. 'Et yugha hoodul'eh tubulh 'et dahuníndel. ² 'Ink'ez Judas, ndun da ye 'ónket, 'en chah nyo t'éwhunínzun, Sizi yugha hoodul'eh tubulh lhat 'et 'ilhúnahodulh 'et huwa. ³ 'Et náwhulnuk bumoodih 'ink'ez Pharisee teh, ndunnah nehúghan 'ink'ez nélghel chah, Judas dulu hubutelhadel. Too dízk'un teh, bé nukwunult'a, 'ink'ez soh cho teh, ts'iyawh hiyelelh. ⁴ Sizi nts'oh teh didut bugha ne'whutet'en, soo ts'iyawh t'éwhunínzun, 'et hubududezya 'ink'ez huboodulhkut, "Ndan kunúhta hoh 'aht'en?" hubúlhni. ⁵ 'Et 'uhiyúlhni, "Sizi Nazareth whut'en, 'en kúznuta." 'Et Sizi ndo búlhni, "Si 'en 'ust'ah." 'Et Judas ye 'ónket, 'en chah hubutah súyin. ⁶ Ndet Sizi si 'en 'ust'ah hubúlhni hoh, ts'iyawh k'ah na'húja 'ink'ez yun k'ut nahánkat. ⁷ 'Et doo chah zeh huboodulhkut, "Ndan kunúhta hoh 'aht'en?" 'Et 'uhutni, "Sizi Nazareth whut'en, 'en kúznuta." ⁸ 'Et Sizi ndo búlhni, "Uda ndun whudáni, si 'en 'ust'ah. 'Et si skunáhta t'eh, ndunnah, 'en nahutoodelh hubugha óonah'ah." ⁹ 'Et Sizi whutsuh da daja tenadedli ínle da, "Sughá buninla 'aw 'ilhunuh whunts'ih tinta chalhtel," ni, 'et hoh teh whét'en 'et ndo búlhni. ¹⁰ 'Et Simon Peter soh cho ut'i, déhayalhtsus, 'i be náwhulnuk degha nus dezti be 'ustl'en ye yoonilht'o hoh nalhnih ts'ih yudzo habe' yalht'o. 'En 'ustl'en boozi Malchus hiyúlhni. ¹¹ 'Et Sizi Peter ndi yúlhni, "Nyoo soh cho buzus be naíntih. 'Alha ilah lah ndi lubot

'aw chatuzésnil se'aBá stl'ayánkai 'i?" ¹² 'Et lhuhudúghan bumoodih 'ink'ez Lizwif nélhghel Sizi hiyílhchoot 'ink'ez hiyulhghel. ¹³ Soo 'udeechoo Annas 'en cho highu hinilhti. 'En Caiaphas 'et nawhuduzuk huba náwhulnuk degha nus dezti unli ínle, 'ink'ez Annas, 'en buzaz 'int'ah 'et. ¹⁴ 'Et ndun Caiaphas 'en 'utni ínle, Lizwif hubugha 'utni hoh ndutni, 'ilhunuh dune 'en ts'iyannah dune ba dazsai t'eh, 'et whutézoo ni ínle.

Peter, 'aw Sizi t'einízun ni.

¹⁵ Simon Peter 'ink'ez 'ilhunuh yugha hoodul'eh bulh Sizi hiyúntiz'az. Ndun 'ilhunuh yugha hoodul'eh, 'en náwhulnuk degha nus dezti t'einízun, 'et 'en Sizi nanistl'oo bet yúlh daní'az. ¹⁶ 'Et Peter ndati yoo 'az ts'ih siyin. 'Et ndun Sizi yugha hoodul'eh 'ilhunuh, ndun náwhulnuk degha nus dezti t'einízun, 'en 'az tenínya 'ink'ez ndati huwunli yulh yaílhtuk hoh Peter chah daínilhti. ¹⁷ 'Et ndun ts'ekeyaz, ndati huwunli, 'en Peter ndi yúlhni, "Nyun chah ih ndun dune yugha hoodul'eh 'ilhunuh inli?" 'Et Peter, "Awundooh," yúlhni. ¹⁸ 'Et bulunah 'ustl'en 'ink'ez nélhghel teh whúzk'uz 'et kwun húdulhk'an. Na'danildzilh hoh Peter 'en chah hubutah siyin 'ink'ez na'dunildzilh. ¹⁹ 'Et ndun náwhulnuk degha nus dezti Sizi yugha hoodul'eh, 'ink'ez hubodulh'eh hukwa yoodulhkut. ²⁰ 'Et Sizi ndi yúlhni, "Soo ts'et gaih 'et ndi yun k'ut whudune hubulh yálhtuk. 'Ahoolhyez wheni luglez 'ink'ez luglez whucho nts'e Lizwif 'ilhúnahuwúdulh, 'et dune hóodulh'eh. 'Aw 'ilhuh whu'iz khunek be yachálhtih. ²¹ 'Ink'ez di ka hukwa soodulhkut? Daja dusni ndunnah sudánts'o, 'en huboodulhkut, soo ts'ah'un t'éhonínzun daja dání 'et." ²² 'Et Sizi njan ndutni hoh, 'ilhunuh nélhghel yuzih siyin, yunen ts'ih yunézkuk 'ink'ez ndi yúlhni, "Ndan na'dunínzun hoh 'udini? Ndun náwhulnuk degha nus dezti, 'en whuz na'a bulh yaílhtuk!" ²³ 'Et Sizi ndi yúlhni, "Dzuh k'una'a yatéltuk t'eh, 'et nedini daja dání. 'Et ts'ah'un na'a 'un dusni t'eh, di ka sunénkuk?" ²⁴ 'Et Annas 'awhuz Sizi lhughel hoh náwhulnuk degha nus dezti Caiaphas, 'en ts'un wheyalh'a. ²⁵ 'Et Peter 'awhuz tse ba siyin 'ink'ez na'dunildzilh, 'et 'uhiyúlhni, "Nyun chah tulih yugha hoodul'eh hubutah 'ilhunuh inli?" 'Et whuts'ooodedlai 'ink'ez, "Awundooh," hubúlhni. ²⁶ 'Et náwhulnuk degha nus dezti be 'ustl'en 'ilhunuh, Peter ndun 'en yudzo haílht'az, 'en bunadun 'int'ah, 'en 'uyúlhni, "Nyun chah tulih haniyeh k'et bulh 'ínt'en hoh nyunalh'en ínle?" ²⁷ 'Et doo chah zeh Peter whuts'ooodedlai hoh soo 'ahoh lígok dune 'udéja.

Sizi, Pilate but nihínilhti

²⁸ 'Et Sizi, Caiaphas bukoo tínahinillti, yun k'ut humoodih, Pilate hiyulhni 'en bukoo ts'ih whuz whehiyalhti. Bundada tube 'uda 'ohoont'ah 'ink'ez Lizwif 'aw bukoo dachahídulh. 'Et bukoo dahúnindel t'eh, 'en huba me hoonli.* 'Et ndahúja t'eh, 'aw njan Hubutus Lhuseya nayút'et'alh, 'aw 'uhoo'alh ghaít'ah 'et huwa. ²⁹ 'Et Pilate 'az buts'un teninya 'ink'ez huboodulhkut, "Ndun dune ndet buk'éwhah'ai hoh 'aht'en?" ³⁰ 'Et 'uhiyúlhni, "Aw ndun dune tinta chaít'il t'eh, 'aw nts'uz toolhte ghaít'ah." ³¹ 'Et Pilate ndo búlhni, "Ulhchoot 'ink'ez nuwhenich'oh nuhwhuba butulhúhesde 'i k'una'a buba nahahyeh!" 'Et ndunnah Lizwif 'uhiyulhni, "Wheni 'aw dune ts'uzoolhghelh negha chahóot'al." ³² Njan 'et nduhútni hoh Sizi nts'e na'a datétsah howu yailhtuk ínle, hoh teh ne'hóot'en ka' hutni. ³³ 'Et Pilate bukoo ts'ih whenája. Sizi yukunáwhulh'a 'ink'ez ndi yúlhni, "Nyun ih Lizwif hubudayi cho inli?" ³⁴ 'Et Sizi ndi yúlhni, "Nyunch'oh ih 'et ndunínzun, k'us 'uyoon si sugha nyádani?" ³⁵ 'Et Pilate 'uyúlhni, "Si ih Lizwif usdli ninzun? Nyunch'oh nyulh dune 'ink'ez náwhulnuk bumoodih, 'en stl'ányuhalhti! Ndét

* **18:28** Ndán 'en 'udun yun k'ut whut'en unli, 'aw Lizwif yugha daoya huba cha'hóot'ah huninzun.

hoh tinta' nínt'en?" ³⁶ 'Et Sizi ndi yúlhni, "Nts'e hubudayi cho usdli 'et 'aw ndi yun k'ut ilah 'uhoont'ah. 'Et ndi yun k'ut hubudayi cho usdli t'eh, suhuneduh 'aw da Lizwif tl'achasúhoolhtel wule da. 'Awundooh, hubudayi cho usdli 'aw ndi yun k'ut ilah 'uhoont'ah." ³⁷ 'Et Pilate yoodulhkut, "Et t'eh hubudayi cho inli ho' 'int'ah!" 'Et Sizi ndi yúlhni, "Nyún 'alha 'udini hubudayi cho usdli. 'Et wheni whuzídi 'et huwa yinkak whudune soo cho hubeni be khunek 'alha 'int'ah 'i t'éhinoozeh 'et ndi yun k'ut neníya. Ndunnah khunek 'alha' 'int'ah 'i t'ehuninzun, daja dusni soo cho suhoozéhls'ai." ³⁸ 'Et Pilate ndi yúlhni, "Di 'int'ah khunek 'alha' 'int'ah 'i?" 'Et ndudéja hukw'elh'az doo chah zeh Lizwif 'az buts'un tinanja 'ink'ez ndo búlhni, "Aw hoh tínta 'unt'en bugha nachawhus'al!" ³⁹ 'Et nuhwheni nuwhe'út'en k'ah whuz'ai Nuhtus Lhuséya whutah 'ilhunuh dune buda'de'ai, 'en nuhwhuba bulanadustnih sih. Ndun Lizwif hubudayi cho, 'en ih bula nadutestnih hukwa' nahzun?" ⁴⁰ 'Et soo ts'iyawh sulya hulhtuk hoh 'uhutni, "Barabbas 'en bula nadintnih, 'aw ndun 'en ílah!" 'Et ndun Barabbas 'en 'undunut'ih 'int'ah.

19

Pilate, Sizi lhdulalhgus be nabe'hidutelhsih ba 'et nihínilhti.

¹ 'Et hukw'elh'az Pilate Sizi hiyilhchoot 'ink'ez hiyolhtsus, ² 'ink'ez ne-hughan whus cho 'awh nahinelhwut, 'i hitsi nehída'ai, 'ink'ez nalhti dulk'un, 'i higha hiwelhnik, ³ 'ink'ez 'uhiyulhni, "Lizwif hubudayi cho sa cho khona." 'Ink'ez hinen ts'ih hiyoonukat. ⁴ 'Et doo chah zeh Pilate 'az hubuts'un tinanja 'ink'ez ndo búlhni, "Nulh'en, ndun si 'aw hoh tínta 'unt'en bugha nachawhús'al, 'et nuhwhuts'un tinanílhti." ⁵ 'Et Sizi whus cho butsi niden'ai 'ink'ez nalhti dulk'un 'i naits'uz hoh tínta Pilate yunilh'en 'et ndo búlhni, "Nulh'en, ndun dune!" ⁶ Náwhulnuk bumoodih 'ink'ez nélhghel teh, hitelh'en ibulh, soo tube cho sulya hulhtuk 'ink'ez, "Lhdulalhgus yundunulht'ah! Lhdulalhgus yundunulht'ah!" hutni. 'Et Pilate ndo búlhni, "Nuhwhenich'oh ulhchoot 'ink'ez lhdulalhgus yundunulht'ah! Si 'aw hoh tínta 'unt'en bugha nachawhús'al 'et huwa!" ⁷ 'Et Lizwif 'uhiyúlhni, "Nuwheni khunek neba butulhúhesde 'i ts'ít'i, 'i k'ut 'utni, daóotsah huba 'uhoont'ah. Lhe'utni Yak'usda buYe' 'ududulhútsi 'et huwa." ⁸ 'Et Pilate hubuduzts'ai 'et tube nelhújoot. ⁹ 'Et doo chah zeh bukoo ts'ih danánja 'ink'ez Sizi yoodulhkut, "Nts'ez de haínya ho' nint'ah?" yúlhni. 'Et Sizi 'aw yulh yachailhtih. ¹⁰ 'Et Pilate ndi yúlhni, "Aw ih sulh yaóolhtuk ghaít'ah? 'Aw ih t'éwhunuzínzun lhdulalhgus whun-yunduntélt'us sughá whunt'ai k'us rla nadutestnih chah sughá whunt'ai?" ¹¹ 'Et Sizi ndi yúlhni, "Aw ndus de yak'uz whuts'un ngha chahóot'al t'eh, 'aw sugha ndoh 'ont'e ghaít'ah. 'Et huwa ndun ntl'asálhti, 'en bulubeshi nyun nlubeshi 'o nus 'ulcho." ¹² 'Et Pilate yudúzts'ai hoh Sizi yúla nadootnih, 'et nahó'ah hukwa 'ét'en. 'Et Lizwif sulya hulhtuk 'ink'ez 'uhiyúlhni, "Ndun dune bula nadantnik t'ah, 'aw hubudayi cho Caesar buk'entsi' ilah 'int'ah! Ndán hubudayi cho na'dudil'i, 'en hubudayi cho Caesar yuch'a détni 'int'ah!" ¹³ 'Et Pilate whuduzts'ai hoh kw'usuda yuk'usda hoh dune ba naheyelh, 'i k'enátl'adida. 'Et Sizi hububut neheyóolhtelh ndet Hebrew k'una'a Gabbatha huwhútni, 'i khunek 'utni, Tse Buk'ut Hoonzoo, 'i ni hoh 'utni. 'I k'ut kw'uts'uzda yulh'ai dune ba naheyelh wheni. ¹⁴ Ndet dzin da Hubutus Lhuséya, 'et dzin wheni lhahúdutneh, 6:00 bat'en 'uhúnet'oh, 'et Pilate Lizwif ndo búlhni, "Ndun nuhwhubudayi cho nulh'en!" ¹⁵ 'Et whunts'ih sulya hulhtuk 'ink'ez 'uhutni, "Awh 'udini! Lhdulalhgus yundunilht'ah!" 'Et Pilate ndo búlhni, "Nuhwhubudayi cho 'en ih lhdulalhgus k'ehítelhtelh?" 'Et

náwhulnuk bumoodih 'uhutni, "Hubudayi cho Caesar 'aw 'en zeh nehubudayi cho, 'aw 'uyoon nehubudayi cho hoolah!"

Sizi lhdulalhgus k'ehíyilhti.

¹⁶ 'Aw 'et hodánts'o Pilate Sizi lhdulalhgus k'ehúyolhtelh wheni butl'ayálhti. Hiyílhchoot 'ink'ez 'o 'un whenahíyalhti. ¹⁷ 'Et dulhdulalhgus yudetilh hoh, nts'e da 'Utsin Ts'un huwhúttni, whuz ninya. 'Et Hebrew k'una'a Golgotha huwhúttni. ¹⁸ 'Et lhdulalhgus k'ehíyilhti. 'Uyoon nanah chah hiyúlh 'ubihinla. 'Ilhunuh hoh 'ílhk'us ts'ih, 'et 'ilhunuh chah bugha naílnnih ts'ih, 'et Sizi 'en soo buniz 'uhiyínla. ¹⁹ 'Et Pilate yuk'úne'uzguz, 'i butl'ayá'ai lhdulalhgus hiyundunólht'a ka. 'I k'ut 'utni,

Sizi Nazareth Whut'en, Lizwif hubudayi cho 'int'ah.

²⁰ Tube keyah wheghah 'uhiyinla hoh lhdulalhgus k'ehúyilhti 'et huwa, tube lhanah Lizwif ndi Pilate yuk'úne'uzguz 'i hik'eyailhtuk. 'Ink'ez ndi khunek tawh dédowh buk'una'a 'uk'une'úsduguz. Hebrew k'una'a, Greek k'una'a, 'ink'ez Latin k'una'a chah. ²¹ 'Et huwa Lizwif náwhulnuk bumoodih Pilate hiyúlhni, "Aw ndan Lizwif hubudayi cho 'int'ah dini hoh ilah 'uk'e'inges. 'Ants'ih njan ndutni dini, si Lizwif hubudayi cho 'ust'ah." ²² 'Et Pilate ndo búlhni, "Ndai hukw'une'zíguz, 'i nts'e na'a usdla, 'et whuz na'a 'oot'e ka usdla." ²³ 'Et ndunnah nehughan, 'en Sizi lhdulalhgus k'ut whehídunilht'o hukw'elh'az, hinaih hiyílhchoot 'ink'ez dink'i hiyulhtsi hoh'ilhunah hinli hoh lhtahíyulya. 'Et ndi 'ude k'ut ye usda, 'i 'aw lhundunílkai ilah hoh 'ilho zeh unli hoh 'ulya. ²⁴ 'I bugha dich'oh 'ulhódotni, "Ndi 'i 'aw yachazdoolhch'oolh. 'Ants'ih buka 'áts'oolih, ndan simba buts'ítooneh." 'Et nduhúttni hoh Yak'usda bughunek soo buk'ah teh né'hoot'en 'et 'uhutni. Ndi khunek 'i ndutni inle, "Sunaih, 'i ts'iyawh lhtahuyulya.

'Et 'ude k'ut be sída, 'i hika 'aínliah."

'Et soo ndunnah nehughan ne'húst'en. ²⁵ 'Et Sizi bulhdulalhgus soo beghah 'et 'ama siyin. 'Ama bulhtus chah, 'ink'ez Mary Clopas bu'at chah, 'ink'ez Mary Magdala whut'en chah. ²⁶ Sizi 'ama yunilh'en 'ink'ez 'ilhunuh yugha hoodul'eh, soo degha nus yuk'entsi', 'en chah yughah siyin. 'Et Sizi 'ama ndi yúlhni, "Ts'eke, ndun nye' nilh'en." ²⁷ 'Et ndun yugha hoodul'eh, 'en chah yunilh'en hoh 'uyúlhni, "Ndun nyu'ama nilh'en." Soo 'et whuts'un ndun yugha hoodul'eh Sizi 'ama bukoo daínilhti.

Lhdulalhgus k'ut Sizi ye khúna 'iyula ditnik.

²⁸ Njan hoh teh ne'whust'en hukw'elh'az Sizi t'éwhunínzun soo ts'iyáíntsuk lhaooodíja. 'Et didut bugha Yak'usda bughunek 'uk'une'úsduguz 'i daja ni, 'et ndúhoneh 'et huwa, "Ta'óosde," ni. ²⁹ 'Et nyo 'oosa'yaz mai too ts'ulki' 'i 'et sú'ai. 'Et ndi hitabehiyalhnik 'i nyoo mai too huyé tóonahiyuz'ai 'ink'ez duchun hyssop hiyúlhni, 'i higha íwelh'oo, 'ink'ez hizek ts'ih dibe' hidunintan. ³⁰ 'Et ndi mai too ts'ulki' 'i yálkha 'ink'ez 'utni, "Aw 'et ts'iyaintsuk lhawhúdija." Yuk ninent'ai 'ink'ez ye khúna 'i yula detnik. ³¹ 'Et nahulyis dzin huba lhahúdutneh, 'ink'ez nats'ulyis dzin whudézti hoh 'ohoont'ah. Lizwif 'et dzin dune buyust'e 'aw lhdulalhgus k'ut hoolhte hukwa cha'hunízun, 'et huwa Pilate hiyoodulhkut bukechun k'unuhíyooyuz* 'ink'ez buyust'e nanáhiyoolltelh 'et hukwa. ³² Nehughan whuz lhghahudíndel hoh soo 'udechoo ndunnah nanah Sizi hiyulh lhdulalhgus k'ut sulhti, 'en choo bukechun k'unuhíyuzyuz. ³³ 'Et Sizi highu nindel hoh 'uda dazsai hinilh'en, 'et 'aw hikechun lhk'uchahayíyus. ³⁴ 'Et whunts'ih 'ilhunuh nehughan sohtuz be yuzih k'ut 'et yúzgwut. 'Ahoh 'uskai 'ink'ez tooyaz bulh, 'i buts'u hayéjul. ³⁵ 'Et ndun howu yalhtuk, soo 'alha

* **19:31** 'A tsih daootsah.

whunalh'en hoh 'utni. 'Ink'ez daja ni soo dich'oh t'éwhunínzun hoh 'utni. 'Et huwa nuhwhuba 'alha 'uhot'e. ³⁶ 'Et whuz na'a hoh teh ne'whust'en. 'Et huwa ndai Yak'usda bughunek 'uk'une'úsduguz, 'i k'una'a lhawhúduja hoh ndutni, "Aw 'ilho buts'un 'i whunts'ih k'uchaítih," ni. ³⁷ 'Et Yak'usda be dustl'us 'uk'une'úsduguz, 'i k'ut 'udun 'et chah 'utni, "Ndun huyúzgwut, hinoolh'en," ni.

Sizi whihíyalhti.

³⁸ 'Aw 'et hoh teh ne'whust'en hukw'elh'az 'et Joseph, Arimathea whut'en, Pilate yughu ninya 'ink'ez Sizi buyust'e yóolhchoot hukwa yoodulhkut. 'Et ndun Joseph 'en chah Sizi yugha hoodul'eh unli, 'et whunts'ih Lizwif hube nuljut 'et whu'iz Pilate 'aw 'et yugha óoni'ai Sizi buyust'e nayóolchoot 'ink'ez whusainya 'ink'ez buyust'e yílhchoot. ³⁹ 'Et Nicodemus, 'en chah yulh whúsain'az. 'En 'uja írle soo 'udechoo Sizi hoh det'en hoh 'ilhe 'ulh'ek yughu ninya. Yoo sooltsun, 'i myrrh 'ink'ez aloes bulh lhtadilya 'i hoh 100 pounds bat'en 'uldaz, 'i whusayánla. ⁴⁰ 'Et Sizi buyust'e hiyílhchoot 'ink'ez Lizwif hube 'ut'en k'ah hukw'una'a, naih dezti lhuyul 'i hiyílhchoot 'ink'ez yoo sooltsun 'i lhtahidénla 'i hik'únuhíyuzdzai, 'ink'ez Sizi buyust'e higha híwezduz 'ahitelhtelh wheni. ⁴¹ 'Et nyo ndet da lhdulalhgus ye hidunilht'o, 'et wheghah haniyeh k'et whuz'ai. 'Et k'ahoondit tse be tsa k'et 'aw whutsuh da dune whuyuchadílhti whuz'ai. ⁴² 'Et tube nilhdukw whuz'ai 'et Sizi buyust'e 'et 'uhíyalhti, Lizwif 'et dzin lhahúdutneh 'ohoont'ah 'et huwa.

20

Sizi ts'un k'ut dinadija.

¹ Dimos dzin whutanilhghel 'awhuz tsahólhgus hoh Mary Magdala whut'en, ts'un k'uz tezya. Whuz ninya hoh tse cho ts'un k'ut whudadune'ai, 'i 'udun dunez'ai hoh yutelh'en. ² 'Aw 'et Simon Peter 'ink'ez ndun 'ilhunuh Sizi yugha hoodul'eh k'us yúk'entsi', 'en bulh, hubughulgai 'ink'ez ndo búlhni, "NeMoodihti buyust'e hiyílhchoot. 'Uts'un whehíyalhti, 'ink'ez 'aw t'éts'onízun nts'e simba whehíyalhti." ³ 'Et Peter 'ink'ez ndun 'ilhunuh bulh ts'un k'uz ts'ih hutelhgai. ⁴ Whuz lhgha hudilgai. 'Et ndun 'ilhunuh 'en Peter 'a bughanus lhgha dilgai 'et huwa 'udechoo ts'un k'uz lhgha dilgai. ⁵ 'Aw 'et whuz núlhgai hoh, nyuk 'uja 'ink'ez whiyah whunalh'en. 'Et naih dezti 'i 'et sula yunalh'en, 'et whunts'ih 'aw dachaíyal. ⁶ 'Et soo yúnelgih hoh Simon Peter whuz lhadílgai. 'En ts'un k'ut danínya 'ink'ez naih dezti 'i 'et sula yutelh'en. ⁷ 'I ndi dzezoh butsigha waiwesdúduz inle, 'i 'aw naih dezti 'i butuh cha hóolah. Soo cho lhénintan 'ink'ez 'udun 'et sulhchooz. ⁸ 'Et ndun 'ilhunuh yugha hoodul'eh 'udechoo ts'un k'uz lhadílgai, 'en chah danínya. Soo cho whunalh'en 'ink'ez buba 'alha 'uhooja. ⁹ 'Et 'awhuz soo cho hubeni be t'éhonízun daja ni ndi Yak'usda bughunek 'uk'une'úsduguz 'i k'ut, Sizi yaidla tah dinádutédalh 'et hubugha. ¹⁰ 'Aw 'et Sizi yugha hoodul'eh bukoo ts'un whenáhet'az.

Sizi, 'en Mary Magdala whut'en, 'en yunalh haínya.

¹¹ 'Et whunts'ih Mary 'en ts'un k'ut 'aw 'et nétl'adinda. Yoo 'az ts'ih siyin 'ink'ez utso. 'Ink'ez utso hoh yuk 'int'ah 'ink'ez ni tse tuz whunilh'en. ¹² Khunyaz nanah lizas soo lhuyul 'i be húzke, njan hoh hubutelh'en. 'Ilhunuh 'en yutsi t'ah, 'et 'ilhunuh chah yuketl'ah ndet Sizi buyust'e ilhte, 'et huzke. ¹³ 'Et hiyoodulhkut, "Ts'eke, di ka intso?" 'Et ndo búlhni, "SMoodihti 'uts'un whehíyalhti 'ink'ez nts'e simba 'ahíyalhti 'aw t'éwhunuzúszun." ¹⁴ 'Et ndudéja hukw'elh'az n'un nalhu'a hoh khunyaz Sizi 'et siyin hoh yutelh'en, 'et whunts'ih 'aw Sizi 'int'ah 'aw nachayóolts'ulh. ¹⁵ 'Et Sizi ndi yúlhni, "Ts'eke, di ghintso? Ndan kunínta hoh 'int'en?" 'Et Mary 'uninzun haniyeh k'et huwunli

tulih 'ut'en, 'ink'ez ndi yúlhni, "Nyun ílhchoot 'ink'ez 'uts'un wheílhti t'eh, nts'e ninílhti ndusudóni, 'et t'eh si naoohlúchoot." ¹⁶ 'Et Sizi, "Mary," 'uyúlhni. 'Et Mary 'awh nadelhú'a 'ink'ez, "Rabboni!" yúlhni ('i khunek nehodulh'eh ni hoh 'utni). ¹⁷ 'Et Sizi ndi yúlhni, "Aw njan soontun ilah. 'Awhuz nduk se'aBá buts'un náchatuzusdak. 'Et whunts'ih sulhutsinkah hubuts'un naíndalh 'ink'ez ndo budíni, nduk se'aBá buts'un nátesdalh. 'En nuhwheni chah nuhwhe'aBá. Si suYak'usda 'ink'ez nuhwheni chah nuhYak'usda unli." ¹⁸ 'Et Mary Magdala whut'en Sizi yugha hoodul'eh hubughu nanja 'ink'ez ndi khunek huba whusanaída'ai, 'ink'ez neMoodihti chah ya'en húbulhni. 'Et Sizi daja yudáni hukw'e hubulh náwhulnuk.

Sizi yugha hoodul'eh hubunalh haínya.

¹⁹ 'Et dzin 'et Dimos dzin whutanolhghel whutah 'uhoont'ah, 'et hulhgha zeh, 'et yugha hoodul'eh 'ilhunahuwésdel. Dulh Lizwif hube hunuljut 'et ndati ts'iyawh dá'denla. Khunyaz Sizi hubutah siyin hitelh'en. 'Et ndo búlhni, "Soo cho nuhdzi dooghel." ²⁰ 'Et ndúbudani hoh bula chah, 'ink'ez buyust'e k'ut chah hubunalh hahonla. 'Et yugha hoodul'eh tube cho huhóost'et hubuMoodihti hiya'en 'et. ²¹ 'Et Sizi doo chah zeh ndo búlhni, "Soo cho nuhdzi dooghel. Nts'e na'a se'aBá whuz de sútelh'a, 'et whuz na'a si chah nuhwhutéh'ah." ²² 'Et ndudéja hukw'elh'az hubuk'uz tésjiz 'ink'ez ndo búlhni, "Ndoni nuhyudóolts'it. ²³ Ndunnah bulubeshi huba 'un telhdel, 'en 'uda huba 'un tezkat ho' 'int'ah. 'Ink'ez ndunnah hubulubeshi huba 'un chatuzulhdel 'aw huba 'un chatikulh ho' 'int'ah." ²⁴ 'Et ndunnah lanezi 'o 'at nanah (12) hubutah 'ilhunuh, 'ut'udánda, Thomas hiyulhni, 'aw hubutah hoolah hoh Sizi bughu ninya. ²⁵ 'Et ndunnah yugha hoodul'eh, 'en Thomas hiyulhni, "NeMoodihti 'en ts'a'en!" 'Et ndo búlhni, "Soo sich'oh suna be bula lutgloo k'ah whunalh'en, 'ink'ez sulasgek be whune'sílhge, 'ink'ez buyust'e 'et sula be buka nudelhunik, 'et k'an zeh sih suba 'alha 'uhot'e," ni. ²⁶ 'Et 'ilhu whutanolhghel inle hoh, doo chah Sizi yugha hoodul'eh koo tuz ts'ih huelhts'i hoh Thomas 'en chah hubutah usda. Ndati duts'o da'de'ai, 'et whunts'ih khunyaz Sizi hubutah siyin hitelh'en, 'ink'ez ndo búlhni, "Soo cho nuhdzi dooghel." ²⁷ 'Et Thomas 'uyúlhni, "Sula nilh'en 'ink'ez nlasgek be suka k'et nudilnih 'ink'ez nla be suzih k'ut chah nudilnih. 'Et 'o 'un 'aw suts'oodóntlai gunih. Mba 'alha 'uhot'e," yúlhni. ²⁸ 'Et Thomas ndi yúlhni, "SMoodihti 'ink'ez sYak'usda!" ²⁹ 'Et Sizi ndi yúlhni, "Thomas, k'an sa'en, 'et huwa mba 'alha 'uhoont'ah. 'Et whunts'ih ndunnah 'aw chasuhí'il whunts'ih, 'ink'ez huba 'alha 'uhoont'ah, 'en degha nus hoonzoo hubugha whults'ut." ³⁰ 'Et 'o nus lhat yugha hoodul'eh hubunalh Sizi hooncha túne' 'ust'en 'et whunts'ih 'aw ndi dustl'us k'ut 'aw buk'echa'íduguz. ³¹ 'Et ndi zeh kw'uné'usduguz, 'i soo cho bugha t'éwhunohzin 'ink'ez nuhwhuba 'alha 'uhot'e, 'alha Sizi 'en Christ, Yak'usda buYe', 'en 'int'ah. 'Et njan nuhwhuba 'alha 'uhoont'ah hoh 'ilhuz wule be ts'úkhuna, 'i Sizi Gri boozi bugha' téht'ilh.

21

Sizi yugha hoodul'eh lhook ka' hut'en, 'et doo chah hubunalh haínya.

¹ Njan hoh teh ne'whust'en hukw'elh'az, doo chah Sizi yugha hoodul'eh 'en hubunalh haínya. Bun k'ut 'et Tiberias huwhútni, 'et 'uja.* 'Ink'ez hubunalh haínya hoh njan tuné'whust'en: ² Simon Peter, Thomas 'ut'udánda, Nathanael, 'en keyah Cana huwhútni Galilee yun k'ut whuz'ai, 'et whut'en, Zebedee buye'kah chah, 'ink'ez 'uyoon nanah Sizi yugha hoodul'eh chah, 'en ts'iyannah 'ilho huelhts'i. ³ 'Et Simon Peter ndo búlhni, "Lhook ka' test'ilh."

* ^{21:1} Ndi bun k'ut Galilee chah hiyúlhni.

'Et ts'iyawh 'uhiyulhni, "Wheni chah nyulh ts'utoodelh." 'Et 'ahoh soo ts'iyawh ts'i cho be händel. 'Ulh'ek ndúhoolhyez hoh te'huzdla, 'et whunts'ih 'aw cha'hílooh. ⁴'Om bundada sa haín'ai hoh khunyaz Sizi taba siyin hitelh'en, 'et whunts'ih ndunnah yugha hoodul'eh 'aw Sizi 'en 'int'ah t'éhonízun. ⁵'Et Sizi ndo búlhni, "Suzkeh† 'aw ih cha'áhlooh?" "Hoolah," hiyulhni. ⁶'Et doo chah ndo búlhni, "Nuhlhoombil ts'i bugha nalhnih ts'ih tailhkat, 'et sih be 'óohlooh." 'Et whuz tahiyalhkat, lhook whuz lhai huzdlooh k'et, 'aw lhoombil hanahíyooleh ghaít'ah. ⁷'Et ndun 'ilhunuh Sizi k'us yúk'entsi', 'en Peter 'uyúlhni, "NeMoodihti 'ut'en." 'Et neMoodihti 'ut'en ni Peter yudánts'o hoh soo 'a cho yoo 'az ts'ih ye usda 'i yé nallhah, 'ankw'us 'ust'et 'int'ah ínle 'et, 'ink'ez bun k'ut tooz tállhah, Sizi ts'un teyalh 'et wheni. ⁸'Aw taba howu nilhza ilah 'uhut'en, lanezi 'o 'at lanezi (200) negan ghútestnih bat'en 'uwhuldzuh. 'Et ndunnah yugha hoodul'eh ts'iyaz be händel 'ink'ez lhoombilh lhook tubulh toot hiyégus hoh yahíyulhdlat. ⁹Yanahúsduki hoh taba kwunyaz dézk'un 'ink'ez lhook buk'ut 'int'ah 'ink'ez lhes chah 'et sa'ai hotelh'en. ¹⁰'Et Sizi ndo búlhni, "Nyooz lhook suhlooh 'i bulah ndéz ahlelh." ¹¹'Et Simon Peter ts'i yenya, 'ink'ez lhoombilh taba yáyuzguz. Lhook soo ncha 'i zeh dez bun, 153 'uneltsuk. Tube lhai 'ink'ez undaz, 'et whunts'ih lhoombilh 'aw k'uchaích'ulh. ¹²'Et Sizi ndo búlhni, "Anih, njan na'aht'ah." Hiyéntsaz hoh 'aw 'ilhunuh whunts'ih ndan 'int'ah hukwa chahiyoodulhkut, 'uda t'ehonízun neMoodihti 'en 'int'ah 'et huwa. ¹³Sizi 'et ninínya, lhes yílhchoot 'ink'ez hubugha íni'ai. 'Et whuz na'a zeh lhook chah hubugha íninla. ¹⁴'Aw 'et yaidla tah dinadija whuts'un, whulh tat Sizi yugha hoodul'eh hubunalh hainya. ¹⁵'Aw 'et na'het'al hukw'elh'az, Sizi, Simon Peter yoodulhkut, "Simon Jonas buye", ndunnah, 'en huba degha nús ih sk'eintsi?" 'Et Peter ndi yúlhni, "A sMoodihti, nyunch'oh t'éwhunízun nk'esi' 'en usdli." "Et t'eh susheepyaz hube 'olh'ah," yúlhni. ¹⁶'Et doo chah zeh whulh nat yoodulhkut, "Simon Jonas buye", 'usk'eintsi' ih?" 'Et Peter ndi yúlhni, "A sMoodihti, nyunch'oh t'éwhunízun nk'esi' usdli." "Et t'eh susheep hubughonle," yúlhni. ¹⁷'Et doo chah zeh k'an yoodulhkut, "Simon Jonas buye" 'alha ih sk'entsi' 'en inli?" 'Et Peter tube buba dzuh suli, Sizi whulh tat yoodulhkut hoh ndi yúlhni, "Sk'entsi' inli ih?" ndi yúlhni. 'Et Peter ndi yúlhni, "SMoodihti, nyunch'oh ts'iyaintsuk t'éwhúnízun. 'Ink'ez nyunch'oh t'éwhunízun nk'ensi' 'en usdli." 'Et doo chah Sizi ndi yúlhni, "Susheep hube 'ilh'ah!" ¹⁸Soo ts'ah'un na'a nyudúsni, soo chilh inli da soo cho soo nadint'ih 'ink'ez nts'e hukwa' niznun teh ninya inle. 'Et whunts'ih hoonyan sinli t'eh, nla nusnidelnik 'ink'ez 'uyoon dune nla ye'dínguz, 'i t'az nts'e hukwa cha'nínzun, hoh teh whunts'ih ninyutélhte," yulhni. ¹⁹'Et Sizi ndi yulhni hoh nts'e na'a didut datétsah huwa Moodihti yudutélhti, 'et wheínluktun hoh 'utni. 'Et ndi dani hukw'elh'az 'et huwa, "Sunanyalh," yúlhni. ²⁰'Et Peter 'awh nadelhú'a hoh ndun Sizi k'us yúk'entsi', 'en 'uja 'udek'elh'az na'hút'ah yuts'un le'uja 'ink'ez yoodulhkut, "SMoodihti, ndan 'uténlh nye'óotekulh?" ²¹Peter ya'en hoh Sizi ndi yúlhni, "SMoodihti, ndun 'en do daténlh?" ²²'Et Sizi ndi yúlhni, "Whusanátesdalh whuts'un 'et khóona hukwa' nuszun t'eh, nyun mba cha'hoot'ah. 'Et nyun sunanyalh." ²³Ndunnah lhulhutsinkah suli 'et ndi khunek Sizi ye yátelhtuk 'i ts'iyawh hubutah nidélts'ut, ndun Sizi yuk'entsi' 'aw dachatésa. 'Et whunts'ih Sizi Peter 'aw chadínil ndun 'en 'aw dachatésa. 'Ants'ih yúlhni, "Whusanatésdalh whuts'un 'et 'en khóona hukwa' nuszun t'eh, nyun mba cha'hoot'ah?" ²⁴'Et ndun yugha hoodul'eh, ndun Sizi degha nus yuk'entsi', 'en 'udani njan howu yailhtuk 'ink'ez 'uk'e'ánguz 'ink'ez daja dani soo 'alha 'uhoont'ah 'et t'éts'onínzun. ²⁵'O 'un chah tube lhat Sizi ne'úst'en. 'Et

† 21:5 Hoh da hubutah whuz na'a lhk'ehudutsi' bulh yahalhtuk.

hubugha ts'iyawh 'uk'e'ánguz t'eh, dustl'us lhai k'et ndi yun k'ut 'et whunts'ih
'aw soo cha'hoolcho wule t'ah 'et telalh wheni núszun. 'Et ndoh honeh.

Whel'a 'En Hubube 'Ut'en K'ah

Luke, ndun Theophilus dahooja yulhni

¹ Sulh dune Theophilus, dahooja. 'Udechoo khunek 'uk'une'úsduguz, 'i 'uk'une'zíguz, 'i Sizi nts'oh tune'úst'en 'ink'ez nehodulh'eh 'et hubugha ndet bube 'ut'en whe' yudilh'en, ² 'ink'ez ndet dzin nduk yak'uz whenája 'et whuts'un. 'Et nduk yak'uz nateltehl whutsuh, ndunnah dune whel'a 'en hubulhtsi, 'en Ndoni bugha huba nahezya. ³ Sizi dazsai hukw'élh'az dit lanezi (40) dzin ndoohoolyez lhat hoh hubunalhts'et nusiya, 'et whuz na'a 'alha khuna 'aw whuts'u hoodódlai ghaít'ah. Hinilh'en 'ink'ez Yak'usda dune k'úne' bul'en hubugha hubulh yálhtuk.

Ndoni buts'uh yoosdzi

⁴ 'Et 'ilhoh hudemelts'i, Sizi khúnek bughu nini'ai hoh ndo búlhni, "Jerusalem huwu toohdelh gunih! Se'aBá ye nuhwhuts'un náhezya, 'i huba oolh'i. Ndai nuhgha tet'alh, 'i bugha 'ún whudusni inle. ⁵ John dune too be 'ulh'en, 'en too, 'i be too be' 'un whulh'en inle, 'et whunts'ih 'aw lhadzin ilah inle t'eh, 'et whusawhútelts'ulh, se'aBá 'en Ndoni nuhts'uh tl'aidute'ah 'ink'ez nuhyudútelts'ulh. 'Et whuz na'a too bé' 'un whutelih," hubúlhni. ⁶ 'Et whel'a 'en Sizi teh 'ilhunahuwésdel hoh 'et Sizi hiyoodulhkut, "NeMoodihti, 'aw 'et ih whusahónzut Israel hubuts'uh hainzut doo chah zeh 'uyoon yun k'ut whut'en bumoodih nahutedleh?" ⁷ 'Et Sizi ndo búlhni, "Nts'oh t'eh 'uwhuténih, 'aw nuhwheni nt'eoonohzin huba cha'hóot'ah. Se'aBá, 'en zeh nt'eooninzun. ⁸ 'Et whunts'ih Ndoni nuhyudélt's'ut t'eh, soo nuhdzi ulhtus hoh Jerusalem 'et si suba dune whunulhtun tehle, Judea yun k'ut nduhóolcho, Samaria yun k'ut, 'ink'ez ndi yun k'ut nduhóolcho chah," hubúlhni.

Sizi Gri yak'uz whenája

⁹ 'Et ndi yughu yaílhtuk hoh, 'aw 'et nduk yak'uz whenája. 'Aw 'et hinilh'en hoh, kw'us yuh ts'ih hoolah suli. ¹⁰ 'Et 'awhuz nduk yak'uz ts'ih hika ités'en hoh khunyaz nanah dune lheyul 'i be dune hinli hubuzih hube hóodiltsai. ¹¹ "Galilee whut'en, di ka 'et nudelhúya 'ink'ez nduk yaz ts'ih whunulh'en? Ndun Sizi nduk yak'uz ts'ih nuhwhughu whenája k'an nulh'en nduk yak'uz whenája, whuz na'a zeh whusanátedalh," hubuhútni.

Tenahudutedli huba 'et 'ilhohowudulh

¹² 'Et whel'a 'en dzulh Olive hiyúlhni, 'i hiye nádidel hoh Jerusalem ts'ih lhgha hudindel keyah whuts'un dzuh nilhdza 'uhoont'ah. ¹³ Jerusalem ts'ih lhgha hudindel hoh, 'ahoh nduk koo huwhut'i danáhundel. Peter, John, James 'ink'ez Andrew, Philip 'ink'ez Thomas, Bartholomew 'ink'ez Matthew, James Alphaeus buye', Simon Lizwif ba huwu daóodit'ah, 'ink'ez Judas James buye', 'en 'et koo húdelts'i. ¹⁴ 'Aholhyez 'ilhunahuwudulh tenahudutedli hukwa. Ts'ekoo bulh chah, Sizi bulhutsinkah, 'ink'ez Mary be'ama chah, ts'iyawh tenahududli.

Judas yuk'enádeja

¹⁵ 'Et hoh da dzin yugha hodil'e 'ilhohuwezdel ('ilho 120 'uhut'en dune). 'En hubutah Peter hubulh yatélhtuk ka didinya, ¹⁶ 'ink'ez ndo búlhni, "Sulhutsinkah ndi Yak'usda bughunek 'uk'une'úsduguz, 'i 'et lhaóodoneh huba' hoont'ah. Ndet David hó'en Ndoni 'en bugha Judas datenilh 'et yughu yalhtuk. Judas 'en hobunelhtan hoh, hoh da Lizwif Sizi hiyílhchoot inle. ¹⁷ 'En chah nelh 'óot'en ka 'utuhaílhti inle. 'Et huwa Judas wheni k'una'a en chah

whel'a inle." ¹⁸ (Ndi sooneya Judas bugha ínenkat tinta' 'ant'en 'et huwa 'i be yun lhadínt'ah, 'i ye'onket. 'Et Judas nadelduz 'ink'ez buyust'e ndulhcho hoh bé buyáh hawheltal. ¹⁹ Jerusalem whut'en ts'iyawh whulh 'úhudants'o 'et nahahoozi "Akeldama" huwhúttni. 'I khunek, "Uskai Yun" ni hoh 'utni. ²⁰ Peter 'et chah ndutni, "Yak'usda bughunek 'uk'une'uzguz, 'i k'ut "Shun" hiyúlhni, 'i ndutni,
 'Bukoo 'aw dune chahóot'ih hoole.'
 'Ink'ez chah ndutni,
 'Bube 'ut'en k'ah 'uyoonyuk'enadóoja.'

²¹⁻²² "Et huwa 'uyoonyuk'enadóoja Sizi Gri dinadija hubugha nela ts'ah'un 'udooni ka. Ndun dune 'utaháztelhtelh, 'en 'ahoolhyez huba nelh 'ét'en inle, 'en 'uztelilh. 'Udechoo Sizi neMoodihti nelh tezya da 'et whuts'un, 'et ndet John dune too be 'ulh'en too bé' yinla da 'ink'ez nduk yak'uz negho whenája 'et whuts'un." ²³ Hukw'elh'az Peter budáni, 'et nanah dune, 'en 'utahaóobahalhti. 'Ilhunuh Joseph 'en Barsabbas hiyúlhni, Justus chah hiyúlhni. 'Et 'ilhunuh chah 'en Matthias hiyúlhni. ²⁴ 'Et tenahududli hoh nduhúttni, "NeMoodihti nyun ts'iyannah dune budzi yuh téoonínzun. 'Et huwa whunéniltun k'us ndan 'en neba 'utuhaílhti. ²⁵ Judas tinta' 'ant'en hoh nts'e huba 'int'ah ts'ih wheínya, 'et huwa ndan yuk'enádutedalh, 'en whel'a whunéniltun ndan simba 'uts'ooleh." ²⁶ 'Et nahúlt'ah huboozi tse k'ehanguz 'ink'ez 'un hinduntelhmul, k'us ndan boozi nduk nádelhts'ut, 'en 'utahaitelhtelh. 'Et ndúja hoh Matthias 'en whel'a 'en lanezi 'o 'at 'ilhunuh hinli hoh butanínya.

2

Ndoni ndan huba 'álha' hoont'ah, 'en hubuyídelts'ut

¹ 'Et Lizwif budzenis whucho, Pentecost* huwhúttni, whusawhélts'ut hoh ts'iyannah Sizi huba 'alha' hoont'ah 'ilhunuh bukoo 'ilhuhowezdel. ² Khunyaz nduk yat'ah ts'ih 'uhuduzts'ai, 'ants'ih nilhts'i cho delts'ulh li'whutni. 'Ink'ez nyo koo hudemhts'i nduhóolhcho 'uwhutni. ³ 'Ink'ez 'ants'ih kwun li'int'ah, 'i hitel'h'en 'ink'ez lhawh tezkat hoh koo hudemhts'i lhuk'inli hoh hubuk'édinkat. ⁴ 'Et hudemhts'i ts'iyawh Ndoni hubuyídelts'ut 'ink'ez khunek whutsuh da t'ehinízun, 'i be yawhehúniltuk, 'et Ndoni bugha óoni'ai 'et ndadooni ka. ⁵ 'Aw 'et lhanah Lizwif, Yak'usda hínedulh hinli Jerusalem húdelhts'i nilhdza keyah ts'ih hahándel njan dzenis whucho 'et wheni. ⁶ 'Et keyah whut'en 'ants'ih whudutni 'et 'uhudánts'o ka, hoh ts'iyawh lhelhts'un keyah whut'en bughunek be hubulh yawhehúniltuk, tube huba hooncha hoh. ⁷⁻⁸ Huba hooncha k'et lht'ah 'ulhahudutni, "Nts'e na'a 'uwhutét'ih? Ndunnah Galilee whut'en lhe'hutni nek'eyáhulhtuk wheni nek'una'a hubuzdits'o," hutni. ⁹ "Wheni Parthia, Media, 'ink'ez Elam whut'en ts'inli. Mesopotamia whuts'un, Judea 'ink'ez Cappadocia whut'en chah ts'inli. Pontus whuts'un, 'ink'ez Asia ts'ih hahandel chah ts'inli. ¹⁰ Phrygia whuts'un, 'ink'ez Pamphylia whut'en chah ts'inli. 'Et Egypt whuts'un, 'ink'ez Lybia whunat Cyrene whuzih whut'en chah, bulunah chah Rome ts'ih hats'ándel. ¹¹ 'Ilho Lizwif 'ink'ez 'udun yun k'ut whut'en, ndan Lizwif ts'ih nalhéya, netah bulunah chah Crete 'ink'ez Arabia ts'ih hahandel ts'inli. 'Et whunts'ih dahóolcho 'i be Yak'usda ne'úst'en, 'et nduhóolcho hoh whenich'oh neghunek k'una'a, whuz na'a hubuzdits'o," 'uhutni. ¹² Bugha hané'nesjoot 'ink'ez 'uhoot'e ts'ih hoolah hoh ts'iyawh lhahóodulkut, "Dawhútenilh hoh

* **2:1** Njan dzin dakelh k'una'a, Ndoni dzin huwhúttni. Hoh da Lizwif budzenis whuti 'i ha'nukat dzin huwhúttni.

simba 'uwhutni?" lhahudutni. ¹³ 'Et 'uyoon, 'en Sizi huba 'alha' 'int'ah ghu hedloh, "Ndunnah dune yatahunatnai," ho' hutni hubuhútni.

Peter, ndunnah Lizwifhubulhyálhtuk

¹⁴ 'Et Peter whel'a 'en hubutah didinya 'ink'ez 'ilhohuwezdel hubulh when-duniltul, "Sulh dune 'ink'ez nuhwheni Jerusalem whut'en chah ts'iyawh soo zélhts'ai, 'et nuhwhudóosni dáhooja njan 'et hubugha. ¹⁵ Ndunnah dune 'aw tachahuniñtai nuhwheni ndunáhzun whunts'ih, 'ink'ez k'an ts'iyai dzetniz whutsuh 9:00 'uhunet'oh 'uhoont'ah. ¹⁶ Njan dawhút'en, 'et ndun Yak'usda ba nus whunilh'en Joel, 'en huwu yailhtuk hoh ndutni,

¹⁷ 'Nts'e na'a k'an dune ts'inli 'ustl'e 'uhóoja t'eh, ni Yak'usda,
'et sih suyeghah si sugha 'en ts'iyannah dune yudutélts'ulh.

Nuhwhuzkehkah nus daóotenilh 'et huwu yahutelhtuk.

Nuhchilhkah chah hubenghun newhúlt'suk t'ehontézin.

Nuhduneti 'en chah nahútes hoh t'ehontezeh.

¹⁸ 'Ink'ez hoh t'eh ndunnah suba 'uhut'en,
dune, 'ink'ez ts'ekoo chah ts'iyawh suyeghah si sugha 'en buye
íduotelts'ulh, 'et huwa 'en chah nus dawhútenilh huwu yahutelhtuk.

¹⁹ Nduckyaz 'ink'ez ndi yun k'ut chah huwa 'ét'en tuné'whutet'en.
'Et 'uskai, 'ink'ez kwun chah,
'ink'ez lhut lhai chah whutéleh.

²⁰ Sa 'i chah tsahólhgus tele,
'ink'ez 'ulh'ek ooza 'i chah 'uskai tele,
ndet whéwhunujut 'ink'ez whudézti dzin neMoodihti whusatéyah 'et
whutsuh 'uwhuténilh.'

²¹ 'Et ndet whusahónzut, 'et whusawhútels'ulh ndan neMoodihti hudutejih
hits'u hukwa 'uhutni, 'en hudutejih."

²² Peter 'et chah ndutni, "Nuhwheni ndun Israel hubuts'uh háhzut, sug-hunek soo cho oozelhts'ai, Sizi, 'en Nazareth whut'en, Yak'usda nuhts'ítelh'a, 'en Yak'usda bugha huwa 'ét'en tune'út'en, 'et hoh whunelhtan njan nuh-tah 'uhoot'en 'ink'ez nuhwheni chah soo cho t'ewhunáhzun. ²³ Yak'usda nanínezut 'ink'ez 'uda t'eoöninzun, 'i be 'uda Sizi nuhtl'atéltelh niwhuni'ai. Nuhwheni nuhgha lubeshi 'ulh'en Sizi lhdulalhgus k'ut whehídunilh'o, 'et whuz na'a sélhghi. ²⁴ 'Et whunts'ih Yak'usda ninaidilhti. Be dats'útsaih, 'i yuch'a' nilhde, 'aw 'ilhuz daootsah huba cha'hóot'ah 'et huwa. ²⁵ 'Et 'uda David yughu yailhtuk ínle hoh ndutni,
"Ahoolhyez neMoodihti sunen ba nulh'en.

Nalhnih ts'ih sunen ba siyin dzuh noszut whuch'a.

²⁶ 'Et huwa 'ahoolhyez sudzi hóont'i, 'ink'ez whunénik bulh chah yalhtuk,
'ink'ez si 'astl'iyaz yinkak sída.
Datésah t'eh 'aw whenoohlhújut ghaít'ah.

²⁷ Naootnilh keyah si suzul 'aw 'et neóolhtelh ghaít'ah 'ink'ez ndunnah
Yak'usda be'ildzun, 'en 'aw buyust'e wulhjut ghaít'ah.

²⁸ 'Ilhuz khutesnalh, 'et whusunelhtan.
Sulh 'ínt'ah 'et huwa hoonúst'i satalhtsilh."

²⁹ Peter 'o 'un chah ndutni, "Sulh dune David netsuh da keyah whuduchun unli, 'en bugha ts'ah'un na'a whunwhunoolhtun hukwa' nuszun. David daz-sai 'ink'ez 'uhíyalhti 'ink'ez buts'un k'ut 'awhuz nezih whuz'ai. ³⁰ 'En Yak'usda ba nus whúnilh'en 'int'ah 'ink'ez Yak'usda ye yúts'u nahezya t'einínzun. 'Ink'ez Yak'usda whuz na'a yuba niwhuni'ai ho' yulhni, 'David buts'uh haínzut, 'en 'ilhudzin David k'una'a bukw'uts'uzda cho dezti, 'i k'utedalh,' 'en Christ 'int'ah. ³¹ David nus hó'en hoh Yak'usda daténilh t'eoönanzin 'et Christ dinadutédalh 'et huwu yailhtuk hoh ndutni,

'Yaidla tah 'aw 'et néyoolhtelh ghaít'ah, buyust'e chah 'aw wulhjut ghaít'ah.'

³² 'Et ndun Sizi 'en dazsai hoh Yak'usda nahighilhna inle 'ink'ez wheni bugha hoodul'eh ts'iyawh khuna hoh ts'a'en 'et huwa. 'Alha nakhítña t'ets'onínzun. ³³ Nduk yak'uz degha nus whudézti, 'et Yak'usda bunalhnih ts'ih natl'aidalhda 'ink'ez nets'ú yoozi, 'i bugha Yak'usda buYe' yutl'ahó'ai. 'Et 'en Ndoni nets'itelh'a 'ink'ez neyudélts'ut. 'Ink'ez 'alha' 'int'ah k'an dzin ndi 'i oozelhts'ai 'ink'ez nulh'en. ³⁴ 'Aw David yak'uz nuchaiyal, 'et whunts'ih njan ndutni,

'Moodihti 'en suMoodihti 'et ndi yulhni,

'Njan nalhnih ts'ih sughu sinda,

³⁵ ndet nch'a hudetni, 'en hubuch'a' nilhde hukw'élh'az 'et 'ilhuz bumoodih onle.'

³⁶ 'Et huwa nuhwheni Israel hubuts'uh háhzut, ts'ah'un nuhwhudúsni, 'alha' ndun Sizi lhdulalhgus k'ut yundunilt'o, Yak'usda, 'en Moodihti 'ink'ez Christ chah yulhtsi." ³⁷ 'Et Peter hidánts'o hoh soo ts'ah'un budzi t'aígheznai. 'Et Peter 'ink'ez 'uyoon whel'a 'en bulh hubuhoodulhkut, "Nelhutsinkah, Peter nedani hubugha dázenilh?" ³⁸ 'Et Peter ndo búlhni, "Ilhunah ahli nuhwhulubeshi whuch'a nuhwhubeni nahadunoohlel 'ink'ez Sizi Gri boozi bugha too be 'ahneh. 'Et nuhwhulubeshi nuna'doodeh 'ink'ez Ndoni nuhyudóolts'it. ³⁹ Ndunnah Yak'usda neMoodihti buka' dutenilh, 'ilhunah ahli hoh Ndoni nuhts'ú yoozi inle, nuwhuzkeh chah 'ink'ez nilhza yun k'ut whut'en, 'en whunts'ih." ⁴⁰ 'Et Peter sa hoh hubulh yaílhtuk 'ink'ez huba nus whúnilht'uk 'ink'ez ndo búlhni, "Ududulhúyis! Ndunnah ntsi' hubuch'a nalhú'ah, 'ink'ez hubulh áht'en ilah, Yak'usda dzuh nobutelhdeh ho' hoont'ah." ⁴¹ Lhanah huhóont'i hoh highunek hiyílhchoot 'ink'ez too be' hulya. 3,000 bat'en 'uhint'ah, 'en hubut'aoobuninla. ⁴² 'Ahoolhyez 'ilhuhowudulh, 'ink'ez whel'a 'en hubuhoodulh'eh. Ts'iyawh 'ilho lhuh 'uhut'en. 'Ink'ez 'udek'elh'az hulgħha na'het'al hoh whunahulnih ka lhula'uhut'ah 'ink'ez 'ilho tenahududli.

Nts'e na'a huba 'alha' hoont'ah yinkak hudedhts'i

⁴³ Whel'a 'en huwa 'ét'en tuné'hust'en 'et hoh 'o nus ts'iyannah huba hooncha. ⁴⁴ Huba 'alha' hoont'ah ts'iyawh 'ilho nuhúdelh 'ink'ez hiyit'i, 'i ts'iyawh hiyé lhula'dut'en. ⁴⁵ 'Ilhunuh yit'i, 'i be 'óokuk t'eh, 'i ts'iyannah ndunnah 'en ndai hiye dunidzit, 'en ndi sooneya hubutuninunih. ⁴⁶ Lizwif hubuluglez whucho 'et dzin totsuk 'ilhuhowudulh. Koo 'et 'ilho budzi únzoo 'ink'ez huhóont'i hoh lhula na'hut'ah. ⁴⁷ 'Et ndunnah huba 'alha' hoont'ah Yak'usda ba whudélti, 'ink'ez Jerusalem whut'en, 'en chah buts'un hínzoo. Ndunnah hudujih, 'en neMoodihti dzin totsuk 'o nus 'uhuneltsuk hubulhtsi.

3

Peter 'inkez John, 'en dune nuchásyah 'en soo ná'yinla

¹ 'Et 'ilhudzin Peter 'ink'ez John bulh dzetniz hukw'elh'az, 3:00 bat'en 'uhúnet'oh, Lizwif hubuluglez whucho ts'ih hutez'az tenahududli neóninzut 'et wheni. ² Hukwuti hoonzoo huwhútni, 'et dune 'en whuzdli whuts'un 'aw nuchásyah, 'en 'et 'usda. Dzin totsuk whuz nihiyukaih. Ndunnah Lizwif hubuluglez whucho ts'ih tihúdelh 'en sooneya ka hubuts'un dátso. ³ 'Et Peter 'ink'ez John bulh bukoo ts'ih hútez'az hoh hubutelh'en 'ink'ez hoonliyaz higha óo'ah ka buts'u dátso. ⁴ Soo cho hinilh'en hoh Peter utni, "Nenilh'en!" yulhni. ⁵ 'Et hubunilh'en hoonli higha te'ah ka hubuts'un tsi hooli. ⁶ 'Et Peter 'uyúlhni, "Aw silver 'ink'ez gold 'i chah chasúst'ih, 'et whunts'ih ndai 'ust'i, 'i ngha tés'ah. Sizi Gri Nazareth whut'en whelhtus 'ink'ez boozi bugha negħá whults'ut huwa didinyih 'ink'ez ninja!" ⁷ 'Ink'ez Peter ndun dune nuchásyah

nalhnih ts'ih yula ilhchoot 'ink'ez didilhya ibulh buke, bukechunah tubulh hoolhtus nawhusdli. ⁸ 'Ahoh didillhah 'ink'ez nádinya. 'Et Lizwif hubuluglez whucho ts'ih hubulh tez'az. Nuya hoh nduk túllhuk chah 'ut'en 'ink'ez Yak'usda délhti. ⁹ Ts'iyannah yunilh'en nya 'ink'ez Yak'usda délhti. ¹⁰ Ndun dune nuchásyah nahuyoolhúts'it 'et Lizwif hubuluglez whucho hukwuti hoonzoo 'et 'usda, 'en 'int'ah. Tube huba dahooja hole! Ndun hinilh'en hoh tube huba hooncha.

Lizwif hubuluglez whucho ts'ih Peter hubulh yálhtuk

¹¹ Peter, John bulh 'awhuz ndun dune soo na'yinla huboontun zeh 'int'ah hoh, dune ts'iyawh njan Solomon bughu dáti bet huwhútni ts'ih whuz hubuts'un whehélgaz. ¹² 'Et Peter hubunilh'en 'ink'ez ndo búlhni, "Nuhwheni Israel hubuts'uh háhzut, di ka nenulh'en 'ink'ez nohba dahooja hole ih? 'Aw whenich'oh be ts'inzoo k'us be ts'ílhtus 'i bugha ilah ndun dune nya nats'úlhtsi. ¹³ Netsuh whudelhdzulh Abraham, Isaac, 'ink'ez Jacob lhan'un teh lhuzkehkah hinli hoh 'uhoont'ah. 'Ink'ez hubuYak'usda Sizi Gri yuk'úne' 'ust'en, 'en ncha yulhtsi 'ink'ez yudélhti. Lizwif howuhinli tl'ahíyalhti. Pilate yulanadutetnih 'et whunts'ih nuhwheni buch'a nidehdel inle. ¹⁴ 'En lubeshi bughu hoolah 'ink'ez ts'ah'un dune chah unli, 'et whunts'ih buch'a nidehdel 'ink'ez dune selhghi, 'en Pilate nuhts'u yúlanadootni buts'o húkwa' dahni. ¹⁵ Ndun 'ilhuz be ts'ukhutena negha íni'ai, 'en 'ahla sélhghi, 'et whunts'ih Yak'usda naoootnilh keyah 'et nahiylhna, 'et njan nduhooja hoh newhuzneulhtan. ¹⁶ 'Et Sizi huba 'alha' yint'ah 'ink'ez ndai yé ulhtus 'i bugha ndunnah dune soo ulhtus suli hoh soo ná'uja. 'En 'int'ah nilh'en. 'Alha' 'i be hoont'ah ndun dune nuhbut siyin, 'en Sizi huba 'alha' yint'ah, 'et 'i be buyust'e ndulhcho hoh soo ná'uja. ¹⁷ 'Aw 'et sulhutsinkah t'enwhunúszun nuhwheni 'ink'ez k'une'nuwhuhul'en chah Sizi dálh'en t'éoonuzúhzun, 'et huwa éht'en. ¹⁸ 'Et 'uda hoh Yak'usda dani 'et ndunnah ts'iyannah Yak'usda be nus whúnih'en, 'et Christ dzuh nutezut, hutni. 'Et whuz na'a 'uhóoja whúlksi. ¹⁹ K'an nuhwhulubeshi whuch'a nuhwhubeni nahadunoohlelh, 'ink'ez Yak'usda buts'u naóolhu'ah, 'aw 'et sih nuhwhulubeshi nuhwhuba yuna'doolhdeh. ²⁰ 'Et hoh Yak'usda nuhdzi ulhtus nuhwhuba yoolhtsilh 'ink'ez Sizi Gri 'en chah nuhts'ítowl'h'a. Whutsuh whudelhdzulh 'uda 'en yugha nuhwhudáni inle. ²¹ 'En nduk yak'uz 'et 'usda, ndet ts'iyaintsuk doo chah soo ná'whutelelh nasdli 'et whuts'un. 'Uda huwu yuhalhtuk ínle. ²² Nuhwheni chah Yak'usda neMoodihti 'ilhunuh Yak'usda be nus whúnih'en si sk'una'a 'int'ah, 'en nuhts'útelh'ah. Nuhkeyah 'ilhunuh 'en 'utenilh. Daja nuhwhuduténih ts'iyawh oozólhts'a. ²³ Ndunnah ndan Yak'usda be nus whúnih'en chahiyoozílhts'ai, 'en Yak'usda budune buch'a baninla, 'ink'ez hoolah hubutelhtsilh.' ²⁴ 'Et Peter 'o 'un ndutni, "Ndunnah Yak'usda be nus whúnih'en ndet 'uwhuténih huwu yahalhtuk da, Samuel chah 'ink'ez 'uyoon yuk'élh'az khuna chah, ts'iyawh whuz na'a zeh 'uhutni inle. ²⁵ Nuhwheni chah Yak'usda be nus whúnih'en buts'uh hágde 'ink'ez ndai Yak'usda nuhtsuh whudelhdzulh khunek huba lhaídinla, 'i nuhwheni chah nuhwhuba 'int'ah. Ndi khunek huba lhaídinla, 'i Abraham chah tl'adélts'ut inle hoh Yak'usda, Abraham yulhni, 'Nts'u haínzut, 'en bugha dune ndi yun k'ut huba hoonzoo tele.' ²⁶ 'Ink'ez Yak'usda buYe' Sizi, 'en dinaidilhti hoh nuhwheni 'udechoo 'en nuhts'ú wheyalh'a. 'Et hoontsi' 'i be túne' aht'en, 'i whuch'a nanwhúninla. 'Et huwa Yak'usda Sizi 'udechoo nuhts'ítelh'a hoh nuhwhuba hoonzoo wule ka."

¹ 'Et 'awhuz Peter, John bulh dune hubulh yahulhtuk hoh, ndunnah nawhulnuk luglez whucho howuhinli bumoodih, 'ink'ez Sadducee hubuhútni chah, 'en hubugha nindel. ² Whuts'uhudutnik ndunnah nanah whel'a 'en Sizi dazsai 'ink'ez dinidija, 'et hubugha whebuhodulh'eh. 'Et hoh yaidla dinahudutédulh 'alha' hoont'ah. ³ 'Et 'om bun whuts'un tsak'eoobuha'ai 'aw 'et hulgħha ts'un ye 'un whezulh 'et huwa. ⁴ 'Et whunts'ih lhanah hubudánts'o Sizi dazsai 'ink'ez dinidija huba 'alha' hoont'ah suli. 'Aw 'et 'ilho huba 'álha' hoont'ah 5,000 bat'en suli. ⁵ 'Aw 'et 'om bun dzin ndunnah Lizwif k'une'buhul'en hubumoYak'usda be nus whúnih'enodih, hubutsuh whúdelhdzulh, 'ink'ez Moses be' dustl'us 'uk'ununa'úsduguz chah, 'en Jerusalem 'et 'ilhúhowezdel. ⁶ 'Ink'ez náwhulnuk degħa nus dezti, Annas hiyúlhni, Caiphas, John, Alexander, 'ink'ez náwhulnuk degħa nus dezti ts'ah hahande, 'en chah, ts'iyawh Jerusalem 'et 'ilhúhowezdel. ⁷ Whel'a 'en 'ink'ez ndun soo na'huyinla, 'en chah hububut níboninla 'ink'ez hubuhoodulhkut "Dáhla hoh ahla? Ndai be úlhtus, 'i be 'aht'i? Ndan boozibugha ndun dune soo na'uhla?" ⁸ Ndoni Peter 'o nus ulhtus yulhtsi hoh ndo búlhni, "Israel budune nuhwheni k'une'bulhú'en 'ink'ez hubutsuh whúdelhdzulh chah, ⁹ ndun dune nuchásyah, 'en ba 'ut'en unzoo, 'i 'uts'ínla, 'i 'ink'ez dats'ínla soo ná'ts'inla hoh, 'i k'an buka neoodulhkut. ¹⁰ 'Et huwa nuhwheni 'ink'ez Israel hits'uh hainzut 'en ts'iyawh soo cho ndun nuhwhudutésnilh, Sizi Nazareth whut'en, 'en lhdulalhgus k'eílhti, 'en Yak'usda nahighílhna. 'En boozibugha 'ink'ez whélhtus 'i be ndun nuchásyah, 'en soo ná'ts'inla. ¹¹ Sizi, 'en 'int'ah Yak'usda be' dustl'us 'uk'une'úzguz, 'i k'ut ndutni hoh bughi yatuk, 'Nuhwheni koo 'uwhulh'en tse 'ún dutelh'uz, 'i 'uja degħa nus tse tube buka daódit'ah, 'i suli.'

¹² Yinkak ndulhcho hoh Sizi Gri 'en bugħa zeh uzdutejih. 'Aw 'ufoon yé ulhtus, 'i bugħa uzdoojih għaít'ah. 'Et whuz na'a Yak'usda negħha ooni'ai." ¹³ 'Et naheyelh 'en t'ehonínzun Peter 'ink'ez John 'en 'ants'ih hoh dune, 'aw whechahodi'il 'uhint'ah. 'Aw chaníljut hoh yahulhtuk, 'et huwa huba hooncha, 'ink'ez t'ehonanzin Sizi Gri hiyulh nusudel hinli. ¹⁴ Ndun nuchásyah soo ná'uja 'ink'ez Peter John bulh hubuziħ siyin hinilħ'en hoh 'et huwa 'aw dája hudooni għaít'ah. ¹⁵ 'Et yatuk bakoo tinábonilh 'ink'ez hukw'u nahuhúlhye. ¹⁶ 'Ink'ez lhahoodulkut, "Ndunnah dune daóobuztelih? Jerusalem whut'en ts'iyawh t'ehonínzun degħa nus huwa 'ét'en, 'et 'uhuhóonla. 'Aw whuts'uts'oodódlai għaít'ah. ¹⁷ 'Et huwa 'aw 'o 'un 'ufoon t'eoħnoozeh whuch'a, ndunnah dune tube cho bube' ts'oonolħjoot Sizi Gri boozibugħa 'aw 'o 'un 'ufoon dune bulħ yáhoolhtuk gunih." ¹⁸ 'Et hubukoo danáboninla 'ink'ez hubuhútni, "Nts'oh dáhoont'ah 'et whunts'ih, 'aw Sizi boozibugħi yaoolhtuk, k'us dune húħodoolħ'eh ílah!" ¹⁹ 'Et Peter, John bulħ 'uhútni. "Nuhwhenich'oh hukw'u nuní nulhzut, nuhk'una'a tulih k'us Yak'usda buk'una'a tulih 'uztenilh? Ndet Yak'usda nalh ts'ah'un 'uhoont'ah? ²⁰ Nts'e na'a ts'uhōen 'ink'ez whulħ 'uts'udánts'o, 'aw 'i zeh huwu yalħts'oolhtuk huba' hoont'ah?" ²¹ Nahéyilh 'en soo khunek ulhtus, 'i be doo chah, "Sizi yugħu yaoolhtuk guniħ!" hubuhútni, 'ink'ez hubulanahudetnik. 'Aw dzuh nobuħoħolhdzut hoolah, dune ts'iyannah Yak'usda ba hodélhti njan dáhooja 'et huwa. ²² Ndun dune huwa 'ét'en 'i be soo na'huyinla, 'en dit lanezi (40) 'o 'un be naoodezut ho' 'int'ah.

Huba 'alha' hoont'ah hunooljut whuch'a ténahududli

²³ 'Aw 'et Peter, John bulħ hubulanahudetnik ibulħ, ndunnah náwhulnuk degħa nus dezti 'ink'ez hubutsuh whudelhdzulh chah, 'et njan daoobuzdáni, 'et hukw'u nahuwhulnuk. ²⁴ 'Et 'uhudánts'o hoh ts'iyawh lhġha Yak'usda

ts'un tenawhehúndunidli, "NeMoodihti nyun Yak'usda 'int'ah t'éts'onízun, yaz, ndi yun, yatoo, 'ink'ez bun k'ut chah ínla, 'ink'ez ndai bulh 'úhoonla, 'i tubulh. ²⁵ Netsuh whudelhdzulh David mba nye'ustlen, Ndoni bugha mba yalhtuk ínle hoh ndutni,

"Udun yun k'ut whut'en,

di ka howunílch'e? Di ka ndunnah dune Yak'usda ch'a yahálhtuk?

²⁶ Ndi yun k'ut hubudayi cho,

'en chah lhahudutedughan wheni.

Ink'ez dune k'une'nuwhuhul'en chah 'ilhúhowezdel Yak'usda 'ink'ez buChrist,

'en hich'a nidendel ho' hut'en."

²⁷ 'Et 'o 'un tenahudedli hoh 'uhutni, "Et 'alha' 'i be njan Jerusalem 'et Herod 'ink'ez Pontius Pilate bulh 'udun yun k'ut whut'en chah, 'et Israel hubuts'uh hainzut 'en chah, ts'iyawh 'ilhuhowezdel hoh nYe' Sizi lubeshi bughoh hoolah, 'en buka tsi hóodli neba yulhtsi, 'en hich'a nidendel 'et wheni. ²⁸ 'Et 'uda be ilhtus, 'i 'ink'ez nyeni be ndunízun inle hoh lhawhudinla. 'Et k'an 'et daóotenilh dini ínle, 'et whuz na'a ndunnah 'ilhuhowezdel nduwhútenilh.

²⁹ 'Et huwa neMoodihti, ne'hunoolhjoot, k'an dzin hubóozelhts'ai 'ink'ez 'aw chats'uníljut hoh wheni, mba' ts'ut'en, nghunek unzoo, 'i be yats'oolhtuk negha ooni'aih. ³⁰ 'Et huwa neMoodihti, be ílhtus 'i be dune soo na'inle 'ink'ez nYe' Sizi, lubeshi bughoh hoolah, 'en boozi be úlhtus, 'i bugha ts'iyannah hubunalhts'et hooncha 'ink'ez huwa 'ét'en tune' whut'en hóle." ³¹ 'Aw 'et tenahudedli 'ustl'e' 'uhudéja hoh, nyoh 'ilhúhowezdel ndulhcho noghésnai 'ink'ez Ndoni buyídelts'ut hoh 'aw chaníljut hoh Yak'usda bughunek 'i be hubulh yáwhehunilhtuk.

Huba 'alha' hoont'ah 'ilho lhula' hudut'en

³² Huba 'alha' hoont'ah 'ilho ts'iyannah lhula hudut'en. 'Aw hube'ildzun hoolah. Ndai hiyet'i 'ilho hiyé ne'ut'en. ³³ 'Aw chaníljut hoh whel'a 'en soo khunek ulhtus, 'i be, "alha' hoont'ah hoh Sizi neMoodihti 'en dinadija," hutni, 'ink'ez Yak'usda tube hubuts'un únzoo. ³⁴ 'Aw 'ilhunuh hubutah ye dunidzit hoolah. Ndunnah bukoo k'us yun lhadínt'ah huyit'i, whe' honket, ³⁵ 'et sooneya bugha yúlt's'uk, 'i whel'a 'en hubutl'aihinudzih. 'I 'ilho ndunnah 'en yedunidzuk 'en hubutl'áhíyudzih. ³⁶ 'Et whuz na'a 'uja 'ilhunuh dune, Joses hiyúlhni, 'en Levite 'int'ah, 'et Cyprus whuzdli, 'en whel'a 'en "Barnabas" hiyúlhni, ndi boozi 'i, "En nedzi ulhtus ilh'i," ni hoh 'utni. ³⁷ 'En chah yun ut'i, 'i be 'ónket 'ink'ez whel'a 'en hubutl'ayándzai.

5

Ananias bu'at Sapphira bulh dahútenilh 'et

¹ 'Et whunts'ih 'ilhunuh dune, Ananias hiyúlhni, 'ink'ez bu'at Sapphira bulh yun hiyít'i, 'i hiyé 'onket, ² 'ink'ez sooneya bulah dich'oh duba yílhchoot. 'Et bu'at chah t'eoónízun. 'Ink'ez bulah 'i whel'a 'en butl'ayándzai, 'ink'ez ndo búlhni, "Ndi sooneya 'i ts'iyawh 'int'ah." ³ 'Et Peter 'uyúlhni, "Et di ka Satan buk'úne' tant'en hukwa' nizun? 'Ink'ez lhe'dini sooneya buluh ílhchoot 'ink'ez Ndoni ts'un honts'it? ⁴ Ndi yun be 'óotehkulh whutsuh nuhwhe'ildzun unli ínle. Be 'óhket hoh buzooneya 'i chah nuhwhe'ildzun 'int'ah. 'Ink'ez di ka ndzi yuh hoh njan tinta' nint'en? Yak'usda ts'un honts'it 'aw dune ts'un ilah!" ⁵ Soo Ananias whudánts'o ibulh, nadélduz 'ink'ez dazsai. Ndunnah whulh údants'o tube cho whehunelhújoot. ⁶ Chilhkah 'en dahuníndel 'ink'ez hiyust'e highá' wezduz, tihinilhti, 'ink'ez whuyéhiyalhti. ⁷ 'Et tat hukw'e' hoonezt'o bat'en inle, 'et bu'at 'aw dáhooja t'echaoonízun hoh danínya. ⁸ 'Et Peter 'uyúlhni,

“Sudíni ndi sooneya, nki netl'ayándzai, 'i be 'óhket, 'i buzooneya, ts'iyawh tulih 'int'ah?” “A, ts'iyawh 'int'ah,” yúlhni. ⁹ 'Et Peter 'uyúlhni, “Et di ka nki bulh Ndoni ólhdzih hukwa' aht'en? Ndunnah chilhkah nki whuyéhiyalhti ndati hundelhúya, nyun chah whuz na'a tinanyotelhtelh!” ¹⁰ 'Et 'ahoh 'en chah yubut nálts'ut 'ink'ez dazsai. Chilhkah dahuníndel 'ink'ez 'en chah dazsai hinilh'en. 'Et 'en chah tihinilhti 'ink'ez buki hizih whuyéhiyalhti. ¹¹ 'Et huba 'alha' hoont'ah 'ink'ez 'uyoon dune tubulh ts'iyawh hodánts'o hoh degha nus whéhunelhújoot.

Whel'a 'en huwa 'ét'en tuné'hut'en

¹² 'Et dune tah whel'a 'en lhat huwa 'ét'en tuné'hut'en. Solomon budáti bet huwhútni, 'et ts'iyannah huba 'alha' hoont'ah whuz 'ilhuhowezdel. ¹³ Ts'iyannah soo hubughi yahalhtuk, 'et whunts'ih 'aw huba 'alha' hoont'ah 'uyoon dune hubutahoodelh ghaít'ah. Njan lhe'hója 'et huwa whehíntsaz. ¹⁴ Sizi Gri huba 'alha' yint'ah 'o nus hulai suli, dune chah 'ink'ez ts'ekoo chah. ¹⁵ Whel'a 'en huwa 'ét'en tuné'hut'en 'et huwa ti whuzih nduda hik'usútez 'i bulh tébuhulih, khun sih Peter hoh wheghah uyalh t'eh, butsen 'i whunts'ih buk'ut lhúyolts'it. ¹⁶ Lhanah hoh dune Jerusalem whunat keyah whut'en, 'en chah whusahándel. Nduda chah 'ink'ez ntsi' nudúdeh buyidélhts'i 'en chah whusábuhule 'ink'ez ts'iyawh soo ná'buhulh'en.

Whel'a 'en dzuh nubuhulhdeh

¹⁷ 'Aw 'et Lizwif náwhulnuk degha nus dezti, 'ink'ez yuts'ú dutnik, 'en Sadducee hinli 'en whel'a 'en tube bughe' hoolnih suli. ¹⁸ 'Aw 'et whel'a 'en hubuhílhchoot 'ink'ez dune tsak'edelhts'i 'et tsak'ebahanla. ¹⁹ 'Et whunts'ih 'et 'ulh'ek neMoodihti bulizas tsak'edelhts'i da'duteztan, tinaóobuninla 'ink'ez obúlhni, ²⁰ “Ahdulh 'ink'ez Lizwif hubuluglez whucho nudelhúya 'ink'ez ndi k'an be ts'úkhuna, 'i bugha hubulh yálhtuk.” ²¹ 'Et hidánts'o hoh, soo yilkai 'et Lizwif hubuluglez whucho dahuníndel 'ink'ez 'aw 'et dune wheoobohódulh'eh.

Whel'a 'en doo chah nahéyelh hububut niboninla

'Et Lizwif náwhulnuk degha nus dezti 'ink'ez yuts'úh dutnik, 'en Lizwif butsuh whúdelhdzulh, 'ink'ez nahéyelh chah, bughú nahézya yahatelhtuk hubugha. 'Et 'ink'ez whel'a 'en tsak'edelhts'i ts'ih Israel hits'uh haínzut 'en bukuwhenábuhalh'a hububut nibatelelh ka. ²² 'Et whuz hunindel hoh whel'a 'en tsak'edelhts'i 'en huhóolah hotelh'en. 'Et nahéyelh buts'un náhundel 'ink'ez ndo badáni, ²³ “Dune tsak'edelhts'i ts'ih lhghazzdindel hoh dá'denla 'aw 'et ndóohoont'ah. 'Ink'ez huwuhinli chah 'aw 'et huwuhinli 'et dá'uzdutez'ai hoh, 'aw ndunnah whel'a 'en huhoolah!” ²⁴ Luglez whucho huwuhinli bumoodih, Lizwif náwhulnuk degha nus dezti 'ink'ez Lizwif bunáwhulnuk moodih tubulh whulh 'úhudants'o hoh, 'et huwu yahulhtuk, “whel'a 'en dahúa simba 'uhint'ah?” hutni. ²⁵ 'Et 'ilhunuh dune danínya 'ink'ez ndo búlhni, “Whunulh'en ndunnah dune tsak'ehudelhts'i 'en nyooz luglez whucho ts'ih dune hubodulh'eh!” ²⁶ Luglez whucho huwuhinli bumoodih, budune tubulh whuz whéhandel, 'et ndunnah 'ilhuhowezdel hubé hunulhújut doo ka tse be hubuhooghan, 'et huwa whel'a 'en higha 'ooliyaz hoh nabuhílhchoot. ²⁷ 'Et whel'a 'en dunábuninla 'ink'ez nahéyelh hububut nebaninla 'ink'ez náwhulnuk degha nus dezti, 'et huboodulh'eh, ²⁸ “Soo khunek ulhtus, 'i be nuhwhuba nats'uhézya ínle ndun Sizi bugha dune huboodulh'eh ílah nuhts'utni inle. K'an whunulh'en lhe'ahja, Jerusalem ndulhcho hoh 'aw 'et hubodilh'eh. Ndun dune dazsai, 'et nuwheni nek'éhoh'ah hukwa 'aht'en!” hutni. ²⁹ Peter 'ink'ez 'uyoon whel'a 'en bulh whuz yahatelhtuk, “Yak'usda zeh buk'úne' ts'oot'en huba' hoont'ah, 'aw dune buk'úne' ts'oot'en huba cha'hóot'ah,” húbulhni. ³⁰ “Et

Sizi lhdulalhgus hiyendunilht'o hoh sélhghi, 'et whunts'ih netsuh whudel-hdzulh buYak'usda 'en nakhiyílhna. ³¹ 'Et Yak'usda yak'uz whenáyalhti dunal-hnih ts'ih buzih 'et yulhda, 'ink'ez Moodihti 'ink'ez neulhyis chah yulhtsi. 'Et Israel hubuts'uh hainzut hubeni náhondunoolelh, 'et sih bulubeshi huba 'ún yutoolhdelh. ³² 'Et nuwheni Yak'usda ne'ust'en ho'en ts'inli 'ink'ez huwu yats'ulhtuk. 'Ink'ez Ndoni, 'en Yak'usda k'une' 'ut'en hubugha iní'ai, 'en chah nela'ut'en," 'et hubúlhni. ³³ 'Et nahéyelh njan hodánts'o hoh, tube cho 'o nus hukwa ha'nilch'e k'et, whel'a 'en hubotuzelhgħelh hukwa' huninzun, 'et howu yahalhtuk. ³⁴ 'Et whunts'ih 'ilhunuh dune, Gamaliel hiyúlhni, 'en Pharisee unli ts'iyannah ba ncha, 'en hubutah didinya 'ink'ez ndo búlhni, "Astl'iyaz 'az hubehlelh." ³⁵ 'Et nahéyelh ndo búlhni, "Israel whudune huwa 'óohli hoh ndunnah dune né'bulh'en. ³⁶ Dzuh sa da inle 'ilhunuh dune Theudas hiyúlhni, 'en ninja 'Dune ncha usdli,' ni hoh dune bulh yálhtuk. 'Et 400 bat'en 'en hits'ú nedindel, 'et whunts'ih hizelhghi, 'ink'ez yuts'ú nidendel inle, ts'iyawh 'ants'ih lhtahanindel. 'Et nduhooja hoh hoolah huzdli. ³⁷ 'Et whuz na'a zeh 'uyoon dune chah nduja, Judas Galilee whut'en hiyúlhni, 'et dune naoodulto hoh 'et ninja. 'Et chah lhanah dune hits'ú nidendel. 'En chah hizelhghi 'ink'ez yuts'ú nidendel ínle, 'en chah ts'iyawh lhtanahundel. ³⁸ 'Et ndúhooja inle 'et huwa nuhwhudúsni, ndunnah dune hoonli 'oboohleh gunih, hubuts'uh hachaoozah'ak! 'Et dich'oh duba 'uhut'en 'ink'ez whunohodulh'eh t'eh, 'ahoh hoolah naóotedle. ³⁹ 'Et whunts'ih Yak'usda ndi 'ut'en k'ah ts'ih hubugha ini'ai t'eh, 'aw buch'a' oolhdeh għaít'ah, doo ka sih Yak'usda ch'a ne'aht'en wahle." ⁴⁰ 'Et nahéyelh huba 'alha' deja. Whel'a 'en danábaninla 'ink'ez "Huboolhtas," hubuhútni. 'Ink'ez hukw'elh'az, "Sizi boozu bugħa dune huhodoolħ'eh gunih!" hubuhútni, 'ink'ez bulanahudetnik. ⁴¹ 'Et whel'a 'en nahéyelh bugħu tħinahundel. Yak'usda Sizi Gri ba dzuh nuhude 'et huba so' huldzoo dich'oh 'et na'hundunudzun, 'ink'ez howu nélhnik. ⁴² 'Et dzin totsuk Lizwif luglez whucho 'ink'ez dune bukoo chah, Sizi, 'en Yak'usda buChrist, 'en bugħa dune huhodulħ'eh 'ink'ez khunek unzoo, 'i be dune hubulh yahúlhtuk, 'aw 'ustl'e' cha'hudínil.

6

Skwunlai 'o 'at nanah dune, ndunnah whel'a 'en la'hut'en

¹ 'Et hoh da yugħa hoodul'eh 'o nus hulai suli. Yugħa hoodul'eh Lizwif nawh hudedowħ, Greek hubughunek k'eyahalhtuk 'ink'ez Lizwif dich'oh hubughunek k'eyahalhtuk, 'en lħts'un lhenah 'ahúdeja. Greek k'eyahalhtuk hutni, "Netsandelh 'aw hubugħa cha'hus'ai dzin totsuk sooneya dune hiye la'ut'en, 'i whutahudzih teh." ² 'Et lanezi 'o 'at nanah whel'a 'en Sizi Gri yugħa hoodul'eh, ts'iyawh 'ilhubuhuwezdla 'ink'ez 'uhutni, "Aw cha'hoozoo Yak'usda bugħunek be yats'ulhtuk whulazdutetni 'ink'ez sooneya dune be la'whut'en, 'i zeh 'uts'oħħen għaít'ah. ³ 'Et huwa sulħutsinkah skwunlai 'o 'at nanah dune nuhtah ndunnah t'ebunáhzun Ndoni hubuyidínda 'ink'ez huwhunih chah 'uhint'ah 'utahāoobahle 'en ndi 'ut'en 'uhiyoolħ'en wheni 'en huwu hinli hubuts'oolħtsilh. ⁴ 'Et nuwheni tenazdudli 'ink'ez Yak'usda bugħunek be yáts'ulhtuk, 'et zeh 'uts'otelħ'ilh," hubuhútni. ⁵ 'Et 'ilħuħowezdel ts'iyawh whel'a 'en huba so' hudeja, 'et Stephen 'en 'utahahúyalhti soċċo be 'alha' hoont'ah ut'i, 'i 'int'ah 'ink'ez Ndoni buyudínda. 'Et Philip, Prochorus, Nicanor, Timon, Parmenas chah, 'ink'ez Nicolaus, 'en 'udun yun k'ut whut'en, Antioch whut'en 'int'ah, 'en Lizwif ts'ú nenadenja inle, 'en 'utahaóobahanla. ⁶ 'Et whel'a 'en hububut nébaninla hoh whel'a 'en huba tenahudedli 'ink'ez hubuk'událnik.* ⁷ 'Ink'ez Yak'usda bugħunek 'aw 'et ndul-

* ^{6:6} 'Et whuz na'a ts'yanah t'ehinízun, hubulh lhulh lhugħa hinli.

hcho t'enédzin. Yugha hoodul'eh, Jerusalem whut'en chah 'o nus hulai huzdli. Lhanah Lizwif hubunáwhulnuk 'en chah Yak'usda bughunek hiyílhchoot.

'Aw 'et Stephen hiyílhchoot

⁸ 'Et Stephen be 'alha' hoont'ah 'ink'ez Ndoni ye úlhtus, 'i be dézbun, 'i bugha dune tah hooncha huwa 'ét'en túne'ust'en. ⁹ 'Et whunts'ih bulunah dune hich'a nídendel, 'en Lizwif Cyrene 'ink'ez Alexandria ts'ih hahándel 'uhint'ah. 'En, 'et 'ulhna hinli hubulanadetnik 'ilhunuh luglez 'et whehúhoozi 'et 'il-huhowezdel. Uyoon chah Cilicia 'ink'ez Asia ts'ih hahándel, 'en chah Stephen hiyenah 'utni. ¹⁰ 'Et whunts'ih Stephen, Ndoni bugha whunih k'et yalhtuk, 'et huwa 'aw hich'a oolhdeh ghaít'ah. ¹¹ 'Et 'ants'ih hoh dune, 'en huba k'elha háwhulhtsi Stephen, Moses bughunek 'uk'une'úsduguz, 'i 'ink'ez Yak'usda ch'a yalhtuk hudooni ka. ¹² 'Et nduhútni hoh, hubutsuh whúdelhdzulh, Moses be' dustl'us 'uk'ununa'úsduguz chah, 'ink'ez 'onghunnah chah huba hodi'ai, 'en ts'iyawh Stephen hiyulh húnilch'e. Highu nindel, hiyílhchoot, 'ink'ez naheyelh hububut nihínilhti. ¹³ 'Et bulunah dune hiba hoots'it ka whusaóobahanla 'ink'ez naheyelh njan ndo buhútni, "Ndun dune neluglez whucho whudezti 'ink'ez Moses huwa néulh'a 'ahoolhyez whuch'a yálhtuk. ¹⁴ Njan ndutni hoh uzdits'o. 'Ndun Sizi Nazareth whut'en neluglez whucho nighthunduneyus 'ink'ez Moses khunek netl'aída'ai, 'i chah ts'iyawh 'uts'un na'a zeh na'whutelih,' 'et ndutni hoh uzdits'o." ¹⁵ Ndunnah nahúheyelh ts'iyawh Stephen 'en zeh hínih'en bunen unzoo k'et 'ants'ih lizas nen 'et ndunt'ah.

7

Stephen wheoobuneltan nts'ena'a Yak'usda Abraham 'utahayalhti

¹ 'Et Lizwif bunáwhulnuk degha nus dezti Stephen yoodulhkut, "Et ndunnah 'alha, hutni hoh ih hutni?" ² 'Et Stephen 'uyúlhni, "Sulhutsinkah 'ink'ez 'abákah soo zúlhts'ai! Netsuh whudelhdzulh Abraham 'awhuz Mesopotamia usda, Haran ts'ih natedalh whutsuh hoh, Yak'usda buts'uh hayánduz, 'et bunalhts'et hawhélts'ut. ³ 'Et Yak'usda 'uyúlhni, 'Nyuratnekah 'ink'ez nkeyah chah whuch'a sinyih 'ink'ez nts'e keyah whúnyuntelhtun whuz tonya.' ⁴ 'Et Abraham, Chaldea yun k'ut whuch'a síya 'ink'ez Haran ts'ih ninya. 'Et hukw'elh'az be'abá dazsai hoh ndi yun k'an buk'udelhúts'i, 'i Yak'usda whuz wheyálh'a. ⁵ 'Aw Yak'usda yun ntsolyaz whunts'ih yughá chai'al, 'et whunts'ih yuts'ú yoozi hoh ndi yulhni, 'Nyun 'ink'ez ndan nyehudútedulh, 'en ndi yun hubube'hooldzun tele.' 'Et hoh da Yak'usda ndi yulhni hoh Abraham 'aw buzkeh hoolah inle. ⁶ 'Et Yak'usda ndi yulhni, 'Nts'ahahutedulh 'uts'un yun k'ut ts'ih whuz 'ulhna huteleh 'ink'ez 400 naoodezut 'et dune dzuh nubutelhdoh.' ⁷ 'Et Yak'usda ndo búlhni, 'Ndunnah 'ulhna hubuhit'i sich'oh huba nahutesyeh. 'Et hukw'elh'az whuch'a nahúsdel 'ink'ez njan keyah, si zeh sk'úne' hutet'en.' ⁸ 'Et Yak'usda Abraham ndi ye yuts'u nahezya, 'i bugha buts'uh huhaínzut, 'en hika dune unli, 'i k'ut hubuhít'us. 'Et whuz na'a Yak'usda hiyulh 'ilhunuh huzdli. 'Et Abraham buye' Isaac whuzdli 'ink'ez whulh lhk'udit dzin 'et hiyúzt'us. 'ink'ez Isaac chah buye' Jacob hoh Jacob, 'en chah ndunnah buye'kah lanezi 'o 'at nanah, 'en chah netsuh whudelhdzulh whunih ndúbuhiinla. ⁹ 'Et doo chah nuhtsuwhudelhdzulh, Joseph bulhutsinkah, 'en highe 'oolnih 'et Egypt ts'ih hiye 'ónket 'ulhna tele ka, 'et whunts'ih Yak'usda yulh 'út'en,* ¹⁰ 'ink'ez dzuh nutezut whuch'a nayulhti. 'Et Pharaoh, Egypt hubudayi cho, yubut ninínya hoh Yak'usda whunih chah yulhtsi, 'ink'ez hubudayi cho yót'i ka 'et chah yugha óoni'ai.

* 7:9 Hubutsuhda 'en yun k'ut Egypt 'et hudalts'i.

'Et huwa hubudayi cho Pharaoh 'en bukoo chah 'ink'ez keyah dulhcho hoh chah whumoodih yulhtsi. ¹¹ 'Et Egypt 'ink'ez Canaan whulh dulhcho hoh dai whuzdli. Tube dune dzuh nudeh k'et netsuh whudelhdzulh 'aw ts'uyi, 'i nahóolelh ghaít'ah. ¹² 'Et whulh údants'o Egypt ts'ih whuz ts'uyi, 'i 'ilhówezdla 'et buzkeh, netsuh whudelhdzulh, 'en 'udetsah whuz whebalh'a. ¹³ Whúlh nat hanahedel hoh 'et Joseph bulhutsinkah ts'un t'éoonedzin 'ink'ez hubudayi cho Pharaoh 'en Joseph bulh dunékah whulh údants'o. ¹⁴ 'Et Joseph be'abá Jacob yuts'ót'l'a khunek i'ai, dich'oh 'ink'ez dunatnékah teh ts'iyawh whusahóodelh, hubúlhni. 'Ilho skwunlai 'o 'at nankoh lanezi 'o 'at skwunlanah, (75) 'en hinli. ¹⁵ 'Et Jacob Egypt ts'ih hunindel, didut chah 'ink'ez netsuh whudelhdzulh chah 'et hudálts'i 'et keyah yahadla. ¹⁶ Buyust'e 'et keyah Shechem huwhúttni ts'ih whuz lhghu naoobadinla. 'Et whutsuh da Abraham 'et keyah, ndunnah Hamor whut'en hubuts'un yunyaz onket inle, 'i k'ut whuyo buhanla. ¹⁷ 'Et ndi yun Yak'usda Abraham ye yúts'u nahezya, 'i beghah whúdezulh 'ink'ez nedune Egypt hudemts'i 'o nus hulai suli. ¹⁸ 'Et 'ants'ih 'uyoon hubudayi cho suli. 'En 'aw Joseph be 'ut'en k'ah 'aw t'éwhunúszun. 'En Egypt whut'en bumoodih suli. ¹⁹ Nedune hubé' whulhts'it 'ink'ez netsuh whudelhdzulh dzuh nubulhdeh hoh k'anya huhonle 'en tébuhoolelh yahódlah ka, 'et whuz na'a hubudayi cho Pharaoh hubúlhni. ²⁰ 'Et hoh da Moses whuzdli, 'en tube dune unzoo 'ink'ez tat sanun 'et be'abá bukoo hinalhyi. ²¹ 'Aw 'et téhinilhti hoh Pharaoh butse' 'en ílhchoot 'ink'ez dich'oh buyaz k'una'a yunelhyi. ²² Egypt whut'en ndai hiyé whunih, 'i ts'iyawh whehiyoodalh'i. 'Et dune ncha suli bughunek bugha 'ink'ez be 'ut'en chah. ²³ 'Et dit lanezi be naoodezulh suli hoh ndun Israel hubuts'uh hainzut Moses, 'en dudulh whut'en, 'en hubutah nanátedalh hukwa' nínzun. ²⁴ 'Et whuz ninya hoh 'ilhunuh bulh whút'en, 'en yunilh'en hoh ndun Egypt whut'en dzuh nuyulhdzut 'en yuk'ut dune hoh k'ut duja 'ink'ez ndun Egypt whut'en yuzelhghi. ²⁵ Moses dich'oh ndunínzun, 'Sudune 'en njan t'ewhunuszun si Yak'usda buts'un sútelh'a, si sugha hubulánáhúdútetnih ka.' 'Et whunts'ih 'aw t'echaoohonízil Moses Yak'usda buts'ú wheyalh'a. ²⁶ 'Et 'om bun dzin 'et nanah Israel hubuts'uh huhanzut lhehút'us 'et, 'Dah!' hubúlhni, 'Soo zúlhts'ai sulh dune lhulhutsin ahli, di ka lhéht'us?' hubúlhni. ²⁷ 'Et ndun bughá whut'en Moses 'un be' yunilhtsut 'ink'ez, 'Ndan nemoodih 'ink'ez nahéylh nyulhtsi hoh 'int'en? ²⁸ Hulhda ndun Egypt whut'en lhé' inla sélhghi! Whuz na'a si chah sutuzalhghelh ninzun ho ih 'int'en?' yúlhni. ²⁹ 'Et Moses whudánts'o hoh, 'et whetsílhya, 'ink'ez keyah Midian huwhúttni ts'ih whuz whinya, 'et dune unli, 'ink'ez 'et nanah buye'kah whúzdli. ³⁰ 'Et doo chah dit lanezi naoodezulh nadle hoh, nyooz dzulh Sinai hiyúlhni, 'i buzih dune chahóot'ih ts'ih 'et whus delhtan, 'i dézk'un 'i tah neMoodihti bulizas yá'en. ³¹ 'Et Moses ba hooncha ho'en 'et whuz wheínya, soo cho whuntelh'ilh ka. 'Et Yak'usda yulh yatéltuk hoh ndutni, ³² 'Si 'ust'ah, ntsuhda hubuYak'usda usdli. Abraham 'en buYak'usda 'ust'ah, Isaac, 'inkez Jacob chah buYak'usda 'usdli.' Moses nuljut k'et dulduz 'ink'ez 'aw whunoohl'en ghaít'ah. ³³ 'Et Yak'usda ndi yulhni, 'Ke hain'es, njan yun whudézti 'int'ah hukw'usinyin. ³⁴ Egypt hudemts'i sudune hubunulh'en ndulhcho, 'i be dzuh nuhudeh 'ink'ez hubudústs'o lhe'hoolcho, 'i be tehududlih 'en hubutelhyih 'et wheni 'usja ndus háya. 'Anih 'aw 'et Egypt ts'ih nyutélh'alh.' ³⁵ 'Et Stephen 'o 'un ndutni, "Moses 'en 'int'ah Israel hubuts'uh huhanzut hich'a nalhúya inle, 'Ndan nemoodih 'ink'ez nahéylh nyulhtsi ho ih 'int'en?' hiyúlhni inle. 'En 'uyínlá Yak'usda hubuts'ítelh'a ndun lizas whus dézk'un, 'i tah ya'en, 'en yula'ut'en hoh Moses bumoodih 'ink'ez whuch'a nabuzdla yulhtsi. ³⁶ 'Et hooncha 'ink'ez huwa 'ét'en tune'út'en, 'et huwa Egypt whut'en hubula k'éhanabanla,

'et yatoo dulk'un huwhútni, 'ink'ez 'et dit lanezi naoodezulh (40), 'et dune chahóot'ih hoh nahudelh inle.³⁷ Moses 'en 'int'ah Israel hubuts'uh huhanzut hubúlhni hoh ndutni, 'Yak'usda be nus whúnih'en, sundult'ah, 'en Yak'usda nuhts'ítelh'ah. Nuhkeyah 'ilhunuh 'en 'utenilh. 'En hubóozolhts'a.'³⁸ Moses 'en dune chahóot'ih 'et Israel hubuts'uh huhanzut hiyulh 'ílhodulh inle. Netsuh whudelhdzulh hubutah 'et'en 'ink'ez 'en zeh 'int'ah Sinai dzulh k'ut lizas yulh yaílhtuk inle Yak'usda bughunek netl'aídoo'ah ka. Ndi Yak'usda bughunek bulatah hoolah ho' 'int'ah.³⁹ 'Et whunts'ih netsuh whudelhdzulh Moses hik'éne' oot'en hukwa cha'hunízun, hich'a nalhúya, 'ink'ez Egypt ts'ih nahutedulh zeh hukwa' hunízun.⁴⁰ 'Et huwa Aaron 'uhiyúlhni, "Uk'éltsi neba inleh! Neba yak'usda wule huba. 'Et ntse newhuntelhtun. Ndun Moses newhusaínla, 'en dája simba 'aw t'ets'onízun 'et huwa.'⁴¹ Hoh da 'et musdusyaz k'edeltsi 'uhínlá inle 'ink'ez Yak'usda bukw'uzdai k'ut hits'e' delhk'un. 'Et huhóont'i hoh honélhnik, hubula be nyoo 'uhiyínlá 'et huwa.⁴² 'Et Yak'usda hubuch'a nálhú'a 'ink'ez n'un hubutelhdel nduk yaz sum 'i hits'un téni' noolhzin ka. 'Et hukwa Yak'usda be nus whúnih'en 'i k'ut 'uk'une'úsguz inle hoh ndutni,

'Dune Israel buts'u huhanzut,

njan dune chahóot'ih dit lanezi naoodezulh whutah ndi khunai uhghan
'aw si suts'un ilah Yak'usda bukw'uzdai k'ut dulhk'un ho' 'int'ah.

⁴³ 'Et nuhyak'usda Moloch 'i nuhwhuba luglez 'uh'en nuhle 'ink'ez sum k'edeltsi 'i chah nuhyak'usda Rephan hiyulhni,
'i 'int'ah hoh 'uk'éltsi 'uhla, 'i buts'un téni'nulhzun, 'et huwa 'aw 'et Babylon
'o 'un ts'ih nuhwhutelh'ah.'

⁴⁴ 'Et Stephen 'o 'un ndutni, "Et netsuh whudelhdzulh dune chahóot'ih ts'ih bun choyah Yak'usda hubeghah 'int'ah, 'i nahíyule. 'Et nts'e na'a Moses Yak'usda ndi yúlhni hoh whuz na'a 'uyínlá, nts'e na'a 'uk'e'whéltsi 'et Moses whínelhtan inle.⁴⁵ 'Ink'ez k'at le netsuh whudelhdzulh bun choyah hububákah hubutl'ahúho'ai. 'Et Yak'usda 'udun yun k'ut whut'en yun k'unábuntézyoot hoh hubudune ndi yun hiyílhchoot inle. 'Ink'ez ndi bun choyah 'et whuz'ai Joshua hiyulh tezdel David whusatéyah whuts'un.⁴⁶ 'En Yak'usda ba unzoo, 'en 'et Yak'usda yoodulhkut, "Aw ih 'udun koo mba níhos'ah ghaít'ah? 'Ilhuz wheni 'et whuté'ah.' Ndun Yak'usda 'en netsuh whudelhdzulh Jacob, 'en buYak'usda 'int'ah.⁴⁷ 'Et whunts'ih Solomon 'en 'uja Yak'usda ba koo 'uhóonla inle.⁴⁸ 'Et whunts'ih degha nus Yak'usda dezti 'aw dune bukoo 'uhóonla chaídah. 'Et Yak'usda be nus whúnih'en inle 'et ndutni,⁴⁹ 'Moodihti utni, yak'uz whuts'un ts'iyawh k'úne' whul'en 'ink'ez ndi yun suke buk'usíla huba' 'int'ah.

Nts'e na'a 'usutelhlilh koo suba 'uwhutehlilh 'ink'ez nts'e na'a natelhúyis,
'et suba niootéh'ah?

⁵⁰ 'Aw t'eónuzáhzun sich'oh ts'iyaintsuk 'usdla inle,' ni hoh utni."

⁵¹ 'Et Stephen 'o 'un ndo búlhni, "Ndi Yak'usda bughunek be nohwhulh yalhtuk, tube 'uts'un únuhzun ahli hoh 'aw oozólhts'a hukwa cha'nuzáhzun 'ink'ez Yak'usda 'aw bulh 'ilhunuh cháhlah! Nuhwheni chah nuhtsuh whudelhdzulh dahánt'e 'et ndaht'ah. Ndoni buk'úne' teht'en 'aw hukwa cha'náhzun!⁵² Ts'iyannah Yak'usda be nus whúnih'en, 'en nuhtsuh whudelhdzulh hube' huzúla inle. 'Ink'ez ndunnah Yak'usda be nus whúnoohl'en, ndun Yak'usda ba ts'ah'un na'a 'int'ah whusatéyah hubugha hubunalh hútni hoh, nuhtsuh whudelhdzulh hizelhghi inle. Ndun 'en 'int'ah be 'óhket 'ink'ez sélhghi inle.⁵³ Nuhwheni 'uht'ah, Yak'usda bughunek bulizas nuhtl'aídai 'et whunts'ih 'aw buk'únucha'aht'il!" hubúlhni Stephen.

⁵⁴ 'Et dune nahéyelh Stephen hidánts'o hoh 'o nus huyulh húnilch'e k'et 'et huwa hituzelhghelh hukwa' huninzun. ⁵⁵ 'Et whunts'ih Ndoni Stephen soo ye yudílts'ut, nduk yak'uz ts'ih yutá'en hoh Yak'usda buts'uh hayánduz yutelh'en 'i bulh 'ink'ez Sizi Yak'usda nalhnih ts'ih yughu siyin. ⁵⁶ 'Ink'ez utni, "Nduk lhe'hója whunulh'en, yak'uz da'dutézkez 'ink'ez yinkak dune ye'† Yak'usda nalhnih ts'ih yughu siyin hoh whunulh'en!" ⁵⁷ 'Et soo 'uhultus hoh 'uhúldzul 'ink'ez hubudzo whudahúdelhnik 'ink'ez ts'iyawh 'ilho hiyúlh telhtsut. ⁵⁸ 'Et Jerusalem 'et tinahínino, 'ink'ez tse be whehiyoonilh'uz. 'Et ndunnah Stephen nehínulh'uz† nahiyits'uz, 'i ts'ahahiyyelya, 'et dune chilh, Saul hiyúlhni, 'en zih nihíninla yughole ka. ⁵⁹ 'Et whuz na'a zeh Stephen tse be nuhínulh'uz 'ink'ez neMoodihti yulh yálhtuk, "Sizi neMoodihti suzul ilhchoot!" yúlhni. ⁶⁰ 'Et dugwútsi be nenínya 'ink'ez soo 'ultus 'utni, "SMoodihti ndi lubeshi 'uhiyínla, 'i huba 'un yutolhdelh!" Ndudeja 'ink'ez dazsai.

8

¹ 'Et ndun Saul hiyeni k'una'a 'ayínla.

Saul ndunnah huba 'alha' hoont'ah 'en hube' zula

'Et dzin zeh Jerusalem ts'ih Sizi ba 'ilhuhowezdel bube' túzelalh 'ink'ez dzuh nobutelhzut. 'Et ts'iyannah huba 'alha' hoont'ah Judea 'ink'ez Samaria whut'en bukeyah ts'ih whuz ts'iyawh whutabanényoot. Whel'a, 'en zeh 'aw 'et hudemhts'i. ² Bulunah soo Yak'usda ts'un téni' hunilhzun, Stephen whuyihiyalhti tube hubugha budzi únduda 'ink'ez hutso. ³ 'Et whunts'ih Saul, Sizi Gri bugha 'ilhuhowezdel hoolah hubutelhtsilh hukwa' ninzun. Koo totsuk dune 'ink'ez ts'e koo chah tíbugus 'ink'ez tsak'eoobulih.

Ndi khunek unzoo, 'i Philip ye yátelhtuk

⁴ 'Aw 'et huba 'alha' hoont'ah ndulhcho hoh nuhúdelh 'ink'ez ndi khunek unzoo, 'i hiye yálhtuk. ⁵ 'Et Philip 'en keyah Samaria whuz'ai whuz ninya 'ink'ez Christ, 'en bugha dune hubulh yálhtuk. ⁶ 'Et 'ilhuhowezdel Philip yáhtuk hidánts'o 'ink'ez huwa 'ét'en tune'út'en chah hinilh'en hoh, ts'iyawh t'ehudusnih 'ink'ez hiyoozélhts'ai. ⁷ Ntsi' nududeh, 'i buyáh hanainanyoot hoh 'ahúlzul. 'Ink'ez Ihanah dune dechadusnik chah 'ink'ez dzuh nuhudelh chah, 'en soo naóo'balk'en. ⁸ 'Et huwa nyoh keyah Samaria whuz'ai ts'iyawh huhóont'i. ⁹ 'Et whunts'ih whuz 'ilhunuh dune, Simon hiyúlhni, 'et usda. 'En 'ahoolhyez duyún 'ink'ez huba né'dulhde 'et hoh, "Si dune uncha 'ust'ah!" hubúlhni hoh Samaria whut'en huba hooncha. ¹⁰ 'Ink'ez ts'iyannah keyah hudemhts'i soode'a 'int'ah 'ink'ez tel'ennah chah hinilh'en 'ink'ez hiyoozélhts'ai. 'Et, "Ndun Simon 'en 'int'ah Yak'usda ba hooncha túne'ut'en unli," hutni. ¹¹ Soo sa hoh huba duyún unli 'ink'ez huba hooncha 'et huwa bughunek tube hiyoontun. ¹² 'Et whunts'ih Philip ndi khunek unzoo Yak'usda dune k'úne' bul'en hubugha 'ink'ez Sizi Gri boozi bugha, 'i chah ye hubulh yáhtuk inle, 'en 'o nus huba 'alha' utni, 'et huwa dune 'ink'ez ts'ekoo chah, ts'iyawh too bé' hulya. ¹³ 'Et huwa Simon 'en chah buba 'alha' hoont'ah suli. 'Et too be' úlya hoh Philip yulh zeh 'ut'en. Nts'oh huwa 'ét'en 'ink'ez hooncha tune'út'en ts'iyawh 'et hubugha Simon buba hóncha. ¹⁴ 'Et whel'a 'en Jerusalem ts'ih whulh 'uhúdants'o Samaria whut'en Yak'usda bughunek hiyílhchoot, 'et Peter 'ink'ez John bulh whuz whebahalh'a. ¹⁵ 'Et whuz huni'az hoh 'et buba 'alha' hoont'ah Ndoni buyudóolts'it ka huba tenahudedli. ¹⁶ 'Awhuz Ndoni buyúdults'it, Sizi boozi 'i bugha zeh too be' hulya. ¹⁷ 'Et Peter 'ink'ez John bulh buk'ehúdilnik hoh 'aw 'et Ndoni buyídelts'ut. ¹⁸ 'Et Simon

† ^{7:56} Sizi Gri whuz na'a chah hiyóozi. † ^{7:58} Ndun ninulh'uz, 'en Stephen hich'a halhtuk inle 'uhint'ah.

hubunilh'en whel'a 'en dune hubuk'ut delhúnik t'eh Ndoni hubuyídults'uk. 'Et Peter John bulh sooneya hubugha óo'alh hukwa' bulh'en. ¹⁹ 'Ink'ez ndo búlhni, "Si chah ndi be ts'ílhtus, 'i sughu náh'ah 'et huwa ndan buk'udelhúnik 'en chah Ndoni buyudóolts'it." ²⁰ 'Et whunts'ih Peter 'uyúlhni, "Ndi Yak'usda negha óóni'ai sooneya be ootankulh ninzun t'eh, nyun 'ink'ez nyuzooneya bulh hukw'elha dutéhk'un ho' hoont'ah! ²¹ Ndi ne'ut'en 'aw nela'olh'en huba cha'ínt'ah 'ink'ez Yak'usda nalh 'aw ndzi ts'ah'un cha'ít'ah 'et huwa, 'ink'ez 'aw nets'ún dentni ilah cha' 'unint'ah. ²² Njan tink'us na'a nuní ninzut lht'an'anindaih 'ink'ez neMoodihti buts'un ténadlini njan dunínzun, khun teh mba 'ún whutoolhdelh. ²³ Whuz na'a t'enyunúszun, daint'ah 'oolnih ntsi' dembun 'ink'ez lubeshi 'ustl'e' onleh ghaít'ah!" ²⁴ 'Et Simon, 'en John 'ink'ez Peter ndo búlhni, "NeMoodihti ts'un sba tenadahdli njan daootenilh dahni, 'et 'aw sts'un nducha hosne." ²⁵ Soo bughunek ulhtus hoh neMoodihti bughunek ghu yáhálhtuk hukw'elh'az John 'ink'ez Peter bulh Jerusalem ts'ih nahunt'az. He'us hoh Samaria whutah keyah whuyaz totsuk khunek unzoo, 'i be dune bulh yahúlhtuk.

Philip, ndun Ethiopia moodih ye yátelhtuk

²⁶ 'Et neMoodihti bulizas, 'en Philip yulh yátelhtuk hoh ndi yúlhni, "Lhadíntneh 'ink'ez ndet Jerusalem ts'ih ti n'az Gaza ts'ih, whuz ti inyalh," whuz dune chahóot'ih ts'ih. ²⁷⁻²⁸ 'Et Philip lhadúja 'ink'ez whuz whenya. 'Et sih Ethiopia dune, 'en eunuch hubuhútni,* 'en koo ts'ih nádalh. Ethiopia hubudayi cho ts'eke† 'en ba sooneya ghunli dune ncha hiyilh'i. Jerusalem ts'ih Yak'usda ts'un teni' noolhdzin ka whuz nusíya, wagon be whuz de hanaja. Hoh wheghah élhbus hoh Isaiah, Yak'usda ba nus whúnoohl'en, 'en yuk'une'úzguz, 'i yuk'oyalhtuk. ²⁹ 'Et Ndoni Philip yulh yailhtuk, "Whuz buts'inyalh 'ink'ez wagon buzih k'ut tonya," yúlhni. ³⁰ 'Et Philip yughulgai 'ink'ez Isaiah yuk'úne'uzguz 'i k'ut 'uk'eyalhtuk yuduzts'ai, 'et yoodulhkut, "Ndai buk'uyailhtuk 'i daja ni, 'et nt'eoonínzun ih?" yúlhni. ³¹ "Nts'e na'a t'entészin? Dune hiye súnulhtun t'eh, 'et sih daja ni hoh 'utni nahós'ah," yúlhni. 'Ink'ez Philip, "Sughu denyih, 'ink'ez suzih sinda," yúlhni. ³² Ndi Yak'usda bughunek buk'une'úsduguz, 'i ilhunuh 'et hukw'e yalhtuk ndutni hoh, "Sheep hitzelhghelh ts'ih hítelhti, 'i soo dant'ah,

'ink'ez sheeypyaz hahiteghus teh t'edusnih,
'et ndunt'ah 'aw yachatílhtih.

³³ Ts'iyannah nalh 'et hooncha hoh hukwayá hoonli tuné' hiyulh'en,
'ink'ez 'aw ts'ah'un na'a nucha'hiyilh'il.
Ndi yun k'ut ye khúna 'i hubugha yílchoot, 'et huwa híts'u hainde 'aw dune t'ehinóozin ghaít'ah."

³⁴ 'Et ndun eunuch Philip 'ulhni, "Sudíni ndan Yak'usda be nus whúnih'en ndan 'ulhni, dich'oh tulih na'dudútni k'us 'uyoón dune tulih 'ulhni?" ³⁵ 'Et Philip yaghénilhtuk ndi dune yuk'uyailhtuk, 'i Yak'usda bughunek 'et ho' dini hoh khunek unzoo, 'i Sizi bugha ts'iyawh yudáni. ³⁶ 'Uhelhbus hoh too hoonli 'uhunilhbaz. 'Et ndun moodih 'utni, "Njan too hooni. Dáhoont'ah huwa 'aw too be' óosneh ghaít'ah?" ³⁷ 'Et Philip 'uyúlhni, "Ndzi ndulhcho, 'i be, be 'alha' hoont'ah int'i t'eh, 'et too be' talnílh." 'Et 'uyúlhni, "Sizi Gri 'en Yak'usda buYe 'int'ah, 'et suba 'álha' hoont'ah!" ³⁸ 'Et ndun eunuch be ne'ulbas 'ilhuz nenintan 'ink'ez nahult'ah Philip ndun eunuch bulh dehahá'az 'ink'ez tahá'az. 'Et Philip ndun eunuch too be' yinla. ³⁹ 'Et tooz hanáhet'az ibulh Philip Ndoni

* **8:27-28** Ndi boozí, eunuch, 'i dune 'aw ts'ekoo t'aghóonalh ghaít'ah hiyulhtsi, ni ho 'utni. † **8:27-28** Ndunnah hubudayi cho ts'eke, 'en Candace hiyúlhni.

be whedánde 'ink'ez ndun eunuch 'aw 'o 'at nachayít'il hoh didut tube cho whunelhnik hoh dukeyah ts'ih whena'elbaz. ⁴⁰ 'Ink'ez Philip keyah Azotus huwhútni 'et nuya hoh hitelh'en. 'Et whunat keyah wheyaz whut'en keyah Caesarea ts'ih teyalh whuts'un, ts'iyawh khunek unzoo, 'i be hubulh yálhtuk.

9

Saul, Sizi Gri ts'u nalhú'a

¹ 'Et whezulh hoh Saul neMoodihti yugha hoodul'eh húnich'e k'et ts'iyawh hubuteghan huwu yailhtuk, 'et Lizwif náwhulnuk degha nus dezti ts'ú whenya, ² 'ink'ez yoodulhkut keyah Damascus huwhutni ts'ih Lizwif hubuluglez be nawhulnuk duba buts'un k'e'ooges buts'u húkwa' 'utni, ndan Sizi k'una'a nuninuzut ts'iyawh dune 'ink'ez ts'ekoo chah tsak'eoobutelelh, 'ink'ez Jerusalem ts'ih nabatoola ka 'et wheni. ³ 'Et Saul keyah Damascus wheghah uyalh hoh, 'et khunyaz ndus de ts'un bunat tube kwun ulhtus ndult'ah, 'i hadanat. ⁴ 'I bughah yun 'et nálts'ut 'ink'ez 'uwhutni, "Saul di ka dzuh nusíldzut hoh 'int'en?" ⁵ "Moodihti ndan inli?" ni Saul. "Si Sizi 'ust'ah. Si 'usilh'en dzuh nusíldzut. Ndán tutsus nulé buk'únucha'zint'en t'eh, nyunch'oh zeh dzuh nuná'dudildzut," yúlhni. ⁶ 'Et dulduz, buba hooncha, 'ink'ez 'utni, "SMoodihti ndet datésnih suts'u hukwa' ninzun?" 'Ink'ez neMoodihti ndi yúlhni, "Dinadindaih 'ink'ez keyah ts'ih ínyalh. 'Et dune daténih nyudóóni," yúlhni. ⁷ Ndunnah dune Saul bulh nuhudelh 'ilhuz nehúnindel 'ink'ez t'ehudinel, 'aw dune chawhes'en 'et whunts'i njan yatuk 'et 'uhoozélhts'ai. ⁸ Saul dinadija 'ink'ez yutá'en hoh chawhés'en suli. 'Et hila ilhchoot 'ink'ez Damascus ts'ih lhgha hidilhy. ⁹ Tat dzin 'et 'aw chawhés'en. 'Et nduhoolyez hoh 'aw cha'us'al 'ink'ez too whunts'ih chayusnai. ¹⁰ 'Et keyah Damascus 'et 'ilhunuh buba 'alha' hoont'ah, Ananias hiyúlhni, 'en bunah hawhelts'ut hoh neMoodihti yulh yailhtuk 'ink'ez ndutni, "Ananias" yúlhni. 'Et 'ahoh Ananias, "SMoodihti, njan sida," yúlhni. ¹¹ 'Et neMoodihti 'uyúlhni, "Lhadíntneh 'ink'ez ti lhts'eoodez'a huwhutni ts'ih whuz inyalh Judas bukoo ts'ih, 'ink'ez dune Tarsus whut'en, Saul hiyúlhni, 'en buka 'oodolhkut. 'En tenadudli ho' 'int'ah. ¹² 'En chah bunah hawhelts'ut hoh Ananias hiyúlhni, 'en daninya yunilh'en 'ink'ez yutsi k'edilnik whe'en naoodle ka." ¹³ Ananias 'et 'uyúlhni, "NeMoodihti nts'e na'a 'utesnilh, Ihanah dune ndun Saul 'en bugha whulh 'udats'o. Njan 'et ndúja, Jerusalem whut'en, dune nye'ildzun, 'en lhe'holhcho 'i be dzuh nobulhdeh ho' 'int'ah. ¹⁴ 'Et 'ink'ez ndez Damascus ts'ih ninya náwhulnuk moodih ndunnah huba 'alha' hoont'ah ilhchoot 'ink'ez nyoozi be yalhtuk, ts'iyawh tsak'eoolelh ka higha óoni'ai." ¹⁵ NeMoodihti 'et 'uyúlhni, "Inyalh 'ink'ez dája nyudúsni 'uhonleh. Saul 'utahaílhti ho' 'int'ah, suba' tet'ilh 'et wheni. 'Udun yun k'ut whut'en, hubudayi cho, 'ink'ez Israel hits'uh hainde chah ts'iyawh si sugha t'ehonózin 'et whúbuntelhtun 'et wheni. ¹⁶ 'Et 'ink'ez njan si sugha dahóolhcho whe dzuh nutezut 'et whuntelhtun." ¹⁷ 'Et Ananias whuz whenya 'ink'ez koo danínya hoh Saul yuk'édilnik 'ink'ez ndutni, "Saul, sulhutsin, neMoodihti sutelh'a, Sizi dich'oh, ndez ínyalh hoh ti nyeghah be hóodilts'ai, 'en sutelh'a whe'en naoondle 'ink'ez Ndoni nyudóolts'it ka." ¹⁸ 'Et 'ahoh hoonliyaz dugoos li'int'ah, 'i Saul buna k'eháyankat, 'ink'ez 'ahoh whe'en nasdli. Didinya 'ink'ez too bé' 'ulya. ¹⁹ 'Et hukw'elh'az 'an'al 'ahoh ulhtus nasdli. 'Et Saul, ndunnah Sizi yugha hoodul'eh 'en dzuh sayaz Damascus 'et hubuzih inda.

Damascus whut'en, 'et Saul khunek unzoo, 'i be hubulh yálhtuk

²⁰ 'Et 'ahoh Lizwif hubuluglez ts'ih danínya 'ink'ez Christ bugha hubulh yáwhenilhtuk, "En Yak'usda buYe' 'int'ah," hubúlhni. ²¹ Ndán hiduzts'ai

ts'iyawh huba hooncha 'ink'ez 'ulhahudutni, "Ndun dune Jerusalem 'en ndi yoozi be yahalhtuk, 'en hubanghan 'en 'int'ah 'ink'ez 'et huwa zeh ndez ninya ndunnah hubutélhchulh 'ink'ez náwhulnuk moodih ts'ih nábuteleh 'et wheni." ²² 'Et whunts'ih Saul bughunek 'o nus ulhtus hoh dune hubulh yalhtuk 'ink'ez Sizi 'en Christ 'int'ah ts'ah'un huba 'álha' hoont'ah hubulhtsi k'et, Lizwif Damascus whut'en 'aw dája hidooni ghai't'ah. ²³ 'Et lhat dzin inle hoh Lizwif 'ilhúhowezdel 'ink'ez Saul nts'e na'a hituzelhghelh hubugha wheni lhahóduleh. ²⁴ Dzin 'ink'ez 'ulh'ek ibulh njan keyah hukwuti 'ahoolhyez huwu hinli hituzelhghelh ka, 'et whunts'ih Saul dahítelih 'et nt'eoonanzin. ²⁵ 'Et 'ilhuh 'ulh'ek Sizi yugha 'eh, 'en Saul hiyílhchoot 'ink'ez keyah whunasú'a, 'i bukoni'a, whuz hukwa hínilhti 'ink'ez k'its'ai cho be híyalhti 'ink'ez yoo 'az ts'ih nahíyalhbal.

Saul Jerusalem ts'ih ninya

²⁶ 'Et Saul Jerusalem ts'ih ninya 'ink'ez Sizi yugha hoodul'eh hubuts'un nidooya hukwa' 'ut'en, 'et whunts'ih 'en 'aw Sizi yugha hoodul'eh 'int'ah cha'hunizun, 'ink'ez tube hiyé nuljut. ²⁷ 'Et Barnabas yughu ninya 'ink'ez yula 'uja hoh whel'a 'en yughi nilhti 'ink'ez hubudáni dája hoh Saul ti uyalh hoh neMoodihti i'en 'ink'ez yulh yaílhtuk chah 'uja. 'Ink'ez ndo búlhi dat'en hoh 'aw chaníljut hoh Damascus whut'en Sizi boozi bugha hubulh yálhtuk. ²⁸ 'Et Saul hubuzih nitl'adenda 'ink'ez Jerusalem nduhoolhcho hoh neya, 'aw chaníljut hoh neMoodihti Sizi boozi bugha Yak'usda bughunek be hubulh yálhtuk. ²⁹ Ndunnah Lizwif, Greek k'eyahulhtuk, 'en chah hubulh yálhtuk 'ink'ez hubulh hukw'u náhulhye, 'et whunts'ih hizoolhghelh hukwa' hiyulh'en. ³⁰ 'Et whunts'i huba 'álha' hoont'ah náhuhoo'ai t'eh, Saul keyah Caesarea ts'un buch'a whehiyalhti. 'Ink'ez dukeyah Tarsus huwhútini whuz whehíyalh'a. ³¹ 'Et ndulhcho Judea, Galilee, 'ink'ez Samaria bulh Sizi ba 'ilhúhowezdel 'aw dzuh nulhahuldeh hoolah. 'Et hoh huba hoonzoo hoh lhódezut 'ink'ez chah Ndoni bugha huba 'álha' hoont'ah ulhtus úbulhtsi. 'Et huwa 'o nus lhanah huzdli 'ink'ez neMoodihti zeh hudélhti suli.

Keyah Lydda 'ink'ez Joppa huwhútini, 'et Peter huwa 'ét'en tune'út'en

³² 'Aw 'et Peter soo ndulhcho hoh nuya. 'Et keyah Lydda dune Yak'usda bube'ildzun, 'en 'et hudemhts'i, ³³ 'en buts'un nuya hoh 'ilhunuh dune, Aeneas hiyúlhni, yughu ninya. 'En lhk'udit naoodezulh (8) whuts'un déchadusnik 'ink'ez sulhti zeh 'int'ah. ³⁴ 'Et Peter 'uyúlhni, "Aeneas Sizi Gri soo na'unyinla! Dinadindaih 'ink'ez nyukw'usti k'ut soo ná'hoonleh," yúlhni. 'Ahoh Aeneas didinya. ³⁵ Ndunnah keyah Lydda 'ink'ez Sharon huwhutni whut'en ndun dune Aeneas hiya'en hoh ts'iyawh neMoodihti hits'u nalhíya. ³⁶ 'Et keyah Joppa huwhútini 'ilhunuh ts'eke 'et whut'en, Tabitha hiyulhni. 'En buba 'álha' hoont'ah. Boozi Greek k'una'a "Dorcus" hiyúlhni, 'et "Yests'e" ni hoh 'utni. 'En 'ahoolhyez hoonzoo túne'ut'en, 'ink'ez tel'ennah chah la'ut'en. ³⁷ 'Et hoh da nduda suli 'ink'ez dazsai. Buyust'e toonáhiyulhti 'ink'ez huwhut'i 'et dúlhyá 'et nehinílhti. ³⁸ Joppa, Lydda whuts'un 'aw chanilhdza, 'et Sizi yugha hoodul'eh, Peter, Lydda usda whulh 'úhudants'o nanah dune, 'en whuz wheoobahalh'a, "Soo 'a nets'ínyalh!" hiyúlhni. ³⁹ 'Et 'ahoh Peter lhadúja 'ink'ez hubulh whenát'az. Whuz ninya hoh ndoh dune whut'i dulhyah ts'ih, whuz whenya. Ts'iyawh tsandehl higha wézdel, hutso hoh ndun ts'eke, Dorcas hiyúlhni, khuna da dzoozt'an 'ink'ez dzoot chah huba 'uyalh'en, 'i hinalhts'et nihíyule. ⁴⁰ 'Et Peter ts'iyannah 'az whenaóobalh'a, dugwútsi be nenínya 'ink'ez tenadudli. Nyoo buyust'e yuts'un nalhú'a 'ink'ez 'utni, "Tabitha, didinyih!" 'Et yutá'en ibulh Peter yutelh'en hoh 'ahoh nduk ninatl'adenda. ⁴¹ 'Et Peter

yula ilhchoot 'ink'ez didílhyá. 'Et dune Yak'usda bube'ildzun, 'en tsandehl tubulh, hubuka' dani 'ink'ez khuna hoh hubutl'anaiyalhti. ⁴² 'Et Joppa dulhcho hoh njan whulh 'úhudants'o hoh lhanah neMoodihti huba 'álha' yint'ah suli. ⁴³ 'Et Peter, Simon 'uzuz 'úlh'en, 'astl'iyaz yuzih inda.

10

Peter, ndun Cornelius, 'en khunek unzoo, 'i be yulh yálhtuk

¹ Caesarea 'et 'ilhunuh dune Cornelius hiyúlhni 'et usda. Roman nehughan, 'en, "Italy hudedoh" hubuhútni, 'en ndun bumoodih unli. ² 'En teni' nilhdzun dune unli, 'ink'ez Yak'usda yénuljut 'int'ah. Didut 'ink'ez bukoo hudelhts'i ts'iyawh Yak'usda zeh hidélti. Lizwif tehel'en, 'en chah tube hubula 'ut'en 'ink'ez 'ahoolhyez Yak'usda ts'un tenadudli. ³ Dzetniz hukw'elh'az, 3:00 bat'en, 'et 'uja hoonliyaz bunalh hawhelts'ut. 'Et soo ts'ah'un Yak'usda hubulizas 'ilhunuh 'en danínya 'ink'ez, "Dahooja Cornelius," yúlhni. ⁴ Tube hubugha ha'nejoot hoh lizas yunilh'en 'ink'ez, "Dáhooja?" yúlhni. 'Et lizas utni, "Yak'usda ntenadudli yudánts'o, 'ink'ez nye 'uga té'nezh chah unzoo, 'et huwa Yak'usda nyunalnik. ⁵ 'Aw 'et Joppa ts'ih 'ilhunuh dune Simon, 'en Peter chah hiyúlhni, 'en bukunáwhulh'a. ⁶ Ndun dune, 'uzuz 'úlh'en, 'en chah Simon hiyúlhni, yatoo taba whut'i, 'en zih usda, 'ink'ez daténilh, 'et hubugha nyuduténilh." ⁷ 'Et hukw'elh'az ndun lizas yulh yaílhtuk whenádede hoh Cornelius nanah bukoo 'uhut'en, dich'oh budune, 'ink'ez 'ilhunuh nehughan, 'en soo Yak'usda zeh délti, 'en chah dich'oh yunat ne'út'en taháyalhti. ⁸ Daja hubugha ts'iyawh hubudáni 'ink'ez Joppa ts'un whébalh'a.

Peter koo whukw'ut hoh benghuni whults'ut

⁹ 'Et 'om bun dzin ndunnah tanah keyah Joppa 'aw 'et wheghah hedulh, 'et wheghah whezulh hoh Peter 'en chah Joppa usda hoh, dzetniz bat'en 'et nduk bun k'ut* whuz hukw'eínya tenadutedli 'et wheni. ¹⁰ 'Et Peter buye'élts'ul, 'ute'ulh hukwa' ninzun. Ts'uyi lhahíduleh whutah, 'et hoonliyaz bunalh hawhelts'ut. ¹¹ Nduk yaz ts'ih lhch'az 'úhooja 'ink'ez nalhti cho ndult'ah, 'i dit lhch'az bunedest'uk, 'i t'az ndus de haímbal, 'ink'ez yun ninimbal. ¹² 'I bet 'et khunai lhelhyoo dedowh, 'i tl'ughus, 'ink'ez yinkak dut'ai chah, 'i ts'iyawh yedelhts'i. ¹³ 'Ink'ez, "Peter didinyih, 'inghan, 'ink'ez 'in'alh," whutni. ¹⁴ 'Et whunts'ih Peter ndutni, "SMoodihti ndi khunai, 'Me' ts'útni buch'a 'unenjoot ho' 'int'ah, 'et huwa 'aw wus'alh ghaít'ah!" ¹⁵ 'Et doo chah zeh 'uwhútni, "Ndai Yak'usda in'alh nyulhni t'eh, 'i 'aw, 'Me 'int'ah,' dini ilah!" ¹⁶ Soo tat whucho 'et njan bunalh hawhelts'ut 'ink'ez ndi naímbal inle, 'i nduk whenalts'ut. ¹⁷ 'Et Peter njan bunalh hawhelts'ut, 'et dawhút'en ho' whut'en, 'et huwu nuní nuzut hoh 'ink'ez ndunnah Cornelius whuz whebalh'a nts'e Simon bukoo 'et t'ehonanzin 'ink'ez hukwuti 'et nahudelhúya. ¹⁸ Hahuhuyih 'ink'ez 'uhoodulhkut, "Aw ih Simon, 'en Peter chah hiyúlhni, njan chaidah?" ¹⁹ 'Et Peter 'awhuz njan ho'en beni taóodoools'it hukwa' 'ut'en hoh Ndoni 'uyúlhni, "Oozélhts'ai, njan tanah dune, 'en nkahites'en. ²⁰ Dinadindaih 'ink'ez nyuk naíndalh. 'Aw mba dahot'e gunih hubulh 'útanilh, si whuz whebalh'a ho' hut'en," yúlhni. ²¹ 'Et Peter nanája 'ink'ez ndunnah dune ndo búlhni, "Si 'ust'ah, dune bukaitéh'en. Di ka ndez tehdel?" ²² 'Et 'uhiyúlhni, "Nehughan moodih, Cornelius, 'en netélh'a ho' ts'ut'en. Dune unzoo 'ink'ez 'ahoolhyez Yak'usda ts'un ténadudli, Lizwif chah ts'iyawh hidélti. Yak'usda bulizas 'ilhunuh 'en bukoo ts'ih nka' doni yulhni, 'ink'ez dája dutenilh 'et nyootuzélhts'ilh wheni." ²³ 'Et Peter koo daóobuninla 'ink'ez 'et hantez.

* ^{10:9} 'Et hubukeyah hubukoo whukw'ut 'et lhts'e whudez'a huhoolh'i.

'Et 'om bun dzin lhadúja 'ink'ez hubúlh nátest'az hoh bulunah huba 'alha' hoont'ah Joppa whut'en, 'en chah hubulh lhghu nahudidel. ²⁴ 'Et 'om bun dzin Caesarea ts'ih ninya. 'Et Cornelius yubalh'i, bukoo hudemhts'i 'ink'ez bulh dunekah chah, "Anih," hubudáni. ²⁵ Soo Peter bukoo ts'ih tezya hoh Cornelius yududezya 'ink'ez yubut nacháneti. ²⁶ 'Et Peter, "Dinadindaih. 'Ants'ih hoh dune 'ust'ah," yúlhni. ²⁷ 'Et bukoo ts'ih hute'us whuts'un Peter, 'en Cornelius bulh yálhtuk zeh 'utni, 'ink'ez bukoo ts'ih huni'az hoh Ihanah dune 'ilhúhowezdel 'et hubunih'en. ²⁸ 'Et ndo búlhni, "Nuhwhenich'oh soo cho t'éoonáhzun, Lizwif whuch'a' hunenyoot 'udun yun k'ut whut'en bukoo dats'óoya 'ink'ez hubulh né'ts'oot'en huba cha'hóot'ah. 'Et whunts'ih, Yak'usda whusúnelhtan 'aw 'uyoon dune 'Me' suba hinli doosni ghaít'ah. ²⁹ 'Et huwa skunaóozulh'a hoh 'aw 'uts'un cha'dusnil hoh nuhts'u whúsaya. 'Et nuhóodulkut di ka 'ahja skunaóozulh'a?" ³⁰ 'Et Cornelius utni, "Et ndoh wheghah whezulh bat'en tat dzin inle hoh dzetniz hukw'elh'az 3:00 bat'en 'uk'e' hunint'o hoh sukoo sahá'delhuya, 'ink'ez tenadesdli hoh khunyaz dune naih soo lheyul, 'i be usda, ³¹ subut suyin 'ink'ez 'usúlhni, 'Cornelius, Yak'usda ntenadudli yudánts'o, 'ink'ez whunalnih nts'ena'a dune ba teni'nilhzun. ³² 'Aw 'et Joppa ts'ih 'ilhunuh dune Simon, 'en Peter chah hiyúlhni, 'en bukunáhoolh'a. Ndun dune 'uzuz 'ulh'en, 'en chah Simon hiyúlhni, yatoo taba whut'i, 'en zih usda, 'ink'ez whusaínya t'eh nyulh yátelhtuk,' 'et njan lizas ndusúlhni. ³³ 'Et huwa 'ahoh nka whenahólh'a, 'ink'ez soo 'inja nets'u whúsainya. 'Ink'ez njan 'aw 'et ts'iyawh Yak'usda bulh 'úts'int'ah mba ts'ilh'i dája neMoodihti huwá nyulh'a bugha nelh yátalhtuk."

Peter khunek unzoo, 'i be hubulh yálhtuk

³⁴ 'Aw 'et Peter yawahéniltuk hoh ndutni, "Soo ts'ah'un t'éooneszin 'et 'álha' hoont'ah 'ilho lhgha Yak'usda nenilh'en. 'Aw 'ilhunuh dune 'o nus yuts'u dutnik hoolah. ³⁵ Ndunnah ndi yun k'ut Yak'usda zeh delhti 'ink'ez tink'us 'utet'ilh whénuljut, 'en Yak'usda buka' dani nts'oh 'udun yun k'ut whut'en 'et whunts'ih. ³⁶ Israel hubuts'uh huhanzut hubulh 'údahts'o dahúja hoh khunek unzoo, 'i butl'aidélts'ut 'ink'ez Sizi Gri, 'en bugha, dahúja hoh ndi khunek unzoo, 'i be hubudzi dinghel, 'en ts'iyannah dune buMoodihti unli ho' 'int'ah 'et huwa. ³⁷ 'Ink'ez chah Israel hubuts'uh huhanzut bukeyah ndulhcho hoh nts'oh teh hooncha tune' whust'en, ndet John too be' ts'ul'ih huwu yailhtuk hoh Galilee 'et whuts'un ho' whe'dit'en, ts'iyawh t'éoonáhzun. ³⁸ T'enahzun Sizi, Nazareth whut'en, 'en daja hoh Yak'usda, Ndoni 'ink'ez be ts'ílhtus, 'i chah ye yudá'ai, 'et huwa ndulhcho nuya hoonzoo tune'út'en 'ink'ez ndunnah netsudule k'une' bul'en 'en chah soo na'bulh'en, Yak'usda, Sizi yulh 'int'ah 'et huwa. ³⁹ Lizwif bukeyah nts'oh tuné'ust'en t'ets'onínzun, nenalh 'úwhet'en 'ink'ez Jerusalem 'et lhdulalhgus ye híndunilht'o hoh hizelhghi. ⁴⁰ 'Et whunts'ih, whulh tat dzin 'et Yak'usda nahiyílhna 'ink'ez nenalhts'et neya yulhtsi, ⁴¹ dune ts'iyawh ilah, wheni zeh ndunnah nenalh 'úwhet'en Yak'usda 'utahanenla ínle. Dinadija hukw'elh'az bulh 'uts'a'al 'ink'ez bulh 'uts'étnai inle. ⁴² 'Et huwa ndi khunek unzoo, 'i dune be hubulh yáts'oolhtuk, huwa nélh'a 'ink'ez 'et 'uzdooni Yak'usda, Sizi 'en 'utahayálhti dune yaidla 'ink'ez khuna chah huba nahooyeh ka. ⁴³ Yak'usda be nus whúnilh'en, 'en ts'iyawh highu yailhtuk ndunnah huba 'alha' hoont'ah Sizi Gri 'en bugha bulubeshi huba 'ún yutelhdulh."

'Udun yun k'ut whut'en, 'en Ndoni hubuyídelts'ut

⁴⁴ 'Et Peter 'awhuz yalhtuk hoh ndunnah yoozélhts'ai Ndoni hubuyídelts'ut. ⁴⁵ Ndunnah Lizwif huba 'alha' hoont'ah, Peter bulh whusahandel, huba

hooncha 'uhooja hoh 'udun yun k'ut whut'en whunts'ih Ndoni buts'ó tl'aidelts'ut 'ink'ez buyidélts'ut. ⁴⁶ 'Ink'ez 'en khunek whutsuh da t'ehinízun, 'i be yawhehúnilhtuk Yak'usda hidélhti hoh hubudíts'o. 'Ink'ez 'et Peter huboodulhkut, ⁴⁷ "Ndunnah, 'en chah wheni nek'una'a Ndoni buyidélts'ut. Ndunnah too be' telnih t'eh, ndan dah dutenilh?" ⁴⁸ 'Et huwa khunek hubugha óoni'ai neMoodihti boozi bugha too be' hutelnih. 'Et hukw'elh'az Cornelius, Peter yughu tedudlih 'astl'iyaz yuzih wuda ka.

11

Jerusalem huba 'alha' hoont'ah Peter hubulh yátelhtuk

¹ 'Et whel'a, 'en 'ink'ez ndunnah huba 'alha' hoont'ah, 'en Judea ndulhcho hoh 'udun yun k'ut whut'en, 'en chah Yak'usda bughunek hiyúlhchoot 'ink'ez hits'un nalhúya 'et whulh úhudants'o. ² 'Et Peter, Jerusalem ts'ih ninya, bulunah Lizwif huba 'alha' hoont'ah Peter hiyenah 'uhutni, ³ "Udun yun k'ut whut'en, Lizwif chailah, 'en hubuzih hoont'i 'ink'ez hubula 'an'al chah 'inja inle," hiyúlhni. ⁴ 'Et Peter ndulhcho hoh 'udechoo whuts'un bulh dahooja hubugha ts'iyawh hubulh náwhelnuk. ⁵ "Keyah Joppa 'et tenadusdli hoh hoonliyaz sugha ha whelts'ut, nalhti cho dit bunedest'uk, 'i ndus de haímbal 'ink'ez suzih nenimbal. ⁶ Soo cho nulh'en hoh khunai lhelhyoo dédowh hoh tl'ughus, 'ink'ez yinkak dut'ai chah, 'i yedelhts'i nulh'en. ⁷ 'Ink'ez khunyaz khunek duzíts'ai 'i 'utni, 'Peter didinyih, 'inghan, 'ink'ez 'in'alh,' whutni. ⁸ 'Et whunts'ih, 'SMoodihti 'awundooh, ndi khunai 'Me' ts'útni, buch'a 'unenjoot ho' hoont'ah, 'et huwa 'aw wus'alh ghaít'ah,' dusni. ⁹ 'Et doo chah zeh ndus de 'úwhutni, 'Ndai Yak'usda in'alh nyulhni, 'i 'aw, 'Me 'int'ah,' dini ilah!' ¹⁰ Soo tat whucho 'et njan bunalh ha whelts'ut 'ink'ez ndi naímbal inle, 'i nduk whenalts'ut. ¹¹ 'Et wheghah whezulh whuzeh, tanah dune Caesarea whuts'un suts'ú botelh'a, 'aw 'et koo sida ts'ih hunindel. ¹² 'Et Ndoni 'usúlhni, 'Aw buch'a 'uts'un cha'duziniih hoh hubulh í'us.' 'Ink'ez ndunnah lhk'utánah (6) huba 'alha' hoont'ah, 'en chah Caesarea ts'ih sulh hútezdel 'ink'ez ts'iyawh Cornelius bukoo ts'ih dáznindel. ¹³ 'Et nedáni ndun lizas bukoo siyin hoh yunilh'en 'ink'ez 'uyúlhni, 'Joppa ts'ih whuz ndun dune Simon Peter hiyúlhni, 'en bukunáhoolh'a. ¹⁴ 'En ndun whuduténih datéhnih 'et hoh nyun 'ink'ez nkoo hudemhts'i chah hudutejih.' ¹⁵ 'Aw 'et yawhénilhtuk hoh, 'udechoo nuwheni lhe'ts'uja, whuz na'a 'en chah Ndoni hubuyídelts'ut. ¹⁶ 'Et whunalhúnih nts'ena'a neMoodihti 'et ndutni inle, 'John dune too be 'ulh'en, 'en too be, too be' 'un whulh'en inle, 'et whunts'ih Ndoni 'en be too be 'un whutelih.' ¹⁷ 'Et 'alha' hoont'ah wheni danénla inle Sizi Gri neba 'alha' 'int'ah suli hoh Yak'usda hoonzoo negha óoni'ai, ndunnah 'udun yun k'ut whut'en, 'en chah whuz na'a 'obínl. Ndán usdli ka suba Yak'usda buch'a doosni?' ¹⁸ 'Et ndunnah Jerusalem huba 'alha' hoont'ah hodánts'o hoh Peter hich'a yálhtuk 'ustl'e' 'uhudeja 'ink'ez 'en chah Yak'usda hidelhti. 'Ink'ez njan nduhútni, "Udun yun k'ut whut'en, 'en chah hubulubeshi whuch'a hububeni lht'anahídunezdla, 'ink'ez 'ilhuz hukhutena. 'Et whuz na'a Yak'usda hubugha óoni'ai," hutni.

Antioch whut'en Yak'usda bughunek hidutéts'o

¹⁹ Stephen hizelhghi hukw'elh'az ndunnah Yak'usda k'une' hut'en hube húzula, 'et whula gha ts'ih ts'iyawh lhch'a huzdel. 'Et bulunah nilhza Phonecia ts'ih, Cyprus 'ink'ez Antioch ts'ih chah whehándel. Ndi khunek unzoo, 'i ndunnah Lizwif 'aw 'en zeh be hubulh yahúlhuk. ²⁰ 'Et whunts'ih bulunah huba 'alha' hoont'ah dune noo cho Cyprus hiyúlhni, 'ink'ez Cyrene ts'ih hahándel, 'en Antioch ts'ih whehándel 'ink'ez 'et 'udun yun k'ut whut'en,

ndunnah Greek hubughunek k'un'a'a yahalhtuk, 'en Sizi neMoodihti 'en bugha ndi khunek unzoo hubulh yahúlhtuk. ²¹ NeMoodihti hiye úlhtus, 'i bugha íni'ai, 'et hoh lhanah dune neMoodihti bughunek hílhchoot 'ink'ez hits'u nalhúa. ²² 'Et Jerusalem huba 'alha' hoont'ah, 'en whulh 'úhudants'o, 'et Barnabas 'en Antioch ts'ih whehíyalh'a. ²³ 'Et whuz ninya whunilh'en daja hoh Yak'usda ndunnah dune ye unzoo, 'i be hubuts'un unzoo. 'Et hóost'et 'ink'ez huba nus whúnilht'uk, "Nts'oh dáhoont'ah 'et whunts'ih neMoodihti soo bulh zeh 'ooht'e," hubúlhni. ²⁴ Barnabas 'en soo Ndoni yudínda 'ink'ez tube dune buba 'álha' hoont'ah. 'Ink'ez lhanah dune neMoodihti hits'u nalhúa. ²⁵ 'Et Barnabas keyah Tarsus ts'ih whenya Saul 'en yukúnuta. ²⁶ 'Et nayilhti 'ink'ez Antioch ts'ih nainílhti. 'Et 'ilhuh naoodezut hoh nahúlt'ah dune Sizi Gri yugha hoodul'eh hubutah lhanah dune whehubahoodalh'i. 'Ink'ez Antioch 'et Sizi Gri yugha hoodul'eh, 'en 'udechoo Sizi Gri budune hubuhútni. ²⁷ 'Et hoh da zeh Yak'usda be nus whúnilh'en Jerusalem whehúdindel hoh Antioch ts'ih húnindel. ²⁸ 'Et hubutah 'ilhunuh Agabus hiyúlhni, 'en didinya 'ink'ez Ndoni bugha hubúlhni, "Aw 'et nilhdukw yun k'ut ndulhcho hoh dai whútele." 'Et Claudius hubudayi cho degha nus dezti unli hoh 'et ndúhooja. ²⁹ 'Et Sizi Gri yugha hoodul'eh lhgha 'úhudeja hoh, 'ilhunuh hinli hoh hubulh huba 'alha' hoont'ah, Judea hudelhts'i, ndet 'úhint'ah hoh hubula' hutet'ilh hutni. ³⁰ 'Et nduhúja hoh, Barnabas 'ink'ez Saul bulh ndi sooneya hubutl'ahínudzih hoh hubuhútni, "Ndi sooneya nelh huba 'alha' hoont'ah be hubúla'teht'ilh, dune tsuh whudelhdzulh hubutl'ayóoh'ah."

12

Hubidayi cho Herod ndunnah huba 'alha' hoont'ah, 'en hube té'zela suli

¹ 'Et hoh da bat'en hubidayi cho Herod ndunnah huba 'alha' hoont'ah hube' zúla suli. ² 'Et James, John bulhutsin, 'en tes cho be hízelhghi. ³ 'Et Herod nt'eoonanzin Lizwif huhóont'i hoh honilh'en, 'et Peter 'en chah tsak'ehiya'ai, lhes nachantildoh, 'i ut'alh whehúnahulnih, 'et 'uhoodja inle. ⁴ 'Et Peter hiyílhchoot hukw'élh'az, tsak'ehiya'ai huwunli dinah nehughan lhk'enáhudeduh, 'en highole ka hubutl'ahíyalhti. Njan Hubutus Lhuseya hukw'elh'az ts'iyannah nalh hiyootéhzih 'et wheni.

Peter tsak'ehiya'ai hoh lizas tinínilhti

⁵ 'Et Peter tsak'ehiya'ai 'et whunts'ih huba 'alha' hoont'ah soo ndet 'úhint'ah, 'et hiba tenadudli. ⁶ Aw 'et Peter 'en Herod yubut niteyalh whutsuh, 'ulh'ek 'et Peter nanah highunli 'en tes be lhughel hoh hube guz nanesti, 'ink'ez hukwuti 'et chah nanah nehughan huwuhinli. ⁷ Khunyaz neMoodihti bulizas bughah be hóodiltsai, bukoo chah whét'en suli. 'Et lizas Peter 'ún be yulhnih hoh ts'enainílhzut 'ink'ez, "Soo 'ah didinyih!" yúlhni. 'Et 'ahoh ndi tes tl'ool be lhúghel, 'i bula buts'u hayánkat. ⁸ 'Et lizas, "Tsunadil'ooh 'ink'ez ke nadil'ooh chah 'ineh," yúlhni. 'Et Peter ndúja 'et lizas, "Nyunaits'uz chah t'unásilchoos, 'ink'ez sunanyalh," yúlhni. ⁹ 'Et Peter tsak'ehiya'ai hubughu téninya 'ink'ez yuneyalh, 'aw nt'éhonízun dat'en ndun lizas 'alha tulih 'int'ah k'us 'ants'ih hubunalh hawhélts'ut ninzun. ¹⁰ 'Udechoo huwuhinli zih lhunáhust'az, 'et whulh nat chah. 'Et tes dádentan, 'i cho keyah dati huwa ni'az hoh dich'oh ndi dati huba da'dutezkez. 'Et tináhant'az 'ink'ez ti hutez'az ibulh lizas hoolah suli. ¹¹ 'Et Peter beni nawhusdli 'ink'ez 'uninzun, "Aw 'et nt'eoonazin 'alha' hoont'ah, neMoodihti bulizas whusayálh'a 'ink'ez Herod Lizwif tubulh dzuh nusátelhzut, 'et whuch'a sulhyih." ¹² 'Et njan huwu ninínizut hoh Mary bukoo 'et howu ninya, 'en John Mark be'ama. 'Et lhanah dune 'ilhúhowezdel 'ink'ez tenahudedli. ¹³ 'Et Peter yoo 'az ts'ih ndati whudulhghalh hoh ts'ekeyaz

'et 'ut'en, Rhoda 'en hiyúlhni, 'et ndati nininya hoh yudánts'o. ¹⁴ 'Et 'ahoh Peter 'utni natsíyoodelhúts'it hoh hóont'i k'et, 'aw dacha'dutítel 'ink'ez 'ants'ih koo danálga'i 'ink'ez, "Peter ndati siyin!" húbulhni. ¹⁵ "Nyeni hoolel hoh 'udini," hiyúlhni. 'Et whunts'ih, "Alha' dusni," ni zeh 'utni hoh, "Awundooh, bulizas 'ut'en," hutni. ¹⁶ 'Et whutah Peter ndati whudulhghalh zeh 'utni. 'Udek'elh'az hoh hiba da'duteztan, tube huba hooncha hitelh'en hoh. ¹⁷ 'Et huba núlhni hoh t'ehudoosnih hubúlhni 'ink'ez huba hukw'u nuhúlhye daja hoh neMoodihti tsak'ehiya'ai hoh tenaínilhti. "James 'ink'ez o 'unnah huba 'alha' hoont'ah ts'iyawh hubudóohni," hubúlhni. 'Aw 'et 'uts'un hubughu whenája. ¹⁸ 'Et bundada nehughan huwuhinli Peter hik'énentai hoh whe-whunujut whe lhtahúwhunt'ai, "Peter 'en dája," lhahudútnti. ¹⁹ 'Et Herod, "Peter hikunoota," hubúlhni. 'Aw nahayólhtel ghaít'ah 'et ndunnah yughinle hubuhoodalhkut 'ink'ez, "Huboohooghan," hubúlhni. 'Et hukw'elh'az Herod, Judea ts'ih whenya 'et whuts'un Caesarea ts'ih chah 'ét'en.

'Aw 'et Herod datétsah

²⁰ 'Et ndunnah nat keyah Tyre 'ink'ez Sidon whut'en, 'en Herod tube cho hubulh húnich'e, 'et lhanah hinli Herod highu nindel. Ndun Blastus 'en hubudayi cho bukoo yuba huwunli, 'en ts'ún nehidelti. 'Et 'ants'ih Herod highu nindel 'ink'ez huba soo' hooleh hits'u húkwa' 'utni, hubudayi cho bukeyah ts'ih whuz de zeh hiya'alh, 'i whuz hakat 'et huwa. ²¹ 'Et dzin huba hoozi Herod 'et hubudayi cho naih yé naja 'ink'ez kw'uts'uzda buba yint'ah, 'i yuk'et'l'adida. 'Et whuts'un dune hubulh yálhtuk. ²² 'Et ndunnah dune 'ahúlzul hoh hahuyih, "Aw dune ilah 'int'ah yalhtuk, Yak'usda unli 'utni!" hiyúlhni. ²³ 'Et Herod 'aw Yak'usda chadílhti, 'et huwa Yak'usda bulizas khunyaz Herod nduda yulhtsi 'ink'ez 'usgoo yulh haneldo, 'et hukw'e dazsai. ²⁴ Yak'usda bughunek ndulcho hoh t'enudzun suli, 'ink'ez lhanah dune huba 'alha' yint'ah suli.

Barnabas 'ink'ez Saul bulh Ndoni 'utáhaltı 'ink'ez whebalh'a

²⁵ Barnabas, Saul bulh 'uhuwhulh'en lhahódinla hoh, Jerusalem ts'ih hanáhadel, John Mark 'en dulh 'uhíyul'en.

13

¹ 'Et keyah Antioch Sizi bughá 'ilhuhowezdel bulunah Yak'usda be nus whúnih'en 'ink'ez bulunah Yak'usda bughunek hubuhodulh'eh 'en chah 'et hudélhts'i. Ndunnah dune, 'en bulunah 'uhint'ah, Barnabas, 'ink'ez Simeon, 'en dune dulhgus hiyúlhni, Lucius chah, Cyrene whut'en 'int'ah, Manaen, 'en yun whu moodih, Herod yulh nézyi, 'ink'ez Saul chah 'int'ah. ² Soo saha'húdelya 'ink'ez neMoodihti hiba 'út'en whutah, Ndoni ndo búlhni, "Barnabas 'ink'ez Saul bulh suba 'udun nébutalhtel, ndi 'ut'en hubugha iní'ai, 'i 'uhiyooseh 'et wheni." ³ 'Et doo chah zeh soo saha'húdelya 'ink'ez tenahudedli hoh hubutsi k'ehudalnik 'ink'ez whébahalh'a.

Barnabas, Saul 'ink'ez hubulh 'út'en chah, 'en Cyprus noo k'éhindel

⁴ 'Et Ndoni hubutélh'a hoh Barnabas 'ink'ez Saul bulh Seleucia ts'ih hunindel, 'et whuts'un noo Cyprus hiyúlhni whuz huninki. ⁵ 'Et keyah Salamis ts'ih hunindel hoh Lizwif hubuluglez 'et Yak'usda bughunek be yáhalhtuk. John Mark 'en chah bula 'ut'en 'et wheni dulh 'uhíyul'en. ⁶ 'Et ndi noo ndulyez hoh hiye oosudel 'ink'ez Paphos ts'ih hunindel. 'Et ndun duyun, Joshua buye' hiyúlhni, Lizwif unli, 'en Yak'usda be nus whunílh'en la'dudil'i, 'en chah 'et 'usda. ⁷ 'Ink'ez njan noo k'ut whumoodih, Sergius Paulus hiyúlhni, 'en dune whunih 'int'ah, 'en ndun duyun yulh dune unli. 'En Barnabas, Saul bulh, "Anih," hubudáni Yak'usda bughunek dutéts'o hukwa' ninzun 'et wheni.

8 'Et whunts'ih ndun duyun Greek bughunek k'una'a Elymas chah hiyúlhni, 'en Yak'usda bughunek yuch'a yunílht'uk 'et hukwa' yulh'en. **9** 'Et Saul, 'en Paul chah hiyúlhni, Ndoni k'une' yul'en hoh soo cho yunen ts'ih yunilh'en **10** 'ink'ez 'uyúlhni, "Netsudule buye", ndai unzoo, 'i ts'iyawh buch'a déntni. Soo hoontsi' hoh dune naní'ah ts'iyawh hoont'i, Yak'usda bughunek 'i chah whuts'it khunek naoolhtsilh hukwa 'ílh'en. **11** Yak'usda nyulh húnich'e 'et hoh 'aw chaozo'a'en tanleh 'astl'iyaz wheni!" 'Et 'ahoh ndun Elymas, dulhgus, 'i buna k'einde, 'ink'ez chawhés'en suli. 'Ink'ez dune yula t'az nítelhyalh hukwa hahuyih. **12** 'Et noo k'ut whumoodih njan dahooja ho'en hoh, Yak'usda buba 'alha' yint'ah suli. Ndai neMoodihti bugha whehiyoodalah'i 'i tube huba hooncha.

Barnabas, Paul bulh Antioch Pisidia buyun k'ut whuz'ai whuz hunindel

13 'Et Paul 'ink'ez yulh nudelh tubulh Paphos 'et nus nihuzki hoh Perga 'et Pamphylia whuz'ai whuz huninki. 'Et John Mark buk'enaja 'ink'ez Jerusalem ts'un whenája. **14** 'Et Perga whehúdindel hoh 'o 'un Antioch, Pisidia whuz'ai, whuz hunindel. 'Et Lizwif nahulyis dzin hubuluglez dahúnindel 'ink'ez nátl'ahudelts'i. **15** Moses bughunek 'uk'une'úsduguz, 'i 'ink'ez Yak'usda be nus whúnih'en bughunek chah hik'eyailhtuk hukw'elh'az, Lizwif luglez whumoodih Paul, Barnabas chah, 'en hubuhútni, "Nelhutsinkah, khunek hiye úlhtus, 'i aht'i t'eh, ndunnah dune hubulh yátelhtuk hukwa' uzninzun." **16** 'Et Paul didinya 'ink'ez buts'un didílnik hoh hubulh yáwhenilhtuk 'ink'ez ndó bulhni, "Sulh dune 'ink'ez 'udun yun k'ut whut'en chah, k'us ndan Yak'usda delhti, 'en soo zelhts'ai. **17** Israel hubuts'uh huhanzut buYak'usda 'en netsuh whudelhdzulh 'utaháoobanla 'ink'ez Egypt whut'en bunalh hincha hubulhtsi. 'Et hukw'elh'az Yak'usda whelhtus 'et hoh ndunnah Egypt whut'en bukeyah whuts'ahanaóobanla. **18** 'Ink'ez dune chahóot'ih ts'ih 'et dit lanezi naoodezulh whutah, 'et hich'a ne'ut'en, 'et whunts'ih k'úne' bul'en hoh inle. **19** 'Et skwunlai 'o 'at nat dédowh (7), 'en Canaan whuyun k'ut whuzdla, 'et hudelhts'i, 'en Yak'usda hoolah hubulhtsi, 'ink'ez 'et ndunnah budune, 'et bukeyah whulhtsi. **20** 'Et 450 naoodezut whutah 'et dune hanle. 'Et hukw'elh'az Yak'usda be nus whunílh'en Samuel whusatéyah whuts'un lhanah hoh bumoodih inle. **21** 'Et hubudayi cho ka' hutni hoh, Saul, Kish buye', 'en Yak'usda bugha inílhti. 'En Benjamin yek'edínzut 'ilhunuh 'int'ah, 'ink'ez dit lanezi naoodezulh 'et hubudayi cho inle. **22** 'Et Saul Yak'usda whusanáyalhti hukw'elh'az hoh 'et David 'en hubudayi cho yulhtsi 'ink'ez Yak'usda 'en yughi yalhtuk hoh ndutni, 'David, Jesse buye', 'en sudzi k'ah ts'ih dune unli. Ts'iyaintsuk hoh suk'úne' tet'en ho' 'int'ah.' **23** Sizi, David yuts'uh haínzut, 'en Israel hubuts'uh huhanzut hubutelhyis wheni Yak'usda hubuts'ítelh'a hubuts'úyoozi inle 'et huwa. **24** 'Et Sizi whe'dutet'ilh whutsuh 'et John dune too be 'ulh'en Israel hubuts'uh huhanzut hubulh yálhtuk, lubeshi whuch'a hubeni náhondunooleh 'ink'ez too be' hoolneh, hubúlhni. **25** 'Aw 'et John dune too be 'ulh'en dude 'ut'en lhai whutele hoh 'et hubúlhni, 'Ndán usdli nahzun? 'Aw ndun buba ilh'i, 'en ílah 'ust'ah, 'et whunts'ih whunulh'en, sunteyah ho' 'int'ah. Buke hana'tesdlelh 'et wheni whunts'ih 'aw huba soo cha'lhudzooh," hubúlhni. **26** 'Et Paul 'o 'un ndo búlhni, "Sulhutsinkah, Abraham yekédinzut, 'ink'ez 'udun yun k'ut whut'en, ndunnah Yak'usda ts'un tenadudli, nuhwheni ts'iyawh, wheni chah, ndi khunek 'i netelhyis wheni nets'ó tl'adelts'ut. **27** Jerusalem 'et whut'i 'ink'ez k'une'nuwhuhul'en chah 'aw t'ehinízun neulhyis 'int'ah. Lizwif nahulyis dzin totsuk ndi Yak'usda be nus whunilh'en 'uk'une'úsduguz buk'eyatuk, 'et whunts'ih 'aw hubeni tachaoodulhts'it. Sizi datétsah ts'ih be' highenya, 'et huwa Yak'usda be nus

whunilh'en bughunek 'alha' 'int'ah hiyulhtsi. ²⁸ 'Et 'aw hukwa hizoolhghelh hoolah, 'et whunts'ih Pilate 'en highu téduqli hizoolhghelh ka. ²⁹ 'Et ndi bugha 'uk'une'úsduguz, 'i dája ni hoh tune'hiyulh'en hoh lhdulalhgus k'ut nihinilhti, 'ink'ez wheyehíyalhti. ³⁰ 'Et whunts'ih Yak'usda yaidla tah nahighílhna. ³¹ 'Et Galilee 'ink'ez Jerusalem whuts'un yúlh lhusudel, 'en hukw'elh'az lhat dzin whuts'un hiya'en. 'En Israel hubuts'uh huhanzut whébontelktun hinli. ³²⁻³³ 'Et wheni njan whusats'ándel khunek unzoo, 'i buk'unats'otelnuk. 'I Yak'usda netsuh whudelhdzulh, 'en buts'un datenilh ni, k'an wheni, buts'uh hats'ánde nenalh 'et 'en Sizi nahighílhna. 'Ink'ez ndi bulh nankoh Shun 'uk'une'úsduguz, 'i chah ndutni,

'Nyun Si suYe' 'unint'ah,
k'an dzin, nye'aBá síli,' ni.

³⁴ 'Et Sizi nahighílhna 'ink'ez 'aw buyust'e telhjut ts'ih natoolts'it ghaít'ah.
'Et hubugha Yak'usda njan ndutni,

'Ndai bugha 'ét'en unzoo, 'i David buts'un yóozizi inle, 'i k'an nuhgha tés'alh.'

³⁵ 'Et 'udun 'uk'une'úsduguz, 'i chah ndutni,

'Yak'usda 'aw dulh 'int'ah dezti buyust'e wulhjut ghaít'ah yulhtsi.'

³⁶ 'Et David soo hoh Yak'usda k'úne' 'ust'en khuna whutah. 'Et dazsai hoh ndunnah butsuh whudelhdzulh 'uhudinla, 'et whuyihíyalhti 'ink'ez ílhjut. ³⁷ 'Et whunts'ih ndun Yak'usda nahighílhna, 'en 'aw buyust'e chaílhjut.'

³⁸⁻³⁹ 'Et Paul o 'un ndutni, "Sulhutsinkah nuhwheni, ts'iyawh, 'alha' hoont'ah ndun Sizi dája 'et huwa nuhwhulubeshi nawhuná'dutedoh. 'Et t'ewhunóhzin ndai Moses ye náhezya, 'i bugha 'aw ts'ah'un dune tehle ghaít'ah inle. 'Et whunts'ih k'us ndan Sizi Gri huba 'alha' yint'ah, 'en hubulubeshi ts'iyawh hoolah huba whulhtsi hoh ts'ah'un dune tele. ⁴⁰ Huwahli ndet Yak'usda be nus whunilh'en huwu yahalhtuk, 'et nohwhulh 'uhónah gunih! ⁴¹ 'Et ndutni, 'Ughuhedloh ndet huwú ni untehzut,

'ink'ez yatéhldah.

Ndi yun k'ut delhúts'i whutah,

'i lhk'uz teh whunwhunelhtan,
'et whunts'ih 'aw nuhwhuba 'alha hot'e ghaít'ah tele.'

⁴² 'Et Paul, Barnabas bulh Lizwif luglez huwu nahutest'az hoh 'udun yun k'ut whut'en, "Nats'ulyis dzin t'eh nets'u nátooh'tas, 'ink'ez doo chah zeh ndi khunek bugha yalhtuk, 'i bugha nelh yaóolhtuk," hubuhútni. ⁴³ 'Et lhtahanahedel hukw'elh'az Paul, Barnabas bulh nahutest'az hoh Lizwif 'ink'ez 'udun yun k'ut whut'en, ndan Lizwif ts'ih nalhíya hiyuntezdel. 'Et Paul, Barnabas bulh, hubulh yahúlhtuk, "Yak'usda nuhts'un yé unzoo, 'i zeh bugha yinkak doolhúts'i," hubuhútni. 'Et hoh budzi ulhtus hubuhulhtsi. ⁴⁴ 'Et o 'at nats'ulyis dzin 'ankw'us ts'iyawh keyah hudemhúts'i, 'en Yak'usda bughunek hiyootuzélhts'ilh wheni 'ilhuhowezdel. ⁴⁵ 'Et Lizwif 'ilhuhowezdel hubunilh'en, 'oonih zeh ye dez bun suli hoh Paul hiye dúdulh 'ink'ez hiba whuts'it. Daja ni, 'et chah whuch'a yáhalhtuk. ⁴⁶ 'Et whunts'ih Paul Barnabas bulh'o nus hoolhtus hoh yahulhtuk, "Ndi Yak'usda bughunek 'i nuhwheni choo be nohwhulh yaóolhtuk huba' hoont'ah. 'Et whunts'ih bukacha'nuzáhzun t'eh, 'ink'ez 'ilhuz khutehna huba soo cha'lhudzooh na'dunáhdzun t'eh, 'ants'ih nuhwhuba 'uhoont'ah náhzun, 'et whute! 'Aw 'et 'udun yun k'ut whut'en, 'en buts'un tadút'us! ⁴⁷ 'Et ndi khunek 'i neMoodihti ye néts'u nahezya 'i 'int'ah, 'et njan ndutni,

'Nuhwheni ndunnah 'udun yun k'ut whut'en be whét'en, 'i huba tehle.

'Et whuz na'a yun k'ut ndulhcho hoh chah nuhgha dune hudutejih," ni, Paul.

⁴⁸ 'Et 'udun yun k'ut whut'en 'uhudánts'o hoh, huhoont'i hoh neMoodihti bughunek hiba whudélhti 'ink'ez ndunnah 'ilhuz khutena huba 'utahálya huba 'alha' hoont'ah suli. ⁴⁹ Ndulhcho hoh 'et keyah neMoodihti bughunek nudúlts'ut suli. ⁵⁰ 'Et ndunnah dune hincha, 'ink'ez ndunnah ts'ekoo hincha soode'a 'uhint'ah, 'en, Yak'usda ts'un tenahududli hinli, bulunah Lizwif bughe' hoolnih 'uts'un húbonilht'uk hoh Paul, Barnabas bulh hube húzula suli, 'ink'ez dukeyah k'unabontezyoot. ⁵¹ 'Et huwa 'et keyah whulez ch'a hubukegwun nahíyanghat 'ink'ez keyah Iconium ts'ih huni'az. ⁵² 'Et Sizi yugha hoodul'eh Antioch hudelhts'i Ndoni be hilhtus súli 'ink'ez tube cho honélhnik.

14

Iconium whut'en khunek unzoo, 'i hidánts'o

¹ 'Et Iconium ts'ih huni'az hoh 'et chah nduhóoja. Paul, Barnabas bulh Lizwif luglez ts'ih huni'az hoh degha nus soo hubulh yáhalhtuk, 'et huwa tube lhanah Lizwif 'ink'ez 'udun yun k'ut whut'en chah Sizi huba 'alha' 'int'ah huzdli. ² 'Et whunts'ih ndunnah Lizwif be 'alha' hoont'ah chahiyílhchulh, 'en ndunnah 'udun yun k'ut whut'en hubeni 'uts'un hubunilht'uk hoh ndunnah huba 'alha' hoont'ah buch'a nahulhuya. ³ 'Et whunts'ih ndunnah whel'a 'en sa 'et hanke. 'Aw chahuníljut hoh neMoodihti bugha hubulh yahúlhtuk daja hoh Yak'usda ndunnah dune ye únzoo, 'i be hubuts'un únzoo howu yahalhtuk. 'Et Yak'usda njan hooncha 'ink'ez huwa 'ét'en tuné'hut'en hubulhtsi. 'Et huwa bughunek 'alha' 'int'ah t'ehonínzun suli. ⁴ 'Et keyah 'ilhohuwezdel bulunah, 'en Lizwif ts'un nihudendel 'ink'ez bulunah chah whel'a 'en ts'un nihudendel. ⁵ 'Et 'udun yun k'ut whut'en, Lizwif chah, 'ink'ez k'une'nuwhuhul'en tubulh, whel'a 'en tenabe' whebonilh'en 'ink'ez tse be hubotzelhghelh hukwa' huninzun. ⁶ 'Et whel'a 'en whulh 'úhudants'o hoh, keyah Lystra 'ink'ez Derbe, Lycaonia hoh whuzdla, whuz buch'a whetsihalhdel, 'et whunat chah. ⁷ Whuz khunek unzoo, 'i be hubulh yahúlhtuk Lystra 'ink'ez Derbe whut'en whel'a 'en khunek unzoo, 'i be hubulh yahúlhtuk.

Lystra 'ink'ez Derbe whut'en khunek unzoo, 'i hidants'o

⁸ Lystra 'et 'ilhunuh dune buke déchadusnik 'et whut'i, 'en whuzdli whuts'un 'aw nuchasyah. ⁹ 'Et usda 'ink'ez Paul yalhtuk yoozéhcts'ai. 'Et Paul yunilh'en, t'éoonínzun ndun dune buba 'alha' hoont'ah 'et hoh soo ná'tetnilh ninzun, 'et soo cho yunen ts'ih yunilh'en hoh ¹⁰ soo 'ultus 'uyúlhni, "Didinyih 'ink'ez ts'ah'un na'a sinyin!" 'Et ndunnah dune didillhah 'ink'ez 'aw 'et nádinya. ¹¹ 'Et ndunnah 'ilhuhowezdel Paul daja hinilh'en hoh soo 'ultus hubughunek, Lycaonia k'una'a, 'uhutni, "Neyak'usda, 'en chah yinkak dune k'una'a 'uhint'ah huzdli 'ink'ez ndus de nets'un hahá'az." ¹² Barnabas 'en hubuyak'usda Zeus be náhiyoozi 'ink'ez Paul chah 'uyoon hubuyak'usda Hermes hiyúlhni, 'en be náhiyoozi, 'en yalhtuk 'int'ah 'et huwa. ¹³ Hubuyak'usda Zeus hiyúlhni 'en bunáwhulnuk, soo keyah yoo 'az ts'ih 'et luglez huwhulh'ai, 'en musdus dune 'ink'ez 'indak 'i keyah dati 'et nihíninla. Ndunnah 'ilhuhowezdel whel'a 'en hubuts'i hidutéhk'un 'et wheni. ¹⁴ 'Et Barnabas, Paul bulh 'aw 'et ndunnah dune dahútenilh whulh 'úhudants'o hoh, huba dzuh k'et dunaih k'uhídutelhúch'ul* 'ink'ez 'ilhuhowezdel nus buniz 'et nihúlgai 'ink'ez soo 'ultus 'uhutni, ¹⁵ "Di ka 'et ndaht'en? Nuwheni chah nuhk'una'a dune ts'inli, 'aw Yak'usda chats'ílah ho' ts'int'ah. Njan khunek unzoo, 'i nuhghá uzte'ah 'et wheni whusaidút'az. Ndi be natsi' unli, 'i nuhyak'usda buch'a naóolhuyeh 'ink'ez Yak'usda khuna 'en buts'un naóolhuyeh. 'En 'int'ah yaz, ndi yun

* **14:14** 'Et whuz na'a Lizwif hube 'ut'en buba dzuh t'eh.

k'ut, yatoo chah, 'ink'ez ndai buk'ut hoonli, 'i ts'iyawh 'uyínlá ho' 'int'ah. ¹⁶ 'Et whuts'uh da k'úne' hut'en, 'et whunts'ih húbuts'u hachawhus'ak. ¹⁷ 'Et whunts'ih 'a hoolhyez dunábunultun hoh ndus de 'ut'en unzoo, 'i 'uyulh'en, 'i be ndi chan nalhtih, 'i 'ink'ez hanéyeh 'i chah soo 'et 'ut'en yílh'i. 'Et whuz na'a ts'uyi, 'i chah nuhghat'ah hoh nuhdzi chah hoont'i yílh'i." ¹⁸ Ndunnah 'ilhuhowezdel whel'a 'en buts'un hidut'élhk'un, 'et whuch'a 'ankw'us hubuho-tun ghaít'ah, 'et whunts'ih Paul bughunek be k'ah hubuhoontun.

Paul tse be hituzelhghulh hukwa' huninzun

¹⁹ 'Et bulunah Lizwil Antioch Pisidia whuz'ai 'ink'ez keyah Iconium chah, 'et keyah Lystra ts'ih hanídel 'ink'ez ndunnah Lystra whut'en 'ilhuhowezdel, 'en ts'iyawh hits'un nint'uk hukwa' hut'en. 'Et huwa Paul tse be hízelhghi 'ink'ez dazsai zeh hininzun. 'Et keyah yoo 'az ts'ih 'et nihininguz. ²⁰ 'Et whunts'ih Sizi Gri yugha hoodul'eh higha wezdel hoh dinadíja 'ink'ez keyah ts'ih whenaja. 'Et 'om bun dzin Barnabas bulh keyah Derbe ts'un whehá'az.

Paul, Barnabas bulh Antioch Syria whuz'ai ts'ih whuz nahutes'az

²¹ 'Et Paul, Barnabas bulh keyah Derbe 'et khunek unzoo, 'i be hubulh yahúlhtuk hoh lhanah Sizi k'úne' hut'en huzdli. 'Aw 'et Lystra ts'ih whenáhet'az. 'Et Iconium ts'ih chah 'ink'ez Antioch, Pisidia whuz'ai hoh wheghah chah lhuhúz'az. ²² Ndunnah yugha hoodul'eh soo budzi ulhtus hoh ndet huba 'alha' hoont'ah whulh hóoyin hubuhulhtsi, 'ink'ez ndo bahútni, "Lhat hoh dzuh nuts'ude, 'et whunts'i whuz na'a nts'e Yak'usda hubudayi cho unli 'et dáztedulh huba' hoont'ah." ²³ Ndet Sizi Gri bughä 'ilhuhowezdel dune tsuh whudelhdzulh huba 'utaháoobanla. 'Et tenahududli 'ink'ez saha'húdelya hoh whuz na'a neMoodihti huba 'alha' hoont'ah 'en tl'ábananla. ²⁴ 'Et Pisidia whuyun k'ut lhuhuz'az hukw'elh'az 'et Pamphylia ts'ih huni'az. ²⁵ 'Et Perga whut'en chah Yak'usda bughunek be hubulh yahúlhtuk 'ink'ez nyoh Attalia ts'un huni'az, ²⁶ 'ink'ez 'et whuts'un Antioch ts'ih nahúsduki. Ndet keyah Paul Barnabas bulh Yak'usda be 'ut'en k'ah butl'aháhonla inle. 'Aw 'et ndi 'ut'en lhahídinla hoh 'uhoont'ah. ²⁷ 'Et Antioch ts'ih nahunt'az hoh Sizi Gri yugha hoodul'eh, ts'iyawh 'ilhóhubughezdla 'ink'ez nts'oh teh Yak'usda bughä ne'húst'en 'ink'ez 'udun yun k'ut whut'en chah be 'alha' hoont'ah, 'i hiyít'i suli hutni hoh hubulh nahuwhulnuk. ²⁸ Sa yugha hoodul'eh hubutah hanke.

15

Paul, Barnabas bulh Jerusalem ts'ih whel'a 'en 'ink'ez dune tsuh whudelhdzulh hubulh 'ilhuhowezdel

¹ 'Et bulunah dune Judea whehudíndel keyah Antioch ts'ih hunindel 'ink'ez ndunnah huba 'alha' hoont'ah Moses bughunek 'uk'une'úsduguz, 'i bughä buka dune ahli, 'i k'ut nuwhuhúz'tus t'eh, 'aw 'et t'eh zeh dutehjih, whuz na'a wheooboohoodalh'i. ² Paul, Barnabas bulh tube cho Moses bughunek 'uk'une'úsduguz, 'i bughä dája hutni 'et hubugha lhenah nihúwhunt'ai, ndunnah Judea ts'ih hahándel tubulh. 'Et huwu lhgha 'úhudeja hoh Paul, Barnabas, 'ink'ez 'uyoon Antioch whut'en tubulh, Jerusalem ts'ih toodelh 'ink'ez whel'a 'en ndunnah dune tsuh whudelhdzulh hubulh huwu yahoolhtuk hubuhútni.

³ 'Aw 'et Sizi Gri bughä 'ilhuhowezdel, ndunnah whel'a 'en whebahalh'a. 'Et Phoenicia 'ink'ez Samaria whutuh lhuhúz'az hoh 'udun yun k'ut whut'en dahúja Yak'usda ts'un náhulhéya hubuhútni hoh tube cho ndunnah Sizi Gri k'úne' hut'en huhóont'i suli. ⁴ 'Et Jerusalem ts'ih huni'az hoh ndunnah Sizi Gri bughä 'ilhuhowezdel tube cho hubanelhnik. Ndunnah whel'a 'en 'ink'ez dune tsuh whudelhdzulh, 'en hubulh náhuwhulnuk Yak'usda bughä nts'oh teh ne'whust'en 'et hubugha. ⁵ 'Et bulunah huba 'alha' hoont'ah, Pharisee hubulh

hudedoh, 'en dihudíndel 'ink'ez 'uhutni, "Udun yun k'ut whut'en hika dune unli, 'i k'ut hubatet'us 'ink'ez ndi Moses bughunek 'uk'une'úsduguz, 'i k'úne' hóot'en hubadooni huba' hoont'ah." ⁶ 'Et whel'a 'en 'ink'ez dune tsuh whudelhdzulh ts'iyawh 'ilhuhowezdel 'ink'ez njan 'uhutni hukw'u nuhúhulhye. ⁷ Sa hukw'u nuhúhulhye hoh Peter didinya 'ink'ez ndo búlhni, "Sulhutsinkah t'eeonáhzun 'uda hoh Yak'usda nuhtáhasálhti Yak'usda bughunek unzoo, 'i bugha 'udun yun k'ut whut'en hubulh yaóolhtuk ka, khun si sudóots'o 'ink'ez huba 'alha hot'e ka. ⁸ 'Ink'ez Yak'usda dune dahínt'ah t'eoobunínzun, 'et huwa 'udun yun k'ut whut'en, 'en chah hubuk'entsi' hoh wheni danénla da whuz na'a ndunnah chah Ndoni hubuyudélt's'ut ho' hoont'ah. ⁹ Wheni Lizwif ts'inli 'ink'ez 'en 'udun yun k'ut whut'en hinli 'et whunts'ih 'aw lhelhts'un na'a lhene'ílhdzun. 'Et hoh ndunnah Sizi Gri huba 'alha' hoont'ah suli 'et huwa bulubeshi huba yuna'dalhde. ¹⁰ Ndi Moses bughunek 'uk'une'úsduguz, 'i wheni 'ink'ez netsuh whudelhdzulh, 'en whunts'ih 'aw ts'ah'un na'a hukw'ú nucha'hit'il inle. 'Et 'ink'ez k'an di ka Yak'usda 'en óolhdzih ho' dahni? Ndunnah yugha hoodul'eh 'uhót'e ghaít'ah teh huba né'dahni. ¹¹ 'Et nts'e na'a 'uwhutét'ih? Neba 'alha' hoont'ah 'ink'ez nts'e na'a 'uhint'ah, whuz na'a wheni chah Sizi Gri neMoodihti ye únzoo, 'i be uzdoojih ka neghá whunt'ai." ¹² 'Et soo hudemhts'i ts'iyawh t'ehudusnih, Barnabas, Paul bulh nahuwhulnuk whutah 'udun yun k'ut whut'en hubutah nts'e na'a Yak'usda bugha hooncha 'ink'ez huwa 'ét'en tuné'hust'en 'et hubugha. ¹³ 'Et yahulhtuk 'ustl'e' 'uhudeja hoh James didinya 'ink'ez utni, "Sulhutsinkah soo sih soo zélhts'ai! ¹⁴ Simon k'an nuhwhudáni, nts'e na'a Yak'usda 'udechoo ndunnah 'udun yun k'ut whut'en dinabunelhútan hoh dune hubutah 'utahaóobanla. 'En 'uhuja Yak'usda boozi dezti hiyulhtsi." ¹⁵ 'Et James 'o 'un ndutni, "Et Yak'usda be nus whunilh'en hubughunek 'uk'une'úsduguz, 'i ts'iyawh lhgha 'uhudeja hoh ndutni,

¹⁶ "Et hukw'elh'az whusanátesdalh,' ni neMoodihti,
 "Ink'ez David bukoo naoonankat, 'et dinaoodutés'ah 'ink'ez yahónkat
 chah soo ná'whutesdlilh,
 'ink'ez lhanaooduteslilh.*

¹⁷ 'Et whuz na'a ndunnah dune 'et nenínkat chah skahunóota 'ink'ez 'udun
 yun k'ut whut'en,
 ndunnah sich'oh suba 'udunébunila soozí be hiyozi ka,
 'en chah skahúnoota, neMoodihti utni.
 'En 'int'ah ndi ts'iyawh 'uhóonla.

¹⁸ Yak'usda ndi yun 'itelilh 'et whutsuh whudelhdzulh nus de dawhútet'ih 'et
 ts'iyawh t'eeonínzun."

¹⁹ 'Et James 'o 'un ndo búlhni, "Si 'et ndunúszun ndunnah 'udun yun k'ut
 whut'en, ndunnah Yak'usda ts'un nalhúya, 'aw huba hoontsi' ts'ih 'uhot'e
 huba cha'hóot'ah. ²⁰ 'Et whunts'ih buts'ó k'e'ts'ooges 'ink'ez hubuzdóoni, 'Ndai
 ts'uyi, 'i hubuyak'usda 'uk'eltsi, 'i hits'un hítulhdelh 'et buch'a' nenjoot ho'
 'int'ah, khun teh wah'ah gunih. Ts'ekoo k'us dune bulh tinta' ooht'en gunih.
 Khunai buze 'úsduguz, 'i 'ink'ez 'uskai tananji, 'i wah'ah gunih, 'ink'ez 'uskai
 chah wahnai gunih.' ²¹ 'Et 'alha' hoont'ah Lizwif luglez 'et nats'ulyis dzin
 totsuk sa whuts'un Moses bughunek 'uk'une'úsduguz, 'i buk'eyatuk 'ink'ez
 keyah totsuk chah bughunek hiye búbulh yalhtuk," ni, James.

*Whel'a 'en 'ink'ez dune tsuh whudelhdzulh 'udun yun k'ut whut'en
hubuts'un k'e'hanguz*

²² 'Et ndunnah whel'a 'en chah, dune tsuh whudelhdzulh, 'ink'ez Sizi Gri
 bugha 'ilhohuwezdel tubulh lhulh lhugha 'uhudeja hoh Paul, Barnabas bulh

* ^{15:16} David hík'edinzut doo cha hubudelhti naoobulhtsi, ni ho 'utni.

Antioch ts'ih hubulh te'us 'utahábotelhtelh. 'Et Judas, 'en Barsabbas hiyúlhni, 'en Silas bulh 'utahaóobahalhti. 'Et huba 'alha' hoont'ah hubutah ndunnah nanah, 'en soo whunih hinli. ²³ 'En ndi hik'une'úzguz, 'i hubutl'ahíya'ai, 'i ndutni,

"Wheni whel'a 'en, dune tsuh whudelhdzulh, 'ink'ez huba 'alha' hoont'ah chah Jerusalem delhúts'i, wheni ts'iyawh nuhts'o k'e'ts'uges, newhul-hutsinkah, 'udun yun k'ut whuzdli, keyah Antioch, Syria 'ink'ez Cilicia yun k'ut delhts'i, Dahooja nuhts'utni.

²⁴ Whulh 'úzdzits'o bulunah dune netahaíndel nuhts'un hunindel 'ink'ez tink'us na'a 'unohuhútni. 'Moses bughunek 'uk'une'úsduguz, 'i buk'une' 'ooht'en 'ink'ez buka dune ahli, 'i k'ut nahuhoot'us.' Ndi khunek 'i be tink'us nahonilht'uk, 'aw wheni ndo buts'útni 'ilah ho' hutni. ²⁵ 'Et huwa 'ilhuts'owezdel 'ink'ez ts'iyawh lhgha 'úzdeja hoh dune whunih 'en nuhts'un uztelh'ah 'utahaóobats'alhti 'ink'ez soo ndunnah hubuk'ets'ints'i Barnabas 'ink'ez Paul bulh hubulh hútoo'as 'et wheni. ²⁶ 'En 'uhuja Sizi Gri, neMoodihti, bughunek be yáhalhtuk hukw'é dahootsah tulih t'ehonanzun 'et whunts'ih.

²⁷ 'Et Judas 'ink'ez Silas nuhts'ú buztelh'ah, 'en dich'oh daja ts'utni hoh nuhts'un k'e'ts'anguz, 'et ts'iyawh buzek whe ndun whuduteni. ²⁸ 'Et Ndoni 'en bulh lhgha 'úzdeja 'aw 'o 'un chah howu whúlna nuhwhuba ts'uhólh'i hukwa cha'uznizun. Ndet k'an nuhghá whunt'ai whuz na'a zeh 'ooht'e hukwa' uzninzun. ²⁹ Ts'uyi, 'i hubuyak'usda k'edeltsi ts'un tulhdelh, 'i wah'ah gunih! 'Uskai chah, khunai buze 'úsduguz, 'i buzkai tananji, 'i chah wah'ah gunih! 'Ink'ez ts'ekoo k'us dune bulh tinta' 'ooht'en gunih! 'Et whuch'a khahdli t'eh, 'et sih soo 'ooht'e. 'Aw 'et zeh.' ³⁰ 'Et khunek na'a 'en whéobahalh'a hoh Antioch ts'ih hunindel. 'Et ts'iyawh huba 'alha' hoont'ah 'ilhobughezdla 'ink'ez dustl'us hubutl'ahíya'ai. ³¹ 'Et ndi hubuts'un k'ehanguz 'i hik'eyailhtuk hoh buk'une'úsduguz, 'i bugha hubudzi ulhtus nasdli 'ink'ez tube huhóont'i. ³² 'Et Judas, Silas bulh hedich'oh chah Yak'usda ba nus whunilh'en hinli, 'ink'ez huba 'alha' hoont'ah sa hoh Yak'usda bughunek be hubulh yahalhtuk, 'et hoh soo hubudzi unzoo 'ink'ez hilhtus chah hubuhulhtsi. ³³ 'Et hukw'elh'az dzuh sa hubuzih hudemlhts'i. 'Et huba 'alha' hoont'ah ndunnah khunek na'a 'en nts'ez de hahádel ts'ih whuz hubudzi hoont'i hoh whel'a 'en hubuts'un whenábahalh'a. ³⁴ 'Et whunts'ih Silas 'en 'aw 'et teda buba hoonzoo ho' hoont'ah. ³⁵ 'Et Paul, Barnabas bulh Antioch 'et chah 'et hanke, 'uyoon chah hubulh khunek unzoo, 'i be hubulh yahúlhtuk 'ink'ez neMoodihti bughunek bugha wheóobuhodulh'eh.

Paul, Barnabas bulh ndun John, Mark hiyulhni, 'en bugha lhch'a hust'az

³⁶ 'Et hukw'elh'az dzin Paul, Barnabas 'uyúlhni, "Nts'e keyah totsuk neMoodihti bughunek be yats'ulhtuk, nelhutsinkah hubuts'un nunaoodút'as 'ink'ez nahot'ah dahínt'ah simba." ³⁷ 'Et Barnabas, John, Mark hiyulhni, 'en dudulh tóo'as hukwa' ninzun, ³⁸ 'et whunts'ih Paul 'aw ts'ah'un buba cha'hóot'ah. Hoh da Pamphylia bughu whenája 'ink'ez 'ut'en hubulh lhachaídil, 'et huwa hubulh 'útenilh, 'aw Paul hukwa cha'nízun. ³⁹ 'Et tube lhenah 'ahudeja k'et, lhch'a nahust'az. Barnabas, Mark dulh 'iyílya 'ink'ez Cyprus ts'ih whenahedúki. ⁴⁰ 'Et Paul, Silas hubutahaíyalhti 'ink'ez huba 'alha' hoont'ah Yak'usda tl'aóobahanla ye únzoo, 'i be hubughole ka, 'et hukw'elh'az whenáhet'az. ⁴¹ 'Et Syria 'ink'ez Cilicia whuyun k'ut whutah lháhuz'az, 'ink'ez Sizi Gri bugha 'ilhuhowezdel 'o nus hubudzi ulhtus hubuhulhtsi.

¹ 'Et Paul 'en keyah Derbe 'ink'ez Lystra ts'ih ninya. Whuz 'ilhunuh dune buba 'alha' hoont'ah Timothy hiyúlhni, 'en hoh whut'en. Be'ama chah buba 'alha' hoont'ah, 'en Lizwif 'int'ah, 'et be'abá, 'en Greek 'int'ah. ² Keyah Lystra 'ink'ez Iconium whut'en, ndunnah huba 'alha' hoont'ah, 'en Timothy soo highu yalhtuk. ³ 'Et Paul 'en Timothy dulh yutél'us hukwa' ninzun, 'et yuka dune unli, 'i k'ut hiyúzt'us. 'Et ndihiyinla hoh Lizwif hoh whut'en, 'en Timothy be'abá Greek unli t'ehinínzun 'et huwa. ⁴ 'Et keyah whutuh hedulh hoh 'et huba 'alha' hoont'ah ndai whel'a 'en 'ink'ez dune tsuh whudelhdzulh Jerusalem 'et highu nahezya, 'i zeh k'úne' 'ooht'en hubuhútni. ⁵ 'Et Sizi Gri bugha 'ilhohuwezedel hoh be 'alha' hoont'ah, 'i be 'o nus hilhtus huzdli, 'ink'ez 'et huwa dzin totsuk nus lhe'huneltsuk.

Paul, Ndoni bugha benghan néwhults'ut Macedonia ts'ih yun k'ut tóoya ka

⁶ 'Et Phrygia 'ink'ez Galatia yun k'ut wheghah lhuhúzdel hoh Asia yun k'ut 'et Yak'usda bughunek be yáhutelhtuk, 'et Ndoni whuch'a hubunezyoot. ⁷ 'Aw 'et Mysia yun k'ut wha'az nihúnindel, Bithynia yun k'ut ts'un hútoodelh hukwa' hut'en, 'et whunts'ih Ndoni 'aw hubugha chahó'o'al. ⁸ 'Et Mysia yun k'ut wheghah lhuhúzdel hoh keyah Troas ts'ih hunindel. ⁹ 'Et 'ulh'ek Paul hoonli bunalh ha whélt's'ut hoh dune Macedonia yun k'ut whut'en yunilh'en 'et siyin 'ink'ez yughu téduddlih, "Macedonia yun k'ut ts'ih nets'ínyalh 'ink'ez nela'ineh!" yúlhni. ¹⁰ Soo njan bunalh ha whélt's'ut ibulh lhazduja Macedonia yun k'uz ts'ih uztekelh 'ink'ez ndunnah 'et whut'en khunek unzoo, 'i be hubulh yats'oolhtuk ka. NeMoodihti neka dani t'ets'onínzun 'et whuz na'a 'uts'uja.

Lydia buba 'alha' hoont'ah suli 'ink'ez too be' 'ulya

¹¹ 'Et Troas 'et ts'i cho be nus ts'utezki, 'et soo ts'ihyan whuz Samathrace ts'ih yats'úzki, 'ink'ez 'om bun dzin 'et Neapolis ts'ih ts'utezki. ¹² 'Et whezdindel hoh keyah Philippi ts'ih ts'unindel. 'I yun k'ut Macedonia 'udechoo keyah whudézti 'et whuz'ai. 'Et Roman keyah be'ilhdzun hoonli ho' hoont'ah. 'Et keyah Philippi lhat dzin 'et na'ts'alh'ai. ¹³ 'Et Lizwif nats'ulyis dzin hoh keyah whuch'a ts'uzdel 'ink'ez took'oh taba ts'ih ts'unindel. 'Et Lizwif tenahudedli hoonli 'uzninzun, 'et huwa 'et nátl'azdelts'i 'ink'ez ts'ekoo 'ilhohuwezedel 'en bulh yáts'ulhtuk. ¹⁴ 'Ilhunuh ts'eke, Thyatira whut'en Lydia hiyúlhni, 'en chah nedánts'o. 'En naih dusk'un dezti be 'óoket unli, 'ink'ez 'ahoolhyez Yak'usda ts'un teni' nilhdzun. 'Et huwa neMoodihti Paul Yak'usda bughunek ye yálhtuk, 'i soo cho yoozélhts'ai 'ink'ez beni taóodoools'it yulhtsi. ¹⁵ 'Et didut 'ink'ez bukoo hudemhts'i, bulh dunekah chah, ts'iyawh too be' hulya. 'Et hukw'elh'az neghunséya, 'ink'ez neundulhni, "NeMoodihti soo cho but'anunestan nuhwhuba 'alha' hoont'ah t'eh, 'anih sukoo ts'ih suzih doolhúts'i." 'Ink'ez 'ilhuz 'udeja hoh bulh utezdel.

Paul, Silas bulh keyah Philippi 'et tsak'ebaha'ai

¹⁶ 'Et 'ilhudzin nts'e tenazdedli ts'ih ts'enindel hoh, 'ilhunuh 'ulhna, 'en ts'eke nedudezya. 'En ntsi' nudúdeh, 'i buyídinda 'i be nus whunilh'en 'ink'ez nus daóotenilh ts'iyawh ndo búlhni. 'Et ndunnah yughunli 'en lhai sooneya hiye 'úlh'en. ¹⁷ 'Et 'ut'en Paul 'ink'ez wheni teh nenunéya 'ink'ez 'alzul hoh utni, "Ndunnah dune degha nus nduk Yak'usda budune hinli. Nts'e na'a dute-hjih hoh teh nuhwhuba nuhúhuyeh!" ¹⁸ Lhat dzin ndut'en, 'udek'elh'az Paul tube taídeznih, yuts'un nálu'a 'ink'ez ntsi' nududeh, 'i njan díyulhni, "Sizi Gri boozi bugha buyúh hanaindaih!" 'Et 'ahoh ntsi' nududeh, 'i yeýúh hanadede. ¹⁹ 'Ink'ez ndunnah ts'eke bumoodih t'ehonanzin ndet hoh sooneya 'uhulh'en, 'ustl'e' 'uhooja, 'et Paul, Silas bulh hubuhúzgooh 'ink'ez huba' hoont'ah, 'et

keyah k'une'nuwhuhul'en hububut nébanilhti. ²⁰ 'Et lhahudughan moodih but nebanilhti 'ink'ez hubuhutni, "Ndunnah Lizwif 'uhint'ah. Netah 'ahoolhyez dune tehudule. ²¹ Ndet wheni hubugha neba nahesda ts'iyawh whuch'a na'a whhubuhodulh'eh. Wheni Roman 'uts'int'ah 'et huwa 'aw buk'ah ts'ih 'uts'ooneh ghaít'ah 'ink'ez hoh tuné'ts'oot'en ghaít'ah." ²² 'Et 'ilhuhowezdel ts'iyawh hubuch'a nihúdendel, nehughan moodih Paul, Silas bulh hubunaih hubuk'uhidutelhch'ul 'ink'ez hubuholht'ah hubuhúttni. ²³ 'Et soo tube hubuholht'o hoh nts'e dune tsak'eha'ai, whuz tsak'ebaha'ai, 'ink'ez ndun huwunli, 'en, "Hubuch'a dana'doo'ahlh," hiyúlhni. ²⁴ 'Et tsak'edinla ghunli hiyúlhni hoh 'ahoh soo bez tsak'edi'ai 'et tsak'ehiya'ai 'ink'ez duchun dindaz huba' 'int'ah, 'i bukechun ghu níhiniinla 'ink'ez hiduna'denla. ²⁵ 'Et tuzniz bat'en Paul, Silas bulh Yak'usda ts'un tenahududli 'ink'ez hujun. 'Et ndunnah tsak'ehudelhts'i hubuhoozélhts'ai. ²⁶ Khunyaz tube cho yun naghesnai hoh koo tsak'ehudelhts'i, 'et chah ndulhcho noghutnah. 'Et 'uhooja ndati ts'iyawh dá'dutezkat 'ink'ez 'i bulh tes tl'ool hiyelhúghel, 'i hubuts'u háyankat. ²⁷ 'Et tsak'edelhts'i ghunli ts'enandzut hoh ndati ts'iyawh 'udun 'udenla whutelh'en ts'iyawh tsak'ehudelhts'i tinta hulghaz ninzun, 'et dutes cho hayálhtsus 'ink'ez 'aw 'et na'dutuzelghelh. ²⁸ Paul soo 'ultus 'uyúlhni, "Dah! 'Udun dóldah gunih, ts'iyawh 'aw 'et 'uzdélhts'i!" yúlhni. ²⁹ 'Et tsak'edelhts'i ghunli kwun nult'a ka 'utni hoh koo dálgai 'ink'ez soo dultuz hoh Paul, Silas bulh hububut nacháneti. ³⁰ 'Et tinábunilhti 'ink'ez huboodulhkut, "Soo sudutéhnih, datésnilh hoh dutesjih?" hubúlhni. ³¹ "Sizi Gri neMoodihti, 'en mba 'alha' 'oot'e, 'et hoh dutanjih, nyun 'ink'ez nkoo hudemhts'i chah," hiyúlhni. ³² 'Et neMoodihti bughunek bugha hiyulh yálhtuk 'ink'ez ts'iyawh ndunnah 'et bukoo hudemhts'i chah. ³³ 'Et 'ulh'ek soo hoh whegha whezulh hoh tsak'edelhts'i ghunli daóobunilhti 'ink'ez hubuka k'et tináwhuzguz. 'Et didut 'ink'ez bukoo hudemhts'i chah, ts'iyawh 'ahoh too be' hulya. ³⁴ 'Et Paul Silas bulh bukoo ts'ih nábunilhti 'ink'ez bughu na'unt'ai, 'ink'ez tube cho whunéhnik didut 'ink'ez bukoo hudemhts'i chah, ts'iyawh Yak'usda huba 'alha' 'int'ah suli 'et huwa. ³⁵ 'Et bundada nehughan moodih nélhghel hubuts'un whebuhalh'a, "Ndunnah dune hubulanadintnih!" hubuhúttni. ³⁶ 'Et tsak'edelhts'i ghunli Paul 'en 'ídani, "Nehughan moodih buts'á khunek 'ults'ut, 'Nyun 'ink'ez Silas bulh nuhlanazdootnih,' hutni, 'et huwa soo cho khohdle hoh natooht'as," hubúlhni. ³⁷ 'Et whunts'ih Paul 'en nélhghel ndo bílhni, "Hukwa tsak'enhoo'ahl hoolah, 'et whunts'ih dune tuz neholhtsus, nuwheni Roman keyah ts'uwut'en ho' ts'int'ah, 'et whunts'ih tsak'edelhts'i 'ink'ez k'an whu'iz 'et nanehutoolh'a hukwa' hut'en. 'Awundooh, 'aw nducháhoot'ah ho' hoont'ah! Nehughan moodih dich'oh whusahóodel 'ink'ez nelanahudoottnih huba' hoont'ah." ³⁸ 'Et nélhghel ndi khunek bugha nehughan moodih hudáni, 'et Paul, Silas bulh Roman keyah whut'en 'uhint'ah whulh 'úhudants'o hoh tube whehunelhújoot. ³⁹ 'Et ndunnah nehughan moodih, 'en hubuts'un tehududli hoh tsak'ehudelhts'i whuch'a nabuhuzdla 'ink'ez keyah whuch'a nahoodelh hubuhúttni. ⁴⁰ Paul, Silas bulh tsak'edelhts'i tináhunt'az 'ink'ez Lydia bukoo ts'ih huni'az. 'Et ndunnah huba 'alha' hoont'ah, 'en chah 'et hudemhts'i. Khunek be ts'ílhtus, 'i be hubulh yáhalhtuk 'ink'ez whenáhet'az.

17

Paul 'ink'ez hiyulh nudelh keyah Thessalonica 'et dzuh nubatelhdzut

¹ 'Et hedulh whuzeh keyah Amphipolis 'ink'ez Apolonia whutah lhuhúz'az, 'et keyah Thessalonica ts'ih huni'az. 'Et Lizwif hubuluglez whuz'ai. ² 'Et whutsuh da ne'ú'en huwa Paul njan Lizwif hubuluglez ts'ih ninya. 'Et tat

nats'ulyis dzin whutah 'et ndi Yak'usda bughunek 'uk'une'úsduguz, 'i bugha wheoobunoolhtun hukwa' utni. ³ 'Et huba hukw'ú nuhúlhye Christ 'en 'utenilh dzuh nutezut, datétsah, 'ink'ez nakhutétnalh. 'Et ts'ah'un 'uhoont'ah huba hoolh'i, "Ndun Sizi k'an bugha nohwhulh yálhtuk, 'en Christ, 'en 'int'ah," ni, Paul. ⁴ 'Et bulunah huba 'alha' hooja hoh Paul, Silas bulh hubuts'un nihudendel 'ink'ez Ihanah Greek whut'en, 'en Yak'usda huba 'alha' 'int'ah 'ink'ez ts'ekoo hincha chah ts'iyawh hubuts'un nihudendel. ⁵ 'Et whunts'ih Lizwif huwe' hoolnih 'et kaldus ti núdelh, 'en nabahálhdzoo 'ink'ez lhts'un nébodinla keyah ndulhcho hoh whudutni buch'a yáhalhtuk, 'i be 'ilhunuh dune, Jason hiyúlhni, 'en chah bukoo tinta' honílh'en, Paul, Silas bulh nabuhóolhtelh hukwa' hut'en 'ink'ez 'az dune ts'uns tibotelhtelh 'et wheni. ⁶ 'Et whunts'ih 'aw nachabuhíltel hoh Jason 'ink'ez bulunah huba 'alha' hoont'ah 'en chah whúske bulh keyah whumoodih 'en ts'un haoobuhanguz 'ink'ez hudultul hoh njan nduhútni, "Ndunnah dune ndi yun k'ut ndulhcho hoh tinta' huwhulh'ih 'ink'ez 'aw 'et njan nekeyah chah 'et ndótet'ilh wheni whusahándel, ⁷ 'ink'ez Jason 'en bukoo hubuzdla. Ts'iyawh nehubudayi cho degha nus dezti khunek netl'aída'ai 'i k'uhunyis ho' hut'en 'ink'ez 'uyoon hubudayi cho unli, "En Sizi ts'utni,' nehútni." ⁸ 'Et ndi khunek 'i be ts'iyawh 'ilhohuwezdel 'ink'ez keyah whumoodih tubulh ndulhcho 'ants'ih whuts'uhudutnik hoh huwu yáhalhtuk. ⁹ 'Et keyah whumoodih, 'en Jason 'ink'ez 'onghuh chah tínahutedulh wheni sooneya k'enáhudedzai 'et bulanahudetnik.

Paul, Silas bulh Berea keyah ts'ih whebahalh'a

¹⁰ 'Et soo nadálghel ibulh huba 'alha' hoont'ah Paul, Silas bulh keyah Berea ts'ih whebahalh'a. 'Et whuz huni'az, 'et Lizwif hubuluglez ts'ih dahani'az. ¹¹ Ndunnah 'et whut'en, 'en Thessalonica whut'en whuch'a 'o nus hinzoo. Ndi khunek buts'ótl'aidelts'ut, 'i soo hika' nizun hoh Paul hiyoozélhts'ai, 'ink'ez dzin totsuk Yak'usda bughunek 'uk'une'úsduguz, 'i hik'uyalhtuk hiyodol'eh ka, ndi khunek Paul ye yálhtuk, 'i 'alha tulih 'int'ah t'ehonteze hukwa' huninzun 'et huwa. ¹² 'Et Ihanah huba 'alha' hoont'ah suli. Greek whut'en ts'ekoo 'ink'ez dune chah. ¹³ 'Et Lizwif Thessalonica whut'en whulh 'úhudants'o keyah Berea huwhútni 'et chah Paul Yak'usda bughunek be hubulh yáhalhtuk hoh whuz lhgha hidunindel 'ink'ez hubuch'a tinta' huwhulh'en hukwa' hut'en. ¹⁴ 'Et 'ahoh huba 'alha' hoont'ah Paul yatoo ts'ih whenáhiyah'a, 'et whunts'ih nahúlt'o Silas, Timothy bulh Berea 'aw 'et hanke. ¹⁵ Ndunnah dune ndun Paul bulh 'uhut'en 'en keyah Athens ts'un zeh hiyúlh lhusúdel. 'Ink'ez Silas, Timothy bulh soo 'a cho duts'un hutoo'as hubúlhni hoh hubuts'otl'a khunek yi'ai, 'et 'ahoh hits'un whin'az.

Paul keyah Athens 'et yalhtuk

¹⁶ 'Et Paul keyah Athens 'et Silas, Timothy bulh hubalh'i 'ink'ez bukeyah ndulhcho hoh buyak'usda k'edeltsi zeh hoonli, 'et Paul tube hubugha budzi nduda. ¹⁷ 'Et Lizwif hubuluglez ts'ih, ndunnah Lizwif 'ink'ez ndan whuz ts'ih tenahududli chah, ndi Yak'usda bughunek 'i be hubulh howi yalhtuk, 'ink'ez njan 'uhóoket hoh, dzin totsuk ndan 'et nuhudelh, 'en chah hubulh howi yalhtuk. ¹⁸ 'Et ndunnah Epicurea hudedowh 'ink'ez ndunnah Stoic hudedoh dune hoodulh'eh hubugha hiyulh yálhtuk hoh bulunah howu yáhalhtuk, "Ndun ilah teh ne'duni, daja dutenilh hukwa' ninzun ho' 'utni," hutni. 'Et 'uyoonah chah 'uhutni, "Ndun, 'en 'uyoo yak'usda, 'en bughu yalhtuk 'ududil'i ho' 'utni." Paul, Sizi 'ink'ez dinadija hubugha hubulh yálhtuk 'et huwa 'uhutni. ¹⁹ 'Et Paul dzulhyaz, Mars hiyúlhni, yedoh hiyúlh nenindel 'ink'ez 'uhiyúlhni, "Ndi k'an buneoodilh'eh, 'i bughu yailhtuk soo cho t'ets'untizeh hukwa' uzninzun. ²⁰ Ndi bughu yailhtuk, tube neba

hooncha ho' hoont'ah, 'et huwa daja ni ho' 'utni, soo cho t'ets'onozez hukwa' ts'uninzun." ²¹ Keyah Athens whut'en 'ink'ez 'uts'un keyah whut'en chah 'et huwhut'i, 'en ts'iyawh k'an khunek bugha yatuk, 'i huhoont'i hoh 'ahoolhyez wheni huwu yahulhtuk k'us ndi khunek daja dutenilh hiyoozólhts'a. ²² 'Et Paul dune dilhts'i dzulhyaz k'ut, 'et 'ilhohuwezdel buniz seyin 'ink'ez ndo búlhni, "Athens whaht'en, t'enwhunazin tube 'ahoolhyez nuhyak'usda ts'un tenadahdli. ²³ 'Et nuwhu'az usyalh hoh nuhyak'usda bukw'uzdai lhe'ultsuk nulh'en. 'Ilhunuh Yak'usda bukw'uzdai k'ut buk'une'úsduguz ndutni, 'Yak'usda t'echats'unízun, 'en ba 'int'ah.' 'En t'enuzuhzun hoh buts'un tenadahdli, 'en k'an bugha nohwhulh yatelhtuk. ²⁴ Ndun Yak'usda t'énuzuhzun, 'en 'int'ah, ndi yun k'ut 'ink'ez ndai buk'ut 'uyint'ah, 'i ts'iyawh 'uyínla. Nduk yak'uz 'ink'ez ndi yun k'ut ts'iyawh whumoodih unli, 'et huwa luglez whucho dune 'uhoonla 'et chaídah ho' hoont'ah. ²⁵ 'Et dune buyiz hiye khúna, 'i 'ink'ez ts'iyaintsuk chah soo dich'oh zeh huwá yúnle ho' 'int'ah. 'Et huwa 'aw dune 'uyínla, 'i yukacha'nizun. ²⁶ Yak'usda 'ilhunuh dune zeh ndi yun k'ut ts'iyannah dédowh 'ulya inle, 'ink'ez ndi yun k'ut nduhoolcho huwhut'i suli. 'Ink'ez 'en zeh ba' hoont'ah hoh nts'e keyah hudutelts'i. Nket'ah ndi yun dune 'utelih 'ink'ez nts'e 'ahutet'ilh, 'et whutsuh 'uhóoja 'uda t'eoónízun. ²⁷ 'Et whuz na'a 'uja didut hika itó'o'en 'et huwa dune chawhés'en k'una'a hoh hikudúlnih t'eh nahiyóolhtelh tulih. 'Et whunts'ih Yak'usda 'aw nilhdza neghucha'ít'ah ho' 'int'ah. ²⁸ 'En bugha dune ts'inli 'ink'ez ts'ukhuna. 'Ink'ez bulunah nuhtah 'uk'une'úsduguz 'uhutni, 'Wheni chah 'en bugha dune 'uts'int'ah.'

²⁹ 'Et huwa wheni Yak'usda bugha dune ts'inli t'eh, 'aw 'uk'edeltsi k'una'a gold k'us silver k'us tse be 'úlya, 'i Yak'usda uznóozen ghaít'ah. 'I ts'iyawh dune yuholh'ai, 'i 'int'ah. ³⁰ 'Et hoh da dune ndet t'ehonízun huwa Yak'usda dzuh nuchaoobilhdzulh, 'et whunts'ih 'aw 'et k'an Yak'usda ts'iyannah dune ndulhcho lubeshi whuch'a hubeni nahondunooleh hubúlhni. ³¹ 'Et 'ilhudzin 'utahahó'ai ndet ndi yun k'ut ndulhcho ye ts'ah'un na'a 'int'ah, 'i be dune ba nahuteyeh ka. Ndun 'ilhunuh dune 'en dune ba nahuteyeh ka 'utahayálhti. 'En dinaidilhti 'et huwa 'alha 'et ndó tenilh." ³² 'Et Paul hidánts'o ndun dune dinadija yughu yailhtuk hoh, bulunah chah highudloh, 'ink'ez bulunah 'uhutni, "Doo chah zeh njan hubugha nelh yaóolhtuk hukwa' uzninzun," hiyúlhni. ³³ 'Ink'ez Paul 'aw 'et 'ilhohuwezdel butahanája. ³⁴ Bulunah dune hits'un nidendel. Hubutah 'ilhunuh, 'en Dionysius hiyúlhni, 'en nahéyilh 'ilhunuh, 'en 'int'ah. 'Ilhunuh ts'eke chah, Damaris hiyúlhni, 'ink'ez 'uyoon chah, 'en huba 'alha' hoont'ah suli.

18

Paul Corinth whut'en khunek unzoo, 'i be hubulh yálhtuk

¹ 'Et hukw'elh'az Paul keyah Athens huwu natesja 'ink'ez keyah Corinth huwhútni ts'ih 'et ninya. ² 'Et Lizwif 'ilhunuh Aquila hiyúlhni yughu ninya. 'En yun k'ut Pontius huwhútni 'et whuzdli inle, k'an zeh yun k'ut Italy huwhútni ts'ih whuz de bu'at Priscilla bulh whusahá'az. 'Et hubudayi cho Claudius hiyúlhni, Lizwif ts'iyawh keyah Rome whuch'a nahoodelh hubúlhni 'et huwa whusahá'az, 'ink'ez Paul hubuts'u whenya. ³ 'Et buzih usda 'ink'ez hubulh 'út'en. Didut dahút'en whuz na'a bun 'ulh'en, 'et whuz na'a hoh whuch'a na'duldeh. ⁴ Nats'ulyis dzin totsuk Lizwif hubuluglez 'et Paul whébunoolhtun hukwa' 'utni. Lizwif 'ink'ez Greek whut'en tubulh ndi Yak'usda bughunek, 'i ts'ah'un be hubulh yaoolhtuk hukwa' 'utni. ⁵ 'Et Silas, Timothy bulh Macedonia ts'ih hanáhet'az. 'Et Paul Ndoni yula 'ut'en hoh ndunnah Lizwif soo cho whébunulhtun ndun Christ, 'en Sizi, 'en

'int'ah. ⁶ 'Et whunts'i ndi bughunek hiyoolhchoot hukwa cha'hunízun, 'ink'ez Yak'usda ch'a hudetni t'eh, 'et bulez ch'a dunaih nayughat 'ink'ez ndo búlhni, "Tinta nahkat t'eh, nuhwhenich'oh zeh nuhwhuba' hoont'ah ho' tehnihil. Si suk'ého'ah ghaít'ah. K'an whuts'un 'udun yun k'ut whut'en, 'en buts'u tóosya!" ⁷ 'Et huwa bughu whenája 'ink'ez 'udun yun k'ut whut'en, Justus hiyúlhni, 'en 'ahoolhyez Yak'usda ts'un teni nilhdzun, 'en yuzih whutet'i ka yuts'un ninya. Bukoo 'et Lizwif hubuluglez whuzih whuz'ai. ⁸ 'Et Crispus, Lizwif hubuluglez whumoodih, 'en, ts'iyawh bukoo hodelhts'i chah, neMoodihti huba 'alha yint'ah 'ink'ez lhanah Corinth whut'en, 'en chah khunek unzoo, 'i hidánts'o hoh huba 'alha' hoont'ah suli, 'ink'ez too be' hulya. ⁹ 'Et 'ilhuh 'ulh'ek Paul bunalh hawhélts'ut hoh neMoodihti ndi yúlhni, "Whéniljut ilah, yailhtuk ze' dini, 'aw 'ustl'e' doneh gunih, ¹⁰ 'ahoolhyez nyulh 'ust'ah 'et huwa. 'Aw dune nyun dóolhdah hoolah, lhanah njan keyah sulh dune hinli ho' hoont'ah." ¹¹ 'Et Paul 'ilhuh naoodézut 'o 'at lhúhoolcho 'et hubutah inda. 'Et Yak'usda bughunek bugha whubodulh'eh zeh inle. ¹² 'Et yun k'ut Greece huwhútmi, 'et Galio, Roman moodih hiyulhtsi. 'Ink'ez Lizwif 'ilho lhtahundel 'ink'ez Paul hiyílhchoot hoh naheyelh bukw'usuda but nihinílhti. ¹³ 'Ink'ez 'uhutni, "Ndun dune ndi khunek néba nahesda, 'i ch'a dune hoodulh'eh. 'Ats'un na'a Yak'usda ts'un tenahudoodli hukwa' bulh'en." ¹⁴ 'Et Paul soo yatelhtuk hoh Galio, Lizwif ndo búlhni, "Alha njan tink'us 'úhoont'ah, k'us 'o nus hooncha hoh tinta' whúnt'en ho' dahni t'eh, 'et sih 'uda, Lizwif, 'alha' hoont'ah hoh nuhoozálhts'a wule. ¹⁵ 'Et whunts'i ndi khunek 'i bugha hiyenah 'uzdooni, 'i unli khunek 'ink'ez buyust'e chah 'ink'ez be néba nahesda, 'i nuhwhenich'oh lhanádahleh. 'Aw si hubugha nahátesyeh hukwa cha'nuzúszun." ¹⁶ 'Et 'ink'ez nahédulh bukoo 'et tinaóobunenyoot. ¹⁷ 'Ink'ez ndun Lizwif hubuluglez bu-moodih, Sosthenes hiyúlhni, ndunnah Greek whut'en, 'en hiyúzgooh 'ink'ez naheyelh bukw'usuda but 'et yahiyalht'o, 'et whunts'ih ndun Galio 'aw buba dacháhoot'ah.

Paul keyah Antioch ts'un nanja

¹⁸ 'Et Paul huba 'alha' hoont'ah Corinth 'et sa hubutah inda. Hukw'elh'az Syria ts'ih nahutekelh, Priscilla, Aquila, 'en chah, hiyulh na'uja. 'Et natekelh whuts'uh Cenchrea. 'Et Yak'usda ts'un nahezya inle, 'et huwa hitsigha ts'iyawh hahinant'az. ¹⁹ 'Et Ephesus ts'ih nahusduki, Priscilla, Aquila bulh bughu whénya. 'Et whunts'i dich'oh zeh Lizwif hubuluglez 'et daninya 'ink'ez Lizwif hubulh yaoolhtuk hukwa' utni. ²⁰ 'Et 'o nus sayaz buzih wuda hiyúlhni, 'et whunts'ih 'aw nduchaínil. ²¹ 'Ink'ez ndo búlhni, "Njan Jerusalem dzenis whuti 'et huwa 'a whuts'u lhunatesdalh hukwa' nuszun. Yak'usda 'uninzun t'eh, 'et sih nuhts'un nátoosja." 'Aw 'et Ephesus whuch'a nasduki. ²² 'Et Caesarea ts'ih lhuga nadiduki 'ink'ez Jerusalem ts'ih whénya. 'Et whuz ninja hoh Sizi Gri bughu 'ilhohuwezdel, "Dahooja," hubúlhni, 'ink'ez Antioch ts'ih whénya. ²³ Sayaz 'et inda 'ink'ez whenája. Galatia 'ink'ez Phrygia whu yun k'ut wheghah lhuséya hoh Sizi Gri yugha hoodul'eh ts'iyawh hubudzi nduk ná'yinla.

Apollos 'en keyah Ephesus 'ink'ez keyah Corinth chah 'et Yak'usda bughunek be yalhtuk

²⁴ 'Ilhunuh dune, Lizwif, 'en Apollos hiyúlhni, keyah Alexandria 'et whuzdli inle, Ephesus ts'ih ninja. 'En dune soo bughunek dinzoo hubulh yálhtuk 'ink'ez Yak'usda bughunek 'uk'une'úsduguz, 'i soo cho chah t'einínzun. ²⁵ Nts'e na'a neMoodihti be 'ut'en k'ah hubugha hodel'i, 'et soo howu daóodit'ah hoh Sizi bughu ts'ah'un na'a yalhtuk 'ink'ez whebodulh'eh. 'Et whunts'ih

ndet John, dune too be 'ulh'en too be' 'úlya inle 'et zeh t'éoonínzun ho' utni.*²⁶ Lizwif hubuluglez 'et soo chaníljut hoh yawhénilhtuk. 'Et Priscilla, Aquila bulh hidánts'o hoh, bukoo ts'ih nahinílhti. 'Et soo cho nts'e na'a Yak'usda be 'ut'en k'ah hiba hukw'un nahúhulhye. ²⁷ 'Et Apollos 'en yun k'ut Achaia ts'ih teyalh niznun, 'et keyah Ephesus whut'en Sizi Gri yugha hoodul'eh, 'en huba 'alha' hoont'ah Achaia ts'ih hiba whuts'un k'e'anguz hoh hila 'ooneh ka. 'Ink'ez 'et, "Whuz ninya t'eh, soo cho bughohle," hubuhútni. 'Et whuz ninya hoh ndunnah Yak'usda ye únzoo, 'i bughä huba 'alha' hoont'ah suli, tube cho bula 'et'en. ²⁸ 'Et Lizwif 'ilhohuwezdel hiyenh 'uhutni hoh buch'a 'unilhde, daja ni Yak'usda bughunek 'uk'une'úsduguz, 'i bughä Sizi 'en ts'ah'un 'alha' hoont'ah, Christ, 'en 'int'ah. 'Et whuz na'a huba hukw'u núhelhya.

19

Paul keyah Ephesus 'et Yak'usda bughunek be yalhtuk

¹ 'Et ndez na'a njan ndúhooja, Apollos 'en Corinth ts'ih 'ut'en, 'ink'ez Paul 'en yun k'ut nukéduzut hoh Ephesus ts'ih ninya. 'Et bulunah Sizi yugha hoodul'eh bughä ninya, ² 'ink'ez ndo búlhni, "Nuhwhuba 'alha' hoont'ah suli hoh Ndoni nuhyudélts'ut inle ih?" "Aw Ndoni hoonli tulih, 'aw whulh chá'uzdusts'o!" hiyúlhni. ³ 'Et "Ndai be too be' ts'ulh'ih 'ulhchoot?" hubúlhni.

"Be too be' ts'ulh'ih John dune too be 'ulh'en yugha yalhtuk, 'i," hutni. ⁴ 'Et Paul 'utni, "Be too be' ts'ulh'ih John dune too be 'ulh'en yugha yailhtuk, 'i ndunnah dulubeshi yuch'a naóol'ah, 'en huba' yint'ah. 'Ink'ez Israel hubuts'un huhanzut chah hubúlhni inle, 'Ndun sk'elh'az whusatéyah, 'en nuhwhuba 'alha 'oot'e,' Christ 'en Sizi 'int'ah." ⁵ 'Et njan hodánts'o hoh, Sizi neMoodihti boozi be too be' hulya. ⁶ Paul buk'edilnik hoh 'et Ndoni hubuyídelts'ut. 'Ink'ez lhelhts'un na'a khunek be yahalhtuk, 'ink'ez Yak'usda bughä nus húho'en. ⁷ Lanezi 'o 'at nanah dune bat'en 'uhint'ah. ⁸ 'Et tat sanun, dzin totsuk Paul Lizwif hubuluglez ts'ih nunádaih 'ink'ez chaníljut hoh Yak'usda dune k'úne' bul'en hubugha whebunulhtun 'ink'ez soo cho huba hukw'un nuhúlhnye. ⁹ 'Et whunts'ih bulunah hubeni dúts'o hoh 'aw huba 'alha' cha'hóot'ah 'ink'ez neMoodihti be 'ut'en k'ah 'et 'ilhuhowezdel tah whuch'a yáhalhtuk. 'Et huwa Paul ndunnah Sizi Gri yugha hoodul'eh hubílhchoot 'ink'ez bughó whenaja. 'Ink'ez Tyrannus dune hoodulh'eh bukoo whulh'ai, 'et dzin totsuk Yak'usda bughä whebunulhtun. ¹⁰ Nat naoodezut hoh 'et zeh nduhét'en. 'Et huwa Asia yun k'ut whudune, ts'iyawh Lizwif 'ink'ez Greek whut'en chah, Sizi neMoodihti bughunek bulh 'uhúdants'o.

Sceva buye'kah ntsi' nududeh, 'i hiyáhanahinooyoot hukwa' hut'en

¹¹ 'Et Yak'usda, Paul 'en zeh ba' hoont'ah hoh bula be huwa 'ét'en tune'út'en. ¹² Dzezoh 'i whunts'ih 'ink'ez but ts'ulhuchooz teh, Paul 'i ye 'út'en, 'i hubuk'eyílhchos teh, 'ahoh nduda soo na'hut'ih 'ink'ez ntsi' nudúdeh 'i chah buts'u hanaíneyukw. ¹³ Bulunah Lizwif 'ahoolhyez nukéhududeh, 'ink'ez ntsi' nudúdeh hit'i bughä whenáhonuyukw. 'Ink'ez neMoodihti Sizi boozi bughä chah 'uhoot'en hukwa' hut'en. 'Et ntsi' nudúdeh 'uhiyúlhni, "Nuwheni 'ún whuts'utni, njan Paul yugha yalhtuk Sizi Gri boozi bughä buyáh hanaindaih!" hutni. ¹⁴ Skwunlai 'o 'at nanah hinli ndun Lizwif náwhulnuk degha nus dezti, Sceva hiyúlhni, 'en buye'kah 'en 'uhut'en. ¹⁵ 'Et nduhútni hoh ntsi' nududeh, 'i hubulh yátelhtuk 'ink'ez ndo búlhni, "Sizi 'en t'enuszun, 'ink'ez Paul chah bughä t'éoonúszun, 'et whunts'ih nuhwheni,

* **18:25** Sizi Gri be 'ut'en k'ah, 'aw soo cho t'ewhunizun ho' 'utni.

ndan ahli ho' 'uht'ah?" ¹⁶ Ndun dune ntsi' nudúdeh buyudínda soo' hoolhtus hoh hubenínya. 'Aw hich'a 'oolhdeh ghaít'ah. Tenaobudínlak, nukai hubulhtsi 'ink'ez buk'e'dutelhch'ul 'et koo tínatsehuldel. ¹⁷ Ts'iyawh Lizwif 'ink'ez Greek whut'en, Ephesus hudemts'i whulh 'uhudants'o hoh ts'iyawh whéhunilhújoot 'ink'ez Sizi neMoodihti boozi 'o nus huba idézti suli. ¹⁸ 'Ink'ez ndunnah dune nededúle hinli, lhanah hubutah huba 'alha' hoont'ah suli. 'Et whusahándel 'ink'ez ts'iyannah nalh khunahawhelnuk. ¹⁹ Lhanah ndunnah dune nededúle huhóolhdzih ts'iyawh ndi dustl'us higha 'ut'en, 'i 'ilhunahiwezdla. 'Et ndi dustl'us buzooneya hiyoodúlhto hoh \$50,000 bat'en suli. 'Ink'ez ts'iyannah nalh hidálhk'un. ²⁰ 'O nus lhanah Yak'usda bughunek hidánts'o hoh 'et whuz na'a Yak'usda bughunek hoolhtus hoh lhannah dune lhba hodit'ai, Sizi hik'úne' tet'en.

Keyah Ephesus 'et lhtahuwhunt'ai

²¹ 'Et njan ndulhcho ne'whust'en hukw'elh'az, Paul, Ndoni nuyúlh'a hoh Macedonia 'ink'ez Greece yun k'ut hoh wheghah lhutéyah 'ink'ez Jerusalem ts'ih téyah, whuz na'a buben i haidinla. "Et whuz níya t'eh, 'et Rome ts'ih chah nutésya," ni Paul. ²² 'Et nanah hila'ut'en, Timothy 'ink'ez Erastus, 'en dutsuh whébal'a Macedonia ts'ih 'ink'ez didut 'awhuz Asia yun k'ut 'et 'astl'iyaz inda. ²³ 'Et hoh bat'en Ephesus njan nts'e na'a neMoodihti be 'ut'en k'ah 'et hubugha tube hiyena 'uhutni suli. ²⁴ Ephesus 'et luglez whuz'ai. Ndi ts'eke k'edeltsi, Artemis hiyúlhni, hits'un ténadudli. 'Ilhunuh dune, Demetrius hiyúlhni, silver ulh'uz. Ndi ts'eke k'edeltsi hits'un ténadudli, 'en ndi silver, 'i be yuk'éne'ulhtsi. 'I 'ants'ih hoh dune dezti hoh hiye buts'e' ooke. Whuz na'a sooneya lhai 'uhulh'en. ²⁵ 'Et huwa Demetrius hibulh 'ut'en ts'iyawh, "Anih," hubudáni. 'Uyoon duk'una'a 'ut'en, 'en chah 'ink'ez ndo búlhni, "Sulh dune t'éoonáhzun ndi 'ut'en 'i bugha soozde'a 'uts'int'ah. ²⁶ Nuhwhenich'oh whunulh'en 'ink'ez whuduhts'o ndun dune Paul dat'en hoh 'ut'en, dune hubúlhni, 'Ndi dune la be 'iyalh'en, 'aw Yak'usda cha'ít'ah.' 'Ink'ez lhanah dune Ephesus 'ink'ez Asia yun k'ut ndulhcho chah highunek hiyílhchoot. ²⁷ Neba húwa 'óodli suli. Njan sooneya ho' ts'ulh'en tinta' hot'en. 'Et zeh ilah, njan neyak'usda Artemis hubuluglez whucho hukwa cha'hunízun wule, 'ink'ez dich'oh ye dezti, 'i chah hoonli chailah wule. 'En Asia 'ink'ez yun k'ut ndulhcho ndun ts'eke neyak'usda hits'un tenadudli." ²⁸ 'Ink'ez ndunnah dune ndi khunek hidánts'o hoh tube hahunílch'e hoh 'ultus 'uhúldzul 'ink'ez 'uhutni, "Ephesus ts'uwhut'en neyak'usda Artemis 'en zeh neba dezti ho' 'int'ah!" ²⁹ 'Et keyah nduhoolcho hoh huwa lhtahawhund'ai. 'En 'ilho nihúdulh, 'en Macedonia whut'en, nanah Gaius 'ink'ez Aristarchus hubuhútni, Paul bulh nahá'as, hubuhúzgooh 'ink'ez dune nuwhúlyeh huba whuz'ai ts'ih whebuhan 'ink'ez whuz nibanilhti. ³⁰ 'Et Paul dich'oh chah nus 'ilhohuwezdel hubutah netéya hukwa' nizun, 'et whunts'ih Sizi Gri yugha hoodul'eh, "Dah!" hiyúlhni. ³¹ Bulunah Asia yun moodih, Ephesus hudemts'i, 'en Paul hubuk'entsi' hinli, 'en chah hits'ot'l'a khunek i'ai highu tedudli hoh dune nuwhúlyeh huba whuz'ai ts'ih tóoya gunih. ³² 'Et zeh 'ilhuhowezdel 'awhuz lhtahuwhunt'ai hoh bulunah 'ilhunuh zeh huwa 'uhúldzul 'ink'ez bulunah chah 'udun huwe' hutni. 'Ink'ez bulunah 'aw t'ehonízun ndet huwa 'ilhuhowezdel. ³³ 'Et 'ilhuhowezdel hubutah, 'ilhunuh dune Alexander hiyúlhni, 'en Lizwif nus hububut nihínilhti huba yaoolhtuk wheni. 'Et dula be t'ehudoosnih hubulhni. ³⁴ 'Et whunts'ih ndunnah 'ilhuhowezdel Paul, 'en Lizwif 'int'ah t'ehinanzin hoh, 'et nat hukw'u hoonezt'o whutah 'o nus 'ahúlzul ho' hutni, "Ephesus whut'en hubuyak'usda Artemis, 'en zeh neba dezti ho' 'int'ah!" ³⁵ 'Et ndun dune keyah huba 'uk'une'úguz, 'en 'ilhuhowezdel 'ustl'e' 'uhudeja hubulhtsi

'ink'ez ndo búlhni, "Ephesus whut'en soo sih soo zélhts'ai, ts'iyawh ndulhcho hoh t'ehonínzun nekeyah Ephesus 'et ndun neyak'usda Artemis buluglez whucho 'et huwu ts'inli ho' hoont'ah, 'ink'ez ndi tse dezti ts'eke k'edeltsi unli ndus de yaz ts'ih hádelts'ut 'i chah. ³⁶ 'Aw dune whuts'oododlai hoolah, 'et huwa t'eduzahnih 'ink'ez ilah tune'óoh't'en gunih! ³⁷ Ndunnah dune 'aw luglez whucho huwe' hutezvla ilah, 'ink'ez neyak'usda chah ch'a yacháhulhtuk, 'et whunts'ih njan whusaóobehla. ³⁸ Demetrius 'ink'ez hubulh 'ut'en, 'uyoon hoonli hubugha buk'ehúhoote'alh t'eh, 'et sih dzin dune ba nahudeh whuz'ai, 'ink'ez naheyelh chah 'et delhts'i. 'En hububut 'uhudooni da! ³⁹ 'Et whunts'ih, 'o 'un hoonli nt'eeonohzin hukwa' nahzun t'eh, 'et sih nts'e keyah whut'en 'ilhodulh teh, 'et ts'ah'un na'a nuhwhuba nehóh'ah. ⁴⁰ K'an dzin 'uhóoja lhtahuwhunt'ai, tube neba huwa 'óodli ho' hoont'ah. Roman bumoodih wheni nek'ého'ah. 'Aw 'et ndúhoneh huba cha'hoot'ah. 'Aw di ka 'uts'uja 'uzdooni ghaít'ah." ⁴¹ 'Et ndúdeja hukw'elh'az ts'iyawh yanahóodelh hubúlhni, 'et whenáhadel.

20

Paul, Macedonia 'ink'ez Greece yun k'ut whulh doo chah whuz nanátedalh

¹ 'Aw 'et 'ustl'e' 'uhudéja hoh, Paul, ndunnah Sizi Gri yugha hoodul'eh, "Anih," hubudáni. Khunek hubudzi be ulhtus, 'i be hubulh yaílhtuk 'ink'ez, "Aw 'et natesdalh," hubúlhni. "Et hubughu whenája hoh Macedonia ts'ih whénya. ² 'Et lhat keyah whutuh húyalh, dune whut'en budzi ulhtus ka hubulh yálhtuk 'ink'ez Greece ts'ih ninja. ³ 'Ink'ez tat sanun 'et inda. 'Et whuts'un Syria yun k'ut ts'ih tekelh huba lhadútneh hoh Lizwif hituzel-hghelh huwu yahulhtuk whulh 'údants'o, 'et ndoh Macedonia ts'ih whégħha lhunátedalh ninzun. ⁴ 'Et Sopater hiyúlhni, 'en Pyrrhus buye', Berea whut'en, 'en yulh nátest'az, 'et Thessalonica whut'en Aristarchus 'ink'ez Secundus bulh chah 'et Derbe whut'en Gaius hiyúlhni, 'ink'ez Timothy chah 'et Asia whut'en Tychicus 'ink'ez Trophimus, 'en chah. ⁵ 'En ts'iyawh nus netsuh whehándel 'ink'ez Troas 'et neba hilh'i. ⁶ 'Et lhes chantíldoh, 'i ut'alh, hukwelh'az 'et Philippi 'et nus nasdúki 'ink'ez skwunlat dzin inle 'et Troas 'et bugħu nats'undel 'ink'ez skwunlat 'o 'at nat dzin 'et uzdálts'i.

Paul 'aw 'et 'udek'elh'az Troas whut'en buts'un nunasja

⁷ 'Et hukw'enilhghel 'et 'udechoo dzin 'et Sizi yugha hoodul'eh 'ilhunahuwédel lhes tahídalhkut nahitet'ah huba. 'Ink'ez tuzniz whuts'un Paul dune hubulh yaílhtuk 'om bun dzin bugħu natedalh 'et. ⁸ Nduk ts'ih 'ilhuts'owudulh lhai be whét'en, 'i dezk'un. ⁹ 'Ink'ez 'ilhunuh chilh, Eutychus hiyúlhni, 'en windah 'et usda. 'Ink'ez Paul yalhtuk zeh utni ndun chilh Eutychus 'en dugħu nantutih zeh 'ut'en. 'Udek'elh'az 'aw 'et dugħu nantesti hoh tat lhandoh whuz'ai ts'ih nduh ndus de whuts'un nadélduz. 'Ink'ez dazsai hoh dinahidilhti. ¹⁰ 'Et Paul yughah nininya 'ink'ez dushih bé' yilchoot, "Bugħa ni uhli ílah, 'awħuz khuna," hubúlhni. ¹¹ 'Et 'ink'ez nduk wheyah ts'ih whenaja. Lħes taidalhkut 'ink'ez 'uha'al. 'Et sa haté'alh whuts'un hubulh yaílhtuk 'ink'ez whenája. ¹² 'Et ndun chilh khuna hoh koo ts'ih whuz hubulh nant'az 'ink'ez 'et huwa tube huhóont'i.

Paul, Troas whuts'un Miletus ts'ih ninki

¹³ 'Et nus butsuh ts'ih, ts'i be nats'undel 'ink'ez Assos ts'ih uztezki. 'Et Paul denáztelħelh wheni, 'et nduts'ooneh neúlhni 'ink'ez didut yun k'ut lhutéyah ni. ¹⁴ 'Et keyah Assos 'et negħu nanja 'et denáts'alhti 'ink'ez keyah Miletus ts'ih ts'utezki. ¹⁵ 'Et nus nats'usduki 'ink'ez 'om bun Chios huwanch'az 'et yats'uzki. 'Et 'om bun 'et Samos lhgħa ts'udinki 'ink'ez Trogylium nízninki.

'Ink'ez 'om bun 'aw 'et Miletus lhghazdinki. ¹⁶ 'Et Paul 'en keyah Ephesus hoh wheghah lhutekelh hukwa' ninzun tube 'aóodulni 'et huwa. 'Aw Asia yun k'ut wuda hukwa cha'nízun. Soo 'a cho Jerusalem ts'ih tooya hukwa 'ut'en, soo tulih Pentecost dzin, 'et neóoya hukwa' ninzun.

Ephesus 'et butsuh whudelhdzulh Paul 'aw 'et 'udek'elh'az hoh hubulh yanaltuk, 'ink'ez bugho whenája

¹⁷ 'Aw 'et Miletus usda whuts'un, Ephesus ts'ih Sizi bugha 'ilhuhowezdel butsuh whúdelhdzulh hidudoodelh hubulhni hoh buts'otl'a khunek i'ai. ¹⁸ 'Et highu nindel hoh ndo búlhni, "T'éoonáhzun dast'en hoh nuhtah sída, 'udechoo dzin Asia yun k'ut niniya whuts'un. ¹⁹ Soo yuk 'udulhúdzun 'ink'ez sunatsul too hoonli hoh neMoodihti be 'ut'en k'ah 'uhoohl'en, dzuh nuszut, 'et whutah sughá whults'ut ndunnah Lizwif satuzelhghelh huwu yahulhtuk 'et huwa. ²⁰ 'Aw dant'i be soo nuhwhula' whudutedut'ilh, 'aw hoonliyaz whunts'i whechasaz hoh 'i 'aw nuhwhuch'a k'ah óstun hoolah. 'Et huwa njan ts'et whe nuhwhuhodalh'i, nahkoo ts'un 'ink'ez nahkoo whuts'un. ²¹ Lizwif 'ink'ez 'udun yun k'ut whut'en 'ilho tube cho hubugha dáni Yak'usda ts'un lubeshi whuch'a bubení nahudunooleh, 'ink'ez Sizi Gri neMoodihti 'en huba 'alha 'uhoot'e. ²² 'Et k'an tube cho whuts'un cha'dusts'il hoh Jerusalem ts'ih tesyalh. 'Et datésnih 'aw t'éoonuzúszun. ²³ 'Et zeh nt'éoonúszun, keyah totsuk Ndoni whusúnelhtan, 'Dzuh nutánzut 'ink'ez tsak'etanda 'et mba whuz'ai,' súlhni. ²⁴ 'Et whunts'ih 'et 'ants'ih 'uhoont'ah, 'ink'ez si be khúsna, 'i chah suba 'ants'ih unli, khun si ndi 'ut'en sughaoolts'it, 'i 'ink'ez Sizi Gri neMoodihti 'ut'en k'ah stl'ahó'ai chah, hoonúst'i hoh lhaóodoosleh khunek unzoo, 'i be Yak'usda ye únzoo, 'i bugha wheoobunoolhtun ka. ²⁵ Soo ts'iyawh nuhtah nusíya Yak'usda dune k'úne' bul'en hubugha nohwhulh yálhtuk. 'Aw 'et t'éoonúszun 'aw doo chah zeh nasooht'en ghaít'ah. ²⁶⁻²⁷ 'Aw Yak'usda bugha nuhwhudutesnilh nuhch'a hóostun ilah hoh nuhtah ída. 'Et huwa k'an dzin soo cho 'ún whudusni, 'ilhunuh whunts'ih kwuncho yuh ts'ih whénya t'eh, 'aw si sugha ilah 'utenilh. ²⁸ Nuhwheni chah soo cho khohdle 'ink'ez ndai Yak'usda be sheep Ndoni be hubughohle ka nuhwhútl'aiyanla, njan Yak'usda bugha 'ilhuhowezdel, 'en sheep ghunli huba ahli, buzkai be bube'ildzun hubulhtsi inle 'et huwa. ²⁹ Nt'éoonúszun whenásja t'eh, dune hints'i, yus whúske, 'i k'una'a 'int'ah, 'en nuhtah nehútedulh, 'ink'ez nuhóduntélhdah, 'ink'ez 'aw nuhghu hoole ghaít'ah. ³⁰ 'Ink'ez 'ilhudzin whusaóotelts'ulh nuhtuhahándel dune, 'en huba hodul'eh naoobanoo'ah hoh nuhch'a nahool'ah 'ink'ez ts'un nebodoolyelh. ³¹ 'Et huwa 'un whudúsni, huwahli 'ink'ez whunaooolhunih, lhat sunatsul too hoonli hoh dzin 'ink'ez 'ulh'ek 'i bulh 'ilhunah ahli hoh tat naoodezulh 'et whenwhudalh'i. ³² 'Ink'ez sulhutsinkah, k'an 'et Yak'usda 'ink'ez bughunek unzoo, 'et nuhlt'ahó'ai, 'et sih nuhdzi 'o nus úlhtus naootelhtsilh. 'Ink'ez ndunnah Yak'usda ba 'udun nibuninla, ndi bughunek 'i be 'en hubulh ndi Yak'usda be'ildzun, nuhwheni chah 'i nuhghaítelelh. ³³ 'Aw 'uyoon buzooneya, silver 'ink'ez gold, k'us bunaih chah buts'u ka cha'duzusnih. ³⁴ Nuhwhenich'oh t'éoonáhzun ndi sich'oh sula be 'ust'en. 'Ink'ez sulh nahudelh hik'ekhuna, 'i hiye ndunidzit, 'i ts'iyawh huba 'uyulh'en. ³⁵ 'Ink'ez ts'iyaintsuk whunwhunelhtan hoh nduts'út'en 'i be ndunnah 'aw 'oot'en ghaít'ah, 'en hubula' ts'oot'en huba' hoont'ah, 'ink'ez Sizi neMoodihti daja ni 'et whunats'oolnih, 'et njan ndutni, 'Dant'i huwats'unle 'i k'us dant'i neghakuk, njan dant'i huwats'unle teh, 'i 'o nus neba ts'un whitezoo ho' hoont'ah." ³⁶ 'Et Paul lhadúja hoh, ts'iyawh hubulh dugwútsi be nenínya 'ink'ez tenadedli. ³⁷ 'Aw 'et ts'iyawh hutso hoh dushih be' hiylchoot 'ink'ez nahídunants'ooz. ³⁸ "Aw 'o 'at nachasutuzeht'il," ndo

búlhni hoh hubulh yanaltuk, 'et huwa tube cho budzi únduda 'ink'ez ts'i ts'un whuts'un hik'uninandel.

21

Paul Jerusalem ts'ih nanátedalh

¹ 'Aw 'et nus nats'usduki. 'Et ts'ihyan lhunats'usduki 'ink'ez Cos ts'ih ts'uninki. 'Et 'om bun Rhodes nezninki, 'ink'ez 'et whuts'un Patara ts'ih uztezki. ² 'Et Phoenicia ts'ih, ts'i cho ukelh 'et nats'uhoo'ai hoh, 'i be ts'andel 'ink'ez uztezki. ³ Soo noo k'ut Cyprus ts'onilh'en hoh wheghah int'l'as ts'ih noo bugha lhuts'úzki, 'ink'ez Syria yun k'ut ts'ih ts'uninki. 'Et keyah Tyre 'et ts'i be deha'hutelelh whutah 'et nyoh uzdálts'i. ⁴ 'Et Sizi Gri yugha hoodul'eh hubuka' ts'ooodulhkut hoh nabuts'inla 'ink'ez 'ilhuh hukw'enilhghel 'et buzih uzdálts'i, Ndoni be Paul Jerusalem ts'ih tóoya gunih hiyúlhni. ⁵ 'Aw 'et bulh lházduja hoh, bugho whenáts'edel 'ink'ez naztesdel ts'iyawh bu'atkah, 'ink'ez buzkeh chah nelh lhunahussdel hoh keyah whuch'a nats'usdel. Taba 'et negwutsi be níznindel 'ink'ez tenazdedli. ⁶ 'Aw 'et ts'iyawh lhula nunats'ust'ai 'ink'ez ts'i be náts'edel hoh hedidut chah koo ts'ih whenáheded. ⁷ 'Et ts'ekelh ze' ts'ut'en Tyre nus nats'uski hoh Ptolemais ts'ih ts'uninki. 'Et 'ilhuh dzin zeh huba 'alha' hoont'ah buzih uzdálts'i. ⁸ 'Et 'om bun dzin uztezdel hoh Caesarea ts'ih ts'unindel. Khunek unzoo, 'i be yálhtuk, Philip hiyúlhni, 'en buts'ún ts'unindel, 'en buzih uzdutélts'ilh. 'En Jerusalem skwunlai 'o 'at nanah 'utahálya inle, 'en hubutah 'ilhunuh 'int'ah. ⁹ 'Ink'ez Philip 'en dinah buts'e'kah, 'aw dune t'echahunizun hinli, 'en Yak'usda ba nus whunilh'en hinli. ¹⁰ Lhat dzin 'et uzdálts'i hoh 'ilhunuh Yak'usda ba nus whunilh'en, Agabus hiyúlhni, 'en Judea yun k'ut ts'ih haínya. ¹¹ Neghu ninya hoh Paul buse yet'sú delhú'oo, 'i yuts'u hayánla 'ink'ez 'i be duke 'ink'ez dula chah lheyulh'oo 'ink'ez 'utni, "Et Ndoni ndutni, 'Jerusalem whut'en Lizwif ndi se be'ildzun yinli whuz na'a hiye hitelhghel, 'ink'ez 'udun yun k'ut whut'en butl'ahítelhtelh." ¹² 'Et whulh 'úzduzts'ai hoh nuwheni 'ink'ez 'uyoon chah 'et hudelhts'i, Paul bugha tezdudlih Jerusalem ts'ih tooya whuch'a. ¹³ 'Et nendulhni, "Et di ka ahtso 'ink'ez sudzi tso ulh'i? Jerusalem satelhghel 'et huba lhadúst'ah, 'et whunts'ih 'o 'un Sizi Gri neMoodihti 'en buba 'et datésah huba lhadúst'ah ho' 'ust'ah." ¹⁴ 'Et whunts'ih 'aw nek'ah ts'ih cha'ínil, 'et huwa, "T'ezdíníl, nts'e na'a neMoodihti hukwa' ninzun k'una'a 'ahóneh," ts'utni. ¹⁵ 'Et hukw'elh'az 'astl'iyaz 'et nazdélhts'i 'ink'ez ndai ne'ezdlai, 'i lhanázdinla 'ink'ez Jerusalem ts'ih naztesdel. ¹⁶ 'Et bulunah Sizi Gri yugha hoodul'eh, Caesarea whut'en, 'en chah nelh hútezdel. 'En ndun dune buzih uzdutélts'ilh hits'un nenihunínla, Cyprus whut'en, Mnason hiyúlhni, 'en 'uda whuts'un buba 'alha' hoont'ah 'int'ah.

Paul, James ts'un nuséya

¹⁷ Jerusalem ts'ih ts'unindel hoh, ndunna huba 'alha' hoont'ah, 'en nehunelhnik. ¹⁸ 'Et 'om bun dzin Paul nélh tez'az James uzte'ih wheni, 'ink'ez ts'iyawh butsuh whudelhdzulh, 'en chah 'et hudelhts'i. ¹⁹ 'Et Paul, "Dahooja," hubúlhni. 'Ink'ez ts'iyawh nts'oh 'udun yun k'ut whut'en hubutah hube 'ut'en be Yak'usda ne'ust'en, 'et hubugha hubulh náwhulnuk. ²⁰ 'Et hidánts'o hoh ts'iyawh Yak'usda ba hodélhti 'ink'ez Paul 'uhiyúlhni, "nel-hutsin whunulh'en dáhoont'ah tube lhanah Lizwif huba 'alha' hoont'ah suli hoonli 'ink'ez ts'iyawh Moses bughunek 'uk'une'úsduguz, 'i soo cho hik'úne' 'ut'en. ²¹ 'En nyulh 'úhudants'o nts'e na'a Lizwif 'udun yun k'ut hudelhts'i, 'en whubodilh'eh. Moses bughunek 'uk'une'úsduguz, 'i hiladootnih, 'ink'ez buzkeh hika dune unli, 'i k'ut hubutét'us, 'ink'ez Lizwif k'una'a dune hinli 'i chah 'ustl'e' 'uhoooneh, whuz na'a hubodilh'eh hutni. ²² Njan whusainya

hubugha t'ewhuntedzeh ho' hoont'ah 'ink'ez dats'óoneh simba? ²³ 'Et huwa ne'úzduni tune'ónt'en. Dinah dune Yak'usda ts'un nahezya, 'en njan nezhí hudelhts'i ho' hint'ah. ²⁴ 'En hubulh 'ínt'en 'ink'ez buts'ún nidenya, 'ink'ez nts'e na'a duna'huldoh nyun huba'uk'elháhoolhtsi, 'et soo dutsi náhunoozo. 'Et ndínja t'eh, 'et whuz na'a nyunch'oh ndi Moses bughunek 'uk'une'úsduguz, 'i ts'ah'un na'a buk'úne 'int'en hunoozin. 'Ink'ez daja nch'a nyuhútni, 'et huba 'alha' cha'whudoosnih. ²⁵ 'Et whunts'ih ndunnah 'udun yun k'ut whut'en huba 'alha' hoont'ah suli buts'ó k'e'ts'anguz 'ink'ez nts'e na'a 'uzdeja, 'et ndo buzzdáni ndai ts'uyi, 'i buyak'usda k'edeltsi ts'un hítulhdelh, 'i wah'ahl gunih. Ts'ekoo k'us dune bulh tinta' 'ooht'en gunih. Khunai buze 'úsduguz, 'i 'ink'ez 'uskai butantsus, 'i wah'ahl gunih, 'ink'ez 'uskai chah wahnai gunih."

Paul luglez whucho 'et hiyílhchoot

²⁶ 'Et huwa Paul ndunnah dinah dune hubílhchoot 'ink'ez 'om bun dzin 'et nts'e na'a duna'huldoh 'et hubulh duna'elde. 'Aw 'et hubuluglez whucho danánja, 'et hoh 'aw 'et Lizwif k'una'a buna'éde. 'Ink'ez Lizwif nawhulnuk hubudáni dáwhuldzah dzin 'et 'uhutet'ilh njan 'et lhahódutelih whuts'un Yak'usda bukw'uzdai k'ut 'ilhunah hinli hoh huba 'uhudutélhk'un. ²⁷ 'Aw 'et skwunlai 'o 'at nat dzin 'ustl'e' 'uwhuténih hoh, bulunah Lizwif, Asia yun k'ut ts'ih huháñdel, Paul luglez whucho 'et hiya'en. Bulunah 'ilhohuwezdel tubulh lhba hodit'ai hoh Paul hiyílhchoot. ²⁸ 'Et 'ahúlzul hoh hahuhéyih, "Israel hubuts'un háhzut, nela 'uhneh! Ndun dune 'en 'int'ah, nduhoolhcho nuya 'ink'ez Israel hubuts'uh hainzut Moses bughunek 'uk'une'úsduguz, 'i 'ink'ez neluglez whucho chah ts'iyawh whuch'a yálhtuk. 'Ink'ez k'an 'udun yun k'ut whut'en chah neluglez whucho daóobuninla, 'et hoh neba me whulhtsi!" hutni. ²⁹ 'Et ndun dune Trophimus, Ephesus whut'en, 'en Jerusalem 'et Paul bulh na'as hoh hinalh'en inle. 'Et Paul hubuluglez whucho daínilhti huninzun 'et huwa 'uhutni. ³⁰ Jerusalem ndulhcho hoh dune dzuh hubutaoodelts'ut. Ts'iyawh 'ilho 'ilhunahowelhúghaz, Paul hiyílhchoot, 'ink'ez hubuluglez whucho 'et tñahininguz. 'Et 'ahoh hubuluglez whucho dána'denkez. ³¹ Ndunnah lhulh nudelh Paul hizoolhgħel hukwa' hut'en hoh nehughan moodih hudáni, "Jerusalem whut'en ts'iyawh lhtahawhunt'ai!" hubuhútni. ³² 'Et 'ahoh nehughan moodih 'uyoón moodih 'ink'ez nehughan chah hilhchoot 'ink'ez 'ilhuhowezdel buts'un whehélgħaz. 'Et ndunnah dune nehughan bulh hubotelh'en hoh 'et Paul njan hiyedúlh 'ustl'e' 'uhiyínla. ³³ 'Et nehughan moodih Paul yughuninya, yílhchoot, 'ink'ez nankoh tes tl'ool be hiyoolhghel hubulhni. 'Ink'ez huboodulhkut, "Ndun dune ndan 'int'ah, 'ink'ez daja hoh tinta 'unt'en?" ³⁴ 'Ilhuhowezdel ts'iyawh lhelhts'un na'a 'uhutni hoh hahuhúyih, 'o nus higha 'un ha' dani k'et nehughan moodih dáhooja 'aw t'echaoonízil. 'Et huwa budune Paul nehughan delhts'i ts'ih hitoolhte hubúlhni. ³⁵ Soo buk'ut dugaíti ts'ih hitelhti, 'et dune budádendel. 'Et 'o nus hiyulh húnilch'e, 'et huwa nehughan 'en hitelhti. ³⁶ Ts'iyawh hiyunelwus 'ink'ez 'uhúldzul hoh, "Sulhgħe!" hutni.

Paul duba yanaltuk

³⁷ 'Aw 'et Paul nehughan delhts'i ts'ih hitelhti hoh nehughan moodih bulh yátelhtuk, "Nyulh yatelhtuk hukwa' nuszun." 'Et nehughan moodih 'uyúlhni, "Greek k'una'a chah ih yailhtuk?" ³⁸ "Et Egypt ts'ih haínya dune 'en tulih 'unint'ah? Nyun tulih 'inja, ndunnah 4,000 nehughan dudulh dune dzuh nuhulhdeh hubuzílhtsi? 'Ink'ez dune chahóot'ih ts'ih whuz huba whénya, nyun tulih 'int'ah?" yúlhni. ³⁹ 'Et Paul 'utni, "Si Lizwif 'ust'ah. Tarsus, Cilicia yun k'ut whuz'ai, 'et keyah whudézti', 'et whust'en. Ndunnah dune hubulh yatelhtuk, 'et sugħa ooni'aih." ⁴⁰ 'Et nehughan moodih yugħa óoni'ai, 'et Paul

dughaíti siyin 'ink'ez dune huba núlhnih hoh t'ehudínel 'ink'ez Paul, Hebrew bughunek k'una'a hubulh yáwhenilhtuk.

22

¹ 'Et ndo búlhni, "Sulh dune, sulhutsinkah, 'ink'ez 'ubákah, soo sih soo zéhlts'ai, k'an nohwhulh duba yanatelhútuk!" hubúlhni. ² 'Et Hebrew bughunek k'una'a hubulh yawhénilhtuk hidits'o hoh 'o nus t'ehudínel. 'Et Paul 'utni, ³ "Si Lizwif 'ust'ah. Tarsus, Cilicia yun k'ut whuz'ai 'et whuzíli. Jerusalem 'et néyi, ndun Gamaliel 'en whusodalh'i hoh netsuh whudelhdzulh hik'úne' 'ut'en, 'i soo cho yusodalh'i. K'an nuhwheni Yak'usda ba buts'u nint'uk, si chah whuz na'a zeh ndust'ah inle. ⁴ Ndunnah Sizi hunedulh ts'iyawh dahútetsah whuts'un hubube' zúsdla inle. Dune 'ink'ez ts'ekoo chah ts'iyawh tsak'ebusdle ínle. ⁵ Náwhulnuk degha nus dezti 'ink'ez ts'iyawh dune tsuh whudelhdzulh, 'en ts'iyawh ts'ah'un 'udusni, 'en chah ndun whadóoni, ndai Lizwif dédowh Damascus delhts'i hubuts'un k'e'hanguz, 'i si stl'ahíyanla 'i bugha dune hubuts'un téya hubutélhcholh 'ink'ez tes tl'ool be hubutélhghel 'ink'ez Jerusalem ts'ih dzuh nubotelhdzut wheni, whuz whebusdle ínle.

Paul, Sizi ts'ih nálh'a howu yalhtuk

⁶ "Et hoh wheghah usyalh ho' hooja, 'aw 'et Damascus wheghah dzetniz bat'en khunyaz ndus de kwun ulhtus, 'i hadanat, 'ink'ez sunat nudéznat. ⁷ 'Ink'ez yun nadelhúduz 'et 'uduzíts'ai 'ink'ez njan nduwutni oozalhts'a, 'Saul di ka dzuh nusílhdzut ho' 'int'en?' ⁸ 'SMoodihti ndan inli?' dusni hoh oodulhkut. 'Sizi, Nazareth whut'en usdli, si 'usilh'en dzuh nusílhdzut,' súlhni. ⁹ 'Ink'ez ndunnah dune sulh nuhudelh ndi kwun hiya'en 'ink'ez hoh hunuljut, 'et whunts'ih ndan sulh yatelhtuk 'aw chahidíts'il. ¹⁰ 'Et 'udusni, 'SMoodihti datésnilh?' 'Ink'ez neMoodihti 'usúlhni, 'Dinadindaih, 'ink'ez Damascus ts'ih inyalh 'ink'ez 'et ts'iyawh ndun yadooni ndet Yak'usda ba datánt'ilh.' ¹¹ 'Et 'usja ndi kwun tube sunat nudeznat k'et chaozes'en suli, 'et ndunnah sulh nuhudelh sula hilhchoot 'ink'ez Damascus ts'ih sanilhya. ¹² 'Et 'illhunuh dune Ananias hiyúlhni, 'en Moses bughunek 'uk'une'úsduguz, 'i yuk'úne' 'ut'en 'ink'ez Lizwif Damascus whut'en ts'iyawh hidelhti. ¹³ 'Ink'ez 'et sughu ninja hoh suzih siyin 'ink'ez 'usúlhni, 'Saul sulhutsin, whé'en naoondle!' 'Et ndudeja ibulh 'ahoh nduk yutá'en 'ink'ez whunilh'en nasdli. ¹⁴ 'Ink'ez 'usúlhni, 'Netsuh whudelhdzulh hubuYak'usda 'en 'utahányalhti Yak'usda be 'ut'en k'ah t'éoononzeh ka 'ink'ez ndun ts'ah'un na'a 'unint'ah 'en ta'ilh 'ink'ez dich'oh chah 'et nyulh yátelhtuk. ¹⁵ 'Et nyun ts'ah'un ndun Sizi bugha ndo hubudutánih ndet ho'en 'ink'ez whudánts'o hubugha. ¹⁶ 'Ink'ez k'an dant'i ba ilh'i? Didinyih 'ink'ez neMoodihti boozí 'i be buts'un tedondli hoh too be 'oneh, 'i bugha sih nlubeshi nyuna'doodeh!"

Yak'usda, Paul 'udun yun k'ut whut'en ts'un yutelh'a

¹⁷ 'Et Paul 'o 'un ndo búlhni, "Et Jerusalem ts'ih whenásja 'ink'ez nuh-luglez whucho tenadusdli whutah 'et njan sunalhts'et hawhélts'ut hoh, ¹⁸ neMoodihti 'en nulh'en 'ink'ez 'usúlhni, 'Soo 'a njan Jerusalem whuch'a nanindaih. Si sugha yailhtuk 'aw nyuhoozólhts'a hukwa cha'hunízun 'et huwa.' ¹⁹ 'Ink'ez 'udusni, 'NeMoodihti, nts'e na'a hoh luglez totsuk whubulh ndunnah nyun buba 'alha 'int'ah, 'en ts'iyawh hubulhchukw 'ink'ez dzuh nobulhdzut inle, soo cho nt'ehonínzun. ²⁰ 'Ink'ez Stephen nyun ngha dune hubulh yálhtuk, 'et hukwa hizelhghi, hoh da si chah 'et síyin inle, suba ts'ah'un 'uhut'en. Ndunnah nehughan hubudzoot, 'i huba bughusdli.' ²¹ 'Et whunts'ih neMoodihti 'usúlhni, 'Inyalh, nilhdza 'udun yun k'ut whut'en butúz nyutélh'alh!" ²² 'Et dune 'ilhuhowezdel Paul huyoozélhts'ai 'et whunts'ih

'et ndudéja hoh soo hubuyiz t'ahúzulh hoh 'uhutni, "Nalhtelh, sulhghe, 'aw khoona huba cha'ít'ah!" ²³ Soo 'uhultus hoh dunaih k'uhídtulch'oolh 'ink'ez whuske k'et lhez chah nduk hútudzih. ²⁴ 'Et ndun Roman nehughan moodih, 'en Paul ndet nehughan délhets'i whuz nahitoolhte 'ink'ez hiyoolhtas hoh hiyoodolhkut ndet huwa ndunnah Lizwif hiyúlh 'alzul hubúlhni. ²⁵ 'Et whunts'ih 'aw 'et hiyootelhtsus wheni hiyulgħel hoh ndun Paul huwunli, 'et siyin 'en 'uyúlhni, "K'us ndan Roman yun k'ut whut'en, 'en ba nahutedeh whutsuh ootalhtsus mba' hoont'ah ih?" ²⁶ 'Et ndun huwunli whudánts'o hoh nehughan moodih yugħu ninja 'ink'ez yoodulhkut, "Daint'en hoh 'int'en? Ndun dune Rome yun k'ut whut'en 'int'ah!" yúlhni. ²⁷ 'Et dich'oh nehughan moodih Paul yugħu ninja 'ink'ez yoodalhkut, "Rome yun k'ut whut'en inli ih?" "A," ni Paul. ²⁸ 'Et nehughan moodih 'en 'utni, "Si lhai sooneya hukw'elha sίlħsi hoh Rome whut'en sili 'ust'ah." 'Ink'ez Paul 'utni, "Si 'et whuzúsdli 'et huwa hube'ilhdzun usdli." ²⁹ 'Et ndunnah dune Paul hiyoodutelhkut, 'ahoh hich'a nasdel 'ink'ez ndun nehughan moodih t'éoonanzin Paul Rome yun k'ut whut'en 'int'ah 'ink'ez lhe'yínla yulhghel chah 'uyínla 'et huwa whenelhújoot.

Paul nahéyilh yubut siyin

³⁰ Ndun nehughan moodih soo naóote'ah hukwa' ninzun, ndet hukwa Paul hiyulh whuske. 'Et huwa 'om bun hububa ne'duni Paul, 'en tes tl'ool hits'ahanahiyānla 'ink'ez ndunnah náwhulnuk degħa nus dézti, 'ink'ez nahéyelh chah ts'iyawh, 'anih hubúlhni 'ink'ez Paul hibut nihínilhti.

23

¹ Paul soo cho hubunilh'en 'ink'ez ndo búlhni, "Sulħutsinkah neyah ts'ih bugħa t'ets'oninzun* 'i bugħa Yak'usda but 'ahoolhyez be khusna, 'i k'an dzin whuts'un ts'ah'un na'a 'ust'ah." ² Ndunah náwhulnuk degħa nus dezti, Ananias hiyúlhni, 'en Paul hizih siyin, 'en hizek hokat hubúlhni. ³ 'Et Paul 'uyúlhni, "Yak'usda 'en chah nyunokat. Koo bez whuziħi whudutsun, 'i naoodesdut'l'us, 'i li'nint'ah hoh nyo 'et sinda 'ink'ez ndai Yak'usda bughunek netl'aída'ai, 'i bugħa suba nahutanyeh, 'et whunts'ih suhóonokat hukwa huwaobilh'a, 'et whuz na'a Yak'usda bughunek k'uninyis ho' dini!" ⁴ Ndunnah dune Paul zih nuhudelhúya 'uhiyúlhni, "Ndun Yak'usda bunáwhulnuk degħa nus dezti buba dzuh 'udenja." ⁵ 'Et Paul 'utni, "Sulħutsinkah 'aw nt'éoonuzúszun 'en náwhulnuk degħa nus dezti unli. Yak'usda bughunek 'uk'une'úsdegħu, 'i k'ut ndutni, 'Nuhmoodih 'en dzuh ts'ih bugħi yaoolhtuk gunih." ⁶ 'Et Paul hubunilh'en 'ilhuhowezdel bulunah Sadducee 'uhint'ah 'ink'ez bulunah chah Pharisee 'uhint'ah hoh tube cho hubulh yátelhtuk, "Sulħutsinkah si chah Pharisee 'ust'ah! Pharisee ye' usdli, 'ink'ez suba 'alha' hoont'ah yaidla dinahudutédulh 'et huwa njan suba nahutedeh huba sída!" ⁷ 'Et ndudéja ibulħi Pharisee 'ink'ez Sadducee teh lhewħehundunidulh 'et huwa 'ilhohuweżdel nawn īlk'ehankat suli. ⁸ 'Et Sadducee yaidla dinahudutédulh 'ink'ez lizas chah, nudúdeh chah hoonli 'et 'aw huba 'álha' cha'ħoħt'ah, 'et whunts'ih Pharisee ndulħcho 'et huba 'álha' hoont'ah. ⁹ 'Et 'o nus 'ulħo, 'i be 'awheħúnilzul 'ink'ez Moses bughunek 'uk'une'úsdegħu, 'i hodulħ'eh, Pharisee dédowħ, 'en diħudindel 'ink'ez tube cho whuch'a hutni, "Ndun dune 'aw hoontsi' bughú nachats'uhó'al. Lizas tulih k'us nududeh, 'i tulih yulh yálhtuk hoh tulih 'utni! 'Et huwa Yak'usda buyénah uzdooni għaít'ah." ¹⁰ Whuz tube lhtah 'uhutni k'et, Roman nehughan moodih whenelhújoot Paul yahidólhch'oolh ninzun, 'et dulh lhadugħan, 'en Paul bugħa hanahíyoolhtelh 'ink'ez ndet nehughan

* ^{23:1} Ndi khunek "Neyuh ts'ih huwa t'ets'oninzun", 'i hoonli ts'ih'un na'a k'us tink'us 'uhoont'ah, 'i għa t'ets'oninzun, ts'utni ho' ts'utni.

delhts'i 'et whuz hitoolhte hubúlhni. ¹¹ 'Et 'ulh'ek zeh neMoodihti Paul yuzih siyin 'ink'ez 'uyúlhni, "Soo cho ndzi 'ulhtus 'ududil'i. Njan Jerusalem nts'e na'a si sugha ts'ah'un hubudáni 'et Rome chah whuz na'a zeh 'udutánih."

Bulunah Lizwif Paul hituzelhghelh hukwa' huninzun

¹² 'Et 'om bun bundada bulunah Lizwif 'ilhúhowezdel 'ink'ez 'ilho nahúhezya hoh nduhútni, "Cha'ts'oos'al 'ink'ez too chah cha'ts'oosnai Paul ts'utuzilhghelh whuts'un." ¹³ Ndunnah ts'iyawh dit lanezi 'o 'un 'uhuneltsuk 'en hukw'u núhuhilhye. ¹⁴ Aw 'et Lizwif náwhulnuk degha nus dézti 'ink'ez hubutsuh whúdelhzulh chah hubugha nindel 'ink'ez hubuhútni, "Ts'iyawh 'ilho nats'úhezya 'aw cha'ts'utes'al Paul ts'utuzelhghelh whuts'un. ¹⁵ 'Et huwa k'an 'et nuhwheni 'ink'ez nahuhéyelh tubulh ndun Roman lhudugan moodih 'en buts'ót'l'a khunek áh'ah 'aoonilhka Paul ndez náhitoolhte 'o nus soo cho be 'ut'en k'ah t'ewhuntehzeh 'et wheni doohtni. 'Et wheni huba lhazdoot'e njan nenátedalh whuts'un ts'uzoolhghelh," hubuhútni. ¹⁶ 'Et whunts'ih Paul bulhtus buye' 'en whulh 'udants'o hoh, 'et nehughan delhts'i ts'ih ninya 'ink'ez Paul ndiyúlhni. ¹⁷ 'Et Paul 'ilhunuh nélhghel, "Anih," yulhni, 'ink'ez 'uyúlhni, "Ndun chilh nehughan moodih ts'ih ílhtelh, hoonliyaz 'un yudutenilh." ¹⁸ 'Et nélhghel yílhchoot 'ink'ez nehughan moodih ts'un wheyalhti 'ink'ez 'uyúlhni, "Paul tsak'edi'ai 'anih sulkni 'ink'ez ndun chilh nts'u tóolhte súlhni, hoonliyaz nyuduténilh 'et." ¹⁹ 'Et ndun nehughan moodih yula ilhchoot 'ink'ez dune hoolah ts'ih neínilhti 'ink'ez yoodulhkut, "Dahoont'ah hubugha 'usudutánih?" yúlhni. ²⁰ 'Et 'uyúlhni, "Ndunnah Lizwif moodih bunt'ah nyuhóodútélhkut, Paul naheyelh ts'un tolhte nyoduténilh, 'aoonilhka 'o nus soo cho highu t'ewhuntezeh, 'et wheni hudutenilh. ²¹ 'Et whunts'ih khun teh huboozólhts'a gunih! Dit lanezi 'o 'un Lizwif, 'en ti hika óodelhts'i, 'en ts'iyawh hituzelhghelh whuts'un 'aw cha'hutes'al 'ink'ez too chahutesnil hutni hoh nahúhezya. K'an 'ahoh 'uhutenilh huba lhahúdint'ah, nyun nahútanyeh 'et zeh hubahilh'i," yúlhni. ²² 'Et nehughan moodih utni, "Khun teh 'uyoón ndudóni gunih, njan ndusudani 'et." 'Aw 'et chilh whenáyalh'a.

Paul, ndun Felix yun moodih ts'ih whehíyalhti

²³ 'Et ndun nehughan moodih nélhghel moodih nanah, 'en hubuka' dani 'ink'ez ndo búlhni, "200 nehughan lhábudahleh keyah Caesarea ts'ih tehdulh, skwunlai 'o 'at nankoh lanezi (70) yeztli be nahúdelh chah, 'ink'ez 200 sohtuz nudúle chah, 'ulh'ek lanezi 'o 'at lhuk'i hoolah hukw'éhunint'o t'eh bat'en (9:00) 'et hutédulh wheni lhahúdoot'e. ²⁴ Paul chah yeztli buba lhadáhleh, soo cho bughohle hoh Felix, yun moodih, 'en buts'un niyóolhtelh." ²⁵ 'Et 'ink'ez nehughan moodih yuts'o k'e'anguz, 'i ndutni, ²⁶ "Felix yun moodih dezti si Claudius Lysias nts'ó k'e'úsge, dahooja. ²⁷ Lizwif ndun dune hiyílhchoot 'ink'ez hituzelhghelh ínle. Rome keyah whut'en unli 'et whulh 'údusts'o 'et sulh nehughan ílhchoot 'ink'ez hubugha hunayunlhúti. ²⁸ Ndet hukwa hiyílhchoot 'et naootés'ah, 'et huwa Lizwif yuba naheyelh ts'ih whélhti. ²⁹ 'Aw hoonliyaz tink'us 'út'en bugha nachawhús'al datétsah k'us huwa 'átelts'ulh huba. 'Ants'ih duk'una'a hiba nahooyeh hukwa' hutni. 'Et huwa hich'a yalltuk. ³⁰ 'Ink'ez ndet Lizwif ndun dune hituzelhghelh hukwa yahulhtuk sudáni hoh, 'ahoh nts'u tóolhte nuszun. 'Ink'ez ndunnah yuch'a yahulhtuk, 'en chah, lhahudughan hubulh nyun nts'o tooya hubudúsni. Soo cho khondle." ³¹ 'Et nehughan nduhóot'en hubúlhni t'eh, hoh tune'hust'en, Paul hiyílhchoot 'ink'ez 'et 'ulh'ek zeh keyah Antipatris huwhútni ts'ih lhgha hidilhti. ³² 'Et 'om bun nehughan yun nuhulghas 'en ts'iyawh nehughan delhts'i ts'ih nahundel, 'ink'ez yeztli be 'uhut'en, 'en zeh Paul bulh hutoodelh ka. ³³ 'Et keyah

Caesarea ts'ih hinílhti, 'et yun moodih chah yuts'ó k'e'anguz, 'i hitl'ahíya'ai, 'ink'ez Paul chah hitl'ahíyalhti. ³⁴ 'Et yun moodih ndi yuts'un k'e'anguz, 'i yuk'eyailhtuk 'ink'ez Paul yoodulhkut, "Nts'ez de yun k'ut haínya?" yúlhni. 'Et yun k'ut Cilicia huwhútni ts'ih haínya t'éoonanzin hoh, ³⁵ 'et utni, "Ndunnah nch'a yáhalhtuk whusahánel t'eh, 'et nyoozólhts'a." 'Et Paul, Herod bukoo whucho ts'ih hitoolhte, 'ink'ez highole ndo búlhni.

24

Ndunnah Lizwif, 'en Paul ch'a yáhalhtuk

¹ 'Aw 'et skwunlat dzin inle hoh, náwhulnuk degha nus dezti, Ananias hiyúlhni, hubutsuh whúdelhdzulh chah, 'ink'ez 'ilhunuh dune yalhtuk, Tertulus hiyúlhni, 'en ts'iyawh Caesarea ts'ih hunindel. 'En yun moodih, Felix hiyúlhni, hibut 'et Paul ch'a yáhalhtuk. ² 'Et Paul dáhinihti 'ink'ez ndun Tertulus dune yalhtuk, Paul ch'a yáwhenilhtuk hoh ndutni, "Degha nus dezti hoonih hoh neghinli 'et huwa sa hoh neyun k'ut whudezghel 'et ndúhont'e, 'ink'ez lhat hoh neyun k'ut soo 'uts'oot'e neba ná'hoonla. ³ 'Et huwa 'ahoolhyez ts'uhóont'i neilh'i tube neul dune nts'útni. ⁴ 'Aw sda sa nyostun ghaít'ah, 'et whunts'ih hoontsolyaz khunek be nyulh yaztélhtuk, neoozólhts'a nts'u téodusdlih. ⁵ T'éts'onínzun ndun dune tube wheónujut hoh ntsi' dune unli. Yun k'ut ndulhcho hoh 'en bugha Lizwif chah lhtáhúwhút'ah 'ink'ez Nazaren hubutsuh nya 'ududil'i. ⁶ 'Ink'ez Lizwif hubuluglez whucho 'et chah me neba whulhtsi, 'et ts'ílhchoot whenich'oh nek'una'a buba nats'ateyeh hukwa' uzninzun. ⁷ 'Et whunts'ih ndun nehughan moodih, Lysias hiyúlhni, danínya 'ink'ez negha hanáyulti. ⁸ 'Et Lysias 'en ndun Paul ch'a yálhtuk nyun nts'ó toodelh hubúlhni. 'Et nyunch'oh ndun dune oodilhkut t'eh, tube lhat hoh bughu yats'ulhtuk t'éwhunonzeh." ⁹ 'Et Lizwif chah Paul ch'a yalhtuk ts'iyawh 'alha' hutni, hutni.

Felix bubut Paul duba yanaltuk

¹⁰ 'Et yun moodih Paul yatelhtuk yutl'ahó'ai hoh ndutni, "T'éoonúszun ndi yun k'ut lhat naoodezut 'et nahéyelh inle, 'et huwa hoonús'i hoh mbüt duba yanalhútuk. ¹¹ 'Et nyunch'oh nahó'ah 'aw lanezi 'o 'at nat dzin bat'en inle teni' ntesdzilh ka, Jerusalem ts'ih teya. ¹² 'Aw Lizwif hubuluglez whucho 'et dune ch'a ts'un cha'duzusnih hoh Lizwif chasuhés'en, 'ink'ez bukeyah 'et dune lheobulhdulh 'et chah chasuhés'en. ¹³ Daja suhútni 'aw ts'ah'un mba nehúho'ah ghaít'ah. ¹⁴ 'Et njan nyudúsni ndunnah Sizi k'una'a 'uhuninzun 'et whuz na'a si chah netsuh whudelhdzulh buYak'usda buts'un teni' nulhdzun, 'et whunts'ih ndunnah Lizwif whuch'a yáhalhtuk. 'Ink'ez Moses bughunek 'uk'une'úsduguz, 'i 'ink'ez Yak'usda be nus whúnih'en 'uk'une'huzguz, 'i chah suba 'alha' 'int'ah. ¹⁵ K'us ndan yaidla unzoo k'us ntsi' inle ts'iyawh dinahudutédulh, Lizwif huba 'alha' hoont'ah, whuz na'a si chah Yak'usda suba 'alha' 'int'ah. ¹⁶ 'Et huwa si 'ahoolhyez Yak'usda ts'un 'ink'ez dune chah ts'un neyah ts'ih bugha t'ets'oninzun* 'i bugha ts'ah'un na'a oost'e hukwa 'ust'en. ¹⁷ 'Et hukw'elh'az lhat naoodezut hoh Jerusalem keyah niya. 'Ink'ez sulh whut'en ba ndai sooneya huba 'ilhunanughe'ai, 'i hubuts'u naínte'ai 'ink'ez Yak'usda ts'un Yak'usda bukw'uzdai k'ut 'udutélhk'un wheni whuz lhgha nadusja. ¹⁸ 'Et hubuluglez whucho Lizwif soo cho hubuna'udeh k'una'a lhaóodusdla inle. 'Et whutah ndust'en hoh suhá'en. 'Aw dune 'ilhuhowezdel 'ink'ez 'aw hoonliyaz lhenah cha'hudusnih ilah inle. ¹⁹ 'Et bulunah Lizwif Asia yun k'ut whut'en chah 'et hudemhts'i, 'en mbüt nihóodelh huba' hoont'ah

* **24:16** Ndi khunek "Neyuh ts'ih huwa t'ets'oninzun", 'i hoonli ts'ih'un na'a k'us tink'us 'ohoont'ah, 'i gha t'ets'oninzun, ts'utni ho' ts'utni.

'ink'ez sch'a yáhoolhtuk hoonliyaz hoh senah 'úhint'ah t'eh. ²⁰ K'us ndunnah teh nyodóni ndet hoh tinta' nust'en sughu náháhóo'ai neba naheyelh hububut síyin hoh, ²¹ 'et whunts'ih nahéyelh but síyin hoh, 'ilhuh ze' dusni, 'Yaidla dinahudutédluh suba 'alha' hoont'ah,' 'et huwa k'an dzin 'et suba nahinyeh.' ²² 'Et Felix ndai Sizi k'una'a 'int'ah, 'i bugha soo t'eóoninzun. 'Et Paul yuba nahooyeh hukwa cha'nízun 'et ndo búlhni, "Nk'at lih nehughan moodih Lysias whusaínya t'eh, mba nahoosyeh." ²³ 'Et Paul nélhghel yughunli 'ulhni, "Ahoolhyez bughinli, 'et whunts'ih 'o nusyaz k'úne' oot'en whute bulh dunekah hits'u k'unaooodulh 'ink'ez ye ndunidzit, 'i be highole ka."

Paul, Felix 'ink'ez Drusila hububut ninínya

²⁴ 'Et dzuh lhat dzin inle hoh Felix bu'at Drusila bulh whusahá'az, 'en chah Lizwif 'int'ah. 'Et Paul hikunáwhulh'a, nts'e na'a Christ buba 'álha' 'int'ah 'et hubugha hubulh yálhtuk, 'et hiyoozélhts'ai. ²⁵ 'Et whunts'ih Paul, Yak'usda be ts'ah'un na'a 'uhoont'ah, 'i 'ink'ez nuwhenich'oh khuts'udli chah, 'ink'ez neba nahutedeh dzin whusaóotelts'ulh t'eh, 'et hubugha wheóobunooltun hukwa' utni. 'Et Felix nelhújoot 'ink'ez utni, "Aw 'et k'an naindalh, doo chah nkana'doosni, sughá whults'ut t'eh." ²⁶ 'Et yalhtuk whutah, "khun teh Paul sooneya sugha óo'ah, 'et bulanadoosnih," ninzun. 'Et huwa lhat hoh yuka' dunih 'ink'ez yulh yálhtuk. ²⁷ Nat naoodezut inle, Porcius Festus hiyúlhni, 'en Felix yun moodih yuk'énadeja. Felix 'en Lizwif dune unzoo hunoozin ninzun 'et huwa Paul tsak'edilh'ai.

25

Paul, Rome whut'en hubudayi cho degha nus dezti, Caesar hiyulhni, 'en yubut nióoya yuts'u húkwa' utni

¹ 'Ink'ez tat dzin inle Festus yun moodih Judea yun k'ut ts'ih ninínya. 'Et keyah Caesarea whédinya 'ink'ez Jerusalem ts'ih ninya. ² 'Et náwhulnuk degha nus dezti 'ink'ez Lizwif bumoodih Festus ts'ih hunindel hoh Paul hich'a yálhtuk 'ink'ez Festus highu tédedlih, ³ Paul, Jerusalem ts'ih naitoolh'a hukwa' hunínzun 'et hoh dula 'ooneh hiyúlhni, 'aoonilhka hiba lhaóodinla hoh wheghah uyalh t'eh, 'et hituzelhghelh 'et wheni. ⁴ 'Et Festus 'utni, "Paul, Caesarea 'et tsak'edi'ai unli ho' 'int'ah. 'Et sich'oh chah 'ahoh 'et whuz natesdalh. ⁵ 'Et nuhmoodih sulh náhutoodelh 'et hich'a yaóolhtuk Paul tinta' 'unt'en hoonli t'eh," hubúlhni. ⁶ 'Et lanezi dzin bat'en 'et hubutah índa, 'et 'ink'ez Caesarea ts'ih whenya. 'Et 'om bun 'aw 'et dune ba nahedelh hukw'ét'l'adida 'ink'ez, "Paul dahiyoolhtelh," hubúlhni. ⁷ 'Et Paul danínya hoh Lizwif Jerusalem ts'ih haíndel higha wezdel 'ink'ez lhat hooncha 'et tinta' 'unt'en hiyúlhni hoh hich'a yálhtuk, 'aw ts'ah'un 'alha' hutni huhoohltsilh ghaít'ah. ⁸ 'Et whunts'ih Paul duba yanaltuk hoh ndi yúlhni, "Aw Lizwif be huba nahesda, 'ink'ez hubuluglez whucho, 'ink'ez Roman hubudayi cho, 'en chah buts'un tinta cha'ust'il." ⁹ 'Et Festus, Lizwif soo cho huba 'uja, 'et huwa Paul yoodulhkut, "Jerusalem ts'ih ndi hiye nch'a yálhtuk, 'i bugha whuz subut tanyin hukwa' ninzun ih?" ¹⁰ Paul 'utni, "Njan Rome whut'en hubudayi cho degha nus dezti, 'en Caesar hiyúlhni, dich'oh nahéyelh, 'et mbüt síyin 'et suba nahodeh huba' 'ust'ah. Lizwif hubuts'un tinta cha'ust'il nyunch'oh soo cho nt'eoónínzun. ¹¹ 'Et be ba nahesda, 'i k'uníyuz t'eh, k'us hoonliyaz hukw'elha daósah huba' hoont'ah 'usja t'eh, 'aw whuch'a ne'óost'en ghaít'ah. 'Et 'aw soo daja 'uhútni 'alha' cha'hóot'ah t'eh, 'aw dune hubutl'asóolhtelh hoolah. Rome whut'en hubudayi cho degha nus dezti 'en but neóosya 'et nts'u húkwa' dusni." ¹² 'Et Festus yugha utni 'en naboodelkut hukw'elh'az, 'et Paul 'uyúlhni, "Rome

whut'en hubudayi cho degha nus dezti but nitányałh hukwa' ninzun, 'et huwa Rome whut'en hubudayi cho degha nus dezti, 'en bubut neóonya!" yúlhni.

Festus, hubudayi cho Agrippa, 'en Paul bugha yúlh yalhtuk

¹³ 'Aw sa ilah hukw'elh'az hubudayi cho Agrippa hiyúlhni 'ink'ez ts'eke yúlh na'as, Bernice hiyulhni chah, Caesarea ts'ih huni'az, Festus dahooja huba hudutenilh ka. ¹⁴ 'Aw 'et lhat dzin hanke hukw'elh'az Festus hubudayi cho Agrippa Paul bugha dáhoont'ah ts'iyawh yulh náwhelnuk, "Njan 'awhuz 'ilhunuh tsak'edi'ai 'et usda, 'en Felix 'aya'ai ínle. ¹⁵ 'Ink'ez Jerusalem ts'ih níya hoh Lizwif náwhulnuk degha nus dezti 'en 'ink'ez hubutsuh whudelhdzulh chah hich'a yálhtuk 'ink'ez datetsah huba buba nahoosyeh ka suts'un téhududlih. ¹⁶ 'Et whunts'ih ndo hubudusni, 'Rome hubuk'una'a 'et ndúhoont'ah, dune tinta' 'unt'en daóotsah ka dáhni t'eh, 'udechoo yuch'a yálhtuk hububut inyin 'ink'ez hububut yuk'ého'ahl huba' hoont'ah, 'aw 'et t'eh zeh huba nahutedeh." ¹⁷ 'Et whusahádel hoh 'om bun 'ahoh dune ba nahudeh, 'et nátl'adesda 'ink'ez, 'Ndun dune dahiyóolhtelh,' hubudúsni. ¹⁸ 'Et yuch'a detni, 'en dihudíndel tube yuk'ehóte'ahl nuszun hoh, 'aw daja chahidínil. ¹⁹ Lizwif hubuluglez hubugha 'ink'ez 'ilhunuh dune, Sizi hiyúlhni, dazsai inle 'et whunts'ih Paul utni, 'Khuna,' ni hoh hubugha zeh lhtana' hudentni. ²⁰ 'Aw náhos'ahl ts'ih hoolah njan 'uwhutni hubugha, 'et Paul oodalhkut, soo tulih Jerusalem ts'ih tooya 'et nahéyelh hububut ootéldzih huba. ²¹ 'Et Paul hubuts'u húkwa' dani tsak'edoo'a 'ink'ez Rome whut'en hubudayi cho degha nus dezti, 'en duba nahooyeh ni, 'et Rome whut'en hubudayi cho degha nus dezti, 'en ts'un télh'ahl 'et whuts'un tsak'edoo'a dusni," ni Festus. ²² 'Et Agrippa Festus 'uyúlhni, "Ndun dune sich'oh ootuzelhts'ilh hukwa' nuszun," yúlhni. 'Et Festus 'utni, "Bunt'ah sih oozólhts'a," yúlhni. ²³ 'Et 'om bun Agrippa, Bernice bulh soo huba hodélhti hoh whusahá'az. 'Et nehughan moodih 'ink'ez keyah whumoodih chah dune 'ilhodulh 'et bulh dahuníndel. 'Et Festus, "Paul dahiyóolhtelh," hubúlhni. 'Et dáhinilhti. ²⁴ Festus 'utni, "Hubudayi cho Agrippa 'ink'ez nuhwheni dune njan delhúts'i ts'iyawh ndun dune nulh'en. Lizwif njan 'ink'ez Jerusalem chah sulh náwhuhulnuk hoh Paul tink'us ne'ust'en, hutni. Soo tube cho 'uhutni, 'aw khoona huba cha'ít'ah. ²⁵ 'Et whunts'ih 'aw tink'us ne'ust'en hukw'elha daóotsah bugha nachawhús'al 'ink'ez dich'oh Rome whut'en hubudayi cho degha nus dezti yuts'u húkwa' dani, 'et huwa 'en buts'íte'ahl. ²⁶ 'Et Rome whut'en hubudayi cho degha nus dezti buts'un k'e'tesgas whunts'ih 'aw Paul tink'us 'uja ts'ah'un bugha nachawhús'al. 'Et huwa njan nuhwhubut ninílhti, nyun soo hubudayi cho Agrippa mbut ninílhti, khun sih hoonli bugha náwhuh'ai t'eh, 'et sih whuk'é'oosges. ²⁷ 'Aw ndun dune hoonli bugha nachats'uhóo'al whuz whets'áhl'a t'eh, 'aw ts'ah'un suba cha'hóot'ah."

26

Agrippa bubut 'et Paul duba yanaltuk

¹ 'Et Agrippa, Paul yúlhni, "Duba yanataltuk 'et ngha ooní'ai." Paul didilnik 'ink'ez duba yanawhéniltuk hoh ndutni, ² "Hubudayi cho Agrippa, Lizwif lhat sk'ehúhoonla hubugha, sich'oh mbüt duba yanatelhútuk. K'an dzin sugha ooní'ai, 'et huwa tube suba hóolya nuszun. ³ 'Et njan 'alha' hoont'ah nyunch'oh soo t'eóninzun nts'e na'a Lizwif duk'ah ts'ih dune hinli 'ink'ez lhtah 'uhudutni hoh chah, 'et huwa soo cho soozélt's'ai nts'u húkwa' dusni. ⁴ Nusol da whuts'un nts'e na'a yinkak sída Lizwif ts'iyawh t'éhonínzun soo 'udéchoo whuts'un sich'oh skeyah 'ink'ez Jerusalem chah hoh zeh dune usdli 'et t'éhonínzun. ⁵ 'Udechoo whuts'un soo degha nus duluglez hukw'un né'ut'en,

Pharisee, 'en hubulh desdowh 'et t'éhonínzun, 'et huwa hukwa' huninzun t'eh 'et da sla'hudootni wule. ⁶ Ndai Yak'usda netsuh whudelhdzulh hubuts'ú yoozi, 'i si chah buká tsih hóosdli, 'et huwa k'an njan ootéhdzih ka mbut síyin. ⁷ 'Et whuz na'a ndunnah lanezi 'o 'at nawh dédowh dune,* 'en ndi khunek buts'ú yoosdzi hubugha ítelts'ulh, 'et hukwa tsih huhóoli, dzin 'ink'ez 'ulh'ek 'i bulh Yak'usda ts'un téni' 'uhunilhzun whutah. 'Et hubudayi cho Agrippa, ndet ndunnah Lizwif, hukwa tsih huhóoli, si chah hukwa tsih hóosdli. 'Ink'ez 'et hukwa sk'ehúhoo'ai. ⁸ 'Et ndet huwa nuhwhuba 'alha 'uhot'e ghaít'ah njan Yak'usda dune yaidla dinabudile hubugha? ⁹ Ndun Sizi, Nazareth whut'en, ts'iyaitsuk hoh buch'a doosni nuszun íle. ¹⁰ Jerusalem 'et ndust'en inle, náwhulnuk degha nus hudézti stl'ahahó'ai hoh lhanah dune Yak'usda bube'ildzun, 'en tsak'ebesdla 'ink'ez yahutédlah wheni huba nahesda hoh, si chah buch'a désni. ¹¹ Si 'udusni huwa luglez totsuk dune dzuh nobuhulhdeh Sizi Gri hich'a naóol'ah hukwa' bulh'en. Whuz tube hubulh húnlhuch'e k'et nilhdza keyah whunts'ih nobunusya dzuh nobutelhzut ka."

Paul, Sizi ts'un budzi náhundunez'ai hukw'un náwhutelnuk

¹² "Njan 'et wheni náwhulnuk degha nus whudézti stl'ahuho'ai 'et Damascus ts'ih teya. ¹³ 'Ink'ez hubudayi cho Agrippa, dzetniz bat'en 'et ti ts'edulh hoh kwun ndult'ah, 'i sa degha nus 'ultus, 'i dune sulh héduh bulh nenat núdeznat. ¹⁴ 'Et ts'iyawh yun nats'ánkat hoh Hebrew bughunek k'una'a sulh yáztelhtuk hoh nduwhúttni, 'Saul, di ka 'int'en, dzuh nusíhhdzut? Ndun tulsus nule 'aw buk'únucha'zint'en t'eh, nyunch'oh zeh dzuh nuná'dudutaldzut,' súlhni. ¹⁵ 'Et oodulhkut, 'Moodihti ndan inli?' dúsni. 'Si, Sizi 'ust'ah. Si 'usilh'en dzuh nusíhhdzut. ¹⁶ 'Et whunts'ih didinyih 'ink'ez sinyin, njan nyunalhts'et haíya suba 'int'en nyutesilh ka. K'an dzin sa'en 'ink'ez 'udun chah nus de whúnyuntelhtun, 'et chah hubugha 'uyoon ndo budóni. ¹⁷ Lizwif 'ink'ez 'udun yun k'ut whut'en, 'en hubuts'un nyutélh'ah. Dzuh nunyotel-hdzut 'et whunts'ih nla' test'ilh. ¹⁸ Whebuntalhtun nts'e na'a tsahólhgus yáhanahudutedulh 'ink'ez whét'en nihútedulh 'ink'ez 'ants'ih hitá'en li'huja t'eh Satan huboontun Yak'usda ts'un nahútelyeh. 'En si huba 'alha' 'ust'ah huwa hubulubeshi ch'a hubuna'dutedoh 'ink'ez Yak'usda ba 'udun nibuninla hubutah 'et hubugha óotelts'ulh,' súlhni.

Paul dude 'ut'en k'ah huwuyalhtuk

¹⁹ "Et huwa, hubudayi cho Agrippa, njan ndus de kwun deznukw 'ink'ez oozalhts'a 'aw 'uts'un cha'dúsnil. ²⁰ 'Udechoo Damascus 'et 'ink'ez Jerusalem chah 'et hukw'elh'az Lizwif hubuyun k'ut ndulhcho hoh, 'udun yun k'ut whut'en hubutah chah, lubeshi whuch'a bubení nahodunooleh huba' hoont'ah 'ink'ez Yak'usda ts'un nahóolyeh 'ink'ez hubudzi náhundunezdla chah, whuz na'a zeh ne'hóot'en, hubudúsni. ²¹ 'Et njan huwa luglez whuchó 'ust'en hoh Lizwif suhílhchoot 'ink'ez sazoolhghelh hukwa' hut'en. ²² 'Et hoh da k'an dzin whuts'un Yak'usda sla 'út'en. 'Ink'ez k'an njan nuhbut síyin ts'iyanah dóosni ka, tehul'en 'ink'ez hudézti chah. 'Et daja dusni, Yak'usda be nus whúnih'en 'ink'ez Moses chah daóotenih hutni, 'et zeh 'uwhudúsni. ²³ Christ'en dzuh nutezut 'udéchoo dune utenilh, datétsah, 'ink'ez 'ilhuz dinadutédalh. 'Et huwa Lizwif 'ink'ez 'udun yun k'ut whut'en, 'en hububa be whét'en teleh." ²⁴ 'Et Paul whuz na'a ndutni hoh, 'et Festus yúlh yedúdulh, "Paul nyeni hoolel! 'O nus hodil'eh k'et, nyeni hoolah suli!" ²⁵ 'Et Paul 'utni, "Festus dezti 'aw seni hoolah ilah, ndi khunek be yálhtuk, 'i khunek 'alha' 'int'ah, 'i 'int'ah 'ink'ez ts'ah'un na'a 'udusni. ²⁶ Hubudayi

* ^{26:7} Ndunnah lanezi 'o 'at nanah 12 'en Jacob buzkeh 'uhant'e. Lizwif ndunnah hits'uh hainde ho' hant'e.

cho Agrippa soo ts'et whucho 'un yudúsni, nyunch'oh chah soo t'éooninzun hoonliyaz nts'oh tune'whust'en. 'Alha ndunuszun 'aw hoonliyaz nch'a ilah túne'whust'en ho' hoont'ah. ²⁷ Hubudayi cho Agrippa, Yak'usda be nus whúnih'en khunek hik'une'uzguz, 'i mba 'álha' utni ih? T'éoonúszun mba 'álha' whutni." ²⁸ 'Et Agrippa, Paul 'uyúlhni, "K'an 'astl'iyaz 'et 'ankw'us Sizi Gri yuneyalh suzílhtsi." ²⁹ 'Et Paul 'utni, "Dahooldukw k'us dawhuldzah nyun chah 'ink'ez ndunnah soo hoozelhts'ai ts'iyawh sundult'ah uncha nuszun hoh nuhwhuba tenadusdli. Ndi tes tl'ool be sulhghel, 'i zeh nuhwhuba buka cha'núszun." ³⁰ 'Aw 'et hubudayi cho, 'ink'ez yun k'ut moodih, 'ink'ez Bernice, 'ink'ez 'uyoon chah ts'iyawh dináhudidel, ³¹ 'et whenáheded hukw'elh'az 'ulhódutni, "Ndun dune 'aw hoonli hukw'elha datetsah k'us tsak'etedcha ínil." ³² 'Ink'ez Agrippa, Festus 'uyuhlni, "Ndun dune Rome whut'en hubudayi cho degha nus dezti yubut wuyin hukwa cha'dínel t'eh, 'uda da bulanazdootnih inle."

27

Paul, Rome ts'ih whehíyalhti

¹ 'Aw 'et lhgha 'úhudeja hoh yun k'ut Italy ts'ih nilhts'i t'az nuke 'i be uztooke hutni. 'Et Julius hiyúlhni 'en Rome nehughan moodih unli, ndunnah nehughan, 'en Rome whut'en hubudayi cho dezti budune nehughan hubuhútni, 'en Paul 'ink'ez 'uyoon tsak'edelhts'i chah, Julius 'en hitl'ábanla. ² Ts'i cho, keyah Adramyttium ts'ih haínkez, 'i Asia ts'ih yatoo ba ts'i yanadukuk whutuhnútéke, 'i be ts'ándel 'ink'ez 'aw 'et uztezki. 'Ilhunuh dune Aristarchus hiyúlhni, 'en keyah Thessalonica, Macedonia yun k'ut whuz'ai ts'ih whuz de haínya, 'en chah nelh 'úja. ³ 'Om bun 'aw 'et keyah Sidon ts'ih ts'utezki. Julius 'en Paul ts'un unzoo dulh dunekah naboot'en ka, 'et yugha óoni'ai, ndai ye ndunindzit, 'i higha yóolelh 'et wheni. ⁴ 'Et whuch'az ninki hoh nedudezts'i, 'et whuch'az noo Cyprus 'i buch'az lhuts'úzki. ⁵ Cilicia 'ink'ez Pamphylia, yatoo wheghah 'et nazninki, 'ink'ez keyah Myra, 'et Lycia yun k'ut whuz'ai, 'et yats'úzki. ⁶ 'Et ndun nehughan moodih ts'i cho keyah Alexandria ts'ih haínki, 'i yun k'ut Italy ts'ih tekelh, 'i be nets'anla. ⁷ Lhat dzin whuts'un hoh ndai gha ts'ekelh tube huwa whulna hoh ts'ekelh. 'Et 'udek'elh'az keyah Cnidus 'et whuzih lhuts'úzki. Nedudezts'i 'i bugha 'aw 'á uztooke ghaít'ah. 'Et huwa nus si noo cho Crete hiyúlhni 'i buts'un 'úts'uja, Salmone huwhútni, hoh wheghah lhuts'úzki, 'ink'ez noo bu'ih zeh 'uts'ut'en hoh, ⁸ noo whuzih zeh ts'ekelh, tube huwa whulna hoh Tl'oh Dezghel huwhútni, 'et keyah Lasea huwhútni, 'et huwu nilhdza ilah, 'et yats'úzki. ⁹ 'Et sa hoh 'et 'uzdálts'i. 'Aw 'et Lizwif sahá'delya dzin 'et chah 'uda whegho dezut, tube huwa 'óodli whudezulh nuts'úke huba.* 'Et Paul hubugha dáni hoh njan ndó bulhni, ¹⁰ "Dune 'aw 'et njan whuts'un tube huwa 'oodli tele. Ts'i chah 'ink'ez be yuzdla, 'i chah tinta' tet'ilh, 'ink'ez bulunah chah yahutádlah ho' hoont'ah." ¹¹ 'Et whunts'ih ndun nehughan moodih Paul yuba 'alha' cha'dusnih. Ts'i niz ts'ih usda, 'ink'ez ndun ts'i bube'ildzun unli, 'en zeh hiba 'álha 'int'ah. ¹² 'Et hudemhts'i khi hudutélts'ilh huba nek'e' hoot'ah. 'Et ndunnah dune k'us lhanah, 'en nus hutekelh hukwa' huninzun, soo' hutenilh t'eh, keyah Phoenix ts'ih hutekelh hutni. 'Et noo cho k'ut tl'at whucho whuz'ai, nyan nilhts'i 'ink'ez nus nilhts'i chah ch'a whu'it whuz'ai, 'et khi hudutelts'i hukwa' huninzun.

Yatoo k'ut whudutehts'ut

¹³ 'Et nyaz de nezul bulh nilhts'i 'i be tezts'i, 'ink'ez ndunnah dune soo 'uhutenilh huninzun, 'et huwa ts'i bulh too su'ai, 'i too hanahiya'ai 'ink'ez

* ^{27:9} 'Et soo dak'et 'uhoont'ah.

nus whehánki, 'ink'ez noo cho Crete 'i soo buzih k'ut zeh hutezki. ¹⁴ 'Et 'aw chaootusxit hoh nilhts'i ulhtus, 'i yoo ts'iz tezts'i hiyúlhni, 'i noo soo buts'uh haínts'i hoh tezts'i. ¹⁵ Ts'i buk'eoodilts'uk hoh 'aw nilhts'i buyah uztooke ghaít'ah suli. 'Et hukwa' ts'ut'en 'ustl'e' 'uts'uja 'ink'ez whute nilhts'i k'una'a uztezki. ¹⁶ 'Uyoo nooyaz Claudia hiyúlhni, 'i bu'it ts'uninki, 'et 'ankw'usyaz neba soo úhónt'e. 'Et soo 'uts'unút'en hoh ts'iyaz whuts'ulh'oo, 'i duts'o ts'úlhtsi, ¹⁷ 'ink'ez dets'ántan. 'Et ts'i cho tl'oohl be bunané'ts'uzguz. Nilhts'i be nuke 'i nanáhiyanla, yun k'ut Lybia whunat taba tadalhdukw, 'ink'ez teh whudutle, 'i hik'ételulh 'et whe hunuljut 'et huwa. 'Ink'ez 'ants'ih nilhts'i be hoh nuzdulduz. ¹⁸ Whéwhunuljut hoh nilhts'i ze' whut'en. 'Et 'om bun ts'i be sula, 'i bulah táwhehinilhdel. ¹⁹ 'Et doo chah whulh tat dzin nyoo ts'i bet be ne'whut'en, 'i chah whenich'oh tats'álhdel. ²⁰ Lhat dzin inle 'et sa chah 'ink'ez sum chah 'aw chats'és'en 'ink'ez whuz tube nílhts'i ze' whut'en. 'Udek'elh'az 'aw 'et uzdutejih 'et cha whulanizdunanzut. ²¹ 'Et sa hoh dune 'aw cha'hus'al hoh Paul hubutah siyin 'ink'ez ndo búlhni, "Dune soo sih soo zólhts'a huba' hoont'ah, noo cho Crete 'aw whuch'a ts'ooke huba cha'hóot'ah. 'Et 'uts'úja t'eh, 'et t'eh da 'aw hoonli nech'a tinta cha'host'en 'ink'ez dachats'útesnil wule da. ²² 'Et whunts'ih k'an nuhghu téoduslih, nuhdzi ulhtus cho ulh'i! 'Aw nuhtah 'ilhunuh whunts'ih dáchatesa, ts'i zeh tinta' tet'ilh. ²³ Yak'usda be'ildzun usdli, 'ink'ez buba ne'ust'en, 'en 'ulh'ek da bulizas 'en suzih be hóodiltsai, ²⁴ 'ink'ez 'utni, 'Paul whéniljut ilah! Rome whut'en hubudayi cho dezti bubut tanyin ho' hoont'ah, 'ink'ez Yak'usda nyudánts'o hoh ye únzoo, 'i bugha nyulh dehúdelhts'i yachahutéssla.' ²⁵ 'Et huwa dune nuhdzi ulhtus cho wule! 'Et suba 'álha' hoont'ah nts'e na'a Yak'usda 'usúlhni, whuz na'a 'uhót'e. ²⁶ 'Et whunts'ih 'ilhuh nooyaz k'ut 'et whuniz telhts'ih." ²⁷ 'Aw 'et whulh nat hukw'enilhgel inle, 'et Adria yatoo k'ut 'awhuz uzdeldus. 'Et tuzniz bat'en ndunnah ts'i bet 'ut'en 'en yun yeghah 'uts'ut'en huninzun. ²⁸ Tl'oohl ndaz, 'i huyé dinguz 'ink'ez tahíya'ai. 'Et nahuhoo'ai tube takhulh 120 feet 'et ta'delkulh. 'Et hukw'elh'az 'et doo chah zeh whunduna'hoolhdzai, 'et 90 feet ta'delkulh. ²⁹ Tse k'ez tekelh whéznuljut, 'et huwa dit tse tl'oohl ts'i bulh too sula, 'i ts'i niz ts'ih taháyanla 'ink'ez soo 'a hol'eh huninzun. ³⁰ Ts'i bet 'uhut'en neghu déhahunool'ilh hukwa' hút'en. Ts'iyaz tahítetilh 'ink'ez ts'i bulh too sula, 'i nus tahíteleh lahuhoolh'i. ³¹ 'Et Paul ndunnah nehughan 'ink'ez bumoodih chah ndo búlhni, "Ndunnah dune 'uhut'en 'aw ts'i be chahudilts'ih t'eh, 'aw nuhwhenih doohjih ghaít'ah." ³² 'Et ndunnah nehughan tl'oohl k'uhinínt'az 'ink'ez ts'iyaz hiladetnik. ³³ 'Aw 'et haootelh'en hoh Paul ndo búlhni, "Uhoo'ah, 'aw 'et whulh nat hukw'enilhgel hubalh'i, 'et ndúhoolyez hoh 'aw hoonli cha'zah'al. ³⁴ Nuhghu téoduslih 'ah'ah! 'Et whut'az dute-hjih ho' hoont'ah. Nuhtsigha lhuk'i whunts'ih tinta cha'dutéskwus." ³⁵ 'Et ndudáni hukw'elh'az, Paul lhes yílhchoot, ts'iyawh hubunallh Yak'usda ts'un, "Suchanailya," dani, taídalhkut 'ink'ez hoh whení'al. ³⁶ 'Et hubudzi ulhtus násdli 'ink'ez 'ilhunuh hinli hoh 'úha'al. ³⁷ Nuwheni ts'iyawh 276 ts'inli hoh ts'i bez ts'udelhts'i. ³⁸ Ts'iyannah soo 'ultsuk nahét'al hukw'elh'az, ts'i ndaz suli ch'a, lhes haníyeh, 'i desúdzai, 'i tahíyalhdel.

Desk'udinki hoh tatsi be ts'i yaidujut

³⁹ 'Aw 'et hoolh'en hoh ts'i bet 'úhut'en nyo yun nachahuhóoltsulh. Tl'ah taba hoonli, 'et hotelh'en, soo 'uhutenilh t'eh whute ts'i yahítejooh huninzun. ⁴⁰ 'Et huwa ts'i bulh too yuzdla, 'i k'unuhíyuzt'az 'ink'ez nyo 'aw 'et hiladet-nik. Tl'oohl ts'i be nuhunukes, 'i be dint'uk 'i chah k'unuhúyuzt'az 'ink'ez nus nilhts'i i be nuke, 'i hoh náhidintsi nilhts'i be no yádooldis ka. 'Aw 'et whusahudutelhúduz. ⁴¹ Nyo lheghidli ndúwhult'ah sai dutle, 'i haín'a 'i ts'i

yuk'énkez 'ink'ez nus ts'i bunintsis duts'o súli, 'aw naghóotnah ghaít'ah. 'Ink'ez niz ts'ih 'aw 'et tatsi be yawheni'el. ⁴² 'Et nehughan ndunnah tsak'ehudelhts'i 'en huboteghan ka lhahódinla, doo ka yahúl'el 'ink'ez tinta nahoolghas. ⁴³ 'Et whunts'ih nehughan moodih Paul yutelhyih hukwa' ninzun 'et, "Dah," hubúlhni. "Ndunnah dune soo nube t'éhonínzun, ts'iyawh 'en choo tahóollhat 'ink'ez yahooobe," hubúlhni. ⁴⁴ 'Et 'onghunnah, 'en lhustel k'us ts'i buts'uh hánidestuk, 'i ndi hit'az yahulhú'el. 'Et whuz na'a ts'iyawh dachats'ínil hoh yats'úzdel.

28

Paul Malta whut'en hubula' tet'ilh

¹ Soo yats'úzdel ndi noo 'i Malta hiyúlhni 'et t'ets'onanzin. ² 'Et whut'en tube nets'un hínzoo. Náwheoonilhtan 'ink'ez whuzk'uz. Kwun neba hídulhk'an 'ink'ez soo cho nene'hulh'en. ³ Paul tsuz 'ilhidughezdla 'i nus tsídule hoh tl'ughus neoolhch'oolh, 'i kwun be ninzil hoh Paul yula súlhch'ulh. ⁴ 'Et ndunnah Malta whut'en ndi tl'ughus Paul yula yé dint'uk hinilh'en 'et 'ulhódutni, "Ndunnah dune neghan 'int'ah. Wheni neyak'usda, 'en boozi, 'i 'ahoolhyez 'uk'elháhoolh'i ts'útni, 'en hutenalh yughá ho'ah ghaít'ah, yatoo k'ut dujih whúnts'i." ⁵ 'Et whunts'ih Paul 'aw dachaínil hoh kwun k'ut dula yughat 'et ndi tl'ughus yuts'úhainkat. ⁶ Hibalh'i, wulk'et tulih, k'us khunyaz tulih nadooldis 'ink'ez daóotsah. Sa hiba lh'i hukw'elh'az 'aw hoonli cha'ínel. 'Et huwa 'uts'un na'a na'húnudzun 'ink'ez ndun buYak'usda bulh 'ilhunuh 'int'ah huninzun. ⁷ 'Aw bughu nilhdza ilah 'et tl'o k'ut whuzdla, noo k'ut hubudayi, Publius hiyúlhni, 'en bube'ildzun hoonli. Soo whu'it teh bugha dáznindel 'ink'ez tat dzin buzih uzdálts'i. ⁸ Publius be'abá kw'usuti k'ut sulhti dada be chah 'ink'ez bubut k'e dzuh nuzut. Nts'e sulhti, 'et Paul yughu danínya 'ink'ez tenadidli, yuk'událni, 'ink'ez soo ná'yinla. ⁹ 'Et ndúhooja hukw'élh'az noo k'ut whut'en hunduda ts'iyawh whusahándel 'ink'ez 'en chah soo ná'huja. ¹⁰ Hoonliyaz lhai nets'ótelhdel 'ink'ez uztezki hoh ndai buka ts'untezilh, 'i chah netl'anáhiyelya.

Malta whuts'un Rome ts'ih hutezki

¹¹ Tat sanun inle hukw'elh'az, keyah Alexandria ts'ih haínsi, 'i Lhulhutsin Lht'adanke hiyúlhni, 'i ts'i khi noo k'ut intan, 'i be uztezki. ¹² Keyah Syracuse huwhútni 'et uzninki 'ink'ez tat dzin 'et uzdálts'i. ¹³ 'Et whezdinki 'et doo chah keyah Rhegium huwhútni whuz ts'uninki. 'Et 'om bun 'et yoo'az tezts'i, 'et nat dzin inle 'et keyah whuyaz Puteoli huwhútni 'et yats'úzki. ¹⁴ Bulunah huba 'álha' hoont'ah nabuts'ínlá hoh 'ilhuh hukw'enilhghel 'et hubuzih uzdóolts'i nehútni. 'Aw 'et yun k'ut 'uts'uja hoh Rome ts'ih ts'utezdel. ¹⁵ Ndunnah neulhutsínkah Rome 'et nelh 'úhudants'o hoh, 'e'óoket, Appius huwhútni, 'ink'ez ts'uztez bakoo chah tat ts'uyi huwhútni, 'et tazah 'uhooldzah ts'ih whuz nedadezdel. 'Et Paul hubutelh'en hoh, Yak'usda, "Suchanailya," yudáni 'ink'ez 'aw 'et budzi nduk ná'uja.

Paul keyah Rome 'et Sizi Gri bugha dune hubulh yálhtuk

¹⁶ 'Et Rome ts'ih ts'unindel hoh Paul whute nehughan 'ilhunuh zeh yughunli hoh dich'oh whút'i higha óóni'ai. ¹⁷ 'Et hukw'elh'az tat dzin inle hoh Paul 'et whut'en Lizwif dune hincha hubulh yátelhtuk ka usda ts'ih duts'ó toodelh hubúlhni. Whusahándel hoh 'et ndó bulhni, "Dune 'ink'ez suh Lizwif 'aw hoonli suh dédowh hubuch'a nuchá'ust'il 'ink'ez netsuh whudelhdzulh buk'ah ts'ih né'whut'en hoh chah whuch'a nuchá'ust'il. 'Et whunts'ih Jerusalem 'et tsak'etsuha'ai 'ink'ez Rome whut'en, 'en hubul'ásahalhti. ¹⁸ 'Et 'en suhoodalhkut 'ink'ez hoonli hoh tínta' nust'en hukw'elha datésah sugha náchahuhó'ah, 'et huwa sula nahudutetnih hukwa' huninzun. ¹⁹ 'Et whunts'ih Lizwif huwanch'az nehúnindel 'ink'ez suh dune 'aw hoh tink'us

na'a bughu yaoolhtuk ghaít'ah, 'et whunts'ih 'oosneh huba' hoont'ah. 'Et huwa Rome whut'en hubudayi cho dezti bubut nítésyalh 'ink'ez buts'u téduesdlih. ²⁰ Ndán Israel hubuts'uh huhainzut hika tsih hóoli, 'en suba 'álha 'int'ah huwa ndi tes tl'ool be suhulhghel. 'Et huwa nanwhutes'ilh 'ink'ez nuhwhulh yátelhtuk hukwá nuszun." ²¹ 'Et njan dihíyulhni, "Aw nyun nyugha yun k'ut Judea whuts'un dustl'us nets'ó tl'achahusdlah, 'aw neulhutsinkah chah whuz de haíndel chah nyun hoontsi' k'una'a nghu yachahulhtuk. ²² 'Et whunts'ih daja dutenilh nts'óotuzelhts'ilh hukwa' ts'uninzun. T'ets'onínzun dune buts'ú dintnik ndulhcho hoh yinka hubuch'a yáhalhtuk 'et huwa." ²³ 'Et Paul ts'un lhahódinla ndet dzin hits'u tedulh. 'Et 'o nus 'uhuneltsuk, 'en 'et dzin hits'u whúsaindel. 'Et bundada hulhgha whuts'un Yak'usda dune k'úne' bul'en hubugha hubodoolh'eh. Yak'usda be nus whúnih'en 'uk'unuhúyuzguz 'ink'ez Moses yuk'une'úzguz, 'i chah 'i bugha Sizi huba 'alha 'oot'e whule hubúlhni. ²⁴ Bulunah huba 'alha deja 'et whunts'ih 'onghunnah, 'en 'aw huba 'alha cha'dusnih. ²⁵ 'Et Lizwif lhelhts'un 'uhutni. 'Et 'az náhedulh hoh Paul njan ndo búlhni, "Dalcho 'i be Ndoni 'en Yak'usda be nus whúnih'en Isaiah 'uhiyúlhni, yudáni, ndi khunek nuhtsaħda hubutl'aídoō'ah ka. ²⁶ 'Et utni, 'Inyalh 'ink'ez ndunnah dune ndubudini,

soo cho 'oozélhts'ai 'et whunts'ih 'aw t'eoonoohzeh ghaít'ah;

soo cho whunulh'en 'et whunts'ih chaséh'en.

²⁷ Ndunnah dune hubeni dút's'o,

dudzo chah whudá'hudinla,

'ink'ez hunilhúts'ul chah 'uhint'ah.

'Et njan 'aw nduchahit'ah t'eh soo da honilh'en,

'ink'ez 'uhudoots'o, 'ink'ez hubeni chah da t'éoonoozeh wule.

'Et t'eh da suts'un náhulheya 'ink'ez da soo ná'boosdleħ, ni Yak'usda."

²⁸ 'Ink'ez Paul 'udek'elh'az ndo búlhni, "Njan t'éoonohzin huba' hoont'ah, Yak'usda bughunek be uzdujih, 'i 'udun yun k'ut whut'en, 'en hubuts'un tl'aida'ai. Hiyoozólhts'a huba' hoont'ah!" ²⁹ 'Et Paul 'et ndudáni hukw'elh'az tube cho lhtana'hudentni hoh Lizwif whenáhadel. ³⁰ Nat naoodezut 'et Paul njan hukw'elha hoolh'i 'et whut'i. Ndun highundelh 'en du'ih teh hubutulh'ih. ³¹ Soo ts'et whucho Yak'usda dune k'úne' bul'en, 'ink'ez Sizi Gri neMoodihti 'en bugha chah dune hoodulh'eh. 'Aw dune whuch'a chahiniyoot hoh ndutni.

Paul, 'en Rome Whut'en Hubuts'un K'e'anguz

Paul ndi dustl'us keyah Rome 'et ndunnah huba 'alha 'uhoont'ah hubuts'un k'e'anguz

¹ Si Paul Sizi Gri be 'ulhna, 'en ska na'detni whel'a 'úst'ah. Ndi khunek unzoo, 'i dune ndo budoosni huba, Yak'usda 'udun nésunilhti hoh 'ust'ah. ² Tube 'uda hoh ndunnah Yak'usda ba nus whunilh'en, 'en hubugha ndi khunek nets'ú yoozi, 'ink'ez Yak'usda be' dustl'us lubeshi bughu hoolah, 'i k'ut neba hik'e'anguz. ³ Njan Yak'usda nets'ú hoozi buYe' bugha, 'en Sizi Gri neMoodihti 'int'ah. 'En hubudayi cho David yuts'u haínzut. 'Et huwa dune 'int'ah t'éts'onínzun. ⁴ Yak'usda buye' chah unli. Yak'usda ye ulhtus, 'i be dinadija. 'I gha Ndoni, lubeshi bughu hoolah, 'en néwhunelhtan 'en Sizi Gri neMoodihti 'int'ah. ⁵ 'En ye únzoo bugha whel'a usdli 'ink'ez buba 'ust'en. 'Et huwa khunek unzoo, 'i ndi yun k'ut ts'ianyah dune hubudutésnilh highunek hiyóolhchoot ka, 'ink'ez boozi bugha hik'une'oot'en. ⁶ 'En hubutah nuhwheni chah Sizi Gri budune sahli. ⁷ 'Et huwa Rome whut'en ndi dustl'us nuhts'ó tl'ates'alh. Yak'usda nuhk'entsi' 'ink'ez nuhka na'detni dune hube'ildzun* sahli. Ne'aBá Yak'usda 'ink'ez Sizi Gri neMoodihti ts'un nuhwhuba tenadus-dli, nuhdzi dóoghel 'ink'ez Yak'usda ye únzoo, 'i nohwhulh 'ót'e ka.

Paul ndan huba 'alha 'uhoont'ah, 'en Rome ts'ih hubuts'un nutéya hukwa' ninzun

⁸ 'Udeechoo 'un nuhwhudutésnilh njan 'et 'uhoont'ah, ndi yun k'ut dune ndulhcho nohwhulh 'uhudits'o, Sizi Gri ts'un be 'alha 'uhoont'ah bugha. 'Et huwa nuhwheni nuhwhuga Sizi Gri bugha suYak'usda nuhwhuba chanailya dusni. ⁹ Yak'usda nalh 'un whudusni, suyéghah ndulhcho, 'i be Yak'usda ba ne'ust'en, ndi khunek unzoo, buYe' bugha, be yalhtuk. 'Ink'ez bunah 'un whudúsni, nuhwhuba tenadusdli 'aw 'ustl'e' cha'duzesne. ¹⁰ 'Ink'ez 'ahoolhyez Yak'usda oodulhkut, 'et nduwhútenilh hukwa' ninzun t'eh, 'et sih nuhts'un tóosya. ¹¹ Tube nuhwhuntel'h'ilh hukwa' nuszun Sizi Gri be 'ut'en 'i be nawhuntelhtun ka. 'I bugha ulhtus wahle 'ink'ez 'aw buch'a naoohlúyeh ghaít'ah. ¹² 'Aw nuhwheni zeh ílah, nuhwhuba 'alha 'uhoont'ah, 'ink'ez si chah be 'alha 'uhoont'ah, 'i be 'ilho nús ts'unóot'uk. ¹³ Sulhutsinkah 'et nt'eoonoohzeh hukwa' nuszun, lhat nuhts'u t'ésyalh nuwheni lhadúst'ih 'et whunts'ih 'aw 'oosneh ghait'ah. Nts'e na'a 'uyoon 'udun yun k'ut whuten dahája, 'et ndóhneh, si sgha ts'iyawh Sizi Gri ts'un naoohlúyeh ka. ¹⁴ Njan 'et ndósneh huba' hoont'ah, khunek unzoo, 'i Greek k'eyahulhtuk 'ink'ez 'aw soo dune chah hilah, ndunnah whuwhunih chah k'us chahuhóonih chah, 'en hubodoohl'eh ka. ¹⁵ 'Et huwa nuhwheni Rome whut'en nuhts'u t'ésyalh wheni lhadúst'ah, 'et sih khunek unzoo, 'i bunwhuntélhtun.

Sizi Gri bugha khunek unzoo, 'i Yak'usda ye ulhtus be dune hudujih, 'i 'int'ah

¹⁶ Ndi khunek unzoo Christ bugha, 'aw hukwaya chasdla hoh be yálhtuk. Yak'usda ye ulhtus hoh ndan huba 'alha 'uhoont'ah, 'en hudutejih 'et huwa. Lizwif choo 'ink'ez 'udun yun k'ut whut'en chah. ¹⁷ Ndi khunek unzoo, 'i Yak'usda ye ts'ih'un 'uhoont'ah yunenélhtan, nts'e na'a neba 'alha 'uhoont'ah 'ink'ez 'o 'un chah 'uts'oot'e. 'Et whuz na'a Yak'usda be' dustl'us yuk'e'ánguz ndutni, "Ndunnah ts'ah'un na'huja, 'en be 'alha 'uhoont'ah, 'i be hukhutena."

'Udun yun k'ut whut'en tinta' hunt'en ho' hint'ah

* ^{1:7} Ndán Sizi Gri hik'une'ut'en, 'en ndunnah dune Yak'usda hube'ildzun hinli.

¹⁸ Yak'uz whuts'un Yak'usda ye hunilch'oh 'i yunedunelhútan, ndun-nah Yak'usda hiyénah 'ink'ez tink'us 'uhet'ilh, 'en ndi khunek 'alha 'int'ah t'ehinínzun tink'us 'uhut'en hoh yuk hinilht'uk. ¹⁹ Nts'ena'a Yak'usda dant'ah, 'et newhunélhtan, 'et huwa ts'iyanah t'einínzun 'en 'int'ah. ²⁰ 'Aw 'ilhunuh whunts'i Yak'usda chahes'en, 'et whunts'ih dant'ah t'ehonínzun. Ndi yun 'uyínla k'an 'et whuts'un ndet Yak'usda dát'en huwhunah'l'en. 'Et huwa Yak'usda 'int'ah 'ink'ez ye ulhtus, 'i 'aw bula tah nachahuhóo'al ts'iyanah t'ehonínzun. Njan t'éhonínzun 'et huwa dune 'aw t'éwhunuzúszun hudooni ghaít'ah. ²¹ Yak'usda t'ehinínzun 'et whunts'ih 'aw chahidílhti 'ink'ez 'aw chanailya chahidúsnih. 'Et huwa 'ants'i ilah teh nuni hunuzut 'ink'ez hubudzi yuh tink'us 'uhuninzun. ²² Huwhunih dune na'hundunúdzun 'et whunts'ih 'aw t'ehonínzun hoolah. ²³ Yak'usda 'ilhuz khuna, 'en ye dézti 'et whu-lahudetnik 'ink'ez ndi 'uk'edéltsi 'uhiyulh'en, 'i dune, dut'ai, khunai, 'ink'ez tl'ughus chah, ndi ts'iyawh yaidlah, 'i 'int'ah, 'i huba idézti suli. ²⁴ 'Et huwa Yak'usda hubula detnik hoh hukwa' huninzun k'una'a yinkak húdelhts'i. 'Ut'en dutsun, 'i 'uhulh'en. Lhtah hubuyust'e hukwayá hoonli hiye ne'ut'en. ²⁵ Yak'usda ye ts'ah'un 'utni, 'i ndi khunek whuts'it 'i be lhk'enahída'ai. 'Ink'ez ndai Yak'usda 'uyalh'en, 'i hits'utedudlih 'ink'ez hik'une'ut'en. 'Et whunts'ih Yak'usda 'en ts'iyaintsuk 'uyalh'en 'ink'ez 'en zeh 'ilulhuz wheni dóoti huba' hoont'ah. Ndoh honeh. ²⁶ Yak'usda huba 'ants'i yúzdli 'et huwa Yak'usda hubula detnik hukwa' huninzun k'una'a yinkak hudóolts'i ka. Lhat whudut-sun 'uwhuhulh'en. Dune ts'ekoo bulh Yak'usda nuwheni 'obinla, 'et whu-lahudetnik 'ink'ez bulunah ts'ekoo dudulh ts'ekoo 'en 'uhulh'en. ²⁷ Bulunah dune chah whuz na'a zeh 'uhut'en. Dune ts'ekoo bulh 'et wheni Yak'usda 'obinla, 'et whulahudetnik. Hudézk'un k'una'a dudulh dune buka' hun-inzun 'ink'ez hukwaya hoonli teh hubulh ne'ut'en. 'Et ndahút'en 'et huwa hubuyust'e dada zeh dubih, 'et bugha whúlt'suk. ²⁸ 'Ink'ez 'aw hoontsolyaz hoh Yak'usda bugha nuní hunoozut hukwa cha'hunízun. 'Et huwa Yak'usda hubula detnik. Hubeni ntsi' súli. Nts'oh né'ut'en, 'aw 'et ndoohóot'en huba cha'hít'ah. ²⁹ Ahoolhyez 'aw ts'ah'un na'a nucha'hust'en. Lubeshi hukwaya hoonli 'i 'uhiyulh'en, 'uyoon yit'i ka' huninzun, 'uyoon hundéldhdaih, 'uhol-nih, dune hughan, lhéhudulh, huwhuts'it, huwhúske, 'ink'ez dudulh dune ts'iyawh lhghu yuhaltuk chah, ³⁰ dudulh dune ch'a yáhulhtuk, Yak'usda hits'u dutnik, dune ba dzuh úhutni, 'uhududelhúti, duba na'hudzoo, 'ahoolhyez tink'us 'úhoot'en huninzun, 'ink'ez 'aw dudusnekah hubuk'únucha'hust'en chah, ³¹ 'aw hubeni hoolah, 'aw hubughunek chahuyóotun, 'aw hubulh dune hubuk'echahitsi', 'aw sulh dunekah nahoolhtsilh ghaít'ah, 'ink'ez 'aw técha'hunízun. ³² 'En dune 'et nduhut'en dahútetsah ho' hoont'ah. Njan t'ehonínzun 'et whunts'ih, whuz na'a zeh 'uhet'ilh. 'Et ndunnah dune nduhut'en t'eh huba hóont'i, 'et huwa Yak'usda ts'ah'un na'a huba nahuteyeh.

2

Yak'usda ts'ah'un na'a dune ba nahuteyeh

¹ Et nyun ndi dustl'us k'eyailhtuk hoh soo cho dints'o ih? K'us ndan nuhtah dudulh dune ghu yalhtuk tink'us 'uhut'en hubugha, 'et dich'oh chah 'alha tink'us 'ut'en. 'Et dich'oh chah khúyanaltuk hoh 'utni. Dich'oh chah whuz na'a zeh ne'ut'en. ² Whunulh'en, t'ets'onínzun, Yak'usda dune tink'us na'a 'uhut'en t'eh, ts'ah'un na'a huba nahuteyeh ho' hoont'ah. ³ Nyun chah tink'us na'a 'int'en t'eh, 'ink'ez nyulh dune ba nahinyeh t'eh, 'et Yak'usda whuz na'a mba nachahutesyeh ninzun ih? ⁴ 'Ink'ez Yak'usda lhe'whuldzuñ nts'un únzoo 'ink'ez 'aw nyulh chahunlhúch'e. 'Et 'ants'i ih mba' hoont'ah? 'Awhuz ih t'ewhunuzínzun Yak'usda nts'un únzoo, nyeni nahaduno'ah ka huba'

hoont'ah? ⁵ 'Et whunts'ih 'aw ndzi náchaduní'al. 'Et zeh 'iltsi'. 'Et huwa ndet dzin Yak'usda ye hunilch'oh dune hubunalhts'et hawhélts'ut suli t'eh, 'et sih ts'ah'un na'a dune ba nahuteyeh, ⁶ 'et hoh 'ilho ahli hoh nuhwhe'ut'en bugha Yak'usda nuhwhuba 'uk'elha whutelhtsilh. ⁷ Bulunah 'aw whechahítsaz hoh ts'ah'un na'a 'uhut'en. 'Et nduhút'en hubugha Yak'usda budóolhti, hincha uboolhtsilh, 'ink'ez 'ahoolhyez dachahútesa 'et hits'u húkwa' ninzun. 'Et nduhint'un dune Yak'usda 'ilhuz wheni hiye khutenalh bugha óote'ahlh. ⁸ 'Et whunts'i bulunah dune k'úwhulh'ai, dich'oh zeh duk'ah ts'ih ne'hutet'en hukwa' huninzun. 'Ink'ez khunek 'alha 'int'ah, 'i k'unucha'hust'en, tink'us zeh 'uhet'ilh. Ndunnah dune Yak'usda tube whúske hoh huba nahuteyeh. ⁹ 'En wheoonujut hoh dzuh nahutedoh. K'us ndan dune tink'us zeh 'uhut'en, Lizwif choo 'ink'ez 'udun yun k'ut whut'en chah. ¹⁰ 'Et whunts'ih Lizwif choo 'ink'ez 'udun yun k'ut whut'en chah, ndan hubutah ts'ah'un 'uhet'ilh, 'en Yak'usda hubudutélhti, hincha hubutelhtsilh, 'ink'ez hubudzi dutéghel. ¹¹ Yak'usda ndi yun k'ut dune ts'iyanah 'ilho lhulhúgha nenílh'en 'et huwa. ¹² 'Et ndunnah Moses be' dustl'us t'ehinízun, lubeshi 'uhulh'en t'eh, ndi dustl'us bu'et 'ilhuz wheni dzuh nuhatedoh. 'Ink'ez ndan Moses be' dustl'us t'ehinízun, lubeshi 'uhulh'en t'eh, 'uk'une'úsduguz, 'i bugha huba nahutedeh. ¹³ Njan whunulh'en, ndunnah Moses be' dustl'us 'ants'i 'et yoozélhts'ai, 'aw Yak'usda ba ts'ah'un cha'hít'ah. 'Et whunts'ih ndunnah Moses be' dustl'us hik'úne' 'ust'en, 'en tinta' hunt'en Yak'usda huba hoolah whutelhtsilh. ¹⁴ 'Udun yun k'ut whut'en Moses be' dustl'us 'aw chahiyust'ih, 'et whunts'ih yinkak húdelhts'i huwa ndi dustl'us hik'úne' 'ust'en t'eh, 'ants'i t'ehinízun huba li'hoont'ah. ¹⁵ 'En Moses be' dustl'us k'una'a hik'úne' 'ust'en t'eh, 'ants'i hubudzi k'ut 'uk'ununa'úsduguz huba li'hoont'ah. 'Et neyuh ts'ih bugha t'ets'oninzun* 'i bugha dahínt'ah, 'et whuz na'a nts'e na'a dahút'en t'ehonízun, whulahtah tink'us na'a 'ohoont'ah, k'us ts'ah'un na'a 'ohoont'ah, 'et dudu'iz yuh ts'ih t'ehonízun. ¹⁶ Ndet dzin Yak'usda dune ba nahuteyeh, nts'oh whu'iz hoh ne'hust'en, 'et Sizi Gri huba nahuteyeh. 'Et ndi sughunek unzoo, 'i dune be hodulh'eh 'et whuz un'a ndutni.

Lizwif 'en 'udun yun k'ut whut'en chah, 'aw Yak'usda bughunek hik'únucha'it'il

¹⁷ Lizwif inli 'ink'ez ndi k'eyailhtuk t'eh, nyun Moses be' dustl'us but'anínintan, 'et Yak'usda ts'un ténadusdli dini 'et hoh duba nainzoo. ¹⁸ Nyun Yak'usda ndet nts'u hukwa' ninzun t'ewhunízun. Moses be' dustl'us hubugha whenyunelhtan 'et tink'us 'ohoont'ah 'ink'ez ts'ah'un na'a 'ohoont'ah t'ewhunízun. ¹⁹ 'Ink'ez 'udun yun k'ut whut'en hodilh'eh ndun-inzun, 'et huwa dune chawhes'en ndult'ah bula óontun ninzun, 'ink'ez dune tsahólgus yuh hudélhts'i li'int'ah, 'en huba be whét'en huba usdli ninzun. ²⁰ 'Ink'ez 'udun yun k'ut whut'en 'uskehiaz whusnik li'hint'ah hubunízun, 'et whuz na'a whebudolh'eh ninzun. Moses be' dustl'us int'i, 'et huwa 'i bugha ts'iyawh t'eoónízun na'dunízun. Ndai tink'us na'a 'ink'ez ts'ah'un na'a 'int'ah t'eoónízun na'dunízun. ²¹ Ts'iyanah hodulh'eh dini. Di ka nyunch'oh nacha'dunuziltun? Lhe'díni, 'uyoon dune ubudíni, "Udunooh'tih gunih!" Nyun chah tulih 'undunint'ih? ²² 'Uyoon chah ndúbudini, "Ts'ekoo k'us dune bulh tinta' ooht'en gunih!" Nyun chah tulih 'et ndint'en? "Uk'edélti ts'u dusnik," dini, 'et whunts'ih 'uk'edélti ts'un ténahududli ts'ih, 'alha ih 'aw hubuluglez hoonliyaz chazílhchoot bé' tant'ilh wheni? ²³ Dune dini Moses be' dustl'us dalzoo, 'et whunts'ih bughunek k'inyis t'eh, Yak'usda 'aw chadílhti ho' 'int'en. 'Aw ih hubugha nuní chanuzinzut? ²⁴ Nuhwheni nuhwhugha

* ^{2:15} Ndi khunek "Neyuh ts'ih huwa t'ets'oninzun", 'i hoonli ts'ih'un na'a k'us tink'us 'ohoont'ah, 'i gha t'ets'oninzun, ts'utni ho' ts'utni.

'udun yun k'ut whut'en Yak'usda ch'a yahalhtuk. Soo whuz na'a Yak'usda be' dustl'us 'utni hukw'u na'a cha'whust'en.

'Et buka dune inli, 'i k'ut nyuhúzt'us t'eh, 'aw nla' whudoneh ghat'ah

²⁵ 'Et hukwa buka dune inli, 'i k'ut nyuhúzt'us t'eh, 'et hoh nyehódet'en Lizwif 'unint'ah.[†] 'Ink'ez Moses be' dustl'us buk'úne' zint'en t'eh, nyuhúzt'us mba hóonzoo. 'Et whunts'ih Moses be' dustl'us 'aw buk'únucha'zint'en t'eh, njan nyuhúzt'us 'aw hoonli chahóolah. ²⁶ Njan whunulh'en 'udun yun k'ut whut'en ndet Moses be' dustl'us buts'u húkwa' ninzun tuné' hut'en t'eh, 'et 'ants'i hubuhúzt'us li'hoont'ah, 'et nduchabahilil whunts'i. ²⁷ 'Et 'udun yun k'ut whut'en ndet Yak'usda buts'u húkwa' ninzun tuné' hut'en t'eh, ndi tuné' hut'en, 'i gha nuhwhuba nahutedeh. Nuhwheni Lizwif, hubuhánt'az 'et whunts'ih Moses be' dustl'us k'unahyuz 'et huwa lubeshi 'ulh'en ahli. ²⁸ Ndunnah Lizwif hinli 'ink'ez hubuhúzt'us Moses be' dustl'us k'una'a t'eh, 'et nduhúja whunts'i, 'aw ts'ah'un Yak'usda budune chahílah. ²⁹ 'Et whunts'ih ndunnah ndet Moses be' dustl'us hubuts'u húkwa' ninzun hoh túne' hust'en t'eh, 'aw 'en zeh soo Yak'usda budune hinli. 'En soo Lizwif 'uhint'ah. Ndoni bugha 'ants'i Moses be' dustl'us buk'una'a hubudzi k'ut hiyúzt'us be hóodet'en, 'aw Moses be' dustl'us k'una'a ílah. 'En Yak'usda hubudutélhti, 'aw dune ilah.

3

¹ 'Et dahoont'ah huwa Lizwif whut'en hinli 'et huwa 'o nus huba hoonzoo? 'Ink'ez dahoont'ah huwa huba húzt'us 'et hubugha 'udun yun k'ut whut'en hubugha ndoh 'uhint'ah? ² Lhat hoh huba hoonzoo. Yak'usda bughunek hubutl'a ída'ai, 'i be ts'iyannah wheoobuhodolh'eh ka. ³ 'Alha 'uhoont'ah, bulunah Lizwif Yak'usda bughunek 'aw hik'únucha'it'il. 'Et ndunt'ah bugha Yak'usda 'onghoh Lizwif hubula dutetnih ninzun ih? ⁴ 'Aw nts'e na'a? 'Uhót'e hoolah ho' hoont'ah! Dune ts'iyannah whuhuts'it 'et whunts'ih Yak'usda 'aw chawhusts'it ho' 'int'ah. 'Et whuz na'a 'uk'e'ánguz hoh ndutni, "Nghunek bugha 'uyoon dune 'alha' dini t'ehontézin.

'Uyoon nyenah 'uhutni t'eh, hubuch'a' talhdoh." ni.

⁵ Nuwheni Lizwif tink'us 'úts'ut'en t'eh, 'et 'uyoon dune 'aw huwa cháhoolnah hoh t'ehonínzun Yak'usda ts'ah'un 'int'ah. Tink'us 'úts'ut'en huwa Yak'usda neba nahuteyeh t'eh, ts'ah'un cha'ust'en ninzun ih? 'Ants'i hoh dune k'una'a 'udusni. ⁶ Yak'usda nuwheni Lizwif ts'ah'un na'a neba nachahuzye t'eh, nts'e na'a simba ndi yun k'ut dune ts'ah'un na'a huba nahooyeh? Nts'e na'a? 'Uhót'e hoolah ho' hoont'ah! ⁷ Lhe'hutni, si whusts'it huwa Yak'usda bughunek 'alha 'int'ah, 'i 'o nus dézti suli 'ink'ez 'uyoon 'aw Yak'usda chawhusts'it 'et t'ehontézin t'eh, 'et di ka sudutéhnih si lubeshi 'ulh'en 'ust'ah? ⁸ 'Et whunts'ih bulunah dune, nech'a yáhalhtuk hoh hutni, "Tink'us 'úhoot'en buts'útni Yak'usda dézti t'ehonoozeh ka," 'et hoh nech'a yáhalhtuk. 'Et 'alha 'uhoont'ah njan huhonts'it 'et hukw'elha Yak'usda huba nahuteyeh, hubulh dawhútenih ts'ah'un 'uhoont'ah.

Ndi yun k'ut dune ts'iyannah lhubeshi 'uhalh'en

⁹ Nuwheni Lizwif 'udun yun k'ut whut'en huba nus sóo' ts'inzoo ninzun ih? 'Aw whuz na'a cha'hóot'ah! 'Uda whenyunelhtan nahúlt'ah Lizwif 'ink'ez 'udun yun k'ut whut'en lubeshi 'ulh'en 'uhint'ah. 'Et huwa Yak'usda huba nahuteyeh. ¹⁰ 'Et whuz na'a 'uk'une'úsduguz 'et ndutni, "Aw ndi yun k'ut 'ilhunuh dune ts'ah'un na'a 'int'ah hoolah.

¹¹ 'Aw 'ilhunuh dune Yak'usda yuts'u húkwa' ninzun hoolah. 'Ink'ez 'aw 'ilhunuh dune hukwa ts'i chahoolih.

† ^{2:25} Ts'iyannah t'ehoninzun, Lizwif 'en Yak'usda 'utahaoobanla budune hoole ka. 4:11 'et cha hukw'e yahalhtuk.

¹² Ts'iyanah Yak'usda ch'a nahulhúya.

Ts'iyanah hintsi' súli.

'Aw 'ilhunuh dune unzoo hoolah.

¹³ Bughunek untsi'. Dune dazsai be yust'e ílhjut zeh buzahooltsun li'hint'ah,
hubughunek 'i be dune nabuna'a.

Huwhuts'it zeh 'uwhuhulh'en.

Khunek hiye yálhtuk, 'i 'ants'i tl'ughus poison ndunt'ah.

Whuz na'a hubughunek be dune hundulhda.

¹⁴ 'Ahoolhyez hubuzek hoontsi' 'ink'ez hubuk'eheyih.

¹⁵ 'Ahoolhyez dune hughan, 'et zeh huba hilh'i.

¹⁶ Nts'oh nuhúdeh teh, ts'iyantsuk tinta' hulh'ih, 'ink'ez dune dzuh
nuhulhdeh.

¹⁷ Nts'e na'a lhts'un soo' ts'oot'e, 'aw t'ehonízun.

¹⁸ 'Aw Yak'usda hiyé chaniljut cha' hint'ah," ni hoh 'utni.

¹⁹ 'Alha t'ets'onízun ndan Moses be' dustl'us hik'úne' 'uhut'en, dustl'us daja
ni, ts'iyawh hik'úne' oot'en huba' hoont'ah. 'Et huwa ts'iyanah Yak'usda
hibut nihuníndel t'eh, lubeshi 'uhulh'en t'éhonízun, 'et huwa 'aw hoonliyaz
'uhidooni ghaít'ah. ²⁰ Ndunnah Moses be' dustl'us k'úne' 'uhut'en 'aw 'et huwa
lubeshi 'uhulh'en huba hoolah hoolhtsilh ghaít'ah. Njan Moses be' dustl'us 'i
bugha lubeshi 'uhulh'en 'uhint'ah t'ehonízun 'et huwa.

*Sizi Gri neba 'alha 'int'ah t'eh, tinta' ts'unt'en Yak'usda neba hoolah whutel-
htsilh*

²¹ K'an 'et Moses be' dustl'us bu'et Yak'usda nalh ts'ah'un 'uhutet'ilh, ye
ts'ah'un be' hoont'ah 'et ts'iyanah wheóobunelhtan. Moses be' dustl'us, 'ink'ez
Yak'usda be nus whunilh'en hubube' dustl'us chah whuz na'a 'uwhuténilh
hutni. ²² Soo 'o 'un zeh, Yak'usda ye ts'ah'un be' hoont'ah, 'et 'i be ts'iyanah
hububa 'ink'ez ts'iyanah hububulh, ndunnah Sizi Gri huba 'álha 'int'ah, 'aw
'en zeh ts'ah'un na'huja hinli nahúsqli. Yak'usda ndi yun k'ut dune ts'iyawh
lhulhúga úbunilh'en 'et huwa. ²³ 'Et nuwheni ts'iyawh lubeshi 'uts'alh'en. 'Et
huwa Yak'usda ye dézti, 'i dant'ah, 'et nduts'óot'e ghaít'ah. ²⁴ 'Et whunts'ih
Christ, 'en Sizi ts'utni, 'en bugha nelubeshi ch'a nenaonket. 'Et huwa
Yak'usda ye unzoo, 'i be tinta' ts'unt'en, 'i neba hoolah neba nawhulhtsi. 'Et
nuwhuba hukw'elha chats'uholhtsil hoh neghaóni'ai. ²⁵ Yak'usda buYe'
'en ndi yun k'ut whut'en yúbunelhtan Yak'usda soo cho hubuts'u naitoot'en
ka. 'Et Sizi Gri buzkai bugha neba 'alha 'uhoont'ah 'et hoh Yak'usda dulu
dunekah nenasulhtsi. 'Et whuz na'a dich'oh ye ts'ah'un be' hoont'ah, 'et
whunenulhtan. 'Uda dune lubeshi 'uhulh'en hoh Yak'usda 'ants'i ubunízun,
k'at lih t'eh zeh huba nahuteyeh. ²⁶ 'Et k'an 'et ndi ye ts'ah'un be' hoont'ah 'i be
dunabunelhútan, ndan Sizi yuba 'alha 'int'ah, Yak'usda ts'ah'un na'a 'int'ah
hoh 'en tinta' hunt'en 'et huba hoolah whulhtsi. ²⁷ 'Aw ih hoonliyaz 'ónt'e
bulh bughu yats'oolhtuk, 'i hoolah? Soo hoolah! Ndet dáhoont'ah simba?
'Ut'en bugha tulih? 'Awundooh! 'Et Sizi Gri neba 'alha 'int'ah, 'i bugha.
²⁸ Njan whuts'odul'eh, ndunnah Yak'usda huba 'alha 'int'ah, 'en tinta' hut'ih
huba hoolah whulhtsi. 'Aw 'o 'un Moses be' dustl'us hik'únucha'oost'en huba'
hoont'ah. ²⁹ Daja nuhzun? Yak'usda Lizwif zeh hubuYak'usda unli, k'us
'udun yun k'ut whut'en, 'en chah tulih hubuYak'usda unli nuhzun ih? 'Alha
'udun yun k'ut whut'en, 'en chah hubuYak'usda unli. ³⁰ Yak'usda 'ilhunuh zeh
unli. 'Et huwa Lizwif 'ink'ez 'udun yun k'ut whut'en huba 'alha 'uhoont'ah
t'eh, 'et t'eh tinta' hunt'en huba hoolah whutelhtsilh. ³¹ 'Et whu la gha ts'ih,
nuwheni Yak'usda buba 'alha' ts'int'ah ts'ah'un na'a na'ts'uja, 'et nduts'ínt'ah
t'eh, Moses be' dustl'us bunats'odutelnah nuhzun ih? 'Awundooh! 'Awhuz
'et dez'ai. 'I chah Yak'usda bughunek 'int'ah.

4

Abraham Yak'usda buba 'alha 'int'ah 'et hubulubeshi buba hoolah nasdli

¹ Nuwheni Lizwif ndun netsuhda Abraham, 'en bughu dája uzninzun? Niz t'eh yinkak inda huwa ndet simba nahoo'ai? ² Abraham be 'ut'en gha Yak'usda tinta' 'ant'en yuba hoolah whulhtsi. 'Et 'alha 'ohoont'ah t'eh, Abraham whé' oot'e da, 'et whunts'ih 'aw Yak'usda nalh ílah. ³ Yak'usda bughunek 'uk'e'é duguz bunalhúnih ih? "Abraham Yak'usda buba 'alha 'int'ah 'et huwa ts'ah'un dune unli yúlhni." ⁴ Ndán dune be 'ut'en gha 'i ba 'uk'elha hóle huba' hoont'ah. 'Et whunts'ih 'aw ye únzoo 'i bugha ilah 'uk'elha whulhtsi. ⁵ 'Et whunts'ih dune Yak'usda dája ni buba 'alha 'ohoont'ah t'eh, 'et tínta' ut'ih, Yak'usda yuba hoolah whutelhtsilh 'ink'ez iduténih ts'ah'un dune inli. Whuz na'a yuba' whutelilh 'aw hoonliyaz yuba cha'lil 'et whunts'ih.

⁶ Hubudayi cho David 'en chah 'et huwu yalhtuk, ndan dune 'aw 'ut'en cha'yilh'il whunts'i Yak'usda ndo búlhni, "Nyun ts'ah'un dune 'unint'ah," 'et 'alha degha nus hoonzoo bughá whults'ut ho' 'int'ah. ⁷ Njan 'et dutni, "Ndán tink'us 'uhét'en hubulubeshi buba 'ún yutelhdel

'ink'ez hubulubeshi 'aw chast'en suli lí'uja t'eh,
'en degha nus hoonzoo hubugha whults'ut.

⁸ Ndán dune Yak'usda 'aw lubeshi 'ulh'en yuk'echoootes'al,
'en dune degha nus hoonzoo hubugha whults'ut ho' 'int'ah."

⁹ 'Et daja nahzun? 'Et dune buhúzt'us hoh be hóodet'en, 'en zeh tulih Yak'usda bugha 'ukenus hoonzoo hubugha whults'ut? K'us ndunnah chahídt'us, 'en chah tulih Yak'usda bugha degha nus hoonzoo hubugha whults'ut? Njan 'et nduts'útni, Abraham Yak'usda daja ni buba 'alha 'ohoont'ah 'et huwa ts'ah'un dune unli yúlhni. ¹⁰ Nkeda Yak'usda yudáni ts'ah'un dune unli? Hitet'us whutsuh tulih k'us hukw'elh'az tulih? Hitet'us whutsuh 'et be hóodet'en 'aw hukw'elh'az ilah. ¹¹ Abraham Yak'usda daja yudáni 'et buba 'alha 'ohoont'ah, 'et huwa Yak'usda 'utni, ts'ah'un dune yulhni. Yak'usda yudáni hitet'us whutsuh da. Hukw'elh'az hiyúzt'us 'et hoh be hóodet'en be 'alha 'ohoont'ah 'i be ts'ah'un dune 'int'ah. 'Et huwa ndan Yak'usda daja ni buba 'alha 'ohoont'ah, 'aw buba cha'hít'us hoh bube hóodet'en whunts'i, 'en Abraham butsuh whudélhdzulh ínle. 'En chah Yak'usda ubúlhni, ts'ah'un 'uhint'ah. ¹² 'Ink'ez bulunah Lizwif, 'en chah Abraham hubutsuh whudélhdzulh unli. Lizwif ts'iyawh hubuhúzt'us hoh hube hóodet'en. 'Et whunts'ih ndan Lizwif Abraham k'una'a yuka dune unli hik'ut hiyúzt'us whutsuh da Yak'usda bughunek buba 'alha 'int'ah, 'aw 'en zeh Abraham hubutsuh whudélhdzulh unli.

Be 'alha 'ohoont'ah, 'i bugha zeh ndi Yak'usda nets'ú hoozi nets'ó telts'ulh

¹³ Abraham 'ink'ez ye k'édinde 'en ndi Yak'usda buts'ú yoozi, 'i bugha ndi yun bube'ildzun whutele, 'aw Moses be' dustl'us bugha ílah hoh butl'a ída'ai, 'et k'us be 'alha 'ohoont'ah bugha ts'ah'un dune suli, 'et huwa ndi buts'ú yoozi, 'i butl'a ída'ai. ¹⁴ Njan whunulh'en ndunnah Moses be' dustl'us hik'une' hút'en 'aw 'et huwa ilah ndi yun bube'ildzun whutele. 'Et whuz na'a nduwhútenih t'eh, 'et t'eh Yak'usda yuts'ú hoozi hoolah nawhutéde, 'ink'ez Yak'usda bughunek neba 'álha 'ohoont'ah 'ants'i 'et 'uwhtuté'ih. ¹⁵ Ndi Moses be' dustl'us 'i be dune bulubeshi hubugha huba nahutedeh. 'Et whunts'ih dune Moses be' dustl'us chahiyít'i t'eh, 'aw huba nahodeh ghaít'ah. ¹⁶ 'Et huwa ndi buts'u yoozi, be 'alha 'ohoont'ah, 'i be dune yitélhcholh. 'Et hoh ndet Yak'usda dune ts'uhóozi ts'iyannah Abraham yuk'édinde, en hubube'ildzun whutele. Ndunnah Lizwif Yak'usda bughunek huba 'alha 'int'ah, 'aw 'en zeh ílah, ts'iyannah Abraham k'una'a Yak'usda bughunek hiyílhchoot t'eh,

'alha ts'iyanah netsuh whudéldzulh unli wule. ¹⁷ Yak'usda bughunek 'uk'e'eduguz, 'i Yak'usda Abraham ndúyúlhni, "Dune lhelhts'un hudédowh butsuh whudéldzulh nyuzílksi." 'Et huwa Yak'usda Abraham lhelhts'un hudédowh butsuh whudéldzulh unli. Yak'usda yuts'ú hoozi 'aw cha'whúsne, 'et whunts'ih ts'ah'un na'a 'uhooja k'una'a huba 'álha 'ohoont'ah. Ndi Yak'usda 'en 'int'ah, 'en bugha yahadla chah hukhuna, 'ink'ez ndai 'uyínla, 'i hoolah be 'uyínla. ¹⁸ Yak'usda yuts'ú hoozi lhanah hudedowh butsuh whudéldzulh tele. 'Uhóneh ghaít'ah li'hoont'ah, 'et whunts'ih huba 'alha 'ohoont'ah 'et nduwhútenilh. 'Et huwa Yak'usda ndi yúlhni, "Nts'uhainde hutelai." 'Et hoh bulh nduahooja. ¹⁹ Tube duneti súli, nts'e na'a simba buzkeh hole? 'Ankw'us 100 naooduzuk be suli. Bu'at Sarah 'en chah 'et ndunt'ah, buzkeh whutéle 'o 'un hóonyin. 'Et whunts'ih, njan 'aw soo cho howu ni chaílah, Yak'usda daja yudáni, 'et tube cho buba 'alha 'ohoont'ah 'et huwa. ²⁰ Yak'usda ndet Abraham yuts'ú hoozi 'aw 'uts'un na'a cha'nízil 'ink'ez 'aw nawh buba cha'hóot'ah. Yak'usda buba 'alha 'int'ah, 'et hoh ulhtus suli, 'ink'ez Yak'usda délhti. ²¹ Tube buba 'alha 'ohoont'ah, t'eoónínzun Yak'usda soo úlhtus hoh ndet yuts'ú hoozi 'et nduténilh. ²² 'Et huwa Yak'usda 'utni, "Ts'ah'un dune inli." ²³ Yak'usda bughunek 'uk'e'edúguz, 'i Yak'usda ndun Abraham ndí yulhni, "Ts'ah'un dune inli." Ndi 'aw Abraham zeh ilah buba 'uk'e'edúguz, ²⁴ Nuwheni chah neba 'int'ah. Yak'usda Sizi Gri neMoodihti dazsai hoh dinaidilhti 'et neba 'alha 'ohoont'ah t'eh, 'et t'eh Yak'usda neduténilh, "Ts'ah'un dune ts'inli." ²⁵ Tink'us 'úts'ut'en huwa Yak'usda Sizi Gri hubutl'a yálhti. 'Ink'ez dazsai hoh dinaidilhti. 'Et huwa Yak'usda nelubeshi neba hoolah whulhtsi.

5

Dune ne'huzúla 'et whunts'i Ndoni neyudinda 'et huwa 'aw whechats'ítsaz

¹ Yak'usda daja nedáni 'et neba 'alha 'ohoont'ah. 'Et hoh tinta' ts'ut'ih Yak'usda neba hoolah whulhtsi. 'Et whula gha ts'ih Sizi Gri neMoodihti 'en bugha Yak'usda ts'un nedzi dezghel. ² Sizi Gri neba 'alha 'int'ah, 'et huwa Yak'usda ye únzoo, 'i ne'ilhdzun unli ho 'int'ah, 'ink'ez 'i be 'ilhuz wheni 'et níznindel. 'Et ts'uhóont'i hoh huba ts'ilh'i ndet whusawhútelts'ulh Yak'usda ye dézti 'i be ts'owhuntehnik. ³ 'Ink'ez 'aw 'et zeh ilah, 'et huwa dune ne'huzúla whunts'i, ts'uhóont'i, t'ets'oninzun dune ne'husúla 'i gha whechats'ítsaz. ⁴ 'Et huwa ts'iyanah t'ehonózin ba soo' ts'uja dune ts'inli. 'Ink'ez 'i gha huba ts'ilh'i ndet whusawhútelts'ulh. ⁵ 'Ink'ez Yak'usda Ndoni nets'ó tl'aidá'ai 'ink'ez neyudande. 'En bugha Yak'usda dahóolcho 'i be nek'entsi' t'ets'onínzun. 'Et huwa 'et dzin whusawhútelts'ulh 'aw buk'elh'i ts'unodelh ghat'ah hoh huba ts'ilh'i. ⁶ Njan whunulh'en, whutsuh da 'aw be ts'ílhtus, 'i chats'ít'i inle, Yak'usda ts'ah'un na'a buba yinkak uzdutélts'ilh huba. 'Et whunts'ih ndet dzin Yak'usda 'udun néwhuni'ai, 'et dzin Christ ts'iyanah lubeshi 'uhulh'en huba dazsai. ⁷ Howu nuní nuhzut, 'aw dune ts'ah'un 'int'ah ba daóotsah hukwa' huninzun hoolah. Nuhtah 'ilhunuh tulih budzi ulhtus hóonli chah 'int'ah, 'en dune unzoo ba datétsah huba. ⁸ 'Et whunts'ih nuwheni 'awhuz lubeshi 'uts'ulh'en hoh Christ neba dazsai. 'Et hoh Yak'usda néwhunelhtan dahóolcho, 'i be nek'entsi'. ⁹ 'Aw 'et zeh ílah, Sizi Gri buzkai 'i bugha ts'ah'un na'ts'uja. 'Et huwa Sizi Gri 'en bugha Yak'usda ye húnich'oh, 'i ch'a uzdutejih. ¹⁰ Njan whunulh'en, 'awhuz Yak'usda buch'a úzdetni hoh buYe' neba dazsai, 'i bugha Yak'usda ts'un dune nelh soo ninawhunt'ai. 'Et 'o 'un degha nus cha' hoont'ah, Sizi ye khúna, 'i be uzdutejih 'et huwa. ¹¹ 'Aw 'et zeh ílah, Sizi Gri neMoodihti 'en bugha Yak'usda bulh ts'uhóont'i, 'aw 'et Yak'usda ts'un dune nelh soo ninawhunt'ai 'et huwa.

Adam 'en bugha lubeshi 'uts'ulh'en, 'et whunts'i Sizi Gri 'en bugha Yak'usda nelubeshi neba hoolah yulhtsi

¹² Huwú nuní nuhzut, 'ilhunuh dune lubeshi 'ínlá, 'en bugha ts'iyanah ndi yun k'ut lubeshi 'uhulh'en huzdli. Lubeshi bugha yaztádlah. Ts'iyawh lubeshi 'uts'inla, 'et huwa ts'iyawh yats'adlah. ¹³ Yak'usda Moses bughunek yutl'aídai. 'Et whuts'un dune lubeshi 'uhulh'en. Dune Moses be' dustl'us 'aw chahiyít'ih, 'et huwa hubulubeshi ba nahutedeh k'at lih huba 'et ni-whuni'ai. ¹⁴ 'Et whunts'ih Adam yinkak inda da hukw'elh'az Moses yinkak ninínya 'et nduhóolhez hoh, dune lubeshi 'uhulh'en, 'et huwa yahadlah. Adam Yak'usda bughunek t'einínzun, 'et whunts'ih k'einínyuz, 'et lubeshi 'ínlá. 'Et huwa ts'iyanah lubeshi 'uhulh'en huzdli. Ndunnah dune 'aw Adam k'una'a lubeshi cha'hílil, 'en whunts'ih lubeshi 'uhulh'en hinli inle 'et huwa yahadlah. Ndunnah whusatéyah, 'en Adam ndunt'ah. ¹⁵ 'Et huwa ndi hukw'elha chats'uholhtsil negha íni'ai, 'i 'aw 'ilhunuh dune 'en bula gha ts'ih 'uts'úja whundúchats'ilt'ah. 'Ilhunuh dune 'en lubeshi 'ínlá 'et huwa ts'iyanah yahadlah. 'Et whunts'ih Yak'usda ye únzoo, 'i bugha nelubeshi yunaoodelhúnah. 'Et huwa Yak'usda ye únzoo, ndun 'ilhunuh dune, Sizi Gri, 'en bugha ndi huba hukw'elha chats'uholhtsil, 'i degha nus hoonzoo hoh lhanah hubugha inínkat. ¹⁶ 'Et ndun 'ilhunuh dune 'en lubeshi 'ínlá hoh dáhooja whunulh'en. Yak'usda ndi hukw'elha chats'uholhtsil negha íni'ai, 'i 'aw 'et whundúchait'ah. Ndez na'a njan nduhoont'ah, ndi 'ilho lubeshi 'ulya 'i bugha Yak'usda ye náhuteyeh 'ulya, 'i ts'iyanah dune dahútetsah. 'Et whunts'i lubeshi lhai 'uts'inla whunts'i, Yak'usda ndi hukw'elha chats'uholhtsil negha íni'ai, 'i bugha tinta' ts'unt'en neba hoolah whulhtsi. ¹⁷ Njan whunulh'en ndun 'ilhunuh dune, 'en bulubeshi 'i bugha ts'iyanah dune yahádlah suli. 'Ink'ez 'aw highah lhoya ghaít'ah. 'Et whunts'ih Yak'usda ye néts'un unzoo, 'i degha nus unzoo. Ndunnah hiyílhchoot, 'i bugha, ndi 'et huba hukw'elha chats'uholhtsil negha iní'ai, 'et Yak'usda ndunélhni, ts'ah'un dune ts'inli 'ink'ez 'ilhuz wheni khuztena. 'Et ndun 'ilhunuh dune, Sizi Gri, 'en whuz na'a neba 'uhóonla. ¹⁸ 'Et huwa ndun 'ilhunuh dune, 'en lubeshi 'ínlá, 'en bugha ts'iyanah dune yahutédlah huba nahesda. 'Ink'ez ndun 'ilhunuh dune whuz na'a zeh ts'ah'un 'ahoont'ah hoh neba 'uja. 'Et huwa tinta' ts'unt'en Yak'usda neba hoolah whulhtsi, 'ink'ez 'ilhuz wheni khuztenalh ho' hoont'ah. ¹⁹ 'Ilhunuh dune 'en Yak'usda bughunek 'aw yuk'únucha'it'il, 'et huwa 'en bugha' hooja ts'iyanah dune lubeshi 'ulh'en huzdli. 'Et whunts'ih ndun 'ilhunuh dune 'en Yak'usda bughunek yuk'une' 'ust'en huwa lhanah dune ts'ah'un 'uhint'ah tele. ²⁰ 'Et Yak'usda bughunek Moses, 'en chah yutl'aídai, 'et 'on nus whénulhtun hoh dawhunéltsuk hoh Yak'usda bughunek k'úzninyuz. Ndet t'ets'onínzun lubeshi 'ulh'en ntsi' ts'inli nats'uhoo'ah Yak'usda ye néts'un unzoo, 'i 'o nus 'íltus hoh nelubeshi yuch'a' nilhde. ²¹ 'Et hoh da nts'e na'a lubeshi bugha dune ye dátsah 'aw yughah lhoya ghaít'ah. 'Et whunts'ih k'an 'et whuz na'a Yak'usda ye unzoo, 'i dune hiyílhchoot t'eh, 'i bugha 'ilhuz hukhutenalh. NeMoodihti Sizi Gri 'en bugha whuz na'a neba' hónla.

6

Netsudule buch'a náts'oolyeh 'ink'ez Sizi Gri buk'úne' ts'oot'en

¹ Dája simba ts'udooni 'et? Lubeshi 'uts'ulh'en zeh ih uztet'ilh, Yak'usda dalcho, 'i be nets'un unzoo t'ets'ontézin huba? ² Nts'e na'a 'uwhuté'lh? Nets'en'a lubeshi whuch'a dats'úzsai, 'ink'ez doo chah lubeshi uztelh'ilh? 'Aw nduhót'e huba cha'hóot'ah! ³ 'Awhuz ih t'ewhunuzáhzun? Ndunnah Sizi Gri bugha too be' hulya t'eh, 'et sih dune t'ehontézin Sizi Gri budune hinli. 'Et

nduts'úja t'eh 'en bulh dats'úzsai lí'ts'int'ah. ⁴ Ndi too be' ts'ulya 'i bugha Christ bulh dats'úzsai, 'ink'ez hiyulh 'áneyalhti li'ts'int'ah. 'Ink'ez ndet ne'aBá ye úlhtus dézti, 'i be Christ yahadla tah dinaidilhti da, 'et whuz na'a nuwheni chah 'uyoon nats'usdli k'una'a yinkak uzdóolts'i 'et huba' hoont'ah. ⁵ Njan whunulh'en, Sizi Gri hiyulh 'áneyalhti bulh 'ilhunuh nduts'ínt'ah t'eh, 'et whuz na'a dinadíja da bulh 'ilhunuh ts'inli lí'uztet'ilh. ⁶ Njan t'ets'onínzun, 'uda dats'ánt'e inle, 'et Sizi Gri 'en yulh lhdulalhgus k'ut whulh dazsai. 'Et 'uda dats'ánt'e inle 'i bugha lubeshi uztelh'ilh hukwa' uzninzun, 'i neba hoolah whulhtsi. 'Ink'ez 'aw 'o 'un lubeshi 'uztelh'ilh hukwa cha'ts'unteszil. ⁷ Ndan dazsai, 'en bulubeshi buch'a hanálti ho' 'int'ah. ⁸ 'Et huwa nuwheni Christ bulh dats'úzsai t'eh, 'et sih 'en bulh khuztenalh, 'et neba 'alha 'uhoont'ah. ⁹ 'Et t'ets'onínzun, Christ yahadla tah dinadíja 'ink'ez 'aw whulh nat daóotsah ghaít'ah ho' hoont'ah. Ndi be yats'adlah 'i 'aw ye nek'une'ool'en ghaít'ah. ¹⁰ Ndi yuk'edazsai, 'i 'et 'ilhuh zeh ts'iyanah ba dazsai. 'Et whunts'ih k'an 'et khuna 'ink'ez Yak'usda bulh khuna. ¹¹ Nuhwheni chah lubeshi ch'a yáhdla nahzun, 'et whunts'ih Yak'usda, Sizi Gri neMoodihti 'en bulh, khahna hoh 'aht'ah. ¹² 'Et huwa lubeshi nuhdzi yuh hóle gunih, 'ink'ez k'une' nuhool'en! ¹³ 'Aw 'o 'at nuhyust'e tink'us na'a 'utet'ilh wheni butl'á'dudoolhúyeh gunih, 'et nuhyust'e yaidla buch'a 'i khuna k'una'a Yak'usda butl'a'dudulhúye, 'ink'ez nuhyust'e Yak'usda ba ts'ah'un na'a 'ut'en wahle. ¹⁴ Moses bughunek nuhtl'aída'ai, 'i but'anínoohtan gunih. Yak'usda ye únzoo, 'i zeh but'anínoohtan. 'Et t'eh lubeshi nuhmoodih wule ghaít'ah. ¹⁵ Daja nahzun? Niz de da ndi khunek netl'aída'ai, 'i 'aw 'o 'un but'aníznootan huba cha'hóot'ah. 'Et Yak'usda ye únzoo, 'i zeh t'aníznentan t'eh, lubeshi 'uztelih netl'ahó'ai nahzun ih? 'Aw nduhót'e ghaít'ah. ¹⁶ Njan 'aw nt'ewhunuzúhzun? 'Et 'ilhunuh dune tehle ka butl'á'dudelhúya t'eh, ndet hukwa' ninzun hoh nduteht'ilh, 'et t'eh 'en be 'ulhna 'aht'ah. 'Et whuz na'a zeh lubeshi butl'á'dudelhúye t'eh, lubeshi be 'ulhna 'aht'ah, 'ink'ez 'ilhuz wheni kwuncho yuh 'et ts'ih tehduh, 'i nuhwhuba k'elha tele. 'Et whunts'ih Yak'usda butl'á'dudelhúya t'eh, Yak'usda be 'ulhna tehle, 'ink'ez Yak'usda nuhduténilh ts'ah'un 'aht'ah, 'et whuz na'a nuhwhuba k'elha whutéle. ¹⁷ 'Ink'ez sulhutsinkah tube nuhwhuba hoonúst'i 'et huwa Yak'usda, "Chanailya," dusni. Niz de lubeshi be 'ulhna ahli ínle, 'et whunts'ih k'an nuhdzi ndulhcho 'i be ndet whunohoodalh'i hukw'úne' zaht'en. ¹⁸ 'Et k'an lubeshi ch'a dahjih, 'ink'ez ye ts'ah'un be' hoont'ah 'i be 'ulhna sahli. ¹⁹ Ts'iyanah 'ulhna hube 'ut'en k'ah t'ehonínzun, 'et huwa whuz na'a nohwhulh yálhtuk. 'Et huwa daja nuhdutésnilh 'aw nuhwhuba huwa cháhoolnah hoh sudutéht's'o. Niz de nuhyust'e lubeshi be 'ulhna tehle huba butl'a'dudelhúya ínle. 'Ink'ez hoontsi' 'uhoolh'en nus zeh lhé'wheltsi' whulh'i. k'an 'et nuhyust'e ye ts'ah'un be' hoont'ah 'i be 'ulhna tehle 'et butl'aítelhtelh. Whuz na'a ndaht'en t'eh, ts'ah'un uteht'ilh, 'ink'ez Yak'usda ba 'udun nilya tehle ka. ²⁰ Lubeshi be 'ulhna ahli da, 'aw ts'ah'un na'a 'uteht'ilh chanúhzhil ínle. ²¹ 'Et hukwayá hoonli tune' zaht'en ínle. 'Aw cha'aht'il 'ink'ez 'et hukw'elha 'ilhuz wheni kwuncho yuh ts'ih téhdulh ho' hoont'ah. 'Et whuz na'a dune ahli ínle. ²² K'an 'et lubeshi 'ulh'en whuladehtnik, 'ink'ez Yak'usda be 'ulhna sahli. Whuz na'a 'áht'en 'et hukw'elha Yak'usda ba 'udun nilya sahli, 'ink'ez hukw'elh'az 'ilhuz wheni yak'uz téhdulh. ²³ Lubeshi 'uts'alh'en, 'i k'elha daztétsah. 'Et whunts'ih neMoodihti Sizi Gri, 'en bugha Yak'usda 'ilhuz be ts'ukhutena, 'et huba hukw'elha chats'uhoolhtsil hoh negha óoni'ai.

¹ Sulhutsinkah, 'aw ih t'eoonuzúhzun? Yak'usda bughunek Moses yutl'aída'ai, 'i soo ts'ah'un t'enuhzun, 'et huwa' dusni be nuwhulh yalhtuk. Dune khuna húbutah ndai khunek Yak'usda butl'a ída'ai hik'úne' oot'en huba' hóont'ah. ² Njan whunulh'en, ndet ts'eke dune ghusda t'eh, yinkak usda whutah, yulh 'ilhunuh 'ulhih. 'Et buki dazsai teh, 'et 'aw yulh 'ilhunuh chaílah nawhudlih. 'Et whuz na'a Moses be' dustl'us ni ho' 'utni. ³ 'Et buki dazsai t'eh, 'et Moses be' dustl'us bugha ndan ts'eke suh natesja ho' 'int'ah. Hukwa' ninzun t'eh, 'uyoон dune ghu natedalh 'ink'ez 'aw lubeshi buba chahóolah. 'Et whunts'ih buki 'awhuz khuna hoh 'uyoон dune zih usda t'eh, 'et lubeshi 'ulh'en 'ohoont'ah, 'ink'ez 'en lubeshi 'inla. ⁴ Sulhutsinkah ndet whunohodalh'i nuhwheni 'ants'i Christ bulh dasáhtsai lí'aht'ah ínle. 'Et huwa 'aw 'o 'un Moses be' dustl'us but'anínooh tan huba cha'hóot'ah. Christ bulh dats'uzsai, 'et huwa Moses be' dustl'us yuch'a naneninla. K'an 'et ndun dazsai 'ink'ez dinadíja, 'en bulh 'ilhunuh tehleh. 'Ink'ez ndet Yak'usda nuhts'uh hukwa' ninzun, whuz na'a 'uhóhleh huba' hoont'ah. ⁵ Niz de neyust'e lubeshi whuts'u nint'uk hoh Moses be' dustl'us 'i lubeshi yuch'a nenenyoot 'et whunts'ih nedzi hukwa' ninzun k'una'a yinkak uzdelhts'i inle. Neyust'e lubeshi butl'ats'iyalhti li'ts'inla, 'et ndúts'uja huwa kwuncho yuh 'i neba k'elha suli. ⁶ Moses be' dustl'us but'aníznintan ínle. 'I bugha 'ants'i ts'ulhúghel lí'ts'ant'e ínle. 'Et whuch'a dats'uzsai da, 'ink'ez k'an nela oodetnik lí'ts'uja. 'Et huwa Ndoni bugha k'an beni, 'i be 'ulhna ts'inli hoh buk'úne' ts'oot'en huba' hoont'ah, 'aw 'o 'un 'uda Moses be' dustl'us but'aníznootan huba cha'hóot'ah.

Moses be' dustl'us unzoo ih?

⁷ Moses be' dustl'us bughu dája uznoozin simba? Moses be' dustl'us 'i ghá ih lubeshi 'uts'ulh'en? 'Awundooh! 'Aw 'uhót'e ghaít'ah. 'I bugha lubeshi 'ulh'en usdli t'éwhunúszun 'et huwa. Moses be' dustl'us k'eyalhtuk hoh 'utni. "Uyoон yit'i ka' nonzin gunih," 'i bugha nahóo'ai lubeshi 'ulh'en usdli. ⁸ 'Et whutsuh da Moses be' dustl'us bu'et lubeshi 'ulh'en inle 'aw t'eoonuzúszun. 'Et whunts'ih ndi khunek Yak'usda netl'aída'ai, 'i t'enazin hoh, 'et dalcho 'i be suyust'e lubeshi ts'un nínt'uk 'et nahóo'ai. ⁹ 'Et whutsuh da Moses be' dustl'us bu'et kwuncho yuh ts'ih t'ésyalh t'eoonuzúszun. 'Et whunts'ih ndi khunek Yak'usda netl'aída'ai, 'i t'enazin hoh lubeshi 'ulh'en usdli, 'ink'ez kwuncho yuh ts'ih tesyalh 'et nahóo'ai. ¹⁰ 'Ink'ez ndi khunek Yak'usda netl'aída'ai, 'i be 'ilhuz ts'ukhutena newhunélhtan, 'et whunts'ih buk'eyalhtuk huwa kwuncho yuh ts'ih tesyalh nahóo'ai. ¹¹ 'Et ndi khunek Yak'usda netl'aída'ai, 'i t'enázin hoh suyust'e lubeshi ts'un nínt'uk 'i khasúnent'a hoh nanést'a, 'et huwa kwuncho yuh ts'ih tesyalh t'eoonazin. ¹² 'Et huwa 'alha ndi Moses be' dustl'us lubeshi bughu hoolah, 'ink'ez 'uyoo khunek Yak'usda netl'aída'ai, 'i chah lubeshi bughu hoolah. 'Awhunelt'et ye ts'ah'un na'a 'ink'ez unzoo chah ho' 'int'ah. ¹³ Dája ts'un tezilh 'et hubugha? Ndi khunek suba unzoo, 'i bugha kwuncho yuh ts'ih t'ésyalh túlih? 'Aw 'uhót'e ghaít'ah! Ndi khunek Yak'usda netl'aída'ai, 'i nela' oot'en ka negha íninla. 'I bugha lubeshi dáltsi' t'enazin. Sich'oh lubeshi ts'un núst'uk, 'et huwa lubeshi 'ulh'en usdli, 'et nahóo'ai, 'ink'ez 'i bugha kwuncho yuh ts'ih t'ésyalh inle.

Neyust'e 'ahoolhyez lubeshi ts'un nínt'uk, 'et huwa neba huwa whulna 'aw Moses be' dustl'us buk'úne' ts'oot'en ghaít'ah.

¹⁴ Ndoni bugha Moses be' dustl'us neghá yunle, 'et whunts'ih suyust'e lubeshi ts'un nínt'uk, 'ink'ez lubeshi be 'ulhna tesdleh 'et t'eoonuszun. ¹⁵ Njan whunulh'en, suyust'e lubeshi ts'un nínt'uk teh, si suba 'aw chahóozooth ho' hoont'ah. Ndai 'óolh'en hukwa cha'nuzúszun 'i zeh 'ulh'en, 'ink'ez ndai degha nus whuts'u dusnik, hoh zeh ne'ust'en. ¹⁶ 'Et ndet hukwa cha'nuszun 'ust'en

teh, 'et Moses be' dustl'us suba ts'ah'un 'int'ah t'ewhunúszun. ¹⁷ 'Et whunts'ih, 'aw si hukwa' nuszun ílah hoh 'ust'en, ndi lubeshi suyust'e ts'un nínt'uk, 'i bugha 'ust'en. ¹⁸ T'eoonúszun 'aw suyust'e be whuts'u nint'uk 'et chahóozooth ho' hoont'ah. Hoonzoo teh né'test'en hukwa' nuszun 'et whunts'ih 'aw 'oos-neh ghait'ah. ¹⁹ 'Et hoonzoo teh né'test'en hukwa' nuszun t'eh, 'aw 'uhóosdile ghaít'ah. 'Ink'ez hoontsi' 'uwhuteslilh hukwa cha'nuzúszun whunts'i, 'aw huwa chahoolna hoh tuné'test'en. ²⁰ 'Ink'ez hoontsi' teh ne'úst'en t'eh, 'aw hukwa cha'nuzúszun, 'et whunts'ih 'aw si hukwa' nuszun ílah hoh 'ust'en, ndi lubeshi suyust'e ts'un nínt'uk, 'i bugha 'ust'en. ²¹ 'Et nduwhút'en nahóo'ai, ndet ts'ah'un 'utest'ilh hukwa' nuszun totsuk, ndi lubeshi ts'un nüst'uk 'i whuch'a súnilht'uk. ²² Sudzi yuh be ndi khunek Yak'usda nets'aída'ai hoonúst'i. ²³ 'Et whunts'ih 'uts'un na'a chah t'eónúszun. 'Et ndez na'a suyust'e seni lhena né'tet'en whuts'u nínt'uk. 'I be lubeshi soontun 'et ndust'ah, 'ink'ez suyust'e whuz zeh nínt'uk. ²⁴ Tube telhú'en. Ndi suyust'e lubeshi zeh ts'un nínt'uk. 'I bugha kwuncho yuh ts'ih t'ésyalh. Ndán 'et whuch'a sútelyih? ²⁵ Sizi Gri 'en zeh 'utenilh. 'Et huwa tube cho Yak'usda, "Chanailya," dusni. 'Et ndez na'a 'ust'ah, seni be Yak'usda buk'ah zeh buk'úne' 'ust'en, 'et whunts'ih suyust'e 'awhuz lubeshi ts'un nínt'uk zeh 'int'ah.

8

Sizi Gri Ndoni bugha 'ilhuz ts'ukhutena 'et negha óoni'ai

¹ K'an 'et, Christ, Sizi ts'utni, ndunnah hiyudúlt's'i, 'aw kwuncho yuh ts'ih wheni huba nachahídel. 'En 'uhint'ah 'aw buyust'e hoontsi' ts'un nínt'uk hukw'u nucha'hust'en, 'et Ndoni buk'ah ts'ih zeh hukw'u ne'hut'en. ² Njan whunulh'en, Christ, Sizi ts'utni, 'en bugha Ndoni 'ilhuz wheni khuztenalh negha óoni'ai, 'et Moses be' dustl'us 'i bugha nt'ets'oninzun lubeshi 'uts'ulh'en dáztetsah ka, 'et whuch'a suba whulaoodetnik. ³ Neyust'e lubeshi ts'un nínt'uk, 'et huwa Moses be' dustl'us 'aw nela 'ooneh ghaít'ah. 'Et hukw'elh'az Yak'usda nela 'uja hoh buYe' nets'ítelh'a. 'En buyust'e neyust'e ndult'ah, 'et whunts'ih neyust'e 'i lubeshi bulh 'int'ah. 'Ink'ez 'en datétsah ka whutl'a'dudelti, ndi yun k'ut dune bulubeshi k'elha whutelhtsilh 'et wheni. ⁴ 'Et hoh Moses be' dustl'us nets'u húkwa' 'utni, ts'iyawh neba lhaóodinla. Nuwheni 'uts'int'ah, 'aw neyust'e nínt'uk ts'ih hukw'u nucha'ts'ust'en, 'et Ndoni buk'ah ts'ih zeh hukw'u ne'ts'ust'en. ⁵ Ndunnah lubeshi zeh whuts'u nínt'uk t'eh, 'ahoolhyez lubeshi 'uhulh'en. 'Ink'ez ndunnah Ndoni k'ah ts'ih zeh nuní hunuzut, 'en Ndoni k'ah ts'ih zeh hukw'ú ne'hut'en ho' hint'ah. ⁶ 'Et ndunnah lubeshi ts'un hunínt'uk, 'en kwuncho yuh ts'ih hutedulh, 'ink'ez ndunnah Ndoni k'ah ts'ih dune hinli, 'en Yak'usda whudezghel bube'ildzun whutele 'ink'ez 'ilhuz hukhutentalh. ⁷ Njan huwa' dusni, ndunnah 'ahoolhyez lubeshi ghu nuní hunuzut, 'en Yak'usda ch'a detni hinli. 'Aw Yak'usda buk'ah ts'ih k'úne' whét'en whutl'a chá'hudulhti, 'ink'ez Yak'usda k'úne' hutet'en 'et 'aw 'úhóoneh ghaít'ah. ⁸ 'Et ndunnah, buyust'e lubeshi ts'un hunínt'uk, 'aw Yak'usda ba chahízooh. ⁹ 'Et Yak'usda buyégha nuhyudínda t'eh, 'alha Ndoni budune ahli 'ink'ez nuhyust'e lubeshi ts'un nínt'uk 'aw buk'únucha'zaht'en. 'Et whunts'ih ndunnah Christ buyeghah* chahit'ih, 'en 'aw budune chahílah. ¹⁰ Nuhyust'e lubeshi bugha datétsah, 'et whunts'ih Christ nuhyudínda t'eh, 'et sih nuhyéghah 'ilhuz khutena. Yak'usda be ts'ah'un 'uhoont'ah, 'i bugha ahja 'et huwa. ¹¹ Sizi dazsai hoh Yak'usda dinaidilhti, 'en buyégha nuhyudínda t'eh, 'et Yak'usda Christ dinaidilhti, 'en buyégha nuhyudínda, 'en bugha nuhyust'e 'ilhuz khutena yughá oote'alh. ¹² Sulhutsinkah, njan dúhoont'ah

* **8:9** Yak'usda bughi 'ink'ez Christ yughi, 'ilho zeh unli. 'En Ndoni hiyulhni.

ho' hoont'ah, nuhyust'e lubeshi ka' ninzun t'eh, 'aw whuz na'a 'oohneh huba cha'hoot'ah. ¹³ 'Et whuz na'a dune ahli t'eh, 'et kwuncho yuh ts'ih téhdulh. 'Et whunts'ih Ndoni 'en bugha nuhyust'e lubeshi ka' ninzun 'ustl'e' 'uhla t'eh, 'et 'ilhuz wheni khutehnalh. ¹⁴ K'us ndan Ndoni buts'u hukwa' ninzun hukw'u na'a 'uhut'en, 'aw 'en zeh Yak'usda budune hinli. ¹⁵ 'Et njan whunulh'en, Ndoni nuhyudélts'ut hoh 'aw Yak'usda be chats'uníjut wheni 'ulhna chanhohílhtsel. 'Et nuhyudélts'ut hoh Yak'usda budune nuhwhulhtsi. 'Et huwa whéchats'uniljut hoh bulh yáts'ulhtuk 'ink'ez, "Abba, 'aBá," ts'utni. ¹⁶ Ndoni 'en dich'oh neyéghah wheóobunulhtun, nuwheni Yak'usda buzkeh ts'inli. ¹⁷ 'Ink'ez nuwheni Yak'usda buzkeh ts'inli t'eh, ndai Yak'usda buts'ú yoozi, 'i bube'ildzun whutele. 'Et whuz na'a Christ bulh úztet'ilh, Christ bulh dzuh nuts'uzut t'eh, 'en bulh uzdutéti 'et huwa.

K'at lih Yak'usda nedutélhti

¹⁸ 'Et njan ndudúsni, Yak'usda ye dézti, 'i whuneuntelhtun hooncha k'et njan k'an 'et Sizi Gri buba dzuh nuts'uzut, 'et ants'i 'uhoont'ah. ¹⁹ Ndai Yak'usda 'uyinla, ndi 'uyinla, 'i ts'iyawh soo hukwa tsi húhooli hoh dudune wheoobuntelhtun. ²⁰ Ndi 'uyinla, 'i 'astl'iyaz wheni 'uyínlá. 'Aw dich'oh 'utahacháhoo'al, Yak'usda dich'oh 'utahahó'ai whuz na'a 'uhót'e ka. 'Et huwa ndi 'uyinla, 'i hukwa tsi húhooli 'uts'un na'a na'whutétnilh 'et huwa. ²¹ Ndi 'uyinla, 'i whunts'i, njan whusawhélts'ut t'eh, ndi yun k'ut be whulhjut, 'et 'ustl'e' 'uwhuténilh. Tube whudézti whutéle. 'Et Yak'usda buzkeh k'una'a buk'ena'et'uk lí'hutenilh. ²² Njan nt'ets'onínzun, ndai Yak'usda 'uyinla, 'i ndunt'i k'an 'et whuts'un khun dutso, nts'e na'a ts'ekoo buyaz whutéle whuz na'a dzuh nuzut. ²³ 'Aw 'i zeh ílah, nuwhenich'oh chah khun dutso Yak'usda buzkeh gaih zeh uzteleh 'et whuts'un. 'Et hoh t'eh, neyust'e 'ants'i buk'ena'et'uk lí'tenilh. 'Et Ndoni nets'ú whusayalh'a inle, 'et hoh t'ets'onínzun Yak'usda nedáni whuz na'a 'et nenaootekulh. ²⁴ 'Et nts'e na'a Yak'usda buts'un hukwa tsi ts'úhooli, whuz na'a uzdujih. 'Et hukw'u nuní nulhzut, ndet hukwa tsi ts'úhooli 'uhóoja t'eh, 'aw 'o 'un hukwa tsi ts'úholi ghaít'ah. Ndet dune honalh'en, 'aw 'o 'un hukwa tsi húhooli ghaít'ah 'et huwa. ²⁵ 'Et whunts'ih Yak'usda ndet nets'ú hoozi 'awhuz chats'úwhes'en t'eh, 'awhuz hukwa tsi ts'úholi zeh 'uts'oote. ²⁶ Lhawh hukw'u na'a 'aw chats'ílhtus. 'Et huwa Ndoni nela 'ut'en. 'Aw whulutah teh ndet huba tenazdutedli 'aw t'ets'onízun. 'Et whunts'ih Ndoni neba tedudlih, khudutso li'utni, khunek 'aw be yaóotuk ghaít'ah, 'i be neba tenadudli. ²⁷ Nduń nedzi yuh nunúta, 'et Ndoni dája ninzun 'et nt'eoónínzun. Yak'usda hukwa' ninzun hukw'u na'a. Ndoni dune Yak'usda bube'ildzun 'en hububa tedudlih 'et huwa. ²⁸ 'Et huwa nt'ets'onínzun ndunnah Yak'usda yuk'entsi', 'en ts'iyaintsuk hoonzoo k'una'a zeh huba whulhih. Yak'usda 'en k'us ndet huba hukwa' ninzun hubutelhyih ka hubuka' dani 'en 'uhint'ah. ²⁹ 'Udechoo whuts'un k'us ndan Yak'usda bube'ildzun huteleh, 'et 'uda ts'iyawh t'eoobunínzun. 'Et huwa whutsuh da huba lhaóodinla nuhwheni buYe' k'una'a 'uteht'ilh lí'hetet'ilh. 'Et whuz na'a Sizi Gri lhannah bulhutsinkah hubutah 'Udéchoo Whuzdli huba unli tele. ³⁰ 'Ink'ez ndunnah whutsuh da hube'ildzun hutele t'ebunínzun, 'en hudutejih ka buka' dani. 'Et tink'us 'uhut'en huba hoolah whulhtsi, 'ink'ez 'en hubudálhti.

Sizi Gri 'en bugha Yak'usda nek'entsi'

³¹ 'Et njan dazdóoni simba? Yak'usda nelh 'int'ah t'eh, ndan simba nech'a dootni? ³² 'Aw Yak'usda buYe' 'en hubuch'a chayóotun hoh neba datétsah wheni hubutl'a yálhti. 'Alha 'uhoont'ah, 'et Yak'usda neba 'udeja t'eh, 'et buYe' bulh 'aw hukw'elha chats'uhoolhtsil hoh ts'iyaintsuk negha ítelelh. ³³ Ndunnah Yak'usda 'utahaóobanla, ndan 'udutenilh lubeshi 'uhulh'en buduténilh? Hoolah! Yak'usda 'en 'uja tink'us 'úhut'en, 'en huba hoolah

whulhtsi. ³⁴ Ndan 'udutenilh hoontsi' k'una'a neba nahuteyeh? Hoolah! Christ 'en zeh 'uja neba dazsai. 'Aw 'et zeh ílah, 'en dinadija 'ink'ez Yak'usda nalhnih ts'ih yuzih usda, 'et neba tenadudli. ³⁵ Ndan 'útenilh Christ ye nék'entsi', 'i yuch'a nanetéltelh? Nech'a hahóonelh'i, k'us howa whúlha neghá whonkat, k'us dune ne'zula, k'us dai ts'ínl, k'us tube tets'ul'en, k'us nelh howa 'óodli uzdelhts'i, k'us nehutuzelhghelh túlih? 'Aw hoolah! ³⁶ 'Uda ndi Yak'usda be' dustl'us njan ndutni,

"Sheep nahituzelhghelh k'una'a 'uts'int'ah.

Nyun ngha dzin totsuk nehutuzelhghelh li'hoont'ah," ni.

³⁷ Ndi hoontsi' nelh 'uwhut'en 'et whunts'ih, ndunnah nek'entsi', 'en bugha 'aw nech'a 'oodeh ghaít'ah. ³⁸ 'Aw 'et njan tube suba 'alha 'ohoont'ah hoh ndi be dats'utsah, k'us be ts'ukhuna, k'us lizas, k'us nek'une'hul'en, k'us negha ndoh ye úlhtus, k'us k'an nelh 'uwhut'ih, k'us nus de haóotekulh, ³⁹ k'us nduk 'ohoont'ah, k'us ndai nyuk 'ohoont'ah, k'us 'o 'un dant'i 'ulya chah, 'et ndi ts'iyawh Yak'usda ye nek'entsi', 'i Sizi Gri neMoodihti yugha 'int'ah, 'aw yuch'a naneolelh hoolah ho' hoont'ah.

9

Ndai hoonliyaz Yak'usda Lizwif buts'ú yoozi, 'i 'aw bugha chayíkulh, Yak'usda hik'ah ts'ih ne'hoot'en hukwa cha'hunízun 'ink'ez bughunek 'aw chahiyótun. Et huwa 'uja Yak'usda 'udun yun k'ut whut'en dudune hóole ni.

¹ Njan ndunwhudutésnilh Christ bunalh 'údusni. 'Aw chaoozústs'it ho' dusni. Dája nuhwhudutésnilh Ndoni 'en bugha suyuhs ts'ih bugha t'ets'oninzun, 'i 'et chah 'álha 'ohoont'ah. ² Njan 'et ndudúsni ho' dusni, Lizwif Yak'usda t'aníchahonitan 'et huwa 'en hubugha tube sudzi únduda, 'ink'ez 'ahoolhyez hubuk'e ni usdli. ³ Lizwif sulh húdedowh 'et huwa bula' tesnilh hukwa' nuszun. 'Et hoh bula 'e'whuduténih t'eh, whute Yak'usda skehooyeh da 'ink'ez Christ ch'a naoosja doosni wule da. ⁴ Ndunnah Israel hits'uh hainde Yak'usda 'utahaóobanla dudune hoole ka. 'En 'uhint'ah Yak'usda hidálhti 'ink'ez be hubuts'ú nahezya, 'et huba nahoosdzi. 'En 'uhint'ah Moses be' dustl'us hubutl'a ída'ai 'i be nts'e na'a Yak'usda ts'ah'un na'a hiba 'oot'en ka. ⁵ Israel budune 'uda dune tsuh whúdelhdzulh ts'ih hahánde ho' hint'ah, 'ink'ez Christ 'en chah hubuts'u haínzut. 'Et huwa buyust'e dune k'una'a 'uchainya inle. 'En 'int'ah ts'iyaintsuk whuYak'usda unli. 'Et huwa 'ilhuz wheni hoh hidélhti. 'Et ndoh honeh. ⁶ 'Aw 'et Yak'usda bughunek 'ants'i yuk 'uhooja nahzun ih? 'Awhundoo! 'Aw yuk 'uhooja ilah. Njan whunulh'en, ndunnah Israel hits'uh hainde, 'aw ts'iyawh ilah Israel whudune hinli 'et huwa. ⁷ 'Ink'ez Abraham yuts'u haínzut 'aw ts'iyawh ilah Israel whudune hinli. Yak'usda 'en Abraham 'ídani, "Isaac 'en bugha zeh nts'u haínzut hootédzilh." ⁸ Njan 'et 'udúsni, Yak'usda budune 'aw dune yust'e ts'un haínde, 'en ílah 'uhint'ah. Ndi khunek ye buts'u nahezya, ndunnah 'i huba 'alha' yint'ah, 'aw 'en zeh Yak'usda budune 'uhint'ah.

⁹ Yak'usda 'en Abraham yuts'u náhezya, "Ndet hoozízi 'et whusanátesdalh 'ink'ez n'at Sarah, 'en dune buyaz tele," yúlhni. ¹⁰ 'Aw njan 'et zeh ílah, Rebecca buzkeh lht'adánke, 'en bu'abá, netsuhda Isaac, 'en 'int'ah. ¹¹⁻¹² 'Aw chahuwhúsdle whutsuh da whuts'un, 'aw hoontsi' k'us hoonzoo cha'whuhusdle da, Yak'usda Rebecca 'idáni, "Udechoo, 'en dek'ah yuk'úne' tet'en." 'Et hoh nts'e na'a Yak'usda hukwa' ninzun, 'et whuz na'a 'uhóoja. ¹³ Njan 'et Yak'usda be' dustl'us k'ut 'uk'e'úsduguz, ndutni, "Jacob* 'en buk'esi', 'et whunts'ih Esau 'en 'ants'i suba unli."

* **9:13** Ndan Jacob, Israel cha hiyulhni, 'ink'ez bulhutsin cha Esau hiyulhni.

Yak'usda buk'ah ts'ih 'aw soo t'echats'onízun

¹⁴ 'Ink'ez dája uzdutenilh nuhzun? Yak'usda 'aw ts'ah'un cha'ít'ah uzdute-
nilh ih? 'Aw whuz na'a 'uhót'e ghaít'ah! ¹⁵ Yak'usda nts'e na'a Moses 'idáni,
"Ndan bugha té'unteszeh, 'aw 'en zeh bugha té'unteszeh,
'ink'ez ndan bugha sudzi dúnteda, 'aw 'en zeh bugha sudzi dúnteda."

¹⁶ 'Et huwa Yak'usda ye negha té'nuzeh, ndan buka' ninzun, k'us dune
dich'oh hukwa' huninzun ilah huwa 'uhooja, Yak'usda 'aw 'en zeh ba'
hoont'ah. ¹⁷ Yak'usda bughunek 'uk'une'uzguz, 'i k'ut Pharoah njan
ndúyulhni, "Njan 'et huwa Egypt whuhubudayi cho nyuzílhsí, nyun ngha ndet
whélhtus dune whúntelhtun. 'Et whuz na'a soozí ndi yun k'ut nduhoolhcho
hoh t'entédzin," yúlhni. ¹⁸ 'Et njan t'eoónóhzin hukwa' nuszun, ndunnah
Yak'usda 'utahaóobanla, 'en bugha te'untezilh. 'Et ndunnah 'uts'un 'úninzun,
'en chah whuz na'a 'uhint'ah hubilh'i. ¹⁹ Bulunah nuhtah 'et tulih sudóohni,
"Dant'i ka Yak'usda 'en nek'eóote'alh. K'us ndai nets'u hukwa' ninzun 'aw
dune hoolah hoh whuch'a hooyen ghaít'ah." ²⁰ Ndán ahli hoh Yak'usda
buyenah 'udutéhnih? 'Et dune 'uyínlá, 'i ndi 'uyínlá, 'i nts'e na'a 'udutenilh,
"Di ka 'inja whuz na'a 'usínla dutenilh?" ²¹ Njan whunilh'en, dune whutl'us
be 'oosa' inla t'eh, lhuk'i unzoo yulhtsi t'eh, 'i ye' dudetélti huba, 'ink'ez
lhuk'i 'i yé' tet'ilh wheni yulhtsi. 'Et whuz na'a 'uyínlá t'eh, dich'oh zeh
buba' hoont'ah. ²² 'Et whuz na'a Yak'usda lhelhyoo hoh lhelhts'un na'a huba
'uhóonla. Bulunah bulubeshi bugha Yak'usda kwuncho yuh ts'ih whébule,
dich'oh khanáhuwhut'ah huwa' bulh'ih. Sa whuts'un whechaítsaz hoh dzuh
nobutelhdzut. 'En bugha Yak'usda dáltus ts'iyanaah t'éwhuntézin, 'ink'ez dal-
cho 'i be lubeshi yuts'u dutnik, 'et chah ts'iyawh t'ehontézin. ²³ 'Et nuwheni
chah sa neba ulh'i. Whutsuh da 'utahanénla negha te'untezelh ka. 'Et whuz
na'a nuwheni chah uzdutéti. Nuwheni negha ts'iyanaah t'ehontézin Yak'usda
ye dézti, 'i dálzoo ho' 'int'ah. ²⁴ Nuwheni Yak'usda uzdutejih ka neka' dani
ts'inli, 'aw Lizwif hubutah zeh ílah, 'udun yun k'ut whut'en chah. ²⁵ Yak'usda
'en 'utni nus whunilh'en Hosea be dustl'us k'ut, whuz na'a 'uwhuténilh hoh
'utni,

"Aw sudune ilah, 'en sudune hubudutésnih,
'ink'ez hubuk'echasi', 'en hubuk'etesi'.

²⁶ Nts'oh yun k'ut whudune,

'aw sudune ilah 'aht'ah hubudáni,
'en whunts'i Yak'usda khuna, 'en dudune hubudutenilh."

²⁷ 'Et nus whunilh'en Isaiah, Israel budune bughu yalhtuk hoh 'et khunek
ulhtus, 'i be ndutni,

"Israel budune taba sai nduhuneltsuk t'eh,
'et whunts'i whulutah zeh hudutejih.

²⁸ 'Ink'ez nts'oh húdelhts'i ndet Yak'usda ubudáni, ye be ts'ah'un 'uhoont'ah, 'i
be khunyaz 'et nduténilh,
'ink'ez khunyaz 'ilhuz wheni huba nahuteyeh," hubúlhni.

²⁹ Nts'e na'a nus whunilh'en Isaiah ndutni,

"Ndun ts'iyaintsuk whuMoodihti unli,
'en Lizwif hubulah zeh chabílyis t'eh,
'et sih Sodom 'ink'ez Gomorrah whut'en 'et da hubulh dahooja,
nuwheni chah 'et ndúztenilh ts'oole da."†

*Israel budune Yak'usda 'aw highunek chahiyilhcholh 'et huwa hubula det-
nik*

† **9:29** Njan Sodom 'ink'ez Gomorrah huwhut'en 'o nus hintsí' k'et 'aw nduchaoobudinel hoh
huholah hubulhtsi.

³⁰ Daja simba ts'udooni 'et? 'Udun yun k'ut whut'en, 'en 'uda Yak'usda nalh 'aw ts'ah'un na'a 'uhoot'e hukwa cha'hust'en, 'en 'uhint'ah k'an 'et Yak'usda nalh ts'ah'un 'uhint'ah, be 'alha 'ohoont'ah hit'i, 'i bugha 'uhuja. ³¹ 'Et whunts'ih Israel budune ndi Moses be' dust'us 'i bugha ye be' ts'ah'un uhoont'ah, hukwa' hét'en, 'et whunts'ih 'i 'aw cha'huhóolil. ³² 'Et di ka ndez na'a 'uhooja? Yak'usda bughunek 'i 'aw huba 'alha cha'yít'ah, 'et huwa 'aw ts'ah'un cha'hít'il. Moses be' dustl'us, 'i zeh hik'úne' oot'en hukwa' hút'en. Ndi tse be hiye dunudaih, 'i hidunudaih 'et huwa. ³³ 'Et whuz na'a Yak'usda bughunek 'uk'e'usdúguz ndutni,

"Whunulh'en, keyah Zion ts'uwhútni, 'et tse‡ 'i nidúntes'alh, 'i dune hinedúntedaih.

'Et ndunnah Yak'usda bughunek chahiyilhcholh, ndi tse huba chayízooth. 'Et whunts'ih ndunnah huba 'alha' yint'ah, 'en 'aw hukwaya hoole ghaít'ah."

10

Israel budune, ndi Moses be' dustl'us dune hik'une'oot'en, 'i ts'iyaintsuk Christ huba 'ustl'e' 'uhóonla

¹ Sulhutsinkah Yak'usda buts'un ténadusdli khun teh Israel budune hudoojih. Njan 'et sudzi yuh hoh hukwa' nuszun. ² 'En bugha 'alha' dusni, tube nchah, 'i be Yak'usda ndet hubuts'u húkwa' ninzun hukw'ú ne'hutet'en hukwa' huninzun, 'et whunts'ih 'aw soo cho nt'ehonízun. ³ Yak'usda ye be' ts'ah'un 'ohoont'ah k'úne' hutet'en 'et 'aw t'ehonízun. Nts'e na'a dich'oh 'uhuhóonla whuz na'a ts'ah'un na'a 'uhint'ah na'hududil'i. 'Ink'ez ndet Yak'usda hubuts'u húkwa' ninzun 'aw hubutl'acha'hududiltel. ⁴ Njan whunulh'en, ndi Moses be' dustl'us nets'u húkwa' ninzun, 'i Christ ts'iyaintsuk neba lhaoedinla. 'Et huwa ndan huba 'alha' yint'ah, 'en Yak'usda nalh ts'ah'un dune hinli. ⁵ Ndunnah Moses be' dustl'us bugha ts'ah'un dune hik'una'a 'uhoot'en hukwa 'uhut'en t'eh, njan howa 'et Moses yuk'une'úzguz hoh ndutni, "Nts'e na'a ndan ndi khunek yuhts'u húkwa' ninzun, whuz na'a 'uhoot'e huba' hoont'ah." ⁶ 'Ink'ez nts'e na'a be 'alha 'ohoont'ah, 'i bugha Yak'usda nalh ts'ah'un na'a 'uts'int'ah, njan 'uk'e'edúguz, "Aw na'ts'oodudolkut ghaít'ah, 'Ndan utenilh nduk teyalh Sizi Gri ndus de haítelhtelh?" ⁷ K'us ndan utenilh, 'Christ neba whusaítelhtelh, yahadla tuz téyah 'et wheni?" ⁸ 'Et Yak'usda bughunek daja ni hoh 'utni? Njan 'et 'uk'e'edúguz, "Ndi khunek ndai bugha ts'ah'un na'a 'uztet'ilh, 'i neghah dez'ai ho' 'int'ah, nezek chah 'ink'ez nedzi yuh chah dez'ai." 'I 'int'ah, ndi khunek be 'alha 'ohoont'ah, ndai be nohwhulh yáts'ulhtuk, 'i 'int'ah. ⁹ 'Et 'uyoon dune ndo budíni t'eh, 'Sizi Gri 'en suMoodihti unli', 'ink'ez ndzi yuh hoh mba 'alha 'ohoont'ah Yak'usda Sizi Gri dazsai hoh dinaidilhtih, 'et t'eh dutanjih ho' hoont'ah. ¹⁰ Njan 'et ndzi yuh hoh mba 'alha 'ohoont'ah t'eh, Yak'usda nalh ts'ah'un na'a 'int'ah. 'Ink'ez njan 'et 'uyoon dune budíni t'eh, 'et sih dínjih ho' nint'ah. ¹¹ Yak'usda bughunek 'utni, "Ndan neMoodihti huba 'alha' yint'ah, 'aw yooya chatesdle." ¹² Lizwif 'ink'ez 'udun yun k'ut whut'en 'aw lhelhts'un na'a cha'hít'ah. Yak'usda ts'iyana hubuMoodihti ho' 'int'ah. 'Et huwa ndunnah hubula' whudóneh hits'u húkwa' 'utni, 'en tube hubuts'un unzoo ho' 'int'ah. ¹³ Ndan hinli whúnts'i, neMoodihti hudoojih hits'u húkwa' 'utni t'eh, 'et 'alha 'ohoont'ah hoh hudutejih. ¹⁴ 'Et ndunnah Sizi Gri huba 'alha cha'ít'ah, 'et nts'e na'a 'uhudutenilh huboolhyis hits'u hukwa' dutenilh? 'Aw hiyulh ch'a'dusts'uk t'eh, 'et nts'e na'a huba 'alha yutétilh? 'Uyoon dune hubudáni t'eh zeh. ¹⁵ Dune hubuts'un whehalh'a ubuduténilh huba, 'et t'eh zeh hiyulh 'údutets'o. Njan hubuga Yak'usda be' dustl'us k'ut 'et 'utni,

‡ 9:33 Ndi tse, 'i Sizi Gri 'int'ah.

“Dáwbulzoo ho' hoont'ah dune khunek unzoo, 'i whuneuntelhtun, nts'e na'a nedzi yuh whudutéghel 'ink'ez Yak'usda be 'ut'en unzoo, 'i ts'óolchoot huba.”

¹⁶ 'Et whunts'ih 'aw ts'iyanah ílah khunek unzoo, 'i hik'úne' 'ust'en. Nts'e na'a nus whunilh'en Isaiah 'utni, “NeMoodihti ndunnah dune daja hubuts'útni 'aw huba 'alha cha'hoc'tah.” ¹⁷ 'Et huwa ndi khunek uzdits'o, 'i bughä be neba 'alha 'uhoont'ah 'uts'int'ah. 'Ink'ez ndi khunek uzdits'o, 'i Yak'usda bughunek 'int'ah. ¹⁸ Njan 'et hukwa nuhoodulhkut, Israel budune 'aw ih ndi khunek hiyulh 'udits'il? A, hiyulh 'údants'o. Njan Yak'usda be' dustl'us k'ut 'et ndutni, “Ndunnah naghúnek na'a 'en bughunek ts'iyawh ndi yun k'ut hídants'o.

'Et ndi khunek dune hiyubodulh'eh nts'e dune huwhut'i ts'iyawh hidánts'o.”

¹⁹ 'Et doo chah nuhoodulhkut, 'et Israel budune 'aw ih njan whulh cha'hudústs'o? A, hiyulh 'údants'o. 'Udechoo Moses njan 'et 'utni, “Ndunnah dune buyun k'ut hoolah nuhzun, 'en hubughe 'ootelhúnih nuh-whutélhsilh.

'Et ndunnah yun k'ut whut'en, 'en ilah tune' hut'en, 'en hubugha tube huntelhúch'oh nuhwhútelhsilh,” ubúlhni.

²⁰ Nus whunilh'en Isaiah 'aw whéchaniljut dája dutenilh, ndet Lizwifhubulh yaíltuk da 'ink'ez Yak'usda ba yalhtuk hoh ndutni, “Ndunnah 'aw skacha'hoodulhkut, 'en sughu nahahoo'ai.

Ndunnah 'aw skúchanustah,
'en bubuduna dunelhútan.”

²¹ 'Et whunts'i Yak'usda Isaiah ndi yúlhni Israel budune hubugha.
“Dzin nduhóolhyez hoh hubuka' dúsni khun teh suts'un hútoodelh ka.

'Et whunts'ih 'aw suk'únucha'hust'en 'ink'ez 'uts'un 'uninzun hinli.
'Ink'ez 'aw suts'un hutóoya hukwa cha'hunízun.”

11

Yak'usda Israel budune 'awhuz hubugha te'obuninzun

¹ 'Et njan 'udusni, Yak'usda dudune 'ilhuz ih 'ún hubutelhdel? 'Awundoo! Si chah 'ilhunuh Israel budune 'ust'ah. Abraham 'en be dizut 'ink'ez Benjamin bulh désdoh. ² Yak'usda dudune whutsuh da t'ebuninzun 'en 'aw hubuch'a nachaí'lal. 'Et 'aw ih whunachasulhúnik Yak'usda be' dustl'us k'ut dája ni nus whunilh'en Elijah 'en bughä? Nts'e na'a Yak'usda yuts'u téudli Israel budune, 'en buch'a 'utni, ³ “SuMoodihti nye nus whunilh'en chah huba hanghan 'ink'ez nkw'uzdai k'ut 'i chah nahínanyuz. Si zeh 'et ninlhúts'ut. Si chah suhutuzelhghelh ka suka hunuta.” ⁴ 'Et whunts'ih ndet Yak'usda yadáni? Njan 'et ndi yúlhni, “Awhuz 7,000 dune 'en 'et hubudelhts'i. 'En 'aw ndi 'uk'edéltsi Baal 'aw 'i hits'u téni'noolhzin 'ink'ez hits'u ténadoodli ghaít'ah.”

⁵ 'Et whunts'ih k'an dzin 'awhuz bulunah Israel budune dujih hoonli. 'En Yak'usda ye únzoo, 'i be 'utahaóbanla, 'en 'uhint'ah. ⁶ 'Et whuz na'a Yak'usda ye únzoo, 'i be uzdujih, 'aw khunek netl'adéti'ah, 'i buk'úne' ts'ut'en 'aw 'et huwa ilah. 'Aw njan ducháhoot'il t'eh, Yak'usda ye únzoo, 'i whutélah ho' hoont'ah. 'Et ndi khunek netl'aída'ah, 'i buk'úne' ts'ut'en huwa uzdujih ts'utni t'eh, 'ink'ez nts'e na'a Yak'usda ye únzoo, 'i be uzdutejih uzduténilh? 'Et dune howu yahalhtuk nts'e na'a hudutejih, ndi khunek Moses be' dustl'us bughä netl'adélt'sut, 'i buk'úne' ts'ut'en whunts'i, 'i bughä uzdoojih ghaít'ah. Njan 'et 'uwhúlhni. ⁷ Khunek njan ndutni hoh 'utni, Israel budune hubudzi duts'un, 'et huwa hukwa húnuta 'aw nachahuhó'al. 'Et whunts'ih 'onghoh 'utahálya, 'en nahuhoo'ai. ⁸ Nts'e na'a Yak'usda be' dustl'us k'ut 'uk'une'whusdúguz, soo whuz na'a 'uhóoja.

"Yak'usda dune 'ants'i nahunestez hubulhtsi.
 Hubuna hóoni 'et whúnts'i 'aw hiye chawhes'en.
 Hubudzo chah hoonli 'et whunts'ih 'aw hiye cha'dusts'uk.
 k'an 'et dzin whuts'un 'awhuz nduhínt'ah," hoh ndutni.
⁹ David 'en chah njan bugha ndutni,
 "Ndai Yak'usda, ncha 'i hubugha íninla, 'i whute, bilh 'ink'ez tsagooh buka
 níyults'ut lí'uja.
 Ndai bughá ininla, 'i hikaya wule huboolhtsilh.
 'Et whuz na'a hubulubeshi huba k'elha nahuwhtulsi.
¹⁰ Hubuna whute hiye chahuwhés'en Yak'usda ye únzoo, 'i hiye nóolh'en
 whuch'a.
 'Ink'ez hiyé dzuh nudeh 'i be yuk húnoot'uk dune ndaz, 'i tuyúghe
 k'una'a," ni.

Yak'usda Israel budune 'aw 'ilhuz ilah bula detnik

¹¹ 'Et chah zeh nuhoodulkut, Lizwif 'et tse bugha huntézghal, 'et 'ilhuz
 wheni tintá hutelts'ulh ka ih nahélt's'ut? 'Aw whuz na'a 'uhót'e ghaít'ah!
 Yak'usda bughunek hika cha'nízun, 'et huwa 'udun yun k'ut whut'en 'et
 k'an 'et hiye dújih. 'Et whuz na'a 'uhutenilh Lizwif 'udun yun k'ut whut'en
 bughe' hootelnih. ¹² 'Et whunts'ih tink'us na'a 'uhut'en 'et huwa 'uyoón dune
 Yak'usda ye únzoo, 'i be huhóont'i hubulhtsi, 'ink'ez Yak'usda Lizwif buch'a
 hóontun 'i be 'udun yun k'ut whut'en tube huhóont'i hubulhtsi. 'Et ndet dzin
 whusawhélts'ut t'eh, Lizwif, 'en chah Yak'usda buzkeh nahúsdli, 'et 'o nus
 whutézoo. ¹³ 'Aw 'et nuhwheni 'udun yun k'ut whut'en nohwhulh yálhtuk,
 Yak'usda 'utáhasálhti nuhwheni nuhwhuba whel'a wúsdle ka. Njan 'et sih
 tube suba hooncha. ¹⁴ Njan ndun whudutésnilh, 'et sulh Lizwif huwe' hoolnih
 huwa tulih bulunah hudoojih. ¹⁵ Yak'usda Lizwif 'ún nubutelhdel, 'ink'ez Sizi
 Gri 'en bugha nuhwheni 'udun yun k'ut whut'en 'aw 'et Yak'usda ts'un dune
 bulh soo ninawhunt'ai. 'Et Lizwif Sizi Gri hits'u nahulhéya huboolhyih ka
 t'eh, 'et Yak'usda nabutelcholh ho' hint'ah. Dune yahadla chah dune nahusdli
 li'hutenilh. ¹⁶ 'Et whunóhuntehtun nts'e na'a 'uwhuténih. Whunulh'en, lhes
 nantéldoh t'eh, 'udechoo, 'i unzoo 'int'ah t'eh, 'et whulutah chah ts'iyawh
 unzoo tele. 'Et 'udun, duchun bughih unzoo t'eh, 'et buzooschum chah 'i
 ts'iyawh dutezoo.* ¹⁷ 'Et whunts'ih ndi duchun unzoo, 'i bulah buzooschum
 k'unúdestuk. 'Et nuhwheni 'udun yun k'ut whut'en, 'et duchun hoh nunúlhye,
 'i Olive duchun hiyúlhni, 'i li'aht'ah. 'Et ndet buzooschum k'unúdestuk 'et
 nuhwheni hik'enánohdanla. 'Et huwa ndi duchun bughih bugha 'ink'ez
 buk'unih unzoo, 'i nuhwhe'ildzun suli.† ¹⁸ Ndi buzooschum k'unúdestuk,
 'i buch'a dóohtni gunih! Whuz na'a 'ududelhúti t'eh, 'aw t'ewhunuzúszun
 ndi 'ughih 'aw bulacha'zaht'en, 'et 'ughih 'i nuhla 'ut'en. ¹⁹ Ndi uzooschum
 k'unúdestuk wheni buk'enázdoodelh ka doohtni. ²⁰ Njan ndudahni 'álha
 'uhoont'ah. Lizwif 'aw Yak'usda bughunek chahuyílhchulh 'et huwa 'uhuja
 k'unúdestuk. 'Et nuhwheni Yak'usda bughunek úlhchoot 'et huwa 'áhja Lizwif
 buk'enánohdanla. 'Et dudoohlhúti gunih, 'et whenoolhújut. ²¹ Whunulh'en,
 ndi duchun soo buzooschum 'aw Yak'usda yugha técha'nizil t'eh, 'et t'eh nuh-
 wheni chah tulih nuhgha técha'nooszin. ²² Njan whudáhts'o 'et hoodulhú'eh,
 Yak'usda dalhcho 'i be nets'un únzoo 'ink'ez 'uyoón ts'un dálhcho, 'i be hubúlh
 whúske. Ndunnah Yak'usda bughunek chahiyílhchulh, 'i be nahélt's'ut, 'en
 hubuts'un bughunek tube duts'un ho' 'int'ah. 'Et nuhwheni 'udun yun k'ut

* **11:16** Paul, 'en Abraham yughi yalhtuk. 'En 'udechoo Yak'usda nalh ts'ah'un ho' 'int'ah. Yak'usda
 bughunek buba 'alha' yant'e ho' 'int'ah. 'En k'una'a hik'elh'az hutezdel Yak'usda buzkeh huzdli ni ho'
 'utni. † **11:17** Ndi 'uzooschum k'unúdestuk, 'i Lizwif li'hint'ah. 'Et ndan hik'enadedel, 'udun yun
 k'ut whut'en li'hint'ah, ni ho' 'utni.

whut'en Yak'usda bughunek úlhchoot, 'et ye únزو, 'i be whuz na'a zeh 'aht'ah t'eh, 'et huwa 'int'ah nuhwheni chah k'únudútehtuk, uzooschum k'una'a wahle. ²³ 'Et ndunnah Lizwif Yak'usda hits'u nátedulh hukwa' huninzun 'ink'ez highunek hitelhchulh t'eh, 'et t'eh ndi uzooschum k'unúdestuk 'et Yak'usda yuk'ená'budutelilh, Yak'usda dich'oh ye úlhtus 'i be 'et nduténilh 'et huwa. ²⁴ Nuhwheni 'udun yun k'ut whut'en ndi duchun Olive hiyúlhni, hoh nunulhye, 'i buzooschum li'aht'ah. Yugha 'óli hoh k'unídezsel 'ink'ez Olive duchun unzoo, 'i yughun nenaídenla, 'aw whuz na'a cha'hust'en 'et whunts'ih. 'Et Lizwif ndi duchun dinzoo, 'i 'et duhínt'ah. 'Et huwa Yak'usda 'aw buba howa chahóolna' ndi uzooschum k'unúdestuk, 'i duchun unzoo, 'i yughu nenaídutelelh. ²⁵ Sulhutsinkah njan whe' hoont'ah hooyah, 'et t'ewhunoohzeh nuhwhuba hukwa' nuszun, doo ka ts'iyaantsuk t'ets'onínzun na'dudoohlú'i. Njan 'et dúhoont'ah, 'et bulunah Lizwif budzi duts'un hutele, ndet 'udun yun k'ut whut'en whudezulh, 'en huba 'ustl'e' 'uwhuténilh 'et whuts'un. ²⁶ 'Et hukw'elh'az Israel budune ts'iyawh hudutejih. 'Et Yak'usda be' dustl'us k'ut 'uk'une'usduguz 'et ndutni,

"Neulhyis, 'en 'et keyah whuti Zion huwhútqi ts'ih whuz de hatéyah.

'Et Jacob budune‡ nts'e na'a tink'us 'úhut'en 'et whuch'a naoobutélelh.

²⁷ 'Et bulubeshi huba 'ún telhdel t'eh,
'et whuz na'a buts'un khunek lhadúsdla inle, 'et huwa' tesnilh."

Yak'usda ts'iyanah gha te'ninzun

²⁸ Ndi khunek unzoo, 'i be nuhwhubulh yalhtuk, 'i 'aw Lizwif hiyóolhchoot hukwa cha'hunízun, Yak'usda hich'a detni hinli. 'Et huwa nuhwheni 'udun yun k'ut whut'en dáhjih. 'Et whunts'ih Yak'usda ndunnah butsuh da§ 'en hubugha Lizwif 'utahaóobanla 'ink'ez hubuk'entsi'. ²⁹ Ndunnah Yak'usda hudutejih ka buka' dani, 'ink'ez ndai Yak'usda hubugha iyúnle, 'i 'aw 'ats'un na'a na'ooteh ghaít'ah. ³⁰ 'Et nuhwheni 'udun yun k'ut whut'en niz de haóodanzut whuts'un Yak'usda 'aw buk'únucha'zaht'en. 'Ink'ez ndunnah Lizwif, 'en Yak'usda 'aw hík'unucha'hust'en, 'et huwa k'an 'et ye negha te'ninzun 'i nuhghainí'ai. ³¹ Ndunnah Lizwif, 'aw hik'únucha'ust'en, 'en hubugha Yak'usda nuhgha te'ninzun. 'Et whuz na'a Yak'usda 'ilhudzin 'en chah hubugha té'noozeh. ³² Ts'iyanah yuk'únucha'ust'en 'ink'ez tsak'edinla lí'binla, didut bugha té'nooze ka.

Yak'usda dálzoo Lizwif 'ink'ez 'udun yun k'ut whut'en butelhyih huba

³³ Yak'usda ye néts'un unzoo, 'i ye whúnih 'ink'ez ndet ts'iyaantsuk t'ewhunínzun, 'et tube hooncha ho' hoont'ah.

Nts'e na'a be 'ut'en k'ah 'ink'ez 'utáhawhúle, 'aw dune t'ehonózin hoolah 'ink'ez 'aw nahúho'ah chah hoolah.

³⁴ Yak'usda be' dustl'us k'ut 'uk'une'whusdúguz 'et dutni,

"Yak'usda dája ninzun, 'aw dune t'echaoonízun hoolah.

'Ink'ez 'aw 'ilhunuh whunts'i yugha nádoontni chah hoolah.

³⁵ Yak'usda ts'iyaantsuk negha unle,

'aw huba k'elha ts'uholhtsilh ghait'ah."

³⁶ Ts'iyaantsuk inla, 'ink'ez 'en bugha ts'iyaantsuk 'uyínla k'una'a 'int'ah, 'ink'ez 'en ba ts'iyaantsuk 'ulya.

'Et huwa 'ilhuz wheni Yak'usda 'en zeh uzdóolhti. 'Et ndó honeh.

‡ **11:26** 'Et njan "Jacob budune", 'en "Israel budune" ni ho' 'utni. § **11:28** Butsuhda, 'en Abraham, Isaac, 'ink'ez Jacob 'uhint'ah.

12

Yak'usda budune nts'e na'a Yak'usda hukwa' ninzun, whuz na'a 'uhoot'e huba' hoont'ah

¹ Sulhutsinkah ndai Yak'usda ye negha te'ninzun, 'i be nuhts'u téodusdlih, lubeshi be'et hoh be khahna, 'i 'ilhuz wheni Yak'usda butl'á'dudelhúya. 'Et ndahja t'eh, Yak'usda hootét'i 'ink'ez whuz na'a 'en ts'ah'un na'a buba' teht'ilh. ² 'Ink'ez nts'e na'a dune k'an dzin dahínt'ah buk'une'óoht'en hukwa 'ooht'en gunih. K'an 'et nuhwhubeni 'ats'un na'a na'ahleh. 'Et ndaht'en t'eh, 'et sih t'éwhunóhzin ndet Yak'usda nuhts'u húkwa' ninzun. Yak'usda be 'ut'en k'ah ts'iyawh hoonzoo, ts'iyanaah ba hoonzoo, 'ink'ez ts'ah'un na'a 'ohoont'ah. ³ Yak'usda yé sts'un unzoo, 'i bugha 'un whudúsni, nuhwheni ndan Sizi Gri k'úne' 'uhut'en dubanadudoohlúti gunih. 'Et whunts'i 'ilhunuh ahli hoh dahoont'ah huwa Yak'usda ye be 'alha 'ohoont'ah nuhtl'aída'ai, 'et 'uwhultsuk ye whunih, 'i be huwu nunínoohzut. ⁴ Njan whunulh'en, neyust'e 'ilho zeh unli, 'et whunts'ih lhai bughah hoonli. 'Et 'i ts'iyawh neyust'e lhelhdun huba 'int'ah. ⁵ Christ budune whuz na'a zeh 'uts'int'ah. Nuwheni ts'ulai whunts'i, ts'iyawh Christ buyust'e bube'ildzun ts'inli, 'et huwa 'ilho zeh ts'inli. ⁶ 'Et whunts'ih ts'iyawh lhelhts'un na'a Yak'usda ba 'uts'ut'en, ye únzoo, 'i bugha 'úja 'ut'en lhelhyoo neghalya 'uts'oolh'en ka. Bulunah Yak'usda be nus honilh'en, 'et hubugha óoni'ai, dahoolcho Yak'usda ye be 'alha 'ohoont'ah hubugha óoni'ai, whuz na'a zeh yahoolhtuk huba' hoont'ah. ⁷ Bulunah Yak'usda ba ne'hut'en, whuz na'a ba ne'hutet'ilh. Bulunah huwhunih hubulhtsi 'uyoон huhodoohl'eh ka. ⁸ Bulunah 'uyoон dune hubudzi úlhtus hubóolh'i ka hubughá whunt'ai, bulunah hiyít'i, 'i 'uyoон hiye hubulá 'oot'en ka 'ink'ez 'aw highu yachaoohluk. Bulunah ndunnah dune tsuh whudélhdzulh soo cho huwa hinli hoh nduhóot'e. Bulunah chah hubudzi hóont'i hoh 'uyoон hubugha te'hunoozeh ka, 'et chah hubughá whunt'ai. ⁹ Whahts'it hoh 'uyoон k'eoohtsi' gunih. Tink'us 'úhoont'ah whuts'u doohtnik. Ts'ah'un 'ohoont'ah 'et hoohtun. ¹⁰ Nts'e na'a lhulhutsinkah lhk'ehudutsi', 'et whuz na'a soo ts'ah'un na'a lhk'ehdutsi'. Ts'ah'un na'a né'lhoolhú'en nuhgha whúlts'uk totsuk. ¹¹ Ndai 'ut'en nuhghálts'ut, soo cho 'oolh'en. Ndai Ndoni ye nuhla 'ut'en, 'i be soo hoonáht'i hoh neMoodihti buba 'ooht'en. ¹² Ndet Yak'usda buts'un húkwa tsi hoohli, 'et huwa tube hóht'i. Ndet Sizi Gri buk'úne' aht'en huwa dune nuhwhé'zula t'eh, 'ustl'e' 'oohneh gunih, 'ahoolhyez neMoodihti buts'un tenádahdli. ¹³ Dune Yak'usda bube'ildzun*, 'en 'endunidzit, ndai aht'i, 'i bulah be hubula 'aht'en. 'Ahoolhyez huba nuhkoo 'udun 'udóolhtan. ¹⁴ Dune nuhwhe'huzúla t'eh, hubuts'un wahzoo 'ink'ez hubuk'ehoohyeh gunih. ¹⁵ Ndunnah hóont'i hubulh hóonaht'i, 'ink'ez ndunnah hutso hubulh 'ahtso. ¹⁶ Nuhwheni nuhwhulh dune ts'un 'ilhuk'i wulh'i. Ahcha na'dudoolhú'i gunih. Tel'ennah hubuch'a déhti noohzin gunih. Whunih dune la'dudoohlú'i gunih. ¹⁷ Nuhwheni dune tink'us na'a nuhts'un ne'hut'en t'eh, nuhwheni chah tink'us na'a hubuts'un ne'ooht'en gunih. 'Et ts'iyanaah nalh 'ahoolhyez ts'ah'un na'a zeh ne'ooht'en. ¹⁸ Ndet soo 'o 'un 'oohneh ghaít'ah hoh ts'iyanaah dune ts'ah'un na'a lhts'un 'ooht'e. ¹⁹ Nuhwhuk'esi' khun k'unóohdzin gunih. Yak'usda 'en butl'awhák'ah. Njan neMoodihti bughunek 'et 'utni, "Be k'uznudzun, 'i si se'ilhdzun 'int'ah. Si hukw'elha whutelhsillh," ni.

²⁰ 'Et huwa nuhch'a hudemtni buye'élts'ul t'eh, hubugha 'óoh'alh.

'Et tá'hoosde t'eh, too hubugha óolhdzeh.

'Et ndiz na'a ndáht'en t'eh,

* **12:13** Ndán Sizi Gri hik'úne'ut'en, 'en Yak'usda bube'ildzun hinli.

'et 'ants'i kwuntset hubutsi nídahdzaih li'teht'ilh.[†]
21 Tink'us be né'whut'en, 'i be nuhwhuch'a' hoolhdeh, 'aw hubutl'a'dudoohlúyeh gunih, 'et whunts'i be hoonzoo ne'whut'en, 'i be whuch'a' oolhdeh.

13

Yun k'ut whumoodih buk'úne' 'ooht'en

1 'Aw 'et nuhwheni ts'iyawh ndunnah yun k'ut huwuhinli, 'en hubuk'une' hóot'en huba' hoont'ah. Ndi yun k'ut hiye huwunli, 'et Yak'usda 'uhóonla 'et huwa. **2** Ndet keyah dune húdelhts'i, dája hubuhútni, 'et whuch'a ne'hut'en t'eh, 'et t'eh nts'e na'a Yak'usda 'uhóonla, 'et whuch'a ne'hut'en ho' hut'en. 'Et nduhut'en t'eh, 'et sih ndi yun k'ut huba nahutedeh tele. **3** Ts'ah'un na'a ndi yun k'ut delhúts'i t'eh, 'et yun k'ut k'úne'nuhwhuhul'en bubé noolhújut ghait'ah, tink'us 'uhut'en 'aw 'en zeh. 'Et ts'ah'un na'a nuhghu yaoolhtuk hukwa' nahzun t'eh, hoonzoo hukw'una'a ooht'en 'ink'ez ndai khunek nuhtl'aída'ai, 'i be noolhújut huba cha'hóot'ah. **4** Ndunnah yun k'ut nuhmoodih, 'en nuhwhuba hózoo ka Yak'usda ba ne'hut'en. 'Et tink'us ne'áht'en t'eh, 'et sih bube noolhújut. Ndai ye úlhtus, 'i butl'á yét'ai, 'i be dzuh nunóhootelhdzut 'et huwa. 'Aw 'ants'i ílah 'uhoont'ah. **5** 'Et huwa ndunnah yun k'ut nuhmoodih hinli buk'úne' 'oohten huba' hoont'ah. Nohwhulk huntelch'oh whuch'a, 'ink'ez nuhyuh ts'ih bugha t'ets'oninzun, 'i chah. **6** 'Et huwa ndunnah yun k'ut nuhmoodih, 'en Yak'usda ba ne'hut'en hinli hoh, bughunek nuhwhutl'ádet'ai, 'i be 'ahoolhyez nus be honoolht'uk. 'Et huwa yun k'elha hole huba' hoont'ah. **7** 'Et huwa ndet nuhts'ú whuz'ai, 'uk'elha whulh'i. Ndet nuhwhenich'oh 'ink'ez nuhyun chah nuhts'ú whuz'ai, ts'iyawh hukw'elha whulh'i. K'us ndan neba hincha, 'en neba hoocha, 'ink'ez k'us ndan hubudélhti, 'en hubudóolhti.

Sizi Gri budune nts'e na'a dich'oh k'enahudutsi', whuz na'a dulh dune hubuk'ehootsi'

8 'Uyoon ts'un 'oht'i gunih, 'uyoон dune k'etehtsi' 'et zeh nuhts'ú whuz'ai. 'Et nyulh dune k'entsi' t'eh, Yak'usda khunek whutl'aída'ai, 'i ts'iyawh lhaooodahla ho' aht'ah. **9** Ndai khunek Yak'usda whutl'aída'ai, 'i dune 'uljni, "Ts'ekoo k'us dune bulh tinta' 'ooht'en gunih, dune soolhghelh gunih, 'undunooh'tih gunih, 'uyoон dune be hohts'it gunih, 'uyoон yit'i, 'i ka' noohzin gunih," ni. 'Ink'ez 'onghoh khunek whutl'aída'ai t'eh, ndez na'a lhaooodoohleh, nts'e na'a k'enats'udutsi', whuz na'a nohwhulh dune hubuk'eoohotsi' huba' hoont'ah.

10 Ndán dudulh dune k'entsi', 'aw yuts'un tink'us na'a 'ooneh ghaít'ah. 'Et huwa nohwhulh dune buk'ehotsi' t'eh, 'et sih Moses be' dustl'us ts'iyawh lhaooodulhla ho' hoont'ah. **11** 'Et t'ewhunéhzin ndet whudezulh 'aw 'et neba whulatah tele. Hoh da Sizi Gri neba 'alha 'int'ah inle, k'an 'et 'o nus nilhdukw whuzzdli, 'et huwa ts'ets'oodeh huba' hoont'ah. **12** 'Aw 'et haootelh'en, 'et huwa ndai 'ut'en tsahólhgus yuh 'uts'ulh'en, 'i 'ustl'e' 'uts'ooleh 'ink'ez ndai 'ut'en 'uztelh'ilh, dzenis 'uts'ooll'h'en.* 'Et nduts'út'en hoh soo cho netsudule 'ets'udulh li'ts'oot'en. 'Ink'ez 'aw nech'a' oolhdeh ghaít'ah. **13** Ndai dzenis 'uts'ulh'en, 'i zeh 'uts'ooll'h'en. 'Et whuz na'a zeh ts'ah'un na'a yinkak

[†] **12:20** 'Et 'ut'en unzoo buts'un ahla t'eh, 'et t'eh Yak'usda ye k'utetnilh ho' 'int'ah. 'Et whuz na'a huwu nunihunoozut, ni. * **13:12** Ndi khunek newhunelhtan ho' 'utni, tsaholhgus yuh 'ut'en netsudule be 'ut'en, dzenis 'ut'en, 'i Yak'usda be 'ut'en 'int'ah ni ho' 'utni.

uzdóolts'i. Ndunnnah tahatnai bulh cha'ts'oost'en, taznutnai 'et chah 'ustl'e' ts'ooneh, 'ink'ez ts'ekoo k'us dune bulh lubeshi 'uts'ulh'en, 'et chah 'ustl'e' ts'ooneh. Lhe'ts'údulh 'ink'ez 'uts'oolnih 'et chah 'ustl'e' ts'ooneh. ¹⁴ Ndi 'ut'en ntsi', i buch'a 'uts'oot'e, 'ink'ez neMoodihti Sizi Gri 'en zeh buk'úna'a 'uts'oot'e, 'ink'ez 'aw 'o 'at neyust'e lubeshi ts'un chats'unoolht'uk.

14

Sizi Gri budune 'aw huba nats'uhoooyeh huba cha'hóot'ah

¹ 'Et ndan dune ye be 'alha 'uhoont'ah, 'i be soo cha'iltus t'eh, whute bulh tenadoohdli, 'ink'ez benah 'udoohni gunih. ² Whunulh'en, bulunah Sizi Gri hunedulh, hiyé 'alha' ninzun, 'i lait'ah huwa, huba 'álha 'uhoont'ah 'aw 'utsun chahús'al. 'Et bulunah ts'iyai tsuk ha'ahl, 'et huba 'alha 'uhoont'ah.* ³ Ndan ts'iyai, 'i a'álh, ndan 'uyat chas'al, 'et hukwa yuts'u dootnik gunih. 'Ink'ez ndan 'uyat chas'al, ndan ts'iyai, 'i a'álh, 'en chah 'aw huba nahoooyeh gunih. Yak'usda hóont'i hoh ts'iyawh hubílhchoot 'et huwa. ⁴ Ndan na'dunúhdzun 'uyoon dune ba ne'út'en huba nahutehyeh nahzun? Bumoodih 'en zeh iduténih, soo 'int'en k'us 'aw soo cha'zint'en. Dich'oh soo teyin, Yak'usda 'en yula' tet'ilh 'et huwa. ⁵ Bulunah dune 'uhuninzun whulutah dzin 'o nus whudézti, 'et bulunah 'uhuninzun, dzin totsuk ba lhulhugha zeh 'uhoont'ah. 'Et ts'iyanah nts'e na'a 'uhuninzun, 'et whuz na'a huba 'alha 'uhot'e. ⁶ Ndan whulutah dzin 'o nus whudézti ninzun, 'en njan 'et dzin neMoodihti yudóolhti ka, 'udun neóoni'ai huwa 'útni. Ndan dune dzin 'o nus chahodítí ninzun, whuz na'a neMoodihti wheyúdelhti. Ndan ts'iyaintsuk a'álh Yak'usda chanailya yúlni 'ink'ez yunali 'et yu'ahl. Ndan 'uyat chás'al, 'en chah Yak'usda chanailya yudáni. ⁷ Yinkak uztedalh 'ink'ez dáztetsah, 'aw whenich'oh 'utáhats'uhó'ahl ghaít'ah. 'Aw nuwhenich'oh duba moodih nachats'ídlah 'et huwa. ⁸ Yinkak uzdelhts'i t'eh, neMoodihti k'úne' ts'oot'en huba' hoont'ah. 'Et dáztetsah t'eh, Sizi Gri yununúdelh k'una'a dats'óotsah. 'Et huwa nts'e na'a ts'ukhuna k'us daztetsah t'eh, neMoodihti bube'ildzun ts'inli. ⁹ Christ dazsai, 'ink'ez nakhítña hoh dinadija. 'Et 'i be ndunnnah yinkak húdelhts'i 'ink'ez yahadla chah buMoodihti tele ka 'uja. ¹⁰ 'Et di ka Sizi Gri be nuhwhulhutsin hinli huba nahahyeh, k'us 'et di ka 'en hubuka cha'nuzáhzun? Nuwheni ts'iyawh Christ neba nahuteyeh ka bubut núzdutelya ho' hoont'ah. ¹¹ Njan hubugha Yak'usda be' dustl'us 'uk'e'anguz 'et 'utni,

"NeMoodihti njan ndutni, khusna hukw'u na'a,
ts'iyanah subut dugwutsi be hóoyin.

'Ink'ez ts'iyanah huba 'álha 'uhot'e Yak'usda usdli."

¹² 'Et huwa 'ilhunuh ts'inli hoh dats'ét'en, 'et Yak'usda uzduténih. ¹³ Njan whuts'un 'aw 'o 'un 'uyoon ba nachats'uhosye. 'Aw 'o 'at neyulhutsinkah Sizi Gri hich'a naóol'ah ka whuz chaoobuznoolht'uk, 'ink'ez huba dzuh 'uts'udooni gunih.

Nyun ngha t'eh nyulhutsin sizi Gri ch'a naóol'ah gunih

¹⁴ Sizi Gri 'en bugha t'ewhunúszun 'alha 'uhoont'ah 'aw 'ut'ahl, me ts'utni, 'i hoolah. 'Et whunts'ih bulunah 'uhuninzun 'i 'ut'ahl, me 'int'ah uninzzun t'eh, 'et t'eh 'en dune huba me yinli ho' 'int'ah. ¹⁵ Ndai ah'ahl 'ink'ez nuhwhulhutsinkah yuch'a' nenyoot ninzun t'eh, 'ink'ez bunalh ah'ahl t'eh,

* ^{14:2} 'Et hoh da 'udun yun k'ut whut'en buk'edéelts'i hits'un tenahududli, 'I khunai hits'u delhk'un. Bulah kw'uzdai k'ut hidelhk'un, 'i 'o 'un hiye'ooket. Bulunah Sizi Gri hunedulh 'uyat be 'ooket, 'I me 'int'ah hininzun. 'Et huwa 'aw hiyoo'ahl ghait'ah. 'Ink'ez bulunah Liwif, ndan Sizi Gri hits'u nalhuya, hukw'elh'az Moses be' dustl'us gha 'aw goso yat hoo'ahl hukwa cha'hunizun. Njan Christ be 'ut'en k'ah whebunelhtan, 'et 'aw whuz toosya hukwa cha'nuzúszun.

'et sih be nék'ets'intsi', 'i bu'et yinkak delhúts'i ho' aht'ah. Ndai ah'ah, 'i bugha ndunnah Christ hububa dazsai, 'en tinta' bóolh'en gunih. ¹⁶ Et huwa ndai nuhwhuba 'alha 'ohoont'ah 'ink'ez 'uyoon tink'us na'a howu yahutelhtuk t'eh, 'et whuch'a huwahli. ¹⁷ Njan whunulh'en, Yak'usda dune k'úne' bul'en hubuga, 'aw ts'a'álh, 'ink'ez ts'utnai, 'i bugha ílah 'ohoont'ah. Ndoni neyudélt'sut 'et huwa Yak'usda nalh ts'ah'un 'úts'ut'en, 'en bugha nedzi dóoghel, 'ink'ez ts'uhót'i. ¹⁸ Ndan Christ ndez na'a ba ne'hut'en t'eh, Yak'usda tube yúlh hoont'i 'ink'ez dune chah huba hoonzoo 'uhut'en. ¹⁹ Et huwa 'ahoolhyez neba whudezghel ts'úznoot'uk 'ink'ez lhula' ts'óodut'en. ²⁰ 'Ut'ah bugha Yak'usda be 'ut'en hoolah hólhtsilh gunih. 'Et 'alha 'ohoont'ah 'aw hoonliyaz me unli hoolah. 'Et whunts'ih ndan yute'ah hoh buba náw 'ohoont'ah 'ink'ez ya'alh t'eh, 'et sih buba dzuh 'ohoont'ah. ²¹ 'Uyat téh'ah, k'us mai too tehtnilh, k'us ndai 'ilh'en, 'i bugha nuhwhulhutsin huba nawh 'uwhut'ih, k'us huba dzuh chah ulhih, k'us ye 'alha' ninzun, 'i chah lait'ah 'ulhih t'eh, 'et ndaht'en, 'aw nuhwhuba soo cha'hóot'ah. ²² Nts'oh teh ndaht'en, be 'alha 'ohoont'ah, 'i be ndaht'en t'eh, nuhwheni 'ink'ez Yak'usda bulh zeh nuhwhuba 'ohoont'ah. Ndunnah njan dahút'en 'ink'ez 'aw hoonliyaz be k'enahot'ah hoolah t'eh, 'en degha nus hoonzoo hubuga whults'ut. ²³ 'Et whunts'ih ndunnah 'uyat á'ah 'aw huba 'alha cha'hóot'ah huninzun, 'et hiyu'ah t'eh, 'et dudzi yuh gha t'ehontézin tinta' hunt'en, hiyé 'alha 'ohoont'ah, 'i bugha 'et nduchahinil 'et huwa. 'Ink'ez ndai hoonliyaz 'uts'ulh'en, 'i, be 'alha 'ohoont'ah, 'i bugha cha'ts'ulh'en t'eh, 'et neba lubeshi hoonli.

15

'Uyoon dzi wúlhzoo zeh hukwa 'ooh't'en

¹ Nuwheni Sizi Gri ba ts'ilhtus, ndunnah lahít'ah, 'en hubula' ts'oot'en huba 'ohoont'ah. 'Aw whenich'oh zeh nedzi ts'ilhdzoo hukwa cha'ts'oost'en. ² Ilhunah ts'inli hoh nelh dune ba whutézoo ka hubula' ts'oot'en, 'o nus Sizi Gri ba hilhtus tele ka. ³ Christ 'en 'aw dich'oh duba hoonzoo hukw'únucha'it'il 'et huwa. Yak'usda be' dustl'us k'ut 'uk'une'úsduguz whuz na'a 'et'en. 'Et ndutni, "Ndan nch'a yáhalhtuk, ndai hiye nch'a yáhalhtuk, 'i ts'iyawh si sts'e' hutni." ⁴ Ndet 'uda Yak'usda be' dustl'us k'ut 'uk'e'edúguz bugha whúts'o dool'eh ka 'uk'e'éduguz. 'Et huwa soo neba nus whunilht'uk hoh ndet Yak'usda nets'u hoozi, 'i buba ts'ilh'i 'ink'ez 'i buka tsi ts'úhooli. ⁵ Njan 'et nuhwhuba hukwa' nuszun, Christ, Sizi ts'utni, 'en bugha Yak'usda soo nilyaz neba ulh'i, 'ink'ez nedzi wuzoo ka, whuz na'a uncha lhts'un 'aht'ah. ⁶ Nduht'en t'eh, 'et sih lhuga zeh uz nudzun 'ink'ez lhuga zeh lhuh yáts'ooltuk. 'Et 'ilho hoh Yak'usda Sizi Gri neMoodihti be'aBá uzdóolhti wule.

Lizwif'ink'ez 'udun yun k'ut whut'en 'ilho zeh Yak'usda hidutélhti

⁷ 'Et nts'e na'a Christ nenilh'en, whuz na'a zeh lhunoolhú'en. 'Et ndaht'en t'eh, Yak'usda ts'udutélhti. ⁸ Njan nuhwhudúsni, Sizi Gri Lizwif huba ne'ut'en suli whunénooltun ka ndet hubutsuh da Yak'usda hubuts'u hoozi 'et 'alha 'ohoont'ah wule. ⁹ 'Ink'ez 'udun yun k'ut whut'en, 'en chah huba ne'ut'en suli, 'i bugha Yak'usda ye te'ninzun, 'i yubúnelhtan, 'et huwa hidélhti. Yak'usda be' dustl'us k'ut njan ndutni,

"Et huwa 'udun yun k'ut whut'en hubutah, 'et ndan inli nyulh yaóolhtuk,
'ink'ez nyoozi 'i dóolhti."

¹⁰ 'Ink'ez doo chah 'utni,
"Nuhwheni 'udun yun k'ut whut'en 'ink'ez budune hubulh ts'iyawh neMood-
ihti dóolhti."

¹¹ Njan chah 'et dutni,

“Udun yun k'ut whut'en ts'iyawh Moodihti délhti
 'ink'ez nuhwheni ts'iyawh dóolhti.”

¹² Isaiah be' dustl'us k'ut njan chah 'et ndutni,
 “Jesse 'en yuts'u haínzut tele.

'En 'alha whusatéyah 'ink'ez 'udun yun k'ut whut'en hubuMoodih tele.
 'Ink'ez ndet hubuts'u hoozi 'et hukwa tsi huholi.”

¹³ 'Et nuhwhuba tenadusdli, ndet Yak'usda nuhts'u hoozi huba ulh'i
 whutah, 'en bugha 'et úncha nuhdzi sóo nedinzut, ndet nuhts'u hoozi nuh-
 whuba 'alha 'ohoont'ah huwa. 'Et whuz na'a 'ilhuz bulh 'óoh't'e, 'ink'ez
 ndet nuhts'u hoozi 'o nus ulhtus hoh nuhwhuba whulh'i, Ndoni ye úlhtus, 'i
 nuhyídan'ai 'et huwa.

*Paul dustl'us hubuts'un k'e'eduguz, 'i bugha 'aw chaníjut hoh hubutsun
 k'e'anguz*

¹⁴ Sulhutsinkah nuhwheni nuhgħa, 'alha t'éwhunúszun lhat hoonzoo
 'uwhulh'en, 'inkez lhat be t'ewhunudzun 'i chah t'éwhunúhzun, 'ink'ez
 soo hoonzoo whe dune whúntelhtun. ¹⁵ Ndi dustl'us k'ut bulah 'i 'aw
 whechanuzulhújut hoh nuhts'ó k'e'usges, whunaoohlúnih ka Yak'usda ye
 únzoo 'et sugħá whunt'ai 'i bugha 'ust'en. ¹⁶ 'Et t'eh Sizi Gri buba 'ust'en
 usdli, 'udun yun k'ut whut'en Yak'usda bughunek bugha hubulh yaoolhtuk
 ka. 'Et ndust'en hoh Yak'usda ba huwa' dudulti li'hoont'ah, 'ink'ez Ndoni
 'en Yak'usda ba 'udun nilya huzdli ka. 'Et whuz na'a Yak'usda hoont'i
 hubílhchoot wule. ¹⁷ 'Et huwa 'ust'ah hoonúst'i, ndai Yak'usda ba' yulh'en,
 'i be Sizi Gri délhti huwa. ¹⁸ 'Ink'ez ndet Christ dája si sugħa 'udun yun
 k'ut whut'en hik'úne' oot'en ka, 'i zeh nohwhulh yátelhtuk. Dája hubudáni
 'ink'ez huba dást'en, ts'iyawh si sugħa Christ huba daja, 'et hubugha 'aw
 whechanuzulhújut hoh nohwhulh yátelhtuk. ¹⁹ Ndoni ye ulhtus, 'i be hoolhtus
 'ink'ez ba whe' whut'en túne'whut'en chah ne'zust'en, 'et huwa Jerusalem,
 Ilyricum yun k'ut nduhólyez ts'ih, 'et ts'iyanah Christ bughunek unzoo, 'i
 ts'iyawh hubudáni. ²⁰ Ndi khunek unzoo, 'i ndunnah dune cha'hudústs'o
 Christ bugha 'en tube hubudutésnilh hukwa' nuszun. 'Aw 'uyoon dune bukoo
 hukw'úwhuz'ai 'aw 'et buk'éhos'ah hukwa cha'núszun. ²¹ 'Et whunts'ih ndez
 na'a Yak'usda be' dustl'us k'ut 'uk'e'edúguz,
 “Ndunnah 'aw hubunalh nacha'dítnil,
 'en huwhuté'ilh,
 'ink'ez ndunnah hiyulh cha'díts'il, 'en t'ehontezeħ.”

Paul 'ubulhni Rome ts'ih téyah hukwa' tet'ilh

²² Lhat nuhts'u t'ésyalh hukwa' nuszun inle, 'et whunts'ih Sizi Gri be 'ut'en
 'ulh'en inle 'et huwa 'aw nuhts'ún chatúsyal. ²³ 'Et whunts'ih 'aw 'et Sizi Gri
 be 'ut'en 'ulh'en, 'i ndoh keyah ndulhcho hoh ts'iyawh lhadúsdla. 'Et lhat
 naooduzuk yus k'ut whuts'un nuhts'un t'ésyalh hukwa' nuszun. ²⁴ Spain
 yun k'ut ts'ih teya t'eh, 'astl'iyaz wheni nuhts'un nutesya. Whuz lhgha
 díya t'eh, 'et hukwa' nahzun t'eh, 'et 'o 'un tesyalh huba sula 'oohneh.
²⁵ 'Et whunts'ih k'an 'et 'aho Jerusalem ts'un t'esyalh. 'Et dune Yak'usda
 bube'ildzun hinli, 'en hubula 'oosneh ka. ²⁶ Sizi Gri yunédulh, ndunnah Mace-
 donia 'ink'ez Achaia whut'en tube cho hukwa' huninzun sooneya be ndun-
 nah tehul'en, dune Yak'usda bube'ildzun Jerusalem húdelhts'i, 'en hubula'
 hutentilh, 'et huwa whuz tesyalh. ²⁷ Huhóont'i hoh ndunnah Jerusalem
 whut'en sooneya hubugha híne'ai. Ndunnah Jerusalem whut'en hubuts'un
 húwhulh'ai li'hint'ah 'et huwa. Lizwif, 'en hubugha 'udun yun k'ut whut'en
 Yak'usda huba 'ut'en, 'i be hoonzoo 'uhuja t'eh, 'et sih 'udun yun k'ut whut'en
 Lizwif hiye ndunidzit, 'i be bula' hooneh 'et huwa. ²⁸ Ndi 'ut'en lhadúsdla,

'ink'ez ndi hubugha íyulya, 'i ts'iyawh butl'a yála t'eh, 'et sih Spain ts'ih tesyalh. 'Et sih nuhk'osya. ²⁹ 'Et t'eeonúszun nuhghu níya t'eh, Christ bughunek unzoo, 'i ts'iyawh 'i bulh 'oosneh. 'Et t'ewhunóhzin ndi khunek unzoo, 'i dáldzoo. ³⁰ Sulhutsinkah neMoodihti Sizi Gri 'en bugha, 'ink'ez Ndoni bugha be lhk'ets'udutsi' chah, 'et 'i bugha nuhts'un tedusdlih, Yak'usda tube cho súlh buts'un tenadoohdli. ³¹ 'Et ndunnah Judea whut'en ndan 'aw huba 'alha cha'hót'ah dachasuhóosdle, 'ink'ez se' 'ut'en Jerusalem ts'ih, dune Yak'usda bube'ildzun, 'en bube 'ut'en 'úlh'en huba whutézoo. ³² 'Ink'ez Yak'usda hukwa' ninzun t'eh, hoonúst'i hoh nuhts'un tóosya. 'Et sih soo na'ulhts'udootni. ³³ 'Ink'ez ndi be whúdezghel, 'i Yak'usda huwa yú'ah, 'i ts'iyawh uncha nuhwhulh 'óot'e. 'Et ndoh honeh.

16

Paul, ndunnah Rome húdelhts'i dahooja hubúlhni

¹ 'Et njan Cenchrea keyah Sizi Gri bugha 'ilhuhowezdel hubutah 'ilhunuh ts'eke, Phoebe hiyúlhni, 'en 'ahoolhyez nuwheni neba ne'ut'en. Ndán 'int'ah nt'ewhunoohzin. ² Nuhghuninya t'eh hoonáht'i hoh Sizi Gri boozí bugha koo daóolhtelh ka. Dune Yak'usda bube'ildzun ahli, whuz na'a ts'ah'un na'a nuhwhuba 'uhoont'ah 'utehnílh huba. Ndai ye ndunidzit, 'i chah be hubula 'ooht'en. Lhannah la'et'en ho' 'int'ah. Si chah sula 'et'en.

³ Priscilla 'ink'ez Aquila suba dahooja hubudóohni. Christ Sizi ts'utni, 'en bugha sulh 'úhut'en inle. ⁴ 'En hiye khúna, 'i 'ants'i huba 'int'ah hoh suhúlhyih inle. 'Et dahúja huwa, si 'ink'ez 'udun yun k'ut whut'en Sizi Gri huba 'ilhuhowezdel, ts'iyawh chanailya hubuts'útni.

⁵ 'Ink'ez ndunnah Christ huba bukoo 'ilhuhowezdel, 'en chah ts'iyawh suba dahooja hubudóohni.

Sulh dune Epaenetus 'en chah suba dahooja dóohni. 'En Achaia yun k'ut 'udechoo Christ buba 'alha' yint'ah suli.

⁶ Mary 'en chah suba dahooja dóohni. 'En chah tube hooncha hoh nela 'ut'en ínle.

⁷ Andronicus 'ink'ez Junias 'en chah suba dahooja hubudóohni. Sunat dunekah 'uhint'ah, sulh tsak'ehudan'a ínle. Whel'a 'en hubutah dune ncha hinli 'ink'ez sutsuh da Christ hits'un nalhú'a inle.

⁸ Amplias 'en chah Sizi Gri yunéyah 'int'ah. Tube buk'esi', suba dahooja dóohni.

⁹ Urbanus dune, 'en chah nelh 'ét'en Christ be 'ut'en 'uts'ulh'en hoh 'ink'ez sulh dune Stachys 'en chah suba dahooja budóohni.

¹⁰ Christ yunéyah, Apeles, ts'iyanaah ba unzoo, 'ink'ez Aristobulus 'et bukoo húdelhts'i, 'en chah suba dahooja hubudóohni.

¹¹ Snadun Herodion 'ink'ez ndunnah Narcisus bukoo húdelhts'i Sizi Gri yunédhulh, 'en chah suba dahooja hubudóohni.

¹² Tryphaena 'ink'ez Tryphosa 'en chah Sizi Gri be 'ut'en 'uhulh'en, 'ink'ez sulh dune Persis tube hooncha, 'i be Sizi Gri be 'ut'en tube huwa ghúna ínle, 'en chah suba dahooja budóohni.

¹³ Rufus 'en degha nus soo Sizi Gri ba 'ut'en, be'ama chah 'ants'i se'ama li'ínt'ah, 'en chah suba dahooja budóohni.

¹⁴ Asyngritus, Phlegon, Hermas, Patrobas, Hermes, 'et 'onghoh nelhutsinkah hubulh 'út'en, 'en chah suba dahooja hubudóohni.

¹⁵ Philologus 'ink'ez Julia chah, Nereus 'ink'ez bulhtus chah, 'ink'ez Olym-pas 'ink'ez dune Yak'usda bube'ildzun, 'en hubulh 'út'en, ts'iyawh suba dahooja hubudóohni.

16 'Et dahooja lhudáhni t'eh, 'et sih lubeshi bughu hoolah be nalhudunoohots'oos.* 'Et ndunnah njan Christ bugha 'ilhuhowezdel, Rome whut'en dahooja nuhwhuts'útni.

Paul ndo búlhni, ndunnah Yak'usda bughunek 'ats'un na'a wheyodulh'eh buka tsi hóhli

17 Sulhutsinkah njan hubugha nuhwhugha dúsni, k'us ndan nuhtah ndunnah nts'e na'a whenhodalh'i whuch'a yálhtuk, 'en bugha lhch'a nidutehdulh 'ink'ez nuhwhuba hoontsi' tele. 'Et ndunt'ah buka huwolhle 'ink'ez buch'a naoohlú'ah. **18** 'Et ndunt'ah dune neMoodihti Sizi Gri hik'únucha'ust'en. Dich'oh k'una'a 'uhut'en, 'ink'ez nts'e na'a dich'oh hukwa' huninzun hukw'úne' 'uhut'en. Nanuhona'ah hoh khunek unzoo, 'i be nohwhulk yáhalhtuk, 'et ndunnah hukwa tsi chahuhóoliwhuz na'a nabonte'ah. **19** Nts'e na'a Sizi Gri be 'ut'en k'ah hik'une' aht'en ts'iyanah whulh 'údants'o. 'Et huwa tube nuhwhuba hoonúst'i. Whunih wahle nuhwhuba hukwa' nuszun ndai 'ut'en unzoo, 'i bugha, 'ink'ez lubeshi k'únucha'zooh't'en. **20** Yak'usda 'en whudezghel negha whu'ah, 'aw chatussit hoh Satan nuhketl'ah hoolah yutelhtsilh. 'Aw 'et neMoodihti Sizi Gri ye únzoo, 'i nuhwhubulh 'óot'e ka. **21** Timotheus, sulh 'út'en, dahooja nuhwhúlhni. 'Ink'ez snatnekoo Lucius, Jason, Sosipater, 'en chah dahooja nuhuwhútni. **22** Terteus suhútni, si 'usja ndi dustl'us Paul ba 'uk'une'zíguz. Si chah dahooja nuhwhudúsni. **23** Gaius, 'en bukoo dásunilhti, 'en chah dahooja nuhwhúlhni. 'En bukoo 'et Sizi Gri hunedulh 'ilhuhowezdel. Erastus, 'et keyah whut'i sooneya ghundli, 'ink'ez nelhutsin Quartus, 'en chah dahooja nuhuwhútni. **24** NeMoodihti Sizi Gri ye únzoo, 'i ts'iyawh nohwhulk 'óot'e. 'Et ndoh honeh. **25** Yak'usda uzdóolhti. 'En 'int'ah ye ulhtus, 'i yít'i Sizi Gri buba ulhtus nuhoolhtselh ka. Nts'e na'a 'un whudáni whuz na'a 'utehnílh, ndet whehodalh'i, Sizi Gri bughunek unzoo, 'i bugha. 'Uda 'aw dune ndi khunek unzoo, 'i highu t'ehonízun. Hoh da Yak'usda ndi yun k'ut 'uyinla, 'et whuts'un njan whe' hoont'ah hooyah buch'a nónut'i inle. **26** 'Et k'an 'et ts'iyawh nt'eoonedzin. 'Ink'ez Yak'usda bughunek nus be t'eoondzun, 'i dune hudéadowh ts'iyanah t'ehinanzin. Yak'usda 'ilhuz wheni khuna, 'i khunek netl'aídai, 'i ndi yun k'ut dune ts'iyawh t'éhinanzin. 'Et t'éhonízun Sizi Gri bughunek hiyóolhchoot hoh hik'úne' oot'en ka. **27** Yak'usda 'en zeh whunih ho' 'int'ah. Sizi Gri 'en bugha 'ahoolhyez uzdóolhti 'ilhuz wheni. 'Et ndoh honeh.

* **16:16** Whuz keyah 'et whuz na'a hohoont'i hoh 'ilhunahowudulh.

Paul, Corinth Whut'en 'Udechoo Hubuts'un Yuk'e'ánguz

Yak'usda ba 'ilhunahuwúdulh keyah Corinth ts'ih, 'en Paul dahooja hubulhni

¹ Si, Paul ndet Yak'usda hukwa' ninzun k'una'a, 'i be Sizi Gri 'en ba whél'a suhútni, 'ink'ez ndun nelhutsin Sosthenes hiyulhni, 'en chah, ² ndunnah keyah Corinth ts'ih Yak'usda ba 'ilhunahuwésdel hinli, nuhwheni ndi dustl'us k'ut nuhts'o k'e'usges. Christ, Sizi ts'utni, 'en bube'ildzun ahli 'et huwa 'et Yak'usda ba 'udun ninwhuninla. Dune Yak'usda bube'ildzun nuhowhúttni. Nuhwheni 'ink'ez ndunnah neMoodihti Sizi Gri yoozi be yuts'u tedudlih, 'en chah dune Yak'usda bube'ildzun 'uhint'ah. 'En hubuMoodihti unli 'ink'ez nuwheni chah neMoodihti unli. ³ Ne'aBá Yak'usda 'ink'ez Sizi Gri neMoodihti ts'un nuhwhuba tenadusdli, 'et hoh nuhdzi dooghel 'ink'ez ye unzoo, 'i nohwhulh 'oot'e.

Yak'usda 'en bugha ts'iyaintsuk nuhghalts'ut

⁴ Sizi Gri bube'ildzun ahli 'et huwa Yak'usda ye unzoo, 'i nuhghalts'ut. 'Et huwa suYak'usda ts'un 'ahoolhyez schanailya dusni. ⁵ Yak'usda ye unzoo, 'i nuhghalts'ut. 'Et huwa nts'e na'a 'en bugha nt'eoonehzin 'ink'ez nts'e na'a bughi yalhtuk, 'et whuz na'a 'en bugha ts'iyaintsuk hoh 'o nus unzoo sahli. ⁶ Nts'e na'a Christ bugha nuhwhudáni, 'i ts'ah'un na'a nuhdzi yudelts'ut. ⁷ 'Et huwa ndi nuhgha unt'ai, 'i 'aw nuhwhuba ndukw chailah ho' hoont'ah, 'ink'ez neMoodihti Sizi Gri netah be hooduteltsilh, 'et huba ilh'i. ⁸ 'Et dek'elh'az dzin whuts'un, 'et 'en bugha be ts'ilhtus, 'i be nidutéhyah 'et whuts'un. 'Ink'ez neMoodihti Sizi Gri budzin t'eh, 'et dzin 'aw be nuhk'eholts'it, 'i whutélah. ⁹ Yak'usda 'aw nuhla dootnih ghat'ah. 'Et huwa buYe' bulh 'ilho wahle ka nuhka'dani. NeMoodihti Sizi Gri 'en 'int'ah.

Lhch'a uzdetni 'et Christ neba hukwa' ninzun ih?

¹⁰ Sulhutsinkah, neMoodihti Sizi Gri 'en boozi bugha nuhts'un téoduslih, 'et nuhwhenich'oh nuhtah lhch'a natehdulh whuch'a, 'et huwa nuhwheni 'ilhuh k'una'a zeh nuni untehzut nuhts'un hukwa' nuszun. 'Et hoh 'ilhunah ahli hukw'u na'a utehnihilh 'ink'ez ts'iyaintsuk lhgha nuni untehdeh 'ink'ez lhk'una'a zeh uteht'ilh. ¹¹ Sulhutsinkah ndun Chloe bukoo húdelhts'i, bulunah, 'en bugha nuhwheni lhedadulh, 'et whulh 'óozalhts'a. ¹² Njan 'et 'un whudusni, bulunah nuhtah njan duhutni, "Paul nésyalh 'ust'ah," k'us "Apollos nésyalh 'ust'ah," k'us "Cephas nésyalh 'ust'ah," k'us "Christ nésyalh 'ust'ah," 'et hukwa lhedadulh. ¹³ 'Et daja nuhzun ih? Christ lhch'a ts'unult'uk ih? 'Awundooh! K'us Paul 'en ih lhdulalhgus k'ut nuhwhuba dazsai? 'Awundooh! K'us Paul boozi, 'en bugha ih nuhwheni too be' lhúya? 'Awundooh! ¹⁴ Yak'usda chanailya dusni hoh nuhwheni nuhtah 'aw 'ilhunuh whunts'i too be cha'usdlil ho' hoont'ah. Crispus 'ink'ez Gaius 'en zeh too be' busdla, ¹⁵ doo ka bulunah 'uhudooni, sich'oh soozi bugha dune too be' úlh'en hudooni tulih. ¹⁶ 'Ink'ez Stephanas bukoo húdelhts'i, 'en chah too be' busdla. 'Uyoon 'en chah tulih too be' usdla 'et 'aw whunachasulhúnik. ¹⁷ 'Aw dune too be' oolh'en huba ilah hoh Christ whuz de ha salh'a. Khunek unzoo, 'i be hubulh yatelhtuk huba 'usinla. 'Aw dune khunek whunih be ilah njan nohwhulh yalhtuk, doo ka Christ bulhdulalhgus 'ants'i 'et 'int'ah wule.

Yak'usda ye ulhtus, 'i 'ink'ez ye whunih Christ 'en 'int'ah

¹⁸ Ndunnah tinta' hunesdel, 'en ndi khunek lhdulalhgus bugha, 'en 'ants'i khunek zeh huba yinli. 'Et whunts'ih nuwheni k'us ndan 'i be uzdujih, ndi

khunek 'i Yak'usda ye ulhtus, 'i neba' hoont'ah. ¹⁹ 'Et whuz na'a Yak'usda bughunek 'uk'e'edúguz hoh ndutni,
 "Ndan whunih na'hududil'i,
 'en hiye whunih, hoolah telhsilh,
 'ink'ez ndan ts'iyaintsuk t'eooninzun,
 'en hiye t'eooninzun, 'i hoolah telhsilh."

²⁰ Nts'e 'ohoont'ah huwhunih hoonli? 'Aw huhoolah. 'Ink'ez nts'e 'ohoont'ah Moses be' dustl'us 'uk'ununa'úsduguz hoonih? Huhoolah! 'Ink'ez nts'e 'ohoont'ah ndan ndi yun k'ut degha nus whunih na'hudunudzun 'uhint'ah? Huhoolah ho' hoont'ah! 'Et 'alha' hoont'ah ndai ndi yun k'ut whut'en ye whunih, 'i Yak'usda ts'iyawh be ts'uwhusnik yulhtsi? ²¹ 'Et Yak'usda ye whúnih njan nduhoont'ah, ndi yun k'ut whut'en, ndai hiye whunih 'i be 'en 'aw Yak'usda t'ehinízun. 'Et k'us ndi khunek unzoo, 'en huba 'ants'ih k'una'a be yats'ulhtuk li'hoont'ah, 'et whunts'ih 'i be Yak'usda hoont'i hoh ndun huba 'alha' hoont'ah, 'en hubulhyih. ²² Soo cho whunulh'en, ndunnah Lizwif huwa 'et'en zeh hukwanuta 'ink'ez ndunnah Greek, 'en hiye whunih 'i zeh hikunuta. ²³ 'Et whunts'ih nuwheni Christ lhdulalhgus k'ut dazsai, 'et zeh howu yats'ulhtuk. 'Et 'alha' 'i be ndunnah Lizwif 'ankw'us huba dzuh suli, 'ink'ez ndunnah Greek, 'en ndi khunek 'ants'ih huba yuzdli. ²⁴ 'Et whunts'ih ndunnah hudutejih ka buka' dani, Lizwif hinli 'ink'ez Greek hinli chah, Christ 'en Yak'usda ye ulhtus, 'i huba unli, 'ink'ez ye whunih chah, huba unli. ²⁵ Ndai Yak'usda ye whusnik, 'i dune ye whunih, 'i degha nus 'ultus, 'ink'ez ndai Yak'usda ye laít'ah, 'i dune ye ulhtus, 'i degha nus 'ultus 'et huwa.

NeMoodihti 'aw 'en zeh ts'udóolhti huba' hoont'ah

²⁶ Sulhutsinkah nuhwheni hoh da dutehjih ka nuhka' dani inle, 'et dant'ah ahli t'eoonahzun. Nts'e na'a ndi yun k'ut whut'en whuz na'a 'uhuninzun ts'iyawh, 'aw lhanah ilah nuhtah duba nahuwhútnih hinli, 'ink'ez 'aw lhanah ilah nuhtah dune be hoolhtus hinli, 'ink'ez 'aw lhanah ilah nuhtah dune ncha hinli. ²⁷ 'Et whunts'ih ndez na'a Yak'usda hukwa' ninzun, ndi yun k'ut ndan hiye whusnik, 'i be ndunnah duba nawhutnih, 'en yooya ubutelhtsilh. 'Ink'ez ndi yun k'ut ndai hiye lait'ah huninzun, 'i be duba nahultus, 'en yooya ubutelhtsilh. ²⁸ 'Et ndunnah tel'en hoh whuzdli, 'ink'ez ndan yuch'a yuk ninelya, 'en Yak'usda 'utahaoobanla. 'Ink'ez doo chah ndai 'ants'i unli whunts'i, 'i chah 'utahayanla, 'i be ndai ndi yun k'ut 'int'ah unli, 'i be hoolah yutelhtsilh. 'Et whuz na'a Yak'usda hukwa' ninzun. ²⁹ 'Et whuz na'a 'aw 'ilhunuh whunts'i Yak'usda nalh ncha na'dudool'i ghait'ah. ³⁰ 'Et huwa Yak'usda bugha Christ, Sizi ts'utni, 'en buyudáhda. 'En 'int'ah Yak'usda bugha be ts'uwhunih neba yulhtsi, 'ink'ez be ts'ah'un na'a 'ohoont'ah chah neba yulhtsi, 'en bugha 'udun neníninla, 'ink'ez nenaonket chah 'uja. ³¹ 'Et huwa 'et ndez na'a 'uk'e'ánguz hoh ndutni,
 "Ndan hidutélhti, NeMoodihti 'aw 'en bugha zeh uzdóolhti huba' hoont'ah."

2

Sizi Gri lhdulalhgus k'ut neba dazsai, 'aw 'et zeh nohwhulh yatelhtuk

¹ Sulhutsinkah ndet nuhwhuts'un whusáya hoh Yak'usda bugha nohwhulh yalhtuk, khunek dezti 'i be 'ink'ez ndi yun k'ut hiye whunih be chah 'aw nohwhulh yachalhtih. ² Seni lhadusdla 'et huwa 'udechoo nuhtaníya hoh 'aw 'udun seni tah whudoo'a hukwa cha'nuszun. Sizi Gri bugha 'ink'ez 'en lhdulalhgus k'ut neba dazsai, 'et zeh seni tah whudoo'a hukwa' nuszun inle. ³ 'Et whunts'ih nuhtaníya da, 'et whenlhújut 'ink'ez suyust'e dulduz 'et hubugha chah 'ink'ez hooyasli. ⁴ 'Ink'ez sughunek be nohwhulh yalhtuk,

'aw ndi yun k'ut dune ye whunih khunek ulhtus, 'i be nohwhulh yachalhtih. 'Et whunts'i sughunek Ndoni ts'un hadelts'ut 'ink'ez dílhtus 'int'ah. ⁵ 'Et hoh Yak'usda nuhwhuba 'alha 'int'ah, Yak'usda ye ulhtus, 'i be, 'aw dune ye whunih, 'i be ilah.

Yak'usda ye whunih, 'i be yats'ulhtuk

⁶ 'Et whunts'ih k'us ndan dune suli, 'en ndi khunek whunih 'i be hubulh yats'ulhtuk. 'Et whunts'ih ndai yun k'ut be whutni, k'us ndi yun k'ut whumoodih, 'en hiye whunih, 'aw 'i be ilah be hubulh yats'ulhtuk. Ndunnah 'ants'i hoolah huteleh. ⁷ 'Et k'us Yak'usda ye whunih, 'i be yats'ulhtuk. Ndi khunek huba whe' hoont'ah hooyah 'ink'ez nunut'i bulh 'int'ah. Yak'usda ndi yun itelilh whutsuh 'et whuz na'a lhaoodinla. 'I neba dézti ho' 'int'ah. ⁸ Ndi khunek neba whe' hoont'ah hooyah, 'i ndi yun whumoodih 'aw 'ilhunuh daja ni t'eininzun huhoolah. 'Et ndi khunek neba whe' hoont'ah hooyah t'ehininzun t'eh, 'et t'eh neMoodihti, ndun dezti, 'en 'aw da lhdulalhgus k'echahiyiltil wule. ⁹ 'Et whunts'ih ndez na'a Yak'usda neba lhaoodinla. Nts'e na'a 'uk'e'eduguz, 'et huwa 'uhooja hoh ndutni,

"Ndunnah Yak'usda k'entsi', ndet Yak'usda huba lhaoodinla,

'i ts'iyawh duna be chahuhós'en,

'ink'ez dudzo be 'aw chahodíts'il,

whuz huba hooncha k'et 'aw howu nuni hunoozut ghat'ah."

¹⁰ 'Et whunts'ih Yak'usda buyégha 'i be whunénelhtan. 'Et Yak'usda bugha Ndoni neba nahoole ts'iyawh newhuneílhtan, ndai ye yuk 'int'ah, 'i whunts'i, 'i chah yunenulhtan. ¹¹ 'Et nuhtah nts'e na'a dune dahint'ah 'aw dune ts'ah'un t'ebuninzun huhoolah. Buyégha buyudin'ai, 'i bugha zeh t'eoónínzun. 'Et whuz na'a Yak'usda dant'ah 'aw t'eininzun hoolah, Ndoni 'en zeh t'einínzun. ¹² 'Aw ndi yun k'ut ne'whut'en huwa ilah Yak'usda bugha t'ets'oninzun, Yak'usda buyégha negha idé'ai. 'Et ndai Yak'usda 'aw buk'elhachats'uhoolhtsil negha íyanlih, 'i ts'iyawh t'ets'unoozeh ka. ¹³ 'Ink'ez ndi bughu yats'ulhtuk, 'i 'aw dune ye whunih ilah 'int'ah hoh whuneodulh'eh. Ndoni 'en bugha whuts'odul'eh. 'I zeh bughu yats'ulhtuk. 'Et whuz na'a nts'e na'a be 'alha' nudzun, 'i Ndoni ts'un hadúlts'it, 'i 'ink'ez nts'e na'a Ndoni ye yalhtuk, 'i ts'iyawh lhuzih niztelelh. 'Et whuz na'a Ndoni whuneodulh'eh. ¹⁴ 'Et whunts'ih ndan Ndoni chait'ih, ndai Yak'usda buyégha buts'un haidults'it, 'i 'aw chayulhchoot, whusnik be hoonli k'una'a ba'yint'ah 'et huwa. Soo Ndoni 'en bugha zeh t'ehontezech, 'et huwa Ndoni daja ni 'aw t'eoónoozeh ghat'ah. ¹⁵ 'Ink'ez ndan Ndoni ye dinda unli, 'en ts'iyawh nt'eoóninzun. 'Aw 'uyoon dune yuba nahuhoooyeh hoolah. ¹⁶ 'Et whuz na'a 'uk'e'eduguz hoh ndutni,

"Ndán t'eoóninzun neMoodihti daja ninzun,

k'us ndan whuyodulh'eh hoh hoonli t'ewhuntezech?"

'Et whunts'ih nuwheni Christ beni neghu dez'ai, 'et huwa nuwheni t'ets'oninzun.

3

Ndoni buk'unucha'zaht'en ahli

¹ 'Ink'ez sulhutsinkah nuhwheni Ndoni k'une' 'uhet'en k'una'a, 'et 'aw whuz na'a nohwhulh yaoolhtuk ghat'ah. 'Et whunts'ih nuhyust'e lubeshi buts'un hunint'uk k'una'a, 'et whuz na'a nohwhulh yalhtuk. Christ bube'ildzun ahli 'et whunts'ih 'ants'i 'awhuz 'uskeh ahli hukw'u na'a aht'ah. 'Et whuz na'a nohwhulh yaoolhtuk huba' hoont'ah. ² 'Uts'oo nuhgha lhdzoh. 'Ink'ez 'aw dut's'un, 'i ilah nuhghas'ah, 'aw teh'ulh huba soo cha'ilcho 'et huwa. 'Ink'ez 'awhuz teh'alh huba soo cha'aht'ah. ³ 'Awhuz nuhyust'e lubeshi

ts'un nint'uk. Nuhtah 'oolnih, 'i nuhtah hooni, 'ink'ez lhedadulh, 'ink'ez lhelhdowh ninahdel hukw'u na'a ahja. 'Et whuz na'a ndaht'en t'eh, 'et 'alha 'awhuz nuhyust'e lubeshi ts'un nint'uk hoh aht'ah. Ndi yun k'ut whut'en k'una'a ne'áht'en. ⁴ Ilhunuh 'utni, "Si Paul nésyalh 'ust'ah," 'ink'ez 'uyoon chah 'et ndutni, "Apollos nésyalh 'ust'ah." 'Et whuz na'a ndudahni t'eh, 'et 'alha ih 'awhuz nuhyust'e lubeshi ts'un nint'uk?

Yak'usda 'en bugha zeh ts'unteyeh. Soo cho khahdli, ndet dzin whusawhélts'ut t'eh, et ts'iyawh 'ilho 'ut'en kwun be t'entedzeh

⁵ 'Et huwa sudutehnih hukwa' nuszun, Paul ndan unli, k'us Apollos 'en chah ndan 'int'ah? 'Ants'i Yak'usda ba ne'hut'en zeh 'uhint'ah. 'En bugha nuhwheni huba 'alha' hoont'ah sahli. Nts'e na'a neMoodihti Yak'usda ba ne'ut'en 'ilho hubugha ooni'ai, 'et whuz na'a 'uja. ⁶ 'A'nusdle, Apollos too be nainulhtsul, Yak'usda hainulhyeh. ⁷ 'Et huwa ndan 'a'nanla, k'us ndan too be nainulhtsul, 'en 'ants'i 'uhint'ah. Yak'usda 'en bugha zeh hanteyeh. ⁸ 'Aw 'et 'a'nanla 'ink'ez too be nainelhtsul, 'en 'ilhunah zeh 'uhint'ah. 'Et whunts'ih nts'e na'a 'ilhunah hinli hoh dahét'en huwa, 'et whuz na'a huba 'uk'elha whutele. ⁹ 'Et huwa nuhwheni Yak'usda bube'ildzun 'ink'ez 'en ba lhulh 'uts'ut'en ts'inli. 'Ink'ez nuhwheni Yak'usda buha'niyeh k'et ahli 'ink'ez Yak'usda bukoo chah ahli. ¹⁰ Yak'usda ye unzoo, 'i nts'e na'a sugha ini'ai, 'et 'i bugha si, koo 'uwhulh'en be whunih k'una'a li'ust'ah, 'ink'ez ndi koo buk'oh whuz'ai, 'i lhadusdla. 'Ink'ez ndan nts'e na'a 'uwhutelih, soo cho huwolhle nts'e na'a koo 'uwhulh'en hukw'u na'a. ¹¹ 'Aw dune, 'udun koo buk'ehoolts'uk, 'i ooleh ghait'ah. 'I 'ilho 'uda 'uhooja, 'ink'ez ndi koo buk'oh whuz'ai, 'i Sizi Gri, ndun nets'u yoozi, 'i 'en 'int'ah. ¹² 'Et ndi koo buk'oh whuz'ai, 'i ndan nde na'a 'uwhutelh'ilh hoh gold, silver, tse dézti, 'i k'us duchun, tl'o, tl'o zukw, 'et 'i be 'uhoolya t'eh, ¹³ 'et ndet dzin whusawhélts'ut t'eh, 'et ts'iyawh 'ilho 'ut'en kwun be t'entedzeh. Nts'e na'a be 'uhoolya, 'i kwun be t'enedzin hukw'u na'a. ¹⁴ Ndan ndi be 'uhoolya, 'i kwun be chadik'il t'eh, 'aw 'en zeh whuba k'elha whutele. ¹⁵ 'Et ndan ndi be 'uhoolya, 'i dank'un t'eh, 'et t'eh 'en ts'iyawh tinta hotelelh. 'Et whunts'ih koo 'uhoonla kwun tah hanabanla hukw'u na'a ubutelhyih. ¹⁶ 'Aw t'eoonuzuhzun nuhwheni Yak'usda hubuluglez whucho ahli 'ink'ez Ndoni nuhyudínda? ¹⁷ Ndán Yak'usda bukoo tinta' whunilh'en, 'en chah Yak'usda tinta' yutelh'ilh, Yak'usda hubuluglez whucho lubeshi huwu hoolah 'et huwa. 'Ink'ez nuhwheni ndi luglez whucho ahli.

Ndi yun k'ut be whutnih 'aw buk'unucha'ts'oost'en

¹⁸ Khun nuhwhenich'oh na'dunont'ah gunih. 'Et nuhtah 'ilhunuh usda hoh ndi yun k'ut ye whunih be dune whunih na'dunúdzun t'eh, 'et t'eh dich'oh ndi yun k'ut whusnik hininzun, 'i whuz na'a na'dudooltsilh huba' hoont'ah. 'Et hoh ts'ah'un na'a whunih dune hutele. ¹⁹ Ndi yun k'ut ye whunih, 'i Yak'usda ba whusnik k'una'a 'int'ah. 'Et whuz na'a 'uk'e'édeguz, "Ndunnah whunih dich'oh hiye whúsnik, 'i be Yak'usda uboolhgooh." ²⁰ 'Ink'ez njan 'uk'e'édeguz hoh ndutni, "Ndunnah whunih nts'e na'a nuni hunuzut, neMoodihti t'eooninzun, 'i 'ants'i gaih unli." ²¹ Ts'iyawh nuhwhe'ildzun 'ohoont'ah. 'Et huwa 'aw 'ilhunuh dune 'o nus unzoo uzdooni ghat'ah. ²² Paul, k'us Apollos, k'us Cephas, k'us ndi yun k'ut, k'us be ts'ukhuna, 'i k'us be yats'adlah, k'us k'an 'et ndai ts'ít'i, 'i k'us ndet whusawhútels'ulh, 'i ts'iyawh nuhwhe'ildzun 'ohoont'ah. 'Et huwa 'aw 'ilhunuh dune 'o nus unzoo uzdooni ghat'ah. ²³ Nuhwheni Christ bube'ildzun ahli, 'ink'ez Christ, 'en Yak'usda bube'ildzun unli.

4

Yak'usda bugha neba whe' hoont'ah hooyah, 'et netl'ahó'ai

¹ 'Aw 'et dune 'et ndez na'a neghu nuni hunoozut, nuwheni Christ be 'ut'en 'uts'int'ah, 'ink'ez ndai Yak'usda bugha huba whe' hoont'ah hooyah, 'et whe nuwhuts'untelhtun ka netl'ahó'ai. ² 'Aw 'et zeh ilah, ndan yutl'aho'ai, 'et ndan dune hit'anínootan huba' hoont'ah. ³ 'Et nuhwheni suba nahuzúhya t'eh k'us 'uyoon chah but niníya, 'ink'ez suba nahuhezya t'eh, 'et whunts'ih ts'iyawh 'ants'i suba 'uhoont'ah. 'Aw sich'oh whunts'i duba nahoosdeh għait'ah. ⁴ 'Aw dahóont'ah suts'un ilah, 'aw t'eoonuzúszun, 'et whunts'ih 'aw 'et huwa ilah ts'ah'un dune usdli. NeMoodihti 'en 'int'ah suba nahéyelh 'et huwa. ⁵ 'Et huwa ndet dzin whusawħütelts'uh whuts'un, 'aw hoonliyaz huba nahoohyeh hoolah. NeMoodihti whusateyalh whuts'un whuba lh'i. 'En 'int'ah ndi tsahólgħu yuh ts'ih nunúl'i, 'i ts'iyawh ts'et hanaítelh. 'Ink'ez nts'e na'a dune budzi yuh ts'ih 'uhuninzun, 'i ts'ianah ndi ts'iyawh bunalhts'et haóotelh. 'Et hukw'elh'az Yak'usda 'ilhunah hinli hoh hoonzoo hoh hubulh huba whudutelhti.

Lhanah dóolhti, k'us lhanah nuhwhuba 'ants'i wule gunih

⁶ Sulhutsinkah nuwheni si 'ink'ez Apollos bulh ndai bugha 'uts'ut'en, 'i k'una'a nuhwheni nuhwhuba. 'Et hoh nuwheni negha 'o nus hodoolħ'eh. Ndi 'uk'e'eduguz, 'i 'o 'un khunek butanaóodooh'ah gunih. 'Et hoh 'ilhunuh délhti, k'us 'ilhunuh nuhwhuba 'ants'i wule gunih. ⁷ Ndān 'un whinla 'uyoon ndulħút'ah nuhwhulhtsi? Hoolah! Di zeh 'int'i ndai nghá chaíkulh? Hoolah! 'Et hoonli ngha ninkat t'eh, 'et di ka howindlo hoh 'aw hoonli sgha chaíkulh dutenlh? ⁸ 'Aw 'et lhai aht'i. 'Aw 'et soo deh'a aht'ah. Nuwheni nuhwhu'et whunts'i, hubudayi cho k'una'a aht'ah. 'Et 'alha uncha 'et whuz na'a aht'ah. 'Et huwa nuwheni chah noħwhulħub hubudayi cho ts'oole. ⁹ 'Ink'ez ndunuszun nuwheni whel'a 'en 'udék'elh'az 'uts'int'ah 'et whuz na'a Yak'usda ne'inla. 'Ants'i ts'ianah nalh dahutetsah hukw'u na'a ne'inla. Ts'ianah ndi yun k'ut whuniz neninħinla hukw'u na'a hoh neħunilħ'en, lizas 'ink'ez dune chah 'en ts'iyawh. ¹⁰ Nuwheni Christ ba ts'uwhusnik ts'inli, 'et nuhwheni Christ bulħ whunih ahli. Nuwheni lats'it'ah 'ink'ez nuhwheni nulħtus. Nuhwheni dune nħħa ahli, 'et nuwheni 'aw chats'uditi ts'inli. ¹¹ K'an 'et dzin whuts'un neye'ults'ilh 'ink'ez t'a'ts'ōosde. Nenaiħ chah chaizooh 'ink'ez 'ants'i hoh nuts'iya koo chah chats'uhoot'ih, 'ink'ez dune ne'huzula. ¹² Nuwhenich'oh nela be 'uts'ut'en. Hoontsi', 'i khunek be negħu yahalhtuk 'et whunts'ih nuwheni khunek unzoo, 'i be hubulħ yáts'ulħtuk. Dzuh nenúħulħdzut 'et whunts'ih soo whulħ ts'uziñ. ¹³ Nech'a yahalhtuk 'et whunts'ih nuwheni nelħi dunedka k'una'a be hubulħ yats'ulħtuk. Ndi yun k'ut 'untulkat li'ts'uja. K'an 'et whuts'un ndi yun k'ut ntsi'ya k'una'a 'uts'int'ah suli.

Suzkeh k'una'a nuhk'esi', 'et huwa khunek ulħtus, 'i be nuhwhulħ yalħtuk

¹⁴ Ndi 'uk'une'zíguz, 'i 'aw be yooya nuhtelsilħ huba ilah usdla. Suzkeh k'una'a nuhk'esi', 'et huwa khunek ulħtus, 'i be nuhwhulħ yalħtuk. ¹⁵ Ndi yun k'ut soo degħa nus dune lhanah hoh Christ bugħha whenohodulħ'eh hoonli t'eh, 'et whunts'ih 'aw lhanah ilah nuhwhe'abá k'una'a chanohonilħ'en. Christ, Sizi ts'utni, 'en bughunek unzoo, 'i be si sugħa be ts'ukħuna, 'i ahti 'et huwa nuhwhuba sīli. ¹⁶ 'Et huwa nuħts'u tedusdli si sk'una'a 'ooħt'e. ¹⁷ 'Et huwa ndun Timothy nuħts'u whelħ'a. 'En neMoodihti bugħha suye' buk'esi', 'en 'unint'ah. 'Ink'ez Christ bugħha 'i ts'iyawh 'aw yula dootnih għait'ah. 'Et sk'una'a neMoodihti bulħ be 'ut'en k'ah, 'et nuhwhuba nuwhunatelnih. 'Ink'ez ndulħcho hoh ndet Yak'usda ba 'ilhunahu wuđlu, nts'e na'a whubodulħ'eh sih, 'i ts'iyawh nuhwhuba whunatelnih. ¹⁸ 'Et nuhtah bulunah

'awhuz 'uhududelhúti, Paul 'aw whusachatesyal huninzun 'et huwa. ¹⁹ 'Et whunts'ih neMoodihti hukwa' ninzun t'eh, 'et sih 'aho nuhts'u tóosya. 'Et nuhghu níya t'eh, 'et ndunnah 'uhududelhúti, 'aw bughunek ilah k'us hiye ulhtus, 'i dant'ah, 'et naootes'alh. ²⁰ Yak'usda huba ne'duni nuhtah, 'i 'aw khunek be ilah, 'et k'us ye ulhtus, 'i be 'int'ah 'et huwa. ²¹ K'us ndet hukwa' nahzun hoh nuhts'u tésyalh? Tutsus tulih k'us be nék'ets'intsi', 'i 'ink'ez nagoostl'íyaz ne'nohwhutelh'ilh?

5

'Ilhunahuwúdulh hubutah lubeshi tinta' 'obulh'ih

¹ 'Et ts'iyanah whulh 'uhudits'o, nuhtah dune ts'eke bulh lubeshi 'uhulh'en. 'Et duhut'en, hukwaya hoonli k'et 'onghun 'udun yun k'ut whut'en 'aw howu yahutoolhtih ghait'ah. Ts'iyanah whulh 'udits'o dune be'abá bu'at 'en yuzih usda. ² 'Ink'ez nuhwheni 'uhudelhúti 'et whunts'ih soo cho huwu ni wahle huba' hoont'ah, 'et ndun nduja, 'en nuhtahanaóolh'ah huba' hoont'ah. ³ Suyust'e be nuhtah cha'ust'ah 'et whunts'ih sich'oh suyégha be nuhtah 'ust'ah 'ink'ez 'ants'i nuhzhíh sída li'ust'ah. 'Et huwa si ndun dune lubeshi 'ulh'en, 'en 'uda ba nahesda. ⁴ 'Et huwa ndet 'o 'at Sizi Gri neMoodihti boozi bugha 'ilhunawéhdel t'eh, 'ink'ez sich'oh suyégha chah, 'ink'ez Sizi Gri ye ulhtus, 'i be, ⁵ 'et ndet 'ilhunahuwúdulh, 'et ndun nduja, 'en Satan butl'aitelhtelh buyust'e tinta' yutelh'ilh 'et wheni. 'Et Sizi Gri neMoodihti budzin t'eh, 'et ndun dune buyégha yutelhyih ho' hoont'ah. ⁶ Huwahdloh 'aw chahoozooh. 'Aw t'eeonuzuhzun ih 'ants'i ndi lhes ilhjut, 'i nelhútlus t'eh, li'tenilh unteldoh.* ⁷ 'Et ndi lhes ilhjut, 'i ts'iyawh 'ún telhdulh. 'I be'et 'et nuhwheni k'an lhes únteldoh k'una'a 'ooht'e. Nuhwheni k'an lhes unteldoh k'una'a 'aht'ah 'et huwa. Christ, 'en Netus Lhusíya whunats'ulnih neba unli, 'et wheni neba hizelhghi 'et huwa. ⁸ 'Et huwa ndi netus lhusíya whunats'ulnih 'aw lhes ilhjut, 'i bulh ilah hoh whunats'oolnih. Ndi lhes ilhjut, 'i hoontsi' 'ink'ez lubeshi 'uts'ulh'en 'i k'una'a 'ohoont'ah. 'Et whunts'ih ndi k'an 'et lhes chantéldoh 'i 'int'ah be ts'ah'un 'ohoont'ah 'ink'ez khunek 'alha 'int'ah k'una'a 'ohoont'ah.

Ndunnah nelh 'int'ah, 'en zeh huba nats'oohooyeh huba' hoont'ah

⁹ 'Et 'uda dustl'us be ndun whudusni, ndun dune ts'eke bulh lubeshi 'uhulh'en 'en khun 'ilhuz wule bugha' dudoohdli. ¹⁰ 'Et whunts'ih ndunnah huba 'alha cha'hoot'ah, 'aw 'en ilah bugha' dudoohdli hoh dune ts'eke bulh lubeshi 'ulh'en, k'us 'uyoon be'ildzun ka' huninzun, k'us 'undunut'ih, k'us 'uk'edéltsi huba 'alha 'int'ah chah, 'aw 'en ilah bugha' dudoohdli ilah hoh nuhwhudúsni. 'Et whuz na'a ndaht'en t'eh, 'ants'i ndi yun buch'a tehyalh hukw'u na'a 'uteht'ilh li'hoont'ah, ts'iyanah ndi yun k'ut 'et nduhút'en 'et huwa. ¹¹ 'Aw 'et nuhts'un k'e'aguz ndun Sizi Gri bugha nelhutsinkah buts'útni, 'ink'ez dune ts'eke bulh lubeshi 'uhulh'en, k'us 'uyoon be'ildzun ka' ninzun chah, k'us 'uk'edéltsi huba 'alha 'int'ah, k'us 'uyoon dzuh ne'duni chah, k'us tanutnai, 'i chah, k'us 'undunut'ih chah, 'et ndun Sizi Gri bugha nelhutsinkah buts'útni, ndunt'ah dune, 'en 'et nduhút'en t'eh, 'aw 'en ubulh cha'zooht'en, 'aw hubulh 'uteh'ah 'et whunts'ih 'aw 'uhot'e ghait'ah. ¹² 'Ink'ez ndunnah nelh cha'it'ah, 'en si suba cha'hoot'ah buba nahutesyeh huba. 'Et ndunnah nelh 'int'ah, 'en zeh huba nats'ateyeh huba' hoont'ah. ¹³ 'Et whunts'ih ndunnah ndune nelh cha'it'ah, 'en Yak'usda huba nahuteyeh. 'Et huwa nelhutsin tink'us ne'út'en, 'en nuhwhenich'oh nuhtahanaóolh'ah.

* **5:6** Whuz na'a ndun dune bulubeshi butaidudoh ni ho' 'utni.

6

Khun teh Yak'usda ba nelhutsin unli, 'en ndi yun k'ut naheyelh but nióolhtelh gunih

¹ 'Et k'us ndan nuhtah huba 'alha' hoont'ah, 'en 'uyoona bulh lhena 'uhutni t'eh, 'et nts'e na'a 'uwhutet'ih hoh huba 'alha cha'hoot'ah, 'en hububut nibutelhtelh huba nahodeh ka? 'Aw nduhóot'en huba cha'hóot'ah! Nts'e na'a 'uwhutet'ih hoh dune Yak'usda bube'ildzun, 'en 'aw hububut niyóolhtelh ghat'ah? ² 'Aw t'eoonañázhun ih dune Yak'usda bube'ildzun, 'en ndi yun k'ut whut'en huba 'alha cha'hoot'ah, 'en huba nahutedeh? Ink'ez nuhwheni ndi yun k'ut huba 'alha cha'hoot'ah, 'en huba nahutehyeh t'eh, 'et nts'e na'a ndi hoonliyaz lhena 'uhutni 'int'ah, nuhwheni ba nahutehyeh huba soo cha'aht'ah? ³ 'Aw ih t'eoonañázhun, Lizas, 'en whunts'i huba nats'ahuteyeh? 'Et 'alha 'uhoont'ah. 'Et huwa 'aw howa chahóolnah hoh njan ndi yun k'ut lhena 'uts'utni hoontsol whunts'i hubugha nats'ateyeh. ⁴ 'Et njan hoontsol ndi yun k'ut 'ut'en lhena 'uts'utni 'int'ah hubugha huba nats'ateyeh t'eh, 'et sih nuhwheni Yak'usda ba 'ilhunahuwésdel tah, k'us ndan nuhwhuba soo cha'ildzooh huba 'alha 'uhoont'ah whunts'i, 'aw 'en zeh nuhwhuba nahuteyeh ubuzilhtsi. ⁵ Hooya wahle 'et huwa 'ún whudusni. 'Et 'alha 'un whudúsni, nuhwheni nuhtah 'aw ih 'ilhunuh whunts'i dune whunih nuhwhuba nahuteyeh hoolah? ⁶ 'Et whunts'ih lhe'ahja! 'Ilhunuh dune dulhutsin ba nahutedeh ts'un wheyalhti. Ndunnah naheyelh huba 'alha cha'hoot'ah, 'et whunts'ih hububut ninilhti. ⁷ Ink'ez njan dune ba nahutedeh ts'un ninilhti, 'et 'uda nuhwhenich'oh ch'a'nulhde whuzdli. Dune 'ats'un na'a ne'nohulh'en t'eh, di ka whulachaduzahnik? K'us dune tink'us 'uhut'en t'eh, 'et chah whute 'uhoont'ah. ⁸ 'Et whunts'ih nts'e na'a ndaht'en, 'et hoh tinta' 'aht'i 'ink'ez nuhulhutsinkah 'e'whulhts'it. ⁹ 'Aw t'eoonañázhun ih, k'us ndan 'aw ts'ah'un cha'it'ah, 'en nts'e Yak'usda hubidayi cho unli, 'aw hubutl'achaóotes'al? Khun nuhwhenich'oh na'dunooh'tah gunih! K'us ndan dune ts'eke bulh lubeshi 'ulh'en, k'us 'uk'edélti huba 'alha 'int'ah, k'us ndunnah lhghu húdelhts'i 'en lubeshi ts'un hunint'uk hinli, k'us dudulh dune hoontsi' k'una'a bulh tinta' ut'ih 'ink'ez ts'ekoo dudulh ts'ekoo bulh tinta' ut'ih, ¹⁰ 'undunut'ih chah, k'us 'uyoona be'ildzun ka' nizun, k'us tanutnai, k'us 'uyoona dzuh ne'duni, k'us 'o nus dáhatni chah, 'en ts'iyawh ndunt'ah nts'e Yak'usda hubidayi cho unli, ndai Yak'usda bube'ildzun unli, 'i 'aw hiyóolhchoot ghat'ah. ¹¹ Ink'ez nuhwheni bulunah nuhtah 'et ndaht'en inle. 'Et whunts'ih whuz na'a toonanwhuzguz li'aht'ah. Yak'usda ba 'udun ninwhuninla chah, 'ink'ez ts'ah'un dune nuwhulhtsi. 'Et ndi ts'iyawh Sizi neMoodihti boozi bugha 'ink'ez neYak'usda buyégha bugha chah, 'et whuz na'a 'un whínlia.

Neyust'e 'ink'ez neyégha chah, 'i be Yak'usda uzdóolhti

¹² 'Et 'aw hoonliyaz be such'a' noojoot hoolah, 'et whunts'ih bulah suba chahóozooth. Hoonliyaz such'a' noojoot hoolah, 'et whunts'ih 'aw hoonli k'une' sool'en, 'i hoolah. ¹³ Ts'uyi nebut ba 'int'ah 'ink'ez nebut 'i ts'uyi ba 'int'ah, 'et whunts'ih 'et ndi 'awhunelhts'et 'i Yak'usda hoolah yutelhtsilh. 'Et whuz na'a nduhoont'ah, neyust'e 'aw dune k'us ts'eke bulh lubeshi 'uhulh'en hukw'u na'a be ts'oot'en huba cha'yilel. 'Et neyust'e neMoodihti ba 'ulya 'ink'ez neMoodihti neyust'e ba 'int'ah. ¹⁴ 'Et Yak'usda ye ulhtus, 'i be neMoodihti dinaidilhti, 'ink'ez nuhwheni chah ye ulhtus, 'i be dinanedutelelh. ¹⁵ 'Aw ih t'eoonañázhun, nuhyust'e Christ buyust'e bulah unli? Nts'e na'a 'uwhutet'ih hoh Christ buyust'e bulah unli, 'i 'ul'en ts'eke buyust'e bulah tes'ilh? 'Aw whuz na'a cha'hoot'ah! ¹⁶ 'Aw ih t'eoonañázhun, dune ts'eke 'ul'en bulh 'et 'int'ah t'eh, 'et buyust'e 'ilho suli hukw'u na'a 'uhint'ah? 'Et

whuz na'a 'uk'e'eduguz hoh ndutni, "Nanah, 'en 'ilho yust'e suli?" ¹⁷ 'Et ndan Sizi Gri ts'un na'ja, buyégha chah 'en bulh 'ilho suli ho' 'uhoont'ah. ¹⁸ 'Et huwa dune k'us ts'eke bulh lubeshi 'uhulh'en 'et nduhoont'ah whuch'a ne'ooht'en. 'Et 'uyoo lubeshi 'aw neyust'e bugha 'uchaghesnak, 'et whunts'ih ndunnah dune k'us ts'eke bulh tinta' 'ant'en t'eh, 'et t'eh dich'oh buyust'e lubeshi be tinta' yulh'ih. ¹⁹ Nuhyust'e 'i Ndoni hubuluglez whucho 'uhoont'ah 'ink'ez nuhyudínda, 'aw t'eoonuzáhzun ih? 'En 'int'ah Yak'usda nuhgha ini'ai 'et huwa 'aw nuhwhenich'oh be'ilhdzun chahlah. ²⁰ Lhe'hoolcho hoh 'un whinla! 'Et Yak'usda nenaonket, 'et huwa nuhyust'e 'i be 'ink'ez nuhwhenich'oh nuhyégha, 'i be chah Yak'usda ba whudóolhti, bube'ildzun sahli 'et huwa.

7

Lhgho delhts'i 'i hubugha

¹ 'Aw 'et ndai sts'o k'e'éhguz, 'i bugha 'et ndun whudutesnilh, dune ts'eke bulh tinta cha'hust'ih 'et hoonzoo. ² 'Et whunts'ih dune k'us ts'eke bulh lubeshi 'uhulh'en 'et nduhoont'ah whuch'a 'et huwa dune 'ilhunah hinli hoh dich'oh bu'at hóle 'ink'ez ts'ekoo chah dich'oh buki hóle huba' hoont'ah. ³ 'Et dune du'at ts'ah'un na'a yuk'eootsi' yughusda huwa 'ink'ez ts'eke duki chah 'et whuz na'a zeh yuk'eootsi' huba' hoont'ah. ⁴ Ndun ts'eke buki hoonli, 'en 'aw buyust'e duba yumoodih chailah, buki 'en zeh yumoodih unli. 'Ink'ez whuz na'a zeh ndun dune bu'at hoonli, 'en cha 'aw buyust'e duba yumoodih chailah, bu'at 'en zeh yumoodih unli. ⁵ 'Aw lhch'a óoh'tas huba cha'hoot'ah. 'Et whunts'ih 'astl'iyaz hoh sahá'delhuya 'ink'ez tenadutehdli hukwa' nuhzun t'eh, 'et 'anelhút'et hoh soo lhgha huhoont'i t'eh, 'et soo 'uwhutet'ilh. 'Et hukw'elh'az doo chah lhk'eoohdutsi' 'ink'ez lhuzih ninaooh'tas, doo ka 'aw nuhyust'e bughu tehle huba soo cha'ah'tah t'eh, 'et Satan nuhootelhdzih, 'et whuch'a. ⁶ 'Aw nuhwuba ne'dusni ilah, njan et ndóht'en hukwa' nuhzun t'eh, 'et huwa 'udusni. ⁷ 'Et ts'iyanah dune si sk'una'a zeh nduchah 'uhint'ah, 'et whuz na'a hukwa' nuszun. 'Et whunts'ih Yak'usda ts'iyanah 'ilhunah hinli hoh ndai huwa yu'ah, 'i bugha iní'ai. Ts'iyawh 'ilhunah hinli lhulhyoo dedowh, 'i hubugha iní'ai. ⁸ 'Aw 'et ndunnah suh nuhudelh, 'ink'ez tsandelh chah, 'en ndez na'a 'ubudúsni, si sk'una'a zeh 'uhint'ah t'eh, 'et huba whute-zoo. ⁹ 'Et whunts'ih 'aw 'uhúdudodutun ghaft'ah t'eh, lhghu hudóolts'i. 'Ants'i kwun k'una'a lhts'un hunint'uk t'eh, 'et lhghu hudélhts'i t'eh, 'et sih 'o nus soo' hoont'ah.

Lhghu húdelhts'i 'aw lhch'a nahoodelh ghaft'ah

¹⁰ 'Aw 'et ndunnah lhghuhusduke, 'aw si ilah dusni, neMoodihti ndi khunek yutulhúhezya 'i 'int'ah, 'aw ts'eke duki ch'a naoja gunih. ¹¹ 'Et whunts'ih duki ch'a nasja t'eh, 'et t'eh 'aw 'uyoon ghu naooda gunih. 'Et whunts'ih hukwa' huninzun t'eh, huhoont'i hoh lhuzih ninahoot'as huba' hoont'ah. 'Ink'ez dune du'at 'en 'ún yutooneh gunih. ¹² 'Aw 'et bulunah nuhtah, si ndun whudutesnilh, 'aw neMoodihti ilah 'utni. Ndan nelhutsin 'en bu'at buba 'alha 'uhoont'ah chailah t'eh, 'et whunts'ih duki 'ilhuz wule yuzih wuda hukwa' ninzun t'eh, 'et du'at 'ún yutooneh huba cha'hoot'ah. ¹³ 'Ink'ez ts'eke 'en duki buba 'alha 'uhoont'ah chailah t'eh, 'et whunts'ih 'ilhuz wheni yuzih tedalh hukwa' ninzun t'eh, 'et t'eh duki 'ún yutooneh gunih. ¹⁴ 'Et buki buba 'alha 'uhoont'ah chailah, 'et whunts'ih 'en bu'at 'en bugha Yak'usda ba 'udun nilti ho' 'int'ah. 'Et whuz na'a bu'at buba 'alha 'uhoont'ah chailah, 'et whunts'ih buki 'en bugha Yak'usda ba 'udun nilti ho' 'int'ah. 'Et whuz na'a nduchá'hoot'ah t'eh, 'et t'eh buzkehkah Yak'usda ba 'ats'un na'a 'uhutet'ilh ho' 'uhoont'ah. 'Et whunts'ih 'en Yak'usda ba 'udun nilti nahúsldi. ¹⁵ 'Et

whunts'ih ndun buba 'alha 'uhoont'ah chailah whenája t'eh, whute natooja. 'Et whuz na'a nduhooja t'eh, 'et sih ndun nelhutsin k'us neulhtus hinli, 'aw 'ulhts'un nuwhunoolht'uk wule huba' hoont'ah. 'Et whunts'ih nedzi dooghel, 'i be ndi yun k'ut uzdoolts'i, 'et huba Yak'usda neka' dani. ¹⁶ 'Et whunulh'en, nuhwheni nuhgha tulih nuhkikah hudoojih. 'Ink'ez nuhwheni nuhgha tulih nuh'atkah hudoojih, 'et huwa 'udusni.

Daht'ah ahli hoh Sizi Gri ts'un nasulhúya sahli, 'et whuz na'a zeh 'ooht'e

¹⁷ 'Aw 'et nts'e na'a ndulhcho hoh Yak'usda ba 'ilhunahuwésdel hube' 'ut'en k'ah huba 'uwhusla, 'et nuhwheni chah 'et whuz na'a nuhwhuba whutet'ilh. 'Et nts'oh da Yak'usda nuhka' dani ndi yun k'ut doolhúts'i ka, whute 'et whuz na'a ndi yun k'ut delhúts'i. ¹⁸ Ndán 'uda yuk'e dune unli, 'i k'ut hiyúzt'us 'ink'ez 'utahayalhti t'eh, 'et t'eh chait'us hukw'u na'a 'oot'e gunih. K'us ndan chait'us unli da, 'ink'ez 'utahayalhti t'eh, 'et t'eh yuk'e dune unli, 'i k'ut hiyúzt'us hukw'u na'a 'oot'e gunih. ¹⁹ 'Et yuk'e dune unli k'ut hiyúzt'us k'us chahiyít'us, 'i 'ants'i 'uhoont'ah. Yak'usda bughunek netl'aída'ai buk'une' ts'ut'en t'eh, 'et zeh neba hooncha ho' hoont'ah. ²⁰ Nts'e na'a 'ilhunah hinli dahint'ah hoh 'utahabalhti, 'et whuz na'a 'uhoot'e huba' hoont'ah. ²¹ Nyun 'ulhna inli hoh 'utahanyalhtih t'eh, 'et huwuni onle gunih. 'Et whunts'ih nyumoodih nladutetnih t'eh, 'et t'eh ndineh. ²² 'Et ndunnah neMoodihti 'utahainyalhti 'ulhna unli whunts'i, 'en neMoodihti yula nadetnik k'una'a 'int'ah 'et huwa. 'Et whuz na'a ndunnah neMoodihti dutejih ka yuka' dani, 'ulhna chailah whunts'i, Sizi Gri ye 'ulhna unli. ²³ Dahoolcho hoh nanohonket, 'et huwa 'aw dune be 'ulhna wahle gunih. ²⁴ Sulhutsinkah nts'e na'a daht'ah dune ahli hoh Yak'usda 'utahanhonla, 'et whuz na'a zeh 'ooht'e huba' hoont'ah.

Ndan 'aw dune k'us ts'eke t'echahunízun, 'en bugha yatelhtuk

²⁵ 'Aw 'et ndun dune k'us ts'eke t'echahunízun, 'en bugha nohwhulh yatelhtuk. 'En bugha neMoodihti 'aw khunek stl'achadi'al, 'et whunts'ih neMoodihti sugha te'ninzun hoh st'aninentan buba tesdle, 'et huwa ndez na'a nohwhulh yálhtuk. ²⁶ Ndai k'an 'et be dzuh nahdeh 'et huwa bugha ts'ih dune nts'e na'a 'uhint'ah, 'et whuz na'a zeh 'uhoot'e huba' hoont'ah nuszun. ²⁷ Ts'eke ghu sinda t'eh, buch'a natandalh hukwa 'ont'en gunih. 'Et suh ninya t'eh, 'et 'uyoon ka' nonzin gunih. ²⁸ 'Et whunts'ih lhghu sahke t'eh, 'aw lubeshi chahoolah. 'Ink'ez ts'eke 'aw dune t'echanusze ki yit'i t'eh, 'aw buba lubeshi chahoolah. 'Et whunts'ih ndunnah lhghu húdelhts'i, 'en ndi yun k'ut dzuh nahutedeh, 'ink'ez 'et whuch'a whuz na'a nuhwhuba hukwa' nuszun. ²⁹ Sulhutsinkah k'an 'et ts'ah'un na'a 'un whudutesnilh, ndet nuhts'u whelts'ulh, 'aw 'et nilhdukw ho' 'uhoont'ah. 'Et huwa njan whuts'un ndez na'a dune uzteleh ho' 'uhoont'ah. Ndán bu'at hooni, 'en whunts'i bu'at hoolah k'una'a 'uhint'ah. ³⁰ Ndunnah 'uk'enudleh, 'aw 'uk'echanusdle k'una'a 'uhint'ah. 'Et ndunnah hohoont'i, 'aw chahuhoot'i k'una'a 'uhint'ah. 'Et ndunnah hoonli 'uhooket, 'aw bube'ildzun chailah li'hint'ah. ³¹ 'Ink'ez ndunnah ndi yun k'ut hube'ílhdzun, 'i hiyit'i t'eh, 'aw hube'ílhdzun chailah k'una'a 'uhint'ah. Nts'e na'a ndi yun k'ut uzdelhts'i hukw'u na'a, 'i hoolah whutele 'et huwa. ³² Howuni ahli, 'et whuch'a nuhts'u hukwa' nuszun. Whunulh'en, ndan suh nuya, 'en neMoodihti be 'ut'en k'ah 'ink'ez nts'e na'a ba whutezoo, 'et zeh howu naninahzut. ³³ 'Et whunts'ih ndan bu'at hoonli 'en nts'e na'a ndi yun k'ut uzdelhts'i hukw'u na'a, 'ink'ez bu'at nts'e na'a buba whutézoo ninzun, 'et zeh howu naninahzut. ³⁴ 'Et ndunnah buki hoonli 'ink'ez 'aw dune t'echanízun bulh lhelhts'un na'a 'uhint'ah. Ndán 'aw dune t'echanízun neMoodihti 'en zeh bugha nuninuzut. 'Et hoh 'en buyust'e 'ink'ez dich'oh buyégha bulh 'i chah lubeshi bughu hoolah unli. 'Et ndan buki hoonli,

'en ndi yun k'ut uzdelhts'i hukw'u na'a, 'ink'ez nts'e na'a buki ba whutezoo, 'et zeh howu nuninuzut. ³⁵ 'Ink'ez 'o 'un nuhwhuba whutezoo, 'et huwa ndi khunek ndun whudusni. 'Aw k'ah nawhunulht'uk ilah ho' dusni. 'Et whunts'ih ndai nuhwhenich'oh be tehzoo, 'ink'ez nts'e na'a 'aw whechahtsaz hoh nuhdzi ndulhcho 'i be neMoodihti bugha dunulhyeh. ³⁶ 'Et 'aw dune t'echanízun ndun dune yulh tinta' tet'ilh ninzun t'eh, 'ink'ez 'aw 'et k'éninyi hoh 'uda teninya ho' 'int'ah, 'et t'eh whute lhghu hooduke huba' hoont'ah, 'aw chahóotsi'. ³⁷ 'Et whunts'ih ndun dune dudzi ndulhcho 'i be dant'ah hoh dune tele, 'et t'eeoninzun t'eh, 'ink'ez 'et huwa 'aw 'at tet'ilh hukwa cha'ust'en hoh dich'oh hukwa' ninzun hukw'u na'a 'int'ah t'eh, 'et ndez na'a dudzi be nahezya 'et hoh soo' tet'ilh. ³⁸ 'Et hoh ndan 'at tet'ilh 'et dúja t'eh, 'et hoonzoo ho' hoont'ah. 'Ink'ez ndan 'at chaít'il t'eh, 'et 'o nus whutézoo. ³⁹ 'Et Moses be' dustl'us ndutni, "Ndan buki hoonli, 'et buki 'awhuz khuna t'eh, 'et 'ilhuz wule lhulh uhoot'e huba' hoont'ah. 'Et buki dazsai t'eh, ndan yuka' ninzun yughu natedalh, 'et whuz na'a 'oot'e, hukwa' ninzun t'eh." 'Et whunts'ih Yak'usda buba 'alha' yint'ah, 'en zeh yughu naooda huba' hoont'ah. ⁴⁰ 'Et whunts'ih nts'e na'a hoont'i hoh dant'ah t'eh, whuz na'a zeh 'oot'e. 'Et whuz na'a nahuzíya. 'Ink'ez si chah Yak'usda buyégha ust'i nuszun.

8

Nuhulhutsinkah hubugha te'noohzin

¹ 'Aw 'et ndi ndai ts'uyi, 'i 'uk'edéltsi bugha yút'ah, 'et hubugha no-hwhulh yátelhtuk. Soo t'ets'onínzun be t'eeonudzun, 'i ts'it'i, 'ink'ez ndi be t'eeonudzun, 'i 'et bulah chah 'uzdudelhúti neilh'i. 'Et whunts'ih be nek'edutsi', 'i be 'o nus Yak'usda ba ts'ilhtus neílh'i. ² Ndán ts'iyaintsuk duba t'enaoonúdzun, 'en ndet t'éoonózin huba' hoont'ah, 'et 'aw t'eeonízun. ³ 'Et whunts'ih ndunnah Yak'usda k'entsi', 'en Yak'usda t'eoobunínzun. ⁴ 'Aw 'et ndi ts'uyi 'uk'edéltsi bugha yút'ah uzte'alh, 'i bugha nohwhulh yatelhtuk. 'Et ndi yun k'ut nts'e 'uk'edéltsi 'int'ah 'et whunts'ih 'ants'i unli 'et t'ets'onínzun. 'Ink'ez 'uyoo Yak'usda chailah, 'ilhunuh zeh Yak'usda unli. ⁵ Lhanah 'et whuz na'a nduhútni, yak'uz ts'ih yak'usda hulai. 'Ink'ez 'alha 'ahoont'ah ndunnah nduhutni yak'usda hulai 'ink'ez moodihti chah hulai hutni. ⁶ 'Et whunts'ih, nuwheni neba Yak'usda 'ilhunuh zeh unli, ne'aBá 'en 'int'ah. 'En ts'iyaintsuk buts'un hayúkat ho' hoont'ah. 'Ink'ez neMoodihti 'ilhunuh zeh unli, 'en Sizi Gri 'int'ah. 'En bugha ts'iyaintsuk 'ulya, 'ink'ez nuwheni chah 'en bugha zeh ts'ukhuna. ⁷ 'Et whunts'ih 'aw ts'iyanaah ndi be t'eeonudzun, 'i chahít'i. 'Ink'ez k'an 'et whuts'un ndi ts'uyi, 'uk'edéltsi bugha yút'ah 'i hiya'alh hoh nyoo 'uk'edéltsi bube'ildzun huninzun 'ink'ez 'awhuz huba 'alha 'ahoont'ah. 'Et huwa 'et ndi hiya'alh 'et buyuh ts'ih bugha t'ets'oninzun* lait'ah 'i be nts'i yulhtsi. ⁸ 'Et whunts'ih 'ants'i ts'uyi, 'aw 'i be Yak'usda nalh ts'inzoom chats'ílah. Ts'an'al t'eh, 'et sih 'aw 'o nus soo ts'inzoom ts'oole ghat'ah. 'Et 'aw chats'i'ulh t'eh, 'et sih 'aw 'o nus neba whuté'ilh le cha'ts'it'ah. ⁹ Nuhwhenich'oh khahdli, doo ka ndai khunek nuhlt'aida'ai, 'i bugha ndunnah lahít'ah tink'us hunoot'uk. ¹⁰ Soo cho whunilh'en, nyun be t'eeonudzun, 'i 'int'i, 'ink'ez nyulhutsin chah buyuh ts'ih bugha t'ets'oninzun, 'i lait'ah t'eh, 'en 'uk'edéltsi luglez 'et higha hiya'ai, 'et sinda hoh nyunilh'en ndi ts'uyi, 'uk'edéltsi bugha yút'ah, 'i in'ah t'eh, 'et 'alha 'en chah whuz nilht'uk ndi ts'uyi, 'uk'edéltsi bugha yút'ah, 'ute'ulh ih? A, 'alha 'en chah whuz ntalht'uk yute'ah wheni. ¹¹ 'Et huwa nyulhutsin 'uk'edéltsi bugha beni tah dez'ai, 'i lait'ah unli, 'en 'et njan be t'eeonudzun, 'i int'i, 'i be tinta' whuté'lh'ilh, Christ yuba dazsai

* ^{8:7} Ndi khunek "Neyuh ts'ih huwa t'ets'oninzun", 'i hoonli ts'ih'un na'a k'us tink'us 'ahoont'ah, 'i gha t'ets'oninzun, ts'utni ho' ts'utni.

whunts'i. ¹² 'Et nuhwhulhutsinkah nuhwheni nuhgha lubeshi 'uhulh'en t'eh, buyah ts'ih bugha t'ets'oninzun, 'i chah undólhdah. 'Et whuz na'a zeh nduteht'ilh t'eh, 'et sih Christ 'en chah buch'a lubeshi itélhcholh. ¹³ 'Et huwa ndi ts'uyi huwa t'aih, 'i bugha sulhutsin tink'us 'ut'iht'eh 'aw 'o 'at 'uyat wús'ahlh għait'ah, si sugħa sulhutsin tink'us óoneh 'et whuch'a.

9

Paul dich'oh khunayaltuk nts'e na'a Sizi Gri ba whel'a unli

¹ 'Alha ih si whel'a usdli? 'Alha ih ndai Yak'usda ba 'utes'ilh, 'i ts'iyawh stl'aho'ai? 'Alha ih neMoodihti Sizi Gri nalh'en? 'Ink'ez 'alha ih ndai 'ut'en neMoodihti 'en ba 'ust'en, 'i be buba 'alha 'uhoont'ah sahli? 'Et 'alha 'uhoont'ah. ² 'Et 'onghoh huba whel'a chausdlah t'eh, 'et whunts'ih 'alha nuhwheni nuhwhuba whel'a usdli. 'Ink'ez nts'e na'a ts'iyannah t'ehinozin si whel'a 'ust'ah, 'et neMoodihti nuhyudínda 'et huwa suba be hóodel'en k'ah ts'ih aht'ah. ³ 'Et ndunnah such'a detni, 'en 'et ndez na'a 'ubudutesnilh, ⁴ 'et 'alha ih hukwa' uzninzun totsuk 'uzte'ulh 'ink'ez 'uztētnilh? ⁵ Nuwheni zeh ih netl'achahoo'al hoh ndunnah Sizi Gri bugha neulhtuskah buts'utni, 'en hukwa' uzninzun t'eh, 'en bugħu ts'oħħa huba' hoont'ah? 'Et 'ongħun whel'a, neMoodihti bulħutsin, 'ink'ez Cephas, 'en chah ts'iyawh bu'at hoonli. 'Et 'alha 'uhoont'ah, 'en buk'una'a 'uts'oot'e ka netl'ahó'ai. ⁶ 'Et si 'ink'ez Barnabas, 'aw nuwheni zeh ih nela be uztet'ilh uzte'alh huba? 'Awundooh! ⁷ 'Et ndan lħudugħan unli hoh ndai ye ndunidzit, 'i dich'oh yuk'elha chahoolħiħ ih? K'us ndan soo ha' nulhyeh, 'en ndai hainulhyeh, 'i yulah te'alh ih? K'us ndan musdus yughundli unli hoh buts'oo yulai tetnai ih? ⁸ 'Et njan noħwhulħ yalhtuk dune k'una'a ilah 'un whudusni. Moses be' dustl'us 'i k'una'a chah 'un whudusni. ⁹ 'Et ndutni, "Ndet musdus dune tl'o mai 'uzte'alh wheni 'uyulħ'en, 'aw 'ute'alh whuch'a 'uts'oolhdzin għait'ah," ni. ¹⁰ Yak'usda musdus dune yugħu ni unli k'us nuwheni neba 'et ndi ts'iyawh utni ih? 'Et 'alha nuwheni neba ndi 'uk'une'uzgħu. 'Et ndan haniyeh k'et 'et whulħ ch'ułi, 'ink'ez ndan tl'o mai nalħdzooh 'en bulah buts'un natoodúkat huninzun. ¹¹ 'Ink'ez nuwheni nuhtah Yak'usda bughunek nuhnat ha'nule li'ts'uja t'eh, 'et t'eh nuhwhuba hooncha ih hoh nuhts'un ndai be uzdunidzit, 'i bulah be negħaóħleħ huba' hoont'ah? ¹² 'Et 'ongħun nuhghunli, 'en hoonli bughahle, di ka nuwheni negħha cha'zahħħa? 'Et whunts'ih ndai Yak'usda negħha ooninla 'aw 'et whuz na'a nducha'ts'it'il inle. 'Et k'us ts'iyawh soo whulħ ts'uziñ khunek unzoo, 'i Christ bugħa doo ka tinta' ts'uholħ'en 'et whuch'a. ¹³ 'Aw t'eoħnuzáħżun ndunnah Lizwif hubuluglez whucho tuz ts'ih 'uhut'en, 'en ndi luglez whucho huwa t'aih buluh oo'alh huba' hoont'ah. 'Ink'ez ndunnah Yak'usda bukw'uzdai nat 'uhut'en, 'en ndi Yak'usda bukw'uzdai k'ut huwa t'aih 'en chah 'et whuz na'a zeh. ¹⁴ 'Et whuz na'a ndunnah khunek unzoo, 'i be yalhtuk hinli, ndai hiye ndunidzit, khunek unzoo bugħha, 'i bughá yunkat. 'Et whuz na'a neMoodihti nets'u hukwa' dani. ¹⁵ 'Et whunts'ih neMoodihti nets'u hukwa' dani, 'et 'i be whunts'ih 'aw hoonli nducha'ust'en. 'Ink'ez 'aw 'et whuz na'a ilah nuhts'o k'ech-a'usgħu. Whunulħ'en, soo hoonusti i-njan nduħoont'ah, 'et howu yalhtuk teh, 'i 'ants'i hóle hukwa cha'nuzúszun. 'Et whunts'ih 'et ndudútesnilh t'eh, 'et whutsuh unducha datésah choo, 'et t'eh sich'oh 'o nus suba whutezoo. ¹⁶ 'Aw 'ududelħuti ilah hoh ndi khunek unzoo, 'i be nuħħulħ yalhtuk. Ndi khunek stl'adélts'ut, 'i 'ants'i 'ustl'e' 'oostl'eh għait'ah. 'Et ndi khunek unzoo, 'i be yachasulħtuk t'eh, dawħultsi' 'et whuch'a ootelħdoh! ¹⁷ Ndi 'ulħ'en, 'i sudzi ndulħcho 'i be 'ulħ'en t'eh, 'et t'eh suba 'uk'elha whutele. 'Et whunts'ih ndi 'ulħ'en wúsħleħ huba' hoont'ah 'ink'ez 'et huwa 'ulħ'en t'eh, 'et sih 'ants'i 'ut'en stl'alts'ut, 'i k'una'a 'ulħ'en hukw'u na'a 'uwhutet'ilh. ¹⁸ 'Et daja nuhzun? Di zeh suba k'elha tele?

Nuhwhudutésnilh. Nts'oh tula ndi khunek unzoo, 'i Christ bugha, 'i be nuwhulh yatelhtuk, 'aw 'uk'elha ilah be nuwhulh yatelhtuk. Whel'a 'ust'ah 'et huwa stl'awhélts'ut hoh ndi 'ut'en 'ulh'en, 'i ka nuhwheni suba k'elha hoolhtsilh huba' hoont'ah. 'Et whunts'ih 'aw nducha'ust'ah. 'Aw 'et sughunek ulhchoot t'eh, 'aw 'et 'i zeh suba k'elha whuzdli ho' 'ohoont'ah.

Ts'iyanah ba 'ulhna na'duzulhúsi, ni Paul

¹⁹ 'Et 'aw 'ulhna chasdla 'et whunts'ih ts'iyanah ba 'ulhna na'duzulhúsi, 'et sih 'o nus 'ahuneltsuk huboolhyih. ²⁰ Lizwif bulh 'ust'ah t'eh, 'et Lizwif k'una'a na'duzulhúsi, 'et tulih Lizwif 'o nus lhanah huboolhyih. 'Ink'ez ndai Moses be' dustl'us yuk'une' 'uhut'en, 'en buk'una'a 'ust'ah na'duzulhúsi, 'et tulih ndunnah 'o nus lhanah huboolhyih. ²¹ 'Et ndunnah Moses be' dustl'us be'et 'uhint'ah, 'en buk'una'a 'ust'ah na'duzulhúsi. 'Et tulih ndunnah Moses be' dustl'us be'et 'int'ah, 'en chah huboolhyih. 'Et whunts'ih ndet Yak'usda neba lhuhezya 'et 'aw whu'et cha'duzusni, et Christ ndet neba 'utni hukw'u na'a 'ust'ah 'et huwa. ²² 'Ink'ez ndan lahit'ah 'en chah hubuk'una'a si chah last'ah na'duzulhúsi, 'et huwa tulih huboolhyih. 'I be whuch'a whunoohlhyeh. 'Et huwa njan 'et ndust'en, niz de haoodanzut ndai 'ulh'en, 'i 'et bulunah tulih huboolhyih. ²³ 'Et huwa ndi khunek unzoo, 'i bugha 'ust'en. 'Et t'eh ndai unzoo, 'i negha íninla, 'i 'inla ts'óolhchoot.

Whuch'a' telhdoh hukwa' nuszun, ni Paul

²⁴ 'Aw nt'eoonuzáhzun ndan lhghu natulwus hubutah, 'en 'ilhunuh zeh whuch'a 'alhdoh. Nuhwheni chah 'et whuz na'a whuch'a nilhde k'una'a 'utehnih. ²⁵ Ndán soo hoolhdzih dich'oh khudli. 'Et lhghu nahutelwus, ndi whuch'a itelhdoh, 'i 'untsi' tele. 'Et whunts'ih nuwheni be whuch'a ts'otelhdoh, 'aw 'untsi' wule ghait'ah. ²⁶ 'Et huwa si chah whuz na'a ndoh 'ulhúgih. 'Ants'i hoh nduhoolcho nulhúgaih ilah hoh 'ust'en. 'Ink'ez ndai be 'ukatusnih 'aw 'ants'i hoh nudulhúchus ilah ho' 'ust'en. ²⁷ Sich'oh suyust'e be suyah 'et hoh suk'une' tet'en. 'Et 'aw ndez na'a nduchasust'en t'eh, lhenyoo khunek unzoo, 'i be hubulh yalhtuk whunts'i, sich'oh suba dah nahódle.

10

Netsuhda, 'en bugha whuts'odul'eh

¹ 'Aw 'et sulhutsinkah njan netsuhda, 'en hubunats'odoolnah hukwa cha'ts'unízun. Soo kw'us yuh ts'ih 'uhint'ah, yatoo tah lhuhúzdel. ² 'Et netsuhda kw'us 'ink'ez yatoo 'i bulh ts'iyawh Moses ts'un too be' yinla. ³ Ts'iyawh ndai ts'uyi, yak'uz hainkat, 'i ndunnah ts'iyawh hiya'al. ⁴ 'Ink'ez ts'iyawh ndai huyetnai yak'uz ts'ih hahiyana, 'i 'ilho hiyetnai. Ndi yak'uz whutse 'i buwhusaínelts'ut, 'et huwa 'i buts'u hayejul, 'i ts'iyawh 'ilho hiyetnai. 'Ink'ez ndi tse 'i Christ unli 'int'ah. ⁵ 'Et whunts'ih k'us lhanah Yak'usda ba 'aw chahízoo. 'Et huwa dune chahoot'ih ts'ih hubuyust'e ndulhcho hoh nudelhúti suli. ⁶ 'Et ndi ts'iyawh bugha t'ets'oninzun, 'i neba suli hukw'u na'a 'uhooja. 'Et huwa 'aw 'en hubuk'una'a lubeshi uztelh'ilh hukwa 'uznoozin ghat'ah. ⁷ 'Ink'ez bulunah, 'en hubuk'una'a 'uk'edélti nuhwhuba 'alha 'oot'e gunih. 'Et whuz na'a 'uk'une'ús duguz hoh ndutni, "Dune húdelhts'i, na'het'al 'ink'ez 'uhetnai cha 'uhuja. 'Aw 'et di hudindel 'ink'ez degha nus hoontsi' k'una'a nohowhulhúya." ⁸ 'En hubuk'una'a ts'ekoo bulh lubeshi wulhchoot gunih! Bulunah 'et whuz na'a lubeshi 'uhinla. 'Et huwa 'ilhudzin 23,000 'et 'uneltsuk yahadla. ⁹ 'En hubuk'una'a Christ ts'oolhdzih li'ts'oot'en gunih. Bulunah hiyóolhdzai 'et huwa tl'ughus be hedughan. ¹⁰ 'Ink'ez 'en hubuk'una'a yuh yaooltk gunih! Bulunah 'et whuz na'a nduhuja, 'et huwa ndan hoolah 'ulhtsih ndunnah hiyahultuk, 'en ts'iyawh hoolah hubulhtsi. ¹¹ 'Et ndi 'i

ts'iyawh huba 'et 'úhooja 'i ts'iyawh bughá t'ets'onozin ka ndúhooja, 'ink'ez neba 'uk'e'anguz hoh neundulhni. Nuwheni 'uts'int'ah nts'e na'a ndi yun k'ut 'uzdelhts'i hukw'u na'a, nuwheni neba 'aw 'et whula tah suli. ¹² 'Et huwa ndan soo siyin unli na'dunúdzun, 'en soo cho howole naoolts'it 'et whuch'a. ¹³ 'Et ndet hoh netsudule dune 'ubóolhdzih, whuz na'a zeh nuhwheni chah nehóolhdzih. 'Et whunts'ih Yak'usda 'aw nela dootnih ghaít'ah. Ndet hoh netsudule neóolhdzih, 'et dáwhultus hoh Yak'usda nuhtl'ahó'ai hoh whulh sáhyin. 'Ink'ez nuhóolhdzih t'eh, 'et sih whuch'a natehdulh, whuz na'a Yak'usda nuhba 'uwhutelih, 'ink'ez soo whulh téhyin.

'Uk'edéltsi ts'un teni' noolhdzin gunih

¹⁴ 'Et huwa nuhwhuk'esi', ndi 'uk'edéltsi nuhwhuba 'alha 'int'ah, 'i buch'a ne'ooht'en huba' hoont'ah. ¹⁵ Whunih k'una'a ahli 'et huwa ndez na'a nuhwhulh yalhtuk. 'Et huwa njan hubugha nuhwhulh yalhtuk nuhwhenihch'oh soo cho ts'ah'un nióonah'ah. ¹⁶ Et ndi lubot 'i be chanailya ts'utni, 'et 'alha Christ buzkai bulh 'úts'int'ah nuhzún ih? A! 'Ink'ez ndi lhes lhts'ezdalhkut, 'et 'alha Christ buyust'e bulh 'uts'int'ah nuhzun ih? A! ¹⁷ 'Et huwa dazneltsuk ts'inli whunts'ih, ndi lhes 'ilho zeh 'uts'int'ah 'ink'ez ndi yust'e 'ilho zeh unli. Ndi lhes 'ilho nuwheni ts'iyawh bulh 'uts'int'ah 'et huwa. ¹⁸ Israel budune k'ah ts'ih t'eónúhzun ih? Whunulh'en, ndan Yak'usda bukw'uzdai bugha t'ah hiya'al, 'en ndi Yak'usda bukw'uzdai bulh 'úhint'ah. ¹⁹ Njan ndez na'a whunwhunulhtun, 'uk'edéltsi hoonli 'int'ah ih? K'us 'uk'edéltsi bugha t'ah, 'i chah ih hoonli unli? 'Awundooh! ²⁰ 'Et 'udun yun k'ut whut'en ndai 'uk'edéltsi bugha hiya'ah, 'i ntsi' nududeh, 'en buts'u hitoolhdhelh, 'aw Yak'usda ts'un ilah. 'Ink'ez nuhwheni ntsi' nududeh bulh 'uteht'ilh nuhwhuba hukwa cha'nuzúszun 'et huwa. ²¹ NeMoodihti bulubot 'ink'ez ntsi' nududeh bulubot bulh 'aw lhtahts'oottnai huba cha'hoot'ah. 'Et neMoodihti bukw'uzdai 'ink'ez ntsi' nududeh bukw'uzdai chah 'aw 'anelht'et buk'ut 'uts'oo'ah huba cha'hoot'ah. 'Aw whuz na'a 'uhóneh ghaít'ah! ²² 'Et neMoodihti 'ootelnih uztelhtsilh ih? 'Aw 'et nduts'oo't'en huba cha'hoot'ah. 'En buch'a 'o nus 'uts'iltus nahzun ih? 'Awundooh!

Nts'e na'a Yak'usda délhi, 'et whuz na'a dune wahle huba' hoont'ah

²³ 'Et 'aw hoonliyaz whuch'a nelhjoot hoolah, 'et whunts'ih whulutah suba chahóozoo. Hoonliyaz whuch'a noosjoot hoolah, 'et whunts'ih whulutah ndutes't'ilh t'eh, 'aw dune la' whudóneh ghaít'ah. ²⁴ 'Et huwa ndet nuwheni zeh neba unzoo, 'i ka' ts'oott'en ghaít'ah. 'Uyoon ba unzoo, 'i zeh ka' ts'oott'en. ²⁵ 'Et ndai 'ilhunahuwúdulh hiye 'óoket, 'i ts'iyawh ah'ah ho' 'int'ah. 'Ink'ez nuhyuh ts'ih bugha t'ets'oninzun, 'i whunts'i, buka' oodolhkut gunih. ²⁶ Ndi yun k'ut 'ink'ez ndai hoonli, 'i ts'iyawh neMoodihti 'en bube'ildzun 'et huwa. ²⁷ 'Et huba 'alha cha'hoot'ah, 'en ndet nuhghu nuhúzya 'ink'ez whuz tanyalh t'eh, ndai nuhbut nihíninla, 'i ooh'ah 'ink'ez nuhyuh ts'ih bugha t'ets'oninzun, 'i whunts'i buka' oodolhkut gunih. ²⁸ 'Et whunts'ih dune njan ndun whudutenilh, "Ndi 'uk'edéltsi bugha it'ah, 'int'ah," 'et t'eh 'aw cha'zooh'al. Ndun nuhwhudutenilh 'ink'ez buyuh ts'ih bugha t'ets'oninzun, 'i 'et huwa 'et 'aw cha'zooh'al. 'Et whunts'ih ndi yun k'ut 'ink'ez ndai hoonli, 'i ts'iyawh neMoodihti 'en bube'ildzun 'int'ah. ²⁹ Ndi neyuh ts'ih bugha t'ets'oninzun, 'i bughu yalhtuk, 'aw nuhwheni nuhyuh ts'ih bugha t'ets'oninzun, 'i 'et ilah howu yalhtuk. Ndun buyuh ts'ih bugha t'ets'oninzun, 'i yughi yalhtuk ho' dusni. 'Et di ka 'uyoon buyuh ts'ih bugha t'ets'oninzun, 'i be 'aw hoonli hoh whuch'a nelhjoot, nts'e na'a 'uyoon beni taoodez'ai 'i suba nahuteyelh? ³⁰ 'Et ts'uyi ka chanailya dusni hoh us'ah, 'et whunts'ih sughu yahalhtuk. 'Et di ka sughu yahalhtuk chanailya dusni 'et whunts'ih? ³¹ 'Et huwa ndet ah'ah, 'ink'ez ahtnai totsuk, k'us nts'oh daht'en chah, 'et ts'iyawh

'i be 'et nts'e na'a Yak'usda whé delhti, 'et whuz na'a zeh dune wahle huba' hoont'ah. ³² 'Et huwa Lizwif, 'ink'ez 'udun yun k'ut whut'en, 'ink'ez Yak'usda ba 'ilhunahuwúdulh, 'en chah, ndan hinli whunts'i, 'et 'aw hoonliyaz huba dzuh 'oohnneh gunih. ³³ Si chah whuz na'a 'et ts'iyanah ts'un wuszoo hukwa 'ust'en. Sich'oh hootést'i hukwa cha'zust'en. K'us ndet ts'iyanah ba hoonzoo túne' 'ust'en, 'et huwa 'en sih hudoojih.

11

¹ Nts'e na'a Christ k'una'a 'ust'ah, 'et nuhwheni chah si sk'una'a 'ooht'e.

Netsi gha'weznik 'i hoh tenazdudli hubugha

² 'Aw 'et sulhutsinkah njan dudusni soo 'aht'en. Ts'iyaantsuk bugha sunalhúnih, 'ink'ez whunohodalh'ih, 'i ts'iyawh hoohtun. ³ 'Et njan t'eeonóhzin hukwa' nuszun, Christ 'en zeh dune ts'iyawh gha ndoh 'int'ah. Dune, 'en zeh ts'ekoo gha ndoh 'úhint'ah. 'Ink'ez Yak'usda 'en zeh Christ yugha ndoh 'int'ah. ⁴ K'us ndan dune butsi gha'weznik hoh tenadudli k'us nus whunóolh'en t'eh, 'et t'eh ndun dune yugha ndoh 'int'ah, 'en hooya yutelhtsilh. ⁵ K'us ndan ts'eke butsi ghacha'winik hoh tenadudli k'us nus whunih'en t'eh, 'et t'eh ndun ts'eke yugha ndoh 'int'ah, 'en hooya yutelhtsilh. 'Ants'i butsigha hoolah li'tet'ilh 'et huwa. ⁶ 'Aw butsi gha'weznik hukwa cha'nizun t'eh, 'et t'eh butsi dulhcho nahinoozo. 'Et whunts'ih hukwaya unli butsigha dune k'una'a hananedut'az, k'us nanedzo t'eh, 'et t'eh butsi gha'woonik huba' hoont'ah. ⁷ 'Et 'alha dune, 'en Yak'usda k'una'a dant'ah 'int'ah, whuz k'una'a 'uhint'ah, 'ink'ez ye dézti, 'i k'una'a 'uhint'ah. 'Et huwa butsi ghacha'winik huba cha'hóot'ah. 'Et ts'ekoo 'en dune hiye dezti 'uhint'ah. ⁸ Dune, 'en 'aw ts'eke ts'un hachaizulh, 'ink'ez ts'eke 'en dune ts'un hainzut 'et huwa. ⁹ 'Ink'ez Yak'usda dune 'aw ts'eke ba cha'yilil, 'ink'ez ts'eke 'en dune ba 'uyinla. ¹⁰ 'Et huwa ndunnah Liza, 'en bula sih ts'ih ndet ts'ekoo hubugha óoni'ai, 'i butsi gha'woonik huba' hoont'ah. ¹¹ 'Ink'ez neMoodihti bube'ildzun 'uts'int'ah. 'Et huwa dune, 'en ts'ekoo hubu'et 'uhoot'e ghat'ah, 'ink'ez ts'ekoo 'en dune hubu'et 'uhoot'e ghat'ah. ¹² 'Et ts'eke dune ts'un hainzut 'ink'ez dune ts'eke bugha whuzdli, 'ink'ez ts'iyawh Yak'usda ts'un hainde, ho' 'uhoont'ah. ¹³ Nuhwhenich'oh ts'ah'un na'a hoh duba nahutehdeh. K'us ndan ts'ekoo 'en tenahududli 'ink'ez 'aw dutsi gha cha'winik t'eh, 'et nuhwhuba ts'ah'un 'uhoont'ah ih? 'Et nuhwhuba dahoont'ah? ¹⁴ Njan ndet zeh whuts'odul'eh ndi yun k'ut? Soo cho whunulh'en, dune butsigha dinyez t'eh, 'et buba hukwaya hoonli ho' hoont'ah. ¹⁵ 'Et whunts'ih ts'eke butsigha dinyez t'eh, 'en ba hoonzoo, 'et butsigha dinyez, 'et bughá whunt'ai butsi gha'weznik li'oot'e ka. ¹⁶ K'us ndan njan lhenah 'uhudutenilh hukwa' huninzun t'eh, 'et ndez na'a zeh njan dudusni, 'et ndez na'a zeh neba' hoont'ah ho' hoont'ah. Nuwheni chah 'ink'ez yun k'ut dune ts'iyawh ndunnah Yak'usda hunedulh 'ilhunahuwudulh totsuk.

NeMoodihti hulhgha na'ut'alh huba

¹⁷ 'Aw 'et ndi be nahodulh'eh, ulhtus hoh be nohwhulh yalhtuk. Ts'iyawh 'ilhunawuzéhdel t'eh, 'aw soo 'áht'en chaduzusnih. 'Et k'us 'ats'un na'a aht'en nuhwhudúsni. ¹⁸ 'Udechoo khunek dusts'o, 'i ndet Yak'usda ba 'ilhunawáhdulh totsuk, ndet 'ilhunawuzehdel t'eh, 'et whunts'ih bulunah nuhtah lhenah 'udahni, 'et whulh 'údusts'o. 'Ink'ez suba 'alha 'uhoont'ah. ¹⁹ 'Et nuh-tah lhelhts'un hudédowh hinli, 'et whuz na'a ndótenilh. 'Et ndunnah nuhtah Yak'usda ba hinzoo, 'en ts'iyanah t'ebuntezeh ho' hoont'ah. ²⁰ 'Et huwa ndet 'ilhunawuzéhdel hoh 'et hulhgha neMoodihti na'ut'alh huba, 'aw 'et huba ilah whusahdel. ²¹ Lhe'ahja nuhwhenich'oh ahli hoh 'onghoh hubutsuh

da ts'uyi ah'al. 'Et huwa bulunah buye'élts'ul 'ink'ez bulunah tahanésnai. ²² 'Aw koo chawhaht'i 'uteh'ahk k'u's tatehtnilh whuba hoh aht'en? K'u's ndi Yak'usda ba 'ilhunawuzehdel t'eh 'ants'i nuhwhuba hoonli ih? 'Ink'ez ndan hoonliyaz chait'ih be yooya ubutelhtsilh. Daja chah nuhwhudoosni? Soo 'aht'en nuhwhudoosni ih? 'Awundooh! 'Aw soo 'aht'en nuhwhudoosni ghaits'ah!

NeMoodihti whusanatedalh whuts'un, ndi lhes ts'oo'ah 'ink'ez ndi lubot be ts'ootnai, 'et whuz na'a neba dazsai bunaztelnih

²³ 'Et neMoodihti khunek stl'aida'ai 'ink'ez i 'int'ah nuhtl'ada'ai 'et ndutni, neMoodihti Sizi Gri 'ulh'ek da ndet da butl'a ihitelhtelh whutsuh, 'et lhes yilhchoot. ²⁴ 'Udechoo chanailya ni 'ink'ez lhts'eyalhkut. 'Et ndó bulhni, "Ndi lhes ulhchoot 'ink'ez ah'alh. Ndi suyust'e 'int'ah. I nuhwheni nuhwhuba lhts'edalhkut. 'Et ndull'en hoh sunaoolhunih." ²⁵ 'Ink'ez ndi lubot 'et whuz na'a zeh 'uja. 'Uha'al hukw'elh'az ndó budani, "Ndi lubot i k'andit khunek nuhwhuba lhadúsdla, i 'int'ah. Suzkai be nuhwhuba usdla. 'Et ahnai totsuk, 'et ndaht'en hoh sunaoolhúnih." ²⁶ 'Et huwa ndi lhes teh'ah 'ink'ez ndi lubot tehnihl t'eh, 'et 'ahoolhyez 'et ndutelh'ilh totsuk, neMoodihti whusanatedalh whuts'un, 'et ndólh'en. 'Et i be neba dazsai whebuznoolhtun.

Sizi neba dazsai bunaztelnih whutsuh, na'uzdunool'en, 'awhuz tulih lubeshi bulh 'uts'int'ah

²⁷ 'Et huwa k'u's ndan ndi lhes yute'ah 'ink'ez neMoodihti bulubot yutet-nell hoh hiba soo cha'hildzoo hoh hiyilhchoot t'eh, 'en nduja t'eh, neMoodihti buyust'e 'ink'ez buzkai bulh 'i bugha lubeshi yilhchoot. ²⁸ 'Et dune dich'oh na'dunul'en 'et hukw'elh'az ndi lhes hiyoo'ah 'ink'ez ndi lubot hiyootnai. ²⁹ 'Et ndan soo cha'hildzoo hoh ndi yu'ah 'ink'ez yutnai t'eh, 'et Yak'usda yuba nahuteyeh, 'et dich'oh khanáwhunt'ai. Dich'oh 'aw ts'ah'un na'a hoh neMoodihti buyust'e 'i bugha t'ewhunúszun 'et huwa. ³⁰ 'Et huwa lhanah nuhtah laihít'ah suli, bulunah hunduda chah suli, 'ink'ez lhanah 'ilhuz nahunestez.* ³¹ 'Et huwa t'ena'ts'udunudzun hoh nuwhenich'oh na'ts'udunul'en t'eh, 'et sih neMoodihti 'aw neba nahooyeh ghaits'ah. ³² 'Ink'ez neMoodihti neba naheyeh t'eh, 'et neoolhtsas. 'Et hoh 'aw ndi yun k'ut whudune bulh neba nahoodeh ghaits'ah. ³³ 'Et huwa sulhutsinkah, nket'ah 'uteh'ah huba 'ilhunawuzehdel t'eh, lhba lhu'i. ³⁴ Ndunnah buye'élts'ul, koo ts'ih hubéh'ah. 'Et hoh nket'ah 'ilhunawuzehdel t'eh, 'aw nuhwhuba nahoodeh ghaits'ah. 'Ink'ez 'udun chah whenhodutelh'eh, ndet nuhghu niya t'eh, 'et ts'iyawh ts'ah'un na'a nuhwhuba neootes'ah.

12

Lhelhyoo Yak'usda be ts'odólhti neghá whunkat, 'et whunts'ih 'ilhunuh zeh Ndoni 'en zeh ts'iyawh negha yúnle

¹ 'Aw 'et sulhutsinkah dant'i Ndoni negha yú'ah, 'i neghalts'uk, 'i bugha 'et chah t'eónóhzin nuhwhuba hukwa' nuszun. ² T'eónúhzun nuhwheni 'udun yun k'ut whut'en hoh da 'aw nuhwhuba 'alha 'uhoont'ah cháhlah inle. 'Et huwa ndi 'uk'edéltsi yachálhtuk, 'i buk'úne' aht'en ínle. ³ 'Et huwa nuhwheni taóodutelts'ulh hukwa' nuszun. Soo cho whunulh'en, 'aw 'ilhunuh dune Yak'usda buyégha bugha, 'Sizi Gri 'en untsi", dooni ghaits'ah. 'Ink'ez 'aw 'ilhunuh dune ndutni t'eh, 'Sizi Gri 'en neMoodihti 'int'ah', Ndoni 'en bugha zeh ndudutenilh ho' hoont'ah. ⁴ 'Aw 'et lhelhyoo neghá nkak, 'et whunts'ih 'ilhunuh zeh Ndoni 'en ts'iyawh negha yúnle. ⁵ 'Ink'ez lhat lhelhts'un Yak'usda huba ne'ts'ut'en, 'et whunts'i 'ilhunuh neMoodihti zeh 'int'ah. ⁶ Lhat hoh Yak'usda ba' ts'oott'en huba' hoont'ah 'et whunts'i 'ilhunuh

* **11:30** Ndi khunek nahunestez ni, 'et yahadlah ni ho 'utni.

Yak'usda unli hoh ts'iyawh ye 'út'en lhaídulh'ih. ⁷ 'Et 'ilhunuh ts'inli hoh Ndoni be wheóodiltsih ho' hoont'ah nuwheni ts'iyawh neba hoonzoo tele 'et huwa. ⁸ 'Et 'ilhunuh dune, 'en Ndoni bugha khunek be ts'uhunih, 'i yugha iní'ai. 'Et 'uyoon dune, 'en chah, Ndoni, 'en zeh, khunek be t'eoonudzun, 'i yugha íni'ai. ⁹ 'Et 'uyoon chah Ndoni, 'en zeh, be 'alha 'uhooont'ah yugha inínla 'ink'ez 'uyoon, 'en Ndoni, 'en zeh, ndi ye úlhtus, 'i dune soo na'bulh'en, 'et yugha ooní'ai. ¹⁰ 'Et 'uyoon 'en ndi huwa 'ét'en tuné' tet'en 'et yutl'ahó'ai. 'Et 'uyoon buba nus whunilh'en, 'et yugha óoni'ai. 'Et 'uyoon 'et nahooté'ah nts'e na'a buyégha lhelhts'un na'a 'int'ah, 'et yugha óoni'ai. 'Et 'uyoon lhelhts'un na'a yahútelhtuk yutl'ahó'ai. 'Et 'uyoon chah lhelhts'un na'a yahulhtuk, 'et t'ewhuntezin 'et yutl'ahó'ai. ¹¹ 'Ink'ez ndi ndunt'i, 'i ts'iyawh 'i Ndoni zeh nts'e na'a hukwa' ninzun k'una'a, 'et whuz na'a huba lhk'ehónla. 'Ink'ez k'an 'et ndet hubutaooníla, 'i Ndoni dich'oh 'en be zeh 'uwhut'en.

Christ buyust'e lhawh 'ulya, 'et whunts'ih buyust'e 'ilhunuh zeh 'int'ah

¹² Ndez na'a njan dúhoont'ah, dune yust'e 'ilho zeh unli. Neyust'e lhat lhelhts'un na'a neoodinla wheni ho' 'int'ah, 'et whunts'ih 'ilho zeh unli. Christ, 'en chah 'et whuz na'a ndunt'ah. ¹³ 'Ink'ez 'ilho Ndoni 'en bugha nuwheni ts'iyawh too be' ts'ulya hoh 'ilho yust'e ts'uzdli. 'Et Lizwif ts'inli, k'us 'udun yun k'ut whut'en ts'inli, k'us 'ulhna ts'inli, k'us 'ulhna whuch'a hubula nadutetnih ts'inli, nts'oh dats'ínt'ah ts'inli whunts'i, 'ilho Ndoni 'en ts'un 'ilho ts'etnai nesulhtsi. ¹⁴ Nulh'en neyust'e 'ilho zeh unli, 'et whunts'ih lhat neoodinla ho' 'int'ah. ¹⁵ 'Et dune ke 'i utni, "Aw 'ula chasdlah, 'et huwa yust'e bube'ildzun cha'ust'ah." 'Et whuz na'a yalhtuk t'eh, 'et ndi yust'e bube'ildzun chailah ih? 'Awundooh! ¹⁶ 'Ink'ez dune dzo 'i 'utni, "Aw 'una chasdlah, 'et huwa yust'e bube'ildzun cha'ust'ah." 'Et whuz na'a yalhtuk t'eh, 'et ndi yust'e bube'ildzun chailah ih? 'Awundooh! ¹⁷ 'Et dune yust'e ts'iyawh 'una unli t'eh, 'et t'eh nts'e na'a simba hoonliyaz whudóots'o? K'us yust'e ts'iyawh 'udzo unli t'eh, 'et t'eh nts'e na'a simba hoonliyaz whuza hólhtsun? 'Aw 'uhót'e ghaít'ah! ¹⁸ 'Et huwa Yak'usda neyust'e lhat neoodinla yulhtsi, 'et whuz na'a hukwa' ninzun 'et huwa 'et ndúyinla. ¹⁹ Nts'e na'a simba 'ilho zeh wule? 'Et 'úja t'eh, 'et nts'e na'a simba yust'e wule? 'Aw 'uhót'e ghaít'ah! ²⁰ 'Et hoh yust'e lhat neoodinla unli 'et whunts'ih 'ilho zeh unli. ²¹ 'Ink'ez 'una, 'ula, "Aw nka' nooszin ghaít'ah," dooní ghaít'ah. 'Ink'ez chah 'utsi, 'uke, "Aw nka' nooszin ghaít'ah," dooni ghaít'ah. ²² 'Et k'us ndi yust'e whulutah tube lait'ah unli uzninzun, 'et whunts'ih 'i be'et 'aw 'uts'oot'e ghaít'ah. ²³ 'Ink'ez ndi yust'e bulah ndai 'aw chadítí uzninzun, 'i 'int'ah 'o nus unzoo 'ink'ez sóo ne'ts'oolh'en huba' hoont'ah. 'Ink'ez ndi yust'e whulutah ndet 'aw dune nalhts'et huba cha'hóozooth, 'i 'int'ah degha nus sóo ne'ool'en huba' hoont'ah. ²⁴ Ndet buyust'e soo 'oonent'en t'eh, 'aw 'et soo 'int'ah. 'Et whunts'ih Yak'usda ts'iyawh lhkanaídanla. 'Et huwa ndai buyust'e bulah hubutah hoolah, 'i ba 'o nus buba idézti k'una'a 'uyínla. ²⁵ 'Et ndez na'a buyust'e 'aw lhk'eookat ghaít'ah. 'Et whunts'ih ndai buyust'e bulah ts'iyawh lhgha hudli. ²⁶ 'Et buyust'e bulah 'ilho whunts'i dzuh nuzut t'eh, ts'iyawh dzuh nuhudeh. 'Et 'ilho buyust'e bulah hidélhti t'eh, ts'iyawh lhba huhóont'i. ²⁷ 'Et whuz na'a zeh nuhwheni chah Christ buyust'e 'aht'ah. 'Ilhunah ahli hoh 'i buyust'e bulah 'aht'ah. ²⁸ 'Et huwa 'ilhunahuwúdulh hubutah, Yak'usda dich'oh 'utahábanla hoh whél'a, 'en 'udechoo nébuninla. 'Et nus whunilh'en, 'en whulh nat nébuninla. 'Et dune hoodulh'eh whulh tat nébuninla. 'Et 'o 'at huwa 'ét'en túne' 'ut'en nébuninla. 'Et 'o 'at hubutl'a hó'ai hoh dune soo na'bulh'en, 'en nébuninla. 'Et 'o 'at 'uyoon la'ut'en nébuninla. 'Et 'o 'at dune moodih nébuninla, 'ink'ez bulunah lhelh ts'un na'a yahulhtuk nébuninla. ²⁹ 'Et

nuwheni ts'iyawh ih whél'a ts'inli? Nuwheni ts'iyawh ih nus whunilh'en ts'inli? 'Et nuwheni ts'iyawh ih dune hoodulh'eh ts'inli? Nuwheni ts'iyawh ih huwa 'ét'en túne' uztet'ilh? ³⁰ 'Et nuwheni ts'iyawh ih netl'awhélts'ut dune soo ná'ts'ulh'en? Nuwheni ts'iyawh ih lhelh ts'un na'a yats'utelhtuk? Nuwheni ts'iyawh ih lhelh yoo khunek t'ets'unuzih netl'awhélts'ut? 'Awundooh! ³¹ 'Et ndi degha nus unzoo, 'i neghant'ai, 'i soo cho hukwa' nuhzun, 'et whunts'i 'o nus hoonzoo, 'et whewhuntehltun.

13

Be nék'ets'ints'i, 'i degha nus dézti ho' hoont'ah

¹ 'Et dune bughunek hiye yalhtuk, 'i 'ink'ez lizas hiye yalhtuk, 'i chah, 'et whuz na'a ts'iyawh be yalhtuk, 'et whunts'ih be nék'ets'ints'i chást'ih t'eh, 'et t'eh lhendunuts'o cho 'ink'ez lhendunuts'oyaz 'ants'i 'ilho lhen-dunuts'o li'dutesnilh. ² 'Et dune huba nus whunilh'en t'eh, 'ink'ez huba whé' hoont'ah hooyah ts'iyawh t'eónúszun t'eh, 'ink'ez khunek be t'eónudzun, 'i 'et chah t'eooniszin t'eh, 'ink'ez ts'iyawh be 'alha 'ohoont'ah 'ust'i t'eh hoh dzulh whunts'i 'udun nités'ah t'eh, whuz na'a 'et ndust'ah hoh be nék'ets'ints'i, 'i chást'ih t'eh, 'et t'eh 'aw hoonli chaslah. ³ Ndai buk'e dune ts'inli ts'iyawh howa níla t'eh, 'ink'ez suyust'e chah duték'un whuba nech'ahudetni hubutl'a yálhti t'eh, 'ink'ez be nék'ets'ints'i, 'i bu'et 'ust'ah t'eh, 'et t'eh 'aw suba k'elha hole ghaít'ah. ⁴ Ndi be nék'ets'ints'i, 'i bugha hoonli tacha'dinik. 'I bugha nedzi unzoo hukw'u na'a 'uts'int'ah. 'I bugha 'aw howu cha'ts'oolhúnih, 'ink'ez 'aw dune 'uzdudil'i howu yachats'ulhtuk chah, 'ink'ez 'aw ts'incha nacha'uzdudil'i. ⁵ Ndi be nék'ets'ints'i, 'i bugha 'aw 'uyoon hoontsi' k'una'a hubulh 'úts'oot'e ghaít'ah. 'Aw nuwhenich'oh hukwa' 'uts'uninzun tuné'ts'oot'en ghaít'ah. 'I bugha 'aw khun ts'uhunóolch'e ghaít'ah 'ink'ez 'aw hoontsi' hubugha nuní uznoozut ghaít'ah. ⁶ 'I bugha ndai 'aw ts'ah'un na'a cha'ít'ah t'eh, 'aw ts'uhót'i ghaít'ah. 'Et whunts'ih ndai khunek 'alha 'int'ah, 'i be ts'uhóont'i. ⁷ Ndi be nék'ets'ints'i, 'i bugha 'aw 'ustl'e 'uts'ooneh ghaít'ah. Ts'iyaintsuk neba 'alha 'ohoont'ah. Nts'oh dáhoont'ah hoh hukwa ts'ih ts'úhooli, 'ink'ez 'et ts'iyaintsuk whechats'ítsaz. ⁸ Ndi be nék'ets'ints'i, 'i 'aw bulatah hoolah. 'Et whunts'ih ndai be nus t'eooniudzun, 'i 'et 'ustl'e 'uwhuténih. 'Et lhelhts'un na'a yatuk, 'et chah hoolah whutele. 'Ink'ez ndai be t'eónudzun, 'i chah 'ustl'e 'udutenilh. ⁹ K'an 'et ndai be t'eónudzun, 'i bulah zeh ts'it'i 'ink'ez ndai be nus t'eooniudzun, 'i chah bulah zeh ts'it'i 'et huwa. ¹⁰ 'Et whunts'ih ndet whulatah suli, 'et whusawhélts'ut t'eh, 'et ndet bulah zeh unli, 'i ts'iyawh 'ustl'e' 'uwhuténih. ¹¹ 'Et 'uski usdli da, 'et 'uski k'una'a yalhtuk, 'uski k'una'a nuní nuszut, 'ink'ez 'uski k'una'a lhtahawhúsde. 'Aw 'et dune sidúdli, 'et ndai be 'uski k'úne' zust'en, ts'iyawh 'udun niooníla. ¹² Soo cho whunulh'en, ndai be ná'uzdunul'en, 'i be 'aw soo nacha'ts'udunil'en. 'Et ndet whusawhélts'ut t'eh, 'et soo ts'ah'un nts'e na'a ts'unul'en, 'et whuz na'a zeh ts'uwhé'en suli. K'an 'et bulah zeh t'eónúszun, 'et whunts'ih ndet whusawhélts'ut t'eh, 'et t'eh nts'e na'a Yak'usda t'esunínzun, 'et si chah whuz na'a ts'iyaintsuk t'ewhunteszeh. ¹³ 'Aw 'et ndi tawh dedowh, be 'alha 'ohoont'ah, be hukwa' tsi hóodli, 'ink'ez be nék'ets'ints'i, 'i 'et njan whuzdla. 'Ink'ez degha nus dézti, 'i bé lhk'ets'udutsi', 'i 'int'ah.

14

Bé nus whét'en, 'i degha nus buka' noohzin huba' hoont'ah

¹ 'Aw 'et ndi be nék'ets'ints'i, 'i zeh soo cho ts'un naht'uk. 'Ink'ez ndai Ndoni negha ínínlá, 'i soo cho buka' noohzin. 'Et ndi be nus whét'en, 'i degha nus buka' noohzin huba' hoont'ah. ² 'Et ndan lhelhyoo khunek be

yahulhtuk, 'en Yak'usda ts'un yálhtuk, 'aw dune ts'un yalhtuk ilah hoh 'utni, daja ni 'aw dune t'ehonízun 'et huwa. 'Ants'i huba whe' hoont'ah hooyah, buyégha bugha yálhtuk 'et huwa. ³ 'Et whunts'ih ndan nus whúnilh'en, 'en dune ts'un yalhtuk. 'Et 'o nus Yak'usda ba hilhtus wule, hubudziyah hoolhtus 'ulheh, 'ink'ez hubudzi nduk óot'e ka. ⁴ 'Et lhelhts'un na'a khunek be yalhtuk, dich'oh 'o nus Yak'usda ba ulhtus na'dudulhtsi. 'Et whunts'ih ndan nus whunilh'en, 'en ndunnah 'ilhunahuwúdulh 'o nus Yak'usda ba hilhtus wule hubulhtsi. ⁵ Ts'iyawh unducha lhelhts'un na'a khunek be yalhtuk 'et whunts'ih nus whunilh'en wahle, 'et 'o nus nuhwhuba hukwa' nuszun. Ndán nus whunóolh'en, 'en nuhwheni nuhwhuba lhelhts'un na'a yalhtuk 'o nus ncha ho' int'ah. Ndán lhelhts'un na'a khunek be yalhtuk, ndet 'uwhúlhni, 'aw t'ets'onízun. 'Et nts'e na'a daja ni t'eooniszin t'eh, 'et t'eh zeh ts'ah'un na'a daja ni t'ets'ontezezh. 'Et sih 'ilhunahuwúdulh Yak'usda ba hilhtus hútele.

Ndan lhelhts'un na'a khunek be yalhtuk, 'et 'uyoo khunek ye yátelhtuk, 'i daja ni hoh 'utni t'einoozeh 'et huba soo cho tenadoodli

⁶ 'Aw 'et sulhutsinkah nuhghu nusya t'eh lhelhts'un na'a be yatuk, 'i be nohwhulh yálhtuk t'eh, 'et nts'e na'a simba nuhwhuba hózoo? 'Et whunts'ih ndai nuhwhuba whé 'utni hooyah, k'us be t'eoónudzun, k'us bé nus whét'en, k'us be whúnhots'odulh'eh, 'et whuz na'a nohwhulh yalhtuk t'eh, 'aw 'et zeh nuhwhuba whútezoo. ⁷ Ndai 'i 'aw chakhínah, 'i 'ants'i ndai bulaz dunul'ai hoh be ts'ujun, 'i k'us 'ult'o, 'i be duzíts'ai 'ink'ez 'ilhuh k'una'a zeh dusts'o t'eh, 'et nts'e na'a simba shun t'ets'unoozeh? ⁸ 'Ink'ez be ts'ujun hiye jih 'uts'un na'a be duzíts'ai t'eh, 'et t'eh nts'e na'a simba lhuhutedughan lhaháootneh ih? ⁹ Nuhwheni chah 'et whuz na'a zeh lhelhts'un na'a yalhtuk t'eh, 'et nts'e na'a simba daja dahni t'ets'onoozeh? 'Ants'ihs yaz ts'un yalhtuk li'dutehnih. ¹⁰ 'Et lhat ndi yun k'ut lhelhts'un na'a khunek be yats'ulhtuk. 'I ts'iyawh 'ilho hoh hoonliyaz 'uwhúlhni. ¹¹ 'Et huwa daja ni 'aw t'eoónuzúszun t'eh, 'et sih ndan lhelhts'un na'a khunek be yalhtuk, 'en lhelhyoo dedowh suba li'hoont'ah 'ink'ez si chah lhelhts'un dedowh huba lí'ust'ah. ¹² 'Ink'ez ndai Ndoni negha ooni'ai nuhwheni chah tube buka' nahzun 'ilhunahuwúdulh hilhtus huboolhtsilh ka. 'Et huwa 'et zeh buka' nahzun, 'o nus hoolhtus wahle. ¹³ Njan howa ndan lhelhts'un na'a khunek be yalhtuk, 'et 'uyoo khunek ye yátelhtuk, 'i daja ni hoh 'utni t'einoozeh 'et huba soo cho tenadoodli. 'Et sih daja ni t'ehonoozeh. ¹⁴ 'Et ndi lhelhts'un na'a khunek be tenadusdli t'eh, 'et t'eh sich'oh suyéghah 'i be tenadutesdli 'et huwa. 'Et whunts'ih sich'oh seni ba 'et 'ants'i whutéle. ¹⁵ Nts'e na'a degha nus neba whutézoo? Daja nuhzun? Ndez na'a 'o nus soo 'ohoont'ah, 'et sich'oh suyégha chah 'ink'ez sich'oh seni be chah tenadutesdli. 'Et sich'oh suyégha chah 'ink'ez sich'oh seni shun be chah tesjun. ¹⁶ 'Et whunts'ih nyunch'oh nyégha 'i be zeh khunek be yailhtuk, 'et Yak'usda délhi hoh yailhtuk t'eh, 'et 'ilhunuh t'eoonuszun hubutah usda, ndi khunek dézti, 'i be yailhtuk, 'ink'ez nyudits'o t'eh, 'et sih nts'e na'a ndoh honeh dooni, daja ni 'aw t'ewhunuszun 'et huwa. ¹⁷ 'Et 'alha nghunek dézti, 'i tube únzoo. 'Et whunts'ih ndan t'echanusze, 'et huwa Yak'usda ba 'aw ulhtus wule ghaít'ah. ¹⁸ Yak'usda suchanailya dusni ndi lhelhts'un na'a khunek be yalhtuk, si nuhghanus lhat hoh lhents'un na'a yalhtuk. ¹⁹ 'Et whunts'ih 'ilhunahuwésdel hubutah, skwunlai khunek be whunts'i nohwhulh yátelhtuk t'eh, 'et lhai cho lhelhyoo khunek be nohwhulh yátelhtuk, 'et 'o nus hoonzoo. 'Et hukwa' nuszun.

Lhelhyoo khunek be yatuk, 'i huba 'alha cha'hóot'ah, 'en zeh hubugha 'utni ho'hoont'ah

20 Sulhutsinkah 'uskeh k'una'a 'ooht'e gunih nuhwhubeni be. 'Et 'uskehyaz dahínt'ah 'aw hoontsi'i'ehonízun, 'et whuz na'a 'ooht'e. 'Et whunts'ih dune suli k'una'a nuní noohzut. **21** 'Et Yak'usda bughunek k'ut 'uk'une'úzguz 'et ndutni, "Lhanah lhelhyoo khunek be yalhtuk,

'ink'ez dune 'ats'un keyah whut'en,
'en hubugha ndunnah Lizwif 'i be hubulh yátelhtuk,
'et whunts'ih 'aw sodóots'o hukwa cha'hunízun."

22 'Et sih ndi lhelhyoo khunek 'i be Lizwif, 'en hubugha 'útni ho' hoont'ah. Ndunnah huba 'alha 'uhoont'ah ba cha'ít'ah. Huba 'alha cha'hóot'ah, 'aw 'en zeh buba 'int'ah. 'Et whunts'ih nts'e na'a dune Yak'usda huba nus whunilh'en, ndunnah huba 'alha 'uhoont'ah 'en huba 'uhoont'ah, huba 'alha cha'hóot'ah, 'en huba cha'hóot'ah. **23** 'Et huwa Yak'usda ba 'ilhunahuwúdulh, 'en ts'iyawh 'ilho 'ilhunahuwutéduh, 'ink'ez ts'iyawh 'ilhunah lhelhyoo khunek be yahutelhtuk t'eh, 'et whuz na'a nduhóoja whulhuhodul'eh k'us ndunnah huba 'alha cha'hóot'ah, 'en nuhgha nindel 'ink'ez nuhzhíh húdelhts'i t'eh, 'et 'alha tulih nuhwheni whusnik ahli nuhóduténih ih? A, 'alha 'uhoont'ah! **24** 'Et whunts'ih ts'iyawh Yak'usda ba nus huhó'en t'eh, 'ink'ez 'ilhunuh 'aw soo cho whechaooodulhú'e k'us 'aw buba 'alha cha'hóot'ah, 'en nuhghu ninya 'ink'ez nuhzhíh usda t'eh, 'et ndunnah nus ho'en, 'en hubugha ndet hoh tinta' 'ut'ih unli, 'et nahooté'ah. 'Et huboozélhts'ai huwa ts'iyanah hiba nahezya. **25** 'Et sih dudzi yuh untilh'i, 'i ts'iyanah nalhts'et hawhútelts'ulh ho' hoont'ah. 'Et huwa nachánitno, Yak'usda ts'un teni' untilhdzilh, 'ink'ez 'alha Yak'usda nuhwhutah 'int'ah hidutenilh.

Yak'usda ba 'ilhunahowesdel t'eh, ndez na'a ndadutenilh

26 'Et sulhutsinkah, daja dutehnilh? Ndet 'ilhunawahdulh teh, 'ilhunah ahli hoh 'o nus ntehyeh 'ink'ez lhat lhula'daht'en. 'Et sih nus lhúnlhut'uk lí'aht'ah. 'Ilhunuh ahli hoh Ndoni nuhgha ooni'ai, whuz na'a 'ooht'en. 'Et 'ilhunuh Yak'usda bushun aht'i, k'us 'ilhunuh whebodutelh'eh aht'i, k'us 'ilhunuh 'uyoo khunek bé nuhtah yatelhtuk aht'i, k'us 'ilhunuh bughunek daja dutenelh aht'i. **27** Ndan nuhtah 'uyoo khunek bé yatelhtuk t'eh, 'et nanah k'us tanah k'us degha nus tahult'oh, 'en 'ilhunah zeh huba yaooltuk. 'Ink'ez 'ilhunah daja hutni, 'et ndun whudóoni. **28** 'Et whunts'ih nuhk'una'a yuba yatelhtuk hoolah t'eh, 'et t'eh 'ilhunahuwésdel hubutah 'ants'i t'edoosnih. Dich'oh dudzi yuh hoh 'ink'ez Yak'usda ts'un chah yaoolhtuk. **29** 'Et ndan nus hó'en nanah k'us tanah, 'en zeh Yak'usda bughunek be yahoolhtuk. 'Et ndai hiye yaílhtuk, 'i 'et 'onghoh, 'en daja hutni, 'uyoona ba ts'ah'un na'a 'int'ah tulih k'us 'ats'un na'a tulih 'int'ah. **30** 'Ink'ez hubutah 'ilhunuh hoonliyaz benghuh níwhults'ut, 'et howu yatelhtuk t'eh, 'et 'udechoo yatelhtuk, 'en t'edoosnih. **31** 'Et whuz na'a 'ilho ahli hoh nus hóh'en t'eh, 'et sih ts'iyawh 'o nus soo t'ewhunoohzeh, 'ink'ez ts'iyawh huba nus whúnulht'uk hoh bula 'ooht'en. **32** 'Ink'ez dich'oh buyégha 'i be ndet nus whunóolh'en, dich'oh zeh k'úne' whul'en. **33** Yak'usda 'en ndai be nedzi dezghel, 'en buts'un hayúkat. 'Et whunts'ih dune ye lhanah 'uhudutni, 'i 'aw 'en buts'un hachayuskat. 'Et whuz na'a nts'oh tulih dune Yak'usda bube'ildzun 'ilhunahuwudulh, 'en ndi be nedzi dezghel, 'i 'et dez'ai. **34** 'Et nuhwheni 'ilhunawuzehdel t'eh, 'et nuhts'ekoo 'en t'ehudoosnih huba' hoont'ah. 'En yahutelhtuk huba cha'hóot'ah, dune ghanyo 'uhint'ah 'et huwa. Moses be' dustl'us 'i chah 'et whuz na'a zeh 'et ndutni. **35** 'Et ts'ekoo hoonliyaz hodutel'eh hukwa' huninzun t'eh, bukoo ts'ih dukikah 'en hubuhoodolhkut. Yak'usda ba 'ilhunahuwúdulh hubutah, ts'eke yatelhtuk t'eh, nuhwhuba hukwaya hoonli ho' hoont'ah. **36** Daja nuhzun, Yak'usda bughunek nuhwheni ih nuhts'u hadélts'ut? 'Ink'ez nuhwheni zeh ih nuhts'u

hadúkat? 'Awundooh! ³⁷ 'Et ndunnah nus whunílh'en na'dunúdzun, k'us Ndoni hoonliyaz 'en hubugha íni'ai, 'et whuz na'a ndonínzun t'eh, 'et ndez na'a chah ndunóozin, ndai bugha nuhts'o k'e'águz, 'i Yak'usda khunek netl'aída'ai, 'i zeh 'int'ah. ³⁸ 'Et whunts'ih ndunnah hoonli t'eónínzun na'dunúdzun, 'en chah whute whuz na'a 'uhoot'e. ³⁹ 'Et sulhutsinkah 'o 'un chah nus ho'en tehle, soo cho hukwa' nuhzun, 'ink'ez ndunnah lhelhyoo khunek be yáhulhtuk, 'en chah whuch'a hubunóohyoot gunih. ⁴⁰ 'Et huwa ts'iyawh hoonzoo hukw'u na'a 'ink'ez ts'ah'un na'a 'uhót'e.

15

Christ dinadíja 'alha 'uhoont'ah

¹ Aw 'et sulhutsinkah ndi khunek unzoo, 'i be nohwhulh yálhtuk. Soo cho t'entehzeh hukwa' nuszun. 'Uda úlhchoot 'ink'ez 'et huwa 'i be ndi yun k'ut delhúts'i. ² Ink'ez ndi khunek be nohwhulh yalhtuk, 'i soo cho oohtun t'eh, 'et 'i be dahjih. 'Et whunts'ih 'ants'i nuhwhuba 'alha 'uhoont'ah t'eh, 'aw buk'e dóohjih ghaít'ah. ³ 'Et 'udechoo da nuhwheni nuhtl'aho'ai ndet stl'awhélts'ut, nts'e na'a Christ nelubeshi k'elha dazsai. 'Et whuz na'a Yak'usda bughunek 'et ndutni. ⁴ Ink'ez nts'e na'a wheyihiyalhti. 'Et whulh tat dzin dinadija. 'Et whuz na'a Yak'usda bughunek 'et chah ndutni. ⁵ Ink'ez nts'e na'a Cephas yunalah ts'et hainya, 'et hukw'elh'az ndunnah lanezi 'o 'at nanah, 'en hubunalah ts'et hainya. ⁶ 'Et hukw'elh'az 500 neyulhutsinkah 'en ts'iyawh 'ilho hubunalah ts'et hainya. 'Ink'ez lhanah 'awhuz hukhuna, 'et whunts'i bulunah 'ilhuz nahunestez. ⁷ 'Et James 'en chah yunalah ts'et hainya, 'ink'ez whél'a, 'en ts'iyawh hubunalah ts'et hainya. ⁸ 'Ink'ez degha nus, si chah, 'aw soo whughah whudezull hoh whuzíli ilah, 'et whunts'ih sunalh ts'et hainya. ⁹ Whel'a 'en hubutah si degha nus hubuk'elh'ih 'ust'ah na'dunúsdzun. 'Et Yak'usda ba 'ilhunahuwúdulh, 'en dzuh nobulhdeh inle, 'et huwa 'aw whél'a saduténih 'et huba soo cha'lhudzooh. ¹⁰ 'Et whunts'ih Yak'usda ye unzoo, 'i bugha nts'e na'a dast'ah, 'et whuz na'a zeh 'ust'ah. 'Ink'ez Yak'usda suts'un únzoo, 'et 'aw 'ants'i cha'hóot'ah. 'Et k'us whel'a 'en hubutah huba nus 'ultus, 'i be 'ést'en. 'Aw si ilah, Yak'usda ye unzoo, 'i sulh 'int'ah, 'i be 'úst'en. ¹¹ 'Et huwa si sgha k'us 'onghoh hubugha, nts'e na'a Yak'usda bughunek be nohwhulh yáts'ulhtuk, 'et whuz na'a zeh neghunek nuhwhuba 'alha 'int'ah.

T'ets'oninzun Christ yahadla tah dinadija

¹² T'eónúhzun Christ yahadla tah dinadija. 'Et whuz na'a nuwheni nelatah ts'ih whudáhts'o. 'Ink'ez nts'e na'a bulunah nuhwheni yahadla 'aw dinahudóodelh ghaít'ah dahni? ¹³ Ndez na'a njan ndúhoont'ah, ndunnah yahadla 'aw dinahudóodelh ghaít'ah t'eh, 'et sih Christ 'en chah 'aw dinachadídal. ¹⁴ Ink'ez Christ 'en chah 'aw dinachadídal t'eh, 'et sih 'en bugha neghunek 'aw hoonliyaz chailah ho' 'int'ah, 'ink'ez be nuhwhuba 'alha 'uwhuté'tilh, 'i chah 'ants'i 'et 'uwhuté'tilh. ¹⁵ 'Et whunts'ih yahadla dinachahúdidulh t'eh, Christ 'en chah 'aw dinachadídal. 'Et whuz na'a nduhooja t'eh, nuwheni chah Yak'usda bugha whuts'it be yats'ulhtuk li'hoont'ah. Njan lhe'ts'utni, Yak'usda 'en bugha Christ nakhítña hoh dinadija 'et huwa. ¹⁶ 'Et yahadla dinachahúdidulh t'eh, Christ 'en chah 'aw dinachadídal ho' hoont'ah. ¹⁷ Ink'ez Christ 'aw dinachadídal t'eh, 'et sih be nuhwhuba 'alha 'uhoont'ah 'aw hoonliyaz chailah ho' 'int'ah 'ink'ez 'awhuz nuhwhulubeshi bulh 'áht'ah. ¹⁸ Ink'ez ndunnah Christ bube'ildzun hinli hoh yahadla, 'en ts'iyawh 'ilhuz wheni tinta' huninkat hinli. ¹⁹ 'Et ndai Christ ts'un buka tsi ts'úhooli, 'et ndi yun k'ut uzdelhts'i huba zeh 'int'ah t'eh, 'et sih ts'iyanaah tah nuwheni degha nus tets'ul'en wule.

Ndi be yats'adla, 'i soo degha nus buch'a detni unli, 'i hoolah tele

²⁰ 'Et whunts'ih 'alha yahadla tah, Christ 'en 'uja dinadija. 'Ilhuz nanestez tah 'en 'udechoo dinadija whuzdli. ²¹ Dune, 'en bugha dune yahadlah 'ink'ez dune, 'en bugha nahakhítnah 'et huwa. ²² 'Et nts'e na'a Adam 'en bugha ts'iyanah yaídla, 'et whuz na'a Christ, 'en zeh nahukhutetnah. ²³ 'Et whunts'ih 'ilhunah hinli hoh nts'oh huwa buba whezulh hubugha óoni'ai, 'et whuz na'a 'uhutet'ilh. Christ 'en choo nakhitnah suli. 'Et hukw'elh'az ndunnah Christ bube'ildzun hinli hoh huba whusanátedalh, 'et t'eh 'en chah. ²⁴ 'Et whulatah suli t'eh, ndoh ts'iyawh 'uda 'uhooja tele. 'Et hoh t'eh bula tah whutéle t'eh, nek'úne' whul'en, ndi yun k'ut neba ye úlhtus chah, ndi nududeh 'i be butl'awhelts'ut chah, 'i ts'iyawh 'ilho hoolah yutelhtsilh. 'Et hukw'elh'az ndai Sizi Gri dich'oh zeh yugha hubudayi cho unli, 'i ts'iyawh Yak'usda ne'aBá, 'en yutl'aítelalh. 'Et whuz na'a degha nus dzin whutéle ho' hoont'ah. ²⁵ 'Et whuts'un buYe' hich'a ne'ut'en, 'en be'aBá duke tl'ah nibutelel 'ink'ez hubuk'edit'ez t'eh, 'et whuts'un ts'iyaintsuk k'une'butelih huba' hoont'ah. ²⁶ Ink'ez ndi be yats'adla, 'i soo degha nus buch'a detni unli, 'i hoolah tele. ²⁷ 'Et huwa njan ndutni, "Ts'iyaintsuk degha nyoh 'int'ah yulhtsi." 'Et whunts'ih hoh da 'uk'e'ánguz hoh ndutni, "Ts'iyaintsuk degha nyoh 'int'ah yulhtsi," 'et whunts'ih 'aw Yak'usda buYe' Sizi Gri degha nyoh ni'dudooltelh għait'ah ni hoh 'utni. ²⁸ 'Et nket'ah ts'iyaintsuk degha nyoh 'int'ah yutelhtsilh t'eh, 'et sih buYe', 'en chah, be'aBá degha nyoh 'int'ah 'uduteltsilh. 'En 'int'ah ts'iyaintsuk degha nyoh 'int'ah yulhtsi. 'Et sih Yak'usda dich'oh ts'iyaintsuk għa ndoh tele.

Bulunah Sizi Gri dinadija 'awhuz huba 'alha cha'hoot'ah

²⁹ 'Et 'alha yahadla dinachahúdidulh t'eh, 'ink'ez ndunnah yahadla 'uyoon, 'en huba too be' hubuhulh'en, 'ink'ez 'et t'eh dahútenilh? 'Et di ka ndunnah yahadla 'uyoon, 'en huba too be' hubuhulh'en? Hoolah 'ants'i 'et 'uhut'en. ³⁰ Ink'ez di ka nuwheni chah dzin totsuk 'ahoolhyez neba wheónujut? Nuhwheni daja nuhzun? ³¹ Ink'ez nts'e na'a hooteht'i, si chah 'et whuz na'a Christ neMoodihti, Sizi ts'utni, 'en bugha hootést'i. 'Ink'ez soo ts'ih'un 'un whudusni, ndi khunek be yalhtuk, 'i bugha dzin totsuk dásah. ³² 'Et keyah Ephesus ts'ih nts'e na'a ndi yun k'ut dune howu nuninuzut hoh, 'et si chah khunaiti be núsya t'eh, nts'e na'a 'uhoont'ah suba whutézoo? 'Et yahadla dinachahúdidulh t'eh, whute 'uts'oo'alh, tats'ootnai, bundada yaztádlah 'et huwa. ³³ Nanooh't'ah gunih! Ntsi' hubulh 'áht'en t'eh, 'et sih nuhwhe'ut'en k'ah hoonzoo ts'iyawh tinta' tet'ilh. ³⁴ Ndai ts'ah'un 'int'ah, 'i doo chah zeh nuwheni tánadeh'ai hukwa 'ulh'en. Lubeshi 'ulh'en 'ustl'e 'ahneh! Bulunah 'awhuz Yak'usda bugha ts'ah'un t'ehonízun. Yooya wahle ka 'un whudúsni.

Yahadla dinahudutédulh t'eh, hubuyust'e dant'ah be whusanáhutedulh?

³⁵ 'Et bulunah nduhútni, "Nts'e na'a yahadla dinahudutédulh? Dahínt'ah hoh hubuyust'e be whusanáhutedulh?" ³⁶ Tube whuzahnik! Soo cho whunulh'en, ndai whuyínanla, 'i dazsai t'eh zeh, 'et whuz na'a zeh nakħutétnalh. ³⁷ Ink'ez ndai 'ílh'en whuyínanla, 'et ndai tele hanáyi t'eh, 'et whuyínanla, 'i ilah 'int'ah 'ants'i bumai 'i zeh 'int'ah. ³⁸ 'Et whunts'ih Yak'usda nts'e na'a hukwa' ninzun, 'et whuz na'a 'uyulh'ih. 'Ink'ez ndi bumai ts'iyawh lhelhts'un dedowh 'i 'int'ah. ³⁹ Ink'ez ndai khunai buyat ts'iyawh 'aw lhk'una'a cha'ít'ah. Dune buyat 'i uyoo 'int'ah. Khunai buyat 'i chah 'uyoo 'int'ah. 'Et lhookt buyat 'i chah 'uyoo 'int'ah. 'Et dut'ai buyat 'i chah 'uyoo 'int'ah. ⁴⁰ 'Et yak'uz whut'en hubuyust'e hoonli. 'Et whunts'ih yak'uz whut'en hubuyust'e hiyé dézti, 'i 'ink'ez ndi yun k'ut whut'en hubuyust'e hiyé dézti,

'i bulh lhelhyoo 'int'ah. ⁴¹ 'Et sa, 'i chah be yedezti, 'i hoonli. 'Ulh'ek ooza' 'i chah be yedezti, 'i hoonli. Sum 'i chah be yedezti, 'i hoonli. 'Et ndi sum ts'iyawh be yedezti, 'i lhelhyoo unli. ⁴² 'Et yahadla dinahudutédluh t'eh, 'et chah lhelhts'un na'a 'uhint'ah. Nts'e na'a buyust'e whuyínanla, 'i k'una'a, 'i telhjut ho' 'int'ah. 'Et dinahududidel t'eh, 'aw hubuyust'e oolhjut ghaít'ah. ⁴³ 'Et buyust'e chadíti hoh whuyíhiyalhti. 'Et whunts'ih dézti hoh dinádutédalh. Lait'ah hoh whuyíhiyalhti, 'et whunts'ih ulhtus hoh dinadutédalh. ⁴⁴ Yinkak dune buyust'e k'una'a unli hoh whuyíhiyalhti. 'Et dinahudutédluh t'eh, 'et chah yak'uz huba 'uyoo buyust'e natedle. 'Et ndi yun k'ut uzdelhts'i huba, neyust'e ts'it'i. 'Et nduk yak'uz whuba 'uyoo neyust'e natédle. ⁴⁵ 'Et whuz na'a 'uk'e'edúguz hoh 'et ndutni, "Et 'udechoo dune 'en Adam yúlhni 'et buzul khuna suli." 'Et degha nus Adam 'en bugha neyéghah khuna, 'et whuz na'a ne'ínlia. ⁴⁶ 'Et whunts'ih neyust'e 'aw yak'uz huba cha'ít'ah. Neyust'e ndi yun k'ut be'ilhdzun 'int'ah. 'Et dats'uzsai hukw'elh'az yak'uz huba 'uyoo neyust'e natédeh. ⁴⁷ 'Et Yak'usda 'udechoo dune 'en ndi yun k'ut whutl'us 'i be dune yulhtsi. 'Et whulh nat dune, 'en neMoodihti, 'en yak'uz ts'ih hainzut 'int'ah. ⁴⁸ 'Et ndun dune whutl'us be 'ulya, dant'ah hoh dune unli, 'et ndunnah whutl'us be 'uhulya, 'en k'una'a 'uhint'ah. 'Et whuz na'a ndun yak'uz ts'ih haínzut, dant'ah unli, 'et ndunnah yak'uz huba 'int'ah, 'en k'una'a 'uhint'ah. ⁴⁹ 'Et ndun whutl'us be 'ulya dant'ah dune unli inle, 'et nuwheni chah 'en bundúts'últ'ah. 'Et whuz na'a ndun yak'uz ts'ih hainzut, 'en dant'ah dune unli 'et whuz na'a nuwheni chah 'en bunduts'últ'ah uztele.

Bé dats'utsah 'i chah hoolah tele

⁵⁰ 'Et sulhutsinkah njan ndun whudusni, ndet Yak'usda hubudayi cho unli, 'et ndi yun k'ut neyust'e 'i be ilah. Yak'usda ndai yit'i, 'i 'aw ts'óolhchoot ghait'ah. Ndi yun k'ut neyust'e telhjut, ndai chatelhjut, 'i be ilah ts'otélhchulh 'et huwa. ⁵¹ 'Aw 'et soo zélhts'ai. Ba whé' hoont'ah hooyah, 'i bugha nohwhulh yatéltuk. Bulunah 'aw 'ilhuz nachats'untestus, 'et whunts'ih ts'iyawh lhents'un na'a na'uztetenilh. ⁵² Tube khun 'uwhuténilh, 'ants'i ts'unilts'ilh hukw'u na'a ba 'uwhuténilh. Hoh t'eh degha nus be ts'újun hiye jih be' dests'ai t'eh, 'et whuz na'a 'uwhutenilh. 'Et hoh whuya whudezulh yahadla, hubuyust'e 'aw chailhjut hoh dinahudutédluh, 'ink'ez nuwheni ts'iyawh lhelhts'un na'a na'uztetenilh. ⁵³ 'Et ilhjut, 'i 'aw chaílhjut natedle huba 'ohoont'ah. 'Ink'ez ndi bé daztétsah, 'i 'aw be dachaztesa, 'i naootedle. ⁵⁴ 'Et nket'ah ilhjut, 'i, 'aw chailhjut nasdli t'eh, 'ink'ez bé dats'utsah, 'i chah hoolah suli t'eh, 'et hoh whuya whudezulh t'eh, 'uk'e'eduguz ts'iyawh 'aw 'et lhaóodutenilh. 'Et huwa whuz na'a ndutni, "Bé dats'utsah, buch'a' ninde ho' 'int'ah."

⁵⁵ 'Et huwa 'uts'utni, bé dats'utsah 'aw 'o 'at be dats'ootsah ghaít'ah.

'Ink'ez ndet yahadla húdelhts'i, 'aw nehotun ghaít'ah.

⁵⁶ 'Alha ndi bé dats'utsah, 'i lubeshi 'i gha 'uhooja. 'Ink'ez Moses bughunek k'uzninyuz, 'i be t'ets'onanzin lubeshi dáltus ho' 'int'ah. ⁵⁷ 'Et whunts'ih neMoodihti Sizi Gri, 'en bugha Yak'usda whuch'a ts'ulhdeh nets'ulhtsi. 'Et huwa tube cho nechanailya uzninzun. ⁵⁸ 'Et huwa sulhutsinkah, ulhtus wahle. Khun nawh hunoozin gunih! 'Aholhyez neMoodihti be 'ut'en k'ah soo cho 'uwhulh'en. T'eóonúhzun k'an 'et nts'e na'a neMoodihti ba 'aht'en, 'et huwa 'aw 'ants'i ilah 'aht'en ho' hoont'ah.

16

Yak'usda bube'ildzun sooneya huba 'ilhunanuts'owéz'ai

¹ 'Aw 'et dune Yak'usda bube'ildzun, 'en ndi sooneya huba 'ilhunanuts'owéz'ai, 'i bughu yatelhtuk. 'Et ndet yun k'ut Galatia

'ilhunahuwudulh, nts'e na'a hubutah budáni da, 'et nuhwheni chah 'et whuz na'a ndóht'en. ² 'Et 'ilhunah ahli hoh daltsuk bat'en be hoonzoo 'ahja, 'et whuz na'a k'enilhghel 'udechoo dzin, 'i bulah lhadáhle. 'Et t'eh nuhghuniya t'eh, 'et hoh whuya whudezulh 'ilhuna'naghóoh'ah huba cha'hóot'ah. ³ Ndet nuhnts'uniya, 'et t'eh naoötés'ahh ndi nuwhe'dustl'us 'i be ndunnah nuhwhuba unzoo hinli, 'en ndi sooneya dune Yak'usda bube'ildzun, 'en huba hubugha íneh'ai, 'i bulh Jerusalem ts'ih hubutelh'ah. ⁴ 'Et si chah whuz tesyalh huba hootézoo t'eh, 'et sih 'en cha sulh útedulh.

Paul datenilh

⁵ 'Et yun k'ut Macedonia 'et whegha lhutesyalh. 'Et whegha lhusíya t'eh, 'aw 'et nuhnts'u t'ésyalh. ⁶ 'Astl'iyaz whuba tulih 'et nuhzih wusda k'us khi nduwhulyez tulih nuhwhuzih wusda. 'Et hoh nts'e tesyalh ts'un, nuhwheni sula 'ooht'en ka. ⁷ Hoh whegha usyalh t'eh, 'aw nuhghah lhutesyalh. 'Et huwa 'aw k'an 'et nuhwhunoohl'en għait'ah. 'Et whunts'ih sMoodihti 'usunínzun t'eh, 'et huwa 'astl'iyaz nduchah nuhzih wusda. ⁸ 'Et whunts'ih ndet dzin 'uhoont'ah, Pentecost huwhúttni, 'et whuts'un keyah Ephesus 'et tesdalh. ⁹ 'Et 'ants'i ndati k'us úncha, 'i suba da'duteztan li'hooja, 'ink'ez lhanah such'a detni unli. ¹⁰ 'Et Timothy nuhghu ninja t'eh, 'aw hoonli whe chaníljut hoh nuhzih wuda. 'Et ts'iyawh nuhwheni nuhwhuba 'uhoont'ah. Si sk'una'a neMoodihti be 'ut'en k'ah ne'ut'en 'et huwa. ¹¹ 'Et huwa nuhwheni nuhtah 'en 'ants'i nuhwhuba wule gunih. 'Et whunts'ih budzi dezghel hoh suts'un nátoolh'a. Si 'ink'ez lhulhutsinkah nuhwheni ts'iyawh huba ts'ilh'i. ¹² 'Et nelhutsin Apollos 'en bugha 'unohdutésnilh. k'an 'et nelhutsinkah bulh nuhnts'u tóoya 'et huba hukwa' nuszun, 'et whunts'ih 'aw hukwa cha'nizun. 'Et huwa sa howu bulh yálhtuk. 'Et whunts'ih nts'oh whugha whudezulh 'et buba hoonzoo t'eh, 'et sih nuhwhuts'u tóoya.

Soo cho huwahli

¹³ 'Et soo cho huwahli. Be 'alha 'uhoont'ah, 'i be whuduts'o hoh sahyin. Nuhwheni nuhdzi hóoni hoh 'et nudoohlúya. Ulhtus wahle. ¹⁴ Ndai be ne'aht'en, 'i ts'iyawh be nék'ets'ints'i, 'i be 'oolh'en. ¹⁵ 'Et sulhutsinkah khunek ulhtus, 'i be nuhdutésnilh. Nt'eónáhzun Stephanas 'ink'ez bukoo húdelhts'i, 'en yun k'ut Achaia 'et 'udechoo buba 'alha 'uhoont'ah huzdli. 'Ink'ez t'eónáhzun nts'e na'a dune Yak'usda bube'ildzun, 'en huba né'hutet'en huwa' hududúlya. ¹⁶ 'Et huwa ndun whudutésnilh, ndunt'ah 'ink'ez ndunnah soo cho hoolhtus hoh nelh 'út'en, 'en nuhwhenich'oh butl'á' dudulye. ¹⁷ Nkeda Stephanas, Fortunatus, 'ink'ez Achaicus, 'en sugħa hunindel da, 'et huwa hoonúst'i. Ndai sugħá chaikulh, 'en bugha sgha níngħat. ¹⁸ 'Et huwa sich'oh suyégha 'ink'ez nuhwhenich'oh nuhyégha chah 'en bugha nduk na'uja. 'Et huwa ndunt'ah, 'en ts'ah'un na'a ne'boolh'en.

Yak'usda yé unzoo, 'i nohwhulh óot'e

¹⁹ 'Et yun k'ut Asia nts'e 'ilhunahuwudulh, 'en chah ts'iyawh dahooja nuhuwhúttni. Aquila, Priscilla, 'ink'ez hubukoo Yak'usda ba 'ilhunahuwúdluh, 'en chah soo cho dahooja nuhuwhúttni. ²⁰ Ts'iyawh nelhutsinkah, 'en chah dahooja nuhuwhúttni. Lubeshi bu'et nalhudunahts'oos. 'I be dahooja lhu-dahtni. ²¹ Si Paul sich'oh sula be 'uk'une'zíguz. 'I be dahooja nuhwhudúsni. ²² NeMoodihti Sizi Gri ndunnah 'en yuk'echaítsi', 'en Yak'usda ye whúske, 'i be hubuk'eóotelts'ulh. O sMoodihti 'a cho nets'ínyalh! ²³ NeMoodihti Sizi Gri ye unzoo, 'i nohwhulh óot'e 'et zeh nuhwhuba hukwa' nuszun. ²⁴ Be nuwhuk'esi', 'i Christ, Sizi 'en bugha, 'i ts'iyawh nohwhulh óot'e hukwa' nuszun. 'Et ndoh honeh.

Paul, Corinth Whut'en Whulh Nat Hubuts'un Yuk'e'ánguz

Yak'usda ba 'ilhunahuwúdulh, keyah Corinth 'et, 'en Paul dahooja hubulhni

¹ Si, Paul, Yak'usda bugha nts'ena'a hukwa' ninzun, 'i be Sizi Gri ba whel'a 'ust'ah. 'Ink'ez ndun nelhutsin Timothy hiyúlhni, 'en chah sulh 'ut'en. 'Et ndunnah keyah Corinth 'et Yak'usda ba 'ilhunahuwúdulh hinli, 'ink'ez ndulhcho hoh yun k'ut Achaia húdelhts'i, ndunnah nohwhulh dune Yak'usda bube'ildzun hinli, 'en nuhwheni ts'iyawh ndi dustl'us k'ut nuhts'o k'e'usges.

² Ne'aBá Yak'usda 'ink'ez Sizi Gri neMoodihti ts'un nuhwhuba tenadusdli 'i ye unzoo, 'ink'ez nuhdzi dóoghel nohwhulh óot'e.

Yak'usda 'en zeh 'int'ah nuwheni ts'iyai, 'i be k'enanwhunoo'ah

³ Yak'usda, Sizi Gri neMoodihti bu'aBá 'int'ah, 'en zeh ts'udélhti. Ne'aBá 'en bugha be négha té'nedze, whuz na'a neghawhults'ut. Yak'usda 'en zeh 'int'ah nuwheni ts'iyai, 'i be negha whuna'ah. ⁴ Ndet hoontsi' negha ooninkat 'et whuch'a k'enánenoo'ah. 'Et huwa whuz na'a 'uyoona hoontsi' hubugha ooninkat t'eh, 'et t'eh nuwheni chah Yak'usda ye nek'enana'ah, 'i bugha k'enábuznoo'ah huba' hoont'ah. ⁵ 'Et nts'e na'a Christ dzuh nusúzut, 'et nuwheni chah 'en bugha dzuh nuts'uzde. 'Et whuz na'a nuwheni chah Christ ye nek'enana'ah, 'et negha whultsuk k'enánena'ah. ⁶ 'Et whunts'ih ndet hoontsi' nets'u whélts'ulh t'eh, 'et 'i bugha k'enabuts'unoo'ah. Ndi hoontsi' nuhts'u whélts'ulh hoh dzuh nahde 'et whunts'ih ndi k'enánut'ah, 'i be nuwheni 'ink'ez nuhwheni chah ts'iyawh whechats'ítsaz. 'Et whuz na'a 'uwhút'en. 'Ink'ez ndet k'enáneni'ah t'eh, 'et nuhwheni zeh nuhwhuba 'ohoont'ah. 'Et 'i be k'enánohuznu'ah. ⁷ 'Ink'ez t'ets'onínzun nts'e na'a nuhwheni dzuh nuts'udeh hoh nets'un nidehdel, 'et 'uwhultus 'i be zeh ndi ye nek'enana'ah, 'i be nets'un nidehdel.

Ndi tube hoontsi' daztétsah, Yak'usda whuch'a neúlhyis

⁸ Sulhutsinkah 'et whunulh'en, nyan, 'i Asia yun k'ut ndi hoontsi' negha óoninkat, 'et nelh dahooja t'ewhunoohzeh hukwa' nuszun. Whuz ts'ih nelh dahooja tube hoontsi' k'et 'aw uzdooni ghait'ah. 'O nus neba hoondaz k'et 'aw whúlh nuzdoolya ghait'ah neba li'hoont'ah. Neba hoontsi' k'et yaztádla 'uznanzin neba li'hooya. ⁹ 'Ahoolhyez daztétsah hukwa tsi ts'úhoolih. 'Et whuz na'a nelh ndúhooja t'eh, 'et huwa 'aw whenich'oh whut'aníznootan huba cha'hóot'ah. Yak'usda zeh whut'aníznootan, 'en zeh yahadla dinabudutélel 'et huwa. ¹⁰ 'Ink'ez ndi tube hoontsi' daztétsah, 'et whuch'a neúlhyih. 'Et 'ahoolhyez 'et zeh ndutét'ilh. 'Ink'ez lha'un teh nendutelih zeh tet'ilh, 'et whuz na'a zeh 'ahoolhyez hukwa tsi ts'uholi. ¹¹ Nuhwheni chah tenadudli be 'ilho nela 'ooht'en hoh nela tenadoohdli. Lhanah neba tenadudli 'et hoh hoonliyaz neghá whunkat. 'Et huwa nelh dáhooja lhanah Yak'usda ts'un chanailya neba hutni.

Ndet neyuh ts'ih bugha nt'ets'onínzun, 'i ndi whunénulhtun, 'et zeh ts'uhóont'i

¹² 'Et ndet neyuh ts'ih bugha t'ets'oninzun, 'i ndi whunénulhtun, 'et zeh ts'uhóont'i hoh 'i bugha yats'oolhtuk. 'Et hoh whunénilhtan ndi yun k'ut uzdelhts'i. Yak'usda bubé 'alha' nudzun, 'i, 'ink'ez 'aw nankoh khunek be yachats'ulhtuk, 'et whuz na'a zeh degha nus nuhtah uzdélhts'i. Ndi yun k'ut whut'en be whútñih, 'i be cha'ts'ilil. Yak'usda ye unzoo, 'i bugha 'uts'út'en. 'Et whuz na'a neni tah whudez'ai, 'i be newhúnelhtan. ¹³ 'Et ndi

buk'eyalhtuk, 'i, 'ink'ez ndet t'eoonehzin, 'et whuz na'a zeh nuhts'o k'e'usges. 'Et whulatah whuts'un 'i t'ewhuntehzeh nuhwhuba hukwa' nuszun. ¹⁴ 'Et whuz na'a hoonliyaz dats'int'ah, 'et negha t'ewhunehszin. 'Et huwa Sizi Gri neMoodihti budzin whusawhélts'ut t'eh, 'et t'eh nuhwheni neba hoónaht'i, 'ink'ez nuhheni chah nuhba ts'uhootet'i.

'Aw nuwhundóolhdah hukwa cha'nuszun

¹⁵ 'Et dune ts'iyawh t'enwhunúszun daht'ah dune ahli. 'Et huwa soo 'alha' nuszun hoh nuhts'u t'ésyalh inle. 'Et whulh nat hoonzoo nuhgha whúlts'ut. ¹⁶ 'Ink'ez Macedonia yun k'ut ts'ih 'et nuhwhegħa nuhts'ún tesyalh inle. 'Et Macedonia ts'ih hanásja t'eh, doo chah nuhk'unatesdah inle. 'Et whuz k'ah násdalh hoh Judea yun k'ut ndai be ndunusdah, 'i be sula tehnih inle. ¹⁷ 'Ants'i hoh ne'dusni nuhzun ih? K'us nts'e na'a neyust'e ts'ih nínt'uk, 'et whuz na'a seni be lhaóodusdla nuhzún ih? 'Et whuz na'a ndust'ah t'eh, 'et t'eh si khun teh, "A" doosni, 'ink'ez khun teh, "Awundooh" doosni t'ah. ¹⁸ 'Et whunts'ih Yak'usda 'aw nela dootnih ghait'ah. 'Et whuz na'a be nóhts'u yats'ulhtuk 'aw, "A" 'ink'ez, "Awundooh" chailah! 'Aw nawh yachats'ulhtuk. ¹⁹ 'Et Sizi Gri Yak'usda buYe' int'ah. 'Et hoh da Sylvanus, Timothy, 'ink'ez si chah 'en bugħa 'i be nohwhulh yáts'ulhtuk da, 'aw, "A" 'ink'ez, "Awundooh" chats'udínil inle, 'en be, "A" zeh int'ah 'et huwa. ²⁰ 'Et Yak'usda yé nets'u nahezya, 'i ts'iyawh, "A" ni, 'ink'ez 'en be, "Ndoh honeh" ts'utni. 'Et nuhheni negħha Yak'usda uzdóolhti. ²¹ 'Ink'ez ndun Christ bulħ soċċa 'ilhuz nohwhulh nuzdelħuña nesulhtsi, 'en Yak'usda int'ah. 'Ink'ez Yak'usda 'en zeh ne'inla, Ndoni ye ulhtus, 'et negħha oonī'ai ho' int'ah. ²² 'Ink'ez chah be hóodel'en, 'i be nuhheni chah neye hóodel'en nesulhtsi. 'Ink'ez Ndoni nedzi yida'ai. 'I be bulah neba 'uk'elha whulhtsi. ²³ 'Ink'ez 'o 'un cha Yak'usda bunalh hoh suzul buch'a sut'ak teyin huba, njan nuhwhúndoolhdah hukwa cha'núszun. 'Et huwa 'awhuz Corinth ts'ih nachatúsdal. ²⁴ 'Aw nuhwhuba 'alha 'uhoont'ah whumoodiħ uzteleh hukwa cha'ts'ust'en. 'Et k'us ndet hoonáht'i hukw'u na'a un whuts'oolhzin. Bé 'alha 'uhoont'ah, 'i be Yak'usda ba nudelħuña 'et huwa.

2

¹ 'Ink'ez si chah seni lhadúsdla 'aw tso bulħ nuhts'u t'ésyalh hukwa cha'núszun. ² 'Et si sugħa nuhdzi tso suli t'eh, ndan simba hoonust'i hoh sugħá ho'ahl? Nts'e na'a simba nuhwheni tso ahli t'eh, hoonúst'i sugħá hoh'ahl? 'Aw 'uhót'e għait'ah!

Ndun tinta' ant'en, 'en buba whunats'odoolnah huba' hoont'ah

³ 'Ink'ez njan k'an 'et nuhwhudúsni 'i bugħa zeh 'uda nuhts'ó tl'a'aguz inle. 'Et nuhghunija t'eh, doo ka nuhwheni nuhgha tso wusdle. 'Et whunts'ih nuhwheni nuhgha hoonúst'i sugħá holts'it, 'et zeh hukwa' nuszun. 'Et huwa 'awhuz nuhts'úchatuzesyal. Be hónust'i, 'i ts'iyawh nuhwheni chah be whúnoohlha hukwa' nuszun. 'Et whuz na'a 'et ndaht'ah t'eh, 'et suba 'alha 'uhoont'ah. ⁴ 'Et sudzi tso be dzuh nuzut inle, 'et whuz na'a ndust'ah hoh 'i be sunatsul too hoonli hoh nuhts'ó tl'a'aguz. 'Aw nuhdzi tso wulhsilh huba ilah nuhts'ó tl'a'aguz. 'Et nts'e na'a be nek'ets'intsi', 'i ncha, 'i nuhwhuba ust'i, 'et t'ewhuntehzeh hukwa' nuhzun, 'et huwa nuhts'ó tl'a'aguz. ⁵ 'Et whunts'ih 'aw si zeh tso chásdlah, nuhwheni chah ts'iyawh 'et hubugħa 'en daja 'et huwa tso ahli. 'Et huwa k'an 'et nuhwhudúsni, doo ka 'aw tube cho nuhwhuba dzuh 'udoosni gunih. ⁶ Nuhwheni 'ankw'us ts'iyawh ndun nuhwhudúsni, 'en 'aw 'et soo hoolcho whe dzuh nus sulhdzut, 'aw 'et soo' hoont'ah. ⁷ 'Et k'an nuhwheni ts'iyawh buba whunats'odoolnah, 'ink'ez k'enáznoo'ah, doo ka 'o nus budzi tso unli t'eh, 'et hoh 'i be buch'a'oodeh. ⁸ 'Et huwa khunek ulhtus, 'i be nuhwhudúsni, ndunnah dune buba whunaoodelnah, 'en whunaoobunteltun

ts'ah'un na'a buk'ehtetsi'. ⁹ 'Et ndez un'a nuhts'un tl'a'aguz, ts'iyawh tulih hukw'u ne'zaht'en. 'Et 'i be t'ewhunteszeh danáht'ah dune ahli. ¹⁰ 'Ink'ez ndun hoonli buba whunaoodélnah t'eh, si chah buba whunaoodutelhúnah. Hoonli buba whunaoodélnah, ndun buba whunaoodélnah, 'en Christ bunalh nuhwheni chah nuhwhuba whunaoodutelnh 'et huwa. ¹¹ 'Et whuz na'a 'uts'ut'en t'eh, 'et t'eh Satan 'aw nech'a' oolhdeh ghaít'ah. Ndet whe nech'a' telhdoh hukwa' 'ut'en, 'et ts'iyawh t'ets'onínzun.

'Et neMoodihti dáti suba da'duteztan li'uja

¹² 'Aw 'et keyah Troas, 'et nusya, ndi Christ bughunek unzoo, 'i be hubulh yatelhtuk, 'et wheni whuz lhughadiya. 'Et Moodihti dáti suba da'duteztan li'uja. ¹³ 'Et whunts'ih sulhutsin Titus 'en buka ités'en, 'et whunts'ih 'aw nachálhtel. 'Et hoh suyéghah be suba ts'ah'un cha'hóot'ah li'ust'ah. 'Et huwa hubugho whenásja, 'et Macedonia yun k'ut ts'ih lhughadiya. ¹⁴ 'Et whunts'ih Yak'usda ts'un chanailya dusni. 'En bugha Christ 'en be 'ahoolhyez whuch'a' ts'úlhdeh. 'Ink'ez ndi 'en bugha be t'ets'oninzun, sooltsun, 'i k'una'a nuhwheni negha 'un 'ílcho whedándi li'int'ah. ¹⁵ 'Ink'ez ndan hudujih 'ink'ez ndan kwuncho yuh ts'ih hutedulh, 'en hubutah Christ 'en ba Yak'usda ts'un buba sooltsun li'ts'int'ah. ¹⁶ Bulunah dahútetsah whuzahiltsun, 'i be kwun cho yuh hutedulh. 'Et onghun chah be ts'ukhuna, 'i zahiltsun, 'i be 'ilhuz wheni hukhutenalh, 'et whuz na'a zeh buba li'ts'int'ah. 'Ink'ez dune ndan 'int'ah ndi 'ut'en 'et huba soo 'úldzoo? 'Aw huhoolah! ¹⁷ 'Et whunulh'en, lhanah Yak'usda bughunek 'uts'un na'a ne'hiyulh'en. 'Et hoh sooneya 'uhulh'en. 'Et whunts'i 'aw hubulh ndúchats'it'ah. Yak'usda nehailh'a. 'Et ts'ah'un na'a hoh 'ants'i Yak'usda ba yats'ulhtuk ho' ts'utni, 'et whuz na'a Yak'usda bunalh hoh Christ 'en be yats'ulhtuk.

3

Nuhwheni Christ nuhwhuts'un yuk'e'ánguz 'i lí'aht'ah

¹ Doo chah zeh 'uztet'ilh ts'ah'un dune ts'inli nuhwhuts'u duténih ih? 'Awundooh! 'Et bulunah ndez na'a njan nduhut'en, nuhwheni nuhwhuba dustl'us k'ut nuhwhuba na'dudóosdzi. Whuz na'a nets'u hukwa' nuhzun. 'Ink'ez nuhwheni nuhts'un dustl'us k'ut, 'i chah huba na'dutésdzi. 'Et whunts'ih nuhwheni 'aw nduchá'ts'ust'en. ² Nedzi k'ut 'uk'e'éduguz hoh ts'iyanah hukw'u yahalhtuk. 'Et whuz na'a ts'iyanah dune t'enohonánzin. ³ Nts'e na'a nuhwhuba ne'úzninla hoh nuhla ts'út'en, 'et huwa Christ nuhwhuts'un yuk'e'ánguz, 'i lí'aht'ah. Ts'iyanah t'éoonínzun 'et hubugha. Ndai 'uk'e'éduguz, 'i 'aw bé 'uk'une'usduguz be lí'inil, ndun Yak'usda khuna, 'en buyégha, 'en be 'uk'e'éduguz ho' 'int'ah. 'Aw tse k'ut 'uk'echa'ídugus, dune budzi k'ut 'uk'e'éduguz ho' 'int'ah.

'Uda khunek 'uk'e'éduguz, 'i bugha dune yahadlah, 'et whunts'ih Yak'usda buyégha be dune hukhuna

⁴ Christ 'en bugha Yak'usda 'en zeh but'aníznentan, 'et huwa whuz na'a yats'ulhtuk. ⁵ 'Et whunts'ih ndi 'ut'en huba whenich'oh duba sóo uzdutneh hoh ndi 'ut'en 'uts'ulh'ih, 'et 'aw whuz na'a chats'unízun. 'Et k'us Yak'usda 'en bugha zeh neghalts'ut hoh ndi 'ut'en huba sóo uzdutneh 'et huwa. ⁶ 'En bugha neghalts'ut hoh nuhwheni chah huba soo uzdúja. Ndi k'andit khunek nuhwhuba lhadúsdla neba neónai'ai, 'et huba Yak'usda ba nets'út'en ts'inli. 'Et whuz na'a Yak'usda negha óoni'ai. Njan ndi k'an 'et nets'ú yoozi, dich'oh buyégha gha 'útni. 'Aw 'uda khunek 'uk'e'éduguz, 'i 'aw 'i bugha ilah. 'Et ndi 'uda khunek 'uk'e'éduguz, 'i bugha dune yahadlah, 'et whunts'ih Yak'usda buyégha be dune hukhuna nasdli 'et huwa. ⁷ 'Et ndi 'uda khunek yuk'e'ánguz, 'i tse k'ut buk'e'éduguz. Ndi khunek 'i bugha yahadlah suli. 'Et ndi ye dézti,

'i be 'uyinla. 'Et huwa Moses bunen k'ut buts'un hayánduz suli. 'Et buts'uh hanáwheoondunide, 'et whunts'ih Israel buzkehkah 'o nus huba hoolhtus, 'aw hinoolh'en ghaít'ah. ⁸ 'Et whunts'ih Yak'usda buyégha, nts'e na'a nela 'ut'en, 'et 'o nus neba ye dézti, 'i 'int'ah. ⁹ 'Et ndi 'uda khunek yuk'e'ánguz, 'i bugha yahadlah suli, 'i dézti t'eh, 'et t'eh ndi k'an 'et 'i be nela 'uwhudut'en, 'i ts'ah'un dune ts'inli, 'i 'o nus dézti ho' 'int'ah. ¹⁰ 'Et 'uda ndi ye dezti, 'i 'aw 'o nus degha nus ye dézti, chaílah. 'Et ndi 'uda ye dezti, 'i k'an ye dezti, 'i 'on nus ye dézti 'int'ah 'et huwa. ¹¹ 'Et ndi 'uda 'int'ah, 'i dézti whunts'i, 'i hoolah wheninle t'eh, 'et ndi k'an dezti, 'i 'ilhuz wheni 'int'ah. 'Et huwa 'i degha nus dézti hó' 'int'ah. ¹² 'Et huwa ndai Yak'usda ts'un hukwa tsi ts'uhooli, 'et hooncha. 'Et huwa tube cho hoh nohwhulh yáts'oolhtuk. ¹³ 'Aw Moses k'una'a cha'ts'ust'en. Ndi ndai buts'un hayánduz, 'i hoolah whénininle, 'et whuch'a dunen yegha' wehnik. 'Et whuz na'a whulatah wule whuch'a, Israel buzkehkah 'aw 'ahoolhyez honoolh'en ghaít'ah. ¹⁴ 'Et whunts'ih hubeni duts'o suli. 'Et k'an 'et dzin whuts'un ndi ndai 'uda khunek huba lladúsdla hik'eyalhtuk, 'i buts'oh gha' weznik, 'i, 'ahoolhyez 'et zeh ndunt'ah. Christ 'en zeh yuts'ú hanaitelhchos 'et huwa. ¹⁵ 'Et whunts'ih k'an 'et dzin whuts'un ndai Moses yuk'une'úzguz, 'i huk'eyalhtuk t'eh, budzi 'awhuz bugha' weznik li'hint'ah. ¹⁶ 'Et whunts'ih 'ilhunuh neMoodihti ts'un nalhú'a t'eh, 'et t'eh ndi bugha' weznik 'i hubuts'a hanaitelhchos. ¹⁷ 'Et neMoodihti 'en Yak'usda buyégha 'int'ah. 'Ink'ez neMoodihti buyégha nts'e dez'ai, 'et huwa ndi neba yuladetnik. ¹⁸ 'Et nuwheni chah nenen yuts'á hana'alhchooz hoh nts'e na'a be na'uzdunul'en 'i be ts'onilh'en, 'et whuz na'a neMoodihti ye dézti, 'i, 'ahoolhyez uznih'en. 'Ink'ez ndi 'uk'e'éduguz, 'i uznih'en, 'et 'i k'una'a 'uts'uja. NeMoodihti ye dézti, 'i 'o nus ye dézti, 'i k'una'a 'uts'int'ah. Dzin totsuk nusyaz zeh 'uts'et'ilh. 'Ink'ez neMoodihti buyégha, 'en bugha whuz na'a 'uhóoja.

4

Christ bughunek unzoo, 'i neba be whét'en, 'i unli

¹ 'Et huwa ndi Yak'usda ba be ne'ts'út'en, 'et whuz na'a Yak'usda ye te'ninzun. Nts'e na'a neghalts'ut, 'et hoh 'aw 'ustl'e' 'uts'ooneh ghaít'ah. ² 'Et whunts'ih dune nunúl'i tube hukwaya hoonli tune'hut'en, 'et huwa nuwheni ts'iyawh 'et whuch'a dah ts'utni. Dune ts'una'ah, 'et nuwheni 'aw nduchá'ts'ust'en. 'Ink'ez Yak'usda bughunek 'aw whuts'it bulh chats'úsdloh. 'Et whunts'ih khunek 'alha 'int'ah, hubúznulhtun. 'Et whuz na'a Yak'usda nalh ts'iyahanah hubuyuh ts'ih bugha t'ets'oninzun, 'i ts'un huba nats'oodútedzi. ³ 'Et ndi khunek unzoo, 'i be yats'ulhtuk, 'i bugha' weznik t'eh, ndunnah kwuncho yuh ts'ih hutédulh, 'en bugha' weznik ho' 'int'ah. ⁴ Ndunnah 'en ndi yun k'ut whuyak'usda duden be chawhes'en ubulhtsi. 'Et huwa Christ bughunek unzoo ye dézti, Christ, 'en Yak'usda yunduwhut'en, ndai buts'un háyanduz, 'i ndunnah duden be chahuwhés'en 'aw hube yudoodi ghaít'ah. ⁵ 'Aw nuwhenich'oh khuyanats'ultuk ilah. 'Et k'us Christ, 'en Sizi neMoodihti, 'en bugha 'un whuts'útni. 'Ink'ez nuwheni, Sizi 'en ba 'ulhna ts'inli. ⁶ 'Et Yak'usda tsahólhgus hoh be whét'en, 'i yuka' dani ibulh 'aho whét'en suli, 'et whuz na'a 'uhóoja. 'En zeh 'int'ah 'et huwa nedzi bé dendli li'uja. Ndi Yak'usda ye dézti, 'i bugha t'ezninzun, 'i neba be whét'en, 'i ho' 'int'ah. 'Et 'i nedzi be dendli. 'Ink'ez ndi ye dézti, 'i Sizi Gri bunen buts'un hayánduz ho' 'int'ah.

Ts'iyaintsuk hoonli hoontsi' nets'ó tukat, 'et whunts'ih 'aw nech'a 'oodeh ghaít'ah

⁷ Neyust'e 'i whutl'us be 'ulya, 'i li'tsint'ah. 'Ink'ez ndi ye soode'a be' uts'intah, 'i Yak'usda negha ininla. 'Et huwa ts'iyanah t'ehonóozin ndi degha nus ye úlhtus, 'i Yak'usda buts'un haíyankat, 'aw nuwheni nets'u haínkat ilah. ⁸ Ts'iyaíntsuk hoonli whe yuk neznílht'uk, 'et whunts'ih 'aw nech'a 'oodeh ghat'ah. Tube whets'íntsaz 'et whunts'ih 'awhuz uznint'uk ze' ts'int'ah. ⁹ Whulah teh nech'a ne'whut'en 'et whunts'ih Yak'usda 'en 'aw nela dootnih ghat'ah. Khunek be nena'hulhdeh t'eh, 'et whunts'ih 'aw nech'a 'oodeh ghat'ah. ¹⁰ Nts'e na'a Sizi neMoodihti neba dazsai, 'et 'ilhuz neyuh whudez'ai. 'Et 'i be ts'iyanah t'ewhuntezeh Sizi ye khuna, 'i neyust'e hubutah 'uyint'ah. ¹¹ Nuwheni ndi 'ilhuz be ts'ukhuna 'i ts'it'i, nuwheni ts'iyawh Sizi 'en buba daztétsah, 'et wheni butl'a'úzdudelya 'et huwa. 'Et ndi yun k'ut neyust'e, 'i be Sizi ye khúna, 'i ts'iyanah t'ehontezeh. ¹² 'Et njan nuwheni be daztétsah, 'i neyust'e ghu hoonli. 'Et whunts'i nuhwheni njan 'ilhuz be ts'ukhuna, 'i nuhwheni nuhghu hoonli. ¹³ 'Ink'ez nuhwheni nts'e na'a be nuhwhuba 'alha 'uhoont'ah 'ink'ez nuwheni chah nts'e na'a be neba 'alha 'uhoont'ah 'i bulh lhulhugha zeh 'int'ah. 'Et huwa nts'e na'a 'uda 'uk'e'éduguz, 'i ndet 'uwhulhni, 'et ndez na'a njan ndutni hoh ndutni, "Et suba 'alha 'int'ah 'et huwa 'i khunek be yalhtuk." 'Et nuwheni chah 'i ts'iyawh neba 'alha 'int'ah, 'et huwa 'i khunek be yats'ulhtuk. ¹⁴ 'Et huwa njan t'ets'oninzun, ndun Sizi neMoodihti dinaidilhti, 'en zeh nuwheni chah Sizi 'en bulh dinánedutélelh. 'Et whuz na'a nuwheni 'ink'ez nuhwheni chah ts'iyawh 'ilhunaneoowezsla hoh dubut neninatelelh. ¹⁵ Nduhoolcho nelh ne'whut'en nuhwhuba whútezoo 'et huwa. 'Et whuz na'a ndi degha nus ye únzoo, 'i, nuhtah hoonli, 'et nuhwheni nuhgha 'o nus Yak'usda ts'un chanailya ts'utni wule. 'Et huwa hiba whudelhti.

Ndai chats'es'en, 'i whunts'i be 'alha 'uhoont'ah 'i be uznih'en

¹⁶ 'Ants'i doo ka 'uts'ut'en ts'unoozin gunih. Neyust'e whénilhjut 'et whunts'ih ndai neyéghah unli, 'i dzin totsuk ts'iyawh k'andit nadleh. ¹⁷ 'Et ndet hóontsi' neghá honkat, 'et 'astl'iyaz zeh neba 'uwhut'ih 'et huwa. 'Et neba 'ants'i li'uhoont'ah. 'Et k'us njan be hóontsi' neghá honkat, 'i be 'o nus neba be whudezti, 'i neba yulhtsi. 'Ink'ez ndi be whudezti, 'i, 'ilhuz nuwheni 'uyínla. 'Et neba hooncha k'et 'aw uzdooni ghat'ah. ¹⁸ Ndai ts'a'en, 'i neba 'ants'i unli. Ndai 'aw chats'és'en, 'i zeh neba ts'ah'un 'int'ah. Ndai ts'a'en, 'i, 'et 'astl'iyaz neba whutét'ilh 'et huwa. 'Et whunts'ih ndai chast'en, 'i 'ilhuz wheni 'int'ah.

5

'Aw ts'a'en, 'i bé ilah hoh ndi yun k'ut uzdelhts'i, be 'alha 'uhoont'ah 'et 'i be zeh ndi yun k'ut uzdelhts'i

¹ 'Et t'ets'oninzun neyust'e unli, 'i bun k'una'a hoh ndi yun k'ut uzdelhts'i. 'Et whenílhjut t'eh, 'et ch'a Yak'usda 'en 'udun koo neba whulh'ai. 'Aw dune dula be 'uhóonla ilah, 'et 'ilhuz nduk yak'uz 'et 'úhoont'ah. ² 'Et huwa 'alha ndi bun be ts'uwhut'i hoh khudutso li'ts'utni. 'Ink'ez nekoo nduk yak'uz whuz'ai 'et buk'éznentai. 'Et huwa nek'eyútelhbilh buts'un tube hukwa' uzninzun. ³ Nek'éyilhbun 'i be soo nenadinla li'né'ínla, 'et whuz na'a nduts'úja t'eh, 'et zeh 'aw 'ust'et chats'ílah li'ts'int'ah. ⁴ 'Alha nuwheni ndunnah ndi bun be huwhut'i, nuwheni lhat hoontsi' nek'ut whuz'ai, 'et huwa khuts'udutso. 'Aw nenaiah be'et hukwa cha'uznízun. 'Et k'us 'o nus 'uyoo lhai be' 'uts'oot'e hukwa' uzninzun. 'Et whuz na'a be ts'ukhuna, 'i ndi be daztétsah, 'ants'i whélno li'tet'ilh. ⁵ 'Et ndun nuwheni njan huba lhanédinla, Yak'usda 'en 'int'ah. 'Uda Ndoni be lhanédinla, 'et 'i be bulah neba 'uk'elha whulhtsi. ⁶ 'Et huwa 'awhoolyez whéchats'uniljut. T'ets'onínzun neyust'e be nduts'int'ah t'eh, 'aw neMoodihti bulh cha'ts'int'ah. ⁷ 'Aw ts'onilh'en, 'i be ílah hoh ndi yun k'ut

uzdelhts'i, be 'alha 'uhoont'ah 'et 'i be zeh ndi yun k'ut uzdelhts'i. ⁸ 'Et whunts'i 'o nus nedzi ulhtus hoh neyust'e koo chats'uhoot'ih t'eh, 'ink'ez neMoodihti bulh uzdelhts'i, 'et hoh 'o nus soo ts'uhootét'i.

Dune Yak'usda bube'ildzun, Christ neba naheyelh, 'en bubut nízteyah

⁹ 'Et huwa ndi yun k'ut uzdelhts'i k'us yak'uz uzdelhts'i, ndet Yak'usda nets'o hukwa' ninzun, 'et 'ahoolhyez buba 'uts'uwhulh'en whuz uznint'uk. ¹⁰ 'Et 'ilhunah ts'inli hoh Christ 'en neba naheyelh bukw'usuda bubut nízteyah. 'Et huwa nts'e na'a ndi yun k'ut dats'últsi', k'us dats'úldzoo, 'et whuz na'a neba k'elha whutele. ¹¹ 'Ink'ez neMoodihti, 'en bé whunutjut, 'et hubugha 'et t'ets'onínzun. 'Et huwa ts'iyanah dune whúz ubuznilht'uk. 'Et Yak'usda 'ilhunah ts'inli hoh nuwheni net'enínzun. 'Ink'ez 'et uncha nuwheni chah nuhyuh ts'ih bugha t'ets'oninzun, 'et hoh net'enahzun.

Yak'usda, Christ yudinda hoh yinkak dune ts'iyawh ts'un ninábudelya

¹² Nuwheni doo chah nuhwhuba nats'ududoodzi ghaft'ah. 'Et k'us nuhwheni negha 'uwhudelhti, 'et nuhts'u hukwa' ts'uninzun. 'Et huwa 'onghoh dune duna be hinilh'en zeh hohoont'i 'et whunts'i dahínt'ah hubudzi be 'aw howu nuni chaonusde, 'et ndunnah dats'ínt'ah soo ts'ah'un na'a ubudutéhnih ho' hoont'ah. ¹³ 'Et ne-eni hoolah li'ts'int'ah t'eh, 'et Yak'usda buba' hoont'ah. 'Et ts'ah'un nuníznudeh ts'inli t'eh, 'et nuhwheni nuhwhuba 'uhoont'ah. ¹⁴ 'Et huwa Christ ye nek'entsi', 'i be 'o nus 'uzdunult'uk. Whunulh'en, 'ilhunuh dune ts'iyanah ba dazsai t'eh, 'et t'eh ts'iyanah yahadlah. ¹⁵ 'Ink'ez ts'iyanah ba dazsai 'et huwa nuwheni ndan ts'ukhuna, 'aw whenich'oh neba zeh ilah hoh ndi yun k'ut uzdelhts'i. 'Et k'us ndun neba dazsai 'ink'ez dinadija, 'en ba zeh ndi yun k'ut uzdóolts'i. ¹⁶ 'Et huwa k'an 'et njan whuts'un ndi yun k'ut dune nena be uznih'en dahínt'ah, 'et 'aw whuz na'a ilah hoh dune t'ebuznínzun. 'Et 'alha whutsuh da 'et whuz na'a Christ 'en bugha t'ezninzun. 'Et whunts'ih k'an 'et 'aw whuz na'a zeh 'en bugha t'ets'onínzun. ¹⁷ 'Et huwa ndan Christ yudinda, 'en buyégha nduhólcho k'ahoondit nawhúsdzi. 'Et whutsuh da 'int'ah hukw'u na'a, 'et ts'iyawh buba hoolah whuzdli. 'Et k'us ts'iyaantsuk buba k'andit nawhúsdzi. ¹⁸ Ndi Yak'usda ts'un 'int'ah. Yak'usda dich'oh Sizi Gri 'en bugha ts'un dune nawhulh soo ninawhunt'ai. 'Ink'ez ndi Yak'usda ts'un dune nuwhulh soo ninawhunt'ai, 'et hubugha dune bulh yáztelhtuk, 'et k'an 'et Yak'usda negha ooní'ai. ¹⁹ 'Et whuz na'a, Yak'usda Christ yudinda hoh yinkak dune ts'iyawh ts'un nuwhulh soo ninawhunt'ai. Ts'iyaantsuk hoh hich'a ne'ust'en, 'et 'aw 'o 'un hubuk'echahoo'al. 'Ink'ez ndi khunek Yak'usda ts'un dune nuwhulh soo ninawhunt'ai, 'i negha iní'ai. ²⁰ 'Et huwa Christ 'en ba khunek na'a ts'inli. Yak'usda nuwheni nebe nohwhulh yálhtuk li'utni. 'Et hoh nuhts'un tézdudli, k'an 'et whuts'un soo Yak'usda ts'un naoolhúyeh! ²¹ Christ, ndun lubeshi bughu hoolah, 'en Yak'usda nuwheni neba lubeshi suli 'et huwa. 'En bugha Yak'usda ye ts'ah'un na'a 'int'ah k'una'a 'uts'int'ah ka.

6

Yak'usda ba ne'ts'ut'en

¹ 'Et 'ink'ez nuwheni Yak'usda 'en bugha ndi lhulh 'uts'ut'en ts'inli hoh khunek ulhtus, 'i be ndun whuts'útni, Yak'usda ye unzoo, 'i 'ants'i 'et wulhchoot gunih. ² 'Et njan ndutni,

"Soo 'et neóoninzut, 'et nyoozálhts'a.

Ndet dzin dinjih, hoh wheghah whezulh 'et nla 'usja," ni.

Njan whunulh'en, 'ilhudzin 'aw 'et nela 'ewhuduténih, 'aw 'et neóoninzut.

Njan whunulh'en, hoh teh uzdutejih neóoninzut, 'aw 'et nduhooja. ³ 'Aw

nuhwhuba dzuh nuhghá ts'uh'o'ah hukwa cha'ts'unízun. 'Et huwa nts'e na'a Yak'usda ba ne'ts'ut'en ts'inli, 'aw hoh hukw'éholts'it hoolah. ⁴ 'Et whunts'ih ndúhoolcho hoh ts'ah'un na'a Yak'usda ba ne'ut'en 'uts'int'ah. 'Et ndez na'a njan ndúts'int'ah, 'uts'oot'e ghaít'ah, 'et whunts'ih whulh ts'ooyin. Nek'éhoot'ah nets'u whélts'ulh, hoonliyaz ka 'ezdunidzut, whulutah neba howa whúlna, ⁵ 'ink'ez nehoolhtas, tsak'ezdi'ai, dzuh nenahulhdzut, 'ut'en howa whúlna, chats'itez, 'ink'ez sahá'ts'udelya 'et chah. ⁶ Lubeshi ch'a khuts'udli, be t'eoonudzun, tacha'ts'udinik, 'uyoон ts'un ts'inzoo, 'ink'ez Ndoni be ts'ukhuna, 'ink'ez ts'ah'un na'a be nék'ets'ints'i', 'et chah. ⁷ Khunek be 'alha 'int'ah, be yats'ulhtuk, Yak'usda ye ulhtus, 'i be 'uts'ut'en, be lhts'udúghan, 'i ts'it'i hoh ts'ah'un na'a 'et nuwheni lhelch'a ts'ih nela be nuts'úle. Whuz na'a Yak'usda ba ne'ts'ut'en ts'inli. ⁸ Ndet huba uzdézti k'us huba chats'udit'i, 'ink'ez ndet hoontsi' k'una'a neghu yahalhtuk, k'us hoonzoo k'una'a neghu yahalhtuk, 'ink'ez dune uzna'ah nehutni, ts'ah'un na'a khunek be 'uts'utni 'et whunts'ih. ⁹ Dahoont'ah huwa dune t'enehunínzun huninzun, 'et whunts'ih ts'iyanah net'ehunínzun. Nts'e na'a hukw'é daztésah li'ts'int'ah 'et whunts'ih dáhooja, 'et whulh ts'úkhuna. Nehutuzelhghelh hukw'u na'a nehoolhtas t'eh, 'et whunts'ih whulh ts'úkhuna. ¹⁰ Dats'ínt'ah huwa tso ts'inli, 'et whunts'ih nedzi be ts'uhóont'i. Dats'ínt'ah huwa tets'ul'en 'et whunts'ih ndai be soo 'uts'oot'e, 'i lhanah hubugha ts'íyu'ah. Dáhooont'ah hoh ndai hoonli be téts'ul'en 'ink'ez chats'ít'i, 'et whunts'ih ts'iyaantsuk ts'ít'i.

'i but'aghóohnalh gunih

¹¹ Nuhwheni Corinth whut'en ts'et whucho nuhwhuzdáni. Nedzi ndulhcho 'i be nuhk'ets'ints'i ts'ulhtsi. ¹² 'Aw nuwheni neghá ilah k'ah náht'uk. Nts'e na'a nets'un daht'ah, 'et whuz na'a 'aht'ah. ¹³ 'Uzkehka ahli hukw'u na'a nohwhulh yálhtuk. Nts'e na'a nuhts'un 'úts'int'ah, nuhwheni chah 'et whuz na'a nets'un 'óoht'e. ¹⁴ Ndunnah huba 'alha cha'hoot'ah, 'en hubuts'ú nidoohdelh gunih. Nts'e na'a simba ts'ah'un na'a ne'ut'en 'ink'ez ts'ah'un na'a nucha'ust'en, 'en 'aw lhulh 'uhoot'en ghaít'ah. 'Aw whuz na'a 'uhót'e ghaít'ah! Nts'e na'a simba whét'en 'et usda 'ink'ez tsahólgus yuh usda bulh, lhuzih hoodie? ¹⁵ Nts'e na'a simba Christ, 'en Beliar 'en bulh 'ilho 'uhoot'e? 'Et nts'e na'a simba buba 'alha 'uhooont'ah 'ink'ez buba 'alha cha'hóot'ah, bube 'ut'en k'ah lhgha 'uwhútet'ilh? ¹⁶ Nts'e na'a simba Yak'usda hubuluglez whucho 'ink'ez 'ants'i 'uk'edéltsi bulh lhgha' tet'ilh? Soo cho whunulh'en Yak'usda khúna, 'en hubuluglez whucho ahli. 'Et whuz na'a Yak'usda ndutni, "Hubudzi yuh 'ust'ah 'ink'ez hubutunusya.

HubuYak'usda tesdle 'ink'ez 'en sudune hutele."

¹⁷ 'Et huwa neMoodihti nets'u náhezya hoh ndutni,
"Nuhwheni 'en hubutah ts'ih hanáhdelh
 'ink'ez hubuch'a 'aht'ah.
Ndai dutsun unli, 'i but'aghóohnalh gunih,
 'et sih nanhoolhúchoot.
¹⁸ 'Et Si nuhwhe'aBÁ whúsdle,
 'et nuhwheni suye'kah 'ink'ez sutse'kah tehle.
 NeMoodihti ts'iyaantsuk hoh ulhtus, 'en 'utni."

7

¹ 'Et huwa nuhwhuk'esi' soo zélhts'ai, ndi yé nets'u nahezya, 'i neghun hoonli. 'Et huwa neyust'e 'ink'ez neyéghah 'i ndai lubeshi be dutsun suli, 'i ts'iyawh buna'ts'oohldeh. Yak'usda 'en bé uznuljut. Ndi bé uznuljut huwa 'et 'i be ndi lubeshi bughu hoolah, soo ts'ah'un na'a lhats'ódooleh.

'Aw 'ilhunah whunts'i buch'a núcha'ts'ust'en

² Nuhwheni nuhdzi neba da'dútahtih. 'Aw 'ilhunah whunts'i buch'a núcha'ts'ust'en. 'Aw 'ilhunah whunts'i tinta cha'ts'ust'ih. 'Aw 'ilhunuh whunts'i bugha hacha'ts'undunest'a. ³ 'Aw nuhk'ehos'ah hukwa ilah 'udus-nih. Hoh da nuhwhudáni nedzi yuh ahli hoh nohwhulh yáts'utadlah k'us no-hwhulh ts'ukhutena. ⁴ Tube cho 'aw whechasaz hoh 'et hubugha nohwhulh yátelhtuk. Tube cho nuhwhudélti hoh nuhghu yalhtuk. Bé k'enaznut'a, sudzi dezbuñ. Hoontsi', 'i sk'uz nínt'uk, 'et whunts'ih tube cho be ts'úhoont'i, 'i sudzi dezbuñ. ⁵ Soo ts'ah'un na'a whunulh'en, Macedonia yun k'ut néznindel, ts'iyaintsuk be nech'a dzuh né'whut'en. 'Et bulunah neghu lhena 'uhudutni. Ts'iyaintsuk hoh wheznuljut, 'et huwa 'aw nats'oolyis għait'ah. ⁶ 'Et whunts'ih ndan hubudzi nduda, 'en ts'iyawh Yak'usda k'ena'bune'a. 'Et Titus neghu ninya, 'et hoh nuwheni chah nek'enane'a. ⁷ 'Aw 'et zeh ilah, nuhwheni ts'iyawh sk'eni sahli. 'Et huwa ahtso ahli nióonah'ai. 'Et whuz na'a tube ncha, 'i be si ba hukw'úne' teht'en hukwa' nahzun. Titus ts'iyawh 'et hukw'a nelh nawhelnuk, 'et huwa 'o nus whunélhnik suli. ⁸ Soo cho nulh'en, ndi dustl'us nuhts'o tl'ai'ai 'et hubugha tso ahli ínle. 'Aw sba dachahóot'ah dusni, 'et whunts'ih sudzi únduda hoh 'uk'úne'zíguz. 'Et whunts'ih 'aw sudzi cháandidah. T'éonúszun ndi dustl'us be nuhdzi dúneda, 'et whunts'ih 'astl'iyaz huba zeh nuhdzi ndúneda. ⁹ 'Et k'an 'aw 'et whunélhnik. Tso ahli 'aw 'et huwa ilah. Ndi tso bugha lubeshi whuch'a nuhbeni nahadunehla. Yak'usda hukwa' ninzunk'una'a tso ahli inle 'et huwa. 'Et hubugha tso ahli hoonliyaz hubugha nuwheni negha tinta chawháh'al. ¹⁰ Yak'usda hukwa' ninzunk'una'a tso ts'inli t'eh, 'et 'i għa lubeshi whuch'a ne-eni lht'anaznooleħ uzdoojih ka, whuz na'a 'aw nedzi úndooda għait'ah 'et huwa. 'Et whunts'ih ndi yun k'ut hiye tso hinli, 'i be yaztādlah. ¹¹ Howu nuní nuhzut, Yak'usda hukwa' ninzunk'una'a tso ahli inle. 'Et dahooja ts'iyawh a tsih ndutéhnih hukwa' nahzun. Yak'usda 'en bulh dunekah dutehnih hukwa' nahzun. 'Et nuhwhuba dzuh whuzzli. 'Et hubugha whenulhjut lí'aht'ah, 'et hoh sk'enehtai. Tube cho ts'ah'un nenaóteh'ah hukwa' nahzun. Nuhwhuba dzuh 'uhoont'ah, 'et chah ts'iyawh nenaóteh'ah hukwa' nahzun. 'Et huwa ndúhoolcho hoh lubeshi nuhghu hoolah suli. ¹² Ndi dustl'us nuhts'ó k'e'aguz, 'i be, ndun tinta' ant'en 'ink'ez ndun bulh tinta' ant'en 'aw 'en bugha ilah nuhts'ó tl'a'aguz. 'Et whunts'ih Yak'usda nalh ts'ah'un na'a nuhwhuts'unulhtun, 'et huwa nuhts'ó tl'a'aguz.

Titus da nedani, 'i bugha tube hoonúst'i

¹³ 'I bula għa ts'ih k'enáneht'a. 'Et 'i be zeh nuwheni chah k'enáznet'a. 'Et 'o 'un chah, Titus buyégha nuhwheni nuhgha 'et k'andit nasdli lí'uja. 'Et huwa 'o nus tube cho ts'onélhnik. ¹⁴ 'Et nts'oh tulih Titus ts'un nuhoonust'i hoh zeh nuhghu yalhtuk, 'aw 'et hukwayá chasdlah. 'Et k'us ndi khunek be 'alha 'int'ah be yats'ulhtuk, 'i be zeh nuhwhubúlh yats'ulhtuk. 'Ink'ez 'et whuz na'a nts'oh Titus ts'un nuhoonúst'i zeh nuhghu yalhtuk, 'et chah 'alha 'uhoont'ah Titus neħoni'ai. ¹⁵ 'Et whunalnih nts'e na'a khunek k'une' aht'en. 'Et whuz na'a nuhyust'e dulduz 'ink'ez nuhwhuba wheónonjut hoh n'az de nuhts'un úyalh nulh'en. 'Et huwa 'o nus nuhk'esi' suli. ¹⁶ 'Et ts'iyaintsuk ne'aht'en ts'ah'un na'a ne'aht'en, 'et huwa 'i be tube cho whunélhnik.

8

Ts'iyaintsuk ndai ilh'en, 'i degħha nus hoonzoo k'una'a 'uhóonla

¹ Sulhutsinkah, 'aw 'et Macedonia yun k'ut Yak'usda ba 'ilhunahuwúdulh, nts'e na'a Yak'usda ye unzoo, 'i 'et butl'a whélts'ut, 'et hubugha ts'iyawh 'et t'ewħuntehzeħ hukwa' uzninżun. ² Tube te'hul'en hubutah 'et hoont'i tube cho huhóont'i. Tehel'en 'et whunts'ih hubula hoonli hoh 'ongħoh bula' huja.

3 'Ink'ez chah dahínt'ah hoh daooneltsuk hubugha húnle, 'et whunts'ih 'et 'o nus 'uwhuneltsuk, 'et zeh hubugha hutelelh, whuz na'a hukwa' huninzun 'ink'ez 'et whuz na'a nduhuja. 'Et t'ewhunészin 'et ts'ah'un na'a 'uhoont'ah. **4** Ndi ye unzoo, 'i, 'et Macedonia whut'en butl'a hó'ai, 'et huwa dune Yak'usda bube'ildzun, 'en lhulh 'uhint'ah hukw'u na'a hoh bula hutenilh. 'Et hukwa soo cho nehoodulhkut 'et ts'iyawh dune Yak'usda bube'ildzun 'en huba ts'óolhchoot. **5** 'Et ndahúja, 'aw hukwa tsi chats'uholih k'una'a ne'hinla. 'Udechoo dich'oh neMoodihti gha' hududulya. 'Ink'ez Yak'usda hukwa' ninzun k'una'a, 'i gha negha' hududulya. **6** 'Et huwa Titus khunek ulhtus, 'i be uzdáni, ndi ye unzoo, 'i nuhwheni 'udechoo nohwhulh whe 'idilh'en, 'et ts'iyawh lhaóodooleh huba' hoont'ah. **7** 'Et whunts'i ts'iyaintsuk ndai ilh'en, 'i degha nus hoonzoo k'una'a 'uhóonla. Be 'alha 'uhoont'ah 'i be, nuhghunek, be t'éoonudzun, 'a tsih ndutehnih, 'ink'ez be nek'ehtsi', 'i chah. 'I ts'iyawh degha nus hoonzoo hukw'u na'a 'uhóonla. 'Et whuz na'a ndi ye unzoo, 'i be hoonzoo whuzúlhtsi.

Christ 'en k'una'a 'uts'oot'en

8 'Aw 'et ndahneh nuhwhudusni ilah. 'Et whunts'ih nts'e na'a 'uyoon 'en 'a tsih 'uhudutenilh, 'ink'ez be nék'ehtsi', 'i whunéuntelhtun, 'et whuz na'a 'un whudusni. **9** NeMoodihti Sizi Gri, 'en ye unzoo, 'i bughu t'eoónáhzun 'et huwa. Nts'e na'a dalcho 'i be soode'a 'int'ah, 'et whunts'ih nuhwheni nuhwhuba tel'en suli. 'Et ndai ye tel'en, 'i nuhwheni be soo deh'a wahle. **10** Ndi daja nuszun 'et ts'ah'un nuhwhudutesnilh, 'et degha nus nuhwhuba whutézoo. 'Ugha da nuhwheni hukwa' nahzun 'ink'ez hoonáht'i hoh ndaht'en, 'et 'awhuz tulih 'et ndaht'en. **11** K'an 'et lhaóodoohleh huba' hoont'ah. 'Et nts'e na'a nuhwhubeni lhadáhla, whuz na'a lhaóodoohleh. **12** 'Et whunulh'en, dune dudenl ihaídinla hoh sooneya daltsuk huwa yúte'ah, 'i 'aw 'et soo 'úneltsuk ho' 'int'ah. Ndai huwa yúte'ah, 'o 'unyaz huwa yúte'ah hukwa' ninzun whunts'i, 'aw 'ooneh ghait'ah, 'et soo' hoont'ah. **13** Njan nuhwheni nuhwhuba howa whulna 'ink'ez 'onghun 'aw hoonliyaz cha'hust'en, 'aw 'et 'uwhudúsni ilah. **14** 'Et k'us ts'iyannah ba lhugha 'ahot'e. 'Et whuz na'a nuhwheni lhai aht'i t'eh, ndunnah cha'ít'ih, 'en be bulah bughah'ah. 'Et whuz na'a lhula' ts'ooodut'en huba' hoont'ah. **15** 'Et whuz na'a whutsuh da 'uk'e'anguz hoh ndutni, "Et ndan k'us lhai hílhchoot, 'en 'aw ditézkat, 'i whunts'i 'aw chaít'i, 'ink'ez ndan dune hukw'elh'ih ilhchoot, 'aw hoonliyaz ye ndunidzit, 'i whutélah."

Yun k'ut Judea 'et Christ bube'ildzun, 'en huba sooneya 'ilhunats'un tuwé'ah

16 Yak'usda ts'un chanailya ts'utni. 'En 'uja Titus ba hoolhtus whulhtsi, 'en soo cho nuhla tet'ilh 'et whuz na'a hukwa' ninzun. **17** Neghunek ulhtus, 'i ilhchoot, 'aw 'et zeh ilah, dich'oh hukwa' ninzun hukwa nuhts'u whénya. **18** 'Ink'ez 'uyoon nelhutsin, ndunnah khunek unzoo, 'i be yalhtuk, 'et huwa Yak'usda ba 'ilhunahuwúdulh, 'en ts'iyawh hiba budélhti. 'En chah Titus bulh whuz nuhts'ún whe buts'alh'a. **19** 'Et zeh ilah, ndunnah 'en Yak'usda ba 'ilhunahuwúdulh neba 'utahahúyalhti nelh té'us 'ink'ez nela tet'ilh whuba. 'Et whuz na'a ndi 'ut'en unzoo, 'i 'onghoh huba ne'hut'enah ts'inli. 'I be neMoodihti dich'oh ye dézti, 'i t'ehinoozeh. 'Ink'ez 'i be nuhwhubeni lhadínt'ah t'ets'onózin. **20** Ndi huwant'ai, 'i hubutaztelelh, 'aw hukwa nek'éholts'it gunih. 'Et whuch'a ne'ts'ut'en. **21** 'Et neMoodihti nalh 'ink'ez ts'iyannah chah nalh soo ts'ah'un na'a 'uts'otelih. **22** 'Ink'ez nelhutsin, 'en chah, bulh whets'alh'a. Ndun lhat ts'óolhdzai 'et huwa t'ets'onínzun, 'ahoolhyez huba ilh'i tube cho 'et nduténih huba. 'En zeh nohwhulh budzi hoonli hoh nuhwheni 'a tsih nuhts'utéyah hukwa' ninzun. **23** 'Et k'us ndan Titus hika' 'oodulhkut t'eh, 'en sulh 'ut'en nuhwheni nuhwhuba sulh 'ut'en 'int'ah, budóohni. 'Et ndunnah nelhutsinkah ká' 'oodulhkut, 'en Yak'usda ba 'ilhunahuwúdulh khunek

huba na'a 'ink'ez Christ ye dezti 'uhint'ah, budóohni. ²⁴ 'Et huwa Yak'usda ba 'ilhunahuwúdulh hubunalh, ndunnah nuhts'u hunindel, nts'e na'a be nek'ets'intsi', 'i aht'i, 'ink'ez nts'e na'a nuhwhuba ts'odelhti, 'et ts'iyawh bunalhts'et haootehlelh.

9

Lhadóoh'te ndi sooneya huwa teh'alh

¹ 'Aw 'et dune Yak'usda bube'ildzun, 'en hubula' tehnih, 'aw 'uyoo khunek nuhts'o k'e'óosges huba cha'hoot'ah. ² 'Et ndutéhnih hukwa' nahzun t'eeonuszun. 'Et huwa ndunnah Macedonia whut'en ts'un nuhwhudélhti hoh nuhghu yalhtuk. Achaia yun k'ut nuhwhenghah whut'en ndet lhahóduteleh, 'et 'ugha da lhahódinla hubudáni 'et huwa. 'A tsih 'uwhuténih hukwa' nahzun, 'et t'éoonúszun. 'Et huwa nuhwheni nuhgha ndunnah Macedonia whut'en k'us lhanah sooneya howa híte'ah 'et huhóost'et. ³ 'Ink'ez nts'e na'a njan be nuhódelhti, 'aw t'eduzoosnih ghat'ah, 'et huwa nelhutsinkah nuhts'un whebalh'a. 'Et whutsuh da nuhwhudáni, 'et huwa nuhzooneya be lhadóoh'te. ⁴ 'Et bulunah Macedonia whut'en, khun teh sulh hútooya, 'et nuhwheni 'aw lhachadaht'ah t'eh, nts'e na'a be nóhwhudélhti, 'i nuhheni bukahoyasli uzteleh. 'Ink'ez nuhwheni, 'et do, nuhwhuba dáhoont'ah? ⁵ 'Et ndunúszun huwa nelhutsinkah 'uda sutsuh nuhts'ó toodelh hubudúsni. 'Et hoonáht'i hoh howa téh'ah, 'et t'eh k'udada huwa teh'ah lhaooodóoleh. 'Et whuz na'a ndi huwa téh'ah, hoonáht'i hoh huwa téh'ah, 'et t'eh 'aw soo 'a tsih ndahneh nuhts'udóni ghat'ah.

Hoonáht'i hoh ndi sooneya huwa óoh'ah. Whuz na'a Yak'usda nuhts'u húkwa' ninzun

⁶ 'Et ndez na'a njan dúhoont'ah, ndan hoontsol, 'i 'ainule, 'en hoontsol, 'i haíntelelh. 'Ink'ez ndan lhai 'ainanla, 'en k'at li lhai haíntelelh. ⁷ 'Ilhunah hinli hoh ndai dudzi be hukwa' huninzun huwa híte'ah, 'et 'uneltsuk, 'i huwa hóo'ah. 'Aw 'et hukw'edutsi' ilah k'us whuz hinilht'uk huwa ilah. 'Et huwa ndan hoont'i hoh huwa 'á'ah, 'en Yak'usda hubuk'entsi'. ⁸ Yak'usda soo 'últus hoh ndai ye unzoo, 'i 'o nus 'uneltsuk, 'i negha natedukulh. 'Et hoh ndai be ndunahdzit, 'i 'o 'un lhai teht'i. 'Et 'ut'en unzoo, 'i 'ulh'en, 'i, ts'iyaintsuk nuhghanus 'uneltsuk, 'i nuhtl'anatedukulh. ⁹ 'Et khunek 'uk'e'éduguz, 'et ndutni,

"Nduhóolhcho whe dune tehul'en, 'en chah hubula 'uja.

Ye ts'ah'un na'a 'int'ah, 'ilhuz wheni 'int'ah."

¹⁰ 'Et ndun nuhgha íyunle, 'en 'o nus úncha lhai nuhghanle. 'Et hoh nuhwhe'ut'en ts'ah'un na'a 'int'ah, 'i 'o nus lhai tele. ¹¹ 'Et nduhóolcho hoh soo deh'a 'et ndet lhts'un nahzoo, 'i be 'onghoh hubuts'un nuhla hoonli. 'Et huwa Yak'usda chanailya ts'utni. ¹² 'Et dahoont'ah huwa nuhsooneya bugha nuh'e'ut'en be ne'hut'en ahli, 'et hoh dune Yak'usda bube'ildzun hinli, 'en hiye ndunidzit, 'i huba soo 'uneltsuk. 'I bugha lhanah Yak'usda ts'un tube cho chanailya hutni. ¹³ 'Ink'ez ndet 'uyoon nuh'e'ut'en k'ah whebuntelh-tun, 'i be, 'et ndúwhulcho 'onghoh Yak'usda 'o nus huba whudélhti. Christ bughunek unzoo, 'i daja dahni, 'et zeh hukw'úne' aht'en. 'Et huwa nuhla hoonli hoh Jerusalem whut'en, 'en bula 'aht'en, 'ink'ez 'un whut'en, 'en chah hubula 'ahja. ¹⁴ Yak'usda ye unzoo, 'i, hóont'i hoh nuhyé yuda'ai, 'et huwa nuhk'e ni hinli 'ink'ez nuhwhuba tenahududli. ¹⁵ Yak'usda ndi 'aw buk'elha chats'uhoolhtsil hoh negha ín'ai, 'i unzoo k'et, 'aw uzdooni ghat'ah. 'Et huwa tube cho chanailya ts'utni.

10

Ndai be lhts'udughan, 'i, 'aw ndi yun k'ut whuts'u haínzut, 'i ilah 'int'ah

¹ Si, Paul, nuhghu téodusdlih. Christ ye yuh 'ududaldzin, 'ink'ez yé soo nilyaz ne'bulh'en, 'i be' dusni. Nts'e na'a dast'ah hoh nuhtah sída da, 'aw whe chaníljut hoh naheyelh chásdlah. 'Et whunts'ih lhe'hutni, nuhwhuch'a 'ust'ah t'eh, 'et chaníljut hoh naheyelh 'i be nuhwhuts'un 'ust'ah. ² 'Et nts'e na'a neyust'e whuts'u nínt'uk hukw'u na'a, 'et whuz na'a zeh 'uts'ut'en huninzun. 'Et nuhtah ndunt'ah, wheóonujut hoh hububut ninátesdalh. 'Et huwa nuhts'u te'dusdli ndet nohwhulh 'ust'ah t'eh, 'aw nuhts'un chaníljut hoh naheyelh hukwa cha'núszun. ³ 'Et ndi yun k'ut uzdelhts'i, neyust'e whuts'u nint'uk, whuz na'a ilah nuts'íya. ⁴ Whunulh'en ndai be lhts'udughan, 'i, 'aw ndi yun k'ut whuts'u haínzut, 'i ilah 'int'ah. 'Et Yak'usda be ts'ilhtus, 'i be lhts'udughan, 'i 'int'ah. 'Et ndai be néch'a whudetni, 'i ts'iyawh náninezyuz. ⁵ Ndét lhutah 'ilho howa yahalhtuk, 'i chah ts'iyawh hoolah whé nilhtsi. Ndai Yak'usda ye whunih, 'i chah higha ndoh 'oot'e hukwa' hut'en, 'i chah ts'iyawh hoolah yutelhtsilh. 'Ink'ez dune daja huninzun, 'et chah nahuhootélchulh, 'et hoh Christ hik'ah ts'ih ne'hoot'en. ⁶ 'Aw 'et ndai ts'iyaintsuk hukw'u ne'zaht'en t'eh, 'et ndunnah hukw'ú nucha'hit'il, nuwheni 'en ts'iyaintsuk dzuh notedeh hubugha ts'óte'alh.

Nuwheni chah Christ bube'ildzun 'uts'int'ah

⁷ 'Aw 'et njan nuhwhuba dáhoont'ah? Ndét hóh'en, 'et zeh ih whunulh'en? Ndunnah Christ bube'ildzun na'hudunúdzun, dáhoont'ah Christ bube'ildzun 'uhint'ah, 'et whuz na'a zeh, nuwheni chah Christ bube'ildzun 'uts'int'ah. 'Et chah soo cho howu nuní noohzut! ⁸ 'Et neMoodihti dune gha ndoh 'uts'int'ah negha óoni'ai. 'i bugha 'o nus ulhtus nuhwhuts'utelhtsilh, 'aw hoolah tehleh k'una'a ilah 'un whuts'uleh. Ndét negha óoni'ai, hóont'i be howu yalhtuk, 'et 'aw hukwa yáchasdlah. ⁹ Njan ndun whudusni, 'aw nuhwhe'oonulhjoot ilah ho' dusni. ¹⁰ 'Et huwa njan ndun whudúsni, bulunah 'uhútni, "Ndi Paul dustl'us yuk'une'úzguz, 'i tube be óonujut 'ink'ez ulhtus. 'Et whunts'ih netah usda t'eh, buyust'e lait'ah 'ink'ez ndai ye yalhtuk, 'i 'ants'i 'int'ah," hutni. ¹¹ 'Et whunts'ih ndan 'et ndez na'a howu yahalhtuk, soo cho howu nihoole, ndi ne'e'dustl'us, 'i be nts'e na'a neghunek daja ni, 'et nket'ah nuwheni nuhtah 'uts'int'ah t'eh, whuz na'a zeh uztet'ilh.

Ndai 'ut'en negha íni'ai, 'i zeh 'uts'oolh'en huba' hoont'ah

¹² 'Et bulunah dich'oh ts'ah'un dune na'hududútni, 'aw nuwheni ndúchats'oost'en. Hedich'oh hubutah dahínt'ah, 'et 'en hubuk'una'a nducháts'oost'en. 'Et whunts'ih ndunnah hedich'oh hubutah duba nahududzoo, 'et ndunt'ah 'aw huwhunih ilah ho' hint'ah. ¹³ 'Et whunts'i ndai 'ut'en, 'i Yak'usda neba yoozi, 'aw 'i zeh ts'uhóont'i howu yats'ulhtuk. 'Ink'ez ndi 'ut'en neba yoozi, nuhwheni chah soo nohwhulh 'utni. 'Et 'uyoo 'ut'en bughu yats'oolhtuk huba cha'hóot'ah. ¹⁴ 'Et ndet 'ut'en 'uts'oolh'en neba hoozi, 'et 'o 'un ka' ts'oot'en ghaít'ah. 'Et huwa nuhwheni chah Christ bughunek unzoo, 'i bulh nuhghuzninel. ¹⁵ 'Ink'ez 'uyoon dune Yak'usda 'ut'en hububa yoozi, 'i 'aw ts'uhóont'i hoh bughu yats'oolhtuk ghaít'ah. 'Et nket'ah 'uwhuténlh hoh nuhwhuba 'alha 'int'ah 'o nus 'uholcho nuhwhuba tele, 'et nuwheni chah nuhtah 'o nus nuhwhuba ts'incha tele. Ndai 'ut'en neba yoozi, 'et nuhwheni nuhwhuba ts'incha tele. ¹⁶ 'Et 'o 'un yun k'ut ndi khunek unzoo, 'i be yats'oolhtuk. 'Ink'ez 'uyoon 'ut'en buba yoozi, 'i 'aw ts'uhóont'i be yats'oolhtuk ghaít'ah. ¹⁷ 'Et whunts'ih ndunnah 'ududálti, 'en neMoodihti, 'en be 'ududóolti huba' hoont'ah. ¹⁸ 'Et ndan dich'oh duba

na'hoodudzi, 'en ndunt'ah, 'et 'aw soo hiyulh nechahoo'al hinle. Ndán neMoodihti yoozi, 'en zeh ts'ózi huba' hoont'ah.

11

Paul, Corinth whut'en, 'en hubughu ni unli

¹ Ndi khunek 'ants'ih be nuhwhulh yalhtuk nuhzun, 'et whunts'i 'astl'iyaz nduchah 'o 'un lih sugha óonah'ah. 'Ink'ez 'alha 'i be whuz na'a soo zélhts'ai. ² 'Et Yak'usda be 'oolnih, 'i be si chah nuhwhuba 'oolhunih. Nuhwhuba nahuziya 'ilhunuh dune bughu tehdalh, Christ 'en 'int'ah. Nuhwheni 'aw dune yut'achaghesnak nuhtsun hoolah li'aht'ah hoh Christ bughanwhunila. ³ 'Et whunts'ih hoh da ndi tl'ughus ye 'uts'un 'uninzun, 'i be nts'e na'a Eve naina'a, 'et whenlhújut nuhwheni chah 'et whuz na'a nuhwhubeni tinta itelh'ilh. 'Et ndúhooja t'eh, 'et t'eh nuhwhubeni Christ ts'un 'aw 'ilho wule għait'ah. ⁴ 'Ink'ez lhe'ahja whunuh dune nuhghu ninja hoh 'uyoon Sizi bugha nohwhulh yalhtuk, 'aw 'en whuz na'a Sizi nuhyulh yachats'ilhdih. K'us 'uyoo yéghah úlhchoot t'eh, 'aw nuwheni negħá ilah úlhchoot. K'us 'uyoo khunek unzoo, 'i úlhchoot t'eh, 'aw nuwheni negħá ilah úlhchoot. 'Et 'alha 'uhoont'ah nahzún ih?

Bulunah Christ ba whel'a na'hududil'i

⁵ 'Ink'ez ndunnah whel'a hincha, 'en 'aw hubugha ndoh nacha'udunuzúszun. ⁶ 'Et yalhtuk soo t'echanuzúszun, 'et whunts'ih lhat nt'eoonszun hoh 'ust'ah. 'Ink'ez ts'iyaintsuk t'éoonáħzun nuhwhuzílħsi. ⁷ Yak'usda bughunek unzoo, 'i 'aw 'uk'elha ilah bé nohwhulh yalhtuk. Te'dudulħú'en 'et hoh 'i be ncha teħle. 'I be lubeshi 'ulħchoot nahzun ih? ⁸ 'Uyoon Yak'usda ba 'ilħuhoweżdel 'en buzooneya suba 'uk'elha huħoolħi. 'Et whunts'ih bugħi ndunust'ih li'ust'en, 'et nuhwheni nuhwhuba ne'úst'en whutah. ⁹ Hoh da nuhtah sida hoh hoonliyaz be whendunidzit, 'et whunts'ih 'aw nuhts'un de' chaduzusni. 'Et sulħutsinkah Macedonia ts'ih hahádel hoh ts'iyaintsuk be sula' het'en. 'Et huwa nuhts'un de' dusni whuch'a' dudulħúdzun. 'Et whuz na'a zeh ndutest'ih nduhħolyez hoh. ¹⁰ Christ khunek yé 'alha 'int'ah 'i be désbun. 'Et huwa njan Achaia yun k'ut ndulħcho hoh ndai bé 'oonust'i, 'i, 'aw 'ustl'e' dōosni għait'ah. ¹¹ Di ka njan dudúsni? 'Aw nuhk'echási' nahzún tulih? 'Et whunts'ih Yak'usda t'éoonínzun. ¹² Ndai 'ut'en 'ulħ'en, 'i k'elha nuhts'un dé' doosni għait'ah, whuz na'a zeh 'et ndutest'ih. 'Et ndunnah nuwheni nek'una'a huħóolħdżi hukwa' hut'en 'ink'ez huħoont'i be howu yahulhtuk t'eh, 'et soo 'ustl'e' 'ahuduténih ubutelħsilh. ¹³ 'En nduhint'ah 'aw ts'ah'un whel'a 'en ilah 'uhint'ah. Dich'oh dude 'ut'en k'ah hukw'u na'a 'uyoon nahuna'ah. Christ whel'a 'en buk'una'a na'hududil'i. ¹⁴ Khun teh nuhwhuba hooncha wule gunih! Satan 'en lizas be whét'en na'dudil'i 'et huwa. ¹⁵ 'Et huwa ndunnah hila 'uhut'en, 'en dich'oh ndunnah ts'ah'un na'a ne'hút'en na'hududil'i. 'Et whunts'ih 'aw chahóocha 'uhoont'ah. 'Et nduhut'en hedich'oh hube 'ut'en k'ah hukw'u na'a huba k'elha whuté!

Si whuzusnik usdli noohzin gunih

¹⁶ 'Et doo chah zeh ndun whudusni, 'aw dune whusnik 'int'ah sunóohzin gunih. 'Et whunts'ih whuz na'a zeh 'unahzun t'eh, whute, whuzusnik k'una'a nisunulhti, 'et hoh hoontsolyaz hoonúst'i be yatelhtuk. ¹⁷ Daja nuhwhudúsni, 'aw neMoodihti yalhtuk hukw'u na'a ilah, si yalhtuk. 'Ants'i whuzusnik k'una'a 'unohdusni. Sudzi hooni hoh ye hóont'i sugħu dez'ai. ¹⁸ Lhanah buyust'e ts'ih nínt'uk hukw'u na'a hóont'i be yahalhtuk. 'Et si chah whuz na'a hoonúst'i be 'et yatelhtuk. ¹⁹ Nuhwhubeni hoonli 'et whunts'ih ndunnah dune 'aw cha'hoot'ah k'una'a dune hinli nuhtah húdelħts'i, 'et whunts'ih

'aw nuhwhuba dacháhoot'ah. ²⁰ Lhe'aht'en, 'ilhunuh nuhtah usda hoh buba 'ust'enah nuhwhulhtsi, k'us 'ilhunuh nuhwhúlhgooh, k'us 'ilhunuh ndai aht'i, 'i nuhghu yílhchoot, k'us 'ilhunuh nuhtah ncha na'dudulhtsi, k'us 'ilhunuh nuhóonúkat, 'et ndúwhulcho nuhwhuba dachahoot'ah. ²¹ Hooya usdli hoh nohwhulh yatelhtuk. Hoh da nuhtah 'uzdélhts'i da, 'ants'i lats'ít'ah lí'ts'int'ah. 'Et whunts'ih ndan njan hubugha lhoojah, 'en buk'una'a, whuz na'a si chah lhóosjah hoh yatelhtuk. 'Ants'i whuzúsnik k'una'a 'udusni.

Christ 'en ba dzuh nusízut

²² Ndunnah Hebrew bughunek yahalhtuk na'hududútni, 'et si chah 'ilhunuh 'ust'ah. Israel whudune na'hududutni, 'et si chah 'ilhunuh 'ust'ah. Abraham hits'u haínde ih, 'et si chah 'ilhunuh 'ust'ah. ²³ Ndunnah Christ ba ne'hut'en ih 'uhint'ah? 'Ants'i seni hoolah hukw'u na'a yalhtuk, 'et whunts'ih si 'o nus 'ust'ah. Si 'o nus 'ut'en huba nus 'ultus 'i be 'ust'en. 'O nus lhat suhólhtsus k'et 'aw uzdooni ghaft'ah. 'O nus lhat hoh tsak'esá'ai, 'ink'ez k'us lhat hoh 'ankw'us dásaih. ²⁴ Ndunnah Lizwif skwunlat suholhtsus. 'Ilhuh suhoolhtsus totsuk, tat lanezi 'o 'at lhuk'i hoolah (39) suts'e 'uhulhtsus. ²⁵ Tat tuz be suholht'o. 'Ilhuh tse be suzoolhghelh hukwa' suhalh'en. Tat hoh ts'i sulh nádezghuz. 'Ilhuh ya too k'ut lhulcho 'et nusdlat, 'ilhuh 'úlh'ek 'ink'ez 'ilhudzin whuts'un. ²⁶ 'Ahoodhyez lhelh ts'un kédeszulh. 'Et took'oh chah tube suba wheoonujut. 'Undunut'ih 'en chah buts'un suba howa 'óodli. Suh hudedowh, 'en whunts'i, buts'u tsi hoosli. 'Udun yun k'ut whut'en, 'en chah buts'u tsi hoosli. Keyah sída, 'et whunts'ih suba howa 'óodli. Dune hoolah sída t'eh, 'et whunts'ih suba howa 'óodli. Ya too k'ut 'et chah suba howa 'óodli. 'Ink'ez ndunnah sulh dedowh na'hududil'i, 'en hubutah chah suba howa 'óodli. ²⁷ 'Ut'en ulhtus, 'i be 'ust'en. 'Et huwa whulutah tube nenúsih. Lhat 'aw chástah. Lhat hoh suye'últ's'ilh 'ink'ez ta'óosde. Lhat hoh sahá'delhúya k'us lhat hukw'uz yuh nusíya dzuh 'et dune usdli hoh. ²⁸ 'Aw 'et zeh ilah, nts'e na'a Yak'usda ba 'ilhunahuwúdulh bughusdli, 'et chah 'ants'i nisunílhts'ut li'ust'ah. ²⁹ 'Aw t'eoónuzáhzun ih 'ilhunuh budzi lait'ah suli t'eh, si chah sudzi lait'ah 'ulhih. 'Ink'ez ndan nelh dune 'onghoh lubeshi be nalts'uk li'ut'ih 'et hubugha whuske 'ink'ez 'ants'i desk'un li'ust'ah. ³⁰ Hoonli hubugha hootest'i t'eh, 'et ndet dast'ah hoh lait'ah 'et whé 'oost'e. ³¹ Yak'usda, Sizi Gri 'en neMoodihti be'aBá, 'en zeh 'ilhuz wheni uzdélhti, 'en t'eoónínzun 'aw chaoozústs'it. ³² 'Et hubudayi cho Aretas hiyulhni, 'en bukeyah Damascus huwhútni, 'et humoodih dune, 'en sutélhcholl hukwa' ninzun. ³³ 'Et whunts'ih, ndi be 'uzdla cho, 'i be súhalhti 'ink'ez windah k'et, 'et nasuhálhbah hoh hubula k'éhanasja.

12

Yak'usda dune yunalhts'et haho'ai

¹ 'Alha ndi 'udelhúti khunek be yalhtuk, 'aw suba chahóozoh ho' dusnih. Ndet neMoodihti benghun newhúkat 'ink'ez ba be wheóodiltsih, 'i bugha nohwhulh yátelhtuk hukwa' nussun. ² 'Ilhunuh Christ yunéyah, 'en t'enuszun. 'Et ndun hoh da lanezi 'o 'at dit naooduzuk inle hoh 'en whulh tat yak'uz 'et 'ants'i khun be' dúzgooh li'uja. Buyust'e bulh k'us be'et, si 'aw t'eoónuzúszun, Yak'usda 'en t'eoónínzun. ³ 'Et ndun 'en t'enuszun. Buyust'e bulh k'us be'et, si 'aw t'eoónuzúszun, Yak'usda 'en t'eoónínzun.

Yak'usda 'int'ah hoh nuwheni ts'iyai, 'i be k'enána'ah

⁴ K'us hoonzoo ni'dudulti lí'uja, 'et 'ants'i khun be' dúzgooh hukw'u na'a 'int'ah. 'Et whuts'un ndai khunek 'aw ye yátoolhtih ghaft'ah, 'et hubuduzts'ai. 'Aw ye yátelhtuk yutl'acháwhus'ai 'et huwa. ⁵ 'Et ndunt'ah dune, 'en bé hoonust'i hoh bughu yatelhtuk. 'Et whunts'ih 'aw se' 'ut'en k'ah huwa ho'

hoonust'i k'una'a howu yaoolhtuk ghat'ah. Ndet dast'ah last'ah, 'et zeh hónust'i hoh howu yalhtuk. ⁶ 'Et be hoonúst'i k'una'a yatelhtuk hukwa' nuszun t'eh, 'et whunts'ih 'aw whuzusnik tesdle hukwa cha'núszun. 'Et huwa ndai khunek 'alha 'int'ah, 'i bugha zeh yatelhtuk. Ndi be hóotest'i whuch'a whuz na'a 'utest'ilh. Doo ka n'awh dune suhunilh'en 'ink'ez chasadits'o t'eh, 'et whuz na'a zeh dune unli suhúntezin.

Ntsi' nududeh, 'i Satan bugha 'ust'en dzuh nuszut

⁷ 'Et njan ndet senghuh niooninkat, 'et whula gha ndi 'uzdudelhúti whuch'a 'ink'ez ncha na'duteltsilh 'et whuch'a, 'et huwa whus cho soo dunat li'ust'en. Satan, bugha ndi ntsi' nududeh, 'en bugha 'ust'en dzuh nuszut. 'Et whuz na'a 'aw 'ududoohlúti ghat'ah. ⁸ Tat neMoodihti buts'un tédesdlih, khun teh whus cho suts'ahanadoodúkat. ⁹ 'Ink'ez 'usúlhni, "Be úszoo, 'i 'aw 'et 'i mba soo 'int'ah. Be úlhtus, 'i be lait'ah, 'i ts'iyawh lhaóodija 'et huwa." 'Et huwa hoonúst'i hoh ndi be last'ah, 'i bugha 'et hoonust'i. 'Et Christ ye 'ulhtus, 'i suh 'óot'e. ¹⁰ 'Et huwa ndet suba last'ah, sghu hudloh, hoonli suba howa whúlna, ndet dzuh nusahalhdzut, 'ink'ez hoontsi' sughá honinla, 'i ndi ts'iyawh 'ilho, Christ 'en bugha suba 'uhóoja t'eh, 'et hoonúst'i. 'Et whuz na'a be last'ah 'i be úlhtus nasdleh.

Whel'a 'en hube 'ut'en k'ah

¹¹ Njan hoonust'i, 'et 'i be whuzusnik li'ust'ah. Nuhwheni whuz sunulht'uk 'et dóosni ka. 'Et nuhwheni nuhgha huba na'óodudoosdzi huba' hoont'ah. Ndunnah whél'a hincha, 'aw hoonliyaz hubuk'elh'ih cha'úst'ah, 'ants'i 'ust'ah 'et whunts'ih. ¹² 'Et 'alha ndai whél'a be hoh hóodel'en, 'i ts'iyawh si sugha lhawhúdint'ah nuhwhuba whuzílksi. Dzuh nuszut whulh síyin, huwa ét'en, 'ink'ez hooncha túne' zust'en chah, hoolhtus chah túne' 'ust'en, 'et ts'iyawh nuhtah 'awhúsdla. ¹³ 'Ongoh Yak'usda ba 'ilhunahuwésdel, nuhwheni nts'e na'a hukw'elh'ih 'uteht'ilh? 'Et 'aw hoonli nuhts'un húkwa cha'duzusnih. 'Et huwa ih tinta' ust'ih nahzún ih? Ndi ndai 'uts'un na'a be ne'zust'en, 'i ts'iyawh suba whunawhudoolnah!

Dahoont'ah huwa hubuk'entsi'

¹⁴ 'Aw 'et lháduja hoh whulh tat nuhts'un nátesdalh. 'Aw ndai aht'i buka' cha'núszun, nuhwheni zeh nuhka' nuszun. 'Et huwa nuhts'un dáteso ka ílah. Whunulh'en, 'uskehyaz 'aw dudusnekah hubonoolhyeh huba cha'hóot'ah. K'us budusnekah buzkeh 'en hubonoolhyeh huba' hoont'ah. ¹⁵ 'Ink'ez degha nus be nuhk'esi', nuhwheni hukw'elh'ih sk'ehtsi', 'et whunts'ih suba 'uts'un na'a cha'hóot'ah. Nuhzul 'i ba hoonúst'i hoh buk'elha whutelhsilh. Be khusna, 'i whunts'ih k'elha yutelhtsilh. ¹⁶ Nts'oh dája nahzun 'et whunts'ih hoonliyaz nuhch'a nuchá'zust'en, nuhwhenich'oh t'éoonúhzun. 'Et whunts'ih lhe'usja, nunúl'i hukw'u na'a whuts'it bulh nuwhílhchoot lí'usja. ¹⁷ Ndan nuhts'ú haho'ai, 'en bugha 'et hoh nuhgha há' dunest'ah nahzun tulih? ¹⁸ 'Et Titus khunek ulhtus, 'i be dáni hoh ndun nelhutsin 'en bulh nuhts'ó whebalh'a. 'En chah ih nuhgha há' dunent'ah? 'Awundooh! Ts'uhóoont'i hoh lhgha hoh nuhtah 'uts'ut'en? Lhk'una'a zeh ih uzdet'us? A! ¹⁹ 'Et doo chah nuhoodutelhkut, nuhwheni nuhts'un k'úzdutetnilh nahzun ih? 'Awundooh! Yak'usda náhl Christ 'en bugha njan duts'útni, buk'entsi' ndai hoonliyaz nuhtah 'uts'alh'en, 'et ndúwhulcho hoh nuhwheni zeh nuhba 'uts'ut'en. 'Et nus zeh lhé'teltus hoh nuhwhuba 'uts'ut'en. ²⁰ 'Et tube whesaz hoh doo chah nuhts'un nátesdalh. Khun 'et ndusja t'eh, 'et sih ndez na'a tulih nahós'ah. 'Et ndet nuhts'o húkwa' nuszun, 'et 'aw whuz na'a tulih chahzooh. 'Ink'ez 'et whuz na'a nuhwheni chah sts'o hukwa' nahzun, 'aw whuz na'a cha'ust'ah tulih nahóh'ah. Nuhghu niya t'eh, 'et ndez na'a tulih 'ooht'e, ts'iyawh lhédahdulh 'ink'ez lhughe' 'oolhunih. 'Et khun lhulh húnulhúch'oh 'ink'ez

lhch'a nidahdulh. Lahoot'ah hoh lhch'a dehni. Ts'iyawh lhch'a ne'dahni. Ncha na'dudulhú'i 'ink'ez ts'iyaintsuk hoontsi' nuhwhuba lht'a'whúnt'en. **21** 'Et huwa whesaz hoh doo chah nuhts'un nátesdalh. K'us lhanah nuhtah lubeshi 'uhalh'en 'ink'ez 'aw lubeshi whuch'a hubeni lht'anachahundunusle. 'Awhuz tulih chahóozooch tune' hut'en. Dune ts'eke bulh tinta' hunt'en. 'Ink'ez lubeshi dutsun, 'i 'uhulh'en. 'Et whuz na'a 'et ndúhoont'ah t'eh, 'et howa sudzi yuk 'utenilh 'ink'ez howu ni tesdle. 'En hubugha Yak'usda 'et yuh 'usutelilh.

13

Paul bugha ndoh 'int'ah, 'i Yak'usda yutl'ahó'ai, 'et whuz na'a hubuts'un teyalh

1 'Et njan 'aw 'et whulh tat nuhts'un natésdalh. Nanah k'us tanah 'en hubunalh ne'whut'en, ts'iyaintsuk nuhwheni nuhtah, ndai be 'uk'ehoot'ah 'en hubughunek bugha ts'iyaintsuk lhaóodutenilh. **2** Whutsuh da njan nuhwhudani whusdlah 'et whunts'ih nuhzih sída hukw'u na'a whulh nat nuhts'o k'e'aguz 'ink'ez ndun whudúsni, ndunnah lubeshi 'alh'en 'ink'ez 'onghoh tubulh ndun whudúsni hoh dzuh nutehzut, 'aw hukw'ut dihudóoya ghat'ah ho' hoont'ah. **3** Si sugha Christ yalhtuk t'ewhuntehzin, 'et huwa nuhwheni si soo zélhts'ai. 'Et huwa whuz na'a nuhwhudáni. 'Ink'ez 'alha 'en 'int'ah nuhwhuts'un lait'ah chaílah, 'ink'ez nuhtah degha nus úlhtus 'int'ah. **4** Christ 'en ye lait'ah, 'i be lhdulalhgus k'ehíylhti, 'et whunts'ih Yak'usda yé ulhtus, 'i bugha khuna. 'Ink'ez nuwheni chah, s'et whuz na'a zeh buyuzdúlt's'i whunts'i lats'ít'ah. 'Et whunts'ih ndi Yak'usda yé ulhtus nohwhulh 'ahoont'ah, 'i be ts'ukhuna. 'Et huwa Christ 'en bulh ts'ukhutena. **5** Na'oodulhúdzih! Ndi bé 'alha 'ahoont'ah, 'i bulh áht'ah k'us bu'et áht'ah, 'et 'i be nuhwhenich'oh whuná'dunulhútun. Sizi Gri nuhyuh 'int'ah, 'aw t'éoonuzáhzun ih? 'Aw soo cho nt'éoonuzáhzun t'eh, 'et tulih n'ún hutezkat ahli. **6** 'Et whunts'ih 'aw n'ún hutezkat 'aw 'en ilah 'uts'int'ah. Soo cho nduchah t'éoonáhzun.

Nuhwheni soo ts'ah'un na'a lhadínt'ah tehle, 'et whuz na'a nuhwhuba tenazdudli

7 'Et whunts'i hoontsi' 'uteht'ilh, 'et whuch'a, Yak'usda ts'un nuhwhuba tenadusdli. 'Aw nuhwhenich'oh nats'oodududzi hukw'u na'a ilah. 'Et whunts'ih nuhwheni hoonzoo k'ah ts'ih 'uteht'ilh, 'et whuz na'a nuhwhuba tenadusdli, 'et whunts'ih 'ants'i 'ún hutezkat hukw'u na'a nuhwhuba 'uts'int'ah tulih. **8** 'Et ndai 'alha' be 'ahoont'ah 'i 'aw buch'a' 'uts'oot'e ghat'ah. 'Et k'us ndai 'alha' be 'ahoont'ah 'aw 'i zeh howu yats'ulhtuk. **9** 'Et nuhwheni lats'ít'ah 'ink'ez nuhwheni ulhtus ahli t'eh, nuhwheni 'o nus ts'uhóont'i. 'Ink'ez soo ts'ah'un na'a lhadínt'ah tehle, 'et whuz na'a nuhwhuba tenazdudli. **10** 'Et huwa nuhch'a 'úst'ah hoh whuz na'a nuhts'ó k'e'usges. 'Et whuz na'a nohwhulh 'úst'ah t'eh, ndet hoh dune hubugha ndoh 'ust'ah 'et neMoodihti stl'ahó'ai, 'i be 'aw nuhdách'e ne'doosni ghat'ah. Ndi be degha ndoh 'ust'ah, 'i be 'o nus Yak'usda ba ulhtus tehle. 'I 'aw be nuhwhundóolhdah ghat'ah.

Nohwhulh 'úhot'e

11 Sulhutsinkah soo degha nus 'ún whudusni. Whunoolhnik! Soo ts'ah'un na'a lhadulya tehleh. Yak'usda k'enaíne'a tehleh. 'Ilho zeh nuhwhubeni tehle. Whudezghel, 'i be ndi yun k'ut delhúts'i. 'Ink'ez Yak'usda, ndun nek'entsi' 'ink'ez nedzi bé dezghel, 'i negha íni'ai, 'en nohwhulh 'óot'e. **12** 'Et lubeshi bughu hoolah be nalhadunoohs'oos. **13** Dune Yak'usda bube'ildzun nezih húdelhts'i, 'en chah ts'iyawh dahooja nuhowhútni. **14** Sizi Gri neMoodihti ye unzoo, 'ink'ez Yak'usda ye nek'entsi', 'ink'ez Ndoni bulh 'ilho ts'indli chah, 'et 'i ts'iyawh nohwhulh 'úhot'e. 'Et ndoh honeh.

Paul, Galatia Whut'en Hubuts'un K'e'anguz

Yak'usda ba 'ilhunahuwúdulh, Galatia yun k'ut húdelhts'i, 'en Paul dahooja hubulhni

¹ Si Paul whel'a usdli. 'Aw lhanah dune, k'us 'ilhunuh whúnts'i ilah bugha 'usja. 'Et whunts'ih Sizi Gri 'ink'ez Yak'usda ne'aBá, 'en 'int'ah Sizi yahadla hubutah dinaidilhti, 'ink'ez 'en bugha whel'a 'ust'ah. ² 'Ink'ez nelhutsinkah ndunnah suzih húdelhts'i, 'en ts'iyawh nuhwheni yun k'ut Galatia ts'ih Yak'usda ba 'ilhunahuwúdulh ahli, nuhwheni ts'iyawh dahooja nuhwhuts'útni. ³ Yak'usda ne'aBá 'ink'ez Sizi Gri neMoodihti, 'en ye unzoo, 'i 'ink'ez nuhdzi dinghel, nuhgha óoni'ai, 'i ts'iyawh 'i bulh 'óoht'e. ⁴ 'En 'uja nelubeshi bugha huwa' dudulti. 'Et hoh ndi yun k'ut ntsi' yuch'a naneuzdla. Yak'usda ne'aBá, 'et whuz na'a hukwa' ninzun. ⁵ 'Ilhuz wheni buba ts'odélhti, 'et ndoh honeh.

'Aw 'uyoo khunek unzoo 'i be yats'oolhtuk hoolah

⁶ Christ ye unzoo, 'i be dutehjih ka nuhka' dani, 'et whunts'ih 'en 'ahoh buch'a nasulhúa 'ink'ez 'uyoo khunek unzoo, 'i nahzun, 'i ts'un nasulhúa. Tube suba hooncha hoh aht'en. ⁷ 'Et whunts'ih 'aw 'uyoo khunek unzoo, 'i hoolah. Bulunah dune nuhwhuba lhtanahuhólelh hukwa' hut'en. Christ bughunek unzoo, 'i 'uts'un na'a nuhwhuba na'huyoose hukwa' hut'en. ⁸ 'Et whunts'ih nuhwheni k'us yak'uz whulizas 'en whunts'i, 'uyoo khunek unzoo, 'i be nohwhulh yats'ulhtuk t'eh, 'et t'eh ndan whunts'i 'utni, Yak'usda hoontsi' ts'ih yulh niuntezulh wule da. ⁹ Nts'e na'a nuhts'udáni, 'et doo chah zeh nuhwhuts'útni, ndi khunek unzoo, 'i 'uda ulhchoot, 'ink'ez ndan 'uts'un na'a 'un nuhwhulhni t'eh, ndan whunts'i 'utni, Yak'usda hoontsi' ts'ih yulh niuntezulh. ¹⁰ Daja nuhzun? Yak'usda tulih k'us dune tulih ba whudóolhti? Soo cho whunulh'en, dune ba uszoo na'dudulhú'i t'eh, 'et t'eh Christ be 'ulhna tesdle, 'aw oosdle gait'ah.

Yak'usda 'utahásalhti 'en ba whel'a tesdle

¹¹ 'Et sulhutsinkah njan ndun whudúsni t'eoónóhzin ka ndi khunek unzoo, 'i be nohwhulh yalhtuk, 'aw dune khunek be cha'duzusnih. ¹² 'Et 'aw ndi dune ts'un ilhchoot ilah, 'ink'ez 'aw dune whusodalh'i chah ilah, Sizi Gri 'en whusúnelhtan. ¹³ 'Et hoh da nts'e na'a si Lizwif hube 'ut'en k'ah huwaghusna inle, 'et ts'iyawh whulh 'udahts'o. Nts'ena'a ndunnah Yak'usda ba 'ilhunahuwúdulh, 'en tube dzuh nobulhdeh 'ink'ez hoolah huboolhsilh hukwa' 'ust'en. ¹⁴ 'Ink'ez sutsuh da dahánt'e 'et ts'iyawh soo cho hostun hukwa' 'est'en. 'Et hoh ndi Lizwif hube 'ut'en k'ah hubugha, ndunnah sulh hudedowh, ndunnah sunduhult'ah, 'et whunts'ih ts'iyawh huba 'o nus unzoo síli. ¹⁵ 'Et 'awhuz chadusdah da, 'et Yak'usda ba hoonzoo hoh 'utahásalhti 'ink'ez ye unzoo, 'i be dutesjih ka ska' dani, ¹⁶ 'ink'ez buYe' yusunelhtan. 'Et 'en bugha 'udun yun k'ut whut'en, 'en ndi khunek unzoo, 'i be hubulh yátelhtuk ka. 'Et hoh da sulh 'et dúhooja hoh 'et 'awhuz 'uyoon dune ts'un huwu yachalhtih hoh ¹⁷ ndoh Jerusalem ts'ih whunts'i chatúsal hoh ndunnah sutsuh whel'a hinli, 'en hubulh yachalhtih. 'Et whunts'ih yun k'ut Arabia whuz whéya. 'Et hukw'elh'az doo chah zeh keyah Damascus ts'ih lhghu nadusja.

Nts'e na'a dat'en keyah whuti Jerusalem ts'ih

¹⁸ 'Et tat naooduzuk hukw'elh'az, 'et nde Jerusalem ts'ih whéya. Peter 'en buzih tesdalh hukwa' nuszun 'ink'ez 'et lanezi 'o 'at skwunlat dzin buzih ída.

¹⁹ 'Et 'onghoh whel'a 'en 'aw chabus'il. NeMoodihti bulhutsin James, 'en zeh nalh'en. ²⁰ 'Ink'ez ndi nuhts'o k'e'águz, 'i, Yak'usda nalh 'un whudúsni, 'aw chaoozústs'it. ²¹ 'Ink'ez 'et hukw'elh'az yun k'ut Syria 'ink'ez Cilicia, 'ahoh hoh nusíya. ²² Judea yun k'ut 'et, ndunnah Christ ba 'ilhunahuwúdulh, 'en 'awhuz chasuhes'en. ²³ 'Ants'i ndez na'a zeh sulh 'uhudants'o, "Ndunah hoh da dzuh nunenulhdzut inle, 'en 'aw 'et ndi be 'alha 'uhoont'ah bugha, ts'iyanah khunek unzoo, 'i be hubulh yalhtuk suli, ndi khunek unzoo 'uda hoolah yoolhtsilh hukwa' yalh'en whunts'i." ²⁴ 'Ink'ez si sugha Yak'usda hudélhti.

2

Khunek unzoo, 'i soo ts'ah'un na'a bughu yaoolhtuk

¹ 'Et lanezi 'o 'at dit naooduzuk hukw'elh'az, Barnabas bulh doo chah ndoh Jerusalem ts'ih nahutest'az. Titus 'en chah nayílchoot 'ink'ez nelh tez'az. ² Senen hawhélts'ut, 'et huwa doo chah Jerusalem ts'ih nunásusja hoh Jerusalem whut'en nduhoolcho 'obudáni. Nts'e na'a ndi khunek unzoo, 'i be ndunnah 'udun yun k'ut whut'en hubulh yalhtuk, 'et nduhoolcho ndo budáni. 'Ink'ez ndunnah ncha hinli, 'en whu'iz 'et hubulh yalhtuk. 'Et hoh 'aw 'ants'i 'et cha'úst'il whuzdli. ³ 'Et whunts'ih Titus, ndun sulh 'ut'en, 'en Greek whut'en unli, 'et whunts'ih 'aw yuka dune unli, 'i hitet'us whuts'un chahinilht'uk. ⁴ Ndez na'a njan dúhooja, bulunah, 'en nelhutsinkah na'hududil'i. 'En nunút'i be netabonínla. Neghu hoole ka dats'int'ah hoh dune ts'inli. Dáhoont'ah 'et Sizi Gri 'en bugha Moses be' dustl'us whuch'a whulazdetnik. Nuwheni doo chah zeh Moses be' dustl'us k'ut 'i be 'ulhna k'una'a nehoolhtsilh hukwa ne'hulh'en 'et huwa. ⁵ 'Et whunts'ih ndunt'ah dune, 'aw 'ilhuh hukw'e'huntet'oh buk'ah 'ahuntét'oh whunts'ih hubutl'a' dudoolhútelh ghat'ah. 'Et huwa ndi khunek unzoo, 'i be 'alha 'uhoont'ah 'i be whuz na'a zeh 'ooht'e. ⁶ 'Et ndunnah hincha unli hubuts'utni, 'en lhugha zeh 'obulh'en. Ndunnah hinli dahint'ah, 'et whunts'ih suba dachahit'ah. Yak'usda nalh lhulhúgha zeh 'uts'int'ah 'et huwa. ⁷ 'Et whunts'ih nts'e na'a Peter ndi khunek unzoo, 'i yutl'aidá'ai hoh 'i be ndunnah dune yuka dune unli, 'i k'ut hiyuzt'us hiyúlhni, 'en hubulh yatelhtuk ka, 'et whuz na'a si chah ndi khunek unzoo, 'i stl'aida'ai. 'I be 'udun yun k'ut whut'en hubulh yaóolhtuk ka. 'Et huwa ndunnah ncha, 'en ts'iyawh ts'ah'un na'a t'ehonanzin. ⁸ Nts'e na'a Yak'usda, 'en Peter ndunnah Lizwif huba whel'a yulhtsi, 'et whuz na'a si chah 'udun yun k'ut whut'en huba whel'a sulhtsi 'et huwa. ⁹ 'Et huwa James, Cephas, 'ink'ez John, 'en buts'utni keyah whuduchun hinli, 'et ts'ah'un na'a t'ehonanzin, ndi ye unzoo 'et stl'ahó'ai, 'et huwa Barnabas 'ink'ez si chah nela nahúz'ai. 'Et 'i be ts'iyanah whenéhantelhtan, nuwheni 'ink'ez James, Cephas 'ink'ez John chah lhulh 'uts'int'ah zeh hubúznedulh. Nuwheni 'udun yun k'ut whut'en hubuts'úztedulh, 'ink'ez ndunnah 'en Lizwif hubuts'á tedulh. ¹⁰ Ndan tehel'en, 'en hubunaztelnih, 'et whuz na'a zeh hukwa' huninzun. 'Et si chah whuz na'a zeh hukwa' nuszun.

Moses be' dustl'us 'aw doo chah buk'une' ts'oot'en huba cha'hóot'ah

¹¹ 'Et Peter hoh da keyah Antioch nusíya hoh tink'us 'uja. 'Et huwa soo bunen ts'un 'ídani. ¹² James 'en ndunnah hiyulh 'uhut'en, keyah Antioch nehútedulh whutsuh, 'et Peter 'ahoolhyez 'udun yun k'ut whut'en hubula 'a'alh. 'Et whunts'ih James hiyulh 'uhut'en whusahádel hoh, 'et Peter hubuch'a nasja, ndunnah Lizwif hube nuljut 'et huwa. ¹³ 'Ink'ez 'onghoh Lizwif, duba nahududzoo hoh 'en chah Peter bulh hubuch'a nahusdel. 'Ink'ez Barnabas, 'en whunts'i, hinalh nduhút'en 'ink'ez 'en chah hubundul'en suli. ¹⁴ Ndi khunek unzoo, 'i 'alha 'int'ah 'i daja ni, ndunnah Lizwif 'aw ts'ah'un hik'únucha'ust'en. 'Et nahoo'ai hoh, ts'iyanah nalh 'et hukwa

Peter njan ndúdusni, "Nyun Lizwif 'unint'ah 'et whunts'ih 'udun yun k'ut whut'en k'una'a ndi yun k'ut inda. 'Ink'ez di ka 'udun yun k'ut whut'en Lizwif k'una'a dune hoole hukwa' bilh'en? ¹⁵ Nuwheni Lizwif ts'inli hoh ts'uwhuzdli. 'Aw 'udun yun k'ut whut'en lubeshi 'uts'uleh k'una'a cha'ts'ít'ah. ¹⁶ T'ets'onínzun Moses be' dustl'us 'i bugha 'uts'ut'en t'eh, 'aw ts'ah'un dune chats'ilah. Sizi Gri neba 'alha 'int'ah 'et huwa whuz na'a zeh ts'ah'un dune ts'inli 'et t'ets'oninzun. 'Ink'ez nuwheni Sizi Gri 'en neba 'alha 'int'ah unli 'et hoh njan Christ neba 'alha 'int'ah, 'et 'i be ts'ah'un dune ts'uzdli. Moses be' dustl'us k'une' ts'ut'en t'eh, 'aw 'et huwa ilah ts'ah'un dune ts'uzdli. Moses be' dustl'us k'une' 'uhut'en, 'et 'aw 'ilhunuh whunts'i ts'ah'un na'a cha'hínil 'et huwa. ¹⁷ 'Et whunts'i nuwheni Lizwif, Christ 'en bugha ts'ah'un dune ts'oole 'et hukwa' 'uzninzun t'eh, 'ink'ez nats'uhoo'ai 'awhuz lubeshi 'uts'ulh'en ts'inli t'eh, 'et Christ 'en chah ih lubeshi ts'un nuhwhúnilt'uk unli? 'Et 'aw 'uhót'e għait'ah! ¹⁸ 'Et ndi Moses be' dustl'us k'ut 'udun niníla 'ink'ez doo chah zeh nalhúchoot 'ink'ez buk'une' test'en t'eh, 'et t'eh khunek lhk'uniyuz ho' test'ilh. ¹⁹ Moses be' dustl'us k'ut, 'ants'i 'i be dasítsai li'ust'ah, 'aw 'o 'at buk'únucha'tuzest'il. 'Et whuz na'a Yak'usda ba khutesna. ²⁰ Christ lhdulalhgus k'ut bulh dasítsai li'ust'ah, 'et 'aw 'o 'un chakhúsna li'ust'ah, 'et whunts'ih Christ syudinda. 'Ink'ez ye khuna, 'i be khusna. Yak'usda buYe' suba 'alha 'int'ah, 'et 'i bugha ndi yun k'ut khusna. 'En 'uja sk'ents'i k'et suba whutl'a' dudelti. ²¹ Ndi Yak'usda ye unzoo, 'i 'aw 'udun nioos'ah għait'ah! 'Alha Moses be' dustl'us k'ut, 'i be ts'ah'un dune ts'oole għait'ah. 'Et whuz na'a 'uhoont'ah t'eh, 'et Christ 'ants'et hoh neba dazsai li'whutet'ilh," Peter 'et ndudúsni.

3

Be 'alha 'uhoont'ah, 'i be zeh Yak'usda nalh ts'ah'un dune ts'uzdli

¹ Nuhwheni Galatia whut'en whuzahnik! Ndán duyún nest'i hoh nuhnána ndi khunek 'alha 'int'ah buk'unucha'zooh 'en ka? Nuhwhenich'oh Christ lhdulalhgus k'ut neba dazsai, 'ants'i whunulh'en li'hoont'ah. 'Et whuz na'a nuhwhuba be hóodet'en. ² Ndi 'aw 'i zeh nts'un nt'ewħun teħzeh hukwa' nuszun.

Nts'e na'a Ndóni nuhyudélts'ut? Moses be' dustl'us buk'une' 'uht'en, k'us ndi be 'alha 'uhoont'ah nuhwhuba whulhúdahts'o tulih? ³ Whuz na'a stabe whuzahnik! Ndóni 'en be whe' daht'en. 'Ink'ez k'an 'et nuhyust'e dálh'en, 'et whuz na'a ts'ah'un lhadulhúya tehleħ, nahzún ih? 'Awundooh! ⁴ Nuhwheni lhat hoh dzuh nusahde ho' hoont'ah. 'Et ndúwhulcho hoh 'ants'i 'uhoont'ah nahzun ih? 'Et 'alha 'ants'i nuhwhuba 'uwhutét'ilh nahzun ih? ⁵ 'Et huwa Yak'usda 'en 'int'ah Ndóni nuhyeída'ai 'ink'ez nuhtah huwa 'et 'en tune' 'ut'en. Nts'e na'a 'uhoonla? Moses be' dustl'us buk'une' 'uht'en k'us ndet whudáhts'o nuhwhuba 'alha 'uhoont'ah? ⁶ Abraham, 'en chah, nts'e na'a Yak'usda yuba 'alha 'int'ah hoh Yak'usda 'en Abraham ts'ah'un dune unli yúlhni, ⁷ 'Et t'ewħunoohzeh, ndan be 'alha 'uhoont'ah hit'i, 'aw 'en zeh Abraham buzkeh hinli. ⁸ Yak'usda bughunek ndet nus de dawħútenilh, 'et whunénuhtun. Be 'alha 'uhoont'ah 'i be Yak'usda ndunnah 'udun yun k'ut whut'en, 'en ts'ah'un 'int'ah hubutelhtsilh. 'Et whutsuh 'uwhuténilh, 'et Yak'usda 'en Abraham njan ndúyulhni, "Nyun ngha ndunnah 'udun yun k'ut whut'en, 'en ts'iyawħ dáwhulzoo hubugha whútels'ulh." ⁹ 'Et huwa ndez na'a njan dúhoont'ah, Abraham, 'en Yak'usda yuba 'alha 'int'ah 'et huwa degħha nus hoonzoo hubugha whults'ut. 'Ink'ez ndan Yak'usda buba 'alha yint'ah, 'en chah whuz na'a zeh njan degħha nus hoonzoo hubugha whútels'ulh.

Moses be' dustl'us, 'i be 'aw dune Yak'usda nalh ts'ah'un wule għait'ah

10 'Et ndan Moses be' dustl'us yut'anihunintan, 'ink'ez ndi khunek k'uhíninyuz t'eh, 'et t'eh Yak'usda hoolah hubutelhtsilh. 'Et whuz na'a 'uk'e'edúguz hoh ndutni, "Moses be' dustl'us, ndai yuk'e'ánguz, 'i ts'iyawh hik'une'oot'en huba 'ohoont'ah. Ndunnah ts'iyawh hik'unucha'ust'en t'eh, 'et t'eh ndet hoolah ubutelhtsilh, ts'iyanaah hote'ilh." **11** 'Ink'ez soo ts'ih'un 'ohoont'ah, ndi Moses be' dustl'us, 'i be 'aw dune Yak'usda nalh ts'ah'un 'uhoot'e ghaít'ah. 'Et Yak'usda bughunek njan ndutni, "Ndunnah ts'ah'un na'huja, 'en be 'alha 'ohoont'ah, 'i be hukhutena." **12** 'Et whunts'i ndi Moses be' dustl'us, 'i, be neba 'alha 'ohoont'ah 'aw 'i bugha ilah. 'Et whunts'i ndan dune Moses be' dustl'us yuk'une' 'ut'en t'eh, 'i be whuz na'a ndi yun k'ut hukhutenalh. **13** Ndán Moses be' dustl'us k'ahunyis, 'en hoolah wule huba' hoont'ah. 'Ink'ez 'et whuch'a Christ nenaonket. Ndet hoolah netelhtsilh dich'oh neba k'éhoo't'ah. 'Et whuz na'a 'uk'e'edúguz hoh ndutni, "Ndun duchun yundunilt'o, 'en hoolah tele ho' 'int'ah," ni. **14** 'Et huwa Abraham dawhuldzoo bughá whults'ut, 'udun yun k'ut whut'en, 'en chah Sizi Gri bugha húbugha whútelts'ulh. 'Et whuz na'a ne'aBá Ndoni 'en nets'u yoozi. 'Et neba 'alha 'ohoont'ah, 'i be Ndoni neyudoolts'it ka.

Yak'usda ndi khunek neba lhaidínla, 'i, 'aw 'ats'un na'a na'hótneh ghaít'ah

15 Sulhutsinkah ndi yun k'ut hubube 'ut'en k'ah, 'et hubugha nohwhulh yalhtuk. Ndán dune khunek yutl'aida'ai, 'i 'aw 'uyoo khunek yutaoodoo'ah k'us yutahanaho'ah ghaít'ah. **16** 'Et Yak'usda Abraham 'ink'ez buts'un hayánzut, ndai ye yuts'u náhezya, 'aw 'en zeh 'ink'ez buts'un hayánzut, 'en zeh buts'ú yoozi. 'Aw Abraham ts'u haínde, 'en ilah 'ubodusni. 'Aw lhanah ilah 'ulhni. 'Et whunts'ih Yak'usda 'ilhunuh dune zeh yughu yalhtuk ho' 'utni. 'Et whuz na'a 'udéja hoh Abraham, "Nts'u haínzut," yúlhni. 'Ink'ez ndun Christ 'en Abraham buts'un hainzut 'int'ah. **17** Daja nuhwhudusni, 'et ndi khunek yutlaída'ai, 'uda Yak'usda Christ bulh lhahódinla ho' hoont'ah. 'Et 430 be naooduzuk hukw'elh'az 'et Moses be' dustl'us 'uk'une'usdúguz. 'Et whunts'i Yak'usda njan Abraham khunek yutl'aída'ai, 'i, ndi khunek ye yuts'u náhezya, 'aw hoolah nahoolhsilh ghaít'ah. **18** 'Et whuz na'a ndi Yak'usda yit'i, 'i, 'et Moses be' dustl'us bugha ilah hoh dune hubugha ítelelh. 'Et nduhoont'ah t'eh, 'aw ye nets'unahezya 'i bugha ilah dune hubugha ítelelh. 'Et whunts'i Yak'usda ndi yit'i, ye nets'unáhezya 'i be Abraham 'i yugha ooní'ai.

Moses be' dustl'us 'i ndet huba unzoo?

19 'Et ndi Moses be' dustl'us ndet huba unzoo nahzun? Tinta 'uts'ut'ih 'et whuch'a neba 'uhóonla. 'Ink'ez nket'ah 'uwhuténih hoh whusawhútelts'ulh, Abraham buts'un hayánzut whusateyalh, 'et whuts'un ndi Moses be' dustl'us neba 'uhóonla. 'Ink'ez ndun yuts'u hainzut, ndi yé nets'u nahezya, 'i, 'en gha 'ohoont'ah. 'Ink'ez 'et ndun dune yeguz unli, 'et lizas daja hidáni, 'en chah 'o 'un ndo bódani. **20** 'Et ndan dune yeguz unli, 'aw 'ilhunuh zeh ba cha'ít'ah. 'Et whunts'ih Yak'usda 'en 'ilhunuh zeh unli. **21** Daja nahzun? Ndi Moses be' dustl'us 'ink'ez Yak'usda Abraham ndi ye yuts'u nahezya, 'et lhghe 'uts'un na'a ih 'int'ah? 'Awundooh! 'Et whunts'ih Moses be' dustl'us daja ni, 'et butl'a hó'ai, 'et 'i be dune 'ilhuz wheni hukhutena t'eh, 'et t'eh 'alha Moses be' dustl'us 'i be dune ts'ah'un na'a 'uhint'ah hutele inle. **22** 'Et whunts'ih Yak'usda bughunek njan ndutni, ts'iyanaah dune lubeshi bulh 'uhint'ah. 'Et huwa ndi ye hubuts'u náhezya, 'i be ndunnah Sizi Gri buba 'alha' yint'ah, 'aw 'en zeh hubugha whútekulh. **23** 'Et whunts'ih ndi be neba 'alha 'ohoont'ah uztet'ilh whutsuh da, 'et Moses be' dustl'us 'i be ts'ak'ezdanla li'ts'ant'e. 'I be duts'o nehlhtsi, nket'ah be neba 'alha 'ohoont'ah buneunteltun 'et whuts'un. **24** 'Et whuz na'a ndi Moses be' dustl'us nehodalh'i inle, 'ink'ez Christ ts'un netezdla. 'Et huwa be neba 'alha 'ohoont'ah 'i be ts'ah'un dune

ts'ooke ka. ²⁵ 'Aw 'et be 'alha 'uhoont'ah ts'it'i. 'Et huwa ndi whuneodalh'i i 'aw 'o 'un buk'uone' ts'oott'en huba cha'ít'ah.

Nuhwheni ts'iyawh Christ, Sizi ts'utni, 'en bugha Yak'usda buzkeh ahli

²⁶ 'Et nuhwheni ts'iyawh Christ, Sizi ts'utni, 'en bugha 'et be neba 'alha 'uhoont'ah, 'i be Yak'usda buzkeh ahli. ²⁷ 'Et nuhwheni nuhtah ndunnah Christ ba too be 'ulya, whuz na'a bulh 'áht'ah sahli. ²⁸ 'Et huwa 'aw 'o 'un Lizwif k'us 'udun yun k'ut whut'en hoolah. 'Ink'ez 'aw 'o 'un 'ulhna k'us 'ulhna ch'a hubula nahudetnik chah hoolah. 'Ink'ez 'aw 'o 'un dune k'us ts'ekoo chah hoolah. Nuhwheni ts'iyawh Christ, Sizi ts'utni, 'en bulh 'ilhunuh 'aht'ah. ²⁹ 'Et Sizi Gri budune ahli t'eh, 'et Abraham ts'un hainde chah ahli. 'Ink'ez ndi Yak'usda Abraham ye yuts'u náhezya, 'i bugha ts'iyawh nuhts'un whutekulh.

4

Dune 'awhuz 'uski unli t'eh, 'ants'i 'ulhna unli li'int'ah, 'et whunts'ih 'ilhudzin t'eh moodih tele

¹ 'Et ndez na'a 'ún whudusni, ndan lhk'echaniyel, 'en 'awhuz 'uski unli t'eh, 'ants'i 'ulhna unli li'int'ah, 'et whunts'ih 'ilhudzin t'eh moodih tele. ² 'Et nket'ah ba'abá yuba hoozi whusawhútelts'ulh 'et whuts'un, ndunnah highundli 'ink'ez koo huwuhindli, 'en 'awhuz highunli. ³ Nuwheni chah whuz na'a zeh 'et nduts'ánt'e. 'Uskeh k'una'a nduts'ínt'ah hoh nduts'ant'e. Ndi yun k'ut hube 'ut'en k'ah ne'ts'ust'en. 'Et huwa ndi yun k'ut 'ulhna ts'anle. ⁴ 'Et whunts'ih 'aw 'et whusawhélts'ut hoh Yak'usda buYe' whusayálh'a. Ts'eke bugha whuzdli, Moses be' dustl'us yuk'úne' tet'en ka. ⁵ 'Et whuz na'a 'en ndunnah Moses be' dustl'us k'úne' 'uhut'en, 'en ts'iyawh naoobonket. 'Et whuz na'a nuwheni neba tl'ananets'anla li'ts'uja hoh Yak'usda buzkeh ts'ooke ka. ⁶ 'Ink'ez Yak'usda buzkeh sahli. 'Et huwa Yak'usda buYe' buyégha, 'en nuhts'un whusayálh'a, nuhdzi yuh wuda ka. Tube cho "Abba" ni. Ne'aBá ni hoh 'utni. ⁷ 'Et huwa 'aw 'o 'un 'ulhna cháhlah, k'us 'en buzkeh sahli. 'Ink'ez buzkeh sahli t'eh, 'et t'eh Christ 'en bugha Yak'usda yit'i, 'i nuhwhe'ildzun tele.

Paul Galatia whut'en ubulhni, "Et nuhwhuba whénlhujut! Ndet hoh da nuhwhuba 'uwhúsdla, 'et 'ants'i 'est'en whutele."

⁸ 'Et whunts'ih niz de whudezulh da 'aw Yak'usda t'echanuzahzun inle. Bulunah 'ants'i Yak'usda la'dadil'i, 'et whunts'i 'aw Yak'usda chahílah, 'en whunts'i buba 'ulhna aht'ah inle. ⁹ 'Ink'ez k'an 'aw 'et Yak'usda t'enehzin, k'us ndez na'a tulih 'udoosni, Yak'usda nuhwheni ts'iyawh soo cho t'enwhunanzin. 'Et di ka nuhwheni doo chah ndai ndi yun ye lait'ah 'i, 'ink'ez ndai chaízooh, 'i ts'iyawh buts'un naoohlúyeh hukwa' aht'en? Ndi doo chah zeh be 'ulhna tehleh hukwa' nahzun ih? ¹⁰ Lhe'aht'en! Whulutah dzin, sanun teh, 'ink'ez nts'oh whegha whudezulh, k'us nts'oh naoodezulh chah, 'i ts'iyawh nuhwhuba whudézti duhni! ¹¹ 'Ants'i 'et tulih tube nuhwhuba 'est'en, 'et huwa nuhwhuba whénlhujut. ¹² Sulhutsinkah nuhwheni nuhts'u tedusdliah sk'una'a 'ooht'e ka. Nuhwheni si nuhk'una'a 'ust'ah 'et huwa. 'Aw chasúndulhdal. ¹³ T'eoonaahzun ndai bé suyust'e lait'ah, 'et huwa soo 'udechoo ndi khunek unzoo, 'i be nohwhulh yalhtuk inle. ¹⁴ 'Ink'ez nts'e na'a suyust'e be dzuh nusízut, 'et whunts'ih nduhoohcho nuhwhuba dachahoot'ah. 'Et huwa 'aw tichasunahyulh. 'Et whunts'ih Yak'usda bulizas usdli nuhwhuba li'ust'ah. 'Et whuz na'a nuhkoo ts'ih dasunulhti. Christ, Sizi ts'utni, 'en nuhwhuba li'ust'ah, 'et huwa 'anah sudahni. ¹⁵ Ndet hoh ndi 'uk'enus hoonzoo nuhwhugha whults'ut? 'Et dáhooja? Ts'ah'un na'a 'un whudusni, 'et whuz na'a da 'oohneh, nuhna hanéhla 'ink'ez da sugha nóohlelh suna natelhtsilh ka. ¹⁶ 'Et dahooja? Ts'ah'un na'a 'ún whudusni. 'Et huwa nuhch'a nideya nahzun ih? ¹⁷ 'Et 'uyoon nunút'i be khanhonoot'ah hukwa' hut'en, hubuts'un

nenádoohdelh ka. 'Et hoh nuhwheni nuhwhuba hincha na'hudutel'i 'et hukwa' hut'en. ¹⁸ 'Et whunts'ih ndet ts'ah'un 'ohoont'ah, 'et zeh soo cho hukwa' aht'en nohwhulh 'ust'en k'us 'aw nohwhulh cha'zust'en 'et whunts'ih. ¹⁹ Suzkehka nket'ah whusaootelts'ulh soo ts'ah'un na'a Christ nohwhulh 'utet'ilh 'et whuts'un, 'ants'i ski ka sulh 'ults'ulh nuhwhuba li'ust'ah. ²⁰ K'an 'et 'aho nohwhulh 'utest'ilh hukwa' nuszun. 'Et khunek be 'o nus hoonzoo hukw'u na'a nohwhulh yaooltuk. Nohwhulh nawh 'unuszun 'et huwa.

Nanah ts'ekoo, Sarah 'ink'ez Hagar, 'en nawh hukw'u na'a khunek neba tl'aida'ai, 'i hinli li'hint'ah

²¹ Nuhwheni ndan ahli Moses be' dustl'us buk'une' teht'en hukwa' nuhzun ka, 'et ts'ah'un na'a 'usudúhni, ndi Moses be' dustl'us daja ni, soo ts'ah'un na'a t'eeonúhun ih? ²² Ndez na'a 'uk'e'anguz 'et njan ndutni, Abraham nanah buzkeh buyekah, 'ilhunuh, 'en ts'eke hubunane'út'en, 'en buyaz. 'Ink'ez 'ilhunuh ts'eke 'aw hubunane'út'en chaílah, 'en buyaz. ²³ 'Et ndun ts'eke hubunane'út'en buyaz, 'en neyust'e k'ah ts'ih whuzdli. 'Et whunts'ih ts'eke hubunane'út'en chailah buyaz, 'en nts'e na'a Yak'usda 'en Abraham yuts'ú hoozi, 'et hukw'u na'a whuzdli. ²⁴ 'Et ndi 'i ts'iyawh bugha ne'ts'ut'en, 'i neba unli. Njan dahoont'ah hoh ndunnah ts'ekoo 'en nawh hukw'u na'a khunek neba tl'aida'ai, 'i hinli li'hint'ah. 'Et 'udechoo ndi khunek neba tl'aída'ai, 'i dzulh Sinai ts'un hadelts'ut, 'i 'int'ah. 'Ink'ez ndunnah 'et huwhuzdli, ts'iyawh 'ulhna hinli. 'Ink'ez ndi khunek neba tl'aída'ai, 'i ndun ts'eke hubunane'út'en Hagar hiyulhni, 'en k'una'a 'int'ah, ni ho 'utni. ²⁵ Ndez na'a njan dúhoont'ah, ndun ts'eke Hagar, 'en ndi dzulh Sinai, yun k'ut Arabia ts'uwhutni, 'et whuz na'a 'int'ah. 'Ink'ez njan keyah Jerusalem, 'et ndun Hagar k'una'a 'ohoont'ah. Njan keyah, 'et 'ulhna keyah 'ohoont'ah. 'Ink'ez ndunnah 'et huwhuzdli, 'en ts'iyawh 'ulhna 'uhint'ah. ²⁶ 'Et whunts'ih 'udun keyah ts'ih 'et chah Jerusalem ts'uwhutni. 'Et nduk yak'uz 'ohoont'ah. 'Et 'ulhna keyah cha'hoot'ah 'ink'ez nuwheni ts'iyawh njan keyah newhe'ama 'ohoont'ah li'hoont'ah. ²⁷ Et njan keyah ndez na'a njan duhoont'ah hoh Yak'usda be dustl'us k'ut 'et ndutni,

"Whunélnik ts'eke!

Nuwhúzkeh hoolah.

Nyun 'int'ah 'aw nuwhúzkeh hóle ghat'ah.

'Aw nyaz whutele hukw'u na'a whéchadintnih.

'Aw 'et k'an 'et hotánt'i! Tube cho hoonínt'i!

Ndun ts'eke buzkeh hoolah, 'en buzkeh hooni,

degha nus buzkeh lhai tele 'et huwa," ni.

²⁸ 'Et sulhutsinkah, nuwheni chah Isaac k'una'a 'uts'int'ah. Nuwheni chah ndet Yak'usda Abraham yuts'u hoozi, 'i bugha buzkeh ts'inli. ²⁹ 'Et whunts'ih hoh da ndun ts'eke Hagar, 'en buye' neyust'e k'ah ts'ih whuzdli, 'en ndun Sarah buye', 'en Ndoni ye ulhtus, 'i be whuzdli, 'et ndet huwa dzuh nuyulhdzut, 'et k'an 'et dzin 'awhuz 'et zeh neba ndúhoont'ah. ³⁰ 'Et whunts'ih Yak'usda be dustl'us daja ni? 'Et ndez na'a Sarah Abraham njan duyulhni, "Et ts'eke hubunane'út'en, buye' bulh tenabunenyoot. 'Alha ndun ts'eke hubunane'út'en buye', 'aw buts'e'tookat ghat'ah. Si ts'eke hubunane'út'en chasdlah, si suye' 'en zeh buts'e'tookat wule," yulhni. ³¹ Sulhutsinkah 'aw 'et njan nuwheni 'aw ts'eke hubunane'út'en buzkeh chats'ilah. 'Et ts'eke hubunane'út'en chaílah, 'en buzkeh 'uts'int'ah.

5

Christ 'en bugha 'ulhna buch'a nelaoodeetnik 'i be soo cho whulh nudoolhúya

¹ 'Et huwa Christ 'en bugha 'ulhna hubuch'a nelaoodeetnik, 'i be soo cho whulh nudoolhúya. 'Aw 'o 'at 'ulhna k'una'a walhúghel gunih. ² Soo zelhts'ai.

Paul si 'ust'ah hoh njan ndun whudusni, 'et nuhwheni buka dune ahli, 'i k'ut nuhotet'us t'eh, ndet Christ nuhwhuba 'uhoonla, 'aw hoonli nuhwhuba hole ghaít'ah. ³ Doo chah zeh ndi whenwhuntelhtun. Ndán dune yuka dune unli, 'i k'ut hiyúzt'us t'eh, 'et ndunt'ah dune, 'en Moses be' dustl'us, 'i ts'iyawh yuk'une' oot'en huba' hoont'ah. ⁴ Nuhwheni ndunnah ndi Moses be' dustl'us 'i be Yak'usda nalh ts'ah'un na'a 'ooh't'e hukwa' aht'en t'eh, 'et t'eh Christ buch'a nasulhúye hoh aht'en. Ye unzoo, 'i chah buch'a náhkat hoh 'ahja. ⁵ Ndoni bugha ndi be 'alha 'uhoont'ah, 'i be zeh nuwheni buka tsi ts'úhooli hoh ts'ah'un na'a dune ts'oole ka, 'et whuba ts'ilh'i 'et huwa. ⁶ 'Et nuwheni ts'iyawh Christ, Sizi ts'utni, 'en bulh 'uts'int'ah t'eh, 'et t'eh yuka dune unli, 'i k'ut hiyuzt'us, k'us 'aw chahiyít'us, 'et 'aw 'ants'i 'uhoont'ah. 'Et whunts'ih be neba 'alha 'uhoont'ah 'et zeh hooncha ho' hoont'ah. 'I bugha 'o nus lhk'ets'oodútsi'. ⁷ Soo ulhúwus inle! Ndán bugha njan khunek 'alha 'int'ah buch'a nasahdel? ⁸ Ndán nuhwhulhgooh, 'et Yak'usda 'aníh nuhwhulhni, 'aw 'en buts'un ilah 'int'ah. ⁹ Ndi ntsolyaz lhes untuldoh, 'i bugha ndulhcho untuldoh. ¹⁰ NeMoodihti suba 'alha 'int'ah 'aw 'uts'un na'a 'unoohzin ghaít'ah. Ndán dune tink'us nuhnílht'uk, 'en ndán unli whunts'i, Yak'usda yuba nahuteyeh. ¹¹ 'Et sulhutsinkah ndi buka dune ulhli, 'i 'awhuz hiyoot'as dusni t'eh, 'et di ka 'awhuz hukwa dzuh nusulhdzut? Nk'acha whuz na'a howu yalhtuk t'eh, 'et Sizi Gri lhdulalhgus k'ut dazsai howu yalhtuk, 'aw da buba dzuh cha'duzoosnih wule da. ¹² Ndunnah tink'us nuhnílht'uk, 'en dich'oh únchah na'hududoout'us. ¹³ Sulhutsinkah whunulh'en, Moses be' dustl'us hik'úne' 'ust'en whula nahudutetnih ahli ho' aht'ah. 'Et hoh Yak'usda nuhoozi. Ndi hoh whula nadetnik 'et whaht'i, 'et whunts'ih soo cho khohdle. Nuhyust'e tinta' tet'ilh, 'et whuts'u nínt'uk t'eh, 'et hólchoot gunih! 'Et whunts'i be nék'ets'ints'i, 'i be lhuba ne'óoh't'en. ¹⁴ Moses be' dustl'us daja ni 'et nduhóolcho 'ilho khunek be lhaoooduja, ndi khunek 'et ndutni, "Nts'e na'a nyunch'oh k'enaindutsi", whuz na'a nyulh dune chah hubuk'eoontsi", ni. ¹⁵ 'Et whunts'ih 'ants'i lhika k'una'a lhehdulh t'eh, doo ka si tinta' lhoolhú'en. 'Et whuch'a soo cho huwohle!

Ndoni 'en be ndi yun k'ut delhúts'i

¹⁶ 'Et njan 'ún whudusni, Ndoni 'en be ndi yun k'ut delhúts'i. 'Et huwa nuhyust'e 'uts'un nóot'uk ghaít'ah. ¹⁷ 'Et neyust'e whuts'un nint'uk, 'i Ndoni buch'a ts'unínt'uk. 'Et doo chah Ndoni nets'un nint'uk, 'i neyust'e whuts'un nint'uk ho' 'int'ah. 'Et hoh lhch'a húhool'i. 'Et huwa nts'e na'a hukwa' nahzun, 'et whunts'ih 'aw whuz na'a ndohnéh ghaít'ah. ¹⁸ 'Et Ndoni 'en zeh k'úne' nuwhul'en t'eh, 'et t'eh Moses be' dustl'us daja ni, 'aw 'o 'un k'úne' nuhool'en ghaít'ah. ¹⁹ 'Et neyust'e be 'ut'en k'ah, 'et nduhoolhcho t'ets'oninzun. 'Ink'ez ndez na'a njan nduhoont'ah. 'Uyoon 'at bulh tinta' ts'ut'ih, k'us lhghu chahídukah, 'en hubulh tinta' ts'ut'ih, k'us lubeshi dutsun, 'i 'uts'ulh'ih. 'Ink'ez 'ahoolhyez dune k'us ts'ekoo bulh lubeshi 'uztelikh whuts'un ts'unint'uk. ²⁰ 'Et 'uk'edéltsi neba 'alha 'int'ah chah, 'ink'ez dune dezdulih chah. Ts'iyawh lhts'uzdutnik, 'ink'ez lhch'a ts'one'l'i. 'Ink'ez lhghe' ts'oollníh 'et whé neba dzuh. Whenich'oh nek'una'a zeh 'uts'et'ilh. 'Et lhelhts'un 'uts'int'ah hoh 'ilho hudédoch, nuwheni ts'iyawh whenich'oh nek'una'a 'onghoh whubuts'odulh'eh t'eh. ²¹ 'Uyoon dune yit'i ka' uzninzun 'ink'ez dune ts'ughan. Taznutnai 'ink'ez ts'iyaintsuk hoh hoontsi' tune' ts'ut'en. Ndi ndunt'ah, 'ink'ez ndet tink'us neyust'e whuts'u nint'uk, 'et whutsuh 'un whudusni, whuz na'a 'uda chah ndun whudani. Ndunnah 'et ndúhoont'ah tune' 'út'en, 'aw Yak'usda whuhubudayi cho unli, 'et 'aw butl'a hólts'it ghaít'ah. ²² 'Et whunts'ih ndi 'ut'en Ndoni be 'uts'ulh'en, 'i 'int'ah, be lhk'ets'udutsi', 'i be ts'onéhnik, 'i chah, be nedzi dezghel 'i chah. 'Ink'ez

sa hoh hoonli tachats'odinik, 'ink'ez 'uyoon ts'un ts'ínzoo 'i chah. 'Et ndai ts'iyaantsuk unzoo, 'i 'uts'ulh'en, Yak'usda neba 'alha 'int'ah, 'i chah. ²³ 'Uyoon gha nagoostl'iyaz chah, 'ink'ez k'ah 'uzdunult'uk. 'Et nduts'int'ah, 'et t'eh 'aw hoonli nek'eholts'it hoolah. ²⁴ 'Ink'ez nuwheni Christ bube'ildzun ts'inli, 'et nduhóont'ah neyust'e lubeshi ts'un nint'uk, 'ink'ez 'ants'i lubeshi 'uts'oolh'en hukwa 'uzninzun, 'et njan ts'iyawh lhdulalhgus whe uzdunilht'o. ²⁵ Ndoni 'en be ts'ukhuna t'eh, 'et t'eh Ndoni 'en zeh bulh úztoodelh huba' hoont'ah. ²⁶ Khun teh 'uzdudoolti gunih. Khun teh ts'uhoske gunih. 'Ink'ez khun teh 'uyoon yit'i 'i ka 'uznoozin gunih.

6

Ndet huwa whúlna lhula dáht'en

¹ Sulhutsinkah nuhwheni Ndoni k'une''aht'en, 'ink'ez ndan nuhtah lubeshi be lhúgooh, 'en nalhúchoot. Nagoostl'iyaz ts'ah'un ninanulhtih. Nuhwhenich'oh na'dunlhu'en, doo ka si nuhwheni chah tink'us nóoht'uk. ² 'Ilho ahli ndet nuhwhuba howa whulna whunts'i lhula 'oohdut'en. 'Et t'eh Christ bughunek netl'adélts'ut, 'i, buk'une' teht'en ho' hoont'ah. ³ Ndán hoonli 'ust'ah na'dunúdzun, 'en dich'oh na'dunut'ah. 'Aw hoonli chailah ho' 'int'ah 'et huwa. ⁴ 'Et 'ilhunuh ahli hoh nuhwhé 'ut'en k'ah soo cho whunóolh'en. 'Et 'ut'en unzoo, 'i 'inla t'eh, 'et dich'oh duba hót'i, 'ink'ez 'aw 'uyoon ba ilah. ⁵ 'Ilhunuh ts'inli hoh nuhwhenich'oh ne'ut'en 'uts'oolh'en huba' hoont'ah.

Tube cho dune za'ahli 'ink'ez hoonzoo tune' 'aht'en

⁶ 'Et ndan Yak'usda bughunek hodulh'eh, 'en ndan whuyoodalh'i, 'en ndai unzoo, 'i yít'i, 'i bulah ye yula 'oot'en huba' hoont'ah. ⁷ Khun nanooh't'ah gunih. 'Aw Yak'usda bughohdloh ghait'ah. 'Et ndai dune 'ainulih, 'i zeh hayuntelelh ho' 'int'ah. ⁸ 'Et nts'e dune buyust'e nint'uk ts'ih, 'et buyust'e whuts'u nint'uk, whuz na'a datetsah. 'Et whunts'ih ndan Ndoni yunilht'uk k'una'a ne'ut'en, 'en Ndoni bughá 'ilhuz khutena. ⁹ 'Et hoonzoo 'uts'uwhulh'en 'et huwa niznootsilh gunih. 'Et 'aw whulachats'udustnik t'eh, whusawhélt's'ut t'eh, 'et t'eh ka há'uznoolelh. ¹⁰ 'Et huwa negha whults'ut t'eh, 'uyoon la' ts'oot'en. Ndunnah be 'alha 'uhoont'ah hinli, 'en degha nus bula' ts'oot'en huba' hoont'ah.

Sizi Gri lhdulalhgus k'ut dazsai, 'et zeh ts'uhót'i

¹¹ Ndi nulh'en sich'oh nuhts'o k'e'aguz, 'i 'int'ah. Lhe'ilhcho sílksi hoh buk'une'zíguz. ¹² 'Et ndunnah hubuyust'e 'et huba soo 'uldzoo, 'en 'et hukwa' hut'en, 'en 'uhint'ah, nuhwheni buka dune ahli, 'i k'ut nuhotet'us whuts'un nahonilht'uk. 'Et njan huwa' hut'en, Christ lhdulalhgus k'ut neba dazsai howu yats'ulhtuk, 'et huwa dzuh nunéhulhdzut, 'et whuch'a ne'hoot'en hukwa' hut'en. ¹³ 'Et ndunnah yuka dune unli, 'i k'ut ts'ant'az, 'en whunts'i Moses be' dustl'us 'aw hik'unucha'ust'en. 'Et whunts'ih whuz na'a buka dune ahli, 'i k'ut nuhotet'us whuz nuhonilht'uk. 'Et ndunwhuhinla t'eh, 'et whuz na'a hoh nuhwhughi yahulhtuk wule da. ¹⁴ 'Et NeMoodihti Sizi Gri bulhdulalhgus, 'i bughá zeh sudzi whudóoti. 'En bulh dasítsai li'ust'ah. 'Et huwa ndi yun k'ut 'ants'i suba whuzdli. 'Ink'ez si chah 'ants'i whuba usdli suli. ¹⁵ Nuwheni ts'iyawh Christ, Sizi ts'utni, 'en bulh 'uts'int'ah t'eh, 'et t'eh yuka dune unli, 'i k'ut 'uts'ant'az, k'us dune chats'ít'us, 'et 'ants'i 'uhoont'ah 'et huwa. 'Et whunts'ih njan hooncha ho' hoont'ah, nuwheni ndunnah Christ, Sizi ts'utni, 'en bulh 'int'ah, doo chah zeh ts'uwuzdli ho' ts'int'ah. ¹⁶ 'Ink'ez ndunnah ndi khunek 'i bughá yuk'úne' 'úst'en t'eh, 'et t'eh be nedzi dezghel, 'i 'ink'ez be negha te'nedzeh, 'i ndi hiyulh 'oot'e. Israel hits'uh haínzut, ndunnah Yak'usda budune hinli, 'en chah.

Yak'usda ye unzoo, 'i nohwhulh 'óot'e

¹⁷ K'an 'et whuts'un 'aw 'o 'un dune dzuh nusoolhdzut gunih! Sizi Gri ba 'ust'en da dzuh nusízut, 'et huwa suyust'e ndulhcho be hóodet'en ho' 'int'ah.
¹⁸ Sulhutsinkah, neMoodihti ye unzoo, 'i nohyeghah bulh 'oot'e. 'Et ndoh honeh.

Paul Ephesus Whut'en Hubuts'un K'e'anguz

Ephesus whut'en Paul dahooja hubulhni

¹ Si Paul Sizi Gri 'en bugha whel'a usdli. 'Et whuz na'a Yak'usda sts'u hukwa' ninzun.

Nuhwheni dune Yak'usda bube'ildzun, 'en keyah Ephesus 'et whut'en, nuhwheni Sizi Gri 'aw bula doohtni ghait'ah, ndet nuhwhuba 'alha 'uhoont'ah, nuhwheni ts'iyawh dahooja nuhwhudusni. ² Yak'usda ne'aBá 'ink'ez Sizi Gri neMoodihti, 'en ts'un ye unzoo, 'ink'ez nuhdzi dezghel nuhwhugha óoni'ai, 'i ts'iyawh nohwhulh óot'e.

Christ, 'en 'uja nenaonket

³ Yak'usda, Sizi Gri neMoodihti be'aBá 'int'ah, 'en uzdélhti. 'En 'int'ah Sizi Gri be ndet yak'ut whudézti, 'et nduhóolcho Ndoni bugha ndi neghant'ai.

⁴ Ndez na'a ne'aBá njan nduja, ndi yun 'utelih whutsuh 'utahanhonla Sizi Gri buyúzduelts'ilh whuba. 'Et hoh lubeshi bughu hoolah ts'oole sih, 'ink'ez 'aw nek'eootelts'ulh hoolah. Ndi be lhk'ets'udutsi', 'i be ne'aBá bubut 'et whuz na'a 'uts'oot'e huba' hoont'ah. ⁵ 'Et hoh ne'aBá ndez na'a 'uda neba lhaóodinla, nuwheni Sizi Gri 'en be dich'oh buzkehkah uztele. Ndets ne'aBá 'en ba hoonzoo, 'ink'ez nts'e na'a dich'oh hukwa' ninzun, 'et whuz na'a 'uhoonla.

⁶ I bugha ndi ye unzoo dézti, 'i uzdóolhti. 'Et whuz na'a buYe' yuk'entsi', 'en buba soo' ts'uldzoo nesulhtsi. ⁷ Sizi Gri 'en buzkai be nenaonket. 'Ink'ez tinta' ts'unt'en neba whuna'dalhde. Ye unzoo, 'i be whudezti, 'i bugha neba 'uhóonla. ⁸ Ndi ye unzoo, 'i be lha'un teh ye whunih, 'ink'ez be t'eoonudzun, 'i ts'iyawh 'i be 'et whuz na'a neba 'uhóonla. ⁹ Ndets ne'aBá dich'oh hukwa' ninzun, 'i neba whe' hoont'ah hooyah, 'et chah newhúnelhtan. Ndets dich'oh duden ihaídínl, 'et hoont'i, duYe', 'en bugha 'uhóoja. ¹⁰ 'Et ndez na'a nduwhútñi, nts'oh whugha whezulh huwhu whusawhélts'ut t'eh, 'et ndan yak'uz húdelhts'i, ndi yun k'ut húdelhts'i chah, 'en ts'iyawh Christ 'en bugha 'ilho ubutelhtsilh. ¹¹ Nts'e na'a ne'aBá dich'oh duden ihaídínl, 'et whuz na'a 'uwhut'en 'et huwa. 'Et whuz na'a 'uda neba lhaoodinla hoh Sizi Gri 'en be nets'ó tekulh ne'ilhdzun whuzdli. ¹² 'Et nuwheni Lizwif 'udechoo Christ, 'en buka tsi ts'uholi. 'Et huwa nuwheni negha Yak'usda ye dézti, 'i ndót'e. ¹³ 'En be khunek 'alha 'int'ah nuwheni negha nuhwheni 'udun yun k'ut whut'en dáhts'o. 'Et whuts'un Sizi Gri nuhwhuba 'alha 'uja. Ndi khunek, 'i bugha duhjih. Sizi Gri hukw'elh'az nuhwhuba 'alha 'uja, 'et Ndoni, nets'úyoozi, 'en be nuhwheoodet'en Yak'usda bube'ildzun sahli. ¹⁴ Ndi ne'aBá yít'i, 'i nets'un whutekulh, ne'aBá, Ndoni negha idé'ai. 'I be 'et bulah neba 'et nilts'ut, ndunnah Yak'usda dich'oh bube'ildzun hubulhtsi, 'en nabootekulh 'et whuts'un. 'Et hoh ne'aBá ye dézti, 'i dutéti.

Yak'usdaye whunih nuhgha ído'ah, 'et huba tenadáhdli

¹⁵ 'Et nts'e na'a Sizi Gri neMoodihti nuhwhuba 'alha 'int'ah, 'ink'ez dune Yak'usda bube'ildzun, 'en ts'iyawh hubuk'ehtsi', 'et nohwhulh 'údusts'o.

¹⁶ 'Et huwa si chah nuhwhuba tenadusdli hoh nuhwhuba chanailya dusni, 'aw 'ustl'e' 'uddóosneh ghait'ah. 'Ahoohyez stenadudli tah 'i be nuhwhu-nalhúnih. ¹⁷ NeMoodihti Sizi Gri buYak'usda, 'en be'aBá ye dézti, 'i bulh 'int'ah, 'en ts'un nuhwhuba tenadusdli hoh Ndoni 'en be whutnih, 'ink'ez nuhwhubeni taoodutekulh, 'et nuhtl'ahó'ai. 'Et hoh Yak'usda dant'ah unli, 'o nus t'entehzeh. ¹⁸ 'Et whuz na'a nuhwhubeni be whunul'en k'una'a 'o nus hooh'en hoh soo ts'ah'un na'a lhat whuntelh'ilh. 'Et whuz na'a njan uzdoojih ka neka' dani negha óoni'ai, 'et whuz na'a hukwa itóoh'en, 'et

'o nus t'ewhuntehzeh. 'Ink'ez dune Yak'usda bube'ildzun, 'en bulh ndi yit'i, 'i nets'ú whutekulh ts'otet'i, dáwhulzoo ho' hoont'ah, 'et chah 'o nus t'ewhuntehzeh. ¹⁹ Nuwheni chah ndan buba 'alha 'uhoont'ah, Yak'usda ye ulhtus, 'i daltus hoh nets'un 'int'ah, ndi hooncha hoh ye úlhtus, 'i be 'ut'en. 'Et whuz na'a nuhwhuba tenadusdli. ²⁰ Hoh da Christ, 'en yahadla tah dinaidilhti. 'Ink'ez nduk yak'uz dughu nalnih ts'ih natl'aídalhda. ²¹ Christ, 'en ts'iyawh hubugha ndoh 'int'ah. Ndunnah nek'úne'hul'en, 'ink'ez ndi nududeh 'i be butl'awhelts'ut, 'ink'ez negha ndoh ye úlhtus, 'ink'ez ndunnah neba moodih hinli chah, 'en ts'iyawh. K'an 'et 'aho 'ink'ez whuz de whudezulh, 'et whunts'ih ndunnah boozi ncha, 'en ts'iyawh Christ bugha ndoh 'int'ah. ²² Ndai ne'aBá degha nus ye ulhtus, 'i be ts'iyaintsuk Christ duketl'ah níninla. 'Ink'ez Yak'usda ba 'ilhunahuwúdulh ts'iyai be 'en ts'iyawh hubutsuh whudéhldzulh 'int'ah. ²³ Yak'usda ba 'ilhunahuwésdel, 'en ts'iyawh Christ buyust'e 'uts'int'ah. Buyust'e lhadúlya ts'inli. 'En ts'it'i t'eh, 'aw 'uts'un na'a 'uts'oot'e hukwa cha'ts'uneszi

2

Ye unzoo, 'i be dahjih

¹ 'Ink'ez nuhwheni tinta' naht'en 'ink'ez nuhwhulubeshi be dasáhtsai, 'et nakhúhna nanwhúlhtsi. ² 'Et hoh da ndi yun k'ut 'ut'en k'una'a yinkak delhúts'i inle. Ndun tazai k'uz ye úlhtus, 'i moodih tele, 'et yutl'ahó'ai, 'en netsudule 'en k'une'un whul'en inle. Ndunnah 'awhuz Yak'usda yuk'unucha'hust'en, 'en ye yúdinda. ³ Hoh da nuwheni chah whuz na'a zeh buk'una'a 'uts'int'ah inle. Nts'e na'a hoh neyust'e lubeshi ts'un nint'uk, 'et whuz na'a zeh neyust'e 'utet'ilh hukwa' ninzun, 'ink'ez není chah, 'et ts'iyawh 'uts'uhulh'en inle. 'Ink'ez Yak'usda ndet hoh hubulh hunilch'e, 'et chah neba whusaóotekulh ínle, ndunnah hubuk'una'a. ⁴ 'Et whunts'ih Yak'usda dahólcho 'i be nek'entsi', 'et huwa tube cho negha te'nanzin. ⁵ Hoh da tinta' ts'unt'en 'et huwa yats'adla, 'et whunts'ih Christ 'en be Yak'usda ts'ukhuna nesulhtsi. Ye unzoo, 'i be dahjih. ⁶ 'Ink'ez yak'uz ts'ih Christ, Sizi ts'utni, 'en bulh ne'aBá nedinadinla. Lhelhdun nduk yak'uz ts'ih, 'en yuzih nitl'azdelts'i. ⁷ 'Et whuz na'a ne'aBá dalcho ye unzoo, 'i nus de whudezulh whusawhútels'ulh, nduwhulyez Christ, Sizi ts'utni, 'en be ne'aBá whunéuntelhtun. 'I be nets'un tézoo ho' hoont'ah. ⁸ Ye unzoo, 'i be, be neba 'alha 'uhoont'ah bugha uzdujih 'et huwa. 'Aw whenich'oh negha ilah hoh uzdujih. Yak'usda 'en negha óoni'ai. ⁹ 'Aw 'ut'en 'uts'ulh'en, 'i bugha ilah uzdujih. Doo ka bulunah dune hundunoolti. ¹⁰ Nuwheni Yak'usda 'un whinla 'uts'int'ah. Christ, Sizi ts'utni, 'en buyúzdults'i hoh 'en be k'andit nats'usdli, 'ut'en unzoo, 'i 'uztelh'ilh ka. 'Et hoh whutsuh Yak'usda neba lhaóodinla. 'Et buk'ah nuts'óodelh ka.

Christ buzkai 'i be Yak'usda benghah ninwhuninla

¹¹ 'Et huwa whunalhúnih, nuhyust'e be 'udun yun k'ut whut'en aht'ah. Ndunnah Lizwif, ndan dune dula be hika dune unli, 'i k'ut 'usdút'us, 'en buka dune hinli, 'i k'ut 'aw chánwhuts'ít'us nuwhuhútni. ¹² Hoh da nuhwheni Christ bu'et 'aht'ah inle. Israel hits'uh haínde 'aw hubutah cha'áht'ah inle. Ndai Yak'usda budune khunek huba lhaídinla, 'i hubuts'ú yoozi hubuts'un whusaóotekulh, 'aw hoontsolyaz whunts'i hoh'en għait'ah inle. 'Aw hukwa itoħħen hoolah 'ink'ez Yak'usda bu'et 'aht'ah inle. ¹³ K'an 'et Christ, Sizi ts'utni, 'en bulh 'aht'ah. Hoh da Yak'usda bugħu nilħza 'aht'ah inle, 'et whunts'ih Christ, 'en buzkai, 'i be k'an 'et begħah 'aht'ah suli.

Christ 'en bugħha nedzi dezghel

¹⁴ Christ 'en bugha nedzi dezghel. Ndi sih li'int'ah 'i ne-éguz, 'i be lhelhdun uzdelhts'i inle. 'En bugha ndi sih 'i neba hoolah yulhtsi, 'ink'ez 'ilho hudedowh nats'usdli 'et huwa. ¹⁵ Ndi Moses be' dustl'us yuk'e'ánguz, 'i be Lizwif 'ink'ez 'udun yun k'ut whut'en lhch'a uzdetni inle, 'et ne'aBá, Sizi Gri buyust'e be neba hoolah whulhtsi. 'Et huwa nuwheni whutsuh da nawh uzdedowh inle, k'an 'et Sizi Gri bulh 'uts'int'ah. 'Et whuz na'a nawh hudedowh 'ilho uzdedowh zeh nenasulhtsi. 'Et huwa netah whudezghel whulhtsi. ¹⁶ 'Ink'ez dulhdulalhgus 'i bugha nawh hudedowh 'ilho zeh nesulhtsi. 'Et hoh neul dunekah nabulhtsi. 'Et whuz na'a Yak'usda ts'un nenainínla. Ndi lhch'a uzdetni, dulhdulalhgus, 'i bugha 'et ts'iyawh neba hoolah whulhtsi. ¹⁷ 'Ink'ez nuhwheni Yak'usda bughu nilhza 'aht'ah inle, 'ink'ez ndunnah Yak'usda beghah 'uhint'ah, 'en chah Sizi Gri whusainya 'ink'ez 'en ts'iyawh khunek unzoo, 'i be nuhwhulh yaíltuk dáhoont'ah ts'ah'un na'a lhts'un 'uhoot'e. ¹⁸ 'Et huwa Sizi Gri 'en be nuwheni nats'ult'oh, 'ilhunuh Ndoni, 'en be ne'aBá netl'ahó'ai hoh ts'iyawh buts'uztoodelh ka.

Christ 'en tse koo buk'uwhuz'ai unli

¹⁹ k'an 'et ndóohoont'ah, 'uts'un whut'en 'ink'ez 'uts'un keyah whut'en ahli inle, k'an 'et 'aw nducháht'ah. 'Et k'us dune Yak'usda bube'ildzun, 'en hubulh hudedowh sahli. Yak'usda koo húdelhts'i hubutah 'aht'ah sahli. ²⁰ Nuhwheni Yak'usda koo lí'aht'ah. Ndunnah whel'a 'en 'ink'ez Yak'usda be nus whunilh'en, 'en ts'iyawh koo buk'uwhuz'ai hinli. 'Ink'ez nuhwheni 'en whunohodalh'i, 'et huwa hubulh 'áht'ah. Christ 'en dich'oh degha nus tse koo buk'uwhuz'ai, 'i unli ho' 'int'ah. ²¹ Sizi Gri 'en be njan koo ndulhcho hoh ts'iyawh whuduts'o hoh 'uhóolya. 'Et 'i be neMoodihti koo 'o nus whudézti suli. ²² Nuhwheni chah 'en be lhadúlya ahli. 'Et Yak'usda Ndoni be nuhyudínda.

3

Whe' hoont'ah hooyah ts'et hawhélts'ut

¹ 'Et ndi bugha si, Paul nuhwheni 'udun yun k'ut whut'en nuhwhuba Christ, Sizi ts'utni, 'en ba 'ust'en. 'Et huwa tsak'esída usdli. ² 'Et Yak'usda dich'oh ye unzoo, 'i nuhwheni nuhwhuba sughant'ai, 'et whulh údahts'o t'eh. ³ Dahóont'ah suba wheóodiltsai, 'et 'i be Yak'usda sut'eoonalhdzin, ndi huba whe' hoont'ah hooyah hubugha. Whutsuh da khunek ntsolyaz be nuhts'ó k'e'aguz. ⁴ 'Et buk'eyalhtuk t'eh, 'et sih Christ 'en bugha buba whe' hoont'ah hooyah, nts'e na'a t'eoónúszun, nuhwheni chah whuz na'a t'ewhuntehzeh. ⁵ 'Uda niz dak'ez ndi yun k'ut whut'en ndet 'uwhúlhni, 'aw t'echahonízil inle. 'Et k'an dzin ts'ah'un na'a ts'iyawh t'ets'onanzin. Ndoni be ndunnah Yak'usda ba whel'a, 'ink'ez Yak'usda be nus whunilh'en chah, 'en ts'iyawh hubunah nt'eoonedzin. ⁶ 'Udun yun k'ut whut'en 'ink'ez Lizwif, 'en chah 'ilho yust'e hoole huba' hoont'ah. 'Ink'ez ne'aBá, Christ 'en be ndi khunek unzoo, 'i be nets'u hooszi. Nuwheni ts'iyawh neba' hoont'ah ho' hoont'ah. ⁷ Khunek unzoo, 'i be ne'úsle síli. Dahoont'ah hukw'u na'a Yak'usda ye ulhtus, 'i be 'uwhut'en, 'et whuz na'a ye unzoo, 'i be stl'awhélts'ut.

Whe' hoont'ah hooyah ts'et hawhélts'ut 'et hubugha

⁸ Si whunts'i, dune Yak'usda bube'ildzun hubutah, 'en hubuk'élh'ih 'ust'ah hukw'u na'a 'udulhúdzun 'et ndunúszun. 'Et whunts'ih ndi ye unzoo, 'i sughálts'ut. 'Et 'i be 'udun yun k'ut whut'en, khunek unzoo, 'i be nduhóolhcho hubudutésnilh. Christ ye dézti, 'i hooncha k'et, 'aw whu la tah hoolah, 'et hubugha hubudutésnilh. ⁹ 'Et hoh buba whe' hoont'ah hooyah, 'et 'i be ts'ianah 'ilho hudedowh ts'oole. Soo 'udechoo da whuts'un, Yak'usda ts'ianah hubuch'á whunetz'i. 'Ink'ez ts'ianah dune

honilh'en hubutelhtsilh ka. 'En 'uja Sizi Gri 'en be ts'iyaintsuk inla. ¹⁰ 'Et huwa yak'uz ts'ih ndunnah k'une'buhul'en, 'ink'ez ndi nududeh 'i be butl'awhelts'ut, 'en ts'iyawh Yak'usda ba 'ilhunahuwésdel hubugha ndunnah nduk yak'uz húdelhts'i, Yak'usda ye whunih ts'iyawh ndet 'uwhúlhni hububut nt'eoonedzin. ¹¹ 'Udechoo whuts'un ne'aBá nduninzun, whuz na'a Christ, Sizi ts'utni, 'en neMoodihti, 'en bugha 'uhóonla. ¹² 'En be 'aw whéchats'oojah hoh be 'alha 'ohoont'ah, 'i bugha 'aw whechats'uniljut hoh ne'aBá bubut nézteyalh. ¹³ 'Et huwa nuhts'u tedusdli, nuhwhuba dzuh nususzut huwa, nuhdzi k'ah 'ooneh gunih, 'et nuhts'u hukwa' dusni. 'Et hoh whunoolhnik.

Whe' hoont'ah hooyah ts'et hawhéelts'ut neba hooncha

¹⁴ 'Et huwa Sizi Gri neMoodihti be'aBá, 'en bubut sugwutsi be niníya. ¹⁵ Boozi bugha ndunnah yak'uz húdelhts'i 'ink'ez ndi yun k'ut hukhuna chah, 'en ts'iyawh buzkehkah hoodzi. ¹⁶ 'En ts'un ndez na'a nuhwhuba tenadusdli, Ye dézti, 'i hooncha k'et 'aw uzdooni ghait'ah, 'et 'uwhultsuk Ndoni bugha ye úlhtus, 'i nuhgha íte'ah. 'Et hoh nuhyégha unli, 'i be ulhtus tehle. ¹⁷ Be nebe 'alha 'ohoont'ah 'i be Christ nuhdzi yuh nidoolts'it. 'Ink'ez be nek'ets'ints'i', 'i be ndi koo buk'uwhuz'ai, 'i bughih hoonli k'una'a duts'o. ¹⁸ 'Et hoh dune Yak'usda bube'ildzun, 'en bulh nuhwheni chah Sizi Gri be nek'ets'ints'i', 'i soo cho be t'éwhuntehzeh, dádeltel 'ink'ez dadelyez, dádeltai 'ink'ez nduk dawhuldzuh ts'ih chah, 'et 'uhoolcho, 'i be. ¹⁹ Christ ye nék'ents'i', 'i hooncha k'et, 'aw t'ets'onózin ghait'ah, 'i be t'eonoohzeh. 'Ink'ez ndai Yak'usda yé dezbuñ, 'i be dóohbuñ. ²⁰ 'Aw 'et ne'aBá ndet buts'un hukwa' ts'utni 'ink'ez howu nuni uznuzut chah, 'et 'o nus 'ultsuk, 'i negha itelelh ho' 'int'ah. Ndai Ndoni ye ulhtus, 'i neyuh 'int'ah, 'et 'i be' whut'en. ²¹ 'Et huwa ndi yun 'ustl'e' 'utenelh whuts'un 'ink'ez hukw'elh'az 'ilhuz wheni, 'et whuz na'a Christ, Sizi ts'utni, 'en ba 'ilhunahuwúdulh ne'aBá uzdóolhti huba' hoont'ah. 'Et ndoh honeh.

4

'Ilho wahle

¹ Si, neMoodihti buba tsak'esída 'ust'ah. Njan dutehjih ka Yak'usda nuhka' dani, 'et huba soo 'ulhúdzoo hoh whuz toohdelh, 'et nuhts'u hukwa' dusni. ² 'Ahoolhyez yuh 'udulhúdzun, 'ink'ez nagoostl'íyaz né'boolh'en. Dzuh nahdeh whuts'udoohtnik gunih. Lhk'edahtsi' hoh 'ilho dune wahle. ³ Ndoni 'en be ts'iyawh lhulh dune wahle. Ts'ah'un na'a lhts'un 'ooht'e, 'i be 'ilho wahle. 'Et 'i be nuhdzi ndulhcho, 'i be whuz na'a zeh hukwa 'ooht'en. ⁴ 'Ilho yust'e ts'uzdli 'ink'ez 'ilho Ndoni neyudinda. Nts'e na'a Yak'usda dutehjih ka nuhka' dani 'et hukwa tsi hóhli. ⁵ 'Ilhunuh neMoodihti 'ink'ez be néba 'alha 'ohoont'ah, 'i chah 'ilho zeh. 'Ink'ez 'ilho zeh be too be' ts'ul'ih hoonli. ⁶ 'Et 'ilhunuh Yak'usda, 'en buba 'alha 'ohoont'ah, ts'iyawh be'aBá unli. Ts'iyai gha ndoh 'int'ah 'ink'ez nuwheni ts'iyawh netah 'ut'en. 'Ink'ez nuhwheni ts'iyawh, 'ilhunuh ahli hoh nuhyudínda.

Ndai Christ negha íninla

⁷ 'Et Christ, 'ilho ts'inli hoh ndi yun k'ut lhelhdun huwa ts'ughuna, ye unzoo, 'i be negha óoninla. ⁸ 'Et huwa Yak'usda bughunek njan ndutni, "Hoh da Christ nduk whenya hoh ndunnah naoobilchukw, whuz whe naoobanla. 'Ink'ez dune bugha' ninla."

⁹ K'an 'et nuhwhudutésnilh daja ni hoh 'utni. Lhdulalhgus k'ut dazsai hoh yahadla tuz whenya, 'et 'uwhúlhni. ¹⁰ Ndun nyuk whenya, 'en zeh degha ndoh yak'uz whenája. Whuz ts'iyaintsuk lhaoodútelih ka. ¹¹ 'En zeh 'ut'en,

bulunah chah whel'a 'en butl'a hó'ai. Bulunah nus whunilh'en butl'a hó'ai. Bulunah khunek unzoo, 'i be yahutelhtuk, 'et butl'a hó'ai. Bulunah Yak'usda ba 'ilhunahuwésdel bughu tele 'ink'ez dune hoodutelh'eh, 'et chah butl'a hó'ai ho' hut'en. ¹² Dune Yak'usda bube'ildzun, 'en lhadúlya nabulhtsi 'et wheni. 'Et whuz na'a Sizi Gri ba ne'úsle 'ut'en 'uhiyulh'en 'ink'ez Christ buyust'e nus zeh lhe'eltus, 'et wheni 'uhut'en. ¹³ 'Et njan whuts'un ndet be neba 'alha 'ohoont'ah chah, 'ink'ez ndet t'ets'oninzun Yak'usda buYe' bugha, 'et whuts'un ts'iyawh 'ilho 'uztele. 'Et whuz na'a soo lhadúlya uztele. 'Ink'ez Christ nts'e na'a soo 'et ndunt'ah, 'en buk'ah ts'ih hukw'u na'a 'uztenilh. ¹⁴ 'Aw 'o 'un 'uskehyazkah k'una'a cha'ts'oost'e 'et huwa. Dune buka hóodelhts'i nabante'ah ka. Lhelhts'un na'a dune wheoobohodulh'eh, 'i be 'ants'i nilhts'i k'una'a lhelh ts'un náhutukuk li'hut'en. ¹⁵ K'us ndet khunek 'alha 'int'ah be lhk'ets'udutsi', 'i be yats'ulhtuk, 'ink'ez Christ netsuh whudélhdzulh, 'en ts'un soo cho uznooyeh hukwa' ts'ut'en. ¹⁶ 'En be buyust'e ndulcho lhk'eyánla. Whuz na'a ye ulhtus, 'i be hóotun. 'Et ts'iyawh lhghu naoodelhúghun 'i be' whut'en. 'Et whuz na'a zeh 'uwhut'en t'eh, 'et t'eh buyust'e be lhk'ets'udutsi', 'i be 'o nus ulhtus 'ink'ez unzoo tele.

K'an dune, dant'ah dune tele

¹⁷ 'Et huwa njan hubugha ndun whudutesnilh, neMoodihti nalh 'udusni, 'udun yun k'ut whut'en hubeni lait'ah hukw'u na'a nuni hunudeh. 'Aw 'o 'un 'en buk'una'a 'ooht'e gunih. ¹⁸ Hubeni tsahólhgus yuh 'int'ah, 'et huwa Yak'usda ye khuna, 'i be'et 'uhint'ah. 'Aw hoonli t'echahonízun, budzi duts'un suli 'et huwa. ¹⁹ 'Aw ts'iyaintsuk hukw'u ní chanulhdzut. Ts'iyaintsuk whulahudetnik. Buyust'e whuts'u nint'uk, 'et zeh hukwa' huninzun. Soo hunint'uk hoh 'ut'en dutsun, 'i 'uhutelh'ilh, 'et zeh whuts'u nint'uk. ²⁰ 'Et whunts'ih nuhwheni Christ, 'en 'aw ndoohoont'ah be whuchaooodulhú'il. ²¹ 'Alha tulih, 'en bugha whulh 'údahts'o 'ink'ez 'en be hoodelhú'i, nts'e na'a hoh Sizi 'en bugha be 'alha' nudzun, 'en unli 'et huwa. ²² 'Et 'uda dats'int'ah inle, 'et ts'iyawh 'ustl'e' 'uwhahleh 'ink'ez whuch'a whúnulht'uk. 'Et nduhoont'ah, 'et ts'iyawh tube hoontsi' ho' hoont'ah. Ndett whuts'u náht'uk, 'et hoh nanáht'ah. ²³ 'Ink'ez nuhwhubeni be howu nuní nahzut, 'et nduhólcho 'et k'andit nahoolhtsilh. ²⁴ 'Et k'an hukw'u na'a yun k'enahdell, 'et whuz na'a whulhchoot. 'Et Yak'usda be 'ut'en k'ah 'ohoont'ah. Ndett be ts'ah'un 'ohoont'ah, 'ink'ez be 'alha 'int'ah, 'i lubeshi bughu hoolah, 'et whuz na'a Yak'usda neba 'uhóonla.

Ndoni khun butso wahle gunih

²⁵ 'Et huwa 'ilhunah ahli whahts'it 'ustl'e' 'udóohneh! 'Ink'ez k'an 'et whuts'un 'ilhunah ahli hoh nuhwheghah huwhut'i 'en chah khunek 'alha 'int'ah, 'i be hubulh yaoolhtuk, ts'iyawh 'ilho uzdedowh ts'inli, 'et huwa. ²⁶ Nuhwhuske be lubeshi wulhchoot gunih. Khun teh nk'achah hunlhúch'e hoh sa yuk tóo'ah gunih. ²⁷ Khun teh netsudule hukwa' ninzun tune' nuhóolh'en gunih. ²⁸ Ndunnah 'udunut'ih, 'en ts'iyawh 'ustl'e' 'uhooneh, 'et hubula be 'uhoot'en, 'et sih huba 'uk'elha hole. Ndai dula be hoonzoo huwa ghóona. 'Et sih dune hoonli whedunidzit hoonliyaz be bula 'ooneh. ²⁹ Khunek nts'i be yaoolhtuk gunih. 'Et khunek unzoo, 'i hiye yalhtuk, 'i be 'o nus hilhtus hutele. 'Et t'eh ndunnah nuhoozélhts'ai, 'en huba whútezoo. ³⁰ Yak'usda buyégha lubeshi bughu hoolah, 'en khun butso wahle gunih. 'En nuhbe hóodet'en nuhwhulhtsi ndet dzin nanhootekulh 'et wheni. ³¹ Ndett nuhwhuba dzuh 'ohoont'ah, 'ink'ez whúske k'et 'ants'i nuhdzi dézk'un li'aht'ah, 'ink'ez whúske 'i be 'ahoolhyez lhulh whuzahke, 'ink'ez 'ahoolhyez lhughí yalhútuk, 'ink'ez dune hubuch'a dahni chah, 'i ts'iyawh buch'a naoohlúye. ³² 'Ink'ez nuhwheni ts'iyawh lhts'un wahzoo, 'ink'ez ts'iyaintsuk nuhdzi wúlhdzoo hoh

Ihughha te'untehdzin, 'ink'ez nts'e na'a Christ, 'en be Yak'usda nuhwhulubeshi nuhwhuba yuna'alhde, 'et nuhwheni chah whuz na'a zeh 'ilho ahli hoh lhba 'un whutoolhdelh.

5

Be lhk'ets'udutsi', i be ndi yun k'ut ts'udelhts'i

¹ 'Et nuhwheni Yak'usda nuhk'entsi' aht'ah, 'ink'ez 'en buzkeh ahli, 'et huwa buk'ah ne'óoht'en. ² Nts'e na'a Christ nék'entsi' hoh dulhdulalhgus k'ut neba butl'a' dudelti, 'ink'ez Yak'usda 'en ts'un bukw'uzdai k'ut ba ts'idalhk'un lí'uja 'ink'ez ndi huwa t'aih, 'i ye khuna 'int'ah, 'i chah bukw'uzdai k'ut butl'a' dudelti li'uja, ndi yoo ba soo yíltsun li'hoont'ah, 'et nuhwheni chah whuz na'a zeh hoh ts'iyanah buk'eoohtsi'. ³ 'Et whunts'ih ndet hoh tinta' aht'ih, 'ink'ez 'ut'en dutsun, k'us 'uyoon dune yít'i ka' nahzun, 'aw hoontsolyaz whunts'i nuhwheni nuhtah 'et ndóht'en gunih. Ndunt'i, 'i nuhtah hóle gunih. Nuhwheni dune Yak'usda bube'ildzun ahli 'et huwa whuz na'a ndi yun k'udoolhúts'i huba' hoont'ah. ⁴ 'Et ndai dutsun 'ink'ez la hoot'ah be yats'ulhtuk. Hoontsi' hoh dlo k'une'uzduni chah, ndi ts'iyawh 'aw whuz na'a nuhwhuba cha'hóot'ah. 'Et k'us tube cho Yak'usda ts'un chanailya dahni. ⁵ Njan t'eoonahzun, ndunnah tinta' 'ut'ih, k'us 'ut'en dutsun, 'i 'ulh'en, k'us 'uyoon dune yít'i ka' huninzun, 'en 'uk'edéltsi ts'un tenahududli bubúlh lhulhuga 'uhint'ah, 'et 'en ts'iyawh, Yak'usda 'ink'ez Christ, nts'e hubudayi cho unli, 'aw hoontsolyaz whunts'i 'aw bughá hokat ghait'ah. ⁶ Khun dune khunek hubutah huhoolah be nuhwhunoo'ah gunih. Ndunt'ah Yak'usda yé whúske, 'i, Yak'usda hik'unucha'hust'en buk'eóodutelts'ulh ho' hoont'ah. ⁷ 'Et huwa buts'ún nidóohdelh gunih.

Whét'en, i niz náhdelh

⁸ Whunulh'en, hoh da tsahólhgus yuh delhúts'i inle. K'an 'et neMoodihti, 'en be whét'en, 'i nuhwhuba suli. 'Et huwa 'uskehyaz k'una'a be whét'en, 'i niz nuhdelh 'et ndóht'e huba' hoont'ah. ⁹ Ndoni be 'ut'en k'ah, ts'iyaantsuk ndet hoonzoo, ts'ah'un na'a 'uhoont'ah, 'ink'ez khunek 'alha 'int'ah, 'i chah ts'iyawh Ndoni búlh buts'un hawhúkat 'úhoont'ah ho' hoont'ah 'et huwa. ¹⁰ 'Et ndaht'en t'eh, 'et whuz na'a neMoodihti hoont'i telhtsilh. ¹¹ Tsahólhgus yuh húdelhts'i hube 'ut'en k'ah ndúhoolcho hoh 'aw cha'hóozooth. Khun buts'un nidoohdelh gunih, 'et k'us njan nduhut'en ts'ih'un whunaoobuts'unultun. ¹² Ndet whunest'i hoh ne'hut'en, 'et hukwaya hoonli k'et, 'aw howu yats'oolhtuk huba cha'hóot'ah. ¹³ 'Et whunts'ih ndi Yak'usda be whét'en, 'i be ts'iyanah hiye t'ewhunilhdzun. 'Et nts'e na'a ts'iyanah t'ehonanzin, ndi Yak'usda be whét'en, 'i be 'uwhut'ih. ¹⁴ 'Et huwa njan ndutni, "Ndan usti, 'en ts'enindzit!"

Yaidla tah dinadindaih.
'Et Christ buts'uh hayánduz,
'i nk'édoodi."

Ye whúnih i be yinkak delhúts'i

¹⁵ Soo cho khahdli. Ye whúnih 'i be yinkak delhúts'i. Huwhusnik hubuk'una'a ilah. K'us huwhunih k'una'a 'ooht'e. ¹⁶ K'an 'et dzin whudezulh 'ahoolhyez dune tink'us 'uhet'ilh ze' hut'en. 'Et huwa njan yun nadalhdukw suli, 'et hoolah whutele whutsuh, soo cho ts'ah'un na'a 'uts'uholeh hukwa' ts'oott'en. ¹⁷ 'Et huwa khun ilah tune' ooht'en gunih. K'us neMoodihti 'en ndet nuhts'o hukwa' ninzun, 'et zeh t'eoonohzeh hukwa 'aht'en. ¹⁸ Khun tanoohtnai gunih. 'I be khahna, 'i tinta' 'ulh'ih. 'Et k'us Ndoni be doohbun huba' hoont'ah. ¹⁹ Yak'usda bughunek be ahjun. Shun teni' uznilhzun, 'i be chah ahjun, 'ink'ez Ndoni shun be ahjun. Nuhdzi yuh hoh nuhMoodihti shun

be délhti, 'et whuz na'a lhulh yalhútuk. ²⁰ Sizi Gri neMoodihti, 'en boozi be Yak'usda ne'aBá, 'en ts'un ts'iyaintsuk hubugha 'ahoolhyez chanailya dahni. ²¹ Yak'usda ts'un te'nahzun 'i gha lhtl'a'dulhúye hoh nuhwheni 'ilho dune wahle.

Ndiyun k'ut lhghuzdelhts'i, 'i Christ 'ink'ez hubuluglez nduwhult'ah

²² Nuh'atkah nts'ena'a neMootihti butl'a'dudelhúya, whuz na'a nuhwhukikah butl'a'dudoolhúyelh. ²³ Nuhkikah 'en nuhtsuh hudemdzulh 'et huwa. Nts'e na'a Christ, Yak'usda ba 'ilhunahuwúdulh butsuh unli, 'et whúz na'a 'et ndúhoont'ah. 'Ink'ez Christ, nuhwheni buyust'e 'uts'int'ah, 'en neulhyis 'int'ah. ²⁴ 'Et huwa nuhwheni Yak'usda ba 'ilhunahuwúdulh, nts'e na'a Christ negha ndoh 'int'ah buk'une' ts'ut'en, 'et whuz na'a ts'ekoo chah dich'oh dukikah ts'iyaintsuk buk'úne' hóot'en. ²⁵ Nuhkikah, nts'e na'a Christ nuhwheni Yak'usda ba 'ilhunahuwúdulh nek'entsi' k'et neba huwá' dudulti, 'et whuz na'a nuhwhenihch'oh nuh'atkah buk'eoohtsi'. ²⁶ 'Et Christ neba daja, nuhwheni Yak'usda ba 'ilhunahuwúdulh Yak'usda ba 'udun neníninla. Soo ts'ah'un too zai, 'i k'una'a bughunek be netsun hoolah nenasulhtsi. ²⁷ 'Et whuz na'a nuhwheni Yak'usda ba 'ilhunahuwúdulh soo degha nus lhadint'ah ts'inle hoh Christ dich'oh dubut nenítelelh. 'Aw tsunyaz whunts'i nek'ut be chaódest'en. 'Ink'ez 'uts'un na'ayaz whunts'i cha'ts'ít'ah. 'Et whuz na'a 'et nduts'uwhut'en uztele. 'Ink'ez lubeshi bu'et uztet'ilh, 'aw whuz na'a nek'eho'ah chaootélah. ²⁸ 'Et whuz na'a dune du'atkah buk'ehootsi'. 'Et dahint'ah dich'oh k'enahudutsi', whuz na'a zeh du'atkah chah buk'ehootsi' huba' hoont'ah. ²⁹ 'Et 'aw 'ilhunuh dune dich'oh buyust'e ts'udutnik hoolah, k'us dich'oh buyust'e soo cho né'yulh'en. 'Et whuz na'a zeh neMoodihti Yak'usda ba 'ilhunahuwúdulh ts'iyawh hubughunli. ³⁰ Christ buyust'e ndulhcho hoh nuhwheni ts'iyawh bulah ts'inli 'et huwa. ³¹ Njan 'et huwa, dune be'abá, be'ama chah buch'a ooya 'ink'ez du'at zeh yulh 'oot'e, 'et nahúlt'ah 'en 'ilho zeh hoole. ³² Ndi huba whe' hoont'ah hooyah, 'et hooncha ho' hoont'ah. 'Et njan 'udusni, 'i Christ ts'utni, 'en 'ink'ez Yak'usda ba 'ilhunahuwúdulh, 'et 'udúsni. ³³ Njan 'et doo chah zeh nuhwhudutesnilh, dáhoont'ah hoh ts'iyawh nuhwhenich'oh k'enahudutsi', 'et whuz na'a zeh nuh'atkah buk'eoohtsi' huba' hoont'ah. 'Ink'ez nuhwheni ts'ekoo nuhkikah soo cho hubudóolhti.

6

'Uskehiaz nuhwhe'abá 'ink'ez nuhwhe'ama 'en hubadóolhti huba' hoont'ah

¹ Nuhwheni 'uskehiaz neMoodihti 'en bugha nuhwhe'abá 'ink'ez nuhwhe'ama hubuk'une' 'ooht'en. 'Et ts'ah'un na'a 'ohoont'ah. ² Nuh'abá nuh'ama bulh hubudóolhti. Ndi khunek 'i 'udechoo netl'aídai'ai 'i bulh nets'u yoozi ho' 'int'ah. ³ Et huwa 'i be sa ndi yun k'ut khutehnalh 'ink'ez ts'iyaintsuk sóo'teht'ilh. ⁴ 'Ink'ez nuhwheni ndan dune buzkeh hooni, nuhwhuzkeh khun hubunóolhch'eh gunih. 'Et whunts'ih neMoodihti whuneoodulh'eh, 'et 'i be soo cho hubugha dahni, 'et whuz na'a hubunoohlhyeh.

'Ulhna 'ink'ez moodih chah soo cho ne'lhuuhul'en

⁵ 'Ulhna ahli nuhwheni chah, nts'e na'a Christ nuhdzi ndulhcho, 'i be buk'une' aht'en, 'et ndunnah ndi yun k'ut nuhmoodih hinli, 'en chah whuz na'a zeh nujut be dulhúduz hoh hubuk'une' 'ooht'en. ⁶ Nuhmoodih nuhwhunih'en ncha na'dudulhú'i t'eh, 'et whuz na'a ndaht'en ilah, k'us Christ be 'ulhna sahli hoh nuhzul 'ink'ez nuhyust'e ndulhcho, 'i be ndet Yak'usda nuh'su hukwa' ninzun, 'et hukw'u na'a 'ooht'en. ⁷ Nuhbeni hoonáht'i hoh neMoodihti ba 'ulhna ahli, 'aw dune ba 'ulhna cháhlah. ⁸ T'eeonáhzun, dune 'ulhna k'us 'ulhna hubula nahudetnik whunts'i, 'ut'en unzoo, 'i ahla, 'et whuz na'a neMoodihti ts'un nuhwhuba k'elha whutéle. ⁹ 'Ink'ez nuhmoodih

ahli, nuhwheni chah nuhwhudutesnilh, nuhwhe'ulhna hoontsi' ne'boolh'en gunih. T'eoonuhzun nuhwhenich'oh nuhMoodihti, 'en nduk yak'uz usda 'ink'ez 'en bunalh ts'iyannah lhulh hulgħha 'uts'int'ah ho' ts'int'ah.

Nts'e na'a netsudule buch'a' ts'ulhdeh

¹⁰ Sulhutsinkah, ndi khunek degħa nus 'int'ah 'i be nohwhulh yatelhtuk. NeMoodihti, 'en bé ts'ilhtus. Ndai ye úlhtus, 'i be ts'ilhtus. ¹¹ Lhts'utedúghan wheni be sóo nazdutetnlilh hukwa, Yak'usda negħha ininla, 'i, ts'iyawħ be soo nadaha tneħeh. 'Et t'eh netsudule ye 'uyoo unli, 'i, 'aw nuhch'a' oolħdeh għait'ah. ¹² I ilah ndi yun k'ut dune bulħħu bħabu chats'udsulħ. 'Et whunts'i ndunnah nek'UNE'whuhul'en, 'ink'ez ndi nududeh 'i be butl'awħelts'ut, 'ink'ez ndi yun k'ut tsaholħġus yuh whumoodiħ, 'ink'ez ndunnah ntsi' nududeh ndus de haíndel chah, 'en ts'iyawħ hubulħ īħets'udulħ ho' ts'ut'en. ¹³ 'Et huwa lhts'utedugħan wheni be sóo nazdutetnlilh ka, 'et Yak'usda negħha īninla, 'i ts'iyawħ be soo nadooħtneħ huba' hoont'ah. 'Et hoontsi' whusawħelts'ut t'eh, 'aw nuhch'a 'oodeh għait'ah. Ts'iyawħ īħadáhja t'eh, 'et sih soo cho nudoolħuya! ¹⁴ 'Et huwa didahdelħ 'ink'ez nuhwhuts'i tah ndi khunek 'alha 'int'ah, 'i be soo cho sunadulħu'ooh. Nuhyust'e ndi be ts'ah'un na'a 'uħoont'ah, 'i chah be náhdelħ. ¹⁵ Lhadóoħt'e ndi khunek unzoo, 'i nedzi ba be soo' hoont'ah, 'i be óoh'es li'oħneh. ¹⁶ Ndi neba be 'alha 'uħoont'ah, 'i 'ants'i nebut ústan li'int'ah. 'Ink'ez wulħchoot. I be k'aza kwun li'int'ah, 'i ndun ntsi' 'en nets'itutsoh t'eh, ndi neba be 'alha 'uħoont'ah, 'i be nanoollħnej. ¹⁷ Ndi be uzdujħi, 'i be užnelħu'ai li'ts'int'ah. 'Ink'ez Ndoni butes cho, 'i wulħchoot. 'I Yak'usda bughunek 'int'ah. ¹⁸ Be tenadudli, 'i, 'ink'ez Yak'usda ts'un teni' uznilhdzun, 'i chah, 'et whuz na'a tenadahdli. Ndoni 'en be 'ahoolhyez 'ustl'e' cha'duzéħne hoh tenadahdli. 'Ink'ez nts'oh dawħut'en 'et whunts'ih, huwahli hoh dune Yak'usda bube'ildzun, 'en ts'iyawħ huba tenadahdli. ¹⁹ 'Ink'ez sich'oh chah soo cho suba tenadahdli. 'I be khunek unzoo, 'i sugħa tékulħ 'ink'ez 'aw wheħasaz hoh ndi khunek 'i be yatelhtuk. 'Et huwa be whe' hoont'ah hooyah 'i bugħa 'ongħoh daja ni, 'et ts'iyawħ whebuntelħtun. ²⁰ 'Et Yak'usda ba sīyin 'ust'ah, tsak'esida whunts'i. 'Et huwa soo cho suba tenadahdli. 'Et 'aw wheħasaz hoh 'uyoon chah hubulħ yatelhtuk, 'ink'ez si ts'ah'un na'a 'uwhutesdlilh.

Ye unzoo, 'i nohwhulħu óot'e

²¹ Si nts'e na'a dast'en 'ink'ez si sts'un sulħ dahooja, 'et Tychicus 'en ts'iyaintsuk nuhduténih. 'En 'int'ah nelħutsin buk'ets'intsı', ndun neMoodihti 'en ts'ah'un na'a ba ne'út'en, 'en 'int'ah. ²² 'Et huwa ndun nuhts'ú telħ'a. 'Et sih dats'út'en t'eoħnoħżeh, 'ink'ez soo cho nuhdzi hoont'i yoolħ-silħ. ²³ Nuhwheni sulhutsinkah ts'iyawħ be nedzi dezghel, 'i nuhħġha tékulħ. Yak'usda ne'aBá 'ink'ez Christ neMoodihti 'en be, be nék'ets'intsı', 'i 'ink'ez be 'alha 'uħoont'ah, 'i bulħ nuhġha tet'alħ. ²⁴ Ndunnah Christ neMoodihti soo 'alha 'i be yuk'entsi', 'en ye unzoo, 'i bulħ 'utet'ilħ. 'Et ndoh honeħ.

Philippi Whut'en 'En Paul Hubuts'un K'e'anguz

Paul, Philippi whut'en, dahooja, hubulhni

¹ Nuwheni Paul 'ink'ez Timothy 'et Sizi Gri be 'ulhna ts'inli. Nuhwheni keyah Philippi whut'en ndunnah Christ, Sizi ts'utni, 'en bugha dune Yak'usda bube'ildzun 'aht'ah, 'ink'ez ndunnah huwunli 'ink'ez yula 'ut'en chah, nuhwheni ts'iyawh dahooja nuhwhuts'útni. ² Yak'usda ne'aBá 'ink'ez Sizi Gri neMoodihti, 'en ts'un ye unzoo, 'i 'ink'ez be nedzi dezghel, 'i nuhgha íni'ai, 'i ts'iyawh nohwhulh 'óot'e nuhwhuba hukwa' nuszun.

Nuhnalhúnih totsuk 'et huwa Yak'usda ts'un chanailya dusni

³ Nuhwhunalhúnih totsuk, 'et huwa Yak'usda ts'un chanailya dusni. ⁴ Tenadusdli totsuk hoonúst'i hoh nuhwheni ts'iyawh nuhwhuba tenadusdli. ⁵ 'Udechoo dzin 'ink'ez k'an 'et whuts'un ts'ianah khunek unzoo, 'i be yalhtuk, 'et nuhwheni chah sula 'aht'en. ⁶ Njan 'et suba nawh cha'hoot'ah, ndun nuhwheni nohwhulh ndi 'ut'en unzoo, 'i whe'yudílh'en, Sizi Gri budzin, 'et t'eh lhaídutelih. ⁷ Ts'ah'un 'ohoont'ah hukw'u na'a hubugha nuni nuszut. 'Et huwa sudzi yuh 'un whunusdzun. Nts'e na'a dast'ah njan 'utes tl'ool be whédust'uk, 'et whunts'ih ndi khunek unzoo, 'i ba síyin 'ink'ez ts'ianah t'ehontézin 'et 'alha 'ohoont'ah. 'Et whuz na'a nuhwheni chah ye unzoo, 'i ts'iyawh lhundúneltsuk hoh lhtats'úlya. ⁸ Yak'usda nallh 'ún whudusni, nts'e na'a Sizi Gri dudzi ndulhcho, 'i be nek'entsi', 'et whuz na'a si chah tube nuhwhuk'enúsdli. ⁹ Ndez na'a nuhwhuba tenadusdli, be t'éoonudzun, 'i be 'ink'ez ye whunih chah ts'iyawh 'i be, 'et whuz na'a be nek'ets'ints'i', 'et lhat lhuk'uz teh nuhwhuba whutéle. ¹⁰ 'Et whuz na'a ndet degha nus hoonzoo, 'et t'ewhuntehzeh. 'Et huwa Christ budzin ndet whusawhutélts'ulh, 'et nuhtsun hoolah 'ink'ez 'aw hoonliyaz nuhk'éholts'it whutélah. ¹¹ 'Ink'ez Sizi Gri 'en bugha 'ut'en ts'ah'un 'int'ah, 'i be dóohbun. 'Et whuz na'a Yak'usda ba ts'odóolhti 'ink'ez 'o nus uzdóolhti.

Christ 'en bughu yatuk

¹² Sulhutsinkah sulh dahooja, 'et whula gha ts'ih 'o nus lhanah dune ndi khunek unzoo, 'i hiyoozélhts'ai suli. 'Et t'ewhuntehzin hukwa' nuszun. ¹³ 'Et huwa hubudayi cho bukoo whucho, ndunnah lhahudughan 'ink'ez 'onghoh, 'en chah, 'et ts'ianah t'ehoninzun, Christ 'en bugha 'utes tl'ool be whédust'uk. ¹⁴ 'Ink'ez ndunnah neMoodihti be lhulhutsinkah hinli, 'en ndi 'utes tl'ool 'i bugha 'en 'o nus 'uhoolcho, 'i be whéchaniljut Yak'usda bughunek unzoo, 'i ye yatelhtuk ka. ¹⁵ 'Alha bulunah sughe' hoolnih, 'ink'ez suhundóolhdah hukwa' hut'en. 'Et whunts'ih bulunah si sts'un hubudzi unzoo. 'Et whuz na'a Christ 'en highu yailhtuk. ¹⁶ Ndunnah sughe' hoolnih, dich'oh 'ahuninzun hukw'u na'a, Christ 'en highu yailhtuk. 'Aw ts'ah'un na'a ilah 'uhut'en. Njan tsak'esida 'et 'o nus suba hoontsi' huhoohltsilh hukwa' hut'en. ¹⁷ 'Et whunts'ih bulunah 'en be nek'ets'ints'i', 'i be Christ 'en highu yailhtuk. T'ehonínzun ndi khunek unzoo, 'i ba njan siyin, 'et hukwa tsak'esahulh'ai. ¹⁸ 'Et nts'e na'a yahalhtuk 'et nduhóolcho suba 'ants'i 'ohoont'ah. Dich'oh duk'una'a tulih yahalhtuk k'us khunek 'alha 'int'ah tulih 'uhutni. Christ 'en highu yailhtuk 'et huwa hoonust'i. 'Ink'ez 'et whuz na'a hootést'i. ¹⁹ Nuhwheni ts'iyawh t'enwhunuszun, ndunnah suba tenahududli, 'ink'ez ndai Sizi Gri buyégha 'i be sula' whudiája, 'et 'i be 'et huwa sula nahudutetnih. ²⁰ Ndet hukwa tsi

hoosdli, 'et daoodulhúne nts'oh ne'ust'en, 'et whunts'ih 'aw hukwaya oosdle għait'ah. 'Et k'us whutsuh da ndést'en inle, 'et k'an 'et whuz na'a zeh 'utest'ilh, 'et huwa 'aw hukwaya chatesdle. Khusna k'us dasítsai 'et whuz na'a zeh be khusna, 'i be Christ 'et hoh délhti. ²¹ Ndez na'a suba njan nduhoont'ah, 'awhuz khusna zeh 'ust'ah t'eh, Christ, 'en zeh 'int'ah. K'us dasítsai, 'et t'eh whuch'a ootélhdoh. ²² 'Et 'awhuz khusna zeh 'ust'ah t'eh, se' 'ut'en i mai li'tenilh. Nts'e na'a 'utahaootes'alh 'aw t'eoonuzúszun. ²³ 'Et suba nawh 'uhooja njan 'et whéguz ninlhús'ut. Nts'e suba hoolhtus wule, 'et whuz na'a 'oosneh. Nduk Christ buts'un 'inkez buzih tesda hukwa' nuszun. 'Et degħa nus whutézoo ho' hoont'ah. ²⁴ 'Et whunts'ih dachásal t'eh, 'et 'o nus nuhwheni nuhwhuba whutézoo. ²⁵ 'Et whuz na'a degħa nus soō hoont'ah, 'et dulhcho suba 'alha 'uhoont'ah. 'Et huwa t'eoonuszun dachásal t'eh, 'ink'ez njan tesdalh 'ink'ez nuhwheni ts'iyawh nohwhulh zeh test'ilh. 'Et whuz na'a be nuhwhuba 'alha 'uhoont'ah 'o nus nteyeh, 'ink'ez 'o nus hootéħ'i. 'Et whuz na'a 'uwhutét'ilh. ²⁶ 'Et whuz na'a nuhghu nanúsja t'eh, 'et sih si sugħa lhk'uz teh Sizi Gri dutélhti.

Christ ba soo uznoot'uk 'ink'ez 'en ba dzuh nuts'oozut

²⁷ Nts'oh dahooja whunts'i, Christ bughunek unzoo, nts'e na'a nuhwhuba hukwa' ninzun, whuz na'a zeh yun k'ut delħús'i. Khun nohwhulh 'ust'ah, k'us nuhch'a 'ust'ah t'eh, ts'iyaintsuk nohwhulh údutests'o nuhyégha 'ink'ez nuhzul bulh 'ilho zeh wahyin. Ndi khunek unzoo, 'i be, be 'alha 'uhoont'ah ts'ít'ih, 'i be 'ilho zeh hukwa 'aħt'en. ²⁸ 'Ink'ez ndunnah nuhch'a detni, 'en hube noolħújut gunih. 'Et whuz na'a ndaħt'ah t'eh, 'et soō ts'et whucho wheóobunulħtun, 'en hoolah tele 'uhint'ah. 'Et whunts'ih nuhwheni dujih ahli. Yak'usda 'en nuhwhuba 'alha 'int'ah zeh ilah, buba dzuh nahdeh chah. ²⁹ Christ 'en ba ndez na'a nuħtl'awħelts'ut, 'aw nuhwhuba 'alha 'int'ah zeh ilah, buba dzuh nahdeh chah. ³⁰ 'Et huwa ndet dzuh nuszut, 'et whunulħen 'ink'ez whudahts'o, 'et nuhwheni chah whuz na'a zeh 'et ndaħt'ah.

2

Te'uzdudil'en hoh 'ilho zeh ts'ooke

¹ 'Et huwa Christ 'en nohwhulh 'int'ah nuhla' tenilh ka ih? Christ ye nuhwhuk'entsi', 'i be ih k'enanwhuna'ah? Ndoni 'ilho ih nohwhulh 'int'ah? 'Ink'ez nuhnts'un únzoo ih? 'Ink'ez nuhgha te'ninzun ih? ² 'Et whuz na'a 'uhoont'ah t'eh, 'et be hóonust'i, 'i ts'iyawh lhadáhla. 'Et nuhwhubeni ts'iyawh 'ilho 'ooħt'e. Be lhk'edahtsi', 'i chah 'ilho zeh 'uteħt'ilh. Nuhzul bulh 'ilho saħli li 'ooħt'e. 'Et hoh nts'e na'a daja nahzun, 'et 'ilho zeh wahle. ³ 'Et nuhwhenich'oh hukwa' nahzun zeh ne'óoħt'en, 'ink'ez ahcha na'dudoolħú'i gunih. 'Et whuch'a yuk 'ududulħúdzun 'ink'ez 'uyoon nuhghanus hinzoo noohzin. ⁴ Nuhwhenich'oh zeh khun nuni noohzut gunih. 'Et k'us 'uyoon chah hubugħu nuní nahzut hubula teħt'ilh ka.

Christ, Yak'usda unli, 'et whunts'ih te'dudil'en hoh ndi yun k'ut inda

⁵ Hoh da ndet Christ, Sizi ts'utni, 'en howu nuni nuzut, nuhwheni chah 'et zeh howu nuni noohdeh. ⁶ Yak'usda dant'ah, whuz na'a zeh 'int'ah. 'Ink'ez Yak'usda yundult'ah ho' 'int'ah. 'Et whunts'ih dich'oh Yak'usda yulħi lhúgha 'int'ah 'aw hoh cha'dudilħi. 'Et huwa 'aw Yak'usda għo tez'ai chanizun. ⁷ 'Et k'us ts'iyawh whuladetnik hoh be 'ulħna dahint'ah, 'et hóolħchoot, 'ink'ez dune nduwhūt'en suli. ⁸ 'Ink'ez dune nduwhūt'en hoh hinilħ'en 'ink'ez dich'oh ts'iyana hubugħan yuk 'int'ah na'dudulħútsi. Datētsah whuts'un de'aBá yuk'UNE' 'ut'en lhdulalhgħus k'ut datētsah 'et whunts'ih. ⁹ Et huwa Yak'usda ts'iyaintsuk għa ndoh yudálħti 'ink'ez boozi degħa nus hooncha hukw'u na'a yoozi whulħtsi. ¹⁰ 'Et whuz na'a ndi Sizi boozi, 'i bugħa ts'iyana

dugwutsi be hits'un nuhudútelya ho' hoont'ah. Yak'uz whut'en 'ink'ez ndi yun k'ut whut'en, 'ink'ez yun t'ah 'int'ah, 'en chah ts'iyawh. ¹¹ 'Et ts'iyawh lhelh yoo khunek be yahalhtuk, 'en ts'iyawh njan dawhúdutenilh, Sizi Gri neMoodihti 'int'ah. 'Et whuz na'a ndahútenilh, 'et Yak'usda ne'aBá, 'en hidutélti ho' hutni.

Ndi khunek be ts'ukhuna, 'i zeh soo cho oohtun

¹² 'Et huwa nuhwhuk'esi' nts'e na'a daht'ah nohwhulh —'ust'en inle hoh Yak'usda k'une' 'aht'en. K'an 'et 'aho 'aw nohwhulh cha'ust'ah, 'et whunts'ih 'o nus buk'une' 'aht'en tehle, 'et nuhts'un hukwa' nuszun. 'Et huwa soo ts'ah'un na'a 'un whudúsni, nts'e na'a dahjih inle, 'et whénlhujut 'ink'ez nuhwhuyust'e dulduz hoh 'et whuz na'a lhaoodáhleh hukwa 'aht'en. ¹³ Yak'usda 'en 'un whulh'en. Ndai yuka' ninzun 'ink'ez hoont'i hoh nts'e na'a hukwa' ninzun, hoh tuné'nohulh'en. ¹⁴ Ts'iyaintsuk hoh hiyena' 'udoohni gunih. 'Ink'ez khun teh lhch'a whunoohlú'i gunih. ¹⁵ Nuhk'ehóotelts'ulh, 'et whu'et 'uht'ah 'ink'ez soo nahtsun hoolah wahle, 'et whuz na'a Yak'usda buzkeh tehle, 'et hoh 'aw nuhk'e holts'it ghait'ah. Ndunnah tink'us 'uhint'ah 'ink'ez lubeshi degha nus ntsi' 'oleh hukwa' hut'en, 'en hubutah 'ulh'ek be whét'en, 'i k'una'a 'ooht'e. ¹⁶ Ndi khunek be ts'ukhuna, 'i zeh soo cho óhtun. 'Et whuz na'a Christ budzin t'eh, dahóolcho 'i be hootést'i. Hoh t'eh, whusúntelhtun niz de ndet hukwa 'est'en 'ink'ez ndai 'álh'en, 'i ts'iyawh 'aw 'ants'i 'et cha'úst'il. ¹⁷ 'Et whunts'ih be nuhwhuba 'alha 'uhoont'ah 'ink'ez Yak'usda ba 'aht'en, ndi Yak'usda bugha t'aih, li'int'ah. 'I k'ut be khusna, 'i nadésjul li'ust'ah, 'et huwa hoonúst'i, 'ink'ez ts'iyawh nohwhulh whúnelhnik. ¹⁸ 'Et hubugha zeh nuhwheni chah hoonáht'i 'ink'ez sulh whunelhnik.

Paul, Timothy yughu yalhtuk

¹⁹ 'Et Sizi neMoodihti 'en but'anínestan hoh Timothy 'aho nuhts'un telh'ah. 'Et whusanája t'eh, daht'ah sudáni, 'et sih hóst'i. ²⁰ 'Aw dune yulh ndult'ah hoolah. 'En soo cho nuhghutele. ²¹ 'Uyoon ts'iyawh dich'oh dude 'ut'en k'ah zeh hukwa hunuta, 'aw Sizi Gri be 'ut'en k'ah ilah. ²² 'Et whunts'ih Timothy nts'e na'a dune unli, nuhwheni ts'iyawh t'eoónúhzun. Dune buye' nts'e na'a de'abá yula 'ut'en, 'et whuz na'a zeh 'ulhna k'una'a ndi khunek unzoo, 'i be sula 'ut'en. ²³ 'Et huwa 'et njan nts'e na'a sulh dawhútenilh, 'et nahóó'ai t'eh, 'aw 'et sih nuhts'ún tóolh'a. ²⁴ 'Et whunts'ih neMoodihti 'en but'anínestan si chah 'aho nuhts'un tesyalh nuszun.

Paul, Epaphroditus yudálhti

²⁵ 'Et howu nuni nuszut, Epaphroditus 'en nuhts'un tóolh'a huba' hoont'ah. 'En nelhutsin 'int'ah. Sulh 'ut'en chah 'int'ah 'ink'ez 'ilhuh sulh lhudúghan idúdli. 'Et nuhwheni nuhwhuba khunek na'a chah unli. 'En 'int'ah ndet hukwa' nuszun, 'et nduhóolcho hoh sula 'ut'en. ²⁶ Hoh da ndun bulh údahts'o nduda inle. 'En hubugha budzi nduda 'ink'ez nuhwheni ts'iyawh nuhk'éninli. ²⁷ 'Ink'ez 'alha tube nduda. 'Ankw'us dazsai, 'et whunts'ih Yak'usda yugha té'nanzin. 'Aw 'en zeh ilah, si chah sugha té'nanzin. 'Et huwa 'o 'un lha'un teh tso chásdlah. ²⁸ 'Et huwa 'aooduneh be nuhts'un whelh'a. Ah'en t'eh, 'et sih hóht'i. 'Ink'ez 'aw tube sudzi chandoosdah. ²⁹ 'Et huwa neMoodihti 'en bugha hoonáht'i hoh koo danúlhti. 'Et ndunt'ah, hubudélhti. ³⁰ Christ 'en be 'ut'en k'ah huwa, 'ut'en buba lhai k'et, 'ankw'us dazsai. Dich'oh ye khuna, 'i whunts'i buba 'ants'i yint'ah. 'Et huwa ndet hoh sula' tehnih inle, ndai be sula cha'áhnil, 'i ts'iyawh dich'oh be sula 'uja.

3

¹ Sulhutsinkah njan 'et degha nus 'uhoont'ah, 'et ndun whudusni. NeMoodihti 'en bulh ts'ónilhnik! ndai nuhts'ó k'e'aguz, 'i zeh 'int'ah. 'Et whunts'ih

suba 'ants'i hoonli, 'ink'ez bé dóohjih sih. ² Ndunnah dune lhikah li'hint'ah buch'a huwahli. 'Ink'ez ndunnah 'ut'en ntsi' 'ulh'en, 'en chah buch'a huwahli. 'Ink'ez ndunnah hika dune unli 'i ka hubuhut'az, 'en chah buch'a huwahli. ³ 'Et nuwheni ts'ah'un na'a nets'ant'az 'et huwa. 'Ink'ez nuwheni Ndoni 'en be Yak'usda ts'un teni' uznilhdzun. 'Ink'ez Christ, Sizi ts'utni, 'en ba ts'odelhti. 'Ink'ez neyust'e k'ah ts'ih 'et 'aw whut'anachats'unítan. ⁴ 'Et whunts'ih si chah hukwa' nuszun t'eh, suyust'e k'ah ts'ih, 'et zeh whut'anínustan, 'et whunts'ih hukwa cha'núszun. Soo cho whunulh'en, 'et 'uyoon chah buyust'e k'ah ts'ih 'uhint'ah, 'et si 'o nus whuz na'a 'ust'ah. ⁵ Whuzíli whuts'un lhk'udit dzin 'et nts'e na'a buka dune ts'inli k'ut nehoot'as, 'et ndusíhina. Israel buts'uh haizut usdli. Benjamin bulh hudedowh, 'en 'ilhunuh 'ust'ah, 'ink'ez Hebrew bughunek k'ah ts'ih degha nus soo yalhtuk 'ust'ah. 'Ink'ez ndunnah Pharasee, 'en dahoont'ah hoh Moses be' dustl'us k'une' hut'en, 'et si chah hubulh désdowh 'ust'ah. ⁶ Soo tube cho hoolhtus hoh 'ust'en. 'Ink'ez ndunnah Yak'usda ba 'ilhunahuwúdulh, 'en dzuh nobulhdeh inle. 'Ink'ez nts'e na'a dune Moses be' dustl'us be ts'ah'un 'int'ah tele t'eh, 'et huwa 'aw hoh sk'eóotelts'ulh hootélah hoh 'ust'ah. ⁷ 'Et whunts'ih nduhoolcho hoh 'o nus suba hoonzoo sutelhtsilh inle, 'et Christ 'en ba 'ants'i 'et 'ést'en whuzdli 'et nahoo'ai. ⁸ 'Aw 'et zeh ilah 'un whudusni, Christ, Sizi ts'utni, 'en suMoodihti dant'ah t'ezninzun, 'et hooncha k'et 'aw uzdooni ghat'ah. 'Ink'ez ndai niz de nts'oh tune'zust'en hoh, dáhoont'ah bughu t'eoónúszun, 'i bugha sghu hóolhchoot t'eh, 'et nduhóolcho whuladesnik. 'I ts'iyawh 'un tukat, 'i suba 'unli 'et huwa 'o nus Christ t'enooszeh ka. ⁹ 'Ink'ez 'en buyudúsda. Ndi Moses be' dustl'us, 'aw 'i bugha ts'ah'un dune chásdlah inle. 'Et k'us Christ suba 'alha 'int'ah 'et huwa ts'ah'un dune síli. Ndi be ts'ah'un na'a be dune ts'inli, 'i, be 'alha 'uhoont'ah 'i be Yak'usda ts'un hawhúlt'suk. ¹⁰ 'Et Sizi Gri 'en soo cho t'enteszeh hukwa' nuzzun. Ye ulhtus, 'i be dinadilhti, 'ink'ez dahoont'ah hoh dzuh nusuzut, 'et chah t'ewhunteszeh. 'Et nts'e na'a dazsai, si chah whuz na'a zeh 'utesnilh. ¹¹ 'Et 'alha 'uhoont'ah, si chah yahadla tah ye dinadija, 'et si chah nduchah ndúsjá.

Nduk whuz zeh hukwa' ts'oot'en

¹² 'Awhuz 'aw nduhoolcho huba soo cha'ust'ah. 'Ink'ez soo 'et lhadúlya síli, 'aw howu yachazulhtuk. 'Et whunts'ih nust'uk zeh 'ust'ah. Di ka Christ, Sizi ts'utni, 'en silhchoot, 'et whuz na'a si chah itélhcholh. ¹³ Sulhutsinkah sich'oh ndi 'awhuz 'aw hóolhchoot chanuzúszun, 'et whunts'ih 'ilhunuh huba zeh 'et ndust'en. Ndi niz sulh ne'whust'en, 'i ts'iyawh bunasulhúnah, 'ink'ez sutsuh 'uwhet'ilh, 'i zeh wúlhchoot hukwa 'ust'en. ¹⁴ Christ, Sizi ts'utni, 'en be Yak'usda ndai nduk negha whúte'alh, 'et whuts'un zeh hukwa 'ust'en. ¹⁵ 'Et huwa ndunnah lhadulya, 'en chah whuz na'a zeh nuni hunoodeh, 'ink'ez nuhwheni 'uts'un na'a 'unahzun t'eh, 'et whunts'ih ts'iyawh Yak'usda t'enohwhuntelhdzeh. ¹⁶ 'Et whunts'ih ndet 'uda neghá whults'ut, whuz na'a zeh nuts'óodelh 'ink'ez lhk'una'a zeh nuni uznoodleh.

'Aw 'et ndi yun k'ut uzdelhts'i 'et whunts'ih yak'uz nekeyah ho' hoont'ah

¹⁷ Sulhutsinkah sk'una'a 'aht'en. 'Ink'ez 'uyoon si sk'una'a neMoodihti ba yinkak húdelhts'i, 'en chah bunulh'en. Nuwheni nek'ah ts'ih 'ooht'e ka 'uts'int'ah. ¹⁸ 'Et whunulh'en lhanah ndi yun k'ut húdelhts'i hoh 'en Christ bulhdulalhgus ch'a detni 'uhint'ah. Ndunnah tso bulh lhat 'un whudáni. Doo chah zeh snatsul too hoonli hoh 'un whudúsni. ¹⁹ 'Et ndunnah huba 'alha cha'hoott'ah tinta' hutet'ilh. Hubut 'i buba Yak'usda unli. Ndi yun k'ut hooya ts'iyawh hiyulh 'int'ah 'ink'ez 'i zeh hiba whudélhti. Ndi yun k'ut hoonli, 'i zeh ghu nuni hunoodeh. ²⁰ Nuwheni 'et yak'uz nekeyah ho' hoont'ah 'et huwa. 'Et whuts'un neulhyis nets'u teyalh, 'et huba níznindel. Sizi Gri neMoodihti, 'en 'int'ah. ²¹ 'Ink'ez neyust'e tel'en, 'i buyust'e dézti, 'i k'una'a 'int'ah yutelhtsilh.

Ndai ye ulhtus, 'i be ts'iyaintsuk buk'une' whut'en, 'i be 'uyoo neyust'e neba itelhsilh.

4

¹ 'Et huwa sulhutsinkah nuhwhuk'esi', nuhk'énisli chah 'ust'ah. Nuhwheni nuhgha hoonúst'i, 'ink'ez nuhwheni suba be whuch'a whundeh ahli. Nuhwhuk'esi', neMoodihti 'en ba soo cho nudelhúya. ² Nuhwheni ts'ekoo Euodia 'ink'ez Syntyche, nuhts'u tedusdli, neMoodihti 'en be lhk'una'a zeh nuni nuhzut.

'ink'ez tenazdoodli

³ 'Ink'ez nyun ts'ah'un sulh dune inli, nts'u tedusdli, ndunnah ts'ekoo, khunek unzoo, 'i be sula 'ét'en, 'en bula 'oneh. Clement, 'en chah, 'ink'ez 'onghoh chah sula 'uhét'en, 'en ts'iyawh ndi dustl'us be ts'ukhuna huboozi k'e'usdúguz, 'i k'ut 'en chah huboozi 'uk'une'úsduguz. ⁴ NeMoodihti 'ahoolhyez 'en be whunélhnik! Doo chah zeh 'udusni, whunélhnik! ⁵ Ts'iyanaah dune soo ne'bulh'en. NeMoodihti whusanátedalh 'aw 'et wheghah 'úhoont'ah. ⁶ Hoonli huwu ni wahle gunih! 'Et k'us ts'iyaintsuk huba tenadahdli. 'Ink'ez tedahdlih, 'ink'ez chanailya dóohni. Ndai be ndunuhdzit, 'i ts'iyawh Yak'usda ts'un buka' dahni. ⁷ 'Ink'ez Yak'usda be nedzi dezghel, 'i hooncha k'et 'aw t'eznoozeh ghat'ah. 'Et Christ, Sizi ts'utni, 'en be ndi nedzi dezghel, 'i nuhdzi yuh 'ink'ez nuhwhubeni yuh chah 'et ts'iyawh yughu tele.

Ts'iyawh ndet nuhwhuba whudézti, et zeh howu nuni noohzut

⁸ Sulhutsinkah ndi khunek, 'i 'udek'elh'az 'int'ah. Ndai 'alha 'int'ah, ndai k'us hóncha, ndet ts'ah'un 'uhoont'ah, ndai netsun hoolah, ndai unzoo, ndet 'et hoonzoo howu yats'ulhtuk, ndi ts'iyawh nuhwhuba whudézti t'eh, 'et zeh howu nuni nahdeh. ⁹ Ndet si sugha hoodelhú'i, ndai sughunek ulhchoot, whudáhts'o, nuhnalh 'ést'en, 'et sih, whuz na'a ne'ooht'en. 'Ink'ez Yak'usda be whudezghel, 'en sih nohwhulh 'óot'e.

Philippi whut'en dahúdzoo

¹⁰ 'Et sa inle hoh doo chah sughu nuní nahzut 'ink'ez 'ahoolhyez sunalhúnih, 'et whunts'ih sula' teht'ilh 'aw nuhgha chawhulhts'it. 'Et huwa neMoodihti 'en be tube hoonúst'i. ¹¹ 'Aw be ndunusdzit, 'i bughi yachasúlhtuk. Nts'e na'a dast'ah, 'et whunts'ih hoonúst'i. 'Et whuz na'a hodelhú'i. ¹² T'eoonuszun nts'e na'a hoonliyaz whezdunidzit, 'ink'ez lhai ust'i, 'et chah t'eoonuszun. 'Et huwa nts'oh dahoont'ah whunts'i suye'últs'ilh, 'ink'ez unus-dai, 'ink'ez 'ulhúdlai, 'ink'ez 'endunúsdzit, 'i ts'iyawh nt'eoonuszun. ¹³ Christ ye úlhtus, 'i sugha ooní'ai, 'et huwa 'en be ts'iyaintsuk 'uwhulh'en. ¹⁴ 'Et whunts'ih dzuh nusízut huwa, 'et hoonzoo hoh 'ahja sula 'eht'en. ¹⁵ Philippi whut'en, nuhwheni zeh sula 'áhja. 'Udechoo khunek unzoo, 'i be yawhenilhtuk hoh, 'ink'ez hukw'elh'az yun k'ut Macedonia howu natésja, ndunnah Yak'usda ba 'ilhunahuwúdulh ts'iyawh, 'aw 'ilhunuh whunts'i hoonliyaz sgha cha'í'al. Nuhwheni zeh 'et ndúsahla. ¹⁶ Keyah Thessalonica 'et sída hoh, ndai chást'i inle, nat lhk'élh'az suts'ó tl'ah'ai. ¹⁷ 'Aw hoonliyaz sugha' teh'ah, 'i 'aw nuwhuts'o hukwa' nuszun ilah. Nus de nuhwhuba 'uk'elha tele, 'i zeh nuhwhuba buka' nuszun. ¹⁸ 'Alha ts'iyai lhai ust'i. Epaphroditus 'en be ndai sutsuh tl'ahla, 'i ts'iyawh ílhchoot, 'ink'ez 'unésdai. Sooltsun, 'i ndulhcho hoh buzahooltsun li'int'ah. 'I huwa t'ah 'int'ah. 'I be Yak'usda tube cho hoont'i. ¹⁹ 'Ink'ez Christ, Sizi ts'utni, ye dézti, 'i bugha suYak'usda ndai be ndunáhdzit, 'i, ts'iyawh nuhgha ítelelh. ²⁰ 'Et neYak'usda 'ink'ez ne'aBÁ, 'en ts'un 'ilhuz wheni tube cho uzdélhti. 'Et ndoh honeh.

Ts'iyanaah dune Yak'usda bube'ildzun, en ts'iyawh dahooja hubudóohni

²¹ Ndunnah Christ, Sizi ts'utni, 'en be dune Yak'usda bube'ildzun, 'en ts'iyawh dahooja suba hubudóohni. 'Et ndunnah sulhutsinkah suzih húdelhts'i, 'en chah dahooja nuhowhútni. ²² Ink'ez dune Yak'usda bube'ildzun, 'en njan húdelhts'i, 'en ts'iyawh dahooja nuhuwhútni. Ndunnah Ceasar bukoo húdelhts'i, 'en soo dahooja hutni. ²³ NeMoodihti Sizi Gri ye unzoo, 'i, nuhwheni ts'iyawh nohwhulh 'oot'e. 'Et ndoh honeh.

Paul, Colossia Whut'en 'En Hubuts'un K'e'anguz

Clossia whut'en Paul dahooja hubulhni

¹ Si Paul Sizi Gri 'en be whel'a 'ust'ah. Yak'usda whuz na'a suba hukwa' ninzun. 'Ink'ez nelhutsin Timothy, 'en bulh, ² nuhwheni Colossia whut'en ndunnah Christ bulh dahooja nuhwhuts'útni. Christ 'en buyudelhúts'i. Yak'usda bube'ildzun ahli. Nuhwheni nelhutsinkah huba 'alha 'uhoont'ah ahli. Yak'usda ne'aBá 'ink'ez Sizi Gri neMoodihti, 'en ts'un nuhdzi dóoghel 'ink'ez ye unzoo, 'i chah nohwhulh óot'e ka, 'et whuz na'a zeh 'ooht'e hukwa' nuszun.

Dahoont'ah hoh Christ, Sizi ts'utni, 'en nuhwhuba 'alha 'int'ah

³ Et Yak'usda Sizi Gri neMoodihti be'aBá, 'en ts'un chanailya ts'utni, 'ink'ez 'ahoolhyez nuhwheni nuhwhuba tenazdudli. ⁴ Nuhwheni nohwhulh uzdits'o dahoont'ah hoh Christ, Sizi ts'utni, 'en nuhwhuba 'alha 'int'ah 'ink'ez dune Yak'usda bube'ildzun unli, 'en ts'iyawh buk'ehtsi'. ⁵ Ndai yak'uz ts'ih nuhwhuba 'ilhowezkat, 'i buka tsi hóhli. 'Et huwa buk'eoohetsi', 'ink'ez ts'ah'un khunek unzoo, 'i whutsuh da whulh údahts'o. ⁶ Nts'e na'a khunek unzoo, 'i ndi yun k'ut ndulhcho hoh núdelhts'ut 'ink'ez 'i be 'uznesdai li'hint'ah. Nuhwheni chah whuz na'a zeh nuhghu delts'ut. Ndet dzin 'udechoo whudáhts'o hoh khunek 'alha 'int'ah 'i bugha Yak'usda ye unzoo, 'i t'ewhunehzin, 'et whuz na'a 'o nus soo náhyeh. ⁷ Epaphras 'en 'ilhunuh be ne'úst'en, 'en nelh 'ut'en 'int'ah 'ink'ez buk'ets'ints'i. 'En bugha ye unzoo, 'i bodulhú'eh. 'En nuhwheni nuhwhuba Christ 'en yuba 'ulhna unli 'int'ah, 'ink'ez 'aw nuhla dootnih għait'ah. ⁸ 'Ink'ez Ndoni be ts'iyana k'ehtsi', nuwhúlhni.

Christ 'aw 'en zeh ts'iyaintsuk ch'a dezti 'int'ah

⁹ 'Et whulagha ts'ih ndet dzin whulh 'úzdants'o da, 'et whuts'un nuhwhuba tenazdudli, 'aw 'ustl'e' cha'ts'udésni. Whuz na'a Yak'usda nuhwhuba ts'oodulhkut nuhts'o hukwa' ninzun, soo ts'ah'un na'a t'ewhunoohzeh. 'Et hoh Ndoni 'en be, be whutnih, 'ink'ez be t'eoonudzun, 'i ts'iyawh be dutéhbun. ¹⁰ 'Et neMoodihti 'en ba soo ts'ah'un na'a ndi yun k'ut delhúts'i. Ndai 'ulh'en, 'i ts'iyawh yé hot'i. 'Ut'en unzoo, 'i buts'un hayóokat, 'ink'ez Yak'usda 'o nus t'entehzeh. ¹¹ Ye ulhtus, 'i dézti, 'i ts'iyawh 'i be 'o nus ulhtus wáhle. 'Ink'ez hoonáht'i soo hoonli tachaoodahtnik 'ink'ez dzuh nahdeh whulh nudelhúya. ¹² 'Ink'ez ne'aBá chanailya dahni. Dune Yak'usda bube'ildzun, 'en be whét'en, 'i buniz nudelhúya, 'en ndai yit'i, 'i hubugha ítelelh 'i bulah negha tekulh, 'et nuwheni soo ts'uldzoo nesulhtsi. ¹³ Ne'aBá ndi tsahólhgus yuh ulhtus, 'i ts'un hanáhonla, 'ink'ez buYe' yuk'entsi', nts'e whuhubu-dayi cho unli, 'et nenáneninla. ¹⁴ 'En duduzkai be nenaonket. 'Et hoh nelubeshi ts'iyawh neba 'un yutelhdel. ¹⁵ Yak'usda 'aw chast'en ho' 'int'ah 'et whunts'ih buYe' 'en yundult'ah ho' 'int'ah t'ets'oninzun. Ndi ts'iyaintsuk 'ulya, 'i 'udechoo whuzdli unli, 'et huwa ts'iyawh whumoodih unli. ¹⁶ 'En be ts'iyaintsuk 'ulya 'et huwa. Ndai yak'uz 'ink'ez ndi yun k'ut, ndai uznilh'en, 'ink'ez chats'és'en chah. Ndunnah yak'uz ts'eh kw'uts'uzda cho dézti, 'i k'uhudelhts'i, 'ink'ez nududeh wheúlhtus. Ndet neba moodih unli 'ink'ez be nek'úne'whul'en chah. Ndi ts'iyaintsuk, 'en bugha 'úhoolya 'ink'ez buba' hóolya. ¹⁷ 'En 'int'ah ts'iyai 'et whutsuh da unli, 'ink'ez 'en bugha ts'iyai lhube'whudilhtun. ¹⁸ 'Ink'ez Yak'usda ba 'ilhunahuwúdulh, buyust'e hinli,

'en butsuh whudéldzulh 'int'ah. Ndun 'udechoo whe' whudílh'en, 'en 'int'ah. 'Ink'ez yahadla hubutah, 'en 'udechoo whuzdli 'int'ah. 'Et whuz 'aw 'en zeh ts'iyaantsuk ch'a dezti 'int'ah ho' hoont'ah.

Christ, 'en bugha be'aBá duts'un nelh soo ninaghunt'ai

¹⁹ Yak'usda hoont'i hoh nts'e na'a dant'ah, buYe' yulh lhulhgha 'int'ah ho' 'int'ah. ²⁰ 'En bugha ts'iyaantsuk 'ink'ez nuwheni chah be'aBá duts'un dune bulh soo ninaghunt'ai. Ts'iyaantsuk ndi yun k'ut 'int'ah 'ink'ez yak'uz chah 'et whunts'ih, lhdulalhgus k'ut buzkai yun nadélt'ik, 'i be whudezghel neba whulhtsi. ²¹ 'Ink'ez hoh da nuhwheni chah Yak'usda buch'a nisinzut 'aht'ah inle. Nuhwhubeni be buch'a dehnti ahli inle, 'ink'ez hoontsi' tune' zaht'en. 'Et whunts'ih duts'un dune bulh soo ninaghunt'ai. ²² BuYe' ndi yun k'einya hoh nuwheni nek'una'a buyust'e whuzdli, 'ink'ez 'i be neba dazsai. 'Et huwa 'aw 'o 'un nelh chahiskah. 'Et hoh nuhtsun hoolah tele. Nuhk'éholts'it chah ghait'ah. 'Ink'ez 'aw 'o 'un nuhch'a yaootuk ghait'ah. 'Et whuz na'a be'aBá ts'un nuhwhutelilh. ²³ Be nuhwhuba 'alha 'uhoont'ah soo duts'o, 'i be óhtun. 'Ink'ez whuduts'o koo buk'uwhuz'ai, 'i li'aht'ah. 'Ink'ez khunek unzoo, 'i bulh udahts'o, ndi khunek buka tsi hóohli khun bula doohtnih gunih. Ndi yun k'ut nduhólcho hoh ndi khunek unzoo, 'i bugha ídelets'ut. 'Et huba si, Paul, Christ ba ne'ust'en síli.

Soo hooltus hoh 'ust'en

²⁴ K'an 'et Christ 'en bugha nuhwhuba dzuh nuszut hoonúst'i. 'Et ndai suyust'e k'ah 'uhoont'ah 'i be 'en buyust'e ba lhaooodutesdlelh. Ndi buyust'e, 'i Yak'usda ba 'ilhunahuwúdulh, 'et 'uwhúlhni ²⁵ 'Et huba huba ne'ut'en síli. Yak'usda ye soo whulh'en, 'i ndet nuhwheni nuhgha sugha whunt'ai, 'et hoh nuhwhuba bula 'ust'en síli. 'Et whuz na'a Yak'usda bughunek ts'ah'un na'a lhaooodutesdlilh. ²⁶ Njan whe' hoont'ah hooyah, 'aw niz de haoodanzut whuts'un, ts'iyanah buch'a whunest'i. 'Et whunts'ih 'aw 'et dune Yak'usda bube'ildzun, 'en nuhwheni ts'iyawh ts'et gaih newhunénelhtan. ²⁷ Ndi whe' hoont'ah hooyah, 'et t'ets'ontezeh 'et Yak'usda nets'u hukwa' ninzun. Dawhuldzoo 'ink'ez dahoolcho 'uhoont'ah 'ink'ez 'udun yun k'ut whut'en, 'en buba' hoont'ah. Christ 'en nuhyudínda, 'et 'uhoont'ah. 'En 'int'ah ndi Yak'usda ye dézti, 'en bugha 'i buka tsi hoohli. ²⁸ 'En bugha ts'iyanah bulh yats'ulhtuk. Be whutnih, 'i be ts'iyanah bugha ts'útni, 'ink'ez ts'iyawh whubuts'odulh'eh. 'Et sih ts'iyanah Christ, Sizi ts'utni, 'en be lhadulya 'uhoot'e. 'Et whuz na'a zeh 'uhint'ah hoh ne'aBá buts'un buztelelh. ²⁹ 'Et huba soo hooltus hoh 'ust'en. Nts'e na'a ye úlhtus, 'i be nulhtus 'ust'en, 'et 'uwhultus hoh hukwa 'ust'en.

2

Ndi njan yun k'ut hubughunek, 'i 'aw Christ yulh nduchaít'ah

¹ 'Et nuhwheni, ndunnah Laodicea whut'en, 'en chah, 'ink'ez ndunnah 'aw chasuhí'il, nuhwheni ts'iyawh t'ewhunehzeh 'et nuhts'u hukwa' nuszun, dahoolcho, 'i be soo hooltus hoh nuhwhuba hukwa 'ust'en. ² 'Et budzi nduk na'oonteh 'ink'ez be lhk'ets'udutsi', 'i be 'ilho nahoodle. 'Et whuz na'a ndet Yak'usda be whe' hoont'ah hooyah, daooneltsuk hoonzoo, 'i be 'uhoont'ah, 'i ts'iyawh soo ts'ah'un na'a t'ewhunteszeh. Ne'aBá chah 'ink'ez Christ chah, 'en bugha 'uhoont'ah. ³ Dawhuldzoo, 'i be ts'uwhuni, 'ink'ez daldzoo, 'i be t'eoónúdzun chah, 'i ts'iyawh Christ 'en buyuh ts'ih neba nonulh'i. ⁴ Njan 'et 'un whudusni khun 'uyoon soo yahulhtuk 'et nanwhunoo'ah gunih. ⁵ 'Aw suyust'e be nohwhulh cha'ust'ah. 'Et whunts'ih suyéghah 'i be nohwhulh 'ust'ah. 'Ink'ez hoonust'i hoh ts'ah'un na'a ne'aht'en 'ink'ez Christ ye úlhtus, 'i be nuhwhuba 'alha 'int'ah, 'et ts'iyawh t'eoónúszun. ⁶ 'Et huwa nts'e na'a neMoodihti, Christ, Sizi ts'utni, 'en úlhchoot, 'et whuz na'a ndi yun k'ut

delhúts'i. ⁷ 'En be nuhghih whuzdli li'aht'ah, 'ink'ez 'en be ulhtus sáhli. 'Et whuz na'a nuhwhuba 'alha 'uhoont'ah, 'en bulh 'ilho wahle ka. 'Et nts'e na'a whunanohodalhi'i, 'et hoh 'o nus ulhtus tehle. 'Et huwa lhk'uz teh chanailya dáhtni. ⁸ Soo cho khohdle doo ka 'uyoon nanwhunoo'ah buk'úne' 'ooht'en ka. Nts'e na'a dune dich'oh duk'una'a nuní hunuzut, k'us 'ants'i khunek be yáhalhtuk, k'us dune dich'oh duk'ah ts'ih 'uhutni, k'us ndi yun k'ut hubuk'úna'a hoh dune hohodalh'i chah, 'aw njan Christ ts'un hachahoozulh. ⁹ Yak'usda dant'ah unli, 'et Christ 'en chah ts'iyawh 'ilho buyust'e zeh yudinda 'et huwa. ¹⁰ 'Ink'ez nuhwheni chah buyudelhúts'i, 'et huwa lhadáhja sahli. Njan ndet neba moodih unli 'ink'ez be nek'úne'whul'en chah, Christ 'aw 'en zeh ts'iyaintsuk k'une' whul'en.

Ndi Moses be' dustl'us buk'une' ts'ut'en, Christ ts'iyawh neba hoolah whulhtsi

¹¹ 'Ink'ez 'en bugha nuhwhúzt'us li'aht'ah. 'Aw dune bula be cha'hóonil. Lubeshi nuhyust'e be 'ulh'en, 'i, ts'iyawh nuhyust'e yuch'a nayuzdla. Whuz na'a Christ nuhwhúzt'us li'aht'ah. ¹² Too be 'ulhúneh hoh 'et hiyulh 'anwhalhti lí'aht'ih. 'Ink'ez Yak'usda be 'ut'en, 'i be yahadla tah Christ dinabudinla, 'et nuhwhuba 'alha 'uhoont'ah. 'Et 'i be nts'e na'a dinabudinla, 'et whuz na'a nuhwheni chah hiyulh dinanwhudinla ho' hoont'ah. ¹³ 'Ink'ez nuhwheni tinta' aht'ih 'ink'ez nuhyust'e k'ut 'aw chanwhuhít'us, 'et huwa dasáhtsai hoh aht'ah. 'Et whunts'ih k'an 'et 'en bulh nakhúhna hoh aht'ah. Ts'iyawh hoh tink'us 'úts'et'en neba whuladetnik. ¹⁴ Dune ne'hutet'en Moses bughunek 'uk'une'úsduguz, 'i nech'a 'uhoont'ah, 'et ts'iyawh neba whusanáho'ai. Ndi yuk'e'ánguz, 'et neba nets'oh 'uhoont'ah. 'Et huwa 'aw whenghut ts'óoya għait'ah. 'Et Sizi ndi khunek yílhchoot 'ink'ez lhdulalhġus k'ut wheyundunilh'o hoh ts'iyawh neba hoolah whulhtsi. ¹⁵ Ndi ndet neba moodih unli 'ink'ez be nek'úne'whul'en chah, 'et ts'iyawh bughu nahóolchoot, 'ink'ez ts'ianah nalh hooya ubulhtsi. 'Et huwa buch'a' nilhde. ¹⁶ 'Et huwa ndai ah'ah, ndai ahtnai, k'us budzenis whudézti, k'an 'ulh'ek ooza, 'ink'ez Lizwif nahulyis dzin chah, ndi 'i ts'iyawh 'et hubugha nuhwhudolhtsi' gunih. ¹⁷ 'Et ndi 'ants'i tsagwusts'it li'hoont'ah. 'Et whunts'ih ndet nus de whusawhutelts'ulh, Christ bube'ildzun 'uhoont'ah, 'et zeh ts'ah'un 'uhoont'ah. ¹⁸ Ndet whuch'a oonúlhde nuhghá whults'ut, khun 'uyoon nuhghu haóoduntet'ah t'eh, khun hubuk'ah ts'ih 'oohnah gunih. Ndut'en huhoont'i hoh huwhuts'it dudzi yuh 'uhilhdzun na'hududil'i. 'Ink'ez lizas ts'un tenahududli. Ndet 'aw chahuhóo'il chah t'ehonínzun na'hududil'i. 'Ink'ez buyust'e whuts'u nint'uk, 'et whuz na'a 'uhuninzun. 'I be 'ants'i nahudúchun li'hut'en. ¹⁹ 'Ink'ez Sizi netsuh whudélhdzulh, 'en buyust'e 'uts'int'ah. 'En 'aw soo cho chahiyoootun. 'Et whunts'ih 'en bugha 'o nus ts'ilhtus 'ulheh. 'Ink'ez 'en bugha ts'iyawh 'ilho uzteleh. 'Et whuz na'a buyust'e nuyeh. Ndai nuyeh, 'i Yak'usda 'en 'uhóonla. ²⁰ 'Udak'ez ndi yun k'ut nuhwhuba 'alha 'uhoont'ah, 'et whuch'a Christ 'en bulh dasáhtsai li'ahja. 'Ink'ez k'an 'et dzin 'et di ka 'awhuz hukw'úne' aht'en? ²¹ But'aghóohnalh gunih! Khun ólkah gunih! Nóhle gunih! 'Et zeh whenhóodalh'i. ²² Ndi ndunt'ah, 'i ts'iyawh hoolah whulhih. Ndi khunek netl'adet'ai, 'ink'ez dune whunhodalh'i, 'et whuz na'a zeh 'uhoont'ah. ²³ 'Et ts'iyawh be ts'uwhunih bulh 'int'ah li'int'ah. 'Et hoh dune dich'oh duk'una'a tenahududli huwhulhtsi. Te'hududil'en na'hududil'i. 'Ink'ez buyust'e dzuh nehiyulhdzut. 'Et whunts'ih ndi ts'iyawh 'aw hoonli chahoolah. 'Et ndúhoont'ah ts'iyawh 'aw neyust'e lubeshi whuts'u nint'uk, 'aw 'et whuch'a nela 'ewhudoneh għait'ah.

3

Neyust'e lubeshi whuts'u nint'uk whulazdootni 'ink'ez Christ nets'u hukwa' ninzun, 'et zeh hukwa' 'uznoozin

¹ 'Et huwa Christ 'en bulh dinadahdel t'eh, 'et nduk yak'uz ts'ih dahoont'ah 'et zeh hukwa' ntehzilh. 'Et Christ Yak'usda nalhnih ts'ih yuzih usda. ² Nduk yak'uz ts'ih dahoont'ah 'et zeh nuhwhubeni tah whudólh'a, ndi yun k'ut 'ohoont'ah, 'et huwununi cha nusóohzut. ³ Dasáhsai li'aht'ah 'ink'ez 'ilhuz be kháhna, 'i Christ 'en bulh Yak'usda bulh 'ilho sahli li'ahja. ⁴ Christ be ts'úkhuna, 'en 'int'ah. 'Ilhudzin ts'iyanah ba be hooduteltsilh, et nuhwheni chah ye dézti, 'i be 'en bulh whuz na'a 'utehnilh. ⁵ 'Et huwa ndi yun k'ut nuhyust'e daootsah howa nélhtih. Tinta cha'zooh't'en, tinta' ts'ut'ih, 'ink'ez whudutsun tune' 'ooht'en gunih, 'ink'ez tinta' uztet'ilh, 'et hukwa cha'uznooszin, hoontsi' tune' uteht'en hukwa' noohzin gunih, 'ink'ez 'uyoon yit'i ka' noohzin gunih, 'et 'uk'edéltsi neba 'alha 'intáh li'hoont'ah. ⁶ 'Et bulagha ts'ih, ndunnah nduhut'en, 'en hubugha Yak'usda ye hunilch'oh, ndunnah hik'unucha'ust'en, 'en ts'iyawh hubuts'u whélts'uh. ⁷ Hoh da nuhwheni chah 'et zeh ndáht'en inle. ⁸ 'Et whunts'ih k'an 'et njan daht'en ts'iyawh whuladoohtnih huba' hoont'ah. Huzahke, hunlhúch'oh chah, k'udáht'en, Yak'usda ch'a yalhtuk, khunek untsi', 'i bé yalhtuk, ⁹ 'ink'ez nalhunooh't'ah gunih. 'Et 'uda dats'int'ah inle, 'un whutulhdelh 'et huwa. ¹⁰ 'Ink'ez k'an 'et 'uyoon nasahdli. 'Et ndan whuz na'a 'un whínla, ndet bugha t'ets'oninzun, 'et 'i be 'o nus ulhtus nats'usdli. 'Et hoh nts'e na'a Christ unli, 'en buk'una'a 'uts'oot'e ka. ¹¹ Ndunnah huba 'alha 'ohoont'ah, 'en ts'iyawh lhunduhúlt'ah. Greek k'eyahalhtuk k'us Lizwif whut'en, yuka dune unli, 'i k'ut ts'ut'us, k'us 'aw chahídut'us chah, nts'iz de hainde k'us Scythia whut'en chah, 'ulhna k'us hubula nahudetnik dune chah, 'en ts'iyawh. 'Et whunts'ih Christ 'en zeh ts'iyai unli 'ink'ez ts'iyawh nelh 'int'ah.

Dant'ah k'an dune nasdzi

¹² Yak'usda 'utahanhónla 'et hoh bube'ildzun ahli, 'ink'ez nuhk'entsi'. 'Et huwa ndez na'a 'óoh't'e. 'Uyoon hubugha te'noohzin, 'uyoon ts'un wahzoo, yuh 'ududoolhúdzin, 'uyoon soo nilyaz ne'boolh'en. 'Ink'ez ts'iyaantsuk sa hoh dzuh nutehzut 'et chah whulh wahyin. ¹³ Lhulh soo' ts'int'ah, 'ink'ez ts'iyaantsuk lhuba whunaooodulhúnah. Nuhtah 'ilhunuh 'uyoon k'ehoo'ai t'eh, nts'e na'a Christ nuhwhuba whunaoodelhúnah, nuhwheni chah whuz na'a zeh huba whunaooodolhúnah. ¹⁴ Be lhk'ets'udutsi', 'i 'udetsuh nets'óo'ah. 'I be degha nus hoonzoo hoh 'ilho 'uts'int'ah. ¹⁵ 'Ink'ez Yak'usda be nedzi dezghel, 'i be nuhdzi yuh k'une' hool'en. 'Et whuz na'a 'utahanhónla 'ilho yust'e wule ka. 'Ink'ez 'ahoolhyez chanailya noohzin. ¹⁶ Christ bughunek be whutnih soo cho nuhdzi yuh hóle. Yak'usda bughunek be ahjun. Shun be teni' uznilhdzun, 'ink'ez Ndoni be ahjun. Lhodulhú'eh 'ink'ez lhgha dáhnti. Be hoonzoo, 'i be nuhdzi yuh hóle, 'ink'ez neMoodihti ts'un ahjun. ¹⁷ Nts'e na'a daht'en nuhghunek 'ink'ez nuhwhe'ut'en 'et chah, Sizi neMoodihti boozi, 'i be ndaht'en. 'Ink'ez 'en be Yak'usda ne'aBá, 'en ts'un chanailya dahni.

Nts'ena'a nuhwhukoo 'et Sizi Gri ba ne'ooh't'en

¹⁸ Nuhwheni ts'ekoo nuhkikah hubutl'a' dudoolhútelh, 'et neMoodihti ba hoonzoo ho' hoont'ah. ¹⁹ Dune nuhwhu'atkah hubuk'eoohtsi'. 'Ink'ez hube' zóohla gunih. ²⁰ Uskehhyaz ts'iyaantsuk hoh nuhwhe'abá 'ink'ez nuhwhe'ama hubuk'UNE' 'oohten. 'Et whuz na'a ndaht'en t'eh, neMoodihti hoont'i. ²¹ 'Ink'ez dune nuhwhuzkeh hubunóolhch'eh gunih! Doo ka si ilah tune' hut'en hole. ²² Nuhwheni 'ulhna ahli, ndi yun k'ut nuhmoodih hinli, 'en ts'iyawh hubuk'UNE' 'ooht'en. Nuhmoodih nuhwhunilh'en 'et zeh 'ooht'en

gunih. 'Et whunts'ih nuhdzi ts'ah'un na'a Yak'usda bé noolhújut, 'ink'ez nuhmoodih hubuk'une' 'ooht'en. ²³ 'Ink'ez daht'en nuhdzi ndulhcho, 'i be ndóht'en. Ndaht'en neMoodihti zeh ba 'aht'en 'aw dune ba ilah 'aht'en. ²⁴ T'eoonúhzun ndai neMoodihti nuhts'u yoozi, 'i nuhgha ítelelh. Christ neMoodihti 'en be 'ulhna ahli 'et huwa. ²⁵ 'Et whunts'ih tink'us 'ahét'ilh, 'en whuz na'a huba k'elha whutele. 'Ink'ez ne'aBá nalh ts'iyawh lhgha zeh 'uts'int'ah 'et huwa.

4

¹ 'Ink'ez nuhwheni moodih ahli, nuhwhe'ustlen ts'ah'un 'int'ah 'ink'ez lhgha 'int'ah, 'i huba k'elha yulh'ih. T'eoonuhzun nuhwheni chah nduk yak'uz ts'ih nuhMoodihti hoonli.

Ye unzoo, 'i bulh Christ ba ts'oot'en

² Soo cho huwahli hoh tenadahdli. 'Ink'ez chanailya dahni. ³ Nuwheni chah neba tenadoohdli. Yak'usda neba dá'dutootan bughunek be yats'oolhtuk ka. 'Et whuz na'a Christ bugha whe' hoont'ah hooyah, 'et ts'iyanah ts'un howu yats'oolhtuk. K'an 'et, 'et huwa tsak'esida. ⁴ 'Ink'ez suba tenadoohdli, 'et hoh nts'e na'a yatelhtuk whuba 'et ts'ah'un newhútes'ah. ⁵ Ndunnah huba 'alha cha'hoot'ah, 'en huwahli hoh hubulh yalhtuk. Ndet k'an 'et nuhghá whults'ut, whunih be 'uhoolh'en. ⁶ Nuhwhughunek 'ahoolhyez unzoo, 'i be hubulh yaoolhtuk. 'Et huwa t'eoonóhzin nts'e na'a huba whutézoo k'una'a, 'et whuz na'a 'ilhunuh hinli hoh hubulh yátelhtuk.

Dek'elh'az khunek butl'a naidet'ai

⁷ Ndun Tychicus, 'en nelhutsin buk'ets'intsi', 'ink'ez neMoodihti 'en ba ts'ah'un na'a nela'ut'en, 'ink'ez Sizi Gri ba sulh 'ulhna unli. 'En si sugha ts'iyawh nuhduténih. ⁸ 'Et huwa njan nuhts'ú téh'a. 'Et nts'e na'a daht'ah t'ewhuntezeh, 'ink'ez nuhdzi nduk na'yooleh. ⁹ Onesimus 'en yulh te'us. 'En chah ts'ah'un na'a nelhutsin 'ink'ez nuhwheni ts'iyawh buk'ets'intsi', 'ink'ez nohwhulh 'ilhunuh 'int'ah. 'En bugha njan ts'iyawh dawhut'en t'ewhuntehze. ¹⁰ Aristarchus, 'en chah sulh tsak'esda 'ink'ez dahooja nuhwhúlhni. 'Et Barnabas bunat, Mark, 'en chah dahooja nuhwhúlhni. Nts'e na'a datét'ilh, 'et 'uda t'eoonáhzun. Nuhghu ninya t'eh, soo cho hoonáht'i hoh nuhghoya. ¹¹ 'Et ndun Sizi, Joosta chah hiyulhni, 'en chah dahooja nuhwhúlhni. Ndunnah, 'en ts'iyawh yuka dune unli, 'i k'ut ust'us 'úhint'ah. Ndunnah 'en zeh Yak'usda dune k'úne' bul'en, 'et huba sula' hut'en, 'ink'ez sóo ne'suhulh'en. ¹² Epaphras 'en chah nohwhulh 'ilhunuh 'int'ah, 'ink'ez dahooja nuhwhúlhni. Christ buba 'ulhna 'int'ah. Soo k'us hooncha hoh nuhwhuba tenadudli. 'Et hoh Yak'usda nuhts'u hukwa' ninzun, 'et 'i be ts'ah'un na'a 'en ba nudutelhúya 'ink'ez lhadúlya chah tehle. ¹³ 'En buba 'alha' ts'ah'un na'a 'udusni, hooncha hoh nuhwhuba nint'uk. 'Aw nuhwheni zeh ilah, ndunnah Laodicea whut'en 'ink'ez ndunnah Hierapolis whut'en, 'en chah. ¹⁴ Luke, 'en yoo be duyin unli, 'en nuhwheni ts'iyawh buk'ets'intsi' 'ink'ez Demas 'en chah dahooja nuhwhúlhni. ¹⁵ Ndunnah Laodicea whut'en, ndunnah nelhutsinkah, 'en ts'iyawh dahooja neba hubudóohni. 'Ink'ez Nymphas, 'ink'ez ndunnah bukoo Yak'usda ba 'ilhunahuwúdulh, 'en chah dahooja suba hubudóohni.

Ye unzoo, 'i nohwhulh 'óot'e

¹⁶ Nuhwhenich'oh nuhtah ndi dustl'us buk'eyalhtuk t'eh, ndunnah Laodicea Yak'usda ba 'ilhunahuwúdulh, 'en chah hik'eyaoolhtuk huba' hoont'ah. 'Et ndai dustl'us hubuts'o tl'aiya'ai, 'i nuhwheni chah buk'eyaoolhtuk. ¹⁷ 'Ink'ez Archippus 'en dóohni, neMoodihti ndet yutl'ahó'ai,

ts'iyawh lhaoodooleh. 'Et whuz na'a 'en ba ne'ust'en tele. ¹⁸ Sich'oh sula be dahooja dusni hoh 'uk'une'zíguz, 'i, "Paul". Ndi tes tl'oolh be tsak'esída bunaoodoolhúnah gunih. Ye unzoo, 'i nuhwhulh 'oot'e. 'Et ndoh honeh.

Paul, Thessalonica Whut'en Ndi 'Udechoo Dustl'us 'I Hubuts'un K'e'anguz

Thessalonica whut'en Paul dahooja hubulhni

¹ Nuwheni tanah ts'inli Paul, Silvanus, 'ink'ez Timothy, nuhwheni keyah Thessalonica ts'ih Yak'usda ne'aBá 'en ba 'ilhunahuwúdulh, dahooja nuhwhuts'útni. Ne'aBá Yak'usda 'ink'ez Sizi Gri neMoodihti ts'un nuhwhuba tenazdudli, 'et hoh ye unzoo, 'ink'ez nuhdzi dooghel nohwhulh 'oot'e.

Hoonzoo k'una'a ne'hut'en

² 'Ahoolhyez nuhwheni nuhwhughha Yak'usda ts'un chanailya ts'utni. Ndet tenazdudli totsuk 'aw 'et nuhwhunats'ulnih. ³ Nuhwhunats'ulnih 'aw 'ustl'e cha'susne, be 'alha 'uhoont'ah, 'i bugha nuhwhe'ut'en, nts'e na'a be nék'ets'intsi', 'i be soo cho 'aht'en, 'ink'ez neMoodihti Sizi Gri 'en bugha hukwa tsi hooqli, 'aw whulachaduzahnik. Yak'usda ne'aBá 'en bunalh 'et whuz na'a ndaht'en. ⁴ Nelhutsinkah nt'ets'oninzun Yak'usda nuhk'entsi' 'ink'ez 'utáhanóhonla. ⁵ 'Et neghunek unzoo, 'i 'aw khunek zeh ilah unli hoh nuhnuhl'adélt'sut. 'Et whunts'ih be hoolhtus, 'i be Ndoni bugha chah, 'et whuz na'a nuhnuhl'adélt'sut. Nts'e na'a nuhnuhl'adélt'sut 'et nt'eoonuhzun ndi khunek 'i ts'ah'un na'a 'int'ah. 'Et huwa hoh da nuhtah uzdelhts'i, nuhwheni nuhwhuba dant'ah dune ts'inli, 'et ts'iyawh nt'eoonáhzun. ⁶ 'Et nuwheni 'ink'ez neMoodihti chah, ts'iyawh nek'una'a aht'ah sahli. Tube dzuh nusuhde hoh Ndoni ye whunelhnik, 'i be Yak'usda bughunek unzoo, 'i hoonáht'i hoh ulhchoot. ⁷ 'Et huwa nuhwheni nuhgha nts'oh tune' aht'en, 'et ndunnah Macedonia 'ink'ez Achaia yun k'ut chah, ndunnah Sizi Gri buba 'alha' 'int'ah, 'en nuhk'una'a 'uhint'ah huzdli. ⁸ 'Et Macedonia whut'en 'ink'ez Achaia whut'en chah, 'en neMoodihtih bughunek, 'i ts'iyawh nuhwheni nuhgha hiyuhl uduzts'ai. 'Aw 'et zeh ilah, Yak'usda ts'un nuhwhuba 'alha' hoont'ah, 'ilhuz nduhoolcho hoh t'ehinanzin, 'et huwa nuhwheni 'aw'o 'un daja uzdooni ghat'ah. ⁹ 'Et hedich'oh nuhwheni nuhwhughha nelh nahuwhulnuk nts'e na'a nuhkoo danwhunulhla inle. 'Ink'ez nts'e na'a 'uk'edéltsi nuhwhuba 'alha' 'int'ah, 'et whuch'a nasahdel 'et Yak'usda ts'un nasulhúya. Yak'usda 'en khuna, 'ink'ez 'alha unli, 'en zeh buba 'ulhna sahli. ¹⁰ 'Ink'ez buYe', yak'uz ts'ih hainya, 'en chah buba ilh'i. Sizi 'en 'int'ah, 'en yahadla hubutah dinadulhti 'ink'ez Yak'usda ye nelh hunilch'e negha itekulh, 'i whuch'a neulhyis.

2

Paul 'en Sizi Gri ba bube 'ut'en k'ah 'int'ah

¹ Nelhutsinkah nuhwhenich'oh nt'eoonahzun 'aw 'ants'i 'et nuhwhuts'un nachats'utedulh. ² 'Et keyah Philippi whut'en, 'en hubugha tube dzuh nuts'uzde, 'et ts'iyawh t'eoonuhzun. 'Et whunts'ih hukw'elh'az Yak'usda 'en bugha 'aw whechats'itsaz hoh bughunek unzoo, 'i be nohwhulh yats'ulhtuk, lhat hoh nehiyenah 'uhant'e 'et whunts'ih. ³ 'Et ndi khunek ulhtus, 'i be nohwhulh yatuk inle, 'aw tink'us cha'it'ah, k'us dutsun, 'i bulh cha'it'ah, 'aw nts'i 'i chah hubutah hoolah. ⁴ 'Et whunts'ih Yak'usda nelh soo neooni'ai hoh bughunek unzoo, 'i be netl'ahó'ai, 'et whuz na'a zeh ts'iyawh 'ilho yats'ulhtuk. 'Et whunts'ih nts'e na'a dune hodutéts'o 'et hukwa' huninzun, 'i khunek 'aw whuz na'a ilah yats'ulhtuk. 'Et whunts'i Yak'usda nets'u hukwa' ninzun, 'et zeh howu yats'oolhtuk. Yak'usda 'en nedzi yoolhdzih. ⁵ T'eoonahzun 'aw khunek 'uyoo unli, 'i be ilah nohwhulh yats'ulhtuk. 'Aw

hoonliyaz aht'i, 'i negha óohlelh, 'et whuz na'a ilah nohwhulh yats'ulhtuk. 'Et Yak'usda nalh njan ts'ah'un na'a 'ún whudusni. ⁶ Nuhwheni k'us 'uyoona chah nedutelhti hukwa chats'iti'en, Christ buba whel'a 'en ts'inli 'ink'ez netl'ahó'ai 'et huwa be hóolhtus, 'i be nuhgha ndoh 'uts'int'ah. ⁷ 'Et whunts'ih nuhtah uzdelhts'i da, nuhts'un ts'inzoo. Nts'e na'a ts'ekoo hubuzkeh nulyeh 'ink'ez hubuk'ehintsi', 'et whuz na'a nagoostl'íyaz ne'unwhuts'ulh'en. ⁸ Nuhk'enits'inli, 'et huwa ts'uhooont'i hoh Yak'usda bughunek unzoo, 'i be nohwhulh yats'ulhtuk. Be ts'ukhuna, 'i whunts'i nuhwheni nuhgha huwázte'ah, nuhk'ets'ints'i 'et huwa. ⁹ Nelhutsinkah soo cho whunalhúnih, hoh da nts'oh tune' ts'ut'en 'ulh'ek 'ink'ez dzin 'i bulh lhula' ts'óodut'en! Tube neba howa whulna t'eoonaahzun. Doo ka nuhwhuba howa whulna ts'uholhtselh 'et whuch'a. 'Et whuz na'a Yak'usda bughunek unzoo, 'i be nohwhulh yats'ulhtuk. ¹⁰ Nuhwheni nuhnalh 'uts'ut'en, Yak'usda bunalh chah, dalcho 'i be soo cho buk'une'ts'ut'en 'ink'ez ts'ah'un na'a ne'ts'ust'en, nuhwheni huba 'alha' hoont'ah nuhtah nek'éholts'it whuch'a. ¹¹ 'Ink'ez t'eoonaahzun nts'e na'a nuhbákah nuhk'ents'i hoh nuhgha hanle, 'et whuz na'a nohwhulh 'uts'int'ah. 'Et huwa khunek ulhtus, 'i be nohwhulh yats'ulhtuk, 'ink'ez k'enánohwhuts'une'a. Dateht'ilh, 'et whunohuznulhtun. ¹² 'Ink'ez Yak'usda ba soo whuldzoo, whuz na'a toohdelh. 'En 'int'ah nts'e usda, 'et hubudayi cho unli, 'et hoh ts'iyaintsuk k'une' whut'en unli, 'ink'ez ye dézti, 'i chah bulh 'int'ah. 'Et whuz de 'anih nuhwhúlhni.

Sizi Gri hits'u nalhúya

¹³ Nuwheni negha Yak'usda bughunek dáhts'o 'et ts'iyawh hoonáht'i hoh ulhchoot. Yinkak dune ghunek ilah k'una'a úlhchoot. 'Alha' hoont'ah Yak'usda bughunek 'int'ah. Nuhwheni huba 'alha' yint'ah, 'i be 'o nus ulhtus nuhwhulhtsi. 'Et huwa 'aw 'ustl'e cha'ts'udésnik hoh Yak'usda chanailya ts'utni. ¹⁴ Nelhutsinkah ndunnah Christ, Sizi ts'utni, 'en bube'ildzun hinli, ndunnah Judea yun k'ut Yak'usda ba 'ilhunahuwúdulh, 'en hubuk'una'a zeh aht'ah. 'Et nts'e na'a ndunnah Judea húdelhts'i, 'en 'onghoh Lizwif dzuh nubuhulhdeh, 'en hubuk'una'a zeh nohwhulh keyah whut'en, 'en dzuh nunóhohulhde. ¹⁵ Lizwif, 'en 'uhuja neMoodihti Sizi Gri hizelhghi. 'Ink'ez ndunnah huba Yak'usda be nus whúnilh'en, 'en chah hubuhanghan. 'Ink'ez nuwheni chah hubuyun k'ut hukw'u nanenhuntézyoot. Ts'iyahanah ch'a hudemtni, 'et huwa 'aw Yak'usda hoont'i hukw'u na'a nuchá'hust'en. ¹⁶ Khun teh 'udun yun k'ut whut'en hudoojih ka hubulh yaztelhtuk, 'et whuch'a nehúnenyoot. Ndunnah Lizwif ndai 'uhiyulh'en, 'i bugha lubeshi be hudezbun. 'Et huwa Yak'usda ye hubulh hunilch'e, 'i 'ilhuz wheni hiyulh utet'ilh.

Thessolanica whut'en hubuk'eninli

¹⁷ 'Et nelhutsinkah, 'astl'iyaz wheni nuhwhuch'a nehunézyoot, 'et whunts'ih nedzi be nohwhulh 'uts'int'ah. Tube cho nanwhuts'utet'ilh, 'et 'o nus hukwa ts'uninzun. ¹⁸ 'Et huwa tube nuhts'uztedulh hukwa' uznanzin. 'Alha si, Paul, nat hoh nuhts'u toosya hukwa 'est'en, 'et whunts'ih ndun Satan 'en nedádenya. ¹⁹ 'Et ndet 'uhooont'ah hukwa tsi ts'uhooli, k'us ndai be ts'uhooont'i? Ndai neba k'elha tele, 'i be ih ts'ótet'i? NeMoodihti Sizi Gri nket'ah whusanatedalh 'ink'ez nuhwheni chah ts'iyawh hubuhubulh 'uteht'ilh, 'et zeh 'uhooont'ah! ²⁰ Nuhwheni be uzdézti 'ink'ez be ts'úhoont'i, 'i ahli 'et huwa.

3

Be 'alha' hoont'ah, 'i 'aw huba chayílhtus tulih, 'et huwa Paul hubughuni unli

¹ 'Et hoh da 'aw 'o 'un whulh ts'ooyin ghat'ah suli. 'Et neba hoonzoo nidúdzun hoh whenich'oh keyah Athens íduke. ² 'Et huwa nelhutsin, Timothy,

'en Yak'usda ba ne'ut'en, 'en nuhts'u whets'ah'a. 'En 'int'ah Christ bughunek unzoo, 'i be nela'ut'en. 'En bugha nuhwhuba 'alha 'uhoont'ah, 'et 'ilhuz wule hukw'u na'a zeh 'uteht'ilh, 'ink'ez bughunek be nus nuhwhunilh't'uk. ³ 'Et njan dune dzuh nunwhulhdeh hoh nuhwhuba dzuh wule gunih. Nuh-whenich'oh t'eoonaahzin njan neba 'uhóolya ho' hoont'ah. ⁴ 'Et nuhzih íduke da dzuh nuztedeh ho' hoont'ah nuhwhuts'udáni inle. 'Et whuz na'a 'uhooja 'ink'ez k'an 'et nt'eoonehzin. ⁵ 'Et huwa si chah 'aw 'o 'un whulh wusyin ghait'ah. 'Et huwa Timothy, 'en nuhts'u whelh'a ndi be 'alha 'uhoont'ah bughä daht'ah ts'iyawh neba naoote'ah. Doo ka sih ndun neóolhdzih, nuh-wheni chah tulih nuhóolhdzai t'eh, 'et sih ne'ut'en, 'i 'ants'i 'et tele.

Timothy daja nedani, 'et huwa nedzi hoont'i

⁶ 'Aw 'et Timothy nuhts'u hanája 'ink'ez neghu nanja. 'Ink'ez daht'ah 'et hukw'un nelh nawhelnuk. Ndi be 'alha 'uhoont'ah, 'ink'ez be nek'ets'ints'i', 'i chah, 'et ts'iyawh nahoo'ai. 'Et nets'un ahzoo 'ink'ez nuwheni neteh'ilh hukwa' nahzun, 'et chah hukw'un nelh nawhelnuk. 'Ink'ez nuwheni chah whuz na'a zeh nanwhuts'untel'ilh hukwa' uznnizun. ⁷ 'Et huwa nelhutsinkah 'uyoон bughä dzuh nuts'udeh 'ink'ez dzuh nelh 'uhoont'ah, 'et whunts'ih be 'alha 'uhoont'ah aht'i, 'i be nedzi nduk na'uja. ⁸ NeMoodihti 'en bulh ulhtus hoh nudelhúya t'eh, ts'uhont'i k'et ts'ukhuna li'ts'int'ah. ⁹ Nts'e na'a simba soo 'uhoolcho, 'i be Yak'usda nuhwhuba chanailya uzdóni? Ndai be simba ts'uhont'i, 'i be ts'iyawh Yak'usda nalh nuhwhuba ts'uhootet'i? ¹⁰ Nuhts'ute'ilh hukwa' ts'uninzu. Be 'alha 'uhoont'ah aht'i, ndet ts'ah'un t'eoonuzahzun 'et ts'iyawh nuhwhuba lhats'odutelih. 'Et hukwa 'ulh'ek 'ink'ez dzenis 'i bulh tube Yak'usda ts'un hukwa' ts'utni.

Yak'usda ba 'ilhunahuwúdulh huba tenahududli

¹¹ 'Et tenazdudli, Yak'usda 'en dich'oh ne'aBá, 'ink'ez neMoodihti Sizi Gri, 'en nuhts'un nétoolh'a wule. ¹² 'Ink'ez nts'e na'a hoh nuhk'ets'ints'i', 'et whuz na'a neMoodihti 'en bughä tube cho lhk'uz teh lhk'ets'oodutsi'. 'Ink'ez 'uyoон chah 'en ts'iyawh nduchah hubuk'ehtsi'. ¹³ 'Et huwa neMoodihti Sizi Gri 'ink'ez dune bube'ildzun hinli, 'en bulh ts'iyawh whusanahedel t'eh, 'et ne'aBá, Yak'usda bunalh, 'aw nuhdzi lubeshi bu'et hoh be ye nuhk'eho'ah hootelah.

4

Lubeshi bughu hoolah 'et hubuts'u hukwa' ninzun

¹ 'Et huwa nelhutsinkah, ndi dek'elh'az khunek be nohwhulh yáts'ulhtuk, 'i neghunek úlhchoot hoh nts'e na'a Yak'usda hóont'i ka tóohdeh nuhwhuts'útni inle. 'Et doo chah whuz na'a zeh Sizi neMoodihti, 'en be khunek ulhtus, 'i be 'un whuts'útni, tube cho lha'un teh wahzoo, 'ink'ez whuz na'a zeh 'ooht'e. ² Nt'eoonaahzun neMoodihti Sizi khunek netl'aída'ai, 'i ts'iyawh nuhwhuts'údani. ³ 'Et Yak'usda ba 'udun ninwhuninla, 'et lhghudelhúts'i k'us 'awhuz lhghudelhúts'i hoh lhulh tinta' 'ooht'en gunih, 'et whuz na'a Yak'usda nuhwhuba hukwa' ninzun. ⁴ Ts'iyawh 'ilhunuh ahli nuhyust'e 'i Yak'usda ba 'udun neóolhtelh huba' hoont'ah 'ink'ez soo cho bughohle. ⁵ Nuhyust'e ulhtus hoh lubeshi ts'un nint'uk, 'et 'aw whuz na'a aht'ah ilah! 'Udun yun k'ut whut'en, ndan Yak'usda t'ehinízun, 'aw 'en buk'una'a ilah aht'ah. ⁶ Khun teh nelhutsin hinli neghá' whunesdút'en hoh bu'at bulh tinta' ts'oot'en gunih. 'Et whuz na'a whutsuh da nuhwhudáni. 'Ink'ez doo chah ndun nuhwhudusni, neMoodihti 'en zeh ndóohoont'ah hubugha ts'iyawh k'útnéh 'int'ah. 'Et huwa njan ndun whudusni, soo cho khahdli! ⁷ Yak'usda 'aw 'ut'en unts'i', 'i 'uztelh'ilh huba ilah uzdoojih ka neka' dani 'et huwa. 'En ba lubeshi bughu hoolah uztelih ka 'et wheni neka' dani. ⁸ 'Et huwa ndan

ndi khunek hidoots'o hukwa cha'hunizun, 'aw dune ch'a nult'uk chahilah. Yak'usda ch'a hunint'uk zeh 'uhint'ah. 'Ink'ez Yak'usda 'en 'int'ah Ndoni 'en negha iní'ai.

Ndiyun k'ut whut'en, 'en hubunalh soo ts'ah'un na'a tóohya

⁹ Lhulhutsinkah yé lhk'edutsi', 'i bugha 'aw nuhts'o k'e'oosges huba cha'hoot'ah, Yak'usda dich'oh whunohodalh'i lhk'eoohdutsi' ka. ¹⁰ 'Et whuz na'a ndaht'en ts'iyawh nelhutsinkah Macedonia yun k'ut húdelhts'i, 'en hubuts'un. Nelhutsinkah khunek ulhtus, 'i be nuhwhuts'útni, lha'un hoh lhk'eoohdutsi'. ¹¹ 'Ink'ez whunistl'iyaz yun k'ut doolhúts'i hukwa' 'ooht'en, 'ink'ez nuhwhe'ut'en zeh noohl'en. Nuhwhenich'oh nuhla be 'ooht'en. 'Et whuz na'a ndoht'en nuhts'udáni. ¹² 'Et whuz na'a ndaht'ah t'eh, 'et t'eh ndunnah huba 'alha cha'hoot'ah, 'en hubunalh soo ts'ah'un na'a toohya. 'Et 'aw hoonliyaz whendunonli ghai't'ah.

Sizi Gri whusanatedalh, 'et whut'aníznintan

¹³ 'Aw 'et sulhutsinkah, ndunnah 'uda nahunestez,* 'en hubughu t'ewhuntehzeh nuhwhuba hukwa' nuszun. Huba 'alha cha'hoot'ah 'aw huba whulanachahó'ah hukw'u na'a tso hinli, doo ka sih whuz na'a ndoht'e. ¹⁴ Sizi dazsai 'ink'ez dinadija, 'et neba 'alha' hoont'ah t'eh, 'et whuz na'a zeh ndunnah Sizi huba 'alha' yint'ah hoh yahadla, 'en ts'iyawh Yak'usda, Sizi 'en dulh 'ubutelih. ¹⁵ 'Ink'ez neMoodihti bughunek be njan ndun whudusni, neMoodihti neka whusanatedalh, nts'e na'a dawhútenilh, ndunnah 'awhuz hukhuna, 'ink'ez ndunnah nahunestez, 'en 'aw hubutsuh 'uztoodelh ghai't'ah. ¹⁶ 'Et neMoodihti dich'oh soo 'ultus 'aw 'et 'udutenilh, 'ink'ez lizas degha nus dezti, 'en 'udutenilh, 'ink'ez Yak'usda ba be ts'ujih, 'i chah 'udutenilh. 'Et whuz na'a Sizi Gri yak'uz ts'ih whusanatedalh. 'Ink'ez ndunnah Sizi Gri huba 'alha' yint'ah, 'et whuz na'a yahadla, 'en choo dinahudutédulh. ¹⁷ 'Et hukw'elh'az nuwheni 'awhuz ts'ukhuna, 'ink'ez ndunnah, 'en 'ilho 'aw chats'odutélh'il khun ne'eduzgooh li'ts'uja hoh nduk kw'us tah 'ilho neMoodihti yazai buduzdutédulh. 'Et whuz na'a 'ilhuz nuwheni neMoodihti bulh 'úztet'ilh. ¹⁸ 'Et huwa ndi khunek 'i be ts'iyawh k'unulhunóoh't'ah.

5

NeMoodihti budzin dawhútenilh

¹ Nelhutsinkah nket'ah 'uwhutenilh 'ink'ez nts'oh huwa whezulh hoh 'uwhutenilh, 'aw 'et huwa nuhts'o k'eoosges ghai't'ah. ² Nuhwhenich'oh soo ts'ah'un na'a nt'eoonaahzun, nts'e na'a 'undunut'ih 'en k'una'a 'ulh'ek whusanúl'ih, whuz na'a zeh neMoodihti budzin neba whusawhútelts'ulh. ³ Njan nduhútni t'eh dachahoot'ah 'ink'ez 'aw howa cha'oodli, 'et khunyaz hubulh haoodutelts'ulh. Nts'e na'a ts'ekoo ulchan bubulh 'útelhúts'ul, 'et whuz na'a 'et nduwhútenilh, 'et 'aw whe ghah hóoya ghai't'ah. ⁴ 'Et whunts'ih nuhwheni sulhutsinkah 'aw tsahólhgus yuh chadulhúts'ih. 'Et huwa njan dzin whusawhélts'ut t'eh, 'aw 'undunut'ih k'una'a nuhgha húnool'ih ghai't'ah. ⁵ Nuhwheni be whét'en, 'ink'ez dzenis be whét'en, 'i buniz delhúts'i. 'Aw nuhwheni 'ulh'ek 'ink'ez tsahólhgus yuh chats'udílt's'ih. ⁶ 'Et huwa 'uyoon k'una'a chats'oostez, whenich'oh khuts'oodle. ⁷ Whunulh'en, ndunnah huztez, 'en 'ulh'ek 'uhoot'e. 'Ink'ez ndunnah tahatnai, 'en 'ulh'ek tahuunutnih. ⁸ 'Et whunts'ih nuhwheni soo whunih be 'uts'oot'e huba' hoont'ah. Neba 'alha' 'int'ah, 'ink'ez be lhk'ets'udutsi', 'i 'utes dzoot ndukw k'una'a nuhwhuba li'tet'ilh. 'Ink'ez be uzdujih, buka tsi ts'uholi, 'i 'utes ts'ah, 'i k'una'a nízdool'a. ⁹ 'Aw Yak'usda ye whúske, 'i be neootelhtus, 'et huba ilah 'udun nenininla 'et huwa. 'Et whunts'i neMoodihti Sizi Gri 'en bugha be úzdutejih, 'i ts'utélhchulh.

* **4:13** Yahadla ni ho 'utni.

10 Neba dazsai. 'Et huwa nts'oh dahooja whunts'i, 'awhuz ts'ukhuna k'us yats'adla, nuwheni ts'iyawh 'en bulh 'uts'oot'e huba' hoont'ah. **11** 'Et huwa 'ilhunah ahli hoh k'unulhunáht'ah 'ink'ez lhba nus lhúnulht'uk. K'an hoh ndaht'en, whuz na'a zeh 'et ndoht'en.

Lhelhts'un na'a ndi yun k'ut uzdóolts'i

12 Nelhutsinkah nuwheni soo cho nuhts'un tezdudlih, ndunnah nuh-tah Sizi Gri ba 'uhut'en, 'en neMoodihti bugha nuhghu hinli 'ink'ez nuh-whuba huwhunih hoh nuhghunanek hulye, 'en 'uhint'ah nuhwhuba hin-chä hubulh'i. **13** 'Ink'ez hubube 'ut'en bugha degha nus be nek'edutsi', 'i bugha ndaht'en. Ts'iyawh wunistl'iyaz hoh lhutah dune ahli. **14** 'Ink'ez nelhutsinkah khunek ulhtus, 'i be njan ndun whudusni, ndunnah nuhtah tsihudutnik soo cho bugha dahtni. Ndunnah hubudzi yuk 'int'ah, soo nenabuneh'ah. Hunuljut 'en chah hubula 'aht'en. Ts'iyanah nagoostl'iyaz né'boolh'en. **15** Ndán hoontsi' nuhts'un 'uja, khun teh hoontsi', 'i be huba k'elha hoolhtsilh gunih! 'Et k'us nuhwhenich'oh chah 'ink'ez 'uyoon ba chah, ndai unzoo, 'i ts'unóoht'uk, 'i zeh nehdulh. **16** 'Ahoolhyez whunélhnik. **17** Tenadahdli, 'ustl'e 'udóohneh gunih. **18** Ts'iyaantsuk hoh chanailya dahni. Sizi Gri 'en bugha 'et whuz na'a Yak'usda nuhts'un hukwa' ninzun 'et huwa. **19** Ndoni 'en ch'a ne'doolhú'en gunih. **20** Khunek be nuhwhuba nus whét'en, 'i khun teh 'ants'i 'uhooont'ah noohzin gunih. **21** Ts'iyaantsuk naoodúlhdih. Ndai unzoo, 'i soo cho óhtun. **22** Ndai untsi', 'i ts'iyawh buch'a 'aht'ah.

Yak'usda ye unzoo, 'i nohwhulh 'óot'e

23 'Aw 'et Yak'usda 'en be nedzi dezghel, 'i negha íni'ai, 'en soo 'et hoh nuh-wheni dich'oh duba 'udun neníninla. 'Ink'ez nuhyust'e, nuhzul, nuhyéghah, 'ilho 'aw hoonli hoh nuhk'éholts'it hoolah neMoodihti Sizi Gri whusanatedalh whuts'un, 'et whuz na'a Yak'usda nuhwhuba 'uholeh hukwa' nuszun. **24** Ndán dutejih ka nuhka' dani, 'en 'aw neladootnih ghait'ah, 'ink'ez 'en nuh-whuba 'uwhutelih. **25** Nelhutsinkah neba tenadoohdli. **26** 'Et lhulhutsinkah nalhatul'ih teh soo cho dushih be' lhoolhtun hoh lubeshi bughu hoolah be nalhadunuhts'oos.* **27** NeMoodihti nalh 'unohdusni, nelhutsinkah 'en Yak'usda bube'ildzun hinli, 'en ts'iyawh ndi dustl'us huba buk'eyaooltuk. **28** NeMoodihti Sizi Gri, 'en ye unzoo, 'i nohwhulh 'óot'e. 'Et ndoh honeh.

* **5:26** Whuz keyah 'et lhula nunahut'a.

Paul, 'En Thessalonica Whut'en Whulh Nat 'I Hubuts'un K'e'anguz

Thessalonica whut'en Paul dahooja hubulhni

¹ Nuwheni tanah ts'inli Paul, Sylvanus, Timothy, nuhwheni keyah Thessalonica ts'ih Yak'usda ne'aBá 'ink'ez Sizi Gri neMoodihti ba 'ilhunahuwúdulh, dahooja nuhwhuts'útni. ² Ye unzoo, 'i 'ink'ez nuhdzi dóoghel, 'et Yak'usda ne'aBá 'ink'ez neMoodihti Sizi Gri buts'un hayúkat, 'i nohwhulh 'óot'e.

Yak'usda degha nus neba nahuteyeh 'ink'ez ye dézti, 'i bugha

³ Huba 'alha' hoont'ah 'i lhk'uz teh aht'i 'ink'ez 'ilhunuuh ahli lha'un teh lhk'ehdutsi'. 'Et huwa nelhutsinkah 'ahoolhyez Yak'usda ts'un nuhwhuba chanailya 'uzdooni huba' hoont'ah. ⁴ 'Et huwa 'onghoh Yak'usda ba 'ilhunahuwúdulh, 'et hubugha degha nus nuhwhuba ts'uhóont'i nuhwheni nuhwhughá whunkat, 'et whunts'ih nuhwhuba 'alha' hoont'ah, 'i be tachahudinik 'ink'ez whecháhtsaz. ⁵ 'Et huwa ts'iyanah t'ehininzun Yak'usda 'en ts'ah'un naheyelh 'int'ah. 'Et huwa nts'e Yak'usda hubudayi cho unli, 'et soo unzoo wule ndai bube'ildzun 'i nuhtl'aóote'ah. 'Et huba k'an dzuh nahde. ⁶ Ndán dzuh nunwhahulhdeh, 'en whuz na'a Yak'usda hubuk'elha ootelhtsilh. 'Et ts'ah'un na'a ho' hoont'ah. ⁷ 'Ink'ez nuhwheni dzuh nudeh nelh natelhúyis. Whuz na'a neba k'elha whutelhtsilh. Ndet neMoodihti Sizi Gri 'ink'ez bulizas ulhtus bulh, 'et yak'uz ts'un hube hóoduteltsilh. ⁸ 'Et t'eh ndunnah Yak'usda t'einízun 'ink'ez neMoodihti Sizi Gri bughunek unzoo, 'i k'únucha'ust'en, 'en kwun dullhuk be huba k'elha whutele. 'Et whuz na'a 'en hubuts'un k'utetnilh. ⁹ NeMoodihti 'ink'ez degha nus ye dézti, 'i 'ilhuz wheni yuch'a nabutélelh. 'Et 'ilhuz wheni hiye dzuh nutedeh 'ink'ez 'aw huba bulatah nachahoo'ah. 'Et whuz na'a huba k'elha whutelhtsilh. ¹⁰ 'Et dzin whusanája t'eh, 'et ndoh whutenilh. Dune Yak'usda bube'ildzun hinli, 'en ts'iyawh huba whudutelhti. 'Ink'ez ndunnah huba 'alha' hoont'ah, 'en huba hooncha tele. Nuwheni neghunek bugha nuhwhuba 'alha' hoont'ah, nuhwheni chah hubulh 'úteht'ilh. ¹¹ 'Et huwa 'alhoolhyiz Yak'usda ts'un nuhwhuba tenazdudli. Yak'usda dutehjih ka nuhka' dani, 'et soo unzoo nuhwhulhtsi. Ts'iyaantsuk unzoo, 'i yughunli, 'ink'ez 'ut'en 'ulh'en, 'i be 'alha 'uhoont'ah be 'ulh'ih, 'i ts'iyawh ye úlhtus, 'i bulh 'int'ah, 'et ts'iyawh lhaóodutehlih. ¹² 'Et whuz na'a neMoodihti Sizi Gri boozi, nuhwheni nuhgha dutéti. 'Ink'ez nuhwheni chah 'en bugha dutéhti tele. Yak'usda 'ink'ez Sizi Gri ye unzoo, 'i bugha ndoh whútenilh.

2

Whuch'a nahusdel whutéle

¹ Et nelhutsinkah, neMoodihti Sizi Gri whusanátedalh 'ink'ez 'en ts'un huba 'ilhunats'owutédulh, 'et hubugha soo cho neoozélhts'ai. ² Dune Ndoni bugha nohwhulh yalhtuk na'dudil'i hoh 'ún whulhni Christ budzin, 'et dzin 'uda whusawhélt'sut. K'us dune dich'oh bughunek be nohwhulh yálhtuk, k'us 'uyoon nuhts'o k'e'anguz 'ink'ez si 'usdla li'ínt'ah t'eh, 'et nduhúja t'eh, khun hubugha khunantóohdelh gunih, 'et whuz na'a nuhts'u tezdudlih. ³ Khun teh dune nanwhunoo'ah gunih. Sizi Gri budzin whusawhútelts'ulh 'et whutsuh, 'et 'udeechoo whuch'a nahusdel whutéle, 'ink'ez ndun lubeshi 'ulh'en, 'en ts'iyanah nalh be hooduteltsilh. Ndun lubeshi 'ulh'en, 'en ts'iyaantsuk hoolah

yulhtsi, 'en buye' 'int'ah. 'Et hukw'elh'az 'et zeh njan dzin whusawhútels'ulh. ⁴ Yak'usda ch'a detni, 'ink'ez yugha ndoh 'int'ah na'dudil'i, 'en ts'iyanah hubudutenilh, "Si zeh Yak'usda usdli. 'Uyoon Yak'usda ts'un tenadoohdli gunih!" 'Et whuz na'a Yak'usda hubuluglez whucho 'et dayih 'ink'ez 'et Yak'usda buba na'dudil'i. ⁵ Aw ih whunachasulhúnik? Nohwhulh 'ust'en hoh da ndun nuhwhudáni. ⁶ Aw 'et ndai k'ah whúnihil't'uk, 'i nuhwheni nt'enahzun. 'Et hoh t'eh ndun lubeshi 'ulh'en ts'iyanah ba be hoodet'en tele. ⁷ 'Et ndi dune hukw'un nuchá'ust'en hubulhtsih, 'et whe' hoont'ah hooyah, 'et 'uda k'an 'et nduwhút'en ho' hoont'ah. 'Et whunts'ih ndun k'ah nenilht'uk, 'et zeh ndutet'ilh whusanáteltelh whuts'un. ⁸ 'Ink'ez 'et t'eh ndun yuk'unucha'ust'en, 'en be hóoduteltsilh. 'En itelilh neMoodihti dich'oh ye usjiz, 'i be ndun yuch'a 'utelhdoh. 'Et whuz na'a neMoodihti whusanátedalh, ndi buts'un hayánduz, 'i be ndun yuk'unucha'ust'en, 'en 'ilhuz wheni be 'ut'en hoolah yutelhtsilh. ⁹ Ndun yuk'unucha'ust'en whusateyalh, 'en be 'ut'en k'ah, nts'e na'a Satan 'ut'en, 'et whuz na'a zeh 'utet'ilh. Hoolhtus tuné' tet'en, 'ink'ez hooncha tuné' tet'en chah 'utet'ilh. 'Ink'ez degha nus whuts'it, 'et huba hooncha tele. ¹⁰ Ndunnah kwuncho yuh ts'ih hutudelh, 'en ts'iyawh ts'ah'un na'a cha'hoot'ah, 'i be nabuna'ah. Khunek 'alha' 'int'ah, 'i hik'echaítsi', 'et huwa 'aw hudoojih ghaít'ah. ¹¹ 'Et huwa hoonli nabuna'ah 'et Yak'usda whuz na'a whute hubula dutetnih. 'Et ndai whuts'it, 'i zeh huba 'alha' 'utét'ilh. ¹² 'Et ndunnah khunek 'alha' 'int'ah huba 'alha cha'yit'ah, 'et ndunt'ah, 'en ndet ts'ah'un cha'hóot'ah, 'et zeh 'et huhoont'i tuné'hut'en, 'en ts'iyawh Yak'usda huba nahuteyeh ho' hoont'ah.

Yak'usda bughunek 'i soo cho bulh nudoolhúya

¹³ 'Et whunts'ih nelhutsinkah neMoodihti nuhk'entsi'. 'Et 'udechoo whuts'un 'utáhanóhanla dutehjih ka. 'Et huwa Yak'usda 'ahoolhyez chanailya nuhwhuba ts'utni. Ndoni be Yak'usda ba 'udun ninwhuninla, ndi khunek 'alha' 'int'ah, 'i nuhwhuba 'alha' 'oot'e. ¹⁴ 'Et whuz na'a neghunek unzoo, 'i be Yak'usda dutehjih ka nuhka' dani. 'Et neMoodihti Sizi Gri ye dézti, 'i nuhgha tékulh. ¹⁵ 'Et huwa nelhutsinkah, soo cho nudelhúya. 'Ink'ez nts'e na'a ndi be hoodulh'eh, 'et nuwheni negha hoodulhú'eh, 'i neghunek bugha, k'us ne'dustl'us bugha chah, 'i ts'iyawh soo cho óohtun. ¹⁶ 'Et neMoodihti Sizi Gri dich'oh, 'ink'ez Yak'usda ne'aBá, 'en nek'entsi'. 'En ye unzoo, 'i be 'ilhuz wheni whuz nenilht'uk hoh 'et whuz na'a buka tsi ts'uholi. ¹⁷ Nuhdzi wúzoo, 'ink'ez khunek unzoo, 'i chah, 'ink'ez 'ut'en unzoo, 'i hubutah ninhoolelh.

3

Nelhutsinkah neba tenadoohdli

¹ 'Et ndi dek'elh'az khunek be nohwhulh yats'ulhtuk, 'i nelhutsinkah neba tenadoohdli. NeMoodihti bughunek 'a tsih nuhtadookat 'ink'ez nuhwhuba dóoti nuhwheni dáhja, whuz na'a. ² Ndunnah tink'us ne'hut'en 'ink'ez dune hintsi', 'en hubuch'a ninaneznoolelh. 'Aw ts'iyawh ilah huba 'alha' hoont'ah 'et huwa. ³ 'Et whunts'ih neMoodihti but'aníuznootan huba' hoont'ah. 'En soo cho ulhtus, 'i be nudelhúya nuhwhulhtsi. 'Ink'ez ndun ntsi', 'en buch'a nuhghunli. ⁴ 'Ink'ez nuhwheni nuhwhugha neMoodihti but'aníuznitan ndi khunek be nuhwhugha uzdani, 'et ndaht'en 'ink'ez 'et zeh ndóht'en. ⁵ Yak'usda ye nék'entsi', 'i 'ink'ez nts'e na'a dune Christ hoolhtus be síyin, 'et whuz na'a nduchah neMoodihti nuhdzi wheínulhtun.

Tsi'doohtnik gunih

⁶ 'Aw 'et nelhutsinkah, neMoodihti Sizi Gri boozi bugha njan ndun whúts'utni, ndunnah huba 'alha' hoont'ah nelhutsinkah hinli, 'ilhunuh teh tsi'udutnik 'ink'ez 'ants'i hubugha ítekulh zeh yubalh'i t'eh, 'et ndunt'ah, 'en

ts'iyawh hubuch'a nahdelh, 'ink'ez hubu'et 'aht'ah. Ndi Yak'usda bughunek whebut'sodel'i, 'aw chahuhóotun 'et huwa' hint'ah. ⁷ 'Et nuwheni nohwhulh 'uts'ut'en inle 'aw tsicha'ts'uditnik. 'Et hoh t'eooniñzin nuwheni nek'una'a 'ooht'e huba' hoont'ah. ⁸ 'Uyoon dune hubuts'uyi 'i 'aw chats'i'al. Tube neba howa whulna hoh 'ulh'ek 'ink'ez dzenis 'i bulh 'uts'ut'en. 'Et huwa 'aw nuwheni naht'aznínootan whuch'a. ⁹ Ts'iyai be nela 'ooht'en huba' hoont'ah 'et whunts'ih 'aw nduchá'ts'ust'en. Nohgha ndoh huwa 'uts'int'ah ilah, nek'una'a 'ooht'e ka whuz na'a 'uts'int'ah 'et huwa. ¹⁰ Hoh da nohwhulh 'uts'int'ah, ndi nuhwhuba nuts'úhezya, 'et bulunah 'aw 'uhutet'ilh hukwa cha'hunízun t'eh, 'aw 'uhoo'ahlh huba cha'hóot'ah. ¹¹ 'Et nuhwheni nuhtah whulh 'úzdzits'o, tsi'hudutnik chah hoonli 'ink'ez 'aw cha'hust'en. 'Et whunts'ih 'uyoona e'ut'en k'ah huwu hinli. ¹² 'Et ndunt'ah neMoodihti Sizi Gri boozi bugha ndi khunek ulhtus, 'i be ndun whúts'utni, nagoostl'iyaz 'uhoot'en hoh hedich'oh 'oha'ahlh nahoodle. ¹³ 'Et whunts'ih nelhutsinkah, 'ut'en unzoo, 'i 'ulh'en, khun 'ustl'e' 'oohnah gunih. ¹⁴ 'Ink'ez ne'e'dustl'us be, neghunek yuk'unucha'ust'en, 'en t'enoohzeh 'ink'ez bulh cha'zooh't'en. 'Et t'eh sih hooya wule. ¹⁵ Khun nuhwhulhutsinkah 'uts'un na'a ne'hut'en t'eh, 'aw nuhch'a detni nóohzin gunih. Nuhwhulhútsin k'una'a hubugha dóohni.

Yak'usda ye unzoo, 'i nohwhulh 'óot'e

¹⁶ Nedzi whúdezghel whuMoodihti, 'en dich'oh 'ahoolhyez 'ink'ez ts'iyaintsuk nuhdzi whudóoghel nuhghá holelh. 'Et nuhwheni ts'iyawh neMoodihti nohwhulh 'óot'e. ¹⁷ Si, Paul, sich'oh sula be 'uk'une'úsguz, 'i be dahooja nuhwhudúsni. Ndet k'e'águz totsuk 'et whuz na'a 'uk'e'aguz. ¹⁸ NeMoodihti Sizi Gri ye unzoo, 'i nuhwheni ts'iyawh nohwhulh 'óot'e. 'Et ndoh honeh.

Paul 'Udeechoo Dustl'us 'I Timothy Yuts'un K'e'anguz

Paul, 'en Timothy dahooja yúlhni

¹ Si, Paul, Sizi Gri ba whel'a 'ust'ah. Yak'usda, neulhyis, 'en bughunek bugha whel'a sili. 'Ink'ez neMoodihti Sizi Gri but'aníuznentan, 'en bughunek bugha whel'a sili. ² Timothy ts'un, ndi be 'alha 'uhoont'ah, 'i bugha soo suye' inli. 'Ink'ez ndi dustl'us nts'o tl'ai'ai, Yak'usda ne'aBá 'ink'ez Sizi Gri neMoodihti, 'en bugha ye unzoo, be ugha te'nudzun, 'ink'ez be nedzi dooghel, 'i chah, 'i ónt'i hukwa' nuszun.

Khunek whuts'it, 'i whuch'a khondle

³ Macedonia yun k'ut ts'ih téya hoh keyah Ephesus 'et nenyunilhti. Soo cho mba nust'uk hoh 'ut'en 'utallh'ilh. Whute, 'et zeh sinda. Daja nyudani, 'et doo chah 'inyudutesnilh, soo khunek ulhtus, 'i be bulunah dune whuts'it be dune hubohodoolh'eh 'et whuch'a. ⁴ 'En 'udada huba 'alha' yint'ah, 'ink'ez lhelhdun butsuh da huba 'alha' hoont'ah. Ndoohoont'ah huwa hukwa lhena 'uhudutni. 'Aw Yak'usda be 'ut'en k'ah ilah 'uhoont'ah. Be 'alha 'uhoont'ah Yak'usda negha ini'ai, 'i bugha 'o nus ts'inzoo 'et huwa. ⁵ Hubudzi chaditsun, 'ink'ez buyuh ts'ih bugha t'ets'oninzun* unzoo, 'ink'ez huba 'alha' hot'e chah, 'et whuz na'a lhk'ets'oodutsi'. 'Et nuwheni ndi khunek Yak'usda netl'aída'ai. ⁶ 'Et bulunah ilah ts'ih whehandel. 'Et huwa tink'us 'uhuja 'ink'ez lahoot'ah 'et howu yahalhtuk. ⁷ Ndunnah Moses be' dustl'us k'ut 'uk'une'uzguz, 'i hubodutelh'eh hukwa' huninzun 'ink'ez daja hutni 'aw nt'ehonízun, 'et whunts'ih 'alha' hoont'ah hutni. ⁸ 'Et t'ets'oninzun, Moses be' dustl'us 'uk'une'uzguz, 'i ndunnah soo ts'ah'un na'a hiye 'ut'en t'eh, 'en huba yinzoo. ⁹ Ndi Moses be' dustl'us 'uk'une'uzguz, 'aw dune ts'ah'un 'int'ah ba cha'it'ah 'et t'ets'oninzun. 'Et njan nduhint'ah, 'en huba' yilya. Ndunnah ndi khunek netl'adélts'ut, 'i k'uniyuzyuz, 'ink'ez 'aw hik'unucha'it'il, budzi dutsun, lubeshi 'ulh'en, k'us ndan Yak'usda ghudloh, buzek hoontsi', ndunnah be'ama, be'ubákah hubanghan, 'ink'ez dune hughan, 'en chah, ¹⁰ ts'ekoo k'us dune bulh tinta' 'ut'ih, 'en ts'iyawh, bulunah dune dudulh dune bulh tinta na'dut'ih, dune 'ulhna be'ahóoket, huwhuts'it, dich'oh bughunek k'ueyuz chah, 'et ndunt'ah dune, 'en ndi Moses be' dustl'us buba' yilya. Yak'usda bughunek unzoo, 'i ts'iyaintsuk unzoo hoh dune whubodulh'eh. 'Et 'udun huwa ts'ah'un khunek hiyodel'i, 'i hich'a detni t'eh, 'en chah buba' yilya. ¹¹ Ndi khunek unzoo, 'i degha nus dézti, 'ink'ez Yak'usda zeh unzoo, 'en bugha zeh 'int'ah. 'Et si st'aninintan hoh stl'aida'ai.

Yak'usda ye unzoo, 'i ts'udóolhti

¹² Christ, Sizi ts'utni, 'en neMoodihti 'en st'aninintan hoh 'ulhtus sulhtsi 'ink'ez de'ut'en k'ah buba' test'ilh, 'et stl'aho'ai, 'et huwa 'en ts'un schanailya dusni. ¹³ Niz de haoodanzut Yak'usda ch'a desni inle 'ink'ez huba 'alha' hoont'ah, 'en dzuh nobuzilhde. 'En ts'iyana ba dzuh 'udusni inle. 'Et whunts'ih 'aw hoonli t'eoonuzuszun, suba 'alha cha'hoot'ah 'et huwa 'est'en, 'et whunts'ih sugha te'ninzip. ¹⁴ 'Et neMoodihti ye suts'un unzoo, 'i tube lhai ho' 'int'ah, 'ink'ez Christ, Sizi ts'utni, 'en ye sk'entsi', 'i be 'alha 'uhoont'ah, 'i chah 'en bulh 'uhoont'ah. ¹⁵ Ndi khunek be nyulh yalhtuk, 'i 'alha' 'int'ah 'ink'ez soo ts'iyawh but'aníontan, 'et ndutni: Christ, Sizi ts'utni, 'en ndi yun

* ^{1:5} Ndi khunek "Neyuh ts'ih huwa t'ets'oninzun", 'i hoonli ts'ih'un na'a k'us tink'us 'uhoont'ah, 'i gha t'ets'oninzun, ts'utni ho' ts'utni.

k'uz nusiya lubeshi be né'hut'en hubutelhyih 'et wheni, 'ink'ez si degha nus dune untsi' usdli inle. ¹⁶ 'Et whula gha ts'ih sugha te'nanzin. 'I be dune tah si 'udechoo sili hoh ts'iyanah hobuntelhtun, nts'e na'a Sizi Gri sa whuts'un suba ilh'i sugha te'nanzin. 'Et sugha ndez na'a ndunnah 'aw 'et nilhdukw 'en huba 'alha' yint'ah, 'ilhuz hukhutenalh ho' hutet'ilh. ¹⁷ K'an 'et ndun 'ilhuz wheni whuhubudayi cho unli, 'en ba ts'odélhti. 'En degha nus dezti unli. 'En 'int'ah dachátesa 'ink'ez 'aw ts'oo'en ghait'ah. 'En Yak'usda whunih unli. 'En 'ilhuz wheni ba ts'odélhti uztele. 'Et ndoh honeh.

Be neba 'alha 'ahoont'ah, i soo cho bulh onyin

¹⁸ Timothy suye', ndi khunek ncha 'i ntl'ada'ai. 'I Yak'usda be nus whunólh'en, 'uda nghu yahalhtuk inle, 'et si chah whuz na'a ntl'aho'ai. Ndi be 'alha 'ahoont'ah, 'i soo cho be but'ayonya. ¹⁹ Be 'alha 'ahoont'ah 'ink'ez nyuh ts'ih bugha t'ets'oninzun, 'i ndi 'ut'en wheni, 'i be soo ubontun. Bulunah ndai hubeni tah yudez'ai, 'i ts'iyawh hukwa cha'hunizun. 'Et huwa be 'alha' 'ahoont'ah, 'i tinta' honilh'en. ²⁰ Ndunnah Hymenaeus 'ink'ez Alexander 'en nduhínt'ah. 'En Yak'usda ch'a yahalhtuk. 'Et huwa Satan† tl'aoobalhti inle. 'I be Yak'usda ch'a yahalhtuk 'et nduchah hudoosneh wule ka.

2

¹ 'Et huwa soo cho 'un nyudusni, 'udechoo Yak'usda ts'un ts'iyanah huba buts'un tedindli, 'et bula 'ooneh. 'Ink'ez hukwa' ninzun k'una'a 'et whuz na'a bula' tet'ilh, 'ink'ez Yak'usda ts'un chanailya dini. ² Hubudayi cho 'ink'ez ts'iyawh negha ndoh 'ududildzun, 'en chah huba tenadindli. 'Et t'eh t'ezdusnih 'ink'ez nedzi dooghel hoh ndi yun k'ut uzdoolts'i. 'Et whuz na'a Yak'usda ba ndi yun k'ut uzdoolts'i' 'ink'ez ts'iyanah ba ts'inzoo wule. ³ 'Et whuz na'a yinkak uzdelhts'i, 'et hoonzoo ho' hoont'ah 'ink'ez Yak'usda neulhyis whuz na'a neba hukwa' ninzun. ⁴ 'En 'int'ah ts'iyanah butelhyih hukwa' ninzun 'ink'ez ndi khunek 'alha' 'int'ah, 'i t'ehinoozeh ka. ⁵ Yak'usda 'ilhunuh ze' 'int'ah. Yak'usda 'ink'ez ndi yun k'ut húdelhts'i hubéguz 'ilhunuh huba yalhtuk ze' 'int'ah, ndun dune Christ, Sizi ts'utni, 'en 'int'ah. ⁶ Nuwheni ts'iyawh nenaootekulh ka butl'a' dudelti. Ndet whusawhélt'sut soo 'et 'uja, ts'iyanah whunilhtan 'et whuz na'a. ⁷ 'Et wheni Yak'usda 'utahásalhti whel'a tesdle ka 'ink'ez buba yatéltuk. Si 'utesnilh 'udun yun k'ut whut'en be 'alha 'ahoont'ah 'ink'ez khunek 'alha' 'int'ah, 'i chah be whubuntélhtun ka. 'Et Christ bunalh daja dusni 'alha' 'int'ah be' dusni, 'aw chaoozústs'it.

Dune 'ink'ez ts'ekoo ndunnah huba 'alha' hoont'ah, Yak'usda ba 'ilhu-nahuwudulh dahutet'ilh

⁸ 'Aw 'et ndi yun k'ut nduhoolcho hoh dune tenahudoodli. 'Et huwa bula hoonliyaz lubeshi bughu hoolah hoh dihudoolnih. 'Aw whúske hubeni tah hoolah 'ink'ez huba nawh cha'host'e hoh tenahudoodli. 'Et whuz na'a sudzi ndulhcho, 'i be 'en huba hukwa' nuszun. ⁹ 'Ink'ez whuz na'a ts'ekoo 'en chah ts'ah'un na'a hoh soo nahudootneh. Huwhunih hukw'u na'a soo 'uhoot'e, buyust'e ts'iyawh buk'e 'uzdla hukw'u na'a. Dutsigha lhat teh cho nahídoolhtsi gunih. K'us gold, k'us kw'usul nehídelya, 'i k'us naih 'o nus dézti, 'i 'et ndóohoont'ah. ¹⁰ 'Et whunts'ih ts'ekoo, 'en 'ut'en unzoo, 'i 'uhitelh'ilh. 'Et whuz na'a whubuntelhtun ndunnah Yak'usda ts'un teni' hunilhdzun 'uhint'ah. ¹¹ 'Et ts'ekoo dune butl'a' hududoolyelh 'ink'ez t'ehudoosnih hoh soo cho Yak'usda bughunek hiyoodol'eh. ¹² 'Et ts'eke 'aw dune hoodolh'eh ka, 'ink'ez yumoodih wule ka butl'achawhus'al. 'Ink'ez t'edoosnih huba' hoont'ah. ¹³ Yak'usda Adam 'en choo 'uyinla, 'et hukw'elh'az Eve 'uyínla 'et

† ^{1:20} Ndunnah Satan 'en netsudule cha hiyulhni. 'Et whunts'i 'aw 'en bugha ilah. Ne'aBá 'en zeh neba nahuteyeh.

huwa. ¹⁴ 'Ink'ez Adam 'aw nachanit'ah, k'us ndun ts'eke 'en naina'a 'ink'ez tink'us 'uja. ¹⁵ 'Et whunts'ih ts'ekoo ts'ah'un na'a duden'i be khuhudli hoh be 'alha 'uhoont'ah hit'i, Yak'usda k'ehintsi', 'ink'ez buyust'e lubeshi bughu hoolah, 'et zeh nduhint'ah t'eh, buyaz whulhih teh hudutejih.

3

Yak'usda ba huwunli, 'en ndez na'a dune wule huba' hoont'ah

¹ Ndi khunek but'aníznentan, 'i 'et ndutni: Ndán dune Yak'usda ba huwunli tele hukwa' ninzun t'eh, 'en 'ut'en unzoo, 'i 'itelh'ilh hukwa' ninzun ho' 'int'ah. ² 'Ink'ez Yak'usda ba huwunli, 'aw dune hoonli hoh tink'us cha'oost'e. 'Ilhunuh zeh bu'at wule. Duba whutnih. Ts'ah'un ni nezulh. Dune bukoo dalih. Soo dune hodulh'eh unli, ³ 'ink'ez mai too 'i ka dachasne. 'Aw khun chahunlhuts'e 'int'ah. 'Aw sooneya ka datne. Dune ch'a nucha'ust'en. Dune yenah cha'dusnih. 'Uyoon dune be'ildzun ka cha'nizun. ⁴ Ts'ah'un na'a bukoo húdelhts'i bughole 'ink'ez dich'oh duduzkeh, 'en chah hube'abá hubutl'a'dudoolyelh hoh budzi k'ah hik'une' 'ut'en huboolhtsilh. ⁵ 'Et ts'ah'un na'a bukoo húdelhts'i bughunli 'aw t'eoónizun t'eh, nts'e na'a Yak'usda ba 'ilhunahuwúdulh bughu tele? ⁶ K'an 'et buba 'alha' hooja ilah 'oot'e. Doo ka sih ut'udelhúti wule, 'ink'ez netsudule be ba nahesda, 'et didut chah sih whuz na'a 'ooneh. ⁷ 'Ink'ez ndunnah huba 'alha cha'hoot'ah, 'en chah soo highu yaoolhtuk, doo ka sih tink'us 'uja 'ink'ez netsudule yoolhgooh.

Yak'usda ba ne'út'en, 'et nts'e na'a dune tele

⁸ Whuz na'a zeh Yak'usda ba ne'út'en hukwa' hut'en: 'en Yak'usda buba dóoti. 'Aw nankoh bughunek chailah. 'Aw mai too 'i ka datne ilah, 'ink'ez 'aw sooneya chah ka datne ilah. ⁹ 'Et whe' hoont'ah hooyah, be neba 'alha' whutet'ilh 'i bulh, buyuh ts'ih bugha t'ets'oninzun, 'i soo netsun hoolah 'et hahotun. ¹⁰ 'Et whunts'ih ndunnah Yak'usda ba ne'hút'en, 'udeechoo soo cho dune t'ebunoozeh 'ink'ez 'aw hoonliyaz hik'eho'ah hoolah t'eh, 'en Yak'usda ba né'tet'en. ¹¹ Whuz na'a zeh ts'ekoo 'en chah Yak'usda buba dóoti, 'uyoon ch'a yachahoolhtuk, duba whutnih hoole, 'et huwa ts'iyaintsuk hoh but'aníuznootan ka. ¹² 'Ink'ez ndunnah Yak'usda ba ne'hút'en, 'en chah 'ilhunuh zeh bu'at wule. Dich'oh duduzkeh 'ink'ez bukoo húdelhts'i chah ts'iyawh ts'ah'un na'a bughole huba' hoont'ah. ¹³ Ndán soo Yak'usda ba ne'hust'en, 'en ndunnah dune hinzoo hubuhútni, 'ink'ez Christ, Sizi ts'utni, 'en ye 'alha' 'int'ah, 'aw whechaniljut hoh 'i be 'uyoон bulh yaoolhtuk.

Hooncha whe' hoont'ah hooyah

¹⁴ 'Aw 'et nilhdukw nts'un tesyalh hukwa' nuszun 'et whunts'ih nts'un k'e'usges. ¹⁵ 'Et whunts'ih sayaz ne'zust'en t'eh, 'et ndi dustl'us 'i bugha t'eoónonzin Yak'usda bukoo dahutet'ilh. 'Et ndán Yak'usda bugha 'ilhunahuwúdulh, 'en Yak'usda khuna bukoo hinli ho' hint'ah. Ndunnah 'ilhunahuwúdulh ndi khunek 'alha' 'int'ah be highunli 'ink'ez ts'ah'un na'a highu yalhtuk. ¹⁶ 'Ink'ez 'aw hubugha lhenah cha'hudusnih, njan whe' hoont'ah hooyah 'et hooncha ho' hoont'ah:

Yak'usda ba ndi yun k'ut 'uzdoolts'i ka.

Yak'usda dich'oh dune suli 'et whubunelhtan.
Ndoni ts'ah'un 'int'ah unli yulhni.

Lizas hiya'en.

'Udun yun k'ut whut'en,
'en hubugha whulh 'uhudants'o.

Ndi yun k'ut whut'en,
'en hubugha hiba 'alha' 'int'ah huzdli.
Yak'uz ts'ih hohoont'i hoh danahinilhti.

4

Sizi Gri whubodulh'eh dune whuch'a nahusdelh whutéleh

¹ 'Aw 'et Ndoni soo ts'ah'un na'a ts'et gaih yalhtuk hoh ndutni, k'at lih ntsi' nududeh bulunah dune nabunte'ah. 'Et huwa ndet whubodutelh'eh, 'aw 'et zeh 'uhoootuzelhts'ilh. 'Ink'ez ndi be 'alha 'uhoont'ah, 'i hila dutetnih ho' hoont'ah. ² Ndunnah duba nahududzoo 'en whuts'it, 'i be yahalhtuk. 'Et buyuh ts'ih bugha t'ets'oninzun, 'i kwun be hubuk'eyiduguz li'hut'ih. ³ Lhghu dutelts'ilh, 'et whuch'a honenyoot, 'ink'ez buluh ts'uyi 'i chah hich'a buntéyoot. 'Et whunts'ih ndunnah huba 'alha' hoont'ah 'ink'ez khunek 'alha' 'int'ah, t'ehininzun, 'en hika' ninzun, 'i ts'iyawh hiyoo'ah huba' hoont'ah, Yak'usda 'uyinla 'et huwa. 'Et 'udechoo ndi ts'uyi ka Yak'usda ts'un chanailya hudooni 'ink'ez hiyoo'ah. ⁴ Yak'usda 'uyinla, 'i ts'iyawh unzoo ho' 'int'ah, 'ink'ez buka cha'ts'unooszin gunih. 'Et huwa Yak'usda ts'un chanailya ts'utni 'ink'ez ts'oo'ah. ⁵ Yak'usda bughunek 'ink'ez tenadudli bulh 'i be neba unzoo unli hoh ts'u'ah.

Sizi Gri ba soo ne'ut'en onle

⁶ Ndunnah lhulhutsinkah hinli, 'en Yak'usda bugha hubodilh'eh t'eh, 'et sih Sizi Gri ba soo ne'int'en tanle. 'Ink'ez ndi khunek be 'alha 'uhoont'ah, 'i bugha t'eeonanzin, 'ink'ez 'i soo cho buk'une' zint'en. ⁷ 'Et whunts'ih khunek chaizooh, 'i 'ink'ez 'ants'ih khunek, 'i oozólhts'a gunih! 'Et Yak'usda ba ndi yun k'ut uzdoolts'i ka, 'i be ílhtus onle. ⁸ 'Et neyust'e ba ne'uzdunuldze, 'et 'astl'iyaz zeh neba whutézoo, 'et whunts'ih Yak'usda ba ndi yun k'ut uzdoolts'i ka, 'et ts'iyaintsuk whudézti. 'I bugha ndi yun k'ut uzdelhts'i nela' 'uwhutet'ilh 'ink'ez yak'uz nizteyalh, 'et chah nela' 'uwhudutenilh. ⁹ Ndi khunek be nyulh yalhtuk, 'i but'ainíontan 'ink'ez tálchchuh huba soo 'uldzoo ho' 'int'ah. ¹⁰ 'Et nuwheni 'uts'ut'en 'ink'ez hukw'elha dzúh nuts'udeh. Yak'usda khuna, 'en but'aníuznentan 'et huwa. 'En ts'ianah hubulhyis 'int'ah ndunnah yuba 'alha' yint'ah, 'en soo hubulhyis.

Yak'usda ba ne'int'en, soo cho howinli

¹¹ 'Et ndi khunek ntl'ada'ai, 'i be 'uyoon hoodutalh'eh. ¹² Chilh inli whunts'i, 'uyoon ba 'ants'i onle gunih. 'Et huba 'alha' hoont'ah, nyun nyanilh'en t'eh, 'et huwa huhodool'eh. Ndai khunek be yailhtuk, 'i nts'e na'a ndi yun k'ut sinda, nts'e na'a 'uyoon k'eintsi', 'i nyegha be, mba 'alha' hoont'ah, 'ink'ez nts'e na'a lubeshi ch'a 'utdunelt'uk chah. 'Et ndi ts'iyawh 'i be huba dobuntaltun. ¹³ 'Et ndet nts'u tesyalh whuts'un, khun ndi Yak'usda bughunek buba hukw'eyailhtuk, 'et 'ustl'e cha'duzoneh. Ndai khunek be ts'oolhtus ka be nelh yailhtuk, 'i be hubulh yailhtuk, 'ink'ez 'o 'un chah wheoobunilhtun. ¹⁴ 'Et hoh da ndunnah 'utsuh whudélhdzulh bula be ntsi k'ut hudalnik. 'Et mba nus hoho'en 'ink'ez 'i nghant'ai, 'i 'ants'i mba wule gunih. ¹⁵ 'Et njan howun nuni ninzut 'ink'ez whutl'a' dudiltih. 'Et t'eh but'az ninyeh, 'et ts'ianah hinoolh'en. ¹⁶ Nyunch'oh soo cho khinli 'ink'ez khunek be whuts'odul'eh chah, 'i bulh zeh 'ont'e. 'Et ndint'ah t'eh, 'et sih nyunch'oh 'uduzilyih 'ink'ez ndan nyuhudits'o, 'en chah hubalhyiz ho' 'int'ah.

5

Yak'usda ba 'ilhunahuwúdulh, soo cho né'bilh'en

¹ Dune nghanus whudélhdzulh, hoonliyaz né'doni gunih. 'Et nyu'abá k'una'a bulh yailhtuk. Dune nk'ah whudélhdzulh, 'en nyulhutsinkah k'una'a hubulh yailhtuk. ² Ts'ekoo nghanus whudélhdzulh, nyu'ama k'una'a hubulh yailhtuk. 'Ink'ez ts'ekoo nk'ah whudélhdzulh, nyulhtuskah k'una'a khunek netsun hoolah be hubulh yaoolhtuk.

Ndunnah soo tsandelh hinli hubuzdóolhti

³ Ndunnah soo ts'ah'un tsandelh hinli, 'en chah hubudólhti. ⁴ 'Et whunts'ih ndunnah tsandelh buzkeh hoonli, k'us buchaikah hoonli, ndunnah tsandelh hits'u hainde, 'en be'ama ts'ah'un na'a highole. 'Et hoh Yak'usda be 'ut'en k'ah whutele. 'Et 'udechoo bukoo húdelhts'i hubudoolhti, 'ink'ez dudus-nekah bula' hóot'en. Ndez na'a hoonzoo ho' hoont'ah 'ink'ez Yak'usda, whuz na'a huba hukwa' ninzun. ⁵ Ndan soo ts'ah'un tsandelh unli 'ink'ez bunat 'e'hoolah t'eh, Yak'usda 'en zeh yut'aninootan yula' tet'ilh huba. 'Et dzin 'ink'ez 'ulh'ek, 'i bulh 'ahoolhyez Yak'usda ts'un teni' nilhdzun hoh tenadoodli. ⁶ 'Et whunts'ih tsandelh, ndan lubeshi ts'un dene'dut'en hoh ndi yun k'ut usda, ndunt'ah hukhuna hoh dahuzzai ho' hint'ah. ⁷ Daja nyudáni 'i khunek ulhtus 'i be ts'iyanah hubulh yailhtuk. 'Et hoh buk'eholts'it hoolah. ⁸ 'Et whunts'ih ndunnah 'aw dunatneka bughu chailah, 'ink'ez bukoo húdelhts'i, 'en cha bughu chailah t'eh, 'et ndunt'ah ndi be 'alha 'uhoont'ah yuch'a nal'alh, 'ink'ez huba 'alha cha'hoot'ah ba nus chaizooth ho' 'int'ah. ⁹ Tsandelh lhk'utai lanezi 'o 'at naoodezut be naooduzuk (60), 'ink'ez 'ilhunuh zeh ghinda t'eh, 'en zeh huboozi hubuk'e'ooduguz huba' hoont'ah. ¹⁰ Unzoo, 'i zeh 'uhulh'en huwa t'ehunoodzin. 'Uskehyaz nelhyi t'eh, dune t'eoobunízun, 'en whunts'i bukoo dabulih, dune Yak'usda bube'ildzun, 'en buke toonagus, dzuh nuhuzut 'ut'en t'eh, 'et ndi 'ut'en unzoo, 'i soo cho ts'iyawh 'uyoolh'en. ¹¹ 'Et whunts'ih k'us ndan k'an hezulh tsandelh hinli, 'en huboozi buk'e'onges gunih. Nts'un na'a ne'hoot'en 'ink'ez Christ ch'a nahulhú'a t'eh, ki ka hudutedut'ilh hukwa' huninzun. ¹² 'Ink'ez 'udechoo hubughunek hiye nahezya, 'i k'uhinínyuz t'eh, 'et t'eh huba nahutedeh. ¹³ 'Ink'ez tsehudutnik chah huhodel'i 'ink'ez kwun tah nuhuya. 'Aw tsihudutnik zeh 'uhint'ah, 'ughu yahulhtuk 'ink'ez 'uyoon 'e'ut'en k'ah huwu hinli cha' hint'ah. 'Aw ne'hudooni huba cha'hoot'ah, hoh teh ne'huduni. ¹⁴ 'Et huwa ndez na'a buts'u hukwa' nuszun, ndunnah tsandelhyaz, 'en ki náhoot'i 'ink'ez bubuzkeh hole, 'ink'ez bukoo chah huwo hoole. 'Et njan nduhut'en t'eh, 'aw nech'a detni nelh yatelhtuk bughá holts'it ghait'ah. ¹⁵ Bulunah 'uda Sizi Gri hich'a nalhú'a hoh Satan hik'une' 'ut'en 'et huwa. ¹⁶ Ndan dune k'us ts'eke 'en huba 'alha' hoont'ah unli, 'ink'ez be'ama tsandelh unli t'eh, 'et sih ndai ye ndunidzit, 'i be bula' hóot'en. 'Et whuz na'a 'onghoh Yak'usda ba 'ilhunahuwúdulh hoonliyaz hubugha hoo'alh ghait'ah. 'Et nduhut'en t'eh, 'et soo ts'ah'un tsandelh hinli, ndai hiye ndunidzit, 'i be bughu hoole.

Yak'usda ba 'ilhunahuwúdulh, ndunnah netsuh whudélhdzulh hubuzdóolhti

¹⁷ Netsuh whudélhdzulh soo dune tsuh nuya, 'en soo hubuzdóolhti 'ink'ez nawh 'ultsuk, 'i be bughonle. Ndan 'ut'en ulhtus, 'i be 'ut'en hoh Yak'usda be 'ut'en k'ah dune hodulh'eh 'ink'ez Yak'usda bughunek be yahulhtuk, 'en degha nus soo ne'boolh'en. ¹⁸ Yak'usda bughunek 'et chah ndutni, "Ndet musdus dune tl'o mai 'uzte'ilh wheni, 'uyulh'en t'eh, 'aw 'ute'alh whuch'a 'enool'a huba cha'hoot'ah." 'Ink'ez 'et chah ndutni, "Dune 'ut'en be 'ut'en buba 'uk'elha whutele ho' hoont'ah." ¹⁹ Ndunnah 'utsuh whudélhdzulh hoonli hubugha hik'eoote'alh t'eh, 'et nanah k'us tanah, 'en hiyulh t'ewhuninzun t'eh, 'et zeh huwu yahoolhtuk huba' hoont'ah. ²⁰ Ndunnah lubeshi hilchukw, ts'iyanah nalh hoh tinta' hunt'en hukwa' bodóni huba' hoont'ah. 'Et sih 'onghoh 'en chah whe hunooljut. ²¹ Yak'usda, Sizi Gri neMoodihti, 'ink'ez lizas 'utahalya chah, 'en ts'iyawh bunalh soo ts'ah'un na'a 'un yudutesnilh, ndi khunek be daja nyudáni 'et huwa 'ilhuz wule ontun. Ndai 'utalh'ilh, 'i ts'iyawh dune ch'a wule hukw'u na'a 'oneh gunih. 'Ink'ez 'aw 'ilhunuh zeh k'entsi' 'ink'ez hoonliyaz whuts'un nolht'uk gunih. ²² Khunyaz dune k'edolnih gunih. 'Ink'ez 'uyoon lubeshi 'ulh'en 'e'ut'en k'ah ts'ih tonya gunih!

Nyunch'oh chah lubeshi 'et 'ududoldzin. ²³ 'Et lhat hoh mbut bugha ndinda, 'et huwa 'aw too zeh otnai gunih, mai too ntsolyaz buk'ei'ontnai. ²⁴ Bulunah bulubeshi ts'iyanah yunilh'en, 'et huwa ndai ye huba nahutedeh whutsuh, 'i dahaja, ts'iyanah t'ehontezin. 'Ink'ez bulunah bulubeshi nahinulh'i, 'et hukw'elh'az ndai ye nahezya, 'i dahaja, ts'iyanah t'eyuntezeh ho' hoont'ah. ²⁵ 'Ink'ez whuz na'a zeh ndan 'ut'en unzoo, 'i 'ulh'en, ts'iyanah t'ewhuntezeh 'ink'ez 'ut'en unzoo, 'i nahinulh'i t'eh, 'i whunts'i ts'iyanah t'ewhuntezeh.

6

'Ulhna hinli, 'en chah hubumoodih hidóolhti

¹ Ndunnah 'ulhna hinli, 'en chah hubumoodih ts'ah'un na'a bughu nuni hunoodeh, soo cho hidóolhti. 'Et nduhut'en t'eh, Yak'usda boozi 'ink'ez ye whubodalh'i, 'i chah 'aw 'uyoon yuch'a dootni ghat'ah. ² 'Et 'ulhna bumoodih huba 'alha' hoont'ah hinli, 'en hubuts'u hudoontni gunih, lhulhutsinkah hinli 'et huwa. 'Et ndunnah 'ulhna, 'en 'o nus 'ulhtus, 'i be huba' hut'en. Ndunnah bumoodih, 'en Sizi Gri bughu huba 'alha' yint'ah hinli 'ink'ez hubuk'entsi'. 'Et huwa 'o nus 'ulhtus, 'i be huba' hut'en hoh hube' 'ut'en be hubula' hut'en ho' hut'en. 'Et ndi khunek be nyulh yalhtuk, 'i 'uyoon chah hubodulh'eh 'ink'ez hubudzi nduk na'inleh.

Sooneya nuhyak'usda wule gunih

³ 'Et ndan dune whuts'it be dune hodulh'eh, 'en Sizi Gri neMoodihti bughunek unzoo, 'i yutélhchulh hukwa cha'nizun. 'Ink'ez nts'e na'a Yak'usda ba ndi yun k'ut 'uzdoolts'i ka hukw'u na'a huboodutelh'eh hukwa cha'nizun t'eh, ⁴ 'en dune 'ududélhúti ho' 'int'ah. Hoonliyaz nt'eoónizun. 'Et huwa 'ahoolhyez dune yenah zeh 'udenilh 'ink'ez lhk'enahudidzuk 'utni. 'Et huwa ndunt'ah dune 'oolnih bughu dez'ai hinli 'uhint'ah. 'Uyoon chah lhk'enahudidzuk hutni, khunek nts'i be 'uyoon chah ghu yahalhtuk. 'Et 'uyoon lubeshi e'ut'en zeh ghu nuni hunudeh. ⁵ Ndunnah hubeni nts'i suli hoh 'ahoolhyez lhk'enahudidzuk huninzun. Khunek 'alha' 'int'ah chahit'ih. Ndunt'ah 'uhuninzun ndan Yak'usda be 'ut'en k'ah hukw'u ne'ut'en, 'en dune soode'a 'utenilh. Nduhint'ah 'en hubuch'a naónja. ⁶ 'Et whunts'ih nedzi soo ts'uhooont'i hoh Yak'usda be 'ut'en k'ah 'uts'uhulh'en t'eh, 'et hooncha 'otanlilih ho' hoont'ah. ⁷ Ts'uhuzzdli da, 'aw hoonliyaz whusachats'ilel, 'ink'ez 'alha neba dzin whulatah suli t'eh, 'aw hoonliyaz naztooza ghat'ah. ⁸ 'Et huwa ts'uyi, 'ink'ez be dune ts'inli, 'i ts'it'i t'eh, 'aw 'et neba soo' hot'e. ⁹ 'Et whunts'ih bulunah soode'a 'uhutenilh hukwa' huninzun, 'en tinta' tet'ilh ka hubóolhdzi. 'I be hubutelhgooh. 'Et huwa yuk hubunilht'uk, 'et hoh ndi yun k'ut húdelhts'i tinta' whutet'ilh 'ink'ez hoontsi' ts'ih huteyalh. ¹⁰ Sooneya huba dézti, 'i 'int'ah lhat hoontsi' bughu whe' whudit'ih. 'I bughu bulunah dahatni k'et, be 'alha 'uhooont'ah ch'a hedulh 'ink'ez lhat budzi unduda khanáhuwhut'ah.

Dune hodelh'i 'ink'ez nyunch'oh chahsoo cho khondle

¹¹ Timothy, nyun Yak'usda budune inli. 'Et huwa ndi be hoontsi' nyudáni, 'i ts'iyawh buch'a ilgih, 'ink'ez be ts'ah'un 'uhooont'ah, be Yak'usda k'une' whut'en, be 'alha 'uhooont'ah, be nek'ets'ints'i, be whulh ts'uzyin, 'ink'ez be yuk uzdudildzun, chah, ndi 'i ts'iyawh whunanyalh hukwa 'int'en. ¹² Neba 'alha 'int'ah 'i bughu 'o 'un 'uts'ooneh ghat'ah 'et whunts'i hukwa' ts'ut'en. Nyun chah 'o 'un oneh ghat'ah 'et whunts'i hukwa' 'ont'en. 'Ilhuz be ts'ukhuna, 'i duts'o cho óntun, nyun chah dutanjih ka nka hesda 'et huwa. 'Ink'ez lhanah nalh soo hoonzoo hoh hubudáni. ¹³ Njan soo cho 'indusni, Yak'usda, 'en bughu ts'iyaits'uk khuna, 'ink'ez 'et whutsuh da Christ, Sizi

ts'utni, bunalh hoh Pontius Pilot soo cho hoh yuts'un khunawhelnuk, ¹⁴ nyun chah khunek netl'aída'ai, 'i buk'une' 'ont'en. Ndai dune be dutsun tele, 'ink'ez hoonliyaz nk'eootelts'ulh, 'i ts'iyawh buch'a huwonle. 'Et neMoodihti Sizi Gri whusateyalh whuts'un, 'et zeh ndont'e. ¹⁵ Sizi Gri whuz hanátedalh, ndet 'uwhutenilh t'eh, 'et neMoodihti 'en hukwa' ninzun, 'et 'uwhutenilh. 'En degha nus unzoo 'ink'ez neMoodihti 'en zeh k'une' 'ut'en unli. Hubudayi cho ts'iyawh buhubudayi cho unli 'ink'ez moodih chah ts'iyawh bumoodihti unli. ¹⁶ 'Aw 'en zeh be dachats'usa, 'i yit'i. Nts'e usda, 'et ndi buts'un hayanduz, 'i bugha 'aw dune yuzih neooya ghat'ah. 'Aw dune chayes'en, 'ink'ez 'aw dune yoo'en hoolah. 'En 'aw 'en zeh 'ilhuz be hoolhtus, 'i yit'i. 'Et huwa uzdélhti. 'Et ndoh honeh.

Soode'a t'eh 'aw cha'duzoolhúti

¹⁷ Ndán ndi yun k'ut soo hude'a 'uhint'ah, 'en khunek 'ulhtus, 'i be hubudóni, 'aw ndi yun k'ut be soode'a 'i 'aw di chaílah. 'Et huwa 'aw 'i but'anínoohtan huba cha'hoot'ah. 'Et ndun Yak'usda khuna, 'aw 'en zeh but'anínoohtan. Yak'usda 'en 'ut'en 'aw hukw'edutsi' ilah hoh ts'iyaintsuk be soo 'ats'oot'e ka negha yunleh. ¹⁸ Ts'ah'un na'a 'uhoot'en hubudoni. Hukw'edutsi' ilah hoh 'ut'en unzoo, 'i 'uhoolh'en. 'Ahoolhyez 'uyoon hiye ndunidzit, 'i be bula' hutet'ilh huba lhahúdoot'e. Soo ts'uhooont'i hoh lhta'ts'oolyelh. ¹⁹ 'Et nduhut'en t'eh, 'i be nduk yak'uz dézti, 'i dich'oh duba 'ilho'howesdle, whusaootelts'ulh wheni. 'Et 'ilhuz be ts'ukhuna, 'i hitélhchulh ho' hoont'ah.

Khunek be 'alha 'uhooont'ah, 'i soo cho bughondle

²⁰ Suye' Timothy ndi khunek ntl'ada'a, 'i soo cho buk'une' 'ont'en, 'et wheni 'usdla. Ndunnah dune 'ants'i howi yahalhtuk 'ink'ez Yak'usda ch'a yahalhtuk, khun buzih nioonya gunih. Ndunnah whuz na'a yahalhtuk, t'ehoninzun huninzun whunts'i, 'en nech'a detni hinli. ²¹ Ndi howi yahalhtuk ndi neba 'alha' hoont'ah, 'en bulunah, 'en tink'us hedulh ho' hutni. 'Et Yak'usda ye unzoo, 'i nyulh 'oot'e. 'Et ndoh honeh.

Paul Whulh Nat Dustl'us 'I Timothy Yuts'un K'e'anguz

Paul, 'en Timothy dahooja yulhni

¹ Si Paul, Sizi Gri ba whél'a usdli. Ndi 'ilhuz be ts'úkhuna, 'i Christ, Sizi ts'utni, 'en yit'i 'ink'ez 'ilhuz wheni 'int'ah nedáni. 'I bugha Yak'usda ndet suts'u hukwa' ninzun 'et huwa whél'a síli. ² Nyun Timothy suye' nk'esi' inli 'ink'ez ndi dustl'us nts'o tl'ai'ai. Yak'usda ne'aBá 'ink'ez Christ, Sizi ts'utni, 'en neMoodihti, 'en bugha ye unzoo, be 'úgha te'nudzun, 'ink'ez be nedzi dezghel, 'i chah, 'i be 'ónt'e hukwa' nuszun.

Paul 'en Timothy yuba whunalnih nts'e na'a Sizi Gri ts'un nalhú'a

³ 'Et Yak'usda ts'un schanailya dusni. Sutsuhda hukw'u na'a, suyuh ts'ih bugha t'ets'oninzun, 'i, lubeshi bughu hoolah hoh Yak'usda buba ne'ust'en. Dzin 'ink'ez 'ulh'ek, 'i bulh, ndet tenadusdli totsuk 'aw 'et nyunalhúnih. ⁴ Nyunats'ultoo' nulh'en 'et whunalhúnih 'ink'ez 'o nus nyuntelh'ilh hukwa' nuszun, 'et sih sudzi hót'i. ⁵ Ndi soo be 'alha 'uhoont'ah, 'i nyulh 'int'ah, 'i bunalhúnih. Ntsoo Lois, 'en 'udechoo ndi be 'alha 'uhoont'ah yulh 'int'ah inle, hukw'elh'az nyu'ama, Eunice, 'en chah. 'Ink'ez nyun chah 'et whuz na'a zeh 'unint'ah, 'et suba 'alha' hoont'ah. ⁶ 'Et huwa mba whunalhúnih ndet ntsi k'ut delhúnik hoh Yak'usda huwa yú'ah, 'i ntl'aída'ai. 'I 'ants'i bulh nughilhnah li'ilh'en, 'et 'i be 'o nus ílhtus wule. ⁷ Soo cho whunaooolnih, Yak'usda, Ndoni neyída'ai hoh 'aw chats'unoooljut. 'Ink'ez Ndoni bugha be ts'ílhtus be lhk'ets'udutsi', 'i ts'utet'i, 'ink'ez ne-eni be whunih ts'inli chah.

Khunek unzoo, 'i 'aw buka hooya onle gunih

⁸ 'Et huwa 'uyoon neMoodihti bugha hubulh yailhtuk t'eh, khun 'aw buka hooya onle gunih. Si chah tsak'esida 'et khun 'aw buka hooya onle gunih. 'Et 'uyoon khunek unzoo, 'i be hubulh yaílhtuk dzuh ninzut t'eh, 'et Yak'usda ye ulhtus, 'i bugha 'ínt'en. ⁹ 'En 'uja nélhyih. Nedzi lubeshi bughu whutélah, 'et whuz na'a neba hukwa' ninzun. 'Aw ne-e'ut'en k'ah bugha ilah neka' dani. Dich'oh ye unzoo, 'i bugha uzdutoejih ka neka' dani, 'et whuz na'a hukwa' ninzun. 'Ink'ez ndi ye unzoo, 'i Christ, Sizi ts'utni, 'en buts'un hayélts'ut hoh neghalts'ut. 'Et 'udechoo whe' whudutét'ilh, 'et whutsuh da 'uhoonla. ¹⁰ 'Aw 'et Sizi Gri nenalhts'et hainya. 'Et whuz na'a Yak'usda ndet dich'oh hukwa' ninzun 'ink'ez ye unzoo, 'i chah, 'i yunenélhtan. Nuwheni be dáztetsah 'i Sizi Gri neba hoolah yulhtsi 'ink'ez khunek unzoo, 'i be 'ilhuz be ts'úkhuna, 'i negha íni'ai. Ndi 'aw dáchats'utesa, 'et neba whusahó'ai, 'et hoh whunénelhtan. ¹¹ 'Et wheni si 'udun yun k'ut whut'en, 'en hubuts'u tesyalh. 'En hubutah húbulh yátelhtuk, 'ink'ez whubodutelh'eh, 'et whuba hubuts'u whel'a síli. ¹² 'Et huwa si chah dzuh nuszut, 'et whunts'ih 'aw hooya cha'usdlah. Ndun suba 'alha' 'int'ah, 'en t'enuszun 'et huwa. 'Ink'ez ndet butl'ahó'ai, degha nus dzin whuts'un soo 'ultus hoh suba hootetun, 'et suba 'alha' hoont'ah.

Ndi khunek unzoo, 'i soo cho ontun

¹³ Ndi khunek 'ulhtus, 'i bugha 'uts'ut'en, 'i li'int'ah si sts'un dánts'o, 'i duts'o cho ontun. Ndi be 'alha 'uhoont'ah 'ink'ez be lhk'ets'udutsi', 'i Christ, Sizi ts'utni, 'en buts'un hayande 'et huwa. ¹⁴ Ndai unzoo, 'i ntl'álya, 'i ts'iyawh Ndoni be ulhtus, 'i be soo cho ontun. 'En 'int'ah neyudínda. ¹⁵ Njan t'eeoninzun ts'iyanah Asia whut'en such'a nahulhúya. Phygellus 'ink'ez Hermogenes 'en chah. ¹⁶ Onesiphorus 'en lhat sudzi nduk yilh'i. 'Ink'ez ndi tse

tl'ool be whe dust'uk, 'i, 'aw yooya chailah hoh sunalh'en. 'Et huwa 'en bukoo húdelhts'i neMoodihti bugha te'nonzeh nt'úcha. ¹⁷ 'Et keyah Rome lhgha dínya hoh soo cho skunúta hoh nasalhti. ¹⁸ 'Et njan dzin whusawhútelts'ulh t'eh, 'et neMoodihti* ye únzoo, 'í unchah ndun Onesiphorus yulh 'int'ah, 'ink'ez neMoodihti yugha te'noozeh. 'Ink'ez keyah Ephesus ts'ih lhat hoh sula 'uja ínle, 'et chah soo t'eooininzun.

2

Ndi Sizi Gri ye unzoo, 'i be sooo 'iltus onle

¹ 'Et huwa suye' nyun Sizi Gri ye unzoo, 'i be sooo 'iltus onle. ² 'Ink'ez lhanah nalh daja sugha nyudáni, ndi khunek whulh 'údants'o, 'i 'uyoon ts'ah'un dune, 'en butl'aída'ai, ndan Sizi Gri hit'anínintan, 'en sooo ts'ah'un hoh 'o 'un 'uyoon hóbodolh'eh ka. ³ 'Et huwa Sizi Gri hiba lhahudughan unzoo k'una'a, nyun chah whuz howu whúlna whunts'ih whechaíntsaz. ⁴ Dune lhahudughan unli t'eh, 'et nts'e na'a sooneya ka ndi yun k'ut uzdelhts'i, 'aw whuz 'udunolt'uk għait'ah. 'En dumoodih ndun lhahudughan huba ne'duni, 'en yulh hootét'i, 'et hukwa 'en zeh yuba 'ut'en. ⁵ 'Ink'ez chah, ndan nuwhújeh tah whuch'a 'ulhdeh, ts'ah'un na'a whuch'a nilhde t'eh, 'et zeh hiba k'elha whulhtsih. ⁶ Ndán dune tube 'ut'en hoh ha' nulhyeh, 'en ndi haínalhyi, 'en choo yulah wulhchoot huba' hoont'ah. ⁷ Ndet ndi nyudúsni howu nini ninzut. 'Ink'ez neMoodihti, 'en nla 'ut'en hoh ts'iyaintsuk t'eoonoranzeh. ⁸ Soo whunailnih, Sizi Gri yahadla hubutah dinadija. David yuts'u haínzut chah 'int'ah. 'Et whuz na'a ndi sugħunek unzoo, 'i 'int'ah hoh nyudáni. ⁹ 'Et huwa si dune untsi' k'una'a tsak'esida hoh dzuh nuszut. 'Et whunts'ih Yak'usda bughunek 'i 'aw chailghel ho' 'int'ah. ¹⁰ 'Et huwa ndunnah 'utahálya, 'en huba hubugha whechástsaz. 'Et 'utahálya, 'en chah Christ, Sizi ts'utni, 'en ndi ye néulhyis, 'i hiyóolhchoot 'ink'ez 'ilhuz whuts'un ts'odólhti. ¹¹ Ndi khunek 'i sooo cho but'aneznootan 'et ndutni,

"En bulh dats'uzsai t'eh,
 'et 'ilhuz wheni bulh 'úztet'ilh.

¹² Nts'oh dawħut'en whunts'i whulh ts'úzyin t'eh,
 'et 'en bulħ dune k'une' ts'ul'en uztele.

Buch'a nats'ul'ah t'eh,
 didut chah nech'a nátel'a.

¹³ Bulazdetnik t'eh,
 'et whunts'ih 'aw didut nela dootnih għait'ah,
 'ink'ez 'aw 'ats'un na'a na'ootneh għait'ah 'et huwa."

Sizi Gri ba ne'ut'en, 'en bulunah hinzoo 'ink'ez bulunah chah hintsi'

¹⁴ 'Et ndi khunek 'i huba bunailnih. NeMoodihti nalh hubuduténih, 'et khun 'i khunek bugha hukwa lhena 'ahudootni gunih. Ts'iyawh huba chayízooh. 'Ants'i ndan yudánts'o 'en ts'iyawh tinta' hubutélh'ilh. ¹⁵ 'Et Yak'usda ba ts'ih'un dune onle, whuz na'a hukwa' 'int'en. Nye 'ut'en 'aw hukwa yachasonle. Ndi khunek 'alha' 'int'ah ts'ah'un na'a nt'eoonoranzeh.

¹⁶ 'Et whunts'ih 'ants'i nts'oh howi yahalhtuk 'ink'ez Yak'usda ghuhedloħ, 'en hubuzih nioonya gunih. Nduhínt'ah, 'en 'uyoon 'o nus Yak'usda ch'a yahalhtuk hubuhutelhtsilh. ¹⁷ Hubughunek, dada k'una'a hubutaidoozit. Ndunnah Hymenaeus 'ink'ez Philetus chah, 'en nduhínt'ah hinli. ¹⁸ 'En njan nduhint'ah dune ndi khunek 'alha' 'int'ah tink'us 'uhint'ah 'et huwa hich'a súdel. 'En 'uhutni, ndi dinahudutédulh, 'uda 'uhooja hutni. 'Et huwa bulunah nebe 'alha' hoont'ah, 'i huba hoolah suli. ¹⁹ 'Et whunts'ih Yak'usda bukoo

* ^{1:18} 'Et ndi boozi "NeMoodihti", 'i 'ilhunuh ne'aBa 'int'ah, 'ink'ez 'ilhunuh Sizi Gri 'int'ah, ni ho 'utni.

buk'uwuz'ai, 'i whuduts'o. 'Aw hoolah wúle ghait'ah. 'I k'ut ndi khunek yuk'e'ánguz, 'i ndutni, "Ndunnah neMoodihti bube'ildzun hinli, 'en ts'iyawh t'ebunínzun." Ink'ez chah, "Ndunnah 'uhutni, Christ ts'inli t'eh, 'en 'ut'en untsi', 'i ts'un nínt'uk, 'et ndoohoont'ah, 'et ts'iyawh whuch'a náholyeh huba' hoont'ah." ²⁰ Nts'e bukoo whucho whubez ts'ih ts'iyaintsuk 'et sula. Be' ts'utnai, bé 'uts'u'alh, buluh 'i gold, 'ink'ez silver chah, 'i be 'ulya. Buluh 'i duchun 'ink'ez whutl'us be 'ulya, 'i chah 'et sula. Buluh 'i unzoo 'ink'ez buluh 'i 'aw chaízoo. ²¹ 'Et whuz na'a, ndan dich'oh lubeshi yuch'a nalhú'a t'eh, 'et t'eh duMoodihti ba 'udune'ududulti 'ink'ez buMoodihti ye' tet'ilh, 'ut'en unzoo, 'i ts'iyawh yeni lhadínt'ah ho' 'int'ah. ²² 'Ink'ez nts'e na'a chilkah ntsi' buyust'e buts'un nint'uk, 'i buch'a telgai. 'Et ts'ah'un 'uhoont'ah, be 'alha 'uhoont'ah, be lhk'ets'udutsi', 'i be nedzi soo 'óot'e, 'i chah, ndi 'i ts'iyawh bunanyalh. 'Ink'ez ndunnah budzi yuh lubeshi bughu hoolah hoh neMoodihti ts'un tedudlih, 'en hubulh ín'us. ²³ 'Et whunts'ih whusnik khunek 'ink'ez khunek t'enusdzun, 'i whunts'i be yáhalhtuk, 'i ts'iyawh buch'a huwonle. T'eoónínzun ndi khunek ndunt'ah, 'i dune hiye lhta'dutnih 'utni, 'i 'int'ah. ²⁴ 'Et k'us ndan neMoodihti be 'ulhna, 'en 'aw dune yédooyih huba chahóot'ah, 'et whunts'i ts'iyanaah dune nagóosdiyaz ne'boolh'en, 'ink'ez soo dune hodulh'eh tele. Ts'iyanaah soo nilyaz ne'bulh'en. ²⁵ Yuh 'údudildzun 'ink'ez buch'a detni ts'ah'un hubulh nenáhoho'ah. 'Et tulih Yak'usda lubeshi whuch'a dudení nahundunezdla huboolhtsilh. 'Et sih khunek 'alha' 'int'ah t'ehinoozeh. ²⁶ 'Ink'ez 'et sih hubeni bugha nádoolts'it, 'ink'ez netsudule hubilhchoot inle hik'une' 'oot'en ka, 'et nts'oh teh hoh tink'us hunint'uk whuch'a nahooja.

3

'Et 'udek'elh'az dzin wheghah t'eh, tube whewhuntejut whutele ho' hoont'ah

¹ 'Et njan t'eoónonzin, 'et 'udek'elh'az dzin wheghah t'eh, tube whuwhuntejut whutele ho' hoont'ah. ² 'Et nilhdukw suli t'eh, dune dich'oh lhk'enahudutetsi', sooneya ka dahútni, ts'iyaintsuk hoh 'ahududelhúti, tube lhóok'a' hinli, Yak'usda 'ink'ez budune, 'en buch'a yahatelhtuk, hube'ama 'ink'ez hube'abá chah k'únucha'hutest'en, 'aw chanailya chahuneszin, 'ink'ez Yak'usda ghuhedloh chah hutete. ³ Dudulh dune k'echahítsi', 'aw hoonli lhba whunachahodulhunah. Dudulh dune dzuh ne'huduni hukwa' huninzun teh zeh ne'hut'en. 'Ants'i 'et 'uyoon dzuh nuhulhdeh, 'ink'ez ndet hoonzoo hukwa cha'huneszil. ⁴ 'Uyoon k'ehintsi' lahoohoohl'i 'ink'ez yooya 'i be dune hundulhda, 'inkez butsi dunuts'un. Duba na'hutedzoo, Yak'usda k'echahítsi', 'ink'ez ndet whunénik, 'et zeh hukwa' huntezilh. ⁵ 'Et Yak'usda ba ndi yun k'ut hudélhts'i na'hududil'i, 'et whunts'ih Yak'usda yé ulhtus, 'i hits'oodedlai. Timothy, nduhínt'ah, 'en hubuch'a naónja. ⁶ Ndunt'ah 'uyoon koo ts'ih dahánul'ih 'ink'ez ts'ekoo huwhusnik, lubeshi be dez bun, 'en 'ilhuz hubihilchukw. Ndunnah lhelhts'un 'ut'en dutsun, 'aw 'i zeh hits'u nint'uk. ⁷ 'Ahoolhyez hohodul'eh 'et whunts'ih khunek 'alha' 'int'ah daja ni 'aw t'ehinoozeh gait'ah. ⁸ 'Et ndunnah Jannes 'ink'ez Jambres bulh Moses hich'a hoonelh'i inle. 'Et whuz na'a ndunnah khunek 'alha' 'int'ah, hich'a hoonelh'i. 'En hubeni soo degha nus untsi' suli. 'Ink'ez ndi be 'alha 'uhoont'ah bugha huba 'ants'i 'uhoont'ah suli. ⁹ 'Et whunts'ih 'aw 'o 'un hutooya gait'ah. Hoh tinta' hunt'en ts'iyanaah t'ewhuntezilh. Nts'e na'a Jannes 'ink'ez Jambres hubulh dahooja, 'en buk'una'a hiye whusnik, 'i ts'iyanaah hubuga t'ewhuntezilh.

K'us ndan Yak'usda yunéyah, 'en 'aw dune hube túzelalh

¹⁰ 'Et whunts'ih huwa 'óonli hoh khunek bunyodalh'i, 'i buk'una'a 'ant'en. Timothy nyunch'oh njan t'ewhunínzun. Nts'e na'a dune usdli, nts'e hukwa 'ust'en, 'ink'ez Yak'usda suba 'alha' 'int'ah. Howa whúlna whulh síyin, 'ink'ez ts'iyanah be k'ési' 'i chah, 'aw hoonliyaz cha'duzusnih. ¹¹ Dune se'zula inle, 'ink'ez dzuh nusuhulhldzut. 'Et whuz yun k'ut Antioch, Iconium, 'ink'ez Lystra, whuz sulh 'et 'úhooja inle, 'i soo ts'iyawh t'eeonanzin. Dune se'zula 'aw whechástsaz, 'ink'ez neMoodihti ts'iyawh whuch'a sula 'uja. ¹² A, 'Alha' hoont'ah, k'us ndan Christ, Sizi ts'utni, 'en bughya Yak'usda ba khutena hukwa 'ut'en, 'en dune hube híye' tuzela ho' hoont'ah. ¹³ 'Et dune hintsi', 'uyoon na'dudil'i, 'en 'o nus hintsi' tele 'ink'ez 'o 'un chah hintsi' hutele. 'Et 'uyoon nahunte'ah 'ink'ez dich'oh chah na'hunduntet'ah. ¹⁴ 'Et whunts'ih nyun ndet hoodal'i hoh 'i ts'iyawh 'alha' 'int'ah t'enínzun whuz na'a zeh 'int'ah. 'Ink'ez ndunnah bughya hoodal'i, 'en t'ebuninzun. ¹⁵ 'Et nyun ski inli da whuts'un ndi Yak'usda bughunek lubeshi bughu hoolah hoh 'uk'e'éduguz, 'i nt'enanzin. 'I bughya be whutnih int'i hoh dinjih. Christ, Sizi ts'utni, 'en mba 'alha' 'int'ah 'et huwa. ¹⁶ Yak'usda bughunek 'i ts'iyawh Yak'usda ye sjiz, 'i bulh 'int'ah. 'Ink'ez bughya whúts'odul'eh huba unzoo, tinta' ts'ut'ih whunénulhtun, neba ts'ah'un niwhu'ah, 'ink'ez 'et whuneodulh'eh ts'ah'un na'a yinkak uzdóolts'i ka. ¹⁷ 'I be Yak'usda budune lhadúlya hutele, ts'iyaini 'ut'en unzoo, 'i wheni lhahúdint'ah.

4

Yak'usda bughunek bé hubulh yaíltuk

¹ 'Et huwa Yak'usda 'ink'ez neMoodihti Sizi Gri 'en bunalh soo ts'ah'un na'a 'un yudutésnih, 'en 'utenilh ts'iyanah nalh be wheóoduteltsih, ndai k'úne' yul'en, 'i bulh. Hoh t'eh hukhuna 'ink'ez yahadla chah, 'en huba nahuteyeh. ² 'Ahoolhyez lhadínt'ah Yak'usda bughunek be dune hubulh yaíltuk. Wheóobuniltun ndet hoh tinta' hut'ih, 'ink'ez tink'us 'uhut'en hukwa' budíni, 'ink'ez budzi nduk ná'inleh. Howa whúlna whulh sinyin, 'ink'ez dune hodilh'eh. ³ Whuz de whúdezulh hoh, ndi khunek ts'ah'un na'a 'int'ah, 'i 'aw hiyodool'eh hukwa cha'hunteszin. 'Et dich'oh hukwa' huninzun k'una'a, 'et zeh hodutets'o hukwa' huninzun. Ndunnah dich'oh hukwa' huninzun 'et zeh whuz na'a dune hodulh'eh, 'en zeh hubuhoottuzélhts'ilh hukwa' huntezhilh. ⁴ Khunek 'alha' 'int'ah, 'i 'aw hidóots'o hukwa cha'hunteszil. 'Et huwa khunek 'ants'i unli, 'aw 'i zeh hika' ntezilh. ⁵ 'Et whunts'ih Timothy nyun ts'iyaintsuk whuch'a soo cho khinli. Ndi Yak'usda be 'ut'en k'ah bulah mba howa whulna 'et whunts'ih 'aw whechaíntsaz zeh 'ilhdzun. 'Ink'ez Yak'usda bughunek be yailtuk hoh dune ilhyis, 'et zeh ndónt'en. 'Ink'ez Yak'usda be huba 'int'en, 'i ts'iyawh lhadónleh.

Paul datétsah da howu yalhtuk

⁶ Si 'aw 'et be khusna, 'i Yak'usda ba huwa t'aih k'una'a nadusyulh li'usneh.* 'Ink'ez nduk tesyalh 'aw 'et nilhdukw suli. ⁷ Hoonzoo hoh ts'ah'un na'a lhes-dughan. 'Aw 'et Yak'usda be 'ut'en k'ah 'uwhulh'en, ts'iyaintsuk lhaoodusdla. Ts'ah'un na'a be neba 'alha' hoont'ah, 'i óntun. ⁸ 'Aw 'et ndet ts'ah'un na'a 'uhoont'ah hoh whuch'a whunilhde, 'et suba sú'ai. NeMoodihti ts'ah'un naheyelh, 'en yutelhtsilh. Ndet dzin whusawhútelts'ulh, 'et dzin sugha íte'ah. 'Ink'ez 'aw si zeh ilah. Ndán dudzi ndulhcho, 'i be bunalh be hóoduteltsih 'ink'ez yute'ilh hukwa' huninzun, 'en 'ilhunuh hinli hoh ts'iyawh si sk'una'a zeh 'úbutelilh.

* ^{4:6} Ndai mai too dezti, 'I kw'uzdai zih nahideyulh inle, 'i Lizwif hube 'ut'en 'int'ah. 'Ink'ez ndi nahideyulh, 'i Paul khuna li'int'ah ni ho' 'utni.

Ts'iyanah sula detnik

⁹ 'A cho sts'u tónya. ¹⁰ Demas sula detnik. Ndi yun k'ut núkat, 'i 'o nus yuka' ninzun. 'Et huwa keyah Thessalonica whuz whinya. Crescens 'en yun k'ut Galatia ts'ih whinya 'ink'ez Titus 'en chah yun k'ut Dalmatia whuz whinya. ¹¹ Luke 'en zeh suzih usda. Mark 'en bukunainda 'ink'ez ndez nyulh tóo'as, 'en suba 'ut'en huba unzoo 'et huwa. ¹² Ink'ez Tychicus 'en keyah Ephesus ts'ih wheílh'a. ¹³ Ndez tanyalh t'eh, sudzoot suba tolhchoos. 'I Carpus keyah Troas ts'ih 'en da buzih neinílhchooz. Nyoo khunek 'úk'e'éduguz, 'i chah to'a, 'ink'ez ndai ndi khunai zuz 'i buk'une'úsduguz, 'i bunaoodolnah gunih. 'I soo buka' nuszun.† ¹⁴ Ndunah 'utes 'útl'us be 'ut'en, Alexander hiyulhni, 'en tube lhat hoh sundálhda. Be 'ut'en k'ah huwa uncha neMoodihti yuba 'uk'elha holhtsilh. ¹⁵ Nyun chah 'en bughonle. 'En dune ulhtus, 'i be neghunek buch'a 'et'ilh 'int'ah 'et huwa.

NeMoodihti 'aw neladootnih ghat'ah

¹⁶ 'Et 'udechoo soo whe suhudunílkut da, 'aw 'ilhunuh whunts'i sut'ak níchaiyal. 'Et ts'iyanah sula hudemtnik, 'et whunts'ih 'aw buk'ehoolts'it hukwa cha'núszun úncha. ¹⁷ 'Et whunts'ih neMoodihti suzih inyin 'ink'ez 'en ye ulhtus, 'i bugha ulhtus íle. 'Et ndi ulhtus, 'i be si sugha ndi Yak'usda be ba yatuk, 'i ts'iyawh ts'ah'un na'a hiyoozólhts'a. 'Et t'eh 'uyoon 'udun yun k'ut whut'en chah ts'iyawh hiyoozólhts'a. Ink'ez chah neMoodihti 'en khunaiti sutzelhghel, yuch'a sulhyih.‡ ¹⁸ Ink'ez yak'uz neMoodihti 'en hubudayi cho unli, 'et wheni sughunli, 'ink'ez buzih tesdalh whuts'un, 'ut'en untsi', 'i ts'iyawh yuch'a sutelhtelh. 'Et huwa 'en 'ilhuz wheni 'ink'ez 'o 'un chah 'uzdóolhti. 'Et ndoh honeh.

Khi whutsuh whusaóonya

¹⁹ Ndunnah Prisca 'ink'ez Aquila, 'ink'ez Onesiphorus bukoo húdelhts'i chah, 'en ts'iyawh dahooja suba hubudóni. ²⁰ Erastus 'en keyah Corinth 'et usda. Trophimus 'en nduda 'et huwa keyah Miletus ts'uwhútñi, 'et ninílhti. ²¹ 'Et khi tele whuts'un, 'et soo 'unint'ah hoh sts'u tonya. Eubulus, 'en chah dahooja nyulhni, 'ink'ez Pudens, Linus, Claudia, ts'iyawh lhulhutsinkah, 'en chah dahooja nyuhútri.

Ye unzoo, 'i nyulh 'óot'e

²² NeMoodihti Sizi Gri 'en ndzi yuh wúda 'ink'ez ye unzoo, 'i nyulh 'óot'e. 'Et ndoh honeh.

† **4:13** Paul khuna hoh da, khunai zuz lhahidulh'ih lhts'enahiyut'as, 'i hik'une'uguz inle. ‡ **4:17** Ndi khunaiti sutzelhghelh, 'et whuz na'a hubudayi cho Caesar, lhanah Sizi Gri yulh 'uhint'ah, 'en chah hubuhanghan inle, ni ho'utni.

Paul Ndi Dustl'us 'I Titus Yuts'un K'e'anguz

Paul 'en Titus dahooja yulhni

¹ Si Paul Yak'usda be 'ulhna 'ink'ez Sizi Gri ba whel'a usdli. Ndunnah Yak'usda buba 'alha' yint'ah, 'et wheni 'utahábanla. 'Ink'ez khunek 'alha' 'int'ah, t'ehontezin Yak'usda ba ndi yun k'ut uzdoolts'i ka. ² 'Ilhuz be ts'ukhuna, 'i buka tsi hoodli, 'i Yak'usda 'aw chawhus'sit 'ink'ez soo 'udechooda whuts'un 'i nets'u yoozi. ³ 'Aw 'et nts'oh huwa whudezulh Yak'usda hukwa' ninzun, 'et whusawhélts'ut. Ndi Yak'usda be ba yatuk, 'i yubunilhtan. 'Et Yak'usda, neulhyis, ndi khunek 'i stl'aida'ai. ⁴ Titus ndi be neba 'alha' hoont'ah 'i bugha suye' sinli. 'I bugha nts'oh k'e'usges. Yak'usda 'ink'ez neMoodihti Sizi Gri, neulhyis, 'en bugha ye unzoo, 'i be negha te'nudzun, 'ink'ez be nedzi dezghel, 'i ts'iyawh nyulh 'oot'e.

Yak'usda ba 'utsuh whudéldzulh, whuz na'a 'uhoot'e huba' hoont'ah

⁵ 'Et wheni Crete 'et ninyunilhti, ndai khunek ntl'ada'ai, 'i be ndet lhaood-int'ah ts'iyawh ts'ah'un na'a lhaoodutanlelh 'ink'ez lhelhdun keyah 'utsuh whudéldzulh 'utahaoobutanlelh. ⁶ 'Et ndez na'a dune hoole huba' hoont'ah. Dune buk'éhot'ah bughu hoolah. 'Ilhunah zeh bu'at unli. Buzkeh chah hubuk'ah na'a 'uhoot'e, 'aw huwhusnik cha ílah, 'ink'ez khunek k'une' 'uhut'en hoole. ⁷ Dune huwunli unli t'eh, 'en Yak'usda be 'ut'en k'ah yutl'áwhulh'ai, 'et huwa buk'ehóotelts'ulh whu'et 'oot'e. 'Aw dich'oh duk'una'a hukwa' noozin huba cha'hóot'ah. 'Aw khun chahunlhúch'e, mai too ka dáchasni. 'Et dune yédluh chailah wule, 'ink'ez 'aw sooneya chah ka cha'dusnih. ⁸ 'Et k'us dune bukoo dalih wule. Ndet hoonzoo ts'iyawh hóont'i. Ts'ah'un ni nezulh, 'ink'ez ts'ah'un dune unli. 'Et budzi lubeshi bughu hoolah, 'ink'ez dich'oh ts'ah'un na'a khudli chah wule. ⁹ Ndi khunek 'i be Yak'usda neba 'alha' 'int'ah, nts'e na'a hiyodel'i, 'i ts'iyawh hiyotun. 'Et sih ndi ts'ah'un na'a be whuts'odel'i, 'i be 'uyoon 'o nus budzi ulhtus hitelhtsilh. 'Ink'ez ndunnah ndi be whuts'odel'i, 'i yuch'a yahalhtuk, 'en ndi khunek 'i be tinta' hut'ih 'et whubuntelhtun.

'Utsuh whudéldzulh hube 'ut'en

¹⁰ Tube lhanah ndi khunek hik'úne' tet'en hukwa cha'hunizun 'ink'ez 'ants'i lahóot'ah hoh ne'huduni. 'Ink'ez 'uyoon nahuna'a, hubutah Lizwif hinli, 'en degha nus hints'i'. ¹¹ Ndunt'ah yahalhtuk whuch'a bonteyulh. Ndut'en 'en tink'us na'a dune huhoodul'eh. 'I be 'uyoon dune bukoo húdelhts'i tinta' 'ubuhulh'ih. 'En tink'us na'a dune hubodalh'i, sooneya hininzun 'et huwa. ¹² 'Et Crete whut'en hubutah, 'ilhunuh dune nus whunílh'en 'en 'utni, "Crete whut'en 'ahoolhyez howhuts'sit, khunai untsi", 'i nduhult'ah, tsi'hudutnik cha' 'uhint'ah, 'ink'ez bucha hooncha cha' 'uhint'ah." ¹³ 'Et daja hubulhni, 'alha' 'utni. 'Et huwa tube cho hubugha 'utni. 'Et t'eh be neba 'alha' hoont'ah, 'i be 'o nus hilhtus wule. ¹⁴ 'Et huwa Lizwif be 'udada 'aw huba 'alha cha'yít'ah suli. 'Ink'ez ndunnah khunek 'alha' 'int'ah ch'a nahulhúya, 'en hubughunek uboozólhts'a gunih. ¹⁵ 'Et ndunnah hubuyuh ts'ih chaooditsun, 'en ts'iyaintsuk huba me chailah. 'Et whunts'ih ndunnah hubudzi dutsun suli, 'ink'ez huba 'alha cha'hóot'ah, ts'iyai huba me yinli. 'En hubeni 'ink'ez hubuyuh ts'ih 'i bugha t'ets'oninzun, 'i ts'iyawh dutsun ho' 'int'ah. ¹⁶ Nduhínt'ah, "Yak'usda t'ets'uninzun," hutni, 'et whunts'ih hube 'ut'en be hich'a detni. 'En hubuts'u hoontsi' hinli, 'ink'ez hedich'oh k'une' hutet'en 'et zeh hukwa' huninzun. 'Et huwa ndet 'ut'en unzoo, 'i 'uhutelh'ilh, 'aw huba soo cha'hildzooh ho' hint'ah.

2

Yak'usda ba 'ilhunahuwúdulh hube 'ut'en k'ah

¹ 'Et whunts'ih Titus ndi ts'ah'un na'a be whuts'odul'eh, 'et ndudóni. ² Ndunnah dune ye'un uzulh, tachanoosnai huba' hoont'ah, teni'hunooldhdzin, 'ink'ez ts'ah'un ni hunoodeh. Whuduts'o hoh huba' alha' hot'e. Be lhk'ets'udutsi', 'i 'ink'ez 'aw tachahudinik, 'et whuz na'a 'uhoot'e. ³ Ts'ekoo ye'un uzulh, 'en chah whuz na'a 'uhoot'e. 'En teni' hinilhdzun hoole. 'Uyoon hoontsi' k'una'a bughi yachahoolhtuk. Mai too 'i lhai hiyootnai hukwa cha'hunooszin. 'Ink'ez hoonzoo zeh 'uyoon huhodoolh'eh. ⁴ 'Et t'eh t'etkeh hubukikah 'ink'ez hubuzkehkah chah buk'ehootsi', whuz na'a hubugha hudooni. ⁵ Ts'ah'un ni hunedoh, Yak'usda ba 'udun nibuninla hutele. Bukoo chah ts'ah'un na'a howu hinli, budzi wúzoo, 'ink'ez hubukikah hubuk'une' hoot'en. 'Et t'eh 'aw 'uyoon Yak'usda bughunek ch'a yahoolhtuk ghaft'ah. ⁶ 'Et chilhkah hinli, 'en chah ts'ah'un ni hunedoh hoole. ⁷ 'Ink'ez Titus nyun chah ts'iyaintsuk hoh nye 'ut'en unzoo, 'i 'uholh'en, whuz na'a 'ont'e. 'Et ndi be whuts'odul'eh, 'i ts'iyawh 'aw chadootsun, dóolhti, 'ink'ez 'aw hoonliyaz hoh 'ats'un na'a 'oot'e gunih. ⁸ Khunek ts'ah'un ye yailhtuk, 'i buba nahodeh ghaft'ah, 'i 'et nch'a detni hooya wule. 'Aw khunek ntsi', 'i be nghu yaootuk ghaft'ah. ⁹ K'us ndan 'ulhna 'en chah dumoodih buk'une' hoot'en budini. Nts'e na'a budzi wúzoo hoh zeh ne'hoot'en. 'Ink'ez 'aw hiyena cha'hudoosnih. ¹⁰ 'Aw bughu chá'hundunoost'ih. 'Et whunts'i dumoodih ts'un ts'ah'un na'a 'uhoot'e, hoonzoo k'una'a whéobunelhtan, 'et whut'az 'uhoot'e. 'Et sih Yak'usda neulhyis bughunek be whuts'odul'eh, ts'iyaintsuk hoh 'o nus hoonzoo wule.

Yak'usda ye unzoo, 'i ts'iyahanah nalhts'et haholts'it

¹¹ 'Et Yak'usda ye unzoo, 'i be uzdujih, 'i ts'iyahanah nalhts'et haholts'it. ¹² 'Et whuneeoodulh'eh, ndet Yak'usda be 'ut'en chahoolah, 'ink'ez whenich'oh ndi yun k'ut hukwa' uzninzun, 'et ts'iyawh dah uzdooni. 'Et whunts'i ts'ah'un ni uznezulh, ts'ah'un dune ts'inli, 'i chah, 'ink'ez Yak'usda ts'un teni' uznilhdzun k'ah ts'ih ts'oot'e, k'an 'et whuz na'a zeh 'uts'oot'e. ¹³ 'Et neYak'usda degha nus uzdóolhti, Sizi Gri neulhyis, 'en 'int'ah buts'un hayánduz, 'i bulh 'et nenalhts'et haóotelts'ulh whuts'un, njan degha nus hoonzoo huba ts'ilh'. ¹⁴ Sizi Gri nuwheni neba huwa' dudulti nelubeshi ch'a nenaootekulh ka. 'Ink'ez nuwheni dich'oh dune 'ut'en unzoo, 'i zeh 'uts'oohl'en huba' hoont'ah. ¹⁵ Titus ndúhoont'ah hubugha hubulh yailhtuk, huba nus whunilht'uk, 'ink'ez mba' hoont'ah, 'et huwa hoh tínta' hut'ih hukwa' budini. 'Aw 'ilhunuh dune whunts'i 'ants'i nyuhóolh'i gunih.

3

Ye unzoo, 'i be ndi yun k'ut 'uzdóolts'i

¹ 'Et ndunnah Crete whut'en 'en huba whunalnih ndunnah keyah huwunli 'ink'ez hubumoodih 'uhinli, 'en hubuk'une' whút'en. 'Aholhyez 'ut'en unzoo, 'uhutelh'ilh wheni lhahúdoot'e. ² 'Uyoon hoontsi' k'una'a bughu yahoolhtuk gunih, 'ink'ez 'aw lhena 'uhudoootni gunih. 'Et whunts'i ts'iyahanah nagoostl'iyaz né'boohhoolh'en 'ink'ez 'uyoon ts'un yuk 'uhududooldzin. ³ Nuwheni chah whuz na'a zeh ts'uwhusnik ínle. Khunek k'unucha'ts'ust'en. Naznut'ah. Lhelhdun ts'uhóont'i hoh hoontsi' tune'ts'ust'en. Ts'ints'i hoh ndi yun k'ut uzdálts'i, 'ink'ez 'uts'oollnih bulh chah 'uts'ant'e. 'Uyoon ts'uzdutnik 'ink'ez ts'iyawh lhuts'uzdutnik. ⁴ 'Et whunts'ih hoh da 'uja neYak'usda nesulhyis, 'en nets'un yé nek'entsi', 'ink'ez yé nets'un unzoo bulh, 'i ts'iyahanah nalh be wheóodiltsai, 'et hoh 'uzdujih. ⁵ Ndet ts'ah'un na'a 'uts'ut'en ínle, 'aw 'et huwa ílah 'uzdujih. 'Et whunts'ih ye te'ninzun, 'i bugha, 'i be neulhyih.

'Et ndi toonáts'uzguz li'yinla hoh doo chah ts'uhuzdli, 'ink'ez Ndoni be k'an 'et nats'usdli. ⁶ Whuz na'a Yak'usda nets'un bula hoonli hoh Ndoni nets'itelh'a. Sizi Gri neulhyis, 'en be 'uja. ⁷ 'Et hoh ye unzoo, 'i bugha nelubeshi ts'iyawh neba hoolah yulhtsi. 'Ink'ez 'ilhuz whuts'un be ts'ukhuna, 'i be 'uts'int'ah. 'I bugha ndai ne'ildzun whutele, 'i hukwa tsi hoodli 'et huwa. ⁸ Ndi khunek 'alha' 'int'ah, 'ink'ez 'ahoolhyez 'et zeh ndudóoni nts'u hukwa' nuszun. Ndunnah Yak'usda huba 'alha' yint'ah, huwu hinli 'ut'en unzoo, 'i zeh 'ahoolhyez higha 'ooneh. Ndi khunek ts'ianah huba unzoo 'ink'ez dune soo 'uhutet'ilh.

Lhenah 'uhudóoni gunih

⁹ 'Et whunts'ih Moses bughunek 'uk'une'úsduguz, 'i bugha, whusnik khunek, lhelhyoo whutsuh da hiye yailhtuk, 'ink'ez lhenah 'uhudutni chah, 'et ts'iyawh hubuch'a 'ont'e. 'Aw ts'ianah ba chahoozoo 'ink'ez 'ants'i hoonli ho' hoont'ah. ¹⁰ Ndan dune lhch'a nilht'uk, 'en whulh nat dah dáni, 'ink'ez 'aw chanyudústs'o t'eh, tenaóolh'a. ¹¹ T'eonínzun ndunt'ah dune 'en dudení be tink'us úninzun 'ink'ez lubeshi 'ulh'en 'et zeh hoont'i. 'Et huwa 'i be dich'oh tinta' dudulti ho' 'int'ah.

Dek'elh'az khunek yé bubulh yánaltuk

¹² 'Et Artimas k'us Tychicus 'en 'ilhunuh nts'u télh'alh t'eh, 'et 'aho ndez tonya, njan keyah Nicopolis ts'uhútni, 'et khi wheni njan tesdalk lhaóodusvla 'et huwa. ¹³ 'Et (Zenas), 'en Moses be' dustl'us k'ut, daja ni hoh beni hoonli be yalhtuk unli, 'ink'ez Apollos, 'en khun nk'uhun'as t'eh, di hika' ninzun, 'i butl'a yónleh, 'a cho hutoo'as. 'Ink'ez khun hoonli 'ehudunits'it hubuch'a yontun gunih. ¹⁴ 'Ink'ez nets'un detni, tehonoozeh 'ut'en unzoo, 'i zeh 'uhoolh'en. 'Uyoon hiye ndunidzit, 'i hiye búla' whét'en. 'Et t'eh ndi yun k'ut 'ants'i 'et chaduzoolhúts'i.

Ye unzoo, 'i nohwhulh 'óot'e

¹⁵ Ndunnah suzih húdelhts'i, 'en dahooja nyuhútni. Ndunnah huba 'alha' hoont'ah nek'entsi', 'en chah ts'iyawh neba dahooja hubudíni. 'Et ndi Yak'usda ye unzoo, 'i nuhwheni ts'iyawh nohwhulh 'óot'e. 'Et ndoh honeh.

Paul 'en Ndi Dustl'us 'I Philemon Yuts'un K'e'anguz

Paul 'en Philemon dahooja yúlhni

¹ Si Paul 'ust'ah. 'Et Sizi Gri ba tsak'esída. 'Et Timothy nelhutsin, 'en chah sulh 'int'ah. Philemon nyun nts'un k'e'tesgus. Nelhutsin, buk'ets'ints'i' inli 'ink'ez nelh 'ut'en inli. ² 'Et ndun Apphia 'en chah buk'ets'ints'i'. 'Ink'ez Archippus 'en chah ne'aBá ba nelh nehughan unli. 'Ink'ez nkoo Yak'usda ba 'ilhunahuwúdulh, 'en ts'iyawh dahooja hubuts'utni. ³ Yak'usda ne'aBá 'ink'ez Sizi Gri neMoodihti, 'en ye unzoo, 'i 'ink'ez nuhwhudzi dooghel, 'i nohwhulh 'óot'e.

Sizi Gri mba 'alha' 'int'ah 'ink'ez buk'ents'i'

⁴ SuYak'usda schanailya dusni. Tenadusdli totsuk nghu nuní nuszut. ⁵ Whulh 'údusts'o Sizi Gri mba 'alha' 'int'ah 'ink'ez buk'ents'i'. 'Et dune Yak'usda bube'ildzun, 'en chah whuz na'a zeh hubuk'ents'i'. ⁶ 'Et huwa be mba 'alha' hoont'ah, 'i be whútnih wule. 'Et Christ, Sizi ts'utni, 'en bugha 'ut'en unzoo, 'i bugha 'int'en, 'et t'eoonoodzeh. ⁷ Sulhutsin nyun ngha dune Yak'usda bube'ildzun hubudzi nduk ná'uja. 'Et huwa be nék'ets'ints'i', 'i ínt'i, 'i bugha tube ts'uhóont'i 'ink'ez sóo k'unuznut'ah cha' ts'int'ah.

Paul 'en Onesimus yuba tedudlih

⁸ 'Et hoh Christ 'en be khunekti be nts'un hukwa' dusni hoh tune' ont'en. 'Et whuz na'a ts'ah'un na'a ne'ón't'en. ⁹ 'Et huwa be nek'ets'ints'i', 'i bugha nts'un tedusdlih. Sunilh'en nts'e na'a dast'ah ye 'un uzulh usdli. 'Ink'ez k'an 'et Sizi Gri 'en ba tsak'edsída. ¹⁰ Suye' Onesimus 'en ba nts'u tedusdli. 'En 'int'ah nke da 'utis tl'ool be sulhghel hoh buba 'alha' hoont'ah sulhs. ¹¹ Whuts'un da nyun nts'un 'aw hoonli huba unzoo hoolah inle. K'an 'et nyun 'ink'ez si suba chah unzoo suli. ¹² k'an 'et 'en nts'un natélh'ah 'ink'ez naóolchoot. 'Et 'ants'i sich'oh sudzi ilhchoot li'tanilh. ¹³ Njan suzih tedalh hukwa' nuszun inle, njan khunek unzoo, 'i bugha sulhghel. 'Et da nyun ngha sunat ne'óot'en wule da. ¹⁴ 'Et whunts'ih nyun, "A," chaduzinh t'eh zeh, 'aw hoonli 'uwhuteslilh hukwa cha'nuszun. 'Et whuz na'a nyunch'oh hoonínt'i t'eh zeh. ¹⁵ 'Et huwa tulih 'astliyaz nghu whinya inle. 'Et sih 'ilhuz wheni naóolchoot t'eh, 'ilhuz nzih wúda. ¹⁶ Aw'o 'un nye 'ulhna chatesdle. 'Et k'an 'et 'ulhna unli degha nus 'int'ah. Nelhutsin buk'ets'ints'i' unli. Si tube suba dézti 'et whunts'ih dalcho 'i be suba nyun 'o nus mba dézti. 'Et náwhult'ah, ndi yun k'ut huba chah 'ink'ez neMoodihti ba chah.

Si sk'una'a nailchoot

¹⁷ Si nyulh 'úst'en suninzun t'eh, si nasicchoot hukw'u na'a naóolchoot. ¹⁸ 'Et ndun hoonliyaz hoh nts'un tínta' 'ant'en t'eh, k'us buts'un whuzilh'ai t'eh, si suba 'uk'une'onguz. ¹⁹ Si, Paul, sich'oh sula be nts'o k'e'usges. Si buk'elha hólhsilh. 'Et whunts'ih hoonliyaz mba whunatelhúnih, nyunch'oh be khina, 'i be whunts'i, 'i be ntse' 'ust'i li'hoont'ah. ²⁰ A, sulhutsin neMoodihti be nyun ngha 'o nus hoonzoo nts'oh hukwa' nuszun. Nts'e na'a suyuh ts'ih ho' dusni, 'et neMoodihti be sudzi soo na'inleh. ²¹ Nts'ó k'e'usges, 'i buk'una'a 'utenilh suba 'alha' hoont'ah. Daja dusni, 'i be 'o nus 'utant'ilh nuszun. ²² 'Et whunts'ih nts'e tesdalh suba lhaóodonleh. Ntenadudli bugha 'et ndoh honeh. 'Ink'ez nts'un sula nahudootnih.

Ye unzoo, 'i nyulh 'óot'e

²³ Epaphras ndun Sizi Gri bugha sulh tsak'esda, 'en chah dahooja nyulhni.
²⁴ Mark, Aristarchus, Demas, 'ink'ez Luke 'en chah, sulh 'uhut'en, 'en ts'iyawh dahooja nyuhúttni. ²⁵ NeMoodihti Sizi Gri 'en ye unzoo, 'i nyégha bulh 'óot'e. 'Et ndoh honeh.

Hebrew Bughunek K'eyahalhtuk Hubuts'un K'e'éduguz

K'an 'et degha nus dzin hoh Yak'usda buYe' 'en be newhulh yalhtuk

¹ Hoh da lhat 'ink'ez lhelhts'un na'a, niz haóodanzut, Yak'usda ba nus whunilh'en, 'en hubugha netsuhda hezulh, 'en Yak'usda hubulh yaílhtuk. ² 'Aw 'et njan dek'elh'az dzin hoh Yak'usda buYe' 'en be nelh yaílhtuk. 'En zeh 'uja be'aBá ndai yit'i, 'i ts'iyawh bube'ildzun tele, 'et whuz na'a be'aBá yutl'ahó'ai. BuYe' 'en be 'uja ts'iyaintsuk 'uhóonla. ³ 'En zeh 'int'ah be'aBá ye dézti, 'i newhunelhtan. 'Ink'ez be'aBá dant'ah, 'et buYe' 'en soo ts'ah'un yundult'ah. Ndai 'uhóonla, bughunek ulhtus, 'i be yalhtuk, 'i be ndulhcho hoontun. 'En dich'oh 'uja, nelubeshi 'i ts'iyawh neba yuna'dalhde. 'Et hukw'elh'az yak'uz ts'ih ndun degha nus ncha, 'en nalhnih ts'ih yughu nátl'adeda. ⁴ 'Et huwa ndunnah lizas huba 'o nus ncha 'int'ah. Ndi boozi bugha ídelts'ut, 'i lizas buboozi ba 'o nus dézti ho 'int'ah. 'Et nduhóolcho hoh bugha ndoh 'int'ah.

Yak'usda buYe' 'en lizas hubugha ndoh 'int'ah

⁵ Ndez na'a njan ndúhoont'ah, Yak'usda 'aw 'ilhunuh lizas 'et nduchaoobudínil,
"Nyun suYe' 'unint'ah.

"Et huwa k'an 'et dzin suYe' sinli, whuz na'a nyoozízi." 'Ink'ez njan chah
Yak'usda 'utni,
"En ba 'aBá tesdle
'ink'ez si suba 'uYe' tele."

⁶ 'Ink'ez 'udechoo whuzdli, Yak'usda doo chah ndi yun k'ut nítelhtelh hoh
'et ndutni,
"Yak'usda bulizas,
'en ts'iyawh hits'u teni' noolhdzin."

⁷ 'Et dulizas bughu yalhtuk hoh njan ndutni,
"Bulizas nilhts'i k'una'a 'obinla.
'En hiba 'uhut'en 'uhint'ah 'ink'ez kwun nudúnat, 'i k'una'a hubulhtsi."

⁸ 'Et whunts'ih buYe' yughu yalhtuk hoh ndez na'a 'et ndutni,
"O Yak'usda nts'e hoh hubudayi cho inli, 'et 'i 'ilhuz wheni 'int'ah.
'Ink'ez ts'ah'un na'a k'une' whutel'en.

⁹ Ts'ah'un 'uhoont'ah zeh hukw'entsi'.
'Uk'únucha'ust'en, 'i buts'u díntnik.
'Et huwa O Yak'usda, nYak'usda ndi khe,
'i dune be ba ts'odelhti,
'i bugha budzi hoont'i,
'i nyulh dune ba nus lhai be nyúlhlho."

¹⁰ 'Ink'ez 'udun chah bughunek 'i 'uk'e'edúguz hoh 'et ndutni,
"Moodihti nyun 'udechoo whe'whudit'en 'et whuts'un, ndi yun inla.
Nyula be yaz chah 'uhóonla.

¹¹ I ts'iyawh hoolah whutéleh, 'et whunts'ih nyun 'ilhuz wheni 'int'ah.
Ndai inla, 'i 'ants'i naih jut 'ulhih teh whuz na'a 'uwhutenilh.

¹² 'Ink'ez nahiyits'uz, 'i k'una'a lhenántetelh,
'ink'ez 'uyoo natedle.

'Et whunts'ih nyun whuz na'a zeh 'et ndint'ah.

Nye naooduzuk 'et 'aw whulátaahchahóolah," Yak'usda 'et ndi yúlhni.

¹³ 'Et whunts'ih Yak'usda bulizas 'aw 'ilhunuh whunts'i njan
nduchaoobudínil,

“Nch'a hudemni ts'iyawh nke hubuk'ut natelyis mba hubutelhtsilh.

'Et whuts'un 'et duhóoja t'eh,
nalhnih ts'ih suzih tanda.”

¹⁴ 'Et ndez na'a njan dúhoont'ah, ndunnah lizas, 'en nudúdeh 'ink'ez be ne'úst'en 'uhint'ah. Yak'usda whébalh'a 'et t'eh ndunnah ndi bé uzdujih, 'i nuhts'ite'ah, 'et huba neba ne'hut'en 'uhint'ah.

2

Ndi 'ilhuz be ts'ukhutena, i bulazdootnih gunih

¹ 'Et huwa Yak'usda bughunek ndet whulh úzdants'o, 'et soo ts'ah'un na'a ts'uhotun 'ink'ez nedzi yuh nits'u ho'ah. 'Et nduchats'inil t'eh, 'et sih bulazdootni. ² 'Et hoh da ndai khunek lizas, 'en be Yak'usda ba yahálhtuk, 'i khunek ts'iyawh 'ilhuz wheni 'utni. 'Ink'ez ndunnah ndi khunek hidutéts'o hukwa cha'nízun 'ink'ez k'uhiyeyus, 'en hoontsi' k'una'a huba k'elha whuzdli. ³ 'Ink'ez ndi whe uzdujih, 'et hooncha ho' hoont'ah. 'Et ts'iyawh neba 'ants'i 'ohoont'ah t'eh, 'et t'eh 'en buk'una'a neba k'elha whutele. Nemoodihti ndi yun k'ut nuséya, 'et whuts'un ndi whe uzdújih howu yalhtuk, 'ink'ez ndunnah ndan hidants'o, 'en ndi khunek ts'iyawh whunéhunelhtan 'et ts'ah'un 'ohoont'ah. ⁴ 'En lhat hoolhtus huwa 'ét'en tune' hust'en, 'ink'ez nts'e na'a Ndoni hukwa' ninzun k'una'a hubutl'a hó'ai, whuz na'a ndunnah 'i be neyuh yahalhtuk, 'en Yak'usda hubulh 'ut'en hoh whunéhunelhtan daja nehudáni 'et ts'ah'un 'ohoont'ah.

Yak'usda buYe' en lizas 'astl'iyaz degha nyoh 'ant'e

⁵ 'Et njan howu yats'ulhtuk ndi k'an 'et, 'i yun 'i buk'uzdutélhts'i huwa, neba whuz de whélt's'ulh, 'et Yak'usda 'aw lizas dune k'une'hol'en 'uhoot'e chaoobudínil. ⁶ 'Et whunts'ih 'udun chah 'uk'e'éduguz hoh 'et ndutni, “Dune di hinli ho' hint'ah?

Yak'usda di ka bughu nuní ninzut?

K'us dune ye' di ka bughu ni tanle?

⁷ 'Astl'iyaz huba lizas degha nyoh 'int'ah silhtsi inle.

Degha nus ncha silhtsi 'ink'ez hoh dezti,
'et hubutl'aho'ai.

Ndai nyula be 'inla,

'i ts'iyawh huwandooh 'int'ah bugha ooní'ai.

⁸ Ts'iyaintsuk buke yah ninínlá yuMoodihti wule ka.” 'Ink'ez ndi buke yah nenínlá, 'i 'aw hoonliyaz be'et cha'ínel. 'Et whunts'ih t'ets'oninzun 'awhuz ts'iyaintsuk buke yah nicháskat.

⁹ 'Et whunts'ih ndun 'astl'iyaz huba lizas hubugha nyoh 'int'ah yulhtsi, 'en uznilh'en. Sizi 'en 'int'ah. Dzuh nusuzut hoh dazsai, 'et huwa degha nus ncha yulhtsi 'ink'ez hoh dezti, 'et chah yutl'ahó'ai. 'Et whuz na'a Yak'usda ye unzoo, 'i be ts'ianah ba dazsai.

Yak'usda buYe' en bugha lhanah Yak'usda ba 'uduni' dudulya huzdli

¹⁰ 'Et be'aBá 'en bugha ts'iyaintsuk 'ohoont'ah, 'ink'ez ts'iyaintsuk buts'un hahonkat. Lhanah hubuzkeh, 'en Sizi whudézti, 'et hubutl'a óote'ah hukwa' ninzun. Sizi 'en whezdutejih 'et neba netsuh nusíya 'int'ah. 'Et huwa Yak'usda 'en buba ts'ah'un 'ohoont'ah hoh Sizi dzuh nusuzut, 'et 'i bugha ts'ah'un 'ulya suli yulhtsi. ¹¹ 'Et ndun Yak'usda buba 'uduni' dudulti, 'ink'ez ndunnah Yak'usda ba 'uduni' dudulya chah nuwheni ts'iyawh lhulhugha zeh 'uts'int'ah. 'Et Sizi 'aw hukwaya chailah hoh sulhutsinkah nélhni. ¹² 'Et whuz na'a be'aBá ndi yúlhni hoh njan ndutni,
“Nyoozi 'uwhulhni,

'i bugha sulhutsinkah hubudutésnilh.
 Yak'usda buba 'ilhunahuwúdulh hubutah,
 mba whudutélhti hoh mba tesjun."
¹³ 'Ink'ez doo chah ndez na'a njan ndutni,
 "Si, but'aníuntestan."
 'Ink'ez doo chah zeh ndez na'a chah ndutni,
 "Njan si 'ust'ah.
 Ndunnah 'uskehkah Yak'usda sugha óobuninla,
 'en chah ts'iyawh sulh 'úhint'ah."

¹⁴ 'Et nuwheni yinkak dune ts'inli neyust'e 'i 'uskai bulh 'úlya. 'Et huwa Sizi Gri buyust'e nuwheni nek'una'a 'int'ah. 'Et hoh lhdulalhgus k'ut neba dazsai, 'i be ndun yé datetsah, ye ulhtus, 'i yít'i, 'en yuch'a' nilhde, 'en netsudule 'int'ah. ¹⁵ Ndunnah ndi yun k'ut hukhuna, 'en dzin totsuk dahútetsah whe húnuljut, 'et huwa netsudule dude 'ulhna ubulhtsi, 'en ts'iyawh Sizi Gri lhdu-lalhgus k'ut huba dazsai, 'et 'en bugha whuch'a neba whuladetnik. ¹⁶ 'Ink'ez 'aw Sizi Gri lizas hubula' tet'ilh huwa ilah whusainya, 'et k'us Abraham ts'u haínde, 'en hubula' tet'ilh, 'et huwa whusainya. ¹⁷ 'Et huwa dudulhutsinkah k'una'a ts'iyaintsuk whuz na'a dune k'una'a 'oolneh huba' hoont'ah. 'En huba náwhulnuk degha nus dezti tele, 'et hoh Yak'usda ba hubugha te'ninzun 'ink'ez 'aw hubula dootnih ghait'ah. 'Et whuz na'a Yak'usda huba ne'ut'en. 'Et huba dazsai huwa lubeshi 'ulh'en Yak'usda huba 'un whutoolhdelh, 'et t'eh soo cho hubuka naítet'ilh. ¹⁸ 'Et neMoodihti Sizi Gri, lhat hoh 'óolhdzai, 'et huwa dzuh nusuzut. 'Et huwa ndunnah óolhdzai, 'en nts'e na'a hubula' tet'ilh t'ewhuninzun.

3

Christ, 'uYe' k'una'a hoh be'aBÁ bukoo huwole

¹ 'Et huwa sulhutsinkah, nuhwheni Yak'usda bube'ildzun ahli, 'et yak'uz ts'un ndi khunek ts'un whúlhni soo ts'ah'un hukw'u na'a ndi yun k'ut doolhúts'i ka, 'et nuhwheni cha hubugha whutelhchulh. 'Et huwa nuhwheni ts'iyawh Christ, Sizi ts'utni, 'en zeh bughunek ghéhtan 'ink'ez 'en k'una'a 'ooht'e. 'En whel'a 'int'ah, 'ink'ez be neba 'alha 'uhoont'ah, 'et huba neba náwhulnuk degha nus dezti unli. ² 'Et whuz na'a Yak'usda 'utaháyalhti. 'Et huwa nts'e na'a yuts'u hukwa 'utni, 'et ts'iyawh lhaóodinla. Nts'e na'a Yak'usda Moses bukoo datet'ilh 'et yuts'u hukwa' niznun, ts'iyawh lhaóodinla. Sizi Gri 'en chah Moses k'una'a 'int'ah. ³ Nts'e na'a 'uhoont'ah ndan bukoo 'uwhulh'en, 'en koo huwa nus dezti 'int'ah, 'et whuz na'a Sizi Gri Moses degha nus dezti 'int'ah. ⁴ 'Et koo totsuk lhelhyoo 'uhóonla, 'et whunts'ih Yak'usda 'en zeh ts'iyaintsuk 'uhóonla. ⁵ 'Ink'ez Yak'usda bukoo ts'ih Moses 'en huba ne'úst'en unli, 'ink'ez Moses ts'iyawh lhaóodinla. 'Et whuz na'a 'en bugha ts'iyaintsuk lhaóodutetneh, 'et t'eh nts'e na'a Moses dat'en inle, whunenulhtun Yak'usda dawhútenilh t'ets'ontezech. ⁶ 'Et whunts'ih Christ, 'uYe' k'una'a hoh be'aBÁ bukoo huwole. 'Et ndai buka tsi ts'úhooli, 'i nedzi nduk soo cho 'uts'udóolhti, 'ink'ez but'aníuznootan, 'ink'ez degha nus dzin whuts'un soo cho ts'oontun t'eh, 'et sih bukoo whut'i ts'inli hoh 'uts'int'ah.

Nuwheni chah whulachats'udoosnih ts'ooke

⁷ 'Et huwa Ndoni 'alha 'utni hoh ndez na'a njan ndutni,
 "K'an 'et dzin Yak'usda bughunek dahts'o t'eh,
⁸ khun nuhdzi doolhts'un gunih!
 'Et whuz na'a 'uhóoja hoh da ndunnah sch'a detni,
 'aw skacha'hunízun.
 'Et huwa ndi dzin dune Yak'usda 'en hiyóolhdzai, 'i hiyúlhni.

'Et nts'e dune chahóot'ih,
 'et whuz na'a 'uhóoja.
 Khun nuhdzi 'aw 'en buk'ah ts'ih 'oohleh gunih!

9 'Et whuz na'a nuhtsuhda suhóolhdzai inle.
 Dit lanezi (40) naooduzuk, 'et ndúwhulyez hoh se' 'ut'en k'ah honilh'en.

10 'Et huwa ndunnah, 'en hubulh hunlhuch'e,
 'ink'ez njan dudúsni,
 'ahoolhyez hubudzi yuh tinta' huwhulh'ih 'ink'ez se' 'ut'en k'ah 'aw
 t'ehonízun.

11 'Et huwa hubulh hunlhuch'e hoh buts'u nahuziya 'et njan dudúsni,
 'Ndet dune nalyis huba 'aw dahóodelh ghaít'ah," ni.

12 Sulhutsinkah nuhwhenich'oh soo cho huwahli! Nuhwheni nuhtah
 bulunah tulih nuhdzi tink'us 'int'ah 'et 'aw nuhwhuba 'alha' cha'hóot'ah. 'Et
 huwa Yak'usda ndun 'ilhuz wheni 'int'ah, doo ka sih 'en buch'a naoohlú'ah.

13 'Et whunts'ih dzin totsuk, 'awhuz khahna da, 'et ts'iyawh lhba nus
 whunoohl'tuk hoh lhula 'oohdut'en. Doo ka sih lubeshi be naniht'a t'eh,
 nuhdzi duts'un wule. **14** 'Et 'udechoo whuts'un Christ buk'úne' ts'ut'en, 'et
 whulatah whuts'un whulh ts'uziyin t'eh, 'et sih Christ be 'ut'en k'ah 'i chah
 nuwheni be ne'ut'en ts'uzdli. **15** 'Et whuz na'a 'uk'úne'úzguz hoh 'et ndutni,
 "K'an 'et dzin Yak'usda bughunek dahts'o t'eh,
 khun nuhdzi doolhts'un gunih!
 Ndunnah Yak'usda ch'a yahalhtuk 'aw 'en buk'una'a 'ooht'en gunih."

*Dune chahoot'i ts'ih húdelhts'i, huba 'alha cha'hóot'ah, 'et huwa ndet Yak'usda
 buts'u hoozi, 'aw dahóoya ghaít'ah*

16 'Et bulunah ndunnah Yak'usda bughunek dánts'o 'ink'ez 'et whunts'ih
 hich'a detni. Moses yun k'ut Egypt ts'ih hanaóobanla, 'en 'uhint'ah, 'et
 whunts'ih 'aw ts'iyahanah whuz na'a nducháhust'en. **17** Ndunnah nduhut'en,
 'en dit lanezi (40) naooduzuk nduhóolhyez hoh Yak'usda hubulh whúske?
 Ndunnah 'en dune chahóot'ih ts'ih lubeshi hílhchoot, 'et huwa whuz yahadla.

18 'En 'uhint'ah Yak'usda bughunek hik'unucha'it'il, 'et huwa ndez na'a
 Yak'usda buts'u hoozi, ndet hoh Yak'usda nalyis, 'aw dahóoya ghaít'ah. **19** 'Et
 huwa ndez na'a whuts'odul'eh, ndunnah ndan huba 'alha cha'hóot'ah, 'et
 huwa ndet Yak'usda buts'u hoozi, 'aw dahóoya ghaít'ah.

4

Yak'usda yunéyah 'en 'et nahutelyis 'et huba whuz'ai

1 Nuwheni njan Yak'usda nalyis nets'u hoozi, nuhwheni nuhtah 'aw tulih
 chawhulhchulh. 'Et huwa nuwheni ts'iyawh whéznooljut huba' hoont'ah.

2 'Et 'alha 'en buk'una'a nuwheni chah ndi khunek unzoo, 'i be nelh yaintuk.
 'Et whunts'ih ndi khunek be nelh yaintuk, 'i 'aw chahidits'il, 'aw huba
 'alha cha'hónil 'et huwa. 'Aw bubeni tachaaoodikulh. 'Et huwa 'aw bula
 cha'whudínil. **3** 'Et nuwheni ndunnah huba 'alha 'uhoont'ah, nuwheni njan
 Yak'usda nalyis nets'u hoozi negha whútelts'ulh. 'Et whunts'ih ndunnah huba
 'alha cha'hoot'ah, 'en ndez na'a 'et Yak'usda ndo búlhni,
 "Hubulh hunlhuch'e hoh hubuts'u nahuziya,

ndet nalhúyis, 'aw dahóodelh ghaít'ah." 'Et whunts'ih nts'e 'udechoo
 whe'whudit'en ndi yun 'ulya da, hoh da 'et dude 'ut'en lhaídinla.

4 'Et 'ilhun Yak'usda bughunek 'uk'úne'usduguz, 'et skwunlai 'o 'at whulh
 natdzin (7) whuneodalh'i hoh ndez na'a njan ndutni, "Yak'usda ts'iyawh
 dude 'ut'en lhaídinla 'ink'ez skwunlai 'o 'at whulh nat dzin (7) 'et nalyiz."

5 'Ink'ez ndi dustl'us 'et whuz na'a ndutni, "Nts'e na'a buts'u nahuziya dune
 nahutelyis, 'aw dahóoya ghaít'ah." **6** Ndunnah ndi khunek unzoo, 'i 'udechoo

yudánts'o, 'en 'aw hoh da hik'únucha'it'il. 'Et huwa ndet nalyis, 'et 'aw dachahiyal. 'Et whunts'ih bulunah, 'en 'awhuz hubugha whútelts'ulh ho' hoont'ah. ⁷ 'Et huwa Yak'usda 'et 'ilhut dzin 'uhoont'ah neba 'udun nióoni'ai. "K'an 'et dzin whudezulh," 'et 'uhoont'ah. 'Et sa hukw'elh'az 'et Yak'usda David be yailhtuk hoh njan ndutni, "K'an dzin 'et bughunek dahts'o t'eh,
khun teh nuhdzi doolhts'un gunih!"

⁸ 'Et ndun Joshua hiyúlhni, 'en Moses k'edanya, 'en Israel ts'un hainzut Yak'usda nalyis, 'et hubugha óote'ah t'eh, 'et Yak'usda hukw'elh'az 'udun dzin whudézti 'aw doo chah 'o 'un howu yaoolhtuk ghait'ah. ⁹ 'Et huwa t'ets'onínzun Yak'usda 'awhuz nahutelyis, 'et huba whuz'ai. ¹⁰ Ndez na'a njan dúhoont'ah, ndan Yak'usda nalyis bugha whults'ut, nts'e na'a Yak'usda be 'ut'en lhaidinla, 'en chah whuz na'a zeh be 'ut'en lhadinla.

'Et Yak'usda bughunek khuna ho' 'int'ah, 'ink'ez hoolhtus túne' 'ut'en

¹¹ 'Et huwa Yak'usda budune nahulyis, nedzi ndulhcho 'i be whuz na'a zeh ts'uhólhchoot. 'Et 'aw ndúchats'ust'en t'eh, 'et t'eh ndunnah 'uk'unucha'ust'en whuz na'a nuwheni chah 'en buk'una'a zeh tinta' ts'ote'ah ho' hoont'ah. ¹² 'Et Yak'usda bughunek khuna ho' 'int'ah 'ink'ez hoolhtus túne' 'ut'en. 'I ndi 'utes cho lhch'az buk'a hoonli, 'i whunts'i 'on nus huba nus khundenyin ho' 'int'ah. Ndez na'a njan dúhoont'ah, 'utes cho nets'un lhghu nunádez'a 'ink'ez neghe 'i ndi chaztet'us, 'et whuz na'a Yak'usda bughunek nezul 'ink'ez neyégha lhk'eítelreh. Nedzi yuh hoh daja uzninzun 'ink'ez nts'e na'a dáztet'ih hukwa' ts'ut'en, 'et ts'iyawh whunénulhtun. ¹³ 'Ink'ez ndai ndi yun k'ut 'uts'ulh'en, 'i 'aw 'ilhuk'i Yak'usda buch'a ntest'i, 'i hoolah. Ts'iyaintsuk whunilh'en, 'ink'ez 'i k'una'a ts'et niooninkat li'int'ah. Yak'usda 'en dats'ét'en, 'et ts'iyawh nduzduténih ho' hoont'ah.

Nenáwhulnuk degha nus dezti negha te'ninzun

¹⁴ 'Et huwa 'ilhunuh náwhulnuk degha nus dezti neba 'int'ah. 'En 'uja yaz nduhoolcho whutuh lhuséya. Sizi, Yak'usda buYe' 'en 'int'ah. 'Et huwa ndet neba 'alha 'uhoont'ah, ts'iyawh duts'o cho ts'uhotun. ¹⁵ Nenáwhulnuk degha nus dezti, 'en ndunt'ah ho' 'int'ah. Ndai be laits'it'ah 'i bulh 'ilho negha te'ninzun dats'int'ah t'eooininzun. 'En lubeshi bu'et 'int'ah, 'et whunts'ih 'en chah nuwheni nek'una'a ts'iyaintsuk tink'us óoneh hukwa 'óoldzh inle. ¹⁶ 'Et huwa Yak'usda bukw'usúda cho dézti, 'i whuz de ye únzoo, 'i negha yú'aih. 'Et huwa 'aw whechats'uniljut hoh whuz uztooya. 'Et whuz de negha te'ninzun, 'ink'ez whé nets'un unzoo, 'et nduwhulcho hoh ts'otélhchulh. 'Et whuz na'a 'en ba ndi yun k'ut uzdelhts'i, ndet nela 'ewhuduténih 'et negha óotelts'ulh.

5

Nawhulnuk degha nus dézti dant'ah tele

¹ 'Et ts'iyannah náwhulnuk degha nus dezti hubulh dedowh hubutahayálhti, Yak'usda but huba nitéyah ka. 'Et huwa 'uyoon hubulubeshi bugha 'et huba Yak'usda bukw'uzdai k'ut huwa t'ah hidutéhk'un 'ink'ez ndai Yak'usda higha hiya'aih huba Yak'usda bukw'uzdai ts'un wheyúlih. ² Ndán Yak'usda yuk'una'a t'echahonízun 'ink'ez tink'us 'ahét'ilh, 'en bugha nagoostl'iyaz ne'bulh'en, dich'oh chah lhat hoh lait'ah 'et huwa. ³ 'Et huwa nts'e na'a 'onghoh hubulubeshi k'elha huwa íte'ah, whuz huba wheyú'aih, 'et whuz na'a 'en whunts'i dich'oh dulubeshi ba huwa íte'ah, 'i chah whuz wheyá'aih. Whuz na'a ndót'en huba' hoont'ah. ⁴ 'Et nts'e na'a náwhulnuk degha nus dezti hulhih, 'aw dune dich'oh 'et nduhóoneh ghait'ah. 'Et whunts'ih nts'e na'a

Yak'usda Aaron 'ut'ahayalhti, 'en k'una'a zeh 'uyoon náwhulnuk degha nus dezti 'utahaóoltelh huba' hoont'ah.

Christ 'en 'ilhuz wheni náwhulnuk degha nus dezti 'int'ah

⁵ 'Et whuz na'a zeh Christ, 'en chah 'aw náwhulnuk degha nus dezti 'ududoltsilh ghaít'ah. 'Et whunts'ih ndun yadáni, 'en 'et ndi yúlhni, "Nyun SuYe' 'unint'ah.

K'an dzin whuz na'a SuYe' nyuzílksi."

⁶ 'Ink'ez 'udun chah 'uk'e'é duguz hoh ndutni, "Ndun Melchizedek, nts'e na'a náwhulnuk 'int'ah, nyun chah 'en k'una'a 'ilhuz wheni náwhulnuk inli."

⁷ Hoh da Sizi Gri ndi yun k'ut nuseya, 'et be'aBá 'en ye ulhtus, 'i yít'i, 'et hukwa' ninzun t'eh datétsah whuch'a yutelhyih, ndez na'a Sizi Gri yuts'u tenadédli. Tube budzi tel'en 'ink'ez bunatsul too hoonli hoh Yak'usda yuts'u téduelih yula 'ooneh ka. Be'aBá yudélhti, 'et huwa yudánts'o daja ni 'et. ⁸ BuYe' yinli 'et whunts'ih ndet dzuh nusúzut, 'et hoh yuk'úne' 'út'en hodel'i. ⁹ 'Et huwa 'uja ts'ah'un 'ulya suli. 'Et huwa ndunnah hi'úne' 'ut'en, 'en 'ilhuz wheni hudujih, 'et hubugha óoni'ai. ¹⁰ 'Et whuz na'a Yak'usda ndi boozi yugha idé'ai hoh ndi dáni, "Ndun Melchizedek nts'e na'a náwhulnuk degha nus dezti 'int'ah, nyun chah 'en k'una'a 'ilhuz wheni náwhulnuk degha nus dezti inli." ¹¹ 'Aw 'et lhat ndun whuzduténih, 'et whunts'ih nedutéhts'o nuhwhuba 'ants'i hoonli. 'Et huwa neba howa whúlna hoh ndi khunek ts'ah'un na'a t'ewhunoohzeh k'una'a nuhwhuts'útni.

Ndunnah Yak'usda bughunek hiyoozélhts'ai tahodeznih 'en 'ants'i 'uskehyaz nduhúlt'ah

¹² 'Et k'an 'et dune hoodulh'eh wahle huba' hoont'ah, 'et whunts'ih soo 'udechoo be whuts'odul'eh, 'i Yak'usda khunek daja ni, 'et bulunah, 'en doo chah zeh nduhóolcho hoh whunanohodutelh'eh huba' hoont'ah. K'an 'et 'uskehyaz k'una'a 'uts'oo 'i zeh buk'e khahna, 'aw ts'iyi duts'un, 'i ilah. 'Et whuz na'a 'ahja. ¹³ 'Et ndunnah 'uts'oo zeh k'e dune hinli, 'en ndi Yak'usda bughunek ts'ah'un 'int'ah, 'et dzuh nt'ehoninzun. 'Awhuz 'uskehyaz hinli 'et huwa. ¹⁴ 'Et whunts'ih ndi ts'iyi duts'un, 'i hincha huba' yint'ah. 'En ndunnah hoodul'eh howun nuni hunuzut, 'en 'ink'ez hik'úne' 'ut'en 'et hubeni ulhtus 'ulheh, 'en 'uhint'ah. 'En unzoo 'ink'ez ntsi' bulh t'ehinínzun.

6

Yak'usda bughunek buts'odool'eh. Hukwachats'unízun t'eh tube howa 'óodli ho'hoont'ah

¹ 'Et huwa ndi 'udechoo Christ bugha hodulhú'eh, 'et zeh hodoohlú'eh gunih, 'et 'o 'un chah hodoolhú'eh. 'Et sih soo ts'ah'un na'a lhadulya k'una'a 'ooh't'e. Ndi 'udechoo whuts'odel'i, 'et koo bukw'uwuz'ai, 'i ndúlt'ah, 'ink'ez 'i nuwhenich'oh 'aw 'uyoo na'ts'ooleh hukwa cha'uznízun. Ndi 'udechoo whuts'odel'i, 'et ndez na'a rjan dúhoont'ah, ndai 'uts'alh'en, 'i 'ants'i 'et 'ohoont'ah, 'aw nela ooneh ghaít'ah, 'i ts'iyawh buch'a náts'ool'ah. 'Et nts'e na'a 'ohoont'ah Yak'usda neba 'alha 'int'ah, 'et chah. ² 'Ink'ez nts'e na'a dune too be 'úl'en. Nts'e na'a 'uyoon dune k'ehúdilnih chah, 'ink'ez 'et nts'e na'a 'uhutenilh dune yahadla tah dinahudutédalh. 'Ink'ez nts'e na'a 'ilhuz neba nahutedeh whuz uztedulh. ³ 'Et whuz na'a Yak'usda netl'ahó'ai t'eh, 'et sih ndet soo ts'ah'un na'a lhadulya uzteleh. ⁴ 'Et ndunnah Christ bugha hohudul'eh 'ink'ez t'ehonínzun, ndi yak'uz howat'ah, 'i hiyílhchoot 'ink'ez Ndoni chah buyídinda. ⁵ 'Ink'ez Yak'usda daja ni, 'et dalzoo, 'i chah hiyílhchoot, 'ink'ez ndet ye úlhtus, 'i whuz de whélts'ulh, 'et chah t'ehonínzun. ⁶ 'Et ndunnah ndunt'ah 'et Yak'usda ch'a nahusdel t'eh, 'en nts'oh dahoont'ah whunts'i,

'aw doo chah whuz na'a dudzi nahodunoolelh ghat'ah. Ndunt'ah dich'oh Yak'usda buYe' lhdulalhgus k'enáhiyilhti li'hiyulh'en, 'ink'ez ts'iyanah nah highudloh. ⁷ Whunulh'en, 'et tube cho nawhúlhtih t'eh, haníyeh ba hoonzoo. 'Ink'ez ts'iyanatsuk ts'uyi, neba hanúlyeh. 'Et whuz na'a Yak'usda nets'un unzoo. ⁸ 'Et whunts'ih, 'i yun whus 'ink'ez 'ut'an untsi', 'i zeh haníyeh t'eh, 'et t'eh 'aw hoonliyaz chailah ho' int'ah. 'Et huwa bukacha'ts'unizun. K'at lih t'eh ts'iyawh uzdutélhk'un. 'Et soo cho howu ni óohtan!

Yak'usda buba ne'ts'ut'en 'aw whunaoodoolnah ghat'ah

⁹ Nuhk'ets'intsi', nuhwheni ndi khunekti be ndun whuhts'utni, 'et whunts'ih Yak'usda ch'a nasahdel chahlah, 'et neba 'alha 'uhoont'ah. 'Et k'us be uzdujih, 'i bugha 'o nus hoonzoo hukw'u na'a 'uteht'ilh, 'et neba 'alha 'uhoont'ah. ¹⁰ Dune Yak'usda bube'ildzun, 'en nuhwheni buba ne'hút'en ahli ínle, 'ink'ez 'awhuz whuz na'a nduht'en. Nuhbe 'ut'en 'ink'ez Yak'usda tube buk'ehtsi' hoh aht'en, 'et ts'iyawh Yak'usda whunilh'en. Yak'usda ts'ah'un na'a zeh 'int'ah, 'et huwa 'aw whunaoodoolnah ghat'ah. ¹¹ 'Et 'ilhunah ahli hoh 'et whulatah whuts'un, nuhdzi ndulhcho, 'i be whuz na'a 'et ndóht'en, 'et nuhwhuba hukwa' uzninzun. 'Et whuz na'a ndet hukwa tsi hoohli, 'et nawh cha'hoot'ah nuhts'un whutekulh. ¹² 'Ink'ez tsi'dahtnik wahle gunih. 'Et ndai Yak'usda ye nets'u náhezya, 'et ndunnah bé 'alha 'uhoont'ah 'ink'ez sa huba whulh huzyin, 'en hubugha íte'alh whuts'un, 'et nuhwheni chah 'en buk'una'a 'ooh't'en.

Yak'usda dich'oh nets'u hoozi Christ buka tsi ts'uholi, 'en 'int'ah

¹³ 'Et 'aw dune Yak'usda gha ndoh 'int'ah hoolah. 'Et huwa hoh da 'et ndi Yak'usda Abraham ye yuts'un náhezya, 'i dich'oh doodoozi be yuts'un náhezya. ¹⁴ 'Ink'ez Yak'usda Abraham yudáni, "Tube nats'un téeszoo. Si sugha nuts'u haínde hutelai." ¹⁵ 'Ink'ez 'et whuz na'a 'uhooja. Yak'usda Abraham daja yudáni sa hoh whechaítsaz, 'et whunts'ih ye yuts'u náhezya, 'et bughá whults'ut. ¹⁶ 'Et ndet dune hoonliyaz hubugha 'uyoón dune yuts'un nahuteyeh t'eh, 'et ts'ah'un néhote'alh hukwa' huninzun, 'et ndan yugha ndoh 'int'ah, 'en boozi be ts'ah'un nehoho'alh huba' hoont'ah. ¹⁷ 'Et whuz na'a Yak'usda 'uja. Ndai hubuts'u yoozi, 'i bugha íte'alh. Ndai hubuts'u yoozi, 'i 'aw 'ats'un na'a na'hótneh ghat'ah. Soo ts'ah'un na'a t'ehonoozeh ba hukwa' ninzun, 'et huwa dich'oh buboozi be hubuts'un náhezya. ¹⁸ Yak'usda 'aw hots'it ghat'ah. 'Et huwa ndet howu yalhtuk 'ink'ez buts'un náhezya, 'et náwhult'ah 'aw 'ats'un na'a na'hotneh ghat'ah. 'Et huwa t'ets'oninzun Yak'usda 'aw nela dootnih ghat'ah. Nuwheni chah ndet hukwa tsi ts'uholi, 'et ts'ohótun huba' hoont'ah. 'I bugha nedzi nduk ná'ut'ih. ¹⁹ Ndai hukwa tsi ts'uholi, 'i nezul, neba bulh tat tsedez'ai li'int'ah. 'Et 'ilhuz duts'o 'ink'ez 'aw naghóotnah ghat'ah. 'Et njan hukwa tsi ts'uholi, 'et huwa whúlh nat whuts'oh hukwa delhchooz 'et hukwuz tedulh. ²⁰ 'Et Sizi Gri 'uda 'uja netsuh nusíya, 'en whuz danínya. Melchizedek 'en k'una'a 'ilhuz wheni náwhulnuk degha nus dezti suli.

7

Melchizedek hubudayi cho degha nus ts'ah'un ne'ut'en

¹ 'Aw 'et ndun Melchizedek 'ilhun keyah Salem huwhútñi, 'et whuhubudayi cho unli. Yak'usda ts'iyanatsuk huwhandoh 'int'ah, 'en bunáwhulnuk unli. 'Et whuz na'a 'uhóoja hoh, hoh da Abraham 'en whuz na'a lhanah hubudayi cho bulh lhedúghan 'ink'ez lhanah hángghan. 'Et hukw'elh'az dukeyah ts'ih náhutesdel hoh ndun Melchizedek, 'en Abraham yududezya hoh 'et ndez na'a Yak'usda ts'un yuba tenadédli, degha nus hoonzoo yugha hó'alh ka. ² 'Ink'ez

ndunnah hubuhanghan ndai hiye 'ánt'e, 'i ts'iyawh huyílhchoot. 'Et ndi bulah, 'i 10% k'ah, 'i Abraham, 'en ndunnah Melchizedek tl'áyanla. 'Et Melchizedek boazi, 'i ndi 'int'ah, ts'ah'un na'a hubudayi cho unli ni, ni ho' 'utni. 'Ink'ez keyah Salem whuhubudayi cho chah unli. 'I be nedzi whudooghel hubudayi cho unli ni ho' 'utni. ³ Be'abá, 'ink'ez be'ama chah chahoolah. Ndun yuts'u haínzut, 'en chah chahoolah. Nkeda hooni, 'ink'ez nkeda dazsai hoolah. 'Et whuz na'a Yak'usda buYe' k'una'a 'ulya hoh 'ilhuz wheni náwhulnuk unli. ⁴ Ndun 'en Melchizedek nts'e na'a dune ncha unli, 'et howu nuní nuhzut. Netsuhda 'int'ah Abraham 'en Ihanah yé dinzut, 'et whunts'ih ndai dune hikabuhanghan, 'i 10% k'ah, Melchizedek tl'áyanla. ⁵ 'Ink'ez 'alha 'uhoont'ah 'i be, Levi hits'uh hainde, 'en zeh náwhulnuk hulhiih. Yak'usda hubutl'a hó'ai hoh dune 10% k'ah hiyít'i, 'i náwhulnuk hitl'anáhiyoo'ah huba' hoont'ah. 'En Abraham ts'uh hahánde 'uhint'ah 'ink'ez bubulhutsinkah hinli, 'et whunts'ih 'en whuz na'a 'et nduhút'en inle. ⁶ 'Et Melchizedek 'aw Levi yuts'u hachaizull, 'et whunts'ih Yak'usda, Abraham ye yuts'u náhezya, 'i yugha óoni'ai, 'ink'ez Abraham 'en 'uja 10% k'ah yutl'áyanla. 'Ink'ez Melchizedek, Yak'usda ts'un yuba tenadédli degha nus hoonzoo yughá ho'ah ka. ⁷ 'Et nawh cha'hoot'ah ndan degha ndoh 'int'ah unli, 'en duk'elh'ih 'int'ah, 'en ba tenadédli. ⁸ 'Et dez na'a 'et 'úhoont'ah, ndunnah Levi, 'en chah 'ants'i yinkak dune zeh 'uhint'ah, 'ink'ez whuz na'a zeh yahadlah, 'et whunts'ih ndi 10% k'ah, 'i chah whuz na'a zeh náhiyulhdzooh. 'Et Melchizedek, 'en 'int'ah 'ilhuz wheni khuna hiyúlni, 'en 'uyinla Abraham 10% k'ah yugha yú'ah. ⁹ 'Et ndez na'a njan dúzduteneilh, Levi 'en 10% k'ah nalhdzooh 'int'ah, 'en whunts'i Abraham bugha Melchizedek 10% k'ah yugha yú'ah. ¹⁰ Whunulh'en, whutsuh da Melchizedek, 'en Abraham ghu ninya hoh, 'et Levi 'awhuz chawhusle hoh.

'Uyoon náwhulnuk whusatéyah

¹¹ 'Et huwa ndunnah Levi ts'uh hahánde, 'aw 'en zeh dune ba náwhulnuk hulhiih 'ink'ez 'en hubugha Yak'usda bughunek netl'aída'ai, 'et whunts'ih 'en hubugha ndet Yak'usda nets'u hukwa' ninzun, 'et ts'iyaantsuk lhachaóodusneh. 'Et whuz na'a ts'iyanah t'ehonózin huba' hoont'ah, 'uyoon náwhulnuk whusatéyah. Ndun náwhulnuk whusatéyah, 'aw Aaron nduchailt'ah. 'Ink'ez Melchizedek k'una'a ootedzi. ¹² 'Et ndet howa ndunnah zeh náwhulnuk hulhiih, 'et Yak'usda lk'enaóoda'ai t'eh, 'et bughunek butl'a ída'ai, 'et chah 'uts'un na'a na'whutétnilh huba' hoont'ah. ¹³ 'Et ndun bughu yats'ulhtuk, 'en neMoodihti 'int'ah, 'en 'udooh dedowh hubuts'uh haínzut 'int'ah. 'Ink'ez ndunnah 'udooh dédowh 'aw náwhulnuk hoole ghait'ah. 'En Yak'usda bukw'uzdai k'ut 'aw hoonli hudóolhk'un huba cha'hit'ah. ¹⁴ 'Et neMoodihti 'en Judah dedowh ts'ih haínzut 'int'ah, 'et ts'iyanah t'ehonínzun. 'Ink'ez 'en náwhulnuk huteleh hubugha, Moses 'aw howu yachaílhtih. ¹⁵ Njan 'o nus soo t'ewhuntehzeh 'et nuhts'u hukwa' nuszun, 'et Melchizedek k'una'a 'uyoon náwhulnuk whusatéyah t'eh, ¹⁶ 'et ye khuna, 'i be 'aw hoolah hiyoolhtsilh ghait'ah, 'et whuz na'a Sizi Gri náwhulnuk suli. 'Et whunts'ih nts'e na'a Yak'usda bughunek be dune Aaron ts'ah hainzut hoh náwhulnuk tele, 'aw 'et huwa ilah. ¹⁷ 'Et whuz na'a Sizi Gri bugha Yak'usda bughunek njan ndutni,

"Ndun Melchizedek, nts'e na'a hoh náwhulnuk unli,
nyun chah 'ilhuz wheni náwhulnuk inli."

¹⁸ 'Et ndez na'a njan dúhoont'ah, 'udechoo khunek butl'aidélts'ut da, 'aw dune la'hoot'en ghait'ah. 'Et huwa Yak'usda 'udun niwhuni'ai. ¹⁹ 'Et ndai 'udechoo Yak'usda bughunek netl'aída'ai, 'i be 'aw dune soo lhadúlya hoole ghait'ah. 'Et whunts'ih hoonli hoh 'et 'o nus hoonzoo hukwa tsi ts'úholi. 'Et t'eh 'o nus Yak'usda beghah uztet'ilh.

Njan 'et ndez na'a Sizi Gri náwhulnuk degha nus dezti neba unli

²⁰ 'Et Yak'usda dich'oh bughunek be Sizi Gri yuts'un náhezya 'et ndi dáni, "Nyun 'ilhuz wheni náwhulnuk inli." ²¹ 'Et whunts'ih ndunnah Aaron nawhulnuk Yak'usda 'aw whuz na'a buba nachahíyel hoh náwhulnuk huzdli. 'Et whunts'ih dich'oh ts'ah'un yuts'un náhezya, 'et huwa Sizi Gri náwhulnuk unli. 'Et whuz na'a Yak'usda bughunek 'et ndutni, "Moodihti bughunek yutl'aída'ai,

dudeni 'aw 'ats'un na'a na'yoleh ghait'ah.

Melchizedek k'una'a nyun chah 'ilhuz wheni náwhulnuk inli."

²² 'Et whuz na'a ndi k'an khunek nets'un lhaidinla, 'i, Sizi Gri neba dazsai, 'et 'i be nets'un whutekulh ho' hoont'ah. ²³ 'Et ndunnah náwhulnuk lhanah hinli 'et whunts'ih 'ilhunuh hinli hoh ts'iyawh yahadla. 'Et huwa 'aw 'ilhunuh 'ilhuz wheni náwhulnuk wule ghait'ah. ²⁴ 'Et whunts'ih Sizi Gri 'ilhuz wheni khuna, 'et huwa neba náwhulnuk unli, 'aw 'uyoон dune yuk'édooya hoolah. ²⁵ 'Et huwa ts'iyannah, 'en be bughah Yak'usda hiyeghah hutet'ilh, ts'iyawh'en huba ye ulhtus, 'i yít'i hoh soo ts'ah'un na'a hubutelhyih ka. 'En 'ilhuz wheni khuna 'ink'ez neba tenadudli 'et huwa. ²⁶ Njan 'et ndez na'a Sizi Gri náwhulnuk degha nus dezti neba unli. Lubeshi bughu hoolah, 'aw buk'eholts'it chah hoolah. 'Ink'ez tink'us 'ohoont'ah 'aw hoontsolyaz whunts'i buk'uz chawhést'en. Lubeshi 'ulh'en hubulh 'ut'en inle, 'et whunts'ih 'aw 'en buk'una'a ndi yun k'ut chaidal. 'Ink'ez buch'a nasja. 'Ink'ez 'en yak'uz whanus dézti suli. ²⁷ 'Aw Lizwif huba náwhulnuk degha nus dezti hubunduchaílt'ah. Ndunnah nawhulnuk dzin totsuk hedich'oh hubulubeshi ba Yak'usda bukw'uzdai k'ut 'uhudéhk'un. 'Et hukw'elh'az dudulh dune ba Yak'usda bukw'uzdai k'ut 'uhudéhk'un. 'Et whunts'ih k'an 'et Sizi Gri ts'iyannah ba dich'oh 'et 'ilhuh zeh 'ink'ez 'ilhuz wheni nelubeshi k'elha dazsai. ²⁸ 'Et dune bulubeshi bugha lahít'ah 'et whunts'ih ndai hoh da Yak'usda khunek netl'aída'ai, 'i be dune náwhulnuk degha nus dezti nahutedle. 'Et ndai Yak'usda bughunek Moses yuk'une'úzguz, 'i buk'elh'az, Yak'usda buYe' 'en bugha nets'un nahezya náwhulnuk degha nus dezti tele. 'En 'int'ah, buYe' 'en 'ilhuz wheni soo 'et lhadulya suli.

8

Sizi k'an 'et náwhulnuk degha nus dézti unli hoh dude 'ut'en k'ah huwaghúna

¹ 'Aw 'et njan daja uzdani, soo ts'ah'un na'a t'ewhunoohzeh nuhts'u húkwa 'uzninzun, nuwheni neba náwhulnuk degha nus dezti ts'it'i, ndun yak'uz k'us úncha, 'en bukw'usúda cho dézti, 'i nalhnih ts'ih yughu nát'adeda. ² Ndi ndai bun cho neMoodihti nené'ai, 'i ts'ah'un na'a 'ohoont'ah. 'I 'aw dune ilah neni'ai. 'Et huwa 'udéni bun bet whubez, 'et degha nus whudézti ts'ih, 'et chah Sizi Gri neba ne'ut'en. ³ 'Et ndunnah náwhulnuk degha nus dézti hinli, 'en Yak'usda bukw'uzdai k'ut 'udelhk'un 'ink'ez hoonliyaz Yak'usda bugha hóo'alh huba' hoont'ah. 'Et whuz na'a ndun dune bughu yats'ulhtuk, 'en chah hoonli huwa óo'alh huba' hoont'ah. ⁴ 'Et lhanah nawhulnuk ndi yun k'ut, 'en nts'e na'a Moses bughunek k'una'a, 'et whuz na'a 'et nduhút'en. 'Et huwa Sizi Gri 'awhuz ndi yun k'ut usda t'eh, 'aw da náwhulnuk chailah wule. ⁵ Ndunnah bun cho t'ah ts'ih dune huba ne'hut'en t'eh, 'et ndi bun cho 'et yak'uz whuz'ai, 'et whunduhúl'en ho' hut'en. 'I yak'uz dahoont'ah 'et whunduhúl'en li'hut'en. Hoh da Moses bun cho nité'alh hoh, Yak'usda yudáni, "Nts'e dzulh k'ut bun cho nitélts'ulh whunyunelhtan, 'et wheni bughá ne'tant'en, 'i mba 'usdla, 'i k'una'a 'onleh. 'Et nts'e na'a whúnyunelhtan, nduhóolcho hoh whuz na'a 'onleh!" ⁶ 'Et whunts'ih Sizi Gri ndunnah 'o nus soo huba ne'út'en suli. Ndi degha nus hoonzoo khunek nets'u lháidinla, 'i, 'et huwa Sizi Gri 'en hubégu

unli. Yak'usda 'o nus hoonzoo k'una'a nets'ú hoozi, 'et whuz na'a neba 'uhóonla.

K'andit khunek nets'u lhaídinla

⁷ 'Et njan khunek 'udechoo khunek hubuts'u lhaídinla, 'i huba hoolhtus, 'aw hik'uecha'ít'il. 'Et huwa 'i bugha dune Yak'usda nah ts'ah'un cha'hit'ah. 'Et huwa doo chah whull nat nets'u nahezya. ⁸ 'Ink'ez Yak'usda, 'en ts'iyawh hukwa' hubudáni. 'Et whuz na'a bughunek 'uk'e'edúguz hoh njan ndutni, "Sih soo zélhts'ai, 'ilhudzin whuz de whélts'ulh,
 'et whusawhélts'ut t'eh,
 'et Israel hubuyun k'ut húdelhts'i,
 'ink'ez Judah hubuyun k'ut húdelhts'i, 'en chah
 njan k'andit khunek huba lhaídutesdlilh.
⁹ Hoh da dunnah 'udechoo khunek huba lhaídusdla,
 'et whulh nat 'aw hukw'u na'a cha'whutést'il.
 'Et hoh da hubula ílhchoot
 'ink'ez Egypt yun k'ut hukw'u nabutéla.
 'Et whunts'ih sughunek 'aw chahiyílhchulh,
 'et huwa hubula desnik.
¹⁰ Et hukw'elh'az Israel buzkehkah soo k'andit,
 'i khunek huba lhaídutesdlilh.
 Ndez na'a ndótet'ilh, suk'ah ts'ih 'et hubeni taóodutesdlel,
 'ink'ez hubudzi k'ut chah 'uk'e'tesgu.
 'Ink'ez si hubuYak'usda tesdleh,
 'ink'ez 'en sudune hutele.
¹¹ Hoh t'eh ts'iyawh 'ilhunuh hinli hoh 'uskehyaz
 'ink'ez ye 'un hudedoh bulh 'ilho, Si t'esontezeh.
 'Et datést'ilh,
 'et huwa hubéghah whut'i,
 k'us dudulhutsinkah 'aw 'ilhunuh whunts'i,
 doo chah zeh 'neMoodihti bugha hoodulh'eh! hudooni huba
 cha'hoot'ah.
¹² 'Et dáhoont'ah 'aw ts'ah'un cha'hust'en t'eh,
 'et huwa bugha té'unteszeh.
 'Ink'ez hubulubeshi 'ink'ez sk'unúcha'ust'en,
 'et 'i ts'iyawh 'o 'un 'aw huba whunaoohlunih ghat'ah."
¹³ 'Et huwa Yak'usda ndi soo k'andit khunek neba lhaídinla, 'i howu yailh-tuk, 'et dája ni hoh ndutni, 'i bugha njan 'udechoo khunek huba lhaídinla, 'i 'aw hoh cha'hoot'ah suli, 'et huwa Yak'usda neba lhk'enaooda'ai, 'ink'ez 'udechoo khunek huba lhaídinla 'aw 'o 'un buk'une' ts'oot'en ghat'ah.

9

Hoh da bun cho 'ulya

¹ 'Ink'ez njan 'udechoo khunek huba lhaídinla, 'i be wheóobunelhtan nts'e na'a nawhulnuk Yak'usda ba ne'hóot'en huba' hoont'ah. 'Ink'ez ndet bun cho 'uhuhóonla, 'et Yak'usda ts'un teni' hunalhzin 'ohoont'ah. ² 'Ink'ez bun cho be 'uhóolya, 'et ndez na'a njan dúhoont'ah. 'Udechoo whabez ts'ih, 'et skwunlai 'o 'at nankoh (7) kwun buk'udezk'un, 'i 'et sukai. 'Ink'ez kw'uzdai lhes buk'úyuzdla, 'i nul'en, 'i chah 'et sukai. 'Et njan 'udechoo whabez ts'ih, 'et whudézti 'ohoont'ah. ³ 'Et 'o ni whulh nat whuts'uh hukwa' delhchooz, 'et degha nus whudézti ho' 'ohoont'ah. ⁴ 'Et whabez ts'ih kw'uzdai 'i ndulhcho 'i bunat gold be 'ulya, 'i 'et sukai. 'Ink'ez 'i k'ut bulut sooltsun, 'i hidélk'un. 'Ink'ez ndi chunkhelh cho, 'i chah bez ts'ih 'ink'ez yoo'az ts'ih, 'i bunat ndulhcho gold be 'ulya, 'i chah 'et sukai. 'Ink'ez Yak'usda khunek huba lhaídinla, 'i buchunkhelh 'int'ah. 'I bez ts'ih gold 'oosa' chah be sa'ai. 'Et

ndi gold 'oosa', ndi lhes manna hiyulhni, 'i bé yuz'ai. Aaron butuz, ndi tuz 'i 'int'ah, 'ut'an buts'un haínalhyi inle, 'i chah be ídeztan. 'Ink'ez ndi lanezi khunek netl'aída'ai, 'i tse k'ut 'uk'une'úsduguz, 'i chah be ídez'ai. ⁵ 'Ink'ez ndi chunkhelh cho k'ut, ndunnah Cherubim hubuts'útni, 'en hube Yak'usda yé dezti t'ets'oninzun, 'et huwa ndi chunkhelh 'i k'ut 'uhint'ah. But'agha whutus lht'aghútñaih hiyulhtsi, 'i t'ah, 'et 'i k'ut 'uskai yuk'unédelht'ik hoh Yak'usda soo cho nets'u naítoot'en ka ts'uwhútñi. 'Aw ndi ts'iyawh howu yats'oolhtuk għait'ah.

'Udechoo bun cho 'ulya, 'i buyah Yak'usda bukw'uzdai k'ut hidelhk'un, 'i aw 'et hoh tinta' ts'unt'en neba 'un whutookat għait'ah

⁶ 'Et ndi ts'iyawh nts'e hubula huba' hoont'ah, 'et nihíninla. 'Aw 'et 'udechoo whabesz ts'ih 'et ndunnah nawhulnuk, 'en dzin totsuk ne'hut'en. ⁷ 'Et whunts'ih náwhulnuk degħa nus dezti, 'en 'ilħuh naooduzuk totsuk 'ilħuh zeh 'o ni whulħ nat ts'ih nuyih. 'Uskai bu'et t'eh, 'aw whuz tooya għait'ah. 'Et ndi 'uskai dich'oh duba chah 'ink'ez ndunnah 'aw t'ehonízun hoh lubeshi hilħchukw, 'en huba chah, 'en ts'iyawh hubulubeshi huwa whuz Yak'usda nahl wheyúkaih. ⁸ Ndez whuz na'a Ndoni whunneoodulh'eh, ndi bun cho 'awħuz 'et su'ai t'eh, 'et degħa nus whudézti ts'ih, nts'e Yak'usda 'int'ah, 'aw whuz dats'ōya għait'ah. ⁹ 'Et ndúhoont'ah, 'et huwa hoonli whuts'odul'eh huba' hoont'ah. Ndán Yak'usda ba huwa íte'alh, 'ink'ez Yak'usda bukw'uzdai k'ut yudutélhk'un, 'en 'i be Yak'usda ba ne'tet'en, 'et whunts'ih 'awħuz buyuh ts'ih bugħa nt'ets'onízun* 'aw ts'ihnu lhadulya ho' hoont'ah. ¹⁰ 'Ants'i ndai hite'alh, hitetnilh, lħelħts'un na'a toonahuwhúgus, 'ink'ez ndai buyust'e ba ts'ah'un 'int'ah, ndi 'i ts'iyawh nus de k'an 'et Yak'usda ba ne'hutet'en, hoh t'eh huba whusawħútelts'ulh, 'et whuts'un, 'et whuz na'a 'uhoot'en whuba' hoont'ah inle.

Sizi Gri dich'oh buzkai be tinta' ts'unt'en neba hoolah whulhtsi

¹¹ 'Et whunts'ih Christ náwhulnuk degħa nus dezti unli hoh whusainya. Ndet hoonzoo whusaóotekulh, 'en 'et negħa whúteleħ. Ndi bun cho degħa nus nħa, 'i 'ink'ez 'o nus ts'ah'un na'a 'uhoont'ah, 'et hoh neba ne'ut'en. 'Aw dune ilah 'uyinla. 'Aw ndi yun k'ut ilah 'uhóolya. ¹² Sheep 'ink'ez musdusyaz bubuzkai, ndi degħa nus whudézti ts'ih 'aw whuz whechayikal. K'us dich'oh duduzkai, 'i be degħa nus whudézti ts'ih whuz whinyā. 'Ilħuh zeh 'ink'ez 'ilħuz wheni, whuz whinyā. 'Et ndúja hoh 'ilħuz wheni nenaneonket. ¹³ 'Et ndunnah Moses be' dustl'us bugħa dahúja 'et huwa 'aw bun cho su'ai ts'ih 'aw whuz hutoodelħ għait'ah, ndunt'ah musdus dune 'ink'ez sheep bubuzkai buk'ehidutelħt'ih. 'Ink'ez musdus hidélhk'un, 'i bulez 'i buk'unuhítedzih, 'et whuz na'a Yak'usda nahl buyust'e 'aw chaditsun nahúdlih. 'Et whuz na'a 'et nduhúja t'eh bun cho su'ai, 'i whuz hutedulħ. ¹⁴ 'Et whunts'ih Christ 'en dich'oh duduzkai, 'i be 'o nus dahóolcho hoh neyuh ts'ih bugħa t'ets'oninzun, 'i 'et ts'iyawh neba whuna' alħde. Ndai 'uts'ulħ'en, 'i 'aw nela 'oot'en għait'ah, 'ants'i 'et 'uhoont'ah. 'Et huwa Yak'usda, 'en buba né'ts'oot'en huba' hoont'ah. Christ 'en 'uja 'aw hoonliyaz bulħ chadí'ah hoh Ndoni ndun 'ilħuz whuts'un khuna, 'en be Yak'usda yutl'a'dudelti, neba datétsah ka. ¹⁵ 'Et huwa ndi k'an khunek neba lhaídinla, 'i 'et Christ 'en hubéguz neba unli. 'Et whuz na'a ndunnah njan 'udechoo khunek huba lhaídinla, 'i 'et hukw'úne' whút'en hukwa 'uhet'en, 'et whunts'ih lubeshi 'uhalħen, 'en ts'iyawh lhdulalhġus k'ut huba dazsai 'et hoh njan 'udechoo khunek huba lhaídinla, 'i bugħa lubeshi

* **9:9** Ndi khunek "Neyuh ts'ih huwa t'ets'oninzun", 'i hoonli ts'ih'un na'a k'us tink'us 'uhoont'ah, 'i għa t'ets'oninzun, ts'utni ho' ts'utni.

neba whulanaoodeetnik huzdli. 'Et hoh ndunnah 'ilhuz wheni hudutejih ka hubuka' dani, 'en ndi k'an khunek huba lhaídinla, 'i hiyóolhchoot ka.

Dune hoonli khunek huba lhaidinla, 'en dune dazsai, 'et zeh buts'i tékulh

¹⁶ 'Et dune hoonli khunek huba lhaidinla, 'en dune dazsai, 'et zeh buts'i tékulh, whuz na'a 'ohoont'ah. ¹⁷ 'Et whunts'ih ndi khunek ba lhaidinla, 'i khuna whutah, 'et 'awhuz bube'ildzun unli ho' 'int'ah. ¹⁸ 'Et whuz na'a 'ohoont'ah, hoh da 'udechoo hoh Yak'usda ndi 'udechoo khunek huba lhaídinla, 'et Yak'usda bukw'uzdai k'ut 'ink'ez dune buk'ut chah, Moses 'uskai be buk'eídilh'tik. ¹⁹ 'Et Yak'usda bughunek Moses yutl'aída'ai, 'i nts'e na'a 'uwhúlhni, 'et hubugha ts'iyawh Moses hubudáni. 'Et hukw'elh'az musdusyaz 'ink'ez sheep bubuzkai too bulh 'int'ah, 'i yílhchoot. Sbai bugha dulk'un, 'i duchunyaz 'i hyssop hiyúlhni, 'i buzooschum, 'i yulaídalh'oo 'ink'ez ndi 'uskai yé tunayuzsi 'ink'ez Yak'usda be' dustl'us yuk'uné'delht'ik 'ink'ez dune chah, ts'iyawh buk'uné' delht'ik. ²⁰ 'Et ndoh búlhni, "Njan ndi 'uskai 'i be Yak'usda khunek nuhwhuba lhaídinla," ni Moses. ²¹ 'Ink'ez ndi bun cho, 'i chah, 'ink'ez tuz ts'ih ndai Yak'usda bé ba 'uwhut'en, 'i 'int'ah, 'i chah ts'iyawh, ndi 'uskai yuk'unídelht'ik. ²² 'Et Moses be' dustl'us 'i be 'ankw'us ts'iyaintsuk 'et ndi 'uskai 'i be whuz na'a chaditsun nahudleh. 'Et 'aw 'uskai buk'échadulht'ih t'eh, 'aw hubulubeshi ba hubuna'oodeh ghat'ah.

Christ 'ilhuh zeh neba dazsai dáhoolcho ho' hoont'ah

²³ 'Et huwa ndi yun k'ut hoonli, 'i ndi ts'iyawh yak'uz sula, 'i ndult'ah ho' 'int'ah. Nts'e na'a Moses dát'en, 'et whuz na'a chaditsun suli. 'Et whunts'ih soo yak'uz ts'ah'un 'int'ah ndai 'et 'int'ah, dutsun wule whuch'a, 'i 'o nus hoonzoo be huwat'ah, hóle huba' hoont'ah. ²⁴ Christ 'en yun k'ut njan bun cho bet, ndet k'us whúdezti, dune bula be 'uhuhóonla, 'aw 'et dachayal. Njan 'et 'ants'i yak'uz whunduwhut'en huwhulhtsi 'et huwa. 'Et k'us nduk yak'uz ts'ih whuz whenya. 'Et whuz na'a Yak'usda but neba neninya. ²⁵ 'Et njan náwhulnuk degha nus dehti, 'en khunai buzakai be, naoodezulh totsuk, njan degha nus whudézti, whuz k'unádaih. 'Et whunts'ih Christ 'aw dich'oh lhat cho huwá dudóltelh huba cha'hóot'ah. ²⁶ 'Et ndúja t'eh, ndi yun 'ulya da whuts'un, k'an 'et whuts'un, 'et t'eh tube lhat da daootsah wule. 'Et k'an 'aw 'et ndi yun 'ustl'e' 'utenilh nilhdukw whuzdli, 'et 'ilhuh zeh ndi yun k'ut nusíya, 'ink'ez neba huwa' dudulti. 'Et huwa whuz na'a nelubeshi neba yunaoodelhúnah. ²⁷ 'Ink'ez dune 'ilhuh zeh dahútetsah, whuz na'a 'uhóolya, 'et dahúzsai hukw'elh'az 'et t'eh huba nahutedeh. ²⁸ 'Et whuz na'a Christ, 'en 'ilhuh zeh huwá' dudulti. 'Et whuz na'a lhanah hubulubeshi hubugha yílhchoot 'i yuk'elha dazsai. 'Et whunts'ih whulh nat, 'aw lubeshi bugha ilah hoh whusanatedalh. 'Et k'us ts'iyahan ndunnah tube buka tsi hooli, 'en hubunalhts'et be hóoduteltsilh, 'et hudutejih.

10

Khunai Yak'usda bukw'uzdai k'ut hídelhk'un, 'i be 'aw hubulubeshi hubuna'doodeh ghat'ah.

¹ 'Et Moses yuk'e'ánguz dalzoo, 'i whuz hatekulh, 'et 'aw soo cho nduchane-dinil. Ndunnah ndi khunek yuk'une' 'ust'en, 'en naoodezulh totsuk ndai huwa t'ah Yak'usda bukw'uzdai k'ut hidutélhk'un, 'et whunts'ih 'aw Yak'usda nalh lhadulya uboolhtsilh ghat'ah. ² Lhadulya hubutelhtsilh t'eh, ndai huwa t'ah, 'ustl'e' hiyooleh huba' hoont'ah. 'Et doo chah hubulubeshi ts'iyawh ba hubuna'dede t'eh, 'et sih buyuh ts'ih bugha t'ets'oninzun, 'i be t'ewhuntezezeh.

³ 'Et whunts'ih naoodezulh totsuk, ndai huwa t'ah, 'i be 'et hoh ts'iyawh t'ehonínzun 'awhuz lubeshi hit'i. ⁴ 'Et musdus dune 'ink'ez sheep buzakai,

'i nts'oh dáhoont'ah 'et whunts'ih hubulubeshi 'aw 'i be hubuna'doodeh ghaït'ah 'et huwa.

Christ buzkai 'i be zeh nelubeshi yuna'alhde

⁵ 'Et huwa nkeda Sizi Gri ndi yun k'eínya hoh, 'et njan ndutni,

"O Yak'usda ndai huwa t'aih

'ink'ez Yak'usda bukw'uzdai k'ut hidélk'un,

'i ts'iyawh buka cha'nínzun.

'Et whunts'ih 'ilho yust'e 'i suba lhadinla.

⁶ Ndai Yak'usda bukw'uzdai k'ut lubeshi ba dézk'un,

'ink'ez 'et 'uyoo huwa hiyulih, chah,

'i ts'iyawh 'aw mba soo cha'ildzooh.

⁷ 'Et huwa 'et njan dûdusni,

'O Yak'usda ndi dustl'us sugha 'uk'une'zinguz 'et 'alha 'uhoont'ah.

Nyun hukwa' ninzun k'una'a tune'test'en, 'et huwa whusaíya."

⁸ Njan ndutni hoh 'utni, "Ndai Yak'usda bukw'uzdai k'ut lubeshi ba dézk'un, 'i 'ink'ez 'et 'uyoo huwa hiyuli inle chah, 'i ts'iyawh 'aw mba soo cha'ildzooh," 'et whunts'ih Moses be' dustl'us 'i bugha 'et nduwhut'en inle. ⁹ 'Ink'ez Sizi Gri njan chah ndutni, "O Yak'usda nyun hukwa' ninzun k'una'a tune'test'en 'et huwa whusaíya." 'Et whuz na'a Yak'usda njan 'udechoo khunek huba lhaídinla, 'i hoolah yulhtsi. 'Ink'ez bulh nankoh khunek huba lhaídinla, 'i yuk'enaída'ai. ¹⁰ 'Ink'ez Yak'usda ndet hukwa' ninzun, 'et hoh 'ilhuh 'ink'ez 'ilhuz wheni Sizi Gri buyust'e be neba huwa' dudulti. 'Et whuz na'a 'uda bube'ildzun ts'uzdli.

Christ neba dazsai, 'et 'i be ndunnah 'utahalya, en ts'iyahanah lhahúdulya hubulhtsi

¹¹ 'Ink'ez ndi Yak'usda bukw'uzdai k'ut hidélk'un, 'et dzin totsuk 'i zeh ndunnah náwhulnuk whusayulih. 'Ink'ez 'et whuz na'a zeh dune huba ne'hut'en. 'Et whunts'ih 'et nduhút'en 'aw hubulubeshi hubuna'doodeh ghaït'ah. ¹² 'Et whunts'ih Sizi Gri nelubeshi k'elha 'ilhuh zeh 'ink'ez 'ilhuz wheni 'uja dich'oh huwá' dudulti. 'Et hukw'elh'az Yak'usda nalhnih ts'ih yughu nátl'adeda. ¹³ 'Ink'ez k'an 'et 'et usda nket'ah 'uwhutenilh hoh yuch'a detni, 'en 'ants'i neke buk'ut nályis, 'i k'una'a duke yuh nébutelelh, 'et huba ulh'i. ¹⁴ Ndunnah Yak'usda ba 'udun nibuninla, 'en huba Sizi Gri 'ilhuh zeh huwa dudulti, 'i be 'ilhuz wheni lhadúlya ts'uzdli. ¹⁵ Ndoni 'en chah whuz na'a 'et ndunélhni. Hoh da 'et ndutni,

¹⁶ "NeMoodihti njan ndutni,

"Et hoh dzin hukw'elh'az ndi khunek huba lhaídusdle, 'i 'uyoo 'int'ah. Sk'ah ts'ih budzi yuh chah newhudutes'alh 'ink'ez bubeni tah chah 'uk'e'tesgus."

¹⁷ Hubulubeshi 'ink'ez 'uk'únuchá'hust'en,

'i ts'iyawh chah 'o 'un huba whunaoohlúnih ghaït'ah."

¹⁸ 'Aw 'et ndai nelubeshi ts'iyawh neba whunaoodelhúnah, 'ink'ez 'aw 'o 'un nelubeshi ba 'udóolk'un ghaït'ah.

Sizi Gri neba daja, khun teh neba nawh 'uhot'e gunih 'ink'ez soo cho ts'uhotun

¹⁹ 'Et huwa sulhutsinkah, Sizi buzkai bugha tube nedzi hoonli hoh ndet degha nus whudézti ts'ih 'ahoolhyez whuz uztedulh, 'et netl'ahó'ai. ²⁰ 'Et ndi ti, 'i k'ahoondit, 'ink'ez ts'ah'un na'a 'int'ah, neba whulhtsi. 'Et dich'oh neba dazsai, 'et 'i be ndi whuts'oh hukwadelhchooz, 'i neba lhch'a yilhchoot.

²¹ 'Ink'ez Yak'usda bukoo húdelhts'i, 'en huba 'en náwhulnuk degha nus dezti unli. ²² 'Et huwa nuwheni chah soo cho neba 'alha 'oot'e 'ink'ez nedzi ts'ah'un 'int'ah, 'i be whuz na'a 'ahoolhyez buts'úztooya. 'Ink'ez buzkai be 'uda nedzi

k'únidelht'ik. 'I be ndet neyuh ts'ih bugha t'ets'oninzun, 'i whudutsun, 'et ts'iyawh neba whuna'alhde. 'Ink'ez neyust'e too unzoo, 'i be toonáyuzguz li'ts'oot'e. ²³ Ndet buka tsi ts'úhooli, 'et neba 'alha 'ohoont'ah ts'utni, khun teh neba nawh huhot'e gunih 'ink'ez soo cho ts'uhotun. Ndun nets'úhoozi, 'en 'aw nela dootnih ghait'ah 'et huwa. ²⁴ 'Et ts'iyawh lhghu nuní uznoozut 'et t'eh nus lhts'un noolt'uk, 'et t'eh ts'iyanah hubuk'ets'ootsi' 'ink'ez 'ut'en unzoo, 'i be hubula' ts'oot'en. ²⁵ Nts'e na'a 'ahoolhyez 'ilhunats'owúdulh khun teh whulazdootnih gunih! 'Et bulunah 'ustl'e' hut'ih. 'Et whunts'ih 'aw 'et degha nus dzin whuz de whélts'ulh 'aw 'et neba nilhdukw suli. 'Et huwa 'o nus soo cho nus lhts'unnoolt'uk hoh 'ahoolhyez Yak'usda ba 'ilhunats'owódelh huba' hoont'ah.

Ts'ah'un na'a 'int'ah, 'en be 'alha 'ohoont'ah, 'i be ndi yun k'ut huddolts'i

²⁶ 'Et huwa 'udusni, khunek 'alha 'int'ah t'ezninzun hoh ts'iyawh ts'ilhchoot, 'ink'ez hukw'elh'az ts'ah'un na'a t'ets'onanzin t'eh, 'et whunts'i 'aoonilhka lubeshi ts'ilhchoot t'eh, 'et nduts'út'en, 'aw be huwá t'aih, 'i neba cha'ít'ah suli. ²⁷ K'us njan ndet neba nahutedeh, 'et wheoonujut k'et 'aw uzdooni ghat'ah. Yak'usda ye hunilch'oh, 'i be neba nahutedeh. Ndi ye hunilch'oh, 'i kwun ulhtus k'et 'i be dulk'us li'utni, 'i k'una'a ndunnah Yak'usda ch'a detni, ts'iyawh 'i be huduték'un. ²⁸ Ndi Moses be' dustl'us k'ut 'uk'e'éduguz, 'i ndan n'un whutulhdelh, 'en nanah k'us tanah nallh 'et duhút'en t'eh, 'et t'eh be 'ugha te'nidzeh, 'i bu'et dahútetsah inle. ²⁹ 'Et ndez na'a 'o nus whutétsi'. Ndunnah Yak'usda buYe' 'ants'i yuba unli hoh yuk'unuya t'eh, 'ink'ez Sizi buzkai be k'an 'et khunek huba lhaídinla, 'i huwhut'i, 'et Yak'usda ba 'udun nioobuninla, 'et whunts'ih ndi buzkai 'aw hoonliyaz huba chaílah t'eh, 'et Ndoni 'en chah, 'en be ye unzoo, 'i buts'un haídults'uk, hich'a yalhtuk t'eh, 'et ndi ts'iyawh ndunnah whuz na'a nduhut'en, 'et 'o nus whéoonujut hoh huba nahutedeh. ³⁰ 'Et neMoodihti, 'en buk'ah ts'ih t'ets'oninzun. 'En 'utni, "Ndi be k'uznudzun, 'i si zeh hukw'elha whutelhsilh." 'Ink'ez chah 'utni, "NeMoodihti dudune, huba nahuteyeh." ³¹ Yak'usda khuna, 'en ndunnah hubuzkeh hinli 'et whunts'ih hich'a nalhúya t'eh, 'en wheoonujut hoh huba nahuteyeh. ³² 'Et whunts'ih nuhwheni whunalhúnih ndi khunek niz dakez daja hutni, soo cho t'eoónáhzun 'ink'ez ulhchoot. Hukw'elh'az tube cho dzuh nusahdeh 'et whunts'ih 'aw nuhwhuch'a cha'ílhdo. 'Et ts'iyawh 'aw whecháhtsaz hoh whutah lhusáhdel. ³³ Whulutah Yak'usda bugha ts'iyanah nallh dzuh nunóhuhulhdeh 'ink'ez nuhch'a yahalhtuk. Whulutah ndan whuz na'a Yak'usda dzuh nuhudeh, 'en buts'ú nidahiyih. ³⁴ Hoh da tsak'esuhan'ai hoh sugha te'nahzun 'ink'ez sula 'aht'en inle. 'Et ndai aht'i, 'i 'ants'i nuhghu hiyílhchoot 'et whunts'ih hoonáht'i. T'eoónáhzun nuhwhenich'oh 'o nus hoonzoo 'ink'ez 'ilhuz 'ohoont'ah, 'et yak'uz nuhwhuba whuzdla ho' hoont'ah. ³⁵ 'Et huwa be nuhdzi ulhtus khun whuladoohtnih gúnih! 'I bugha hooncha nuhgha whutelts'ulh. ³⁶ 'Et njan 'et ts'iyawh bula doohtnih gunih! 'Et Yak'usda nuhts'u hukwa' ninzun, lhaoodahla t'eh, 'et nuhts'u nahezya, 'et nuhgha óotekulh. ³⁷ 'Uda khunek 'et njan ndutni,

"Et ndun whusatéyah, 'aw sa ilah whusatéyah.

³⁸ 'Et ndunnah ts'ah'un na'huja,
'en be 'alha 'ohoont'ah,
'i be hukhutena huba' hoont'ah.

'Et whunts'ih ndunnah k'ah na'huja t'eh,
'aw si huba hóst'i ghat'ah."

³⁹ Ndunnah dune Yak'usda huba 'alha' yint'ah 'ink'ez k'ah na'huja t'eh, 'en ndai Yak'usda bugha whúte'alh, 'aw hiyóolhchoot ghat'ah. Nuwheni 'aw 'en

hubuk'una'a cha'ts'ít'ah. 'Et k'us nuwheni Yak'usda buba 'alha' yint'ah ts'inli, 'et hoh 'uzdujih 'uts'int'ah.

11

Be 'alha 'uhoont'ah, 'i be Yak'usda be 'ut'en k'ah nt'ets'onínzun

¹ 'Et ndai buka tsi ts'uhóoli, 'i be 'alha 'uhoont'ah, 'i be t'ets'onínzun neba whusaootékulh. 'Ink'ez ndi ndet chats'uwhes'en, 'et whunts'ih be 'alha 'uhoont'ah, 'i be t'ets'onínzun 'et whuzila ho' hoont'ah. ² Ndi be 'alha 'uhoont'ah, 'i be ndunnah Yak'usda ba 'utsuh whudélhdzulh, 'en soo ts'ah'un na'a howu yahalhtuk. ³ Be 'alha 'uhoont'ah, 'i be zeh t'ets'onínzun Yak'usda daja ni, 'et hoh ts'iyaintsuk ndi yun k'ut 'ulya. Ndai chats'es'en, 'i whunts'i, bughunek 'i be ts'iyawh 'uyinla, 'i 'int'ah.

Yak'usda ndi yun 'uyinla hoh da whuts'un be neba 'alha 'uhoont'ah, 'i bugha zeh Yak'usda bunalh ts'ah'un 'uts'int'ah

⁴ Ndun Abel, 'en Yak'usda buba 'alha' yint'ah. 'I be zeh 'uja dulhutsin Cain 'en degha nus unzoo, 'i Yak'usda bukw'uzdai k'ut yuba 'údalhk'un. Ndi huwa íni'ai, 'et Yak'usda hoonzoo k'una'a yughu yalhtuk. 'Et Abel dazsai hukw'elh'az whunts'i nts'e na'a daja, 'et bugha nelh yaintuk, Yak'usda nahl 'en ts'ah'un dune 'int'ah hutni. ⁵ Njan be 'alha 'uhoont'ah, 'i be zeh Enoch nts'e na'a Yak'usda yuts'u hukwa' ninzun, 'et 'uhóonla 'et whuz na'a bugha t'ewhunúdzun. 'Aw dachaitsal. Khuna hoh Yak'usda yak'uz wheyalhti. 'Et whuz na'a Yak'usda bughunek 'et ndutni, "Yak'usda yak'uz ts'ih whenáyalhti. Hoolah. 'Et huwa hiyulh 'uhut'en 'aw chahiyés'en suli." ⁶ Bé 'alha 'uhoont'ah, 'i bu'et t'eh, 'aw Yak'usda buba dzuh ts'oozoo ghait'ah. 'Et huwa ndunnah Yak'usda ts'un hutedulh hukwa' huninzun t'eh, Yak'usda hoonli ho' hoont'ah, 'et huba 'alha' hot'e huba' hoont'ah. 'Ink'ez soo ts'ah'un dudzi huwa' hooli hoh hik'ah ts'ih hukwa hítes'en, 'en zeh bula' tenilh. ⁷ Noah 'en chah Yak'usda buba 'alha' yint'ah. 'I be ndet 'aw chawhes'en whúnts'i, ndet Yak'usda 'uyúlhni, "Huwondle 'aw 'et whuz de whélts'ulh." 'Et huwa whenuljut hoh ndi ts'i cho 'i 'uyínla. 'Et huwa Noah hikoo húdelhts'i, 'en ts'iyawh hubúlhyih. Ndet ndi ts'i cho 'uyínla, 'i bugha ndi yun k'ut nduhóolcho hoh dune huba nahesda. Nts'e na'a hoh be 'alha 'uhoont'ah be ts'ah'un na'a 'int'ah ts'inli, Noah 'en chah whuz na'a Yak'usda buba 'alha' yint'ah suli, 'i be ts'ah'un dune inle.

Abraham buba 'alha 'uhoont'ah

⁸ Abraham, 'en chah Yak'usda ndi yúlhni, "Udun yun k'uz tonya. K'at lih t'eh njan yun k'ut 'et nye'hoolhdzun whutele." 'Et be 'alha 'uhoont'ah be Abraham whuz na'a yuk'úne' 'ust'en. 'Et nts'e teyalh 'aw nt'éoonízun 'et whunts'ih 'aw 'et tezya. ⁹ Be 'alha 'uhoont'ah, 'i be ndi yun yuts'u yoozi, 'i bube'hooldzun tele. 'Et njan yun k'ut 'uts'un keyah whut'en unli, 'et whuz na'a njan yun k'ut usda. Bun bet zeh whut'i. Ndunnah Isaac 'ink'ez Jacob 'en chah 'en k'una'a bun be zeh huwhut'i. 'En chah ndi Abraham ye yuts'u náhezya, 'en bulh bube'ildzun whutele. ¹⁰ 'Et njan keyah 'ilhuz 'uwhutet'ilh, 'et Yak'usda, 'en 'uhóonla, 'et Abraham huba ilh'i hoh bun be zeh 'ant'e inle. ¹¹ Be 'alha 'uhoont'ah, 'i be Sarah 'en chah Yak'usda ye ulhtus, 'i yutl'anaho'ai wulchan ka. Tube ye 'un uzulh 'aw buyaz hóle buba cha'hóot'ah. 'Et whunts'ih nts'e na'a Yak'usda yuts'ú hoozi, Sarah nt'eooininzun Yak'usda 'aw yula dootnih ghait'ah. ¹² 'Et huwa 'ilhunuh dune, 'en tube hoonyan k'et 'ants'i dazsai li'int'ah, 'et whunts'ih yé dinde hulai. Nduk sum 'et 'i bundíneltsuk 'ink'ez taba sai, 'i 'aw oodólto ghait'ah, 'et 'uhuneltsuk.

Ndunnah 'uda Yak'usda huba 'alha' yint'ah, 'en ts'iyawh 'awhuz huba 'alha 'uhoont'ah hoh whulh yahadla

¹³ Ndunnah 'uda Yak'usda huba 'alha' yint'ah, 'en ts'iyawh 'awhuz huba 'alha 'uhoont'ah hoh whulh yahadla. 'Et ndai Yak'usda yé buts'ú nahezya, 'i 'aw butl'acháyizulh. 'Et whunts'ih ndai nus huho'en, 'et huwa 'aw nawh huba cha'hóot'ah. Hubudzi hóont'i hoh huhoontun. 'Ink'ez ts'iyanaah 'uhutni, 'aw ndi yun k'ut whut'en chahílah. 'Ants'i ndi yun k'ut whuk'uhundelh ho' hint'ah. ¹⁴ 'Et dahutetsah whutsuh ndunnah whuz na'a yalhtuk, 'en soo ts'et gaih hoh ts'iyanaah wheoobuhonulhtun, hedich'oh hubuyun k'ut 'et zeh hukwa' huninzun. ¹⁵ 'Et 'alha ndet yun k'ut whuch'a huzdel, 'et howu nuní hunudeh t'eh, 'et whuz nahutoodelh wule da. ¹⁶ 'Et whunts'ih 'o nus keyah hoonzoo hukwa' huninzun. Njan keyah 'uwhúlhni, 'et yak'uz whuz'ai. 'Et huwa Yak'usda 'en neYak'usda hidáni. 'Ink'ez Yak'usda 'en neYak'usda hiyulhni, 'en 'aw hukwaya chailah, keyah whuti 'et huba lhaóodinla 'et huwa.

Israel hitsuh dedowh, 'en ndi be huba 'alha 'uhoont'ah

¹⁷ Be 'alha 'uhoont'ah, 'i be hoh da Yak'usda Abraham yóolhdzai hoh 'aw 'il-hunuh buye' Isaac Yak'usda bukw'uzdai k'eyilhti 'ink'ez Yak'usda ba yutzel-hghelh ka. Ndet Yak'usda yuts'ú hoozi hoh buye' buts'ah hainde huteldlai, 'et ts'iyawh hóolhchoot. ¹⁸ 'Ink'ez whutsuh 'uja 'en Yak'usda Abraham yudáni, "Isaac 'en bugha nyéinde 'en ts'iyawh whusahátedulh." ¹⁹ 'Et whunts'ih Isaac, 'en Yak'usda bukw'uzdai k'eyítelhtelh whutsuh Abraham whunalnik Yak'usda daja yudáni. 'Et huwa 'et dunínzun, Yak'usda 'en soo 'últus hoh Isaac dazsai t'eh, 'et whunts'ih yahadla tah dinaidutéltilh. 'Ink'ez 'alha 'uhoont'ah, yahadla hanáyalhti li'yinla. ²⁰ 'Ink'ez be 'alha 'uhoont'ah, 'i be ndet ts'iyaintsuk whusaóotekulh ka, Isaac, 'en Yak'usda yoodalhkut, ndunnah Jacob 'ink'ez Esau bulh buts'un wúzoo ka. ²¹ Be 'alha 'uhoont'ah, 'i be Jacob dawhénintsai hoh Yak'usda yoodalhkut Joseph buye'kah buts'un wuzoo ka. 'Et dutuz nichandunuti hoh Yak'usda ts'un teni' nalhdzin. ²² 'Ink'ez be 'alha 'uhoont'ah, 'i be Joseph 'aw 'et buyiz lait'ah whéninle hoh Israel whudune Egypt yun k'ut whuch'a nahutedulh hoh hubugha hubulh yaílhtuk. 'Ink'ez buts'un 'i chah dahítelih, 'et hubudáni.

Moses buba 'alha 'uhoont'ah

²³ Hoh da Moses whuzdli, 'en ski daldzoo, 'et huwa be 'alha 'uhoont'ah, 'i be be'abá 'ink'ez be'ama chah, hubudayi cho daja ni, 'aw hik'una'a cha'inil, 'et k'us tat sanun nduhóolyez 'et be'abá 'ink'ez be'ama 'et nuhínulh'i. ²⁴ Moses 'aw 'et k'enényi hoh Pharaoh butse', 'en buyaz hiyúlhni, 'et be 'alha 'uhoont'ah, 'i be nduhíylhni 'ilhuz ch'a oobunésjoot. ²⁵ 'Et k'us Yak'usda, 'en bulh tube lhat hoontsi' dzuh notezut, 'et whuz na'a Moses 'utahahó'ai. 'Astl'iyaz lubeshi be hootét'i, 'aw 'et ilah 'utahahó'ai. ²⁶ Christ 'en bugha ndunnah Egypt whut'en, 'en Israel hits'uh hainde hubuch'a yahalhtuk. 'Et Moses njan duninzun ndi buch'a yahalhtuk, 'et Egypt whuhubadayi cho daneletsuk sooneya, 'i ts'iyawh ba nus yinzoo ho' 'int'ah. Yak'usda, 'en nts'e na'a hoh hube'ildzun huba k'elhla whutele, 'et huba neóoni'ai, 'et huwa 'et ndúhoont'ah zeh Moses hukwa ités'en. ²⁷ Yak'usda chast'en, 'en whuz na'a 'ants'i ya'en hukw'u na'a 'uja, 'et huwa huba howa whulna whechaítsaz. 'Et huwa be 'alha 'uhoont'ah, 'i be yun k'ut Egypt whuch'a nasja. 'Aw hubudayi cho ye yulh hunilch'e, 'i Moses 'aw yé chaniljut. ²⁸ Be 'alha 'uhoont'ah, 'i be Moses ts'iyaintsuk Yak'usda k'une' 'ust'en. 'Et huwa ndet koo 'uskai be hoodel'en, 'et lizas whutus lhuseya. 'Et huwa koo 'uskai be wheoodutet'en, 'udechoo huwhuzzli, 'en ndun lizas buzoolhghelh ghait'ah. ²⁹ Ndi ya too dusk'un, 'i Yak'usda huba lhch'a 'úyinla 'ink'ez yun whudezgi hoh be 'alha 'uhoont'ah, 'i be hik'ut nanídel. 'Et Egypt ba nehughan, 'en chah huba huntezdel hoh ts'iyawh too hubanghan.

'Uda lhanah huba 'alha 'uhoont'ah, 'i be whuch'a honílhde

³⁰ Be 'alha 'uhoont'ah, 'i be Jericho keyah 'et skwunlai 'o 'at nat dzin 'et whunahudedulh hoh khunyaz hukw'elh'az ndi tse dutai, 'i whunasá'a, 'i nanánkat. ³¹ Be 'alha 'uhoont'ah, 'i be ndun ts'eke 'ul'en, Rahab hiyúlhni, 'en ndunnah Moses ba nunúl'i, 'en bula' tenilh ka bukoo dábuninla. 'Et huwa ndunnah Yak'usda k'unucha'ust'en, 'en 'aw hubulh dachaitsal. ³² 'Aw 'et njan lhe'whultsuk be 'alha 'uhoont'ah k'une' hust'en, ndunnah hulai k'et 'aw ts'iyawh hubugha nuhwhudóosni ghat'ah. Gideon ndet 'uhóonla. Barak 'en chah. Sampson, Jephthah, David, Samuel, 'ink'ez nus whunilh'en, 'en ts'iyawh, ³³ be 'alha 'uhoont'ah, lhelhdun keyah whut'en, 'en chah ts'iyawh buch'a' hunilhde. Ndet ts'ah'un na'a 'uhoont'ah, be 'alha 'uhoont'ah, 'i be 'uhuhónla. Ndet Yak'usda buts'ú hoozi, be 'alha 'uhoont'ah, 'i be bube'ildzun whutele t'ehoninzun. Be 'alha 'uhoont'ah, 'i be Yak'usda ndi khunaiti, lion hiyúlhni, 'i hizek lhts'una' hoonla hubundóolhdah whuch'a. ³⁴ Be 'alha 'uhoont'ah, 'i be kwun dezk'un, 'i chah nahinelhno. Yak'usda ch'a hudemtni, 'en tes cho be hubuhuteghan inle, 'et whunts'ih be 'alha 'uhoont'ah, 'i be buch'a hudemtih. Lahít'ah 'en chah 'i be ulhtus nahusdli. Lhuhutedúghan ts'ih hutezdel hoh 'et chah be 'alha 'uhoont'ah, 'i be hilhtus suli. 'Et whuz na'a hubulh lhúhudughan, 'en chah hubube oonújut hiyida'ai 'et whuz na'a whenábuhananyoot. ³⁵ Be 'alha 'uhoont'ah, 'i be bulunah ts'ekoo bughu yahadla chah zeh dinahudidel 'ink'ez bughu nahundel. 'Ink'ez 'uyoon chah dzuh nubuhulhdeh, 'et whunts'ih be 'alha 'uhoont'ah, 'i be zeh hedich'oh 'aw hubula nahudutetnih hukwa cha'hunízun. 'Et 'o nus hoonzoo hukw'u na'a dinabudutélelh 'et nahohooté'ah. ³⁶ 'Et 'uyoon, 'en bughu hedlo 'et hoh hubuhóolhdzai, 'Et bulunah hubuhoolhtas. 'Ink'ez bulunah tl'oohl be hubuhulhghel 'ink'ez tsak'ebuha'ai. ³⁷ Bulunah tse be hubuhanghan. Bulunah dugwut be buyust'e tánuhídezghut. Bulunah chah tinta' hutet'ilh whuts'un bonalht'uk. Bulunah tes cho be hubuhanghan. 'Ink'ez bulunah ndai khunai zuz, sbai teh, sheep teh, 'i ts'iyawh lhelhyoo zuz 'i zeh be dune hinli. 'Ink'ez 'ants'i hoh nuhadelh. Hik'u khúténa, 'i whunts'i chahuyít'i inle. Dune dzuh nobuhulhdeh. Lhat hoh hoontsi' k'una'a ne'bahalh'en. ³⁸ 'Et ndunt'ah 'aw ndi yun 'i whunts'i huba soo cha'yildzooh. 'Aw dune chahóot'ih 'ink'ez dzulh tah hoh lhelhts'un náhutudulh. Tse 'an teh k'us yun 'an teh, 'et huwhut'i. ³⁹ 'Et ndunnah ts'iyawh be huba 'alha 'uhoont'ah, 'et huwa hoonzoo k'una'a bughi yaintuk. 'Et whunts'ih ndet hubuts'u hoosdzi, 'aw butl'acháhoozulh. ⁴⁰ Whuz na'a nuwheni ts'iyawh nús t'eh, Yak'usda 'o nus hoonzoo neba' 'uhóonla. 'Et whuz na'a ndunnah ts'iyawh nuwheni ts'uholah t'eh, ndet hoh Yak'usda buts'u hoozi, ne'et 'aw ts'ah'un na'a lhadúlya hoole ghat'ah.

12

Neba 'alha 'uhoont'ah, 'i be lhghu naztoolghas

¹ 'Et huwa ndun whudutésnilh, ndunnah hubugha 'un whudani, 'en Yak'usda be 'ut'en k'ah whunéhunulhtun, 'en hulai k'et, nenat nduhóolcho 'ants'i kw'us li'hint'ah. 'Et huwa ndai neba ndaz, 'i k'ah nenilht'uk, 'i 'ink'ez ndi lubeshi 'aw huwa chahoolna hoh nélhghel, 'i ts'iyawh 'un uztoolhdellh. Ndi Yak'usda ba lhghu naztulwus, 'i neba níwhults'ut hoh howa wulnah whunts'i soo cho whulh ts'ooyin hoh uztoolghas. ² Netsuh ts'ih Sizi Gri uznoolh'en. 'Aw 'en zeh neba bé 'alha 'uhoont'ah dant'ah, 'en ts'ah'un na'a whunéhunulhtun 'int'ah. 'Ink'ez ndi yun k'ut usda, 'et ye khuna, 'en nduhóolcho hoh neba 'alha 'uhoont'ah neba lhaoodulh'ih 'int'ah. Nus de ye whúntelhnik, buts'un yékulh, 'et whunts'i lhdulalhgus yulh ínyin inle. Ndai yugha hooya suli, 'i huba 'ants'i 'uhoont'ah inle. 'Ink'ez Yak'usda bukw'usúda cho dezti, 'et nalhni ts'ih nát'l'adeda.

Yak'usda khunek yé nelh yailhtuk, i khun teh 'ants'i nuhwhuba 'oot'e gunih

³ 'Et Sizi daja 'et soo cho hubugha nuní noohzut. 'Et ndunnah lubeshi 'ulh'en, 'en ts'iyawh hich'a detni, 'et whunts'ih soo whechaitsaz. Nuhwheni chah ts'iyawh 'en zeh bughu nuní nahdeh t'eh, 'et 'aw ninoohtsilh ghait'ah 'ink'ez 'aw lait'ah wahle ghait'ah. ⁴ Nuhwheni lubeshi ch'a ne'aht'en, tube nuhwhuba huwa whúlna 'et whunts'ih 'aw hukw'e yachazahdla. ⁵ 'Et Yak'usda khunekti be buye'kah k'una'a nohwhulh 'et whunaoodelhúnah. Ndez na'a nuhMoodihti 'ún whúlhni,

“Suye'kah ndi khunek be nohwhulh yalhtuk, i 'ants'i wúlh'i gunih.

Ndet tinta' aht'ih hukwa' nuhwhúlhni t'eh,
khun teh nuhwhéyuh 'ustl'e' 'oohnneh gunih.

⁶ 'Et ndunnah neMoodihti buk'entsi',
'en ts'iyawh khunekti be hubulh yalhtuk.

Ndunnah buzkehkah hinli,
'en ts'iyawh huboolhtsas.”

⁷ 'Et Yak'usda khunek ulhtus, 'i be nohwhulh yalhtuk, 'ink'ez whulh whecháhtsaz t'eh, 'et t'eh buzkehkah k'una'a nuhwhunulhyeh. 'Et ndan dune simba 'int'ah buye' tink'us 'uja t'eh yuts'ahachahós'al? ⁸ 'Et nuhwheni nehyelh hoh Yak'usda khunek ulhtus, 'i be nohwhulh yalhtuk t'eh, 'ink'ez ts'iyawh whuz na'a 'ilhunuh ts'inli hoh uznezyi, 'et 'aw buk'unucha'zaht'en t'eh, 'aw nuhwhé'abá hoolah, 'ink'ez Yak'usda buzkeh chahlah hoh 'aht'ah. ⁹ Njan 'o 'un chah 'ún whudusni, ndi yun k'ut ne'abákah 'en khunek ulhtus, 'i be neyulh yahalhtuk 'ink'ez buk'úne' ts'ust'en. 'Ink'ez Yak'usda, 'en neyégha be'aBá ts'utni, 'en ne'aBá degha nus dézti 'int'ah, 'en 'o nus butl'a'úzdudoolyelh ts'ah'un na'a ndi yun k'ut uzdutelts'ilh huba. ¹⁰ Ndi yun k'ut ne'abákah 'astl'iyaz zeh hubulh 'uts'int'ah, ndet degha nus neba hoonzoo, 'et t'ehoninzun, 'et whuz na'a khunek ulhtus, 'i be nehunelhyi. 'Et whunts'ih Yak'usda ne'aBá, 'en ndet 'ilhuz wheni neba whutezoo k'una'a khunek ulhtus, 'i be nelh yailhtuk. 'Et 'en k'una'a 'o 'un lubeshi neghu hoolah ts'ooke ka. ¹¹ Nts'e na'a ts'ah'un na'a khunek ulhtus, 'i be nelh yaintuk hoh uznezyi, whulutah teh whuts'uzdutnik, 'et whunts'ih hukw'elh'az 'et whuz na'a uznezyi t'eh, 'et t'eh soo ts'ah'un 'int'ah dune uztele hoh Yak'usda nallh ts'ah'un na'a lhts'un uztet'ilh.

Yak'usda bughunek khun teh bula doohtnih gunih

¹² 'Et huwa 'ants'i ninéhtsai li'aht'ah hoh nuhgan naintle 'ink'ez nuhwhug-wut chah lait'ah suli t'eh, soo 'o 'un 'oohnneh ghait'ah hoh ulhtus naoolhtsilh.

¹³ Nuhke ba ti chah lhk'odez'a naholhtsilh. 'Et whuz na'a ndunnah nuhtah lahít'ah 'en tinch'a hooya ghait'ah, 'et k'us soo hilhtus na'hutedle. ¹⁴ Ts'iyahanah ts'un ts'ah'un na'a lhts'un 'ooht'e hukwa' 'ooht'en. Lubeshi bughu hoolah dune wahle hukwa 'ooht'en. 'Et whu'et, 'aw neMoodihti ts'oo'en ghait'ah.

¹⁵ Soo cho nuhtah nuhwhenich'oh nuhwhulhutsinkah bughohle! Doo ka sih Yak'usda ye unzoo, 'i hiye ghoya. 'Et whuz na'an nduhooja t'eh, 'et bulunah nuhwhutah ntsi' bulh nuni hunuzut wule. 'Et ndihínt'ah t'eh, 'et 'en hubugha lhanah ntsi' bulh nuni hunuzut hutele ho' hoont'ah. ¹⁶ Doo ka sih nuhtah bulunah, 'uyoona ts'ekoo k'us dune bulh lubeshi wulhchoot whuts'u nooht'uk. K'us Esau k'una'a 'en Yak'usda bughohdloh. 'En 'ude-choo whuzdli 'int'ah 'ink'ez ndai be'abá yuts'u yoozi, 'i bube'ildzun yutele, be'abá nahuyoosdzi, 'i didut buts'itekulh, 'i 'uyinla, 'ilhuh yute'ah zeh k'elha yutez'ai. ¹⁷ T'eeonáhzun hukw'elh'az dáhooja. Ndai hoonzoo yuk'eoote'ah hukwa' ninzun, 'et whunts'ih be'abá yuch'a nalhú'a. Lhat hoh huwintse, 'et whunts'ih 'aw be'abá dudení nahudunoo'ah ghait'ah. Nts'oh dát'en whunts'i, 'aw hiba lhk'enaóodoo'ah ghait'ah.

Ndunnah yak'uz húdelhts'i, 'en hubuts'un ts'utelwus

¹⁸ Ndez whuz na'a 'un whudóosni hukwa 'ust'en, ndunnah Israel buzkehkah, 'aw 'en buk'una'a ilah hoh ndi dzulh Sinai* dune yut'aghunah, 'et 'aw whuz chatésyal. Ndi dzulh ndulhcho dezkl'un, 'ink'ez tsahólgus cha' hoont'ah. 'Ankw'us 'aw hoonli honoohl'en ghait'ah, 'ink'ez nilhts'i dus cho chah hoonli. ¹⁹ 'Et Yak'usda ba be ts'újih, 'i chah hidíts'o 'ink'ez Yak'usda yalhtuk, 'et chah hódants'o. 'Et ndunnah yudánts'o, 'aw 'o 'un hidóots'o hukwa cha'hunizun. 'Et whuz na'a hits'u tedudli 'aw 'o 'at huwhudutéts'o hukwa cha'hunizun 'et huwa. ²⁰ 'Et Yak'usda khunek butl'a ída'ai, 'et 'aw whuh hooyen ghait'ah 'et huwa. Khunek njan ndutni, "Khunai whunts'i ndi dzulh yut'agheznai t'eh, 'et t'eh tse be hizóolhghelh, k'us k'aza be hiyooch'ih." ²¹ 'Et huho'en hoh tube whehunelhújoot. Moses 'en whunts'i, "Whenlhujut k'et dulhúduz," ni. ²² 'Et ndi dzulh bugha nuhwhuzdáni, 'aw whuz chatahdullh. K'us ndi dzulh Zion ts'utni, 'i buts'un lhghadahdel. Yak'usda khuna, 'en bukeyah whuti 'ohoont'ah. 'Ink'ez keyah whuti Jerusalem ts'uwhútni, 'et yak'uz whuz'ai. 'Et lizas hulai k'et, 'aw uzdooni ghait'ah. ²³ 'Ink'ez ndunnah Yak'usda huba 'alha' yint'ah, ts'iyanah 'ilhunahuwúdulh huba whuz'ai. Ndun 'udechoo whuzdli 'en oosdzi, 'en ndunnah bube'ildzun yinli, 'en yak'uz ts'ih huboozi 'uk'une'úsduguz, 'en chah 'et húdelhts'i. Yak'usda 'en ts'iyanah ba naheyelh, 'en chah 'et usda. 'Ink'ez ndunnah ts'ah'un na'a lhadúlya, 'en hubuyegha, 'i chah 'et 'int'ah. ²⁴ 'Et Sizi ndi k'an khunek neba lhaíndinla, 'en neba hubéguz unli, 'en chah 'et usda. 'Ink'ez ndi 'uskai neba nadélt'ik, 'i be nelubeshi ts'iyawh neba hoolah suli, 'et nts'e na'a Abel yuzelhghi hoh buzkai yun nadélt'ik, 'i 'o nus hoonzoo néwhunelhtan, 'et chah 'et whuz'ai. Ndi ts'iyawh 'et whuts'un whets'elghaz.

Yak'uz whuts'un nelh yailhtuk ts'oozólhts'ai

²⁵ 'Et Yak'usda nohwhulh yálhtuk, 'et hubugha nohwhulh yalhtuk, khun dah doohtni gunih! Whunulh'en, ndi yun k'ut 'et ndúbulhni, 'et whunts'i 'aw hik'unucha'it'il, 'et huwa hoolhtus hoh huba nahezya. K'an 'et yak'uz whuts'un nelh yailhtuk, 'en buch'a nats'ulhúa t'eh, 'et 'o nus dáwhultus hoh neba nahutedeh. ²⁶ Hoh da Yak'usda hubulh yaílhtuk hoh ndi yun dulduz. 'Ink'ez doo chah zeh nets'ú hoozi hoh njan ndútni, "Doo chah zeh ndi yun dutelduz. 'Aw 'i zeh ilah, yaz chah ndúhoolcho hoh whudútelduz." ²⁷ 'Ink'ez ndi khunek, "Chah zeh," 'utni, 'et ndez na'a néwhunulhtun, ts'iayai ndai 'ulya, 'i ts'iyawh dutelduz. 'Et whuz na'a dullhuk, 'i hoolah whutele. 'Et ndai 'aw ndoollhuk ghait'ah, 'i 'ilhuz wheni 'utet'ih. ²⁸ Nts'oh huwa hoh nts'e Yak'usda hubidayi cho unli, 'et 'aw nughóotnah ghait'ah. 'Et nets'u whutekulh. 'Et huwa ndi ye unzoo, 'i be ts'ah'un na'a hoh Yak'usda, 'en neba dézti 'ink'ez neba be óonujut, 'en huba ne'ts'oott'en. ²⁹ Nuwheni neYak'usda kwun ts'iayai delhk'un, 'i 'et ndunt'ah ho 'int'ah 'et huwa.

13

Ndi yun k'ut lubeshi buch'a nasulhúye

¹ 'Ahoolhyez nuhwhulhutsinkah hubuk'eoohtsi'. ² Ndunnah whutsuh da chabuzeh'en, hoonáht'i hoh nuhkoo dáboohlelh. Bulunah lizas tusih 'uhint'ah, 'aw t'eoonuzahzun 'et huwa. ³ Ndunnah Sizi Gri hunedulh 'et huwa tsak'eoobaha'ai, bunálhúnih 'ink'ez bula 'ooht'en, 'en bulh tsak'edahla lí'aht'ah 'et huwa. Ndunnah be dzuh neoobahalh'en, 'en chah whuz na'a nuhwhubeni tah 'obulhdzun. Ts'iyawh 'ilho yust'e zeh 'uts'int'ah 'et huwa.

* **12:18** 'Et 'udechoo khunek nuwhuba lhaidinla, 'I k'ut whunulh'en, Moses dzulh Sinai nusiya inle, ni ho 'utni. Exodus 19:21-22, 20:18-21, Deuteronomy 4:11-12, 5:22-27

⁴ Lhghuzdelhts'i, 'i ts'iyanah ba' hoont'ah, 'ink'ez whudézti. Lhghu húdelhts'i whu'iz hoh dukw'usti k'ut dawhut'en, 'aw chahóotsi' ho' hoont'ah. 'Et whunts'ih ndan 'uyoona ts'ekoo k'us 'uyoona dune bulh tinta' 'uhut'ih, 'en Yak'usda huba nahuteyeh ho' hoont'ah. ⁵ Nts'e na'a ndi yun delhúts'i huwahli. Ndai k'an 'et aht'i, 'i 'o nus 'uyoo ka daoohtni gunih. 'Et huwa neMoodihti njan ndutni,

"Aw nuhghu toosya ghat'ah,
'ink'ez nuhla doosnih ghat'ah."

⁶ 'Et huwa nedzi ulhtus whé 'uzdooni,
neMoodihti 'en nela 'ut'en 'int'ah.

Dune danehulh'en 'et whunts'ih 'aw chats'unoolhújut.

Ndunnah lhelhts'un na'a nehóodulh'eh, 'en buk'une' 'ooht'en gunih

⁷ Yak'usda ba 'ilhunahuwúdulh ndunnah nuhtsuwhudéhdzulh, 'en bunaoolhúnih. 'En 'uhint'ah Yak'usda bughunek be nohwhulh yáhalhtuk. Nts'e na'a niz dak'ez ndi yun k'ut hudélhts'i da hubulh dáhooja, 'et howu nuní noohzut. 'En hiye 'alha 'int'ah, 'en buk'una'a ne'ooht'en. ⁸ Sizi Gri 'en hulhda, k'an dzin, 'ink'ez 'ilhuz wheni chah, 'et zeh ndunt'ah. ⁹ Lhelhts'un na'a 'ink'ez hoontsi' hukw'u na'a dune hohodulh'eh, 'en huboozólhts'a 'ink'ez buk'une' 'ooht'en gunih. Ndai Lizwif hiya'alh, 'i 'ants'i unli ho' 'int'ah. 'Et ndunnah buk'una'a 'uhut'en, 'aw bula 'uwhudóneh ghat'ah. 'Et huwa ye unzoo, 'i be whuz na'a nedzi yuh dez'ai t'eh, 'aw 'et zeh ts'ah'un 'uhoont'ah. ¹⁰ Nuwheni Sizi Gri buba 'alha' yint'ah 'uyoo Yak'usda bukw'uzdai ts'it'i. 'Ink'ez ndai Yak'usda bukw'uzdai neba k'einkat, 'i ts'oo'ah huba' hoont'ah. 'Et whunts'ih ndunnah Lizwif ndi yun k'ut bun cho but'ah ne'hút'en, 'aw hiyoo'ah ghat'ah, 'aw whuz na'a butl'achahoots'ulh. ¹¹ 'Et náwhulnuk degha nus dezti khunai buzkai, ndet degha nus whudézti, lubeshi ba 'et whuz dainínkai. 'Et ndi khunai buyust'e, dune whut'i, yoo 'az ts'ih hidéhk'un. ¹² 'Et whuz na'a zeh Sizi keyah whuti whunanesdut'l'oo dati 'o 'az ts'ih 'et dzuh nuhiyulhdzut. 'Et hoh dich'oh duduzkai, 'i be Yak'usda ba 'udun neninínla. ¹³ 'Et huwa ts'uwhut'i 'o 'az ts'ih, nts'e Sizi Gri 'int'ah, 'et nuwheni chah 'et 'uts'oot'e. 'Ink'ez nts'e na'a hoh hooya hiyulhtsi, nuwheni chah ts'uhóolhchoot. ¹⁴ 'Et ndi yun k'ut 'aw keyah 'ilhuz 'uwhutet'ilh hoolah ho' hoont'ah. 'Et whunts'ih ndet keyah 'ilhuz 'uwhutet'ilh, 'et whuz de whélts'ulh, 'et zeh hukwa ts'ítés'en. ¹⁵ 'Et huwa Sizi Gri boozi bugha 'ahoolhyez Yak'usda chanailya uzdóoni. 'Et whuz na'a Yak'usda uzdóolhti. ¹⁶ 'Et hoonzoo 'uwhulh'en 'ink'ez ts'iyawh 'ilho lhula' daht'en, 'et khun whunaooodoohlúnah gunih. 'Et whuz na'a Yak'usda bugha whut'ah, ts'iyawh 'et tube hóont'i. ¹⁷ Nuhtsuwhudéhdzulh, 'en hubuk'une' 'ooht'en 'ink'ez hubutl'a' dudoohlúyelh. 'En nuhzul nuhwhuba ghuhindli 'uhint'ah 'et huwa. 'Ink'ez nts'e na'a nuhwhuba highunli, 'et hube 'ut'en whugha Yak'usda but huteyin. 'Et huwa soo ts'ah'un na'a niwhúnah'ah. 'Et whuz na'a ndaht'en t'eh, 'et ndunnah whutsuh whudéhdzulh huhót'i hoh Yak'usda ba nuhghú hoole huba' hoont'ah wule. Khun teh nuhwheni nuhgha khunani wahle gunih. 'Et ndaht'en t'eh, 'et zeh nuhwhuba whutézoo.

Neba tenadoohdli

¹⁸ Ts'ah'un na'a t'ets'oninzun neyuh ts'ih bugha t'ets'oninzun, 'i 'aw hoonliyaz hoontsi' bugahah hoolah. Whuz na'a zeh ts'otétun hukwa 'uzninzun. Whuz na'a neba tenadoohdli. ¹⁹ 'Et 'o 'un chah nuhtsuwhudéhdzulh, suba tenadoohdli, 'et sih 'aho Yak'usda nuhts'ó tl'anasoolhtelh.

Ye unzoo, 'i nohwhulh 'óot'e

²⁰ 'Aw 'et Yak'usda 'en be nedzi ts'ah'un 'oot'e negha óoni'ai, 'en neMoodihti Sizi Gri buzkai be neba nadélt'ik, 'et huwa yahadla tah dinaidilhti. 'En

sheep għunli ncha 'int'ah. 'Ink'ez ndi 'uskai 'i be 'ilhuz wheni khunek neba lhaídinla, 'i ho' 'int'ah. ²¹ 'Et Yak'usda soo ts'ah'un na'a lhadulja nuhtel-htsilh, 'et whuz na'a nuhwhuba tenadutesdli. 'Et hoh Yak'usda nts'e na'a nuhts'u hukwa' ninzun, 'et ts'iyawh huba 'uwháhla. 'Ink'ez ndai Yak'usda Sizi Gri be'et nuhwhuba 'uwhulħen, 'et 'uhóonla t'eh, 'et nduhóolħcho hoh hootét'. ²² 'En zeh 'ilhuz wheni buba ts'odóolhti. 'Et ndoh honeh. ²² 'Et sulħutsinkah, soo cho nuhts'u tédu slih ndi khunek 'i be nus nōoħt'uk, 'i ts'iyawh soo cho óozelħts'ai 'ink'ez nuhwhuba 'alha 'oot'e. 'Et whunts'ih 'aw lhat 'uk'echá'iduguz. ²³ Nelħutsin Timothy tsak'esda, 'en 'aw 'et tinánja, 'et t'ewħunoohzeh hukwa' nuszun. 'Et 'aho whusanája t'eh, 'en bulħ nuhts'un tadút'us. ²⁴ Nuhtsuh whudélhdzulħ chah, 'ink'ez dune Yak'usda bube'ildzun, 'en chah suba dahooja budóħni. Yun k'ut Italy whut'en, 'en chah dahooja nuhuwhútni. ²⁵ Nuhwheni ts'iyawh ndi Yak'usda ye unzoo, 'i noħwhulħ 'oot'e nuhwhuba hukwa' nuszun. 'Et ndoh honeh.

James Ndi Dustl'us Yuk'e'ánguz

Ndunnah Lizwif huba 'alha' hoont'ah James dahooja hubulhni

¹ Si James, Yak'usda 'ink'ez neMoodihti Sizi Gri ba 'ulhna usdli. Nuhwheni Lizwif, ndunnah Sizi Gri huba 'alha' 'uhint'ah, nuhwhukeyah nuhwhuch'a nuhwhuts'unézyoot ahli, ndi dustl'us nuhts'ó k'e'ezges, 'i be dahooja nuhwhudúsni.

Dzuh nahudeh huwa hohóodul'eh

² Sulhutsinkah lhat hoh lhelhts'un na'a dzuh nahzut t'eh, 'et whunts'ih hoonah'ti hoh whuz na'a zeh 'ooht'e. ³ T'ewhunáhzun nts'e na'a Yak'usda but'aninehtan hoh lhelhts'un na'a dzuh nahzut, 'et whunts'ih soo ulhtus hoh nudoolhúya, 'et whuz na'a hodoolhú'eh. ⁴ 'Et whunts'ih nts'e na'a Yak'usda ba ulhtus sahli, 'et 'alha' soo ts'ah'un na'a ts'iyawh hodoolhú'eh. 'Et t'eh Yak'usda ba lhadúlya wahle. 'Ink'ez soo ts'ah'un na'a 'ut'en k'ah lhaóodahla. 'Et whuz na'a Yak'usda ba hoonliyaz whu'et cha'áhnil. ⁵ 'Et nuhwheni bulah Yak'usda be whútnih 'aw ts'iyawh chaht'ih t'eh, 'et sih Yak'usda hika hiyoodolhkut. 'Et ndan hika hiyoodulhkut, ye dinzoo 'i bugha íte'ah. 'Ink'ez 'aw hooya huboolhtsilh ghait'ah. ⁶ Ndun hiyoodulhkut, bé 'alha' hoont'ah 'i be hiyoodolhkut. Khun teh huba nawh 'uhot'e gunih. 'Et ndun ba nawh 'ohoont'ah, 'en nts'e na'a nilhts'i too hubulh nudutun li'hint'ah. ⁷ 'Et huwa ndunt'ah dune khun teh neMoodihti 'aw hoonliyaz bugha óote'ah hunoozin gunih! ⁸ Ndunt'ah, 'en 'ahoolhyez nawh 'uhet'ilh hinli.

Hoonzoo 'int'ah 'ink'ez tehul'en chah Yak'usda ba lhgha zeh 'uhint'ah

⁹ Ndun nelhutsin tehul'en, 'en Yak'usda dune degha nus ncha yulhtsi, 'et huwa huhót'i huba' hoont'ah. ¹⁰ 'Et whunts'ih soo de'a 'int'ah duzooneya be nduk 'ududildzun, 'en Yak'usda yuk na'yinla, 'et huwa hót'i huba' hoont'ah. 'Et t'ewhunónzin nts'e na'a 'indakyaz dátsaih, whuz na'a zeh ye soo de'a 'int'ah, 'i bugha khoona ghait'ah. ¹¹ 'Et sa ha'ahih teh 'i be tube whunizulh. 'I be 'indak chun dugih teh, bindak nakuk. 'Et lhe'ildzoo nduwhút'en 'et whunts'ih hoolah 'ulhih. 'Et whuz na'a zeh ndunnah soo de'a 'int'ah 'awhuz dude 'ut'en 'uhulh'en hoh dich'oh whunts'ih huhoolah hutele.

Dzuh nuts'uzut 'et whunts'ih Yak'usda buk'ets'intsi'

¹² Ndán ts'óolhdzih, 'et whunts'ih 'awhuz whechaítsaz, 'en degha nus hoonzoo hubugha whutelts'ulh. 'En 'int'ah 'ilhuz ye khúténa bughá whunt'ai. Ndet whuch'a' nílhde, 'et chah hubugha whútelts'ulh. Ndun neMoodihti yuk'entsi', 'et whuz na'a buts'ú hoozi. ¹³ Ilhunuh lubeshi ts'unínt'uk t'eh, khun teh Yak'usda sóolhdzih dooni gunih. 'Aw Yak'usda ntsi' be ólhdzih ghait'ah. 'Ink'ez dich'oh chah whuz na'a zeh 'uyoon hoontsi' ts'ih bunoolht'uk ghait'ah. ¹⁴ 'Et whunts'ih nuwheni 'ilhunuh ts'inli hoh nuwhenich'oh hukwa' uzninzun, 'et huwa lubeshi 'utztelh'ilh ts'ih whuts'únnint'uk. ¹⁵ Nduts'ut'en t'eh, 'et nts'e na'a hukwa' uzninzun k'una'a hoh lubeshi 'uts'ulh'ih, 'et lubeshi whe'whudit'en. 'Et lubeshi 'uts'ulh'en t'eh, 'et 'i bugha dats'útsaih. ¹⁶ Sulhutsinkah nuwhuk'esi', nanooh'tah gunih! ¹⁷ Ne'aBá, 'en yak'uz be whét'en, 'i ts'iyawh 'uyinla. Ndi be whét'en, 'i whulutah teh 'uts'un na'a na'ut'ih 'ink'ez tsakwúts'it li'whulh'ih. 'Et whunts'ih ne'aBá 'aw nawh 'uninzun unli ilah. 'Et huwa ndai ndus de negha whúninla, 'et unzoo 'ink'ez soo ts'ah'un 'ohoont'ah, 'i ts'iyawh 'en zeh buts'un ha whúkat ho' hoont'ah. ¹⁸ Nts'e na'a dich'oh hukwa' ninzun, 'et whuz na'a 'uja hoh ndi

khunek 'alha' 'int'ah, 'et 'i be doo chah ts'uwhuzdli. 'Et whuz na'a ndúhooja ndai 'uyalh'en, 'i hubutah 'et hoh nuwheni 'udechoo bube'ildzun ts'uzdli.

'Ilhunuh ahli hoh soo cho 'udoohsts'o

¹⁹ 'Et huwa sulpatsinkah nuwhuk'esi', 'ilhunah ahli hoh Yak'usda bughunek soo cho doohts'o. Sayaz hukw'u nuní nulhzut k'an zeh yatulhtih. 'Et khun hunoolhúch'eh gunih. ²⁰ Whuzáhke t'eh, Yak'usda ye ts'ah'un na'a 'int'ah, 'aw whuz na'a buk'une' 'ooht'en ghait'ah.

Yak'usda bughunek buk'une' aht'en 'ants'i oozélhts'ai ilah

²¹ 'Et huwa ts'iyai whudutsun k'una'a ne'aht'en, 'ink'ez lhat hoh tink'us na'a ne'aht'en, 'et 'i ts'iyawh whula doohtnih. 'Ink'ez Yak'usda bughunek nuhyudández, 'i nuhdzi yuk úlhdzun hoh wúlhchoot. Ndi khunek 'i be zeh nuhtelhyih. ²² 'Et nuhwheni Yak'usda bughunek daja ni, 'et whuz na'a buk'une' 'ooht'en. 'Ants'i oozélhts'ai ilah. 'Et ndaht'en t'eh, nuhwhenich'oh na'dunaht'ah hoh aht'en. ²³ 'Et ndun ndi khunek 'ants'i hidits'o 'et whunts'ih chayúlhchoot, 'en ndunt'ah, 'en 'uhint'ah, ndai be na'uzdunul'en 'i be na'hundunul'en, whuk'ah ts'ih 'uhint'ah. ²⁴ Dich'oh na'dunul'en, 'ink'ez 'et nts'e na'a nul'en, 'et 'aw 'et whunaoodilnah. ²⁵ 'Et whunts'ih Yak'usda bughunek lhaóodinla, 'i be lubeshi ch'a nanenilhti, ndunnah 'en soo cho hik'eyalhtuk 'ink'ez whunachahodulhúnah, 'ink'ez daja ni 'ahoolhyez hukw'úne' hut'en t'eh, ndan nduhut'en, 'en 'et whuz na'a dude 'ut'en k'ah huwa degha nus hoonzoo hubugha whutelts'ulh. ²⁶ Ndun nuhtah Yak'usda ba ne'hut'en huninzun, 'et whunts'ih 'aw bughunek bugha cha'oolih, 'et dich'oh zeh na'hundunut'ah. 'Et 'ants'i 'et ndunt'ah Yak'usda ba hut'en, 'et 'aw hoonli chahóolah. ²⁷ 'Et nts'e na'a ts'ah'un 'ohoont'ah, 'ink'ez 'alha' 'ohoont'ah hoh Yak'usda ne'aBá, 'en ba né'ts'ut'en, 'et njan dúhoont'ah: ts'unah 'ink'ez tsandeh, 'en dzuh nahudeh huwa buzih nuts'oodelh huba' hoont'ah bula ts'oot'en ka. 'Ink'ez ndi yun k'ut dawhút'en lubeshi 'ul'en, 'i bugha dutsun wahle gunih.

2

Khun teh 'ilhunuh, 'en 'uyoona nus unzoo ho' 'int'ah noohzun gunih

¹ Sulhutsinkah, neMoodihti Sizi Gri whudézti, 'en nuhwhuba 'alha 'int'ah, 'et huwa khun teh 'ilhunuh 'uyoona nus unzoo noohzin gunih. ² Khunyaz tulih 'ilhunuh dune nuhluglez nuhwhughut danínya hoh lande'ai dézti, 'i nidelya, 'ink'ez naih unzoo, 'i be dune unli. 'Ink'ez 'et zeh 'uyoona dune, 'en chah yunéyalh. 'En tel'en 'int'ah, 'ink'ez bunaih untsi', 'i be dune unli. ³ 'Et ndan bunaih unzoo hoonáht'i hoh, "Njan hoonzoo sinda," dahni. 'Et ndan tel'en, 'en 'udahni, "Ants'i njan yun neke zih sinda, k'us 'ants'i hoh sinyin." ⁴ 'Et whuz na'a ndaht'en t'eh, 'et 'alha nuhwheni 'ilhunuh 'en 'uyoona nus unzoo nahzun. 'Et whuz na'a nuhwheni untsi', 'i be 'uda huba nahuzáhya. ⁵ Sulhutsinkah nuhwhuk'esi', soo zúlhts'ai. Ndi yun k'ut t'ehul'en, ndan Yak'usda k'entsi', 'en 'utahábanla huba 'alha' hoont'ah 'i be soo hude'a 'int'ah hubulhtsi. 'Aw ndi yun k'ut be 'uts'int'ah ilah. 'Ink'ez nts'e Yak'usda hubudayi cho unli, ne'aBá yit'i, 'i hubugha ítelelh 'et 'i hubugha ítekulh. 'Et whuz na'a zeh ndan yuk'entsi', 'en chah hubugha ítelelh. ⁶ 'Et ndan tel'en nuhghu ninya hoh buts'u dudelhúti. 'Et whunts'ih soo de'a 'int'ah, 'en hoontsi' hukw'u na'a ne'nohwhuhulh'en. 'Ahoolhyez nahéyelh but nenóhohugus. ⁷ Ndi boozi unzoo, 'i be nuhwhúlhni, 'alha 'i hich'a yalhtuk. ⁸ 'Et Yak'usda nehubudayi cho, ndi bughunek netl'aída'ai, 'i neba 'uk'e'ánguz, 'et njan ndutni, "Nts'e na'a nuhwhenich'oh k'enadahtsi", 'et whuz na'a zeh 'uyoona nus unzoo ho' 'int'ah noohzun gunih. ⁹ 'Et nduht'en t'eh, 'et soo' hoont'ah.

whunts'ih 'ilhunuh 'uyoona 'o nus unzoo nahzun t'eh, 'et lubeshi 'ahla hoh 'aht'ah. 'Et whuz na'a ndi Yak'usda bughunek netl'aída'ai, 'i whunówhunulhtun khunek k'unyis ahli. ¹⁰ 'Et ndi Yak'usda bughunek netl'aída'ai, 'i ts'iyawh buk'une'ts'ut'en 'ink'ez hoontsolyaz k'uzninyuz t'eh, 'et ts'iyawh k'uzninyuz ho' hoont'ah. ¹¹ Ndun 'et nendulhni, "Dune k'us ts'eke bulh tinta' 'ooh't'en gunih." Njan chah 'et ndutni, "Dune soolhghelh gunih." 'Et njan dúhoont'ah, 'uyoona 'at bulh tinta' cha'ínt'il t'eh, 'et whunts'ih dune sílhghih t'eh, 'et ndi Yak'usda bughunek netl'aída'ai, 'i ts'iyawh k'unyiyuz ho' hoont'ah. ¹² 'Et huwa Yak'usda bughunek netl'aída'ai, 'i be lubeshi ch'a nenilhti, 'aw 'et nilhdukw hoh 'i be nuhwhuba nahutedeh noohzin. 'Et huwa 'et whuz na'a nuhwhenich'oh lhutah ts'ah'un na'a lhulh yaoolhútuk, 'ink'ez whuz na'a zeh ne'óoh't'en. ¹³ 'Et huwa ndet dzin tele neba nahutedeh whusawhútels'ulh, ndan 'ugha tech'a'nízun, 'en bugha tech'a'nídzun hoh Yak'usda yuba nahuteyeh. 'Et ndan 'uyoona bugha té'ninzun, 'en Yak'usda yugha te'untézeh hoh yuba nahuteyeh.

Be 'alha 'ahoont'ah, 'i 'ut'en unzoo be'et t'eh, 'aw hoonli cha'hóolah ho' hoont'ah

¹⁴ Sulhutsinkah, ndan dune 'utni, "Be 'alha 'ahoont'ah 'ust'i," 'et whunts'ih Yak'usda 'aw yuk'únucha'ust'en t'eh, 'i 'aw huba cha'hóozoo hoh 'ahoont'ah! 'Et ndunt'ah be 'alha 'ahoont'ah soo butelhyih nahzun ih? 'Awundooh! ¹⁵ 'Et nelhutsinkah k'us neulhtuskah naih chahít'i, k'us k'an 'et dzin huba whúnts'i, 'aw hiyoo'ahl, chahít'i t'eh, ¹⁶ 'et 'ilhunuh nuhwheni nuhtah ndo búlhni, "Soo óoh't'e. Noohzul. Soo cho na'ooht'ahl." 'Et whunts'ih ndai hoonli hiye ndunidzit, 'i 'aw hiye bula cha'áhníl t'eh, nts'e na'a nuhwhuba whutézoo? 'Aw khunek zeh hik'ekhóona ghat'ah. ¹⁷ 'Et whuz na'a zeh dune ndutni, "Be 'alha 'ahoont'ah ust'i," 'et whunts'ih Yak'usda 'aw yuk'unucha'ust'en t'eh, 'aw hoonliyaz chailah. ¹⁸ 'Et whunts'ih 'ilhunuh tulih ndez na'a njan ndúsudooni, "Nyun be 'alha 'ahoont'ah int'i, 'ink'ez si 'ut'en 'ust'i." Ndint'en t'eh, 'aw 'et nye 'ut'en be'et be, be mba 'alha' hoont'ah whusuníltun, 'et t'eh si chah se' 'ut'en be, 'i be suba 'alha' hoont'ah whunyunoolhtun. ¹⁹ 'Et chah sudóni, "Yak'usda 'ilhunuh zeh 'int'ah." 'Et mba 'alha' hoont'ah, 'et huwa 'ut'en unzoo, 'i 'ilh'en. 'Et whunts'ih ntsi' nudude, 'en whunts'i 'et whuz na'a huba 'alha 'ahoont'ah hoh nujut bulh hudulduz. ²⁰ 'Et nyun tube whuzinik! 'Awhuz ih t'eónuzínzun? 'Ut'en bu'et t'eh, 'et t'eh ndunt'ah be 'alha 'ahoont'ah, ndi yun k'ut 'aw hoonli chailah hoh 'ahoont'ah. ²¹ Ndez na'a njan nduhooja, netsuh da, Abraham, 'en buye', Isaac, 'en Yak'usda bukw'uzdai k'eyilhti, Yak'usda ba yutuzelhghelh ka. 'Et huwa dude 'ut'en be ts'ah'un dune suli. ²² Soo ts'ah'un na'a t'ewhunonze, Abraham be 'ut'en k'ah, be 'alha 'ahoont'ah, 'i be 'uja. 'Et be 'ut'en k'ah huwa, be 'alha 'ahoont'ah soo ts'ah'un na'a lhadúlya suli. ²³ 'Et Yak'usda bughunek daja ni 'en bugha, 'i ts'iyawh 'uhóonla. Ndez na'a njan ndutni, "Abraham 'en Yak'usda yuba 'alha' 'int'ah. 'Et huwa Yak'usda ts'ah'un dune inli," yúlhni. 'Ink'ez Yak'usda bulh t'eke yudéti suli, hiyúlhni. ²⁴ Soo cho whunoohl'en, 'aw be 'alha 'ahoont'ah bugha zeh ilah hoh ts'ah'un dune ts'ulhlhiih. Ne'ut'en 'i bugha zeh chah. ²⁵ Ndun lubeshi 'ul'en, Rahab hiyúlhni, 'en dich'oh dude 'ut'en k'ah huwa, dune nahl ts'ah'un 'int'ah suli. 'Et ndez na'a ndúja, ndunnah Joshua ba khunek na'a, 'en dabúninla hoh 'et hukw'elh'az 'udun titi tinaóobuninla. ²⁶ 'Et huwa njan dúhoont'ah, neyust'e neyégha bughi yoolah t'eh, 'aw khoona ghat'ah. 'Et whuz na'a zeh be 'alha 'ahoont'ah, 'ink'ez ne'ut'en k'ah chah bughi yoolah t'eh, 'et be 'alha 'ahoont'ah 'aw hoonli chahóolah.

3

Neghunek bughu chats'ilah t'eh

¹ Sulhutsinkah nuhtah khun teh stalhanah dune hodulh'eh wahle hukwa 'ooht'en gunih. Nuwheni hodulhú'eh, 'et 'o nus hooncha hoh neba nahutedeh 'et huwa. ² Lhat hukw'u na'a lubeshi 'uts'ulh'en 'et huwa. 'Et dune dich'oh bughunek be 'aw lubeshi chaílhchulh t'eh, 'en dune soo beni lhadúlya suli. Buyust'e dulhcho hoh ts'ah'un na'a né'yulh'en 'et huwa. ³ Njan howu nuní noohzut, ndi yeztli buza yant'uk, 'i buza ts'uyulih t'eh, nts'oh tula núznulht'i, buyust'e hoh túne' 'ut'en. ⁴ Njan 'et chah howu nuní noohzut, ts'i cho ncha, 'i be ts'ekelh 'ink'ez tube nilhts'i t'eh, hoh teh nulhts'i. Nts'oh tatsi dalcho 'et whunts'ih niz chos lhe'ítolsol, 'i 'et whunts'ih yuk'úne' 'ut'en. ⁵ 'Ink'ez netsoola lhe'ultsol, 'et whunts'ih hooncha howu yalhtuk. 'Ink'ez whunulh'en, kwunyaz dik'ah teh, dáwhulcho chuntah be whúdutek'un ho' 'uhoont'ah. ⁶ Netsoola 'ants'i kwun li'int'ah. Ndai khunek ts'ah'un na'a chaít'ah be yats'ulhtuk, 'i be dubih. 'I be ndulcho neyust'e tinta' yulh'ih. Ndi yun k'ut neyust'e whuts'u nint'uk, 'ants'i kwun k'una'a hoolhtus whulhtsih. 'Ink'ez netsoola 'i kwuncho yuh whumoodih, 'en be dik'ah. ⁷ 'Et ndi yun k'ut khunai lhelhyoo dedowh, dut'ai, ndai yun k'ut núlh'as, 'ink'ez ndai toot hoonli, 'i chah, nuwheni ndi yun k'ut dune, 'i ts'iyawh k'une' ts'ooll'en huba' hoont'ah. ⁸ 'Et whunts'ih 'aw 'ilhunuh netah whunts'i, khunek be yats'oolhtuk, 'i 'aw k'une' ts'uhol'en ghait'ah. 'Ahoolhyez bé hoontsi' tune' uzduni, 'aw 'ustl'e 'uzdóoneh ghait'ah. 'Et neghunek poison li'int'ah, 'i be 'uyoon ts'ughan li'ts'ut'en. ⁹ Nezek be Yak'usda ne'aBá tube cho buba ts'odélhti. 'Ink'ez 'i be zeh nelh dune hubézduyih, 'en Yak'usda duk'una'a 'obinla 'ink'ez. ¹⁰ 'Et whuz na'a zeh nawh k'una'a yats'ulhtuk. Whulutah hoonzoo k'una'a neuzduni. 'Ink'ez whulutah hoontsi' hoh tuné' uzduni. Sulhutsinkah 'et 'aw whuz na'a cha'hóst'e huba' hoont'ah. ¹¹ Too unzoo, 'i 'ink'ez too ntsi' 'aw 'ilho haóoli ghait'ah. ¹² Sulhutsinkah, ndi duchun fig hiyulhni, 'i bumai olive chah buts'u haínooyeh ghait'ah. 'Ink'ez mai chun, 'i chah 'aw bumai, fig hiyulhni, buts'u haínooyeh ghait'ah. 'Et whuz na'a zeh ya too, 'i 'ink'ez too unzoo, 'i bulh 'aw 'ilho haóoli ghait'ah.

Yak'usda ye whunih 'ink'ez netsudule ye whunih

¹³ Ndán nuhtah whunih dune unli 'ink'ez lhat nt'eooninzun? 'Et ndunt'ah hoonzoo k'una'a nuhtah dune wule. 'Et whuz na'a bube 'ut'en k'ah whunih be 'ink'ez yuh 'ududildzun 'i be 'utet'ih ho' hoont'ah. ¹⁴ 'Et whunts'ih nuhwheni degha nus lhghe 'oolhúnih 'aht'ah, 'ink'ez 'ahoolhyez 'uk'une' dut'en hukwa' nahzun. 'Et whuz na'a nuhdzi yuh whudez'ai t'eh, 'i be 'óont'e' be howu yaoolhtuk gunih! Ndet khunek 'alha' 'int'ah, khun teh hubugha hóhts'it gunih. ¹⁵ Ndi be whútnih, 'aw ndus de hachadilts'ulh. K'us ndi yun k'ut hiye whunih, 'i 'int'ah. Nts'e na'a neyust'e whuts'u nint'uk hukw'u na'a 'uhoont'ah. Ntsi' nududeh, 'en ye whunih, 'i 'int'ah. ¹⁶ 'Et nts'e 'uhoont'ah dune lhghe' hoolnih 'ink'ez 'ahoolhyez dich'oh zeh k'ununi hunudzut, 'et whuz na'a ts'iyawh huba whe' hoont'ah hooyah dawhútenilh simba, 'ink'ez ts'iyaintsuk hoontsi' hoh 'uwhahulh'en. ¹⁷ 'Et whunts'ih ndus de be whutni, ndez na'a njan ndut'en, 'udechoo, 'i netsun hoolah neilh'i, nedzi dezghel yulhtsi, 'ink'ez nagoosdliyaz né'ts'ut'en. 'Et hoh 'uyoon hukwa' huninzun k'una'a bugha ts'úwhunle. Be te'nuzzun, 'i be uzdutébun, 'uyoon ba 'ut'en unzoo, 'i 'uts'oolh'en, ts'ianah lgha zeh nebuts'oolh'en, 'ink'ez 'aw nawh cha'ts'unizun hoh ne'ts'oot'en. ¹⁸ Ndunnah 'uyoon bugha ts'ah'un 'uhoot'e 'et huba hukwa' huninzun, 'i bube 'ut'en bugha ts'ah'un na'a huba ne'hoot'en. 'Et sih lhanah ts'ah'un na'a lhts'un 'uhútet'ilh.

4

'Ududelhúti 'i be dune lhtah huwhulyih

¹ Nuhwheni nuhtah di ka ts'iyawh lhenah lhutah 'udahnih, 'ink'ez lhéhdulh? 'Et nts'ez de hawhélts'ut ho' hoont'ah? Ts'iyahanah duk'una'a hukwa' huninzun, 'et whuz de hawhélts'ut ho' hoont'ah. ² Tube hoonliyaz hukwa' nuhzun 'et whunts'ih 'aw chawháht'ih. 'Et huwa dune sulhghih. Dune ghe' 'oolhúnih 'et whunts'ih ndet hukwa' nahzun 'aw chawháht'ih. 'Et huwa ts'iyawh lhenah lhutah 'udahnih 'ink'ez lhedáhdulh, 'ink'ez Yak'usda buts'un 'aw buka cha'yooduzulkut, 'et huwa 'aw chawháht'ih. ³ Yak'usda buka yoodulhkut 'et whunts'ih 'aw nuhghá yo'ahlh ghaít'ah. Hoontsi' hukw'u na'a buka yoodulhkut 'et huwa. 'Ants'i nuhwhenich'oh nuhwhuba hoonzoo hukwa' nahzun teh, bé ne'teht'en, 'et huwa 'aw nuhgha yóo'ahlh ghaít'ah.

⁴ Nuhwheni dune 'ink'ez ts'ekoo lhulh tinta' aht'ih lí'aht'ah, soo zélt's'ai, ndi yun k'ut hoontsi' túne 'aht'en, 'et zeh hoonáht'i t'eh, 'et 'alha' Yak'usda ch'a dehnti ahli. 'Et huwa ndunnah ndi yun k'ut hoontsi' tune' tet'en hukwa' huninzun, 'en Yak'usda ch'a detni na'hududulhtsi. ⁵ Yak'usda bughunek 'ants'i 'et cha'dusnih hoh njan ndutni, "Ndoni neyudinda, 'en tube cho 'uyoon neba ka cha'nizun." ⁶ 'Et Yak'usda lha'un ye unzoo, 'i negha íni'ai, 'et huwa ndez na'a bughunek njan ndutni,

"Ndunnah 'ududélti,

'en Yak'usda ch'a detni 'int'ah.

'Et whunts'ih yuh údudildzun,

'en ye unzoo, 'i bugha yú'ah ho' 'int'ah."

Be yuh 'uzdudildzun, 'i ndi yun k'ut hoonli zeh ghu nuni uznuzut t'eh, 'aw netsudule nech'a 'oolhdeh ghaít'ah

⁷ 'Et huwa Yak'usda 'en zeh butl'a' uzduooltelh. Netsudule, 'en buch'a uzdetni, 'et t'eh nuhghu nátsitelyalh. ⁸ Yak'usda beghah ninahya t'eh, 'et t'eh Yak'usda didut chah nuhghah niteyalh. Nuhwheni tinta' 'uhut'ih, 'et whuch'a nuhla tóonahgus. Nuhwheni nawh nanínahdeh, nuhdzi butsun hoolah naoolhtsilh. ⁹ 'Et dáhja, 'et nuhwhenich'oh tube cho yuh 'ududoohlúdzin! 'Ink'ez howuni 'oohle! Ndet hoontsi' howahdloh, 'et 'ustl'e 'udoohneh, 'et huwohtso! Ndi nuhwhuba whunenik tune' 'aht'en, 'i ts'iyawh whuladoohtnih, 'ink'ez nuhdzi undooda. ¹⁰ NeMoodihti bubut yuh 'ududoohlúdzin, 'et sih nawhudóolhti.

Newhulhutsin buts'un nahonyeh gunih

¹¹ Sulhutsinkah lhuch'a yaoolhtuk gunih! Ndán dulhutsin duch'a yalhtuk 'ink'ez yuba nahezya t'eh, 'en Yak'usda bughunek netl'aída'ai, 'i yuch'a yalhtuk hoh 'utni. 'I 'o nus unzoo na'dunúdzun. 'Et ndint'en t'eh, 'aw Yak'usda khunek netl'aída'ai, 'aw kw'unucha'zint'en, Yak'usda k'una'a naheyelh 'int'ah na'dunínzun. ¹² 'Aw 'ilhunuh zeh 'int'ah ndi khunek netl'aída'ai. 'Aw 'ilhunuh zeh dune hubulhyis k'us kwuncho yuh ts'ih hubutelh'ah. 'Et huwa ndan inli na'duninzun hoh 'uyoon ba nahanyelh?

Bunt'ah nts'oh datánt'ilh 'et huwe' dudelti howu yaoolhtuk gunih

¹³ 'Ink'ez nuhwheni ts'iyawh sih soo zélt's'ai. Bulunah ndez na'a tulih njan ndudóohtni, "K'an dzin k'us 'om bun tulih nts'un keyah ts'utedulh. Whuz 'ilhuh naooduzuk 'et 'uzdutélt's'ilh, whuz sih sooneya lhai 'uts'ooleh." ¹⁴ 'Et whunts'ih bunt'ah 'aw dawhútenih t'eónuzáhzun. Be kháhna, 'i ndai ho' 'int'ah? 'Ants'i lhut li'int'ah. 'Astl'iyaz ndoh hoh nudúdeh, 'ink'ez hoolah 'ulhih. ¹⁵ 'Et k'us ndez na'a njan ndudóohtni huba' hoont'ah, "NeMoodihti hukwa' nizun, 'ink'ez 'awhuz ts'ukhuna, 'et t'eh ndi k'us ndai, 'et whuz na'a njan díztenilh." ¹⁶ 'Aw 'et nuhwheni 'ududélti ndet 'ududelti be yalhtuk, 'et

ndi ts'iyawh hoontsi' ho' hoont'ah. ¹⁷'Et huwa ndan t'ehoninzun ts'ah'un na'a ne'hoot'en huba' hoont'ah, 'ink'ez nduchahúst'en t'eh, 'et sih huba lubeshi hoonli.

5

Nuhwheni soo deh'a, ndunnah tehul'en hube soo de'at 'et huwa nuwhuba nahutedeh

¹ 'Et nuhwheni soo deh'a 'aht'ah sih soo zúlhts'ai. Dawhultsi' nuhts'u whekulh, 'et huwa tube cho ahtso 'ink'ez 'alhúdzul. ² Be soo deh'a, 'et ts'iyawh holhjut. Nuhnaih 'i whunts'i, 'i chah musdzoombai ts'iyawh ya'al. ³ Nuhwhugold 'ink'ez silver 'i bulh, 'i ndulhcho k'una'didutsan. 'Ink'ez ndi k'ena'didutsan, 'et hoh nahuhoote'ah dant'ah ahli. Ndi ndai kwun hoolah ilh'i, 'i, 'et whuz na'a ndaht'en tinta' nuhtéhl'ilh. 'Et dek'elh'az dzin 'et huba 'uwháhla! ⁴ 'Et ndunnah tl'o nuhwhuba nalhdzooh, 'en chah ts'iyawh hube whulhts'it. 'Et huwa nuhch'a tsó yahalhtuk. 'Ink'ez ndunnah nuhwhuba whut'as, 'en chah whuz na'a zeh 'ubulh'en. 'Ink'ez Yak'usda, ndun ts'iyaintsuk whuMoodih unli, 'en nuhch'a khunahudútso hoh ts'iyawh hubudánts'o. ⁵ Nuhwheni soo de'a 'unaht'ah, ndi yun k'ut hoonah't'i zeh 'uwhulh'en, 'ink'ez hoonzoo hukw'una'a zeh dune ahli. 'Et nuhwheni 'et ts'iyawh hukwa' nahzun tune' aht'en. 'Et nts'e na'a musdus nats'utuzelhghelh teh whutsuh 'et naznulhk'ah, 'et whuz na'a zeh nuhwheni chah 'et ndaht'en. ⁶ Ndunnah ts'ah'un na'a 'uhut'en, 'en nuhwheni hubuk'éwhah'ai, 'ink'ez 'et ubahghan, 'et whunts'ih 'aw k'uhootneh chanizun.

Dzuh nahdeh nuhwhuba huwa whúlna, 'et whunts'ih whulh sahyin

⁷ 'Et huwa sulpantsinkah neMoodihti whusanátedalh whuts'un, 'et huba ilh'ih. Soo zúlhts'ai, ndan dune haníyeh 'ulh'en, ndi haínulhyeh, 'i soo 'úlcho tele whuts'un, sa hoh yuba ilh'i. 'Olulh 'ink'ez dak'et naootelhtilh, 'et huba ilh'i ho' hoont'ah. ⁸ Nuhwheni chah neMoodihti whusanatedalh, 'et whuz na'a zeh huba ilh'i, 'ink'ez nuhdzi soo cho ulhtus wulh'i. 'Aw 'et neba nilhdukw suli 'et huwa. ⁹ Sulhutsinkah lhch'a ne'doohtni gunih, doo ka sih nuhk'éholts'it. Nulh'en Yak'usda, naheyelh, 'en ndati 'et seyin 'et huwa. ¹⁰ Sulhutsinkah ndunnah nus whunílh'en, 'en ndunnah neMoodihti boozi be yahulhtuk, 'en dude 'ut'en k'ah huwa dzuh nuhúde t'eh, 'et whunts'ih neMoodihti date-nilh, 'et huba hilh'i. 'En hubugha hodoolhú'eh! ¹¹ Soo zúlhts'ai, ndunnah howa whúlna whunts'i whechahítsaz, 'en degha nus hoonzoo hubulh 'úhooja hubuts'utni. 'Et ndun Job ts'utni, 'en chah nts'e na'a dzuh nusuzut, buba howa whúlna whunts'i whulh ínyin. 'Ink'ez nts'e na'a neMoodihti tube yugha te'nanzin, 'ink'ez hukw'elh'az soode'a 'int'ah yutl'anáho'ai, 'et ts'iyawh whulh údahts'oh. ¹² 'Ink'ez sulhutsinkah ndi 'uhoont'ah 'un whudusni, 'et hoonliyaz dune ts'un nahuzinya t'eh, khun yak'uz whunalh 'udúsni k'us ndi yun k'ut whunalh 'udusni, k'us 'uyoo khunek be, whuz na'a teh yatoolhtih gunih. 'Et k'us, "A," dutehnilh t'eh hoh, "A," doohtni. 'Et, "Dah," dutehnilh t'eh, 'et chah, "Dah," doohtni! Doo ka sih nuhwhuba nahoodeh.

Lhula ts'oodut'en

¹³ Nuhwheni nuhtah dzuh nuzut hoonli t'eh, 'en tenahudoodli. 'Ink'ez nuhtah hoont'i hoonli t'eh, 'en chah shun 'i be Yak'usda hudóolhti. ¹⁴ Nuhwheni nuhtah hubuyust'e soo cha'ít'ah t'eh, ndunnah Yak'usda ba 'ilhunahuwúdulh nuhtsuwhudélhdzulh, 'en 'anih hubudóohni. 'Ink'ez ndi khe neMoodihti boozi be 'i ndan hubuyust'e soo cha'ít'ah, 'i hubuk'ut huboolhlho 'ink'ez hiba tenahudoodli. ¹⁵ Be 'alha 'uhoont'ah, 'i be tenahudoodli. 'Et sih ndan hubuyust'e soo cha'ít'ah soo na'tetnilh. 'Ink'ez neMoodihti duk ná'yooleh. 'Et lubeshi ut'i t'eh, 'i yuba whunawhudoolnah. ¹⁶ Lhts'un tink'us aht'en t'eh, ndulhudóohnti 'ink'ez lhuba tenadoohdli. 'Et ndaht'en t'eh, 'et t'eh

soo na'oohneh. 'Et ts'ah'un dune, 'en ts'ah'un na'a hoh tenadudli t'eh, 'et whuz na'a hubutenadudli bugha lhat hooncha túne' whutet'en 'et huwa. ¹⁷ 'Et Elijah ts'utni, 'en nuwheni nek'una'a dune unli inle. 'En 'uja soo chan ch'a tenadédli. 'Et tat naoodezuk 'o 'at lhúhoolcho, 'et ndi yun k'ut 'aw nachahooltil. ¹⁸ 'Ink'ez doo chah tenadédli hoh chan 'ants'i yak'uz ts'ih hájulh. 'Et yun doo chah zeh mai buk'ut hananyi.

Tink'us hunínt'uk, 'en nahundunooya ka hubula'oohneh

¹⁹ Sulhutsinkah nuhtah 'ilhunuh khunek 'alha' 'int'ah, 'i yuch'a nasja t'eh, 'et nuhtah 'ilhunuh neMoodihti ghu nainilhti t'eh, ²⁰ 'en 'et nduja, 'et njan dudóohni, "Ndan lubeshi 'ulh'en, 'en be 'alha' nudzun yuch'a nasja t'eh, ndan ndúja neMoodihti ghu nainilhti t'eh, 'en ndi yun k'ut datétsah whuch'a nayulhti ho' 'int'ah. 'Ink'ez 'en hubugha lhat lubeshi hubuk'é'imbal li'tenilh."

'Udechoo Dustl'us Peter Yuk'e'ánguz

Lizwiflhelhdun keyah whut'en huzdli, 'en Peter dahooja hubulhni

¹ Si Peter, Sizi Gri 'en bugha whel'a usdli. Nuhwheni Lizwif bukeyah whut'en ahli inle. 'Aw 'et lhelhdun keyah whut'en sahli. Yun k'ut Pontus, Galatia, Cappadocia, Asia, 'ink'ez Bithynia 'et chah. 'Et 'onghoh ndulhcho hoh 'astliyaz whuba nináhtna. Yak'usda ba 'utahálya aht'ah. 'Et huwa nuhwheni nuhts'o k'e'usges. ² Yak'usda ne'aBÁ nus whudezulh ts'iyawh t'eooininzun. 'Et huwa 'utahálya aht'ah. Ndez na'a nuhwhuba 'et 'úhooja, Ndoni Yak'usda ba 'udun ninwhuninla Sizi Gri buk'une' teht'en ka, 'ink'ez buzkai nuhwhuba nadélt'ik 'i be nuhwhulubeshi ts'iyawh nuhwhuba hoolah suli. Ye unzoo, 'i 'ink'ez Yak'usda ts'un be ts'ah'un aht'ah, 'i lha'un teh nuhgha óokat.

Yak'uz ts'ih neba 'et sula

³ Yak'usda, Sizi Gri neMoodihti be'aBÁ, 'en uzdélhti. Hooncha hoh negha te'nanzin et hoh nenakhílhna. 'Et huwa hoonzoo hukwa tsi ts'úhóoli huba' hoont'ah. Sizi Gri 'en yahadla hubutah dinadija. 'Et huwa nuhwheni chah 'ilhuz ts'ukhutena, 'et hukwa tsi ts'úhóle. ⁴ K'an 'aw 'et ne'aBÁ yit'i, 'i negha ítelelh, 'i chah nuhwheni neba 'int'ah. 'Aw wulhjut ghat'ah. 'Aw ntsi' chah wule ghat'ah, 'ink'ez dutoodeh ghat'ah. 'I 'uda yak'uz ts'ih nuhwhuba 'et whuzzla. ⁵ Ndunnah Yak'usda ye ulhtus, 'i be búghudli, 'ink'ez hit'anínentan 'et hoh whéhudutejih 'et hotélhchulh. 'Et deke'lh'az dzin t'eh, yak'uz ts'ih 'et neba whuzzla, 'i ts'iyawh ts'et haóotekulh 'et wheni lhaóodint'ah. ⁶ 'I be nuhwhudzi ndulhcho hoonáht'i. 'Et whunts'ih k'an 'et 'astliyaz whuts'un nuhwhubeni lhelhdun tulih be dzuh nahzut, 'et huwa nuhóolhdzih. ⁷ 'Et whuz na'a nuhwhuba 'alha 'uhoont'ah, 'et nuhwhuba 'o nus hoonzoo tele. Nts'e na'a gold kwun 'i be lhtuhadúkat hiyulhtsih, 'et hoh soo ts'ah'un 'i zeh 'ulhih, 'et whunts'ih 'i chah hoolah tele. 'Et ndi ye nuhwhuba 'alha 'uhoont'ah, 'i gold ch'a degha nus whudézti ho' hoont'ah. 'Et whuz na'a zeh hoh t'eh ndet dzin Sizi Gri nenalhts'et be wheóodiltsai t'eh, 'et t'eh bé nuhwhuba 'alha 'uhoont'ah huwa Sizi Gri nuhwhuba whudutélhti, 'ink'ez huba hooncha tele. ⁸ Sizi Gri 'aw chaséh'en 'et whunts'ih buk'ehtsi'. 'Aw chaséh'en 'et whunts'ih nuhwhuba 'alha 'int'ah. 'Ink'ez ndi be ts'uhooont'i, 'i ncha k'et 'aw uzdooni ghat'ah, 'ink'ez tube dézti ho' 'int'ah. 'Et huwa hoonáht'i. ⁹ Ndi ye nuhwhuba 'alha 'uhoont'ah lhawhúdulyeh 'et hoh nuhzul dutejih ho' hoont'ah. ¹⁰ Ndunnah Yak'usda be nus whunilh'en, 'en ndi ye unzoo, 'i nuhts'u whélts'ulh, 'et hubugha nus huho'en. Njan whézdujih, 'et hubugha 'et soo ts'ah'un degha nus huwa' hooli hoh nahahooté'alh hukwa' hut'en. ¹¹ Hoh da Christ buyéghah hubuyudinda 'ink'ez 'uwhutenilh whutsuh, 'en bughi yalhtuk nts'e na'a Christ dzuh nutezut, 'et hukw'elh'az huba hooncha tune'tet'en 'uwhutenilh. 'Et nduhoont'ah nket'ah njan 'et nduwhutenilh, 'ink'ez nts'e na'a 'uwhutenilh, ndunnah nus whunilh'en nahahooté'alh hukwa' hut'en. ¹² 'Ink'ez ndunnah nus whunilh'en, 'en Yak'usda wheóobunelhtan 'aw 'en huba cha'hoot'ah. 'Et k'us nuhwheni zeh neba nus húho'en. 'Aw 'et ndunnah khunek unzoo, 'i be yahalhtuk, 'en Ndoni yak'uz ndus de hál'a, 'en be ndun hódani. 'Ink'ez nduhoont'ah, 'et lizas, 'en whunts'i nahahooté'alh hukwa' huninzun.

Yak'usda ne'aBÁ, 'en buk'una'azeh 'uts'oot'e

¹³ 'Et huwa nuhwheni lhadáhleh. Nuhwhenich'oh duba naootéhnih. 'Et whuz na'a ye unzoo, 'i nuhts'u tekulh, 'et whulatah whuts'un buka tsi hóohli. Ndet dzin 'utenilh Sizi Gri nenalhts'et be hóoduteltsilh. Hoh t'eh njan whézdujih, 'et nuhgha whútelts'ulh. ¹⁴ 'Uskekah k'una'a 'uk'une' hut'en wahle.

'Aw niz de ndeht'en Yak'usda t'enuzahzun, 'et huwa hoontsi' ts'unáht'uk. 'Aw 'o 'un ndóht'en gunih. ¹⁵ 'Et whunts'ih 'aw 'et ndan dutehjih ka nuhka' dani, 'en nts'e na'a lubeshi bughu hoolah, nuhwheni chah ndaht'en 'en buk'una'a zeh toohdelh. ¹⁶ 'Et huwa whuz na'a 'uk'e'éduguz hoh njan ndutni, "Si lubeshi bughu hoolah 'ust'ah. 'Et huwa nuhwheni chah 'et ndóht'e huba' hoont'ah." ¹⁷ Ilhunuh ts'inli hoh nts'e na'a dats'et'en, ne'aBá 'aw ndan ts'un chadítini hoh neba nahuteyeh. 'Et huwa 'en ts'un zeh tenadahdli t'eh, soo cho khahdli. 'En benlhújut hoh ndi yun k'ut hukw'ut lholhodelh. ¹⁸ Hoh da ndet nuhwhudusneka whunohodalh'i, whulutah teh 'aw hoonliyaz chahoolah inle. Silver, gold ndunt'i, 'i be ilah Yak'usda nanhonket. 'I ts'iyawh hoolah tele 'et huwa. ¹⁹ 'Et whunts'ih Christ buzkai dézti, 'i be nanhónket. 'En sheepyaz 'aw hoonliyaz buchaooodí'ah k'una'a 'int'ah. ²⁰ Alha 'uda ndi yun 'utelnih whutsuh da, Sizi Gri daóotenilh 'uda t'ewhunínzun. 'Et njan degha nus dzin nuhwhuba whuz'ai, k'an 'et nuhwhuba ts'et hawhélts'ut. ²¹ 'En bugha Yak'usda but'anioonúhtan. 'En 'uja yahadla hubutah dinaidilhti 'ink'ez ye dézti, 'i chah yugha ní'ai. 'Et Yak'usda but'aninahtan, 'ink'ez ndet hukwa tsi hoohli, 'et Yak'usda 'en bugha ts'iyawh whusaóotelts'ulh.

Khunek 'ilhuz 'int'ah,

²² Ndoni 'en be ndi khunek 'alha 'int'ah 'i buk'une' aht'en, 'i be nuhdzi 'aw lubeshi bughu hoolah sulhtsi. 'Et ndan huba 'alha 'uhoont'ah, 'en nuhdzi ndulhcho 'i be, buk'ehtsi'. 'Aw nuhdzi chadítsun hoh 'ilhunuh ahli soo cho lhk'eoohdutsi'. ²³ Yak'usda bughunek 'i be doo chah zeh nawhuzáhdli. Nedusneka hubugha 'ilhuz ts'ukhoona ghai't'ah. 'Et whunts'i Yak'usda bughunek 'i be zeh 'ilhuz ts'ukhutena ho' hoont'ah. ²⁴ 'Et huwa ndi khunek njan ndutni,
"Ts'iyahan 'ants'i tl'o li'hint'ah.

Ndi tl'o 'astl'iyaz 'int'ah.
'Ink'ez dune ye dézti,
 'i bumai li'int'ah.
Ndi tl'o bindak dugih 'ink'ez nakuk.

²⁵ 'Et whunts'ih neMoodihti bughunek 'ilhuz wheni 'et dez'ai."
'Et ndi khunek 'i khunek unzoo, 'i be nohwhulh yaintuk, 'i 'int'ah.

2

¹ 'Et huwa 'uyoos ts'un nuhwhubeni untsi', 'i, whuts'it be yalhtuk, duba nahzoo, 'uyoos ghe 'oolhúnih, 'ink'ez khunek untsi', 'i be yálhtuk chah, 'et ts'iyawh 'ilhuz wheni whuladoohtnih. ² K'an 'et 'uskehyaz huwhuzdli 'uts'oo 'i zeh hika dátni, nuhwheni chah 'en buk'una'a ndi khunek ts'ah'un 'int'ah, 'i zeh buka daóohtne, 'o nus ulhtus wahle ka. ³ NeMoodihti daldzoo 'et nawhah'ai t'eh, 'et t'eh ndi khunek 'i zeh buka daóohtne.

Sizi Gri 'en 'utahayálhti, 'ink'ez nuwheni chah 'utahálti 'uts'int'ah

⁴ Sizi 'en 'int'ah tse khuna, 'i ndult'ah. Lizwif, 'en 'uhiyinla lhanah 'un hitezno li'huja. 'Et whunts'ih Yak'usda 'utahayálhti 'ink'ez 'en tube dézti ho' 'int'ah. 'En zeh buts'un tóohdelh. ⁵ 'Ink'ez nuhwheni chah tse khuna, 'i k'una'a 'aht'ah. 'Et whuz na'a Ndoni 'en luglez whucho nuhwheni nuhbé' whulneh. 'Ink'ez 'en be nuhwheni Yak'usda ba nawhulnuk 'aht'ah. 'Et hoh ndai Ndoni nuhsts'o hukwa' ninzun, 'en Sizi Gri 'en be ndai Yak'usda buba soo' yint'ah, 'i hubugha iyóohlelh. ⁶ 'Et huwa Yak'usda njan ndutni hoh 'uk'e'éduguz, "Whunulh'en, nuhwheni keyah Zion whut'en,

'et koontl'at tse,
 soo degha nus buka dawhútni, 'i 'et níde'ai.*

* ^{2:6} Sizi ndi tse ndult'ah ho' 'int'ah.

'En 'utahaílhti, 'ink'ez dézti ho' 'int'ah.
 'Et 'alha 'uhoont'ah ndunnah huba 'alha' yint'ah,
 'aw hooya hoole ghat'ah."

⁷ 'Et huwa ndunnah nuhwhuba 'alha 'uhoont'ah, nuhwhuba dézti ho' 'int'ah. 'Et whunts'ih ndunnah hik'unucha'ust'en, 'en hubugha njan ndutni, "Ndunnah koo 'uwhulh'en ndi tse 'un hidutelh'uz li'huja,
 ndi koontl'at tse soo degha nus buka dawhútni, 'i suli."

⁸ 'Ink'ez njan chah ndutni,
 "Ndi tse hit'az nunúghalh
 'ink'ez 'i be 'ahoolhyez huba dzuh 'ulhih." Yak'usda bughunek
 hik'unucha'ust'en, 'i bugha nonúghalh. 'Et whuz na'a Yak'usda buba'
 hóonla.

⁹ 'Et whunts'ih nuhwheni dune 'utahálya ahli. Yak'usda hubudayi cho bunawhulnuk ahli. Yak'usda bube'ildzun aht'ah. Nuhwheni budune 'int'ah ahli. 'Onghoh, 'en ts'ah'un na'a daldzoo ho' 'int'ah, ts'iyawh budutéhnih ka. 'Awhuz tsahólhgus yuh delhúts'i hoh 'anih nuhwhudáni, buts'un toohdelh ka. Bughi yet'en, 'i be whét'en, 'i 'et 'uhoont'ah. ¹⁰ 'Uda Yak'usda budune cháhlahinle. K'an 'et Yak'usda budune sahli. 'Uda 'aw bé nuhgha te'whunizeh chalhchulh inle. K'an 'aw 'et bé nuhgha te'whunezech nuhghant'ai.

'Udun yun k'ut whut'en tah ts'ah'un na'a yinkak doolhúts'i

¹¹ Nuhwheni nuhwhuk'esi' ahli, bukeyah hoolah k'una'a, 'astl'iyaz zeh ndi yun k'ut ahdulh. 'Et huwa nts'e nuhyust'e whuts'u nint'uk, whu'et 'ooht'e, 'et hukwa nuhts'u téodusdli. ¹² 'Udun yun k'ut whut'en tah ts'ah'un na'a yinkak doolhúts'i. 'Et hoh nuhch'a hudemtni, 'en hoontsi' tune' aht'en nuhohútni, 'ink'ez 'ut'en unzoo, 'i ahla 'et honilh'en t'eh, 'et t'eh nket'ah Yak'usda dune tah nuteyalh, 'et huwa 'o nus hoonzoo k'una'a hidutélhti.

Nts'e na'a dune ne'hutet'en 'uk'e'hanguz, 'et ts'iyawh whuk'úne' 'ooht'en

¹³ 'Et huwa neMoodihti, 'en bugha nts'e na'a dune ne'hutet'en 'uk'e'hanguz, 'et ts'iyawh whuk'úne' 'ooht'en. Dant'ah dune hinli 'et whunts'ih, buk'une' 'ooht'en. Ndun hubudayi cho unli, soo 'udetsuh whudéhldzulh, 'en chah buk'une' 'ooht'en. ¹⁴ K'us ndi yun whumoodih, 'en chah. Ndunnah, 'en hubudayi cho ba whel'a 'en 'uhint'ah. 'Et hoh ndunnah hoontsi' 'uwhulh'en, 'en hubudayi cho ba hube' whudutelhyah. 'Et hoonzoo 'uwhulh'en, 'en budutélti. ¹⁵ 'Et whuz na'a Yak'usda hukwa' ninzun, ts'ah'un na'a ne'aht'en t'eh, 'i be whusnik be yahalhtuk buzek whudána'dooh'ah. ¹⁶ Sizi bugha lubeshi ch'a nahusdel aht'ah. 'Et whunts'ih 'et whut'anínehtan hoh nuhwhuba 'ants'i hoonli hoh lubeshi 'oolh'en gunih! 'Et Yak'usda be 'ulhna k'una'a yinkak doolhúts'i. ¹⁷ 'Ink'ez ndunnah huba 'alha 'uhoont'ah, 'en ts'iyawh soo cho hubudóolhti 'ink'ez hubuk'eoohtsi'. Yak'usda be noolhújut 'ink'ez hubudayi cho 'en chah dóolhti.

Nuhwheni 'ulhna nuhmoodih hubenlhújut hoh hubutl'a' dudoohlúyelh huba' hoont'ah

¹⁸ 'Et nuhwheni 'ulhna nuhmoodih hubenlhújut hoh butl'a' dudoohlúyelh huba' hoont'ah. Hinzoo 'ink'ez soo ne'hut'en, 'en zeh ilah buk'úne' 'ooht'en. 'Aw ts'ah'un cha'hit'ah, 'en whunts'i hubuk'úne' 'ooht'en. ¹⁹ Ts'ah'un 'aht'ah 'et whunts'ih dzuh nunóhohulhdeh t'eh, 'ahoolhyez Yak'usda ghu nuní nahzut whecháhtsaz hoh dzuh nahdeh t'eh, 'et Yak'usda ba hoonzoo ho' hoont'ah. ²⁰ 'Et huwa tink'us na'a ahja, 'et hukwa yanohahulhtsus t'eh, 'ezahnih hoh whúlhchoot, 'ink'ez di simba nuhgha óokat? 'Et hoonzoo 'uwhulh'en 'ink'ez 'ants'i nuhwhuba hoonli hoh hukw'elha dzuh nahzut t'eh, 'et Yak'usda ba hoonzoo ho' 'uhoont'ah. ²¹ 'Et ndez na'a zeh Yak'usda nuhts'un húkwa' ninzun. Christ 'en chah neba dzuh nusúzut. 'En buk'una'a ne'ts'oo't'en ka

whunénilhtan. 'Et huwa 'en zeh buts'un úztoodelh huba' hoont'ah. ²² 'En 'aw lubeshi cha'ilel, 'ink'ez 'aw whuts'it, 'i be yachalhtuk. ²³ 'Et ndi khunek untsi', 'i be hiyulh yalhtuk, 'et whunts'ih 'aw khunek untsi' be hubuts'un k'uchaitnil. Hoh da dzuh nusúzut hoh, 'et whunts'ih 'aw hubuts'un k'uchasne. Ndun soo ts'ah'un na'a naheyelh, 'en yutl'a' dudelti. ²⁴ Nelubeshi dich'oh buyust'e be lhdulalhgus k'ut níninla, 'i be 'aw 'o 'un nelubeshi nemoodih wule ghat'ah. 'Et sih ts'ah'un na'a ts'ukhoona, buka k'et 'et ts'iyawh soo ná'whulya 'et huwa. ²⁵ 'Ants'i sheepyaz tinta nilh'az, 'i li'aht'ah inle. K'an 'et ndun sheep għunli 'ink'ez nezul ghúndli chah, Sizi 'en 'int'ah, 'en bughu nanahdel.

3

Nuhwheni ts'ekoo nuhkikah huba nyuh 'udúdoolhdzin

¹ 'Et whuz na'a zeh nuhwheni ts'ekoo nuhkikah huba nyuh 'udúdoolhdzin hoh hubutl'a' dudoolhúyelh. Bulunah Yak'usda bughunek hik'únucha'ust'en hoh hubu'atkah, nts'e na'a 'uhint'ah huwa 'et khunek bu'et whunts'i hubeni náhondunoolelh. ² Dálhdzo 'ink'ez Yak'usda ye nuljut, 'et whuz na'a nuhonilh'en t'eh, 'et huwa hubeni náhondunoolelh. ³ Yoo 'az ts'ih dawħáht'en 'et whuz na'a zeh ilah. Nts'e na'a nuhtsigha dalhdzun, gold nidelhúya, khusulhúya teh be 'ulhdzun, k'us naih unzoo, 'i be dune ahli t'eh, ndunt'i, 'i ts'iyawh 'et ndoh t'e gunih. ⁴ 'Et k'us nts'e na'a be nahzoo 'ink'ez nuhdzi unzoo chah, 'i nuhyuh be 'adulhúdzun teh. 'Et ndi Yak'usda bunalh whudézti ho' hoont'ah. ⁵ 'Et niz t'eh haóodanzut nduwhulyez hoh ndunnah ts'ekoo Yak'usda bube'ildzun, 'en Yak'usda t'aníhonentan, 'en chah soo cho soo nahudut'ih. Dukikah hubutl'á' hududulyih. ⁶ Whuz na'a Sarah, 'en Abraham yuk'une' 'ust'en hoh, "Smoodih" 'uyulhni. Nuhwheni chah 'aw whechanzulhújut hoh 'ut'en unzoo, 'i 'ulh'en t'eh, 'et sih nuhwheni chah Sarah k'una'a 'uteht'ilh. 'Et whuz na'a nuhkikah hubutl'a' dudoolhúyelh.

Nuhwheni dune nuh'atkah ts'ah'un na'a ne'boolh'en

⁷ Nuhwheni chah dune nuh'atkah ts'ah'un na'a ne'boolh'en hoh hubuzih doolhúts'i, 'ink'ez hubudóolhti. Soo nilyaz hoh ne'boolh'en, chahíltus ho' hint'ah 'et huwa. 'Et ndi 'ilhuz be ts'ukhuna, 'i nuhghant'ai nanlhút'ah be 'áht'ah 'et huwa. 'Et ndúchaht'ah t'eh nuhtenadudli, 'i Yak'usda 'aw yoozólhts'a għat'ah.

'Uk'úznoodzin gunih

⁸ 'Et njan degħa nus nuhdutēsnih. Nuhwheni ts'iyawh nuhwhubeni 'ilho zeh wahle. Lhuga te'noohdzin 'ink'ez lhulhutsinkah ts'iyawh lhk'eoohdutsi'. Lhuts'un nuhdzi wuzoo 'ink'ez soo cho lħts'un dunekah wahle. ⁹ 'Et khun 'uyoon nuhts'un tink'us 'uhuninzun t'eh, khun 'uk'unóohdzin gunih. 'Uyoon nuhch'a yáhalhtuk t'eh, nuhwheni chah khun hubuch'a yaóolhtuk gunih. 'Et whunts'i khunek unzoo, 'i be hubulh yaóolhtuk. T'eoónáhzun 'et whuz na'a Yak'usda nuhts'o húkwa' ninzun. 'I Yak'usda yit'i, 'i nuhgha óolts'it wule sih. ¹⁰ Ndeż na'a 'uk'e'anguz hoh njan ndutni, "Ndunnah k'an khuna 'et hóont'i 'ink'ez dzin totsuk ba hoonzoo, ndunt'ah ndunnah 'et whuz na'a hukwa' huninzun, 'en hoontsi' túnucha'hudoosnih, 'ink'ez khunek whuts'it, 'i be yachahoolhtuk.

¹¹ Hoontsi' tune' hut'en whuch'a naoolhúyeh 'ink'ez 'ut'en unzoo, 'i zeh 'oolh'en.

Be ts'ah'un na'a lħts'un 'uts'oot'e, 'et zeh hukwa' ts'óot'en huba' hoont'ah.

¹² 'Et alha neMoodihti ndunnah ts'ah'un 'int'ah, 'ahoolhyez bughunli.

Hits'un tedudlih totsuk uboozélhts'ai.

'Et whunts'ih ndunnah lubeshi 'uhulh'en,

'en whúske be hubunilh'en."

Ts'ah'un na'a aht'en hukw'elha dzuh nahdzut t'eh, 'et t'eh degha nus hoonzoo nuhgha whútelts'ulh

¹³ Ndet hoonzoo hukw'u na'a 'aht'ah t'eh, 'et t'eh ndan 'utenelh nuhwhunduntélhdah? ¹⁴ 'Et whunts'ih ts'ah'un na'a 'aht'en hukw'elha, huwa dzuh nahdzut t'eh, 'et degha nus hoonzoo nuhgha whútelts'ulh. 'Ink'ez nuhwhé' hoonulhjoot t'eh whenoolhújut gunih, k'us huwuni wahle gunih! ¹⁵ 'Et whunts'ih Yak'usda neMoodihti, nuhdzi be soo degha nus dóolhti. 'Et whuz na'a ndun nuhoodutelhkut ndet hukwa tsi hoohli, 'et huwa 'ahoolhyez khunek lhadóolhdzin. 'Et whunts'ih soo ts'ah'un na'a hubunulh'en 'ink'ez soo cho ne'bulh'en hoh hubudóohni. ¹⁶ 'Et lubeshi nuhghu hoolah 'ink'ez 'uyoon hoontsi' k'una'a nuhch'a yáhalhtuk, 'et whunts'ih t'ehoninzun Christ, 'en be hoonzoo hukw'u na'a hoh ndi yun delhúts'i, 'et sih hukwaya hoole. ¹⁷ Khun teh 'ut'en unzoo, 'i bugha dzuh nahzut, 'inkez whuz na'a Yak'usda hukwa' ninzun t'eh, 'et nuhwhuba hoonzoo. 'Et whunts'ih tink'us na'a aht'en huwa dzuh nahzut t'eh, 'et 'aw nuhwhuba chahóozooth ho' hoont'ah.

Christ neba dzuh nusuzut, i be whuts'odul'eh

¹⁸ Christ 'en chah dich'oh 'ilhuh zeh nelubeshi k'elha dzuh nusuzut. 'En ts'ah'un 'int'ah 'ink'ez nuhwheni 'aw ts'ah'un na'a cha'ts'it'ah. Whuz na'a neba 'et ndúja hoh Yak'usda ts'un néootelelh ka. 'En buyust'e hizelhghi 'et whunts'ih Ndoni be buyust'e nakhítna. ¹⁹ 'En be nts'e nududeh tsak'edinla ts'ih, whuz hubuts'un whinya 'ink'ez ndet hubuts'u whélts'ulh hubugha ubulh yailhtuk. ²⁰ Ndunnah, 'en 'uhint'ah, hoh da 'aw hik'únucha'it'il inle. Noah ts'i cho 'uleh hoh, 'et nduhóolyez Yak'usda yubulh dzuh nuzut hoh buba ilh'i. 'Ink'ez bulunah lhk'udinah (8) 'aw 'en zeh, too hubuteghan whuch'a hudujih. ²¹ 'Et njan huwa t'ets'onanzin. 'Et njan too be' ts'ulya whézdujih. 'Aw neyust'e dutsun buna'ts'ulhdeh, whuz na'a ilah. K'us Yak'usda ts'oodulhkut hoonzoo neyuh ts'ih bugha t'ets'oninzun, 'i whudoo'a, 'et whuz na'a uzdujih. Sizi Gri dinadija, 'et 'uhooont'ah. ²² 'En 'int'ah, yak'uz whenaja 'ink'ez k'an 'et Yak'usda yughu nalhnih ts'ih usda. Ndunnah lizas, 'ink'ez ndi nududeh 'i be butl'awhelts'ut, 'ink'ez ndunnah ye ulhtus, 'i hiyít'i, ndi ts'iyawh Sizi Gri hik'une' oot'en huba' obínla.

4

¹ Christ, 'en buyust'e 'i be neba dzuh nusuzut. 'Et huwa nuhwheni chah nuhwhubeni ulhtus wahle 'ink'ez 'en k'una'a nuni noohzut. Ndunnah dich'oh hubuyust'e be dzuh nuhudeh, 'en ts'iyawh lubeshi hunedulh 'ustl'e' 'uhuja 'et huwa. ² 'Et whuz na'a dahooldzah ndi yun k'ut neba whuz'ai, 'aw 'uyoon hubuk'ah ts'ih lubeshi ts'úznoot'uk huba' cha'hóot'ah. 'Et k'us Yak'usda nets'o hukwa' ninzun, 'et whuz na'a ts'ukhoona huba' hoont'ah. ³ 'Alha niz de haóodanzut whuts'un, 'udun yun k'ut whut'en hukwa' huninzun tune' hust'en, 'et nuhwheni chah 'et whuz na'a zeh 'et nduts'ét'en. 'Aw 'et sóo' hooldzah 'et nduts'ét'en. 'Et hoh da 'ut'en dutsun, 'i 'uts'alh'en, neyust'e whuts'u nint'uk, 'ink'ez nzoodil'i 'i be lhutah 'uts'ut'en, 'ink'ez 'ahoolhyez nutaznutnai inle, 'ink'ez 'uk'edéltsi neba 'alha 'ant'e. ⁴ Ndunnah 'udun yun k'ut whut'en huba whe' hoont'ah hooyah dáhoont'ah huwa 'ustl'e' ahja. 'Aw 'o 'un zoodil'i hubulh chá'tuzest'il. 'Ink'ez 'aw 'o 'un lahoo'tah teh hubulh nucha'zaht'en. 'Et huwa hoontsi' k'una'a nuhghu yahalhtuk. ⁵ 'Et naheyelh 'aw 'et lhaduja. Ndunnah yahadla 'ink'ez hukhuna chah, hibut nitedulh huba nahuteyeh ka. Dahét'en, 'et ts'iyawh hiduténih. ⁶ 'Et huwa ndunnah dahútetsah whutsuh 'en khunek unzoo, 'i be hubulh yailhtuk. Nts'e na'a hukhuna huba nahuteyeh, 'et whuz na'a zeh 'en chah huba nahuteyeh. 'Et nts'e na'a Yak'usda khuna, 'en chah whuz na'a buyégha khutena.

Ne'ut'en be Yak'usda uzdóolhti

⁷'Aw 'et ndi yun nadalhdukuw suli. 'Et huwa nuhwhenich'oh duba whaht-nih 'ink'ez 'ahoolhyez khahdli. 'Et sih soo ts'ah'un na'a tenadoohdli. ⁸Soo hoolhtus 'i be lhk'eoohtsi'. 'I soo degha nus hooncha ho' hoont'ah. 'Et 'alha 'ohoont'ah, lhat hoh dune nech'a lubeshi 'uhulh'en, 'et whunts'i ndi be lhk'ets'udutsi', 'i bugha lubeshi buch'a buka' delhchooz li'uja. ⁹Nuhdzi hoont'i hoh dune nuhkoo bez ts'ih hubuts'u daóohzoo. ¹⁰'Ilhunah ahli hoh ndai Ndoni nuhgha iní'ai, 'i be lhula 'oohdut'en. Yak'usda ye unzoo, 'i lhat lhelhts'un na'a nuhghant'ai. 'Et sih 'uyoon soo cho whuz na'a huba ne'ooht'en. ¹¹Ndunnah dune yatelhtuk, 'en Yak'usda k'una'a yahoolhtuk huba' hoont'ah. Ndunnah 'uyoon dune ba ne'hút'en, ndai ye ulhtus Yak'usda bugha iní'ai, whuz na'a 'uyoon huba né'hoot'en. 'Et nduhút'en, 'i bugha ts'iyannah Sizi Gri 'en be Yak'usda hidóolhti. Sizi Gri 'ilhuz wheni 'ink'ez 'ilhuz wheni, 'en 'o nus uzdóolhti huba' hoont'ah. 'En ts'iyawh bube'ildzun 'ink'ez ye úlhtus bulh 'int'ah 'et huwa. 'Et ndoh honeh.

Dzuh nuts'uzut, 'i be Yak'usda dóoti

¹²Nuhwhuk'esi' khun 'uyoon hubugha dzuh nahzut, 'et hoh óolhdzh, 'ants'i kwun k'una'a be dátnih. Nohwhulh 'et ndúhooja t'eh, khun teh ndez na'a nohwhulh 'et duchaóotesnil noohzin gunih. ¹³Ndai Christ ye dzuh nusuzut, 'et whuz na'a zeh dzuh nahzut t'eh, 'et soo cho hóht'i! Christ ye dézti, 'i nuhwhunalh ts'et hawhélts'ut t'eh, 'et tube cho whunoohlhnik. ¹⁴'Et Christ bunehdulh ahli huwa nuhwhulhtsi t'eh, 'et soo degha nus hoonzoo 'uda nohwhulh 'úhooja. Yak'usda buyégha ye dézti, 'i 'ilhuz wheni nohwhulh 'int'ah 'et huwa. Ndunnah, 'en hich'a yalhtuk, 'et whunts'ih nuhwheni délhti whuz na'a bughu yalhtuk. ¹⁵'Et dudulh dune hughán, 'undunut'ih, tink'us et'ilh, k'us 'uyoon 'ahoolhyez dahóot'en buhútni, 'en ts'iyawh 'et ndunt'ah, khun teh 'en buk'una'a ne'ooht'en gunih. Doo ka sih buk'una'a dzuh nohzut. ¹⁶'Et whunts'ih ndun Christ budune hinli 'ink'ez 'et huwa dzuh nuhúzut t'eh, khun hukwaya hoole gunih! 'Et k'us njan huwa Yak'usda hidóolhti. ¹⁷'Aw 'et neba whusawhélts'ut, nuwheni Yak'usda bukoo ts'inli hoh neba nahuteyeh. 'Et nuwhenich'oh neba nahuteyeh t'eh, 'et ndunnah Yak'usda bughunek unzoo, 'i daja ni hukwa cha'nízun, 'en hubulh dawhútenilh simba? ¹⁸'Ink'ez njan ndutni,

"Ts'ah'un na'a 'int'ah tube huba howa whulna hoh hudutejih.

'Et ndunnah Yak'usda chahidílhti 'ink'ez lubeshi 'ulh'en, 'en dahútenilh nahzun?"

¹⁹'Et huwa ndunnah Yak'usda hik'úne' 'ut'en hukwa dzuh nuhuzut t'eh, 'ut'en unzoo, 'i 'uhoolh'en. 'Et whuz na'a Yak'usda hiye khuna, 'i buba ghóle. 'En 'uja ts'iyaintsuk inla 'ink'ez 'aw neladootnih gait'ah.

5

Nuhwheni dune tsuh whudéhldzulh, soo cho bughahli

¹ Nuhwheni Yak'usda ba 'ilhunahuwúdulh, ndunnah nuhtah 'utsuh whudéhldzulh, si chah nohwhulh 'ilhunuh 'ust'ah. 'Ink'ez Christ, 'en dzuh nusuzut da, si chah 'et whunah'en. 'Ink'ez ndi ye dézti, 'i 'aw 'et nilhdukw nenalhts'et haootelts'ulh, si chah sulh 'uwhutenilh. 'Et huwa khunek ulhtus, 'i be njan nuhwhudutésnilh. ²Yak'usda busheep hubutah delhúts'i, 'en huba sheep ghundli wahle. 'Uyoon nunhoneyoot 'et huwa 'et ndóht'en gunih. Nuhwhenich'oh hukwa' nahzun huwa 'et Hughohle. Nuhwhuba k'elha whutele noohzin gunih, nuhwhenich'oh hoonáht'i huwa 'ooht'en. ³Ndunnah nuhnl'álya, 'en hubumoodih cho wahle gunih. 'Et ndunnah 'ilhuh nuyeh, 'en bunah ts'ah'un na'a 'ooht'en, 'en chah nuhk'una'a 'ahoot'e. ⁴'Ink'ez Sizi Gri,

'en hubusheep ghundli hubutsuh whudéhdzulh, 'en ndet nenalhts'et haínya t'eh, 'et ndi whudézti whuch'a oonúlhde, 'aw hoolah nahodle ghaít'ah, 'et nuhgha óotelts'ulh.

Yak'usda butl'a' dudułhúye 'ink'ez netsudule buch'a dehtni

⁵ 'Et whuz na'a nuhwheni k'an nehyelh, 'et ndunnah ye 'un hezulh, 'en butl'a' dudułhyelh. 'Alha nuhwheni chah ts'iyawh whuz na'a lhul'a' du-doodłhúyelh. Be yuh úzdudildzun, 'i, 'ants'i naih k'una'a bé doolhúts'i. Ndez na'a 'uk'e'anguz hoh njan ndutni,

"Ndunnah 'ududélti, 'en Yak'usda buch'a detni.

'Et whunts'ih ndunnah yuh údudildzun, 'en ye unzoo, 'i bugha yú'ah."

⁶ 'Et huwa Yak'usda soo cho bubut yuh 'údudoolhdzun. 'Et sih whusawhélt's'ut t'eh nuhwhudóolhti. ⁷ Ndet huwu ni ahli, 'et ts'iyawh Yak'usda butl'awháhle. 'Ahoolhyez nuhghunli 'et huwa. ⁸ Duba whatnih 'ink'ez soo cho huwahli! Netsudule, nuhch'a detni, 'en ndi khunaiti, lion ts'utni, 'i k'una'a nutuhnudúlgħoo. Ndān tinta' butelh'ilh 'en bukunúta. ⁹ Ndun buch'a déhtni 'en ndi be nohba 'alha 'uhoont'ah soo cho óhtun. Nt'eoónáhzun ndet dzuh nahdeh, ndunnah ndi yun k'ut nuhwhulhutsinkah ndulħcho hoh huba 'alha' yint'ah, 'en chah whuz na'a zeh dzuh nuhudeh. ¹⁰ 'Et Yak'usda, ye unzoo, 'i ts'iyawh yulh 'int'ah, 'i bugha Christ, Sizi ts'utni, neba daja, 'et huwa uzdutejih ka neka' dani. 'Et huwa 'ilhuz wheni yak'uz whudézti ts'ih uzdutelts'ilh. 'Et whunts'ih 'astl'iyaz dzuh nutehdoh. 'Et hukw'elh'az dich'oh soo cho lhanwhudutelih. 'Et ulhtus nuhwhutelhtsilh 'ink'ez koo buk'u whuz'ai, 'i k'una'a 'aw nogħoċtnah għait'ah nuhwhutelhtsilh. ¹¹ Yak'usda 'en ts'un ye dézti, 'ink'ez ts'iyawh ye ulhtus, 'i ts'iyawh bube'ildzun 'int'ah. 'I 'ilhuz wheni 'ink'ez 'ilhuz wheni, 'et ndoh honeh.

Nuhwheni ts'iyawh nuhdzi unzoo nohwhulh 'uhot'e

¹² 'Et nelhutsin, Silvanus ts'utni, 'en but'aníwhunentan unli, daja nuhwhudáni, 'en hoontsolyaz be suba 'uk'une'uzguz. Ndi khunek 'i be nuhdzi 'ulhtus wule hoh ndi Yak'usda ye unzoo, 'i ts'ah'un na'a 'alha 'int'ah, 'ink'ez 'i bugha ndun whudáni. 'I be nudelhúya. ¹³ Njan keyah Babylon, 'et ndun ts'eke, 'en nohwhulh 'utahálти 'int'ah, 'en dahooja nuhwhúlhni. Mark suye', 'en chah dahooja nuhwhúlhni. ¹⁴ Lhk'ehdutsi' be nalhudunáhts'oos, 'i be dahooja lhudahtni. Ndunnah Sizi Gri yulh 'int'ah, nuhwheni ts'iyawh nuhdzi unzoo nohwhulh 'uhot'e. 'Et ndoh honeh.

Whulh Nat Dustl'us Peter Yuk'e'ánguz

Yak'usda soo hoolhtus hoh yulh súyin, Peter dahooja ubulhni

¹ Si Simon Peter, Sizi Gri, 'en be 'ulhna 'ink'ez whel'a chah usdli. NeYak'usda neulhyis Sizi Gri, 'en ye ts'ah'un na'a 'int'ah, 'i njan be 'alha 'uhoont'ah dézti, 'et nuwheni chah 'ilho neghalts'ut. 'Et hubugha nuhts'o k'e'usges. ² Yak'usda 'ink'ez Sizi neMoodihti, soo ts'ah'un na'a 'en bugha t'ets'oninzun, 'i be Yak'usda ye unzoo, 'ink'ez ye ts'ah'un 'int'ah, 'i lha'un teh nuhgha óokat. ³ Nts'e na'a Yak'usda ba ndi yun k'ut uzdoolts'i ka, Yak'usda dich'oh whéulhtus, 'i be nduwhulcho negha óoni'ai. 'En bugha nt'ets'onínzun, 'i bugha neghá whults'ut. 'Et ndai Yak'usda ye dézti, 'ink'ez 'aw 'o 'un 'o nus hoonzoo chahoolah, 'et 'uzdutejih hukwa neka' dani. ⁴ 'I be njan khunek k'us hooncha 'ink'ez khunek dezti, 'et whulh nets'un náhezya. Njan 'et huwa Yak'usda dant'ah, 'et nuhwheni chah whuz na'a zeh buk'una'a 'óoht'e. 'Et njan yun k'ut nts'i' netelhtsilh, 'i bugha ndi yun k'ut be' whut'en 'et zeh whuts'u nint'uk, 'et nuhwheni 'uda ts'iyawh buch'a nasahdel.

Sizi Gri 'en bugha t'eoonehzin, 'i be 'o nus soo nóohyeh

⁵ Njan 'et huwa, 'uda Yak'usda nuhwhuba 'alha 'int'ah, nuhdzi ndulcho 'i be ndez whuz na'a chah 'ooht'e. Ts'ah'un na'a dune unzoo wahle, 'ink'ez 'o nus chah Yak'usda t'enoohzeh. ⁶ Hoontsi' whuch'a khóhdle, 'ink'ez howa whulna whunts'i whulh wahyin. 'Ahoohyez Yak'usda bughu nuní noohzut, 'ink'ez buba whudóolhti. ⁷ Ndunnah Yak'usda buba 'alha'yint'ah, 'en hubuk'eoohtsi', 'ink'ez be Ihk'ets'udutsi', 'i be Ihk'eoohdutsi'. ⁸ Ndi ts'iyawh 'et ndaht'en, 'ink'ez 'i be 'o nus ulhtus 'ulheh t'eh, 'et sih ndi neMoodihti Sizi Gri 'en bugha t'eoonehzin, 'i be 'o nus soo nóohyeh, 'ink'ez nuhwhe'ut'en soo ts'ah'un na'a 'ooht'e. ⁹ 'Et ndunnah Sizi Gri buba 'alha' yint'ah, 'en njan ducháhust'en t'eh, 'en nilhdukwyaz zeh honilh'en li'hint'ah 'ink'ez 'ankw'us chahuwhés'en li'hint'ah. 'Ink'ez niz dak'ez bulubeshi 'uhiyalh'en, 'uda Yak'usda ts'iyawh yuna'ahlde inle, 'et whunahodelhúnah. ¹⁰ 'Et huwa sulhutsinkah nuhdzi ndulhcho 'i be 'ink'ez 'o 'un chah, 'et nts'e na'a dutehjih ka nuhka' dani, 'ink'ez 'utahalya 'ahli soo ts'ah'un na'a njan 'et whunaooodoolhúnah gunih. Ndi ts'iyawh 'i be whuz na'a ndaht'en t'eh, 'et 'aw ntóohghalh għait'ah. ¹¹ Ndez na'a neMoodihti 'ink'ez neulhyis Sizi Gri, nts'e 'ilhuz wheni hubudayi cho unli, 'et hoonzoo hoh nuhwhuba da'dutekwus.

Peter 'aw 'et datétsah

¹² 'Et huwa njan ts'iyawh t'eoonaħzun 'ink'ez khunek 'alha 'int'ah, 'i chah úlhchoot hoh soo cho óhtun. 'Et whunts'ih 'ún whudáni 'ahoolhyez Ihk'uz teh nuhnalhts'et hanáwhus'ah. ¹³ 'Et t'eoonaħzun 'awhuz khusna 'et whuts'un, 'ún whudani nuhwhuba whunalhúnih 'ink'ez nuhnalhts'et hawhús'ah. 'I be whahnih wahle. ¹⁴ T'eoonaħzun 'aw 'et nilhdukw hoh datétsah. Nts'e na'a datétsah, 'et neMoodihti Sizi Gri whusúnelhtan. ¹⁵ 'Et huwa 'o 'un oosneh għait'ah 'et hukwa 'ust'en, 'et ndust'en 'et huwa dasítsai hukw'elh'az njan hodelhú'i 'i ts'iyawh whunaoohlhúnih.

Ndunnah Yak'usda bube'ldzun, 'en nts'e na'a Ndoni hubunelhtan yahutelh-tuk, 'et whuz na'a zeh yahalhtuk hoh 'uk'e'hanguz

¹⁶ 'Et neMoodihti Sizi Gri, 'en ye úlhtus, 'ink'ez whusanatedalh chah, 'et whúnwhuznelhtan. Ndunnah tube whunest'i be yahalhtuk, 'en whuz na'a bulunah ts'ah'un na'a khunek cha'it'ah 'uhulh'en. 'En buk'una'a ilah nuwheni whúnwhuznelhtun. 'Et whunts'i hoh da nuwhenich'oh 'et nena be hooncha

hoh buts'uh hayanduz, 'et ts'onah'l'en. ¹⁷ Nts'ena' ne'aBá Yak'usda, 'en buYe' yudélhti 'ink'ez deghunla dézti ho' 'int'ah, 'et newhunélhtan. K'us hooncha, 'en bube'ildzun 'uhoont'ah, 'et dich'oh buYe' yugha ooni'ai. Ndez na'a njan nduhooja. Yak'uz ts'un degha nus hooncha, 'et Yak'usda bughunek ndus de hadélts'ut 'et ndutni, "Ndun 'en SuYe' buk'esi", 'en 'int'ah. 'En bugha tube hoonúst'i." ¹⁸ Hoh da njan dzulh k'ut whudézti 'et, Sizi 'en bulh nuts'udelh hoh ndi bughunek, 'i yak'uz ts'un hadelts'ut, 'i 'uzdánts'o. ¹⁹ Ndi Yak'usda be nus whunilh'en bughunek, 'i k'an 'o nus but'az 'uhoont'ah. 'Et ndi khunek soo cho ulhchoot t'eh, 'et sih degha nus nuhwhuba whutézoo. Nts'e na'a tsahólhgus kwun be whét'en, 'et ndi khunek nuhwhuba 'et ndunt'ah. Christ, sum cho ts'utni, 'en nuhdzi be whet'en tele li'tehnilh, 'et whuts'un nuhdzi ndulhcho 'i be ndi khunek wúlhchoot. ²⁰ Ndi soo degha nus hooncha t'ewhunoohzeh huba' hoont'ah. Yak'usda bughunek nus t'eznanzin, 'i, ndet 'uwhulhni, 'aw dune dich'oh duk'una'a na'huyoose ghait'ah. ²¹ 'Et ndi khunek 'i be nus t'eznanzin, 'i, 'aw dune dich'oh hukwa' huninzun whuz na'a ilah hoh neba 'uk'e'hanguz. 'Et k'us Yak'usda, ndunnah hube'ílhdzun, 'en nts'e na'a Ndoni wheóobunelhtan yahutelhtuk, 'et whuz na'a zeh yahalhtuk hoh 'uk'e'hanguz.

2

Khunek whuts'it, 'i be whenets'odulh'eh, 'i whuch'a khahdli

¹ 'Et hoh da 'uhooja ndunnah whuhuts'it hoh nus whunilh'en, 'en chah dune tah húdelhts'i inle. 'Ink'ez whuz na'a zeh khunek whuts'it, 'i be whebodulh'eh, 'en chah nuhtah hudutélts'ilh. Ndunnah whu'iz hoh khunek whuts'it, 'i be nuhwhuba 'alha 'uhoont'ah, 'i hoolah hitelhtselh hukwa' hutet'ilh, 'et whuz na'a whunohodutelh'eh. NeMoodihti, ndun nenaónket, 'en whunts'i hits'oodutédlai. Ndunnah whuz na'a dune hodulh'eh, 'en 'il-hudzin t'eh Yak'usda ye whúske, 'i khunyaz hubugha whútelts'ulh. ² 'Ink'ez khunek ts'uhwuts'it, 'i be lhanah nahuntet'ah hubuhuntoodelh ka. 'Et huwa 'en hubugha 'uyoon njan Yak'usda buznedulh, 'et ts'uhwuts'it hoh ts'ut'en, hudutenilh. ³ 'Uyoon hiyít'i ka' huninzun 'et huwa hubughunek whuts'it, 'i be nuhgha há' huduntet'ah. 'Et whunts'ih Yak'usda ndun huba nahuteyeh, 'uda huba lhadint'ah. 'Ink'ez 'en 'int'ah ye whúske, 'i hubugha whúte'alh, 'en 'aw chaitah ho' 'int'ah.

Dune nahuna'a 'en Yak'usda dabutelih

⁴ Hoh da ndunnah lizas lubeshi inla, njan dahét'en, 'et Yak'usda 'aw whulachadítnih. 'Et huwa tsak'et whutl'ah hoolah, Tartarus ts'utni, 'en whuz whébalhdel. 'Ink'ez whuz tsahólhgus yuh huba nahuteyeh whuts'un 'utes tl'ool be whenábadezguz. ⁵ 'Ink'ez yoo niz haóodanzut da whuts'un, 'uda yun k'ut whut'en, ndunnah Yak'usda highu nuni chahunízut 'ink'ez 'aw chahidílhti, Yak'usda 'en chah 'et 'aw whulachadítnih. 'En 'uja ndi yun k'ut ndulhcho hoh too hadambun 'ink'ez too hubanghan. Hoh da lhk'udinah 'aw 'en zeh 'et whuch'a Yak'usda hubulhyih. Too hadutébilh whutsuh, Noah, 'en Yak'usda ye ts'ah'un na'a 'int'ah, 'i be dune hubulh yailhtuk, 'en hubulh 'ilhunuh 'int'ah. ⁶ 'Ink'ez nat keyah Sodom 'ink'ez Gomorrah huwhútini, 'et nawhult'ah kwun nailhtan hoh whudálhk'un 'ink'ez lhez gaih zeh whulhtsi. 'Et whuz na'a hoolah hubulhtsi, 'et hoh huba nahezya. Nus de ndunnah Yak'usda highu nuní chanteszut 'ink'ez 'aw chahidílhti, 'en huwa t'éhonozin ka 'et huwa 'uhóonla. ⁷ 'Ink'ez ndun ts'ah'un dune Lot hiyúlhni, 'en keyah whuduték'un whutsuh, 'et whuch'a Yak'usda bulizas hiyúlhnyih. Ndunnah hubutah inda, 'en hube 'ut'en k'ah whudutsun huwa ni unli. ⁸ 'En dune ts'ah'un 'int'ah, 'en hoh da hubutah inda inle, 'et 'ahoolhyez

'aw khunek k'únucha'hust'en hoh whunilh'en 'ink'ez whudits'o, ndóohoont'ah huwa dzuh nuná'duduldzut. ⁹ Ndunnah Yak'usda yé hunuljut, 'en lubeshi 'uhulh'en whuts'u hunint'uk, nts'e na'a whuch'a nabutélelh, 'et neMoodihti t'eeoninzun. 'Ink'ez ts'ah'un cha'ít'ah, 'en chah ndet dzin huba nahuteyeh, 'et whuts'un hube' whudúyah, 'et huboontun. ¹⁰ Ndunnah soo degha nus buyust'e whudutsun zeh whuts'uh hunínt'uk 'ink'ez bumoodih huba 'ants'i hinli hoh hik'unucha'ust'en. 'En 'uhududelhúti 'ink'ez hukwa' huninzun tune' hut'en. Ndunnah ncha 'aw whechaniljut hoh hoontsi' hukw'u na'a bughu yahalhtuk. ¹¹ 'Et whunts'ih lizas, ndunnah khunek whuts'it, 'i be dune hoodulh'eh, 'en huba nus hilhtus 'ink'ez huba 'o nus hincha ho' hint'ah. Ndunnah lizas, 'en whunts'i ndunnah ncha nduhut'en, 'aw neMoodihti but hubodilhtsi' hoh hubuk'echahawhus'ai.

Ndunnah khunek whuts'it, 'i be dune hodulh'eh, dawhúltsi' ho' hint'ah

¹² 'Et whunts'ih ndunnah khunek whuts'it, 'i be dune hodulh'eh, 'en tintah khunai yunduhúlt'ah. Hoh nduhint'ah 'aw t'ehonízun, 'et whunts'ih hoontsi' hukw'u na'a howu yahalhtuk. 'Et huwa tintah khunai k'una'a dahutetsah, 'et ndi hiye untsi', 'i bulh Yak'usda but huteyin. ¹³ Hubuyust'e whuts'u nínt'uk dzin duhólyez hoh 'et zeh 'uwhúwhulh'en. Ts'ah'un cha'hoot'ah tune' hust'en, 'et hukw'elha huba k'elha whutele. Nuhtah bukaya hoonli. Tube huhoont'i hoh nanhona'ah 'et whulh lhulhúgha nuhla 'uha'alh. ¹⁴ 'Uyoon 'at bulh tinta' hut'ih, 'et zeh honilh'en. Lubeshi 'uhulh'en, 'aw 'ustl'e' 'uhooneh ghat'ah. Ndunnah buzul soo cha'íltus, 'en tink'us hubanilht'uk. 'Uyoon yit'i ka' huninzun, 'et whuz na'a hubudzi hodulh'eh. Ndunt'ah Yak'usda hubulh hunilch'e hoh 'uda huba nahezya ho' hint'ah. ¹⁵ Ts'ah'un ti 'et tinch'u hunésdel. Balaam, Beor buye', 'en be 'ut'en k'ah huhóolhchoot. Dat'en inle 'et whuz na'a 'uhut'en. 'En ts'ah'un cha'hoot'ah tune' 'ut'en, hoont'i hoh 'et sooneya be buba k'elha hoonli. ¹⁶ 'Et whunts'ih hoontsi' k'una'a et'ilh 'et huwa. Khunai donkey hiyúlhni, 'i, 'aw yachalhtuk, 'et whunts'ih ndun nus whunih'en, 'en whusnik k'una'a ne'ut'en hoh donkey dune k'una'a khunekti be yulh yalhtuk hoh Balaam, "Dah!" yulhni. ¹⁷ 'Et ndunnah ndunt'ah, 'en 'ants'i too k'et whuzdla, 'aw too hoolah whunduhúlt'ah. 'Et nduk kw'us búlh nodults'ut, li'uhint'ah. Ndunt'ah whuz na'a khunek be 'alha 'uhoont'ah whu'et 'uhint'ah. Soo nts'e tsahólhgus 'ink'ez 'aw whét'en chahoolah, 'et 'ilhuz wheni 'et huba 'udun whuz'ai.

Bulunah dune nana'ah

¹⁸ K'us ndan huba 'alha 'uhoont'ah, 'en ndi yun k'ut tink'us 'et'ilh, 'en buch'a nahusdel. Ndi khunek whuts'it, 'i be hubodulh'eh, ndunnah huba 'alha 'uhoont'ah hubuhoolhgooh hukwa' hubuhulh'en. Nts'e na'a hoolhtus hoh neyust'e lubeshi whuts'u nint'uk, 'en whuts'it, 'i khunek ncha, 'i be hubulh yahalhtuk hoh tink'us húbanilht'uk hukwa' ba halh'en. ¹⁹ Ts'iyaintsuk k'une' 'uhoot'en 'et buts'ú hoozi. 'Et whunts'ih dich'oh whudutsun 'uhuwhulh'en, 'et hoh netsudule be 'ulhna huzdli. 'Et nawh cha'hóot'ah, ndan whuch'a' bunílhde, 'en bube 'ulhna hinli. ²⁰ 'Et ndunnah neMoodihti 'ink'ez neulhyis Sizi Gri, 'en soo ts'ah'un highu t'ewhunínzun, 'i be ndi yun k'ut hoontsi', 'et ts'iyawh whuch'a hudujih, 'ink'ez doo chah zeh hubuch'a' ninde, 'ink'ez nts'i hubutanahandel t'eh, 'et whutsuh da Yak'usda t'ehunuszun da, dahét'en, 'et degha nus huba whutétsi'. ²¹ 'Et ndunt'ah, 'en njan ts'ah'un ti 'aw t'ehonízun t'eh, 'et sih da huba soo' hot'e wule. 'Et hukw'elh'az t'ehonanzin t'eh 'ink'ez butl'a hida'ai hoh 'i hich'a nalhúya, 'et whuz na'a dek'elh'az 'i 'udechoo degha nus hotétsi'. ²² 'Ink'ez nts'e na'a hubulh dahooja, ndi khunek 'i bughu whuts'odul'eh, nts'e na'a daja ni, 'et whuz na'a 'uhooja hoh ndez na'a njan ndutni, "Lhi nahiyulkoo, doo chah zeh nahiyudlat." 'Ink'ez njan chah

ndutni, "Goso too be soo cho bubuna'hulhdoh, 'ink'ez hukw'elh'az whutl'us tanahalgok." Ndunnah 'et whuz na'a 'et duhint'ah.

3

NeMoodihti nts'e na'a nets'u náhezya, 'aw sa nuchá'ust'en

¹ 'Aw 'et nuhwhuk'esi', ndi bulh nankoh dustl'us nuhts'o k'e'úsges. 'I be nuhwhubeni unzoo, 'et whunts'ih nuhwhuba whunahlhúnih. ² 'Et ndunnah nus whunilh'en Yak'usda bube'ildzun hinli, 'en hoh da daja hudani. 'Ink'ez nuwheni whel'a 'en 'uts'int'ah, neMoodihti neulhyis bughunek, 'i be no-hwhulh yats'alhtuk 'ink'ez nuhwhuzdáni, 'et huwa ts'iyawh whunaoohlhúnih. ³ Njan 'et 'udechoo soo cho t'ewhunoohzeh huba' hoont'ah. Dek'elh'az dzin t'eh, 'et ndan Yak'usda għudlo, 'en nts'e na'a buyust'e whuts'u nínt'uk, 'et whuz na'a zeh 'uhutet'ilh hukwa' huninzun, 'en chah nuhtah 'uhutet'ilh. ⁴ 'Ink'ez 'uhudutenilh, "Alha ih Sizi Gri nuhts'u nahezya doo chah whusanatedalh. Ndān 'udáhni, 'en nts'é 'ut'en? Netsuh da ts'iyawh yahadla 'et whunts'ih 'awhuz whusanáchasdaih. 'Udechoo ndi yun 'ulya 'ink'ez k'an 'et dzin whuts'un, ts'iyaintsuk dawhút'en, 'et zeh nduwhút'en." ⁵ 'Uda dahooja 'aw whunahoolnih hukwa cha'hunízun. Yak'usda bughunek, 'i be 'udechoo 'uda nduk yaz 'uhóolya inle. 'Ink'ez ndi yun bulah teh tl'ah 'int'ah 'ink'ez bulah yun unli inle. ⁶ Yak'usda bughunek 'i be too hadambun. 'Et whuz na'a yun k'ut too be' hoonla. 'Et hoh ts'iyawh hoolah whulhtsi. ⁷ Ndunnah Yak'usda yugħu nuni chanizut 'ink'ez 'aw chahidilhti, 'en huba nahuteyeh Yak'usda ye whúske, 'i hubugħa whútels'ulh ka, 'et ndet dek'elh'az dzin whuts'un bughunek be huba k'ah hoontun. 'Et k'an 'et yun 'ink'ez nduk yaz chah, hoh t'eh kwun be ts'iyawh whuduték'un. ⁸ 'Et whunts'ih nuhwheni nuhwhuk'esi', njan 'ilħun 'et whunaoħħoolħúnah gunih. NeMoodihti 'ilħudzin 'et 'ants'i 1,000 be naooduzuk ba lí'hoont'ah. K'us 1,000 be naooduzuk 'et 'ilħudzin ba lí'hoont'ah. ⁹ NeMoodihti nts'e na'a nets'u náhezya, 'aw sa nuchá'ust'en. 'Et bulunah sa stla 'ut'en huninzun. 'Et whunts'ih tube sa neba ilh'i. 'Aw 'ilħunuh whunts'i tinta oolts'it hukwa cha'nizun. 'Et ts'iyana lubeshi ch'a hubeni nahadunóoleħ 'et zeh hubuts'u hukwa' nizun.

NeMoodihti budzin whusaóotelts'ulh

¹⁰ 'Et buka tsi cháhoodli hoh dune 'undunut'i 'ulh'ek whusayih, 'en k'una'a buka tsi cháhoodli hoh neMoodihti budzin whusaóotelts'ulh. Ndet ndúħoo ja t'eh, 'et nduk yaz 'ants'i kwun delħútulħ hukw'u na'a hoolah whutele. 'Ink'ez ndai 'ulya, 'i, ts'iyawh kwun ulhtus, 'i be ts'iyaintsuk natelgħeh. Ndi yun 'ink'ez ndai buk'e yuzdla, 'i bulħi ts'iyawh duték'un. ¹¹ 'Et whutsuh ndótenilh t'eh, ndez na'a dune unli wahle huba' hoont'ah, lubeshi bu'et 'ink'ez Yak'usda be 'ut'en k'ah 'et zeh hukw'u ne'ooħt'en. ¹² Yak'usda budzin whuz de whélts'ulħ, 'ahoolhyez hukwa tsi hóħli 'ink'ez 'a cho whusahólts'it whuz na'a hukwa' holħ'en. Nts'oh whégha whezulħ hoh 'et nduwhútenilh, 'et t'eh nduk yaz ndulħcho hoh kwun be hoolah whutele. 'Et ndai ts'iyaintsuk 'ulya, 'i, kwun dullħuk 'i be ts'iyaintsuk natelgħeh. ¹³ 'Et whunts'ih njan ndet nets'u hoozi, ndi yun 'ink'ez yaz 'et k'ahoondit, 'et 'ahoolhyez hukwa tsi ts'úhole. Njan 'et ye ts'ah'un na'a 'int'ah, 'i 'et zeh 'ilħuz wheni 'et 'utet'ilh.

Soo ts'ah'un zeh 'ooħte

¹⁴ 'Et huwa nuhwheni nuhwhuk'esi' ndi 'i ts'iyawh buka tsi hóħle. Soo ndet 'o 'un 'ooħneħ ghait'ah hoh hóolħdzih. 'Et hoh 'aw hoonliyaz hukwaya chasóħħle. 'Et t'eh hoonliyaz nuhk'echáholhts'it, 'ink'ez Yak'usda be ts'ah'un aħt'ah, 'et whuz na'a 'en ba hóolħdzih. 'Et Sizi Gri whusanája t'eh, 'et whuz na'a 'ooħt'e. ¹⁵ 'Ink'ez neMoodihti tube sa neba ilh'i, 'et lhanah hudoojih

huba, 'et whuz na'a huwu nuni noohdeh huba' hoont'ah. 'Ink'ez nelhutsin buk'ets'intsi', 'en Paul hiyulhni, 'en ye whunih, 'i hubugha whults'ut, 'et 'i bugha Yak'usda bughunek nuhts'o k'e'anguz. ¹⁶ 'Et ts'iyawh be' dustl'us i k'ut 'et howu yalhtuk. Bulah khunek tube howa whúlna hoh t'eznezech. 'Et ndunnah 'aw whechaoodí'l, 'ink'ez 'aw soo cha'ítus chah, Yak'usda bughunek 'i dich'oh hukwa' huninzun k'una'a na'huyínl. 'Et whuz na'a zeh 'onghoh bughunek 'i chah 'et ndihíyinla. 'I bugha hoontsi', 'et dich'oh khanáhuwhunt'ai. ¹⁷ 'Et huwa nuhwheni nuwhuk'esi', njan 'et nduwhútenilh whutsuh, 'uda t'eooonáhzun. 'Et huwa howahli! Nts'e na'a 'aht'ah, whuz na'a zeh 'ooht'e. Doo ka ndunnah hintsi', 'en tinta' hut'ih, 'en hubuk'una'a 'oohnneh. 'Et hubuk'una'a 'ahja t'eh, 'et laht'ah tehle. ¹⁸ 'Et whunts'ih neMoodihti 'ink'ez neulhyis Sizi Gri ye unzoo, daja ni 'ink'ez ndet bughu t'ets'oninzun, 'i chah, 'o nus bugha hodoolhú'eh. 'En ts'un ye dézti, 'i nawhult'ah k'an 'et 'ink'ez 'ilhuz wheni. 'Et ndoh honeh.

'Udechoo Dustl'us John Yuk'e'ánguz

Ndi khunek be ts'úkhuna, 'i bugha

¹ Soo 'udechoo da whuts'un hoonli soo ts'ah'un na'a 'uts'udánts'o, nena be chah ts'onah'en, 'ink'ez nela be chah but'ats'úgheznai khunek be ts'úkhuna, 'i bugha. ² Ndi be ts'ukhuna nenah hawhélts'ut 'ink'ez ts'uhon'en 'ink'ez howu yats'alhtuk. Ndi 'ilhuz be ts'ukhuna ne'aBá bulh 'int'ah. 'Et nenah hawhélts'ut, 'i hubugha nuhts'udáni. ³ Ndet ts'uhó'en 'ink'ez 'uts'udánts'o, 'et bugha 'un whuts'útni. 'Et huwa lhulh 'uts'óot'e wule. 'Et 'alha ne'aBá 'ink'ez buYe' Sizi Gri 'en bulh 'ilho ts'udédowh. ⁴ 'Ink'ez ndi ts'iyawh huba nuhwhuts'un k'e'ts'anguz, 'et huwa tube cho whunoohlhnik.

Ndi be whét'en, 'i buniz ts'edulh t'eh, 'et 'ilho 'uts'int'ah ts'inli

⁵ Ndi khunek 'uts'udánts'o 'i 'int'ah, 'en buts'uhayélts'ut, 'i bugha ndun whuts'útni, Yak'usda be whét'en, 'i 'int'ah, 'ink'ez 'aw tsahólhgus 'i 'aw bughu chaíhoolah. ⁶ 'En bulh lhulh 'úts'int'ah ts'utni, 'ink'ez tsahólhgus yuh ts'ih ts'edulh t'eh, 'et ts'uwhuts'it ho' ts'utni, 'ink'ez 'aw khunek 'alha 'int'ah, 'i buk'uncha'ts'ust'en. ⁷ 'Et whunts'ih be whét'en, 'i bulh 'int'ah, 'i buniz ts'edulh t'eh, 'et 'ilho lhulh 'uts'int'ah ts'inli 'ink'ez buYe' Sizi Gri buzkai be nelubeshi ts'iyawh yuna'dalhde. ⁸ 'Aw lubeshi chats'it'ih ts'utni t'eh, na'uzdunut'ah 'ink'ez khunek 'alha 'int'ah, 'i neghu hoolah. ⁹ Lubeshi 'uts'ah'en ts'utni t'eh, 'aw nelachadutesni 'ink'ez ts'ah'un 'int'ah hoh nelubeshi neba yunaoodutélnah 'ink'ez tink'us na'a 'uhoont'ah, ts'iyawh whuch'a yuna'dutéldoh. ¹⁰ 'Aw lubeshi cha'ts'ilil ts'utni t'eh, Yak'usda whuts'it 'int'ah ts'utni ho' ts'utni, 'ink'ez bughunek, 'aw neghu hoolah.

2

¹ Suzkehyaz, 'aw lubeshi 'utelh'ilh whuch'a 'et huwa ndi khunek 'i be nuhwhuts'un k'e'usges. Ndunnah lubeshi 'ulh'en, 'en huba ne'aBá Yak'usda bubut neba yatelhtuk, Sizi Gri, ts'ah'un na'a 'int'ah, 'en 'int'ah. ² 'Ink'ez 'en 'int'ah nelubeshi k'elha dazsai. 'Aw nuwheni zeh ilah. Yinkak nduhóolhcho hoh whulubeshi k'elha chah. 'I be ne'aBá soo cho nets'u naitóot'en 'et hukwa.

Sizi Gri ndan unli, whuz na'a t'ezninzun

³ Khunek netl'aída'ai, 'i buk'une' ts'ut'en t'eh, 'et whuz na'a t'ets'onínzun 'i bugha Sizi Gri t'ezninzun. ⁴ Ndun 'en t'enuszun ni, 'ink'ez yughunek yuk'unucha'ust'en t'eh, 'en whuts'it 'int'ah 'ink'ez ndi khunek 'alha 'int'ah, 'i 'aw chayít'ih ho' 'int'ah. ⁵ 'Et ndan yughunek k'une' 'ut'en, 'en 'alha Yak'usda ye nék'entsi', 'i be ts'ah'un na'a lhadúlya ho' 'int'ah. Njan huwa t'ets'onínzun Sizi Gri buyúzdelhts'i ho' ts'int'ah. ⁶ Ndán ye yudínda ni t'eh, nts'e na'a nusíya, 'et whuz na'a zeh nóya huba' hoont'ah. ⁷ Sulhutsinkah* 'aw khunek k'andit, 'i netl'aída'ai, 'i bugha ilah nuhts'un k'e'usges. 'Udechoo whuts'un t'enahzun ndi khunek 'uda, 'i 'int'ah. Ndi khunek 'uda, 'i 'udechoo whuts'un déhts'o, 'i 'int'ah. ⁸ Tsahólhgus yuh 'aw 'et whedúdeh 'ink'ez ts'ah'un be whét'en, 'i 'aw 'et be whét'en suli. 'Et huwa nuhts'un k'e'usges 'ink'ez doo chah 'un whudúsni, k'an 'et khunek netl'aída'ai, 'i ndi 'alha khunek 'i yulh 'int'ah, 'ink'ez nuhwheni chah bulh 'áht'ah. ⁹ Ndán be whét'en niz 'int'ah ni t'eh, 'ink'ez dulhutsin ts'udutnik, 'en 'awhuz tsahólhgus yuh usda ho' 'int'ah. ¹⁰ Ndán dudulhutsin k'entsi', 'en be whét'en tah 'int'ah 'ink'ez 'aw tink'us 'utét'ilh whuts'u nót'uk

* ^{2:7} Ndi khunek "sulhutsinkah", ndan Sizi Gri huba 'alha' yint'ah, 'en lhuzkehkeh hinli li'hint'ah. 'Et huwa lhulhutsin 'ink'ez lhulhtuskeh hudli ho' hint'ah.

ghait'ah. ¹¹ 'Et whunts'ih ndan dudulhutsin ts'udutnik, 'en tsahólgus yuh 'int'ah 'ink'ez tsahólgus yuh núya. 'Ink'ez nts'e tezya 'aw t'echaooníszun, ndi tsahólgus be chawhes'en suli 'et huwa.

- Yak'usda ba hilhtus nahúsdli*
- ¹² 'Uskehyaz Sizi Gri boozi bugha nuhwhulubeshi nuhwhuba buna'déde, 'et huwa nuhts'un k'e'usges.
- ¹³ Nuhwheni 'ubákah yulh ndult'ah ndun 'udechoo whuts'un hoonli, 'en t'enahzun, 'et huwa nuhts'un k'e'usges.
Chílkah ntsi' buch'a nulhde 'et huwa nuhts'un k'e'usges.
'Uskehyaz ne'aBá t'enahzun, 'et huwa nuhts'un k'e'usges.
- ¹⁴ Nuwheni 'ubákah ndun 'udechoo whuts'un 'int'ah t'enahzun, 'et huwa nuhts'un k'e'isguz.
Chilhkah ulhtus 'ink'ez Yak'usda bughunek nuhyudín'ai,
'ink'ez ntsi' buch'a nulhde,
'et huwa nuhts'un k'e'águz.

Ndez na'a ndi yun k'ut uzdóolts'i

- ¹⁵ Ndi yun k'ut tink'us 'uwhut'en 'ink'ez ndi yun k'ut hoonli, 'i chah, whuts'u nóoht'uk gunih. Ndán ndi yun k'ut tink'us ne'whut'en ndóohoont'ah whuts'u nint'uk t'eh, 'aw ne'aBá ye nék'entsi', 'i bughi yoolah ho' 'int'ah.
- ¹⁶ Neyust'e whuts'u nint'uk, 'ink'ez nena chah whuts'u nint'uk, 'ink'ez ndai aht'i be 'ududelhuti t'eh, ndi 'i ts'iyawh ndi yun k'ut huba 'int'ah, 'ink'ez 'aw ne'aBá ts'un hachahoots'ut 'et huwa. ¹⁷ Ndi yun 'aw 'et whewhúlt'sit 'ink'ez buts'úznint'uk, 'i chah, 'et whunts'ih Yak'usda hukwa' ninzun teh ne'út'en, 'en 'ilhuz khuténa.

- Ndunnah Christ ch'a detni, 'en buch'a huwahli*
- ¹⁸ 'Uskehyaz 'aw 'et dek'elh'az 'et né'hunent'o ho' hoont'ah. 'Ink'ez ndun Christ ch'a detni, 'en whuz de úyalh whulh údahts'o. K'an 'et whunts'i Christ ch'a hudemtni hulai ho' hoont'ah. 'Et huwa nt'ets'onínzun 'aw 'et dek'elh'az 'et né'hunent'o ho' hoont'ah. ¹⁹ Nets'u hahándel 'et whunts'ih 'aw nelh hudedowh ilah 'uhint'ah. Nelh huditowh 'uhint'ah t'eh, nelh zeh da hoot'e wule. 'Et whunts'ih whehandel 'et huwa ts'iyanaah t'ebunózin 'aw nelh hudedowh chahílah. ²⁰ 'Et whunts'ih ndun Christ lubeshi bughu hoolah, 'en Ndoni nuhyída'ai 'ink'ez ts'iyaintsuk t'eoónáhzun. ²¹ Ndi khunek 'alha 'int'ah, 'i t'enuzahzun huwa ilah nuhts'un k'e'águz. Ndi khunek t'enahzun 'et huwa nuhts'un k'e'úsuges 'ink'ez ndi khunek 'alha 'int'ah, 'i whuts'it bughu hoolah.
- ²² Ndán Sizi 'en Christ 'unli 'et whuts'ooodedlai, 'en whuts'it 'int'ah. 'En Christ ch'a détni 'int'ah. 'En 'int'ah ne'aBá 'ink'ez buYe' bulh whuts'ooodedlai. ²³ Ndán ne'aBá buYe' ts'ooodedlai, ne'aBá chah chayít'ih ho' 'int'ah. Ndán ne'aBá buYe' buba 'alha' yint'ah t'eh, be'aBá chah yit'i ho' 'int'ah.

- 'Udechoo whuts'un whudáhts'o 'ilhuz wheni bulh 'óoh't'e*
- ²⁴ 'Et huwa 'udechoo whuts'un whudáhts'o 'ilhuz wheni bulh 'óoh't'e. 'Et 'udechoo whuts'un whudáhts'o nohwhulh 'úhoont'ah t'eh, 'et sih ne'aBá 'ink'ez buYe' chah bulh úteht'ilh. ²⁵ Njan nets'ú hoozi, 'ilhuz ts'ukhutena, 'et 'uwhúlhni. ²⁶ Ndunnah nanohunte'ah hukwa' 'ut'en, 'en bugha ndi nuhts'un k'e'úsuges. ²⁷ 'Et whunts'ih Ndoni ne'aBá nuhyída'ai, 'i 'ilhuz nohwhulh 'int'ah, 'ink'ez 'uyoon dune 'aw 'o 'un whunohodoolh'eh huba cha'hóot'ah. 'Et k'us ndi nuhyudélts'ut, 'i ts'iyaintsuk whunohdulh'eh 'ink'ez ts'ah'un 'int'ah, 'aw whuts'it, 'i ilah 'int'ah. 'Et soo nts'e na'a whunohdálh'i, whuz na'a zeh bulh 'óoh't'e.

Nuwheni Yak'usda buzkehkah 'aw hoonli hukwaya chats'ilah hoh bubut nuts'udóolya

²⁸ 'Uskehyaz ndun 'en zeh bulh 'óoh't'e. 'Et hoh nuhnalh ts'et hainya, 'ink'ez whusanája t'eh, nedzi ulhtus unli 'ink'ez 'aw hoonli hukwaya chats'ilah hoh bubut núzdoolya. ²⁹ 'En ts'ah'un na'a 'int'ah t'eoónáhzun t'eh, t'eoónahzun ndun ts'ah'un ne'út'en 'en Yak'usda yé ulhtus, 'i be huwhuzdli ho' hínt'ah.

3

¹ Dalcho, 'i be ne'aBá nek'entsi' negha óoni'ai, Yak'usda dich'oh nendúlhni buzkeh 'uts'int'ah soo cho whunulh'en. 'Et huwa ndi yun k'ut whut'en net'echahunízun, didut 'aw t'ehinízun 'et huwa. ² Nuhwhuk'esi' k'an 'et Yak'usda buzkeh ts'inli. Daztét'ilh 'awhuz nenalhts'et hachawhulhts'it. 'Et whunts'ih nt'ets'oninzun ts'a'en t'eh, soo bunduztel'ilh, soo nts'e na'a dantah, whuz na'a uztet'ilh 'et huwa. ³ 'Ink'ez ndunnah whuz na'a hits'un hukwa tsi hooli, dutsun hoolah na'hudutelsih, dant'ah butsun hoolah, whuz na'a.

Lubeshi 'uts'ulh'en ts'iyawh whulazdoonih huba 'uhoont'ah

⁴ Ndán lubeshi 'ulh'en, 'aw khunek yuk'únucha'ust'en ho' 'int'ah. 'Et khunek k'uts'uyus t'eh, lubeshi 'uhoont'ah. ⁵ 'Ink'ez t'eoónáhzun nelubeshi neba 'ún yutoolhdelh ka ndi yun k'ut nuséya. 'Ink'ez didut 'aw lubeshi bugah hoolah ho' 'int'ah. ⁶ Ndán ye yudinda, 'aw lubeshi oolh'en ghaít'ah ho' 'int'ah. Ndán lubeshi 'ulh'en, 'aw chayí'il 'ink'ez 'aw t'echainízun. ⁷ 'Uskeh 'uyoon nanwhunoo'ah gunih. Ndán ts'ah'un ne'ut'en, 'en ts'ah'un 'int'ah. Dant'ah Sizi Gri ts'ah'un 'int'ah, whuz na'a ndunt'ah ho' 'int'ah. ⁸ 'Udechoo whuts'un netsudule lubeshi 'ulh'en. Ndán lubeshi 'ulh'en, 'en netsudule yunéyah 'int'ah. Njan 'et huwa Yak'usda buYe' ndi yun k'ut nuséya, 'et huwa netsudule be 'ut'en ts'iya yóolhtsilh 'et whuba. ⁹ K'us ndán Yak'usda yé ulhtus, 'i bé whuzdli, 'en lubeshi cha'ulh'en. Ndi Yak'usda ts'un hainzut, 'i be 'ilhuz wheni ts'ukhuténa, 'ink'ez 'ilhuz wheni yulh 'int'ah. 'Et ndunnah 'i be whuzdli, 'en 'aw lubeshi 'uholh'en ghaít'ah.

Nuwheni Sizi Gri uznedulh ts'iyawh lhk'ets'oodútsi'

¹⁰ 'Et ndez na'a Yak'usda buzkeh 'ink'ez netsudule buzkeh chah t'ehunudzun: ndan ts'ah'un nucha'ust'en, k'us dudulhutsin k'echaítsi', 'en Yak'usda yuneyah ilah ho' 'int'ah. ¹¹ Soo 'udechoo whe' whudit'en whuts'un ndi khunek dahts'o njan ndutni, lhk'ets'oodutsi', ni. ¹² Ndun dune Cain 'en k'una'a ilah. 'En ntsi' niyah 'int'ah 'ink'ez dudulhutsin yuzilhghi. 'Et di ka 'uyinla? Be 'ut'en untsi' 'ink'ez bulhutsin 'en ts'ah'un ne'ut'en, 'et hukwa' yinla. ¹³ Sulhutsinkah ndi yun k'ut whut'en nuhts'u hudutnik t'eh, khun teh nuhwhuba hócha gunih. ¹⁴ Nelhutsinkah hubuk'ets'ints'i', 'et huwa t'ets'oninzun dats'uzsai 'ink'ez nats'ukhítña li'ts'int'ah. Ndun dulhutsin k'echahitsi', 'awhuz yahadla li'hint'ah. ¹⁵ Ndán dulhutsin ts'udutnik, 'en néghan 'int'ah. 'Ink'ez t'eoónáhzun ndán néghan, 'en 'ilhuz be ts'ukhuna, 'i bughi yoolah ho' 'int'ah.

Sizi Gri neba daja 'et huwa be lhk'ets'udutsi', 'i t'ezninzun

¹⁶ Sizi Gri 'en ye khuna, 'i neba yuladetnik, 'et huwa be lhk'ets'udutsi' t'ezninzun. 'Ink'ez nuwheni chah nelhutsinkah be ts'úkhuna, 'i huba hubulazdoonih huba' hoont'ah. ¹⁷ 'Et whunts'ih ndán ndi yun k'ut hoonli ut'i hoh bulhutsin ye dunidzut, 'ink'ez dudzi be 'aw yugha techa'nizil t'eh, nts'e na'a Yak'usda ye nék'entsi', 'i yulh 'útet'ilh? 'Et ndut'en t'eh, nts'e na'a Yak'usda k'etetsi'? ¹⁸ 'Uskehyaz 'aw khunek be zeh ilah lhk'ets'udutsi' uzdooni. Soo ts'ah'un na'a ne'e'ut'en be chah lhk'ets'oodutsi'. ¹⁹ Njan 'et huwa nt'ets'oninzun khunek 'alha 'int'ah, 'i bulh 'uts'int'ah. 'Et t'eh bubut nedzi ts'ah'un 'oot'e. ²⁰ Nedzi bugha neba nahezya t'eh, Yak'usda 'o nus negha te'ninzun ho' 'int'ah, ts'iyaintsuk t'eoónízun 'et huwa. ²¹ Nuhwhuk'esi' nedzi

neba chahesye t'eh, whéchats'uniljut hoh Yak'usda bubut nuzdútelya. ²² Dant'i buts'un ka' ts'utni, 'i negha íyunle, bugha 'i ts'oontun 'ink'ez hoonzoo hoh bunalh ne'ts'ut'en 'et huwa. ²³ Ndi bughunek netl'aída'ai, buYe' Sizi Gri, 'en ndan unli, 'et neba 'alha 'oot'e 'ink'ez lhk'ets'oodutsi'. 'Et whuz na'a bughunek netl'aída'ai.

Soo cho huwohle, lhanah nus whunilh'en na'hududil'i, 'en 'uda netah 'uhut'en ho' hoont'ah

²⁴ Ndán yughunek oontun, 'en Yak'usda yudínda 'ink'ez Yak'usda chah yuh 'int'ah. Ndoni neyída'ai 'en be t'ets'onínzun neyuh ts'ih nelh 'int'ah.

4

¹ Nuhwhuk'esi', nudúdeh, 'i ts'iyawh ilah nuhwhuba 'alha 'oot'e. Ndi nududeh, 'i óolhdzih Yak'usda ba ts'ah'un 'int'ah tulih. Lhanah huwhuts'it hoh nus whunilh'en yun k'ehindel 'et huwa. ² Ndai nududeh, 'i Sizi Gri buyust'e be ndi yun k'ut nuseya, ni t'eh, 'i Yak'usda ba ts'ah'un ho' 'int'ah. 'Et huwa Yak'usda buyégha ndan unli t'ets'onínzun. ³ Ts'iyai nududeh, 'i Sizi Gri buyust'e be ndi yun k'ut nuseya, 'aw nduchadusnih t'eh, 'aw Yak'usda bulh cha'it'ah ho' 'int'ah. 'Et ndi nududeh, 'i Christ yuch'a détni, 'i 'int'ah. Whusateyalh whulh 'udahts'o 'ink'ez 'uda ndi yun k'ut hoonli ho' 'int'ah. ⁴ Uskehiaz, Yak'usda bulh 'áht'ah 'ink'ez ndunnah Christ ch'a hudemtni 'uda hubuch'a' núlhde. Ndun nuhyudínda, 'en, ndi yun k'ut netsudule 'en buch'a degha nus 'ultus ho' 'int'ah 'et huwa. ⁵ Ndunt'ah ndi yun k'ut humoodih hube'ilhdzun hinli. 'Et huwa yun k'ut whut'en hubuk'una'a yahalhtuk 'ink'ez yun k'ut whut'en hubuhoozélhts'ai. ⁶ Nuwheni Yak'usda bube'ilhdzun ts'inli. Ndunnah Yak'usda t'eninzun, 'en nehudits'o. Ndunnah Yak'usda hube'ilhdzun chailah, 'en 'aw chanehoozélhts'ai. 'Et huwa njan nududeh, 'i ts'ah'un 'int'ah 'ink'ez tink'us 'int'ah nudúdeh, 'i t'ebuznínzun.

Ts'iyahah lhk'edutsi', 'en Yak'usdayé ulhtus, 'ibéhuwhuzdli 'ink'ez Yak'usda t'ehinínzun

⁷ Nuhwhuk'esi' ts'iyawh lhk'ets'oodutsi'. Bé lhk'ets'udutsi', 'i Yak'usda ts'un hálts'ut ho' 'int'ah. Ts'iyahah lhk'edutsi', 'en Yak'usda yé ulhtus, 'i bé huwhuzdli 'ink'ez Yak'usda t'ehinínzun. ⁸ Ndán, 'en 'aw 'ilhunah k'echai'tsi', 'en Yak'usda 'aw t'enízun ho' 'int'ah, Yak'usda 'en nek'entsi' 'int'ah 'et huwa. ⁹ 'Aw 'ilhunuh zeh buYe' 'en ndi yun k'uz yútelh'a. 'En be 'ilhuz wheni ts'ukhoona 'et whuba. 'Et whuz na'a Yak'usda ye nék'entsi', 'i yunénilhtan. ¹⁰ Ndez na'a njan duwhutni, nuwheni Yak'usda buk'echats'ítsi' inle, 'et whunts'ih nek'entsi' 'ink'ez buYe' whusayálh'a nelubeshi k'elha datetsah 'et whuba. 'I be soo cho nets'u naítat'en. ¹¹ Nuhwhuk'esi', 'et whuz na'a Yak'usda nek'entsi' t'eh, nuwheni chah lhk'ets'oodutsi' huba' hoont'ah.

Lhk'ets'udutsi' t'eh, Yak'usda neyudinda

¹² 'Aw dune Yak'usda ya'en hoolah. Lhk'ets'udutsi' t'eh, Yak'usda neyudinda 'ink'ez ye nék'entsi', 'i nedzi yuh soo ts'ah'un na'a lhaóodulya. ¹³ Njan 'et huwa t'ets'onínzun Ndoni negha iní'ai 'et hoh bulh 'uts'int'ah 'ink'ez didut chah neyudínda. ¹⁴ Ndi yun k'ut whut'en hubutélhyi huba ne'aBá buYe' whusayálh'a. 'Et ts'uwha'en 'ink'ez howu yats'ulhtuk. ¹⁵ Ndán Sizi Yak'usda buYe' 'int'ah ni, 'en Yak'usda yuyudínda 'ink'ez didut chah Yak'usda bulh 'int'ah ho' 'int'ah. ¹⁶ Ndi Yak'usda ye nék'entsi', 'i t'eznanzin 'ink'ez neba 'alha 'ohoont'ah. Yak'usda nek'entsi' 'int'ah. Ndán bé lhk'ets'udutsi', 'i bulh 'int'ah, 'en Yak'usda bulh 'int'ah 'ink'ez Yak'usda yuyudínda ho' 'int'ah.

Ndez na'a be lhk'ets'udutsi', 'i soo ts'ah'un na'a neba lhadúlya suli

¹⁷ Neba nahudeh dzin 'et sih nedzi wúlhtus huba, 'et whuz na'a be lhk'ets'udutsi', 'i soo ts'ah'un na'a neba lhadúlya suli. Christ didut 'et dunt'ah huwa, nuwheni chah ndi yun k'ut 'et nduts'ínt'ah 'et huwa. ¹⁸ Bé lhk'ets'udutsi', 'i 'aw nujut bughu hoolah. 'Et whunts'ih bé lhk'ets'udutsi' soo ts'ah'un na'a lhadúlya suli, 'i nujut 'un whenaínuyukw. Nujut dzuh nénumhdzut ho' 'int'ah. Ndán nuljut, 'en bé lhk'ets'udutsi', 'i buyuh soo ts'ah'un na'a lháchadit'ah ho' 'int'ah. ¹⁹ Yak'usda didut 'udechoo nek'entsi' 'et huwa buk'ets'intsí'.

Be 'alha 'ohoont'ah, 'i be Yak'usda buk'une' ts'oot'en

²⁰ Ndán Yak'usda buk'esi' ni t'eh, 'ink'ez dudulhutsin ts'udutnik, 'en whuts'it 'int'ah. Nts'e na'a dudulhutsin yunilh'en whunts'i yuk'echaítsi' t'eh, Yak'usda 'aw chayes'en, 'ink'ez nts'e na'a yuk'etetsi'? ²¹ 'Ink'ez ndi khunek netl'aídai, 'i ndez na'a njan dúhoont'ah; ndán Yak'usda k'entsi', dudulhutsin chah k'eoootsi' huba' hoont'ah.

5

¹ Ndán Sizi, 'en Christ 'int'ah, huba 'alha 'ohoont'ah, 'en Yak'usda yé ulhtus, 'i be whuzdli 'int'ah. Ndunnah ndán 'ilhuz be ts'ukhutena negha óoni'ai, hik'entsi' t'eh, ndunnah 'en be yé ulhtus, 'i whuzdli, 'en chah buk'ehootsi' huba' hoont'ah. ² Yak'usda buk'ets'intsí' 'ink'ez bughunek ts'oontun t'eh, 'et njan 'et huwa t'ets'oninzun Yak'usda buzkeh buk'ets'intsí'. ³ Ndi bughunek ts'oontun t'eh, 'et whuz na'a Yak'usda buk'ets'intsí'. 'Ink'ez ndi bughunek 'aw bugha chahoolnah hoh buk'une' ts'oot'en. ⁴ Ndunnah Yak'usda yé ulhtus, 'i be whuzdli, 'en ndi yun k'ut 'ut'en ntsi' ch'a' nilhde. Bé neba 'alha 'ohoont'ah, 'i be whuch'a' nilhde. ⁵ Ndán Sizi 'en Yak'usda buYe' unli huba 'alha 'ohoont'ah, 'en ndi yun k'ut 'ut'en ntsi', 'i ch'a' ulhdeh.

Yak'usda buYe' dant'ah 'int'ah whunénulhtun

⁶ Sizi 'en Christ 'int'ah. 'En too 'ink'ez 'uskai be whusainya. 'Aw too be zeh ilah. Too 'ink'ez buzkai be whusainya. Ndoni ts'ah'un be' hoont'ah, 'i 'int'ah. 'Et huwa 'en 'uja bunalh 'úhooja. ⁷ 'Et tanah 'en yak'uz whuts'un bunalh 'úhooja. Ne'aBá, 'ink'ez ndun khunek, 'ink'ez Ndoni chah. Ndunnah tanah 'ilhunuh zeh hinli. ⁸ 'Et ndi tahált'ah, 'i ndi yun k'ut bunalh 'úhooja. Ndoni, too, 'ink'ez buzkai chah. Ndun tahált'ah 'i lhgha 'uhudéja. ⁹ Dune bunalh 'úhooja bughunek ts'ilhchoot t'eh, Yak'usda bunalh 'úhooja 'o nus hooncha ho' hoont'ah, 'ink'ez ndi Yak'usda buYe' yughu yailhtuk, 'i 'int'ah. ¹⁰ Ndán Yak'usda buYe' huba 'alha' yint'ah, Yak'usda daja ni, 'et chah huba 'alha 'ohoont'ah whuzdli. Ndán Yak'usda huba 'alha cha'yit'ah, 'en Yak'usda whuts'it ninzun. Yak'usda buYe' yughu yailhtuk huba 'alha cha'yít'ah 'et huwa. ¹¹ Ndi bunalh 'úhooja, 'i Yak'usda 'ilhuz ts'ukhutena negha óoni'ai. Ndi 'ilhuz be ts'úkhuna, 'i buYe' bulh 'int'ah. ¹² Ndán buYe' ut'i 'ilhuz be ts'ukhuna, 'i ut'i ho' 'int'ah. Ndán Yak'usda buYe' chait'ih, 'en 'aw 'ilhuz be ts'ukhuna, 'i chait'ih ho' 'int'ah. ¹³ Ndunnah Yak'usda buYe' boozi huba 'alha' yint'ah ndi nuhts'un k'e'anguz. 'Et hoh 'ilhuz khutehna whaht'i t'eeonóhzin, 'ink'ez Yak'usda buYe' boozi nuhwhuba 'alha 'oot'e zeh 'ooht'e.

Yak'usda yunéyah, 'en ndet buts'un hukwa' hutni, ts'iyawh hubudits'o

¹⁴ 'Et whechats'uniljut hoh buts'un tezdudlih, 'et 'i 'int'ah, ndet hoonli buts'un hukwa' ts'utni, 'et whuz na'a hukwa' ninzun t'eh, nedits'o 'int'ah. ¹⁵ 'Ink'ez nedits'o t'ets'oninzun t'eh, ndet buts'un húkwa' ts'utni, ndi whutsuh da buts'un húkwa' ts'utni, 'et nawh cha'hoot'ah negha tékulh. ¹⁶ Ndán bulhutsin lubeshi 'aw yuk'é dachatesah, 'i 'ulh'en, yunilh'en t'eh, Yak'usda yoodolhkut 'ink'ez 'et ndan lubeshi 'aw yuk'é dachatesah 'ulh'en, 'en khutena yugha óote'alh. 'Et lubeshi bughá daztésah, 'i chah hoonli. 'Aw 'et huba

tenadondli chaduzúsnih. ¹⁷ Ts'ah'un be nucha'ts'ust'en, 'i ts'iyawh lubeshi 'int'ah. 'Ink'ez lubeshi bughá daztétsah, 'i chah hoonli.

Ndan Yak'usda yé ulhtus, 'i bugha whuzdli, 'aw lubeshi cha'ulh'en

¹⁸ Ndan Yak'usda yé ulhtus, 'i bugha whuzdli, 'aw lubeshi cha'ulh'en, 'et t'ets'oninzun. 'Et whunts'ih ndan Yak'usda yé ulhtus, 'i bugha whuzdli dich'oh khudli ho' 'int'ah, 'ink'ez ndunnah ntsi', 'en 'aw yut'aóonah għait'ah.

¹⁹ Nuwheni Yak'usda bulh 'úts'int'ah 'et nt'ets'oninzun. 'Ink'ez ndi yun k'ut whut'en, ndunnah ntsi', 'en ts'iyawh k'úne' bul'en. ²⁰ Yak'usda buYe' whusainya 'ink'ez t'ets'oninzun njan t'ets'onózin, 'et negħa óoni'ai. 'Et hoh ndan 'alha 'int'ah t'eznoozeh 'et whuba. Ndan 'alha 'int'ah, 'en bulh 'uts'int'ah. BuYe' Sizi Gri 'en chah bulh 'uts'int'ah. Ndan 'en 'int'ah soo 'alha Yak'usda 'int'ah 'ink'ez 'ilhuz be ts'úkhuna, 'i unli ho' 'int'ah. ²¹ 'Uskehyaz 'uk'edéltsi, 'i buch'a khahdli. 'Et ndoh honeh.

Whulh Nat Dustl'us John Yuk'e'ánguz

Dahooja nuhwhudu'sni, ni John

¹ Si dune netsuh whedelhdzulh, ts'eke 'utahálti 'ink'ez buzkeh chah hubuts'un k'e'usges. 'En hubuk'esi'. 'Aw si zeh ilah. Ndunnah khunek 'alha 'int'ah, 'i t'eninzun, 'en chah hubuk'ehintsi'. ² Ndi khunek 'alha 'int'ah neyúdezvla, 'i 'ink'ez 'ilhuz wheni nelh utét'ilh, 'i bugha 'udusni. ³ Yak'usda ne'aBá 'ink'ez neMoodihti Sizi Gri ne'aBá buYe', 'en buts'un ye unzoo, 'i ye negha té'ninzun, 'i chah, 'ink'ez nedzi whudezghel, 'i ts'iyawh 'ilhuz wheni nelh 'óot'e. Khunek 'alha 'int'ah, 'i 'ink'ez be lhk'ets'udutsi', 'i bulh.

Ne'aBá khunek netl'aída'ai, 'i lhk'ets'oodutsi', ni

⁴ Ne'aBá khunek netl'aída'ai, 'i ts'ihchoot k'una'a, whuz na'a bulunah nyuzkeh khunek 'alha 'int'ah, 'i bulh hédluh. 'Et nahoo'ai hoh tube hoonúst'i. ⁵ 'Ink'ez ts'eke nts'un téodusdlih. 'Aw ndi k'an 'i khunek 'i et netl'aóoda'ai ilah 'udusni. Ndi khunek 'i soo 'udechoo da 'i njan lhk'ets'oodutsi', ni. ⁶ Ndai khunek netl'aída'ai bugha nuts'óodelh huba' hoont'ah. Ndi 'i bé lhk'ets'udutsi', 'i 'int'ah. Soo 'udechoo da dahts'o ndi khunek netl'aída'ai, 'i bughá nóhdelh huba' hoont'ah.

Lhanah dune nana'ah 'en yun k'éhindel, 'et huwa kháhdli

⁷ Lhanah dune nana'ah 'en yun k'éhindel. 'Et huwa ndunt'ah 'aw Sizi Gri ndi yun k'ut buyust'e be nuséya chahudusnih. Ndán ndunt'ah, 'en dune nana'ah 'int'ah 'ink'ez Christ ch'a hudetni chah 'int'ah. ⁸ Nuhwhenich'oh khahdli! Ndai 'ut'en be né'ts'ust'en, 'i tinta ts'oolelh whuch'a. 'Et sih soo cho neba 'uk'elha hóle. ⁹ Ndán tinta 'ut'ih 'ink'ez Christ khunek be bughu yatuk, 'i 'aw chayótun t'eh, 'aw Yak'usda chah chaít'ih. Ndán ndi Christ bughu yatuk, 'i yoontun t'eh, ne'aBá buYe' bulh nahúlt'ah hubit'i ho' 'int'ah. ¹⁰ Ndán Christ khunek be bughu yatuk, 'i chayótun hoh whenhodutélh'eh huba nuhghu ninya t'eh, ndunt'ah 'aw nuhkoo daóoya gunih, k'us danínyih dóohtni gunih! ¹¹ Ndán danínyih yúlhni, 'en chah ndi tink'us ne'út'en yula 'ut'en ho' 'int'ah 'et huwa.

John 'ubulhni, "Ilhudzin t'eh nuhts'un tésyalh hukwa' nuszun."

¹² Njan whulat nuhwhuts'un k'etésrus. 'Aw dustl'us too bulh k'une'úsduguz, 'i 'udutésni hukwa cha'nuzúszun. 'Ants'i nuhwhuts'un tésyalh 'ink'ez soo nuhwhunen ts'un nuhwhulh yatelhtuk 'et hukwa' nuszun. 'Et huwa tube cho ts'uhót'i. ¹³ "Nuhwhulhtus 'utahálti buzki, 'en dahooja nuhwhuhútni. 'Et ndoh honeh.

Whulh Tat Dustl'us John Yuk'e'ánguz

John, Gaius ts'iyanah yuk'entsi', 'en yuts'un k'e'anguz

¹ Si John dune netsuh whedelhdzulh Gaius ts'iyanah yuk'entsi', 'en soo 'alha buk'esi', 'en buts'un k'e'usges. ² Nk'esi' nzul dáldzoo, 'et whuz na'a ts'iyanatsuk be soo de'a 'ont'e 'ink'ez soo 'ónt'e, 'et whuz na'a mba tenadusdli. ³ Daint'en ts'ah'un na'a inyalh, neyulhutsinkah whusahádel 'ink'ez ndi khunek 'alha 'int'ah, 'i bulh 'int'ah, 'et hukw'un nahuwhulnuk. 'Et huwa tube cho hoonúst'i. ⁴ Suzkehkah unli, 'en khunek 'alha 'int'ah, 'i be ts'ah'un na'a hedulh whulh 'údusts'o t'eh, 'et dáhoolcho, 'i be hoonúst'i ho' hoont'ah.

Gaius 'ahoolhyez ts'iyanah hubula 'ut'en

⁵ Nk'esi' neyulhutsinkah 'ink'ez 'uts'un whut'en 'ahoolhyez hubula 'int'en. ⁶ 'En 'uhint'ah nts'e na'a hubuk'entsi', Yak'usda ba 'ilhunahuwúdulh, 'en hubuts'un nk'unahuwhulnuk. Nts'e na'a Yak'usda hootéti hukw'u na'a hutedulh ts'ih whébilh'ah t'eh, 'et tube soo 'int'en hoh 'int'en. ⁷ Yak'usda boozie bugha whehádel 'ink'ez 'udun yun k'ut whut'en hubula k'ez cha'hílhchulh 'et huwa. ⁸ Nuwheni chah ndunt'ah nekoo dábuts'oolelh huba' hoont'ah. 'Et t'eh khunek 'alha 'int'ah, 'i ba 'ilho 'uts'ut'en ts'oole.

'Ilhunuh dune, 'en hoont'i hoh Yak'usda ba 'ilhunahuwúdulh hubutah dune 'int'ah na'dudil'i, 'ink'ez 'ilhunuh dune, 'en ts'iyanah soo híghu yalhtuk

⁹ 'Et Yak'usda ba 'ilhunahuwúdulh hubuts'un k'e'isguz. 'Et whunts'ih 'ilhunuh hubutah usda, Diotrepes hiyulhni, 'en hoont'i hoh hubughun nus dézti na'dudil'i, 'et hukwa' ninzun. 'En 'aw nekacha'nízun. ¹⁰ 'En khunek buk'ewhúnduda 'i be 'ants'i ulgih li'utni nech'a yálhtuk. 'Et huwa nuhts'un téysalh t'eh, nts'oh tune'út'en ne'ut'en nuhwhunalh howu yatelhtuk. 'Aw 'et zeh ilah ndut'en, nelhutsinkah 'aw hubuka cha'nízun. 'Ink'ez ndunnah hubuka' ninzun, 'en tenazdudli bakoo 'et tenábulh'ah. ¹¹ Nk'esi' ndai ntsi', 'i be ne'ont'en gunih. Unzoo, 'i zeh ne'ont'en. Ndán 'ut'en unzoo, 'i 'ulh'en, 'en Yak'usda bulh 'int'ah. 'Et whunts'ih ndan tink'us 'ut'en, 'en 'aw Yak'usda chayí'il ho' 'int'ah. ¹² Ts'iyanah Demetrius soo híghu yalhtuk. 'Ink'ez khunek 'alha 'int'ah, 'i bugha whunénulhtun dant'ah unli. 'Ink'ez nuwheni chah soo bughu yats'ulhtuk. 'Ink'ez 'alha ts'utni t'eoónáhzun.

Ts'iyanah hubudzi whudooghel, 'et hubuts'u hukwa' ninzun

¹³ Njan whulat nyuwhuts'un k'etésguz, 'aw dustl'us too bulh k'enezduguz 'i 'udutésnilh hukwa cha'nuzúszun, ¹⁴⁻¹⁵ 'et whunts'ih 'a tsih nyutés'ilh hukwa tsi hóosdli. 'Et sih soo lhunídul'en hoh yatádultuk. Ts'ah'un na'a lhts'un 'óoht'e. Ndunnah nek'entsi' nezih hudélhts'i, 'en dahooja nyuhútni. Nek'entsi' nyuzih hudélhts'i, 'en 'ilhunuh hinli hoh dahooja hubudóni.

Jude Ndi Dustl'us Yuk'e'ánguz

Yak'usda 'utahábanla, Jude dahooja hubulhni

¹ Si, Jude, Sizi Gri be 'ulhna 'ink'ez James bulhutsin 'ust'ah. Nuhwheni Yak'usda ne'aBá, 'en ba 'udun ninwhininla 'ink'ez Sizi Gri 'en be huboontun. 'Et ndunt'ah, 'en 'utáhalya 'uhint'ah. ² Ye té'ninzun 'ink'ez be nedzi dezghel, 'ink'ez be lhk'ets'udutsi', 'i chah, 'i ts'iyawh nuhwhuba lhk'uz tookat ka nuhwhuba tenadusdli.

Neba 'alha' hoont'ah, soo cho whulh nudoohlúya

³ Nuwhuk'esi' ndet hoh whézdujih, 'et hubugha da nuhwhuts'un k'e'tesgus, 'et whunts'ih be neba 'alha' hoont'ah, 'et hubugha 'o nus nuhts'o k'eoosges huba' hoont'ah. Ndi neba 'alha' 'int'ah, 'ilhuh zeh 'ink'ez 'ilhuz wheni dune Yak'usda bube'ildzun, 'en Yak'usda hubutl'ahónla, 'i ba soo cho nudoohlúya, 'et ndun whudutesnilh ka nuhts'o k'e'águz. ⁴ 'Et bulunah dune tube nunul'i hinli hoh nuhtáh hunindel. Niz t'eh whudezulh sa inle, 'et whuts'un nts'ena'a huba nahuteyeh, 'et ts'iyawh 'uk'e'whusduguz. 'En dune Yak'usda bu'et 'uhint'ah. NeYak'usda ye unzoo, 'i 'uts'un na'a na'huyulh'ih hoh 'et nduhútni, ndai ts'iyawh 'ut'en dutsun, 'i 'uts'ulh'en t'eh, 'et soo' hoont'ah nehútni. Yak'usda 'en zeh k'une'hiyul'en, 'ink'ez Sizi Gri neMoodihti, 'en chah hits'oodedlai.

'Uda 'ink'ez k'an 'et Yak'usda lanadetnik

⁵ 'Et hoonliyaz nuhwhuba whunatelhúnih, 'uda t'eoónáhzun 'et whunts'ih. 'Et whenghah whudezulh njan Egypt yun k'ut 'et whuch'a neMoodihti hubudune, 'en ts'iyawh 'ubulhyih. 'Et hukw'elh'az ndunnah huba 'alha cha'hoot'ah, 'en ts'iyawh hoolah hubulhtsi. ⁶ 'Et ndunnah lizas, 'en chah Yak'usda huba' hoonla, 'et whunts'ih whulahudetnik. 'Ink'ez ndunnah neMoodihti tsahólgus yuh ts'ih, 'en huboontun. Tl'oohl 'ilhuz 'int'ah, 'i be whénobudezguz, dzin hooncha whuz de whélts'ulh hoh t'eh huba nahuteyeh. ⁷ 'Et whuz na'a ndunnah Sodom 'ink'ez Gomorrah whut'en, 'et whunat whudune, 'en chah, 'et whuz na'a zeh hubuk'ah ts'ih 'uhut'en. 'Ut'en dutsun, 'i 'uhiyulh'en, 'et wheni hedich'oh whutl'a' hududelya. Ts'iyai hudedowh bulh tinta' hutet'ilh. Alha ndi kwun 'aw nachanusne, 'i be dzuh nuhudeh ho' hoont'ah. 'Et huwa 'en hubugha t'ets'onanzin. ⁸ 'Et whuz na'a zeh ndunnah 'et nduhutenilh huninzun, 'en hubuyust'e lubeshi be dutsun hiyilh'i. 'Ink'ez ndai hik'úne' oot'en huba gha ndoh 'int'ah hubuk'unucha'hust'en. 'Ink'ez ndunnah buts'u ha 'ánduz lizas, 'en whunts'i hukw'u na'a bughu yahalhtuk. ⁹ 'Et whunts'ih Michael 'en degha ndoh lizas 'int'ah, 'et hoh da netsudule 'en Moses dazsai hoh hukw'elh'az buyust'e 'i bugha lhena 'uhudutni hoh yahalhtuk. 'Aw dich'oh buba' hoont'ah chanízun hoh yuch'a detni be yalhtuk 'ink'ez yuba nahuteyeh. 'Et whunts'ih Michael ndez na'a netsudule ndi yúlni, "NeMoodihti hukwa' nyudóoni!" ¹⁰ 'Et whunts'ih ndunnah ndet t'ehonízun, 'et whunts'ih hukw'u na'a howu yáhalhtuk. 'Ink'ez nts'e na'a neyust'e hukwa' nizun, 'et whuz na'a zeh 'ants'i khunai ne'út'en, 'et whuz na'a buyust'e tinta' hiyulh'ih. ¹¹ Dawhultsi' hubuts'u whélts'ulh! 'En chah Cain hiyundul'en. 'Et huwa dawhultsi' hubuts'u whélts'ulh! 'Et ndun Balaam nanet'a hukw'u na'a 'uja. 'En chah whuz na'a zeh tube sooneya ghu dahóodit'ah. 'Et ndun Korah dahoont'ah huwa Moses ch'a nedinja, 'en chah 'en k'una'a yahadla.

Yak'usda lanahudetnik, 'en tube hintsi' suli 'ink'ez huba nahesda

¹² Lhk'ehdutsi' hoh lhulana'aht'ah, 'et whunts'ih ndunnah hubughu yalh-tuk 'aw whechaniljut hoh nuhwhula'ha'ah. 'En 'ants'i huwa'óodli, 'i teh noo duhúlt'ah. Dich'oh zeh soo ne'hududul'en. 'Ants'i kw'us too bughu hoolah li'hint'ah. 'Et kw'us k'una'a nduwhúlcho bubúlh nuts'i. 'Ants'i dak'et mai chun mai bughu hoolah li'hint'ah. 'Ink'ez bugnih bulh 'ants'i hánahuyulhch'ulh li'hint'ah. Nat daházsai li'hint'ah. ¹³ 'Ants'i ndulhcho tatsi nudútun lí'hint'ah. Ndai dune huba hukwaya hoonli, 'i huwus 'et dunt'ah. Sum k'una'a lhtana-hekulh li'hut'en. 'Et ndunt'ah dune, 'en soo tsahólhgus t'es li'int'ah, 'i 'ilhuz wheni 'et Yak'usda huba 'udun whulh'ai. ¹⁴ 'Et ndun Enoch 'en whulh skwun-lai 'o 'at nankoh Adam ts'u hainzut 'int'ah, 'en ndunnah dune, 'en bughu nus hó'en hoh njan ndutni, "Whunulh'en neMoodihti 'aw 'et whusáinya! 'en ts'iyawh dune bube'ildzun, lhanah k'et 'aw 'ubuts'oodólhto ghat'ah, 'en hubulh whusateyalh. ¹⁵ 'Ink'ez ndunnah Yak'usda bu'et 'uhint'ah, 'en ts'iyawh huba nahuteyeh. 'En Yak'usda bu'et 'uhint'ah, dahoont'ah hukw'u na'a Yak'usda ch'a ne'hust'en whuz na'a hubuk'ehóote'ah. 'Et ndunnah Yak'usda bu'et 'uhint'ah, 'en lubeshi 'ulh'en 'uhint'ah. Nts'e na'a khunek duts'un, 'i be hiyena hoh yahalhtuk, 'et whuz na'a huba nahuteyeh!"

Yak'usda lanahudetnik, 'en njan díhínt'ah

¹⁶ Ndunt'ah, 'en tsakhunek huldelh, 'ink'ez hanílch'oh hoh huba dzuh hinli. Hubuyust'e nint'uk ts'ih hedulh. Khunek ncha, 'i be yahalhtuk. 'Et hoh hoonzoo hukw'u na'a dune ghu yahalhtuk 'et hoh whuch'a nahootélhdoh. ¹⁷ 'Et whunts'ih nuhk'esi', neMoodihti Sizi Gri ba whel'a 'en ndai khunek hiye yailhtuk, 'i soo cho bunaoohlúnih. ¹⁸ Nts'e na'a 'ún whudani degha nus whusawhútelts'ulh lhanah ne'aBÁ buk'ah ts'ih huwudloh whutele. Ndunnah nts'e Yak'usda ch'a nint'uk ts'un, 'et whuz na'a zeh hutedulh. ¹⁹ Ndunnah, 'en ndi yun k'ut whuba zeh 'uhint'ah. 'En dune lhch'a hunilht'uk 'ink'ez Ndoni bu'et 'uhint'ah.

Soo cho Yak'usda bulh 'óoh't'e

²⁰ 'Et whunts'ih nuhk'esi' be nuhwhuba 'alha' hoont'ah, 'i be 'o nus ulhtus 'ududulhtsi. Ndoni 'en be tenadahdli. ²¹ Ndai Yak'usda ye nék'entsi', 'i zeh bulh 'óoh't'e. NeMoodihti Sizi Gri ye te'ninzun, 'i be 'ilhuz ts'ukhoona ts'uwhut'i, 'et zeh hukwa itóoh'en. ²² Dune t'ebunoohzeh nts'e na'a hoh lhents'un na'a 'uhint'ah. Bulunah hubugha te'noozin. ²³ 'Et whunts'ih 'onghoh huba whenhujut hoh huboolhyih, kwun ch'a huboohgooh. Ndi naih hubuyust'e t'aigheznai, 'i whunts'i hubuts'u doohtnik.

Yak'usda 'uzdóolhti

²⁴ 'Aw 'et ndun Yak'usda ch'a nahútel'ah whuch'a neghundli, 'ink'ez buts'u hayanduz, 'i zih ninhotelilh, 'aw be 'uk'ehóotelts'ul bu'et. 'Et soo degha nus hóont'i hoh whuz na'a nuhwhuba 'uwhutelilh. ²⁵ 'Aw 'en zeh Yak'usda whunih 'ink'ez neulhyis unli. 'Aw 'en zeh buts'un hayánduz, 'ink'ez k'us ncha 'int'ah. 'En zeh nék'une'ul'en 'int'ah. 'En zeh ts'iyaintsuk gha ndoh 'int'ah. K'an 'et whuts'un 'ink'ez 'ilhuz wheni, 'et whuz na'a 'uwhuté't'ilh. 'Et ndoh honeh.

Sizi Gri, 'En Dune Ba Ts'et Hahónla

¹ Ndi khunek 'i Sizi Gri, 'en dune huba ts'et hahónla, 'i 'int'ah. Yak'usda yutl'aída'ai be 'ulhna bunalh ts'et hahókat 'et huba. 'Aw 'et dawhútenilh, 'et hubugha 'int'ah. Dulizas 'en dude 'ulhna John 'en yughe nílh'a. ² John 'en Yak'usda bughunek yughu yailhtuk 'int'ah. Sizi Gri ndet howu yailhtuk hubugha chah 'et dune budáni, 'ink'ez ts'iyai ho'en, 'et chah ubudáni. ³ Ndán ndi dustl'us yuk'uyalhtuk 'ink'ez ndi nus be whét'en, 'i khunek hidánts'o huy-oontun t'eh, tube degha nus hoonzoo bughá whutelts'ulh, 'aw 'et nilhdukw suli 'et huwa.

Skwúnlai 'o 'at nankoh dune Yak'usda ba 'ilhunahuwúdulh, dahooja hubulhni

⁴ Yun k'ut Asia ts'ih Yak'usda ba skwúnlai 'o 'at nankoh lhelhdun keyah dune 'ilhunahuwúdulh, nuhwheni si John nuhnts'un k'e'usges hoh njan dudusni: k'us ndan 'int'ah, 'en ant'e, whuz de ha téyah, 'en ye unzoo, 'i nedzi be whudezghel 'ink'ez skwúnlai 'o 'at nankoh nududeh, 'i Yak'usda yuk'usda, 'i bubut 'int'ah, 'en chah ye unzoo 'ink'ez nedzi be whudoóghel nuhwhulh 'oot'e. ⁵ Sizi Gri 'en chah whuz na'a 'ún whulhni. 'En 'int'ah soo ts'ah'un na'a newhunulhtun unli. 'En 'uja 'udechoo whuzdli yahadla tah dinadija 'int'ah. Ndi yun k'ut hubidayi cho k'une' bul'en. 'En nek'entsi' 'ink'ez duduzkai be nelubeshi tóonayuzguz. ⁶ Yak'usda ba'aBá, 'en ba nuhwheni hubidayi cho 'ink'ez nawhulnuk nesulhtsi. 'En ts'un ts'odóolhti, 'ink'ez hoolhtus hoh k'une' ne'ool'en. 'Ilhuz 'ink'ez 'ilhuz wheni 'et nduhóot'e, 'Et ndoh honeh.

⁷ Whunulh'en! Kw'us tah whuz de ha téyah.

Ts'iyanah hite'ilh.

Ndan lugloo cho be hikunuhínélht'o, 'en chah.

'Ink'ez ndi yun k'ut lhelhts'un hudedowh, 'en ts'iyawh hubugha khu-nahudutéts'o.
'Et ndó ténelh, 'et ndó honeh.

⁸ NeMoodihti njan ndutni, "Si 'ust'ah Alpha 'ink'ez Omega usdli. 'Udechoo whe' whudit'en 'ink'ez 'ust'l'e' 'uwhuténilh, 'en 'ust'ah. K'us ndan usdli 'ink'ez est'e, 'ink'ez whusatéyah 'ust'ah, 'ink'ez ts'iyai 'i wanus ulhtus, 'en 'ust'ah."

John noo Patmos ts'utni, 'i k'ut tsak'esda hoh Sizi Gri in'en

⁹ Si John nuhwhulhutsin 'ust'ah. Dzuh nahdeh teh si chah nohwhulh dzuh nuszut. Njan Yak'usda hubidayi cho unli 'ink'ez Sizi Gri buba howa whúlna 'et whunts'ih neba whulh ínyin, si chah whuz na'a zeh nohwhulh síyin. Yak'usda bughunek be yálhtuk 'ink'ez Sizi Gri t'ehinoozeh huwa chah, 'et huwa ndi noo Patmos ts'utni, 'i k'ut 'ust'ah inle hoh, ¹⁰ 'et hoh da neMoodihti budzin, 'et Ndoni bulh sulh wheóodande lí'usja. 'Et sk'ah ts'ih dune tube yatelhtuk, be ts'udujih, 'i k'una'a, 'et whuduzíts'ai. ¹¹ 'Et njan ndutni, "Si Alpha 'ink'ez Omega usdli. 'Udetsoo 'ink'ez dek'elh'az, 'en 'ust'ah. Ndet whunilh'en dustl'us k'ut buk'e'ónges 'ink'ez skwúnlai 'o 'at nat Yak'usda ba 'ilhunahuwúdulh, yun k'ut Asia húdelhts'i, 'en ndi dustl'us buts'un tl'ayónleh. Ndi hubukeyah boozi 'int'ah: Ephesus, Smyrna, Pergamos, Thyatira, Sardis, Philadelphia, 'ink'ez Laodicea whuz chah." ¹² Ndi khunek sut'ak ts'ih be yátuk, 'i oozálhts'a hoh buts'un nasulhú'a. 'Et whuz nasulhú'a hoh ndi skwúnlai 'o 'at nankoh be whét'en, 'i gold be 'ulya, 'ink'ez 'et nandez'a, 'i télh'en. ¹³ 'Et njan skwúnlai 'o 'at nankoh be whét'en, 'i nanusa'a, 'i tah, yinkak dune ye' k'una'a 'et siyin. Bunaih buke t'ayughanaih, 'i be usda. Se gold bulh 'ulya, 'i be buts'i tah 'on doh ye sudelhú'oo. ¹⁴ Butsi 'ink'ez butsigha bulh sheep bugha k'una'a lhéyul, tsil k'una'a lheyul. Buna kwun k'una'a tezdi

li'int'ah. ¹⁵ Buke tse dulk'un tsáhazda'ai nduwhút'en. Bughunek too natéjilh lí'utni. ¹⁶ Bula nalhnih ts'ih skwúnlai 'o 'at nankoh sum 'i yoontun. 'Et soh cho 'i buzek haya'a. Lhch'az ts'ih buk'a hoonli. 'Ink'ez bunen sa ulhtus, 'i k'una'a be hóodet'en. ¹⁷ Télh'en hoh bubut dasúsai hukw'un na'a nalhúts'ut. Dula nalhnih ts'ih 'i be sk'édilnik 'ink'ez 'usulhni, "Niljut ílah! 'Udeechoo 'ink'ez dek'elh'az, 'en 'ust'ah. ¹⁸ Khusna 'ust'ah. Dasítsai inle 'ink'ez sunilh'en, 'ilhuz 'ink'ez 'ilhuz wheni khusna. 'Et ndoh honeh! Hades 'ink'ez yats'adlah 'i be whuda'de'ai nusdle. ¹⁹ Ndet whunalh'en 'et hukw'e'ónges. Hoonli 'int'ah, 'i 'ink'ez ndi hukw'elh'az nus dawhútenlh, 'et chah 'ukw'e'ónges. ²⁰ Ndi skwúnlai 'o 'at nankoh sum sunailnih ts'ih sula k'et nalh'en, 'i 'ink'ez skwúnlai 'o 'at nankoh nanusa'a, 'i gold be 'ulya be whét'en, 'i chah, 'i bugha whe' hoont'ah hooyah, 'et ndez na'a njan ndúhoont'ah: Skwúnlai 'o 'at nankoh sum 'i skwúnlai 'o 'at nat Yak'usda ba 'ilhunahuwúdulh, 'en bulizas 'int'ah. 'Ink'ez skwúnlai 'o 'at nankoh be whét'en, 'i yunalh'en, 'i skwúnlai 'o 'at nat Yak'usda ba 'ilhunahuwúdulh 'int'ah."

2

Keyah Ephesus dune Yak'usda ba 'ilhunahuwúdulh 'udeechoo hoh Sizi Gri 'ink'ez nohwhulh dune chah buk'ehtsi' inle, 'et whuladehnik, suba hubudóni.

¹ "Et keyah Ephesus dune Yak'usda ba 'ilhunahuwúdulh bulizas 'en buts'un k'e'inges:

Ndun skwúnlai 'o 'at nankoh sum nalhnih ts'ih bula k'et 'ink'ez skwúnlai 'o 'at nankoh be whét'en, 'i tah nuya, 'en njan ndutni:

² Nuhwhe'ut'en k'ah t'eeonuszun, nuhwhe'ut'en ulhtus, 'i chah. Nuhwhuba howa whulna 'et whunts'ih whulh sahyin, 'ink'ez ndunnah ntsi' 'en 'aw hubulh 'óoh't'e ghai't'ah. Ndunnah whel'a na'dudil'i, 'et whunts'ih 'alha 'aw whel'a chahílah, 'en huboozélhts'ai 'ink'ez t'ebunanzin whuts'it 'uhint'ah.

³ Soozi bugha soo cho whulh sáhyin 'ink'ez 'aw hoonliyaz cha'duzóohni hoh tube 'éht'en 'et whunts'ih 'aw nichanahtsil. ⁴ 'Et whunts'ih njan 'ilhun 'et hoh 'uts'un na'a suba 'aht'ah. 'Udeechoo hoh Sizi Gri 'ink'ez nohwhulh dune chah buk'ehtsi' inle, 'et whuladehnik. ⁵ 'Et huwa ndet nailhúts'ut 'et whunaoohlunih. Lubeshi whuch'a lht'ananahdaih 'ink'ez 'udeechoo nuhe'ut'en, 'i nalhuchoot. 'Aw lht'anachanúhdulh t'eh, khunyaz nuhts'un téyah 'ink'ez nyoo nuhbe whét'en, 'i nuhghu natelhucholh. ⁶ 'Et whunts'ih 'ilhunuh hoonzoo, 'et whah't'i, Nicolas hinedulh bube 'ut'en buts'u dahnik. Si chah tube whuts'u dusnik ho' hoont'ah.

⁷ Ndán 'udits'o, Ndóni Yak'usda ba 'ilhunahuwúdulh, daja hubúlhni, 'en hiyoozólhts'a huba' hoont'ah. Ndunnah 'ut'en ntsi', 'i yuch'a 'ulhdeh, ndi duchun bugha khutna, 'i bumai hiyoo'ah bugha óotes'ah. Ndi duchun 'i Yak'usda bukeyah degha nus hoonzoo, 'et whuniz ts'ih nadí'a."

Keyah Smyrna dune Yak'usda ba 'ilhunahuwúdulh, nuhwhe'ut'en chah, be dzuh nahzut, 'ink'ez hoh télh'en chah, ts'iyawh t'eeonúszun, suba hubudóni

⁸ "Et keyah Smyrna dune Yak'usda ba 'ilhunahuwúdulh bulizas 'en buts'un k'e'inges, njan dudóni:

Ndun 'udeechoo 'ink'ez dek'elh'az, 'en dazsai inle, 'ink'ez nakhítña, 'en njan ndutni: ⁹ Nuhwhe'ut'en, be dzuh nahzut, 'ink'ez hoh télh'en chah, ts'iyawh t'eeonúszun. 'Et whunts'ih 'alha soo deh'a 'aht'ah. Ndunnah nuhch'a detni nduhutni, 'Nuwheni Lizwif 'uts'int'ah', 'et whunts'ih Lizwif chahílah. 'En ndun Satan hiyúlhni, 'en hubuluglez 'et be'ílhdezun hinli ho' hint'ah, 'et chah t'eeonúszun. ¹⁰ Ndet hoh dzuh nutehzut, 'aw 'et nilhdukw nuhghu whutélts'ulh. 'Et whenoolhújut gunih! Soo zélhts'ai! 'aw 'et nilhdukw bulunah netsudule 'un whutélilh. 'Et hoh nohootélhdzih. 'Et lanezi dzin

'et dzuh nutéhdeh. 'Et yatahdlah whuts'un 'et nuhwhuba 'alha 'uhoont'ah zeh 'uhót'e. 'Et hukw'elha 'ilhuz khutehna nuhghá whunt'ai, 'o 'un whuch'a 'unúlhde, 'et chah nuhgha whutés'ah.

¹¹ Ndunnah 'udits'o, Ndoni Yak'usda ba 'ilhunahuwúdulh, dája hubulhni, 'en huyoozólhts'a. Ndunnah 'ut'en ntsi', 'i ch'a nilhde, 'et dune whúlh nat dahútetsah, 'i be 'aw hundóodah ghat'ah."

Keyah Pergamos dune Yak'usda ba 'ilhunahuwúdulh, se'ut'en k'ah bulah buladehnik, suba hubudóni

¹² "Et keyah Pergamos dune Yak'usda ba 'ilhunahuwúdulh bulizas 'en buts'un k'e'inges. Njan dudini:

Ndun soh cho lhch'az ts'ih khundenyin, 'i ut'i, 'en njan ndutni:

¹³ Nuhwhe'ut'en k'ah 'ink'ez nts'e whaht'i t'eoonuszun. Ndet Satan bukw'usúda cho dézti, 'i su'ai, 'et whaht'i. Soozi, 'i soo cho oohtun. Nts'e Satan whut'i 'ink'ez hoh da ndun Antipas hiyúlhni, 'en soozi bugha nuhtah hizelhghi. 'Et whunts'ih nuhwhuba 'alha 'ust'ah 'aw whuchaooodáhdrai ilah. ¹⁴ 'Et whunts'ih bulah 'uts'un na'a suba aht'ah. Bulunah nuhtah Balaam bughunek 'i hiyoontun 'et huwa. 'En 'int'ah Balak hodalh'i. 'En 'uja Israel hits'uh hainde 'en whubodalh'i but 'uk'e déltsi bugha t'ah, 'i hiyoo'ah 'ink'ez 'uyoona ts'ekoo 'ink'ez 'uyoona dune chah tinta' hoot'ih hoh huboolhgooh hukwa 'ut'en. ¹⁵ Nuhwheni nuhtah 'et chah Nicolas bughunek oontun hoonli. 'I tube buts'u dusnik ho' 'int'ah. ¹⁶ Lubeshi whuch'a lht'ananoohdelh! 'Et nduchahnil t'eh khunyaz nuhts'un téysalh 'ink'ez soh cho suzah hai'a, 'i be ndunnah Nicolas hiyunedulh, 'en buch'a nidutésyalh.

¹⁷ Ndán 'udits'o, Ndoni Yak'usda ba 'ilhunahuwúdulh, daja ubulhni, hiyoozólhts'a huba' hoont'ah. Ndunnah 'ut'en ntsi 'i yuch'a 'ulhde, 'en ndi 'ut'ah manna hiyúlhni, 'i dune buch'a yuntéh'i, 'i bulah bugha ités'ah. 'Ink'ez tse dulyul, 'i chah bugha yuntés'ah. 'Ink'ez ndi tse buk'ut k'an ndi boozi 'i buk'eitedúguz. 'Aw dune boozi t'ehinuszun. Ndán bugha ídelts'ut, 'en zeh t'eyuntézin."

Keyah Thyatira dune Yak'usda ba 'ilhunahuwúdulh, bulunah tube tink'us ne'ut'en, 'en suba hubudóni

¹⁸ "Et Keyah Thyatira dune Yak'usda ba 'ilhunahuwúdulh bulizas 'en buts'un k'e'inges. Njan dudini:

Yak'usda buYe' buna kwun k'una'a tezdi nduwhút'en 'ink'ez buke tse dulk'un tsáhazda'ai, 'i nduwhút'en, 'en 'utni:

¹⁹ Nuhwhe'ut'en t'enuszun, ndi be lhk'ets'udutsi', 'uyoona be hubula'aht'en, be nuhwhuba 'alha 'uhoont'ah, 'ink'ez hoonli cha'lhouzahnih. 'I 'ut'en 'udechoo ho' daht'en k'an 'et 'o nus soo 'aht'en. 'I chah ts'iyawh t'enuszun.

²⁰ 'Et whunts'ih hoontsolyaz hoh suba 'uts'un na'a 'aht'ah. Ndún ts'eke Jezebeel nus whunílh'en na'dudútni. Hubodulh'eh 'ink'ez se' 'ulhna tink'us húbunilht'uk. 'Uyoona dune 'ink'ez 'uyoona ts'ekoo bulh tinta' hoot'ih. 'Ink'ez ndi 'uk'edéltsi bugha t'ah, 'i hiyoo'ah hukwa' bulh'en. 'En ts'eke 'aw whuch'a chanuzáhyoot. ²¹ Ndún ts'eke 'uyoona dune bulh tinta' 'ut'ih, 'et 'ustl'e' 'ooneh dúsnih, 'et 'aw bulubeshi whuch'a bubeni nachahudunile.

²² Soo zúlhts'ai, kw'usti k'ut dunteada bugha ootés'ah. Ndán dune yulh tinta' 'ant'en, 'en chah nduwhút'en, 'aw lht'anachahunídulh t'eh, dzuh note-doh hubugha ootés'ah. ²³ 'Ink'ez ndún ts'eke buzkeh chah hubutesghan.

'Ink'ez Yak'usda ba 'ilhunahuwúdulh, ts'iyawh t'ehontézin, si 'ust'ah dune hubeni tah 'ink'ez hubudzi bet chah hoonli hukwu nústa. 'Ink'ez 'il-hunah ahli hoh nuwhe'ut'en k'ah huwa nuhwhuba k'elha whutelhsilh.

²⁴ 'Et whunts'ih nuhwheni 'ink'ez 'uyoona Thyatira whut'en, ndún ts'eke

bughunek chahiyóotun t'eh, 'ink'ez soo Satan be 'ut'en degha nus whutl'ah 'int'ah, 'i whuz na'a nduhutni, 'i chah t'ehinízun t'eh, nuhwhudusni, 'aw 'o 'un howa whúlna nuhgha chaootizes'al. ²⁵ 'Et whunts'ih whusatésyalh whuts'un, ndai 'ut'en unzoo 'ulh'en, 'i soo cho ohtun.

²⁶ Ndán 'ut'en untsi', 'i yuch'a 'ulhdéh 'ink'ez degha nus whuts'un se' 'ut'en huyoontun t'eh, 'en lhelhdun keyah whut'en humoodih hutéle, 'et hubugha óotes'alh. ²⁷ Ndunt'ah 'ut'es tuz be susheep k'una'a butsuh nutéyah 'ink'ez lhezt'l'us busa 'i k'una'a yanúbuduteyuz. Whuz na'a 'et bughu tesle. Su'aBá si chah whuz na'a stl'ahó'ai. ²⁸ 'Ink'ez bundada sum chah bugha yutés'alh ²⁹ Ndán 'udits'o, Ndoni Yak'usda ba 'ilhunahuwúdulh, dája hubulhni, 'en hiyoozólhts'a huba' hoont'ah."

3

Keyah Sardis dune Yak'usda ba 'ilhunahuwúdulh, lhanah dune 'uhutni, khahna hoh aht'ah hutni, 'et whunts'ih yahadla ahli hoh aht'ah, suba hubudóni

¹ "Et keyah Sardis dune Yak'usda ba 'ilhunahuwúdulh bulizas, 'en buts'un k'e'inges. Njan dudini: Ndun Yak'usda skwúnlai 'o 'at nankoh nududeh, 'i 'ink'ez skwúnlai 'o 'at nankoh sum chah nule, 'en 'utni:

Nuhwhe'ut'en k'ah t'eoónuszun. Lhanah dune chah 'uhutni, khahna hutni, 'et whunts'ih yahadla ahli hoh aht'ah. ² Yak'usda ba nuhwhe'ut'en 'aw soo cha'ildzooh, 'et nahóo'ai. 'Et huwa soo cho huwahli! Bulah 'ut'en unzoo 'i nohwhulh 'int'ah, 'aw 'et nilhdukw hoh hoolah tele. 'Et huwa 'ut'en unzoo 'i chah 'o nus ulhtus ulhtsi. ³ 'Et huwa whunalhúnih nts'e na'a ndi khunek dáhts'o 'ink'ez úlhchoot. Soo cho oohtun 'ink'ez nuhwhulubeshi whuch'a nuhwhubeni nahadunoohlelh! 'Et 'aw whuz na'a zeh huwu cháhlah t'eh, soo 'undunut'ih k'una'a nuhgha hatésyalh, 'ink'ez nts'owhúya 'uhunet'oh nuhts'un téysalh 'aw t'ewhuntuzéhzin.

⁴ Bulunah nyulh 'uhint'ah Sardis whut'en, 'en 'aw dunaih chahudílhtsun. 'En lheyul 'i be hudélhts'i hoh sulh nahútedulh. 'Et huba soo hínzoo 'et huwa.

⁵ Ndunnah 'ut'en untsi' 'i ch'a 'ulhdeh, 'en naih lheyul 'i be hudutélts'ilh. Ndi 'ilhuz ts'ukhuna 'i be dustl'us k'ut, 'aw buboozi 'uk'unatoosges ghat'ah. Se'aBá 'ink'ez bulizas bulh 'en bubut 'en se'ilhdzun hinli budutésnilh.

⁶ Ndán 'udits'o, 'en Ndoni Yak'usda ba 'ilhunahuwúdulh, dája hubulhni, 'en hiyoozólhts'a huba' hoont'ah."

Keyah Philadelphia dune Yak'usda ba 'ilhunahuwúdulh dzuh nusahde soo whulh nudalhúya, suba hubudóni

⁷ "Et keyah Philadelphia dune Yak'usda ba 'ilhunahuwúdulh bulizas, 'en buts'un k'e'inges. Njan dudini: Ndun lubeshi bughu hoolah, ts'ah'un 'int'ah chah, 'ink'ez hubudayi cho David be da'dutut'ah na'a. Ndun dahúduta'ah, 'aw dune dana'doo'ah ghat'ah. 'Ink'ez dána'dú'ah 'aw dune dahana'doo'ah ghat'ah. 'En 'utni:

⁸ Nuhwhe'ut'en t'enuszun. Whunulh'en ndati 'udun 'udéntan nuhbut nióoni'ai. 'Ink'ez 'aw dune dána'dootan ghat'ah. Be ulhtus, 'i ntsolyaz áht'i, sughunek chah oohtun, 'ink'ez soozi hubuts'un 'aw whuchaooodáhdrai ilah 'et huwa. ⁹ Soo zulhts'ai, ndunnah Satan buluglez huwhut'en, 'en Lizwif hinli hutni 'et whunts'ih huwhuts'it ho' hutni, 'aw Lizwif chahílah. 'Aw nawh cha'hoot'ah, nuhghu buníla 'ink'ez nuhbut teni' hunilhdzun ubutélsilh. 'Et huwa t'ehonózin nuhk'esi' inle.

¹⁰ Nuhwhudáni dzuh nusahde soo whulh nudalhúya. 'Et whuz na'a sk'une' zaht'en. 'Et huwa ndi yun k'ut ndulhcho hoh dune dzuh nute-doh whusaóotelts'ulh hubootélhdzih 'et whuba. 'Et whutsuh whuch'a nanohtésdlelh. ¹¹ Soo zúlhts'ai, khunyaz 'utesnilh whusatésyalh. Ts'ah'un

aht'ah soo cho hoohtun. 'Et hukw'elha aht'en 'aw 'uyoon nuhgho hólhchoot ghait'ah. ¹² Ndunnah ndi 'ut'en untsi', 'i ch'a 'ulhdeh, ndunt'ah suYak'usda hubuluglez whut'ah nain'a, 'i hubutelhsilh. 'Ink'ez 'aw tenáchahutésdulh. SuYak'usda boozi, 'i buk'ut buk'e'tesgus. 'Ink'ez suYak'usda bukeyah whuti boozi, k'an 'et Jerusalem huwhutni, 'i chah buk'ut buk'e'tesgus. Yak'uz ts'ih suYak'usda buts'un haootelts'ulh. 'Ink'ez k'an 'et 'i soozí, 'i chah buk'e'tesgus. ¹³ Ndán 'udits'o, Ndóni Yak'usda ba 'ilhunahuwúdulh, daja hubulhni, 'en hiyoozólhts'a huba' hoont'ah."

Keyah Laodicea dune Yak'usda ba 'ilhunahuwúdulh, bulunah sughunek 'ants'i nuhwhuba 'int'ah, suba hubudóni

¹⁴ "Et keyah Laodicea dune Yak'usda ba 'ilhunahuwúdulh bulizas, 'en buts'un k'e'inges. Njan dudini:

Ndun ndóh honeh, bunalh 'úwhut'en, but'aníuznitan, ts'ah'un na'a 'int'ah chah, ndai Yak'usda 'uyinla, 'i 'en 'udeecho whé'whudilh'en 'int'ah, 'en 'utni:

¹⁵ Nuhwhe'ut'en k'ah ts'iyawh t'eoónúszun. Nts'e na'a Yak'usda ba aht'en, 'aw tube chaník'uz 'ink'ez 'aw tube chah chanízul soo cho náhk'uz k'us nehzul 'et da nuhwhuba hukwa' nooszin wule. ¹⁶ Aw chaník'uz chah aht'ah 'ink'ez 'aw chanízul chah 'aht'ah. 'Ants'i nahzulyaz li'aht'ah. 'Et huwa suzek hoh n'un nuhwhutélhdzoh. ¹⁷ Lhe'dahni, 'Soode'a 'uts'int'ah 'o nus chah soo de'a 'uts'uja. 'Aw 'uyoo hoonliyaz ka cha'uznízun,' dahni. 'Et ndahínt'ah dalhútsi' ts'iyaintsuk nuhwhuba nek'e' hoot'ah aht'ah. Telhú'en aht'ah. Chaoozeh'en aht'ah, 'ink'ez ust'et aht'ah. ¹⁸ Ndai gold kwun be 'o nus 'uldzoo suli, 'i si sts'un óohket nuhwhudusni. 'Et sih soo deh'a 'ooht'e. Naih lheyul, 'i chah sts'un óohket. 'Et sih 'et dune wahle, 'ink'ez 'ust'et ahli 'et 'aw hukwa yáchazoohle. Na yoo, 'i na k'et dulhúye, 'et sih soo hóh'en. ¹⁹ Ndunnah hubuk'esi', 'en ts'iyawh khunek ulhtus 'i be hubulh yálhtuk 'ink'ez ts'ah'un na'a nenábusdlih. 'Et huwa nuhdzi ulhtus cho ulh'i 'ink'ez nuhwhulubeshi nuhwheni whuch'a náhandunoohlelh.

²⁰ Soo zulhts'ai, ndati síyin 'ink'ez ndati whudúlhghalh. Ndán sudits'o 'ink'ez suba dahúduteztan, bughu datésyah, bulh na'tést'ulh 'ink'ez didut chah sulh na'hutét'ah. ²¹ Ndán ndi 'ut'en ntsi' 'i ch'a 'ulhdeh, suk'usda cho k'ut suzih tedalh hubugha ootés'ah. Si chah whuz na'a chah whuch'a nulhde 'ink'ez se'aBá bukw'usúda cho dézti, 'i k'ut buzih natl'adisda. ²² Ndán 'udits'o, Ndóni Yak'usda ba 'ilhunahuwúdulh, dája hubulhni, 'en hiyoozólhts'a huba' hoont'ah."

4

John nduk yak'uz ndati 'udun 'udentan 'et whutélh'en

¹ 'Et hukw'elh'az whunulh'en 'ink'ez nduk yak'uz ndati 'udun 'udentan et whutélh'en. 'Et ndun 'udeecho yatelhduk duzíts'ai, be ts'ujih be yálhtuk li'utni. "Ndez suts'un dugha inyih, 'ink'ez k'an 'et hukw'elh'az daóotenilh whényuntélhtun," sulhni. ² 'Et 'aho Ndóni bulh sulh wheóodande lí'usja. 'Ink'ez yak'uz kw'uts'uzda cho dézti, 'i 'et su'ai 'i k'ut 'ilhunuh yuk'usda, 'et whutélh'en. ³ 'Ink'ez ndun hukw'usda tse dunézti, 'i jasper hiyulhni, 'ink'ez carnelian tse chah, 'et whuz na'a ndoonent'en. 'Ink'ez ndi kw'uts'uzda cho dézti, 'i ditnik nayúgus, 'i bunayuzt'uk, tse, emerald hiyulhni, 'i ndoonent'en.

⁴ Ndi kw'uts'uzda cho dézti bunat nat lanezi 'o 'at dit kw'uts'uzda cho dézti, 'i bunaidelhúya. 'Ink'ez ndi kw'uts'uzda cho dézti, 'i nat lanezi 'o 'at dinah 'utsuh whudélhdsulh hik'udelhts'i. Naih lheyul, 'i be dune hinli. Gold nanezbaz 'i butsi k'éyuzdla. ⁵ Ditnik oolges, ditnik chah, 'ink'ez lhai yatuk 'i chah ndi kw'uts'uzda cho dézti, 'i buts'un haídukat. 'Ink'ez ndi kw'uts'uzda cho dézti, 'i bubut skwúnlai 'o 'at nankoh be whét'en, 'i dezkiun. 'I ndi skwúnlai

'o 'at nankoh Yak'usda bunududeh, 'i 'int'ah. ⁶ 'Et ndi kw'uts'uzda cho dézti, 'i bubut 'et bun k'ut whuchu dezghel k'et too 'i khe li'int'ah, 'et whuz'ai li'hoont'ah. Lhum dant'ah bukiyúnt'en, 'et nduwhút'en. Ndi kw'uts'uzda cho dézti buk'ut chah 'ink'ez bunat chah dink'i hoonliyaz usjiz, 'i 'una zeh unli, bubut ts'ih chah 'ink'ez but'a ts'ih chah 'una bughu nezdla. ⁷ 'Udechoo usjiz, 'i khunaiti, lion, ndúwhut'en. Bulh nankoh usjiz, 'i musdusyaz ndúwhut'en. Bulh tak'i usjiz, 'i dune k'una'a bunen hoonli. Bulh dink'i usjiz, 'i sbalyan 'út'oh li'int'ah. ⁸ 'I nyoh dinah usjiz, 'i lhuk'i hoh lhk'utak'i ye nut'o, 'i bughu yuzdla. 'Ink'ez ndulhcho hoh 'una zeh unli buyuh ts'ih chah. 'Aw 'ulh'ek 'ink'ez dzenis ibulh nachahulhúyiz hoh njan nduhútni,
 "Lubeshi bughu hoolah,
 lubeshi bughu hoolah,
 lubeshi bughu hoolah,
 Yak'usda neMoodihti,
 'en ts'iyai tsuk bughanus ulhtus 'int'ah.
 Ndun 'ant'e, 'ink'ez 'int'ah,
 'ink'ez whusatéyalh," hutni.

⁹ Ndun 'ilhuz 'ink'ez 'ilhuz wheni khuna, 'en kw'uts'uzda cho dézti 'i k'usda, 'en ndunnah hoonliyaz usjiz, soo cho ne'hiduni, hidélhti, 'ink'ez 'ahooliyiz nenachail'en hiyúlhni, ¹⁰ 'et ndunnah nat lanezi 'o 'at dinah dune dune netsuh whedelhdzulh, ndun kw'uts'uzda cho dézti, 'i k'ut usda, 'ilhuz 'ink'ez 'ilhuz wheni khuna, 'en hibut nacháhunedel, hits'u téni' hunilhdzun ho' hut'en. 'Ink'ez butsi nanezbaz 'i hibut nihíninla, 'ink'ez 'uhutni,
¹¹ "O neMoodihti nts'u ha baínduz, dénti, 'ink'ez ilhtus chah 'int'ah.
 'I ts'iyawh 'et ndan ts'idóni huba soo 'ulzoo, ts'iyaintsuk inla 'et huwa.
 Nyun inla 'et huwa 'int'ah, 'et whuz na'a hukwa' ninzun."

5

Dustl'us buk'une'úsduguz, Yak'usda be busheepyaz, 'i yílhchoot

¹ Njan 'et whunulh'en, ndun kw'uts'uzda cho dézti yuk'usda, 'en nalhnih ts'ih dula be dustl'us lhch'az ts'ih buk'une'usdúguz, 'i 'ink'ez dustl'us lhegha ndunenduz. 'Ink'ez skwúnlai 'o 'at nankoh 'et bune'delhúdz. ² 'Et 'ilhunuh lizas soo ulhtus, 'en télh'en. 'Ink'ez tube cho njan ndutni, "Ndán soo 'uldzoo, 'en ndi dustl'us yadáha' dutelhch'ulh 'ink'ez lhk'etuwélel?" ³ Nduk yak'uz, k'us yun k'ut, k'us yun t'ah chah, 'aw 'ilhunuh soo cha'ildzooh hoolah ndi dustl'us yadáha' dutelhch'ulh k'us yuntelh'ilh huba. ⁴ 'Ink'ez 'aw 'ilhunuh soo cha'ildzooh ndi dustl'us yadáha' dutelhch'ulh, 'ink'ez yuk'uyatelhtuk k'us yuntelh'ilh. 'Aw nahiyóolhtelh għait'ah, 'et huwa tube nasdutso. ⁵ 'Et 'ilhunuh dune netsuh whedelhdzulh, 'en 'usúlhni, "Intso ilah! Nilh'en Judah bulh hudédowh hubukhunai cho, lion hiyúlhni, ndun hubudayi cho David ts'ih haínzut, 'en 'uja ts'iyaintsuk whuch'a' nilhde. 'En zeh soo 'úldzoo ndi dustl'us yadáha' dutelhch'ulh, 'ink'ez ndi skwúnlai 'o 'at nankoh be lhúnedelhze, 'i yadáha' dutelhch'ulh. ⁶ 'Et ndet whutélh'en tube suba hooncha. Ndi kw'uts'uzda cho dézti 'ink'ez ndi dinah hoonliyaz 'usjiz, 'ink'ez dune netsuh whedelhdzulh hubutah chah, 'et sheeypyaz 'ilhuk'i, 'i hizelhghi, 'i nduwhút'en 'et siyin. Bude skwúnlai 'o 'at nankoh 'ink'ez skwúnlai 'o 'at nankoh 'una chah unli. 'Ibuna 'i 'int'ah Yak'usda be'ílhdzun unli skwúnlai 'o 'at nankoh nududeh. 'I ndi yun k'ut nduhóolcho whél'a. ⁷ 'Et ndun sheeypyaz ndun kw'uts'uzda cho dézti, 'i k'usda, 'en nalhnih ts'ih dustl'us yoontun, 'i yula k'ehíya'ai.

Yak'usda busheepyaz 'aw 'en zeh soo 'uldzoo

⁸ 'Et ndi dustl'us yílhchoot ibulh, ndi dinah hoonliyaz 'usjiz, 'ink'ez nat lanezi 'o 'at dinah dune netsuh whudelhdzulh chah, ndun sheeypyaz hibut

nacháhuneldel. 'Ilhunuh hinli ts'iyawh nela be, be ts'ujun nuhúle, 'ink'ez tsets'ai gold unli, 'i ndi dezkl'un sooltsun, 'i bet whudézbun. 'I ndi 'i 'int'ah dune Yak'usda bube'ildzun, 'en hiye tenadudli 'int'ah. ⁹ K'an 'et shun 'i hiyé whenijun hoh njan nduhutni,

"Ndi dustl'us tálhcholh 'ink'ez buda' dutálhch'ulh 'et huba soo' níldzoo. Dune nyazelhghi 'ink'ez nyuzkai be Yak'usda ba nenaonket.

'Ink'ez lhelhts'un hudedowh,

'ink'ez lhelhts'un na'a yahulhtuk,

'ink'ez 'uyoon dune, 'ink'ez lhelhdun keyah whut'en 'en chah.

¹⁰ 'Ink'ez neYak'usda ba hubudayi cho 'ink'ez nawhulnuk nesilhsí.

'Ink'ez ndi yun k'ut k'úne' ts'otel'ilh ka uzdutélts'ilh."

¹¹ 'Et njan whutélh'en 'ink'ez whudáts'o ndi kw'uts'uzda cho dézti, 'ink'ez hoonli usjiz, 'i chah, 'utsuh whudélhdzulh, 'en chah, 'en bunat lhanah lizas, 'en whuz hulai k'et 'aw whe hubuts'oodolhto għait'ah, ¹² 'en tube cho njan duhútni,

"Ndun sheeypyaz hizelhghi, 'en ye ulhtus, hiye soode'a 'int'ah, be whútnih, 'ink'ez nut'uk chah, be ts'udézti,

'ink'ez be whét'en,

'ink'ez ba ts'odélhti,

'en 'int'ah ndi ts'iyawh huba soo 'úldzoo hoh whuz na'a uzdóolhti."

¹³ 'Ink'ez ndai usjiz nduk yak'uz 'int'ah, 'i ndi yun k'ut chah, 'ink'ez ndi yun but'ah ts'ih chah, 'ink'ez k'us ndai ya too k'ut hoonli, 'en ts'iyawh njan nduhútni hoh ubudusts'o,

"En ba ts'odélhti, be ts'udézti, be whét'en,

'ink'ez ts'iyaintsuk buk'une' whut'en, 'i chah,

ndun kw'uts'uzda cho dézti k'usda chah, 'ink'ez sheeypyaz hizelhghi chah,

'ilhuz 'ink'ez 'ilhuz wheni be'ilhdzun wule."

¹⁴ 'Et ndi dinah usjiz, 'i 'utni, "Et ndoh honeh!" 'Ink'ez nat lanezi 'o 'at dinah 'utsuh whudélhdzulh, hibut nacháhuneldel 'ink'ez ndun 'ilhuz wheni khuna hits'u teni' nalhdzin.

6

'Udechoo dustl'us lhudildze

¹ 'Et ndi dustl'us be lhíldildze lhuk'i 'i ndun sheeypyaz 'i yuts'u hayálhch'ul 'et whutélh'en 'ink'ez dinah usjiz hubutah 'ilhuk'i 'i duzíts'ai. 'Ants'i ditnik k'una'a 'utni 'ink'ez "Anih 'ink'ez whunilh'en!" ni. ² 'Et whunalh'en 'ink'ez yeztli lheyul, 'i telh'en. Ndun yuk'usda k'aza nudútun. 'Ink'ez ndai netsi k'ustan nanezbaz, 'i butl'ayélts'ut. 'Et whuz na'a ts'iyannah ch'a telhdoh 'ink'ez whuch'a' butélhdoh ka, 'et whuz whinya.

Bulh nankoh dustl'us lhudildze

³ 'Et bulh nankoh dustl'us lhudildze, 'i yuda' dutelhch'ul. 'Ink'ez bulh nanah usjiz, 'i 'utni 'et 'oozálhts'a, "Anih 'ink'ez whunilh'en!" ni. ⁴ 'Ink'ez 'uyoo yeztli, tube dulk'un, whuz whellhah. Ndun yuk'usda, 'en be ts'ah'un na'a lhts'un 'uts'int'ah, ndi yun k'ut whut'en bugħu hootélhchulh, 'et yutl'aho'ai dune lhuhoodughan ka. 'Ink'ez soh cho 'i butl'ayánkez.

Bulh tat dustl'us lhudildze

⁵ Ndet bulh tat dustl'us be lhíldildze yuda' dutelhch'ul. Ndi bulh tanah usjiz 'et 'oozálhts'a 'ink'ez 'utni, "Anih, whunilh'en!" Whuz yuta'en 'ink'ez yeztli dulhk'us, 'i yutélh'en. Ndun yuk'usda, 'en bé ne'uldas, 'i bula k'et yuzdla.

⁶ 'Ink'ez ndi dinah usjiz hubutah ts'ih 'uwhutni, "Lħes haníyeh busa 'ilhuz dezbun, 'i lhuk'i sooneya denarius hiyúlhni, 'i k'elha yutez'ai. 'Ink'ez tak'i busa ndultsuk tl'o mai, barley hiyúlhni, 'i lhuk'i sooneya denarius hiyúlhni,

'i k'elha yutez'ai. 'Ink'ez khe be 'ut'es 'ink'ez mai too chah, ndi ts'iyaantsuk khun teh tinta' oolh'en gunih."

Bulh dink'i dustl'us lhudildze

⁷ 'Et bulh dink'i dustl'us lhíldíldze, 'i yuda' dutelhch'ul hoh bulh dinah usjiz 'et ndutni, "Anih 'ink'ez whunilh'en!" ⁸ Whunulh'en 'ink'ez yeztli bodande nduwhút'en. 'Ink'ez yuk'usda boozi, 'i be yáts'adlah hiyúlhni. 'Et niz t'eh yahadla delhts'i, Hades huwhútni, 'et buwhunelts'ulh. Ndi yun k'ut whut'en hoontsolyaz, nedo k'ah, (^{1/4}) huwhutni, 'et 'uwhulcho hubuhuteghan, 'et bughá whults'ut. Soh cho be, 'ink'ez dai chah, dada nudúzut, 'i chah, 'ink'ez chuntah khunai, ndi be dune yahutádlah.

Bulh skwúnlái dustl'us lhudildze

⁹ Ndet bulh skwúnlái dustl'us be lhíldíldze yuda' dutelhch'ul hoh ndunnah Yak'usda bughunek bugha 'ink'ez highunek highi yalhtuk, dune hubanghan buzul, 'en Yak'usda bukw'uzdai t'ah hubutéh'en. ¹⁰ 'Et tube cho njan nduhútni, "Nek'une' ul'en nyun lubeshi nghu hoolah, 'ink'ez ts'ah'un 'int'ah chah inli. Ndi yun k'ut ndunnah neanghan dawhuldzuh neuzkai bugha huba nahutanyeh 'ink'ez neba k'uténtnilh?" ¹¹ 'Ink'ez 'ilhunuh hinli hoh lheyul, 'i nahuyits'uz hubutl'a hínanla. 'Ink'ez hubuhútni, hubulh 'ulhna 'en 'ink'ez hubulh utsinkah 'en chah ts'iyawh 'en buk'una'a zeh hubuhuteghan, 'et lhaoodutenilh whuts'un, naoolhúyis.

Bulh lhk'utak'i dustl'us lhudildze

¹² 'Et sheepyaz 'et bulh lhk'utak'i dustl'us be lhíldíldze yuda' dutelhch'ul hoh khunyaz tube yun nughésnai, 'ink'ez sa chah dulhk'us suli, naih dulhk'us nduwhút'en. 'Ink'ez 'ulh'ek ooza chah, 'uskai nduwhút'en suli. ¹³ 'Ink'ez sum 'i chah yun k'ut nainkat. Ndi duchun figs mai ntet'ai whutsuh 'ants'i nilhts'i ulhtus, 'i be yun nanukuk, 'et whuz na'a sum, yun k'ut nainkat. ¹⁴ 'Ink'ez nts'e na'a dustl'us lhenahinudus, 'et whuz na'a yat'a lhenáwhunéduduz 'et whuz na'a hoolah whuzdli. Dzulh chah 'ink'ez noo teh, ts'iyawh whuzdla 'udun neoninkat. ¹⁵ Ndi yun hubudayi cho dune ncha, dune soode'a 'int'ah, nehughan bumoodih, dune ulhtus, 'ulhna ts'iyawh, 'ink'ez 'ulhna bula nadetnik, 'en chah, 'en ts'iyawh tse 'an 'ink'ez dzulh tah tse t'ah, hoh huntelhu'i. ¹⁶ 'Ink'ez 'uhutni, "Tse 'ink'ez dzulh tubulh nek'eoonóot'ah. 'Et t'eh ndun kw'uts'uzda cho dézti k'usda, 'en bunen 'ink'ez ndun sheepyaz ye húnilch'e, 'i ch'a neúntoolh'i. ¹⁷ 'Alha ye nelh hunilch'e, 'i 'aw 'et whudzin whusawhélts'ut. 'Aw 'ilhunuh whunts'i whulh wuyin gait'ah."

7

Israel ts'un hainde 144,000, 'en hubunintak hube hoodet'en téleh

¹ 'Et hukw'elh'az dinah lizas ndi yun k'ut dit nódelhúya hoh ubutéh'en. Ndi nilhts'i dink'i ndi yun k'ut 'ink'ez yatoo k'ut, 'ink'ez duchun chah, ndi buk'ut noolhts'i ka, 'et whuch'a k'ah hiyoontun. ² 'Et 'uyoón lizas ndaz de yedoh út'oh hoh téh'en. Yak'usda khuna, 'en ye hóodalh'eh, 'i ye'alh. 'Et ndunnah dinah lizas, 'en yun chah 'ink'ez yatoo bulh tinta 'otéh'ilh ka bughá whults'ut. Soo 'ultus hoh ³ 'en 'ubulhni, "Ndunnah neYak'usda be 'ulhna hinli, 'en 'et Yak'usda ye hóodalh'en, 'i be hubunintak hube hóodet'en hubuts'u telhtsilh, 'et whutsuh ndi yun, ya too, 'ink'ez duchun chah tinta oolh'en gunih!" ubúlhni. ⁴ 'Et danéltuk hubunintak hubube hóodet'en suli whudáts'o. Israel hits'ah haínde hubuzkeh, lhelhts'un hudedowh, 'en ts'iyawh 144,000 hinli. 'En ts'iyawh hubunintak hube hoodet'en hubuhulhtsi.

⁵ Judah hudedowh ts'ih haínde, 'en 12,000 hube hoodat'en hubuhulhtsi.
Reuben hudedowh ts'ih haínde, 'en 12,000 hube hoodat'en hubuhulhtsi.

Gad hudedowh ts'ih hainde, 'en 12,000 hube hoodat'en hubuhulhtsi.
⁶ Asher hudedowh ts'ih hainde, 'en 12,000 hube hoodat'en hubuhulhtsi.
 Naphtali hudedowh ts'ih hainde, 'en 12,000 hube hoodat'en hubuhulhtsi.
 Manasseh hudedowh ts'ih hainde, 'en 12,000 hube hoodat'en hubuhulhtsi.
⁷ Simeon hudedowh ts'ih hainde, 'en 12,000 hube hoodat'en hubuhulhtsi.
 Levi hudedowh ts'ih hainde, 'en 12,000 hube hoodat'en hubuhulhtsi.
 Issachar hudedowh ts'ih hainde, 'en 12,000 hube hoodat'en hubuhulhtsi.
⁸ Zebulun hudedowh ts'ih hainde, 'en 12,000 hube hoodat'en hubuhulhtsi.
 Joseph hudedowh ts'ih hainde, 'en 12,000 hube hoodat'en hubuhulhtsi.
 Benjamin hudedowh ts'ih hainde, 'en 12,000 hube hoodat'en hubuhulhtsi.

Ndunnah lheyul, i be húdelhts'i

⁹ 'Et hukw'elh'az whunilh'en 'ink'ez lhanah dune, hulai k'et 'aw hubuts'oodolhto għait'ah, 'en hubunulh'en. Lhelhdun keyah whut'en, lhelhts'un hudedowh chah. Yinkak dune chah. Ts'iyawh lhelhts'un na'a yahúlhtuk 'uhint'ah. 'En ts'iyawh kw'uts'uzda cho dézti, 'i 'ink'ez ndun sheeypyaz hibut nudelhúya. Ts'iyawh lheyul, 'i nahiyits'uz, 'i be dune hinli 'ink'ez 'ul tl'otel nduwhút'en, 'i hidelelh. ¹⁰ 'Et 'en tube cho 'uhutni "NeYak'usda kw'uts'uzda cho dézti k'usda 'ink'ez ndun sheeypyaz chah, be uzdujih, 'en buts'u hawhélts'ut!"

¹¹ 'Utsuh whudéldzulh, 'ink'ez dinah usjiz, lizas chah, 'en ts'iyawh ndi kw'uts'uzda cho dézti, 'i hinat nudelhúya, hibut nacháhuneldel 'ink'ez Yak'usda hits'u teni' nalhdzin. ¹² 'Ink'ez 'uhutni, "Ndoh honeh! Uzdóolhti.

'Et huwa ye dézti,

be ts'uw hunih,

be ts'ílhtus 'ink'ez nut'uk,
be chanailya ts'utni,

be uzdézti chah,

ndi ts'iyawh neYak'usda be'ilhdzun wule 'ilhuz 'ink'ez 'ilhuz wheni.

'Et ndoh honeh!"

¹³ 'Aw 'et 'ilhunuh 'utsuh whudéldzulh, 'en 'usúlhni, "Ndunnah lheyul, 'i be hudemhts'i, ndunnah ndan ho' hint'ah? 'Ink'ez nts'ez de hahándel?" ¹⁴ 'Et 'udúsni, "SMoodih nyun t'eoónínzun." 'Et 'usúlhni, "Hoh t'eh soo degħha nus dune dzuh nuhutedoh, 'en 'uhu ja hoh da whuz na'a dzuh nuhuzde. 'Ink'ez ndun sheeypyaz buzkai be dunaih toonáhiyuzguz 'ink'ez lheyul suli. ¹⁵ 'Et huwa Yak'usda bukw'usúda cho dézti, 'i hinat nudelhúya. 'Ink'ez dzin 'ink'ez 'ul'h'ek ibulh hiluglez whucho hiba ne'ut'en. 'Ink'ez ndun ndi kw'uts'uzda cho dézti yuk'ut usda, 'en hubutah 'int'ah 'ink'ez bughu tele. ¹⁶ 'Aw 'o 'un buyuh nucha'telhúts'ul 'ink'ez 'aw 'o 'un ta'óde għait'ah. 'Aw sa zul niz chah 'uhot'e għait'ah, 'ink'ez 'aw tube cho huba whunoozul għait'ah. ¹⁷ 'Et huwa 'ubinla, ndun sheeypyaz kw'usúda cho dézti, 'i hubutah 'int'ah, 'en bughu tele hoh butsuh teyalh 'ink'ez ndi too 'ilhuz wheni buk'u ts'ukhuna, 'i ts'un úbutelih. 'Ink'ez Yak'usda bunatsul too ts'iyawh buna k'et whúna'idutelhdoh."

8

¹ 'Aw 'et ndunah sheeypyaz ndi búlh skwunlai 'o 'at nankoh dustl'us be lhidildze yuda' dutelhch'ul hoh lhulcho (½) hukw'e' hunint'o, 'et nduhooldzah bat'en, 'et yak'uz nt'eoondiñil. ² Skwunlai 'o 'at nanah lizas Yak'usda but nudelhúya hubutélh'en. 'Ink'ez skwunlai 'o 'at nankoh be ts'újih, 'i hubutl'a yánkat. ³ 'Et 'uyoon lizas kwun tsit be nut'a, gold be 'ulya, 'i na'a, whusainya 'ink'ez Yak'usda bukw'uzdai but siyin. Bet yudutélhk'un sooltsun, 'i lhai hitl'aindzai. 'I dune Yak'usda bube'ildzun, 'en hubutenadudli, 'i bulh Yak'usda bukw'uzdai gold be 'ulya, 'i k'ut néyoolel ka. Ndi Yak'usda

bukw'uzdai 'i kw'uts'uzda cho dézti bubut yuzkai. ⁴ Ndi kwun tsit be nut'o sooltsun bulut 'ink'ez dune Yak'usda bube'ildzun, 'en hubutenadudli 'i bulh, ndun lizas bula k'et ts'ih Yak'usda ts'un whédukat. ⁵ 'Et ndun lizas kwun tsit be nut'o yílhchoot 'ink'ez Yak'usda bukw'uzdai k'ut kwun 'i be yudélbun. Yun k'éyilhkat hoh khunek lhai, 'i be taoodetnik, ditnik dutni, ditnik oolhges, 'ink'ez yun chah noghésnai. ⁶ 'Et ndunnah skwunlai 'o 'at nanah lizas, skwunlai 'o 'at nankoh be ts'ujih nuleh, hiye tejih wheni lhaháduja.

'Udechoo be ts'ujih, 'i yé' déja

⁷ 'Et 'udechoo lizas be ts'ujih, 'i yé' déja, 'ink'ez ooloo tsan 'ink'ez kwun 'i 'uskai bulh 'int'ah, 'i yun k'e híylhkak. 'Et ndi yun k'ut whuduchun (½) 'i dánk'un. 'Ink'ez yun whut'an neyelh ts'iyawh chah dánk'un.

Be ts'ujih, 'i bulh nankoh, 'i yé' déja

⁸ 'Et lizas bulh nánah be ts'ujih, 'i be 'udéja. Dzulh cho ndulh cho kwun be dezkl'un, 'i yatoo k'ut tahíyalh'uz. 'Et yatoo (½) 'i 'uskai zeh suli. ⁹ Yatoo k'ut khunai (½) 'i yahadla. 'Ink'ez ts'i cho nukat (½) 'i chah hoolah suli.

Bulh tak'i be ts'ujih, 'i yé' déja

¹⁰ 'Et bulh tánah lizas be ts'ujih, 'i be 'udéja. 'Ink'ez sum cho yaz ts'ih halts'ut. Be nekwunult'a k'una'a dezkl'un 'ink'ez 'ukoh (½) 'et 'uwhultsuk hukw'eílts'ut. 'Ink'ez too yun ts'ih hánusuli k'ut chah. ¹¹ Ndi sum, 'i wormwood, 'i boozi. Ndi boozi ts'ulki', 'i hiyúlhni. 'Ink'ez too (½) 'i wormwood, 'i suli. 'Ink'ez dune lhanah ndi too hik'eyáidla, ts'iyawh ts'ulki' suli 'et huwa.

Bulh dink'i be ts'ujih, 'i yé' déja

¹² 'Et lizas bulh dinah be ts'ujih, 'i be 'udéja hoh dzenis ooza, 'ulh'ek ooza, 'ink'ez sum chah ts'iyawh whenghaz (½) ndi ts'iyaintsuk but'agheznai. 'I ts'iyawh dulhgus suli. 'Et huwa dzenis whenghaz (½), 'ulh'ek chah (½) tsahólgus suli. ¹³ 'Et yaz ts'ih 'ilhunuh lizas yedoh hut'oh, 'et nalh'en, 'ink'ez soo 'ultus hoh njan ndutni, "Nuhwheni ndi yun k'ut delhúts'i, degha nus hoontsi' nuhts'u whékulh, degha nus hoontsi' nuhts'u whékulh, degha nus hoontsi' nuhts'u whékulh, ndi tanah lizas be ts'ujih, 'i be 'aw 'et hiye téjih 'et huwa!"

9

Bulh skwunlai be ts'ujih, 'i yé' déja

¹ 'Et bulh skwunlat lizas be ts'ujih, 'i be 'udéja, 'ink'ez sum ndus de yun k'élts'ut, 'et whunah'en. 'En ndi tsak'et whucho whutl'ah hoolah 'i be whuda'de'ai, 'en butl'ayélts'ut. ² 'Ink'ez njan tsak'et whucho whutl'ah hoolah whudá' dutéz'ai. 'Et 'ants'i koo tube whunezul cho k'una'a lhut nyus de hanéldo. 'I be dzenis ooza chah 'ink'ez yat'ah 'i bulh ndulhcho hoh tsahólgus suli. ³ 'Et ndi tulk'us cho lhut tuz haíndel 'ink'ez yun k'eíndel. Ndi tulk'us cho nts'e na'a hukwa' ninzun ne'tet'en, 'et bughá whults'ut. Ndi poison unli, 'i scorpion hiyulhni, nts'e na'a hukwa' ninzun tune'ut'en 'i k'una'a. ⁴ Ndi tulk'us cho 'i khunek hitl'adánla yun k'ut tl'o hanúyeh, k'us hanúyeh, duchun teh, ndi tinta' yóohl'en gunih hiyúlhni. Ndunnah dune Yak'usda ye 'ehóodalh'i hubunintak hubuk'uhoolah, 'en zeh hubundólhdah hubudáni. ⁵ 'Ink'ez hubuteghan hubugha chahoots'ulh. 'Ants'i skwunlai sanun 'et dzuh nuboolhdzut. Ndi scorpion hiyulhni uboget whuz na'a hukw'e húdunteda. ⁶ Hoh dzin whusawhélts'ut t'eh, 'et dune hoh yahutadlah hukwa huntetah 'et whunts'ih 'aw nahohó'ah għait'ah. Yahutadlah tube hukwa' huntezilh 'et whunts'ih 'aw yahódlah għait'ah. ⁷ Ndi tulk'us cho yeztli dune lhutedugħan ts'ih telh'az nduhóotet'en. Butsi nainezbaz gold

nduwhút'en, 'i butsi nanezbaz. 'Ink'ez bunen 'i chah dune nen nduwhút'en. ⁸ Butsigha, 'i chah ts'ekoo tsigha nduwhút'en. Bughoo, 'i chah khunaiti, lion hiyulhní, bughoo 'et nduwhút'en. ⁹ 'Et 'utes dzoot ni'delya hiye délhts'i. 'Ink'ez but'a 'i chah 'ants'i yeztli lhái 'elhbus dune nehughan ts'ih telhughaz 'et ndutni. ¹⁰ 'Ink'ez buche 'i scorpion buche nduwhút'en. 'Ink'ez buche be neooget 'ink'ez buk'e whúnduda. 'Et dune skwunlai sanun whuts'un dune hubundoolhda, 'et hubughá whults'ut. ¹¹ 'Ink'ez tsak'et whucho whutl'ah hoolah whulizas 'en ba hubudayi cho unli. 'En Hebrew buk'una'a Abaddon hiyulhní, 'ink'ez Greek buk'una'a Apollyon be húyoozi. ¹² 'Aw 'et 'udechoo degha nus hoontsi' hoh whélts'ut. Soo zélhts'ai, nawh degha nus 'o nus hoontsi' whuz de whélts'ulh.

Bulh lhk'utak'i be ts'ujih, 'iyé' déja

¹³ 'Aw 'et bulh lhk'utat lizas be ts'ujih, 'i be 'udeja. 'Ink'ez ndi Yak'usda bukw'uzdai gold be 'ulya, Yak'usda bubut yuz'ai, 'i Yak'usda bukw'uzdai dink'i bude yinli, 'i butuz 'uwhutni. ¹⁴ Bulh lhk'utat lizas be ts'ujih nutun, 'en 'uts'utni, "Ndunnah dinah lizas lhughel 'ukoh whucho, Euphratis huwhútni, 'en bula nadontnih." ¹⁵ 'Et ndunnah dinah lizas nts'oh huwa 'uhunet'oh, ndet dzin, ndet sanun, 'ink'ez ndet naooduzuk wheni, 'et wheni lhahúdint'ah ndi yun k'ut dune (%)'en huboohooghan ka bula hudétnik. ¹⁶ Ndunnah nehughan yeztli k'ahúdelhts'i, 200,000,000 hinli hutni, 'et 'uhuneltsuk huboozálhts'a. ¹⁷ Njan ho'en, 'et yeztli chah í'en. 'Et ndunnah hik'udelhts'i, t'es dzoot nihúdelya kwun lí'int'ah dulk'un, duldzan 'ankw'us dulhgus lí'int'ah, 'ink'ez sulphur k'una'a dultl'uz 'i be húdelhts'i. 'Ink'ez yeztli butsi 'ants'i khunaiti, lion, butsi dónet'en. 'Ink'ez buzek ts'ih kwun, lhut, 'ink'ez sulphur ndi buzáhaidukat. ¹⁸ Ndi tak'i hiye dzuh nutédeh, 'i be ndi yun k'ut dune (%), 'en yahadla. Ndi kwun 'ink'ez lhut, 'ink'ez sulphur 'i yeztli buzáhaidankat, 'i hik'eyaídla. ¹⁹ 'Et yé ulhtus buzek chah, 'ink'ez buche chah, whuz de haidukat 'et huwa. Buche tl'ughus lí'int'ah 'ink'ez 'utsi bulanduni'ai. 'I be dune hundélhdaih. ²⁰ Ndunnah ndi yun k'ut dune, ndi hiye dzuh nutédeh ye k'eyáchahadlal, 'en nduhút'en 'et 'aw hubulubeshi whuch'a hubeni náchahudunílel. 'En 'awhuz ntsi' nududeh, 'i hits'u teni' nilhdzun 'et huwa. 'Ink'ez 'uk'edélti, gold, silver, dulk'un t'eh, tse, 'ink'ez duchun be 'ulya, ndi 'uk'edélti chawhes'en 'int'ah, cha'dústs'uk 'int'ah, 'ink'ez nuchásyah chah 'int'ah, ndi hits'un teni' nilhdzun, 'et 'ustl'e' cha'hinil. ²¹ Dune hughan, 'ink'ez hudeyun, k'us dune 'ink'ez ts'ekoo bulh tinta' hút'ih, k'us 'uhundunut'ih, 'et ts'iyawh nuhwhulubeshi whuch'a nuhwhubeni nachahadunílel.

10

'Uyoon lizas ncha dustl'usyaz 'i tuyúlhchoos

¹ 'Et doo chah 'uyoón lizas ncha ndus de yak'uz ts'ih hainya yutélh'en. Kw'us tah 'int'ah 'ink'ez ditnik na'nanguz, 'i butsi k'ut nanesdúguz. Bunen sa nduwhút'en 'ink'ez buke kwun nduwhút'en. ² 'Ink'ez dustl'usyaz 'i tuyúlhchoos. Nalhnih ts'ih duke be yatoo k'edit'ez, 'ink'ez 'íntl'as ts'ih duke be yun k'edit'ez. ³ 'Ink'ez ndun lizas ncha soo khunaiti lion dulghoo, whuz na'a 'udeja. Soo hahuyih ibulh skwunlai 'o 'at nankoh ditnik 'udéja. ⁴ Skwunlai 'o 'at nankoh ditnik 'udeja hoh, 'aw 'et 'uk'e'tesgus. 'Et ndus de yak'uz ts'ih sulh yáztelhtuk. 'Et 'usúlhni, "Skwunlai 'o 'at nankoh ditnik daja déja, nyunch'oh zeh t'eoónónzin, 'aw 'uk'e'ónges gunih!" ⁵ 'Ink'ez ndun lizas ncha yatoo 'ink'ez yun k'ut siyin, 'en yak'uz ts'ih didilnik nalh'en. ⁶ 'Et yak'uz 'ink'ez ndai 'et hoonli, yun 'ink'ez ndai buk'ut hoonli, yatoo 'ink'ez ndai hubutah hoonli, ndun 'ilhuz 'ink'ez 'ilhuz wheni khuna, 'en ts'iyawh 'uhoonla, 'en boozi be

lizas ncha njan ndutni 'aw 'et neóodinzut! 'Aw 'o 'un hubaoohl'i ghaít'ah. ⁷ Et whunts'ih ndun bulh skwunlai 'o 'at nannah lizas 'aw 'et ndet dzin be ts'ujih, 'i be 'udutenilh hoh Yak'usda ho' hoont'ah wheyuh lhaóodutetnlilh. 'Et whuz na'a Yak'usda hube 'ulhna nus whunílh'en, 'en 'et hubugha ubudáni inle.

Ndi dust'l'usyaz 'i John ya'al

⁸ 'Et whutsuh da yak'uz ts'ih sulh sailhtuk whudáts'o, doo chah sulh yatelhtuk 'ink'ez 'utni, "Ndun lizas yatoo 'ink'ez yun k'ut siyin buts'un yínyalh 'ink'ez dustl'us tuyúlhchoos, 'i ólhchoot." ⁹ 'Ink'ez lizas bughu níya 'ink'ez 'udusni, "De' dustl'us sutl'ailhchoos." 'Et 'usulhni, "Nah! Ilhchoot 'ink'ez í'ahl! Mbut ba ts'ulki' tele, 'et whunts'ih nzek 'et honey k'una'a mba telki." ¹⁰ Lizas dustl'us bula k'e hayálhchooz 'ink'ez í'al. Sást'ai hoh honey k'una'a suba lhuki. 'Et whélhno hoh subut bet ts'uwhulki' suli. ¹¹ 'Ink'ez 'usulhni, "Lhanah dune, lhawh hudedowh, lhelh ts'un na'a yahúlhtuk, 'ink'ez hubudayi cho chah, doo chah 'en hubugha nus whunóolh'en hubudóoni huba' hoont'ah."

11

Nanah bunalh 'uhooja

¹ 'Et doo chah tl'ogħażiħ be 'ún de'ooldzih duchun li'int'ah, 'i stl'aidantān 'ink'ez lizas 'et siyin 'ink'ez 'utni, "Didinyih 'ink'ez Yak'usda hubuluglez whucho, Yak'usda bukw'uzdai chah ndi bunduná'olhdzih. 'Ink'ez nyooz luglez whucho Yak'usda ts'ih teni' nilhdzun, 'en chah huboodolhlo. ² 'Et whunts'ih luglez whucho whuzih tse whunalhtun ba n'az ts'ih, 'et whute 'aw whunducha'zolhdzih. 'Et 'udun yun k'ut whut'en bughá whunt'ai ho' hoont'ah. 'Ink'ez ndi yun k'ut Yak'usda bukeyah whuti, 'et dit lanezi 'o 'at nankoh sanun (42) 'et 'ants'i buba' hoonli hukw'u na'a hoh ndulhcho nahutedulh ho' hoont'ah. ³ 'Et ndunnah nanah suba bunalh 'uhooja, doso dulhk'us, 'i be húzke, 'en 1,260 dzin 'et nus hontelh'ilh, 'et butl'a óotes'ahl. ⁴ Ndunnah nanah, 'en nankoh duchun, Olive hiyúlhni, 'ink'ez nankoh be whét'en, 'i neMoodihti, ndi yun k'ut whuYak'usda, 'en bubut nanídez'a, 'i hinli ho' hint'ah." ⁵ Ndunnah bunalh 'uhooja ubundólhdah hukwa 'ut'en, kwun buzek haidutenolh 'ink'ez hubuch'a detni hoolah hubuhutelhtsilh. 'Ink'ez ndan hubundóolhdah hukwa' ninzun, 'en ndez na'a hizóolhghelh huba' hoont'ah. ⁶ Ndunnah nanah, 'en nduk yaz chan ch'a whudána'hudute'ahl huba' hoont'ah. 'Aw nus whuhunoolh'en whutah 'et 'aw nachaootelhtil 'et huwa. 'Ink'ez ndi too 'i chah 'uskai hitelhtsilh. Ndi yun k'ut hukwa' huninzun totsuk hiye dzuh nutedeh, 'i nudútezut, 'et nduhóot'en 'et hubutl'a whélts'ut.

Ndunnah nanah bunalh 'úhooja, 'en 'ubuhuzelhghi

⁷ 'Aw 'et ndunnah nanah bunalh 'úhooja dune hubulh yáhalhtuk, 'ustl'e' 'uhudéja hoh, khunaiti ntsi', 'i tsak'et whucho whutl'ah hoolah halget, 'i hubulh hutedughan, hubuch'a' telhdoh, 'ink'ez hubutzelhghelh. ⁸ 'Ink'ez hubuyust'e, keyah whuti, 'et ti yun nibanílhti. Njan keyah whuti 'et 'uts'uwhutni, keyah Sodom 'ink'ez yun k'ut Egypt ndúwhult'ah. 'Et neMoodihti lhdulalhgs k'ehiyilhti inle. ⁹ 'Et bulunah dune, lhelhts'un hudedowh, lhelhts'un na'a yahúlhtuk, 'ink'ez lhelhdun keyah whut'en chah, ndi buyust'e tat dzin 'o 'at Ihuhoolcho dzin hubuhuntelh'ilh. 'Ink'ez 'aw dune whuyihítelhtelh butl'a huhoo'ahlh għait'ah. ¹⁰ Ndi yun k'ut whut'en huhootét'i 'ink'ez hóntelhnik. 'Ink'ez lhts'e' hutéldulh. Ndunnah nanah nus whunílh'en dazsai, 'en dzuh nunéhulhde hutni 'et huwa.

Ndunnah bunalh 'uhooja dune hubangħan dinahudidel

¹¹ Tat 'o 'at Ihuhoolcho dzin inle hoh Yak'usda buyiz be ts'ukhuna biye délts'ut 'ink'ez dinahudit'az. Ndunnah hubunalh'en tube hunelhújoot.

12 Ndus de yak'uz ts'ih tube cho 'uwhudeja, "Ndez áh'us!" ni. 'Ink'ez buch'a detni bunalh kw'us k'ut yak'uz ts'ih whehá'az. **13** 'Et whulhugha 'uhunet'oh hoh tube yun nughésnai. 'Ink'ez keyah whuti (1/10) 'et nawhúnet'ai. 'Et yun nughésnai hoh 7,000 dune hedúghan. 'Et 'onghun tube whéhunelhújoot 'ink'ez yak'uz whuYak'usda, 'en hidálhti. **14** 'Et whúlh nat degha nus hoontsi' whewhélts'ut. Soo zelhts'ai whulh tat 'o nus degha nus hoontsi' 'a hoh whuz de whélts'ulh.

Bulh skwunlai 'o 'at nankoh be ts'ujih, 'iyé' déja

15 'Aw 'et whúlh skwunlai 'o 'at nanah lizas be ts'újih, 'i be 'udéja. 'Et yak'uz ts'ih lhanah tube njan duhutni,
"Ndi yun k'ut hubudayi cho bukeyah neMoodihti 'ink'ez buChrist,
bube'ilhdzun whuzdli.
'Ink'ez 'ilhuz 'ink'ez 'ilhuz wheni hubudayi cho tele."

16 'Et nat lanezi 'o 'at dinah 'utsuh whudélhdzulh Yak'usda but dukw'usuda cho dézti k'uhudelhts'i, 'en Yak'usda but nachahuneldel 'ink'ez hubuts'un teni' hunalhdzin. **17** 'Ink'ez 'uhutni,
"O Yak'usda neMoodihti degha nus ulhtus inli.

Ndan inli, 'ink'ez ndan ant'e,
'ink'ez ndan whuz de téyah inli.

Ndai be ílhtus, 'i cho ílhchoot 'ink'ez hubudayi cho inle 'et huwa.
Chanailya nts'útni.

18 'Udun yun k'ut whut'en huhunílch'e 'ink'ez nyoo be húnílch'e, 'i 'aw 'et whusawhélts'ut.

Yahadla huba na'dutédeh whusawhélts'ut.

Nye 'ulhna nus whunílh'en 'ink'ez dune nye'ildzun,
ndunnah nyoozi ye nuljut,
ntsol 'ink'ez ncha, 'en chah,
'en ts'iyawh huba' k'elha whutele.

'Ink'ez ndunnah ndi yun k'ut dune nilh'en,
'en chah tinta' 'ant'en hubutelhtsilh."

19 'Ink'ez Yak'usda hubuluglez whucho yak'uz whuz'ai whudáha' dankez.
Ndi chunkhelh dézti, 'i bet khunek neba lhaídinla, ndi nankoh tse k'ut 'uk'uné'uzguz, 'i bé dezvla, 'i nyo hubuluglez whucho nul'en. 'Ink'ez ditnik oolges, tube tawhúdetnik, ditnik dutni cha' whutni. Yun nughútnah, 'ink'ez 'oondloo tsan nincha, 'i chah nanánkat.

12

1 'Aw 'et nduk yat'ah ts'ih huwa ít'en, 'et hoh wheóodiltsai, ts'eke bunaih sa ts'un hainduz nduwhút'en, 'i be dune unli. Buketl'ah 'et 'ulh'ek ooza 'us'ai. 'Ink'ez lanezi 'o 'at nankoh sum 'i butsi náyuzt'uk. **2** 'Ink'ez ski bulh 'int'ah. Ka' dutni 'aw 'et ski whutéleh. **3** 'Ink'ez doo chah zeh 'uts'un na'a nduk yat'ah ts'ih huwa ít'en, 'et hoh wheóodiltsai. Whunulh'en tl'ughus cho khunai k'una'a núlgét dulk'un, skwunlai 'o 'at nankoh butsi 'ink'ez lanezi chah bude únli. 'Ink'ez skwunlai 'o 'at nankoh butsi, 'i 'ilhuk'i hoh hubudayi cho butsi nayuzt'uk nduwhút'en, 'i butsi nayuzt'uk. **4** Duche be nduk yat'ah sum (½) ndi ndus de hayálhdel 'ink'ez yun k'eyilhdel. Ndun ts'eke 'aw 'et buyaz whutéleh, 'en yubut siyin, soo ski whuzdli ibulh yutelhnoh 'et hukwa. **5** 'Ink'ez ts'eke duneyaz sulhtsi. 'En ndi yun k'ut lhelhts'un hudedowh, ts'iyawh 'ut'es tuz be k'une' butel'en. 'Ink'ez buyaz 'en Yak'usda 'ink'ez bukw'usúda cho dézti, 'i whuz whehíyalhti. **6** 'Ink'ez ts'eke chuntah dune chahóot'ih ts'ih whetsílhya. 'Et Yak'usda yuba lhaódilhdzun, 'et usda. 'Et 1,260 dzin 'et 'uwhuldzah, 'et ya'al, 'i be bughu tedleh.

Satan yak'uz tinahinino

⁷ 'Ink'ez nduk yat'ah whelhónidughan. Michael 'ink'ez dulizas teh tl'ughus cho khunai k'una'a nulget ch'a nihúndendel. 'Ink'ez ndi tl'ughus cho khunai k'una'a nulget, 'i dulizas teh huba nch'a nihúnindel. ⁸ 'Aw ndunnah tl'ughus khunai k'una'a nálget 'ink'ez bulizas teh, 'aw whuch'a cha'híldoh. 'Ink'ez yat'ah húdelhts'i whuch'a hubuhunézyoot. ⁹ 'Et ndi tl'ughus cho khunai k'una'a nálget ncha, 'en téhinino. Ndi 'uda whutl'ughus, netsudule 'ink'ez Satan hiyulhni. Ndi yun k'ut ndulhcho hoh dune nana'ah, 'en 'int'ah. Bulizas tubulh ndi yun k'ébuhuninyoot. ¹⁰ 'Et nduk yak'uz ts'ih tube cho njan nduhudéja,

"Aw 'et be uzdujih, 'i 'ink'ez be ts'ilhtus, Yak'usda hubudayi cho unli chah,
'et buChrist, 'en moodih tele whusawhélt's'ut.

Netsudule ndun nelhutsinkah hubuk'eho'alh,
'en ndi yun k'éhininyoot 'et huwa.

Netsudule 'en 'ut'en Yak'usda but seyin hoh dzin 'ink'ez 'ulh'ek ibulh nel-
hutsinkah hubuk'ehoo'ah.

¹¹ Ndun sheepyaz buzkai be,
ndi khunek Yak'usda ghu yalhtuk chah,
'i ndi ts'iyawh hoh netsudule ch'a hunilhde,
'ink'ez 'aw hukw'elha yahutadlah whechahuniljut.

¹² 'Et huwa yak'uz whut'i 'ink'ez Yak'usda bubun whucho t'ah húdelhts'i,
nuhwheni ts'iyawh whunélhnik!

'Et ndunnah ndi yun k'ut húdelhts'i, ya too k'ut chah nuhwheni ts'iyawh
degha nus hoontsi' nuhgha whutelts'ulh.

Netsudule ndus de nuhghu ninya tube hunilch'e.
T'eeoninzun huba nilhdukw suli 'et huwa."

Ts'eke dzuh niyulhdzut

¹³ 'Et nyoo tl'ughus cho khunai k'una'a nulget ndus de hahínanyoot t'ewhunanzin hoh, 'et ndun ts'eke duneyaz buyaz suli, 'en tube dzuh niyulhdzut. ¹⁴ 'Et whunts'ih ndun ts'eke sbalyan cho but'a nankoh butl'ayánkat. 'I be keyah dune chahóot'i ts'ih 'et tedalh whuz toot'ah ka. 'Et tat naooduzuk 'o 'at lhuhoolcho 'et ya'alh, 'i be bughudli hoh tl'ughus khunai k'una'a nulget, 'i ch'a 'et inda. ¹⁵ 'Ink'ez tl'ughus khunai k'una'a ts'eke ts'un too lhai buzá hayangoo. 'I be sih ndun ts'eke too bulh tóolat ninzun ka. ¹⁶ 'Et whunts'ih ndoh yun ts'eke yula 'uja. Nyo yun lhch'az 'uja 'ink'ez ndi tl'ughus cho khunai k'una'a nulget too buzá hayangoo, whuz 'ajul. ¹⁷⁻¹⁸ 'Ink'ez ndi tl'ughus cho khunai k'una'a nulget tube ts'eke bulh húnich'e, 'ink'ez ndun ts'eke buts'un hainzut hubulh úteghan ka buts'ú whelget. Yak'usda ubudani hik'une' 'ut'en 'ink'ez Sizi Gri ghu yalhtuk, 'i chah hiyoontun, 'en 'uhint'ah.

13

Khunaiti ntsi', 'i tooz haduki

¹ 'Et yatoo k'ut taba síyin hoh khunaiti ntsi', 'i tooz haduki hoh télh'en. Skwunlai 'o 'at nankoh butsi únli 'ink'ez lanezi bude únli. 'Ink'ez ndi bude lanezi hubudayi cho butsi nayuzt'uk nduwhút'en, 'i buk'e yuzdla. 'Ink'ez lhuk'i hoh butsi khunek Yak'usda ch'a yalhtuk, 'i buk'une' úsduguz. ² Ndi khunaiti ntsi' t'elh'en, 'i chuntah boos cho, leopard hiyúlhni, 'i nduwhút'en. Buke 'i chah sus ke nduwhút'en. 'Ink'ez buzek khunai cho lion hiyulhni, 'et nduwhút'en. 'Ink'ez ndi tl'ughus cho khunai k'una'a nulget 'i úlhtus chah, kw'uts'uzda cho dézti, 'ink'ez ts'iyaintsuk k'une' oot'en ka, 'et ts'iyawh yutl'ahónla. ³ Butsi lhuk'i, 'i tube nukai suli. 'I bugha dazsai suba lí'int'ah. 'Et

buka whuzdli nawhéje. 'Et ndi yun k'ut ndulhcho hoh huwa hoho'en 'ink'ez ndi khunaiti ntsi', 'i hiyuntezdel. ⁴ Ndun tl'ughus cho khunai k'una'a nulget, khunaíti ntsi' k'une' oot'en ka yugha óoni'ai, 'en hits'un teni' nalhdzin. 'Ink'ez ndi khunaiti ntsi', 'i chah hits'un teni' nalhdzin 'ink'ez 'uhutni, "Ndi khunaiti ntsi' 'aw yundult'ah hoolah. 'Aw hiyooghan ghait'ah." ⁵ Ndi khunaiti ntsi' tooz haduki, 'i hooncha howu yalhtuk 'ink'ez Yak'usda ch'a yalhtuk, 'et wheni buzek bughá whults'ut. Dit lanezi 'o 'at nankoh sanun (42) 'et ndúwhuldzah hoh k'une' oot'en ka bughá whults'ut. ⁶ Yak'usda ch'a yawhénilhtuk. Bun cho whuch'a yawhénilhtuk, 'ink'ez ndunnah yak'uz húdelhts'i, 'en chah, 'et ts'iyawh hubuch'a yawhénilhtuk. ⁷ Dune Yak'usda bube'ildzun 'en hubulh lhatedúghan 'ink'ez buch'a telhdoh, 'et bughá whults'ut. Lhelhts'un hudedowh, lhelhts'un na'a yahulhtuk, 'ink'ez lhelhdun keyah whut'en, 'en k'úne' butel'en ka bughá whunt'ai. ⁸ 'Ink'ez ndi yun k'ut húdelhts'i, 'en ts'iyawh ndi khunaiti ntsi' hits'un teni' huntelhdzilh. Ndun sheepyaz 'udechoo ndi yun 'uhóolya whuts'un 'uda lháoodint'ah hituzelhghelh, 'en ndi 'ilhuz 'ink'ez 'ilhuz wheni ts'ukhuna be dustl'us k'ut huboozi hubuk'echa'íduguz, 'en 'uhint'ah.

⁹ Ndan budzo hooni 'en 'uhoozólhts'a huba' hoont'ah.

¹⁰ Ndan 'uyoon 'ulhna hubulhtsi,

dich'oh chah whuz na'a zeh 'ulhna tele.

Ndan soh cho be dune ghan t'eh,

dich'oh chah soh cho be datetsah ho' hont'ah. 'Et huwa dune Yak'usda bube'ildzun, njan hiye 'alha 'uhoont'ah 'ink'ez 'i be whulh huzyin, 'et 'uwhúlhni.

'Uyoo khunaiti ntsi', 'i yun ts'ih hálget

¹¹ 'Et doo chah 'uyoo khunaiti ntsi' 'et yun k'ut nyus de úlgwulh hoh telh'en. Sheepyaz k'una'a nankoh 'ude hoonli 'ink'ez tl'ughus cho khunai k'una'a núlget, 'en k'una'a yalhtuk. ¹² Ndun 'udechoo khunaiti ntsi', 'i ye k'une' 'ut'en whuz na'a ts'iyawh yubut 'et ndut'en. 'Ink'ez ndi yun 'ink'ez yuk'ut whut'i chah ndi khunaiti ntsi' dazsai inle 'ink'ez naje, 'i hits'u teni' noolhdzun hubulhtsi. ¹³ 'Ink'ez ndi bulh nanah khunaiti ntsi' hooncha whehóodet'en tune'út'en. Dune nahl ndus de kwun yun k'éylhkuk 'et chah ndut'en. ¹⁴ Ndi bulh nanah khunaiti ntsi', 'i 'udechoo khunaiti ntsi' nahl lhat teh huwa 'et'en tune'út'en bughá whunt'ai, 'et hoh ndi yun k'ut whut'en nabuna'ah. Ndun khunaiti ntsi' soh cho be nukai suli inle 'ink'ez khana ndi yun k'ut whut'en, 'i buk'edéltsi 'uhooleh hubúlhni. ¹⁵ 'Ink'ez ndi 'uk'edéltsi usjiz yutelhtsilh, 'et bughá whults'ut. 'Et t'eh ndi khunaiti ntsi' buk'eyíltsi yalhtuk chah yulhtsi. 'Ink'ez ndunnah ndi 'uk'edéltsi 'aw hits'un teni' noolhdzin ghait'ah, 'en ts'iyawh hubuhooghan, ni. ¹⁶ Ntsol 'ink'ez ncha, soo hude'a 'uhint'ah 'ink'ez tehul'en, 'ulhna 'ink'ez 'ulhna whuch'a bula nahudetnik chah, 'en ts'iyawh nalhnih ts'ih bula k'us bunintak hube hóodet'en hubulhtsi. ¹⁷ Ndunnah hube hóodet'en, k'us khunaiti ntsi' boozi, ndi be 'oodulto boozi be 'i bunintak k'us bula nalhnih ts'ih 'aw hubuk'echa'íduguz t'eh, 'aw 'uhoket 'ink'ez whé'hoket ghait'ah. ¹⁸ Ndi 'i be ts'úwhunih, ndan beni hooni, 'en ndi khunaiti ntsi' boozi yoodolhto huba' hoont'ah. Dune boozi 'int'ah. Ndi 'i lhk'utak'i lhk'utak'i lhk'utak'i ndi yúlhni (666).

14

144,000 ne'aBá boozi bunintak buk'une'úsduguz, 'en Yak'usda busheepyaz hizih nudelhúya

¹ Njan 'et ho'en, dzulh Zion hiyulhni, 'i buk'ut ndun sheepyaz 'et siyin téh'en. 144,000 ne'aBá boozi bunintak buk'une'úsduguz, 'en hizih nudelhúya.

² 'Ink'ez ndus de 'uwhútni. Too najilh li'whutni. 'Ink'ez ditnik, tube dutni

k'una'a li'utni. 'Ink'ez nela be, be ts'újun be 'ujun, 'i chah oozálhts'a. ³ Et kw'uts'uzda cho dézti, nyoo dinah usjiz, 'ink'ez 'utsuh whudéhhdzulh chah, 'en bubut soo k'an dit shun be hújun. Ndi shun yoodool'eh hoolah. Ndunnah 144,000 ndi yun k'ut nabuhonket, 'en zeh ndi shun hiyodutel'eh. ⁴ Ndunnah, 'en ts'ekoo bulh tinta' ut'ih chahílah, but'acha'ughésnai 'uhint'ah 'et huwa. 'En 'uhint'ah ndun sheeypyaz nuya teh totsuk nuhínudelh. Dune tah 'uhooket 'uhint'ah. Yak'usda 'ink'ez busheepyaz, Sizi hiyúlhni, 'en huba 'udechoo bube'ildzun hinli. ⁵ 'Ink'ez buzek 'aw whuts'it hoolah. 'Alha Yak'usda bukw'usda cho dézti yuk'usda 'en but 'aw hoh tink'us 'uhint'ah bughu hoolah.

Tanah lizas, 'en 'uhudéja

⁶ 'Et doo chah 'uyoona lizas nduk yaz nut'o hoh whunulh'en. Ndi yun k'ut whut'en, lhelhdun keyah whut'en, lhelhts'un hudedowh, lhelhts'un na'a yahúlhtuk, 'ink'ez soo ts'iyanah, 'en ndi khunek unzoo 'ilhuz 'int'ah, 'i bugha buduténilh, 'et huba ndun lizas ndi khunek 'et yudelh'ai. ⁷ Tube cho njan ndutni, "Yak'usda be nulhújut 'ink'ez délhti. Dune ba nahuteyeh 'aw 'et hoh wheghah 'uhunet'oh 'et huwa. Yaz 'ink'ez yun k'ut, yatoo 'ink'ez yun ts'ih hainli chah, ts'iyawh 'uhoonla, 'et huwa buts'un teni' nulhdzun." ⁸ 'Ink'ez 'uyoona lizas yunet'oh 'ink'ez 'en chah njan ndutni, "Keyah whuti Babylon 'aw 'et hoolah whuzdli, hoolah whuzdli! Nyoh keyah whuti soo nint'uk hoh 'uyoona dune bulh tinta' ut'ih, mai too k'una'a lhelhdun keyah whut'en hube yulhnai." ⁹ 'Et bulh tanah lizas 'et hubunet'oh. Dultul hoh njan ndutni, "Ndi khunaiti ntsi' 'ink'ez buk'edeltsi chah, ndunnah yuts'un teni' nilhdzun, 'ink'ez bunintak k'us bula k'ut bube hóodet'en t'eh, ¹⁰ 'et t'eh dich'oh Yak'usda ye húnich'oh mai too k'una'a ulhtus, 'i hitetnilh. Ndi lubot mai too k'una'a ulhtus dezbuun, 'i whuz na'a ndi Yak'usda ye húnich'e, 'i be dézbun. 'Et ndunnah khunaiti ntsi' hits'un teni' nilhdzun, 'en Yak'usda bulizas 'ink'ez busheepyaz bunalh kwun 'ink'ez sulphur hiyúlhni dezkuun, 'et 'i be dzuh natedeh. ¹¹ Ndi hiye dzuh nudeh whulut, 'ilhuz wheni nduk whedújoot. Ndunnah ndi khunaiti ntsi' 'ink'ez buk'edeltsi hits'un teni' nilhdzun 'ink'ez bunintak k'us bula k'ut bube hóodet'en, ndunnah 'et nduhut'en, 'en dzenis 'ink'ez 'ulh'ek 'i bulh nachahutelhúyiz." ¹² 'Et whunts'ih ndunnah dune Yak'usda bube'ildzun, 'aw 'en hubuk'una'a cha'hít'ah. Yak'usda bughunek netl'aída'ai howa whulna whunts'i whulh huzyin hoh Sizi Gri huba 'alha' yint'ah, 'en 'uhint'ah. ¹³ 'Et nduk yak'uz ts'ih 'usuhútni, "Ndi 'uk'e'ínges, k'an 'et whuts'un ndunnah neMoodihti t'einínzun hoh yahadla t'eh, 'en degha nus hoonzoo hubulh 'úhooja." Ndoni, "A," ni. "Ut'en 'uhalh'en, 'et huwa nahutelyis. 'Ink'ez dahét'en hube 'ut'en unzoo 'aw tinta hiyóolelh ghat'ah."

Ndi yun k'ut ha' nukat 'aw 'et whusahónzut

¹⁴ Njan 'et ho'en, kw'us lheyul, 'i télh'en. 'Ilhunuh dune ye nduwhút'en, 'en ndi kw'us yuk'usda. Butsi k'éyuztan, 'i gold 'int'ah, 'ink'ez tl'o be udút'as khundenyin, 'i niyútun. ¹⁵ 'Et 'uyoona lizas luglez whucho tenínya 'ink'ez soo 'ultus hoh kw'us k'usda njan ndíyulhni, "Nyoo be udút'as, 'i be 'int'as. 'Aw 'et 'utant'us whusawhélts'ut. Ndi yun k'ut ha' nukat 'aw 'et whusahónzut 'et huwa." ¹⁶ 'Et huwa kw'us k'usda ndi be whudut'as yun k'ut ye whútet'us. 'Et ndi yun ndulhcho hoh 'ada hont'az.

Yak'usda ye húnich'oh, 'i

¹⁷ 'Et yak'uz whuluglez whucho, 'et 'uyoona lizas tenínya. 'En chah be udút'as khundenyin 'i nutun. ¹⁸ 'Et doo chah 'uyoona lizas 'en Yak'usda bukw'uzdai ts'ih haínya. 'En kwun k'une' 'ul'en unli. Ndun be whudut'as khundenyin nútun, 'en soo 'ultus hoh njan ndí yulhni, "Ndi be 'udút'as khundenyin, 'i be

'int'as 'ink'ez ndi yun k'ut mai nezt'ai buduchun bulh nailhdzooh, 'aw 'et nezt'ai 'et huwa." ¹⁹ 'Aw 'et ndun lizas dube whudút'as, 'i be ndi yun k'ut hont'az 'ink'ez mai nezt'ai buduchun bulh nayalhdzook. 'Ink'ez njan tse cho buk'ut hawhedúkai, 'et ndi mai 'ayalhkat, 'ink'ez ke 'et ndi mai yuk'unuya hoh butoo buts'un hayútsus 'et hukwa. 'Et whuz na'a ndi Yak'usda ye húnilch'oh 'int'ah. ²⁰ 'Et keyah whuti whan'az, 'et njan mai too 'ul'en whuz'ai, 'et mai hik'unúdelh 'ink'ez 'uskai buts'un hayíjul. Yeztli buzek yuzdla 'et 'uskai tadékhulh suli. 'I 200 miles bat'en, 'et 'uwhulyez.

15

Skwúnlai 'o 'at nankoh lhests'ai, 'i Yak'usda ye húnilch'oh 'i be dez bun

¹ 'Et doo chah yat'ah 'udun whe hóodet'en whutelh'en. Hooncha 'ink'ez huwa 'ét'en. Skwúnlai 'o 'at nanah lizas, 'en ndi skwúnlai 'o 'at nankoh degha nus hiye dzuh nuzut, 'i be whunujut, 'i nihíyule. 'I be yak'usda ye húnilch'oh lhaóodutenilh. ² 'Et doo chah, bun k'ut whucho dezghel khe li'int'ah, kwun hubutah hoonli, 'i nduwhút'en telh'en. Ndunnah ndi khunaiti ntsi' buk'edéltsi, 'ink'ez be hóodet'en, 'ink'ez ndi be 'oodulto boozu yuch'a' nilhde, ndi bun k'ut whucho dezghel k'ut nahudelhiya. Nela be ts'ujun, 'i Yak'usda be'ilhdzun, 'i nahúyule. ³ Moses, 'en Yak'usda be 'ulhna, 'ink'ez ndun sheepyaz bulh buyun 'i be hújun. Ndi shun njan ndutni,

"NeMoodihti Yak'usda 'o nus ulhtus inli.

Nye 'ut'en uncha 'ink'ez bugha 'ét'en.

Ndi yun k'ut whut'en huba hubudayi cho inli.

Nye 'ut'en k'ah ts'ah'un 'ink'ez 'alha 'uhoont'ah.

⁴ O neMoodihti ndan nyechantelhújut 'ink'ez nyoozi ts'udutélhti?

'Alha 'i be nyunch'oh zeh lubeshi bughu hoolah inli.

'Alha 'udun keyah whut'en ts'iyawh whusahatédulh 'ink'ez mbut nts'un teni' huntelhdzin.

Ts'ah'un be né'int'en, 'i 'aw 'et hooltsai 'et huwa."

⁵ 'Et hukw'elh'az whunulh'en 'aw 'et yak'uz ts'ih Yak'usda hubuluglez whucho whut'ah, Yak'usda bughunek chunkhelh be dezvla, 'i buk'ut bun k'ut whucho whuz'ai, 'et da' dutézkez. ⁶ 'Ink'ez ndunnah skwúnlai 'o 'at nanah lizas skwúnlai 'o 'at nankoh dune ye dzuh nudeh, 'i hiyelelh hoh luglez whucho tihúnindel. Naih dézti chaditsun 'ink'ez be hóodet'en be húdelhts'i. 'Ink'ez buts'i tah 'on doh, se gold unli, 'i be tsuhudelhú'oo. ⁷ 'Et ndunnah dinah khunai usjiz, hubutah 'i lhuk'i skwúnlai 'o 'at nankoh lhests'ai, gold unli, 'i Yak'usda 'ilhuz 'ink'ez 'ilhuz wheni khuna, ye húnilch'oh, 'i be dez bun, 'i lizas skwúnlai 'o 'at nanah hubutainínla. ⁸ 'Ink'ez Yak'usda buts'un hayánduz 'ink'ez yé ulhtus bulut 'i be luglez whucho whudezbun. Skwúnlai 'o 'at nankoh dune ye dzuh nudeh skwúnlai 'o 'at nanah lizas nihíyule, lhaóodutenilh whutsuh luglez whucho dune daóoya ghat'ah.

16

¹ 'Et oozálhts'a nyez de luglez whucho ts'ih 'uwhutni, tube 'uwhutni 'ink'ez skwúnlai 'o 'at nanah lizas hubulh yatelhtuk 'et njan ndutni, "Ahdulh 'ink'ez ndi lhests'ai, 'i Yak'usda ye húnilch'oh, 'i be dez bun ndi yun buk'ut nadulhkuk!"

'Udechoo lhests'ai, 'i

² 'Et huwa 'udechoo lizas ndi lhests'ai, 'i yun k'ut naidélhkak. Ndunnah dune ndi khunaiti ntsi' bé hoodet'en, 'i yit'i, 'ink'ez buk'edéltsi ts'un teni' nilhdzun, 'en ndai yun k'ut naidélhkak, 'i be ntsi' 'ink'ez buba' whuninzun be ndunnah dune bukak wheoonílhjut.

Bulh nankoh lhests'ai, 'i

³ 'Et bulh nanah lizas, 'en dulhests'ai yatoo k'ut naidélhkat. 'Ink'ez ndi yatoo dune dazsai buzkai nduwhút'en suli. 'Ink'ez ndai toot khunai ts'iyawh yaídla.

Bulh tat lhests'ai, 'i

⁴ 'Et bulh tanah lizas dulhests'ai 'ukoh ts'iyawh 'ink'ez yun ts'ih hanusuli chah, ndi k'ut naidélhkat. 'Ink'ez too ts'iyawh 'uskai suli. ⁵ 'En lizas zeh njan ndutni hoh dús't'o,

“O neMoodihti ts'ah'un 'int'ah.

Nyun 'int'ah 'ink'ez nyun 'ant'e 'ink'ez lubeshi bughu hoolah inli.

Whuz na'a huba nahuzínya 'et huwa.

⁶ Dune Yak'usda bube'ildzun, 'en 'ink'ez ndan nus whunilh'en hububahang-han.

'Et huwa khunaiti ntsi' hinedulh, 'en 'uskai hiyootnai ka huba 'iyínla.

Njan 'et whuch'a honílhde 'et huwa.”

⁷ 'Ink'ez Yak'usda bukw'uzdai ts'ih 'uyoon yatélhtuk whudusts'o hoh njan ndutni,

“Yak'usda neMoodihti,

ts'iyawh whanus 'ultus inli.

'Alha 'ohoont'ah! Nyun ts'ah'un na'a 'ink'ez 'alha hukw'u na'a dune ba nahinyeh.”

Bulh dit lhests'ai, 'i

⁸ 'Et bulh dinah lizas dulhests'ai sa k'ut naidílhkat. 'Ink'ez dune kwun be buka nódatek'un ka bughá whunt'ai. ⁹ 'Ink'ez kwun tube nezul, 'i be buka nódezk'an. 'Ink'ez Yak'usda boozi hiyenah yalhtuk. 'En ye úlhtus, 'i be ndi dune ye dzuh nudeh hoonli 'et huwa. 'Ink'ez 'aw hubulubeshi whuch'a hubeni nachahadunilel 'ink'ez 'aw chahidílhti.

Bulh kwulai lhests'ai, 'i

¹⁰ 'Et bulh skwulanah lizas dulhests'ai khunaiti ntsi' bukw'usúda cho dézti, 'i yuk'usda, 'i k'ut naidílhkat. 'Ink'ez bukeyah hubudayi cho unli ndulhcho hoh tsahólhgus whuzdli. 'I bugha tube hukw'e húnduda k'et hubutsoola hiya'ahl. ¹¹ 'Ink'ez Yak'usda yak'uz usda, 'en hiyenah yalhtuk. Stabe buka whunduda 'i be hubulh 'últs'ulh 'et huwa. 'Ink'ez dahút'en 'aw whuch'a nachahídulh.

Bulh lhk'utak'i lhests'ai, 'i

¹² 'Et bulh skwúnlai 'o 'at nanah lizas dulhests'ai 'ukoh whuti, Euphratis huwhútni, 'i k'ut tayálhkat. 'Ink'ez too hoolah suli. 'Et hoh ndunnah hubudayi cho ndaz de hahutédulh, hoh lhuhutedulh 'et wheni 'et huba 'uhóonla.

¹³ 'Ink'ez tl'ughus cho khunai k'una'a núlget, 'ink'ez khunaiti ntsi', 'ink'ez whuts'it hoh nus whunílh'en tahult'ah nudúdeh ntsi', 'i tsasli nduwhút'en, buzek hayándl 'et whutélh'en. ¹⁴ Ndowh netsudule bunudúdeh, 'i 'int'ah, hoh huwa 'út'en tune'ut'en. Yun k'ut ndulhcho hoh whuhubudayi cho 'ilho hubutughélelh. Yak'usda ndun whanus ultus budzin, 'et dzin, 'en bulh lhatedúghan 'et wheni lhadútneh. ¹⁵ “Soo zélhts'ai, 'undunut'ih k'una'a whuz de nél'ilh. Ndunnah 'ahoolhyez khudli 'ink'ez bunaih chadidzun, 'en 'et nduhút'en t'eh, 'aw 'ust'et nuhooya ghait'ah 'ink'ez bube 'ust'et wút'en ghaft'ah, 'en degha nus hoonzoo hubugha whutéls'ulh.” ¹⁶ 'Et Hebrew bughunek k'una'a Armageddon huwhútni, 'et wheni netsudule bunudúdeh ndi yun k'ut whuhubudayi cho 'ilhobohowezsla.

Bulh skwúnlai 'o 'at nankoh lhests'ai, 'i

¹⁷ 'Et bulh skwúnlai 'o 'at nanah lizas dulhests'ai ndoh tazai k'uz naidílhkat. 'Ink'ez ndukyak'uz whuluglez whuchø kw'uts'uzda cho dézti su'ai ts'ih, whuz

tube cho njan nduwhútñi, "Aw 'et lhaoodíja!" ¹⁸ 'Ink'ez tawhudetnik, ditnik 'ink'ez ditnik chah oolges, 'ink'ez hooncha hoh yun núghesnai. Ndi yun k'ut dune whúzdli 'et whuts'un 'aw ndulhcho be whuz na'a yun nuchághesnai. ¹⁹ 'Ink'ez njan keyah whuti tawh lhk'ehonkat. 'Ink'ez 'udun keyah whut'en bukeyah whuti, hoh chah nawhúnankat. 'Ink'ez nyoh keyah whuti Babylon huwhútñi, 'et chah Yak'usda whunalinik, 'ink'ez Yak'usda ye húnilch'oh, mai too k'una'a ulhtus, 'i yugha étalhdzoh 'et huwa. ²⁰ 'Et 'ink'ez noo ts'iyawh chah hoolah suli, 'ink'ez dzulh chah hoolah suli. ²¹ 'Ink'ez ndus de yak'uz ts'ih 'indloo tsan nincha cho, 'i dune k'ut naílhtan. 'Ilhuk'i 'indloo tsan 100 lbs 'et 'uldaz. Ndi 'indloo tsan be óonujut k'et 'i bugha dune Yak'usda hiye duyih.

17

Ts'eke 'ul'en khunaiti ntsi' soo dulk'un, 'i yuk'usda

¹ 'Aw 'et ndunnah skwúnlai 'o 'at nanah lizas skwúnlai 'o 'at nankoh lhests'ai nule, 'en hubulh 'ilhunuh sghu ninya 'ink'ez 'usulhní, "Anih ndun degha nus 'ul'en, lhat too yuk'usda, huba nahezya whúnyuntelhtun. ² Ndi yun k'ut hubudayi cho hubulh tinta' 'ut'ih. 'Ink'ez ndi ye tinta' 'ut'ih 'ants'i mai too k'una'a, 'i be ndi yun k'ut whut'en hubínelhnai li'uja." ³ 'Et Ndoni be dune chahóot'ih ts'ih sunilhti. 'Et njan whunulh'en, ts'eke khunaiti ntsi' soo dulk'un, 'i yuk'usda. Yak'usda yulh yeduyih khunek, 'i khunai ntsi' buyust'e ndulhcho hoh buk'e'ús duguz. Skwúnlai 'o 'at nankoh butsi hoonli 'ink'ez lanezi bude hóoni. ⁴ Dulk'un mai too nduwhút'en 'ink'ez soo dulk'un, 'i ndun ts'eke ye usda. 'Ink'ez gold 'ink'ez tseyaz dunezti, 'ink'ez kw'usul dunezti chah, ndi be nudelhútsi. Lubot gold unli, 'i nuyúka. Ndai ndi yun k'ut whut'en tink'us whudutsun tune'húst'en 'ink'ez hube 'ut'en buba' whuninzun, 'i be ndi lubot dézbun. ⁵ Bunintak 'et boozi 'uk'e'ús duguz, 'ink'ez ndez na'a njan ndutni, "whe' hoont'ah hooyah Babylon uncha, 'ul'en be'ama 'ink'ez ndi yun k'ut degha nus hoontsi' chah be'ama", ni. ⁶ 'Et ndun ts'eke téh'en. Ndunnah Sizi bugha dune hubulh yálhtuk, 'et hukwa hizelhghi 'ink'ez k'us ndan Yak'usda bube'ildzun, 'en chah, hubuzkai 'i be ndun ts'eke tanésnai. Nalh'en hoh suba hooncha k'et 'aw suba 'alha cha'hóot'ah.

Ts'eke 'ul'en 'ink'ez khunaiti ntsi' daja ni hoh 'utni

⁷ 'Et lizas 'usúlhni, "Di ka mba hooncha? Ndun ts'eke, 'ink'ez ndi khunaiti ntsi' skwúnlai 'o 'at nankoh butsi hóonli 'ink'ez lanezi bude únli k'usda, 'et bugha whe' hoont'ah hooyuh, 'et nyudutésnilh. ⁸ Ndi khunaiti ntsi' nalh'en, 'i 'ant'e inle 'ink'ez k'an 'et hoolah, 'ink'ez tsak'et whucho whut'ah hoolah whuz de hatélgwulh 'ink'ez nts'e hoolah tele ts'ih telgwulh. 'Ink'ez ndi yun 'udechoo 'ulya whuts'un, ndunnah ndi yun k'ut whut'en, ndi 'ilhuz ts'ukhuna be dustl'us k'ut, 'i k'ut 'aw huboozi 'uk'echa'iduguz, ndi khunaiti ntsi' 'ant'e inle, 'ink'ez k'an 'et hoolah, 'et whunts'ih hoonli ho' 'int'ah, 'en ndet hiya'en t'eh huba whutécha. ⁹ Ndán beni whúnih njan huwa nuni noozut. Ndi skwúnlai 'o 'at nankoh 'utsi, 'i skwúnlai 'o 'at nankoh dzulhyaz 'int'ah. 'I k'ut ts'eke yuk'usda. ¹⁰ 'Ink'ez skwúnlai 'o 'at nanah hubudayi cho hoonli. Skwunlatnah 'en huholah suli. 'Ilhunuh 'en 'awhuz hubudayi cho unli 'ink'ez 'ilhunuh 'awhuz whusachásyak. Whusainya t'eh, 'astl'iyaz zeh hubudayi cho tele. ¹¹ 'Ink'ez ndi khunaiti ntsi' 'ant'e inle 'ink'ez 'aw k'an 'et hoolah, 'en lhk'udínah hinli. 'Et whunts'ih ndunnah skwúnlai 'o 'at nanah 'en hubulh 'ilhunuh 'int'ah 'ink'ez ndet hoolah tele ts'ih telgwulh. ¹² Ndi lanezi 'ude i'én, 'i lanezi hubudayi cho, 'awhuz hubudayi cho huteleh butl'acháwhuskat 'uhint'ah. 'Et whunts'ih 'ilhuh hukw'e'hunint'o 'uwhuldzah, 'et ndi khunaiti ntsi' 'en bulh k'une' hutét'en hubugha óotelts'ulh. ¹³ 'En ts'iyawh lhgha 'uhuninzun. Hiye úlhtus 'ink'ez hiye k'une' 'ut'en, ndi khunaiti ntsi' 'et higha

óotelelh. ¹⁴ Ndunnah, 'en ndun sheeypyaz bulh lhahutedughan. 'Ink'ez ndun sheeypyaz 'en hubuch'a' telhdoh! 'En 'int'ah ts'iyawh moodih, 'en ts'iyawh huba Moodihti unli 'ink'ez hubudayi cho chah unli, 'en ts'iyawh huba hubudayi cho unli 'et huwa. Ndunnah yulh 'int'ah, 'en 'utahálya 'ink'ez bughu nusja, 'en 'aw Sizi hilachaditnil hinli." ¹⁵ 'Et doo chah lizas 'usúlhni, "Nyo lhat too k'ut 'ul'en yuk'usda whunalh'en, ndi too, 'i lhanah dune, lhelhts'un hudedowh, 'ink'ez lhelhts'un na'a yahúlhtuk hoonli whuz na'a ndi too 'et 'en 'uhint'ah. ¹⁶ Ndi khunaiti ntsi' bude lanezi i'en, ndun 'ul'en hits'u dutetnik. Ndai yit'i, 'i ts'iyawh higha hahitelyelh 'ink'ez 'ust'et gail tele. Hiyust'e hite'ulh 'ink'ez kwun be hidutélhk'un. ¹⁷ Yak'usda nts'e na'a dawhútenilh hukwa' ninzun, 'et budzi yé danla soo lhk'una'a zeh nuni hunoozut ka. 'Ink'ez hubudayi cho hiye k'une' 'ut'en, ndi khunaiti ntsi' hitl'aóotelilh, ndet Yak'usda bughunek lhawhúdutenilh 'et whuts'un. ¹⁸ 'Ink'ez ndun ts'eke i'en, 'en njan keyah whuti unli ho' 'int'ah. Ndi yun k'ut hubudayi cho bumoodih unli."

18

Njan keyah whuti Babylon 'aw 'et hoolah whuzdli

¹ 'Et ndoh hoh hukw'elh'az 'uyoon lizas yak'uz ndus de út'oh hoh téh'en. Soo ulhtus hoh k'úne' 'ut'en nduwhút'en. Buts'un hányuzduz ndi yun k'ut be whét'en. ² 'Ink'ez soo dultul hoh njan ndutni,

"Njan keyah whuti Babylon 'aw 'et hoolah whuzdli
hoolah whuzdli

'Ink'ez njan keyah whuti Babylon, ndi ntsi' nududeh lhai bukeyah whúzdli.
Nududeh dutsun ts'iyawh delhts'i whuzdli.

ndai dut'aiyaz dutsun 'ink'ez buts'uz dutnik,
'i chah 'et delhts'i.

³ Soo nint'uk hoh 'uyoon dune bulh tinta' 'ut'ih,
mai too k'una'a 'udun yun k'ut whut'en,
'et whuz na'a zeh hube yulhnai.

Ndi yun k'ut hubudayi cho chah hiyulh tinta' ut'ih inle.

'Ink'ez ndi yun k'ut 'uhóoket, 'en
ndun ts'eke hoh soode'a 'int'ah 'ink'ez whélhtus,
'et huwa higha soode'a huzdli."

⁴ 'Et doo chah ndus de yak'uz ts'ih 'uwhutni whudáts'o hoh njan nduwhútni,
"Sudune buts'uh hanáhdelh doo ka sih 'en bulh lubeshi 'oolh'en.
'Ink'ez doo ka sih ndi dune ye dzuh nudeh,
'i nuhghá doolts'it.

⁵ Bulubeshi nduk yat'ah ts'ih 'udéltai suli 'et huwa.
'Ink'ez yé tink'us 'int'ah, 'i ts'iyawh Yak'usda yunalni.

⁶ Danwhúhinla whuz na'a zeh huba 'uk'elha hoolhtsi.
'Ink'ez be 'ut'en nawh 'ultsuk huba 'uk'elha hoolhtsi.
Ndi lubot mbez nuhwhuba lhtainílhze,
'i nawh 'et 'ultsuk 'i huba lhtanaoolhdzeh.

⁷ Duba naducha 'ink'ez whudézti hukw'u na'a zeh yinkak usda,
whuz na'a dzuh nuzut 'ink'ez tso unli bugha óonah'aih.

Dudzi yuh hoh njan ndutni,
'Hubudayi cho ts'eke k'una'a sída.
'Aw tsándelh chásdlah,
'ink'ez tso chah chasés'en.'

⁸ 'Et huwa dune ye dzuh nudeh,
'ilhudzin zeh 'et ndi ts'iyawh bugha whútelts'ulh.
Bé dats'utsah, tso,
'ink'ez dai chah ts'iyawh.

'Ink'ez kwun be soo ts'iyawh duték'un.
NeMoodihti Yak'usda yuba naheyelh, 'en ulhtus 'et huwa."

Ndi yun k'ut whut'en, 'en Babylon hoolah whuzdli hukw'e hunudleh

⁹ "Ndi yun k'ut whuhubudayi cho yulh tinta' 'ut'ih, 'en soo hiyulh soode'a 'uhánt'e ndun ts'eke dezkl'un bulut hinilh'en hoh, hik'e tetso 'ink'ez hik'e ni unteleh. ¹⁰ Ndi ye dzuh nadinzut hinilh'en 'ink'ez hiye nuljut 'et huwa ye 'un cho nodelhúya 'ink'ez 'uhutni,

'Keyah whuti Babylon degha nus hoontsi' huwá whults'ut,
degha nus hoontsi' huwá whults'ut.

Nyo hoolhtus keyah whuti,

'ilhuh hukw'e'hunint'o, 'et mba nahezya, whusawhélts'ut.'

¹¹ 'Et whulagha ts'ih ndi yun k'ut 'uhóoket hik'e tetso, 'ink'ez 'en chah hik'e ntedleh. Ndai hiye ooke, 'aw dune chahuyoosket suli 'et huwa.

¹² Gold, silver, tse dunetzti, kw'usul dunézti, naih dézti, naih dulk'un 'ankw'us dulhk'us, seluk soo dulk'un, khunai ncha bude, ivory hiyúlhni, hoonliyaz hiyilh'i ts'iyai dézti duchun, dulk'un t'eh, iron, tse, marble hiyulhni, 'ants'i ts'iyai dézti, ¹³ 'ink'ez bulh buta'whut'en, cinnamon hiyulhni, 'ink'ez sooltsun dezkl'un, khe sooltsun, yoo, Frankincense hiyulhni, mai too, 'ink'ez khe, olive hiyulhni, lhes 'ink'ez lhes hanúyeh, musdus, sheep, yeztli 'ink'ez nuyúlhbás tubulh, dune hubuyust'e 'ink'ez hubuzul chah, ts'iyawh ye 'óoket." ¹⁴ 'Et 'uhutni, "Ink'ez soo ts'uyi unzoo zeh kúndunut'a, ndai tube hika' ninzun, 'i chah ts'iyawh nch'a hoolah suli. Ndai dézti 'ink'ez soo 'uwhut'en, ndi ts'iyawh nch'a hoolah suli, 'aw naónonlelh ghait'ah." ¹⁵ Ndunnah ndi be 'ooduket, 'en ndun ts'eke soode'a 'int'ah ubulhtsi, ndun ts'eke ye dzuh nuzut, 'i hiyé nuljut 'et huwa ye 'un cho highu nudelhúya, tube cho hutso, 'ink'ez hukw'e ni hunudleh. ¹⁶ 'Ink'ez chah 'uhutni,

"Degha nus hoontsi' nghá whults'ut!

Degha nus hoontsi' nghá whults'ut!

'Iyuge! 'Iyuge!

Nyo keyah whut'i naih dulk'un 'ankwus dulhk'us,

'ink'ez dulk'un be húdelhts'i,

'ink'ez gold, tseyaz dunézti,

'ink'ez kw'usul dunetzti be nahudelhúts'i.

¹⁷ Soo ts'ah'un 'ilhuh hukw'e'hunint'o ndi be soo uzde'a whucho, 'i ts'iya whuzdli."

'Ink'ez ndunnah ts'i cho be nuke, bumoodih chah, ndunnah whuzna'a 'uhooket 'ink'ez 'oohooket, 'en ts'iyawh ye 'un cho nuhudelhúya.

¹⁸ 'Ink'ez nyoo dezkl'un bulut, 'i hinalh'en hoh tube cho njan nduhútni, "Aw ndóohoont'ah keyah whuti 'aw 'udun whuz na'a keyah whuti hoolah!"

¹⁹ 'Ink'ez lhez hubutsi k'ehúyidzeh, 'ahúldzul, hutso, hukw'e ni hunudleh, 'ink'ez 'uhutni,

"Degha nus hoontsi' bughá whults'ut!

Degha nus hoontsi' bughá whults'ut!

Nyo keyah whuti ts'i yatoo k'ut nükat ts'iyawh soo hude'a hubulhtsi.
'Ilhuh hukw'e'hunint'o soo ts'ah'un ts'iya whuzdli."

²⁰ "Nuhwheni yak'uz whut'en 'ink'ez nuhwheni Yak'usda be'ildzun 'ink'ez nuhwheni whel'a,

'ink'ez nus whunilh'en chah ndun ts'eke 'ul'en bulh dahooja,

'et huwa soo cho whunélnik!

nts'e na'a nuhwhuba nahezya whuz na'a Yak'usda nuhwhuba yuk'elha whulhtsi 'et huwa."

Keyah whuti Babylon 'aw 'et 'ilhuz 'ustl'e' 'uhóoja

21 'Et lizas ulhtus tse cho buk'ut lhes dunutsut nduwhút'en, 'i yílhchoot 'ink'ez yatoo k'ut taínalh'uz. 'Ink'ez 'utni,
“Soo wheónonujut hoh keyah whuti Babylon whuz na'a Yak'usda nawhunteýus
'ink'ez 'aw'o 'at dune nahó'ah ghait'ah.

22 Nela be ts'ujun, 'i 'ujun chah, buzek whé hiye ujun
'ink'ez be ts'újih be hújih,
'aw'o 'at dune hubuhudóts'o ghait'ah.

Ndunnah lhelhts'un dedowh 'ulh'en,
'en chah 'ilhuz huholah tele.
'Ink'ez tse k'ut lhes hundunutsut be duts'o 'et chah 'ilhuz 'uwhuduténih,
'aw'o 'at dune 'uhudoots'o ghait'ah.

23 'Aw be whét'en, 'i chah chahootélah.
'Aw nyoh dune lhghu delhts'i,
'et chah 'ilhuz 'uwhuduténih.

Ndunnah mba 'óoket ndi yun k'ut dune ncha 'uhant'e.
Duyun k'una'a ndi yun k'ut dune lhelhts'un hudedowh nyun nabuna'a 'et
huwa.

24 'Ink'ez ndunnah nus whunilh'en, dune Yak'usda be'ilhdzun, 'en hubuzkai,
'ink'ez ndi yun k'ut dune hubanghan,
'en chah ts'iyawh 'en hubuzkai 'i 'int'ah!"
ni, lizas ulhtus.

19

*Keyah whuti Babylon ts'iya whuzdli, 'et huwa ndunnah yak'uz húdelhts'i, 'en
'et hubugha howhunélnik*

1 'Et njan hukw'elh'az whudusts'o nduk yak'uz ts'ih tube lhanah soo tube
cho njan nduhútni,
“Yak'usda uzdoólhti!
Be ts'udujih, 'ink'ez ye dézti,
'ink'ez ye úncha,
'ink'ez ye úlhtus,
ndi ts'iyawh neMoodihti Yak'usda buba' yint'ah.

2 Ye nahéyelh ts'iyawh 'alha 'int'ah 'ink'ez ts'ah'un 'int'ah 'et huwa.
Ndun degha nus 'ul'en hoontsi' tune'ut'en, 'et hoh ndi yun k'ut dune tinta'
hubunílh'en,
'ink'ez Yak'usda be 'ulhna hubuzkai whulhtsi,
'et hukw'elha Yak'usda yuba nahezya.”

3 Doo chah zeh 'uhutni,
“Yak'usda uzdóolhti!
Ndun ts'eke 'ilhuz 'ink'ez 'ilhuz wheni bulut nduk whedújoot!”

4 'Et ndunnah nat lanezi 'o 'at dinah 'utsuh whudélhdzulh, 'ink'ez ndunnah
dinah 'usjiz nacháhunedel 'ink'ez Yak'usda bukw'usuda cho dézti, 'i yuk'usda
hoh, hibut dugwutsi be nachahunedel 'ink'ez hits'u teni' nalhdzin hoh
nduhútni,
“Et ndoh honeh!

Yak'usda nts'udélhti!”

5 'Et kw'usuda cho dézti ts'ih njan nduwhútni,
“Nuhwheni ts'iyawh Yak'usda be 'ulhna 'ink'ez hiye nuljut chah,
ntsol 'ink'ez ncha chah,
neYak'usda délhti!”

6 'Et whudáts'o 'ants'i dune lhanah 'ilhuh yahatelhtuk li'hutni. 'Ants'i too
najilh k'una'a 'uwhutni. 'Ink'ez tube cho ditnik dutni lí'whutni, hoh njan
nduhútni,
“Yak'usda uzdóolhti!

NeMoodihti Yak'usda degha nus ulhtus,
 'en ts'iyantsuk k'une' whul'en 'et huwa.

⁷ Ts'ohót'i 'ink'ez ts'onólhnik 'ink'ez uzdóolhti.

Ndun sheepyaz 'at tet'ilh huba whusahónzut 'ink'ez bu'at yutéleh 'aw 'et dich'oh lhadúja.

⁸ Naih dézti,
 chadítsun 'ink'ez be hóodet'en,
 'i ye t'edalh ka bughá whults'ut."

Ndi naih dézti, 'i dune Yak'usda bube'ildzun hubube 'ut'en ts'ah'un 'int'ah, 'i 'int'ah. ⁹ 'Et ndun yalhtuk, 'en 'usúlhni, "Njan 'uk'e'onges, ndun sheepyaz 'at 'utet'ilh na'hutet'alh, ndunnah hubughu nusja, 'en degha nus hoonzoo hubughu whútels'ulh." 'Ink'ez 'usulhni, "Ndi 'i soo ts'ah'un na'a Yak'usda bughunek 'utni." ¹⁰ 'Ink'ez bubut nachánesno buts'un teni' untilhdzilh ka. 'Et 'usúlhni, "Et ndint'en ilah! Nyulh 'ulhna usdli. 'Ink'ez nyulhutsinkah, 'ink'ez Sizi bughunek bughu yalhtuk, 'en ts'iyawh hubulh 'ulhna usdli hoh 'ust'ah. Yak'usda 'en zeh buts'un téni' nilhdzun! Whunilh'en, ndi khunek Sizi be ghú yatuk, 'i mba nus whunóolh'en ho' hoont'ah."

Christ yeztli lheyul, 'i 'et yuk'usda

¹¹ 'Et yak'uz dáha' dankez 'et whutelh'en, 'ink'ez yeztli lheyul, 'i télh'en. Yuk'usda, 'en but'aníuznitan 'ink'ez ts'ah'un 'int'ah hiyúlhni. Soo ts'ah'un na'a dune ba nehughan 'et whuz na'a zeh huba nahuyeh. ¹² Buna kwun k'una'a tezdi nduwhút'en. Butsi k'ut hubudayi cho butsi k'eyúz dla nduwhút'en, 'i lhai butsi k'usula. Boozi buk'e'usdúguz, 'i 'aw dune t'einízun, dich'oh zeh t'einízun. ¹³ Nayits'uz 'uskai be toonalhuchooz, 'i be dune unli. 'Ink'ez boozi, 'i Yak'usda Bughunek ts'utni. ¹⁴ 'Ink'ez yak'uz nehughan, naih dézti lheyul 'ink'ez chadítsun, 'i be hudélhts'i. Yeztli lheyul, 'i k'ut delhts'i hoh huyunedulh. ¹⁵ 'Et ndi soh cho, khundeniyin buzá hayedúki. Ndi 'i be 'udun yun k'ut whut'en ye hubut ts'e' telht'oh ka. Dich'oh 'ut'es soh be k'une' hubutel'en. 'Ink'ez Yak'usda degha nus ulhtus, 'en ye whúske 'ink'ez ye húnilch'oh, 'et njan mai too 'ul'en whuz'ai k'una'a, 'i dich'oh yuk'unutéya. ¹⁶ Nayits'uz 'ink'ez buwuz k'ut 'et boozi 'uk'une'úsduguz hoh njan ndutni, "Hubudayi 'en hubudayi cho 'ink'ez moodih hubuMoodihti," ni.

Khunaiti ntsi', 'i 'ink'ez hiyulh lhúdughan tubulh hubuch'a ninde

¹⁷ 'Et doo chah lizas sa niz séyin hoh télh'en. 'Ink'ez soo dultul hoh ndai dut'aiyaz ndoh núdelh, 'i ndi yúlhni, "Ndez 'ilhowéhdel Yak'usda ncha, ndi teh'alh nuhwhuba lhaídinla. ¹⁸ 'Et hubudayi cho hubuyust'e, nehughan hubumoodih hubuyust'e, dune ncha hubuyust'e, yeztli 'ink'ez yuk'udelhts'i, 'ink'ez ts'iyanah yust'e, 'ulhna 'ink'ez 'ulhna whuch'a bulawhudetnik, ntsol 'ink'ez ncha chah, hubuyust'e, 'i ts'iyawh teh'alh." ¹⁹ 'Et khunaiti ntsi' telh'en, ndi yun k'ut hubudayi cho nehughan tubulh 'ilhuhowezdel, ndun yeztli yuk'usda 'ink'ez yuba nehughan, 'en hubuch'a nehúdendel hubulh lhahutedughan ka. ²⁰ 'Et ndi khunaiti ntsi' hiyílhchoot. 'Ink'ez whuts'it hoh nus whunilh'en, 'en chah hiyílhchoot. 'En 'int'ah khunaiti ntsi' nalh huwa 'ét'en tune'úst'en. 'I be ndunnah khunaiti ntsi' 'i be hubuk'une'delhúk'an, 'ink'ez ndunnah buk'eyéltsi ts'ih teni' nalhdzin, 'en ts'iyawh nabuna'a. 'Et ndunnah nahúlt'ah hukhuna hoh kwun sulphur be dézk'un, bun k'ut dúwhulcho, 'et tsabadano. ²¹ 'Et 'onghun khunaiti ntsi' ba nehughan, 'en ndun yeztli yuk'usda, soh cho buzá hayedúki, ndi soh cho 'i be ts'iyawh 'ubanghan. 'Ink'ez dut'aiyaz ts'iyawh dune yust'e húnesdai.

20

Satan 1,000 naooduzuk 'et lhughel

¹ 'Et yak'uz ndus de ts'ih lizas ut'oh hoh téh'en. T'es tl'oollh cho 'ink'ez nyo tsak'et whucho whutl'ah hoolah 'i be whuda'de'ai bulh 'i yelelh. ² 'Et ndun tl'ughus cho khunai k'una'a nulget, ndun 'uda whútl'ughus, 'en netsudule hiyúlhni 'ink'ez Satan chah hiyúlhni. 'En yílhchoot 'ink'ez 1,000 naooduzuk 'et wheni yulhghel. ³ Tsak'et whucho whutl'ah hoolah, 'et wheyano 'ink'ez yuch'a dána'de'ai 'ink'ez whudána'delhdze. 'Et whuz na'a ndi 1,000 naooduzuk lhaóodutenilh 'et whuts'un, ndi yun k'ut ndulhcho hoh lhelhts'un hudéadowh dune 'aw 'o 'un nabunoo'ah ghait'ah 'et huwa. 'Et whunts'ih 'et hukw'elh'az, 'astl'iyaz hila nadootnih huba' hoont'ah.

Christ be'ilhdzun, 'en 1,000 naooduzuk hiyulh hubudayi cho hanle

⁴ 'Et kw'uts'uzda cho dézti lhai téh'en. 'Ink'ez yuk'udelhts'i, 'en dune ba nahuteyeh, 'et bughá whunt'ai. 'Et ndunnah Sizi bughunek bughu yalhtuk, 'ink'ez Yak'usda bughunek chah, 'et huwa 'en hoh da butsi k'unónutselh. 'Ink'ez ndunnah nyuk khunaiti ntsi' k'us buk'edéltsi hits'u teni cha'nílhdzil, 'ink'ez ndunnah buk'une'delhúk'an be bunintak k'us bula k'ut buk'echa'íduguz, 'en ts'iyawh buzul nulh'en. 'En nahukhítña 'ink'ez 1,000 naooduzuk ndúwhulyez hoh ndun Christ 'en bulh moodih hinli. ⁵ Njan 'et 'udechoo dinazdutédulh 'uhoont'ah. 'Et whunts'ih 'onghoh yahadla, 'en 1,000 naooduzuk lhaóodija t'eh zeh dinahudutédulh. ⁶ K'us ndan njan 'udechoo dune dinadutédulh hubulh 'uhoont'ah, 'en degha nus hoonzoo hubugha whutelts'ulh, 'ink'ez lubeshi bughu hootelah huteleh. 'Ink'ez whulh nat dune yatádlah, 'aw 'en huba cha'hóot'ah. 'Et k'us Yak'usda 'ink'ez Christ bunáwhulnuk huteleh 'ink'ez 1,000 naooduzuk 'i hiyulh moodih huteleh.

Netsudule ndi kwun, sulphur be dezkl'un bun k'ut dúwhulcho, 'et tsuh hídan

⁷ 'Et 1,000 naoodezuk 'ilhawhúduja t'eh, Satan tsak'et usda hila nadutetnih. ⁸ 'Ink'ez 'udun yun k'ut whut'en ndi yun k'ut ndulhcho hoh húdelhts'i, 'en nabunte'ah. Gog 'ink'ez Magog whut'en, 'en lhatedughan ka, Satan 'ilho hubuteghelelh. 'En yatoo taba sai 'et 'uhuneltsuk. ⁹ 'Et ndi yun k'ut ndulhcho hoh whudune whusahátedulh 'ink'ez njan keyah whuti 'et dune Yak'usda bube'ildzun huwhut'i, 'et 'uhoont'ah keyah whuti Yak'usda hukw'entsi', Jerusalem huwhutni 'et whunat 'et 'ilhunahowetughédulh. 'Ink'ez nduk yak'uz Yak'usda usda whuz de kwun hatékulh. 'Ibe ntsi' ts'iyawh ts'iya hutele. ¹⁰ 'Et ndi kwun, sulphur be dezkl'un bun k'ut dúwhulcho, 'et khunaiti ntsi' 'ink'ez whuts'it be nus whunílh'en 'et huzke, 'et netsudule, dune nana'ah, 'en chah 'et tsu hídan. 'Et dzenis 'ink'ez 'ulh'ek ibulh 'ilhuz 'ink'ez 'ilhuz wheni dzuh nuhutedeh.

Kw'uts'uzda cho lheyul, Yak'usda 'i k'ut usda hoh, ndan yuk'unucha'it'el huba nahuteyeh

¹¹ 'Aw 'et kw'uts'uzda degha nus ncha lheyul, 'ink'ez ndun yuk'usda 'en téh'en. Ndi yun k'ut 'ink'ez yat'ah chah Yak'usda usda, 'et buch'a oonínkat, 'i 'ink'ez ts'iyawh hoolah whuzdli. ¹² 'Ink'ez yahadla ntsol, ncha chah Yak'usda but nahúdelhúya hubutéh'en. 'Ink'ez dustl'us lhai buk'une'úsduguz, 'i lhk'enankat. 'Ink'ez 'uyoo dustl'us buk'une'úsduguz, 'i ts'ukhuna ho' dustl'us, 'i chah lhk'enankat. 'Ink'ez yahadla bube 'ut'en k'ah huwa ndi dustl'us lhai 'uk'e'edúguz, 'i bughu huba nahesda. ¹³ 'Et yatoo k'ut yahadla, 'ink'ez be yats'adlah, 'i be yahadla 'ink'ez Hades húdelhts'i chah, 'en ts'iyawh whutl'ábahunla huba nahutedeh ka. 'Ink'ez 'ilhunuh hinli hoh bube 'ut'en

hubugha huba nahesda. ¹⁴ 'Et be yáts'adlah 'ink'ez Hades bulh njan sulphur be dezkl'un bun k'ut dúwhulcho tsuh bodalhdel. Njan 'et whulh nat yats'itádlah 'uhoont'ah. ¹⁵ 'Et hoh ndunnah ts'ukhuna dustl'us k'ut huboozi 'uk'echa'íduguz, 'en ts'iyawh ndi kwun bun k'ut ndulhcho 'et tsuh ba hudalhdel.

21

Ts'iyaintsuk k'an 'et nasdli

¹ 'Et k'ahoondit yat'ah 'ink'ez yun chah k'ahoondit, 'et whutélh'en. 'Udechoo yat'ah 'ink'ez 'udechoo yun 'et whehónkat 'et huwa. 'Ink'ez 'aw yatoo chah hoolah suli. ² 'Et si, John, njan keyah whuti whulubeshi hoolah, k'an 'et Jerusalem huwhúttni, 'et ndus de yak'uz ts'ih Yak'usda ts'un hawhélts'ut, 'et whutélh'en. Ts'ekeyaz ki tet'ilh ba soo naduja, 'et nduwhut'en. ³ 'Et ndus de yak'uz ts'ih tube cho 'uwhutni, njan nduwhúttni, "Nilh'en 'et Yak'usda dune hubulh 'uwhutet'ilh, 'ink'ez hubulh dune tele, 'ink'ez hubudune tele. 'Ink'ez Yak'usda dich'oh hubulh útet'ilh 'ink'ez buYak'usda tele. ⁴ 'Ink'ez Yak'usda bunatsul too buna k'et whuna'itelhdoh. Yats'adlah chah 'ustl'e' 'uwhutenilh. Tso ts'indli 'ink'ez ts'utso chah 'ustl'e' 'uwhutenilh. 'Aw 'o 'un hukw'e ts'unduda chah hootélah. Whuts'un da 'uhoont'ah ts'iyawh ts'iya whuzdli 'et huwa." ⁵ 'Et kw'uts'uzda cho dézti k'usda 'utni, "Soo zilhts'ai ts'iyai tsuk k'ahoondit 'uwhusdleh." 'Ink'ez 'usúlhni, "Ndi khunek ts'ah'un 'int'ah 'ink'ez but'aníwhunitan ho' 'int'ah, 'et huwa 'uk'e'inges." ⁶ 'Ink'ez 'usulhni, "Aw 'et lhaóoduja! Si Alpha 'ink'ez Omega usdli. 'Udechoo whe' whudit'en 'ink'ez lhawhúdulya usdli. Ndán ta'ósde, 'en ndi too be ts'ukhuna hajilh whutoo 'i hubugha itéldzoh. ⁷ Ndunnah 'ut'en ntsi' ch'a 'alhdeh ts'iyaintsuk buba' yutét'ilh. HubuYak'usda tesdle 'ink'ez suzkeh hutele. ⁸ 'Et whunts'ih ndunnah whénuljut, huba 'alha cha'hóot'ah, huba' whuninzun tune'hut'en, nehughan chah, hoontsi' túne'hut'en, duyun, 'uk'edéltsi ts'un tenahududli, 'ink'ez huwhuts'it chah, 'en ts'iyawh nyo bun k'ut dúwhulcho kwun sulphur be dezkl'un, 'et 'uwhutet'ilh. 'Et whúlh nat yats'utádlah 'uhoont'ah."

Keyah whuti Jerusalem k'ahoondit nawhusdli

⁹ 'Et ndun skwunlai 'o 'at nanah lizas, skwunlai 'o 'at nankoh lhests'ai hiye dzuh nutedeh, skwunlai 'o 'at nanah hudedowh, 'i be dezbuñ, 'en hube 'ilhunuh lizas sghu nininya 'ink'ez sulh yailhtuk. Njan ndúsulhni, "Anih ndun sheepyaz bu'at tele, 'en búnyuntelhtun." ¹⁰ 'Et Ndoni be dzulh ye doh hadet'ai whuz whe salhti. 'Ink'ez keyah whuti Jerusalem 'aw whulubeshi hoolah, yak'uz ts'ih Yak'usda ts'un ndus de whélts'ulh, 'et whusúnelhtan. ¹¹ Yak'usda buts'un hayánduz, 'i bulh 'úhoont'ah. 'Ink'ez buts'un hayánduz 'i tseyaz dunizti, jasper hiyulhni, 'i 'uyoo tse be nduwhut'en, crystal hiyulhni, 'aw 'i bundoh whut'en. ¹² Sih dutai 'ink'ez duts'o 'ink'ez ye doh 'int'ah. Lanezi 'o 'at nankoh 'et ndati. 'Ink'ez lanezi 'o 'at nanah lizas ndati nuhadelhúya. 'Et lanezi 'o 'at nanah Israel hits'uh hainde hudedowh, 'en huboozi ndati 'uk'e'usdúguz. ¹³ Ndaz de ts'un tat ndati, 'ink'ez nyaz de ts'un tat ndati. 'Ink'ez nts'iz de ts'un tat ndati. 'Ink'ez nus de ts'un chah tat ndati. ¹⁴ Nyoh keyah whuti sih whunasa'a, 'i lanezi 'o 'at nankoh tse lhelhts'un hudedowh buk'uwhuz'ai. 'Ink'ez lanezi 'o 'at nanah ndun sheepyaz ba whel'a huboozi hukw'une'usduguz. ¹⁵ Ndun sulh yalhtuk gold tl'ozelh ut'i, keyah whuti whudati 'ink'ez whusih chah whunduná'ootelhdzh ka. ¹⁶ Keyah whuti busih ts'iyawh lhundúwhulcho. Dáhoolyez, 'et zeh 'uwhultel. 'Ink'ez keyah whuti tl'ozelh be whunduna'oolhdzai. Dahoolyez, dahooltil, 'ink'ez nts'oh ndunaoodalhdzah nduwhulcho hoh whunduna'oolhdzai. 12,000 furlongs

'uwhulyez.* 12,000 furlongs 'uwhultel, 'ink'ez 12,000 furlongs ná'dalhzat. ¹⁷ Et sih doo chah whunduna'oolhdzai. 'I, 144 cubits huyulhní.† Dune whunduna'oolhdzih, whuz na'a lizas whunduna'oolhdzai. ¹⁸ Ink'ez sih jasper hiyulhní, tse 'i be' hoolya. 'Ink'ez nyoh keyah whuti soo dadint'az bukiúnt'en ndunt'ah, 'i soo gold gaih zeh keyah whuti be' hoolya 'uhoont'ah. ¹⁹ Ink'ez nyoh keyah sih whunasa'a, 'i but'ah soo ts'iyaantsuk tseyaz dunezti, 'i be nyoh keyah whusih whunasa'a buk'uwhuz'ai, 'i be buk'ut nodelhútsi. 'Udechoo tse whutl'ah dez'ai, 'i jasper 'int'ah. Bulh nankoh tse, 'i sappire hiyulhní, 'i 'int'ah. Bulh tak'i tse, 'i chalcedony hiyúlhni. Bulh dink'i tse, 'i emerald 'int'ah. ²⁰ Bulh skwúnla tse, 'i sardonyx hiyúlhni. Bulh lhk'utak'i tse, 'i sardius hiyúlhni. Bulh skwunlat 'o 'at nankoh tse, 'i chrysoliti hiyúlhni. Bulh lhk'udink'i tse, 'i beryl hiyúlhni. Bulh lhuk'i hoolah lanezi tse, 'i topaz hiyulhní. Bulh lanezi tse, 'i chrysoprase hiyulhní. Bulh lanezi 'o 'at lhuk'i tse, 'i jacinth hiyulhní. 'Ink'ez bulh lanezi 'o 'at nankoh tse, 'i amethyst hiyúlhni. ²¹ Ink'ez lanezi 'o 'at nankoh ndati, 'i lanezi 'o 'at nankoh kw'usul dunézti 'int'ah, pearl hiyulhní, 'et 'ilho kw'usul dunezti cho, 'i 'ilho ndati unli. 'Ink'ez buti keyah whuti nówruz'a, soo windah k'una'a bukiúnt'en, soo gold gaih zeh 'uhoont'ah.

Keyah Jerusalem k'ahoondit, 'i Yak'usda buts'un hayánduz be whét'en tele

²² Et whunts'ih 'aw luglez whucho chawhús'il. NeMoodihti Yak'usda degha nus ulhtus, 'ink'ez busheepyaz bulh nyoh keyah whuluglez hinli 'et huwa. ²³ Aw 'ulh'ek ooza 'ink'ez sa chah 'aw nyoh keyah buka cha'whunízun Yak'usda buts'un hayánduz, 'i be whét'en. 'Ink'ez ndun sheeypyaz 'en hubuniz be whét'en. ²⁴ Ndunnah 'udun yun k'ut whut'en hubutah hudujih, 'en hiniz nutedulh. 'Ink'ez ndi yun k'ut hubidayi cho hiyé dézti 'ink'ez hiyé ncha, 'i hedich'oh hubidayi cho dahítelhtelh. ²⁵ Dzin dúwhulyez hoh whudati 'aw dá'doola ghait'ah 'aw 'ulh'ek chawhutesdle 'et huwa. ²⁶ Lhelhts'un hudedowh hiyé dézti 'ink'ez hiyé úncha, 'i dahítelhtelh. ²⁷ Et whunts'ih hoonliyaz dutsun 'et daóolts'it għait'ah. K'us ndan huba' whuninzun tune' 'ut'en, 'ink'ez whuts'it chah, 'aw dahóodelh għait'ah. Ndunnah ndun sheeypyaz ts'ukhuna be' dustl'us k'ut 'uk'une'úsduguz, 'en zeh huba' hoont'ah 'et huwa.

22

Ndi 'ukoh bugha ts'úkhuna

¹ 'Ink'ez 'ukoh soo too unzoo, bugha ts'ukhuna, 'i soo unzoo k'et ndulhcho hoh whét'en, 'et whusúnelhtan. Yak'usda 'ink'ez ndun sheeypyaz bukw'usúda cho dézti, 'i 'ukoh buts'un hayánli. ² Ti soo whuniz hoh whúya lhusúli. 'Ukoh lhch'az ts'ih taba 'et duchun bugha ts'ukhuna nanúdez'a. 'I lanezi 'o 'at nankoh bumai yinli. Ilho duchun 'i sanun totsuk bumai whulhlhīh. 'Ink'ez duchun but'an 'i lhelhdun yun k'ut whut'en hiye naóojeh ka 'int'ah. ³ Aw ndai Yak'usda yuk'e hanya, 'i hootélah. 'Et k'us Yak'usda 'ink'ez ndun sheeypyaz bukw'usúda cho dézti, 'et te'ahl. 'Ink'ez be 'ulhna hinat né'tet'en 'ink'ez hiba ne'hutet'en hoh hits'u teni' untilhdzun. ⁴ Hinen hiyuntelh'ilh, 'ink'ez boozibunintak hukw'e dute'alh. ⁵ 'Et 'ulh'ek chah hootélah. 'Aw be whét'en, 'i k'us sa be whét'en, 'i chah hi'et 'utet'ilh. NeMoodihti Yak'usda buts'un hayánduz, 'i buniz 'uwhutét'ilh 'et huwa. 'Ink'ez 'ilhuz 'ink'ez 'ilhuz wheni hiyulh dutéti.

'Aw 'et neba nilhdu kw suli

⁶ 'Ink'ez lizas 'usúlhni, "Ndi khunek but'aníwhunentan 'ink'ez ts'ah'un 'int'ah." 'Ink'ez ndunnah buMoodihti Yak'usda be nus whunilh'en,

* 21:16 'I 1,500 miles 'uwhulyez. † 21:17 'I 216 feet bat'en.

daóotenilh, 'aw 'et nilhdukw suli. 'Et huwa, dude 'ulhna but'eoonoolhdzeh ka bulizas buts'ú wheyalh'a. ⁷ "Soo zélhts'ai, nilhdukw whusatésyalh. Ndi dustl'us 'i k'ut khunek be nus whét'en, 'i ndunnah hiyoontun t'eh, tube degha nus hoonzoo hubugha whútels'ulh." ⁸ Ink'ez si, John, ndoh hoh whunah'l'en 'ink'ez whudáts'o hoh lizas whusúnelhtan, 'et huwa 'en bubut nachánisno buts'un teni' untesdzilh ka. ⁹ 'Et 'usúlhni, "Et ndint'en ilah! Nyulh 'ulhna usdli hoh 'ust'ah. 'Ink'ez nyulhutsinkah nus whunilh'en, 'ink'ez ndunnah ndi dustl'us bughunek óontun, 'en chah hubulh 'ulhna usdli hoh 'ust'ah. Yak'usda, 'aw 'en zeh ts'un teni' nilhdzun!" ¹⁰ Ink'ez 'usulhni, "Ndi dustl'us nus whunilh'en, 'i khunek budána'dolhdzeh gunih! 'Aw 'et nilhdukw suli 'et huwa. ¹¹ Ndan ts'ah'un cha'it'ah, whute 'et zeh ndót'e. Ndan dutsun, whute 'et zeh ndót'e. Ink'ez ndan ts'ah'un 'int'ah, 'et zeh ndót'e. Ndan Yak'usda ba 'udun nibuninla, 'et zeh ndót'e," ni lizas.

Sizi 'utni, "Ts'iyanah hube 'ut'en bugha huba 'uk'elha yutelhtsilh, i núsdle."

¹² "Whunilh'en, 'aw 'et nilhdukw whusanátesdalh 'ink'ez ts'iyanah hube 'ut'en bugha whuz na'a huba 'uk'elha yutelhtsilh, 'i núsdle. ¹³ Si 'ust'ah Alpha 'ink'ez Omega usdli. 'Udechoo whe' whudit'en 'ink'ez 'ustl'e' 'uwhuténih, 'en 'ust'ah. 'Udetsuh 'ink'ez 'udék'elh'az 'ust'ah." ¹⁴ Ndunnah yughunek k'une' 'ut'en, 'en degha nus hoonzoo hubugha whútels'ulh. Ndi duchun bughá khútina, 'i 'ink'ez njan keyah whuti whudati dahútedulh, 'et 'en zeh bughá whunt'ai ho' hoont'ah. ¹⁵ 'Et whunts'ih njan keyah whuti ye 'az ts'ih, 'et lhikah hiyulh ndult'ah, huduyun, dune k'us ts'ekoo bulh tínta' hut'ih, nehughan, 'uk'edéltsi ts'un tenahududli, 'ink'ez ndunnah huhóont'i hoh huwhuts'it chah, 'en ts'iyawh yoo 'az ts'ih 'uhint'ah. ¹⁶ "Si, Sizi sulizas nuhwheni Yak'usda ba 'ilhunahuwúdulh, 'en nuhts'ú whéh'a. Ndi khunek Yak'usda ba 'ilhunahuwúdulh, 'en hubudóohni ka David hits'uh haínde, 'en buts'uh haizut hoh 'ust'ah. Bundada sum tube be hóodet'en, 'i li'ust'ah!" ni Sizi. ¹⁷ 'Et Ndoni 'ink'ez Sizi bughu tedalh bulh, "Anih!" hutni. 'Ink'ez ndan whudits'o, 'en chah, "Anih!" hudooni. Ndan ta'óosde chah dez tóoya 'ink'ez ndi be ts'úkhuna whutoo, ndet hukwa' ninzun totsuk, hiyootnai.

Ts'iyanah bugha 'utni

¹⁸ Ndi dustl'us be nus whét'en, 'i be dustl'us dits'o, huwahlí nuhwhudúsni. Ndunnah dich'oh khunek 'uyoo chah inla, ndi dune ye dzuh nuzut ndi dustl'us k'ut bughá 'uk'une'úsduguz, 'i 'o 'un chah ndi dune ye dzuh nuzut, 'i Yak'usda bughá óote'alh wule. ¹⁹ 'Ink'ez ndi dustl'us be nus whét'en, 'i ndunnah whulutah 'i khunek 'uk'una'itézguz, ndi be ts'úkhuna be dustl'us, njan keyah whuti whulubeshi bughu hoolah chah, 'ink'ez ndi duchun be ts'úkhuna, ndai be'ilhdzun yutele, ndi ts'iyawh Yak'usda bughu naootélchulh wule.

Khunyaz whusanátesdalh, ni Sizi

²⁰ Ndun ndi 'i nuhwhudáni, 'en 'utni, "Alha 'aw 'et nilhdukw whuz de úsyalh!" 'Et ndoh honeh! NeMoodihti Sizi, whuz na'a zeh dezínyalh! ²¹ NeMoodihti Sizi Gri ye unzoo, 'i ts'iyawh nohwhulh 'óot'e. 'Et ndoh honeh.